

清
實
錄

高宗純皇帝實錄(一〇)
卷七二六至卷八二五
乾隆三十年至三十三年

清實錄

第一八冊

中華書局影印

清 實 錄

(第 一八 冊)

高 宗 實 錄 (一〇)

*

中 華 書 局 出 版

(北京王府井大街 36 號)

北京市中國書店發行

中國建築工業出版社印刷廠印刷

*

787×1092 毫米 1/16 · 76 3/8 印張

1986 年 3 月第 1 版 1986 年 3 月北京第 1 次印刷

印數 0,001——1,500 冊

統一書號: 11018 · 1355—18 定價: 57.00 元

清實錄第一八冊目錄

高宗純皇帝實錄(一〇)

卷七二六	乾隆三十年正月上	一
卷七二七	乾隆三十年正月下	九
卷七二八	乾隆三十年二月上	一七
卷七二九	乾隆三十年二月下	二五
卷七三〇	乾隆三十年閏二月上	三三
卷七三一	乾隆三十年閏二月下	四四
卷七三二	乾隆三十年三月上	五五
卷七三三	乾隆三十年三月下	六六
卷七三四	乾隆三十年四月上	八〇
卷七三五	乾隆三十年四月下	九〇
卷七三六	乾隆三十年五月上	九九
卷七三七	乾隆三十年五月下	一一
卷七三八	乾隆三十年六月上	一二六
卷七三九	乾隆三十年六月下	一三六
卷七四〇	乾隆三十年七月上	一四七
卷七四一	乾隆三十年七月下	一五六
卷七四二	乾隆三十年八月上	一六五
卷七四三	乾隆三十年八月下	一七四
卷七四四	乾隆三十年九月上	一八四
卷七四五	乾隆三十年九月下	一九四
卷七四六	乾隆三十年十月上	二〇六
卷七四七	乾隆三十年十月下	二一六
卷七四八	乾隆三十年十一月上	二二七
卷七四九	乾隆三十年十一月下	二四二
卷七五〇	乾隆三十年十二月上	二五三
卷七五一	乾隆三十年十二月下	二六一
卷七五二	乾隆三十一年正月上	二七二
卷七五三	乾隆三十一年正月下	二八一
卷七五四	乾隆三十一年二月上	二九四
卷七五五	乾隆三十一年二月下	三〇八
卷七五六	乾隆三十一年三月上	三二四
卷七五七	乾隆三十一年三月下	三三三
卷七五八	乾隆三十一年四月上	三四七
卷七五九	乾隆三十一年四月下	三五四

卷七六〇	乾隆三十一年五月上	三六三
卷七六一	乾隆三十一年五月下	三七〇
卷七六二	乾隆三十一年六月上	三七六
卷七六三	乾隆三十一年六月下	三八二
卷七六四	乾隆三十一年七月上	三八九
卷七六五	乾隆三十一年七月下	三九八
卷七六六	乾隆三十一年八月上	四〇九
卷七六七	乾隆三十一年八月下	四一七
卷七六八	乾隆三十一年九月上	四二六
卷七六九	乾隆三十一年九月下	四三七
卷七七〇	乾隆三十一年十月上	四四九
卷七七一	乾隆三十一年十月下	四六一
卷七七二	乾隆三十一年十一月上	四七四
卷七七三	乾隆三十一年十一月下	四八五
卷七七四	乾隆三十一年十二月上	四九四
卷七七五	乾隆三十一年十二月下	五〇二
卷七七六	乾隆三十二年正月上	五一八
卷七七七	乾隆三十二年正月下	五二六
卷七七八	乾隆三十二年二月上	五四五
卷七七九	乾隆三十二年二月下	五六二
卷七八〇	乾隆三十二年三月上	五七四
卷七八一	乾隆三十二年三月下	五九二
卷七八二	乾隆三十二年四月上	六一〇
卷七八三	乾隆三十二年四月下	六二三
卷七八四	乾隆三十二年五月上	六三六
卷七八五	乾隆三十二年五月下	六五四
卷七八六	乾隆三十二年六月上	六六四
卷七八七	乾隆三十二年六月下	六七二
卷七八八	乾隆三十二年七月上	六八三
卷七八九	乾隆三十二年七月下	六九二
卷七九〇	乾隆三十二年閏七月上	六九七
卷七九一	乾隆三十二年閏七月下	七〇四
卷七九二	乾隆三十二年八月上	七一二
卷七九三	乾隆三十二年八月下	七一九
卷七九四	乾隆三十二年九月上	七二九
卷七九五	乾隆三十二年九月下	七三六
卷七九六	乾隆三十二年十月上	七四四
卷七九七	乾隆三十二年十月下	七五六

卷七九八	乾隆三十二年十一月上	七六五	卷八一七	乾隆三十三年八月下	一〇六七
卷七九九	乾隆三十二年十一月下	七七五	卷八一八	乾隆三十三年九月上	一〇八八
卷八〇〇	乾隆三十二年十二月上	七八七	卷八一九	乾隆三十三年九月下	一〇九五
卷八〇一	乾隆三十二年十二月下	七九七	卷八二〇	乾隆三十三年十月上	一一三三
卷八〇二	乾隆三十三年正月上	八一〇	卷八二一	乾隆三十三年十月下	一一三九
卷八〇三	乾隆三十三年正月下	八二六	卷八二二	乾隆三十三年十一月上	一二五六
卷八〇四	乾隆三十三年二月上	八四五	卷八二三	乾隆三十三年十一月下	一二七〇
卷八〇五	乾隆三十三年二月下	八六八	卷八二四	乾隆三十三年十二月上	一二八五
卷八〇六	乾隆三十三年三月上	八九〇	卷八二五	乾隆三十三年十二月下	一二〇二
卷八〇七	乾隆三十三年三月下	九〇一			
卷八〇八	乾隆三十三年四月上	九一一			
卷八〇九	乾隆三十三年四月下	九二七			
卷八一〇	乾隆三十三年五月上	九四四			
卷八一一	乾隆三十三年五月下	九五八			
卷八一二	乾隆三十三年六月上	九六八			
卷八一三	乾隆三十三年六月下	九七八			
卷八一四	乾隆三十三年七月上	九九五			
卷八一五	乾隆三十三年七月下	一〇一七			
卷八一六	乾隆三十三年八月上	一〇五〇			

大清高宗法天隆運至誠先覺體元立極敷文奮武孝慈神聖純皇帝實錄卷之七百二十六

監修總裁官經筵講官太子太傅文淵閣大學士文淵閣領侍衛內大臣稽察欽奉 上諭事件處管理

吏部理藩院事務內閣學士著滿洲部統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領侍衛內大臣稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲副都統軍功紀錄六次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆三十年乙酉春正月丁未朔

上詣

奉先殿行禮○詣

堂子行禮○率王以下文武大臣詣

壽康宮慶賀

皇太后禮成御太和殿受朝作樂宣表如儀○

詣

大高殿

壽皇殿行禮○遣官祭

太廟後殿○御乾清宮賜宗室王公等宴○戊

申

上詣

皇太后宮問安○諭今春朕恭奉

皇太后安輿四巡江浙東南黎庶望幸情殷宜

布渥恩用光盛典前此三經臨幸恩旨疊頒

所有江南省積欠地丁等項蠲免至二百餘

萬兩維時地方大吏率多遵循舊例例所應

蠲者不論災熟積欠並予豁免而於因災緩

帶之項其中有例不准蠲者轉未獲一體邀

恩於情理未為允協因思成熟地畝當年出

產本豐自不難踴躍輸將年清年款其陳積

未完者實不免豫覲恩膏有心觀望若因災

停緩之糧勢由歲歉不齊致滋逋負初非玩

戶抗延之比今翠華所過慶典聿修而此等

侵薄窮黎未蒙濫澤朕心深為軫念著加恩

將江蘇安徽乾隆二十五年以前節年因災

未完蠲剩河驛俸工等款並二十六七八三

年因災未完地丁河驛等款以及二十八年

以前節年因災未完漕項。暨因災出借籽種口糧。民借備築隄堰等銀一百四十三萬餘兩。又籽種口糧內米麥豆穀十一萬三千餘石。概予蠲免。至浙江一省額賦本較江南為少。其積欠亦屬無多。著將乾隆二十六、七、八三年因災未完地丁銀兩。並二十七年屯餉沙地公租二十六、七兩年未完漕項等銀十三萬二千五百餘兩。又二十八年借給籽本穀一萬三千七百餘石。加恩悉行蠲免。以均

惠恤。該督撫等其董率所屬實力詳查妥協。副朕嘉予元元至意。倘有不肖胥吏從中舞弊。影射侵漁。察出即與嚴叅。從重治罪。該部遵諭速行。○又諭去歲甘省夏秋偶被偏災。各州縣業經降旨。令該督等加意撫綏。照例給賑。並蠲免本年額賦以示優卹。但念該處地土瘠薄。當此青黃不接之時。例賑將停。麥秋未逮。小民口食恐尚不免拮据。著加恩將災重之皋蘭。金縣。渭源。靖遠。紅水縣。丞。沙泥

州判。鹽茶廳。山丹。東樂縣丞。平涼。隴西。通渭。會寧。安定等十四廳縣。無論極次貧民。概行展賑兩個月。稍重之漳縣。固原。張掖。武威。鎮番。平番。古浪。永昌。西寧。中衛。靜寧。隆德。莊浪。靈州。花馬池州同等十五州縣。無論極次貧民。概行展賑一個月。該督其董率屬員實心查辦。毋令胥吏侵蝕中飽。務俾貧民均霑實惠。以副朕軫念邊氓之至意。該部遵諭速行。○已酉。諭上年湖北黃梅等各州縣偶被水

災。已經疊降諭旨。加恩賑卹。撫綏。嗣據該督撫等奏報。被水之區。補種收成。均有六、七、八分不等。民情已為寧帖。第念藉賑貧民。向資官廩。入春東作方興。正在青黃不接。若驟行按例停止。未免餬口維艱。深為軫念。著再加恩。將被災較重之文泉。監利。黃梅。三縣。及毗連之廣濟一縣。無論極次貧民。俱展賑一個月。並酌借籽種。以資耕作。其沔陽。漢川。漢陽。三州縣。及勘不成災之江夏。武昌。咸寧。嘉魚。

蒲圻興國大冶黃陂黃岡蘄水黃安蘄州石首等十三州縣收成完屬稍歉亦著該地方官酌借常社等倉穀石接濟口糧籽種俾得盡力南畝以待麥秋該督撫等董率屬員實心經理務使小民均霑濫澤副朕加惠元元至意該部遵諭速行○庚戌

上奉

皇太后幸重華宮侍宴○大學士管陝甘總督楊應琚奏巴里坤牧廠前經奏准將安西涼

州肅州等處撥剩馬解往孳生現屆三年按部定額數有贏無絀惟烏嚕木齊現存多係驕馬應俟雅爾駐兵時貿易撥解孳生生息既蓄遇營馬倒斃在五年限外者即以孳生馬抵補無庸動項未滿五年應按日月分賠者亦以厰馬補給令其交價充公報聞○辛亥

上詣

皇太后宮問安○諭向來選拔貢生定例惟府

學准選二名州學縣學均係額取一名其江蘇安徽二省有分設各縣仍統於新舊兩學中彙拔一人貢入成均肄業茲當翠華臨幸正值選拔之年因念分設各邑版籍既繁膠庠亦盛僅令兩學拔取一人懷才者或不免拘於常格何以昭鼓勵而廣甄陶著加恩將江蘇安徽二省所有分設各縣准於本年選拔時每學各取一人俾得均霑惠澤該學政其悉心秉公遴選務取文行兼優之士用副

廣勵學宮至意○壬子享

太廟遣裕親王廣祿恭代行禮○遣官祭

太歲之神○

上御紫光閣賜蒙古王公台吉及回部郡王等宴○諭朕恭奉

皇太后鑾輿巡幸江浙於十六日啟鑾著誠親王和親王大學士劉統勳尚書阿桂留京辦事其月選之文員內通判州縣等官武員內八旗護軍校驍騎校及外省送到之補放水

手驍騎校等官弁。並年滿千總。俱著王大臣照從前之例驗看。可傳諭該部知之。○諭軍機大臣等。尹繼善奏。江蘇應修城工。需費甚多。所有賞卹兵丁生息銀兩一項。前經奏准俟裁扣完日。撤回司庫。現在各處裁汰兵丁。將次完竣。請將此項生息銀兩。暫行照舊行運。以濟修城工用等語。所辦甚好。已降旨如所議行矣。直隸裁汰兵丁。曾否如數完竣。所有賞卹之費。已有裁扣名糧。足敷支給。此項

滋生銀兩。是否照舊營運。抑或撤回司庫。直屬應修城垣。亦復不少。若倣照江蘇之例。仍行生息。協濟城工。甚為有益。著傳諭方觀承。將前項生息銀兩。現在作何辦理。及如何籌畫。以濟城工之處。一併詳悉查明具奏。尹繼善摺。並鈔寄閱看。○以刑部尚書舒赫德署步軍統領。○癸丑。

世祖章皇帝忌辰。遣官祭孝陵。○

上詣奉先殿。

壽皇殿行禮。○諭曰。莊有恭著以刑部尚書協辦大學士。仍暫留江蘇巡撫之任。莊有恭未到以前。所有刑部尚書事務。著大學士劉統勳兼管。于敏中著補授戶部尚書。其戶部侍郎員缺。著裘曰修補授。仍兼署倉場侍郎。吏部侍郎事務。著程景伊署理。○又諭曰。明德著調補江蘇巡撫。所遺陝西巡撫員缺。著和其衷調補。彰寶著補授山西巡撫。彰寶未到任之前。巡撫印務。著布政使文綬護理。其江寧布政使員缺。著永泰調補。貴州布政使員缺。著恒光調補。所遺員缺。著喬光烈補授。○諭軍機大臣等。江蘇巡撫員缺。已降旨令明德調補。陝西巡撫員缺。令和其衷調補。彰寶令補授山西巡撫。彰寶未到任以前。山西巡撫印務。已令文綬暫行護理。可傳諭和其衷即束裝赴新任。明德俟和其衷到任。亦即束

裝起程。於朕臨幸蘇州時。就近陛見。接辦江蘇巡撫事務。彰寶候南巡迴蹕時請訓。再赴新任。○甲寅。召大學士及內廷翰林等茶宴。以雪象聯句。○諭軍機大臣等。步軍統領衙門奏。據尚書陳宏謀。送交二保控原任武威縣知縣永寧。前自任所。馱回銀十餘萬兩。開設當舖一節。隨令軍機大臣會同陳宏謀查審。因思永寧係布蘭泰之子。永貴之弟。布蘭泰曾為巡撫提督。永貴又經身任巡撫。伊家現在貲財亦非必不應有之物。且永寧不過一縣令。分例所得。即極為撙節。亦何至積有十餘萬兩之多。至其辦理軍需。正當黃廷桂為總督之時。稽查不可謂不嚴。亦安得聽其恣意侵蝕。是二保所控情節。原意其必無是事。今據軍機大臣等審訊。則二保全不能指出實據。顯係計圖陷害。然即治以誣告之罪。不足以服其心。著傳諭楊應璠將永寧前在武威任所。承辦軍需。其經手錢糧。有無侵蝕。

虧空。及得贓受賄情弊。秉公詳確查明據實覆奏。原摺並鈔寄閱看。尋奏永寧係二十一年到任。值連年辦理軍需。間因車輛不敷添雇騾頭運送。實無馱銀十餘萬兩。潛運往京之事。其任內經手軍需。并地方錢糧。俱經接任知縣接收結報咨部報聞。○軍機大臣等議奏。吉林將軍恒祿等奏稱。吉林八旗佐領四十八員。內錫伯世管佐領一。喀爾喀巴爾虎佐領七。舊例瓜勒察等。陞階不過驍騎校。喀爾喀巴爾虎等。不過佐領。嗣瓜勒察等移駐盛京。因當差奮勉。加恩不拘舊例陞用。今巴爾虎等差使亦勤。請一體破格賞給陞途。再吉林等處員弁。應各隨地勢酌調。請將錫伯巴爾虎佐領俱作為蒙古佐領。其打牲烏拉協領二員。裁一員作為吉林蒙古協領。蒙古協領缺出。於錫伯巴爾虎蒙古瓜勒察佐領內揀補。吉林滿洲協領缺出。將此項蒙古協領調補。至八旗佐領四十員。鑲黃旗六。正

白旗四。應撥勻。令每旗各五員。又寧古塔現設員弁。不敷差防。請將打牲烏拉防禦八員。酌留四員。餘四員。調赴寧古塔。均應如所請。從之。○乙卯。

上詣

大高殿行禮。○詣

皇太后宮問安。○丙辰。諭軍機大臣等。此次南巡。衍聖公孔昭煥。尚書嵇璜。俱現在制中。不必前來接駕。如伊等尚未起程。該督尹繼善

該撫崔應階。可傳諭停止。如業已在途。亦即令其回籍。○丁巳。諭前經降旨。八旗三品以上大臣子弟。果有嫻熟國語。練習弓馬者。遇考試之期。該父兄自行奏明。准其入闈。原因八旗淳樸素風。近來未免沾染虛浮。艷心詭遇。且從而釣弋其名。淵藪其弊。是以示之節制。俾知崇實黜華。非概從禁制。遏其進取之途也。乃邇年來。八旗大臣。竟無奏請子弟應試者。未免多生顧慮。因噎廢食。伊等既不潛

心力學。而於國語騎射。又未見專攻嫻習。頓覺出色。自不如兼收並進。猶可為造就之資也。我國家滿洲世臣。宣力贊政者多。原不藉文章一途。但承平百餘年。滿洲詞臣。文藻猷飾。亦不可少。大臣子弟中。果能於國語騎射之外。兼習文藝。在伊等延請師資。擴充聞見。較之寒素之家。成材自易。嗣後所有八旗大臣子弟。仍准一體考試。無庸奏明請旨。倘伊等仍不以實學就考。如前懷挾。或進身之後。仍蹈虛浮陋習。託名斯文。無裨實用。朕又何難隨時懲治。俾知所儆惕乎。可將此通諭知之。○戊午。諭軍機大臣等。今日新選柳州府知府何朝福。請訓。召見詢問事宜。應對殊不明晰。該員前在江西安仁縣任內。祇一年有餘。即行捐陞知府。於居官臨民之道。大概未必熟諳。看來不過一捐貲富戶。不甚了事之人耳。雖柳州尚非繁劇。但知府有表率之責。若庸闇無能。亦難勝任。著傳諭馮鈐。令其留

心察看。如果不能稱職。即行據實具奏。勿致貽誤地方。○是日起。

上以祈穀於

上帝。齋戒三日。○已未。諭戶部議覆黑龍江將軍富僧阿奏。索倫進貢貂皮。毋庸自行呈送。並停鄂倫春等賞賚一摺。雖屬簡便。但向來索倫進貢貂皮。不特及等者。例有賞賚。即不及等者。朕亦加恩減半給賞。以示體卹。歷有年所。今若停其賞賚。則伊等無由霑受朕恩。殊非嘉惠遠來之意。嗣後著仍照舊例行。○庚申。

上詣

南郊齋宮齋宿。○是日。立春。順天府進土牛春山寶座。○諭。昨楊錫紱奏摺內。御史德成列名在總漕之前。朕以為外省奏事。舊例如此。今日李宏奏摺。則巡漕給事中溫如玉。又列名於總河之後。可見向來原無成例。不過該督等意存謙牧。則讓御史居前。而奉差人員。

自以為皇華出使者。遂儼然署銜其上。耳科道等官。果奉特旨欽差。查辦事件者。遇有會銜具奏之事。自應以奉差專辦之員居首。若南北漕差。每年一派。雖屬軺車直指。亦幾與定額設官無異。督撫為國家封疆大臣。不當轉列於臺臣之後。即如臺灣巡察。亦有欽命巡方之責。而其奏事列銜。又豈得遂先閩浙督撫乎。此雖章奏中小節。朕亦不肯輕忽。必須明白指示。定以程式。俾皆知所遵循。以昭畫一。嗣後三品以下。奉差外省。非特旨有欽差字樣者。概不准在督撫前列名。該部可通行傳諭知之。○辛酉。祈穀於

上帝。

上親詣行禮。○詣

皇太后宮問安。○御箭亭。賜朝正外藩等宴。召科爾沁和碩親王固倫額駙色布騰巴勒珠爾。和碩達爾漢親王多羅額駙色旺諾爾布。多羅扎薩克圖郡王納旺色布騰。固山貝子

多羅額駙班珠爾。喀喇沁多羅都統郡王喇
特納錫第。固山貝子多羅額駙扎拉豐阿。鎮
國公丹津達爾扎。烏珠穆沁多羅額爾德尼
貝勒達什衮布。鄂爾多斯多羅貝勒棟多布
扎木素。喀爾喀和碩親王諾爾布扎布。多羅
郡王車木楚克扎布。厄魯特多羅郡王多羅
額駙羅布藏多爾濟。吐魯番多羅郡王額敏
和卓。回子郡王品級多羅貝勒霍集斯。輔國
公圖爾都阿。巴哈納爾多羅貝勒達什敏珠
爾等。至御座前。賜酒成禮。

大清高宗法天隆運至誠先覺體元立極敷文
奮武孝慈神聖純皇帝實錄卷之七百二十六

大清高宗法天隆運至誠先覺體元立極敷文奮武孝慈神聖純皇帝實錄卷之七百二十七

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆三十年乙酉正月壬戌

上奉

皇太后南巡車駕發京師○詣

皇太后行宮問安○是日駐蹕黃新莊行宮○

癸亥

上詣

皇太后行宮問安○諭朕此次巡幸江浙所有

經過直隸山東地方本年應徵地丁錢糧俱

著加恩蠲免十分之三該督撫等務董率屬

員實力奉行俾小民均霑實惠副朕愛養黎

元之至意○又諭朕翠華南幸經過直隸山

東三省辦差文武各官住俸罰俸降級之案

俱著加恩准其開復如無此等參罰案件者

各加一級○伊犁將軍明瑞等奏官兵移駐

雅爾綽克托先領滿洲索倫兵起程訥蘇肯

領滿洲綠旗兵護送糧餉農器等項臣等領

索倫兵六百名起程於中途合隊綽克托總

統前行沿途驅逐越界游牧之哈薩克並派

散秩大臣碩通及侍衛官員領滿洲索倫察

哈爾厄魯特等官兵五百餘名令愛隆阿統

領越阿勒坦額默勒巡察勒布什招摩多一

帶俟至雅爾時將前勘定之額敏河沿巴爾

楚克沁達蘭三處安設大卡座其沁達蘭與

博囉塔拉相接卡座亦酌量安設報聞○是

日駐蹕涿州行宮○甲子

上詣

皇太后行宮問安○賜扈從王公大臣及回部

郡王等並直隸大小官員等食○諭朕恭奉

皇太后安輿巡幸江浙鑾輿所莅宜廣

慈仁以昭盛典。所有經過直隸山東二省之老民老婦著照從前恩詔之例賞賚。用示優老引年之意。○又諭直隸連歲收成豐稔。民間蓋藏自應充裕。但從前因災未完積欠。新舊並徵。尚恐艱於完納。茲當鑾輿南巡。道經畿輔。體察民隱。用沛恩膏。以廣慶澤。著加恩將直隸各屬自乾隆十九年至二十五年舊欠。並二十六年未完緩徵銀共三萬二千四百

餘兩米穀。共三百五十餘石。一體豁免。該督其實力稽察。妥協辦理。俾閭閻均霑實惠。稱朕疊沛渥恩至意。該部即遵諭行。○是日駐蹕紫泉行宮。○乙丑。

上詣

皇太后行宮問安。○諭此次南巡所過直隸山東二省。派出辦差兵丁。著加恩賞給兩月錢糧。○又諭昨伊犁圖來京召見。清語較前生疎。大員乃管轄官兵之人。矧駐劄伊犁。不但

清語當熟練。即蒙古語亦宜留心。乃伊犁圖清語轉不如前。想來伊犁大員皆說漢語。全不以清語為事。夫清語乃滿洲根本。即不會蒙古語。豈可不會清語。且現在陸續攜眷駐劄伊犁者多。尤當以嫻習技勇清語為要。明瑞係彼處將軍嗣後大員回事接談之際。務禁止漢話演習清語。經朕訓諭後。倘由伊犁來之大臣等。仍前清語生疎。惟明瑞是問。○是日駐蹕趙北口行宮。○丙寅。

上詣

皇太后行宮問安。○諭朕因巡幸江浙前經降旨。於江浙二省冬兌漕糧內各截留十萬石。豫備臨時平糶之用。此項減歇漕船向例止給一半月糧。於該丁等生計未免拮据。著加恩於應給月糧之外再賞給十分之二。○又諭曰。總管內務府大臣兼奉宸苑卿四格所管之處甚多。其奉宸苑卿之缺。施恩著吉慶補授。並同德保和爾精額管理萬壽山事務。

○是日駐蹕思賢村行宮。○丁卯

上詣

皇太后行宮問安。○諭曰。明德奏據潼商道屠用中稟稱。在朝邑縣地方。盤獲外來之江西僧人。形跡可疑。交該縣知縣典史。查拏究訊。詢係胡中藻之次子胡得玉等語。胡得玉係逆犯之子。久經隱匿脫逃。該道屠用中能留心查緝。甚屬可嘉。著交部議敘。知縣湯尚箴。典史劉宏武。能實力盤究。不致漏網。亦屬能事。俱著該部行文。調取來京引見。○是日駐蹕太平莊行宮。○戊辰

上詣

皇太后行宮問安。○是日駐蹕紅杏園行宮。○己巳

上詣

皇太后行宮問安。○諭。朕恭奉

皇太后安輿。省方問俗。凡清蹕所經。祇令灑掃潔淨。毋事華飾。及添建行宮。屢經降旨申諭。

而地方大吏。以

慈駕臨駐。旃廬究不若屋宇之安善。尚有葺治行館。以供憩息者。因其義適

溫清。且成事不說是。以不復禁止。茲停蹕景州。見一切位置。頗為妥適。從前所賞公帑。尚恐不敷應用。在封疆大臣。善體朕意。雖不致派累閭閻。而各官或有捐廉經理。亦非所以示體卹。著加恩。於直隸存公項內。賞銀二萬兩。以裕工作之費。再山東亦有新建座落三處。

經畫諒與直隸相同。亦著於該省存公項內。賞給二萬兩充用。該部即遵諭行。○又諭曰。英廉現隨行在。有交辦事件。所有戶部事務。著舒赫德暫行兼管。○諭軍機大臣等。輔德奏臬司廖瑛。委查素章阿案內。護道丁亭。私扣銀兩一節。並未推究確情。止圖率結。瞻徇顯然等語。廖瑛身任臬司。承審事件。理應悉心查辦。乃兩次會臬。不實不盡。自應予以處分。以示懲儆。已如該撫所奏。交部嚴加議處。

矣。至請將張逢堯等一併交議。則未免過於張大其事。素章阿貪縱不法。罪無可逭。然亦按律繩治足矣。若因一人之不職。而司道大員。概呈吏議。既於政體未協。且恐無識之徒。妄疑案外苛求。亦不足以昭平允。因將原摺刪節交部。前因輔德與素章阿。同係滿洲。恐其或瞻徇情面。是以批令秉公辦理。原為防其流弊。今輔德錯會前旨。有意從嚴。則失之過當。朕辦理庶政。鑑空衡平。從不肯稍存畸

輕畸重之見。輔德豈尚未之知耶。又另摺稱藩司張逢堯才識不足。且入冬以來耳稍重聽。事每健忘。未能擔荷重任等語。現在廖瑛已交部議處。即降調朕亦不稍為姑容。若張逢堯復以衰病去官。藩臬兩司同時更易。辦事亦殊費周章。且張逢堯暫時重聽。交春後或能向愈。亦未可定。此時不妨稍待。俟部議廖瑛一案降旨後。新授臬司有人。彼時再行酌量請旨。可傳諭輔德知之。○是日駐蹕絳

河行宮。○庚午。

上詣

皇太后行宮問安。○諭朕清蹕時巡。道經山左。昨已特沛恩膏。降旨將所過地方。本年額賦蠲免十分之三。東省連歲豐稔。民氣恬熙。朕攬轡所觀。深為欣慰。但念該省尚有積年欠項。皆係從前無力輸將所致。若按限催科。仍恐稍有拮据。著加恩將濟南武定兗州曹州東昌等府屬。乾隆二十六七兩年未完因災緩徵地丁。暨民借麥本牛具等銀六萬二千九百五十餘兩。又濟南武定兗州東昌曹州沂州等府屬。乾隆十二年至二十七年未完因災緩徵。暨民借年久常平倉穀七萬五千四百四十餘石。暨行豁免俾閭閻益資饒裕。該撫其善體朕意。率屬實力奉行。務期膏澤下施。均霑實惠。該部即遵諭行。○又諭吏部請將各部滿郎中與漢郎中一體截取銓選。知府等因一摺。所奏甚屬非是。朕臨御以

來滿洲擢用外任者頗不乏人從前雖將截取道府之例暫行停止然年來如京察保舉及記名簡錄者遇有監司方面之任未嘗屏而不用即以現在藩臬而論滿洲並不少於漢人較之康熙雍正年間滿洲外用者有增無減何轉虞壅滯耶若謂滿漢司員同屬在部辦事欲令其一體陞轉以示銓法之平尤為不揣其本而齊其末殊不思八旗人數與各省漢人孰多孰少顧於銓擢一途強為衡

量如是而謂之平允有是理乎且滿洲漢人同為國家臣僕朕用人行行政一秉大公從不肯稍存歧視吏部此奏亦全不善體朕意矣至摺中所稱漢郎中歷俸三年截取之處尚屬可行但因此而欲飾其改例希恩之跡則未免涉於取巧更為朕所不取吏部堂官著嚴行申飭摺擲還○是日駐蹕德州行宮○
辛未

上詣

皇太后行幄問安○西安將軍新柱等奏西安八旗步甲滿洲蒙古七百漢軍三百嗣因管理步甲之馬營章京等皆已出師將西安年老告退馬甲內有勞績者挑取步軍校四十管理步甲今查滿洲蒙古步甲惟餘四百為數無多且漢軍並無步軍校辦理亦未盡一請將滿洲蒙古步甲仍令馬營章京管轄不必補放步軍校但遽裁恐礙生計應俟現在四十員缺出時陸續裁汰補挑步甲四十名

從之○是日駐蹕李劉莊大營○壬申

上詣

皇太后行宮問安○諭此次接駕人員內進獻詩冊之焦汝翰薛澂林樹崑任果馮浩蔣學鏡倪存謨著各賞給大荷包一對小荷包二個○又諭請轎校尉掌車內監等著加恩賞給一月錢糧○是日駐蹕晏子祠行宮○癸酉

上詣

皇太后行幄問安。○諭從前楊橋漫口及祥符等處漫土沿河官弁所有分賠銀兩自應按限完繳。但念此項工程尚與有心疎防者有間。且或分賠數多。或係佐貳備弁微員。若一律按限催繳。恐伊等力難完措。著照阿思哈所請。將傅勒瑚訥。丁榮。孫自祥。王復興。王應宗等。各名下未完應賠銀兩。俱於現任養廉內分半坐扣。陸續完繳。○軍機大臣等議覆鑾儀衛大臣福隆安等奏稱。五城民校尉每月攢錢。私幫長當差校尉出錢。人並不當差。請嚴禁。令輪流演差。不能者革退。查民校尉共一千八百五十六名。挑備請轎送轎。長當差使者百餘名。其餘差使較少。但月給錢糧。俱不過九錢五分五釐。概令每日當差。恐妨生計。即挑出人等。不稍得幫項。亦難當差。請嗣後除頭目六十七名。並請鞏看守衙門。庫房鐘鼓樓。象房傳事。打更人一百六十一名。錢糧無庸增減外。其餘不常當差民校尉。每

名裁減二錢五分五釐。添給挑出當差人每名給錢糧二兩。攢錢私幫者禁止從之。○以內務府郎中公義為

東陵總管內務府大臣。○是日駐蹕潘村大營。

○甲戌

上詣

皇太后行宮問安。○遣官祭

東嶽。○遣官至曲阜祭

元聖周公。

先師孔子。○是日駐蹕靈巖寺行宮。○乙亥

上詣

皇太后行幄問安。○是日駐蹕小新莊大營。○

丙子。

上詣

皇太后行宮問安。○吏部奏。地方官承督未完

案件。於展參限內遇赦。例將原議處分寬免。

赦後另起初參之限。查參限有二。三。參。至四

參者。赦前或已二三參。赦後復另起初參。至

四叅遇命盜重案。議結過遲。人犯遠颺。賊證無據。徒有叅處之繁。無裨緝捕之實。請嗣後已無展叅之案。處分與赦款符者。免其議處。毋庸起限。展叅案件。各照現屆叅限。另起限期。不准概從初叅起限。從之。○以翰林院侍讀學士劉星煒。為內閣學士兼禮部侍郎。○調吏部左侍郎梁國治。提督江蘇學政。命內閣學士全魁。提督安徽學政。○是日。駐蹕四賢祠行宮。○是月。署湖廣總督湖北巡撫王

檢奏。永州鎮總兵顧鉉。叅揭把總胡玉龍。未能管束兵丁。該城門無一人看守。隨據鎮標遊擊沈菁莪。稟稱。顧鉉因胡玉龍代辦船隻不善。捏故詳革。且縱用長隨稿房書吏。總兵顧鉉遊擊沈菁莪。均請勅下督臣確訊。得旨。此正宜汝即行審理之事。况督臣迴任尚需時日。何必避嫌推諉。是汝不是矣。○大學士管陝甘總督楊應琚奏。哈密協駐防兵八百名。每年應需四本兵糧。向折本色支給。近年

屯田收成豐裕。請將三十年應需本色兵糧。酌撥小麥八百石。豌豆八百石搭支。此後遞年豐獲。更可以多估本色。減運折價。報聞。○又奏。雍正年間。西路軍需賞項下。有餘剩皮棉袍褂。暨暖帽等項。節經各提鎮分領賞給出師兵。今甘省提標尚存衣帽一百四十一件。此次西陲出力官兵。業經給賞。現在伊犁駐劄官兵。中多奮勉。且雅爾現亦移駐官兵。均需賞項。請即以此項衣帽。乘今歲涼莊第二

起官兵。移駐伊犁之便。交與護送委員分載。令將軍明瑞等酌量賞給。得旨嘉獎。○四川總督阿爾泰等奏。綽斯甲布等九土司。會攻金川。節次得勝。宜乘機鼓勵。現在賞需。雖有代銷餘茶息銀。湊集撥用。尚宜寬裕籌備。查川省惟捷為富順二縣。近年鹽井旺盛。令竈戶於額引外。將存剩餘鹽。儘數報官登冊。由鹽道發給印票代銷。計每年可徵銀萬兩。彙解道庫。貯充賞需。得旨。如所議行。○兩廣總

督李侍堯等奏廣西桂林城守營實額兵七百零二名。分防臨桂陽朔二縣水陸各汛。共兵二百七十七名。在城看守各城門堆卡及各庫監獄。共需三百七十七名。僅餘兵四十八名。護餉解犯不敷差撥。請於不分防汛地之撫標左右兩營兵內。每營酌撥六十名。按月輪流防守在城堆卡。於桂林城守營守卡各兵內。掣出一百二十二名。以備護解餉犯得旨。如所議行。○雲南巡撫常鈞奏。九龍江領兵叅將劉明智等。攻破白塔寺莽賊。乘勝奪回宣慰土城。飛報捷音。得旨。有旨諭劉藻小小之勝。何足侈言捷音。汝非未經大敵者。比何乃亦入綠旗之習。

大清高宗法天隆運至誠先覺體元立極敷文奮武孝慈神聖純皇帝實錄卷之七百二十七

大清高宗法天隆運至誠先覺體元立極敷文
奮武孝慈神聖純皇帝實錄卷之七百二十八

監修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆三十年乙酉二月丁丑朔

上詣

皇太后行幄問安。○祭

先師孔子。遣大學士劉統勳行禮。○是日。駐

蹕中水大營。○戊寅。

上詣

皇太后行宮問安。○祭

大社

大稷。遣顯親王衍潢恭代行禮。○賜扈從王公

大臣。並山東大小官員等食。○是日。駐蹕泉

林寺行宮。○己卯。

上詣

皇太后行幄問安。○刑部議覆。江西布政使張

逢堯奏稱。銅鉛私鑄各犯。請不分錢數多寡。

但鑄造已成。為首及匠人。概擬斬絞。其錢數

不及十千減等例。刑除。查私鑄定例。錢不及

十千者。免死減等發遣。概擬斬絞。情未平允。

應將該布政使所奏。毋庸議。惟此等人犯。向

發雲貴兩廣等省。該處均產銅鉛。恐萌故智。

請嗣後改發黑龍江等處。給披甲人為奴。從

之。○封回部台吉色提巴勒氏為輔國公。○

以故雲南姚州土州同高禹治子配忝襲職。

○是日。駐蹕永安莊大營。○庚辰。

上詣

皇太后行宮問安。○遣官祭黑龍潭

昭靈沛澤龍王之神。玉泉山

惠濟慈佑龍王之神。○諭軍機大臣等。明瑞

等奏稱。伊犁屯田回人所用牲隻頗多。請交

成衮扎布等。從烏里雅蘇台。購辦孳生牛一千餘隻。乘今秋草茂時解送等語。著傳諭成衮扎布等。烏里雅蘇台。如現有牛隻。即照數撥送。或有不足。則喀爾喀四部落。來年應交馬二千餘匹。著照從前改折孳生牛隻解送伊犁。併傳諭明瑞等知之。○又諭曰。明瑞等奏稱。塔爾巴哈台邊界居住之哈薩克多羅特拜。庫圖什。頗能抒誠効力。現又查出察哈爾。及回人呈獻。似應加以賞賚等語。多羅特拜著加恩賞給四品頂。孔雀翎。庫圖什。賞給六品頂。藍翎。以示鼓勵。○是日。駐蹕萬松山行宮。○辛巳。

上詣

皇太后行幄問安。○遣官祭

關帝廟。○是日。駐蹕孟家泉大營。○壬午。

上詣

皇太后行宮問安。○遣官祭昭忠祠。○諭軍機大臣等。初五日。駐蹕山東孟家泉地方。向晚

濃陰密布。霖霖宵零。至郟城尤為霑足。約計三寸有餘。沿途土膏含潤。麥壠青蔥。攬轡之餘。深用欣慰。因念直隸密邇山左。雲氣所周。雨勢自應普遍。著傳諭方觀承。將是日曾否得雨。寸分若何。即速查明奏報。以慰廑念。尋奏。正月二十六。七等日。京城一帶。得雪三寸。保定省城微雪。順義密雲。平谷。薊州。永平。宣化。遵化等屬。均得雪二三寸不等。現在麥苗露青。根土尚潤。初四五兩日。未經得雨。得旨。

邇日此間時雨霑霽。北望濃雲密佈。不知可曾被澤否。○河南巡撫阿思哈奏。前因河陰縣知縣典史二缺。裁歸滎澤。先據張淑慎等呈請免併。臣批裁汰官役。原為便民。毋得借詞虛聳。詎陳起忠等。以滎澤差繁。煽惑聚眾。斂錢抗官。閉城罷市。現經布政使佛德等。督緝各犯。獲解來省。研訊得旨。究汝失於周防耳。又批。既有此。則早當懲治警眾。豈有批迴了事之理。朕固謂汝柔懦不解事。何如。○是

日。駐蹕鄒子花園行宮。○癸未。

上詣

皇太后行幄問安。○諭朕恭奉

皇太后安輿。四巡江浙。啟鑒之前。已特頒恩旨。將該二省積年緩貸未完銀糧。全行豁免。茲當入疆伊始。宜敷愷澤。以昭盛典。所有江南。浙江。水陸經過地方。本年額賦。俱著加恩蠲免十分之三。該督撫等。其率屬實力妥辦。稱朕觀民行慶至意。該部遵諭即行。○是日。駐

蹕龍泉莊大營。○甲申。

上詣

皇太后行宮問安。○遣官祭

先醫之神。○遣官祭

河瀆

淮瀆之神。並遣官至故河道總督靳輔等合祠。拈香奠酒。○諭朕恭奉

皇太后安輿。巡幸江浙。翠華所至。愷澤覃敷。而優卹高年。推恩宜渥。著將江南。浙江。二省男

婦。年七十以上者。俱照從前恩詔之例。一體

賞給。以示恩賚。○又諭。藩臬兩司。俱有奏事之責。屢降諭旨。甚明。乃歷來藩司。不過撫拾尋常事件。以為數陳。司臬者。亦祇更請一二律例。即勅部議行。議駁。俱於實政無裨。至附奏年歲晴雨情形。又多仿照督撫所報。依樣葫蘆。而於地方緊要政務。從未見專摺入告。此豈朕委令得用。奏牘意耶。即如近日豫省河陰縣士民。因歸併滎澤。聚眾罷市一案。值

阿思哈來行在迎鑾。該省藩臬。雖亦一面具稟。一面親往。獲犯究審。但既可稟知該撫。何不可據實奏聞。巡撫因公出境。兩司同駐會城。通省之事。責在伊等。豈有遇此等重案。猶必待巡撫據稟具奏乎。雖封疆大吏。隨時陳奏。兩司固不便撓越。然使皆心存顧忌。無論事之大小。概不敢自發一言。倘督撫中。或有敗檢黷法之事。勢必將瞻徇隱忍。甘於欺朦。而不顧所關。更復不小。且藩臬為二三品大

員尤非道府等可比。今日之兩司安知不即為他日之督撫。朕所期待於伊等者甚厚。而顧可深自暴棄。負簡畀之任耶。嗣後藩臬等遇地方緊要事件。有應陳奏者。即具摺奏聞。倘仍觀望因循。及僅以空言塞責。必懲其不率以示警。若因有此旨。輒復逞私挾詐。以行其傾軋督撫之技。則是自干重戾。更難逃朕洞鑒。再從前保舉堪勝知府。皆以督撫為政。藩臬兩司均不與聞。是督撫各舉所知。安保

無徇一人之私。以清薦牘者。亦不可不防其流弊。將來再有應行保舉時。並著藩臬會同叅覈。以昭公慎。或所舉非人。兩司亦不得辭其咎也。將此通行傳諭知之。○諭軍機大臣等。和其衷奏。遂犯胡中藻之子胡得玉。供詞與從前原案情節迥不相符一摺。已密諭該部議奏矣。此案當日江西查拏犯屬時。稱伊一子已亡。一孫尚幼。今胡得玉所供兄弟原有五人。其次兄胡友。頂替長兄胡論洙解京

身故。尚有二人。不知逃避何處等語。與從前查辦原案大相懸殊。其中情弊。不可不徹底根究。著將原摺鈔寄輔德。令其詳悉查明的確情由。據實速奏。可將此密諭輔德知之。尋奏查胡得玉所供尤義烈左義輩。礪溪俱無其人。訊胡中藻之弟中藩妻兄丁開健。並出戶之老僕萬聯貴等。僉稱中藻並無名友。名得玉之子。復查胡氏家譜。中藻妻丁氏生長子論洙。名下註明生庚。二子論淮。名下註幼

歿。繼妻徐氏生三子。論泗。名下無註。供稱徐氏並未生子。係屬望丁。豫擬論泗一名載入者。論洙係生員。於十八年身故。有學冊可憑。乾隆二十年。中藻犯事解京。並無併解伊子論洙案據。是胡友頂替之事。應屬子虛。又遍查該族草譜。及中藻中式硃卷齒錄。並僧道齋牒簿。止載長子論洙。其胡得玉所供胡友。並查出之論淮。論泗等名。均無登記。論淮僉供生未一歲即死。論泗雖供望丁擬載。但譜

內既有此名。或即得玉。或實屬望丁。尚難懸擬。應將胡中藩。丁開健。萬聯貴等。解部質審。得旨。此事必陝省原問。有不妥處。亦將是摺。欽交部詢問矣。○吏部議覆。江西按察使廖瑛奏。稱各省府州縣官。遇一切承審獲咎。及失察贍徇。因公呈誤等案。向例咨參後。並不離任。恐啟侵漁等弊。請嗣後先由各督撫查明。例得處分。除罰俸降級留任。并降級有級抵銷者。仍照舊例外。其降級革職。應離任者。

題咨時。即委員署印。清查倉庫。聽候部文到日。分別辦理。查承審錯誤情節不同。贍徇失察。因公呈誤。事有輕重。降革尚須酌議。未便概令離任。應俟部議降革奉旨後。部咨到日。即委員接任。惟錢糧盜案。限滿應降革。無級抵銷者。該督撫於查參日。先令離任。俟部議奉旨後。開缺從之。○江西巡撫輔德奏。按察使廖瑛查辦參革吉南贛道素章阿。私扣贛闖稅銀一案。不實力推究。且代支飾。請革職。

質審得旨。廖瑛著革職。下部知之。○是日駐蹕順河集行宮。○乙酉。

上詣

皇太后行幄問安。○諭宿遷一帶地方。濱河沮洳。土瘠民貧。從前巡幸所經。每深軫念。茲入疆咨省。見閭閻氣象。較前頗覺寬舒。攬轡之餘。深用欣慰。昨已降旨。免經過州縣額賦十分之三。因念陸路經行。一切灑道清塵。較水程倍為勤勩。雖按名給值。絲毫不以累民。而

百姓踴躍赴公。瞻依恐後。其情尤堪嘉悅。著加恩。將現在經過之宿遷。桃源。清河。暨迴鑾時所過之銅山等四縣。本年應徵地丁銀兩。蠲免十分之五。該督撫其率屬實心經理。俾益藏益資。饒裕元氣。大復共樂恬熙。以副朕加惠愛養之至意。該部遵諭速行。○以河南河北道吳虎炳。為江西按察使。○是日駐蹕林家莊大營。○丙戌。

皇后千秋令節。停止行禮筵宴。○賜扈從王公

大臣並江南大小官員等食。○諭。此次南巡。所有江浙二省。派出辦差兵丁。著賞給兩月錢糧。以示恩賚。○是日。駐蹕陳家莊行宮。○丁亥。

孝康章皇后忌辰。遣官祭

孝陵。○

上詣

皇太后行幄問安。○諭。南巡迴鑾時。

皇太后御舟。仍由水路進京。朕亦舟行至德州。

登陸。而江廣糧艘。亦俱以次北上。東省運河。一切收蓄調劑事宜。正須早為經理。淮徐道李清時。前任運河道。於山東河務。素為熟悉。去歲秋冬間。因運河水勢。畧覺微弱。曾諭令往濟寧一帶。協同商辦。此次著仍派李清時。隨總漕楊錫紱。前往山東。會同總河李宏將。河湖諸務。妥協辦理。事竣仍回本任。○是日。駐蹕徐家渡大營。○戊子。

上至河岸。祭

河神。○奉

皇太后渡河。○詣

皇太后御舟問安。○閱清口東壩。木龍惠濟閣。

○諭。朕巡幸江浙。所有該二省辦差文武各官。任內罰俸住俸降級之案。俱著加恩准其開復。其無此等叅罰案件者。著各加一級。○又諭。據楊應琚奏。興漢鎮總兵金梁。現丁父憂。該員駐劄伊犁。有承辦經理事務。請暫停開缺等語。金梁在伊犁。實為出力得用之人。

著賞給伊家銀五百兩。令伊弟料理喪事。並照該督所請。令其在任守制。仍留伊犁。不必開缺。○又諭。日鑾儀使明亮。著回京整裝。隨阿桂前往伊犁。學習辦事。○戶部議准。四川總督阿爾泰疏稱。江油縣木通溪。和合洞等處鐵礦。試採頗旺。應准商開採。照珙縣上羅基例。十分抽二。稅鐵變價。自本年為始。徵貯司庫。按年報部。撥充兵餉。從之。○又議准。調任雲南布政使永泰奏稱。大小各官。品分正

從。俸無異同。正品官遇降俸一級處分。照從品。仍食原俸。請嗣後凡正品官。降俸一級處分。均照降俸二級折半扣繳。其降一級留任處分。亦照此例扣支。從之。○刑部等部議准。湖北按察使雷暢奏稱。州縣離任。例將一切案件。造冊交代。但未分已結未結。恐辨理歧誤。請嗣後無論正署。離任時將一切已結案卷冊交。未結各案。分開事由。註明月日。冊交接任官。限一月查對。冊申府覈。加結轉詳。又承審盜案。例限十個月完結。州縣官恃期寬不即審辦。致兇犯稽誅。請嗣後無論首夥。緝獲幾名。賊證確鑿者。概照命案。例六個月完結。賊證未確者。據實聲詳。該管上司。覈明咨部。准以十個月完結。續獲盜犯。到官在州縣分限外。不能并案解審者。扣限四個月審結。從之。○又議覆。河南布政使佛德奏稱。州縣官於民間詞訟。近有濫批鄉約。地保等處覆者。恐索詐滋累。請嚴禁。查定例。州縣官遇重

大事件。濫批鄉約。地保。查覆者。降三級調用。惟詞訟細事。例准批查。但不據覆覈斷。即批委鄉約。地保處結者。嗣後請照將事務交不應交之人。例。罰俸一年。從之。○是日御舟駐蹕直隸廠。○己丑。江南河道總督高晉奏。清口木龍工程。

聖駕親臨閱視。諭於四架木龍下。緊對陶莊積土處。添木龍一架。俾挑溜全趨北岸。衝刷陶莊積土。收清黃並流之效。臣遵即勘明。應於四龍下。相隔一百九十丈處。添建擬長五十丈。委員覈辦。趕伏汛前竣工。得旨是。○是日。御舟駐蹕平橋。○庚寅。

上詣

皇太后御舟問安。○諭江南浙江辦差滿洲兵丁。著加恩賞給一個月錢糧。○大學士管兩江總督尹繼善等奏。江蘇常鎮二府屬港汊圩圍。並通江尾間。前據協辦大學士陳宏謀奏。請責成司道勘明。修培挑濬。查該二府屬

支河汊港園蕩隄塘向俱民自經理通江尾間如孟河之類淤塞年久工繁費重且民屆東作無暇興工請先委常鎮道督同該二府親勘支河等項坍淤工費無多者即督各業佃挑培通江尾間應大加挑濬者令民公同議辦或一時民費難集酌借公帑分年徵還從之○是日御舟駐蹕海棠庵○辛卯諭朕恭奉

皇太后臨幸江浙推

恩錫類優渥引年著將江寧京口杭州乍浦駐防男婦年七十以上者亦照從前恩詔例一體賞給以敷慶澤○是日御舟駐蹕崇家灣

大清高宗法天隆運至誠先覺體元立極敷文奮武孝慈神聖純皇帝實錄卷之七百二十八

大清高宗法天隆運至誠先覺體元立極敷文
奮武孝慈神聖純皇帝實錄卷之七百二十九

監修總裁官經筵講官太子太傅文淵閣大學士文淵閣領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣 廣柱

總纂官經筵講官太子太傅文學士文淵閣領侍衛內大臣稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣 董誥內大臣戶部尚書鑲黃旗滿洲都統軍功紀錄五次

尋常紀錄十四次臣 德瑛經筵講官太子少保工部尚書紀錄六次臣 曹振鏞等奉

敕修

乾隆三十年乙酉二月壬辰月食○

上諸

皇太后行宮問安○諭朕此次南巡啟鑒前已
降旨將江蘇省歷年災緩積欠一百四十餘
萬兩概行豁免並於入疆之初諭將經過地
方本年額賦蠲十分之三宿遷等縣地土素
稱瘠薄特免十分之五以示體恤今自渡淮
而南見羣黎歡迎道左愛戴尤殷因念江蘇
為財賦重地頻歲屢獲豐稔維正之供量無
拮据但所免災欠一項蘇松各屬不及淮徐

之多恩施未能徧逮即駐蹕處所將來更沛
恩膏亦止省會數縣其餘各屬尚未一體均
霑著再加恩將江蘇布政使所屬各州縣乾
隆二十八年以前熟田地丁雜款未完銀四
萬一千六百餘兩一體概行豁免並將江蘇
經過地方本年錢糧均免十分之五俾閭閻
益資殷阜共樂昇平副朕加惠無已至意該
部遵諭速行○又諭朕此次南巡體恤兩淮
商衆先期傳諭不令捐輸繁費而伊等趨事

踴躍甚屬可嘉著加恩均照本身職銜各加
一級○諭軍機大臣等輔德奏胡中藻家譜
刻有三子論泗字樣是否即係陝省竿獲之
胡得玉必須與胡中藩等當面質對彼此繞
難狡匿真偽可以立辨現在委員將胡中藩
等解送刑部查訊一摺當日胡中藻如果止
生論洙論淮二子此外並無餘孽何以家譜
內又載有論泗字樣此中疑竇非將胡中藩
與胡得玉隔別研訊復行當面質對不能水

落石出。著將原摺鈔寄劉統勳。舒赫德等閱看。俟案犯解到日。務須悉心研鞫。徹底根究。使鬼蜮無所遁情。可傳諭劉統勳。舒赫德。知之。○又諭曰。輔德奏查逆犯胡中藻之子一摺。與胡得玉所供大相懸殊。甚不可解。胡中藻如果止生論誅。論淮二子。此外並無餘孽。如何家譜內。又載有三子論泗字樣。此中疑竇。非將胡中藩等解京研訊。不能明晰。已傳諭劉統勳。舒赫德。俟案犯到日。詳悉質審。務得實情。是胡中藩等。均為應質要犯。該撫必須慎選妥員解送。沿途嚴密防範。不可令伊等有自戕免脫等事。仍於該處密訪嚴查。徹底根究。毋任鬼蜮伎倆。倖逃法網。將此傳諭輔德知之。○又諭曰。登州總兵馬之騏奏懇來行在陛見一摺。甚屬非是。該鎮於去年十二月初二日。補放總兵。奉到諭旨後。即應趨赴東省迎鑾。面聆訓誨。既於臣子之義允協。即為該鎮計。於新任省分。就近請訓赴任。亦

屬甚便。今乃遲之日久。始具摺懇赴行在。僕遠涉。甚無足取。可謂不諳事理。馬之騏著傳旨申飭。○是日。駐蹕天寧寺行宮。至甲午。皆如之。○癸巳。遣官祭

江瀆之神。並遣官至周吳季札祠。宋臣宗澤祠。及故大學士張玉書。尚書趙申喬。巡撫潘思渠等祠。拈香奠酒。○賜扈從王公大臣。並江南大小官員等食。○諭前日蘇昌奏。閩省鹽政情形一摺。當經降旨。交行在戶部議奏。

及至數日後。未見戶部議覆。經朕詢問。竟係奏事處。徑交蘇昌。而行在戶部。並未接到。此等事件。奏事處於奉旨後。自應即交該部辦理。若將原摺口傳諭旨。仍交本人。倘或誤聽訛寫。及遺漏遲延。何所考據。蘇昌所請交部察議之處。著寬免。所有接交此摺之奏事官員。著交內務府大臣察議。○又諭曰。原任吏部尚書王安國之子生員王念孫。著加恩賞給舉人一體會試。○工部等部議准。大學士

管陝甘總督楊應琚疏稱甘肅安西府治前經改設沙州。知府衙署請將右營都司署加拓改建。以舊有公廨改作都司署。敦煌縣典史現住衛千總舊署。該員有監獄專責。應擇近獄處另建。所遺衛千總舊署。隔別門戶。令教授經歷分住從之。○甲午。

上詣

皇太后行宮問安。○賜兩淮鹽政高恒等食。○戶部議准。湖北布政使三寶奏稱撫藩接任。

例將接收庫項。有無那虧。於交代限內。乘奏事便。另摺附奏。惟署藩司。因督撫暫行檄委。例未議及。恐啟瞻徇。請嗣後藩司。無論正署。將接收錢糧清楚緣由。自行陳奏。從之。○乙未。遣官祭賢良祠。○諭。由京隨來之水手網戶。著賞給一月錢糧。江南水手頭目。著賞給一兩重銀。銀二個。水手人等。各賞給一兩重銀。銀一個。拉緯河兵一千名。著賞一月錢糧。○是日。駐蹕高旻寺行宮。○丙申。

上至京口。祭

江神。○奉

皇太后渡江。○詣

皇太后行宮問安。○閱京口水師。○諭。此次渡江。各船水手人等。往返駕駛。俱屬黽勉。著加恩。於應給雇值四分外。每名每日。各增給銀一分。以示體恤。該部即遵諭行。○兵部議准。兩廣總督李侍堯疏稱。廣東增城左右二營。原設內河槳船二隻。近年河道淤塞。巡船虛設。應裁從之。○以戶部左侍郎錢汝誠充經筵講官。○是日。駐蹕金山行宮。翼日如之。○丁酉。

上閱京口水師。○諭軍機大臣等。據桑寨多爾濟奏稱。准俄羅斯畢爾噶底爾咨。索彼處逃出之厄魯特巴達克山等。桑寨多爾濟等擬回伊文內。有並未收納俄羅斯逃人。諒俄羅斯出於逆料等語。語意太遜。從前議彼此不得容納逃人。已屬錯誤。况俄羅斯現屢納我

逃人伊既背約。我何為株守前議。即將收留巴達克山等。明告俄羅斯。亦無不可。乃桑寨多爾濟等。飾詞咨覆。所見過小。又奏稱。准畢爾噶底爾咨。稱理藩院咨行彼處薩納特衙門。文詞侮慢。伊等難以措詞等語。此亦無關緊要。桑寨多爾濟等。視同大事密奏。尤屬不曉事體。可將桑寨多爾濟等原文改正。另代辦一咨文。寄與照例咨行。至丑達乃特旨派往。協同桑寨多爾濟辦事之人。俄羅斯有何

能。彼即滋事。我自有待之之策。看此情形。丑達不惟不能協助桑寨多爾濟。反形怯懦。致桑寨多爾濟張皇失措。朕即另派妥員前往更換。○伊犁將軍明瑞等奏。各城遷移屯田回人。共一千七百九十六戶。俱陸續到齊。所需口糧。除五月以前。照原奏給發外。尚需一月口糧。交吐魯番公茂薩通融辦理。其回人等所帶牲隻。即為屯田之用。不足再為撥補。又據庫爾勒哈子伯克阿瑞稟稱。現有多倫

回人三十戶。願自備資斧移屯伊犁地畝寬廣。應准其一體安插。報聞。○戊戌上詣

皇太后御舟問安。○諭朕清蹕時巡。所有經過地方。大臣祠墓在三十里以內者。例俱遣官致祭。原任大學士史貽直之墓。雖遠在溧陽。念其宣力年久。亦著加恩一體遣祭。以示優卹。○又諭據伍彌泰奏。稱品河地方。正月二十日地震。城垣兵房倉廩。及商民房屋俱倒

壞。兵丁王哲昭壓斃。城垣兵房倉廩陸續修補。商民房屋聽其量力自修等語。品河地震壓斃兵丁著加恩。照兵丁失足落水例賞卹。其商民倒壞房屋。令其量力自修。未免拮据。著伍彌泰查酌。如係徵租房間。量免數月半年。以紓商民之力。若官地商民自蓋。徵房身地租者。寬免一年。○諭軍機大臣等。伍彌泰等奏。稱烏魯木齊屯田尚需馬六百九十二匹。行文伊犁請給。經明瑞等以伊犁現亦需

用俟貿易有餘再行撥送。擬派員購買。每匹估給價銀八兩等語。辦理殊屬錯謬。烏魯木齊等處數年來積貯頗豐。倘屯田馬匹稍有缺額。即先將現在馬匹供用。其不敷者亦無妨少緩。且哈薩克貿易馬匹。纔值銀二三兩。今以銀八兩購馬一匹。頓增三四倍矣。著傳諭伍彌泰所購馬匹。如業經給價則已。否則毋庸購買。並傳諭明瑞等知之。○是日御舟駐蹕三義閣。○己亥。遣官祭故大學士史貽

直墓。○禮部題。朝鮮國王李吟遣使表賀萬壽。冬至元旦三大節。及進歲貢方物。賞賚筵宴如例。○命大學士劉統勳教習庶吉士。○是日御舟駐蹕政成橋。○庚子。吏部議准。雲貴總督劉藻等疏稱。雲南永北府知事。現經移駐金江渡口。應請鑄給永北府分駐金江知事印信。其附近金江之陶營羅家村等四十六村。均撥歸管理。從之。○是日御舟駐蹕十里亭。○辛丑。

上詣

皇太后行宮問安。○諭拉緯六班河兵俱著加恩。各賞一月錢糧。管兵守備等各賞金牌一面。銀牌二面。千總把總各賞銀牌三面。効力千總把總各賞銀牌二面。下船催趲拉緯河兵之水手網戶十四名。各賞給一兩重銀鏢一個。○山海關副都統伊勒圖奏。山海關前經添設官兵輪值石門寨。查拏私渡貂皮珍珠一切禁物。計今二十餘年。從未盤獲一案。

臣親往查看。石門寨係一小城。與長城地界不連。雖通九門口等小邊口隘。仍相距二三十里。奸猾匪徒繞路行走。值班官兵難查。請嗣後另於長邊內外輪派官兵。不時巡察。此項值班官兵裁撤得旨。如所請行。○是日駐蹕蘇州府行宮。至癸卯皆如之。○壬寅。孝昭仁皇后忌辰。遣官祭

景陵。○遣官至周泰伯祠。先賢言子祠。宋臣韓世忠范仲淹及故大學士蔣溥總河陳鵬年。

巡撫湯斌。張伯行等祠墓。拈香奠酒。○吏部議覆。湖北巡撫王檢等奏稱。沔陽州轄新隄地方。經前署撫愛必達奏准添設文泉縣治。將原駐通判改為知縣。鍋鎮巡檢改為典史。並請建城垣。倉庫監獄等項在案。現查該處地窪城倉各項俱未興工。且於民情不便。請將新設文泉縣裁。新隄等處仍隸沔陽。即移該州州同駐劄。定為沿江要缺。在外選補。無庸復設通判。典史仍改為巡檢。分司隄垸。應如所請。惟文泉縣訓導。應否裁汰。或仍改為沔陽州訓導。復設巡檢。是否仍駐鍋底灣。該撫等均未聲明。應令詳酌。咨到再議。從之。○工部議准。浙江巡撫熊學鵬疏稱。會稽縣桑盆一帶舊石塘隄。近因護沙坍盡。水逼塘根。塘石抽剝。樁脚搜空。請於貼連舊塘後。戩另建斗砌石塘一道。令兩頭盤接舊塘。其石塘以西。自瑞字號至愛字號。面土低矮。加高四尺。從之。○葉爾羌叅贊大臣額爾景額等奏

博羅爾伯克沙呼沙默特。平日勞苦所屬回人與弟海魯蘭不睦。又奪齊特喇爾伯克邁瑪特什丕之妹。致海魯蘭合謀掠伊村莊。現已各知其非。復相和好。臣等仍按其呈到情形。分別是非行文曉諭。報聞。○杜爾伯特貝子瑪什巴圖故致祭如例。○癸卯。

上詣

皇太后行宮問安。○以湖北鄖陽協副將英泰為貴州威寧鎮總兵。○甲辰。

上詣

皇太后行宮問安。○諭從前因貝勒弘瞻年幼不肯學好。不遵

聖母皇太后懿訓。喜事妄為。屢經訓誨。未知悔悟。自新遷善。俾得成就。伊果能遷善有成。則朕自必加恩。今覽御醫所奏。知伊患病。朕心甚為憐念。恭請

聖母皇太后懿旨。封伊為郡王。想伊聞命欣喜。

病勢自必速痊。弘瞻著封為郡王。該衙門查例辦理。○又諭曰。貝勒弘瞻患病。據御醫奏稱。係屬弱症。從前差務較多。身體頗壯。現在差務甚少。年幼之人。未免不知愛惜身體。耽於安逸。致有此疾。今加恩將伊晉封郡王。伊接奉諭旨。理宜仰體朕恩。加意調養。朕迴鑒時。自可痊愈。永受朕恩。若仍不善調理。是甘於自棄矣。○又諭曰。傅森年邁。著不必管理都統事務。所遺鑲白旗蒙古都統員缺。著扎

拉豐阿調補。扎拉豐阿所遺正黃旗漢軍都統員缺。著齊斌補授。○又諭曰。湖南巡撫圖勒炳阿。現在患病。著派侍衛噶爾炳阿。帶同行在御醫一員。馳驛前往診視。○又諭曰。圖勒炳阿奏稱。現在患病。難以速痊。已派御醫前往診視。圖勒炳阿不必解任。著在署靜養。命王檢前往署理湖南巡撫印務。吳達善現已回任。即著兼署湖北巡撫事務。王檢俟吳達善回任後。再赴湖南。王檢未到湖南之前。

所有巡撫印務。著布政使赫昇額暫行護理。○以江蘇蘇松鎮總兵馬銘勲。為江南提督。調江西南昌鎮總兵馬全。為蘇松鎮總兵。以江南河標中軍副將邱若龍。為南昌鎮總兵。○是日。駐蹕靈巖山行宮。翼日如之。○乙巳春分朝。

日於東郊。遣理郡王弘曉行禮。○是月。護理山西巡撫布政使文綬奏。山西通省所設墩汛九百六十餘處。塘房九千餘間。現多傾圮。請照借項修城例。於司庫公項內領借。確估興修。分年於該州縣繁費內扣還。得旨。如所議行。○又奏。綏遠城駐防官兵。向來歲需口糧粟米五萬餘石。每年於歸化城各廳及莊頭并土默特蒙古大青山十五溝等處額徵米四萬四千六百餘石。同舊存倉糧支放。現在綏遠城出旗漢軍改補綠營官員。俱已起程。其漢軍兵二千一百十七名。陸續調補綠營。約一年可全出旗。此後所收一年之糧。足供

兩年兵糈。請將現存倉粟米十二萬餘石。酌留六萬九千餘石。以供今年明年兵糧。其餘五萬餘石。變價解司充餉。得旨如所議行。○四川總督阿爾泰奏。川省岷江源遠。內江分注成都十五州縣。外江經由邛雅瀘嘉等郡。下達重慶。尤為水利所關。應設法存蓄。隨時開放。查茂州長寧沙壩地方。俱可壘砌石埂。鵝鴨溝小溪口。亦可攔水積聚。又汶川縣尤溪及豬腦壩山溝。宜於各溪口作石壩。俟需

實錄卷七二〇

十一

水時。酌量引放。至涪江。逼近綿州城根。每虞水患。應於王家灘開支河一道。得旨嘉獎。○又奏。川江多險灘。節次修鑿六十餘處。近年沿江各屬。具報失事船隻較少。現仍飭屬乘水弱時。各將境內險灘。竭力鑿除。得旨覽奏。可謂留心地方。○雲貴總督劉藻等奏。滇省湯丹大礪等廠。加銅價後。每年辦銅加多。嗣因積存餘息。不敷添價之用。於東川新舊兩局。冬季三個月。每旬加鑄半卯。近來湯丹大

礪等廠。日見豐旺。東川加卯。仍不敷用。應於東川二局。自三十年春季二月為始。按旬再各加半卯。同湯丹大礪兩廠鑪戶。每季多辦銅八萬六千七百餘觔。於銅本內借支鑄本。鑄出錢文。照例扣解司庫。得旨如所議行。

實錄卷七二〇

十一

大清高宗法天隆運至誠先覺體元立極敷文奮武孝慈神聖純皇帝實錄卷之七百二十九

大清高宗法天隆運至誠先覺體元立極敷文奮武孝慈神聖純皇帝實錄卷之七百三十

監修總裁官建儲官太子太傅文淵閣大學士文淵閣領閣事領侍衛內大臣稽察欽奉 上諭事務處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履歷

總纂官經筵講官太子太傅文華殿大學士文淵閣領閣事稽察欽奉 上諭事務處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書錢謙益滿洲都統軍功紀錄一次

尋常紀錄十四次臣德瑛總纂講官太子少保工部尚書紀昀六次臣曹振鏞等奉

敕修

乾隆三十年乙酉閏二月丙午朔

上詣

皇太后行宮問安○詣蘇州府

文廟行禮○遣官祭

禹陵

南鎮會稽山神

江海潮神並遣官至吳越王錢鏐唐臣陸贄

宋臣岳飛明臣于謙及故大學士徐本梁詩

正尚書徐潮等祠墓拈香奠酒○是日駐蹕

蘇州府行宮翼日如之○丁未遣官祭

海神祠並遣官至唐臣張巡許遠及故大學

士陳元龍陳世倌等祠墓拈香奠酒○工部

等部議准安徽巡撫託庸疏稱安徽藩司前

經移駐安慶除司府兩署業已興建外其布

政司經歷衙署以安慶府照磨舊署改作庫

大使衙署以通判舊署改作安慶府同知通

判衙署無隙地可建應買民房估建府經歷

照磨二署及照磨應隨建監獄均於安慶府

新署附近估建從之○戊申

上詣

皇太后御舟問安○諭朕巡幸江浙啟鑒之初

降旨將江浙二省累年積欠銀糧全數豁免

而浙省所免之數較之江省尚少茲當入疆

伊始疇咨民瘼該省尚有未完款項若再加

恩將浙江省乾隆二十六年七、八等年積欠未

完漕項及仁和袁浦等場未完電課銀一萬

八千六百餘兩二十四、五、六等年因災緩

帶積欠未完南米及借給各場電戶倉米一

萬八千九百餘石。二十六。八。兩年。錢塘。諸暨。玉環等廳。借給農民。緩徵穀。及因災。緩徵租穀。一萬六千九百餘石。概行蠲免。該督撫等。其率屬實力奉行。務俾恩膏下逮。稱朕惠愛黎元至意。該部遵諭速行。○又諭。此次隨營人等。雖俱加恩賞給。但行走係內地。與外地不同。用度稍費。著交總理行營事務王大臣等。分別賞給。再王家營存住各項人等。應如何恩賞之處。分別議奏。所賞銀兩。在兩淮鹽政庫內。存貯公項內。動用。尋奏。乾隆二十七年。隨營王大臣等。奉旨。分別賞銀賞俸。王家營存住人等。賞半俸。餘衆。照二十二年例分賞。此次請照前次例。冊交兩淮鹽政會同行在戶部賞給。報聞。○又諭。曰。浙江提督武進陞。久歷鎮提。年登大耋。伊子恩壽。著加恩賞給一品廕生。以昭優眷。○又諭。曰。榮澤縣知縣曾應召。前因陳起忠等。聚衆抗官。開城罷市。並不即行嚴拿。遽行回縣。經該撫阿思哈。

奏請革職。仍發巴里坤。効力贖罪。但念該員甫往河陰。尚未任事。著加恩免其發遣。交與吏部。於迴鑾後。帶領引見。○是日。御舟駐蹕吉慶寺。○己酉。

上詣

皇太后御舟問安。○諭。朕稽古省方。四蒞江浙。已降旨。將經過地方。本年額賦。蠲免十分之三。而省會駐蹕之地。加恩更宜優渥。其將江南之江寧。蘇州。浙江之杭州。附郭諸縣。本年應徵地丁銀兩。概予豁免。用宣慶惠。該部遵諭速行。○又諭。朕翠華南幸。始蒞浙境。念該省所免積欠。較江省獨少。且於未奉恩旨以前。復有續完之項。民情可謂急公。因命悉查積年未完各項。無論於例應蠲與否。盡予豁免。以紓民力。至清蹕所經。前已降旨。蠲本年額賦十分之三。昨巡歷江省。復念淮。徐。各屬地瘠民貧。江淮以南。人知愛戴。凡水陸經行州縣。加免十分之五。浙省雖郵頻無多。而除

道清塵。亦足現閭閻歡感。且兩省皆係赤子。誠求懷保。厥視惟均。著再加恩。將浙江經過地方。本年應徵錢糧。概免十分之五。俾羣黎普霑膏澤。益慶阜恬。副朕入疆施惠至意。該部即遵諭行。○軍機大臣等奏遵旨查明浙省杭嘉湖道兼管海防事務繁劇。額設養廉僅二千五百兩。而糧鹽兩道各額設五千兩。請各撥五百兩。增作海防道養廉。得旨是。○以杭嘉湖道永德為浙江布政使。○是日。御

舟駐蹕石門鎮。○庚戌。賜扈從王公大臣並浙江大小官員等食。○諭。三吳兩浙文風素盛。昨於啟鑒之先。已特降恩。將江南分設各縣。准於本年選拔時。每學各取一人。以廣教澤。茲當翠華蒞至。因念成均既多。予拔尤而費序亦宜。增試額。用循舊典。以示渥恩。其將江蘇。安徽。浙江三省。本年應試文童。府學及州縣大學。增取五名。中學增取四名。小學增取三名。各該學政務宜慎加遴選。詳悉校

閱。副朕樂育作人至意。○又諭。海寧石塘工程。民生攸繫。深厯朕懷。連年潮汛安瀾。各工俱屬穩固。茲入疆伊始。即日就近親臨相度。先行閱視。繞城石塘五百三十餘丈。實為全城保障。而塘下坦水。尤所以捍衛石塘。但向來止建兩層。今潮勢似覺頂衝。外沙漸有汕刷。三層之外。應須豫籌保護。該撫等上年所奏。加建三層坦水六十餘丈。止就尤險要處而言。於全城形勢。尚未通盤籌畫。若一律普

築三層石坦。則於護城保塘。尤資裨益。著將應建之四百六十餘丈。均即一例添建。其二層舊坦內。有椿殘石缺者。亦著查明補換。該督撫等其董率所屬。悉心籌辦。動帑興修。務期工堅料足。無濫無浮。以收實濟。副朕為民先事豫籌之至意。○又諭。翰林院編修陳邦直。著賞給翰林院侍讀。○是日。駐蹕安瀾園行宮。翼日如之。○辛亥。

上閱海塘。○諭。索琳著補授副都統。賞戴花

翎前往庫倫更換。丑達協同桑寨多爾濟辦事。俟朕啟鑒後。索琳交却起程。丑達著前往葉爾羌辦事。丑達到時。額爾景額著前往喀什噶爾辦事。更換納世通來京。○諭軍機大臣等。今日佛德奏。豫省得雨。霑足一摺。循奏事虛名。具文塞責。甚屬非是。藩司為通省大員。令伊等得專牘陳奏。原謂地方要務而言。非僅為較量晴雨而已也。昨河陰縣士民聚眾罷市一案。該撫適赴行在迎鑒。佛德駐居

會城。一接該縣稟報。既已親往查辦。何難一面奏聞。乃僅以專稟該撫為盡職。而於朕前並不即行入告。今乃以得雨情形。專摺具奏。殊屬不知輕重。佛德著傳旨申飭。○西安將軍新柱等奏。西安另記檔案出旗閑散人等。經前任巡撫鄂弼奏請照綏遠城另記檔案發往綠營食餉例。挑補步糧守糧。補完後。再陸續挑補步甲。嗣於另記檔案內。挑出馬步甲八百四十九名。今屆三年。僅補馬甲五十

三名。步甲未補。於為民之閑散內。挑出五百八十二名。已坐補步糧守糧一百三十七名。查出旗閑散。均係奉旨入各州縣民籍之人。如先儘補閑散。則出旗步甲等。久占錢糧。缺不能出。計六七年間。尚難全數出旗。且閑散既先得缺。復不分步糧守糧補用。未免過優。請嗣後遇馬兵缺出。補用出旗之領催前鋒馬甲。不必先補閑散。步兵缺出。補用步甲。守糧缺出。補用閑散。得旨嘉獎。○壬子。

上詣

皇太后行宮問安。○諭朕時巡江浙。清蹕所經。恩膏疊沛。軍民士庶。無不忭舞。臚歡而清理庶獄。亦矜恤所宜逮。用循舊典。以廣深仁。著將江蘇。安徽。浙江三省。軍流以下人犯。俱加恩各予減等發落。俾得改過自新。勉為良善。共享太平之福。○又諭。據王檢奏。湖南糧船停泊漢口鎮守風。因鹽船失火。延燒岳州衛三幫船一十三隻。經官弁兵役撲救。餘船一

百六十五隻俱保護無損。所焚糧石請照例於各船之旗丁什軍名下追補。漕船照出廠年分著落賠造一摺。焚失漕糧若由旗丁等不能小心防範本幫不戒於火自應按數著賠。今湖南糧艘停泊岸旁鹽船失火風急延燒非該丁等力能豫防。所請應賠糧米漕船之處俱著加恩寬免。其官弁兵役等盡力救護奮勉可嘉著查明出力之人酌量獎賞。該部即遵諭行。○諭軍機大臣等據輔德奏查

訊逆犯胡中藻之子胡論誅實係病故並無另有子嗣一摺。據所查胡中藻止生胡論誅一子。研訊親隣族保眾口合同並檢查胡姓族譜及其中式硃卷與寺廟舊存醮簿所載亦無異說。而論誅病故年分則更有學冊可據似不應更有遁情。且胡中藻之事敗露於乙亥之春伊子論誅已於癸酉年病故自無逆料其日後發覺。而於學冊豫為捏報身故之理。但陝省所獲之胡得玉豈不知逆犯之

子。罪應連坐乃竟悍然直認又何以捏稱兄弟五人言之確鑿於情理殊不可解。現在胡得玉已經解京胡中藻等亦據該省委員押解赴部著將此摺鈔寄劉統勳舒赫德等閱看令其詳悉研訊務得確情以釋疑竇。所有查出學冊家譜等件著一併寄發。○又諭曰王檢奏鹽船失火延燒漕船一摺已降旨將旗丁等免其著賠并令將出力之官弁兵役查明獎賞至起火情節不可不徹底嚴究一

船失火延及隣船既焚燒商課鹽船復燬損漕船正供并斃男婦七命即使過出無心亦不當僅照尋常失火之例以枷責完結若孫和林等與本船商夥或有宿嫌借端洩憤以致損漕糶而斃人命則情罪更為可惡即擬以重辟於情法亦為平允可將此傳諭王檢知之。○四川總督阿爾泰等奏據西路維州副將知州南路遊擊同知等先後稟報委員分赴所屬土司查驗毗連金川地方碉卡並

飭各土司相機進剿。各土司屢蒙恩賞。且謂殄滅金川於彼有益。俱感激踴躍旋金川。郎卡差頭人因通事迎見委員。自陳悔罪。委員曉以利害。當即遣送所掠黨壩人口五十一名。拆毀穆爾津岡戰碉五座。惟山梁尚未退還等語。查郎卡恃地險。堅構壘以來。從未乞憐。今忽輸誠。恐有別情。隨調委員等來省面詢。據稱悔懼似出實情。但後此果否安分。臣等難逆料。仍飭委員駕馭。令各土司設法進攻。得旨。不必二三其意。仍持前議。久而不懈。自可成功。況又無甚大費。莫為屬員了事。將就之議。○是日。駐蹕杭州府行宮。翼日如之。○癸丑。

上閱兵。○賜扈從王公大臣。並浙江大小官員等食。○諭。此次接駕一百七歲之訓導王世芳。著賞給扁額。並緞二疋。○又諭。嘉興知府員缺。經該督撫遵旨揀選。紹興府鄒應元調補。續據奏稱。鄒應元籍隸無錫。距嘉興在五

百里以內。例應迴避等語。無錫雖地近嘉興。然江浙隔省。不相統轄。該督撫既稱該員人地相宜。不必照例迴避。○宗人府奏。員勒弘瞻奉旨晉封郡王。其封號應用何字。恭候欽定。得旨。仍用果字。○甲寅。

上幸觀潮樓。閱福建水師。○是日。駐蹕聖因寺行宮。至癸亥。皆如之。○乙卯。阿克蘇辦事副都統卞塔海等奏。辦送沙囊樹科之烏什回人二百四十名。於二月十四夜聚謀城中。鎗傷綠旗兵。副都統素誠會同阿奇木伯克阿布都拉。登山拒守。臣等聞報。卞塔海即整兵往援。阿克蘇辦事布政使德福留守城池。其喀什噶爾。葉爾羌。庫車。賽哩木。拜等處。俱已分途飛報。諭軍機大臣等。卞塔海等聞烏什城內回人滋事。即領兵前往。又咨行各城策應。同日鄂寶。明普。高廷棟。俱奏稱。派兵前往。烏什回人作亂。尚未得起釁確情。著傳諭柏琨。額爾景額等。如柏琨正抵烏什。即將此事

查辦。所有起釁回人。務嚴行根究正法。以示懲創。仍即曉諭各城回衆。令其各安生理。毋得驚恐。柏琨如已過烏什。即著額爾景額。前往辦理。再辦送沙棗樹料。其事甚屬微細。何必派出如許回人。以致激成事端。或素誠及綠旗兵丁。平日擾害伊等。致不能堪。適因此事。遂爾舉發。亦未可定。柏琨等辦理竣事時。將素誠平日有無擾害回人情事。一併查明具奏。○丙辰。

上詣

皇太后行宮問安。○遣官祭

歷代帝王廟。○丁巳。諭曰。沈德潛。錢陳羣。江浙耆宿也。並以卿貳予告里居。曩者省方東南。存問所及。特晉尚書階。優頒廩祿。茲時巡蒞。至二臣咸扶杖迎謁。耄耄而神明不衰。惟國之瑞。朕甚嘉焉。其各加太子太傅。以寵異之。沈德潛之孫。錢陳羣之幼子。各一人。並賜舉人。一體應禮部試。二臣益忻愉恬養。以躋

期頤。副朕優高年眷舊臣之意。○阿克蘇辦事副都統卞塔海奏。二月十五日。領兵往援烏什。次日抵烏什之喀喇和卓。遇賊八百餘人。追擊捉生詢問。據供。素誠被害。阿奇木伯克阿布都拉。被拘禁等語。臣當將烏什城外關隘據守。十七。十八晝夜擊賊。殲百餘人。十九有馬步賊多名。出城抗拒。因衆寡不敵。雖復殺賊百餘人。官兵亦陣亡七十八名。現屯駐哲爾格濟克德。飛咨德福。添兵策應。其葉

爾羌。喀什噶爾兵。亦經催取赴援。諭軍機大臣等。卞塔海奏。伊領兵前往烏什。捉生詢問。知駐劄大臣。已為逆回戕害。現在據城聚衆抗拒。官兵等語。初意回人小有變亂。或不過械鬪案件。今乃戕害官兵。焚劫倉庫。此固素誠等平時辦理不善。以致滋事。而回人等敢行叛亂。情罪可恨。若不盡行勦絕。將來駐劄大臣。何以辦事。適據明瑞奏。一聞德福所報信息。即派觀音保領兵前往。此時納世通。額

爾景額應亦赴援。自可計日蕞事。但逆回潰敗之後。必分路潛逃。斷不可防範稍疎。致使漏網。倘有投往額爾德尼伯克處之人。即向伊索取。此時卡塔海等辦理若何。仍作速奏聞。○又諭。今日據卡塔海奏。伊領兵前往烏什。知素誠已被戕害。連日與賊相持等語。正欲諭明瑞領兵往辦。適據奏至。已令觀音保前往應援。加以各城陸續出兵。諒逆賊無難擒戮。茲命明瑞前往。非專為勦賊。特令其詳

察起釁情由。大臣等駐劄新疆。平日失於撫馭。惟偏護內地人等。恣意擾害回人。及債事後。又復張皇失措。為若輩所輕視。即如派送沙棗樹科。何至二百人之多。其為辦理不善顯然。再烏什原係霍集斯駐劄之地。或伊屬人聳衆生事。亦未可定。明瑞此行。固不宜輕縱回人。亦不可偏護官兵。務得其實情。加以懲創。始於地方有益。俱著據實奏聞。○阿克蘇辦事布政使德福奏。現署阿奇木事務伊

什罕伯克薩里之弟額伊敏。告知逆回交銀。遣與噶西納齊伯克沙資雅東。及安集延回人。往霍罕額爾德尼伯克求援。額伊敏乘間脫出報信。得旨。額伊敏為賊所遣。乘間脫出。報知信息殊屬可嘉。著傳旨嘉獎。仍賞緞五疋。○大學士兼管刑部尚書劉統勲等奏。研究陝省盤獲胡得玉。據供。實係山西張京涵親子張機。其年歲妻室住址隣右。及逃出行節。均確鑿可據。但陝省承審時。因疑成誤。今

據實詳覆。並俟江省將胡中藩解到。再行覈擬具奏。得旨。此事究屬荒唐。細心推究。按例定擬可也。○以江蘇按察使錢琦為四川布政使。蘇松糧道朱奎揚為江蘇按察使。○戊午。工部議准。浙江巡撫熊學鵬疏稱。會稽縣境滙海所一帶舊石塘。因久未加修。現俱坍塌。請普加高四丈。從之。○己未。諭。浙江進獻詩賦。考取一等之進士張培。馮應榴。舉人吳壽昌。俱著授為內閣中書。遇缺即補。陸費墀

著特賜舉人授為內閣中書學習行走與考取候補人員挨次補用其二等之黃瀛元等十四名著各賞緞二疋○又諭曰原任禮部侍郎蔡世遠之子蔡長汭原任江蘇巡撫邵基之孫邵洪俱著賞給舉人一體會試○諭軍機大臣等昨據德福奏烏什噶匪納齊伯克沙資雅東等為賊遣往霍罕求援於額爾德尼伯克有同行之額伊敏脫出送信等語額爾德尼伯克前與阿布都喇伊木互相通信今沙資雅東等數人內或有阿布都喇伊木親戚意圖報復或額爾德尼伯克尚有通信往來之事亦未可定明瑞至烏什時亦當留心查明如額爾德尼伯克果有此等情事即藉此移兵進剿事平後霍罕雖不必駐劄大臣自可另授伯克管理俱著據實奏聞○又諭回部自內附以來朕加意輯寧俾各安生理豈意烏什回人等忽戕害官兵搶掠倉庫情固可恨或因駐劄大臣等平日失於撫

馭綠旗官兵又復恣意擾累伊等不得已而出此又或阿布都喇伊木親戚人等與霍罕額爾德尼伯克潛通信息煽誘妄為俱未可定額敏和卓曾與新柱同辦事務新柱有無擾累回人及各城大臣所行若何著傳諭額敏和卓伊係効力年力之人各大臣辦事情形及回人情事自必深知伊有所見聞當據實具奏不可纖毫隱匿再額爾德尼伯克倘有通信形跡額敏和卓意中應作何辦理並著籌酌奏聞○又諭曰額敏和卓入覲時曾請將獲罪安置回人阿布都賚頗拉特發往伊犁居住已如所請交帶領入覲回人侍衛等便道送往伊犁今烏什回人既經叛亂此阿布都賚等素非安靜之人或在伊犁滋事亦未可定阿布都賚頗拉特不必送往伊犁即著侍衛素勒帶回京師照舊安置○庚申清明節遣官祭

永陵。

福陵。

昭陵。

昭西陵。

孝陵。

孝東陵。

景陵。

泰陵。○遣官祭

孝賢皇后陵。

端慧皇太子園寢。○

上詣

皇太后行宮問安。○諭軍機大臣等。前孫延柱奏。果郡王病勢未減。深為廬念。特加恩賞給郡王。令其祇受新恩。忻豫調攝。以期勿藥之喜。乃今日本報到時。果郡王並未將病體情形陳奏。孫延柱日承診視。何以亦未奏聞。著留京辦事王大臣傳詢孫延柱。令其將該郡王近日病體曾否輕減。漸就痊可之處。即行詳悉具奏。○又諭內務府大臣奏。審明遺失

念珠一案。並請將總管李裕。張國詳。吳進忠。交宮殿監督領侍等治罪一摺。已降旨依議。但以馮國泰等商謀竊取。計圖傾陷。謂李裕等失於查察。殊於情事未協。轉不足以服伊等之心。朕之所以懲治伊等者。因舍衛城所管各鋪面什物不全。必係趙連璧平時偷竊。經王永貴接受交代時。查點不全。趙連璧自問竊取心虧。方肯甘於認賠。若果止因殘損。勒令賠補。則宮殿陳設甚多。即使年久損舊。其物現在誰肯以私錢賠償官物。李裕等身為總管。近在一園。豈有園內什物被人私竊。漫無稽查。及王永貴收點勒賠。尚不能查出真情究治。而聽其捏稱殘損賠完。冀掩飾其偷竊之迹。伊等所管何事。是伊等之罪無可寬。全在於此。著傳諭內務府大臣等照此議罪。並將此明白諭令李裕等知之。○又諭前諭阿桂。明亮。俟朕南巡旋蹕時。再請訓前往伊犁。今明瑞既往烏什。著傳諭阿桂。明亮。不

必守候迴鑾。即馳驛至行在請訓。前往伊犁辦事。○又諭。此次進剿烏什逆回。各城大臣俱領兵會合。但必號令歸一。方克有濟。額爾景額。至烏什之時。即著總理軍務。或觀音保先至。亦可暫總其事。以待額爾景額之來。明瑞一至。伊本係將軍。自應節制各城官兵。再各城大臣等。會合一處。尤當和衷商辦。以期集事。斷不可各存意見。烏什之事。想計日可竣。但恐逆回等。見官兵陸續全到。或逃往霍罕。投額爾德尼伯克。并傳諭該將軍大臣等。務於緊要關隘處所。選派官兵。加意瞭望。擒拏。勿令免脫。○又諭。據德福奏稱。阿克蘇庫貯軍器火藥。所餘無幾。恐各城官兵至日。不敷配給。已行文喀什噶爾。葉爾羌大臣。速由臺站運送等語。所辦未合機宜。軍器火藥。自屬緊要。但各城大臣。既領兵會剿。自必攜帶。豈有專俟阿克蘇豫備之理。況此時各臺站俱有回人。有事之秋。保無心懷叵測。妄行擲

奪。德福何見不及此。再所奏阿克蘇辦事。不可無大伯克。因行文楊應琚等。催色提巴勒氏。於入覲歸途之便。馳驛速赴該處。尚屬可行。色提巴勒氏抵阿克蘇日。即留彼辦事。至薩里係烏什人。父母兄弟。俱在彼處。自必備知其詳。著派往卡塔海軍前効力。俱傳諭知之。○鑲白旗護軍統領弘昉奏。紫禁城內。宮殿門鑰。關係甚重。請嗣後自景運門至隆宗門。照例夜間令該門堆撥進班章京護軍校護軍等。在六庫牆後。陸續送籌繞巡。起更後各處人等。不得妄自出入。違者叅究。得旨。著照所請行。

大清高宗法天隆運至誠先覺體元立極敷文
奮武孝慈神聖純皇帝實錄卷之七百三十

大清高宗法天隆運至誠先覺體元立極敷文
奮武孝慈神聖純皇帝實錄卷之七百三十一

監修總纂官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理
吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂
總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務
世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次
尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆三十年乙酉閏二月辛酉諭曰阿桂遣

往伊犁舒赫德著留京辦事工部尚書正紅
旗滿洲都統事務著託恩多署理○浙江提
督武進陞遺疏聞諭曰浙江提督武進陞歷
膺提鎮宣力有年今聞患病溘逝殊堪軫惻
所有應得卹典著該部察例具奏○又諭浙
江提督員缺著黃正綱補授所遺廣東碭石
鎮總兵員缺著葉相德署理俟服闋之日再
行實授黃正綱到任尚需時日浙江提督事
務著段秀林暫行署理○蘇尼特輔國公羅

壘故致祭如例。○以故雲南箭桿場土巡檢
字生民于印襲職。○壬戌。

上詣

皇太后行宮問安。○諭軍機大臣等。蘇昌奏請
增閩省鹽價一摺。經行在戶部議。以是否實
在情形。難於懸揣。楊廷璋久任閩督。於鹽務
自必熟悉。請交楊廷璋妥議覆奏。已如部議
行矣。閩省鹽務。果有成本不敷。難於銷售之
事。楊廷璋在閩數年。何以未經籌辦。蘇昌到

任未久。於地方諸務。諒未必即能真知灼見。
所奏是否實情。誠難懸斷。定長簡任閩撫有
年。於該省現在情形。知之必確。如果商力疲
乏。運售維艱。自當熟籌妥辦。但錢價隨時長
落。鹽價豈能因之屢為增減。且遽爾增價。於
民有無擾累。亦不可不悉心斟酌。著傳諭定
長。將商鹽實在情形。及如何辦理妥協之處。
即就所知覆奏。或蘇昌意在沽名。急於入告。
以博衆商感頌。亦即據實具奏。定長昨因楊

廷璋一案。累誤朕已加恩寬宥。此次交查事
件。若稍存瞻徇之見。依違兩可。必不能再為
曲貸矣。將此密諭。定長知之。尋奏。閩省鹽務。
雍正元年。曾將商人裁革。統歸官辦。復經題
准。除長樂福清晉江同安等四縣官辦外。餘
悉招商行運。先完課銀。後配鹽。近年商辦。
頗形竭蹶。乾隆二十八年。通商呈請增價。前
督楊廷璋酌准。每擔加運耗鹽五觔。上年又
會請續增。經督臣蘇昌將建寧光澤邵武三

幫。准加運耗鹽七觔。不補錢水。其餘各幫。於
原定賣價。准每錢一文。增補錢水九絲七忽。
零。今蘇昌奏請加增鹽價。是否於增補錢水
外。又請加價。臣無從懸揣。查雍正十一年。題
定於各商成本外。每觔准其獲息一文。歷今
三十餘年。本費既多。獲息自薄。請按一文之
數。折半加增。令通省各幫。悉照現在賣價。每
觔加收五毫。毋庸加給錢水。亦不准加運耗
鹽。其泰寧一幫。近因溪河淤塞。民間願加挑

運腳費。請每觔加收一文。溪河復通。仍止准加五毫。惟官運四縣。毋庸議增。得旨。所奏甚公。緣係問總督之事。此摺不明發。密令該部酌採議行。○癸亥。

上詣

皇太后行宮問安。○賜扈從王公大臣。並浙江大小官員等食。○諭軍機大臣等。據納世通奏稱。接卡塔海烏什同人作亂信息。一面傳檄招撫。隨帶領官兵起程等語。納世通初得信息。尚不知道逆回有戕害大臣搶掠倉庫之舉。是以意在招撫。今既知逆回等肆惡情形。斷難曲宥。納世通。額爾景額等。務期大示懲創。不可稍存姑息。○阿克蘇辦事副都統卡塔海奏。二月二十四日。栢琨等領庫車官兵同人等。至哲爾格濟克德。拏獲烏什逃回尼咱爾默特。訊供。烏什馬步賊共二千六百餘人。現傷斃二百餘人。并聞遣人向布魯特求援。其首逆係魯克察克村之四品頂帶孔雀

翎伯克額色木圖拉。及伊子賴和木圖拉等。同人雖現被迫脅。因度日艱難。常懷怨恨。據供情形。賊黨俱以耕牧為生。今廢時失事。必然內潰。似無難計。日掃除。報聞。○甲子。

上奉

皇太后自杭州迴鑾。○詣

皇太后御舟問安。○諭曰。沈德潛錢陳羣前以侍郎予告里居。曾降旨准令在籍食俸。今已晉加尚書銜。俱著照加銜食一品俸。○諭軍機大臣等。德福奏稱。平定烏什後。總辦事務。及倉庫城池卡座。俱需人甚急。如官兵員缺。必俟內地派補。未免遲滯。請先從阿克蘇官員內。挑選數人。隨大臣辦事。所用兵丁。亦交楊應琚酌派等語。烏什辦事。雖需用官兵頗多。但隨明瑞前往之人。即可令其暫行辦事。並調取所用兵丁。無不可者。不必先事張皇。向各處調取。并傳諭德福知之。○又諭據德福奏稱。卡塔海領兵前往烏什。伯克薩里等。

助馬一百匹。今因運送口糧。又與阿布都噶普爾。并請助牛二百頭。又賽哩木阿奇木伯克。阿瓜斯伯凱。署拜城阿奇木伯克。阿爾租默特。亦請每城助馬一百匹等語。薩里等急公効力。協助牲畜。甚屬可嘉。自當示以獎勵。所助牛馬。俱著賞給價值。仍將朕加恩獎賞之意。傳諭伊等知之。○吏部議准。調任山西巡撫和其束疏稱。山西長治縣丞。上年移駐西火鎮。西火鎮巡檢。掣回潞城縣虹梯關。黎

城縣吾兒峪巡檢。移駐潞城縣石城里。應各照移駐地方。鑄給印信。從之。○蠲緩江西德化縣。上年被水災民額賦有差。○旌表守正捐軀之河南臨漳縣民李喜妻張氏。○是日。御舟駐蹕塘棲。○乙丑。

上詣

皇太后御舟問安。○諭。前據福建學政紀昀條奏。敬避

廟諱御名一摺。經大學士等會同禮部議覆。請

將偏旁各字。缺筆書寫。原屬臣子敬謹之意。嗣經武英殿校改書版。推廣字類。如率銜等字。亦俱一律缺筆。朕思

廟諱御名。偏旁字畫。前代如石經刊本。俱係缺筆。自應仿照通行。但祇可令現在臨文繕寫。及此後續刊書版。知所敬避。若將從前久經刊藏之書。一概追改。未免事涉紛擾。至上中嵌寫之字。與本字全無關涉。更可無庸迴避。嗣後如遇

廟諱御名。應行敬避缺筆之處。仍照舊例遵行。外。所有武英殿頒行字樣。及紀昀所請改刊經書之處。俱不必行。將此通諭中外知之。○諭軍機大臣等。李星垣奏。代土田州岑宜棟進獻銀兩一摺。甚屬乖張悖謬。不堪之至。李星垣前此代岑宜棟奏請入覲。已屬多事。經朕批示。尚不知悛改。今復為此奏。伊若非得受岑宜棟賄賂。豈肯代伊奏請。不然。則是借此嚇詐巧取。皆不可知。李星垣已於百色封

鹽案內降旨革職著就近交與馮鈐即行拏問。會同李侍堯嚴加詳鞠如審有婪贓賄囑情弊即一面奏聞解交刑部重治其罪即訊無受賄之事。而以苗疆專閫大員如此舉動乖張亦應解部治罪。李侍堯等務須徹底根究毋得稍有寬縱著將此傳諭知之。○豁除兩淮豐利場坍沒竈地四十八頃六十九畝有奇額賦。○是日御舟駐蹕石門鎮。○丙寅上詣

皇太后御舟問安。○諭江西巡撫印務著明德前往署理俟新放巡撫到任後再回江蘇本任。其江蘇巡撫事務仍著莊有恭暫行兼管。俟明德回任交代後再行赴京供職。○諭軍機大臣等據桑寨多爾濟奏稱哲布尊丹巴呼圖克圖坐牀以來賽音諾顏部落喇嘛清蘇珠克圖諾們汗未來叩謁亦不遣人前來令堪布諾們汗尚卓特巴等差哈勒噶齊喇嘛沙喇布詢問伊託詞支吾復令沙喇布拜

見彼處一小喇嘛令其詢問前世呼圖克圖之親隨老喇嘛據云清蘇珠克圖諾們汗前曾力言此小喇嘛係哲布尊丹巴呼圖克圖之後身今未得為呼畢勒罕心存怨忿惑亂人心等語清蘇珠克圖諾們汗叩謁哲布尊丹巴呼圖克圖與否在彼無甚關礙但哲布尊丹巴呼圖克圖係喀爾喀等供養之大喇嘛從前據西藏吹鐘等以裏塘降生屬實等因具奏曾經曉諭四部落四部落會盟迎請

坐牀今清蘇珠克圖推戴彼處一小喇嘛為呼畢勒罕且露形跡於沙喇布倘喀爾喀等妄生疑慮於事大有不便著交將軍成衮扎布派侍衛台吉各一員將清蘇珠克圖處小喇嘛護送來京如尚未出痘即送至熱河俟朕看視後再為定奪將此傳諭桑寨多爾濟等知之。○以甘肅慶陽協副將祖雲龍為湖廣鎮筸鎮總兵。○是日御舟駐蹕嘉興府北教場。○丁卯諭軍機大臣等卞塔海等奏擒

獲烏什回人額伊敏供稱駐劄大臣等從前派出屯田回人前往伊犁所購馬匹牲畜及採買官糧均未給價又將瘦羊四百隻每隻令回人繳價四兩此項銀兩俱係哈密回人侵蝕至運送沙棗樹料之時賴和木圖拉兄弟謀逆伊父額色木圖拉阻止不從因在素誠署前放火拆屋素誠與阿布都拉殺賊數人後見賊勢愈衆先殺其子復行自盡阿布都拉被擒以女與賴和木圖拉之子為妻始未殺害等語前據捉生詢問阿布都拉被回人拘禁朕尚以阿布都拉係玉素布之弟必不肯屈節今觀伊平日縱容所屬侵蝕回人銀兩又納女於賴和木圖拉希圖臨難苟免此與叛逆何異豈可以其為玉素布之弟遂從寬貸著傳諭明瑞伊至烏什之日務將此等情節查訊明確若果所傳不妄非獨逆回等當族誅示懲即阿布都拉亦當明正典刑其運送木植累派回人之處俱著查明具奏

○又諭據德福奏稱卡塔海等拏送烏什賊人數名交薩里訊問等語卡塔海等一有俘獲即應研訊情形乃轉送德福德福又委之薩里據所供亦無關緊要何不於軍前正法又煩遠送朕意或越將軍大臣等未至之先揚我軍聲釋放伊等同城令其傳說使賊人內潰此亦取烏什之一策卡塔海總未計及看來伊識見甚小不過接戰數次即束手無策徒日望援兵之至此時倘逆回等聞風免脫又如雅爾哈善之取庫車則伊等罪尤難逭且辦理烏什亦不必定以克城為急惟嚴加防範俾無從得食自可計日就擒俱著傳諭知之○大學士管兩江總督尹繼善等奏據浙江學政錢維城奏請勅發御製詩初集二集御製文初集各一部交直省布政司照頒發經書例一體刊行應如所請廣為刊布以式士林得旨准其刊布著向武英殿請領○戶部議准大學士管兩江總督尹繼善等

疏稱鳳陽長淮二衛坐落壽鳳等州縣暨本衛屯田前據漕運總督楊錫紱題請每畝酌議徵津一分以濟漕運查較別衛屯田每畝三分六分以及糧一差一者所徵猶薄且有益窮丁應請如該漕督原議按畝徵解給丁辦運從之○旌表守正捐軀之安徽阜陽縣民邢連舉妻李氏山西平遙縣民張秉恩妻李氏陝西邠州民索學聰妻韓氏○是日御舟駐蹕南斗圩○戊辰

上詣

皇太后行宮問安○諭江西巡撫員缺著明山調補廣東巡撫員缺著王檢調補湖北巡撫員缺著李因培補授明山接到諭旨即赴江西新任廣東巡撫印務著總督李侍堯暫行兼管王檢現署湖南巡撫俟圖勒炳阿病痊後再赴廣東新任○又諭食二兩錢糧水手頭目呂聖林劉星太等俱賞給八品頂帶每月仍加賞給錢糧一兩○又諭京城水手網

戶著加恩各賞給一月錢糧江南水手頭目等各賞給一兩重銀鏹兩個水手等著賞給一兩重銀鏹各一個拉緯河兵各賞一月錢糧○是日駐蹕蘇州府行宮翼日如之○已諭曰范時紀著調補倉場侍郎其工部侍郎員缺著李宗文調補禮部侍郎員缺著程巖調補仍留直隸學政之任○大學士傅恒等奏江蘇學政李因培奏宋臣朱長文樂圖書院文天祥專祠請勅賜扁額臣等承旨恭擬呈覽至韓世忠祠廟乾隆十六年已恩賜扁額惟拉緯尚虞薪米請交地方官修理得旨應修理者修理尋賜朱長文樂圖書院扁曰道園養素文天祥祠曰正氣歲仁○伊犁將軍明瑞等以伊犁河新築滿洲駐防城及喀什回人新築城工告竣奏請賜以嘉名尋定伊犁河駐防城曰惠遠門東曰景仁西曰說澤南曰宣閨北曰來安喀什回城曰懷順○明瑞又奏前遣觀音保領兵先往烏什應

援二月二十五聞烏什大臣被害卞塔海未能即獲賊首臣應領兵前往除愛隆阿巡邊所領兵一千二百名。觀音保赴援兵五百名外。臣派滿洲索倫察哈爾共兵一千一百餘名。與阿奇木伯克公茂薩領回兵二百名。於閏二月初五起程。又派素尼爾圖往迎愛隆阿。如未起程。不必令喀薩克等聞知。惟密告綽克托。即回伊犁駐劄。又現在官兵漸集。恐逆回聞風。逃入布魯特等處。已行文德福與納世通會商堵截。如兵不能分。俟觀音保到日商辦。報聞。○庚午。

上詣

皇太后行宮問安。○諭吏部侍郎員缺著范時綬補授。仍兼鑲藍旗漢軍副都統。○軍機大臣等議奏。前據黑龍江將軍富僧阿等奏稱。該管兵內有應代祖父賠還銀兩。請免息。將本銀展季扣還。官員亦照此例。於季俸內坐扣。兩月歸還。新放新挑官兵。遇婚喪賞借銀

者。不必待下季。即將庫貯銀動借。當議此事可行。令將庫貯銀數。數借與否。聲明再議。茲據查明黑龍江等處所收滋生息銀足數。賞借。應如所請。兵丁代扣銀兩。免息展季扣本。前鋒領催。每季扣銀四兩。馬甲三兩。水手匠役。一兩五錢。官員每季坐扣兩月俸銀。歸本。新挑新放官兵。應賞借者。即動項借給。報聞。○戶部議覆四川總督阿爾泰奏。稱成都新添移駐官兵。需米較多。購雜維艱。經按察使

石嘉禮奏。請將應支口糧。半給折色。半派附省州縣。將額徵地丁銀。改徵米石。運支奉旨。交議。事屬可行。請如該按察使所奏。改運搭放。並加徵一五耗米。以為運費。其運米照運金川糧例。每石每站給價一錢。稍遠州縣。耗米不敷。運脚者。以路近州縣有餘耗米撥補。又貯米倉廩。除將省城府縣及滿城內共舊倉七十餘間。量修外。添建三十間。此項兵米。責令成都府知府。督同理事同知。經理府經

歷管者倉夫斗級於成都府及事簡州縣額設內酌撥至乾隆十二年原任副都統卓鼐奏請動項交成都府屬州縣分買米二萬石酌放現既改徵一半米石此項應停止均應如所請惟運腳未便以附近州縣援運軍需例一律支銷應令該督分晰該州縣經由水陸程站妥酌冊報再議從之○又議准廣西巡撫馮鈐疏稱粵西慶遠府屬河池州響水廠銅礦開挖有年地力漸薄委員查勘近年產銅衰應封閉從之○詔除湖南武岡州上年水衝難墾民屯田一項六十一畝有奇額賦○是日駐蹕靈巖山行宮○辛未遣官祭明太祖陵並遣官至晉臣卞壺宋臣曹彬明臣徐達常遇春李文忠方孝孺等及故總督于成龍傅臘塔等祠墓拈香奠酒○諭軍機大臣等向來軍機大臣所奉寄信諭旨該督撫等具摺覆奏時止稱接准廷寄及軍機處字寄並不書寫承旨銜名於體制殊未允協

嗣後凡各省督撫等接准軍機大臣遵旨寄信傳諭有應具摺覆奏者俱著將寄信內所開承旨人名一一開寫不得但稱廷寄及軍機處字樣可於奏事之便傳諭各督撫一體通傳應行奏事之各該衙門遵照○是日駐蹕蘇州府行宮翼日如之○壬申諭軍機大臣等納世通奏領兵至烏什與卞塔海會合攻城擊敗賊人等語看來賊勢窮蹙聞我兵陸續前往必畏懼潛逃今卞塔海防範既嚴縱有逃脫者不過往布魯特等部落伊等烏敢容留倘稍有抗違自可一併辦理至烏什回人所傷官兵事定後自當查明優卹惟素城咎由自取不得入於請卹之數○又諭曰德福奏稱巴什雅克瑪駐劄卡座侍衛巴哈布同護軍兆明額等十二人至阿克蘇告稱伊等前往烏什支領錢糧夜半聞亂即緹城約會卡上人等前往應援行至古古爾魯克因附近回人俱亂更相爭戰護軍校察靈阿等

八人陣亡。餘人脫出稟報等語。巴哈布等之言。未可遽信為實。但察靈阿等。如果遇賊陣亡。著明瑞等。辦理烏什事竣後。詳查奏請優卹。○癸酉。

上詣

皇太后御舟問安。○阿克蘇辦事副都統卞塔海等。奏報侍衛訥蘇等。暨庫車阿奇本伯克鄂斯瑞等。勦賊功次。得旨。此次進勦賊人之管隊侍衛訥蘇等。及各城伯克奮勉可嘉。著

明瑞。納世通等。存記。俟平定烏什後。一體奏請交部議敘。○旌表守正捐軀之江蘇丹徒縣民將以仁妻田氏。山東金鄉縣民王士奇女王氏。○是日御舟駐蹕十里亭。○甲戌旌表守正捐軀之江蘇無錫縣民朱子遠妻陳氏。○是日御舟駐蹕政成橋。○乙亥。

上詣

皇太后御舟問安。○喀什噶爾叅贊大臣納世通。奏前奏派翼領良福。領兵堵賊。因尚未前

來。親領兵往禦。嗣良福兵到。令往防巴什雅克瑪一帶。臣於初七日。奪取城西之山。殺賊三十餘名。賊自知罪重。據險死守。今伊犁兵將次到齊。俟觀音保至日。選兵防守要害。又希布察克布魯特散秩大臣阿奇木冲噶巴什布魯特比阿瓦勒各領布魯特兵前來。呼什齊部落那喇巴圖之姪。亦願隨軍効力。當加獎諭。令與我兵。一體支給行糧報聞。○蠲緩江蘇上元。江寧句容。江浦六合等五縣上

年水旱災民額賦。分別給賑。有差。並緩徵勘不成災之海州本年地丁銀米。及節年舊欠錢糧。○是日御舟駐蹕三義閣。○是月安徽廬鳳道兼管鳳陽關稅務卓爾岱奏。臣道任養廉。儘數公用。所有本年關任養廉銀六千兩。辦公銀六千兩。毋庸支領。得旨。嗣後於關任養廉內。每年賞汝一千兩。即後任亦照此辦理。○湖廣總督吳達善奏。二月初六日。在東省迎鑾。扈從鎮江疊蒙召見。復荷賞賚。於

閏二月初六日回任。得旨覽。今用李因培為湖北巡撫。此人甚能辦事。學問亦好。但未免自恃其才。好居人上。又係初任民事。一切汝宜留心。若有不妥。善為規勸。彼若不聽。據實奏聞。此人久未擢用。亦欲折煉其氣質。今覺比先改觀。但恐其志滿。則終於易盈。負朕造就之意耳。○大學士管陝甘總督楊應琚奏。烏什逆回叛亂。經德福調取伊犁。喀什噶爾。葉爾羌。庫車等處兵。而哈喇沙爾庫車辦事大臣明普等亦率師隨往。查哈密庫內存貯火藥尚多。臣飛咨哈密辦事道員等酌撥星解阿克蘇備用。得旨。似伊等如此張皇之事。卿亦不權其輕重。以驚無知衆人乎。又有何大事。料今早已定矣。實可不必。○陝西巡撫和其衷奏。藩庫耗羨銀內有無定公款一項。向來陝省官員遇修署等事動借。僅有出借。達部之咨。無扣完還項之案。請嗣後借支銀數不得逾千兩。分限三年扣還。並先將支借

緣由隨時咨部。俟扣清歸款後報銷。報聞。○四川總督阿爾泰奏。灌縣原存松潘茂州。汶保等縣溢額穀一萬九千九百餘石。前經奏明。今汶保茂各州縣民願領借者。呈報該地方官給照。票自行赴灌領借。秋收後以小麥一石。或莖子一石八斗。抵米一石。即於原籍徵還在案。現屆春耕。各該處糧價漸增。應飭該管道府督率州縣妥協查辦。報聞。○又會同提督岳鍾璜奏。緋斯甲布等九土司會攻金川郎卡。節次小有殺獲。現訊金川逃出男婦。據供金川刮耳崖一帶年歲歉薄。情形甚苦。且聞逃投各土司者均有賞賜。因逃求生等語。查毗連金川之黨壩小金川一帶。雖亦間有歉收處所。各土司通融交易。糧食尚可接濟。金川歲歉。且被九土司圍困。不能運糧赴巢。窮乏乏食。諒難支持。應乘此青黃不接之時。一面招徠。一面進攻。報聞。○兩廣總督李侍堯奏。崖州實兵八百一十二名。每年

所領兵餉。共折本色。買食維艱。查該營現存公費銀。一千一百餘兩。請酌買穀石。建倉分貯。按年出借。扣餉買還。尚餘公費。留為修補軍裝之用。得旨。如所議行。

實錄卷三十三

三十三

大清高宗法天隆運至誠先覺體元立極敷文奮武孝慈神聖純皇帝實錄卷之七百三十一

大清高宗法天隆運至誠先覺體元立極敷文奮武孝慈神聖純皇帝實錄卷之七百三十二

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭部外處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣謹稽

總裁官經筵講官太子太傅文華殿大學士文淵閣領閣事稽察欽奉 上諭部外處管理刑部戶部三庫事務

世襲騎都尉軍功加十九級隨帶加二級又加二級臣謹稽內大臣戶部尚書總纂滿洲都統軍功紀錄五次

尋常紀錄十四次臣謹稽經筵講官太子少保工部尚書紀錄六次臣謹稽纂奉

敕修

乾隆三十年乙酉三月丙子朔

上奉

皇太后渡江至金山行宮駐蹕。○

上幸焦山。○諭軍機大臣等。納世通等奏稱。辦理烏什官兵。現有一千八百餘名。已足敷用。伊犁事務緊要。明瑞可毋庸前來。止須撥馬四五百匹接濟。已由驛六百里行文知會等語。明瑞係節制各城將軍。遇此等情事。理應前往查辦。納世通行文阻止。甚屬錯謬。諒明瑞未必因此徹回。即一時所見未到。亦必作

速前往。一切事宜俱遵照陸續所降諭旨辦理。併傳諭納世通。朕命明瑞前往。不獨藉壯軍聲。兼以查覈起釁情節。即烏什平定。伊仍有應辦之事。何以行文阻止。顯係納世通視辦理烏什事甚易。恐明瑞與伊分功。懷此伎心。何由集事。奏內又稱。葉爾羌派來兵丁二百名。甚屬平常。已將觀音保所領兵丁撥往隘口堵禦。尤屬非是。觀音保所領伊犁官兵既屬可用。乃不以之勦賊。而置之閒地。豈又

恐觀音保分伊等之功耶。將來明瑞到彼。如伊等和衷協助。自當一體敘功。若果存此等小見。即幸而竣事。亦所不取。納世通著傳諭嚴行申飭。○又諭。昨因烏什回人叛亂。曾諭嚴懲首惡。宥其脅從。今卞塔海等既進攻數次。而納世通至彼。尚未竣事。是逆回等助惡者多。情節實為可惡。觀音保現在領兵前往。若烏什回人等稍知畏懼。或擒獻首惡。乘間納降。是其情尚屬可矜。倘愍不畏死。仍行抗

拒。必俟我兵全至。力竭始降。自不得概從寬貸。著傳諭明瑞。納世通等得城之後。必嚴行查辦。不可稍事姑息。至叛犯婦女。毋庸解京。現在安插之厄魯特等。鯨居者甚多。應送往伊犁酌量給配。其烏什城亦不可留。徑行拆毀。以其地給回人耕種。俱著明瑞等遵照辦理。○又諭。據納世通奏。布魯特阿奇木領兵前來協助。甚屬可嘉。著明瑞傳諭獎賞。其各回城伯克等。似此奮勉効力者。俱著分別功

次具奏。俟平定之日。從優賞賚。○加賑湖北漢陽漢川沔陽黃梅廣濟監利新裁文泉等七州縣。乾隆二十九年分水災飢民。並緩徵江夏武昌咸寧嘉魚蒲圻興國大冶黃陂黃岡蘄新水黃安蘄州石首暨武昌黃州蘄州等十六州縣衛錢糧。○是日駐蹕焦山行宮。○丁丑。

上至金山詣

皇太后行宮問安。○諭軍機大臣等。馬之騏前

奏請赴行在陛見。朕以該鎮奉到補放總兵諭旨。即應趨赴山東迎鑾。就近請訓。本屬順便。乃於駐蹕揚州之時。始具摺懇赴行在。可謂不曉事理。已令傳旨申飭。今復奏稱。赴東請訓。程途迫促。意欲趨赴江浙為詞。該鎮迎鑾請訓之奏。如果出於誠心。即當兼程趕赴。何必喋喋陳請。摺內又未將現在何處。及欲何處陛見。逐一聲明。殊屬糊塗。馬之騏。仍著傳旨申飭。○軍機大臣等奏。伊犁駐防。現奉

旨添兵二千。查成都地方。前議派西安兵往駐。因路難攜眷。奉旨停止。請即將此項兵就近改派伊犁。由京補派滿洲蒙古兵往駐西安。從之。○是日。駐蹕金山行宮。○戊寅。

上奉

皇太后渡江登陸。幸江寧府。○詣

皇太后行宮問安。○戶部議准。雲貴總督劉藻疏稱。東川新局五十鑪。每年應支炒銅工費。前因正鑄內。已全年支給。題明將加卯項下

炒費節省。今正鑄減半。將加卯抵補所有炒費。應按年覈增。從之。○工部議准。江南河道總督高晉疏稱。外河廳屬之清口東西壩。係蓄清抵黃。利漕濟運。最要關鍵。上年洪湖水勢長發。應拆長東壩二十四丈。西壩六丈。俟今歲交伏後。湖水由清口暢出。會黃東注。入秋水勢稍落。復接長東壩二十四丈。西壩八丈。酌留口門十七丈五尺。以資收束。從之。○旌表守正被戕之湖南臨湘縣軍犯李四桂

妻侯氏。○是日。駐蹕龍潭行宮。○己卯。

上詣

皇太后行宮問安。○是日。駐蹕棲霞行宮。翼日如之。○庚辰。吏部議准。雲貴總督劉藻奏稱。雲南之廣南。元江。鎮沅。三府。并緬寧通判。巡檢。雲州知州。吏目。他郎通判。寶寧縣知縣。典史。元江府經歷。因遠知事。廣南府經歷。鎮沅府經歷。新撫司巡檢。猛統巡檢等十六缺。均極烟瘴。請照粵西例。三年俸滿。掣回內地候

陞遺缺另行揀調從之。○又議准雲南巡撫常鈞奏稱督撫會奏事件。無論同城與否。凡彼此商定者。於摺首聯銜。未商定者。摺首列主稿銜名。會銜聲敘摺尾。事干處分分別定議。其緊要事件。不及相商。或會稿銜門意見不同。均照在京九卿會議例。另摺陳奏。從之。○戶部議准雲貴總督劉藻疏稱雲南省臨二鑄局。原定米炭價不敷。鑄戶賠累。請照東川大理例。每鑪每卯。加錢四串。從之。○蠲緩

安徽桐城。太湖宿松。望江。貴池。銅陵。東流。當塗。蕪湖。繁昌。無為。廬江。巢縣。和州。含山。及安慶。建陽。廬州。等州縣衛。乾隆二十九年。分水災。民屯田地。額賦有差。并緩徵被旱。勘不成災之鳳陽縣。新舊錢糧。舊欠籽種口糧。○旌表守正捐軀之河南滑縣民楊席住妻蒙氏。○辛巳。

上詣

皇太后行宮問安。○祭

先蠶之神。遣妃恭代。皇后行禮。是日駐蹕江寧府行宮。至甲申。皆如之。壬午。

上詣明太祖陵奠酒。臨視織造機房。幸大學士管兩江總督尹繼善署。伊犁將軍明瑞奏。臣領兵至穆素爾嶺。准納世通咨。會現兵已數進。勦止。臣不必前進。祇須協濟馬匹。臣思先派觀音保帶往之兵。俱已撥防隘口。進勦者半係回人。及布魯特兵。不無疑慮。且倉卒撤回。恐沿途回人等妄猜伊犁有警。於事有礙。應帶兵前往駐阿克蘇烏什之間。相機應援。並可以壯軍勢。至馬匹現可通融。已行文納世通等。到日商辦。輸軍機大臣等。昨因觀音保所領之兵。納世通不用。以進勦令其遠防要隘。又咨行明瑞。不必前來。種種錯謬。已傳諭申飭。且謂明瑞未必因此撤回。今據明瑞所奏。甚合朕意。納世通已與賊人攻戰數次。尚未竣事。倘明瑞不行前往。更當

何若。除遵照陸續所降諭旨辦理外。看來回人以耕種為生。既防其要隘。不能脫逃。而農時又失。自然內潰。今納世通惟知急攻。與賊相持。受其誘敵之計。翻覺彼逸我勞。明瑞至烏什時。宜知所鑒。再納世通奏稱。觀音保領兵進攻。因厄魯特兵先退。以致受傷等語。所言未足深信。即厄魯特等果有先退情節。此時且不必深求。或係伊等推諉脫卸。則尤失人心。併著明瑞酌量查辦。○又諭曰。納世通

等奏。與觀音保會合攻城。觀音保受傷。護守礮位兵丁。為賊所襲。失礮一位。卞塔海亦奏稱。從前伊與賊戰。失礮三位。俱奏請議處。進剿賊人。轉致失我軍器。罪固難辭。然尚屬事之所有。但卞塔海一有此失。即應具奏。何以遲延至今。待納世通有失礮之事。始行陳奏。其意圖隱飾。已可概見。至納世通之罪。則又並不在此。既據奏明。俱著明瑞於辦理烏什竣事後。再行查叅請旨。○吏部奏。雲南巡撫

常鈞。咨稱。雲南巡撫官銜。及勅書關防。均有兼建昌畢節等處。及川貴兵餉字樣。查建昌隸四川。畢節隸貴州。川貴兵餉。不由雲撫督辦。應刪節。照各省巡撫添注糧餉字樣。從之。○旌表守正捐軀之直隸元城縣民馮小妻郭氏。山西五臺縣民李量小子妻智氏。○癸未。

上閱兵。○軍機大臣等會議。據安徽巡撫託庸疏稱。安省各屬倉穀。因撥賑缺額四十萬石。急須買補。但近年穀價昂貴。定例米一石。并腳價一兩二錢。不敷買補。請照前撫潘思榘等奏。准收捐本色例。徽寧等屬六縣減四收捐。其餘各屬。照從前鳳潁例。減三粟穀兼收。外省貿易人民。亦准報捐。應如所請。惟外省商賈。非有糧人。買穀報捐。必致市價更增。且恐私交折色。州縣官轉買滋累。應不准行。從之。○甲申。

上詣

皇太后行宮問安。○調廣西巡撫馮鈴為湖南巡撫。以陝西布政使宋邦綬為廣西巡撫。湖南按察使湯聘為陝西布政使。安徽寧太道沈世楓為湖南按察使。○乙酉諭江蘇安徽進獻詩賦諸生考取一等之舉人鄭澧張熙純俱著授為內閣中書。遇缺即補。鮑之鍾金榜秦潮周發春吳楷洪朴陳希哲蔣寬劉種之俱著特賜舉人。授為內閣中書。學習行走。與考取候補人員。挨次補用。其二等之程世

淳等二十一名著各賞緞二疋。○諭軍機大臣等。據成衮扎布等奏稱莫尼扎布至額爾齊斯。都爾伯勒濟等處驅逐哈薩克游牧人等。哈薩克哈爾糾巴圖魯將伊甥厄魯特沙喇額木根妻子九口。巴爾哈巴圖魯將厄特持波羅勒岱妻子六口。沙爾拜將厄魯特巴朗等獻納。例應賞賚。但伊等漸次闖入內地。臣等惟當示威驅逐。應賞之項。請傳諭伊犁將軍等賞給等語。哈薩克等無知。現於額爾

齊斯等處游牧。方且嚴行驅逐。若由烏里雅蘇台賞賚。伊等將益啟僥倖之心。成衮扎布等所見甚是。著傳諭明瑞曉示哈薩克來人云。汝哈爾糾巴圖魯等獻納厄魯特人口。烏里雅蘇台將軍大臣等已移咨前來。汝哈薩克等往日獻納厄魯特人口時。大皇帝均加恩。今於此處賞賚。烏里雅蘇台將軍大臣等不與聞。今已有諭旨。令此處獎賞爾等。嗣後不可在額爾齊斯等處游牧。如游牧時。烏里

雅蘇台將軍大臣等必行驅逐。於爾無益。曉示後。將賞項交哈薩克來人帶回。併傳諭成衮扎布等知之。○又諭曰。額敏和卓奏稱伊行抵游牧。稍加整頓。趨赴烏什等語。額敏和卓聞烏什有事。即請前往。甚屬可嘉。計此時明瑞應亦辦理將竣。著傳諭額敏和卓。若明瑞尚須協助。伊即暫駐烏什軍前。其喀什噶爾與霍罕。額爾德尼部落相近。亦關緊要。烏什事竣。額敏和卓仍以叅贊大臣駐劄辦事。

王素布俟額敏和卓往代後。再回哈密。○又諭。昨據卞塔海等奏稱。烏什逆回。潛遣安集延回人。求援於霍罕。額爾德尼等語。朕意以大兵前抵烏什。應遣人向額爾德尼索取。若此時額爾德尼。早將此數人縛獻。或遵檄付還。俱可勿論。倘索而不與。即屬有心抗拒。應將霍罕一併平定。另授伯克。今明瑞以將軍領兵。如遣人前往。則額爾德尼。更知畏懼。即烏什逆回等。望救之心亦絕。或可自潰。至克取烏什之道。不在攻城。惟嚴防逃走。要隘擇近城水草之地。牧養馬匹。牲畜。賊衆飢疲。無措。庶不致大煩兵力。併著傳諭知之。○又諭。曰。納世通等奏稱。閏二月十九日。領兵進攻烏什。賊人數次潰敗。追至城壕。勦殺頗多。雖甚驚懼。但恃險死守。難於即克。聞明瑞領兵。二三日內可至。即會商進剿。務期殲滅。以安各城反側之心等語。近據納世通等將進剿烏什。無須明瑞前來。行文阻止之處。具奏。朕

即屢加申飭。以納世通所見非是。觀其行止。斷不能竣事。此次所奏。愈覺不堪。明係始以辦理烏什為易。慮及分功。今乃知其難。又復巧為掩飾。甚屬無恥。至所稱安撫各城。尤為悖謬。烏什業經叛亂。尚何安撫之有。若指其餘各城。則現在回人。俱感激朕恩。捐輸口糧。牲畜。領兵協助。又何待於安撫。蓋納世通方寸已亂。將効力回人。俱視為敵國。尚可倚以集事乎。即如攻城一事。若克一城。又有一城。不得不急圖進取。今死守者。只此一城。自當俟其困極自潰。而納世通等。株守城下。兵疲力竭。如此是納世通等。全不曉事。著傳諭明瑞。此事惟伊是賴。一切俱自行決斷。不可稍有推諉。又據德福奏稱。烏什未亂。十日前。有布魯特等。乘間將阿奇木伯克阿布都拉所牧羊隻。及牧人家屬十五名。口掠去等語。此等布魯特。雖事發在前。而相去不遠。焉知非賊人等。已陰相約結。乘釁搶掠。明瑞到彼務

將此事情節查明辦理。將起意為匪之人。正法示衆。德福又稱。納世通所失礮位。並非大威遠礮。從前係伊誤奏等語。近因納世通。下塔海俱將失礮之處。奏請議處。已交明瑞查辦。並著於竣事後。查明參奏。○又諭曰。納世通奏稱。噶岱默特。遣往額德格訥。薩爾巴噶什偵探。回人愛伊特默特。路遇烏什回人等。揚言布魯特。俱已疑貳。伊前至車哩克齊等游牧。曉示車哩克齊。即遣伊弟海蘭達爾前來求見。又請示聽候調遣等語。車哩克齊素稱恭順。茲復知奮勉。懇請自効。甚屬可嘉。著加恩賞緞四端。伊弟著賞緞二端。愛伊特默特。著加恩賞給七品頂帶。遇有小伯克缺出。即補。仍賞銀二十兩。○戶部議准。直隸總督方觀承疏。稱喀喇河屯廳屬之化育溝。向因有駐防兵。附近旗民。開設鋪面。額徵斗稅。今駐防兵已盡發伊犁。補額京兵。又改駐熱河。鋪面關閉。原設斗稅。應裁豁從之。○是日。駐

蹕棲霞行宮。○丙戌。上至七里港祭江神。○奉皇太后渡江。○詣孝賢皇后忌辰。遣官祭陵寢。○是日。駐蹕金山行宮。○丁亥。遣官祭先農之神。○諭。據留京辦事王大臣奏。稱果郡王於三月初八日申刻薨逝等語。朕啟鑒時。聞伊病重。朕即加恩封為郡王。原期伊聞之欣悅。病可速痊。今聞薨逝。深為惋惜。著加恩一切應辦事宜。俱照親王例辦理。遣六阿哥成服。其餘阿哥等於祭祀日前往。○諭軍機大臣等。據德福奏。稱現飛咨葉爾羌。開展哈密等處。令速撥鉛彈火藥等物。解送軍營備用等語。鉛彈等項。雖應籌備。但現辦烏什回匪。不必攻城。惟嚴守隘口。勿令竄逸。且擾其耕作。糧盡時。自然內潰。前經屢降諭旨。今

德福咨取鉛彈等項甚屬不曉事體既已咨行亦止可如是辦理嗣後斷不可仍前張皇著傳諭明瑞德福等知之○是日駐蹕高旻寺行宮○戊子

上詣

皇太后行宮問安○諭軍機大臣等納世通奏稱噶岱默特遣往額德格訥偵探回人聞烏什逆回等散布流言即曉示車哩克齊已令伊弟前來聽候調遣雖此等造言逆犯應向額爾德尼索取但現在進攻烏什伊若稍有支吾又須辦理請俟事竣後再辦等語前因烏什逆回遣安集延回人向額爾德尼求援朕即諭伊等宜遣人索取倘支吾不行傳送則將額爾德尼一併辦理續因伊等種種錯謬又諭明瑞當檄行霍罕索取逆犯以壯軍聲今納世通轉以恐生事端為言真怯懦不堪之至著傳諭明瑞速遵前旨索取再納世通奏卡塔海於二月十九日閏二月初六日

兩次為賊所敗而卡塔海前奏並未及此如納世通之言屬實卡塔海固難諱飾之罪若納世通與卡塔海不和意圖誣陷則其罪尤為重大俱著明瑞查明具奏○又諭據明普奏稱將軍叅贊等領兵俱到烏什現在時方東作納世通飭伊起程回哈喇沙爾等語明普實一無用之物且試思伊至烏什究為何事彼處事體正資辦理豈可遽舍而回即使納世通冒昧令回亦宜請留奮勉行走若謂耕作緊要儘有耕作之人豈需伊親耕乎明普明知烏什事較難辦故借納世通之言即回甚屬不堪著嚴行申飭不准回哈喇沙爾○兵部議准原任江西巡撫輔德奏稱江西驛站船內紅座船六十不堪應用且近年差少應裁又茅柁船四十酌於南昌省次留二十南安贛州二府各留五餘十隻裁從之○是日駐蹕天寧寺行宮至庚寅皆如之○己丑諭行在禮部查奏遲誤

泰山祭文。請將該地方官交部察議。一摺。此事固由地方官遞送遲誤。而禮部此次辦理諸事。總屬錯謬。即如思賢村。距東省尚遠。何不待該撫崔應階迎鑒時。禮部將祭文面交該撫。甚屬易事。而必於途次。由鋪交發。以致地方接遞。輾轉遲延。彼此俱難辭咎。行在禮部堂官。及遞送遲誤之地方官。均著交部照例察議。至此項祭文。禮部於正月二十日。交任邱縣遞送。何以直至二十六日。始遞到德州。

其因何遲誤緣由。著交方觀承查奏。再同時發去致祭

孔子周公祭文二道。曾否如期齋到。抑或亦有稽誤。而派往致祭之人。未經奏聞。並著該撫崔應階查明具奏。尋直隸總督方觀承奏。查自任邱縣至山東德州。遞送程途。惟故城縣無稽延。餘俱遲誤。當將各該州縣職名。送部照例察議。沿途鋪兵責革。報聞。山東巡撫崔應階奏。致祭

孔子周公祭文二道。係同祭

泰山文。裝置一封。於正月三十日。遞至臣署。包封轉寄。至二月初三日。臣於永安莊地方。始行接到。已逾致祭日期。得旨覽。○兵部等部議覆。直隸總督方觀承疏。稱永定等河堡船板夫。前經奏裁。並將永定河子牙河千總二缺。把總二缺。裁汰。改設守備一員。駐劄天津。隸天津道管轄。所有新設營制。及一切河道隄工各事宜。應酌定。○南運河千把總。并文武各汛河兵。及天津道屬各河工。均令該守備經管。鑄給南運各河營守備條記。○該守備衙署。應令天津縣擇地估建。未建以前。令暫賃民房。每季給銀八兩。○南運河歲搶各工。向係地方印官估報。由廳轉報天津道親勘。請嗣後先委該守備查勘。結報天津道。再親覈勘。○南運河子牙河各汛千把總優劣。暨新舊交代。令該守備督覈。戰守河兵。遇更換選拔。令覈轉。天津道衙門經制外委。并

額外各外委俱令差管並兼管子牙淀河工程新建海河疊道天津五閘一切修防啟閉事宜。南運河各工文汛以丞倅為專轄守備為兼轄遇漫溢丞倅正叅守備附叅武汛以守備為專轄丞倅為兼轄遇漫溢守備正叅丞倅附叅。該守備俸薪馬乾等項銀兩

每年彙入豫估冊內派撥沿河州縣徑解天津道該守備按季赴道請領其餘各汛弁兵俸餉仍照舊令各州縣赴道領給均應如所

請從之。○庚寅諭近因果郡王薨逝二子尚

幼永興不能辦理王府家務特派英廉同和爾精額料理此時王府太監與謙妃位下太監等借端侵漁通同作弊皆不可知英廉尚未到京和爾精額宜留心詳查嚴加約束俟英廉回京後一同辦理一切務期於王之子有益勿得少存姑息。○大學士管兩江總督尹繼善奏江南京口駐防漢軍協領叅領防禦等員因出旗改補綠營奉旨俱發江南以

叅遊守備補用查此項人員俱曾習水師若僅以陸路題缺補用江省現有豫保人員恐守候無期請嗣後除協領改補叅將仍俟陸路缺出題補外其叅領改補遊擊防禦改補守備均無論陸路內河與豫保人員輪流間補得旨允行下部知之

實錄卷之三

五

大清高宗法天隆運至誠先覺體元立極敷文奮武孝慈神聖純皇帝實錄卷之七百三十二

大清高宗法天隆運至誠先覺體元立極敷文奮武孝慈神聖純皇帝實錄卷之七百三十三

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件庫管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件庫管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書兼藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆三十年乙酉三月辛卯

上詣

皇太后御舟問安。○諭據禮部奏稱果郡王薨逝除照例傳行王大臣官員齊集外固倫公主和碩福晉以下縣君奉恩將軍之妻以上應否齊集之處請旨等語夫郡王薨逝公主福晉等應否齊集雖例應請旨亦宜分別遠近果郡王非他郡王可比况朕現在南巡必俟奏請往返多日此際齊集耶不齊集耶辦理甚屬拘泥禮部堂官著申飭固倫公主和

碩福晉以下縣君奉恩將軍之妻以上皆令齊集○又諭江南進獻詩冊入選之程晉升胡革隆王嵩高金學詩任大椿吳省蘭陳初哲吳珏趙帥汪履基洪榜姚興榮張曾敷金樞著各賞緞一疋○諭軍機大臣等明普奏稱哈喇沙爾遊擊李大勇因庫爾勒阿奇木伯克色提克體察多倫回人情形不甚安靜前來呈報伊與納世通相商暫回庫爾勒查辦等語昨因明普應援烏什忽以乘時耕種為詞欲回哈喇沙爾曾降旨申飭今既有色提克所報之言雖不可遽信為實自應前往查辦並將現在情形作速奏聞○旌表守正捐軀之直隸安平縣民李之水妻高氏○是日御舟駐蹕崇家灣○壬辰諭軍機大臣等現在西路烏什地方有應辦事務將軍明瑞暨各辦事大臣等常有馳遞摺奏著傳諭江南河南山東山西直隸陝甘各督撫通飭沿途各站凡有接遞夾板報匣務較尋常事件

更加迅速。不得稍有遲緩。○又諭曰。明瑞奏稱。烏什回人。雖係小醜。無難剿滅。但據城固守。必須攻擊。未免傷我官兵。且城內迫脅者必多。似宜設間以離其黨。從前護送伊犁屯田回人之烏什伯克呢雅斯等四十餘人。實不知叛逆情事。俱暫交薩里看守。今傳喚詢問。酌將數人帶往軍前。相機調遣。又據從烏什脫出送信之回人阿布都果普爾告稱。賴和木圖拉倡亂時。西城一帶回人。俱不願從逆。率其家屬。投向駐劄大臣。而素誠等疑惑。不肯收留。皆哭泣而去等語。昨據卡塔海將數次攻城情形具奏。朕即諭克城不必以進攻為事。今明瑞欲相機設間。使之內潰。所見尚是。前因烏什回人從逆。為之死守。自應大加懲創。但如送信回人之言。則合城並非同叛。此等挈眷投向駐劄大臣之回人等。若果係實情。自應從寬免死。但明瑞兵至烏什。即來歸附。始可寬貸。若抗拒如初。直待困極始

降。則又不可姑息。至阿布都果普爾脫出。先向阿克蘇報知。又詳述城中情事。甚屬出力。著加恩賞給六品頂帶。仍賞銀五十兩。○又諭。據明普奏庫爾勒阿奇木伯克色提克告稱。多倫回人情形不甚安靜。請回哈喇沙爾查辦等語。多倫回人安插已久。雖情跡稍有可疑。亦未可全信。額敏和卓熟悉回人情事。前往烏什時。著順道至哈喇沙爾。若烏什事竣。伊等安靜如常。則已。或稍有可疑。惟在額敏和卓酌量辦理。但新有烏什一事。回人等未免驚恐。當使之不覺。方為妥協。併傳諭明普諸事。聽額敏和卓辦理。不可自執已見。○是日御舟駐蹕海棠庵。○癸巳。

上詣

皇太后御舟問安。○諭軍機大臣等。據侍衛保寧奏稱。伊帶領入覲回人內。有伊什罕伯克摩羅和卓。係烏什人。伊家口皆在城中。今聞信必自生心。擬將摩羅和卓暫留哈密看守。

等語。摩羅和卓雖不無疑慮。然伊究何能為。即脫逃。又將何往耶。著仍照常帶領行走。不必留於哈密。并傳諭薩瀚曉示摩羅和卓。以保寧奏伊係烏什人。請留哈密。奉到諭旨。謂烏什之事。與伊無涉。仍照常行走。一面另派委員。酌量帶領保寧辦理。過當著傳旨嚴行申飭。○是日。御舟駐蹕平橋。○甲午。諭。今年京察屆期。吏部開列在京各部院三品以上大臣。暨督撫等。奏請甄別。內閣大學士。職掌班寮。向不與列。第念大學士傅恒等。或叅贊綸扉。兼領部務。或歷膺節鉞。宣力有年。均各敬慎恪恭。克稱厥職。宜加優獎。以光鉅典。傅恒。尹繼善。劉統勳。楊應琚。俱著交部議敘。○又諭。本日吏部開列在京部院三品以上大臣。請旨。所有協辦大學士。尚書。阿里。袁。陳。宏。謀。莊。有恭。尚書于敏中。託恩多。阿桂。侍郎錢汝誠。安泰。覺羅阿永阿。均各恪勤稱職。著交部議敘。以示優獎。侍郎雙慶。此次隨從南來。

辦理行在禮部事務。總屬錯謬。即如致祭泰山。孔子。周公。祭文。均經遲誤。業據崔應階具摺請罪。五福奏聞。泰山祭文遲誤。雙慶係遣祭孔子。周公之人。又屬禮部。既不據實陳奏。於前經朕查詢。又復希圖狡辯。不可復任侍郎之職。著降四級調用。餘俱照舊供職。○又諭。今年京察屆期。吏部將在外之總督。巡撫。開列名單進呈。所有總督方觀承。蘇昌。阿爾泰。高晉。楊錫紱。巡撫明德。熊學鵬。定長。崔應階。在封疆大臣中。均屬勤慎供職。著交部議敘。以昭獎勵。餘著照舊供職。○諭軍機大臣等。刑部覈覆馮鈐審擬林亞晚戮傷胞兄林時顯身死一案。將抱持伊兄林時顯之林時達。僅擬杖徒。於情罪殊未平允。已交軍機大臣。會同行在刑部改擬矣。此案商賣房屋。由於林時達起意。先與伊兄林時顯角口。復同林

亞晚徑往分頭拆屋。及林時顯毆打林亞晚時。又將伊兄背後抱住。以致林時顯束手就斃。是林時達之情罪較林亞晚相去無幾。即以林亞晚業已定擬斬決。若再將林時達一律問擬。則伊同胞兄弟三人。竟無遺類。亦止應量為末減。豈可僅以杖徒完結。以致輕重懸殊。刑部為執法之司。遇此倫紀攸關之案。徒爾意存姑息。草率覈覆。將明刑弼教之謂何。又將謂朕巡方。無暇看及此等本章乎。刑

部堂官著傳旨申飭。○又諭。據卞塔海奏稱。明瑞領兵於閏二月二十七日至烏什。與納世通等會議。明瑞觀音保攻城之東面。納世通卞塔海鄂寶攻城之西面等語。明瑞已抵烏什。既經定議夾攻。何以具奏者僅卞塔海一人。著傳諭明瑞。伊知卞塔海有此奏否。如知之。何以不言。若明瑞不知。而卞塔海私自爭先具奏。不知是何意見。況此議雖定。究未舉行。即限行六百里馳奏。尤為可詫。著明瑞

據實陳奏。毋稍隱諱。此次辦理軍務。納世通卞塔海德福等乖張錯謬之處。皆交與明瑞查明參奏。但明瑞性情朕所深悉。諸事惟委靡推讓。伊若於此事不量輕重。為周旋世故之舉。斷不能逃朕洞鑒。且將來若命阿桂續查。伊能當其咎乎。至明瑞定議攻城東面。或因地屬緊要。但東路通阿克蘇。賊若逃潰。必由西走。是西面亦屬要地。納世通等又豈能防其逃逸。且盡獲要犯耶。朕甚為伊等念之。

仍將進攻情形作速奏聞。○又諭。卞塔海德福等辦理烏什一事。全無端緒。將來竣事後。伊等俱當治罪。應另行派員前往伊勒圖著在阿克蘇協同綽克托辦事。其雅爾屯田事務著安泰以參贊大臣前往辦理。前命丑達往葉爾羌辦事。額爾景額往喀什噶爾。與納世通交代。今額敏和卓已往喀什噶爾。即與額爾景額一同駐劄。柏琨著往葉爾羌。同丑達辦事。○開除山東聊城縣報墾不成熟

地二頃五十畝有奇。○旌表守正被戕之浙江臨海縣民金應吉聘妻陳氏。○是日御舟駐蹕直隸。○乙未。

上至武家墩祭。

淮神。○閱高家堰隄。○祭

河神。○奉

皇太后渡河。○詣

皇太后御舟問安。○諭兩江總督員缺著高晉補授。江南河道總督員缺著李宏調補。向來

總河事務兩江總督雖有兼轄之名究非專責。茲李宏甫由監司擢用總河現在所屬道廳多係舊時同寅恐難免有瞻徇掣肘之處。高晉久任南河於一切工汛修防素為諳練。所有南河總河事務著高晉仍行統理其河東河道總督員缺著李清時補授。吳嗣爵著調補淮徐河道。所遺淮揚道員缺著巴靈阿補授。李清時向任東省熟於運河事務而黃河隄岸機宜尚恐未能深悉此時河東總河

事務仍著李宏協同辦理。李清時即同往豫省講習河防諸務。俟伏秋汛過李宏再赴南河新任。高晉於李宏到任後即前往接受總督印務。大學士尹繼善交代事畢再行入閣辦事。○又諭曰。圖倫楚著加恩賞給副都統職銜。○是日御舟駐蹕徐家渡。○丙申。

上詣

皇太后御舟問安。○諭據舍圖肯等奏稱地震倒壞官鋪房間請動滋生餘息銀兩交與承辦滋生銀兩官員會同工部委員監修其將軍衙門等處官房請交盛京工部修理等語。舍圖肯等所奏應修各項官房及官鋪房間甚多需帑浩繁若僅委屬員承修難免浮冒開銷。所有各工著交舍圖肯倭陞額會同該部侍郎督率修理毋令下屬任意冒銷。○諭軍機大臣等明瑞奏稱三月初一日東西夾攻烏什勦殺賊衆二百餘人等語此次進攻方可謂之奮勇勦賊且奪據山隘斷其樵牧

尤為知要。觀音保負傷効力。愛隆阿在雅爾。聞明瑞前往烏什。即遣恒瑣協助。甚屬可嘉。俱賞給荷包。觀音保仍賜號卓哩克圖巴圖魯。賞銀一百兩。効力之侍衛官員兵丁及陣亡得傷人等。俱著明瑞查明。交該部分別議叙。議卹。○又議曰。德福奏。納世通調取官兵及布魯特回人等口糧一事。殊屬瑣屑。在兵丁等雖有應給之項。自當酌量辦理。何必按口計日。致滋糜費。其布魯特回人等向無給與口糧成例。不過酌加賞賚。豈可與官兵一體給與口糧。是伊等全不知事理之輕重。著傳諭明瑞。此次所給布魯特回人糧餉。俱著納世通德福賠還。○是日御舟駐蹕陳家道口。○丁酉御舟駐蹕林家莊。○戊戌

上詣

皇太后御舟問安。○諭軍機大臣等。納世通等奏稱三月初一日進勦烏什。自辰至午。衝敗賊人數次。直抵西門。未及關閉。馬上賊衆急

於入城將步下賊人踏死者甚多。官兵亦勦賊百餘名。二等侍衛烏爾圖及兵丁二名陣亡。官兵得傷者四十五名。布魯特等五名。著照納世通等所奏。將伊所領官兵有陣亡得傷効力出衆人等。俱查明奏聞。○又諭據綽克托奏。自伊犁行抵雅爾。官兵馬匹全無傷損。糧餉器什亦俱運到。等語。此次帶領移駐官兵行走。甚屬妥協。綽克托伍岱訥蘇肯俱著交部議叙。是日御舟駐蹕順河集。○已

亥遣官祭徐州府銅山縣

河神廟並遣官至山東

禹王廟

龍王廟周先賢仲子祠任子祠明臣宋禮祠

拈香奠酒尋頒

禹王廟扁曰溯源明德仲子祠曰賢詣升堂

諭曰。雙慶所遺禮部侍郎員缺著額爾景額補授。額爾景額未回京以前著諾穆渾署理。安泰所遺戶部侍郎員缺著旌額理署理。

○諭軍機大臣等。前據熊學鵬奏三月初一日以後浙江省城及各屬節次得雨四五寸不等。經朕批詢與農桑有無關礙。令其詳查速奏。迄今尚未奏到。昨布政使永德奏稱。近日雨暘時若。萊麥敷榮。漸次結實等語。浙省今年連次得有透雨。土膏最為深潤。方今萊麥將登。正須天氣晴和。以資成實。現在雨水是否不致過多。與農事蠶桑有無妨礙。春收分數若何。著傳諭熊學鵬。即速查明具奏。尋

奏三月初一日以後得雨大小四五次。初九以後晴至二十一日。復得細雨一二。次二麥正資暢發。並不過多。杭嘉湖三府育蠶之地。三月以來天氣溫暖。現屆三眠。計四月初旬內可上山成繭。至通省春收分數。紹興一府最稔。餘約七分以上。至八九分不等。得旨覽奏欣慰。○以浙江處州鎮總兵素保為山海關副都統。○是日御舟駐蹕王家莊。○庚子上詣

皇太后御舟問安。○諭由京隨來水手網戶。每人各賞給一月錢糧。江南省水手頭目等。每人賞給一兩重銀鏹一個。水手等。每人賞給一兩重銀鏹一個。拉緯河兵一千名。每人賞給五錢重銀鏹一個。○是日御舟駐蹕泃口鎮。○辛丑諭軍機大臣等。明瑞奏稱。與納世通商議。以烏什南山距城不遠。約分為兩翼。前往攻取。賊盤踞山嶺。施放鳥鎗。為我兵衝擊。敗走入城。盡奪其輜重。又焚西北門外所有水磨。棄其麥麴。計殺賊三百餘名。得傷者甚多。宗室侍衛恒璜。被鳥鎗傷陣亡。厄魯特瑯海。被鳥鎗傷墜馬。其餘得傷者十五名。似難力攻。因暫息官兵等語。逆回等怙惡不悛。必大加勦殺。始知所警戒。但烏什山險城堅。進攻不易。續據明瑞奏。遣回人等。設間以離其黨。看來此時。明瑞雖經辦理。而逆回等未必即聽其言。仍以力攻。致傷損官兵。殊屬可憫。自仍以防守要害。堵截遁逃。坐待其斃為

要。再納世通定議攻城西面。今明瑞兵至西北。未知納世通於何處夾攻。著明瑞查明具奏。至阿克蘇辦送口糧。尚覺拮据。烏什城小。被圍日久。何未見糧餉不足。而軍器火藥亦甚有餘。伊等起事時。何以能豫為儲積如此。著明瑞查明具奏。此次効力及陣亡得傷官兵。俱著交部分別議叙。議卹。○又諭曰。明瑞奏稱進攻烏什時。遣回人阿布都海色木。至城下招撫。有賊四人出應云。我等歸順以來。

久屬臣僕。安敢作逆。因哈密屬人。擾害不堪。以致犯此重罪。又抗拒大兵。除畏死之外。別無他意。俟回城商議等語。前據卞塔海奏。烏什回人因派送沙棗樹料。忽然滋事。朕即諭以查看起釁情由。必係素誠平日辦理不善所致。著明瑞查明具奏。今看回人等所告。尚將綠旗兵欺凌伊等情事。隱而未發。至阿布都拉所屬人等。任意擾害回人。素誠全未查辦。現在額敏和卓前往喀什噶爾。先至喀什。

沙爾查辦多倫回人事竣。即赴烏什。暫行協辦。額敏和卓與玉素布俱朕臣僕。練事有年。自不至縱容所屬。擾害回人。然所屬愚人不。知事體輕重。希圖小利。倚勢橫行。亦未可定。著通行傳諭。駐劄大臣等。烏什既有此等情事。可為鑒戒。將來必須留心體察。約束下人。斷不可失於防範。以致自貽伊戚。○又諭。前議雅爾駐兵。哈薩克等有小商販前來。准其貿易。至大商。則令前赴伊犁。特恐伊等因雅

爾貿易近便。遂不復前往伊犁。但哈薩克等。若以同一商販。而區分大小。未免妄生揣度。且雅爾既駐官兵。則馬匹牲隻。在所必需。惟減其價值。以運送多費為詞。聽其情願與否。即將來馬匹牲隻較多。亦可陸續解送伊犁。著傳諭。綽克托。愛隆阿等。將雅爾貿易情形。會同明瑞定議具奏。○豁除福建南安縣水衝難復民田十八畝。有奇額賦。○是日。御舟駐蹕萬年倉。○壬寅。

上詣

皇太后御舟問安。○諭據明瑞奏稱素誠在烏什。平日將回人種種科派苦累。伊父子及辦事筆帖式等任意姦淫。回人婦女此次辦送濟克得木植。素誠將伊子派出押運。沿途行李俱令回人背負。以致所派之人甚多。並將小伯克賴和木圖拉。亦行派出。而賴和木圖拉之妻。從前又曾被素誠留宿。因此蓄有嫌怨。遂至作亂。至卡塔海。領兵到烏什時。並不查訊致亂緣由。輒行施放烏鎗。至第三日。用礮攻打城門。回人始行出拒。而卡塔海。遽爾敗北。奔至七八十里之外。致將步兵百餘名。礮三座。俱沒於賊。再阿克蘇。喀什噶爾。大小伯克。平日視印房等處辦事人員。極為畏懼。而納世通。卡塔海。妄自尊大。其接見領隊大臣侍衛等。較從前軍營將軍參贊。體統尤尊。至待所屬辦事各員。反覺過優。昨觀音保援兵至彼。納世通等。即撥給回兵二百名。令供

樵汲。使用。觀音保不敢留用等語。納世通。卡塔海。素誠。俱受朕深恩。身為大臣。各駐專城。辦事乃素誠父子在烏什。任意將回人科派苦累。且姦其婦女。納世通。卡塔海。平日妄自尊大。一聽所屬官兵。將回人凌辱折挫。至辦理烏什一事。卡塔海初到時。並不查訊起釁。緣由。輒用鎗礮攻城。至賊衆出拒。又不能奮勇抵敵。竟將步兵百餘名。礮三座。俱行棄失。敗走七八十里。並將此等情節。希圖隱匿。不即據實奏聞。而納世通。領兵甫至彼處。始則恐明瑞爭功。行文阻止。繼復懇求援助。無恥實甚。彼時明瑞。若聽其阻止。竟行徹回。尚不知釀成何等事端。且正當撫輯未生事之回衆。令其傾心出力之時。反撥給觀音保回兵二百名。以備使令。是又俱何肺腑。即此撥兵一節。其平日之任意苦累。更不問可知。納世通。卡塔海。種種背謬乖張。不可枚舉。由此觀之。烏什之始。而激變。繼而聽賊猖獗。不能立

時完結者。皆伊等卑鄙無恥。庸妄僨事之所致。實堪髮指。此內素誠情罪尤屬可惡。雖經自戕不足蔽辜。著交留京辦事王大臣。將素誠家產查抄其現有之子。俱著革退差使。發往伊犁充步甲當差。納世通。卞塔海之罪。雖不至將伊子一併治罪。而伊等本身斷難寬恕。所有納世通。卞塔海治罪之處。另降諭旨。外。其二人家產亦俱著查抄。明瑞摺一併譯發。○又諭曰。永貴著前往喀什噶爾。辦理事

實錄卷五十二

七

務。其禮部尚書員缺。著託恩多署理。永貴著馳驛赴行在請訓。即往喀什噶爾。○又諭據額爾景額奏稱。現在將軍明瑞。辦勦烏什回匪。奴才將葉爾羌事務。交玉素布。富明阿。汪騰龍等。擬輕騎前往協同明瑞。辦理一切等語。烏什逆回。朕已交明瑞辦理。明瑞接旨。諒能辦理完竣。額爾景額不必前往。又近因納世通等。辦事不安。朕降旨。命額爾景額。往喀什噶爾辦事。但葉爾羌地方。亦屬緊要。喀什

噶爾。朕已另派永貴前往。額爾景額仍著在

葉爾羌駐劄辦事。○諭軍機大臣等。據明瑞查奏。素誠。納世通。卞塔海等情事。朕已節次鑒悉。故一切專委明瑞辦理。又命阿桂前往協辦。阿桂至烏什。即同明瑞傳旨。將納世通。卞塔海於軍前正法。看來烏什回人。雖罪在不赦。亦大臣等擾累所致。自宜分別辦理。著傳諭明瑞。此時如尚未克城。即將查奏情事。宣諭招撫。若抗拒如前。仍盡行勦殺。至善後事宜。已派永貴前往喀什噶爾。將來陸續辦理。阿桂著速赴烏什。一切事宜。與明瑞會議具奏。明瑞先回伊犁。阿桂留烏什數月。俟事定後。與永貴交代。再往伊犁。接辦明瑞所管事務。明瑞於來年回京亦可。俱著傳諭知之。○是日。御舟駐蹕韓莊開。○癸卯。

上至河岸祭

河神渡河。○諭曰。禮部尚書永貴。現在出差。其缺著阿里衮兼管。阿里衮未到京以前。著

託恩多暫行署理。納世通工部侍郎員缺著官保補授。○又諭曰。蘇昌等奏。福清縣知縣程廷棧。誤拏浙省逃犯。不能體察得實。率意咨解邀功。請交部嚴加議處。一摺。程廷棧尚無大過。且由誤信本犯自認。尚未定罪。並蘇昌定長。俱著免其交部議處。○諭軍機大臣等。昨據明瑞奏。稱從前下塔海領兵策應烏什時。為賊所乘。失陷步兵一百餘名。併礮三座。賴侍衛數人帶領馬兵斷後。將步兵救出。一半等語。此數侍衛甚屬奮勉。著傳諭明瑞。將各該侍衛名姓。並實有幾員之處。查明遇便奏聞。○陞任江南河道總督高晉奏。徐州毛城鋪迤東之唐家灣。引河外灘因沙淤高。河岸袤延二三十里。不加修治。勢必漸徙漸上。且逼近蔣家營。傳家窪等處。過水較多。恐致掣溜。請以二十七年。欽定徐城水誌尺寸為準。將該處河灘新淤剷平。遇水長逾誌。即開放引河宣洩。報聞。○以總管內務府大

臣四格為鑲白旗漢軍都統。調鑲紅旗滿洲副都統鄂寧為正紅旗漢軍副都統。鑲白旗漢軍副都統趙啟為正藍旗漢軍副都統。以鑲白旗漢軍都統王進泰署鑲紅旗漢軍都統。鑲白旗蒙古都統扎拉豐阿署鑲黃旗滿洲副都統。○是日。駐蹕雲龍山行宮。○甲辰上至河岸祭河神。渡河。○詣

皇太后御舟問安。○諭。昨據蘇昌定長等奏。福清縣知縣程廷棧。誤拏天台縣逃犯丁欽顯。經解浙審明。請將該縣程廷棧及該督撫交部分別議處。一摺。朕已將該縣及督撫等俱免其處分。又明德回秦陝省。盤獲胡中藻之子胡得玉。經刑部審係錯誤。自請交部議處等語。亦經批示寬免矣。州縣官尋常誤拏案犯。原有應得處分。朕於此二案。特降旨寬免者。蓋以地方遇有隔省逃犯。及盜匪逆犯。有司果能留心盤詰緝拏。使兇徒無從竄逸。漏

綱本屬能事。是以過年。或降旨咨送引見。或交部議叙。以示獎勵。若以偶爾錯訛。轉即因此獲咎。則必皆自畏處分。孰肯復行留心緝匪乎。第無識之輩。或以地方有司。因有獲犯。擢用優叙之例。未免喜事邀功。及誤拏人犯。又不予以議處。恐故輕累無辜之漸。則全不達事理矣。不知州縣膺百里之寄。境內鉅細。孰不當實力體察。其有能詰暴燭奸。申國憲而除民患。豈可不獎錄以勵庶僚。若畏謬悠

之口。凡有見聞。概置不問。於隣封過分吟域。奸盜將託為遁逃藪。則是因噎廢食。國家亦安賴此庸碌無能者為耶。至歷來所辦盤獲案犯。皆係反覆窮究。使無枉濫。並未嘗一就拘執。即真重典。即如閩省拏獲之丁欽顯。到案自行供認。及移解浙省。經訊明實係雲和縣之劉年學。而非天台縣逃兇丁欽顯。即予省釋。陝省拏獲之胡得玉。亦係該犯自認不諱。隨即行查江西。則該犯所供姓名事蹟。盡

屬子虛。旋經刑部審明實係山西民人張機。而非逆犯胡中藻之子。亦不復擬以緣坐。皆未嘗波及無辜也。是惟在各省督撫。凡遇此等案件。必詳悉根究。務得確情。使實者不致倖逃法網。虛者亦不令誤罹刑書。而有司復隨時實心體訪。奮勉有為。毋或稍懷瞻顧。庶吏治民生。均有裨益。設有不肖州縣。以毫無影響之事。羅織平民。妄希進取。一經審實。是自速罪戾。又不得以閩陝二省之案藉口也。

朕辦理庶務。勸懲一秉至公。從不稍存成見。所望於各直省大小臣工。善體朕意。交相勉之耳。可將此通諭知之。○輔國公多爾濟車登故。致祭如例。○開除江西廣昌縣報墾水衝屯地六十九畝有奇。○旌表守正捐軀之廣東鎮平縣民王超元妻古氏。○是日御舟駐蹕韓莊閘。○乙巳諭安徽修理城垣俱經報竣。所有該省收捐監生等項銀兩。除撥協江蘇城工外。尚有餘剩。現在直隸城工。亦有

應修葺之處著該督等即於此內撥銀二十萬兩解交方觀承備用。○諭軍機大臣等朕巡幸徐州閱視河防工程見荆山橋石工過長未免混行糜費詢之大學士尹繼善奏係叅革淮徐道張宏運前任銅山縣令時承修共報銷銀五萬兩荆山橋當民人捐建時祇費銀二萬餘兩而承修之員報銷至加倍有餘其中顯有浮冒情弊因事屬已往姑弗深究又據尹繼善奏稱張宏運在淮徐道任內

尚有張家馬路漫工一案應追分賠銀兩除將任所貲財抵賠外所有未完之項業將張宏運解回湖北交原籍地方官嚴查家產勒限追賠此案漫工銀兩係貽誤工程應行追完之項不便聽其任意拖延著傳諭吳達善李因培即將張宏運監追並將伊原籍產業盡數查抵毋得令其稍有隱匿拖欠以為承辦工程任意冒銷者戒俟帑項全完再奏。○調任河東河道總督李宏等奏永濟神白英

導汶濟運功垂不朽請選嫡派子孫給八品頂帶承襲奉祀從之。○是日御舟駐蹕常家口。○是月署江西巡撫印務江蘇巡撫明德奏臣面奉諭旨輔德辦理叅革吉南賴道素章阿一案其叅劾官員內或有冤抑之人令臣查奏叅道素章阿逼死知縣唐開道輔德初恐干不能約束之咎欲寢其事嗣因唐開道之妻控告始行叅奏及降旨訓飭輔德恐懼恣意苛求輾轉糾叅拖延半載終未歸結

臣抵南昌後飭兩司勘轉即親訊具題得旨所奏公又抵竟不料其如此然已故祇可不問而已。○浙江巡撫熊學鵬奏仁寧三縣境海塘西塘翁家埠海中新漲嫩沙較前刷低間有竹簍邊篾破損及石塊卸落者業經修築完整東塘陳家塢外海中漲沙較前縮短北岸無虞衝激其餘通塘一切柴土石工俱各平穩再寧海縣繞城石塘外添建三層坦水四百六十五丈七尺現於三月初旬開工

四月望前可竣。得旨覽奏俱悉。○閩浙總督蘇昌奏浙江定海鎮三營額設頭號水船大船十四。巡船三。釣船十二。大船每年分巡統巡及運載餉米。應用有餘。可裁二。巡船不若釣船駕駛便利。請裁去巡船。添造釣船六。於各處沿邊口岸分防巡緝。得旨如所議行。○又會同福建巡撫定長奏琉球國貢帶土物。自乾隆二十八年准歲買土絲五千觔。二蠶絲三千觔。茲該國王高穆咨請於歲買絲觔數內量買綢緞二千觔。每綢緞千觔扣抵絲一千二百觔。請旨施行。得旨此何不可之有。○湖廣總督吳達善奏江夏縣監獄在該縣大門之東。緊連馬號。與該典史衙署相距寫遠。請以現在馬號改為典史衙署。以縣署餘基改為馬號。再查該縣有縣丞舊署因坍塌縣丞賃住民房。其舊署物料儘數典史衙署之用。請拆建典史現在衙署完好。即令該縣丞移駐得旨嘉獎。○四川總督阿爾泰奏保

寧府屬南江縣北大壩地方東西計長九十里。南北長五十里。四面山環。中有龍塘大壩。南壩。後壩。大元壩。小元壩。薌葉壩等處。多係平行荒疇。地頗肥厚。且上流有溪河兩道。築堰開渠。皆可營治稻田。請招民試墾。得旨獎。○雲貴總督劉藻奏請陞見得旨雲南路遠。何必以來京為請。如卿之素履亦毋庸屢訓也。

大清高宗法天隆運至誠先覺體元立極敷文奮武孝慈神聖純皇帝實錄卷之七百三十三

大清高宗法天隆運至誠先覺體元立極敷文奮武孝慈神聖純皇帝實錄卷之七百三十四

學務院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總辦官經建講官太子太傅文華殿大學士文淵閣領事稽察欽奉 上諭事件度管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經建講官太子少保工部尚書紀錄六次臣曹振鏞等奉

敕修

乾隆三十年乙酉夏四月丙午朔享

實錄卷七百三十四

二

太廟遣怡親王弘曉恭代行禮○

上詣

皇太后御舟問安○禮部議覆四川學政博卿

額奏稱夔州府學歲科取進童生二十名廩

增缺各四十名後經學臣隋人鵬題請童生

進額裁撥梁山學四名達州學二名廩增原

額並未議及近年廩增額缺多不過補至三

十四名其餘應請裁等語查該府歷年學冊

充補廩增實缺者不過三十四名其餘六缺

向俱虛懸應如所請准其裁廩增各三名又

據稱府學廩增四十名一年一貢州學廩增

三十名三年兩貢今夔州府學既定為三十

四名若仍舊一年一貢未免太優亦應請照

州學例三年兩貢等語查府州縣學歲貢原

視廩額多寡酌定出貢年分今該學廩額既

減亦應如所請照州學例出貢從之○賑卹

甘肅河州渭源隴西會寧安定漳縣通渭平

涼靜寧華亭隆德涇州靈臺鎮原莊浪固原

實錄卷七百三十四

三

張掖山丹平番靈州花馬池州同巴燕戎格

廳西寧碾伯三岔州判高臺等二十六廳州

縣乾隆二十九年分電水旱霜災民糧一十

二萬四百八十石折賑銀二十七萬六千一

百七十兩有奇○旌表守正捐軀之安徽太

和縣民張三女張氏○是日御舟駐蹕新挑

河○丁未戶部議覆湖北巡撫王檢疏稱宜

昌府屬鶴峯州乾隆十九年開墾額外下地

十五頃零該糧六石二斗五升銀九兩二錢

二分造冊送部應准其造入該年地丁冊內查覈其勘墾各官既據聲明不及議敘應毋庸議從之○是日御舟駐蹕濟寧州南○戌申

上詣

皇太后御舟問安○兵部議准大學士管陝甘總督楊應琚疏稱乾隆二十年軍機大臣原議驛站錢糧統歸州縣管理嗣經陞任巡撫陳宏謀等先後奏請紅城等站夫馬錢糧分

書奏事

三

歸各同知通判支領報銷乾隆二十八年復據巡撫常鈞以軍務告竣不若仍歸州縣管理以符原議維時莊浪理事通判所管之平城松山二驛因地僻差稀仍聽其管理今既改為涼莊理事通判移駐涼州平城松山二驛自應改歸州縣經理但該縣現管八驛勢難兼顧且平城松山二驛又在莊浪同知所轄界內應請將該二驛改歸本管番地之莊浪茶馬同知經管從之○免江西南昌新建

進賢等三縣乾隆二十九年分水災額賦其蠲剩銀米並予帶徵○是日御舟駐蹕大長溝○己酉常寧祀

天於

園丘遣裕親王廣祿恭代行禮○諭河南省城守尉著加恩照直隸城守尉之例每年賞給養廉銀二百兩○予故多羅果郡王弘瞻祭葬如親王例諡曰恭○是日御舟駐蹕王老口○庚戌

書奏事

四

上詣

皇太后御舟問安○諭今歲鄉試屆期所有各省正副考官著將應行開列人員照例通行考錄以備簡用該部即遵諭豫行辦理俟迴鑒後請旨示期考試○免湖北漢陽漢川沔陽文泉黃梅廣濟監利等七州縣並屯坐漢陽文泉二縣之武昌衛漢川縣之武昌左衛沔陽州之沔陽衛黃梅縣江南宿松縣之蘄州衛監利縣之荊州衛乾隆二十九年分水

災額賦其蠲剩銀米並予帶徵○是日御舟駐蹕五里鋪○辛亥諭曰原任刑部尚書王士正績學工詩在本朝詩人中流派頗正從前未邀易名之典宜示褒榮以為稽古者勸著大學士察例議謚具奏尋謚文簡○又諭甘肅布政使員缺著海明補授所遺按察使員缺著周景柱調補河南按察使員缺著何燭補授何燭久任河工於一切修防事宜素為熟悉所有豫省南北兩岸河道工程仍著何燭兼理○諭軍機大臣等前方畧館所進卷十三清字方畧將一鼓先登句鼓字繕為擊鼓之鼓業經降旨查詢今進呈第十五卷又將以增羽翼句直繕為羽翼字樣甚屬非是從前辦理準噶爾回部事宜節次俱係清字諭旨編輯清字方畧自有原奉諭旨可遵詞藻至編輯清字方畧自有原奉諭旨可遵不過節其繁冗最為省便今轉因譯出之漢文拘泥一二字面任意混繕既失原文正意

亦且徒勞筆墨豈非舍易而就難耶想伊等祇因設有桌飯銀兩借此以為能盡心力而不自知其謬劉統勲舒赫德何以亦不加查看聽其屢次錯誤所有上次誤繕清字官員已經降旨停陞其此次錯誤又係何人著傳諭劉統勲等查明覆奏尋奏繕譯錯誤之處臣等未能看出殊屬疎忽除遵旨改正進呈應請將臣等交部嚴議其繕譯官刑部郎中伊蘭奏即照上次刑科筆帖式蘇成額之例遇有應陞處停其陞用報聞○又諭曰明普奏稱王古爾庫爾勒回人俱照常耕種並無可疑惟阿奇木伯克色提克據回人等首告哈子伯克阿瑞噶西納齊伯克和碩爾等散布流言意圖叛逆傳訊回人與原告相符已將阿瑞等及應行質訊之人拏獲看守等語昨據明普奏請回抵哈喇沙爾查詢回人朕即諭以宜加慎密若毫無形迹則已設果潛懷反側辦理時當出其不意儻令稍有知覺

則各城回人。因此驚懼。或至另生一事。亦未可定。著傳諭明瑞。朕以額敏和卓。熟習回部情事。伊至哈喇沙爾時。當令其留心體察。若回人等實係謀叛。何以並未舉事。坐待拏問。如謂本無其事。則回人等首告之言。又何以衆證符合。將來查明時。若祇阿瑞等數人起意造言。即將伊等正法示懲。不必輾轉株連。諒額敏和卓。必能妥協辦理。再審訊既實。則色提克。尚屬輸誠効力。自應加恩獎賞。著明

瑞等。以朕旨宣示。照伊現在職銜加一級。賞戴孔雀翎。仍賞緞八疋。○予故浙江提督武進陞祭葬如例。謚良毅。○旌表守正捐軀之山西陽曲縣民傅榮妻陳氏。○是日御舟駐蹕劉家灣。○壬子。

上詣

皇太后御舟問安。○諭軍機大臣等。明瑞奏自三月初九。十三。十四。十五等日。進攻烏什情形。又據伯克薩畢請遣親信回人呼特呼默

特。持書前往招撫回衆等語。逆賊等倚恃城堅糧足。敢行抗拒。朕已節次傳諭。不必徒事攻擊。惟嚴防要隘。俟其自敝。此時若尚未竣事。則鄂津所領伊犁官兵五百名。亦到倍添威力。至納世通等。攻守一隅。屢戰挫衄。久留該處。必至債事。昨已降旨。將納世通。卞塔海於軍前正法。明瑞此時且不必宣露。俟阿桂到彼。一同傳旨辦理。納世通等。俱擾累回人。為衆所惡。若不早正典刑。則回衆不知天朝

法紀。著一面傳諭阿桂。速行前赴烏什。將納世通。卞塔海正法後。其所領官兵。即著阿桂管轄。與明瑞協力取城。至領隊進剿。愛隆阿尚屬諳練。著明瑞酌量。如伊犁不必定須愛隆阿駐劄。即派赴烏什辦事。至德福與卞塔海同在阿克蘇辦事。俱無端緒。德福雖罪不至於正法。或將伊革職。令其効力行走。或作何治罪之處。亦應定擬。所有應辦錢糧緊要事件。暫調伍彌泰赴阿克蘇辦理。俱著明瑞

妥議具奏。納世通等奏摺俱未批示。一併發交明瑞閱看酌量查辦。奏聞。又諭曰。納世通進勦烏什。全無端緒。且任意虐使回人。看來伊在喀什噶爾時。亦必妄自尊大。或有無恥情事。俱未可定。著傳諭柏琨。伊至喀什噶爾多時。已奏事數次。納世通在彼行止。豈全無見聞。何以未經奏及。奉到此旨。務須徹底查訪。據實參奏。亦傳諭明瑞。阿桂如柏琨有徇庇納世通。稍為隱匿之處。一經查出。即行參奏治罪。○又諭曰。明瑞奏哨探人等擒獲一賊。交茂薩訊供。據稱城內回衆議論不一。有謂投降必不全戮者。有謂烏什城池堅固。厄魯特曾以三萬兵圍守九月。竟不能克。今喀什噶爾阿克蘇人心俱變。不過麥熱前亦亂。其言雖不可全信。似宜留心防範。且駐劄大臣等。辦理不善。回人不能相安。似宜專於伊犁駐劄大兵。以資彈壓。其回部各城。仍其舊俗。不必駐劄大臣官兵等語。所奏未合事。

機。自平定回部以來。駐兵辦事。已成定制。一旦忽爾改易。殊非國體。且烏什情事。皆由大臣等激變。既經嚴治其罪。則後來定知所懲戒。設仍有懲不畏法者。亦有誅無赦而已。若因烏什一事。將各城大臣官兵裁撤。非徒示弱於回人。即如補授阿奇木伯克。誰為揀選保舉。而阿奇木等或妄自尊大。不奉伊犁約束。又將如何辦理耶。至厄魯特三萬兵攻圍不克之語。益屬荒誕。從前霍集占據有全部。何以各城俱皆攻克迎降。此不過助惡之伯克等。作此語以固其屬人之心耳。著傳諭明瑞。當持以鎮定。一意堵截。要隘防賊脫逃。彼芻糧既盡。自然內潰。一切事宜。俱同阿桂。永貴酌議具奏。若各城駐兵尚少。將來酌量增加。亦可。並傳諭阿桂知之。○是日御舟駐蹕朱官屯。○癸丑。諭軍機大臣等。前以江南春雨稍多。恐防菜麥。曾命尹繼善傳諭蘇爾德令其將雨暘情形及春收分數。若何。就近查

明據實覆奏。彼時據尹繼善奏稱不出江南境即可奏到。今距傳詢之期已逾半月。尚未見馳奏。昨在江南每望開霽。茲相隔甫八九程。而連朝天氣晴暖。又以得雨為佳。未識過日黃河以南亦與東省相同否。南望江鄉。彌深縈念。著傳諭尹繼善。莊有恭將現在雨暘春收情形若何。即速查奏。以慰廑念。尋尹繼善等奏。江以北雨暘應時。二麥可期。豐稔。江以南得雨三次。餘俱晴霽。細詢農民。油菜登場甚豐。大麥黃熟無礙。惟小麥不無稍減。現在田水充足。芒種後即可分秧插蒔。糧價照常。民情安帖。得旨覽奏稍慰。○是日御舟駐蹕新莊。○甲寅。

上詣

皇太后御舟問安。○諭曰。李國柱著以提督銜。管理浙江處州鎮總兵事務。○以江南督標中軍副將烏爾登額為雲南永順鎮總兵。○是日御舟駐蹕朱金屯。○乙卯。諭軍機大臣

等。柏琨奏將布魯特車哩克齊解到。送信回人逐一訊供看守。已酌賞車哩克齊等緞疋等語。此等回人俱賴和木圖拉親信。據供烏什有馬五六百匹。口糧將盡。較之明瑞捉生詢問所供不符。益見前言之未可深信。惟絕其糧道。防禦逃逸。自然內潰。但駐守官兵接濟糧餉甚屬緊要。明瑞當豫為籌畫。再車哩克齊等拏解回人。先將其銀兩緞疋槍奪。亦不可不明白宣諭。著明瑞曉示車哩克齊云。

爾等拏解潛通信息回人甚屬可嘉。伊等所攜雖係官物。即以充賞。嗣後凡有此等脫逃通信之人。俱照例辦理。仍加賞車哩克齊緞疋四疋。至柏琨奏已布敦瑪瑪達布拉係賊人心腹。若縛置軍前。俾賊人看視。以絕其望。救之念於事有益。所見尚是。明瑞即照此辦理。○又諭前據明瑞查奏烏什回人一事。實由素誠等狂縱妄行。以致激成事變。及納世通之妄自尊大。凌辱回眾。卡塔海之輕率攻城。

敗走掩飾。均為法所難宥。已將伊等分別治罪示懲。茲復據柏琨奏。訊取已布敦等供詞。則素誠在烏什之奸淫婦女。苦累回人各款。俱與明瑞前奏相同。是其情真罪當。實屬眾口如一。著將柏琨摺譯發。諭眾知之。○是日。御舟駐蹕夾馬營。○丙辰。

上詣

皇太后御舟問安。○諭。前據耀海奏。廣寧縣知縣奎福到任後。赴府回署。行至中途。自戕。恐

知府富察善不無逼抑情由。及錦縣知縣哲成額。扶同驗報。請一併解任。交盛京刑部質審。已降旨允行。今復據奏。奎福傷痕。業於三月初三日平復。至十七日。又復用刀自戕。旋於二十日身死。該府富察善是否假公濟私。有意窘迫。應一併交部嚴訊等語。此案奎福初次自戕時。赴府甫回。或由該府富察善。抑迫所致。尚未可知。今奎福業已在官看守。傷痕平復後。復自尋短見。又被何人窘迫。則前

此因病自戕。更無疑義。設云富察善果有別項情節。則當奎福活口。可質時。詳細究詰。何難得其實情。乃遲之又久。於其身後。過為擬議。則有意苛求。轉非情理之平矣。至富察善從前並不親身前往根究。亦不具文詳報。及聞奎福遁負甚多。不令管理倉庫。辦理未能妥協。亦止於交部察議。然按例。尚不至於降調處分。即錦縣知縣哲成額。驗報時。稱因瘋病。由令觀之。亦不得謂之扶同捏飾。富察善

哲成額。仍著照舊任事。至摺內所稱看管不嚴。及富察善失於查察之處。著交部照例察議。○諭軍機大臣等。刑部覈擬沈邱縣民王架。撞跌大功服兄王棟身死一案。將該撫聲請之處。議駁所辦甚是。已降旨依議矣。王架醉後吵嚷。伊大功兄王棟向其嗔責。乃不服管教。輒以頭抵撞。致王棟絆跌。墜傷殞命。是其酗酒犯尊。已屬強橫。且王棟之死。實由撞跌。何得尚云死出意外。為之聲請耶。審擬命

案惟當準酌情理。期於至當。況事關倫紀。尤不宜有意從寬。今該撫辦理此案。未免心存開脫。殊失明刑弼教之意。新任臬司何燭素信佛法。方慮其惑於慈悲之說。欲於獄獄求陰。該撫若復似此姑息。則將來豫省刑名案件。尚可問耶。阿思哈著傳旨申飭。○是日御舟駐蹕十屯。○丁巳。諭軍機大臣等。前據明瑞以圍城無益。當遣回人招撫具奏。迄今多日。未見奏及。看來烏什回人死守不降。

顯然可見。若仍設間招撫。恐賊人謂攻城無策。惟以納降為事。著傳諭明瑞。毋庸再行招撫。現在大臣官兵多係坐糜糧餉。此時固不必急於進剿。而防守堵禦尤當加意。如一年不克。即駐守一年。俟其自潰可耳。○是日御舟駐蹕德州。○戊午。

上詣

皇太后御舟問安。○命簡親王豐訥亨等恭奉皇太后由水程迴鑾。

上登陸。○工部奏。各省辦理工程。動用正雜錢糧。無論多寡。例由各督撫估銷。嗣於乾隆十

三年。經戶部奏准。凡雜項銀於例外興作。俱應奏明報部覈銷。今查各省動用雜項銀。該督撫於工竣後。有具題請銷者。有咨部覈銷者。用銀有在數百兩上下。即行具題者。有至千兩。及一二萬兩。徑行咨銷者。辦理仍未畫一。請嗣後各省修建一切工程。動支銀數在一千兩以上者。俱由該督撫具題請銷。其百

實錄卷一百五

五十六

兩至數十兩不等者。仍照舊咨結從之。○是日駐蹕景州絳河行宮。○己未。諭各省道員副將。歷俸六年以上者。向俱送部引見。前經降旨。令該督撫等於摺內將伊等是否堪勝臬司總兵之處。聲明奏聞。原欲覈其平日之政績如何。以覘人材之高下。及督撫等保舉之公正與否也。今思臬司總兵均係國家大員。道員等之堪勝與否。朕原可於引見時因才甄定。其薦剡本不足為定評。且恐循行日

久視為具文屬僚或不免藉此為干進梯榮之階而上司亦即以為示惠酬私之地於政體轉有關係嗣後道員副將仍照舊例送部引見其聲明是否堪勝臬司總兵之處著概行停止該部可遵諭行○又諭前經降旨命各省駐防協領等年滿引見由該將軍等將該員能否堪勝城守尉副都統之任具摺陳奏但城守尉副都統俱係大員協領等引見時朕觀其人即可知其能否不必該將軍等

實錄卷七十四

十五

保奏恐日久弊生或有營求瞻徇之處著仍照舊例來京引見其保奏處即行停止○諭軍機大臣等據成衮扎布等奏稱來自庫倫貿易之民人趙立裝載俄羅斯羶皮等貨二十車任長源裝載五車詢之則云買自庫倫之蒙古又喇嘛垂党駝載十四馱前來詢之則云係伊等舊存物件勘驗所馱之物俱係俄羅斯羶皮海龍各項恰克圖貿易既已停止而蒙古等仍有貿易之人於理未合等語

恰克圖停止貿易特為俄羅斯等背原定價值加增貨稅一切諸事推託支吾不肯簡速辦理今既將民人貿易停止而蒙古等豈可私行桑寨多爾濟等所司何事不識知此事否若知而不禁殊屬不合著傳諭桑寨多爾濟索琳將向烏里雅蘇台貿易之民人趙立喇嘛垂党等究訊何以與俄羅斯私行貿易之處徹底查明具奏○是日駐蹕紅杏園行宮○庚申

實錄卷七十五

十六

上遣額駙福隆安赴五里屯皇太后御舟問安○諭江南淮揚淮徐二道向係兼理河工地方之缺嗣據原任兩江總督德沛奏請將海防道裁汰改設為淮徐海道專管三府州事務並將揚州一府歸常鎮道管理而令原設之淮揚淮徐二道專管河工久經部議允行今思河防分巡均屬地方要務原不應過分畛域現在淮揚淮徐二道專理河務而分巡之事不令兼司於地方官呼

應不靈。遇辦理一切工程。未免掣肘。且山東之兗沂曹。河南之開歸。河北各道。俱不難於兼顧。江南又何獨不然。著將淮徐二府地方分巡事務。仍歸淮徐河道兼管。其揚州府地方分巡事務。仍歸淮揚河道兼管。俾事權歸一。以資實效。其添設之淮徐海道一缺。即行裁汰。所有一切裁併應行事宜。及現任淮徐海道應如何酌留另補之處。著該督撫詳細妥議具奏。該部可遵諭行。○吏部等衙門奏

實錄卷一百一十五

元

本年京察大學士傅恒等。遵旨議敘。一摺。得旨。傅恒。尹繼善。劉統勳。俱著加一級。楊應琚著加一級。抵前降一級。陳宏謀。莊有恭。阿桂。錢汝誠。安泰。阿永。阿俱著加一級。阿里衮。託恩多。于敏中。俱著加一級。抵前降一級。方觀承。蘇昌。阿爾泰。高晉。楊錫綏。熊學鵬。崔應階。俱著加一級。明德定。長俱著加一級。抵前降一級。餘依議。○戶部議准。江西巡撫輔德疏稱。南昌。新建。進賢。新昌。吉水。新城。鄱陽等七

縣。勸墾荒地。及額外新生田地。共十一頃七十一畝。應徵銀米。於三十四年徵收。從之。○是日。駐蹕太平莊行宮。

實錄卷一百一十五

三

大清高宗法天隆運至誠先覺體元立極敷文奮武孝慈神聖純皇帝實錄卷之七百三十四

大清高宗法天隆運至誠先覺體元立極敷文奮武孝慈神聖純皇帝實錄卷之七百三十五

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務黃旗漢滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

教修

乾隆三十年乙酉四月辛酉諭軍機大臣等

朕前節次屢經降旨烏什不必圍攻惟於賊匪逃竄要路嚴行防範無使逃脫但明瑞圍城之東賊至勢窮力蹙必由城西逃逸納世通等若不能堵截必致走脫要賊徒獲無足輕重賊匪防守賊人出路最為緊要今明瑞又連日將彼處情事若何之處未行具奏朕深為厯念著再傳諭明瑞伊此時若業已辦竣甚妥如尚未辦竣伊等圍攻賊至力窮之時必將西竄防守此路為要納世通無用不

可倚任明瑞速遣觀音保帶兵往烏什城於鄂托巴什等緊要隘口嚴加防範務使賊匪不致逸脫此際伊等辦理情形若何之處迅速奏聞又諭據桑寨多爾濟等奏稱俄羅斯畢爾噶底爾奉到移文覆稱向云薩納特衙門不肯回文大部之事並非薩納特衙門所交乃出於伊之意見又定界以來彼處交回之人計四千餘名並未容納一人舍楞等之事薩納特衙門業經咨行大部請免索取惟祈將塔噶巴齊喀勒瑪克遣回其應否給與回文之處請旨等語畢爾噶底爾既捏辭訛索塔噶巴齊喀勒瑪克行文前來合給與回文著該院代作一回文寄發桑寨多爾濟等令其照例譯出咨行畢爾噶底爾工部等部議准直隸總督方觀承疏稱撫寧遠安二縣請建深河沙河二驛官房以資護送差務從之○是日駐蹕恩賢村行宮○壬戌孝端文皇后忌辰遣官祭

昭陵○是日駐蹕趙北口行宮○癸亥
上遣侍衛扎拉豐阿赴陳官屯。

皇太后御舟問安○是日駐蹕紫泉行宮○甲
子命湖廣提督李勲來京陛見○是日駐蹕
涿州行宮○乙丑諭軍機大臣等據阿桂奏
現在明瑞所領之兵尚有盈餘但圍城總覺
不足因詳細會議添調兵丁二千名等語明
瑞在彼一切事宜皆當辦理今阿桂既經知
會自當盡心選練勿致遲延貽誤著會同商

辦具奏○是日駐蹕黃新莊行宮○丙寅

上迴鑾○詣

安佑宮行禮○幸圓明園○遣額駙色布騰巴
勒珠爾赴鄭家莊。

皇太后御舟問安○旌表守正捐軀之山西吉
州民樊明妻李氏○丁卯兵部議覆兩廣總
督李侍堯疏稱粵東營制外海水師副將五
缺應陞之叅將僅有四員遊擊十一缺應陞
之都司共止八員遂致叅將都司甫經到任

旋即推陞陸路遊擊共計二十員而應行題
陞者止有增城營叅將一缺以致遊擊中出
色人員多係遷轉別省請量為改缺俾得均
勻陞轉等語應如所請瓊州水師副將改為
海口營叅將仍聽雷瓊鎮管轄左營都司改
為守備左翼碣石二鎮標右營水師遊擊改
為都司雷州協陸路副將改為雷州營叅將
亦聽雷瓊鎮管轄將中軍都司裁以左營守
備兼管其兼轄之海安營遊擊徑隸雷瓊鎮
管轄徐聞營守備仍隸該營兼轄欽州營陸
路遊擊改為叅將仍隸高州鎮管理至所稱
瓊州水師副將都司左翼碣石二鎮標右營
遊擊原係外海水師題缺今改為叅將都司
守備自應仍為題缺欽州營陸路遊擊原係
五年邊俸報滿題缺今改為叅將應仍為俸
滿題缺雷州協陸路副將原係選缺今改為
叅將總理左右二營水陸事宜應改為陸路
題缺其左營守備亦係推缺今中軍裁歸左

營兼管亦請為題缺至出巡洋面海口營叅將守備輪流左翼碣石二鎮標遊擊互替等事均應如所奏辦理又該督所請將潮州鎮標左右二營潮陽惠來二營遊擊守備共八缺均改為部選督標中軍副將都司提標叅將廣州協副將都司均改為陸路題缺亦應准其改換但查外海水師新改遊擊應題九缺而應陞都司亦祇九缺人缺相當於陞遷過優恐難得熟練之人且水師守備共二十

六缺於題陞都司反覺人多缺少應令該督於各遊擊缺內再行確覈如有應改營分酌量降改定議報部至所改各缺俱俟現在各員陞補事故出缺後分別改換雷州協中軍都司既裁未便久懸應將現任都司劉德懋給咨赴部另補其應換關防勅書亦擬定字樣造冊送部辦理從之○戊辰諭軍機大臣等據栢琨奏准納世通咨與明瑞會商令將回人已布敦瑪瑪達布拉送赴烏什等語昨

因栢琨請將拏獲潛通信息之回人等縛置軍前俾賊人見之絕其望救之念朕即以此事尚屬可行屢降諭旨而明瑞等總未具奏此次栢琨所奏則係納世通咨取又云與明瑞會商甚不合理明瑞係總統回部將軍納世通不過叅贊大臣各城一應事宜當聽將軍查辦豈有叅贊大臣專主一事僅知會將軍同辦之理且將軍明瑞等數日以來並未將烏什事體如何之處奏聞甚屬不知緩急

俱著傳諭知之○刑部議覆浙江巡撫熊學鵬疏稱乾隆二十九年案准部咨直省秋審屆期今各州縣酌量人犯數目遴選佐雜押犯赴審審畢仍著解回但州縣佐雜多寡不同概令通行保無貽誤請止令委員逐程交替不必長解等語查乾隆二十九年五月內臣部議覆廣東按察使赫昇額條奏秋審案內委員長解原屬慎重解犯防範疎虞是以奏准通行在案今該撫既稱一縣之內設立

典史。又有縣丞。主簿。巡檢者。尚無曠誤。若典史而外。僅設縣丞。或巡檢者。先期差委他出。該縣僅止典史一員。更有並無縣丞巡檢之縣分。儻委典史管解。監獄所關非細。亦屬慎重職守。酌量通變之道。應如所奏。嗣後秋審解犯。委員逐程交替。須將人犯解役。覲面點交前站委員。始回本地。以昭慎重。從之。○已。諭。今日正白旗蒙古。帶領盛京遼陽保放驍騎校之官保。所奏履歷不成清語。盛京係滿洲故地。彼處官兵。俱應清語熟練。官保不能清語。是全失滿洲舊習。不以清語為重。而該將軍等。平時又不嚴加教導所致耳。著交舍圖肯等。令彼處官兵。上緊習學清語。務期精熟。嗣後來京引見人員內。若仍有似此不能清語者。惟舍圖肯是問。諭軍機大臣等。明福所奏將軍標下兩營各項用存銀兩摺內。單開四柱舊管一項。業已於二十九年解交藩庫。則是現無舊存銀兩。理應註明舊管

無字樣。乃該將軍拘泥成例。四柱名目。並不諳開載款式。復將已解之項。重複敘入。以致總數混淆。覈算不符。嗣後如並無現存銀兩。祇須於摺內聲明。毋庸混入舊管項下。可將此傳諭該將軍知之。○庚午。

皇太后自水程迴鑾。

上至三間房間安奉。

皇太后居暢春園。○諭前於正白旗滿洲辦理世管佐領白格員缺承襲之分不均。因交該旗查覆。今覽該旗所奏。尚未甚錯。想係照原辦佐領事務之王大臣等所定辦理。從前八旗辦理承襲佐領世職等事。並不盡一。是以專派王大臣等。按其原由。辦定承襲之分。但原定時條目太繁。八旗拘泥遵行。又致紊亂。因復將珠林等所襲佐領重行更定。辦理旗務。宜從簡易。即如獲重罪者之子孫。不應列名。在任病故者之子孫。仍應列名。例有明文。而按其家譜。論其遠近。辦給擬正擬陪之序。

亦殊不難。凡事宜揆之於理。豈可謂例屬一定。不復詳度情理乎。著交軍機大臣會同八旗大臣等。將從前所定八旗承襲佐領世職條例。再行查明刪去繁文。務期簡易。定議具奏。於承襲佐領世職人員帶領引見時。朕再酌量辦理。○旌表守正捐軀之山西崞縣民孟登遠女孟氏。○辛未。

上詣暢春園問

皇太后安。○哈薩克使臣鄂托爾齊等入覲。

上御勤政殿召見。隨幸同樂園賜食。○諭軍機大臣等。據明瑞奏稱烏什逆回等以死固守。而納世通、卡塔海等未能和衷辦事。每多掣肘等語。納世通、卡塔海等不能和衷集事。朕早已知之。但伊等之罪尚不在此。惟諱敗飾功。存心欺隱。其罪甚大。是以降旨將伊等正法。大臣等辦理國事。原不應分別彼我。至朕用人行政。一本大公。大臣等如果同心協力。自當並錄其功。若乖張僨事。亦必均任其咎。

從不稍有偏倚。即富德等入巴達克山索取霍集占兄弟之時。兆惠並未前往。朕因其事已集。未行深究。若稍有貽誤。自必治兆惠之罪。納世通、卡塔海因不相合。以致僨事。今阿桂、永貴陸續前往。萬不可仍蹈覆轍。俱著傳諭知之。○壬申。戶部議覆雲南巡撫常鈞疏。稱開化府屬麻姑金廠新舊塘共十五口。定為十五牀。每牀酌定十五人。月納課金一錢三分。年久塘空金盡。請照錫板金廠之例。自乾隆二十九年正月始。將張百福等原領之八牀開除。其餘七牀仍按月徵收。應如所請。准其開除。從之。○癸酉。

上御勤政殿聽政。○詣暢春園問

皇太后安。○軍機大臣等議覆廣西提督許成麟疏。稱柳州城駐劄官兵向來多住草房。易致火患。節經該處提臣先後奏請借帑修建瓦房。迄今漸就傾圯。請援例借銀修復等語。查柳州城人烟稠密。兵住草房多致火患。乾

隆二年。經提臣譚行義奏准將營運生息銀二萬餘兩內領四千兩借給兵修建瓦房。每間九兩。三年扣還。嗣於十五年。提臣豆斌以城外兵房並未議及。復奏請將前次歸還四千兩內。利銀一千三百八十兩零。借給城外兵。限五年內易蓋瓦房歸款在案。今該提既稱年久傾頽。兵丁無力修復。應如所奏。准將司庫息銀二千六百兩仍行借出。遵照臣等原奏。委中軍叅將會同馬平縣修理。工竣報部查覈。並按六年定限分扣清款。從之。○以內務府護軍統領奇成額鑲藍旗護軍叅領舒通阿俱為鑲藍旗滿洲副都統。○旌表守正捐軀之直隸易州知州李文耀妻伊爾根覺羅氏。河南夏邑縣民黃二妻張氏。○甲戌諭曰。傳玉著補授正黃旗護軍統領。仍署理鑲黃旗護軍統領事務。兼鑲黃旗滿洲副都統。烏勒登所遺正藍旗護軍統領事務著莽古賚署理。莽古賚釋服以前著弘昫署理。

諭軍機大臣等。據方觀承奏稱。本月二十五日。東安地方得雨一二寸不等。尚未深透等語。看來迤南一帶雨澤未為霑霈。著傳諭方觀承。將河間等處曾否得雨及有無霑足情形。速即查明具奏。以慰廑懷。尋奏。四月二十五日得雨兩處。京師及附近之昌平。密雲。良鄉。房山。涿州。通州。為優。保定府屬。惟定興。新城。新寧。得雨三四寸。保定省城與正定等府。深易等州。祇一二寸。至河間一帶雨甚微小。現在行令各屬求雨。連日地氣升潮。陰雲時見。夏至節屆。可望霑霈。報聞。○以洗馬勵守謙為雲南鄉試正考官。工部主事鄒夢臯為副考官。編修李孔陽為貴州鄉試正考官。刑部主事吳巖為副考官。○是月直隸總督方觀承奏。查閱永定河下口工段及沿途雨水情形。得旨。覽。此迤南雨澤殊不及近京一帶也。再得霑霈恩雨。方佳耳。○兩江總督管江南河道總督高晉奏。本年桃汛後。節據上游

正陽關委員稟報。淮河水勢加長。臣即飭委河庫道等查看。如洪湖水長逾誌。即將清口東西壩及時啟拆。嗣據稟。洪湖水勢。自三月二十五日。至二十八日。共長水五寸。山盱五滾壩。高出水面三尺二寸。及三尺七寸不等。已督率外河廳營將清口東壩拆展十丈。仍查看水勢情形。再行遞展。臣隨親至清口。看得湖水於拆壩後。至四月初七。又復加長一尺一寸。隨又將東壩拆展七丈五尺。西壩拆

展二丈五尺。飭令一律剗深。合之上年舊存口門十七丈。共三十七丈。湖水宣洩甚暢。得旨嘉獎。○又奏。臣在常家口地方送駕後。取道茶城。前赴豐碭廳查工。該廳屬黃河北岸孫家集一工。當日原係漫灘奪溜。後合龍時。將工做於灘上者。在從前北岸無隄之時。自應每歲修防。以資捍禦。迨二十三年北岸接築新隄。則此工在於隄外灘上。又當因時制宜。以節糜費。臣悉心相度。該工埽後。本屬坑

塘。添有數尺。以至丈許。應照夏家馬路辦法。先開倒溝引河。以備水長進淤。一俟淤成。便可停修埽工。設或河勢北徙。地面寬廣。下游何家莊引渠。緊靠蘇家山。亦不致北趨奪溜之患。又邳睢廳屬王家堂迤上黃河坐灣。節年兩崖水長。即行坍塌。現在徑直處河崖祇存三四十丈。若塌透即成直河。然聽其由下段塌透。溜勢必直射王家堂舊壩臺。恐致生工。今於上段順勢開挖引渠。將來水長。自必

由引渠塌透。水由下行。不獨與王家堂舊工無礙。且逢灣取直。所費無多。二十餘里之兜灣河形。於潤之後。可得良田百餘頃。招民墾種。亦甚有益。至外河廳屬清口四木龍迤下。添建木龍一架。應需木植。董纜已據各委員分投購足。現在僱運交工。務於汛前趕紮完竣。以資護灘挑溜。衝刷對岸積土。目下黃河水勢平緩。淮揚上下運河亦俱充足。得旨覽奏俱悉。○署理河東河道總督姚立德奏。南

漕頭進糧船自大河衛前幫至江淮六幫久經過濟北上。其二進之大河宿州等幫亦俱跟接前進。現在統計入境者四十七幫已過濟寧者三十六幫。開河水勢充裕足資浮送。今二進各幫船體稍重。臣現飭道廳開放馬場南旺二湖之水以助南行。並酌啟蜀山湖金線閘以助北行。其蜀山湖之利運開俟三進船到再為啟放。專留馬踏湖之水以濟江廣尾幫。務使入境幫船迅速抵通。再臣自豫回濟沿途經過。二麥均已吐花。秋田亦俱耕種。得旨聞山東一帶尚有望雨處何不奏聞。○安徽布政使程燾奏。藩司為錢糧總匯向來州縣命盜各案止報督撫臬司巡道。藩司不與。然尋常案件於地方關係尚不甚大。若統率多人明火執仗。所關非淺。州縣官員能否辦理俱可立見。嗣後安省遇有劫盜案件應令一體具報藩司。其平日居官辦事可以參稽並覈遇有應行辦理之處即可隨臬督

撫二臣不致因循貽誤。得旨各省不知有此例否待緩酌可也。○又奏列樹表道古制為昭現今直隸山陝河南等省大路夾道垂楊安徽為九省通衢路在田中不能並馬其先徑途本濶因無樹標識漸次塌損應請通飭各屬除砂磧山嶺毋庸栽種外其近田瀕水處統令栽種柳株得旨告之撫臣妥實行之。○湖北巡撫李因培奏湖北吏治廢弛有二。一由民風刁悍。地方官惡其倔強亦以浮率辦理。一由官吏因循成習不能親理民事一切委之幕客幕客又倚書吏上下內外並無一留心之人。公事何由得協。自督臣吳達善到楚極力振刷吏治已覺改觀。臣蒙恩任用所能自信者惟有盡心認真二端。至楚北濱江連湖盜案頗多督臣設法緝拏臣亦委弁員嚴緝其隄岸城工及地方應行事宜臣日與吳達善過從面商同心辦理得旨汝二人如此和衷共濟何患楚省吏治不改觀耶。○

大學士管陝甘總督楊應琚奏狄道州南鄉宗石等三莊於三月十二日地震計壞居民四十一戶壓死男婦六名口又與狄道州連界之設鑪莊同日地震共壞居民三十八戶俱未傷損人口當即飛飭確查妥協賑卹茲據稟震倒土房各戶每房一間給銀五錢壓斃人口每口給棺木銀一兩壓斃牲畜每戶給銀五錢因銀數無多俱經該州捐給其餘各村因上年收成尚好口食不缺現在民情安帖無庸優請動支正項報聞○甘肅按察使周景柱奏請入覲得旨不必來汝才具祇宜甘省事簡之地若再不努力奮勉益不可矣○四川總督阿爾泰奏川省兵紅白事件賞需銀於乾隆二十四年奉旨令各省督撫就地方情形籌議具奏經前督臣開泰奏請將川省各營內交商生息之項全數撤回歸還原本其重慶夔州二處向無民當營中自行開設生息充賞仍令照舊開設並請於鹽

茶項下動銀一萬四千五百餘兩交寶川局每年加鑄二卯除扣還工價外可得利銀七千七百餘兩足敷賞卹並可陸續歸本而重慶二當本銀四萬一千九百餘兩每年息銀僅獲五千三四百兩較之錢局懸殊臣與藩司等悉心計議不若將營員所設官當舖停其當本銀四萬一千九百餘兩定限於三十一年歲底完繳此內酌留一萬九千餘兩交錢局隨卯帶鑄除歸還價本餘息足敷添補賞項之用至停當以後未經帶鑄以前所需賞項擬於犒賞屯番案內鼓鑄餘息撥用俟帶鑄獲有餘息即行歸還原項得旨如所議行

大清高宗法天隆運至誠先覺體元立極敷文
奮武孝慈神聖純皇帝實錄卷之七百三十五

實錄卷七百三十五

九

大清高宗法天隆運至誠先覺體元立極敷文
奮武孝慈神聖純皇帝實錄卷之七百三十六

監修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆三十年乙酉五月乙亥朔

上詣暢春園問

皇太后安○詣

大高殿行禮○還宮○諭曰羅布藏多爾濟之

父原係郡王彼承襲時照例降等承襲貝勒

嗣因軍前奮勉晉封郡王今念其屢次打仗

始終出力著加恩晉封親王○吏部帶領京

察王大臣驗看之京堂一等八員二等十一

員三等十一員應休致官一員引見得旨陳

兆崙張若淮德爾泰俛承寬陸宗楷劉松齡

傳作霖施世琦俱准其一等齊克昌著休致餘依議○是日起

上以夏至祭

地於

方澤齋戒三日○丙子諭曰四達著實授刑部左侍郎其刑部右侍郎著緯克托補授緯克托現在軍營所有刑部侍郎事務著吏部侍郎旌額理署理不必兼署戶部高晉現授兩江總督高恒應行迴避即著署理戶部侍郎

現在戶部堂官辦事有人高恒且不必來京俟高晉接受總督印務後高恒再來京供職其兩淮鹽政員缺臨時再降諭旨○丁丑孝誠仁皇后忌辰遣官祭

景陵○諭巡視臺灣御史前已降旨三年簡派一次事竣即回無庸留駐候代今思該處現有道鎮大員駐劄一應地方事務俱可隨時經理而向來巡察御史在彼並未聞有所建白原屬有名無實若遽行裁撤則地方官或

以遠隔海洋無人稽察日久不免廢弛亦不可不防其流弊嗣後屆三年請派之期該衙門仍照例奏請或暫停派往或數次後派員一往巡查候朕隨時酌量辦理其盛京等五處分班簡派稽察亦照此例行○軍機大臣等議覆湖廣襄陽鎮總兵立柱奏請刊頒欽定清語一摺據稱清語為旗人根本外省所鈔清字黏單或圈點多寡不合任意長短違式總緣繕寫之吏不識清字雖曰照鈔實錯中添錯請勅下各省督撫將歷年奉到清語遴派旗員校正飭令布政司刻印頒發文武各衙門并嗣後遇有奉到清語亦照式頒行以免鈔謄訛錯等語查各直省俱有部頒定本現在訛錯紛紛若就現行部頒清語各自刊刻其中分門別類仍不免舛漏錯誤徒滋糜費臣等酌議現增纂清文鑑俟書成頒發即可久遠遵循至各省同知通判等官不少滿員令該督撫就其中繕譯精熟者專派一

二員兼辦清文。隨時校正。自不致輟轉訛錯。所有揀派之員。咨明軍機處存記。倘再有鈔寫舛錯等情。惟該員是問。從之。○吐魯番郡王額敏和卓等奏。臣等將逆回阿璫及原首回人克伊雅斯等。提集審訊。據原首人供。閏二月初五日。阿璫邀請飲食。伊兄噶匝納齊伯克和碩爾及弟姪等十一人在坐。阿璫忽云。聞烏什各城俱叛。我等何不將阿奇木等殺死。以克伊雅斯為導。至烏什。我為大伯克。爾等俱為頭目等語。眾俱無言。和碩爾云。我曾入覲。見

大皇帝威福。且賞賚甚重。爾如何出此妄言。再不改悔。必呈報處治。即率其子先行。我三人隨出。即告知阿奇木伯克等語。據阿璫供。因阿奇木伯克色提克。無故將我毆打。心甚懷恨。是以欲將伊殺掠。其各城俱叛。係屬造言。詢之色提克。亦稱去年派差阿璫以老弱充數。抗拒不換。鞭打是實。臣等伏查阿璫以多

倫微末回人。蒙恩授為哈子伯克。乃敢挾嫌謀叛。罪無可逭。應請將阿璫按律凌遲處死。妻子緣坐。和碩爾雖經斥責。并未首告。且係親兄。亦應擬斬立決。其弟姪等俱應緣坐。但情事稍有不同。謹分別定擬。色提克因公將阿璫鞭責。應毋庸議。得旨。額敏和卓等審訊多倫。逆回阿璫。聞知烏什信息。倡言惑眾。一事。阿璫著即凌遲處死。將伊妻子解京賞給。王大臣為奴。伊兄弟和碩爾等。雖不能首告。

但業經斥責。并未聽從。且係新附回人。不知內地法律。俱著加恩省釋。餘依議。○戶部侍郎錢汝誠奏。請回籍侍養。得旨。准其歸養。○添鑄科布多軍營辦理糧餉處。關防從將軍成衮扎布請也。○戊寅夏至祭

地於方澤

上親詣行禮。○詣暢春園問

皇太后安。○幸圓明園。○諭今日致祭

地壇所有供獻桌套俱有污漬祭祀所用什物理宜敬謹收貯不應至有污漬此皆所司人役平日收貯不敬謹之所致該管官所司何事甚屬疎忽所有沾污桌套人役著交該堂官查明重加責懲外該管官著交部查議○
己卯

上奉

皇太后幸萬方安和侍膳○諭軍機大臣等烏什回人變亂戕害官兵數與將軍大臣等拒戰敗走入城死守不降殊堪痛恨朕曾降旨明瑞等克復烏什城後勿留孑遺盡數殺戮但霍集斯之姪及伊族人皆居烏什城內克復烏什城後伊等若斃於軍中則已若生獲者雖俱在應戮之數宜看霍集斯之面免其一死著傳諭明瑞等克復烏什後霍集斯之姪及伊族人內除死於軍中者無論所有生獲免其一體誅戮俱著查出奏聞與彼過於疎遠者不在此例仍遵朕節次所降諭旨辦

理○庚辰

上詣暢春園問

皇太后安○諭軍機大臣等據尹繼善奏各省城垣均關緊要現在江南江西各屬城工開捐勸輸陸續興修已有成效各省州縣鹽當各商及殷實富戶所在俱有豈無好義急公之人願出餘資共勦善舉又如犯事到官或罪有應得而情尚可原情願以金作贖幫助城工並可酌量收捐等語城垣所以衛民出民力以自衛固屬公私兩便但各省情形不同樂輸恐未必盡皆踴躍或地方官奉行不善難免滋擾則又不得不因地制宜著傳諭各該督撫將各省實在情形若何是否可照江南捐修事例舉行之處據實覆奏到日飭部議行如民情未能一例急公亦不必勉強從事所有尹繼善原奏著一併鈔寄○調兵部侍郎王際華為戶部侍郎以祭酒陸宗楷為兵部侍郎○命戶部侍郎裘曰修兼管順

天府府尹○辛巳軍機大臣等議覆福州將軍明福疏稱福州出旗兵一千零一戶除將原有本地另戶兵三十四名及由鄭家莊發到二百七十八名遇缺坐補外其餘六百八十九戶請分為三隊遣來等語應如所奏將由京出派滿兵六百八十九戶編為三隊頭二隊各二百三十名末隊二百二十九名其前鋒馬甲領催匠役步甲等亦分三隊將每隊數目分均二百三十名內領催十八前鋒十八馬兵一百二十四匠役二步甲六十八自本年秋季起程至冬到閩其三四隊酌辦之處臨期再奏又據稱此次所派兵少戶口無多即照去年例由浙江江山縣行走毋庸由江西長山縣分路不必另派領隊即交進京引見之保放協領圖海防禦福佳那斯琿等順便彈壓均與原奏相符准其辦理從之○壬午諭軍機大臣等李星垣朕素知其不安本分之人前此奏代土知州岑宜棟進獻

銀兩一摺乖張悖謬朕即逆料其必有得受賄賂及嚇詐巧取情弊因令李侍堯前往會同馮鈐徹底根查今據馮鈐奏稱就近傳詢岑宜棟據供李星垣到任後屢有勒索馬匹蟒袍人漫三七并令買婢女俱不發價值等事李星垣經朕擢用總兵不思潔己率屬乃敢婪索妄為甚屬可惡著傳諭尹繼善將伊徐州本籍家產嚴行查封知府邵大業素愛沽名至今尚未能改辦理此事難免徇縱著該督於滿洲道府中揀派一員前往會同該府查辦並將此旨傳諭邵大業知之○塔爾巴哈台叅贊大臣綽克托奏臣至塔爾巴哈台會同叅贊大臣愛隆阿以將軍明瑞所定築城屯田事宜逐一指出查現領綠旗兵六百名即派五百四十名掘渠引水開墾荒地其餘六十名以十名入山採取碾磨之石餘同滿洲索倫兵砍取柳條於營外周圍插護營內各分院落苫蓋窩鋪暫收糧餉緞疋等

物設立堆撥看守計自駐劄月餘以來時雨數降地畝開墾次第播種隨於三月二十六日令叅將吳士勝原任主事伏魔保領綠旗聽差兵興工伐木刈葦合土築城仍於屯田兵內勻出協助照明瑞所定玉爾雅爾兩處築城計周圍城垣二里四分高一丈五尺足敷兵一千五百名駐劄所建官署倉庫共六百餘間仍有餘地以備添建謹繪圖貼說恭呈御覽報聞○以侍講謝墉充日講起居注

平定縣志卷之六

十一

一

官編修宋弼署日講起居注官○以故雲南鎮南州土州同段恒章子仁昭襲職○癸未上詣暢春園問

皇太后安○諭奉

皇太后懿旨

令貴妃敬慎柔嘉溫恭端淑自膺冊禮內治克勤應晉冊為皇貴妃以昭壺範欽此所有應行典禮各該衙門照例舉行○戶部議覆河南巡撫阿思哈疏稱豫省各府買補倉穀

大都委之州縣減開價值浮交糧石百弊叢生請責成各首邑經管知府祇許照例盤查毋庸涉手等語查知府為州縣表率倉貯盈虧止應任稽查之責其經管州縣如有弊端全賴知府整飭身自作弊則州縣等勢必效尤若將府倉改歸首邑經理知府責任稽查於體制既合而倉儲之額設仍舊應如所奏將開封等府倉額貯穀石均改歸首邑經管一切借糶買補事宜悉照縣倉辦理所有倉

平定縣志卷之六

十一

一

厰斗級人數悉循舊例如有應需協濟動用府倉者仍聽上司酌撥并飭令各該府於每年奏銷時照例就近盤查結報如該首邑有藉稱府倉名色私行科派各屬州縣分買短價累民情事查出即行指名題叅至該首邑既兼管府倉倉穀較前為多其陞遷離任如何展限交盤之處令該撫分晰詳報以憑查覈再各省均有府倉今豫省既改隸首邑應將直省府倉均准其改歸首邑以昭畫一從

之○甲申。吏部帶領京察保送一等之翰林院侍讀盧文弼等五十七員引見。得旨。盧文弼。錢大昕。李中簡。謝墉。觀文。德風。觀光。錢戴。楊述曾。汪永錫。俱准其一等。穆克登。泰。重祿。五彰。阿。錦格。滿岱。陳朝璣。鞠光。訥清。額慶。泰。福森布。岱哈。富興。覺羅。雙福。那諾。穆福。英敏。張三賓。張附鳳。毛應藻。明安。宗室。懇特。宗室。存格。宗室。平泰。宗室。五壯。宗室。巴哈岱。宗室。炳文。哈豐阿。五爾喜。吉爾彰。阿。瑚世泰。德成。富勒賀。王猷。劉秉恬。策璘。七十五。阿克棟。阿。策。賈。那。繼德。福。重。三。藏。保。俱准其一等。加一級。蘇楞額。於侍讀任內成策。於中書任內鄂爾昆。於筆帖式任內。准其一等。加一級。圖。豁。布。張。曾。敬。塞。布。騰。永。祿。俱著改為二等。○戶部議。山東巡撫崔應階疏稱。新城。高苑。博興。三縣。乾隆二十四年。勸墾水田。六頃。三十三畝。應徵銀一十六兩有奇。按年升科。於三十年入冊徵收。從之。○以故翁牛特三等子袞。

布姪旺扎勒襲職。○乙酉。

上臨果恭郡王弘瞻殯所。及簡勤親王奇通阿國寢賜奠。○旌表守正捐軀之安徽宿州民謝永和妻張氏。河南濟源縣民李學順妻郭氏。○丙戌。

上詣暢春園。問。

皇太后安。○諭。向例官員等有未完應追官項。果係無力完交者。取具承追各官印結題請豁免。上年因叅革葭州知州劉度昭拖欠數

減城堡工程銀一千餘兩。該旗查奏請豁。朕以劉度昭本係獲罪之人。而其拖欠之項。乃係工程銀兩。若既免其追賠。復寬其治罪。不足以示懲儆。是以降旨將劉度昭治罪。續有已故鳳臺縣知縣吉祿應追修城數減銀兩一案。該旗已坐扣其子孫名糧。又將伊子送部治罪。刑部議以罪無重科。奏請此後款項有著者。其子即免治罪。雖視該旗所辦較為平允。但未將何項應行追賠及為數若干應

作何治罪之處分別定議條例尚未明晰恐各衙門仍不免誤會諭旨辦理未能允協夫工程覈減之項必須嚴追治罪者原以承辦工程人員或草率誤工或任意浮冒或上司原叅即以侵欺為覈減是較之顯然侵欺者不大逕庭而玩延不完自有應得之罪若因已無可追既行豁免不復加之罪譴則幸免之徒轉自以為得計即如張宏運前在南河糜帑誤工侵欺顯然而皆坐之以覈減應賠之項纍纍至今未完又豈可任其脫然事外不加追究乎至於覈減內採買水脚等項今昔時價不同經部覈駁後該督撫有將實在情形奏聞者朕每特加寬免此與浮冒工程者判然不同即經費項下長支溢領誤發各款情節亦非一律若不論事理之重輕概行議罪並且累及子孫則竟漫無區別與膠柱鼓瑟何異嗣後應如何酌定章程使巧侵者不致漏網獲罪者知所創懲無事者免於拖

累著戶刑二部會同詳悉定議具奏尋議凡遇工程覈減除浮冒侵欺仍按本律定擬外如實係覈減本身無力完繳請豁銀數一千兩以上者請照知府分賠屬員侵欺不完例治罪以十分為率未完五分以內者杖一百六分者杖六十徒一年十分者杖一百徒三年均不准納贖如不及十兩者仍照例請豁免其治罪至身故子孫無力完繳者亦照舊例請豁無庸議罪再覈減採買水脚等項今昔不同或物價較昂或工食漸貴名同覈減與侵欺者迥別如果力不能完自應照例豁免其餘經費項下若長支溢領及分賠代賠之項或失於詳查格於成例欠項零星亦援例豁免若為數較多未便漫無區別應令各該旗籍聲明將本身照現定工程覈減治罪之例酌減一等問擬免其治罪從之吏部帶領京察保送一等之戶部郎中邁拉遜等六十員引見得旨邁拉遜塔章阿色明阿于

雲峻王日杏張應田楊大鵬覺羅圖思德富森布興泰慶桂西成博清額福明安錢受穀戈源汪承霽長際泰德寧顧廷芳普璉福桂雯櫟圖明阿五爾勒惠齡德璘齊發七十五景福文志海都五靈阿敏德鄂奇善書成福勒賀覺羅明善珠魯訥和隆鄂羅敏薩哈禪薩郎阿永長保成明倫戴文燈哈琳圖桑阿覺羅奉和覺羅恒齡伍納錫德寧梁永年覺羅福勒賀興順清德永信俱准其一等加一

級赫紳於員外郎任內沈清任於主事任內准其一等加一級○丁亥遣官祭

關帝廟○諭軍機大臣等明瑞等奏聞賊有決戰之信即整兵進剿連戰敗賊恐其事急潛逃於要隘分兵防守等語以賊人現在情形計之賴和木圖拉若不為其屬人所殺必至潛逃此時脅從之賊若擒獻首惡尚可寬貸否則仍遵前旨辦理○又諭據額爾景額參奏和闐總兵和誠於上年十二月派阿奇

木伯克阿什默特署筆帖式松科泰家人李文等假巡查六城為由松科泰李文索取回人金錢衣物衆回人無不嗟怨等語和誠以辦事大員任聽屬官家人求索所部甚屬不堪且安保無指使情事和誠著革職等因奏內有名人犯俱交明瑞阿桂嚴審定擬具奏至阿什默特雖有干涉若衆人不行首告即毋庸深究昨據額爾景額參奏和誠私采哈朗圭塔克之玉隱匿不進朕以采玉尚無關

緊要姑從寬貸此次所奏情事又在采玉以前則是和誠向日行止不端額爾景額未免為之姑容今見素誠在烏什以貪婪債事始補行參奏殊屬闕茸著傳旨申飭昨伍訥璽以布政使銜赴和闐辦事此時著富明安暫署丑達亦著往和闐辦事○又諭駐劄各回城辦事大臣理宜潔已奉公約束下人撫輯回衆毋令絲毫擾累乃大臣等遇事往往彼此歧視漠不相關以博長厚之名雖有見聞

概行容隱。若果能以國事為重。於同官有不
法之舉。即行叅奏。則不肖之徒。知所顧忌。何
至滋生事端。即如烏什一事。可為炯戒。現在
和誠。又縱伊屬員家人。求索所部。額爾景額
平日豈無見聞。而僅以私采玉石一事入奏。
朕以為無關緊要。姑從寬貸。及烏什事發。始
補行叅奏。若早如此。直切指陳。則和誠早經
治罪矣。額爾景額。即係姑息瞻徇。著傳諭各
該大臣等。嗣後有仍蹈覆轍。擾累同人者。鄰
城一有見聞。即據實叅奏。其或以私事不合。
互相傾軋。亦不能逃朕洞鑒。吏部帶領京
察六法官。宗人府主事。延德等四員。引見。得
旨。延德。景椿。著照部議降調。德山。積蘭。泰。著
照部議休致。○兵部等部議覆。綏遠城將軍
宗室蘊著奏稱。綏遠城官五十四員。兵一千
三百餘名。右衛官四十八員。兵一千五百餘
名。二處官兵多寡不同。請量其數。用均齊。將
綏遠城滿洲作為佐領十六。蒙古作為佐領

四。共二十佐領。右衛滿洲作為佐領八。蒙古
作為佐領二。共十佐領。綏遠城現在協領九
員。內滿洲八。蒙古一。佐領二十一。防禦十。驍
騎校十四。今設佐領二十。按一佐領下防禦
驍騎校各一員計算。多佐領一員。少防禦十
員。驍騎校六員。兩翼蒙古。少協領一員。均應
添補。右衛現在協領六。佐領九。防禦十一。驍
騎校十七。今設佐領十。按數計算。少佐領一
員。多防禦一員。驍騎校七員。協領六員。內多
滿洲協領一員。均應裁。請將右衛應裁滿洲
協領一員。暫令其管理。綏遠城協領一缺。即
仍於蒙古內補放。其右衛滿洲協領一缺。即
裁。至綏遠城所少之防禦十員。將多餘佐領
一員。令其原銜在防禦上行走。再將右衛應
裁之步軍章京一員。防禦一員。調補。尚少七
員。即在右衛世職閒散官及驍騎校內揀放。
其綏遠城所少驍騎校六員。即於右衛應裁
驍騎校七員內調補。其餘一員。俟缺出。裁。至

右衛少佐領一員。即行保送補放。又綏遠城右衛二處。每兵百名作為一佐領。每佐領下除匠役各二名外。領催前鋒馬甲各七十五。養育兵步甲各二十五。綏遠城應額兵二千。現一千三百。不敷滿兵七百。於由京派來駐防兵內補。不敷蒙古兵一百。於右衛蒙古餘額兵內補。其右衛蒙古餘額兵。俟缺出裁均應如所請辦理。至奏稱右衛滿洲蒙古兵搬移家口。請照移駐張家口之例。給與口糧車

書錄卷三十五

三

價亦應准其照例辦給。至稱右衛每兵一名。馬三匹。口糧十分。綏遠城每兵一名。馬二匹。口糧五分。今既均齊移駐之兵。亦照綏遠城例。每名裁馬一匹。每兵各給口糧十分等語。查乾隆二十九年右衛移駐案內。據晉撫咨報。每大口日給口糧粟米八倉合三勺。小口減半。并未議有兵一名。給與口糧十分之處。所有此次移撥綏遠城兵家口。應令該將軍查照定例支給。毋庸議添從之。○兵部議准

湖廣總督吳達善疏稱。湖北省現存驛站座船十二。沙船二。皆毋庸議減。惟宣樓船三十六。船多差簡。請裁減十隻。餘各項站船四十。足敷撥用。統計拆造。蓋及水手工食銀每年可節省二千七百餘兩。倘過差添。即於裁存工食銀內雇船備用。從之。○旌表守正捐軀之湖北蘄州民馮三女馮氏。戊子。

上詣暢春園問

皇太后安。詣

書錄卷三十五

三

大高殿行禮。○還宮。○己丑。

上御太和殿視朝。文武陞轉各官謝恩。○幸圓明園。○吏部議准貴州巡撫方世儒疏稱。平越府屬湄潭縣向因地廣人稀。政務較簡。定為簡缺。近生齒日繁。實屬難治。非揀選強幹之員。不能勝任。又安順府屬清鎮縣昔為兼三要缺。近則該處民苗相安。事務較少。請將湄潭縣改為繁疲難兼三要缺。在外揀補。清鎮縣改為衝難兼二中缺。歸部銓選。至石阡

府屬龍泉縣向例定為簡缺。今亦請加以繁難二字。改為中缺。歸選等語。應如所請。准其更調註冊從之。○戶部議覆大學士管兩江總督尹繼善疏稱。丁溪廟灣二場。原報熟地四千一百八十二頃。內除實丈出熟地一千三百八十六畝外。荒地銀四千六百九十兩二錢九分。請自二十八年為始。久遠減除。至查丈熟地。較二場原報共多出地二百二十二頃五十七畝。應將查丈不實之員附參等語。應如所請。將各員附參。并前項丈出餘地。自二十七年以後。應徵課銀。按數追繳。送部查覈從之。

實錄卷七百三十六

三

大清高宗法天隆運至誠先覺體元立極敷文奮武孝慈神聖純皇帝實錄卷之七百三十六

實錄卷七百三十六

三

大清高宗法天隆運至誠先覺體元立極敷文
奮武孝慈神聖純皇帝實錄卷之七百三十七

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣等謹

總裁官經筵講官太子太傅大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級戶部尚書錢謙益滿洲都統軍功紀錄五次

尋常紀錄十四次臣等謹將經筵講官太子少保工部尚書紀錄六次臣等謹將等奉

敕修

乾隆三十年乙酉五月庚寅賜哈薩克阿布

賚勅書曰昨爾所遣恭請朕安之鄂托爾齊
等來京瞻覲朕顏覽汝表文並據鄂托爾齊
口奏布魯特帶兵入爾哈薩克游牧戕害多
人掠去牲畜無數仰乞睿鑒等語前據駐劄
伊犁大臣奏稱巡察塔爾巴哈台等處路過
爾哈薩克之鄂羅木拜等稟稱阿布勒比斯
糾合多人帶兵二千餘名將布魯特人畜搶
掠無數彼此講和完結哈薩克布魯特俱係
仰慕皇風為朕藩服朕一視同仁毫無軒輊

今汝奏稱布魯特侵擾爾哈薩克然汝之阿
布勒比斯帶兵二千餘名擄掠布魯特而回
為我大臣所遇布魯特若以爾等入彼游牧
擄掠人畜入告朕將以誰為直耶看來爾二
部彼此搶掠習以為常爾等兩處游牧係屬
比隣理宜彼此和睦守分安居互相刳擄最
為惡習兩俱無益布魯特擄掠汝等一事汝
使人來後爾等哈薩克亦將布魯特搶掠報
復業已講和完結嗣後爾等當感激朕恩恪

遵訓諭改革搶掠之習循分安居戒除貪圖
小利之心則長受朕恩各享昇平之福矣勉
之此事布魯特並未入奏伊即入奏亦照此
旨曉諭無論何人朕不偏袒也外特賜阿布
賚蟒緞文綺若干爾其祇受朕之恩賜并賞
來使鄂托爾齊三品頂翎額呼克拜吐魯根
摩呼賚雅爾監博渾五品頂帶薩噶爾哲爾
格齊薩坦巴朗阿達伯克六品頂帶及前次
賞給三品頂翎之瑪穆特五品頂翎之和通

額哩葉伯克和屯鄂羅滿圖滿等十七人服飾器用銀兩有差再爾奏請人葺等藥俱如所請賞給爾一併祇領○吏部帶領京察保送一等之工部郎中薩穆哈等四十八員引見得旨薩穆哈永慶務實柱林孫琦福重王琳巴克唐阿威中額范樹禮德需薩泰鄂敏舒勒赫明善發哈伊克坦布明海海拉遜圖桑阿查錫納德興岱永佛遜泰查爾斌阿諾穆圖睦成額拉布坦道貴布達扎布瑞泰覺羅扎進泰長唐闊循琦王鋌吳綬詔泰覺阿隆安薩靈阿官泰福永鳳翔佛爾慶額伍雲珠八格書啟善素爾納俱准其一等加一級瑪爾洪阿准其於郎中任內一等加一級○以侍講謝墉為福建鄉試正考官御史毛輝祖為副考官戶部員外郎錢受穀為湖南鄉試正考官編修張坦為副考官內閣侍讀學士湯先甲為四川鄉試正考官吏部員外郎王猷為副考官翰林院侍讀學士盧文弨為

廣東鄉試正考官吏部員外郎劉墀為副考官御史積善為廣西鄉試正考官吏部主事孟超然為副考官○命副都統伊勒圖往雅爾辦事更換副都統訥蘇肯往阿克蘇同叅贊大臣綽克托辦事○辛卯戌刻京師地震○諭軍機大臣等據刑部議覆明德審擬程秋香致死胞兄程成一一案該撫照弟毆胞兄至死例擬斬立決雖罪無增減而於本內聲明該犯實係失手致傷並非有心毆死等語殊屬非是當程成一之豬在該犯程秋香田內踐食白菜其事本屬甚小該犯執擔趕打及豬已跑回何至窮追入室且人與豬高下相去懸殊豈有舉擔向豬遂至傷及伊兄顛門之理於情事尤為未協從來外省辦理卑幼毆死尊長案件雖據例定擬每於供詞內多方遷就以冀一綫可原久已成為銅疾屢經降旨飭諭明德向來辦理刑名尚為詳慎何以亦蹈此惡習著傳旨申飭○又諭

前明山叅奏糧道王槩浮收倉米賣銀入已一案業經該督撫審擬完結。但思從前明福於糧道任內。因有浮收斛面等弊。特派劉統勳前往徹底查辦。此後自應夙弊一清。何得王槩尚有浮收之事。且自查辦明福以來。閱今已十餘載。其間任糧道者不止一人。如歷任道員。並知潔已自愛。而王槩獨敢復蹈覆轍。致有浮收私弊。則更無可曲貸。若其事為歷任相沿之陋弊。而道員之為督撫所偏護。

者。即曲為掩蓋。姑容其意。所不悅者。即登之白簡。是督撫以愛憎為是非。致同一貪墨之員。或顯罹刑章。或倖逃法網。實於政體有關。況倉糧本有定額。若任意浮收。計圖贏溢。必致苛累小民。尤非整飭官方之道。朕辦理庶務。一秉大公。豈容含糊了事。使監司同罪。異罰耶。著傳諭李侍堯。明山。將明福以後。王槩以前所有歷任道員。有無似此浮收私賣等情節。逐一徹底查明具奏。毋得稍有袒徇諱。

飾並將此後如何立法不致仍生弊端。著悉心詳議具奏。明山如已赴江西。於接到諭旨後。即回廣東。會同李侍堯悉心查辦此案。定議後。再赴新任。將此諭令知之。吏部帶領京察保送一等之吏科掌印給事中陳作梅等三十七員引見。得旨。宋弼准其一等。陳作梅福章阿范宜賓塘古泰寧泰吉爾章阿庚音布占達哈布。熙玉。兆靈。阿誠。明圖。起瑚什理。畢沅。李汪。度趙翼。彭元瑞。章謙恒。褚廷璋。

圖拉。積福。楊義。那禮。善素。匡肅。懷誠。寘廷璋。

阿昌。阿阿山。納清。阿福。慶德。明素。楞額。墨爾根。額俱准其一等。加一級。德慶。佛佑俱著改為二等。壬辰。

上詣暢春園問皇太后安。諭軍機大臣等。本月十七日戌刻。京師微覺地震。旋即寧靜。直隸地方距京師甚近。所有畿輔一帶情形。若何。朕心深為廕念。著傳諭方觀承。令其即速查明具摺覆奏。

尋奏保定省城亦於是日微覺地動臣查問城內外居民有覺有未覺者保定距京三百餘里情形既屬相同諒各處不過如此報聞○戶部議准調任陝西巡撫明德疏稱鳳縣地方幅員遼濶請將附近留壩一帶村莊及松林武關二驛分隸通判管轄其民壯一項除現在籌議外禁卒二名應准在鳳縣內酌撥二名作作一名於旱役內撥充斗級四名於弓兵內撥給從之○癸巳諭軍機大臣等明瑞等奏稱四月十八日賊人驅出牲畜甚多一半渡河牧放因伏兵五十名候賊人舍騎刈草之時突起衝擊擒三人殺二十人其渡河之賊被殲大半收取牛馬驢三百餘分賞効力官兵等語此次官兵擊賊收其牲畜甚屬奮勉著查明有應賞已圖魯號者奏請賞給仍酌量獎賞以示鼓勵今日據納世通等雖奏稱與賊交戰數次並未有實在勞績著傳諭明瑞凡城西堵截賊人樵牧俱著一

體加意辦理○吏部帶領京察保送一等之光祿寺署正福寧等三十九員引見得旨福寧汪守鐫佛尼勒班濟泰奇成額承基舒魯富炎泰道寶舒明陳孝泳什勒密喜常白士傑永德張肱楊桑阿瑪興阿覺羅法海那澄常慶富勒渾張桂馬進泰顧光旭馮章宿松祿筠翮書魯俱准其一等加一級○乙未上詣暢春園問

皇太后安○諭軍機大臣等昨據富尼漢奏稱沂水縣有鹽徒聚集二三百人在地方滋事該縣會同千總前往查拏詎鹽徒持械拒敵打傷縣役二名並將該縣等所擒捕打倒之鹽梟三名亦被搶去四散奔逃該縣等現在尾追擒拏等語已批令嚴拏重處毋致漏網並令將因何致事之故查明速奏矣此等匪徒若祇係挑販私鹽何至聚集二三百人之多敢於持械拒捕必有致釁之由諒非邂逅聞拏烏合滋事或該處奸民本屬刁悍聚集

已久。遇事輒爾恣橫。而地方官平日既姑息養奸。臨時復經理不善。均須徹底根究。崔應階現在濟寧一帶查河。相距沂水不遠。著即前往嚴行查辦。至陞任知府宋敞。朕因其資俸已深。人亦似乎可用。是以量加遷擢。但該員在沂已久。若果能留心整頓。必不致梟棍橫行。此案與宋敞任內有無干涉。及該員在任時是否實心。并新授知府曾否接印任事。及如何辦理之處。並著即速查明據實覆奏。將此傳諭知之。○又諭曰。新任處州府知府沈嶠。經部選四川保寧府知府。引見時。朕以其人才具未必能勝保寧劇任。是以調用處州。今日請訓召見。察其舉止奏對。即處州簡缺。亦恐未能勝任。裕如處郡地居山僻。雖案牘不甚繁多。而整飭亦須得當。況知府有表率之責。若辦理竭蹶。即難稱職。著傳諭熊學鵬留心察看。如果不能勝任。即據實具奏。斷不可稍事姑容。致滋貽誤。○又諭曰。推陞貴

州銅仁府知府佟世虎。於請訓召見時。朕觀其人殊有習氣。奏對亦未能明了。該員前在湖北宜昌府知府任內。總督那蘇圖曾奏稱該員難勝知府之任。今看其人實屬平常。知府有表率之責。若辦理諸務。張皇竭蹶。恐致貽誤地方。著傳諭方世雋留心察看。如果不能稱職。即行據實具奏。不得稍事姑容。○丙申。吉林將軍恒祿等奏。吉林失火。應蓋房間。請借官兵民人等俸餉銀兩。得旨。吉林地方三年內失火二次。官兵民人等修造房屋。未免拮据。著加恩將借與伊等之俸餉銀兩。俱著展限扣繳。三年者展為五年扣完。五年者展為十年扣完。餘照所請辦理。○丁酉。孝恭仁皇后忌辰。遣官祭景陵。○諭軍機大臣等。李侍堯等審擬李星垣婪索土知州岑宜棟銀兩一摺。定罪甚屬失當。李星垣始向岑宜棟索借銀二千兩。因其一時難以措應。輒將營中現存買穀價銀一

千五百兩令其豫領俟秋間備穀交倉旋即令家人張同收取入已侵用以庫貯買穀官項假豫發之名巧為騰挪私充慾壑非監守自盜而何李侍堯並不按伊應得之罪定擬乃引索借所部財物律擬似於本條加重科斷即其家人張同趙公承李星垣意指兩次向岑宜棟勒索六百餘金情均可惡亦不僅以杖責完結已交部另行覈擬矣李侍堯前在兩廣總督及戶部尚書任內辦理諸事頗知認真此次自用為湖廣總督調任兩廣以來一味萎靡不振殊非朕倚任之意况李星垣即係該督保舉堪勝總兵之人今其贓罪敗露猶欲為之迴護意從輕減即此一端其一切之不能如前可知矣該督現在年力壯盛尚可造就有成若似此因循不思極力整頓何以承受朕恩耶李侍堯著傳旨申飭○又諭曰楊錫紱奏漕船於五月初十日全數渡黃一摺今年漕船北上較往歲稍遲且前

半年運河水勢亦覺淺少昨雖據崔應階奏報東省得雨水已加長今該督亦奏及河水充裕足資浮送第此後水勢或不無有盈縮之處現在即須豫為籌辦以利輓運楊錫紱於南巡時甫經召見為時不遠此次押運北來不必循照往例赴圓明園宮門或到京已屆巡幸木蘭啟鑒之後並不必趨赴行在該督可徑在運河一帶往來察看妥協經理著將此傳諭知之○免安徽懷寧桐城太湖宿松望江貴池銅陵東流當塗蕪湖繁昌無為廬江巢縣和州含山等州縣並建陽廬州安慶三衛乾隆二十九年分水災民田蘆洲額賦○戊戌

上詣暢春園問

皇太后安○吏部議准湖北巡撫李因培疏稱文泉縣治裁歸沔陽州管轄漢陽府通判關防鑄有文字自應刪去另擬從之○己亥諭軍機大臣等明瑞奏四月二十七日桑林內

有馬賊二百餘名。領步賊二千餘名。斫取桑樹。臣急速領兵進攻。計捉生七名。勦殺二百餘名。得馬及鳥鎗無算。又將拏獲小回人二名。放回以離間城內人心等語。明瑞此等意見。甚不曉事。豈欲圖賊人感激耶。殊不知我兵初到時。畧示懲創。賊即納降。尚可酌量寬宥。今已抗拒數次。並無悔罪。歸附者。非闔城誅戮。無以示儆。將來著傳諭明瑞。仍遵前降諭旨。不可稍事姑息。○吏部議覆盛京兵部

侍郎果爾敏奏。稱盛京庫使遇考試筆帖式時。向例考中者。仍留庫使。未中者。即行開缺。請嗣後停其開缺。仍留庫使効力等語。查伊等既不能考中筆帖式。復久任庫使。亦無以示勸懲。應令嗣後庫使考中筆帖式時。除照例補用外。未經考中者。暫免解退。令該堂官嚴加訓迪。俟下次入考不中。即行解退。另補從之。○禮部議覆安徽布政使程燾奏。稱生監不許充當牙埠雜役。及莊書社長等項。先

經浙江學政李因培條奏。經部覆准。在案。伏思社長與雜役不同。職司倉糧。稽覈借放。祇當論其家道殷實。為人端謹。不必論其為生與監。且生監亦有區別。生員讀書應試。原不宜以他務相妨。至鄉民蓄貲捐監。祇以頂帶榮身。並非應考。自嚴禁後。貧民勾串吏胥。冒認承充。請嗣後除應試生員。毋庸選充外。其鄉民捐納貢監者。仍准充選等語。應如所請。嗣後充選社長。社副。准於該鄉不應考試之

貢監生。及愿謹農民。擇其殷實可任者。一體選充。其應考生員。停其充補。從之。○改鑄雲南東川府分防湯州通判關防。從雲貴總督劉藻請也。○庚子

上御勤政殿聽政。○諭軍機大臣等。據莊有恭奏。審擬外洋刦盜龔老大等各案犯。分別定罪。一摺。已交法司覈擬具奏。但如崇明縣事主張奎吉。在陳家河外洋被刦一案。首夥共十七犯。現據拏獲王長生等十一犯。又投首

之張忝補外其餘各犯自應上緊緝獲立正典刑毋使一人竄逸致稽顯戮不得以首夥已獲過半遂稍存懈弛之意僅以通緝了事及將來續獲各犯亦不得任其巧飾卸罪倖逃法網也此等江洋大盜糾合匪徒行劫多案肆行不法已至數年之久皆厯任文武各員不能實力防緝姑息因循所致現在龔老等雖已緝獲而其餘未破之案或事主隱忍未報或遠在外洋刦殺無人首告者恐復不少有司營汎各員弁尤當協力訪查設法擒捕務期洋盜根株盡絕估舶往來安行以收寧謐綏靖之效其如何嚴定章程飭屬巡防搜緝肅清海洋之處該督撫其悉心籌辦毋以具文塞責將此傳諭莊有恭並該督尹繼善知之○戶部議准直隸總督方觀承疏稱候選員外郎范清濟接辦銅觔自三十年為始每年辦解保定銅二十五萬觔較前多運銅五萬觔適符一鑪之數請將前減二鑪

內仍添設一鑪應配鉛錫一併委員採買所有局內員役公費工食俱照依五鑪之數增給辦公從之○辛丑諭曰熊學鵬因其子熊之台聽受書吏撞騙伊平日不能教訓請交部嚴加議處一摺已於摺內批諭寬免矣熊之台經部問擬杖徒熊學鵬並不敢為其懇請捐贖但念熊學鵬簡任巡撫以來於辦理諸務頗知認真亦能留心察吏且伊子因書吏撞騙僅係口許酬謝究與有心央浼營幹者有間熊學鵬僅有一子著加恩准其贖罪○軍機大臣等議覆直隸總督方觀承疏稱萬全縣張家口縣丞倉支牧丁口糧一項前以採買周章撥運糜費請令銀米兼支經軍機大臣議令仍支本色但數年以來領取米石於牧丁生計愈覺無益請仍改折色等語查乾隆二十六年督臣方觀承因採撥維艱請將察哈爾牧丁口糧銀米兼半支放臣等恐牧丁領銀花費轉致乏食不若仍支本色

奏准今復據該督體察近年情形與都統巴爾品札商稱張家口鋪戶與察哈爾牧丁長年交易牧丁所需茶布各項俱係賒取指米償還逐年遞壓豫賒至數年之後該鋪戶於貨則增價於米則減值輾轉盤剝無所底止是牧丁所領米石並非藉以食用而每年籌解祇為鋪戶罔利之端該丁轉不能實受其益自應如所奏按米石定價支給銀兩由張家口同知支放庶兵丁領銀到手或置買貨物糴買米糧皆得便益從之○又議覆河南巡撫阿思哈疏稱直省各標營生息銀原為兵賞需用乾隆二十四年奉旨以其名非政體飭令各該督撫就本省情形籌畫議奏嗣經直隸山西江南等省俱請裁兵扣餉充賞而豫省生息原本久經歸清其現存以息作本銀三萬六千餘兩經前撫臣胡寶琛奏請照舊存留交鹽當商領運生息充賞在案今各屬鹽當商每年向有規禮多寡不同乾隆

五年撫臣雅爾圖奏明府廳州縣如數在三百兩以下者仍留在本官工費之用逾額者提存司庫以充賞卹計每年約有六千餘兩除賞捕工食外頗有存餘以之賞兵既與政體合宜並可久遠遵行等語查此項銀兩雖亦出自商人但久經充公即與公帑無異應如所請將各營生息銀截至三十年代概行停止營運定限一年將本銀繳回俟收齊請旨撥解其各標營每年賞卹通共需銀三十四五百兩即於三十一年始於鹽當規禮項下按季赴司動支隨時查賞從之○壬寅諭今日國子監帶領蒙古教習引見竟不能說蒙古語蒙古教習若不能說蒙古語將何以教人此二人不便照例施恩觀保雖不通蒙古語然教習等平時能否說蒙古語之處亦應詳查觀保無用著不必管理國子監事務派德保伍勒穆集管理○諭軍機大臣等玉素布奏稱伊弟阿布都拉騷擾烏什回人以

致債事俱由伊素失教訓請交部嚴加議處等語阿布都拉以阿奇木伯克縱所屬人等滋擾激變罪由自取與玉素布無涉著加恩免其交部○癸卯

上詣暢春園問

皇太后安○諭據舍圖肯等將盛京應行修理

陵寢宮殿等工估計具奏修理盛京

陵寢宮殿等工工竣移奉

神牌所關緊要理應由京派大臣等前往盛京

平定九年十二月

會同該將軍一同辦理著派公永瑋都統四

格前往盛京會同舍圖肯將

陵寢宮殿應行修理之處一同勘定後四格即

行回京永瑋俟工竣奉移

神牌供奉後再行回京○諭軍機大臣等據明

瑞節次奏報進攻烏什情形朕以逆賊等一

心死守即困憊出降亦不可寬宥今又據所

奏捉生詢問之言是賊人口糧將盡不久即

可取其城縱使歸降亦不過圖免誅戮非其

本心益不可信著傳諭明瑞但遵陸續諭旨加意堵截搜剿拆毀城堡以杜後患萬勿稍存姑息之見○戶部議准廣西巡撫馮鈐疏報宣化崇善歸順三州縣勸民開墾水旱田一項八十八畝零天保縣勸民開墾田埜三十六埜一什一伍半伍應徵銀米分別於三十五年三十九年升科收納從之○工部議准直隸總督方觀承疏稱獨石口官兵舊有營房共八十五間今照古北口等處建造營房例移建衙署營房共二百六十間估銀修建從之○伊犁將軍明瑞等奏烏什軍務甚要納世通卡塔海平日辦事糊塗此次舉動尤為錯謬奉旨將納世通卡塔海嚴拏正法即令觀音保明亮前往接辦納世通等分兵西北若解至臣營相距數十里恐其聞信自戕未能明正國法臣等即派領隊大臣觀音保明亮前往將納世通卡塔海交與侍衛訥蘇等護送前來稟稱拏二人時齊集侍衛官

員伯克宣讀諭旨。回人布魯特俱歡喜告語。至愛隆阿伍彌春。因伊犁事繁。不便遠離德福。向在阿克蘇。雖辦事糊塗。近頗知省改。可否暫行寬宥。俟綽克托。伊勒圖到時。再將伊犁革職治罪報聞。○甲辰。諭前因烏什之事。朕以回人斷無無故作亂之理。必係彼處大臣官員等將伊等苦累不堪。致啟釁端。因交明瑞查奏。嗣據明瑞等將納世通平素妄自尊大。於辦事人員過為寵信等款。陸續奏聞。今

柏琨又將納世通在喀什噶爾從前帶領回人行圍。并主事烏爾袞。任意勒索回人。毆害伯克。種種劣蹟。查奏。各城駐劄辦事大臣。俱身受朕恩。為一城統領大員。自應潔已率屬。安撫回衆。即偶爾行圍。藉以操練官兵。原屬可行。但祇應帶內地兵丁。至於回人俱以耕種為生。乃常派其出圍。以致伊等廢時失業。有是理乎。曾見內地大臣有帶領農民行圍者乎。實屬悖謬不堪。再回部伯克俱係恩賞

職銜品級之人。該管大臣固不可過於優容。亦不可任意凌賤。至官員等。尤非大臣可比。烏爾袞不過一主事耳。竟敢將散秩大臣阿奇木。毆辱。實出情理之外。此皆大臣等平日過於寵信所致。若不重治其罪。何以示懲。是以降旨交明瑞。阿桂等將納世通。卡塔海治罪外。併將烏爾袞等審明定罪。若傳諭各城辦事大臣。嗣後各宜守身潔已。善視伯克。一切事務。秉公辦理。屬下人員。嚴加約束。毋令

擾累回衆。以納世通為炯戒。著通行曉諭知之。○諭軍機大臣等。李宏奏請河工効力人員。仍循舊例。在外揀選一摺。內稱於德州召見時。曾經陳奏。面奉諭旨。應該如是等語。從前李宏面奏。應行改例情形。彼時以該督所奏亦屬近理。是以令其具摺。陳奏。候朕勅部議行。若果竟以為應該如是。彼時即降旨允准矣。李宏此奏。祇宜就事論事。原可不必將面奉諭旨。敘入摺內。即欲詳悉敘明措詞。亦

應與面奉之旨相合。豈宜稍有增飾。已將原摺改正。交部議覆。看來李宏此摺。若非不諳事理。即係漢軍習氣未除。著傳旨申飭。○是月。漕運總督楊錫紱奏。浙江、汴、廣各幫行抵宿遷以北。並山東境內各幫。據委員稟報。河水稍小。每逢淺處。多須起剥。臣隨自淮沿途察看情形。宿遷一帶。將駱馬湖之水開放。接濟邳州一帶。將沂河之水。從蘆口壩引出。歸入運河。至微山湖。為南省運河之源。惟湖口閘內向有一灘。東風大起。出水不暢。臣委員將攔門灘開挖深通。俾湖水暢出。以濟南運。至濟寧南旺一帶。因天氣亢旱。汶河涓細。是以運河水勢不能加添。河臣李宏已飭暫開蜀山湖水。以助南北分流之用。俟汶水一發。即行堵閉。待江廣重運。再行開放。目下南北糧艘已各處通行無阻。再五月初一至初三。連日大雨。河水增長。從此汶水長發。更可通行。得旨。可謂盡心經理。據李宏亦奏報得雨。

水長。此後似可不憂水不足矣。又會同巡漕御史德成奏。五月初九日。據湖南頭幫千總報稱。旗丁成忠船裝米七百二十五石八升。又灑帶米六石九斗三升。行至邳州之河成閘。陡遇暴風。折倒大桅。挑開底板。淹斃副丁一名。米石漂散無存。查內河失風。例應賠補。但至七百餘石。一時全償。窮丁力難措辦。請於本年抵通。令買米四百石。交納其餘。寬俟下運。買足帶交。得旨。如所議行。○江西南

昌鎮總兵邱若龍奏。報赴任經過地方雨水。並察閱營伍情形。得旨。覽奏俱悉。但期言行相符。勉之。○浙江巡撫熊學鵬奏。浙省製造各營火藥。及各縣官匠傾銀火硝。每年赴豫、江二省採辦。硝三十六萬觔。近年豫、江二省產硝稀少。委員赴買。俱未足額。除運回先供各營應用。而銀匠傾鎔之硝。每致等待需時。上年十二月內。經司道等會詳。以官匠每年傾鎔餉銀。約需淨硝三萬八千觔。與其候委

員辦回繳價給領停鑪等情請令誠實官匠
備價隨同委員購買先行運回濟用至硝觔
抵浙另委妥員秤驗其所買之硝仍即在原
額三十六萬觔數內扣算不許額外多買臣
查司道各庫餉銀例應按卯傾兌需用硝觔
難以遲緩今令官匠自行備價赴買運回應
於在省同知通判內委派一員監督及時鎔
淨以濟實用嗣後除營中需給各處硝觔仍
聽杭協設廠監鎔外其司道庫所需傾課之
硝俱照此隨時派委承辦辦理得旨如所議
行○湖北巡撫李因培奏湖北糧米向仰給
湖南川東春間川省少雨湖南去歲歉收客
米稀至湖北米價漸增因飛飭各屬開倉平
糶並屢飭武漢二府自四月初間開糶起至
本月底止分設多廠減價而糶貧民資以餬
口又各營兵例給折色之時按名一例借給
米石即於伊等應領餉內照平糶價值分作
三個月扣還兵民寧帖近日客米漸通市價

驟減俟早禾一登民食愈足得旨覽奏欣慰
凡事豫則立如湖南所辦似遲而又不得當
故致成事端矣○河南巡撫阿思哈奏彰德
府屬安陽縣舊有萬金渠一道係引洹河之
水分流縣境下達衛河該縣地畝既資灌溉
亦藉宣洩康熙年間建閘啟閉極資利賴日
久淤塞乾隆三年復濬之後地方官不甚留
心致漸淺阻茲復據該府稟萬金渠不可不
修但須立定寬深丈尺大加挑挖方能收效
剋期興工逾月竣事又安陽縣向有美河一
道乾隆二十二年河決馬官屯水勢衝刷成
河而舊河反致淤塞亦經該府稟明新河土
鬆地窪應仍挑復舊河計淤塞一千六十丈
照舊規諭令沿河居民用力開挖亦已告成
堵築新河復歸故道並定歲修之例逐漸加
寬以資暢洩得旨嘉獎○大學士管陝甘總
督楊應琚奏覆據陞任陝西布政使方世雋
以陝省潼關至長武路通新疆護解遣犯民

壯不敷請按照銜僻分缺裁撥經部議以陝甘二省俱通新疆甘省現俱照舊陝省因何更調請勅下督臣通籌詳議查陝省七十六州縣廳惟潼關至長武十三處為通新疆之孔道甘省六十四州縣廳惟涇州至哈密二十處為毗連新疆之上游現在護解遣犯多係各該處於各班人役內通融派撥並捐給往返口食數年辦理尚無貽誤至民壯一役設自順治四年因各州縣捐解俸工以致有

名無實雍正六年勅部定議令將壯丁按額選足用以捕緝盜賊防守城池倉庫原非專為遞解遣犯而設計自節經裁汰以來俱係確按繁簡酌定數目實難再行裁撥臣悉心通籌二省民壯應請仍循其舊毋庸更張惟嚴飭各屬務須選用精壯如有老弱充數及不知技勇者即令該管府廳據實揭叅以示懲戒得旨如所議行○又奏甘省巴里坤鎮標中左右三營與安西營從前額設把總每

營四員嗣於乾隆二十六年經臣奏明在巴里坤鎮標右營內酌撥把總一員前往蔡把什湖率兵屯種歸哈密協管轄是以巴里坤鎮標右營祇有把總三員其安西營因將百齊堡把總一員兵一百名移撥安西所以現有把總五員兩處營制未臻畫一再查巴里坤孳生馬廠所需牧馬兵丁向因鎮標三營不敷派撥每於各協路撥用未免需費滋繁經臣奏請在安西營兵內酌撥二百名移往

甘肅通志

卷七

以資牧馬並請於安西營把總五員內酌撥一員移往巴里坤鎮標補額庶於牧務營制兩有裨益得旨如所議行○兩廣總督李侍堯奏廣東省各營兵紅白事件原經酌定規條分別賞給嗣緣改減息銀不敷支放又奏定照原定賞格八折給發乾隆二十四年廣州各屬時氣流行兵屬事多賞倍所收息銀儘用外尚不敷銀二萬一百餘兩數多難補是以臣前任內奏請將兵丁父母身故及祖

父母身故。原定賞銀六兩四錢者減為四兩。原定賞銀三兩二錢者減為二兩。俟歸清借項。仍照例給發。今查自酌減以來。除清還借項。截至乾隆二十九年。餘銀一萬九千九百零足數。原賞請仍照八折賞格一例給發。得旨。著照所請。行下部知之。○廣東巡撫明山奏。崖州境內皆山嶺。產穀無多。比來生齒日繁。流寓甚衆。每商販鮮至。米價增昂。查該州原貯額穀五千三百七十八石四斗。另貯穀一千一百七十四石。遞年碾放。所存無幾。必須酌量加貯。以備緩急。但各州縣倉穀久經定額。毋許浮多。茲查高州府屬之電白縣有溢額穀七千餘石。堪以撥運五千石。同崖州額貯穀共一萬一千五百五十二石零。長為定額。再查惠州府屬之歸善縣額穀一十一萬餘石。為數甚多。上年平糶。尚有未經買補穀價。應即截出六千一百七十餘石。價銀批解充餉。即以抵崖州加貯之額。如此通融辦

理。是並未額外加增。而邊海要區。積穀稍充。於民食實有裨益。得旨。如所請行。

大清高宗法天隆運至誠先覺體元立極敷文奮武孝慈神聖純皇帝實錄卷之七百三十七

大清高宗法天隆運至誠先覺體元立極敷文奮武孝慈神聖純皇帝實錄卷之七百三十八

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆三十年乙酉六月乙巳朔諭軍機大臣

等崔應階覆奏沂水縣鹽徒滋事緣由一摺
內稱鹽徒乘地方官公出挑取私鹽雇覓鎗
手公然赴集肆賣巡役前往查拏即煽誘趕
集鄉民隨同搶奪等語可見此事起釁由地
方無大員彈壓所致朕向來巡幸地方恐地
方大吏齊來迎鑾以致境內乏員經理屢次
降旨禁阻即如今歲南巡沿途諄切告誡更
不啻再三乃不知善體朕意以地方事務為
重致生此等搶奪事端該撫實不能辭咎所

有聚眾滋事鹽徒雖已拏獲三十餘人據稱
首出要犯數名現在分路追拏是首犯尚未
弋獲該撫務督率員弁極力擒捕毋使漏網
稽誅至趕集鄉民當鹽徒肆橫時即不能協
同官役查拏亦應各守本分安靜無擾乃轉
因其煽惑竟從而附和搶奪其情亦屬可惡
將來審擬定案務當研究隨同犯法之人嚴
加懲治以示炯戒斷不可稍存姑息致令脫
然事外再此案該撫既稱事起近日又云尚
屬宋敞在任之時則是鹽徒不法三四月間
諒已漸有端倪從前何以並未奏聞豈地方
有司因案情重大隱匿未報抑該撫業有所
聞因事未敗露遂欲有意消弭化有事為無
事耶又據奏宋敞於五月十六日起程赴沂
距東省地方官在境上送駕時已一月有餘
宋敞理應或回沂州料理任內未完事件或
即赴新任乃於何處逗留遲至如許之久始
回原任交代著傳諭該撫崔應階將各項實

在情由一併查明具奏○旌表守正捐軀之直隸肥鄉縣民盧申妻劉氏○丙午

上詣暢春園問

皇太后安○諭軍機大臣等阿桂奏稱前因明瑞所領之兵恐不敷用隨經札商據咨賊勢雖漸窮蹙但殲滅之期難以豫定似宜增兵二千名至此事既經陳奏應候諭旨於途次就近辦理臣以烏什現在情形尚未深悉所有增派兵丁果能尅期前往與否亦難懸擬

請遵旨仍候明瑞酌辦等語明瑞阿桂移文往復未免互相推諉在他人且不可況伊二人為朕所簡用者乎即如進勦烏什一事近經明瑞等奏捉生訊問俱稱賊人口糧將絕自可計日克城且攻城非策惟堵截逃竄之路最為緊要何必增調兵丁若專為圍城起見則不但二千人雖有萬眾尚恐不足況鄂津已領兵五百前往亦可協助明瑞身在烏什確按情形自當以不必增兵咨覆乃因此

奏出於阿桂即令其自行辦理阿桂又不敢固執已見惟以情形未悉為言似此推諉游移將來恐有貽誤明瑞阿桂俱著傳旨申飭增兵一事即著停止○吏部議准直隸總督方觀承疏稱遷安縣屬建昌營人戶衆多離縣較遠乏員彈壓請將七家嶺驛丞裁改設建昌營巡檢所有冷口關內外各村撥令管轄請鑄給鈐記以昭信守從之○旌表守正捐軀之河南獲嘉縣民吳國臣妻馬氏○丁未諭朕於七月初八日巡幸木蘭所有應派人員豫備事宜著交各該處派辦其派出人員應照例演射布把○諭軍機大臣等據明瑞奏准阿桂咨已令愛隆阿由伊犁派兵二千遣赴烏什亦不必定拘原數等語昨以明瑞阿桂於增兵一事互相推諉因傳諭申飭但明瑞業經行文愛隆阿應已辦理陸續起程若又行撤回徒滋紛擾著照明瑞所奏行但明瑞奏內似以派兵一事專出阿桂之意

蓋因阿桂年長又係朕特遣故相推讓阿桂不必疑為諉卸又明瑞謂身離伊犁數月未悉彼處情形應交愛隆阿酌量辦理語亦非是明瑞酌量調兵愛隆阿不過聽候委辦豈敢專主且明瑞離伊犁未久彼處情形安得諉為不知此皆明瑞未經諳練所致阿桂閱歷有年前至軍營明瑞務與和衷集事不可稍存彼此之見又諭曰明瑞奏稱自五月初七日至十二日屢次擊殺賊衆收取牲隻

無算等語逆回等時出拒敵情罪重大即力竭出降亦難寬宥至此數次奮勉進剿及陣亡得傷官兵回人等俱著查明交部照例議敘議卹再額敏和卓之子素賚瑞茂薩鄂對之子鄂斯瑞布魯特散秩大臣阿奇木俱著有勞績並酌賞緞疋以示鼓勵此內有應行交部議敘者仍照例具奏伊等所屬之回人布魯特等有似此實心出力者俱著查明奏聞戊申諭朕向來巡幸地方惟恐各大員

皆以迎鑾辦差為事致境內乏人經理屢次降旨禁阻即如今歲南巡沿途諄切告誡更不啻再三蓋地方一切政務所係於民生利弊者甚鉅道員職在分巡知府責專董率果能策勵所屬整飭吏治綏靖民風朕必深為嘉予若惟事僕僕祇候於屬車清蹕間効奔走之微勞於公事無益而有損朕實為之不取昨崔應階奏沂水縣鹽徒聚衆滋事一案朕即料其必係該處大員遠出迎鑾之時無

人彈壓所致已傳諭將該撫申飭今據高誠奏益都壽光臨朐沂水蒙陰博山等縣自本年正二月間即有鹽徒聚集販私搶店拒捕傷人之事俱經商人報縣有案是此事起釁根由果不出朕所料崔應階不知善體朕意致山東通省道府俱赴行在接駕朕隨時召見諮詢即行遣回本任並有遣之而藉詞辦差不去者今沂州各府果以無大員約束致生事端則該撫貽誤之咎實所難辭崔應階

著交部議處其經理不善之地方各官俱著該撫查明交部嚴加議處至陞任沂州府知府宋敞前於途次召見時朕因其資俸已深人亦似乎可用且曾經擢用道員是以河北道缺出即將該員補授今既查明鹽徒滋事之案在沂州境內者獨多則其平時於地方諸事全無整頓可知豈能復勝監司之任宋敞著即解任聽候部議其河南河北道員缺著寧泰補授○諭軍機大臣等昨據崔應階

奏沂水縣鹽徒滋事緣由已於摺內批諭如果事在正二月間何以並未奏聞今據高誠摺奏益都壽光臨朐沂水蒙陰博山等縣自本年二三月間即有鹽徒拒捕傷人之事共三十四案俱經商人報縣有案等語果不出朕所料已降旨將崔應階交部議處並地方各官嚴加議處宋敞即行解任聽候部議矣此等聚眾滋事之鹽徒全獲後固當嚴行懲治以儆兇頑即附和之鄉民因利私鹽價賤

羣相買食致為奸徒煽誘隨從搶奪刁風亦不可長昨已諭令詳鞠嚴懲該撫務徹底根究不可稍存姑息顛預了事將此傳諭知之高誠摺及清單一併鈔寄閱看○已酉諭曰李侍堯現在丁憂兩廣總督員缺著楊廷璋速往署理其工部尚書員缺著董邦達暫行兼署楊廷璋未到任以前總督印務著明山暫行署理俟楊廷璋到任後再赴江西新任明德俟明山至江西後再回江蘇本任莊有

恭於交代事畢來京供職○諭軍機大臣等前曾諭令明山會同李侍堯查辦廣東糧道一案俟查明具摺後再赴新任今李侍堯現在丁憂所遺兩廣總督員缺已降旨著楊廷璋署理楊廷璋到粵尚需時日總督印務著明山暫行署理俟楊廷璋到任後再赴江西新任明山此時如已起程接奉此旨後著速回廣東任事可將此傳諭知之○又諭此次辦理烏什事務額敏和卓之子素賚瑞茂薩

鄂對之子鄂斯瑞布魯特散秩大臣阿奇木俱能奮勉出力著傳諭明瑞阿桂等酌量將彼處綢緞賞給以示鼓勵有應行交部議敘之處照例具奏再彼處所有回人布魯特內如有似此奮勉者著明瑞阿桂一併查明奏聞此際烏什事務情形若何之處亦著迅速具奏○戶部議准兩廣總督李侍堯疏稱電白縣電茂場業戶黃嘉隆等報開築生塠七十一口每塠徵銀一錢七分請自三十年始起徵從之○以甘肅哈密協副將四十方為肅州鎮總兵江寧將軍標副將頗榮仁為陝西固原鎮總兵○旌表守正捐軀之河南商水縣民李光輝女李氏○庚戌

上詣暢春園問

皇太后安○諭軍機大臣等據尹繼善奏查抄李星垣產業共地畝一百四十餘頃房屋一百八十餘間一摺上年李星曜在京召見時請假回籍管教伊姪因細詢其故據奏伊父

李衛兄弟二人祖遺田產共有八百餘頃李衛之兄無子即以李星垣為嗣將所有家產兩股均分李星垣一人獨得四百頃李星曜兄弟等共分四百頃等語今江省查出之數與李星曜去歲所奏多寡懸殊其中顯有隱匿情弊已諭令尹繼善再行確查覆奏矣李星曜昨歲甫經回籍查檢田產知之必詳該員現任川省道員著傳諭阿爾泰就近面詢令其將李星垣名下現在田數若干據實開出或李星垣從前受分之四百餘頃別有花銷費用所存僅有此數伊兄弟行事彼此應無不知其底裏無難和盤托出若李星垣田產實止一百四十餘頃則該道從前何以妄行陳奏著李星曜逐一稟覆毋稍徇隱該督即行據稟具奏尋奏據李星曜稟稱伊祖父新舊置有田房產業約計四百頃星垣過繼伯父為嗣於四百頃內分去二百頃星曜兄弟四人共分田二百頃立有分單二紙現俱

可查上年請訓之時。怵惕屏營。以致未將四百頃之數。分晰奏明。實屬糊塗冒昧。請勅下江南地方官。查取分單覈對。則一切細數。皆可立見得旨。不必再問矣。○又諭曰。阿桂奏稱。烏什增兵一事。已行文烏魯木齊提督五福等。將該處綠旗兵一千名。辦理起程。一面於伊犁兵丁內。揀派千餘名。陸續前來等語。昨據阿桂奏請增兵。朕即謂賊衆將屆絕糧。烏什計日可克。毋庸增派兵丁。續慮愛隆阿

已經辦理。故仍准調撥。今愛隆阿又調烏魯木齊兵一千名。亦屬多事。蓋賊衆逃竄。所當豫防。而綠旗兵多係步行。豈能追及。逆回截擒其衆。明瑞。阿桂舉動。未免張皇。恐各城回人聞之。妄生疑忌。著傳諭五福。若烏魯木齊兵丁尚未起程。即行停止。或遙行未遠。亦可撤回。惟將抵烏什。即留軍營協助。○又諭。據成衮扎布等奏。稱恰克圖往來之人。及恰克圖居住人等。皆言俄羅斯尚通貿易。而協理

台吉沙克都爾。亦告稱。曾見桑寨多爾濟屬下官員達賴等。齎有王大臣等文書。帶領商人。連次赴俄羅斯貿易等語。俄羅斯貿易之處。已經停止。桑寨多爾濟豈可潛行貿易。著阿里衮。馳驛前往庫倫。查辦此事。索琳。係新去之人。未及與聞。阿里衮即帶領索琳。一同辦理。步軍統領印務。著交與傅恆署理。傅恆赴木蘭後。交與舒赫德署理。伊雖不能出門。在家坐辦可也。○又諭。據成衮扎布等奏。稱

桑寨多爾濟等。遣喀爾喀副都統索諾木丕勒。往捉烏里雅蘇台貿易民人趙立。任長源。喇嘛垂党等。聞恰克圖往來行人。及恰克圖居住人等。俱稱恰克圖仍有貿易。而自恰克圖換回之協理台吉沙克都爾。亦告稱。桑寨多爾濟屬下官員達賴等。齎執王大臣執照。帶領衆人。連次往俄羅斯處貿易等語。從前成衮扎布等奏。稱趙立。垂党等。攜有俄羅斯貨物。朕即降旨。以民人貿易業經停止。而蒙

古等。又何得私行牟利。桑寨多爾濟未識知情否。究係何以與俄羅斯私行貿易之處。令其查明具奏。今成衮扎布等既云衆口一詞。而沙克都爾又係目覩證據。鑿鑿屬子虛。小民干法。尚屬不可。桑寨多爾濟等發票遣往。益覺錯謬。若云成衮扎布素與桑寨多爾濟不睦。參奏出於構陷。究係桑寨多爾濟確有此事。伊方能指摘其非。若將毫無影響之事具奏。伊亦有罪。成衮扎布寧復不知。儻因

實錄卷七三八

三

素日不和。即避嫌不奏。則成衮扎布有負朕恩。其過大矣。成衮扎布不存避嫌之見。據實陳奏。甚是。但此事大有關係。必須查明根究。因遣阿里衮前往。即令起程。並傳諭成衮扎布。凡案內干涉一切人犯。及協理台吉沙克都爾等。於阿里衮到庫掄時。派人盡數解至。交與阿里衮查辦。不得於阿里衮未到之前。先行解到。○以病休奉國將軍舒賢子重係襲職。○予故青海輔國公達什納木扎勒科

爾沁輔國公拉錫色。賸祭葬如例。○辛亥。上御勤政殿聽政。○壬子。諭。今年漕船北上。較往歲畧遲。目下河水雖足。資浮送恐抵通後。為期稍迫。不能如常年於八月中旬全數兌竣。著倉場侍郎。派坐糧廳一員。於江西尾幫漕船。截留四十萬石。收貯天津北倉。俟來歲春融。再行運通。俾得及早回空。無誤冬兌。其各船所帶餘米。仍照舊例。准其一體糶賣。該部遵諭速行。○刑部等衙門議奏。鑲黃旗滿

實錄卷七三八

四

洲覺羅永謙佐領下。閒散覺羅音佳與德親等。鬪毆一案。得旨。毆打宗室覺羅之例。與毆打平人較重者。原係優待宗室覺羅之意。伊等當自知尊貴。不與下賤之人鬪毆。方為合理。儻身繫黃帶紅帶。不期被平人毆辱。理應照此辦理。近經降旨。諄切訓飭。俾分屬天潢之人。知章服所關至重。佩飾尊榮。不至身蹈卑賤。今音佳並未繫紅帶。人又何以知其身為覺羅耶。若照毆打宗室覺羅之例辦理。伊

等既因此放縱妄為於情理亦未允協。音佳自取凌辱罪所應得。著照該衙門所擬治罪。德親著改照毆打平人例問擬。嗣後凡宗室覺羅若繫黃帶紅帶被毆者。仍照舊例辦理。其不繫帶被毆者。毆打之人。即照毆打平人之例辦理。如此庶情罪允協。而宗室覺羅等亦知所警惕。不敢卑污妄為。此朕保全宗室覺羅令其自知尊貴之意。將此傳諭各宗室覺羅知之。○諭軍機大臣等。明山前已有旨。

奉 上諭

五

令其暫署廣東總督。俟楊廷璋到任後再赴新任。並令明德莊有恭各在本任守候交代。今據明山奏稱。已於五月初六日前赴江西。恐明德以明山既至。即回蘇州。而莊有恭亦即交代來京。現在降旨。令明山接到諭旨。即日速回廣東。著再傳諭明德莊有恭。仍遵前旨。俟明山至江西。明德始回蘇州。莊有恭亦俟明德到任後。再行來京。若此時已經在途。俱各即速回任。○癸丑。

上詣暢春園。問

皇太后安。○諭八旗世職。原係確覈功績。定以世次用昭。酬庸延賞之典。應襲時由該旗查明嫡派子孫。令其承襲。如本支無人。准其由近及遠。從旁支推逮。此實曲加恩卹之意。但此等多係宗派濶疎。與立功授職之人。既已渺不相涉。且由外省駐防兵丁人等承襲世職。其中不無材質愚魯。祇堪披甲當差。難勝世職之任者。於服官行走。本非所諱。一經獲咎斥革。其苦累反不如披甲食糧矣。莫若概行查辦。量為變通。嗣後如宗支不甚疎遠。應承襲者。仍照舊辦理。外其有宗派懸殊。及由外省駐防兵丁調取來京襲職者。停其承襲。所有原立軍功嫡派承襲出缺之家。作何施恩之處。著該部會同八旗都統等。詳悉查明。定議具奏。至例應承襲人員內。其出缺之人。有應行坐扣官項。向例即著落承襲之員。扣俸完繳。第此等人員。多由微員及兵丁閒散。

襲職素乏生計之人甫得一官其應得錢糧既已停止而世職俸銀又復扣抵一切當差行走皆未免拮据並著該部旗一併查明各該員名下所欠官項若干繕列清單呈覽候朕酌量降旨辦理○甲寅以冊封

令皇貴妃遣官祭告

太廟後殿

奉先殿○軍機大臣等議覆西安將軍新柱奏稱西安官兵遇有遠差向由餉銀斂湊復借

重利不肖之員未能管束反借此侵漁有關兵丁生計請將所餘房租銀借給坐扣等語查此項租銀為八旗公用除累年需用外現在庫存四千四百餘兩應如所請按官兵差遣遠近支借作為二年扣還令該佐領協領出具保結以杜弊端及虧欠等事從之○乙卯命大學士公傳恒為正使協辦大學士吏部尚書陳宏謀為副使持節冊封令貴妃魏氏為

皇貴妃冊文曰朕惟彤闈贊化本敬順以揚庥紫掖升名表恪恭而錫慶爰稽彝典式播溫綸咨爾

令貴妃魏氏早侍深宮夙嫺懿範襄廿年之內治麟趾凝祥超九御之崇班鳳章優秩自膺冊命益茂芳徽祇事小心克承歡於璇殿含章明順更流譽於椒庭茲仰奉皇太后懿旨以冊寶晉封爾為皇貴妃尚其勉

副

實錄卷七三八

十八

慈恩光昭壹德永懷淑慎輝翟服以垂型彌稟謙冲綿鴻禧而迓福欽哉○諭軍機大臣等愛隆阿等奏稱准明瑞行文已調鄂津領兵前往烏什又將熱河及涼州莊浪兵丁揀選五百名起程續准明瑞阿桂增兵二千擬將伊犁滿洲察哈爾額魯特兵派出五百名又行文烏魯木齊將豫備綠旗兵一千帶領前往烏什等語明瑞前於伊犁調兵五百名此次又增調五百已足敷用何必又派綠旗兵

伊等所辦太覺張皇著傳旨申飭所調綠旗兵一千名仍著停止○丙辰旌表守正捐軀之直隸東鹿縣民王花子妻田氏河南延津縣民周敬修婢春妮○丁巳諭軍機大臣等據明瑞等奏捉生訊問情形及連日勦賊收取牲隻看來賊衆矢死抗拒殊為可恨若不嚴誅何以示警明瑞阿特斷不可仍存招撫之意此次官兵等尚屬奮勉著查明交部議敘有應賞巴圖魯號者查明請旨○又諭烏什滋事以來素賚瑞茂薩俱著有勞績今日明瑞奏現在與賊相持素賚瑞茂薩領援兵橫衝賊陣追至險阻之地大敗賊人等語素賚瑞茂薩俱額敏和卓之子能遵父訓實心奮勉已加恩賞給緞疋茲特賞額敏和卓大小荷包仍著傳旨嘉獎以示鼓勵○又諭據成衮扎布奏稱桑寨多爾濟丑達私遣人於恰克圖貿易牟利等語丑達係特旨派往庫倫辦事之人恰克圖貿易久經停止寧復不

實錄卷七十五

五

一

知乃伊敢私行遣人貿易殊屬目無法紀現在丑達前往和闐辦事著傳諭將伊應經過之巴里坤阿克蘇葉爾羌各城及駐劄和闐大臣等此際丑達行至何處即於該處拿問派妥員押解進京並將伊所有物件查送前來○戊午

上詣暢春園問

皇太后安○諭據溫福等奏薊運河水發糧艘被衝漂失米二千五百餘石淹斃水手等二

實錄卷七十五

五

一

十八名請照例追賠並取應議職名送部查議等語此項撥運米石抵次候兌陡遭山水漂沒雖在內河例應追賠議處但雨後水勢驟衝猝不及備非人力所能施情殊可憫其損壞船隻漂失米石均免其賠補運糧官弁亦不必議處所有淹斃人口仍著照例賞卹○以鑲藍旗滿洲副都統舒通阿為墨爾根城副都統○己未以吏部侍郎德保為江西鄉試正考官侍講汪永錫為副考官祭酒曹

秀先為浙江鄉試正考官侍講學士錢大昕為副考官侍講學士汪廷璽為湖北鄉試正考官給事中陳科捷為副考官

實錄卷七百三十八

主

大清高宗法天隆運至誠先覺體元立極敷文奮武孝慈神聖純皇帝實錄卷之七百三十八

大清高宗法天隆運至誠先覺體元立極敷文奮武孝慈神聖純皇帝實錄卷之七百三十九

監修總裁官總纂官太子太傅文淵閣大學士文淵閣領事領銜內大臣稽察欽奉 上諭軍機處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領事稽察欽奉 上諭軍機處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書錢謙益滿洲都統軍功紀錄五次

尋常紀錄十四次臣德瑛經筵講官太子少保工部尚書紀昀六次臣曹振鏞等奉

敕修

乾隆三十年乙酉六月庚申諭曰德保曹秀

先現已派典試差本年順天鄉試屆期成均

錄科諸事需人辦理陸宗楷久任祭酒於監

務最為熟諳所有國子監事務仍著暫行兼

管○旌表守正捐軀之河南葉縣民陳四時

妻吳氏○辛酉

上詣暢春園問

皇太后安○諭軍機大臣等昨李因培奏盤獲

究出水模楊龍等偷竊銅觔一摺已降旨該

督撫令其盡法懲治矣因念銅鉛船隻經涉

江河遇有沉溺等事。必需雇覓水摸打撈。乃此輩或乘機於水底倒翻銅包。僅抽取碎塊。搪塞甚或鑿通船孔。將偷竊銅觔懸絡水底。夜間移放淺灘。以便私賣。現據訪獲買銅價銀至八百餘兩之多。夥黨朋謀久成積蠹。殊屬可惡。其已經發覺者。固當嚴行懲處。而將來通徹查辦。尤不可稍存姑息。蓋此等水摸以打撈銅鉛為業。所得不過雇價。豈能分潤餘銅。若有裝載私賣之事。其為偷竊。不問可知。蹤蹟尤易為根究。地方官俱應悉心查緝。以絕根株。湖北既有此惡匪。則上游之四川。湖南下游之江西。江南各省。皆係沿江毗連。為銅鉛船隻經過之處。安知不有此種匪徒。商謀偷竊等弊。著傳諭各該督撫。嚴飭地方員弁。所在設法躡緝。毋得稍有疎縱。再運河一帶。所過銅鉛船隻。向來俱經奏報。亦間有沉溺打撈之事。其中藏奸積弊。亦復不少。並著一體通行查究。務使奸匪肅清。以裨輓運。

將此一併傳諭知之。正白旗蒙古都統奏。世襲騎都尉阿克棟阿。絕嗣請停止承襲。得旨。爭官妄控。甚屬惡習。不但絕嗣不應承襲。之世職不可妄控。即屬承襲有分者。亦應靜候大臣等辦理。不可微倖妄控。朕為此屢經降旨訓諭。阿克棟阿之世職。係伊高祖阿拜岱巴圖魯歸附。伊子六人各賞一官。阿克棟阿。班布拉克。二支。雖已絕嗣。別支尚有四官。且原立功績之人。其名亦不至於泯滅。今阿克棟阿。絕嗣。無應行承襲之人。理應追交勅書。而伊族人復妄行爭控。承襲殊屬不堪。阿克棟阿之職。著照所奏。追交勅書。其妄控之人。及接呈轉呈之官員等。俱著交該旗都統。查明交部嚴加議處。兵丁俱著懲責。命兵部侍郎陸宗楷兼署吏部侍郎。壬戌。上御勤政殿聽政。伊犁將軍明瑞等奏。欽奉諭旨。以納世通卡塔海。俱係債事之人。應於軍前正法。以觀音保代領其衆。仍候阿桂到。

時辦理。今五月二十五日臣阿桂行抵軍營。即將前奉諭旨傳示納世通。下塔海隨派員監看。即行正法報聞。○以戶部侍郎表曰修充經筵講官。○旌表守正捐軀之直隸清苑縣民史國英妻王氏。○癸亥諭。向因補放副都統不得其人。是以命頭品文武大臣等。每拘品級各舉堪勝之人。遇有副都統缺出。補授。特欲得賢能人員。以期辦事有益。今保舉副都統人員。業經陸續用盡。其中並無十分出色之員。率皆常隨伊等當差之印務叅領等官。若復令照此薦舉。仍屬不能得人。著該部將補放副都統本內開列人員查明。俟朕回鑾後。由部帶領引見。○改鑄雲南順雲營叅將并劍川營都司關防。從雲貴總督劉藻請也。○甲子諭軍機大臣等。明瑞等奏稱賴和木圖拉中箭殞命。賊衆仍另立伯克等語。逆賊久抗大兵。罪深惡極。未得生擒寸磔已屬倖免。而賊衆仍一心死守。情罪可惡。惟當

遵節次諭旨盡行勦殺拆毀其城。不必多留官兵。酌派能事員弁一二人領兵屯田。聞該處所產硝磺甚多。應廣為採取運解各城備用。俱著於事竣後悉心商辦。○又諭前諭伊犁圖往雅爾更換訥蘇肯。今伊犁大員甚少。著暫留辦事。俟明瑞回時再行前往。○乙丑上詣暢春園問皇太后安。○丙寅以故多羅果恭郡王弘瞻子永璿襲爵。○丁卯遣官祭

火神廟。○諭朕恭閱

世祖章皇帝實錄內載大學士寧完我劾奏陳名夏之疏。有與魏象樞結為姻黨一款。朕向聞魏象樞在漢大臣中尚有名望。乃與黨惡之陳名夏聯姻。藉其行私護庇。則亦不得謂之粹然無疵之名臣矣。因取國史館所撰列傳。祇稱以事降調。而不詳其叅劾本末。則後之人亦何由知其事為何事。而加之論定乎。向來國史館所輯列傳。原係擇滿漢大臣中。

功業政績素著者列於史冊以彰懿徽其無所表見及獲罪罷斥者概屏弗與第國史所以傳信公是公非所關原不容毫釐假借而瑕瑜並列益足昭衡品之公所為據事直書而其人之賢否自見若徒事鋪張誇美甚或畧其所短暴其所長則是有褒而無貶又豈春秋華袞斧鉞之義乎且以衆所共譽之魏象樞尚有瑕隙可抵非今日因事稽覈誰復摘其隱微若罪惡顯著之陳名夏及楊義所

叅交結黨援之孫承澤俱曾身為大臣特以身名隕越國史攢而弗書將世遠年湮更無有知其罪狀之昭宣與夫糾彈之顛末伊等轉得以文詞著述掩蓋其生平則其餘美惡叅半之人境過事忘因而彌縫隱護者益復不少即如索額圖明珠徐乾學高士奇輩當時非不藉藉人口而蹟其行事或則恃才自恣或則倚附結納交通聲氣雖學問或有可稱而品誼殊無足取此等若非官為立傳則

世人毀譽任情久益流傳失實且其載之家乘大率不外乎行狀墓誌非其子若孫志在顯親即其門下士工於諛墓將必自撰私傳轉至揄揚溢分徵實難憑昔年滿洲淳樸之風從無是事而世代遞降薰於習染一二性喜詩文之人生前唱和吹噓身後假他人筆墨誇張阡隴者亦頗有其人矣即如索額圖明珠揆敘阿靈阿等皆以世臣勲閥身罹愆尤國史概從屏斥久之且不知其為何如人

又何以為一代汗青之據前命廷臣編纂宗室王公功績表傳現已告成事實釐然可考因思大臣之賢否均不可隱而弗彰果其事功學行卓卓可紀自應據實立傳俾無溢美若獲罪廢棄之人其情罪允協者固當直筆特書垂為炯戒即當日彈章過於詆毀吏議或未盡持平亦不妨因事並存毋庸曲為隱諱從前國史編纂時原係彙總進呈未及詳加確覈其間秉筆之人或不無徇一時意見

之私抑揚出入難為定評今已停辦年久自應開館重事輯修著將國初已來滿漢大臣已有列傳者通行檢閱覈實增刪考正其未經列入之文武大臣內而卿貳以上外而將軍督撫提督以上並宜綜其生平實蹟各為列傳均恭照

實錄所載及內閣紅本所藏據事排纂庶幾淑慝昭然傳示來茲可存法戒朕將特派公正大臣為總裁董司其事以次陸續呈閱朕親加覈定垂為信史並著該總裁官將作何蒐輯酌定章程不致久稽時日之處詳議具奏○又諭此次南巡接駕人員據吏兵二部查開履歷案情朕詳加檢閱覈其緣事情節內因考試休致之編修沈齊禮周龍官陸樹本戈岱邵齊燾焦汝翰檢討艾茂李臺金維岱等九員有情願來京考試者准其自行來京候朕考試定奪至因事降革之沈慰祖睦朝棟鹿驄豫王銘琮宮去吝胡邦祐李允性莫

如忠張學浩宋煥彭朝元張慶侯克岐張開士史錦陶淳黃玉衡胡啓植唐廷樞葛岬起董鈞倪存謨蔣學鏡邵謙吉顧偉烈吳嘉善周鼎劉世宏余崇年宋齊巖耿佩誠戴超廉大禮孟明遠等三十四員著該部行文調取來京引見再降諭旨其不願來者聽之○諭軍機大臣等據桑寨多爾濟奏稱審訊商人任長源並搜查伊鋪內物件帳簿據供或將未售完物件轉行販賣或將喇嘛所貯布施物件變價覈對帳簿有舊存寄等物其收買出賣月日數目俱屬相符所有伊等販賣之物均係原舊存貯並非由俄羅斯私行買來之物應毋庸議等語所奏殊不明晰未可遽信此摺不必發回著傳諭阿里衮瑚圖靈阿令其歸於現辦內一併詳悉查明辦理○戊辰

上詣暢春園問

皇太后安○諭朕此次巡幸木蘭著裕親王和

親王大學士劉統勳尚書託恩多留京辦事其月選之文員內通判州縣等官武員內八旗護軍校驍騎校及外省送到之補放水手官驍騎校並年滿千總等官弁俱著王大臣照從前之例驗看至外省督撫提鎮等奏摺著照例自啓鑒之日為始俱齎赴留京辦事處加封交內閣隨本呈送行在候朕批示隨本發回仍於留京辦事處交齎摺人祇領該部通行傳諭知之○以工部侍郎李宗文為

江南鄉試正考官少詹事錢載為副考官翰林院侍讀楊述曾為陝西鄉試正考官宗人府主事左衢為副考官○旌表守正被戕之山東泰安縣民陳廷玉女陳氏○已巳諭軍機大臣等明瑞等奏稱六月初二等日賊人與城西軍營拒敵伊等領兵夾攻復捉生訊問知城中另立伯克擬相機辦理速為竣事等語賊人怙惡猖獗如此伊等所奏似仍有招撫之意殊不可解若謂事期早竣則伊等

駐守已數月未嘗催促及不惜兵丁責以梯衝克城之舉也特因回人頑梗若仍准其降則伊等謂罪不加衆轉視逆叛為常事拒守為良策且忽降忽叛亦與國體有關著傳諭明瑞等惟遵節次諭旨辦理克城之日即將伊等勦殺不必遲疑候旨○旌表逼嫁捐軀之四川瀘州民易生華妻蔣氏○庚午諭從前承襲簡親王爵時朕較量房分加恩令奇通阿承襲當時以伊已襲王爵將本身所有

公爵裁汰今閱王公表傳奇通阿所襲公爵係伊祖父父子陣亡加恩承襲之爵則其王爵係伊家內公同有分者此公爵不宜裁汰且豐訥亨此次軍營甚屬奮勉雖賞給雲騎尉世職而承襲王爵之後亦已裁汰論伊祖之勞績及豐訥亨現在軍營奮勉行走此公爵理宜加恩賞給伊家令其承襲此特褒獎功績之意即如以皇子分封之爵承襲時朕往往降等承襲其軍功所得之爵即獲罪謫

仍令其子孫世襲罔替庶使有功者可以永受國恩而軍前奮勉者亦可以昭鼓勵著交宗人府將豐訥亨家內應行承襲公爵之子弟查明帶領引見○諭軍機大臣等前因喀爾喀與俄羅斯交易朕曾遣軍機章京前往張家口稽查具報本年正月間有桑寨多爾濟駝馱經過約計三四十馱俱係水獺灰鼠等物差役恐此內有商人物件索取稅銀伊屬人曾與差役角口等語看來桑寨多爾濟私與俄羅斯交易已屬顯然所有伊掩飾具奏之處朕已令鈔寄阿里衮瑚圖靈阿矣將此著仍鈔寄阿里衮等令其嚴行審辦以正黃旗蒙古副都統雲保鑲黃旗蒙古副都統德福對調 辛未諭軍機大臣等瑚圖靈阿於本月十七日起程前往庫倫於七月中旬方可到彼阿里衮不必在臺站守候奉到此旨即行前往到彼時即提應審人等審辦若延擱日期或致串供反於事無益著傳諭

阿里衮令其遵照辦理 工部議准調任廣東巡撫明山疏稱龍門縣商人劉永和承開囊窩油柑嶺等處煤山係從前未經題明請每年認輸餉銀四十兩准其開採從之 壬申

上詣暢春園問

皇太后安 以內閣學士富德為兵部侍郎

癸酉諭軍機大臣等據湯聘奏陝省於五月

三十六月初一等日近省州縣獲有時雨但

入土不深未為霑足等語該省五月初旬得雨優渥曾經和其衷奏聞此後晴雨如何未據續奏茲聞湯聘摺西安等屬似有盼雨情形現在時屆溽暑禾苗長發待澤甚殷雖據稱得有時雨而入土未能霑足是否溉潤有資目下曾否更獲甘霖一律深透於秋稼收成有無妨礙著傳諭和其衷據實查明速奏以慰廑念 尋奏六月初二日省城得雨深透各屬亦俱報三四寸至深透不等惟西鳳

邠乾鄜六府州屬自六月初二日得雨後迄
今尚未得雨延榆綏三府州屬內除保安懷
遠神木陸續得有透雨其餘亦未得雨臣細
查情形西同鳳邠乾鄜六府州民間種麥甚
廣本年二麥豐收民食不至拮据延榆綏三
府州民間種麥不過十分之二三倘七月半
前仍不得雨必須早為接濟臣已飭令各員
留心查察如有應行蠲緩借糶之時當再奏
聞得旨一切應速為綢繆妥辦毋致百姓失

所○吏部帶領京察保送一等之掌四川道
御史星額布等十一員引見得旨星額布裕
義寧祖邏庚觀亮五英法福禮噶爾炳阿金
培德福海拉遜俱准其一等加一級○是月
兩江總督管江南河道總督高晉奏洪澤湖
因上游山水驟發日漸加增高堰誌椿至五
月二十七日連底水長至八尺滾壩高出水
面五寸及一尺不等臣隨又將清口東壩再
展十丈計舊有口門并節次拆寬共五十七

丈宣洩甚暢但上游淮水仍長發未定現在
仁義二壩過水五寸禮字壩與水相平智信
二壩封土三尺尚未過水東西二壩除應留
壩臺保護尚可各展五丈通計清口出水口
門共寬六十七丈較上年多拆二十丈淮水
若不再長自可暢達歸海湖水消落滾壩即
可斷流倘淮水若再加長而清口去路既暢
下游高寶諸湖底水甚小容納有地尚不致
礙民田再邳宿運河五月後因上游沂河長

發水勢漸增比上年此時水大一丈一尺四
寸兩岸埽工今已平水漫水臣酌擬如自此
水勢漸消則可毋庸分洩倘上游來水仍長
運河不能容納當督令廳營將劉老澗開放
宣洩可免泛漲得旨諸凡皆妥所奏情形皆
如在目前設非親歷安能知其悉也○兩淮
鹽政高恒奏淮商中家貲殷厚才識明幹者
原知長價不如廣銷惟實力辦理期於流通
獲利乃有無業之人專事囤積引窩日望江

廣賣價增長其窩價亦可驟昂以致辦運之商成本加重口岸賣價不能不增私鹽畢集官引遂至壅滯實為鹽法大害又口岸原有疲暢之分暢岸銷售自易其疲岸或與隣鹽接壤或係淮引通津其中竊販亦所不免但使該岸之商將鹽照額運赴加意查緝民間亦何至舍官店而買私販無如商人一目之為疲岸即安心棄置而惟趨暢岸以圖易銷如安徽之安池太三府江西之南昌等八府人皆百計圖避羣趨湖廣而其後并湖廣亦不能盡銷臣於丁丑年到任查知其弊於安慶等三府選派殷商前往運銷并飭諭本岸商人毋許妄爭新舊現在各府銷售已覺暢順至於行銷江西之鹽向來俱於儀所過掣後始行戳派以致商人規避今將各商根窩徹底清查造送印冊如在十引以下免其戳派十引以上至數萬引者均按各處額銷之數於根窩內豫行分定每綱硃單照此填給

庶通河商人知引已戳定不復再有希冀得旨將此章程詳悉面交後任可也○又奏鹽商辦引裕民原貴殷實之戶其無資本而巧取利者是名鹽蠹臣上年與運使趙之璧熟籌定為四季查銷之法如首二兩季之鹽尚未運畢者即行提比至四季已竣而猶有未運之鹽即係虛滾之引宜嚴究追出分給急公商人以示鼓勵以清年額如此按季查銷則引課皆有著落而向來無本虛滾名引之人自無容有藏匿得旨好亦告之後任○湖北巡撫李因培奏湖廣濱江臨湖原係潯水之區宜聽水所歸不與之爭地乃小民貪目前微利畚土成圩冀堪種植且有祇圖收麥一熟者迨潦水忽至決口頻仍地方官不得不督率興築而田中一畝歲入不敵一丈隄費遂有決後不肯再修者現在漢川隄垸民情頗有甘廢之意臣與督臣司道等詳加籌畫期於妥協俟辦理有緒再行奏聞得旨是

若原係水區可以讓水者究以復舊為妥○大學士管陝甘總督楊應琚奏。巴里坤地氣日漸和燠。每歲布種細糧俱有成熟。商民認墾接踵而至。除乾隆二十九年以前認墾地一萬一千八百九十餘畝外。本年春間又認墾地四千餘畝。連前撥給安西戶民承墾地共二萬五六千畝。皆取三道之水引渠灌溉。但商民認墾之地皆在上游。安西戶民承墾之地係在下游。若上游需水既多。誠恐下游稍乏。必啟爭端。今廢員陳文樞等奉鎮臣委令督率墾種。即與該處同知詳加審度。擬於迤東河水入渠之處。培高閘壩。開濬寬深。俟流至商民認墾地界。即由渠北分鑿大渠一道。引流西下。俟流近安西戶民承墾地界。仍與舊渠合一。接連新開之渠。安設木閘一座。每當用水時。閘住舊渠引灌認墾之地。新渠引灌承墾之地。庶各引各渠。兩無爭競。於四月十五日興工。今已報完。計開新渠三千餘

丈。寬深如式。得旨嘉獎。○四川總督阿爾泰奏。川省灌江為數郡水利關鍵。居高就下。存蓄甚難。春時江水微弱。不敷灌田。及大雨瀑漲。堰口又有衝淤之患。臣籌辦蓄洩機宜。於上年冬間。令灌江上游州縣於溪港歸江處所壘築埂壩。使蓄水充盈。今春次第開放。下注民田。較往歲水長三四尺不等。至伏汛雨後。江水瀑漲。挾沙滾石。勢甚洶湧。洩水之法。惟飭道府令該管廳縣輪替查勘。將堰口時洶使沙石毋稍停淤。其上游支河深加疏濬。自五月至今。內江堰口並無衝淤。農田亦無淹損。臣辦試有效。謹酌定章程。擬將灌江上游應蓄水之汶川保縣茂州各屬於每歲十月以後酌量蓄水。來春次第開放。其都江大堰口每屆伏汛以後。即令水利同知與灌縣駐工防守。皆責成該管道府輪替查驗。務保無虞。得旨甚好。可謂知勤民之本矣。四川布政使錢琦奏。各州縣設有賦役全書。向由

藩司判定臣到任接閱此稿見其名目不經如所載起運臣衙門甲丁二庫銀一百二十七兩門子一名阜隸九名庫夫一名每名工食銀二兩七錢等語臣恐地近邊陲漏規未革隨徹底清查委係舊刻相沿並無別項情弊又如起運蜀府草束銀若干兩富順太平二王祿米銀若干兩等類不一而足皆係前明賦役科條未經刪減倘刊刻頒示無論耳目不經體制攸繫或不肖官吏執此以惑鄉愚其弊不可勝言查錢糧名目最簡明者莫如奏銷一冊現在直省逐年造辦並無遺漏嗣後刊刻均以奏銷冊所開條款為式凡仍前明之舊者一概刪除不特省無益之費抑亦杜微漸之弊端報聞

書錄卷七十九

三

大清高宗法天隆運至誠先覺體元立極敷文奮武孝慈神聖純皇帝實錄卷之七百三十九

書錄卷七十九

三

大清高宗法天隆運至誠先覺體元立極敷文奮武孝慈神聖純皇帝實錄卷之七百四十

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部二庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆三十年己酉秋七月甲戌朔享

太廟遣怡親王弘曉恭代行禮○諭前明山叅奏糧道王緊浮收倉米賣銀入己一案業經革職發審擬以斬候昨據刑部代伊奏請贖罪因思從前廣東糧道明福曾以浮收斛面等弊被叅審擬治罪復經徹底查辦自應夙弊一清何得復有王緊之案且此十餘年中任糧道者不止一人如歷任道員並知潔已自愛而王緊獨干法紀則不但不准贖罪秋審時必且入於情實予勾若歷任相沿陋弊

而道員之或叅或否祇憑督撫之愛憎為是非又豈足以示平允因降旨令李侍堯明山逐一詳悉查奏今據李侍堯等奏稱自查辦明福以後梁翥鴻范時紀李珏陳于中任內俱不敢多收及富明安到任斛面又漸加增此後多寡不一而富明安及金烈熊繹祖又俱有折銀入己之事是其弊非始於王緊乃富明安於積弊澄清後復敢開浮收折價之端與王緊原叅時情罪無異而金烈熊繹祖之效尤染指亦不能因其或故或陞不加窮究可見前此督撫之未經舉劾非袒庇姑容即漫無覺察均不得辭其咎矣即以王緊而論蘇昌素稱其能事則曲為保全明山不喜其為人則登之白簡察吏糾貪惟憑一己之好惡又豈能逃朕之洞鑒乎朕辦理庶政一秉至公從不肯畸重畸輕稍存成見此案既經查明自當分別辦理富明安熊繹祖俱著革職押解廣東交與楊廷璋明山拘提案內

應質人犯嚴審定擬具奏其餘歷任道員有無似此情弊仍著逐一確查毋稍隱飾王際既係因仍積弊尚可量為寬貸著刑部查照前奏加恩准其贖罪李侍堯等摺并發並將此通諭中外知之○諭軍機大臣等前明山叅奏糧道王際浮收倉米賣銀入已一案朕以任糧道者不止一人因降旨令李侍堯等將歷任道員有無似此浮收私賣等情節逐一徹底查明具奏今據李侍堯等查奏自辦

實錄卷七百一

三

理明福以後其弊復始於福明安而金烈熊繹祖任內亦俱有折價入已之事則犯法不獨王際一人已降旨將福明安熊繹祖革職解往廣東審訊其餘各任道員有無情弊據該督等奏稱現在逐一詳查但李侍堯已經丁憂回京此案始終皆明山所辦著交與楊廷璋會同明山悉心徹底根究俾無絲毫隱飾所有案犯並著會同審訊定擬并將如何酌定章程之處詳悉妥議具奏即新撫王檢

到任明山亦必俟辦理結案後再赴江西新任將此即行傳諭知之○又諭據李侍堯等查奏貴州按察使熊繹祖前在廣東糧道任內有浮收斛面折錢入已一案經伊管倉家人宋二收進等語已降旨將熊繹祖革職解審著傳諭方世雋即行派委妥員押解赴粵審訊其家人宋二亦著一併拏解務令沿途小心防範無致疎虞○又諭曰明山在廣東現有查辦事件一時不能即赴江西新任莊

實錄卷七百一

四

有恭管理江蘇巡撫交代尚需時日所有任內一切應辦之事宜照前加意詳悉辦理專候明德到蘇接辦再行起程不可存五日京兆之見稍有疎忽著將此傳諭莊有恭並明德知之○乙亥協辦大學士刑部尚書暫管江蘇巡撫莊有恭疏報乾隆二十九年分常州府屬靖江縣新坍田十一頃八十三畝有奇新漲田四頃三十六畝有奇○以故輔國公巴爾堪曾孫經訥亨襲爵○以江蘇驛鹽

道高積。為貴州按察使。○丙子。

上御勤政殿聽政。○諭軍機大臣等。據佛德奏。各省官員衙署。自道府以下。不免間有殘損。其丞倅州縣等署。類多傾圮。請通融酌辦。准予借動閒款。從容扣還一摺。衙署為辦公之所。蒞事親民。觀瞻攸繫。豈可任其歲久傾圮。不加修葺。乃各員在任。或安於簡陋。惟事因循。或視同傳舍。畧不經意。則公廨必致日久頽廢。勢將何所底止。佛德此奏。尚屬可行。著

欽此

五

各該督撫。就該省情形。通盤籌畫。除現在完整。並近年動項建蓋者。毋庸置議。仍令自行黏補外。其實係年久坍塌。必須購料修理者。准予借動閒款。各按舊制。酌量興修。計其歲入養廉。分年扣還。俾公私均有裨益。可於各督撫奏事之便。傳諭知之。佛德摺并鈔寄閱。看。○丁丑。

上詣暢春園。問

皇太后安。○詣

大高殿行禮。○還宮。○添建熊岳。金州。鳳凰城。開原。牛莊。五處倉廩。從盛京將軍舍圖肯請也。○戊寅。

上御太和殿視朝。文武陞轉各官謝恩。○幸圓明園。○諭軍機大臣等。楊錫紱奏。駱馬河水相傳以為專濟江廣重運。其餘斷不輕開。今歲四月間。因江浙幫船淺阻。商之河臣。開水濟運。江廣船至。湖水亦未告竭。請嗣後四五月間。糧艘經過時。江浙船至。則開柳園頭。俟

欽此

江廣船至。再兼開王家溝。二處石閘。令該汛守備。專司其事。並請於乾車頭口門。及一隅頭小湖口門。俱設立閘座。以資啟閉。又沂河之水。亦足供邳宿以下運河。請於邳境蘆口。改築草壩。截水歸運等語。諸水原因濟運而蓄。若漕渠水足敷運。自應遵守章程。設遇水小之年。亦復拘泥成例。則重運未得其利。而餘船阻滯已多。未免膠柱鼓瑟。且放水濟運。俾湖身騰空。或遇上源沂河漲注。使之容受

有地於海沐水患亦可稍減自屬一舉兩得之道。著傳諭高晉悉心相度。妥協辦理具奏。楊錫紱摺并鈔寄閱看。○又諭前因微山湖蓄水過多。遇夏秋漲溢之時。瀕湖窪地每致淹浸。經崔應階等奏請宣洩微湖水勢。以水誌一丈為度。於韓莊閘添建新閘以殺其勢。並挑荆山橋以暢其流。辦理以來漸著成效。朕今歲南巡迴鑒時。舟行所經。詢悉該處情形。知湖濱窪地近多涸出。農田耕作有資。但

高宗實錄

七

湖水暢消既久。蓄蓄未充。亦恐艱於濟運。事難兩利。深厓熟籌。今據楊錫紱奏稱湖內之水須存一丈二尺。用至五月。八閘底水尚可。得四尺餘寸。足供輓運。若止存一丈。則五月間八閘底水止存二尺六七寸。重運難以進行。請交東省河撫二臣將現在各處出水口門地形高下水勢深淺尺寸。與湖口滾水壩是否相等。及可否量改水誌之處。確切定議。如水誌難以議改。或將湖口以下至頓莊閘

高宗實錄

八

數十里河底一律挑深五尺。以為調劑等語。所奏於漕渠轉輸自有裨益。但水誌改加二尺。於低窪地畝有無妨礙。及挑深河底是否可行。著崔應階會同李宏李清時詳悉確勘。定議具奏。期於漕運民田均得利賴。可將此傳諭知之。楊錫紱摺并鈔寄閱看。○己卯諭考試為抡才大典。必須弊竇肅清。方可以拔真才而杜僥倖。近年以來。加意整頓。從前懷挾諸弊。雖漸次釐剔。但聞應試士子。竟有因搜檢嚴密。復遁而雇覓鎗手代構者。或私聯坐號。或頂名入場。或臨時換卷。種種難以枚舉。即如上科韓家清覓人代倩一案。其明證也。雖事後敗露。未嘗不審出實情。按律重治。其罪。但此等弊端。所關於士習科場者匪淺。不可不設法防範。以絕根株。本年順天鄉試屆期。場中即用坐號。著提調監試等。按例親身詳慎辦理。勿僅虛應故事。仍假手吏胥。致滋奸弊。臨期該部請旨。於點名時。朕當特派

大臣會同順天府尹於龍門內嚴加查察以防接談換卷亂號之弊。至榜後填寫親供校對試卷筆跡是否相同。以稽頂替代情。立法至為周密。乃相沿日久。視同具文。犯法者無所忌憚。嗣後鄉試中式舉人。務令當堂填寫親供。並默寫闈中首藝七八行。該學政等親加封固。彙齊奏聞。候朕另派大臣逐卷校勘。如有筆跡不符之處。即舉出請旨。交部嚴訊。以示炯戒。倘覈對時草率疎漏。別經發覺。惟派出之大臣是問。將此通諭各該衙門知之。○又諭曰。四格德保現俱出差。總管內務府大臣人數較少。和爾精額著暫辦總管內務府大臣事務。○諭軍機大臣等。明瑞奏派兵設伏。勦殺賊衆。毀棄糧食。阿桂亦稱賊食將盡。俟調兵一至。即可攻圍等語。看來伊等意見尚謂逆賊等以死據守。克復甚難。雖窮蹙至此。猶必待其自斃。是從前之未曾力戰可知。即如所奏賊人尚在城外設立水磨。儲積

糧石。則伊等前此並未近城。或較納世通下塔海駐劄之地為稍近耳。又如明瑞在城東駐劄。今至西北埋伏。亦屬可疑。西北一帶係阿桂觀音保駐劄。何以未聞會合策應。昨據明瑞奏稱。將擒獲生口。幼弱無用者。發遣入城。以分其口食。且使之內潰。是尚欲招降不知何意。又欲於城之四周掘成深塹。益屬錯謬。烏什四面皆山。若盡行鑿鑿。當於何時可竣。伊等辦理竭蹶。即此可見。明瑞阿桂著嚴加申飭。再明瑞等雖東西分營駐劄。仍須一體籌辦。烏什並非大城。東西相隔。必不甚遠。焉可仍蹈覆轍。各存畛域。將來功過。伊二人同之。務遵朕節次諭旨。一心協辦。不可稍有推諉之見。○又諭。昨據成衮扎布奏稱。桑寨多爾濟私與俄羅斯貿易。朕命阿里衮查辦去後。並派軍機章京往張家口稽查。陸續據報。桑寨多爾濟將皮張物件。於張家口等處售賣。因命大臣等將桑寨多爾濟。丑達家人

提訊。並據供吐實情。看來私行貿易屬實。桑寨多爾濟。自幼養育內廷。受恩深重。於停止俄羅斯貿易後。理宜嚴加查禁。今乃首先給票射利。深負朕恩。阿里衮。瑚圖靈阿。審訊外。自應將伊彼處什物入官。但伊家產。係伊祖丹津多爾濟所遺。若一併入官。朕心不忍。今桑寨多爾濟雖獲重譴。朕必擇丹津多爾濟子孫。量賞官爵。給予舊產。著傳諭阿里衮等。除伊祖父舊產外。俱著入官。至額爾景額。係派往庫倫辦事之人。大臣等如此飭法。既不阻勸。又不報部。且昨據桑寨多爾濟之護衛等供稱。伊係知情。則其罪更難寬宥。索琳。身受朕恩。持旨令其協同桑寨多爾濟辦事。理應留心詳察。當成衮扎布初奏此事時。朕即著伊查奏。乃竟扶同捏稱。並無此事。諒伊甫到庫倫。未必即與桑寨多爾濟合夥。但無論果否知情。即其含糊具奏。罪亦難寬。將此傳諭阿里衮等。一併查辦。○以翰林院侍讀嵩

貴為河南鄉試正考官。宗人府主事徐恕為副考官。御史秦釁為山東鄉試正考官。編修戴第元為副考官。翰林院侍讀阿肅為山西鄉試正考官。中書陸錫熊為副考官。○庚辰上詣暢春園。問

皇太后安。○吏部等部議准。調任江西巡撫明德奏稱。臨江府屬樟樹鎮。為江浙粵水陸衝途。商民雲集。向設都司一員。巡檢一員。第都司止任巡緝一切地方事務。未便專委巡檢經理查臨江府通判。並無專管事件。請移駐該鎮。添建衙署。換給關防。其原設清江司巡檢。及吏役應裁。留弓兵十名。以資差緝。從之。○舉行乾隆三十年分廣東省軍政卓異官三員。年老官二員。分別議敘處分如例。○辛巳

上以秋獮木蘭。奉皇太后自圓明園啟鑒。○是日。駐蹕南石槽行宮。○壬午。諭。朕此次巡幸木蘭。所有經過地

方著加恩蠲免錢糧十分之三。該部遵諭速行。○又諭曰。富勒赫現在差往和闐辦事。其直隸宣化鎮總兵員缺。著恒德署理。○諭軍機大臣等。據阿桂奏。烏什賊衆抗拒時。有擒獲婦女等語。賊衆以死拒守。自應勦殺。其婦女幼童。曾命送往伊犁。今伊等勢甚窮蹙。猶復怙惡不悛。並婦女亦敢抗拒。殊可痛恨。著傳諭明瑞。阿桂。克復烏什後。查訊賊人婦女內。有曾經持械拒敵者。一併正法。毋得稍事姑息。○是日。駐蹕密雲縣行宮。○癸未。

姑息。○是日。駐蹕密雲縣行宮。○癸未。

景陵。○諭。巡視兩淮鹽政著普福去。薩載著賞道員銜。管理蘇州織造事務。普福。俟薩載到任交代後。再赴鹽政新任。高恒。交代事畢。即行來京供職。○諭。軍機大臣等。前據成衮扎布奏稱。恰克圖地方。並未停止貿易等語。朕曾令索琳等查明具奏。乃索琳扶同桑寨多爾濟掩飾。並不據實陳奏。今知阿里衮到彼

查辦。恐其敗露。始行請罪。殊屬不堪。索琳著革去副都統。自備資斧。管理恰克圖卡兵。在章京上効力贖罪。著派福鼎。同瑚圖靈阿。駐劄庫倫辦事。福鼎所遺理藩院侍郎員缺。著伍勒穆集署理。○又諭。近因張家口。查出桑寨多爾濟。私與俄羅斯貿易物件。朕令傅恒。舒赫德。訊伊在京之護衛太監等。供出私行貿易等情。並傳諭阿里衮。前往審辦。茲據阿里衮奏到。未及查訊之前。桑寨多爾濟業經

具呈自行檢舉等語。實屬駭異。著舒赫德。親查桑寨多爾濟在京家產。酌留格格分例。餘俱入官。○丑。達。一併查辦。○是日。駐蹕要亭行宮。○甲申。浙江巡撫熊學鵬奏。浙省商船往南洋。喇吧等處貿易者。每船准帶土絲二。蠶絲各千觔。其往閩粵內地者。部議未及。請照江蘇省例。每船准帶糙絲三百觔。收稅驗放。俱照洋船定例。從之。○是日。駐蹕兩間房行宮。○乙酉。軍機大臣等議覆天津水師都

統富當阿奏稱。天津水師營馬四百匹。每匹月給二兩錢糧。前經都統常森奏准。自四月出牧。至九月撤回。此六個月。每月給養馬兵一兩五錢。助其生計。其十月至來年三月。每月添給二兩五錢。以充餵養之費。但天津片鹵之地。野草早凋。請嗣後九月初即撤回。每年牧放五月。應如所請。再奏稱。出牧五個月。錢糧共銀二千七百兩。請買米接濟兵丁。查此項係賞給拴馬兵。現官兵既設圈餵養。毋庸再給。買米亦屬無多。於兵丁無甚裨益。著交富當阿存公。俟彙積多時。再籌接濟之處。從之。○是日。駐蹕常山峪行宮。○丙戌。調任江西巡撫明德疏報。乾隆二十九年分。先後開墾通省十四府州屬七十七廳州縣官山田地洲塘。共一千二百九十四頃五十九畝有奇。○添建陝西安西府屬淵泉縣縣丞。移駐踏實堡衙署。從大學士管陝甘總督楊應琚請也。○是日。駐蹕喀喇河屯行宮。○丁亥。

調任河東河道總督李宏奏。黃河自積石以下。至陝州之三門砥柱兩岸崇山。河不為患。至孟縣漸無山岡。河面寬至十數里。北岸武陟縣南岸滎澤縣。始有隄工。北有丹。沁。兩河。由武陟木欒店匯入。南有伊。洛。潞。澗。四河。由鞏縣洛口匯入。每遇水發。上南河廳屬之胡家屯。楊家橋首攔其鋒。最為緊要。迤下各廳河道多順軌東流。惟土性虛鬆。逢灣掃刷。若黃河沁洛並漲。則大河漫灘。各處均須防護。現飭陝州。鞏縣。各立水誌。自桃汛至霜降。逐日查報。其沁河水誌。應改立木欒店龍王廟前。令黃沁同知查報。一遇水長。并報江南總河修防。又濟瀆發源於濟源縣西北三里濟瀆廟後。滙渙河。由孟縣迤東達黃。岸高河低。可以無患。又大丹河發源於山西高平縣。至河內縣丹谷口。築有攔水碎石壩。俾由小丹河歸衛濟運。壩下設九堰。分十九渠洩水灌田。名九道堰。前河臣張師載於碎石壩下丹

河尾閘。歲築土壩。攔水歸沁。今勘形勢。十九
渠分流錯出。並不全由大丹河歸沁。土壩應
停修築。每年春夏。惟應培築碎石壩。並將斗
門以下。小丹河淺窄處疏濬。俾丹水暢達衛
河。又輝縣百泉。係衛河之源。發源蘇門山下。
南流里許。建有斗門三。中為官渠濟運。東西
為民渠灌田。重運過時。封閉民渠。俾眾流入
衛。五月後。二日濟運。一日灌田。六七月。聽民
自便。惟民渠迤東石壩。少有坍塌。業飭該廳
修整。不使堵閉民渠時。水有旁洩。得旨嘉獎。
○是日。駐蹕避暑山莊。至八月戊午。皆如之。
○戊子。月食。○中元節。遣官祭

實錄卷七百十

十七

永陵。

福陵。

昭陵。

昭西陵。

孝陵。

孝東陵。

景陵

泰陵。○遣官祭

孝賢皇后陵

端慧皇太子園寢。○

上奉

皇太后駐蹕避暑山莊。以兵部左侍郎觀保
為都察院左都御史。

實錄卷七百十一

一八

大清高宗法天隆運至誠先覺體元立極敷文
奮武孝慈神聖純皇帝實錄卷之七百四十

大清高宗法天隆運至誠先覺體元立極敷文奮武孝慈神聖純皇帝實錄卷之七百四十一

監修總裁官經筵講官太子太傅文淵閣大學士文淵閣領事侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆三十年乙酉七月己丑

上詣

皇太后行宮問安。○辛卯諭曰。御史劉天成條奏三摺。於事理都未諳悉。如所稱每科揀選下第舉人。分發各省。俾得及鋒而試。一摺。各省額缺。祇有此數。而直省中額。每科遞積人浮於缺。勢所必然。歷年以來。揀選錄用。已非一次。而間數科一舉行。其中原可得一二有用之材。若每科以為常例。揀發數十百人。遞年加增。在外省缺分俱有定例。必不能概儘

揀發之人補用。仍致坐守積薪。若將部選之缺。全改為題補。則吏部舉班銓法。又將窒礙難行。是欲疏通而轉致壅滯矣。至請定內外官員宿齋一摺。內稱。凡齋宿二日者。請照致齋三日之例。各就本衙門齋宿。其外任各員。均令不居本衙。另備齋房。以便齋宿。亦屬無當。祭祀大典。或朕親行。或遣官恭代。惟在主祭者之必誠必敬。以期昭格。若夫陪祀多員。固應恪恭將事。如果身心被濯。即散齋二日。亦斷不敢玩褻私居。若徒視為具文。縱使襍被入齋房。亦何足以致嚴肅而襄秩祀。而外省官員。於逢齋戒之日。亦何藉其必慎。襄事耶。又如飭禁民間溺女一摺。請勅定規條。載入律例。尤屬繁瑣。溺女本有例禁。地方官果能實力奉行。其風自息。若必責成隣族鄉保。報驗查究。官為經理。則凡生育之家。必致擾累。而鄉保等藉端滋事。勢更無所底止。該御史所奏三摺。即批交部議。亦必不准。但覈之

情理俱屬空言而不中事理。不可不詳悉曉諭。○諭軍機大臣等。和其衷奏籌辦捐修城工緣由一摺。已批交該部議奏。俟各省奏到時。彙總定議酌辦矣。據該撫奏。陝省民俗儉嗇。商本細微。雖非江晉等省可比。而趨事赴功。具有同心。如有急公願捐者。隨時照例辦理等語。但據另摺所奏。西同等屬。正在望雨。延榆綏三府州。如七月半以前。仍未得雨。必須早為接濟。並將採買麥石。現行停止。是該

省目下情形。尚恐不免有偏災。應需籌辦之處。至城工一項。原非刻不容緩。此時毋庸亟事捐修。緩候部議可也。可將此傳諭。和其衷知之。○又諭曰。方世儒奏。經過地方情形一摺。內稱徐獻朝捏稟陷害。暨文韜傳播謠詞。現已審明另奏等語。徐獻朝捏造逆稟。誣陷徐占鼇一案。業經該督撫提鎮等節次奏明。至施秉地方。傳貼謠詞之案。雖據該撫稱。已在甕安縣究出。民人文韜。似屬首犯。但此案

情節。該撫前此並未奏聞。摺內稱。另摺奏聞。而同日所到。並無另摺。著傳諭方世儒。將文韜一案。緣事情由。明白覆奏。尋奏。文韜一犯。據平越府知府究出。當即會督臣提訊。供稱謠詞。得自伊師。已故歐孔祥處。但傳鈔至三十餘人。實與首造無異。業經按律擬罪。前奏經過地方情形。摺內。未將擬定後。即行會奏緣由。聲敘實屬愚昧。報聞。○吏部議奏。奉天府府尹尹耀海參奏。理事通判伊清額署內庫

貯錢糧被竊。應如所請革職。得旨。吏部議覆。奉天府府尹尹耀海參奏。理事通判署內庫銀被竊一本。將通判伊清額。照該府尹所奏。議以革職。前據耀海摺奏。稱庫項被竊時。伊清額適派委隨往海城縣捕蝗。但該通判於庫項錢糧。並不留心慎重。未便以公出稍為姑容。仍請旨革職。將竊去銀一千三百四十五兩。著落照數賠補等語。朕披閱原奏時。以處分自有定例。因批令該部議奏。夫庫貯不慎。

本管官固難辭咎。若既奉委公出。則比之本官在署者。其議處必當更有區別。且既著落賠補竊項。亦足以蔽其辜。又復奏請革職。辦理正未免過當。使當日庫項被竊。伊清額並未公出。又將何以處之乎。今吏部議覆此案。僅照耀海所請革職題結。不復查敘定例如何。殊非朕交議本意。著將此本交該部另行查例。定議具奏。○壬辰。軍機大臣等議覆伊犁將軍明瑞等奏稱。熱河涼州莊浪官兵。挈

眷駐防伊犁。一切差操。應照各處均派。請將三處馬步兵四千二百四十名。合為八旗。蒙古附滿洲旗分。即令三處原有協領八員。各管一旗。現佐領三十八員。請添設二員。每旗佐領五員。總計八旗。領催一百六十。前鋒三百二十。馬兵二千八百。步兵六百。礮手四十。匠役八十。養育兵二百四十。以符四千二百四十名之數。員弁關防圖記。照數鑄給。均應如所奏從之。○癸巳。禮部議覆河南巡撫阿

思哈奏稱。各省鄉試。巡撫監臨。統理諸務。其入闈鹿鳴等筵宴。向設藩司衙門。請嗣後改設巡撫衙門。應如所請。惟查江南監臨。係上下江巡撫輪值。衙門均不與貢院同城。仍設公所。以巡撫主其事。其出榜鈴印。均用巡撫關防從之。○旌表守正捐軀之江蘇元和縣民吳景泰妻張氏。○甲午。諭軍機大臣等。據錢琦奏。請刪賦役全書內不經之名目一摺。稱川省現值修刻。書內載有起運蜀府草束

銀兩之類。不一而足。此皆由前明賦役繁重。以致多設科條。自我朝釐定典章。從無此等不經名目。何得尚沿舊文。至現在錢糧款項。列入奏銷者。最為簡明。應請遵照刊刻等語。川省如此。恐他省似此者。亦復不少。著傳諭各該督撫。通飭藩司。逐一詳查。凡涉瑣碎。不經名色。概行芟除。畫一辦理。可於各省奏事之便。通諭知之。錢琦摺一併鈔寄。○以鑲藍旗滿洲副都統期成額。為兵部左侍郎。○以

戶部右侍郎安泰為鑲黃旗蒙古都統○舉行乾隆三十年分陝甘兩省軍政卓異官四員。年老官二員。有疾官一員。分別議敘處分如例。○乙未。

上詣

皇太后行宮問安。○諭曰。安泰現在出差。所有鑲黃旗蒙古都統事務。著弘昫暫署。俟朕回京後。該部另行奏請。派員署理。○諭軍機大臣等。據額爾景額奏稱。原任總兵和誠。重利

盤剝回人。及折收金兩之處。俱經審訊明確。請將和誠解交明瑞再行覆訊。擬罪等語。和誠係特簡和闡辦事大員。似此貪婪敗檢。大干法紀。實出情理之外。可傳諭明瑞等將和誠即在該處正法示衆。仍傳諭回人等知之。○又諭。據明瑞等奏稱。六月二十九日。兩營合勢進逼賊城等語。是伊等從前距賊巢尚遠。今始進薄其城耳。官兵屢次進剿。賊衆惟以死相拒。非痛加懲創不可。著傳諭明瑞等。

將所獲生口。俱即正法。得城之日。遵朕節次所降諭旨辦理。我兵既直逼城下。而五福之兵亦到。不為不多。務宜晝夜巡防。俾賊衆不得休息。絕其芻牧。斷其樵採。並於隘口嚴行偵候。斷不可使一賊竄逸。此次烏什賊衆。雖屬小醜。而兇狡實甚。官兵及厄魯特。布魯特等。不避矢石。有進無退。甚屬可嘉。即前此平定準噶爾及回部時。似此格鬪之事。亦少。著明瑞等於事竣後。將奮勉効力。勞績出衆者。查明分別奏聞。候朕加恩優敘。至明瑞身為將軍。辦理無策。以致曠日持久。免咎足矣。何可言功。併傳諭知之。○實授高恒為戶部右侍郎。○調鑲白旗滿洲副都統旌額理為鑲黃旗滿洲副都統。正白旗漢軍副都統傳景為正白旗滿洲副都統。以總管內務府大臣塔克圖為鑲白旗滿洲副都統。刑部郎中喀寧阿為正白旗漢軍副都統。原任四川布政使五訥璽為鑲紅旗漢軍副都統。○丙申。兩

江總督管江南河道總督高晉議奏葦蕩營各事宜。一葦蕩左右兩營并船務營共設濟柳石船五百七十隻。於黃中兩河裝運額柴濟工。易為風濤所壞。其與修例未符者。向著弁兵採賣餘柴修補。既恐耽延。且致冒濫。嗣後請將駕駛不慎以致損壞者。令其自行賠補。餘准動項修整。一蕩地寬濶。去水口甚遠。每年雇民挑挖支港。需費二千餘兩。向借款先辦。採賣餘柴歸還。嗣後請歸官辦。霜降後。

實錄卷七四一

七

動項勘濬。年終於餘柴項下還款。一濟柳各船。原設兵撐駕。其石船四十四隻。係雇水手。額設工食八個月。而運柴需十個月完竣。其不敷兩月。亦請動項墊發。以餘柴歸補。一黃中兩河。催趲稽察。向設守備一員。効用外委六名。難於兼顧。請添設把總二員。外委二員。効用外委四名。一每年所採餘柴。應照額柴例。分派各廳濟工。其運費請一體給發。即於所繳餘柴內扣領。毋庸動項。一書役紙張工

實錄卷七四一

十

食。委員往來盤費。請覈每年餘柴多寡。定所賞之數。得旨。如所議行。○予故阿拉善鎮國公索諾木多爾濟致祭如例。○丁酉。諭廣東雷瓊鎮總兵員缺。著甘國寶調署。其開化鎮總兵員缺。亦屬緊要。著該督劉藻於通省總兵內。揀選一員調補。所遺員缺。著華封補授。○諭軍機大臣等。桑寨多爾濟。係公主之子。自幼養育內廷。襲郡王爵。受恩甚重。後喀爾喀等騷擾時。伊操心堅確。毫無動移。又微著勞績。朕以此愈加眷注。晉封親王。補授副將軍。遣往庫倫辦事。今乃與俄羅斯私行貿易。實出意料之外。本應從重治罪。姑念從前勞績。著加恩革去王爵。解京閒住。令其閉門思過。但此郡王爵。係伊祖丹津多爾濟軍功所封。伊雖獲譴。與伊祖無涉。著該院將丹津多爾濟子孫內。應行襲爵之人。帶領引見。以郡王爵承襲。○戊戌。諭軍機大臣等。據柏琨奏。稱遣往霍罕偵探之回人多里野特墨特。帶

有額爾德尼伯克書信。隨送交明瑞。明瑞查驗封套。係回覆喀什噶爾葉爾羌大臣之書。因不知情節。仍行發回。今將來書譯出。大概係辨明阿布都喇伊木通信一事。謂大臣等勿聽小人之言。看來無甚關係。似無庸置議等語。所見甚屬錯謬。額爾德尼並未呈書將軍。柏琨並不細加譯看。即送交明瑞。已覺草率。若因係納世通。從前所辦。不欲接管。更屬推諉。伊即不知情節。豈無舊案可查。且原書

既經明瑞發回。伊重加譯看。有大臣等勿信小人之語。自當將此事顛末。一一指出。方足見國家用法之當。毫無偏聽於其間。使之心服。乃竟謂無甚關係。含糊了事。豈駕馭外藩之道。且大臣等彼此更替。將來後任者。俱可將前事置之不問。其貽誤尤不淺。柏琨著嚴加申飭。如霍罕尚未有來使。即著永貴行文額爾德尼。明白曉示。明瑞雖非承辦此案之人。但從前情節。俱經知會。此時又經譯出。乃

僅以發回結局。亦屬非是。並著傳諭知之。○已亥。禮部議准貴州學政李敏行奏稱。各省鄉試士子。毋許臨場改經。希圖倖售。查鄉會之年。向例不准呈改。直省或不盡一應通行禁止。從之。○鑄給雲南奇兵營改設都司關防。從雲貴總督劉藻請也。○旌表守正被戕之江蘇長洲縣流寓四川民馬玉潔妻呂氏。○庚子。諭據永瑋奏稱。盛京宗室覺羅等學。原定五年一次。奏派大臣考試。自乾隆二年起。節經展限。並未舉行。本年又屆五年期滿。請派盛京侍郎一二人。會同臣及將軍考試等語。盛京宗室覺羅等學。五年一次考試。所以分別宗室覺羅等力學之勤惰。及該學總管等之賢否。豈容屢次展限。直至三十年之久。伊等平日不以為事。可知從前奏請展限之將軍及總管等。交部查議。著朝銓雅德會同永瑋。會圖肯考試。又諭曰。兆惠之公爵。著伊子扎蘭泰承襲。太常寺奏每歲致祭。

礮神向例紙繕祝文。且在盧溝橋郊外非祠廟定所。並未專設祭器。嗣後請照各神廟改用祝版。并設祭器。以昭誠敬。從之。○辛丑上奉

皇太后幸卷阿勝境。侍早晚膳。至癸卯皆如之。○賜扈從王公大臣及蒙古王公台吉等食。至癸卯皆如之。○伊犁將軍明瑞等奏烏什賊衆投降情形。諭軍機大臣等。明瑞阿桂奏本月初二初四等日。攻敗賊人。直抵城下等

實錄卷七四一

十一

語。看來伊等從前並未近城。不過較納世通等稍覺不遠耳。至現在賊衆情形已覺困憊。不支。計接奉此旨時。應早竣事矣。逆賊等一心死守。至於數月。甚屬可惡。今力窮求免。斷不可允。首惡額色木圖拉尤寸磔不足以蔽辜者。即其屬人縛伊以降。亦不可姑息。仍當督兵進剿。著明瑞阿桂遵照辦理。○壬寅。諭軍機大臣等。普福從前屢獲罪愆。朕復加恩用為兩淮鹽政。若論辦理鹽務。較高恒自更

諳練。但高恒能破除情面。毫無瞻徇。即如蔣尚桓范思皇逗留揚州。希需商人餘潤。皆經高恒一一據實具奏。普福前在鹽政任內。豈無似此者。並未見其奏及。且如陸世龍捐官一事。普福尚為欲資幫助。直至安寧。知事難容隱。始行奏聞。則其徇情掩飾已可概見。試思此等銀兩。鹽政豈能解囊相贈。不過取給商衆。此風不戢。必至釭務廢弛。其弊將無所底止。普福自問。平時曲意徇人。及伊有事時。

實錄卷七四一

十五

誰能為之相顧。即此亦當翻然改悔矣。兩淮鹽務積弊。經高恒歷年釐剔。漸次肅清。朕所以特用高恒者。實因能秉公持正耳。著傳諭普福。務當痛除積習。一切加意整頓。如或因仍故態。復有過犯。朕斷不能稍為姑貸也。○又諭官兵等進剿烏什。逆回攻圍既經數月。賊衆無以為食。自應旦夕就誅。但窮蹙至此。仍以死抗拒。實屬兇狡。斷不可姑息。容留前諭將丁男俱行剿殺。其十三歲以下幼童及

婦女。送往伊犁。發往時。俱令自備資斧。不得給以口糧。蓋伊等恃糧食有餘。相率抗拒。戕我大臣官兵。而伊等家口窮迫時。轉給以養贍。有是理乎。著明瑞等。於事竣後。查明此等賊人家口。若隨身尚有口糧。能前往伊犁者。姑貸其一死。或不能自給。沿途餓斃。伊等獲全首領。尚屬厚倖。斷不可過行小惠。給與口糧。濫費公項。○旌表守正捐軀之山西五臺縣民楊卓義妻齊氏。○癸卯。以大學士傅恒。

實錄卷五十一

十一

尹繼善。劉統勳。為國史館正總裁官。協辦大學士吏部尚書陳宏謀。戶部尚書于敏中。兵部尚書託恩多。刑部尚書舒赫德。為副總裁官。○是月。兩江總督管江南河道總督高晉。奏前奏豫展清口東西壩得旨。尚覺汝展寬畧遲。若早數日。則仁義等壩亦無過水之事矣。以後切記。現今斷流否。車邏等壩過水否。速奏來查。本年伏汛。上游淮濰河水驟長。洪澤亦長至一丈二尺。幸清口暢洩。山盱五壩。

雖三壩過水。旬月間已斷流。車邏等壩封土未動。可毋庸開放。東西壩以工程堅實。拆壩時未免耽延。嗣後惟豫備利器。多募人夫。勿致稽誤。更有請者。滾壩斷流後。落水一尺。東西壩即收築十丈。湖水以次遞落。則清口以次遞收。俟收過四十丈後。再看水勢。衰旺酌辦。得旨甚妥。○又奏前蒙指示清口工程。應於四架木龍迤下。再添木龍一架。則挑溜更為有力。北岸積土。自可衝刷盡淨。以收清黃。

實錄卷五十一

十一

並流之效。當即購辦。業於四架木龍迤下一百七十丈對北岸陶莊積土處。建設工竣後。清水漸消。黃水漸長。挑溜甚為得力。南岸淤出新灘約二百丈。北岸積土外灘亦已行溜。汕刷報聞。○湖廣總督吳達善奏湖北幅隕遼瀾水路則襟江帶湖。支港四達。陸路則環山僻壤。最易藏奸。州縣捕役。募賊為生。明知故縱。惟令營兵分布城鄉。耳目衆多。查緝較易。本年各營報獲頗多。其黃岡蘄州蘄水等。

處素稱賊藪。亦經緝獲多犯。審擬彙奏。得旨。應時刻留心。莫致久而生怠。○陝西巡撫和其衷奏報。西同等府州。本月初七日。已沛甘霖。秫穀豆糜。得雨蘇息。可望秋成。得旨。欣慰。覽之。究屬種遲。有成災者否。○雲貴總督劉藻奏滇南各屬城垣。現在完固。無應行修理工程。且該省僻處邊隅。不通舟楫。素鮮殷戶富商。至罪犯贖銀。更為有限。將來即有坍塌。當飭地方官隨時修補。年底彙報。請無庸照江南例捐修。得旨。是如所議行。○貴州按察使高積奏。謝陞任恩。并請陞見。得旨。不必來以汝之材具。似可勝任。但期務實。毋為聰明所累。則可耳。勉之。

平糶李王

王

大清高宗法天隆運至誠先覺體元立極敷文奮武孝慈神聖純皇帝實錄卷之七百四十一

實錄卷七百四十一

王

大清高宗法天隆運至誠先覺體元立極敷文奮武孝慈神聖純皇帝實錄卷之七百四十二

監修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領事稽察欽奉 上諭事件處管理理部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆三十年乙酉八月甲辰朔

上詣

皇太后行宮問安。○諭現在刑部辦理秋審案件。其中緩決人犯為數漸多。此等尚非情實難寬。而尋常矜減亦難遽及。淹繫日久。讞牘徒致紛繁。著該部查明朝審秋審各犯。緩決至三次以上者。覈其情罪。分別請旨減等發落。以示矜恤。祥刑之至意。○乙巳

上奉

皇太后幸卷阿勝境。侍早晚膳。至辛亥皆如之。

○賜扈從王公大臣及蒙古王公台吉等食。至辛亥皆如之。○遣官祭

關帝廟。○軍機大臣等議覆前鋒統領努三奏請於直隸餵養官馬內。撤回一千匹。分給八旗武職官員。查八旗官馬原係官兵拴養。嗣因兵丁或將馬乾銀花銷。並不加意餵養。或任缺額。空食錢糧。種種滋弊。且從前草豆昂貴。並無贏餘。是以交直隸餵養。現草豆價減。官兵情願拴養。業撤回四千五百匹。

交前鋒護軍及親軍等餵養供差。如官員亦各分養一匹。於當差均有裨益。但一千不敷分給。應如所奏。請撤回二千匹。給三營前鋒參領護軍參領等。每人拴養一匹外。滿洲每旗一百匹。蒙古每旗五十匹。除兼文職官員外。每員分養一匹。餘給各營行走人員及勤慎護軍校等分養。每年出青。留一千匹差用。以一千匹牧放。仍交該都統等嚴查從之。○吏部等部議准。山西巡撫彰寶奏稱。歸化城

承審蒙古民人交涉案件。向照苗疆例。於正限外展限兩月。嗣後請飭綏遠城將軍。同歸綏道勘審。後該道移臬。即詳撫具題。無庸再咨都統。其展限之例。應刪從之。○山東巡撫崔應階疏報。乾隆二十九年分。開墾海豐。霑化。泗水。臨淄。濰縣。壽光等六縣。額外旱田七十六頃三畝有奇。○丙午。遣官祭昭忠祠。○諭據明福等奏稱。披甲常格。值班來遲。該管佐領赫住。將伊斥責。常格不服。遂將赫住撩倒。並奪棍。致傷赫住頭耳。請將常格照二十七年定例發遣。其臨時未經擒拏。常格之領催三保。披甲佛倫泰等。鞭責八十。咨請部示。經刑部令其請旨辦理。咨覆等語。此案該將軍既經咨請部示。該部即當擬定罪名。咨行該將軍辦理。若必須奏明辦理。該部自當即行具奏。若以該將軍未經奏聞。非是。亦當一併叅處。何必往返咨移。令其請旨辦理。殊屬推諉。此等風氣。朕屢經訓示。仍蹈前轍。是何

道理。著將刑部堂官。交部查議具奏。常格等交部查例定罪具奏。○丁未。祭先師孔子。遣大學士劉統勳行禮。○命編修梅立本。提督廣西學政。○戊申。祭大社。大稷。遣顯親王衍潢恭代行禮。○諭曰。富勒赫母年已老。不必遣往和闐。著留京以副都統用。宣化鎮總兵員缺。著巴延弼補授。前往和闐辦事。仍令恒德署理。巴延弼所遺大同鎮總兵員缺。著納丹珠署理。○大學士管陝甘總督楊應琚奏。前奉旨。令將甘省與新疆接壤居民。遷移烏魯木齊開墾。茲據肅州申報。招民八百餘戶。高臺縣四百餘戶。現飭道員在瑚圖畢寧邊城。昌吉。羅克倫等處。查明餘地。給與車輛口糧。送往安插。報聞。○己酉。諭據明山奏。遊擊裘鰲訪緝海洋盜蹤。嚴督所屬員弁。巡查追捕。知縣金廷烈。拏獲盜首黎天喜。及夥盜等十三名。並將要犯徐亞海等。

設法擒拏等語。裴鰲金廷烈實心緝捕。拏獲盜犯多人。甚屬奮勉。俱著送部引見。此案盜犯往來洋面。糾約多人。行劫至數十次之多。且自乾隆二十八年以來。積年劫掠。該地方文武員弁。並未查報緝拏。所司何事。著該督撫查明。叅奏。交部嚴加議處。○諭軍機大臣等。明山奏。拏獲洋面劫盜一摺。已降旨將遊擊裴鰲。知縣金廷烈。送部引見。並令將前任縱盜疎防之文武員弁。查叅。交部嚴加議處矣。粵東毗近外洋海面。盜船尤宜隨時偵緝。以靖地方。此二案盜犯。自乾隆二十八年至今。時逾三載。積至五六十案之多。該地方官前此何以漫無聞見。任其橫行滋事。歷任督撫。並未經劾奏疎防之員。則亦不得辭其咎矣。外省每視查緝盜犯為具文。動輒因循玩忽。即如今歲莊有恭奏獲江洋大盜。亦係屢年積案。一經實心訪緝。即多就獲。可見盜犯之能獲與否。全在地方官之實力與不實力。

耳。況此等盜匪。駕駛海船。糾衆行劫。若不上緊搜剿。不但估舶受害無窮。且恐日久蔓延。滋患今盜首及要犯。雖就弋獲。而夥盜未獲者尚多。此時楊廷璋王檢想已蒞新任。明山尚有查辦事件在粵。此案係伊任內經手之事。著一併傳諭。令其嚴飭各員弁。實力躡緝。盡絕根株。毋使漏網。以期海疆寧謐。其現獲各犯。亦即嚴加審擬。盡法處治。毋稍姑息。不可歸案完結。以圖了事。可將此傳諭。楊廷璋等知之。○又諭曰。巴延弼已授為宣化鎮總兵官。命往和闐辦事。伊得旨後。若來京請訓。往返有需時日。著即由彼馳驛前往和闐。因思駐劄大臣等多官於內地。習尚安逸。既以邊隅為勞苦。又或不能同寅協恭。或不能潔己自愛。苛擾其下。滿洲世僕。豈宜出此。即如素誠在烏什。貪淫敗檢。竟致激成叛亂。已身被害。并子嗣俱無所逃罪。和誠在和闐。隱匿應貢之玉。又重利盤剝回人。亦經治罪正法。

其明鑒也。大臣等果能正已率屬。與同官和衷集事。將來年滿徹回。必加恩擢用。著傳諭巴延弼。朕因其人尚可用。予以奮勉之階。伊至和闐。當以素誠和誠為戒。再和闐采玉。係常年土貢。每派回人供役。伊等倘怠玩隱匿。自當加意約束。若効力行走。尚屬勤慎。則應酌量賞給。以示鼓勵。不可絲毫擾累。○順天鄉試。以戶部左侍郎管順天府府尹事裘曰修。府尹寶光。兼為監臨官。兵部尚書彭啟豐。

為正考官。兵部右侍郎鍾音。為副考官。○庚戌。諭軍機大臣等。明瑞。阿桂等奏稱賊勢較前衰弱。伊等於七月初九日。領兵逼近城根。掘溝築牆。防其逃逸。忽東門突出賊眾二千。為官兵擊敗入城。仍不時衝突。城西亦然。現在各門俱築長圍。俟壘砌堅固。自無所逃等語。看來我兵從前離城甚遠。且掘溝築牆一事。何以早未計及。若謂兵不敷用。明瑞身為將軍。即應據實陳奏。再伊等奏內有賊人欲

割城下未熟之黍。為我兵擊敗之語。烏什賊人滋事。始於二月。計其耕種之期。不過三四月間。何以未聞驅逐毀棄。若似此圍困賊人。雖經年看守。亦不能竣事。明瑞等著嚴加申飭。至伊等既以長圍困賊。無路可逃。若仍准納降。則姑息過甚。斷不可行。明瑞等務遵節次所降諭旨辦理。○辛亥。吏部議覆。安徽按察使閔鶚元奏稱。地方官緝獲盜匪。例邀議敘。豈容攘竊為功。乃外省州縣陋習。竟將隣封及佐貳所獲之犯。捏稱自獲。請嚴定處分。以戒冒濫。應如所奏。如捏報盤獲重犯。應送部引見之案。本員革職。上司徇隱。降三級調用。不知情者。降一級留任。如尋常盜匪。應加級紀錄之案。本員降二級調用。上司徇隱。降一級調用。不知情者。罰俸一年。通行直省遵照從之。○又議覆。安徽按察使閔鶚元奏稱。外省審理命盜案件。請仿部中彙奏例。以年終為限。督撫將新舊已完未完各案。并聲明

因何未完之故彙奏。庶承審官不敢遲延。逾限督撫亦不敢怠於稽查。人犯可免拖累。應如所奏。通行直省遵照。從之。○壬子秋分夕月於西郊。遣裕親王廣祿行禮。○

太宗文皇帝忌辰。遣官祭

昭陵。○吏部等部議准。直隸總督方觀承奏。稱永定河道署。向在固安縣城內。地窪濘潦。多就傾頽。請移建南關高阜。又南岸同知。向居分司舊署。年久已圯。請移建該縣東門外北

岸同知。未經設署。請添建永定河北張化地方。所需工料。於司庫動撥。從之。○兵部議覆陝西西安提督李時升奏。稱延綏鎮屬宜君營。駐劄鄜州屬宜君縣。北距延綏總兵駐劄之榆林府一千餘里。文檄往來遼遠。現提督駐劄西安。距宜君縣僅三百餘里。請就近改歸提臣管轄。應如所奏。從之。○舉行乾隆三十年分江南省軍政。年老官一員。有疾官一員。才力不及官一員。分別處分如例。○癸丑

上奉

皇太后幸萬樹園大幄次。侍早膳。○賜蒙古王公台吉。並杜爾伯特郡王車凌烏巴什等食。○兩江總督管江南河道總督高晉奏。勘駱馬湖情形。查山東沂河。下達駱馬湖。由蘆口壩出沙家口。徐塘口。又由乾車頭。一隅頭。王家溝。柳園頭。各水口入運。為運河北岸之旁流。惟王家溝。柳園頭二處。設有閘座。餘俱修築草壩收蓄。每年酌量水勢大小。開放濟運。並不專濟江廣重運。如江浙船至。運河水足。敷浮送。應酌留湖水。以濟後運。柳園頭閘。亦毋庸開放。如遇水小。柳園頭一閘。不敷接濟。請兼開王家溝閘。二處閘官。查宿遷縣丞汛務尚簡。應責成經營。又乾車頭。在駱馬湖上游。於洩水形勢不順。一隅頭口門。名竹簍壩。二處向設草壩。冬閉春開。已足濟運。無庸設閘。又蘆口壩。上受沂河。駱馬湖水下注沙家徐塘。二口入運。實於邳州一帶運道有益。遇

水小之年。應於壩南築草壩。攔截沂河。悉歸沙家徐塘出口。濟運重運過後。仍堵閉。以免山水旁溢。但此壩係水利工程。年久坍塌。應俟水落後修整。并請改歸河員經理。其餘通湖引渠。及各口門尾閘。間段淤淺處。統俟水落與蘆口壩一併趲辦。得旨如所議行。○甲寅。

太祖高皇帝忌辰。遣官祭。

福陵。○兵部議准。閩浙總督蘇昌疏稱。臺灣淡水營駐劄八里坌。係販洋要路。又為臺郡北路門戶。向設都司一千總一。把總二。俱從陸路人員內調補。恐於洋面情形未必熟練。查該營原係水陸兼轄。請改都司為水師調缺。把總外委改用一半水師。督率水兵巡洋。其餘千總及把總。外委仍從陸路人員內拔補。專防陸路地方。從之。○豁除甘肅平羅縣上下寶開二堡砂壓額田一百一頃六十一畝。

額賦。○乙卯。

上奉

皇太后幸卷阿勝境。侍早晚膳。至戊午。皆如之。

○賜扈從王公大臣及蒙古王公台吉等宴。至戊午。皆如之。○諭軍機大臣等。據瑚圖靈阿奏稱。俄羅斯綽爾濟喇嘛丹巴達爾扎等。遣索特巴稟稱。伊等游牧地近邊境。情願歸順天朝。但恐被俄羅斯追索。致生事端。請於和好解約時。歸順方妥。并探恰克圖停止貿易之故。再請歸順時。遣卡兵歡迎等語。丹巴達爾扎等遣索特巴來稟。特以我停止恰克圖貿易。或構兵端。如不歸順。伊等游牧地近慮先受害。若豫歸順。又恐我擒執送還。故來探取確信。著傳諭瑚圖靈阿。如丹巴達爾扎等遣人再來。瑚圖靈阿即云。我皇上統一區宇。外藩慕仁歸化。無不容納。爾等若果輸誠歸順。代奏後。必加恩收留。如恐我執送俄羅斯。則從前俄羅斯曾收留我國逃人舍楞等。此時豈有將爾等送還之理。至於恰克圖貿易。

易。特因俄羅斯近年諸事推諉。不能即速完結。且增加稅額。以致物價昂貴。是以停止。並非欲搆兵端。倘俄羅斯敢於滋事。彼時再行裁度。丹巴達爾扎等如欲歸順。聽從其便。否則亦無抑勒之理。若請遣兵歡迎。我天朝亦斷不行此誘人之事。曉諭後。遣還可也。○丙辰。

萬壽節遣官祭

太廟後殿○遣官祭

福陵。

昭陵。

昭西陵。

孝陵。

孝東陵。

景陵。

泰陵○遣官祭

孝賢皇后陵○遣官祭

顯佑宮。

東嶽廟。

城隍廟。

上詣

皇太后行宮行禮。○御澹泊敬誠殿。扈從王公大臣官員及蒙古王公台吉等行慶賀禮。○丁巳。諭。朕為闡揚黃教。安輯衆生。特降諭旨。將哲布尊丹巴呼圖克圖之呼畢勒罕。由西藏接來。哲布尊丹巴呼圖克圖。乃喀爾喀等供養之大喇嘛。今方年幼。正宜勤學經典。不可無教習之喇嘛。但堪布諾們汗扎木巴勒多爾濟。尚卓特巴遜都布多爾濟。及堪布喇嘛沙克都爾等。昨據阿里衮瑚圖靈阿奏。亦曾請給票照。私向俄羅斯貿易。并據成衮扎布奏。諾木布扎布扎木巴勒多爾濟等。有擅打小呼圖克圖一事。經阿里衮訊問。雖互相推諉。不肯吐實。然仍留於呼畢勒罕之側。甚屬無益。俱令來京。其普寧寺堪布喇嘛羅布藏扎木巴拉。亦由西藏喚來。通徹經典。今

特賞諾們汗名號遣往庫倫為哲布尊丹巴呼圖克圖之教習務俾呼畢勒罕勤學經典慎守戒律副朕闡揚黃教之至意而喀爾喀等亦有厚賴焉勉之勿怠將此并諭喀爾喀四部落等知之○吏部議覆調任江西巡撫明德疏稱吉安府屬龍泉縣地處萬山棚民雜處風俗刁悍非初任之員所能勝任請改為要缺在外揀補廣信府屬廣豐縣漕糧無多詞訟亦簡雖有棚民醇良易治請改為中

缺歸部銓選應如所奏從之○戊午戶部議覆江西布政使張逢堯奏稱本省牙行向例五年編審更換新帖查州縣牙行有事故歇業者許其頂補換帖其消乏吞欠者應隨時查辦原無俟五年編審始行更換請長遠停止以杜吏胥擾累應如所奏至稱各省有似此者概請停止查京城牙行承充者多外來之人稽查非易應仍照舊例五年一次換帖外省土著居多地方官自可隨時稽察亦應

如所奏一體停止從之○兵部議准調任廣東巡撫明山疏稱雷州協中軍都司原係題缺左營守備原係推缺現裁都司以左營守備管中軍事總理左右二營事務殷繁請定為陸路題缺再粵東外海水師遊擊九缺內業改左翼碣石二鎮右營遊擊為都司其電白吳川二營遊擊所轄地方未為險要弁兵較各營為少亦請改為都司仍作題缺隸高州鎮管轄出洋巡哨照舊輪辦從之○江南

河道總督李宏河東河道總督李清時山東巡撫崔應階奏會勘微山湖情形查濟寧魚臺二處濱湖地勢高於湖口滾壩無幾若照漕臣楊錫紱議將水誌加高二尺湖濱地畝難免淹浸現探量湖水高於運河水面二尺有餘來春放開運河水可得五尺餘寸第微湖滾壩每月消水六寸而重運經行約有三月之久迨江廣糧艘入境止存水三尺有餘難於浮送請將滾壩磯心每孔安砌石槽設

立板片。水小。加板多蓄一尺。水大。即將板片盡啟。至八閘河底。多係砂礮。若自湖口至頓莊五六十里。悉行挑深五尺。不特費帑無益。且恐韓莊以上運河。抽掣過甚。轉致淺阻。請將八閘運河新淤處。儘力挑挖。不必拘定五尺。務至舊時河底而止。則滾壩既加蓄水一尺。八閘河底。又復挑深。與漕臣所請增水二尺之數。約畧相符。而濟寧魚臺一帶民田。亦可不致淹浸。再小梁山。內華山。蘭家山。伊家河等處支河。河底俱低於滾壩。該壩既設板攔。水各水口宜悉堵閉。俟應行宣洩時。啟放再江南河清。河定。河成等閘。與山東八閘毗連。臣李宏業飭閘官。照八閘例。知會啟閉。俟冬底。再將加口。貓兒窩。淺處疏通。則山東八閘。既無虞淺阻。江南邳州一帶。亦足浮送有餘。得旨。所議甚妥。依議行。

大清高宗法天隆運至誠先覺體元立極敷文奮武孝慈神聖純皇帝實錄卷之七百四十二

大清高宗法天隆運至誠先覺體元立極敷文奮武孝慈神聖純皇帝實錄卷之七百四十三

監修總裁官總纂官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄次臣慶桂

總裁官總纂官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級巨量路內太臣戶部尚書鑲藍旗滿洲都統軍功紀錄五次

尋常紀錄十四次臣德瑛總纂官太子少保工部尚書紀錄六次臣曹振鏞等奉

敕修

乾隆三十年乙酉八月己未

上詣

皇太后行宮問安。○自避暑山莊啟鑾幸木蘭。

○諭軍機大臣等。明瑞等奏稱。七月十八日至二十四日。賊人屢次出城衝突。俱經擊敗等語。賊勢窮蹙至此。尚敢行抗拒。情罪可惡。即明瑞等。亦知其不可招降矣。至官兵等。遇以死拒守之賊人。能奮勇攻擊。甚屬可嘉。前已諭明瑞等。查明分別奏聞。著將此次查奏之出力官兵。交部議敘。嗣後官兵內。有奮勉

出衆効力者。俱著詳悉存記。俟事竣奏請加恩優敘。○又諭曰。明瑞等奏。准額爾景額咨稱。阿什默特。所屬回人呢雅斯。克伊葉斯。常唆聳阿什默特。苛虐屬人。不可留於和闐。臣以呢雅斯等。如何唆聳阿什默特之處。並未確實證據。遽行遣往伊犁。恐阿什默特。不無疑懼。若訪聞屬實。則阿什默特。亦不可留於和闐。行令查明定奪等語。所見甚是。但此案應行質訊之人。明瑞應調集該處查辦。不

當仍委之額爾景額。若此時尚未辦結。仍著明瑞。咨調辦理。至回部伯克等。如果擾累屬人。縱加以寬宥。亦難弭其疑懼之心。著傳諭明瑞。阿桂等。查明此案情節。若係呢雅斯。克伊葉斯。倚勢橫行。阿什默特。失於覺察。則呢雅斯等。治罪後。阿什默特。亦不可仍留該處。酌量與別城阿奇木伯克等對調。若阿什默特。因聽呢雅斯等之言。自行苛虐回人。即將呢雅斯。克伊葉斯。辦理。阿什默特。送京安插。

亦可。○是日駐蹕中關行宮。○庚申。賑卹甘肅紅水靖遠會寧山丹東樂武威永昌鎮番古浪平番中衛等十一縣夏旱災民并貸皋蘭金縣貧戶籽種。○是日駐蹕波羅河屯行宮。○辛酉。

上遣侍衛福靈安赴避暑山莊。

皇太后行宮問安。○遣官祭賢良祠。○是日駐蹕張三營行宮。○壬戌。

上行圍。○河南巡撫阿思哈奏各省到豫採買

硝觔原係毛硝運回本省另行煎提澄淨方足配用所出成色往往高下不等緣硝土產於斥鹵鹽鹹之地必須風日晴燥漸有浮起始可認明掃刮若雨水稍多即產硝不旺且鹹砂混雜掃取每有不純委員貪其價賤隨意購買充數提煉後成色自低不能數額勢必勒賠買補往返咨詢徒煩案牘請嗣後責成行戶收買即飭委員督辦就豫提淨運費亦多節省如運回不淨惟該員是問得旨甚

好如所議行。○是日駐蹕阿貴圖大營。○癸亥。

上遣侍衛靈保赴避暑山莊。

皇太后行宮問安。○行圍。○黑龍江將軍富僧阿等奏據往探格爾畢齊河源之副都統瑚爾起稟稱自黑龍江至格爾畢齊河口計水程一千六百九十七里自河口行陸路二百四十七里至興堪山其間並無人煙蹤跡又往探精奇哩江源之協領納林布稱自黑龍江入精奇哩江北行至托克河口計水程一千五百八十七里自河口行陸路二百四十里至興堪山其地苦寒無水草禽獸又往探西里木第河源之協領偉保稱自黑龍江經精奇哩江入西里木第河口復過英肯河計水程一千三百五里自英肯河口行陸路一百八十里至興堪山地亦苦寒無水草禽獸又往探鈕曼河之源之協領阿迪木保稱自黑龍江入鈕曼河復經西里木第河入烏默勒

河口計水程一千六百十五里。自河口行陸路四百五十六里。至興堪山。各處俱無俄羅斯偷越等語。查呼倫貝爾與俄羅斯接壤之額爾古納河。西岸係俄羅斯地界。東岸俱我國地界。處處設有卡座。直至珠爾特地方。現復自珠爾特至莫哩勒克河口。添設二卡。於索博爾罕。添立鄂博。逐日巡查。俄羅斯龜瑪爾。斷難偷越。其黑龍江城。與俄羅斯接壤處。有興堪山。綿亘至海。亦斷難乘馬偷越。第自

康熙二十九年。與俄羅斯定界。查勘各河源。後從未往查。嗣後請飭打牲總管。每年派章京。驍騎校。兵丁。六月由水路。與捕貂人同至托克英肯。兩河口。及鄂勒希西里木第。兩河間。偏查回報總管。轉報將軍。三年派副總管佐領。驍騎校。於冰解後。由水路至河源興堪山。巡查一次。回時呈報。其黑龍江官兵。每年巡查格爾畢齊河口。照此。三年亦至河源興堪山。巡查一次。年終報部得旨。如所議行。○

是日。駐蹕海拉蘇台大營。○甲子。

上行圍。○諭軍機大臣等。傳諭明瑞。阿桂。烏什。賊衆負固死守。抗拒大兵。殊堪痛恨。克城後。應將城垣拆毀。不可稍留基址。俾得復據為險要。其應行撤回之兵。著即遣回。暫留五福所領綠旗兵。修理烏什一帶道路。○是日。駐蹕呼魯蘇台大營。○乙丑。諭據楊應琚奏。省城皋蘭縣。於七月十八日。地覺微動。少頃即止。並無傷損。其鞏昌府屬之隴西。安定。會寧。通渭。漳縣。寧遠。伏羌。西和。岷州。直隸秦州。并所屬之清水。禮縣等。十二州縣。亦於是日。地動。內有損壞舊城倉署民房。并間有壓斃人口。牲畜者。而寧遠。伏羌。通渭等。三縣。較他處稍重。現在親往查勘。分別撫卹等語。甘省遠處西陲。地瘠民貧。茲以地動。壓損房屋人口。朕心深為軫惻。現在該督親往查勘撫卹。著加恩。照乾隆三年賑卹寧夏成例。查明被災情形。分別優卹。其災重地方。並著將本年應

徵錢糧一體蠲免。該督其董率所屬實力奉行。毋任胥吏侵蝕中飽。俾閭閻均沾實惠。以副朕矜念災黎之至意。該部遵諭速行。○諭軍機大臣等。據楊應琚奏。鞏昌府屬於七月間地動。業經降旨加恩撫卹。而該督另摺所奏。又有赴蘭鞏等府採買糧石。以供兵糈民食等語。鞏昌府屬現在被災。雖據稱秋成可望豐收。而一經採買。價值必增。閭閻食用不免拮据。所有鞏昌府屬自應停其採買。至甘省產米素少。而烏魯木齊闡展屯田處所連歲豐稔。米糧充裕。若能設法運至內地。則以有餘濟不足。似屬兩便。惟是程途稍遠。輓運恐多糜費。但該省安西等處糧價向頗昂貴。若覈計沿途腳費。較買價有減無浮。即可通融籌辦。倘以新疆經運為艱。則或由烏魯木齊闡展運至巴里坤。再接運至甘省。陸續轉遞。自覺事半功倍。否則於官郵隨便帶運。或聽民間負販流通。俱無不可。如此源源接濟。

於甘省民食自有裨益。著傳諭楊應琚將各項情形徐為通盤計算。悉心籌畫。是否可行之處。詳晰奏聞。○刑部議覆河南巡撫阿思哈奏稱毒藥殺人最猛烈者砒霜信石。兇徒以之謀命。愚民以之輕生。此等案件各省多有。向來未經嚴禁者。緣此藥治疥殺蟲亦多需用。而賣者又恃律內有不知情不坐之條。遂至恬不為怪。請飭地方官將鋪戶現有此藥限一月銷燬。并遇謀命自盡之案。查訊來

由定律治罪。亦慎重人命之一端。查此藥既多需用。限期銷燬不能杜絕。且啟吏胥紛擾勢不可行。至定律治罪。應如所奏。嗣後請將賣藥之人審係知情。照律與本犯同罪。不知情者亦照不應重律擬罪。庶不煩擾而咸知儆惕。從之。○是日駐蹕納爾蘇台達巴漢東下坡大營。翼日如之。○丙寅。

世宗憲皇帝忌辰。遣官祭。

泰陵。○諭軍機大臣等。明瑞等奏。七月二十八

日。派巴圖魯兵六百三十餘名。分為兩隊。取城調伊犁。遣犯十二人。攜雲梯前列。攻東北隅之兵。乘賊未覺。鼓勇先登。奪據城垣。有騎賊來援。俱不能上。惟在近城房屋拒守。攻西南隅之兵。因賊已知覺防守。未能登城。近城之賊。又放鎗拒戰。恐官兵有失。始行撤回。此次登城。勦賊奮勉可嘉。惜西南隅登城稍緩。否則竟可克城竣事矣。計賊人心膽已寒。必至內潰。著傳諭明瑞、阿桂等。將此次効力出衆。得傷陣亡之人。俱查明具奏。候加恩敘卹。其發往伊犁人犯。果有出衆効力者。亦應加恩。或可即令充補綠旗兵丁。著一併查奏。至另摺所奏。官兵不便與回人雜處。如沙雅爾等城。未嘗駐兵。頗屬安靜。而烏什有兵。轉致滋事。不若將各城官兵調集。駐劄一處。庶兵力不分。而擾累回人之弊可杜。等語。所見非是。烏什有事。特由素誠激變。卞塔海又辦理不善。以至如此。豈可謂回人無端滋事。若因

此謂回人俱不可信。則烏什事起。伊等當羣相附和。何以絕無動靜。朕前諭將該處城垣拆毀。今可毋庸辦及。或駐劄綠旗兵屯田。或移阿克蘇大臣駐劄亦可。至合兵駐劄一事。即地方全定。亦當於四五年後辦理。倘倉猝遽行之。回人等必以我有鑒於烏什。而防閑太過。不但徒起猜疑。亦非所以彰國體。所奏不可行。俱著傳諭明瑞、阿桂知之。○丁卯。上行圍。○諭軍機大臣等。據明瑞、阿桂等奏。烏什平定後。酌議駐兵一事。朕已諭將該處城垣不必拆毀。各城駐劄大臣。當以烏什為總匯之地。著永貴駐劄辦事。其阿克蘇毋庸駐劄。大臣官兵。即移於烏什。綽克托亦著協辦烏什事務。兼轄阿克蘇、喀什噶爾。事雖不煩。柏琨一員。尚覺不足。著與額敏和卓同辦事。務其各城大臣。仍依舊制。烏什等城俱聽伊犁將軍管轄。隔一二年。親往各城巡查一次。至烏什地頗肥饒。多駐綠旗兵。似於屯田有

益一切駐兵籌餉事宜。著明瑞、阿桂等會同詳議具奏。○兵部議准。大學士管陝甘總督楊應琚疏稱。安西副叅遊都守各員。除西寧鎮屬保安、歸德二營都司。壤連內地番民風氣日馴。應照舊例。定為題缺外。請將移駐烏魯木齊之安西提標中營叅將守備左營遊擊守備右營都司守備烏魯木齊城守營都司守備巴里坤鎮標中左右三營各遊擊守備沙州營副將及左右二營都司哈密協副將及中軍都司安西營叅將守備靖遠營遊擊赤金布隆吉塔勒納沁踏實橋灣五營都司塔爾灣營守備各缺。定為邊俸。五年報滿甄別題陞。其尋常供職者。調回內地。仍照常俸計算從之。○是日駐蹕都穆達烏拉岱大營。○戊辰。

上行圍。○遣官祭黑龍潭。

昭靈沛澤龍王之神。玉泉山。

惠濟慈佑龍王之神。○舉行乾隆三十年分

福建省軍政年老官一員。罷軟官一員。有疾官一員。分別處分如例。○是日駐蹕巴顏布爾噶蘇台大營。○己巳。

上行圍。○戶部議准漕運總督楊錫紱奏稱。山東一省漕船十幫。兌糧水次半在臨清閘內。半在臨清閘外。因運河每年熬壩挑濬。自十一月至正月始行竣事。是以閘內各幫俱於二月初受兌開行。其在閘外者。仍照冬兌冬開大例。十月內赴德州臨清一帶受兌。兌竣後即報守凍。至來年驚蟄節後冰解始行。米石在船守候至四月之久。設有火燭之虞。冰堅如石。移動為難。而旗丁雇覓水手亦徒費四月工食。查該處距通甚近。即於立春後受兌開行。仍可不误抵通之限。與其循冬開之虛名。不若改春兌之便舉。請自本年新運定為春兌春開。與閘內幫船畫一辦理從之。○是日駐蹕巴顏溝大營。○庚午。

上行圍。○大學士管兩江總督尹繼善兩江總

督管江南河道總督高晉協辦大學士刑部尚書暫管江蘇巡撫莊有恭奏江南裁淮徐海道一缺諭令將淮揚淮徐二道兼理河務分巡查淮揚道現管淮安府屬山陽安東清河鹽城阜寧五縣及揚海二府州屬十州縣河務淮徐道現管淮安府屬桃源一縣及徐州府屬八州縣河務俱令兼分巡地方惟海州及所屬之贛榆沐陽二縣在黃河北與桃源宿遷等縣毗連河務分巡請改歸淮徐道就近管理得旨允行下部知之○是日駐蹕墨爾根烏里雅蘇台大營○辛未

上行圍○刑部議覆安徽按察使閔鶚元奏稱沿江一帶地方上通江楚下連吳會易藏奸匪即有汛弁巡邏恐難周到請飭州縣於支港馬頭口岸各設快船派幹役搜查所費無多毋需動款等語查此項既無額設工食責令長川駕駛查緝勢必不能況捐資辦理日久易滋派累并恐汛弁以支港馬頭口岸等

處係文員專責轉多藉詞推諉於公事無益但奸匪匿跡處所自當嚴密搜查應令督撫按各地方情形悉心籌畫或有如該按察使所奏力能設船派役與武員協緝者聲請分別議敘從之○是日駐蹕英圖昂阿大營翼日如之○壬申

上行圍○諭據愛隆阿等奏稱攜眷駐防伊犁錫伯兵一千名所有借給烏里雅蘇台馬五百匹駝五百隻其馬匹不必收回以備明歲耕地等事每馬作價四兩由伊等錢糧內坐扣其倒斃駝隻照去歲索倫兵例豁免一半請旨著照所奏錫伯兵丁借給烏里雅蘇台馬匹不必收回折價坐扣外其應賠倒斃駝隻著加恩照去歲攜眷索倫兵例免其一半餘限一年賠交○前任兩廣總督兼廣東巡撫李侍堯疏報乾隆二十九年分開墾廣潮肇雷等府屬額外旱田二十六頃三十畝有奇墾復肇雷二府屬額內旱田八十五畝有

奇○癸酉

上行圍○兩江總督管江南河道總督高晉奏請定河工會辦事宜○河員文職通判以上文汎州同以下武職守備以上武汎千總以下凡題補題署咨補咨署河臣主稿知會督臣商定○河工動用錢糧除官兵俸餉朋馬奏銷軍裝甲械等項歲有定款者聽河臣覈題其歲修搶修加高土工另案大工修造葺蕩營船隻及辦購正雜物料三汎夫工等項三道十七廳一體詳報督臣會辦○凡冬勘春修伏秋加鑲一切埽土等工用存正雜料物并各工水勢道廳營汎通報河督兩衙門察覈得旨允行下部知之○是日駐蹕扎克丹鄂佛囉大營○是月大學士管兩江總督尹繼善奏江蘇省修理城垣現飭江寧江蘇兩藩司分別緩急辦理其修費浩繁處督撫藩例應親勘并擇通省佐雜中熟悉工程者帶往確估工費在萬兩以內者責成本地方

官承辦道府往來督查如數逾二三萬兩除本地方官外或委府屬丞倅或派無城工處州縣分段興修同時畢舉庶可剋期告竣再修城物料磚塊灰漿俱關緊要購辦後本管道府親驗果否與估冊相符物料如式如一時不能辦齊俟續購有成數再行報驗毋許將未經驗過者偷用并禁匠役挾彼注茲那前掩後修竣後若徒丈量尺寸即行收工仍恐以舊作新不能堅久督撫藩須親往查勘間段拆開視其果否如式稍有弊混即將承辦及督查之員一併叅處著令分賠得旨甚好交高晉照此查驗○兩江總督管江南河道總督高晉奏豐碭廳屬黃河北岸孫家集外灘埽工前經奏明放淤以節工料現埽內坑塘淤滿除埽工上首裏頭仍應酌留二十丈以資挑溜餘可停修節費又邳睢廳屬王家堂迤上河勢坐灣業經開挖引河俾水勢直達正溜舊灣處洩出灘地四十四頃有奇

現飭道府確勘應歸河營者植柳濟工應歸地方者陸續召墾得旨覽奏俱悉○江南河道總督李宏奏報蒞任日期及山盱滾壩斷流督臣高晉業將伏秋汛內所拆東西兩壩接築止留口門十七丈俟將來水消遲速再行酌辦得旨覽一切不可立異但與高晉和衷共濟自可勝任慎之勉之○浙江巡撫熊學鵬奏仁寧二縣海塘本年雨暘時若並無風潮八月大汛北岸工程均獲平穩翁家埠塘外及陳家塢迤東相近塔山處增漲新沙較前更為綿亘其尖山壩外沙形日高壩工益資鞏固至老鹽倉鐵牛盤頭等處竹簍工間有損卸而漲沙漫蓋均足保護塘根無庸拆換致滋糜費惟林茂舍迤東至石塘頭止三百二十餘丈日久竹朽石卸勢當衝要急應修整以禦來年春汛除將舊石抵用外業添料趲辦九月內可完竣今春蒙

皇上閱視海塘指示訓誨閱霽伏秋三汛正溜

南趨一切柴土石工無不穩固北岸沙勢自開北壘以來未有增漲至此者得旨欣慰覽之○湖北巡撫李因培奏查湖北各府倉並各首邑倉穀多寡不等除將額穀無多處照部咨改併首邑外請將武昌府穀十二萬石酌派首邑江夏及興國武昌咸寧嘉魚五州縣漢陽府穀十萬三千八百餘石酌派首邑漢陽及沔陽漢川三州縣黃州府穀三萬九千餘石酌派首邑黃岡及蘄州蘄水三州縣分貯各處皆近水次撥給亦易得旨如所議行下部知之○河東河道總督李清時奏蒞任後即查各湖收蓄水勢其未足者加緊籌辦現八月初旬蜀山馬踏馬場南旺各湖收水自五尺至七尺餘寸不等來春重運經臨漸次開放浮送有餘至微山湖尾閘准兩江督臣山東撫臣咨於七月底將茶城小梁山伊家等河閉堵臣飭道廳開放魚臺汛南陽以下十四單閘俾暢流入湖現亦蓄水九尺

餘寸。儘數來歲濟運得旨嘉獎。○又奏豫省埽工現屆秋分水勢已緩凡無需加鑲處即令停止以杜河員冒濫再南河埽壩工程經兩江督臣高晉定於霜降後勘估挑汛前修築其大汎搶鑲復分塌卸平墊工程緩急今東河亦仿照辦理得旨此係河工錮習宜加整飭又批此法甚善應仿為之亦不但河工總能以高晉為法自當諸凡勝任○陝西巡撫和其衷奏西同鳳鄠乾鄜六府州七月初

得雨後可望收成惟延榆綏三府州每年春麥甚少以秋禾為重雖不成災民力不無拮据俟收穫時詳察情形具奏或緩徵或賑貸務使民食有資得旨覽奏稍慰○廣東巡撫王檢奏粵東洋盜經遊擊裘鰲擊獲多犯臣抵任後即會同署督臣楊廷璋調任撫臣明山將現獲各犯嚴究并飛飭沿海員弁竭力訪緝餘犯盡法處治斷不敢姑息了事得旨嚴行督緝以靖海疆○又奏粵東地近海洋

盜匪多係漁人船名拖風皆富民所造出租採捕失業因即為盜現飭州縣責成船主出結毋許攜帶兵器如有刦掠情事者連坐再聞匪船有蝦狗艇竹洲艇諸名底尖輕迅專事搶刦并飭州縣查驗拆毀再民風狡詐訟棍尤多每係衙門書吏包攬滋事且將屈開徵恐多浮收重折現皆徹底懲究得旨須事

大清高宗法天隆運至誠先覺體元立極敷文奮武孝慈神聖純皇帝實錄卷之七百四十三

大清高宗法天隆運至誠先覺體元立極敷文奮武孝慈神聖純皇帝實錄卷之七百四十四

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆三十年乙酉九月甲戌朔

實錄卷七百四十四

上行圍。○吏部議准雲貴總督劉藻疏稱雲南普洱一府地處極邊時有莽匪沙匪出沒兼之水土惡劣烟瘴盛行官斯土者勢難久居其原定夷疆之普洱府思茅同知寧洱縣三缺請改為烟瘴調缺三年俸滿掣回內地陞用至廣南一府近來人烟稠密瘴氣全消其原定烟瘴即陞之廣南府寶寧縣二缺請改為夷疆久任三年優敘後再歷三年加銜候陞再普洱鎮總兵一缺亦請照廣西左江鎮

例三年報滿調內請旨簡用從之○舉行乾隆三十年分浙江省軍政卓異官四員年老官二員有疾官二員才力不及官二員分別議敘處分如例○豁除湖北江夏縣下黃畝麥紅社草埠楊林等處及荻麥灣金沙洲水衝隄壓田地五十四頃五十四畝有奇額賦○是日駐蹕伊綿峪大營○乙亥

實錄卷七百四十四

上行圍○諭據理藩院奏貝子那木扎勒車凌等報稱郭羅克潛進伊等遊牧肆行搶掠若舉兵往攻恐附近之唐古忒等必疑我等任意妄為不免生事懇請由院轉奏頒給執照如郭羅克等肆掠即行勦殺等語那木扎勒車凌等若舉兵往攻郭羅克誠恐唐古忒等疑懼所見尚是但郭羅克肆行搶掠自應嚴懲亦不必給與執照將此曉諭俾協力勦殺庶各遊牧可得寧謐擒獲生口解交駐劄西寧大臣辦理並諭青海各扎薩克等一體遵行○是日駐蹕庫庫英圖大營翼日如之○

丙子

上行圍○遣官祭

歷代帝王廟○遣官祭

都城隍之神○浙江巡撫熊學鵬奏。紹興府屬上虞縣之蒿壩隄。梁湖口隄。二道。及會稽縣之曹娥鎮。地勢低窪。每當秋汛。山水下注。海潮上溯。田廬易被淹浸。現三處士民協力。將梁湖舊隄四百餘丈。蒿壩隄一百八十丈。曹娥鎮隄七百六十餘丈。次第修築。並請嗣

後民間經理。無需動帑。得旨嘉獎○丁丑

上行圍○諭。據恒祿奏。三姓打牲烏拉額木赫。索羅旗丁房屋。被水衝坍一百六十四間。吉林烏拉。三姓。拉林官屯地。被衝一千四百十六頃。應否照前例。房屋每間賞銀五錢。並豁免地應交糧石請旨。著照所奏。被衝房屋。每間賞銀五錢。并免官屯應交糧石○豁免浙江湖。紹二府屬。乾隆二十六年分。水災民欠緩徵米六百四十石有奇○賑卹山東章邱

鄒平。齊河。濟陽。長清。德平。陵縣。臨邑。惠民。青城。陽信。海豐。樂陵。商河。濱州。利津。霑化。蒲臺。莘縣。博興。高苑等二十一州縣。水災貧戶。並予緩徵○賞恤廣東香山協。巡海被風淹斃受傷兵銀兩有差○是日。駐蹕伊遜薩勒巴爾哈達大營○戊寅

上行圍○諭。大學士向俱兼管部務。尹繼善到京後。著管理兵部事務。劉統勲著管理刑部事務○諭軍機大臣等。現在刑部九卿辦理秋審已畢。即應陸續具本進呈。將來自熱河啟蹕後。仍照往年之例。在途次勾到一二次。劉統勲現以大學士管理刑部。著傳諭劉統勲。令其趕赴行在。辦理勾到事宜○伊犁將軍明瑞等奏。克復烏什城。諭軍機大臣等。今日得明瑞等奏。摺僅將八月初九等日。與賊相持。及為從前守塚陣亡得傷人等。聲敘請卹。並未將如何克復回城。擒獲賊首情形具奏。祇於奏片中。渾含數語。即得城後。有急需

辦理之事。不及詳悉陳奏。亦不應簡畧至此。著傳諭明瑞、阿桂等。將入城擒賊情形。逐一作速奏聞。其城垣形勢及官兵所築長圍臺壘。攻守大概。俱著繪圖呈覽。○又諭曰。明瑞等奏稱。八月十五日。克復烏什城等語。烏什賊衆敢行叛逆。據險死守。久抗大兵。甚屬可恨。今罪人斯得。著傳諭明瑞。遵節次所降諭旨辦理。此次烏什一事。進剿半年。僅能克復。明瑞、阿桂。俱朕簡用之將軍大臣。如此辦理。遲滯。幸免於罪足矣。豈當復予議敘。其在事官兵。俱各奮勉効力。較從前平定伊犁回部時。戰功猶覺過之。著明瑞等。將官兵內著有勞績及陣亡得傷者。分別查明具奏。交部議敘。議卹。其烏什駐劄大臣官兵之處。俱遵前旨行。○又諭。據柏琨奏。呼什齊之布魯特納喇巴圖。及其從弟博爾克。曾効力軍前。賞給翎頂。博爾克之兄額拜都拉。又與將軍駐劄地方相近。伊恐烏什事竣。令額拜都拉統轄。

因唆令往霍罕安集延。額拜都拉不從。伊即領所屬二百餘戶。度葉提葉木嶺而去。業遣人往額德格訥查訪。俟得確信。即報明瑞、阿桂等辦理等語。前因納喇巴圖。為額爾德尼所擾。加恩指賞游牧。俾得安居。今膽敢唆聳額拜都拉。并帶所屬徑赴霍罕安集延。情實可惡。若不捕執。無以示戒。著傳諭明瑞、阿桂。如額德格訥人等。將伊獻出。即行治罪。如已逃往霍罕安集延。即遣人向額爾德尼索取。○是日。駐蹕多們昂阿大營。○己卯。上行圍。○諭。據楊廷璋等奏。續查廣東。歷任糧道張曾、張嗣衍、王槩、梁國治、蔡鴻業。又護道龍廷棟。各任內。俱有浮收折價之事。除張嗣衍已經病故。張曾告假回籍。現咨河南行提王槩。現在粵東。就近質審外。其侍郎梁國治、蔡鴻業。知府龍廷棟。三員。請旨革職。並令交出管倉家人。一併發粵質審等語。該省浮收斛面一事。自查辦明福之後。即不應復有此。

弊乃富明安。首先復犯情罪。自為較重。至厯任各員。亦不應因仍積弊。其浮收多寡。不過視蒞任之久暫。稍有不同。若不按律治罪。無以服衆人之心。梁國治。蔡鴻業。龍廷棟。及告假回籍之張曾。俱著革職。與摺內有名人犯一併發往。該督撫質審定擬具奏。○是日。駐蹕布爾噶蘇台大營。○庚辰。

上遣額駙福隆安。赴避暑山莊。

皇太后行宮問安。○行圍。○諭各省學政現屆

差滿。安徽學政全魁。福建學政王杰。廣西學政梅立本。俱係本年任事。毋庸更換。順天學政著德保去。江蘇學政著曹秀先去。江西學政著金甡去。陝西學政著吳綬詔去。山東學政著張若淮去。山西學政著呂光亨去。河南學政著李宗寶去。浙江學政著李宗文去。湖南學政著童鳳三去。湖北學政著胡紹南去。四川學政著羅典去。雲南學政著于雯峻去。貴州學政著陳荃去。翁方綱仍留廣東學政。

之任。○諭軍機大臣等。據宋邦綏奏。懷集縣知縣武揮烈。昏庸不職等因。一摺。已降旨分別革職審擬矣。向來督撫叅革州縣。有案情重大者。自應專摺奏聞。或時屆封印不及繕本者。亦有具奏之例。若尋常案件。俱係照例具題。今此案情節。無關緊要。何庸專達奏函。是宋邦綏於題奏事例。尚未諳悉。可將此傳諭知之。○吏部議准。湖北布政使三寶奏。稱官員叅罰。應否離任。以例載處分為衡。尤

以有無加級紀錄為斷。第陞補揀發人員。前厯他省任內。其有無加級紀錄。無從查覈。請除已抵銷外。於引見補授時。內部照案開明。咨該員新任省分督撫。飭藩司存檔。庶不致辦理舛錯。從之。○調禮部左侍郎程景伊為吏部左侍郎。以內閣學士劉星煒為禮部左侍郎。吏部郎中何逢禧為刑部右侍郎。○貴州巡撫方世儒疏報。乾隆二十九年分。開墾思州銅仁甕安湄潭天柱等府縣額外田一

百七十畝有奇。墾復額內田三十一畝有奇。
○是日。駐蹕阿貴圖大營。○辛巳。吏部議覆
河南巡撫阿思哈奏稱。要缺州縣。應在外揀
補者。一有因公議處。即與陞調例不符。而並
無違礙者。又多尋常供職之員。難膺其選。嗣
後請凡因公呈誤。降革留任。并例有展叅。致
礙陞調者。恩准捐復。俾幹濟人員。得以自効。
應如所請。令其赴部投捐。至於展叅之案。未
經議結。如概准捐復。凡有承追承緝之責者。

均得希圖遷轉。脫然事外。必致貽誤公務。毋
庸議從之。○是日。駐蹕張三營行宮。○壬午。
賜蒙古王公台吉等食。○諭。前據楊應琚奏。
鞏昌府屬之寧遠等縣。地動情形較重。朕深
為軫惻。已降旨。令照乾隆三年賑卹寧夏成
例。分別優卹。今該督奏稱。親往查勘。地動各
屬。請將被災較重之寧遠。伏羌。通渭等三縣。
照寧夏之例。稍減辦理等語。想尚未奉到前
旨。甘省素本貧瘠。此次地動。倒塌房屋。壓斃

人口較多。民力未免艱窘。自當加意撫綏。俾
皆得所。若僅照寧夏例。減半辦理。恐尚不足
以濟民困。著該督仍遵照前旨。將賑借各項
均照優卹寧夏之例。一體籌辦。以副朕矜恤
災氓至意。該部遵諭速行。○兵部議准。大學
士管陝甘總督楊應琚奏稱。肅州鎮屬臨水。
雙井。鹽池。深溝等堡。涼州鎮屬水泉。紅水。二
堡。地介衝途。原設兵額。不敷差防。又肅州屬
邊外之毛目城。及黑泉。撫彝。二堡。涼州屬靖

邊。豐樂。二堡。俱未設弁兵。今酌地方衝僻。差
務繁簡。請撥高臺營外委一員。駐黑泉堡。洪
水營把總一員。駐毛目城。大靖營外委一員。
駐靖邊堡。永昌營外委一員。駐豐樂堡。改下
古城千總。駐威魯堡。威魯堡外委。駐下古城。
裁下古城兵六十名。勻添臨水。雙井。鹽池。深
溝。黑泉等堡。威魯堡兵四十名。設毛目城。平
川堡馬守兵各四名。設撫彝堡。高古城。鎮番
營兵各二十名。分添水泉。紅水。二堡。大靖。永

昌。二營兵各三十名。分設靖邊豐樂二堡。從之。○豁除浙江海寧縣。坍沒沙地六頃七十畝。有奇額賦。○是日。駐蹕波羅河屯行宮。○癸未。戶部議覆。湖北布政使三寶奏稱。官員遇有叅罰。應降罰俸銀者。係將逐年編俸扣抵。至浮罰之俸。聽其自完。惟是食俸雖有定數。而外省因地糧攤荒扣除。以致支俸數目。多寡不一。如遇陞調他省。前任罰項。照原省定數完交。上司無從覈實。至該員自完之數。更恐難憑。嗣後請凡前任罰項。均照現任編俸銀數完繳。應如所奏。從之。○是日。駐蹕中關行宮。○甲申。

上詣

皇太后行宮問安。○諭現今熱河三旗厄魯特兵丁額缺。止一百三十名。伊等戶口繁多。額缺未免較少。著加恩再添設二十名。共成一百五十名之數。俾伊等生計有益。○蠲緩綏遠城所屬助馬口外。雹災莊地二百十二頃。

有奇額賦。○鑄給貴州都勻協改設之中軍都司右營遊擊。左營守備及銅仁協改設之中軍都司。左營守備各鈐記。從雲貴總督劉藻請也。○是日。駐蹕避暑山莊。至戊子。皆如之。○乙酉。諭軍機大臣等。本年秋審廣西省。緩決人犯內。經刑部九卿將殺妻圖賴胞兄之藍扶約。及毆傷小功兄嫂。致墮胎斃命之陽接受二案。均改入情實。於情法殊為允當。藍扶約。因伊胞兄索欠牛租穀石。欲留田畝。

作抵微嫌。輒起意將伊妻韋氏殺死。希圖詐賴。忍心害理。豈得律以尋常夫殺妻之條。尚原名分議緩。至陽接受。因取竹損爭角細故。輒將小功兄嫂李氏。毆踢多傷。以致墮胎身死。與連斃二命者何異。亦豈可照闖毆常例。稍逭刑誅。乃該撫馮鈐。俱行列入緩決。未免意存姑息。該撫歷任封疆。於秋審案件。辦理有年。不應錯謬若此。豈以業奉調任之旨。自謂五日京兆。於舊任讞牘。不復加意詳慎耶。

馮鈴著傳旨嚴行申飭○又諭本年秋審貴州省內因財故殺小功堂姪林曰仁之林柏及持刀戮傷郭天祥之軍犯鍾五索詐逼死胡須邦之捕役齊賢三案經刑部九卿定讞均改入情實甚得情法之平林柏以盜賣林曰仁園地恐其控告毆傷致斃既係因財故殺即不得援尊長卑幼之常例議緩至鍾五本係生事惡徒行兇擬遣今復於配所拒捕傷人實屬怙惡不悛亦豈可以傷輕平復稍貸其死而齊賢身充捕役奉票拘人輒敢索詐嚇逼致胡須邦情急自盡尤不應以賊未入手為辭致稽顯戮該撫方世儒於此等案件均列為緩決殊屬錯謬念其初任封疆於秋審事宜或尚未能諳習姑從原恕著傳諭方世儒留心省記嗣後辦理讞案務期詳慎允協毋得意存寬縱○又諭曰吳達善等奏鹽梟李曰萬等在松滋地方奪犯毆差一摺該犯等夥同船載私鹽潛行越卡販賣經官

役拏獲膽敢率同搶犯復糾約三十餘眾分駕漁船乘夜潛往打傷兵丁將已獲鹽船繩纜砍斷開放奪回鹽包并將巡役哨船順流推下此等惡梟不法已極若不嚴加處治無以儆兇頑而靖地方著傳諭吳達善李因培將現獲各犯從重審訊定擬毋得稍存姑息其未經就獲者亦即密派兵役多方躡緝勿令倖逃法網今又續獲逸犯否速奏來○以戶部右侍郎高恒為總管內務府大臣○丙戌

上詣

皇太后行宮問安○諭兵部八旗會議查辦世職一摺甚屬錯誤殊非朕體恤加恩之本意前因世職人員內有由兵丁襲職者其本身應得錢糧既經停止而所襲世職俸祿又代扣本缺之應還官項是一經襲職而當差度日反無所資且材質間有宜於兵丁而不宜於世職者往往易於獲咎斥革轉不如披甲

食糧之得以常留生計。而其中或有因本宗無人。遽及疎派承襲者。得官既無所利。并至失其故業。未嘗不轉以襲職為累。是以降旨令該部旗查議。量為變通。原欲於酬庸延賞中。寓曲加恩恤之意也。乃該部旗等議稱。輾轉承襲。施於渺不相涉之人。未免濫邀爵賞。請停止遠支承襲者。二十餘員等語。於大憲全未體會。竟似朕此次查辦。因靳恠世職起見矣。試思邇年平定伊犁回部。錄勲錫爵。特

予世職者。不啻五六百員之多。何有於此二十餘人。而顧為之查覈裁制耶。國家養養八旗為之計。長久而籌贍育者。恩施優渥。如果於伊等生計有益。雖稍濫亦非所惜。此議不必行。即現在襲替無人。祇有遠族及別旗同姓子孫者。亦應俟將來出缺時。再行辦理。何必亟亟於此時豫為計議。至所有查出承襲各員名下。應行代扣官項銀四萬一千三百餘兩。及世職佐領代扣出缺人員各欠項六

千六百餘兩。俱著一併加恩寬免。以示優恤。可將此通諭八旗知之。○又諭曰。原任河南巡撫胡寶瑤之子胡鼎蓉。著加恩賞給舉人一體會試。○丁亥。諭曰。尚書于敏中之子于齊賢。屢應鄉試。未能中式。因念于敏中。侍直內廷有年。僅有一子。年已及壯。著加恩照伊尚書品級。賞給廕生。○又諭曰。扎木巴勒多爾濟。沙克都爾遜。都布多爾濟等。皆出家之人。且係親隨。呼圖克圖。教導經卷。自宜謹守

清規。乃敢私與俄羅斯貿易。并擅打呼圖克圖。經朕遣大臣訊問。又不吐實。理合治罪。特加恩寬免。命來熱河交軍機大臣嚴行申飭。著革去堪布諾們汗。尚卓特巴。作為閒散喇嘛。仍解往庫倫。交瑚圖靈阿等管束。若不悛改。即奏請治罪。○兵部議准。湖廣總督吳達善奏稱。漢陽營戰船二十五隻。除分撥巡防外。閒泊尚多。請裁八隻。荆水師營派防沔陽州屬之新隄兵三十名。巡船三隻。向仍荆水

師管理水陸往返遼遠請改歸漢陽營就近管轄從之○浙江巡撫熊學鵬疏報乾隆二十九年分開墾臨安鄞縣諸暨黃巖寧海等縣山塘沙竈蕩塗共二百十九頃十五畝有奇○前任兩廣總督兼廣東巡撫李侍堯疏報乾隆二十九年分開墾廣州鶴山東莞南澳靈山香山嘉應潮陽惠來高要東安海陽揭陽恩平西寧等府廳州縣共水田三十八頃九十畝有奇廣州府屬沙坦三十頃十三畝有奇○雲南巡撫常鈞疏報乾隆二十九年分開墾麗江彌勒和曲平彝通海會澤恩安永善大關建水河西昆明霑益晉甍鎮沅威遠恩樂文山嵩明馬龍新興等府廳州縣民屯田地共一百九十八頃有奇○豁免浙江乾隆二十八年分民欠南秋軍儲等米四千九百八十九石有奇○戊子諭前以國史原撰列傳止有褒善惡者惟貶而不錄其所以為惡人究不知非所以昭傳信也因降旨

開館重修特派大臣為總裁董司其事並令詳議條例以聞今據該總裁等議奏開館事宜內稱滿漢大臣定以官階分立表傳旗員自副都統以上文員自副都御史以上及外官督撫提督等果有功績學行及獲罪廢棄原委俱為分別立傳等語所議尚未詳備列傳體例以人不以官大臣中如有事功學術足紀及過蹟罪狀之確可指據者自當直書其事以協公是公非若內而部旗大員循分供職外而都統督撫之歷任未久事實無所表見者其人本無足重輕復何必濫登簡策使僅以爵秩崇卑為斷則京堂科道中之或有封章建白實裨國計民生者轉置而不錄豈非缺典且如儒林亦史傳之所必及果其經明學粹雖韋布之士不遺又豈可拘於品位使近日如顧棟高輩終於淹沒無聞耶舉一以例其餘雖列女中之節烈卓然可稱者亦當覈實兼收另為列傳諸臣其悉心參考

稽之諸史體例。折衷斟酌。定為凡例。按次編纂。以備一代信史。至立表之式。固當如所定官階為限制。仍應於各姓氏下。註明有傳無傳。使覽者於表傳並列者。即可知某某之嫩惡瑕瑜。而有表無傳者。必其人無足置議。有傳無表者。必其人實可表章。則開卷瞭然。不煩言而其義自見。朕每覽歷代史冊。褒譏率無定評。即良史如司馬遷。尚不免逞其私意。非阿好而過於鋪張。即怨嫉而妄為指摘。其他更可知矣。我朝百餘年來。於大小臣工。彰善癉惡。一秉至公。實可垂為法戒。今悉據事實。立為表傳。總裁大臣。公同商榷。朕復親為裁定。傳之萬世。使淑慝並昭。而衮鉞不爽。不更愈於自來秉史筆者之傳聞異辭。而任愛憎為毀譽者耶。將來成書時。即以朕前後所降諭旨。弁之簡端。用示慎重。修輯國史之意。

大清高宗法天隆運至誠先覺體元立極敷文奮武孝慈神聖純皇帝實錄卷之七百四十四

實錄卷之七百四十四

大清高宗法天隆運至誠先覺體元立極敷文奮武孝慈神聖純皇帝實錄卷之七百四十五

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆三十年乙酉九月己丑

上奉

皇太后自避暑山莊迴鑾○詣

皇太后行宮問安○諭軍機大臣等刑部進湖

廣招冊九卿由緩決改入情實及由緩決改

入可矜者較他省起數獨多內湖北省改情

實者則有散力行但其云楊得宏改可矜者

則有何世新馬大賓劉玉賢徐柯免等共七

起湖南省改情實者則有劉廷輝李梅遜周

仲三胡九思改可矜者則有唐興祥徐士鳳

等共六起覈其情罪刑部九卿所改均屬允

當該撫等原擬何以錯謬若此夫以應入情

實人犯列為緩決即為失出而以可矜者列

入緩決又屬失入秋讞大典理宜詳慎持平

失出失入厥過維均皆非執法者所應有李

因培王檢初經辦理秋審於律例未能熟諳

此次尚可宥恕嗣後當留心省記輕重務得

其平若再定擬失當必將伊等交部議處李

因培王檢俱著傳旨申飭○是日駐蹕喀喇

河屯行宮○庚寅

上御行殿勾到秋審官犯服制及雲南貴州情

實罪犯停決官犯三人服制斬犯二十三人

貴州斬犯一人餘四十三人予勾○諭軍機

大臣等四川督標中軍副將永昌浙江杭州

協副將張玉琦陝西定邊協副將萬岱廣東

雷州協副將朱光正順德營水師副將施致

雲俱係乾隆二十四年以前補用在任已逾

六年各該副將平日居官若何及是否堪勝

總兵之處。著傳旨詢問各該督。令其據實查明具奏。○又諭。穆什霞砍運木植一事。既據查明。戴保住並無短發逼勒等情。無庸再行查辦。至潘桃口監督五岱。及前任監督赫達色。向多倫諾爾地方。違例重複抽收稅銀一節。如果全無確據。該商等何以控告紛紛。其中情節。尚須徹底根究。閻循琦。邁拉遜。與五岱均係司員。不免官官相護。難得實情。著派禮部侍郎鄂寧。署理藩院侍郎伍勒穆集。馳

驛前往。會同秉公詳悉查明具奏。○調福建金門鎮總兵談秀。為浙江定海鎮總兵。以江南京口水師副將楊元起。為金門鎮總兵。○以故青海輔國公達什納木扎勒養子禮塔爾。襲爵。○旌表守正被戕之福建上杭縣民胡成浩妻陳氏。○是日。駐蹕常山峪行宮。○辛卯。諭軍機大臣等。據

東陵貝子等會奏。查議運薊米石。改支折色一案。既稱官兵等俱以折價買食有餘。情願支

領折色。而摺後又云。米糧缺少之年。其價不能購如應需之數。仍令兵役等暫支米石等語。甚非辦事之道。粟米每石折價一兩四錢。較直隸舊例每石一兩之數。已屬加恩寬給。設偶有米糧稍缺。價值甚昂。年分彼時自當籌辦。何必此時即總總豫為過計。轉使兵丁等得以藉口。一遇糧價稍昂。輒冀關支本色。所謂民可使由。不可使知。豈有定立章程之初。輒爾豫存遷就。尚何以辦公事耶。此必公

義。未能通曉事理。拘小見而不知大體。方觀承。因彼係專司之人。不復與之辨執。遂有此議耳。已降旨申飭公義。除將原摺交軍機大臣節刪。交部定議外。並將此傳諭該督知之。○又諭。曰。明瑞。阿桂等奏。稱烏什賊衆擒獻首惡。已分別正法。及送往伊犁辦理等語。昨據伊等奏報克復烏什。語甚含糊。距今十二日。始以查辦賊衆具奏。而所辦又極乖張。錯謬。即如賊人戕我大臣官兵。以死拒守。及長

圍久迫。始縛獻首惡。希冀苟免。誅戮準以天理人情。豈復可赦。惟盡以軍法從事。始足申國憲而儆愚頑。乃辦理半年。不能速為擒斃。仍待賊衆窮急自獻。始稱竣事。豈不貽各回部布魯特人等姍笑。且朕屢降諭旨。特以此等回人。逞兇肆惡。若不大示懲創。將來或效尤滋事。轉非辟以止辟之道。今伊等既從事姑息。著將送往伊犁人等。即交二人養贍。再伊等從前請於烏什駐兵屯田。朕已諭令籌

議。今另摺所奏。忽將五福所領綠旗兵撤回。何錯謬。至於此極。所有官兵來往資糧。俱著伊二人償補。且前諭得城後。查覈素誠。阿布都拉等。一切情事。原欲詳其顛末。傳諭中外。而額色木圖拉既擒。亦應訊取確供。再正典刑。乃一味草率完局。不知伊等十數日來。所辦何事。由此觀之。則所查正法之賊人。亦皆聽信人言。未能脗合情理。此必明瑞顧念家室。早欲回京。而阿桂亦思早至伊犁。更替明

瑞。阿桂著交部嚴加議處。俟烏什事竣。均即往伊犁候旨。○又諭曰。明瑞等奏。烏魯木齊綠旗兵。令五福帶領護送移解回人後。再行撤回。於八月二十一起程等語。著傳諭五福。伊所撤之兵。若距烏魯木齊尚遠。仍令回至烏什。或相去已近。自當暫行休息。俟正月前往。以不誤春耕為妥。若謂此次派出官兵。業經往返。即另派亦可。○戶部等部議覆。署兩廣總督楊廷璋議奏。粵東徵收屯米各事

宜。糧道為州縣上司。如任意浮折。下屬莫可誰何。且不能身親其事。必假手胥役家人。弊端百出。嗣後請委理事同知專管。設有情弊。易於發覺。其倉大使一缺。應裁。○每石向加耗米三升。內一升五合。解折色。為修倉鋪墊之用。一升五合。解本色。充折耗。及書役紙張飯食等項。間有不敷。致啟浮收之弊。查折耗每石一升。斷不可少。惟修倉鋪墊。尚可節省。請改一升解折色。二升解本色。以修倉鋪

墊之所餘。補折耗役食之不足。一州縣解米赴倉。例將解批送巡撫處挂號。然後轉發收倉。但多解少收。無從稽考。請飭該撫遴委標員。將某日某處解數。及每月開放兵糧之數。申報。再令同知於收放完時。將米票彙申該撫存覈。零星遠戶。例許折徵。該督撫於開徵前。覈定時價。飭州縣刊入由單示諭。均應如所奏。從之。○以陝西西鳳協副將俞金鰲為廣西左江鎮總兵。○是日。駐蹕兩間房行宮。○壬辰。

上詣

皇太后行宮問安。○御行殿。勾到四川。廣西。廣東。秋審情實罪犯。停決四川斬犯二人。廣東斬犯三人。絞犯一人。餘一百六人予勾。○諭軍機大臣等。本年秋審。江蘇省緩決人犯內。經刑部九卿改入情實者。共有五起。較他省獨多。此內惟鄧斌。偽造夫票。冒支緯夫折錢入已一案。該犯因一時希圖獲利。得贓本屬

無幾。擬以緩決。尚有一錢可原。至如歸昌章。成元。楊景山。沈百良。李四。張二等。四案。或得贓故縱罪囚。復致釀成人命。或結黨聯夥行竊。拒捕打船奪櫓。或挾嫌加功。設謀害命。或竊匪妬姦。商同謀殺。均係情罪可惡。法難寬貸之犯。刑部等所改。均屬允當。該撫久任封疆。辦理案件。已非一日。何以舛謬若此。若非因暫管撫篆。存五日京兆之見。於秋讞有意姑寬。即是於律例正意。不能體會。莊有恭。現

授刑部尚書。到京後。即須承辦讞案。以此擬議失當。其何以勝秋卿之任耶。莊有恭著傳旨嚴行申飭。○浙江巡撫熊學鵬疏報。乾隆二十九年分。開墾常山。永嘉。平陽。縉雲。遂昌等五縣。田地山園。共二十九頃五十畝有奇。○旌表守正捐軀之廣東嘉應州民陳元文妻鍾氏。○是日。駐蹕要亭行宮。○癸巳。上御行殿。勾到福建。奉天。朝鮮。陝西。秋審情實罪犯。停決福建斬犯一人。奉天斬犯三人。朝

鮮絞犯一人。陝西斬犯一人。絞犯一人。餘七十四人。予勾。○河南巡撫阿思哈奏。豫省運河發源輝縣之百泉。南注三十里。至新鄉縣全河尖。與丹水合。又一百五十里。繞衛輝城北。為兌漕水次。又東北至濬縣。會淇水。達湯陰。內黃受湯河。洹河。二水。迤邐至直隸大名縣張兒莊。入臨清河。前河撫諸臣議於水次下游。建草壩二十六座。束水濟運。并照東省挑淺。查夏秋盛漲。無需收蓄。一交冬令。來源既涸。支派甚微。糧艘開時。水落沙停。草壩又屬無益。不若於上游來源處。先期蓄水。臨時開放。春夏兼灌民田。自開兌至糧艘出境止。堵閉民渠。俾盡歸官渠濟運。每年官為經理。原議草壩。請停修築。至濬縣十八里溜之三官廟老鸛嘴等處。為善化山根石柱砂礪。最為險要。該處鹽商。業捐貲開鑿溜勢寬平。其餘間段浮沙。應照舊例。飭印汛官。於八九月集夫。剗挖報聞。○是日。駐蹕密雲縣行宮。○

甲午。諭軍機大臣等。據何燭奏。婦女因調姦羞忿自盡。案情不一。請將旌表之處。分別覈定。一摺。於事理未為允當。向來辦理圖奸之案。其婦女因懷羞忿。激烈捐軀者。即予建坊入祠。原所以維持風化。此奏請分別婦女自盡之條。其意不過以為示之限制。婦女輕生者。或可因此少息。藉以博取陰功。仍伊嚙齋念佛之本念。所見殊小。閨闈之內。情偽微曖。原非一轍。或妻女本不欲死。而夫與父母相逼而成者。亦不能保其必無。但著為律令。明示區別。豈善善欲長之意。所奏無庸更交部議。著傳諭各省督撫。嗣後審理調姦案件。或有如何燭所奏張成。冀三羣等案情。務虛衷研鞫。審得實情。另於本內聲明。候朕酌量辦理。可於各督撫奏事之便。傳諭知之。何燭摺一併鈔寄閱看。○以翰林院侍讀學士鍾蘭枝為內閣學士。兼禮部侍郎。○以光祿寺卿瓦爾達為大理寺卿。○河南巡撫阿思哈疏

報。乾隆二十九年分。開墾祥符內鄉三縣旱荒地共四頃九十七畝有奇。○山西巡撫彰寶疏報。乾隆二十九年分。開墾吉州府屬鄉寧縣山坡旱地三十二畝有奇。○豁免浙江乾隆二十六年分。民欠額徵南米一千八十石有奇。○鑄給湖北荊門州新城司。改駐京山縣宋河鎮。當陽縣漳河司。改駐河溶鎮。兩巡檢圖記。從湖廣總督吳達善請也。○是日。駐蹕南石槽行宮。○乙未。

上迴鑾奉

皇太后居暢春園。○詣安佑宮行禮。○幸圓明園。○諭軍機大臣等。刑部進河南省秋審招冊內。經九卿由緩決。改入情實者。有絞犯黃朝帶。蔣進禮。谷九等三起。覈其情罪。皆係必應情實之犯。刑部九卿所改甚是。該撫阿思哈。原擬列入緩決。均屬寬縱。而於調姦之案。風化攸關。從前降旨甚明。謬圖姦釀命之案。風化攸關。從前降旨甚明。

朕觀招冊。黃朝帶本非必不可寬之犯。然各省歷來無不入於情實。一次不勾。下次即入緩決。何不可待之有。豈阿思哈獨未查案耶。抑謂朕不能看出。必待伊之矜恤耶。阿思哈著傳旨申飭。嗣後務宜悉心按例。擬議得平。倘仍蹈故轍。沽名斷不能再為寬恕也。○丙申。

上詣暢春園問

皇太后安。○諭軍機大臣等。本日引見興漢城守營都司胡虬龍。奏及曾署理興漢鎮總兵事務。詢係何時之事。據稱係楊應琚所委。甚屬駭聞。總兵乃專閫大員。偶遇缺出。應以副將護理。如副將無人。或次及叅將。暫時承乏。尚屬可行。至都司官階懸絕。若遽令越次署理。其何能彈壓兵丁。節制營伍耶。著傳旨詢問楊應琚。將從前因何令該都司暫署緣由。抑係胡虬龍捏飾妄奏之處。據實覆奏。并傳諭各總督。提督各該省總兵缺出。曾否有似

此越階委署之事。嗣後遇有鎮篆需人護理。不得用遊擊以下人員。以符體制。著於各該督提。奏事之便。傳諭知之。○丁酉。諭軍機大臣等。據高晉奏。本年大展清口。湖水宣洩甚暢。由五套漫堰過水。流入潮河歸海。兩邊海灘蕩地。今已斷流挂淤。其從前兩次新淤地內。小民圖利。間有種植雜糧等語。海灘淤地。想即前此大學士陳世倌所指黃河入海。停淤漸高。以致河流阻塞。此雖地勢使然。非人力所能施效。即以現在情形而論。亦不虞其遽窒歸墟。但聽其淤漲。不為經理。恐年復一年。久之或不能保無阻梗。不可不為先事綢繆之計。人言固非無稽也。至今年清水宣洩既暢。足資刷黃之力。何以轉致挂淤。或下游消納稍遲。沙水遂成停闕。該督等應悉心相度。就堰內溝渠所在。或酌開支河。以導其流。似亦因勢利導之一法。至民間耕種淤地。止圖目前微利。而不顧妨礙河渠。若不亟行禁

止。則灘地墾藝日廣。必致侵占河身。岸愈高而流愈窄。於清黃下注形勢。所關匪小。即如浙江之西湖葑田。直隸之淀河麥地。皆因有妨水利。嚴禁小民占種。況海口為南條歸宿。顧可任其侵礙。委輸要地。而不力為防禁耶。著傳諭高晉。李宏。詳悉熟籌。妥協辦理。仍行具摺奏聞。尋奏。前陳世倌所指停淤阻塞。就海口外橫沙而言。臣高晉前摺所奏。五套挂淤處。距海口尚一百餘里。現復履勘五套一帶。黃河海口。通暢並未停淤。無虞阻塞。至五套舊堰內。皆係蕩地。有溝渠三道。一由殷家溝入河歸海。一由蔣家溝。一由辣樹溝。匯入太平河。達河歸海。其堰內間有種植者。原照蕩地科則徵糧。並無妨礙。惟三道洩水溝渠。水涸時。小民圖利。難免耕占。現逐一清丈。飭地方官毋許仍前占種。得旨。覽奏俱悉。已慰厪念矣。○又諭。據李質穎奏。河東本年收鹽。配引足額。外尚存鹽三千二百名。有零。令各

商加謹收貯以備將來不敷年分補用等語。鹽勸收貯過夏。易致洩耗。該處池鹽何以獨能久貯。留待將來補用。河東週年產鹽既旺。照額暢銷之外。尚有贏餘。或可將此項存鹽。仿照淮揚之例。配用餘引。以濟民食。較貯積陳因。不更妥協乎。著傳諭李質穎。確按彼處情形。悉心籌畫。據實奏聞。尋奏。查河東從前鹽歉之時。蒙恩裁減餘引七萬道。現在豐收存鹽積滯。請先酌復餘引三萬道。自三十年

為始。赴部補領。給商配運。庶免貯積陳因日久損耗。報聞。○又諭。安徽寧國府知府員缺。已降旨將狄咏麓調補。該員在直隸年久。經方觀承保舉堪勝知府。是以用為正定府知府。今春於行在召見。觀其才具。似覺平常。昨因其有降調處分。詢之方觀承。稱其辦事尚屬實心。是以從寬留任。但恐方觀承因曾保薦。或不免於迴護。因將該員調補安徽。著傳諭高晉。託庸。俟伊到任後。留心察看。將居官

如何之處。據實奏聞。○戊戌。吏部等部議准。浙江巡撫熊學鵬奏。稱。仁和寧波二邑塘工。設東西兩海防同知分管。其西防同知管仁邑八仙石起。至寧邑戴家石橋止。八十五里工程。向未設署。伏秋在工。賃屋防護。查該同知所管之翁家埠。為八仙石戴家石橋適中之區。與老鹽倉要工亦近。請於該處建設衙署。俾得駐工防汛。從之。○工部議准。協辦大學士刑部尚書暫管江蘇巡撫莊有恭奏。稱。

寶山縣江東凌家港。地當頂衝。大洋潮浪逼近塘身。請於原築簔工之北。接築簔工十丈。原築坦坡之上。加築簔工一百十丈。工尾迤北。再築雙層簔工六十丈。從之。○舉行乾隆三十年分。湖北。湖南。兩省軍政卓異官一員。年老官二員。才力不及官一員。分別議敘處分如例。○己亥。

上詣暢春園。問皇太后安。○詣

大高殿。

壽皇殿行禮。○還宮。○大學士管陝甘總督楊應琚奏。巴里坤鎮屬哈密協兵糧。因艱於籌辦。每石折色二兩二錢。赴安西採買。兵丁既多往返之勞。折價亦有運送之費。查該協所屬塔勒沁等處屯田。小麥豌豆豐稔。來歲兵糧。請即撥屯田豆麥。較折價節省實多。得旨嘉獎。○庚子。

孝慈高皇后忌辰。遣官祭。

福陵。○諭。舉人選用知縣。需次動至三十餘年。其壯歲獲售者。既不得及鋒而用。而晚遇者。年力益復就衰。每為軫惜。朕嘗中夜思維。籌所以疏通壅滯之法。因查每科中額一千二百九十名。統十年而計。加以恩科。則多至五千餘人。而十年中所銓選者。不及五百人。除各科會試中式外。其曾經揀選候選者。尚餘數千。經久愈多。遂成壅積。而直省知縣員缺。本祇有此數。即使一時概行銓用。亦屬缺少。

人多。不能使人人皆紆墨綬。此固必然之勢也。而不知者。或歸咎於捐班之占缺。因復覈計捐班所選。每歲亦不過三四十人。縱令盡予舉班。仍屬無幾。即如近日部旗所辦世職。扣欠官項一事。言者輒云。世職承襲。因代扣欠項。不能食俸者甚多。朕聞之惻然。因命查豁。則統計旗員世職。共一千九百六十八員。除本身借欠。應扣止二十餘萬兩外。其代扣官項者。纔一百五十八員。應扣銀四萬餘兩。此項雖名為代扣。其實子襲父職。應行接扣者。則有三萬九千餘兩之多。而承襲族中世職。代扣還項者。止數千餘金。夫父借子還。世之常理。豈得謂之代人扣賠。可見前此扣項代還。旗員多累之說。盡屬無稽。浮議之不足憑。大率如此。現在捐例已停。自可無虞占缺。即或將來再議開捐。其知縣一條。不必載入捐款。至向來吏部截取舉人例。由各省督撫咨送。往往意存姑息。不加甄別。及至部選得。

缺。經九卿驗看。始以袁庸改補教職。是督撫徒欲博寬厚之名。使此等衰邁之人。僕僕道途。終歸無益。所謂愛之實適害之也。嗣後各該督撫。於舉人截取領文時。留心驗看。如果實在精力已衰。難膺民社者。或該員情願就教。即於本省呈改。以省跋涉之勞。其有自揣老齡。不願就銓者。並令彙冊咨部。請旨酌給職銜。以慰其寒窻績學之志。明歲丙戌春闈。各省舉人雲集。當於會榜後。特派大臣。分別挑選引見。量其年力才具。及時錄用。其有科分已深。非因丁憂事故。自分年老才庸。不願赴京會試者。亦聽其自便。其作何給予職銜。如何挑選錄用。及選班中更有如何可以疏通之處。著大學士九卿會同詳議以聞。副朕體卹寒畯。及時登進羣才至意。○又諭曰。班禪額爾德尼。年齒長成。經典淹洽。復教導達賚喇嘛。經卷理宜加恩冊封。著交該院照例辦理。○又諭。

雍和宮之堪布喇嘛阿旺楚勒提木。係統領四寨桑。教習大衆之大喇嘛。因其教導有方。加恩賞給諾們汗名號。著該院照庫掄諾們汗例。鑄給銀印。○是日起。

上以孟冬享

太廟。齋戒三日。○辛丑。諭軍機大臣等。明瑞等奏稱烏什新定。應酌量留兵五百名。滿洲兵以副都統舒泰。乾清門侍衛保寧管轄。索倫兵以原任總管達克塔納管轄。綠旗兵以乾

清門侍衛法靈阿管轄。並請於効力贖罪人員內。留原任協領伊昌阿。原任三等侍衛舒明阿。管理工作。留原任御史忠德。管理糧餉。其屯田事務。調巴里坤遊擊陳堯典。辦理等語。烏什事竣。滿洲索倫兵。無須多駐。著留滿洲兵一百名。索倫兵一百名。前據明瑞等請派綠旗兵屯田。已諭將五福所領兵丁留駐。乃伊等忽令撤回。業經降旨申飭。著仍遵前旨。量其行走之遠近。若已抵烏魯木齊。即於

來年正月起程。或另派亦可。五福亦不必再往烏什。仍留烏魯木齊。著楊應琚於副將內揀選一員。由烏魯木齊領兵前往烏什。其管轄兵丁。豫備差遣各員。俱照明瑞等所請行。將此傳諭知之。○軍機大臣等議覆。副都統額勒登額奏。請圍場兵。官為設馬五百匹。賞銀餵養一摺。查乾隆十八年。添駐兵五百二十名。每名給馬一匹。賞銀七兩。餵養兵丁。並不加意愛惜。陸續倒斃。現留剩無多。該副都

統所奏。毋庸議。若以自京隨哨官兵。不敷騎用。嗣後請飭兵部。於八旗官馬內。每兵各給一匹。圍後交還。其前設馬匹。仍令該副都統籌畫補足。以備卡座緝拏等差。從之。○以前任兩廣總督李侍堯。署工部尚書。○壬寅。孝敬憲皇后忌辰。遣官祭。

泰陵。○諭。獨石口等處官兵。不必每歲巡查。著三年巡查一次。○是月。直隸總督方觀承奏。保定等處駐防兵米。請照山海關例。豫買一

年存貯。今年直屬豐收。照每石一兩定價。動司庫銀。發保屬十六州縣。及雄縣。固安。寶坻。三處。新糧入市。照數採買。得旨嘉獎。○江南河道總督李宏奏。在任接辦事宜。并請恩賜訓誨。得旨。有何訓誨。河工係汝素知。較高晉更覺諳練。但恐居心不如彼。而河員陋習。不能改耳。切記於心。即所以訓汝矣。○江南蘇松鎮總兵馬全奏。巡查外海情形。八月初旬。率將備弁兵。從吳淞港出匯頭。距崇明縣三

百餘里。西為高家嘴。東為廖角嘴。水面四百餘里。中伏銅沙。最為險阻。從此出口。即屬外洋。對針南行。以大七山為標準。再經小七山。俱荒島無壘門可泊。乘東北風。徑赴小羊山。駐弁兵六十六員名。漁人蓬廠六十餘處。偵巡並無匪類。再東南四十里之大羊山。係浙省定海汛境。亦多採捕漁人。復乘西南風。轉至八十餘里之徐貢山。又東北行一百餘里。至馬蹟山。徐貢山與小羊山相等。惟馬蹟山

週二百餘里。舉門二十餘處。恐藏奸匪。久經封禁。直東五百餘里。為盡山。所過洋面稍平處。即布演水操。以壯軍威。仍飭官兵實力巡緝。得旨嘉獎。○大學士管陝甘總督楊應琚奏。甘肅地瘠民貧。春借籽糧。秋成還款。或倉貯不敷。即借司庫銀接濟。查各屬所產。粟。麥。小麥。為上。豌豆為次。大豆。青稞。糜子。大麥。青豆。為下。嗣後請毋拘原借。止分上下色。通融抵收。再河西一帶。豌豆價昂。并請即抵米麥。

兼按時值。以粟抵銀。改收本色。其願照原借交還者。聽得旨允行。○陝西巡撫和其衷奏。陝省西延。鳳。漢。榆。同。六府。向無常平額儲。前撫臣明德奏設。令將捐監糧石收貯。自後俱未捐足。現奉部議。改歸首邑經管。請各首邑每捐監百名。以五十名為府額。五十名為縣額。分別存貯。每年糶買。不得藉稱府倉派累鄰邑。報聞。○又奏。延。榆。二府屬之膚施。保安。甘泉。安塞。安定。榆林。神木。府谷。懷遠。葭州。及

廊州。並所屬之洛川。中部。宜君等州縣。夏秋得雨既遲。今又被霜。收成更歉。現確查無力貧民。緩徵積欠。九月中借給社糧。俾得播種。冬麥再俟冬春酌借常平倉儲。以資口食。得旨是。○廣西巡撫宋邦綏奏。蒞任後。體察屬員。剔除蠹役。嚴堵南太。鎮。三府。外通交趾之要隘。稽查平。梧。潯。太。慶等屬。開採各礦之匪徒。得旨。諸凡為之以實。要之以久可也。○又奏。粵西臨桂。興安。所屬南北二十八陡。河。為

通商利農之要津。今又修復星橋。靈山。牛路。三陡。請每陡設夫二名。并給蓄水器具銀兩。再向令臨桂巡檢。興安典史。分管該縣按季親查。但二縣事繁。難於兼顧。查桂林府同知本兼水利銜。事務亦簡。應責成稽察。報聞。○廣西布政使淑寶奏。粵西徵冊。皆歸里書收藏。任意飛灑。且每年秋季私纂徵冊後。即停止推收。無賴原業。勾串重售。情弊百出。請飭州縣。將里書家藏底冊繳官。編號鈐印。置局

大堂業戶稅契當堂對冊過戶推收擇誠實里書輪直每晚覆覈每季彙繳藩司查察庶私稅白契之陋習可杜得旨嘉獎

大清高宗法天隆運至誠先覺體元立極敷文奮武孝慈神聖純皇帝實錄卷之七百四十五

大清高宗法天隆運至誠先覺體元立極敷文奮武孝慈神聖純皇帝實錄卷之七百四十六

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣謹將世襲騎都尉軍功加十九級隨帶加二級又加二級臣謹將內大臣戶部尚書錢謙益滿洲都統軍功紀錄一次尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆三十年乙酉冬十月癸卯朔享

太廟

上親詣行禮○遣官祭

永陵

福陵

昭陵

昭西陵

孝陵

孝東陵

景陵

泰陵。○遣官祭

孝賢皇后陵。

端慧皇太子園寢。○頒乾隆三十一年時憲書。○諭曰。永和原係內務府護軍統領。著仍補授護軍統領。管理打牲烏拉總管事務。○欽差侍郎鄂寧。伍勒穆集等奏。潘桃口監督赫達色。五岱等。以例不徵稅木植。竟違例徵收。請旨革職審擬。得旨。赫達色著革職。五岱著解任。交與鄂寧等將案內應質人犯。一併嚴審定擬具奏。至此項木植。例不徵稅。赫達色等朦混報部。該部因何准行之處。著該堂官明白回奏。○甲辰。

上御乾清門聽政。○諭曰。明瑞。阿桂等。辦理烏什回城一事。舛謬之處。不一而足。已降旨交部嚴加議處。但所奏摺。並未發鈔。衆人不悉其中原委。或疑回人既已平定。何以不行議敘。轉加議處。今將伊等奏摺鈔發。俾衆共知之。即如今春烏什逆回賴和。木圖拉等。因素

誠激變。據城抗拒。特命明瑞。阿桂。帶領官兵前往辦理。伊等初至時。朕因烏什最爾孤城。又無外援。易於收復。官兵毋庸悉銳進城。輕撓鋒鏑。是以令伊等惟嚴圍困之計。使賊回勢窮力蹙。則乘機攻勦。尤為事半功倍。今圍城已及半載。逆回芻糧乏絕。馬斃人飢。自生離叛。此時攻取。易若摧枯。況既知賊衆內潰。并聞城內倉皇救火。聚集驚惶。即當統率大兵。悉力攻城。誅殺賊衆。以揚我武。乃兵已臨

城。尚退列壘內。及經回衆將要賊獻出。始行入城。復關閉城門。收獲鎗礮弓箭。種種示怯。全不知奮勇任事。則回城之復定。尚得謂由伊等收取耶。我國家定鼎之初。兵威丕振。雲梯所向。立破堅城。從未有稍存畏葸退縮不前之事。不謂伊等於烏什彈丸之地。選悞周章。至於如此。實損我國威。伊等罪乃在此也。至素誠等苦累回人。姦淫回婦。各情節。雖從前得之俘囚之口。今顏色木圖拉等正犯既

經就獲。理應嚴訊起釁緣由。及素誠所犯。是否屬實。使情罪確鑿。乃成信讞。而衆共曉然。方結此事之局。伊等一概置之不問。輒稱將賊黨正法。有是理乎。明瑞阿桂此次辦理。節錯謬。不得不交部議處。以示懲創。其在事將弁兵丁。仍交部分別議敘。朕辦理庶務。一秉大公。賞罰悉期允當。此天下臣民所共知。而於軍令賞罰之際。更所慎重。茲將伊等原摺譯發。使衆閱看。自知其辦理之無紀緒也。

並宣諭中外知之。○諭軍機大臣等。莊有恭審擬靖江縣區書童親仁一摺。已降旨交三法司覈擬具奏矣。該犯以蠹役侵蝕錢糧。數至盈千。擬以大辟。原屬罪所應得。但現在正屆勾到之期。若按例定為監候。歸入本年秋審情實。亦不至久稽時日。何必於例外聲請。即予正法。使無知者疑該撫有意從嚴。亦非辦理刑名之道。至該撫所奏花戶名下。應行重完米石。該縣熊琫自願代民完納。所有失

察之處。應邀免議。辦理亦屬非是。花戶等因希冀便宜。致受奸胥愚弄。自應照例著令重完。其力不能即完者。或酌量分別年限帶徵。尚無不可。即間有無力貧民。艱於輸納。亦當俟將來查明。加恩予豁。何得於此時概請寬免。轉令該縣代為補償。適以滋長刁風。豈可為訓。所有原擬舛謬之處。俱著該撫另行辦理。奏聞。原摺已交軍機大臣刪改發議。莊有恭著傳旨申飭。○以戶部員外郎慶桂為內

閣學士兼禮部侍郎。○以廣東督標副將朱崙為雲南永北鎮總兵。○乙巳。諭據劉藻等奏。貴州布政使恒光。現在患病。請回旗調理等語。恒光著准其解任調理。所遺貴州布政使員缺。著良卿補授。雲南按察使員缺。著夔舒補授。○又諭。八旗官員。因事故離任。尚有未完宗人府銀。并紅白事借俸滋生等銀。在伊等親戚家族。及保官披甲兵丁。並子孫俸餉。各銀內扣還者。共一萬六百七十兩零。又

因無俸餉可扣。按季交納者。共七千七百兩零。俱係應完之項。今八旗世職。應接扣欠項銀四萬餘兩。已加恩免其扣交。此項銀兩。著加恩一併豁免。以示體卹。○又諭據方世儒奏。署婺川縣知縣趙必恭。拏獲拒捕流犯劉文昭。究明定擬一摺。該犯自配所逃回竄跡險僻地方。該縣趙必恭親往查拏。迅即弋獲。尚屬能事之員。著該撫將伊平日居官如何之處。出具考語。送部引見。○又諭曰。回部頭

等台吉哈什木病故。理藩院應奏請令伊子承襲。乃僅請賞給披甲錢糧。殊屬不合。哈什木之子阿布拉。著加恩承襲二等台吉。伊年尚幼。著支食半俸。○丙午。

上御懋勤殿。勾到湖廣浙江情實罪犯。停決湖廣斬犯五人。絞犯三人。餘七十三人。予勾。○諭曰。領侍衛內大臣等。奏藍翎漢侍衛杜樾。告假逾限。應請罰俸等語。嗣後有似此逾限者。不必罰俸。俟其年滿應陞時。逾限四月。

即停陞一年。八月者。停陞二年。一年者。停陞三年。杜樾即照此例辦理。○丁未。諭曰。德保正黃旗漢軍副都統員缺。著高恒署理。愛隆阿鑲白旗蒙古副都統員缺。著伍勒穆集署理。雅郎阿正紅旗滿洲副都統員缺。著富勒賀署理。訥蘇肯正紅旗蒙古副都統員缺。著呼什圖署理。○諭軍機大臣等。赫達色等違例徵稅一案。前降旨將因何准行之處。詢問工部。據稱此項木植。經赫達色朦混呈報。工

部未能詳查。遽行奏准。實屬疎忽等語。已將該堂官交部察議。赫達色在監督任內。輒以多倫諾爾地方商舖居民。從不納稅之已賣現存木植。徧行搜查。朦混呈部。既非按例之事。寧不慮部中駁詰。難保無關通書吏囑託。准行情弊。著傳諭鄂寧等。將此情節。一併嚴行查訊。務得實情。以成信讞。○戶部議准。浙江布政使永德奏稱。准部咨。府貯倉穀。令首邑經理。查浙省有府倉者。温州。處州。衢州。台

州四府。該倉穀原備平糶。並撥濟屬縣。若歸首邑管理。出納未便。應請嗣後用該倉穀在郡平糶者。令首邑買補。撥濟屬縣者。令領穀之縣買補。如該縣米貴。令附近豐收州縣代買。從之。○調雲南楚姚鎮總兵書敏。為開化鎮總兵。以直隸通州協副將華封為楚姚鎮總兵。○戊申。

上詣暢春園問

皇太后安。○幸圓明園。○諭曰。翁牛特貝勒朋

蘇克內廷行走多年。今聞溢逝。朕心深為惻。著乾清門侍衛蒙固勒。馳驛前往奠醊。并賞銀五百兩治喪。○又諭曰。翁牛特貝勒朋蘇克病故。所遺盟長缺。著羅布藏錫喇布補授。羅布藏錫喇布之副盟長缺。著巴圖補授。○諭軍機大臣等。劉藻奏滇省五華書院山長張甄陶。自主講席以來。迄今五載。實能盡心訓迪。著有成效。請令為黔省貴山書院山長。俟屆滿六年。撫臣就近考覈。或照例奏請

議敘。或送部引見示獎。臨期再行酌辦等語。所奏甚是。已如議行矣。省會設立書院。所以樂育人材。前經降旨。令督撫等慎選山長。如果教術可觀。六年之後。著有成效。奏請酌量議敘。原以山長為多士觀摩。若徒視為具文。漫無考覈。既無以為激勸之資。則日久因循。未免怠於訓課。惟知戀棧優游。諸生或且習而生玩。恐於數學無裨。且在籍閒居之人。未嘗無端謹績學。可主講席者。若實心延訪。使之及瓜更代。自必鼓舞振興。共相淬勵。方不負設館育材之意。乃自降旨以來。各督撫並未見有遵旨具奏者。即如齊召南之在敷文書院。廖鴻章之在紫陽書院。豈止六年之久。何以從前未經辦及。朕所知已有二人。恐各省似此者。尚復不少。著各該督撫。將因何不行遵旨辦理之處。查明具奏。嗣後均以六年為滿。秉公考察。分別覈辦。庶於勸學程功。均有實濟。著傳諭各督撫知之。○己酉。諭軍機

大臣等明瑞阿桂等奏稱葉爾羌喀什噶爾阿克蘇和闐之阿奇木伯克等多不滿物議此內惟鄂對人尚可用阿什默特亦能辦理事務至噶岱默特色提巴勒氏聲名較前稍減除鄂對駐劄葉爾羌外請將噶岱默特調往阿克蘇色提巴勒氏調往和闐阿瓜斯伯凱補授喀什噶爾阿奇木伯克等語所見又屬錯謬鄂對等皆歸順舊人且遇有軍務頗能出力報効此次若盡行移調則回人布魯

特等不知情事妄起猜疑謂國家乘新取烏什之威將伊等更調若謂伊等貪圖小利亦回人常事安能保其必無惟在大臣等正已率屬賞罰嚴明地方自必安靜毋庸更調紛紜轉滋惶惑即如所奏伊等應行更調之處亦未有確實款蹟不過得之物議又可盡信乎況明瑞等從前尚欲盡撤各城大臣倘從所請則將來伯克等之賢否復以何人為之體察可謂自相刺謬矣所有更調阿奇木伯

克之處俱不必行惟伊等另摺所奏善後事宜尚屬可行著交軍機大臣議奏○命大學士尹繼善為尚書房總師傅○庚戌上詣暢春園問

皇太后安○辛靜宜園駐蹕○旌表逼嫁捐軀之湖北潛江縣民朱之賢妻吳氏○辛亥上迴圓明園○旌表守正捐軀之四川閬中縣民唐太順妻趙氏○壬子

上詣暢春園問

皇太后安○還宮○癸丑諭移駐伊犁驍騎校等向在涼莊凡遇閏月俱不支給餉銀今既移駐伊犁著加恩照八旗之例一體支給閏餉○軍機大臣等議奏會典載坐褥親王冬用貂世子郡王冬用猞猁緣貂親王與上用制同無以示別應令親王用猞猁緣貂世子郡王貂心緣猞猁緣又軍器部載盔纓式都統鵬翎二貂纓副都統薰獺尾紅纓直省督撫提鎮與都統同查直省各鎮於乾

隆十八年。改正二品。受總督節制。盛纓應改用薰獺尾。與副都統同。副叅以下。改用獺尾。與叅領同。至兩翼前鋒統領。八旗護軍統領。向用鵬翎貂尾。應併改正。又禮服冊。敬載

皇帝冠服於卷首。軍器部內甲冑制。自親王始。查大閱盛典。御用甲冑制度。與禮服等重。應敬載卷首。從之。○吏部議准。河南巡撫阿思哈奏稱。宜陽縣屬韓城鎮。為山陝江楚商賈衝道。應設官彈壓。查鞏縣縣丞。與知縣同城。

所司水利等事。知縣可兼理。請令移駐韓城鎮。改為宜陽縣分防縣丞。并稽查附近韓城鎮之三鄉木柴關等村。其衙署即於該鎮擇地建蓋。從之。○甲寅。諭曰。額爾景額正藍旗蒙古副都統員缺。著富虎署理。○諭軍機大臣等。今烏什事竣。已經兩月。明瑞等即應回伊犁辦事。設謂尚有未完之件。此等瑣屑事務。豈一時可了。逐細搜尋。轉屬無益。且永貴額敏和卓等。亦可陸續辦理。著傳諭明瑞。阿

桂。與永貴交代後。即行起程。不必久留烏什。○軍機大臣等議覆。伊犁將軍明瑞等奏。回部善後事宜。一。各城舊制。以阿奇木伯克總辦事務。日久權重。任用私人。侵奪小伯克等承辦之事。諸弊叢生。請嗣後一切事件。俱先交承辦之員。俟其呈稟。仍與伊什罕伯克會商。若有仍前攬權獨辦。許伯克等於該駐劄大臣前控告治罪。虛者反坐。一。回人賦稅頗輕。惟厄魯特時。有格訥坦名色。以備差務。每年各城派四五千騰格不等。俱係臨時酌派。並無定額。易滋擾累。侵蝕諸弊。今各部落差人。已官給口糧羊隻。大臣等俱有養廉。應將前項陋規禁止。照從前吐魯番定制。豫擇富戶。給與地畝。令每戶一二年間輪辦一次。一。從前厄魯特。每年派哈喇罕一人。和卓一人。按各城回人戶口賦役造冊。開除老弱。後來漸生隱匿賄脫之弊。請仍循舊規。每間一年。派員查覈。若有輕重不均。將該阿奇木等議

處。都官伯克缺出。該伯克補用不公。且有阿奇木等子弟親戚。據為利藪。請嗣後令伊什罕。噶西納齊。商伯克。公同保舉。其阿奇木等族姻。俱令迴避。一。伯克所用親隨。謂之顏齊。向有定額。惟取中等人戶。有陞調別城者。按級增益。今則逾額數倍。且必派富戶。其應納賦稅。攤入他戶。伯克等從中侵蝕。顏齊等又挾制伯克。市權滋擾。請令阿奇木等。公同查覈。如有額外挑派。槩行革除。一。每年回人應辦賦役。俱由伯克指派。并不豫為曉示。每致放富差貧。請將現辦賦役定額。令該大臣等。以印文榜示。如有不遵定額。偏枯擾累。准回人等控告。虛者反坐。一。內地貿易商民漸多。所居與官兵相近。尚可彈壓。若與回人相雜。易滋事端。請令該大臣等清查。俱令赴駐兵處貿易。若仍與回人雜處。即行治罪。一。阿奇木以下伯克。與大臣官員等相見。向來未定儀注。該大臣等。或妄自尊大。請嗣後阿奇

木。伊什罕伯克。見大臣官員等。照總管副總管例。其餘伯克。俱照官兵例。仍令大臣官員等。毋得簡傲。均應如所請。從之。○乙卯。

上御懋勤殿。勾到江西。江蘇。安徽。情實罪犯。停決。江西斬犯一人。江蘇斬犯一人。安徽絞犯二人。餘七十七人。予勾。○漕運總督楊錫紱奏。前因湖南糧艘。抵次最遲。修艖草率。奏准於田鎮豫給銀兩。置辦蓬桅。至漢口修艖。本年春間。據該省糧道劉秉愉詳稱。蓬纜須二

平糶本字四十六

三年更換一次。每年即有添補。亦可至田鎮置辦。至修艖。必須旗丁親身承辦。各船至漢口。抵次不遠。旗丁急回。衛料理新漕。其時舊丁更換。新丁未到。彼此觀望。推延。衛備遠處各地。不能督修。豫給銀兩。每致浮銷。經臣咨部請停。准部覆。此項豫發銀兩。係奏准遵行之案。應具題辦理。查田鎮給銀。原期修船堅固。今有名無實。應請仍循舊章。得旨。著照所請。行。下部知之。又諭軍機大臣等。楊錫紱奏

湖南糧艘。請停豫解蓬纜銀兩一摺。已照所請准行矣。此事楊錫紱之咨部。及戶部之咨駁。皆不能無失。楊錫紱初據糧道劉秉愉稟詳糧艘於田家鎮發銀豫修。乃係有名無實。不如照舊修艖。以免逗留花費。既知其事不可行。即應奏請停止。何必復咨戶部。而該部接據來咨。見其覈實籌辦。亦即應奏明覆准。又何必以從前奏准之案。駁令具題。是該部固過於拘泥。而該督之咨部辦理。亦因前此係伊奏請。未免稍存迴護。但楊錫紱究因劉秉愉之稟詳。奏請停止。並不固執成見。是其可取處。朕辦事準酌得中。務使瑕瑜不掩。可將此傳諭知之。至糧道劉秉愉能查覈具稟。頗屬留心任事。該員平日居官如何。並著該督查明據實覆奏。尋奏糧道劉秉愉操守謹飭。性情樸直。辦理糧運事務。頗知奮勉。報聞。○吏部議准。湖北按察使雷暢奏稱。沿江河州縣。或遇傷屍漂流過境。畏承緝之累。不行

撈獲。或案情發覺。關查止以未經獲屍回覆。請嗣後州縣遇傷屍過境。未經撈獲者。照失察例罰俸一年。若地保人等呈報。地方官諱匿不報。應照隣邑巧為諉卸。不往相驗例。降三級調用。從之。○以翰林院侍讀張曾敝。為順天武鄉試正考官。編修趙翼。為副考官。○丙辰。諭軍機大臣等。明瑞奏稱。阿克蘇官兵俱移駐烏什。所有舊頒印信。應送部繳銷。請另行鑄給等語。著該部鑄給總理各回城事務。叅贊大臣印一顆。兼清漢篆。及回部字體頒給。○又諭。據吳達善等奏。湖北城垣工料銀兩。除鑄錢餘息等項外。尚不敷銀五萬三千餘兩。現據各屬殷實士民。踴躍捐輸等語。已於摺內批示矣。前此安徽城工。急需修理。經託庸奏請勸捐興修。該撫於此事聚精會神。經理兩年。因得剋期告竣。雖無大弊。已不能不致議論。嗣經尹繼善奏。各省城垣。請照安省之例修理。朕以各省民情土俗。未必相

同。降旨令各督撫按該地方情形。悉心籌畫。詳議覆奏。并交該部。俟各省奏齊時。彙總通盤覈議。酌量舉行。並未令其一面奏聞。一面辦理也。今吳達善等。查奏修理湖北城工。自應奏明。聽候部覆遵行。乃即飭各屬曉諭士民。陸續報捐。未免急遽無序。著傳諭該督等。靜候部臣議覆。再行照辦。此時毋庸急於從事。○丁巳。

上御太和殿視朝。文武陞轉各官謝恩。○諭曰。

瑪瑞鑲紅旗滿洲副都統員缺。著索諾木策凌署理。○吏部議准。安徽巡撫託庸等疏稱。鳳陽縣地廣事繁。該縣丞與知縣同駐一城。無專管事件。應令移駐溪河集。巡緝彈壓。該集士民願捐地建署。應拆舊署建造。從之。

大清高宗法天隆運至誠先覺體元立極敷文奮武孝慈神聖純皇帝實錄卷之七百四十六

大清高宗法天隆運至誠先覺體元立極敷文奮武孝慈神聖純皇帝實錄卷之七百四十七

監修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆三十年乙酉十月戊午諭曰阿巴噶王

索諾木喇布坦人甚誠實內廷行走有年前聞其患病特派乾清門侍衛烏爾圖那遜帶領御醫前往診視今聞溘逝朕心甚為憫惻著派公永瑤馳驛前往奠醑并賞銀一千兩治喪○諭軍機大臣等吳達善等奏鹽梟李曰萬等在松滋地方奪犯毆差一摺該犯等夥同船載私鹽潛行越卡販賣經官役拏獲膽敢率同搶犯復糾約三十餘衆分駕漁船乘夜潛往打傷兵丁將已獲鹽船繩纜砍斷

開放奪回鹽包并將巡役哨船順流推下此案惡梟不法已極若不嚴加處治無以儆尤頑而靖地方著傳諭吳達善李因培將現獲各犯從重審訊定擬毋得稍存姑息其未經就獲者亦即密派兵役多方躡緝勿令倖逃法網今續獲逸犯否速奏來○又諭湖北鹽梟李曰萬等奪犯毆差一案已經降旨令該督撫將現獲各犯從重審擬未獲各犯多方躡緝今據吳達善等奏到先後獲犯已三十

名尚有未經弋獲之戈大德等共十一名此等惡梟情罪可惡既已弋獲多人自應就現獲各犯作速究審治罪以示嚴懲使奸徒知所警畏毋庸夥犯齊全始行結案以致稽延時日或有疎虞著傳諭該督等即將現獲人犯嚴加審究分別盡法懲治其未經緝獲之犯仍著上緊嚴拏毋使稍有漏網○又諭據阿爾泰奏新墾地畝分別升科及續墾荒地現在飭令地方官招集墾戶妥協安置並查

明承業認糧確數以資清理一摺。朕因阿爾泰於地方本計水利農田諸務向能留心經理。此事諒非虛飾。是以聽其舉行。其實墾地升科。本係良法。但辦理不善。轉致累民。即如當日田文鏡查辦墾荒一事。將升科銀兩灑派花戶。徒務開墾虛名。小民無授產之益而受加賦之累。前車深足為戒。今阿爾泰現在籌畫招墾。不可不慎之於始。如果實有曠土可耕。能化荒蕪為腴壤。固於惠養黎元之實

政有裨。但恐有司辦理不善。或迎合邀功。以無報有。勢必貽累閭閻。所關正復不小。著傳諭該督務須加意查辦。覈其藝聞收穫之實。據計畝起科。使小民永享耕田鑿井之利。切勿為屬員所朦蔽。以致有名無實。徒滋擾累。此事利弊所係。惟責成該督悉心體察耳。○又諭。據阿爾泰奏。留任筆帖式諾慕齊三年期滿。請再留任三年。如能愈加奮勉。俟有邊地相當缺出。奏請送部引見等語。督撫衙門

向設筆帖式。管理繙譯。定以三年為滿。使部院筆帖式俱得更番差遣。立法最為平允。若在外三年期滿。復奏請留任。遇缺陞補。是伊等一至督撫衙門。不過六七年之久。即得補用外缺。較部院辦事人員。陞遷更易。不且為若輩開一捷徑耶。況外省辦理繙譯事件。本屬無多。即能妥協無誤。原係分內之事。阿爾泰所奏諾慕齊再留任之處。不必行。並將此傳諭知之。○已未。諭曰。德保現出直隸學差

吏部侍郎事務。著慶桂署理。李宗文現出浙江學差。程景伊著以吏部侍郎署理工部事務。其吏部侍郎事務。仍著王際華署理。○諭軍機大臣等。昨據熊學鵬奏。天台新昌寧海等三縣地畝。間被旱災。現在分別酌給籽本。其應徵錢糧。照例蠲緩。並豫籌撥運附近倉穀協濟。小民自可不致失所。但念來歲春收尚遠。青黃不接之際。山僻窮黎。生計未免艱窘。應否作何加恩撫卹之處。著該撫詳查覆

奏。俟朕酌量降旨。至前摺所奏收成稍歉之仁和錢塘會稽蕭山桐廬分水等縣。雖據該撫勘明係一隅偏災。應俟明年春耕時查明實在無力貧農酌借籽種。但秋收分數既減。民力自不無拮据。是否並須接濟。亦著該撫體察情形。一併詳悉具奏。可將此傳諭知之。○又諭甘肅鞏昌等處秋間地動業經降旨該督令其分別加恩從優撫卹。昨據楊應琚奏到河東河西各屬秋禾偏旱及間被雹水風霜係一隅偏災與閩屬收成尚無關礙現經照例賑卹等語。該省今歲秋成通計尚屬豐稔。但偏災處所蓋藏未必充裕。明歲青黃不接之時民力不無拮据。其或有尚須賑卹之處著傳諭楊應琚查明現在情形詳悉覆奏。候朕酌量加恩降旨。○又諭前據崔應階奏濟南武定等屬間有被水地畝或勘不成災或分數輕減現將無力貧民照例借給麥本等語。該省被災窪地雖僅屬一隅且業已

分別撫綏小民自不致失所惟是被水之餘秋收分數既減明春青黃不接之時窮黎生計或不免拮据著傳諭崔應階將偶被偏災之各州縣應否加恩賑卹之處即行查明據實覆奏。候朕酌量降旨。○伊犁將軍明瑞等奏請添派屯田兵得旨著楊應琚派綠旗兵一千名前往烏魯木齊烏什二處屯田。○庚申諭軍機大臣等阿思哈奏豫省輪運薊糧現已運赴水次改徵固屬不及惟有照數截存據實變價解交等語。昨因薊運米石海河輓送維艱是以停止豫東二省船運改徵折色。該省漕米現在既已收竣無庸復令變價致涉紛繁著即存貯水次地方倉內作為該省常平之用。或直隸間遇米少年分亦可資其協濟。況此項米石為數原屬無多小民踴躍輸將相沿已久今忽改徵折色民間或有未便嗣後著仍照數收兌本色留貯備用既可省臨時採買之煩而將來或有改徵豆石

之年。即可以此項作抵。更免另為籌畫。著將此傳諭阿思哈及崔應階知之。○湖北巡撫李因培疏報宜城縣乾隆二十七年開墾額內下則地一項十九畝有奇。○辛酉。

上御乾清門聽政。○諭軍機大臣等。昨戶部議駁。莊有恭咨請奉省海運來江販賣糧石。徵收稅銀等因。一摺。止論江海關之稅額有無。而不計及奉天米石之不應遠販江省。未得此事竅要。已諭令改議矣。奉省糧價向來平

減。固由於地脈肥厚。亦因不通商販。搬運者少。向遇直隸山東米糧稍短之年。特許酌量販運。以資調劑。至近年暫開海禁。亦因該處年穀豐盈。聽其於直隸等近省轉糶流通。商民均受其益。至江南產米素多。何須仰給奉天糧石。即該省果有歉乏。必需海運接濟。臨時自當籌畫辦理。亦不應聽其常川搬運。且其地距奉天遙遠。往來經涉重洋。私販透漏諸弊。皆所不免。况商人輩趨利如鶩。若漫無

節制。則奉省糧價必致漸昂。並將來偶遇內地歉收之時。撥運亦不可得矣。著傳諭舍圖肯嗣後豐收之年。除直隸山東商船准其照舊運載外。其江省商販概行查禁。不得稍滋影射。倘有私自偷運者。地方官嚴行查究。奏明從重治罪。至現在奉省商販已經到江米石。自應查明徵稅。俾該商等無重利可圖。庶可杜絕將來販運。可一併傳諭莊有恭知之。○定舉人銓用例。吏部議奏。各省舉人截取

時例。由督撫驗看。分別知縣教職。咨部候選。但意存姑息。甄別不審。知縣得缺後。經九卿改補教職。徒多往返之勞。應請嗣後各督撫於接到部文日。定限一年。行文調取各舉人據實驗看。其年力尚健。堪膺民社者。給咨赴部候選。願就教職者。准在本省具呈。若年在七十以上。不堪供職。免其調取驗看。該督撫題請賞銜。舉人已經揀選。原係候選知縣。應從優以中書科中書大理寺評事太常寺博

士等銜。由吏部掣定。奏請賞給。其已經截取。願得職銜者。亦照此辦理。各省舉人約一萬有餘。每科會試不過四五千。人。今奉恩旨。挑選。明歲來京會試者必多。難概令就挑。從前壬申。辛巳。兩科會試後。挑選新科舉人。不與今擬再扣一科。壬午。乙酉。兩科。俱不准就挑。至現任教職。來京會試舉人。向准就挑。查該員已登仕版。俸滿可陞知縣。且截取時。仍得歸班銓選。應毋庸與挑。通計各省知縣。共一

千二百八十五缺。此內陞調遺缺。准挑選人員題補。乾隆十七年。并二十六年。挑選分發舉人。二年餘。均即用完。明歲就挑人多。數應加增。前次大省四十員。應加二十。中省三十員。加十五。小省二十員。加十。各帶領引見。請旨以知縣教職分用。其分發知縣者。約計不過十之五六。各省陸續請署請補。不至壅滯。其以教職用者。數年內即可得官。其年力已衰。未經入選。願受京銜者。准其具呈。即交派

出揀選大臣。查實奏請賞給。中書科中書等銜。將來即不與截取。再查舉人應選班次。有知縣。直隸州州同。鹽庫等大使。三項。銓例。知縣雙月用五甲。五舉。四捐。三陞。單月用四補。四捐。四甲。四舉。共計雙單月各班內。舉人應得九缺。捐班無人。以舉人抵補。將來捐例人員用完後。其抵捐舉人。改為舉抵班。又可多用人員。直隸州州同。向係專用舉人。後因捐例議准。雙月用二舉。一捐。單月用一補。一舉。

一捐。今請改雙月用四舉。一捐。單月用一應補。一舉。兩班後。用捐納一人。如應補無人。以舉人抵選。鹽庫等大使缺出。向例一補。一捐。應補無人。專用捐班。俟捐納用完後。再將已經截取舉人。帶領二人引見錄用。今請改為一補。一捐。一舉。如應補無人。以舉人抵用。再知縣係舉人應選正途。近各省每以同知州判。知州等員。借補知縣。銓缺更少。嗣後應不准借補。舉人可以多選。向例試用人員。遇該

省陞調遺缺。始准題補。續經奏准。揀選舉人發往各省試用者。不拘陞調缺。概准題補。原係暫行。今例捐知縣用完。陞調缺止補舉人。且或遇部選人員未到。或本省出差陞調縣缺乏人。皆可委署。丞倅等缺出。亦得暫攝。挑發之員。不致守候無期。若概令題補。歸部選缺無幾。截取候選舉人。又多壅滯。嗣後舉人分發各省試用者。仍照舊例。止准題補。陞調遺缺。至挑選人員。以教職銓補者。向俱先行

選用。查學正。教諭。雙月內有陞選。教習。恩拔。副榜等班。單月內有舉人應補。及恩拔。副榜。應補。應選各班。今令挑選舉人。概行壓班。未為允協。請嗣後雙月。用挑選舉人二員。後將班內應用人員。選用一人。單月。將挑選舉人。與應補應選人員輪用。此次疏通之後。二三年內。挑發之員。即可用完。應於會試之期。請旨挑選。從之。○又議奏。伊犁將軍明瑞。阿桂等辦理烏什事務。錯謬。應照例革職。得旨。明

瑞。阿桂。俱著革職。從寬留任。○以上謝圖汗車登多爾濟。為喀爾喀右翼副將軍。○以貝子布彥濟爾噶勒。為瑪什巴圖副盟長。○賑長蘆屬滄州。慶雲。海豐等三場。本年水災。竈民。○豁除江蘇丹徒縣。本年坍江田地二十四頃五十六畝額賦。○壬戌。以太僕寺少卿伊滿。為光祿寺卿。○癸亥。

上詣暢春園。問

皇太后安。○幸圓明園。○甲子。庫倫辦事大臣

瑚圖靈阿。福鼎奏。管理俄羅斯卡座兵丁。公旺沁多爾濟。患病未愈。請派該部落扎薩克固山貝子伊達木扎布。管理從之。○乙丑。上詣暢春園。問

皇太后安。○還宮。○兵部議准。西安將軍新柱等奏稱。西安八旗兵。派往涼州莊浪外存蒙古兵。每佐領下馬甲一百二十名。步甲十二名。滿洲每佐領下馬甲六十名。步甲六名。不。等。蒙古披甲拜唐阿。倍於滿洲。應均齊在滿

洲旗分一體挑選派差。惟咨報丁冊。仍歸蒙古旗分。再八旗另記檔案披甲拜唐阿。蒙古百家保趙家保。二佐領下。各四十餘名。移駐涼州莊浪後。該二佐領下另戶人等甚少。另記檔案各兵。陸續充補綠營。其遺缺挑補不均。應將另記檔案披甲拜唐阿。均齊在八旗。滿洲蒙古旗分。再滿洲蒙古。另戶閒散人等。及漢軍另記檔案各兵。另戶閒散。數亦不均。應并均齊辦理。從之。○命大學士尹繼善教

習庶吉士。○豁除江蘇丹徒縣。乾隆二十八年。坍山坍江田地十六頃十七畝額賦。○旌表守正被戕之江西鉛山縣民林科生妻楊氏。河南太康縣民黃永海妻張氏。○丙寅。上御懋勤殿。勾到河南山東情實罪犯。停決山東斬犯六人。河南絞犯一人。餘六十六人。予勾。○諭。據富僧阿奏稱。齊齊哈爾。呼蘭。二處。本年田禾被水。請借給旗戶。穀一萬二千七百餘石。索倫等銀一千七百餘兩等語。該處

既被水災。若借以銀穀。仍令償還。該旗戶索倫等。不無拮据。著加恩將請借銀穀。全行賞給。不必令其償還。○又諭。據富僧阿奏。本年齊齊哈爾。呼蘭。均被水災。請借給二處官屯壯丁口糧籽種。共米一千三十六石。并請免交額糧等語。著加恩照富僧阿所請。由該處倉儲內借給。其應交糧石。并著加恩豁免。○貸直隸薊州。青縣。靜海。滄州。南皮。慶雲。保安。西寧。豐潤。玉田。易州。萬全。懷安等十三州縣。

本年水災飢民。并緩徵新舊錢糧。○豁除直隸宣化。萬全。懷安等三縣。乾隆二十九年。水衝民地十二頃二十一畝額賦。○豁除江蘇甘泉。阜寧。桃源。銅山。邳州。宿遷。贛榆。徐州。衛等八州縣衛。乾隆二十八年。挖廢民屯河灘學租等田二百六十三頃五十二畝額賦。○丁卯。貸浙江仁和县。錢塘。會稽。蕭山。新昌。寧海。天台。桐廬。分水等九縣場并仁和。浦東。橫浦。三場。台州。杭嚴。二衛所。本年旱災飢民。并緩

徵額賦漕糧有差。○豁除江蘇泰興縣乾隆二十六年。坍沒田地六十八頃四十五畝。額賦。○戊辰。

上御懋勤殿。勾到直隸山西情實罪犯。停決直隸斬犯一人。絞犯一人。山西絞犯三人。餘九十人。予勾。○諭軍機大臣等。楊廷璋等奏。萬州知州廖佑齡。因漁戶在洋網獲鉛觔。親往試探打撈。計獲白鉛一十九萬九千餘觔。照例變價歸公等語。該州知州於漁人網獲白

鉛。聞信即能親往試探。撈獲多觔。尚屬能事。著傳諭楊廷璋。如廖佑齡平日居官尚好。即出具考語。送部引見。○又諭曰。明瑞等奏。稱克復烏什官兵。於閏二月初六日。及六月十八十九。二十。二十九等日。七月二十八日。歷次勦賊圍城。著有勞績。及陣亡得傷之官兵。回人等。遵旨分別等次。造冊送部。請加恩敘卹等語。著加恩。將有功陣亡得傷之官兵。回人等。俱分別議敘。敘議卹。○戶部議准。山東巡

撫崔應階奏。稱准部咨。府倉貯穀。改歸首邑管理。查各府倉穀。濟南。東昌。二府。各五萬石。貯府倉。登萊青三府。額穀五萬石。貯府倉。各二萬石。餘分貯屬縣。曹州府。五萬石。武定。沂州。二府。各二萬石。俱分貯各屬縣。現存府倉者。照部咨辦理。分貯各縣者。搬運腳費繁多。應各循其舊。德州糧道倉。貯穀二萬石。應照府倉例。改歸德州管理。至濟南。萊州。青州等府倉大使。應俱裁。現任之員。咨部以相當之

缺。改補從之。○旌表守正被戕之四川酉陽州民尹子盛媳夏氏。○已已。諭曰。大學士楊應琚。現已准其來京。陞見。陝甘總督印務。著和其衷前往署理。其陝西巡撫事務。即著布政使湯聘暫行護理。該部遵諭速行。○又諭。都察院奏。浙江諸暨縣民錢名標等。控告該縣官吏。將已徵錢糧捏報未完。通同侵蝕一案。著派刑部侍郎四達。馳驛前往。會同該撫秉公查辦。所有隨帶司員。並著馳驛。○諭軍

機大臣等。據馮鈐奏。湖南攸縣等處城垣。久經坍塌。現照安徽事例。勸輸舉行。已據各該縣士民。踴躍捐輸。俟有成數。即可興工等語。該撫辦理此事。失之太躁。已於摺內批示矣。前因安省城垣。急需修理。經該撫託庸聚精會神。經理兩年。工程得以告竣。此事雖無大弊。已不能不致議論。嗣經尹繼善奏請。應修城垣。省分俱宜一律照辦。朕以各省民風土俗。未必相同。因諭令各督撫。將地方實在情形。查明具奏。並諭戶部。於各省奏齊時。彙總籌畫定議。並未令各省遽照安徽事例。輒行勸捐興工也。現在各省已經陸續奏到。戶部正在通覈酌議之時。著傳諭馮鈐。俟部議到日。再行遵照辦理。此時毋庸急於從事。○吏部議准。署江西巡撫明德奏。稱南昌府屬新建縣之吳城鎮。前經奏准。令南康府同知移駐彈壓。該地兵民雜處。習俗刁頑。視同知為隔屬之官。呼應不靈。請將該同知改隸南昌。

府管轄。至南康府同知。所有捕盜之責。應令該府通判兼理。併各換給關防。從之。○禮部奏。

皇太后萬壽聖節慶賀禮儀。得旨。是照例行禮。奉。

皇太后懿旨。今年停止筵宴。○庚午。諭曰。楊應琚奏。巴里坤屯田秋成分數。請予議敘。獎賞等語。著照所請。管屯將弁。俱著交部議敘。兵丁。著賞給一月鹽菜。種地遣犯。著

賞給一月口糧。其効力廢員。綽和岱等。既在屯數年。實心出力。綽和岱家屬。已經移駐伊犁。著加恩。准其前赴伊犁駐防當差。栢靈保。著准其回旗。常際春。著准其回籍。○辛未。

上詣

奉先殿。

壽皇殿行禮。○諭曰。莊有恭奏。靖江縣區書童親仁。侵收花戶米石一案。請令花戶照數重

完。並將失察之知縣熊璫咨部查議等語。此案侵收中飽。在區書童親仁。固屬法無可貸。而花戶等希冀省便。誤託匪人。照例著令重完。亦所應得。但念村野貧農。零星尾欠。若復令其赴倉交納。未免紛煩。著加恩免其重完。該縣熊璫。不能早行覺察。亦難辭咎。但係自行查出稟報。而此項侵蝕米石。情願代賠。亦足示儆。所有應得處分。著加恩寬免。○諭軍機大臣等。宋邦綏奏。宜山縣民韋氏戕死伊翁梁勝立。定擬凌遲處死一摺。此等倫紀攸關案件。於審明之後。一面奏聞。一面即行正法。使兇犯不致稍稽顯戮。以申法紀而快人心。前經降旨甚明。宋邦綏於此等案件。並不照例即行辦理。僅將審擬緣由奏聞請旨。殊不曉事。宋邦綏著傳旨申飭。○是月。直隸總督方觀承奏。今歲豐收。倍於常年。凡可貯米之倉。均應買足。查中關地方。有倉二十間。可貯米一萬二千餘石。喀喇河屯通判所屬之

鞍匠屯。有倉三十間。上年買貯額米一萬石。尚可添貯五千石。又熱河宮倉內。有空廩十間。可貯米七千餘石。張三營宮倉內。有空廩五間。可貯米八千餘石。該兩倉久虛滲漏。已委員修理。共計添米三萬二千石。均在各該處採買。米價自八錢。至一兩不等。再八溝廳產米最廣。每石不過七錢。應請採買二萬石。交該處同知。運赴遵化州收貯。得旨嘉獎。○又奏。山海關駐防官兵。歲需米一萬三千二百石。按年採買支放。仍另行常貯一年米備用。除明歲應用米石。業經動項買足外。今年豐米賤。應請添買一年米常貯。於兵民均有裨益。報聞。○河東河道總督李清時奏。黃河修防各事宜。一。工料稽查宜清。現飭該道將各廳屬內舊存新辦。各料覈實。按照工程平險。分別堆垛。編立號木。註明。并查驗各廳修造土埽工程。如料物短少。工不堅實。即行嚴叅。一。向來各廳埽壩工程。每至伏秋水長。動

工鑲修。既難兼顧。且易浮銷。茲於霜降後。委員赴南北兩岸。會同該廳確勘。或應春修。或俟伏汛。開造工段丈尺確冊。交該道查驗。臣再加確勘。應春修者。即於來歲正月望後興工。限三月完竣。至伏秋大汛。如遇臨河要工。陡塌。即令該廳一面查報丈尺需料確數。一面妥辦。如非急不及待之工。必俟分別估定辦理。一。埽工。向係草土兼用。近日所造埽工。草多土少。每致塌卸。今飭令草土均勻堅實。再拆鑲工段。凡遇頂衝迎溜之處。必須簽釘長椿。方資穩固。豫東向來簽椿之處。頗少。法未盡善。今飭該廳。及守備。選練椿埽熟諳之兵備用。一。向例廳營互相稽查。至効力人員。差赴各廳防工催料。每多虛應故事。今遴委幹員。分駐各廳。除帑料不准經手外。凡該廳屬內汎水消長。溜勢遷移。工程丈尺。用料多寡。取土難易。皆令該員按日稟報。既可驗該員賢否。亦使廳營均有顧忌。得旨。諸凡付妥。

實力為之可也。○四川總督阿爾泰奏。川民不諳紡織。地間產棉。種植失宜。或商販賤售。至江楚成布。運川重售。現飭各屬勸諭鄉民。依法芟鋤。廣招織工。教習土人。并令婦女學織。再查川西南。地少山多。民頗瘠苦。惟種茶獲利。連年飭屬勸諭居民。於該處荒山密菁。悉行開闢。廣種茶樹。現灌縣。汶川。及邛州一帶。漸次繁衍。商民獲利。引課漸增。得旨。嘉獎。

大清高宗法天隆運至誠先覺體元立極敷文奮武孝慈神聖純皇帝實錄卷之七百四十七

大清高宗法天隆運至誠先覺體元立極敷文奮武孝慈神聖純皇帝實錄卷之七百四十八

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆三十年乙酉十一月壬申朔諭曰陸宗

楷現署吏部侍郎其兵部侍郎事務著史奕昂署理○諭軍機大臣等據柏琨奏阿布勒比斯聞烏什事竣差哈薩克沁德睦爾同齊里克齊之弟海林達爾前至喀什噶爾進獻馬匹前因哈薩克阿布賚差人進馬所帶餘馬在喀什噶爾等處貿易曾傳諭永貴哈薩克等在烏魯木齊貿易時馬價極賤若在同疆貿易於烏魯木齊馬價有礙嗣後哈薩克帶馬至回地嚴禁回衆私買須官為經理較

伊犁烏魯木齊多減價值絲毫不令多得仍

曉諭伊等赴伊犁烏魯木齊貿易今阿布勒

比斯等差人進獻馬匹若復在回地貿易柏

琨即遵朕前旨辦理并曉諭伊等現在回疆

諸務俱係伊犁將軍統轄此處斷難接辦將

此傳諭柏琨及各回城駐劄大臣并伊犁將

軍知之○軍機大臣會同工部議覆欽差侍

郎鄂寧伍勒穆集等奏稱潘桃口商人例由

該關監督給票砍伐克什克騰山木將大木

趕運下河抵關納稅其餘細小木植聽在本

地售賣或由張家口商人採買并蒙古砍賣

小木概不徵稅自赫達色等濫行徵稅章程

已紊應請照舊辦理至潘桃口監督原不准

擅至多倫諾爾地方搜查木植但不肖官吏

藉口水貨由旱運透漏濫徵滋擾查張家口

監督但收該處商人旱運木稅潘桃口所收

係下河大木之稅辦理殊屬兩歧請嗣後統

歸張家口監督管理將潘桃口監督裁汰每

年春秋木植採運時該監督親赴大河口稽查將下河大木烙印斧記抵關報稅旱運進口者照張家口則例納稅既易分晰自免滋擾再潘桃口監督所管向有六小口坐落永平府地方離張家口遼遠應歸通永道管理從之○吏部議准山東巡撫崔應階奏稱沂青二府地方遼濶山僻村莊易藏奸匪其毗連蒙陰縣界有東里店民居稠密為適中扼要之地應將沂水縣縣丞移駐該處稽查該

縣丞衙門額設阜役四名不敷差遣應於沂水莒州蒙陰臨朐博山等五縣額設民壯內各撥給四名安邱縣岙山一帶係私鹽出入門戶應設營汛巡防查該縣有把總一外委一應令外委移駐岙山酌撥馬兵三守兵十二臨朐縣之大關銅陵關二處亦係私販來往要地應添二汛大關設兵五銅陵十於通省營鎮內酌撥再汶上縣馬村等集與山楚嘉祥濟寧等處連界離城一百二三十里該縣

稽查難周應令該縣縣丞移駐并稽查坡南鄉之一百三十餘村莊從之○又議准貴州巡撫方世儒奏稱貴州巡撫關防有兼理湖北川東等處地方字樣查向隸楚省之平江青浪偏橋鎮遠石開銅鼓六衛川省之湄潭龍泉甕安餘慶等四縣俱已改隸黔省現隸川楚等省各地方黔省並未管轄應將關防改鑄從之○禮部議覆御史戈濤奏稱鄉會試供給官向係派大宛兩縣縣丞典史四員

分理該員職微任重每辦理周章應責成大宛兩縣知縣辦理其丞尉等員聽該縣自行派委至順天文武鄉試及禮部文會試一切供應俱係順天府委員辦理惟武會試外間係五城兵馬司承辦事體殊未畫一嗣後武會試外間供給統歸順天府辦理再科舉生員錄科後例由各學造冊申送學政彙冊送順天府按冊收卷近學臣欲稽查正案應舉實數以定羅試續取之額因令各生赴京時

投文本學。以憑覈算。查羅試應取之額。歷科可以比照。無須考校驗文。況士子至京投文。先後不一。羅試期迫。難俟投齊開考。續取之額。亦未能豫定。至順天府增添驗文。自上科始。空文不足防弊。易滋書吏需索之端。應將驗文停止。羅試生員。例由該學申送。但人給一文。亦屬瑣屑。應請嗣後凡願應羅試者。令本生先期報名。該學造總冊申送學政。取錄者。總造名冊。知照順天府投卷。均應如所請。

從之。○癸酉。

上御乾清門聽政。○蠲江蘇海州沐陽丹徒丹陽金匱溧陽等六州縣本年水旱災田畝應徵地丁銀米。并緩徵新舊漕糧。漕項及地丁錢糧有差。○甲戌。遣官祭

先醫之神。○

上御懋勤殿。勾到朝審情實罪犯。停決斬犯七人。絞犯十三人。餘二十二人。予勾。○諭曰。莊親王年邁。管理事務太繁。不勝其勞。所管正

黃旗滿洲都統著託恩多調補。託恩多所遺正白旗蒙古都統著永瑋補授。阿桂所遺正紅旗滿洲都統員缺著豐訥亨署理。安泰之鑲黃旗蒙古都統員缺著那親署理。楊廷璋之正紅旗漢軍都統員缺著李侍堯署理。永瑋之鑲藍旗漢軍副都統員缺著范宜宗補授。○乙亥。

上詣暢春園。問

皇太后安。○幸圓明園。○吏部議准。雲貴總督

劉藻等奏稱。滇省曲靖元江武定東川永昌等五府印俱有軍民府字樣。該五府未管軍務亦無營制交涉。應將印文改鑄。從之。○戶部議准。大學士管陝甘總督楊應琚疏稱。哈密設立巡檢。地方事宜。應仍責成哈密廳通判管理。該廳監獄。令巡檢查管。從之。○禮部議覆。御史素爾訥奏稱。鄉會試卷後。例寫添註塗改字數。其無添註塗改者。亦應寫明。以杜弊端。再貢院更道外。即大牆與士子號舍

相近。至公堂外兩旁。更夫來往。並無柵欄。更道南短牆外。即看守貢院人役住房。防閑不密。應將更道南牆築高。密佈荆棘。至公堂外兩旁更道。設立柵欄。派員防守。從之。○丙子。諭曰。倭盛額奏。在京旗人。盛京有房地者。因相隔遼遠。不能親往查看。不肖莊頭私行隱匿典賣。請加治罪等語。此等惡僕。固宜嚴懲。即私行售買。及居間人。亦應一併治罪。但恐不肖之徒。捏故訛詐。亦不可不防。其漸著該

部詳悉定議辦理。○又諭。前兵部引見興漢城守營都司胡虬龍奏及。曾經署理興漢鎮總兵事務。朕以總兵與都司官階懸絕。越次署理。甚屬駭聞。是以降旨詢問。今據楊應琚覆奏。前歲興漢鎮懸缺。即委潼關協副將福寧護理。福寧未到之先。不過令都司代拆代行。並無牌委署理之事等語。胡虬龍捏詞聳聽。實屬綠營浮誕惡習。所有豫保記名之處。著註銷。仍交部議處。至楊應琚因係伊保舉

之員。請一併交部議處。胡虬龍臨時妄奏。非其意料所及。楊應琚著免其交部。○又諭。內外各衙門題奏事件。遇有地名字面。理應遵照全寫。乃向來章疏。祇圖省便。每將地名節稱一字。其謬不可枚舉。如熱河之但稱為熱。多倫諾爾之但稱為諾。則其尤甚者。此皆幕友吏胥。相沿行文陋習。形之奏牘。殊非敬謹入告之體。昨戶部進蠲免海州沐陽積欠本內。輒照原題寫作海屬字樣。內閣亦即照依

票簽。經朕指示改正。今楊應琚奏開渠增墾一摺。稱巴里坤為巴城。亦令增改發鈔矣。前因各該衙門有稱滿洲。蒙古。作滿蒙者。曾經降旨訓飭。此等字面。皆可類推。何竟不知舉一以例三耶。嗣後凡遇地名字面。俱一概全寫。不得競趨簡易。致乖體制。著宣諭內外各衙門知之。○諭軍機大臣等。前據吳達善面奏。提督李勲年老。常向人自稱衰邁。朕恐該提督果係頹憊龍鍾。豈堪復膺專閫之寄。是

以降旨令其來京陛見。昨於行在召對數次。見其精力尚健。迥異所聞。因詢其何以人前稱老之由。據奏。實因年逾七十。雖筋力尚堪。勉而自問。年齒日增。對人合當稱老等語。所奏似屬實情。而細察其精神筋力。尚堪供職。因令仍回原任。吳達善不可因前曾奏其年老。經朕召見。令其復任提督。遂有意避嫌。不加體察。或一兩年後。該提督日就衰頹。不能整飭。竟爾曲為容隱。不即據實奏聞。亦不得

因朕此旨。過事吹求。惟當不設成見。一秉至公。方不負封疆大臣協恭持正之道。至吳達善。今春陛見時。甫由滇至楚。與李勲共事未久。彼此諒無嫌隙。或者因新寧罷市一案。李勲首先具奏。致為湖南地方官所忌。遂於該督入境之初。即有以李勲年老告之者。而該督據以入告。亦未可定。著傳諭吳達善。令其於奏事之便。據實覆奏。尋奏臣前調補來楚。見提督李勲有年逾七十。已經老邁之語。遂

據以入告。地方官實無向臣言者。倘一二年後。提督日就衰頹。斷不敢曲為容隱。亦不敢過事吹求。得旨覽。○軍機大臣等議覆。錦州副都統常在奏稱。錦州義州馬兵。請十分內一分改為步甲。蒙古錫伯。巴爾虎。漢軍。包衣。佐領下之女。照滿洲例。禁止與漢人結親。查錦州義州額設馬兵一千九百四十七名。生齒日繁。生計不無拮据。今通融酌改。勻出數百分錢糧。多養數百戶。亦可多得當差之人。

應如所請。至漢軍每與漢人結親。歷年已久。毋庸禁止。其另戶蒙古錫伯。巴爾虎。佐領下女。俱照滿洲例。從之。○又議覆。庫爾喀喇烏蘇辦事大臣伍彌泰奏稱。特訥格爾城。現非衝要。既無過往官兵。商民又少。所貯米穀。每年支給本莊官兵外。所餘尚多。恐致紅朽。查呼圖畢城。係東往瑪納斯庫爾喀喇烏蘇河伊犁雅爾衡途。若在該處添撥屯兵。多貯米穀。可以接濟過往官兵。且令商人販買。所得

價銀。作為正項錢糧。亦省內地轉運之費。現特訥格爾駐兵六百。留一百屯田。餘移駐呼圖畢。所遺空房。楊應琚招募遣往一千三百戶民內。令分住八百戶。由彼處貯穀內。借給籽種口糧。餘五百戶。令分住羅克倫等處。均應如所請。從之。○大學士管陝甘總督楊應琚奏。巴里坤附近田地漸闢。迤西四十餘里之花莊。抵尖山卡座。沃衍二十餘里。黑溝之水。足資灌溉。舊渠漏沙處。俱經修整。并開新渠一道。由舊渠上流。抵尖山柵口。長三十里。傍山地盡可耕。認墾者聞風趨赴。自二十六年至今。共墾地三萬八千餘畝。得旨欣慰覽之。該部知道。○丁丑。

上奉

皇太后還宮。○詣

皇太后宮問安。○諭曰。李治運之母。現已年老。著令其回籍終養。所遺浙江按察使員缺。著圖桑阿補授。○又諭。戶部議奏。各省修理城

垣事宜。請停止勸捐。其直隸。山東。陝西。浙江。廣西。山西等省。估需不敷銀五百三十一萬餘兩。於該省偶遇水旱不齊之年。該督撫照以工代賑之意。酌量奏請辦理等語。所議停止勸捐之處。頗合朕意。但直隸等六省。應修城工甚多。若俟該省水旱不齊之年。再行奏請以工代賑。未免曠日持久。完工無期而已。經損塌之城垣。愈至艱於修整。據摺內所稱直隸等省不敷銀。不過五百餘萬兩。現在軍需已罷。各省多報有收。正府庫充盈之際。而朕所念者。庫中所存者多。則外間所用者少。即當動撥官帑。俾得流通。而城工亦藉以整齊。且如戶部收捐貢監一項。每年約計可得百餘萬。若以五年為期。即可敷所需之數。著該部按照各該省需用銀數多寡。每年酌撥銀一百萬兩。統計五年。而各省城工。遂可一律告竣。其如何分別省分酌量派撥之處。仍著該部妥議辦理。○旌表守正捐軀之直隸

遷安縣民于可璠妻劉氏。○戊寅。諭向來奉天府尹事務。令盛京將軍兼轄。今思將軍與府尹所屬旗民事件。各有專司。若令將軍節制於公務未免牽掣。莫若照京城侍郎兼管順天府尹之例。於盛京五部侍郎內派出一員管理。永著為令。於體制更為畫一。現在奉天府尹事務。即著雅德兼管。○諭軍機大臣等。理藩院奏稱。扎薩克輔國公旺楚克年老有疾。該將軍奏請開缺。令伊子承襲公爵等

語。旺楚克係扎薩克中舊人。出力多年。如因其年老有疾。將公爵開缺。朕心實為惻然。其爵原應伊子承襲。著仍留伊身。應辦事務。令伊子經理。○又諭曰。熊學鵬奏。鄭謝天現在撥醫調治。俟病痊解往粵省一摺。辦理甚屬非是。已於摺內批示矣。鄭謝天雖以老病告休。其在瓊州副將任內。尚有藥局被轟。經該督叅奏。乃並不在粵靜候查辦。輒自搭船回籍。任意徑行。不知君臣大義。熊學鵬接到該

署督明山咨文。自應持正辦理。且摺內始稱鄭謝天在粵即已患病。既可由粵至浙。何不。可由浙解粵。該撫既見及此。即行派員押解。方得辦事正理。何又惑於李治運之請。僅將伊子鄭文剛等解粵候訊。而鄭謝天則撥醫調治。俟病痊起解。非姑息而何。即使其病果未痊。何妨緩程遞解。顧任其託故遷延。致叅案久懸不結。有是理乎。熊學鵬身任封疆。於此等事件。明知其非理。復徇屬員之意。依違

遷就。殊失大臣公正之道。鄭謝天著即派員解往粵省。熊學鵬著傳旨嚴行申飭。○又諭據戶部議奏。各省修理城垣一摺。其停止勸捐之處。已依議行。城垣捍衛民生。所關綦重。是以不惜帑金。令其上緊興修。以資鞏固。但向來地方官承辦城工。往往浮冒開銷。草率了事。徒費工作。而不能經久。此次特發內帑。一律普修。更非尋常陸續黏補可比。該督撫務須嚴飭。應修城垣之各州縣。確覈估報。實

用實銷。並專派大員。董率經理。覆估覈查。務期工料堅完。足資久遠。毋令不肖有司。糜公帑而飽私橐。以致玩視工程。亦不得僅以結報保固塞責。將來工竣奏報之日。朕當特派大員前往。逐一查驗。如有浮冒草率等弊。惟該督撫是問。前此尹繼善條奏。查驗江省城工事宜。頗為詳盡。著將原摺一併鈔寄閱看。遵照辦理。可將此傳諭各督撫知之。○

泰陵承辦事務輔國公弘眺等奏。

陵寢樹株。應行補種。得旨。

陵寢儀樹。關係重大。必須專派大員經理。方足以昭慎重。

東陵著派公義。

泰陵著派蘇赫訥。實力承辦。以專責成。至此項樹株。定例查明限內回乾者。著落原栽之員賠補。但伊等每以細小樹株。補栽充數。多不能生活繁茂。相沿日久。幾至有名無實。蓋由向來雖有三年保固之例。並未計及限內賠

種。果否長成。亦不查覈所栽樹株圍尺。是否如式。則一屆限外。既可希圖謝責。而限內補種。率皆視為具文。殊非敬謹之道。嗣後回乾補種之樹。應行保固三年者。務覈其實能成活。始准報銷。亦不得聽其以小樹搪塞。倘有仍前因循草率者。惟派出之總管是問。○是日起。

上以冬至祀

天於

園丘。齋戒三日。○己卯。諭軍機大臣等。據高晉奏。託庸欲將安省修城餘剩銀二十七萬餘兩。全撥直隸協濟修城之用。與尹繼善原請撥給江蘇十四萬餘兩之奏不符。請旨遵行等語。安徽捐修餘剩之項。已准尹繼善所奏撥給江蘇十四萬餘兩。以補該省城工不足之數。今若全解直隸。則江蘇又須另為籌辦。況直隸各省城工。現在降旨酌動帑項五百餘萬。分年撥修。更可無需多為協濟。著傳諭

高晉託庸。直隸止須撥銀十萬兩。其撥給江蘇。及酌留安徽備修城工之項。仍照各原奏辦理。並諭莊有恭。方觀承知之。○又諭各省書院延師訓課。向有山長之稱。名義殊為未協。既曰書院。則主講席者。自應稱為院長。著於各督撫奏事之便。傳諭知之。○軍機大臣等議准。西安將軍新柱等奏稱。前派涼州莊浪。滿洲蒙古兵。攜眷駐防伊犁。遷西安兵二千。移駐涼州莊浪。頭起兵各將官房二間交出。其自蓋房盡皆拆賣。致居不聯絡。明歲二三起兵遷移時。其自蓋房禁止折賣。業經賣給旗人。及現今遷移兵。出旗漢軍人等交出空房。俱按該佐領地方。作為官學。并設馬圈。分給家口衆多之兵居住。從之。○刑部奏。舊例職官負罪逃竄。一經拏獲。除應斬決絞決者。無庸另議。餘俱加重治罪。但由笞杖徒流遞加至絞。仍屬法輕易犯。應請嗣後軍流以下等犯。逃脫被獲者。俱改為絞監候。從之。○

庚辰。

上詣

南郊齋宮齋宿。○諭軍機大臣等。明德奏。據廣昌縣知縣李振文稟稱。本年鄉試薦中第一名吳光槐。頭場首藝。係勦襲江南省夏東衡觀風考作等語。已批交部嚴察議奏。但思此案情罪。專在吳光槐。或係懷挾漏網。或係勦襲倖中。必須向吳光槐徹底查究。分別辦理。此時即交部察議。該部亦無從查辦。此摺且不必交部。著該撫將吳光槐親提嚴訊。究其因何鈔襲之故。及有無夾帶情弊。該生於此等刻文。尚能成誦。則其胸中記憶必多。即可令其默寫他文數篇。以別真偽。再嚴加覆試。視其文理何如。若兩者俱不能。即為懷挾無疑。自當照例治罪。縱使實無情弊。而錄舊中式之例。亦應褫革。該撫於審明日另行具摺奏聞。再交部辦理。至聞中校閱文字。止憑文去取。雖有鈔襲之卷。試官豈能徧查來歷。所

有取中吳光槐之主考房官。俱可無庸議處。再該縣李振文出闈後。於取中卷訪有弊竇。自行檢舉。辦事尚屬留心。該員平日居官如何之處。並著該撫一併覆奏。尋江西巡撫明山奏。提訊吳光槐。據供。頭場首藝。係鈔襲讀過考卷。實非懷挾。二三篇及二三場文。均係自作。其餘讀過舊文甚多。皆能默寫。當即將該生扃閉密室。派員監守。令作四書題文。及詩各一首。並默寫舊文數篇。自己刻及申刻。一併交卷。今將原稿進呈。下禮部議。尋議吳光槐覆試文字。尚無疵謬。其中式首藝亦非懷挾。但全錄舊文。濫叨首選。應革去舉人。從之。江蘇巡撫前署江西巡撫明德奏。李振文前任新昌縣知縣。才具明幹。辦事認真。自調任廣昌。頗能整頓地方。民情愛戴。報聞。○辛巳。冬至。祀

天於

圜丘。

上親詣行禮。○遣官祭

永陵

福陵

昭陵

昭西陵

孝陵

孝東陵

景陵

泰陵。○遣官祭

孝賢皇后陵。

端慧皇太子園寢。○詣

皇太后宮問安。○壬午。

上以冬至節。詣

壽康宮行慶賀。

皇太后禮。王大臣於

慈寧門。衆官於午門。行禮。○御太和殿受賀。○

諭軍機大臣等。據蘇昌奏。乍浦同知陳虞盛

等。拏獲海洋匪犯楊廷彩等三十餘名。現在

飛飭臬司。逐一嚴加詰究。分別解江質審。再行設法。關緝逸犯一摺。海洋賊匪。刼竊多案。自應窮盡根株。使海疆寧謐。而現獲各犯。尤當速審嚴懲。以申法紀。該犯等事懸兩省。若彼此分案辦理。押解往來。不獨輾轉需時。難以速結。且恐此等積匪。中途解送。或有疎虞。至現在逸犯。與其專關根緝。亦不若兩省地方官并力協拏。尤為上緊。所有洋匪各案。著浙江巡撫熊學鵬。與江蘇巡撫明德會同查辦。速行嚴審定擬。其未獲各犯。即飭屬密速查拏。毋使一人漏網。所有此案出力獲犯各員。俟審明結案後。分別奏請議叙。著傳諭熊學鵬。明德。并蘇昌。高晉知之。○癸未。

上諭

皇太后宮問安。○幸瀛臺。○諭曰。皇五子永琪年已長成。應予封爵。著封為親王。所有應行典禮。各該衙門察例具奏。○諭軍機大臣等。據阿桂。永貴等奏稱。呼什齊布魯特納喇巴

圖。同額爾德尼。在阿克霍爾罕地方游牧。已札付額爾德尼。令將納喇巴圖獻出。若有別詞推託。即嚴行辦理。又據永貴稱。布魯特習俗甚惡。此等事件。屢經辦理。終不能革其陋習。從前辦理不善。伊難以辭咎。請交部治罪等語。所奏殊屬乖謬。且復取巧。納喇巴圖。應行嚴辦。即當迅速辦理。如有別情。亦當聲明請旨。今阿桂。永貴。同在一處辦事。既聯名具奏。永貴又復自行請罪。特以前奉旨催辦。又恐掣肘。故佯設此法。朕若將永貴交部。則納喇巴圖之事。即可不辦。此皆阿桂之意。特欲嘗試朕耳。此等伎倆。豈能逃朕洞鑒。且納喇巴圖。毫無難辦之處。伊等應先行文。如有別詞。即遣人索取。額爾德尼。焉敢抗違。倘仍復推託。應作何辦理之處。臨時儘可酌定。何必先存畏難之意。從前阿桂辦理伊犁事務。舛謬。朕已格外加恩。今復毫無振作。伊前任侍郎。尚冀擢用尚書。是以諸事奮勉。今已至內

大臣尚書都統又復何求。故凡事不肯實心經理。誠如此居心。朕施恩擢用之職。伊豈能長據乎。至永貴係特旨遣往回疆辦事之人。諸事畏難苟安。復同阿桂取巧嘗試。亦屬不堪。阿桂永貴并著傳旨嚴行申飭。○又諭據阿桂等奏稱。烏什屯田兵八百名。需用農器。在阿克蘇購買。并行知高廷棟將開展所貯鋤鋤等物解送等語。昨楊應琚奏烏魯木齊屯兵一千名。所需農器。就近在開展哈密巴里坤取用。如不敷。由肅州辦往。開展等處所貯農器。既解往烏魯木齊。烏什又復取用。恐有不敷。著傳諭楊應琚。阿桂等。令其會商妥辦。務期不誤。烏什烏魯木齊二處耕作。○甲申聖祖仁皇帝忌辰。遣官祭

景陵。○

上詣

奉先殿

壽皇殿行禮。○諭曰。陳宏謀等奏。覆勘順天山

東山西河南陝西等五省中式試卷。分別應議免議一摺。著照所擬交部辦理。科場取士。原以文體為重。即如單內所舉疵蒙各句。於文風大有關係。此等句。無論唐之韓柳。文章大家。固所擯棄弗道。即前明歸有光黃淳耀等。為制藝專門。亦斷不肯掉以輕心。淺率為此。諸生為文。惟當根柢經史。發揮義理。一以清真雅正為宗。自不致涉筆動多瑕類。試官等亦當精心甄別。勿使魚目混淆。試卷中果有詞句多疵者。自應逐一簽出。按例議處。至摺內所稱盛世玉案等字。原磨勘官因雙單擡寫之處。與程式不符。俱行簽出。經伊等聲請免議。止就現在試卷而言。其實科場禁例。凡遇

廟諱字面。理應恪遵敬避。加意檢點。如有違錯。自難貸其處分。至擡頭小誤。既無關於弊竇。且與文體毫無干礙。而條例所定字樣甚多。如必斷斷較量。曲為指摘。何異吹毛求疵。況

擡頭格式。本無一定。即詞臣所進詩文。尚不能悉合。朕亦從不與之計較。又豈肯於草節下士。風簷寸晷中。過為苛責乎。嗣後此等繁瑣小節。俱著刪除。又如貼例內。有填寫添註塗抹字數等條。立法原因防弊。第闡中弊實惟在司事者實心經理。稽覈精嚴。若必沾沾於此。亦所謂不揣其本而齊其末。徒令衰老之人。往往以疎畧罣誤。亦殊可憫。所有條例內應加刪正之處。並著大學士會同該部。詳悉定議具奏。尋議奏。科場條例內應加刪正各條。一。舊例舉子文體不正者。褫革。疵蒙謬戾者。罰停會試一科。查文體不正者。或顯違格式。或引用怪僻。書理全謬。自屬易見。若疵蒙謬戾。多有影響近似者。在考官固當精擇磨勘。官尤宜慎重別裁。至文內引用諸史子集者。務以平正切當為宗。但語似有本。即應體玩文氣。廣為諮詢。不得輕加訾議。一。例載三擡雙擡各字。應敬謹遵寫。誤者以違式論。

至恩膏德意等字。偶誤單擡。尚非玩褻。應予免議。一。試卷後填寫添註塗改。原防謄錄改易之弊。查例載舉子試卷。塗改過百餘字者。貼出。數十字中。原不能化劣藝為佳構。防弊已極嚴密。不須自為註明。徒使耄年之人。動多罣誤。應即停止。從之。○諭軍機大臣等。柏琨奏。據額爾德尼文稱。商人來往道路。有厄魯特等搶掠。已差人查拏。應覆額爾德尼回文。現與阿桂。永貴等商辦等語。前令伊犁將軍。統轄回疆各城。原為調兵等項大事而言。若事無大小。必文移商酌。耽延誤事。且啟推諉之漸。著傳諭各回城駐劄大臣。嗣後遇有調兵等大事。一面具奏。一面會商伊犁將軍。尋常事件。自行辦理具奏。○又諭曰。成衮扎布等奏。據明噶特鄂拓克人等稱。該扎薩克差務過重。情願附入烏梁海交納貂皮。若照伊等所請。差務太輕。請照辦理。丹拜屬人例。交科布多大臣等管理等語。此項明噶特人

等。若原非博貝屬人。因被勢逼計誘。即照丹拜屬人例辦理。尚無不可。若實係博貝屬人。將伊等移駐科布多。反得倖避差使。且使別部落效尤。此風斷不可長。著成衮扎布徹底查明定議具奏。尋奏。明噶特鄂拓克人等百餘戶。原係博貝屬人。但伊等已與本旗構釁。不便仍留。應交科布多大臣管轄。將彼處喀爾喀兵撤回。令伊等代充差務。從之。○又諭據彰寶題參。違例濫刑之陽曲縣知縣陳玉墀一本。已降旨將該員革職矣。縣令承委覆審案件。理應秉公訊擬。以昭平允。乃陳玉墀將原告之朱正名。惡其上控。肆行責辱。而於被告之鄭良翰。占山盜樹。業經知州方體泰查訊明確之處。轉不細加研鞫。顯有袒護鄭良翰情事。該撫本內。僅以陳玉墀違例濫刑題參。其有無交通徇庇緣由。及此案如何審結。並未奏及。辦理亦未周到。著傳諭彰寶。令其再行詳悉查訊。據實覆奏。尋奏。朱正名等

控告劣生鄭良翰等盜伐五臺山下堡子山樹八十餘株。當委陽曲縣知縣陳玉墀審訊。該縣將朱正名掌責。旋即物故。當即查問陳玉墀。因何擅責。據供。因朱正名恃老上控。係一時暴戾。實無袒護私心。當即將陳玉墀題參革職。其鄭良翰等。已自認占山盜樹。並無私行求託之事。應照例問擬杖徒。餘犯俱分別治罪如律。報聞。○乙酉。諭曰。吏部尚書傅森。宣力有年。齒臻耆耄。現以患病請假。行走維艱。著授為內大臣。俾得在家從容頤養。所遺員缺。著託恩多調補。兵部尚書員缺。著託庸補授。馮鈐著調補安徽巡撫。李因培著調補湖南巡撫。其湖北巡撫員缺。著湯聘補授。李因培速赴湖南新任。其湖北巡撫印務。著交與總督吳達善兼署。馮鈐俟李因培到任後。即赴安徽新任。託庸俟馮鈐到任後。再行來京供職。託恩多仍暫管兵部。俟託庸來京後。再到吏部新任。湯聘現在護理陝西巡撫

印務俟和其衷回任後再赴湖北之任。○又諭曰。錢琦之母現已年老。四川路途遙遠。未獲迎養。著加恩調補江西布政使。俾得就近侍奉。其四川布政使員缺。著張逢堯補授。○調安徽布政使程壽為陝西布政使。以山東按察使富尼漢為安徽布政使。山西冀寧道富勒渾為山東按察使。○丙戌。諭軍機大臣等。烏什乃回疆著名大城。住回衆甚夥。逆回搶奪倉庫。應有藏匿米穀餉銀等物。明瑞。阿桂等。收復烏什城池。即應盤查。彼時朕若降旨詢問。似以盤查俘獲為要務。且意其徐當查奏。何以延至數月。并未奏及。從前平定準噶爾時。即查明俘獲諸物。或解京。或入官。今何以不照前次辦理。官兵所得。係回衆物件。自可聽其入己。如係官項銀兩。即當查出。明瑞。阿桂。辦理烏什事務。一切不能妥協。若謂如此大城。竟無物件。將誰欺乎。從前霍集斯將伊金銀等物。盡留烏什。後乃互相抵賴。由

此觀之。不可謂烏什回衆無物也。明瑞。阿桂。究係如何辦理之處。著即明白回奏。

大清高宗法天隆運至誠先覺體元立極敷文奮武孝慈神聖純皇帝實錄卷之七百四十八

大清高宗法天隆運至誠先覺體元立極敷文奮武孝慈神聖純皇帝實錄卷之七百四十九

監修總裁官經筵講官太子太傅文淵閣大學士文淵閣領閣事領銜內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆三十年乙酉十一月丁亥

上詣

皇太后宮問安。○幸瀛臺。○諭據理藩院奏輝特屬人習於耕作請編為一佐領頒給扎薩克印信令其交納貢賦等語著照所請鑄給印信交台吉拉克沁噶拉掌管附入巴勒達爾盟內伊等歸附未久著照杜爾伯特扎哈沁之例交納貢賦。○刑部奏奉信郡王如松轎夫犯賭經部提審該王府長史安圖不即交出并捏稱該犯脫逃請將安圖交部議處

并将如松交宗人府察議得旨安圖著革職拏交刑部審擬治罪如松縱容轎夫犯賭已有應得之咎乃於刑部傳喚賭犯復隱匿不即交出且安圖赴部捏稱脫逃伊豈有不知之理甚屬不合如松不必在乾清門行走仍交與宗人府嚴加議處。○又諭曰五吉縱容轎夫聚賭著交部嚴加議處。○戊子

上御乾清門聽政。○己丑諭曰王大臣等擡轎人夫聚賭博其風甚陋前經嚴禁今信郡王如松尚書五吉因擡轎人夫賭博朕另降諭旨將如松五吉議處王等擡轎之人與大臣擡轎之人必須雇覓者難以類比王等俱有包衣名色官屬人等擡轎所用無幾儘可於此輩選用況王等之分例所得藍甲甚多即分藍甲之錢糧與伊等擡轎食用或用伊等包衣人等毋庸另覓人夫二者皆為有益但王等惟計省儉藍甲之錢糧雇覓人夫應用而雇覓之夫又不多給工價再王府甚

深。如有此等賭博之事。誰能進其角門拏緝耶。嗣後若欲坐轎。俱用伊等包衣之人。不可雇夫。即如和親王。簡親王。即用伊等包衣人等擡轎。有何不可。若欲省儉。即騎馬亦可。又可學習武藝。所有坐轎之大臣。亦必俱各嚴飭所雇人夫。禁止賭博。若仍有此賭博之事。朕必嚴加治罪。斷不寬恕。著交步軍統領衙門嚴查。一遇此等。即行參奏。○旌表守正捐軀之江西臨川縣民劉勝隴妻陳氏。○庚寅。

諭伊犁領隊大臣無多。富虎著授為領隊大臣。攜眷前往伊犁駐劄。○又諭恰克圖貿易一事。近因俄羅斯不遵舊制。違背禁約。甚且多收貨稅。苦累商人。是以降旨停止。原以俟其自知悔過。抒誠祈請。再准其通商貿易。恐桑寨多爾濟身係蒙古。未能深曉事宜。復派大臣前往稽查彈壓。協同辦理。其所以責成者甚重。當桑寨多爾濟起意私通交易時。丑達係特派大臣。理應正言阻止。阻之不從。即

應據實參奏。乃不惟不行阻止。參奏。並且通同舞弊。貿易多次。覈其贓私。竟至數千兩之多。藐法營私。殊出情理之外。及經拏解來京。尚敢冀稽顯戮。在途延捱。負恩喪心。實屬可惡。此斷不可以一日容留。丑達已依議正法。至額爾經額。係隨往司員。若丑達等恪遵禁令。嚴絕貿易。則額爾經額。決不敢自行罔利。其情罪較丑達稍輕。是以改為應斬監候。此中輕重權衡。朕惟一秉至公。毫無成見。期協乎情罪之至當而已。可將此曉諭中外。并軍營辦事大臣知之。○諭軍機大臣等。明瑞等奏稱。前奉旨將烏什回衆。解往內地。賞給大臣官員為奴。此項回衆。俱係附逆之人。沿途逃竄盜竊。恐解往內地。滋生事端。因將回衆二千三百餘名。盡行正法。至分解回衆路費。前奉旨令臣等賠交。今應如何分賠。請旨遵行等語。前因明瑞、阿桂等辦理烏什回衆。姑息從事。是以降旨申飭。并令賠繳路費。今盡

誅回衆尚屬無罪。但已無需用路費之處。復請示如何賠交。看來明瑞等將回衆盡誅。竟因路費起見。殊屬不堪。即如收烏什城時。所有庫貯米銀等物。皆當搜查。乃並未經理。而於此等小處用心。是何意見。前已降旨查問烏什倉貯。著再傳諭明瑞。阿桂等令其即速奏聞。○察哈爾都統巴爾品奏。京城八旗官馬出牧。例派在京副都統二員。察哈爾副都統一員。太僕寺兩翼總管二員。察哈爾乾清門侍衛二員。叅領。副叅領。二員。管理查官馬共六萬餘匹。出廠時。俱係察哈爾官兵牧放。應即選察哈爾叅領。副叅領。二員。管理兩翼總管。停派從之。○辛卯。

上詣

皇太后宮問安。○幸瀛臺。○諭曰。書通阿年已老邁。著留京。其三姓副都統員缺。著福珠禮調補。所遺吉林烏拉副都統員缺。著永安補授。○禮部議准。本部侍郎德保奏稱。江西省

經房卷數。書經春秋禮記不甚相遠。惟易經一千七百餘卷。詩經四千五百餘卷。易經四房。每房分校四百餘卷。詩經五房。每房九百餘卷。多寡懸殊。目力恐有不給。應將易經裁去一房。添入詩經從之。○加賑山東章邱鄒平齊河濟陽臨邑長清德平惠民青城陽信海豐樂陵商河濱州利津霑化蒲臺高苑等十八州縣。本年水災飢民。并緩徵新舊錢糧。○賑甘肅河州狄道隴西涇州安化寧州永昌平番中衛巴燕戎格廳西寧碾伯等十二廳州縣。本年水雹霜災飢民。并蠲應徵錢糧。緩徵狄道渭源金縣岷州秦州靜寧正寧靈州碾伯大通等十廳州縣。本年額賦及舊欠錢糧。○山東巡撫崔應階疏報。新城汶上臨淄壽光等四縣。乾隆二十八年開墾水田八十五頃九十八畝有奇。○壬辰。封皇五子永琪為和碩榮親王。○以寧夏將軍達色為正藍旗蒙古都統。○癸巳。諭軍機大臣等新疆

赴京沿途設立臺站。凡遞解人犯及齎送進京物件。自應按站傳送。以免遲誤。乃近如阿克蘇遞解丑達到京。甚屬遲延。即新疆各處齎送物件。亦多有愆期者。此必解送之員。任意逗留。新疆臺站。皆陝甘總督所轄。著楊應琚通飭沿途。嚴行查察。嗣後遇有解京物件。及遞送人犯。隨到即行應付。不得任其託故疎誤。亦不得因有此旨。致奉差官役。借端矯枉過正。騷擾地方。及任意馳騁。傷損驛馬。此

事總責成該督楊應琚。隨時留心稽察妥辦。并傳諭新疆各城辦事大臣。及經過地方各督撫知之。○又諭曰。阿桂等為索取納喇巴圖。將付額爾德尼文。及額敏和卓與額爾德尼書鈔錄具奏。阿桂等所辦。又復姑息。伊等行文額爾德尼。應嚴厲其詞。乃僅謂納喇巴圖。不可容留。有似祈求。額爾德尼豈肯聽命。且既已行文。何必令額敏和卓寄書。伊書內稱將軍欲帶兵前往。經伊阻止。不但伊等不

知畏懼。且啓驕蹇之意。於事何益。著傳旨嚴行申飭。一切遵朕前旨辦理。○以正藍旗蒙古都統達色。署正白旗領侍衛內大臣。○以直隸古北口提督永泰為寧夏將軍。○換給洮岷營副將。岷州舊洮文縣西固保安等營都司。階州鞏昌循化等營遊擊各關防。及起臺堡守備條記。從大學士管陝甘總督楊應琚請也。○山東巡撫崔應階疏報。新城壽光等縣。乾隆二十九年開墾水田七頃八畝有

奇。○甲午。諭宗人府奏。請將右宗正如松革職。并革去王爵。如松著革職。其應革王爵之處。著加恩寬免。○又諭曰。普福來京召對。據奏在籍御史蔣和寧。以起復進京。親自投謁。欲其諭令衆商攸助等語。紳宦來往淮揚。自向商人求助。已屬可鄙。若欲借本管上司勢力以相要挾。更於功令有關。此等惡習。向來原所不免。但未經敗露。已往姑弗深究。前此即稍有所聞。亦僅微示儆戒。使其人自知愧

悔。茲當變政更換之時。即有乘機干謁之事。此風斷不可長。況蔣和寧身為御史。律已宜嚴。益當遠嫌自愛。乃竟卑求鹽政。希藉吹噓。沾潤。尤屬卑鄙。蔣和寧著交部嚴加議處。不知者或謂普福與交好之人。則為之掩護隱諱。而蔣和寧與伊不甚契洽。故爾奏及果爾。則在京御史。豈無風聞。不妨指名叅奏。即該鹽政亦更知所顧畏。著將此通諭知之。○諭軍機大臣等。據阿桂等奏稱。審明回犯呢雅斯。即行正法。阿什默特等犯。請分別辦理等語。阿什默特受朕殊恩。賞給公爵。補授大伯克。乃附從逆酋霍集占。又用呢雅斯滋擾回衆。著將阿什默特并伊妻子解京候旨。呢雅斯之子赫伊雅斯及回人瑪瑪底敏。教唆阿什默特妄為罪實難逭。著將伊二人并其妻女及呢雅斯諸子俱解京。分賞王大臣。圖拉葉密錫愛資雅爾。捏稱拍爾渾為霍集占之子。與愛資贊霍卓拉克。惑衆圖利。情殊可惡。

俱著革去伯克。并伊妻子解京。分賞王大臣。其餘無干人等。不必究辦。著傳諭阿桂。永貴等。遵照辦理。○吏部議奏。理藩院尚書五吉。轎夫聚賭。不行約束。又向步軍協尉囑託。實屬知情故縱。應照例革職。得旨。五吉著革職。○以西安將軍新桂。為理藩院尚書。調江寧將軍容保。為西安將軍。以成都副都統富椿。為江寧將軍。四川松潘鎮總兵訖雲。為成都副都統。○調貴州提督馮哲。為直隸古北口提督。以貴州古州鎮總兵譚五格。為貴州提督。○調貴州鎮遠鎮總兵諾倫。為古州鎮總兵。以廣西慶遠協副將李連仲。為鎮遠鎮總兵。調四川重慶鎮總兵德興。為松潘鎮總兵。以靖遠協副將達興阿。為重慶鎮總兵。○乙未。

上詣

皇太后宮問安。○丙申。

皇太后萬壽節。遣官祭。

太廟後殿○

上詣

壽康宮行慶賀

皇太后禮王大臣於

慈寧門衆官於午門行禮○奉

皇太后幸壽安宮侍宴○諭現今富虎攜

帶家口前往伊犁著施恩賞給銀一百五十

兩收拾行裝即行起程○丁酉

上詣

皇太后宮問安○幸瀛臺○工部議奏潘桃口

木稅事務歸併張家口監督管理一切章程

應令口北道會同該監督即赴多倫諾爾確

查情形辦理得旨著觀音保前赴多倫諾爾

會同定議辦理○戊戌軍機大臣等議覆直

隸天津副都統富當阿等奏稱前經噶爾錫

等奏准天津水師營兵三千名裁減五百遇

甲缺出由天津八旗滿洲蒙古三十二佐領

兵數內挑補不拘旗分佐領今缺已裁完應

照原奏辦理惟領催前鋒請按旗分佐領勻

挑等語應如所請但滿洲蒙古甲缺向有區

別應令該都統各按旗分挑補從之○己亥

諭前經降旨命阿桂至伊犁更換明瑞不必

來京俱在伊犁候旨明瑞阿桂二人何必同

在一處安泰在雅爾地方曾染患病症阿桂

著即赴雅爾更換安泰來京○又諭據楊應

琚奏甘省蘭山書院於去歲延請丁憂在籍

之府丞史茂來主講席一摺此甚非是史茂

係回籍守制之員理應閉戶家居以盡三年

之禮至讀禮之餘或在家課訓子弟自屬分

所應為古人尚有廬墓終制者即不能取法

亦當杜守里門若竟住居省會書院教授生

徒與地方官長賓主應酬則與居官何異此

不過冀得膏火以資贍給遂置禮制於不問

微特人子之心難安其又何以為多士表率

乎督撫有維持風教之責搢紳中績學砥行

足備師資者諒不乏人何必令丁憂人員覲

居講席。是應聘者固不能以禮自處。而延請之地方大吏。亦復不能以禮處人。於風俗士習。頗有關係。恐他省不無類此者。特為明切曉示。通諭知之。○又諭。據安泰等奏稱。雅爾地方。今歲豐收。統計兵丁每名各得細糧一十一石有奇。與從前議敘賞賚之例相符。請將副將吳士勝。及管屯之員。交部議敘。兵丁各賞一月鹽菜銀兩等語。雅爾地方。今歲甫行墾種地畝。而兵丁每名。即各收穫細糧一十一石有奇。副將吳士勝。及管屯各官。俱著交部議敘。兵丁等每名各賞給一月鹽菜銀兩。○諭軍機大臣等。明瑞。阿桂等。奏查出解往伊犁。回衆各物件。賞給出力兵丁銀四百餘兩。歸併房租銀備用等語。即此益知從前收復烏什城時。未將城內所有各物查奏。甚屬錯謬矣。解往伊犁之回人無多。尚有物件銀兩。烏什城內。豈無官項錢糧。明係收復城池時。任官兵搶掠。此次解往伊犁。回衆各物。

件。又恣官兵搶奪。知其不可隱瞞。始行陳奏。此等事。向不具奏。乃沾沾及此。明瑞。阿桂。何糊塗至是。至所稱查出回衆等物。賞給官兵尤屬非是。伊等不過押解回衆。前赴伊犁而已。有何格外出力之處。復需獎賞乎。著傳諭明瑞。阿桂。令其明白回奏。○又諭曰。明瑞。阿桂。收復烏什城時。並未奏及搜查城內物件。甚不妥協。今令阿桂前往雅爾。更換安泰來京。著將節次訓飭阿桂之旨。鈔寄安泰閱看。令其路過伊犁時。即向伊等詢問。諒伊等未肯吐實。安泰留意訪查。其未經查辦。究係何故。想屬下人必有議論。伊等有無隱匿情弊。或官兵恣意搶奪。伊等不能約束。務得確據。即速馳驛來京。明白面奏。○以理藩院尚書新桂。為正紅旗蒙古都統。○庚子。

上詣

皇太后宮問安。○幸瀛臺。○正紅旗滿洲都統簡親王豐訥。亨等議奏。承襲佐領各條例一。

原立佐領長支子孫承襲缺出。應揀選出缺人子孫擬正。別支子孫曾經承襲者擬陪。其餘各支。毋論曾經承襲與否。每支揀選一人列名。若別支承襲缺出。應令出缺人子孫擬正。長支子孫有曾經承襲者。揀選擬陪。其餘毋論曾經承襲與否。一同揀選列名。如長支未經承襲。即選曾承襲之子孫擬陪。長支及未承襲之別支子孫。一同揀選列名。別支子孫。若俱未承襲。應選長支子孫擬陪。其餘列名。若長支子孫承襲缺出。或絕嗣。或緣事革退。其子孫不應承襲者。仍於長支子孫內揀選擬正。別支出缺人。或絕嗣。或緣事革退。其子孫不應承襲者。應由長支內曾經承襲者揀選擬正。若未經承襲。或現有承襲佐領者。俱不與選。令別支曾經承襲之子孫擬正。若俱未承襲。仍選出缺本支子孫擬正。現有承襲佐領者。亦無庸與選。即選無佐領支內子孫擬正。出缺支內揀選擬陪列名。其餘承襲

世職。均應照此辦理。至原官子孫襲職後。復以勞績得官。承襲原官。應止令擬陪。一優異世管佐領。係著有勞績。與尋常世管佐領有間。除止經原立佐領子孫承襲者。仍照舊例辦理外。其原佐領兄弟承襲缺出。應令原立佐領之子孫擬正。出缺人子孫擬陪。其餘列名。再如正白旗滿洲那翰太。那林明書三佐領。初立佐領時。原非優異。至伊弟承襲後。始定為優異佐領。此等缺出。若止令出缺人子孫擬正。則原立佐領子孫。轉不得襲。應仍令原立佐領子孫擬正。出缺人子孫擬陪。一原立佐領有子孫。而其缺為伊兄弟伯叔祖之子孫。及遠族承襲者。與勲舊世管等佐領有間。其缺出。應令出缺人子孫擬正。選原立佐領子孫擬陪。其餘列名。若出缺人或絕嗣。或緣事革退。其子孫不應承襲者。佐領既非伊祖父所立。即別有子孫。應止令擬陪。選原立佐領子孫擬正。若原立佐領子孫承襲缺出。

令伊子孫擬正。襲佐領之胞兄弟伯叔子孫擬陪。其餘列名。若有二三佐領。俱係原立佐領子孫承襲。即令出缺人子孫擬正。若現有承襲佐領。即選無佐領支內子孫擬正。曾經承襲之胞兄弟伯叔子孫擬陪。其餘列名。若有二三佐領。俱係原立佐領胞兄弟伯叔之子孫承襲。缺出。應令原立佐領子孫擬正。出缺人子孫擬陪。其餘列名。原立佐領有子孫而缺為遠族子孫承襲者。應揀選原立佐領

子孫。及曾經承襲之胞兄弟伯叔子孫擬正擬陪。其餘列名。此等佐領。若止存一支。仍照本人子孫承襲例辦理。原立佐領絕嗣。應令伊胞兄弟子孫擬正。如無胞兄弟子孫。親伯叔子孫擬正。如胞兄弟伯叔子孫止有一支。照本人子孫承襲例辦理。若有二三支。應將出缺人子孫擬正。曾經承襲之子孫擬陪。其餘列名。原立佐領之兄弟伯叔有子孫而缺係伯叔祖子孫承襲者。出缺時。仍選原立

佐領兄弟伯叔子孫擬正。曾襲佐領之子孫擬陪。列名。若原立佐領兄弟伯叔之子孫未經承襲。仍令列名。若原立佐領絕嗣。其兄弟伯叔之子孫亦絕嗣。向係伯叔祖子孫承襲者。應令出缺人子孫擬正。由無佐領支派內揀選擬陪。其餘列名。若二三佐領。俱係一支承襲。缺出。選無佐領支子孫擬正擬陪。出缺本支。及別支遠支子孫列名。若原立佐領絕嗣。別支承襲。惟存一支者。應令承襲之人。為原立佐領承祀。永久勿替。一兄弟一同率屬來歸。編設佐領。子孫俱有承襲之分。若有二三支者。應將出缺人子孫擬正。無佐領支子孫擬陪。有佐領支子孫列名。若佐領俱係一人子孫承襲。缺出時。應選無佐領支子孫擬正擬陪。現襲佐領之支列名。若二三四支。僅一佐領。應令出缺人子孫擬正。餘支子孫擬陪。列名。若出缺人無嗣。仍於本支內揀選擬正。若緣事革退。其子孫不應承襲者。本支雖

有子孫止令擬陪由無佐領別支內揀選擬正原立佐領胞兄弟伯叔子孫曾有承襲者擬陪其餘列名又有原係二半佐領歸併一佐領因人丁生息分為二佐領者亦應照率屬來歸佐領例辦理原襲半佐領如無嗣胞兄弟子孫無論曾經承襲與否均應照此例一。一族之人原附遠族人佐領下後因本支人及百數編設佐領缺出時應令出缺人子孫擬正同族子孫擬陪列名至盛京吉林黑龍江察哈爾等世職佐領并請照新例辦理從之○辛丑吏部議准兩廣總督楊廷璋奏稱廣東韶州惠州肇慶高州瓊州等五府倉大使均屬閒員瓊州倉大使兼管雷瓊道庫應改為該道庫大使高廉道庫向無專員稽查應改高州倉大使為高廉道庫大使餘俱裁從之○是月湖北巡撫調任湖南巡撫李因培奏滇省銅船至湖北境自宜昌府屬巴東縣萬流塘起至東湖縣止江流湍急峽灘

鱗列遇有銅鉛沉溺銅包隨浪旋流急雇鉤手尚可取獲若沉入江底亂石內水摸難施江陵縣一帶江濶水平又無亂石水摸易於為力但伊等潛謀分潤積弊已久應設法防範請飭沿江州縣遇銅鉛沉失即一面赴勘一面代雇水摸并委捕巡一員帶兵役前往協同運員家丁督率防範倘有私賣即嚴拏治罪如別經發覺將該員查叅得旨此應實力妥辦者毋論弊竇叢生即實係沉沒亦覺物力可惜也南省亦應有類此者一體留心可也○大學士管陝甘總督楊應琚奏巴里坤額支兵丁本色糧石向以該處不種細糧止支青稞二千石餘每石折給銀二兩二錢長途撥運需費浩繁後奏請試種豌豆小麥均已成熟因視每年屯穫盈縮改支本色折價遞減今歲更為豐稔邊儲充裕因就該處鎮標兵糧內撥小麥三千石豌豆二千石既免兵丁折買之難更省折價銀一萬五千四

百兩得旨嘉獎。○雲貴總督劉藻雲南巡撫常鈞等奏各省常平倉貯缺額。例以收捐監穀補足。查滇省通都大邑。及有銅鉛鑛廠。聚集多人之處。米價常昂。青黃不接時。必需減價多糶倉穀。秋成亦復價昂。艱於買補。加以捐監人少。倉儲多缺。偏僻州縣人少米賤。春間無須多糶。秋成易於買補。報捐之穀。陳陳相因。有紅朽之虞。現通融酌辦。凡米貴處應補缺額。撥附近州縣盈餘監穀抵補。所存價銀解司庫歸監穀原款。合運腳覈計。較穀貴處買補之價尚減。且監穀糶價多有盈餘。即以此項銀支銷運費。得旨甚妥。

大清高宗法天隆運至誠先覺體元立極敷文奮武孝慈神聖純皇帝實錄卷之七百四十九

大清高宗法天隆運至誠先覺體元立極敷文奮武孝慈神聖純皇帝實錄卷之七百五十

監修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆三十年乙酉十二月壬寅朔禮部議准

廣西巡撫宋邦綏學政葉觀國等奏稱各學進額及廩缺應視人文優劣量為增減永寧河池左州養利等州應各減進額三名武緣縣進額十五名應增五名崇善縣進額四名應增四名梧州府學原額十五名應增三名懷遠遷江二縣廩缺各四十應各減四缺上林北流二縣廩缺各十二應各增四缺從之
○癸卯

上詣

皇太后宮問安○幸瀛臺○兵部議准署兩廣總督楊廷璋奏稱粵東西各營惟南村汛守備有三年無盜保題之例該汛非邊地苗疆可比不應獨邀倖進之階應停止從之○甲辰禮部先期奏乾隆三十一年元旦慶賀禮儀得旨是照例行禮奉

皇太后懿旨停止筵宴○乙巳

上御乾清門聽政○諭前據都察院奏浙江諸暨縣民人錢名標等呈控該縣官吏將已徵錢糧捏報未完通同侵蝕一案朕特派刑部侍郎四達前往會同熊學鵬審理今據奏到先有諸暨縣生員陳駒赴巡撫衙門控告經該撫熊學鵬飭委紹興府知府高象震審係妄控該撫以所訊未確復行委員會審等語高象震審理此案不無迴護徇庇之處著即解任質審至該縣黃汝亮適在此案發覺之際不前不後告病回籍其中顯有情弊黃汝亮著革職拏問交原籍地方官解赴浙省與

案內有名犯証。一併審擬具奏。○諭軍機大臣等。浙江諸暨縣民人錢名標等。控告該縣官吏。將已徵錢糧捏報未完。通同侵蝕一案。現據四達等覆奏。原任諸暨縣告病回籍。知縣黃汝亮。應到案質審。業經飛提等語。該員不前不後。適在此案發覺之時。告病回籍。其中顯有情弊。已有旨將伊革職拏問。著該撫明山。飭委委員沿途小心防範。即速鎖解往浙省候訊。毋得令其兔脫。或畏罪自戕。○又

諭曰。明瑞等奏稱。哈薩克霍集伯爾根帶兵千名。越境居住。伍岱帶兵將霍集伯爾根等擒獲。罰其牲畜。復將衆哈薩克牲畜。一併收取等語。前據安泰奏。霍集伯爾根等恃強內徙。伍岱將伊擒獲。收取馬匹。霍集伯爾根等恐懼。請命痛加訓飭。遣回。朕以伍岱辦理妥協可嘉。已交部議敘。并賞給大緞。今覽明瑞等奏。似覺伍岱多事。近來辦事之人。過於姑息者多。過於勇往者常少。然亦有以區區勞

績。張大其詞者。如霍集伯爾根果係恃強內徙。伍岱乘其不備。前往擒獲。收取牲畜。甚合機宜。即闌入游牧。非有他意。伍岱將伊擒獲。亦無不可。若賺之內徙。擒拏以為己功。則是邀功妄奏。此事務必徹底查明。始可定其功罪。前令阿桂前赴雅爾。更換安泰來京。諒安泰此時尚未起程。著傳諭阿桂。安泰將此事徹底查明。據實奏聞。後安泰再由伊犁來京。并著傳諭明瑞等知之。○以輔國公永瑋為

宗人府右宗正。○丙午。

上御太和殿視朝。文武陞轉各官謝恩。○詣皇太后宮問安。○諭據鑲黃旗滿洲都統奏稱。坐臺筆帖式烏登額病故。所有長支盤費銀兩。伊子無力交還。亦無家產可抵。請由伊胞姪德元等錢糧內坐扣等語。烏登額所欠銀兩。著加恩寬免。此項盤費銀兩。原應按月支給。若不豫支。何至拖累伊等子孫。此皆該管大臣官員等辦理錯誤。嗣後此項銀兩。有豫

吏不能交還者俱著落該管大臣官員等賠補將此通行曉諭駐劄辦事大臣等知之○

丁未。

孝惠章皇后忌辰遣官祭

孝東陵○諭軍機大臣等周琬平日情性乖張妄自尊大而歸州盜犯張洪順一案辦理錯誤因將伊發往伊犁効力贖罪但此案情節係愛必達始終迴護所致周琬止有前案率行批結之咎後案則與伊無涉使周琬在巡撫任日久充其剛愎乖謬之伎倆其匿非護短未必不更甚於愛必達然就此案而論周琬究係離任之員情罪較愛必達稍為輕減且發遣已二年餘應加恩釋放回籍但其為人究難深信或在遣所私有記撰語涉怨尤亦未可知安泰現在前往伊犁可密至周琬住處嚴行搜查如其並無怨望字蹟即令明瑞將伊放回并將此旨傳示周琬俾知朕於臣工賞罰一秉大公而其人之優劣罪之輕

重皆洞鑒其情處以至當若有顯然背謬字蹟則是怙惡不悛罪無可逭著一面奏聞一面即行正法亦將此旨傳示於彼俾知朕雖加恩罪仍由彼自取倘字句介在疑似之間安泰未能明晰即將周琬拘禁該處以所有字蹟封固進呈候旨定奪周琬原係朕令明瑞管束之人前曾傳諭明瑞令其將周琬有無怨言字蹟之處查明覆奏安泰如恐查出字蹟與明瑞有礙因此心存瞻顧不據實辦理目前即可掩飾日後必致敗露試問安泰能當此罪名耶可將此傳諭安泰知之○禮部奏順天等五省中式試卷磨勘各官及覆勘大臣並無挂漏者例應議敘得旨磨勘各官有無遺漏經覆勘大臣指出分別議處議敘自屬允當至覆勘大臣所閱各卷設再派大臣檢閱亦難保其必無挂漏但以覆勘為不足憑更復需人詳看輾轉吹求勢將何所底止今覆勘大臣既無人復加覈勘其中即

有挂漏亦何由而知是功與過皆無可論既無議處則何必予以議敘耶嗣後覆勘大臣議敘之例不必行○戊申諭曰阿桂此次辦理烏什地方甚無章程暫且不必來京所有工部尚書員缺著蘊著補授蘊著所遺綏遠城將軍員缺著嵩椿補授○又諭曰副都統書泰前往葉爾羌已滿三年著令其回京○戶部奏派撥各省修理城工銀兩開單呈覽得旨此項興修城垣費繁工鉅朕特發庫帑以期辦理迅速各該督撫務飭屬悉心經理俾工程鞏固帑歸實用並著遴委道府大員或藩臬兩司分管督辦以專責成其派出之員即行指名具摺奏聞將來奏報工竣後朕當特派大臣前往查驗如有浮冒開銷草率了事及藉工擾累等弊惟派出督辦之員是問即各該督撫亦難辭咎○賑貸甘肅紅水靖遠會寧山丹東樂武成永昌鎮番古浪平番中衛等十一縣本年旱災飢民并蠲應徵

額賦緩徵蠲剩及舊欠錢糧有差○己酉上詣大高殿行禮○旌表守正被戕之河南新鄉縣民馬良妻王氏○庚戌上詣皇太后宮問安○諭直隸二十六年以前被災積欠銀糧疊經降旨加恩豁免而霸州固安永清三州縣屯戶領糧及隨帶地畝應交未完租穀未經與民地一併予豁伊等所種地畝即與民地相連邇年雖屬豐收而新舊並徵屯民生計未免拮据所有霸州固安永清三州縣屯戶及為民屯戶未完二十四二十六兩年租穀八百餘石著一體加恩豁免該部遵諭速行○命工部尚書蘊著正藍旗蒙古都統達色俱在紫禁城騎馬○辛亥諭軍機大臣等聞佛郎機亞國百姓專治外科其人於今歲到廣東在佛郎機行內郎世寧等稱其願來京居住著該督楊廷璋即派員照

看由驛送京。但不可令其驚懼。○又諭據劉藻等奏鄧川州民饒宗正毆父致死一案請候硃批到日正法等語。所辦非是。茂倫重犯原屬決不待時。該督撫等自應遵照原奉諭旨。一面奏聞。一面即行速辦完結。即從前令該督撫親提研鞠。務期情節益加確實。並非於審明後復稽顯戮。今該犯饒宗正既經提訊。並無疑義。自當速正典刑。何必俟硃批至日辦理。此等案犯乃兩間戾氣。罪不容誅。向來外省奏到俱不批發。亦不交部存案。該督等豈未之知耶。劉藻常鈞俱著傳旨申飭。并將此諭令知之。○吏部奏教職六年俸滿題陞者。例不准逾限半年。原以杜營求接任上司之弊。查教職保題例。應督撫學政會同驗看。或因督撫公出。或俟年終學政回省。或本員委辦差務勢難如期具題。至接任上司於所屬賢否宜從容試看。反恐因限期迫促。草率辦理。各省州縣同知通判等官。三年五年

俸滿保題。惟俸未滿者議駁。而教職轉礙於歷俸有餘未昭公允。應即停止其鹽庫大使五年俸滿保題不得逾限半年之例。應並停從之。○壬子予故大學士史貽直入祀江蘇鄉賢祠。從巡撫明德請也。○癸丑諭曰。五阿哥病症醫治數月。尚未痊可。據現在醫生診視。稱係虛損所致。若從前起病時。據實奏聞。即可早為防範調治。而五月間張如璠宋國瑞等並不將虛損緣由詳診具奏。實屬因循。朦混。張如璠宋國瑞著交內務府大臣治罪。○旌表守正捐軀之安徽阜陽縣民張士則妻唐氏。○甲寅豁除江蘇元和吳縣昭文青浦靖江等五縣乾隆二十九年坍荒占廢田六十六頃六畝額賦。○旌表守正被戕之直隸武清縣民曹封妻張氏。守正捐軀之新河縣民朱子強女朱氏。○乙卯

上詣

皇太后宮問安。○旌表守正被戕之江蘇沐陽

縣民馮廷璧妻高氏。○丙辰。諭前因山東濟南武定等屬間有被水地畝。經該撫題請分別賑濟。兼令借給麥本。現在時屆隆冬。賑期已滿。而屈指麥秋尚遠。民食未免拮据。著加恩將被災稍重之濟南府屬齊河。濟陽。長清。臨邑。德平。武定府屬惠民。樂陵。青城。商河。濱州。陽信。利津。霑化。蒲臺。青州府屬高苑等十五州縣。極次貧民。槩予加賑一月。該撫其董率所屬實心經理。務俾窮黎均霑實惠。副朕加惠元元至意。該部遵諭速行。○又諭據四達熊學鵬奏查審諸暨縣民人錢名標等呈控該縣官吏將已徵錢糧捏報未完。通同侵蝕一案。業經審出情弊。請將知縣黃汝亮革職嚴審。并請將不行審出實情之知府高象震同知彭元瑋解任。嚴行究審等語。前已降旨將高象震解任。質訊黃汝亮革職。拏問鎖解浙省嚴審。彭元瑋亦著照所請解任。交四達等一併質審具奏。○又諭據明瑞等奏本

年伊犁綠營兵丁所種田禾收穫比去歲較多。可否照上年之例。綠營官員。交部議敘。兵丁賞一月鹽菜銀兩之處。請旨等語。著照所請。將承辦官員俱交部議敘。兵丁等每名賞給一月鹽菜銀兩。○又諭綏遠城向駐家選兵。因伊等家口無多。口糧較他處稍減。後移駐滿洲蒙古。兵丁伊等家口衆多。額米已覺不敷。近因均齊右衛兵數以向食十口糧兵移於綏遠城。支給五口糧。尤屬不均。著加恩將綏遠城兵丁俱增給口糧。俾資養贍。其應如何增給之處。著軍機大臣詳議具奏。尋議綏遠城馬兵一千五百。每名月領五口糧。步兵養育兵各二百五十。步兵每名領四口糧。養育兵領三口糧。查他省駐防馬兵領十口糧。步兵養育兵領五口糧。綏遠城兵應一例增給從之。○諭軍機大臣等據四達等奏查審諸暨縣官吏於奉到蠲免文後祇有判行出示之稿。並不將各糧戶姓名欠數張掛告

示。及按士民呈詞。覈對串號數目。竟有以大改小。以完作欠之弊等語。民間積年舊欠。經朕特降恩旨。全行豁免。黃汝亮身為縣令。理應明白曉示。乃止有判行之稿。並未發貼告示。其為有意朦混鄉愚。希圖肥橐。可知。至書吏等。將所完銀數。或以大改小。或以完作欠。敢於恣意舞弊。顯有官吏通同侵蝕情弊。著傳諭四達。熊學鵬將案內各情節。逐一推求。嚴訊。務期水落石出。不使絲毫隱飾。按律定擬。以示懲儆。至高象震彭元璋等有無串囑各情。著一併質審明確。據實奏聞。熊學鵬若稍迴護。是自取罪戾也。○刑部等部議覆。兩江總督高晉等奏。巡防海洋各事宜。一商漁船隻。初造完日。例報官驗明。給照填寫在船人夫年貌籍貫。出口時。由汛官驗照掛號。查商船挾資出洋。往返經年。舵工水手。雇覓詳慎。至採捕漁船。多係無業貧民。或二三月一出。或一月數出。舵水人等不時更易。若仍舊

例給照。每多人照不符。設有為匪情事。無從稽查。嗣後除商船仍遵舊例辦理外。其漁船止將船主年貌籍貫填寫入照。並將船甲字號。於大小桅蓬。及船旁大書深刻。照後多留餘紙。出口時。令守口員弁。將該漁船前往何處。作何生業。并在船人夫姓名年貌籍貫。查填入照。鈐蓋印戳。并登號簿。遇有為匪。即可按簿查緝。如州縣官將照給匪人。汛口員弁查填不實。均照例降二級調用。○例載船隻出洋。稅關衙門。查驗地方官印照給牌。妄給者議處。原無責令查察舵水明文。但設關原以稽查奸匪。果於船隻出入。詳悉查驗。匪蹤自難掩飾。嗣後應令海關口岸。一切倒換照票。務須查明人數登簿。鈐蓋印戳。如有人照不符。船貨互異。即送地方官審究。失察者。將該委員降二級調用。吏役責革枷號。并將該管官罰俸一年。若關口員役藉端需索。分別查叅治罪。○海洋盜案。例飭該管文武員弁

帶同事主會勘洋面。內洋易於勘定。如在外洋失事。疆界難定。查勘每多稽延。以致人犯遠颺。事主拖累。查江省洋面。縣界里數。各營已給有定圖。應將洋圖再加較正。發洋海州縣。并送部存案。嗣後內洋失事。仍帶事主會勘。如係外洋。令事主於進口處。不拘何衙門呈報。該衙門訊明被劫處所里數若干。即將該事主所開贓物報明。各該管印官。該管官查照洋圖。定為何州縣營汛所轄。飛關該州縣會營差緝。事主即予寧釋。毋庸候勘。其詳報督撫。無論內外洋失事。總以事主報到三日內出詳馳遞。以便據報行查。海關各口將稅簿贓單互相較覈。有貨物相符者。即將盜船夥黨姓名呈報緝拏。至守口員弁有規避處分。互相推卸。或指使捏報他界者。查明將申報之員降一級調用。其查關員役如於文檄未到之先。能查獲匪船者。該員等分別議敘。吏役酌賞銀兩。如奉到文檄。能查出匪蹟。

飛移地方官拏獲者。免其盤查不實處分。向來盜船多係租賃。若船主杜絕租賃。匪徒自無從售奸。應定私船禁例。以靖盜源。查盜匪或刦或竊。其船主罪應區別。嗣後除犯該徒罪以下。船主不知情者。仍照例杖枷。其犯該流罪以上者。船主雖不知情。亦應杖徒。船隻入官充賞。并將失察之地方官議處。如船主實有事故。不能親自出洋。令親屬駕船許赴地方官呈報。將親屬開填入照。如未呈明。以頂冒論罪。均應如所請從之。

大清高宗法天隆運至誠先覺體元立極敷文
奮武孝慈神聖純皇帝實錄卷之七百五十

平定回疆方略卷之七十五

七十五

大清高宗法天隆運至誠先覺體元立極敷文
奮武孝慈神聖純皇帝實錄卷之七百五十一

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆三十年乙酉十二月丁巳諭曰方觀承

奏籌辦城工一摺內稱界連驛路之懷安等
縣土城現在勘估改建磚城其餘偏僻小邑
仍就土城黏補修葺工費較省等語所奏尚
未悉辦理城工之本意前因各省應修城垣
費繁工鉅特發庫帑五百萬兩分撥各省一
律興修祇期於衛民有益雖多費亦所不較
況頻歲年穀順成庫藏極為充裕因思天下
之財止有此數庫中所積者多則民間所存
者少用是動撥官帑俾得流通而城工亦賴

以完整。此朕本意也。且國家一應工作料物。皆按值購辦。食用亦計日給資。閭閻不但無力役之煩。而無業窮民。並得藉力作以餬口。實寓以工贍民之意。是一舉而數善咸備。更無庸較量工費。意存節省。至土城改建磚城。雖現在為費畧多。其實壯觀瞻而資鞏固。且省不時修葺之勞。視土城尤為經久。即出於原估五百餘萬兩之外。正亦何妨。朕惟期有益於民。豈計所費之多寡乎。但承辦之地方官。能實用實銷。不致浮開糜費。則工程自然堅固。而夫役工料等事。皆實發價值。絲毫不科派里下。庶於民生實有利賴。前已降旨。令各督撫遴委大員。分辨經理。以專責成。如各省或有土城應改建磚城者。并著一體確估覈奏。該督撫等。務飭督辦各員。實心查察。設致不肖有司。冒銷侵蝕。草率了事。及藉端擾累者。若經發覺。則該督撫不得辭重咎。著將此通行傳諭知之。○以故一等男加一雲騎尉祖學恭弟學讓襲爵。○戊午。

上御乾清門聽政。○詣

皇太后宮問安。○以輔國公崇尚為宗人府右宗人。○以故一等子揚桑阿姪塞炳阿。二等子固寧阿子阿克敦。一等男敏珠爾子巴圖扎爾等。各襲爵。○旌表守正捐軀之山東陽穀縣民王克勤媳劉氏。甘肅寧州民賀天昇妻張氏。○已未。諭據旺保奏稱舊疾復發。驟難痊愈。請解任留荊州調理等語。著照所請。

准其解任。與伊子同住荊州調理。○又諭禮部議覆陝西巡撫和其衷題。涇陽縣貢生張璘一門孝友。七世同居。應如所請。照例旌獎。民風淳厚。倫紀懋敦。朕用嘉慰。茲親製詩一章。以賜。並著加賞上用緞疋。用示優獎。○又諭據伍彌泰等奏。本年庫爾喀喇烏蘇等三屯。烏魯木齊三營。及呼圖畢一屯。兵丁收穫米麪。每名俱至十三石有零。可否將管理屯種事務頭等侍衛額爾德蒙額。並管理烏魯

木齊三營呼圖畢一屯之官員。交部議敘。兵丁賞給一月鹽菜銀兩之處。請旨等語。著加恩照伍彌泰等所奏。將額爾德蒙額。並承辦官員。俱著交部議敘。兵丁各賞給一月鹽菜銀兩。○刑部奏直隸香河縣書役科派車輛。並內務府郎中伊星阿。任莊頭雇車作弊。又復侵用。應分別治罪。得旨莊頭姚頤。翟彬。從前承辦車輛之時。伊等不願認辦。今經地方官雇覓車輛。伊等又復希冀分肥。從中取利。甚屬不法。著交內務府大臣。從重治罪。至伊星阿貪鄙不堪。著在慎刑司枷號一百日。俾內務府人員。共知儆戒。至直隸州縣官。借差滋擾。方觀承所司何事。著即明白回奏。尋奏香河縣書役。科派幫貼車費。前任知縣任瑀。出票催追。臣不能查察。實屬昏憤。請交部嚴加議處。下吏部議。尋議應照例降二級調用。得旨方觀承著降二級。從寬留任。○宗人府奏。應行襲封宗室等。已照例考試。恭候欽定。

得旨永朗。永杭。俱授為三等鎮國將軍。恒英授為奉恩將軍。明佩。授為三等輔國將軍。永勳。永遐。達明阿。俱授為二等奉國將軍。弘嵩授為二等鎮國將軍。弘豐。授為一等輔國將軍。明恭。興兆。景燭。俱授為二等輔國將軍。永登。永破。俱授為三等奉國將軍。○旌表守正捐軀之河南襄城縣民李廷榮女李氏。○庚申。諭軍機大臣等。據劉藻等奏。莽匪竄入猛捧等土司地方。肆行焚掠。現在飭派營協各員。調兵進剿。並親往督辦一摺。此等醜類。野性難馴。敢於擾害邊境。非大加懲創。無以警兇頑。而申國法。劉藻等既經調兵進剿。必當窮力追擒。搗其巢穴。務使根株盡絕。邊徼肅清。恐劉藻拘於書生之見。意存姑息。僅以驅逐出境。畏威逃竄。遂爾苟且了事。不知匪徒冥頑不靈。乘釁生事。視以為常。前此阿溫波半扎。乃占一案。未嘗不重治其罪。甫經半載。仍敢怙惡不悛。即其屢擾邊界。已屬罪無可

這。此次若復稍存寬縱。難保其不再干犯。養癰貽患之說。尤不可不深以為戒。著將此傳諭劉藻知之。○又諭曰。高晉具題。審擬段成功縱容家人書役詐擾累民一本。內稱該員因患瘧昏迷。不能檢點案牘。家人龔玉等婪贓各款。該員均未知覺等語。所辦甚屬錯謬。段成功不過一時患瘧。並非重症。且瘧或間日一至。或一日一至。至亦不過一二時辰之久。此人人皆知之。高晉獨不之知乎。何至不能檢點案牘。一任家人等肆行無忌。明係承審之員。有意開脫。冀圖從輕完結耳。高晉自擢用總督以來。甫經審辦叅案。即意存瞻徇。巧為嘗試。此等伎倆。豈能逃朕洞鑒。設使尹繼善在彼。敢於如此辦理。朕必重治其罪。江南吏治廢弛已久。現在正當督撫更換之時。高晉尤宜加意整頓。力矯積習。何意竟敢於姑息朦混。若此。看來此案必出自朱奎揚之意。朕知朱奎揚素非善類。不過因其在道任

年久。又有議其不能得尹繼善懽心者。是以擢而用之。若係交伊獨任其事。伊必不敢姑息。若不涉彼身之事。督撫在前。則袒護隱飾。冀博屬員感悅。高晉遂墮其術中。漫無覺察耳。本應將該督交部嚴加議處。第念高晉新任總督。初次獲咎。且在總河任內。尚能實心任事。姑從寬宥。此後若再不知改悔。必不能為之曲貸也。高晉此事實屬昏愎糊塗。負朕恩矣。著傳旨嚴行申飭。此本已交內閣擲還。該督另委賢員。秉公確審。務得實情。以成信讞。若尚迴護希圖了事。朕必有另辦之法。可惜朕造就高晉之恩矣。大不是。豈有此理。著將此傳諭高晉知之。仍令高晉傳諭朱奎揚令其小心。○又諭曰。高晉審擬段成功縱容家人書役詐擾累民一本。辦理殊屬錯謬。已降旨將高晉嚴行申飭。另行審辦矣。著鈔錄一分。并寄明德閣看。令其將此案情節。秉公查實速奏。并將朱奎揚近日辦事如何之處。

據實奏來。○又諭。據瑚圖靈阿奏稱。車臣汗部落扎薩克鎮國公格勒克巴木丕勒。拏獲私向俄羅斯貿易兵丁玉木玉爾等五人。解送前來。訊據伊等前隨協理台吉噶勒桑。在恰克圖駐劄時。噶勒桑曾受商人圖庫哩克布帛等物。准其私行貿易。因行知瑪尼巴達喇。令將噶勒桑等解送質審。并將貿易民人蒙古等嚴行緝拏等語。公格勒克巴木丕勒。拏獲私行貿易之人。甚屬可嘉。著賞給大緞四疋。以示獎勵。協理台吉噶勒桑。係專在恰克圖駐劄之人。竟敢受商人貨物。准其貿易。商人等違禁行賄。均屬可惡。著傳諭瑚圖靈阿。審明從重治罪。再此項人等。恐此時有回至張家口者。著將瑚圖靈阿摺鈔寄巴爾品。令其嚴行拏獲治罪。如有應行質審者。解往庫倫。交瑚圖靈阿審辦。○辛酉。吏部議准。閩浙總督蘇昌奏稱。江陰團塢坎增闢。應設大使一員。駐劄經理。查福場三小團一缺。事務

簡少。應裁併赤祀團兼管。所裁薪水銀。令新設江陰大使支領。再江陰璧頭地方緊要。易走私販。應令海壇鎮右營派千把一員。兵船一隻。常川堵緝。並添哨捕兵四十名。從之。○又議准。湖南按察使沈世楓奏稱。各省知府直隸州員缺。有委所屬州縣兼護者。以屬員兼管上司印務。交代之際。或多隱忍。所管屬員。本係同寅。又易瞻徇。且於該州縣報結各案。易於抽換。嗣後本屬州縣。不准委護本府州印務。從之。○予安徽故左都御史梅穀成。甘肅故直隸提督吳進義。西寧鎮總兵包進忠。各祀鄉賢祠。故河南陳留縣知縣許勉燦。祀名宦祠。從各督撫請也。○旌表守正捐軀之河南中牟縣民孫耀宗妻閻氏。○壬戌。上詣皇太后宮問安。○諭軍機大臣等高晉。審擬段成功縱容家人書役詐擾累民一案。辦理錯謬。已降旨令該督另行據實究審具奏。著將

所降高晉諭旨鈔錄一分寄與四達閱看。計此旨到浙時。四達諸暨審案。諒已完結。即速順道赴蘇。會同高晉將此案審訊明確。務得實情具奏。四達接到諭旨。不必先行知會高晉。可將此傳諭四達知之。○又諭。發遣伊犁人犯。俱係身罹重罪。免死發往之人。伊等宜感戴朕恩。守分改愆。如有私行逃脫者。拏獲即行正法。此係現行之例。茲據和其衷奏。拏獲烏魯木齊逃犯王克明等。內有實係採薪販賣在途失迷者。請分別辦理等語。明係為此等人犯開脫。易滋徼倖之弊。所奏實屬錯謬。斷不可行。和其衷著傳旨申飭。并傳諭伊犁將軍。及駐劄回城辦事大臣等。嗣後拏獲此等人犯。俱照現行例辦理。毋任狡供。倖免。○軍機大臣等議覆。伊犁將軍明瑞等奏。稱烏什兵二百名換班時。請合派京師滿洲東三省兵等語。查二十七年派往分駐各回城滿洲兵六百名。索倫兵三百名。今應照數派

往。但索倫兵數年軍營効力。今應撤回。請將健銳營兵揀選九百名。派翼長一員。正副委署章京十八員。前鋒校二十四員。於明年三月。分四起帶領前往。各項應支銀兩。俱照上次派往戍守例辦理。從之。○癸亥。諭軍機大臣等。據瑚圖靈阿奏。稱喀爾喀土謝圖汗部落副將軍印務。已交與車登多爾濟庫倫事務。或仍行辦理。或即來京。請旨遵行等語。所奏甚謬。伊係特旨派往庫倫辦事之人。俄羅斯邊境。及呼圖克圖沙畢納爾等事。俱應辦理。喀爾喀副將軍。不過辦理該部落內小事而已。此等大事。豈應干與。車登多爾濟。少未更事。不過按職分補授副將軍。非倚之辦事也。庫倫事務。若瑚圖靈阿照常辦理。副將軍印務。即交車登多爾濟。令隨瑚圖靈阿學習辦事。具奏事件。瑚圖靈阿開列在前。次列福鼐。車登多爾濟等名。○甲子。諭曰。輔國公修齡著在散秩大臣上行走。○軍機大臣等議

准黑龍江將軍富僧阿奏稱。呼蘭運糧水手支放錢糧。並紅白事賞銀等項。例由水師營派領催一員管理。委員辦理諸事。殊未妥協。請派呼蘭八旗佐領一員管理。由該處四十名水手內。揀放領催一員。以備差遣。從之。○乙丑。諭軍機大臣等。據安泰奏稱。官兵所缺馬匹。官為定價向哈薩克買給。於所領鹽菜銀坐扣等語。所奏尚屬可行。此項馬匹。若任官兵私與哈薩克貿易。恐滋盜竊之事。且私買價賤。官購價昂。亦為哈薩克所笑。著傳諭阿桂等。現在彼處官兵所缺馬匹。即照安泰所奏辦理。若有私相貿易者。查明從重治罪。○丙寅。

孝莊文皇后忌辰。遣官祭

昭西陵。○諭軍機大臣等。成衮扎布奏。查辦喀爾喀等。向哈薩克私換馬匹一案。伊子敏珠爾多爾濟。扎哈沁公扎木禪。俱曾向哈薩克私換馬匹。請交常復質審等語。所奏固屬秉

公。但從前哈薩克前來貿易。以其疲乏馬匹。沿途更換。亦常有之事。已往無庸究辦。惟應嚴行禁止。著傳諭成衮扎布等。將敏珠爾多爾濟。扎木禪等。俱行寬免。仍嚴行曉諭卡座台吉。及僕從等。如有仍前私換馬匹者。叅奏從重治罪。○厄魯特達罕巴勒丹錫拉布故。以其孫閒散台吉恭格襲職。○是日。丙戌年立春。順天府進土牛春山寶座。○是日起。上以歲暮裕祭。

太廟齋戒三日。○丁卯。諭曰。蘊著。現已補授工部尚書。託恩多著。即辦理吏部事務。兼署兵部事務。將來託庸到任後。託恩多仍著兼管兵部。○又諭曰。明瑞等奏。請遣愛隆阿進京。接取家眷。留烏勒登協同辦事。並同鄂津。管理索倫昂吉兵丁等語。著照所請。俟愛隆阿回伊犁時。烏勒登再行來京。○戊辰。以歲暮裕祭。遣官祭太廟中殿。

後殿。○軍機大臣等議准。大學士管陝甘總督楊應琚奏稱。甘省毗連新疆。往來差繁。應將涇州瓦雲。至肅州酒泉。共四十八驛。各添馬一十五匹。此內安定縣屬之秤鈎。西鞏。延壽。會寧縣屬之青家。保寧等驛。山險道長。應於已添馬十五匹外。各再添十匹。從之。○又議覆。大學士管陝甘總督楊應琚奏稱。巴里坤連歲豐收。地氣較前漸暖。地未墾者。應於明春撥馬廠兵一百名墾種。該處同知庫內貯有農器。如不敷。再為添造。應用馬牛。巴里坤現無可撥。應令該同知向商人購用。至巴里坤迤西穆壘地方。直接烏魯木齊之特納格爾。可墾地數十萬畝。現於安西肅州等處。招募無業貧民。給與盤費。令次第開墾。將來糧石充裕。商販流通。可以接濟內地民食。該處應設官管理。請令塔爾灣營守備。把總。各一員。兵一百二十名。移駐歸巴里坤鎮營管轄。塔爾灣餘兵七十八名。歸併附近之靖逆營。

其建房開渠。及牛具籽種等事。俱令巴里坤鎮。豫為籌辦。均應如所請。從之。○己巳。禘祭太廟。

上親詣行禮。○遣官祭

永陵。

福陵。

昭陵。

昭西陵。

孝陵。

孝東陵。

景陵。

泰陵。○遣官祭

孝賢皇后陵。

端慧皇太子園寢。○遣官祭

太歲之神。○庚午。

上詣

皇太后宮問安。○御保和殿。筵宴朝正外藩。左翼。科爾沁。和碩達爾漢親王。多羅額駙。色旺。

諾爾布。和碩親王固倫額駙色布騰巴勒珠爾。固山貝子多羅額駙班珠爾。鎮國公索諾木色楞。輔國公哈達。和碩額駙敏珠爾。多爾濟。固山額駙多爾吉呼固穆。一等台吉喇特那。二等台吉巴勒珠爾。三等台吉濟克濟扎布。烏珠穆沁和碩車臣親王朋蘇克喇布坦。多羅額爾德尼貝勒達什袞布。喀喇沁多羅都統郡王喇特納錫第。固山貝子多羅額駙扎拉豐阿。鎮國公丹津達爾扎。一等塔布囊達克丹敦珠布色布騰翁牛特多羅都統郡王布達扎布。阿巴哈納爾多羅貝勒達什敏珠爾。扎魯特多羅貝勒錫勒塔爾。鎮國公那遜額爾克圖。茂明安多羅達爾漢貝勒玉木沖。敖漢和碩額駙密扎特多爾濟。固山貝子固山額駙吹濟扎勒。輔國公多羅額駙桑濟扎勒。固山額駙沙津阿爾畢特呼。二等台吉巴勒珠喇布坦。鄂爾多斯固山貝子喇什色楞。固山貝子那木扎勒多爾濟。巴林輔國公

和碩額駙德勒克。四等台吉旺舒克。土默特和碩額駙納遜特古斯。歸化城土默特四等台吉巴勒丹多爾濟。右翼喀爾喀扎薩克圖汗巴勒達爾。和碩親王多羅額駙羅布藏多爾濟。親王品級多羅郡王車布登扎布。多羅貝勒阿玉爾。固山貝子車木伯勒。敦多布多爾濟。貝子品級扎薩克台吉齊旺多爾濟。輔國公德勒克多爾濟。扎薩克一等台吉恩克達瑪林扎布。袞楚克扎布。二等台吉班丹多爾濟。阿巴噶多羅卓哩克圖郡王車凌旺布。蘇尼特多羅都統郡王車凌多爾濟。綽羅斯多羅郡王羅布扎。回子郡王品級多羅貝勒霍集斯。輔國公圖爾都。和什克額色尹。回子扎薩克一等台吉瑪木特。土爾扈特多羅貝勒羅布藏達爾扎。厄魯特固山貝子袞楚克巴克。烏喇特鎮國公索諾木喇布坦。翁牛特鎮國公恭格喇布坦。科爾沁輔國公嗎哈密玉爾。杜爾伯特輔國公扎那巴克。和碩特輔

國公色布騰扎薩克一等台吉特默齊及大學士領侍衛內大臣等召科爾沁和碩達爾漢親王多羅額駙色旺諾爾布和碩親王固倫額駙色布騰巴勒珠爾烏珠穆沁和碩車臣親王朋蘇克喇布坦多羅額爾德尼貝勒達什衮布喀喇沁多羅都統郡王刺特納錫第固山貝子多羅額駙扎拉豐阿翁牛特多羅都統郡王布達扎布阿巴哈納爾多羅貝勒達什敏珠爾喀爾喀扎薩克圖汗巴勒達爾親王品級多羅郡王車布登扎布阿巴噶多羅卓哩克圖郡王車凌旺布綽羅斯多羅郡王羅布扎回子郡王品級多羅貝勒霍集斯輔國公圖爾都土爾扈特多羅貝勒羅布藏達爾扎等至

御座前賜酒成禮。○是月浙江巡撫熊學鵬奏浙省各營兵例許借常平倉米俟領餉時按價扣還倉穀原備平糶若出借兵丁當春既妨民食秋收買補時出入易致牽混且滋捏

報浮開諸弊查兵丁每名除餉銀外月領米三斗即有不敷可乘價平時自行購買今冬應停借嗣後若有必需借給者令該提鎮覈實咨報行司酌借不准徑請報聞。○河南巡撫阿思哈奏河工料物前經奏准官代民辦事竣徵還民間甚便但恐行之日久小民視為官事失代辦本意嗣後應令該地方官公舉正直紳士耆老同委員辦理得旨嘉獎。○雲貴總督劉藻雲南巡撫常鈞等奏莽匪屢擾普洱邊境調兵勦捕需費繁多請加鑪鼓鑄於三十一年正月起省局添鑪五座加鑄十卯通計可得本息錢三萬一千一百餘串除雜費外實得錢二萬五千四百餘串以一串二百作銀一兩共作銀二萬一千一百餘兩除銅鉛錫工本銀外實獲餘息銀八千三百餘兩以備防邊之用報聞。○常鈞又奏莽匪滋擾普洱邊境督臣劉藻督兵進剿現調兵練七千餘人普洱廳縣倉米不敷支放口

糧請撥附近之元江新平等府縣倉米接濟報聞○是年予烏什等處出兵陣亡之護軍校車靈端多克等三十三員把總張麟等三員祭葬贈卹如例領催護軍披甲馬步兵等一百三十九名卹賞俱入祀昭忠祠○旌表孝子江蘇等省祝彭齡等三名孝婦直隸謝氏一口守節合例八旗滿洲護軍烏爾登妻生音氏等一百一口蒙古護軍阿金泰妻那呢里氏等二十一一口漢軍領催祖應辰繼妻郎氏等二十七口內務府鑲黃等旗常有妻劉氏等四口奉天等省駐防於紹煥妻徐氏等五百一十五口直隸等省趙澄妻張氏等三百二十二口夫亡殉節滿洲護軍德山妻覺羅氏一口安徽等省羅興智妻楊氏等十四口未婚守志廣州駐防劉玉成聘妻胡氏一口浙江等省金塔聘妻吳氏等二十一口百歲壽民婦江蘇等省黃公朝等二十名口各給銀建坊如例○一產三男直隸等省趙

謙等八家○會計天下民穀數各省通共大小男婦二萬六千九百九十九萬三千二百二十四名口各省通共存倉米穀三千三百三十八萬九千六百八十四石九斗一升八合九勺

大清高宗法天隆運至誠先覺體元立極敷文奮武孝慈神聖純皇帝實錄卷之七百五十一

大清高宗法天隆運至誠先覺體元立極敷文奮武孝慈神聖純皇帝實錄卷之七百五十二

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事務處管理

吏部理藩院事務正黃旗滿洲都統世襲領侍衛內大臣稽察欽奉 上諭事務處管理

總裁官經筵講官太子太傅文淵閣大學士文淵閣領閣事稽察欽奉 上諭事務處管理刑部戶部三庫事務

世襲領侍衛內大臣稽察欽奉 上諭事務處管理

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆三十一年丙戌春正月辛未朔

上詣

奉先殿行禮○詣

堂子行禮○率王以下文武大臣詣

壽康宮慶賀

皇太后禮成御太和殿受朝作樂宣表如儀○

詣

大高殿

壽皇殿行禮○遣官祭

太廟後殿○御乾清宮賜宗室王公等宴○壬

申

上詣

皇太后宮問安○召大學士及內廷翰林等茶

宴以玉盃聯句 賜葉爾羌四品商伯克托

克托和卓等食賞賚有差○諭朕統御萬方

孜孜求治惟以愛育黎元為念自御極以來

蠲賜所逮不下千億萬乾隆十年曾恭依

皇祖普免直省錢糧恩例蠲除天下額徵正賦

二千八百萬有奇期斯民家給人足咸臻樂

利惟歲運漕米向以供給俸餉廩糈之用非

水旱特蠲例不普免夫八政以食為先閭閻

蓋藏尤資饒裕恭閱

皇祖實錄康熙三十年

特頒恩旨將各省起運漕糧通行蠲免一週大

澤均霑慶逾常格仰惟

皇祖冲齡踐阼臨御之三十年春秋未及四十

朕年二十有五始登大寶膺祺受祉迄今亦

閱三十年際

重熙累洽之會必世昌期均符泰運其為慶幸
倍深茲荷蒙

上天眷佑

列祖鴻庥函夏謐寧疆宇式闢北庭西域二萬
餘里咸隸版圖外有耕屯之獲內無餽餉之
勞且連歲年穀順成庶物豐殖京通倉貯儘
有餘粟

天既誕貽樂歲惠洽昇平朕自當仰體

天心以推恩黎庶是用敬承

嘉貺懋繼

前謨使薄海億兆並裕倉箱之慶所有湖廣江
西浙江江蘇安徽河南山東應輸漕米著照
康熙年間之例於乾隆三十一年為始按年
分省通行蠲免一次其江寧京口杭州荊州
等處駐防地方該省漕米既蠲所有估需兵
食如何豫為籌辦並各該省蠲免次第應行
酌辦各事宜著該部速行定議具奏尋議各
省歲輸漕糧請照康熙三十年分年蠲免之

例再加籌酌三十一年免山東河南二省三
十二年免江蘇省三十三年免江西省三十
四年免浙江省三十五年免安徽省三十六
年免湖南省三十七年免湖北省以次遞免
其隨漕銀米應照舊例輪免之省停運丁船
例給減半本折月糧在漕項款內動支餘存
銀米報部撥用有漕省分兵米杭州荊州豫
東等處於地丁徵收兵糧款內動支江寧於
漕項米內支給均毋庸另行籌辦惟京口向

於起運漕糧內截撥三萬七千餘石今漕糧
已免應照江寧之例照數撥給從之 癸酉
諭前因甘肅河東河西各屬有秋禾偏旱及
間被雹水風霜之處業經照例賑卹但念偏
災處所蓋藏未必充裕特令該督再行悉心
查勘具奏今據查明奏到所有被災較重稍
重之各州縣於例賑完畢之後正值青黃不
接之時民力不無拮据著加恩將被災較重
之靖遠紅水縣丞安定會寧通渭寧遠伏羌

鎮原平涼安化等縣靜寧州涇州寧州等十三處無論極次貧民俱展賑兩個月被災稍重之皋蘭金縣隴西漳縣華亭莊浪固原州鹽茶廳隆德靈臺合水武威鎮番平番中衛等十五處無論極次貧民俱展賑一個月以副朕優卹邊氓至意該部遵諭速行○甲戌上奉

皇太后幸重華宮侍宴○諭前因山東省濟南武定等屬偶被偏災業經加恩分別撫綏其被災稍重之齊河等十五州縣復於例賑之外展賑一月至勘不成災處所錢糧雖例不停徵但念毗連災地收成不免歉薄小民生計亦未能裕如著加恩將濟南府屬之陵縣東昌府屬之莘縣青州府屬之博興縣所有應徵錢糧俱緩至麥熟後徵收以紓民力該部遵諭速行○又諭浙江天台新昌寧海等三縣去秋晚禾間有被旱業經該撫酌給籽本其應徵錢糧照例蠲緩並豫籌撥運倉穀

協濟小民自可不致失所但念東作方興春收尚遠青黃不接之際閭閻生計未免稍艱著加恩將天台新昌寧海等縣查明實在貧乏戶口散給一月口糧以資接濟至仁和錢塘會稽蕭山桐廬分水等縣雖據該撫勘明係一隅偏災亦經分別緩徵而收成究屬歉薄民力不無拮据並著加恩將此數縣歉收地畝於春耕時按畝賞給籽本穀三升免其追繳令各乘時力作該撫其董飭所屬悉心經理務俾小民均霑實惠以副朕愛養黎元至意該部遵諭速行○又諭昨歲河東河西間有偏災業經降旨於例賑之外加恩分別展賑撫卹期窮黎不致失所復念甘省土瘠民貧而被災各屬尚有歷年緩帶借欠未完等項例須新舊並徵同時輸納民力未免拮据是用特沛恩膏將甘肅省之靖遠紅水縣丞會寧固原鹽茶廳環縣山丹東樂縣丞武威鎮番永昌古浪平番花馬池州同一十四

廳州縣自乾隆二十三年至二十九年民欠地丁銀及折借籽種口糧牛本等項銀共三十七萬四千餘兩民欠地丁糧及籽種口糧牛本等項糧共一百二十四萬五千餘石陝省延安榆林綏德三府州屬自乾隆二十一年至二十五年民欠籽種口糧共四萬六千餘石民欠籽種口糧牛具銀一萬一千餘兩普行豁免俾閭閻益滋康阜該督撫其董率所屬盡心經理務使小民均霑實惠毋任不

肖官吏侵漁中飽以副朕愛養邊氓至意該部遵諭速行○調廣西左江鎮總兵俞金鰲為甘肅肅州鎮總兵甘肅固原鎮總兵頗榮仁為左江鎮總兵肅州鎮總兵四十六為固原鎮總兵○乙亥

上詣

皇太后宮問安○丙子享

太廟遣誠親王允祕恭代行禮遣官祭

太歲之神○

上御紫光閣賜蒙古王公台吉及回部郡王等宴○丁丑

世祖章皇帝忌辰遣官祭

孝陵諭據明瑞等奏由涼州莊浪移駐滿兵修理房間一萬七百餘間所有承辦人員甚屬妥協可否酌量加恩之處奏聞請旨等語所有修工官員既屬奮勉著加恩交部議敘其兵丁著交明瑞等酌量賞給諭軍機大臣等侍郎四達等審擬浙江諸暨縣官吏將已徵錢糧捏報未完通同侵蝕一案已交三法司覈擬速奏矣此案該書吏等串通舞弊甚屬狡獪巧詐非尋常作奸犯科可比如該糧書等將糧戶所完銀錢私自那用於連三串票流水簿內先用淡墨細筆將大數混寫小數送署查驗發出後再用濃筆改寫大數或先寫零數再添整數給付本人不但掩飾納戶耳目即拆封亦無從查察而該縣黃汝亮於徵收錢糧止就糧書開送籤追遂致該

書吏等將糧多大戶設法按捺任意侵那並將南米折收侵用及至奏銷屆期概係先侵後吐那掩彌補積弊相沿不止一日迨昨春降旨將浙省歷年緩帶銀米悉行蠲免該縣糧書等知事已敗露遂商同冊總張黻將從前侵用銀米捏作民欠希冀開銷復恐糧戶執票告發託言劃抵新糧騙回減迹及經該府訪聞查調徵冊該書吏等又賄通該縣之子黃其聰抽換冊簿補印申送冀圖狡飾朦

混該縣黃汝亮見事已發覺遂乘機告病回籍種種情弊俱經逐一審明按律定擬自當盡法懲治以儆其餘第恐一縣如此他省州縣亦未必無此等情弊週年蠲免錢糧恩施稠疊原期實惠及民若不肖官吏通同侵蝕分肥以致澤不下逮何以清積弊而祛民害著傳諭各該督撫嚴飭所屬實力防範仍不時留心查察如有似此弊端即行據實嚴參毋得稍事姑息○以戶部員外郎珠魯訥為

荊州副都統、戊寅諭近據江蘇浙江廣東等省節次拏獲海洋盜犯多人業已盡法懲治此等積匪或一人連犯兩省之案或一案牽連數省之人累累劫案已閱多年此時始行發覺皆由從前各地方官遇有商船被劫之事每以事涉海洋畏難不肯訪緝又或因水面所轄地界毗連可以互相推諉彼此搭攔遂致縱盜養奸釀成積案已將各年疎防之文武各員交部嚴加議處矣今三省盜夥

就獲者幾及數百名恐匪船往來洋面潛蹤劫竊似此者尚復不少若不嚴加搜捕盡絕根株何以靖海疆而安旅舶當思此等海盜糾夥行兇雖在洋面而所竊贓物不能不向城市變賣其妻孥家屬亦必於陸地寄居即如浙省獲盜之案亦因賊犯宋三竊贓包褲敗露遂得尋線根求弋獲多犯誠使地方員弁平日留心察訪見有行蹤詭秘並衣物可疑者隨時盤詰鬼域復何所遁形至界連數

省之處盜匪出沒每聞此地嚴拏即竄入彼境以圖避匿若彼此同心上緊協緝則四路堵截匪徒又何從狡脫乎總在封疆大吏嚴飭有司實力稽查設法躡捕使洋面永遠清靜方不負戢暴安民之意倘此後該地方官復敢因仍故習玩視盜案不行嚴密查拏及諱匿不報者一經發覺必重治其罪該督撫等不能嚴切董飭責有攸歸朕不能為之寬貸也將此通行曉諭知之是日起

上以祈穀於

上帝齋戒三日（庚辰）

上詣

南郊齋宮齋宿諭軍機大臣等英廉奏查辦江弼與王永成互控地畝案內查出乾隆二十四年查大地畝時兩造俱大有餘地雖例應入官招買但伊等爭控之地尚未勘斷明確乃前鋒那蘇圖等觀此項餘地價輕利厚輒行認買該將軍及盛京戶部估價亦遽准

其認買彼時正值那蘇圖之父布顏達賚身任該處副都統若非伊等囑託瞻徇何以正案未結先將丈出餘地急行出賣此項地畝結案時自應照數查追入官其原辦之將軍戶部亦不能辭咎著傳諭英廉查係何人任內之事據實參奏辛巳祈穀於

上帝

上親詣行禮詣

皇太后宮問安諭前因高晉審擬段成功一

案稱係該員患瘧昏迷以致家人龔玉等婪贓等語朕以高晉審理此案甚屬錯謬因降旨嚴行申飭並令明德據實查奏今據奏稱段成功家人龔玉出票滋擾段成功俱屬知情其中尚有染指之處承審之蘇州府孔傳炯主稿審轉之臬司朱奎揚明知其裝病瞻徇未究等語朱奎揚素非善類不過因其歷任年久尚無顯過是以擢任臬司至孔傳炯人似幹練經朕特加擢用調補繁缺乃承審

叅案輒敢瞻徇姑息希圖朦混了事深負朕恩朱奎揚孔傳炯俱著革職拏交刑部治罪其成招會轉之布政使蘇爾德雖無承審專責但以藩司大員若果持正爭執朱奎揚等豈能施其伎倆乃竟扶同會轉亦難辭咎蘇爾德著交部嚴加議處至從前會審之候補知州德寧安雖亦審理不實念係微員尚與藩臬有間著交部察議朕辦理庶務一秉大公情罪輕重悉視其人自取邇來吏治肅清外省審理叅案從未有敢於顯然袒庇至此者高晉辦理此案實出朕意想之外著將前此申飭高晉諭旨鈔發與衆閱看並將此通諭中外知之以江蘇蘇松道李永書為江蘇按察使 壬午

上詣

大高殿行禮 奉

皇太后居長春仙館 詣

安佑宮行禮 幸圓明園 雲貴總督劉藻雲

南巡撫常鈞奏永昌順寧二府所屬之耿馬孟定孟連等土司地方界連緬國惟藉滾弄江為天塹年來土司懦弱失防每有水匪偷渡滋擾之事近據永順鎮永昌守稟報木梳莽已覺領兵到木邦猛店地方駐劄向耿馬索取舊規不給即渡江來襲又據順寧守稟報莽子竄入孟連地方並及圍空有人七百馬七匹各等情查該匪兩路分進是否虛實其人衆若干未據確探且既稱索取馬舊規其竄入孟連又因何事隨飛檄永順鎮府會差練土偵探該匪已拔營退去查木賊莽已覺即布普拉因臺卡嚴密無隙可乘退歸屬實第夷性叵測且耿馬土司罕國楷已故恐有乘間潛窺之事是滾弄江之防範未可稍疎已分行永順鎮府嚴飭各土司督率目練常川防守庶俾耿馬無虞得旨不可苟圖了事戒之 癸未

上奉

皇太后幸山高水長至己丑皆如之。諭前因高晉審擬段成功一案稱該員患瘧昏迷以致家人書役婪贓等語辦理甚屬錯謬是以降旨將該督嚴行申飭並令明德查出實情將承審之孔傳炯朱奎揚等革職拏問並將申飭高晉諭旨鈔發令衆閱看今據四達會同該督究出此案出票婪索皆係段成功親筆標發實有染指等弊則段成功之情罪已無疑義而高晉摺內並稱莊有恭原叅即有段成功抱病被朦字樣實屬駭異莊有恭既訪知段成功有出票婪索之事具題叅劾豈有復信其捏病被朦之理伊彼時若仍任江蘇巡撫決不肯如此姑息了事亦不肯為此隱躍兩可之語其意不過以五日京兆離任在即何必結怨故留此罅隙即使他日審出實情伊可居救之不得之名如因捏病一節得以藉端開脫即可解怨市恩此等卑瑣居心行事尚安得為純臣乎至高晉如此據實

覆奏若令尹繼善身處其地不過具摺引罪而已必不詳奏及此蓋高晉因朕洞鑒確情伊又係初任總督恐罪及已故和盤托出耳今尹繼善現在朕前惟有俯首心服即問之各省督撫朕於此諸人微暖窺見底裏確中與否諒亦不能為之置辭也莊有恭原叅抱病被朦一語實出意想之外因令內閣檢取原本閱對則有本官抱病朦官舞弊之語並詢問莊有恭據稱該司府等審究龔玉等僉供段成功時適患病係伊等朦蔽所為隨據揭敘稿題叅未能即將段成功斷非患病之處明白指駁實屬錯謬此語更屬取巧莊有恭若果知其實係患病則又何必嚴叅其所叅以嚴叅者蓋恐後任叅出朕將問及故不得不叅而為之隱躍其辭耳莊有恭受朕深恩特加擢用乃敢為此巧於市恩之術此非前任受尹繼善局弄之過可比是有心欺朕矣莊有恭著嚴加議處高晉雖奏稱莊有恭原

叅有抱病被朦之語。伊審辦時即應究出實情。何竟聽屬員袒庇開脫。遂爾扶同牽結。舛謬殊甚。並著交部嚴加議處。外省上和下睦之習。最為惡陋。屢經整頓。懲創庶幾稍知改悔。不謂尚有復蹈故轍若此者。伊等其以朕為何如主。而敢以此等伎倆。巧為嘗試耶。當此綱紀肅清之時。而伊等錮習牢不可破。實所深恨。諸臣當痛加湔洗。毋得自罹罪戾。朕必欲力挽頽風。法在必懲。勿謂言之不豫也。

將此通諭中外知之。○諭軍機大臣等。據四達等奏。段成功縱容家人書役婪索一案。檢閱所出之票。皆係段成功親筆標發。請將承審之孔傳炯。朱奎揚。解任嚴究等語。孔傳炯等承審此案。實出情理之外。朕早知其必有情弊。昨已降旨。將伊等革職。交刑部。今既有應行究訊情節。著即將孔傳炯。朱奎揚。革職鎖拏。交與四達等質審。明確後再行解部治罪。至高晉履奏稱。莊有恭原叅內有段成

功抱病被朦之語。實屬奇聞。看來孔傳炯平日辦事。尚不至於如此荒唐。今查辦此案。何至一任段成功捏病狡飾。其中必有授意指使之入。著四達等嚴行究訊。務得實情。孔傳炯。朱奎揚。承審叅案。敢於徇情舞弊。若此。倘再不將實情吐露。首領尚不能保。復何暇代人隱諱。自速罪戾耶。著傳諭四達。高晉。即速嚴訊明白。據實覆奏。○甲申。

上奉
皇太后幸同樂園侍早晚膳。至丁酉。皆如之。○御奉三。無私殿。賜皇子諸王等宴。○乙酉。上詣
安佑宮行禮。御正大光明殿。賜朝正外藩等宴。召科爾沁和碩達爾漢親王。多羅額駙色旺諾爾布。和碩親王固倫額駙色布騰巴勒珠爾。烏珠穆沁和碩車臣親王。朋蘇克喇布坦。多羅額爾德尼貝勒。達什衮布。喀喇沁多羅都梭郡王喇特納錫第。固山貝子多羅額

駙扎拉豐阿翁牛特多羅都梭郡王布達扎
布阿巴哈納爾多羅貝勒達什敏珠爾喀爾
喀扎薩克圖汗巴勒達爾親王品級多羅郡
王車布登扎布貝子品級扎薩克頭等台吉
齊旺多爾濟尼魯特和碩親王多羅額駙羅
布藏多爾濟阿巴噶多羅卓哩克圖郡王車
凌旺布綽囉斯多羅郡王羅布扎回子郡王
品級多羅貝勒霍集斯輔國公圖爾都等至
御座前賜酒成禮

大清高宗法天隆運至誠先覺體元立極敷文
奮武孝慈神聖純皇帝實錄卷之七百五十二

大清高宗法天隆運至誠先覺體元立極敷文
奮武孝慈神聖純皇帝實錄卷之七百五十三
監修總纂官總纂官太子太傅文淵閣學士文淵閣領事領侍衛內大臣稽察欽奉 上諭事件處管理
吏部理藩院事務正黃旗滿洲副都統世襲騎都尉軍功加七級隨帶加一級尋常加二級軍功紀錄一次臣履桂
總纂官經筵講官太子太傅文華殿大學士文淵閣領事稽察欽奉 上諭事件處管理刑部戶部三庫事務
世襲騎都尉軍功加十九級隨帶加二級又加二級臣董福內大臣戶部尚書鑲黃旗滿洲副都統軍功紀錄五次
尋常紀錄十四次臣德瑛經筵講官太子少保工部尚書紀錄六次臣曹振鏞等奉
敕修

乾隆三十一年丙戌正月丙戌

上御正大光明殿賜大學士尚書等宴○諭曰
楊應琚現赴雲南有交辦事件著馳驛前往
雲貴總督劉藻奏據總兵劉德成等報稱
十二月十九日攻九龍江一路破賊營一座
二十日攻橄欖壩一路破賊營六座又據報
稱二十一日官兵行至猛往猝遇莽匪由山
箐夾衝將軍裝槍去遊擊明浩被賊鏢傷叅
將何瓊詔等不知下落隨差弁往查飛檄防
兵士練前往應援並咨會提臣達啟等相機

接應二十四日又據整控差弁面稟何瓊詔等已沒於賊查整控江有山僻小徑可至普洱府城軍需銀兩及火藥軍裝悉貯於此所係更重乃暫至普洱駐劄至何瓊詔等原令其在整控江防匪竄入乃不奉軍令妄圖邀功輕進致敗罪有攸歸謹由四百里馳奏得旨如此軍機何不即用六百里飛遞適又據常鈞奏報刁派先一案並有旨諭卿總之此事似不可中止小小懲創了事莫若大舉以

靖其源或俟兵威齊集再行進發亦可卿祇宜調度鎮撫攻戰之事應督催達啟奮勇為之綠旗兵已不足稱勇況土練乎若再加之詐偽更不可問矣此最宜留心者諭軍機大臣等劉藻奏進剿莽匪情形一摺已詳悉批諭矣該督因整控江有山僻小徑可通普洱因回至普洱府駐劄防守所見亦是但此等莽匪敢於抗拒官兵非小小懲創所可了事況綠旗兵本不能勵勇衝鋒而其素習詐

偽更不足信若調遣無多輕率前進既於征剿無益且恐賊匪輕視官軍轉得肆其猖獗該省各鎮協駐兵不下數萬自應調選精銳以供驅策此時不妨暫為整兵靜鎮俟各路兵調集後即行鼓勇前進扼要剿擒俾賊匪無從竄逸庶得盡絕根株以清邊徼至摺內稱十九二十等日由小猛養分兵渡江攻九龍江橄欖壩等處並有捷獲今按圖內道里詳為記誌則橄欖壩等處在小猛養之前猛

往在後官兵既分路剿截何以莽匪復得潛越小猛養渡江退至猛往竄伏以致衝散官兵明浩何瓊詔等有遇賊被傷之事其理殊不可解此非繪圖有舛即係所報不實著將朕硃筆記誌之圖發去該督細看自知仍著另繪詳細清圖註明貼說呈覽軍行要務奏報宜速此後如有應行奏聞機宜俱由六百里馳遞將此傳諭劉藻知之○又諭據常鈞奏永順邊境木匪滋事請俟普洱莽匪辦有

端緒再將孟連土司之案辦理一摺。所見亦是前於乾隆二十八年間。曾經降旨。以此等鼠竊狗偷。原屬不成事體。只可如此辦理。係就彼時情形指示。若匪徒敢於侵擾邊境。則當搗其巢穴。務使根株盡絕。自無容仍拘泥前旨。但普洱莽匪。現經劉藻率兵進剿。若將木匪一案。即於此時併辦。該處地壤相錯。恐致彼此勾連。難於速結。著將此摺鈔寄劉藻閱看。令其於辦竣莽匪之後。次第接辦。至劉

藻現在追擒莽匪。前已傳諭令其不得扭於書生之見。意存姑息。稍為寬縱。況總督既已親行督兵進剿。設復苟且了事。轉使此等醜類。罔知畏懼。何以申國威而示懲創。但劉藻本係文臣。軍旅非其所習。不必勉強臨陣。若居中調度。審機宜而彰賞罰。尚係力所能為。達啟現在同往普洱。伊身係滿洲。且曾經出兵。可責令其統率兵弁。鼓勇進剿。以期肅清邊界。該督辦竣此事後。即將木匪一案。嚴行

查辦。亦不得稍事姑容。草率完結。即該撫所奏孟連土司刁派先係緬甸國支裔。應襲土司之刁派。新時與緬甸往來一節。從前該督撫等何以並未奏聞。此種夷性。叵測使恣其交結。或致漢奸從中勾引。易滋事端。亦不可不防。其漸自應嚴行禁止。但現在辦理進剿事宜。此事不必急於查辦。俟剿滅莽匪後。該督撫等再就該處情形。會商妥協辦理。可將此傳諭劉藻常鈞等知之。○又諭現在征剿

莽匪。一應軍務。均須調度得宜。總督劉藻辦理地方事務。素屬妥協。然究係書生。未嫻軍旅。設於用兵。機宜稍有不當。既於剿賊之事。無裨。而用違其材。亦非朕所以成全劉藻之意。楊應琚久任陝甘。籌辦軍需事務。伊所熟諳。楊應琚著調補雲貴總督。吳達善著調補陝甘總督。湖廣總督員缺。即著劉藻調補。此旨且不必頒發。該督現在普洱調集官兵。督率攻剿。恐此旨一經宣示。未免屬員等意存

觀望呼應不靈所有一應軍務該督仍實心妥協辦理不可存聊待後人之心俟楊應琚到滇後再行一一交代起身赴湖廣新任著將此傳諭知之又諭曰楊應琚已調補雲貴總督由京馳驛赴滇劉藻調湖廣總督其陝甘總督員缺令吳達善調補但吳達善須俟劉藻到楚方能交代起身和其衷亦須吳達善到彼方能回任湖北巡撫印務現有吳達善兼攝湯聘署陝西撫篆務須隨時隨事實心經理不可存五日京兆之見致有貽誤

丁亥諭曰楊應琚奏請帶往雲南之都司薩克查縣丞周裕著一併馳驛前往戊子諭朕於二月初四日御經筵所有應行典禮各該衙門照例豫備諭軍機大臣等和其衷奏籌辦城工一摺內有東樂縣丞字樣東樂並非縣治何以該縣丞有東樂之稱且既稱東樂縣丞似以分駐之地得名非郡邑等地方可比何以又有所屬城垣其稱謂名義

均不可解著傳諭和其衷將該處情形查明覆奏雲貴總督劉藻奏據總兵劉德成連次報稱由大渡口進攻莽匪奪獲土鍋寨賊營一座攻破九龍江賊營三座叅將劉明智等分翼夾攻砍開白塔寺賊營一座土弁叭先捧率練追入雙龍寺賊營殺賊甚多官兵會合連踏賊營五座分兵搜伏將小渡口一帶賊營悉行焚燒乘勝奪回宣慰土城一座現在合兵暫劄江地俟探明賊巢再行進攻查莽匪東竄西突日集日多復於土鍋寨圍困官軍非大加攻擊直搗巢穴罔識國威且不乘此時添兵深入一屆三月瘴癘盛行官兵不習水土便難攻戰反致多糜帑項目前雖大挫其鋒而整哈猛遮等處尚多嘯聚整控江外土城亦多未平官兵不敷分遣隨加調提標楚姚開化等鎮營官兵及臣標兵約共二千餘名迅赴軍營剋期掃蕩得旨是迅速齊力前進不可徘徊誤事又奏據劉德

成報稱正月初七日晚間令遊擊施聖學遠熟悉路徑之土目暗渡躡山探得莽賊於整哈江岸把守極嚴江岸後有營四座去江稍遠不甚防備隨於是夜二更派土千把帶練攜硫磺焰硝火礮火箭等物由上流渡江抄出賊營後分伏左右又另派兵練於江外之蠻紅抄伏賊人歸路並派員保護糧石兼堵江口去後於初八日申刻據該遊擊等回稱昨渡江至四更甫畢分投潛伏土弁領練將火礮等物一齊引著拋入賊營火光併起伏兵齊出鎗礮併施賊衆亂竄被兵練斫殺及火燒鎗斃者徧野堵江餘匪聞聲赴援官兵堵截賊不能進復奔江岸被鎗傷斃無數查此次夜襲賊營斬殺甚多整哈渡已經打通但據稱猛遮一路賊匪恃險固守所得土司土城猛海猛阿猛往等處皆連營直接整控江岸應俟添兵到時方能一鼓蕩平直搗巢穴得旨小小之捷何足艷稱且綠旗虛詐之

習祇可信一半耳雲南巡撫常鈞奏永昌順寧二府屬邊外耿馬土司稟報探聞木梳木邦確情並孟連猛遮連界應次第查辦情形查莽匪木賊在外域原屬相連雖彼此各分畛域其實孤羣狗黨忽東忽西總恃其荒僻劫掠本無定向今據報木梳調練情形似實而日久安靜是該匪等詭詐謀為聲東擊西安知非別往外域滋擾又安知非現在九龍江猛遮等處之莽賊即係若輩且現有莽匪五十人至孟連要孟連助攻猛遮之事則彼此勾結已可概見邊防尤不可不嚴現札會督臣就近查詢現在占據猛遮之莽子是否即係召散木匪果否為追索召而起釁木梳木邦前調之練或仍有潛藏窺伺耿馬孟連之意亦未可定九龍江已報大捷賊匪聞風喪膽勢可解散其督臣續調之永順鎮騰越協營兵到日已可無須勦辦報聞己丑諭軍機大臣等據常鈞奏報攻勦九龍江捷

音一摺殊屬不知事體。已於摺內批示矣。叅將劉明智等攻打白塔寺賊營。不過鎗礮傷賊十數人。斬殺五十餘人。何足侈言全勝。且賊既敗衄。正當乘勝追擒。乃伊等暫駐九龍江。尚俟探明賊蹤。始行追剿。尤失奮勇直前之道。其稟內所敘穿紅穿綠等語。更為綠旗鋪張夸誕。惡習常鈞亦遂據稟報捷。實屬可笑。常鈞前在軍營。曾經大敵。何亦為綠旗習氣所染乎。至莽匪敢於抗拒官兵。劉藻統兵進剿。正當擣其巢穴。殲剿無遺。以申國威。而靖邊徼。且劉藻前此奏及明浩等於猛往地方遇賊被傷。常鈞豈未聞知。何無一語奏及。至劉藻續調之永順騰越鎮協各營兵丁。正可厚集兵勢。以期剿賊。而常鈞另摺有已可無須勦辦之語。尤屬非是。此事專交劉藻辦理。前已屢次傳諭。劉藻務遵朕旨。悉心調度。併力勦滅。盡絕根株。勿使復貽後患。即間有攻勦賊寨之事。斷不可徇於小勝。遂懈進攻。

若賊衆竄逸遠逃。亦不可不悉力窮追。使無免脫漏網。切勿草率了事。但聞該處三月以後瘴氣頗盛。若彼時尚未辦竣。不妨整兵稍待。俟可以進兵時。再行率衆進剿。以奏膚功。昨令楊應琚赴滇接辦此事。伊曾面奏莽匪木匪係屬兩事。今據常鈞奏莽匪木匪雖各分畛域。其實地屬相連。而狐羣狗黨。忽東忽西。本無定向。且木匪現在調集土練。彼此勾結。已可概見等語。則兩事實屬一事。著傳諭楊應琚。劉藻。常鈞知之。常鈞摺並鈔寄楊應琚。劉藻閱看。庚寅軍機大臣等議覆將軍明瑞等奏伊犁攜眷之滿洲錫伯索倫察哈爾厄魯特綠旗兵共萬餘名。又有屯田回人。此內有在城駐防者。有在外遊牧者。亦有隨所耕田地居住者。遠近不一。非內地可比。且伊犁地屬極邊。應存軍營體制。從前攜眷滿兵未至時。曾請設立印務處糧餉處駝馬處司員三缺。實缺筆帖式四缺。委署筆帖式四

缺又總辦各昂吉事務處揀派侍衛章京管理設委署筆帖式二缺遵行數年應照舊設立至司官三員尚不敷用請於効力贖罪人員內擇其妥幹者令其協理俟年滿回京本處辦事之人再請由部派往其發交各部落事件及揀派巡察等務令總辦各昂吉事務處管理侍衛章京委署筆帖式俱照舊例分別勸懲又伊犁領隊大臣從前惟管轄戍兵辦理糧餉俱係通融派撥今各部落官弁一切出納查記及呈報事件漸多於前不可無專辦人員請領隊大臣檔房內每部落各擇能書寫兵二名委為筆帖式一切俱照印務處之例辦理均應如所請從之吏部議奏前任江蘇巡撫今陞刑部尚書協辦大學士莊有恭題參蘇州府同知段成功並不據實嚴參巧為解怨市恩之地應照例革職兩江總督高晉扶同審結應照例降調得旨莊有恭於題參重案巧為解怨市恩如此居心豈

可復留綸扉之任著革去協辦大學士餘俟四達等審明到日再降諭旨高晉著革職從寬留任辛卯兵部奏侍郎五福家炭戶領票燒炭前於雍正元年停止王公炭票時既已朦混未經革除及五福身為大臣明知炭票不應請領又不報停以致領票辦炭之人藉端滋事應交部嚴議其炭票長遠停止諭曰五福身為工部堂官乃於早應革除之炭票不行停止以致匪徒認充炭戶影射生事

甚屬不合五福革去工部侍郎降為頭等侍衛管理圓明園茶膳房等處事務仍著嚴察議奏尋議頭等侍衛兼佐領五福應照溺職例革職得旨五福留頭等侍衛之任俟八年無過准其開復調吏部侍郎程景伊為工部侍郎刑部侍郎何逢禧為吏部侍郎以服闋甘肅布政使吳紹詩為刑部侍郎壬辰諭曰吳紹詩現在補授刑部侍郎伊子郎中吳壇例應迴避但吳壇辦事頗屬明敏勉力

為刑部好司官著毋庸迴避諭軍機大臣等據劉藻等奏木匪潛匿孟連界內該應襲刃派先捏飾欺朦現飭提訊一摺係在劉藻十二月二十六日所發進勦莽匪叅將何瓊詔等被傷及常鈞二十七日所發奏查木匪並刁派先與緬夷往來二摺之前此摺到京甚遲所奏情形已可毋庸置議業令楊應琚前往辦理此事前經降旨傳諭該督等先將現辦之莽匪盡力進勦搗其巢穴務使根株盡絕其木匪一案若於此時併辦恐致彼此勾連難於速結自當於莽匪勦定後次第辦理著傳諭楊應琚令其仍遵前旨悉心妥辦至現獲素領散撰之壻施尚賢係內地民人為莽匪姻黨膽敢探聽消息實屬漢奸不法之尤並令該督等嚴行根究自可得莽匪滋釁情形著將劉藻摺一併鈔寄楊應琚閱看並諭劉藻常鈞等知之癸巳以戶部侍郎王際華兼署工部侍郎甲午諭前因朱奎

楊孔傳炯原審段成功婪贓一案一任該員捏病狡飾其中必有授意指使之入當經降旨四達等令其嚴行究訊務得實情具奏今四達等訊據孔傳炯供段成功叅後飭審時曾經莊有恭面諭如果他家人書役不供出段成功知情得贓也就罷了又朱奎揚供面見莊有恭曾面諭段成功一案府審止係家人書役得贓段成功不知情可照此揭叅竊窺莊有恭意在從寬遂亦不加深究各等語此實出情理之外深可駭異矣朕初意莊有恭不過因離任在即為解怨市恩之巧計然亦不過隱躍其言後任審虛伊固可市恩即使審實伊可居救而弗得之名此尚外省所素有之惡習耳是以吏部議將莊有恭革任時僅將伊協辦大學士革去俟四達等查奏到日再降諭旨今閱四達等所奏此案之上下相朦俱由莊有恭授意指使以致臬司知府扶同欺混其居心欺詐若此實非意料所

及莊有恭從前學政任內接收大逆丁文彬逆書不行奏辦一案巡撫任內將應擬縲首之朱鼎擅行准罰外結一案已疊獲重罪皆經棄瑕錄用復加恩陞授尚書協辦大學士朕之施恩於莊有恭者有加無已苟稍有天良自應實心圖報乃於將次離任之時敢於叅審重案授意屬員巧為欺蔽深負朕恩此皆朕之不能以德感人以明識人深用為愧若再姑息其過何以董正天下督撫哉莊有

恭著革職拏交刑部軍機大臣會同該部嚴審定擬具奏又諭曰莊有恭前在學政任內有應罰未完銀兩曾經加恩寬免今莊有恭於段成功一案如此喪心負恩所有從前寬免之項仍著照數追繳諭軍機大臣等據劉藻叅奏何瓊詔等輕率渡江以致敗衄現將遊擊明浩拏訊究擬並請將伊及提臣一併治罪等語非此時應行急辦之事莽匪一案尚未明發宣布若遽將明浩等交部治

罪迹涉張皇於辦理機宜轉未妥協且綠營積習專以虛謊捏飾為事若不切實根究難以定其真偽即如前報何瓊詔與外委陶國興俱沒於賊今陶國興復又回營則前此之捏報可見至何瓊詔之死據伊家人將關防齎交自無疑義但何瓊詔是否打仗陣亡抑係窘迫自盡或因既經失事回營後畏罪自戕皆未可定種種情節劉藻等均未經細心查訊亦難定此案情罪應俟楊應琚到彼該

督會同逐一查訊確實再行奏聞請旨至現在添兵二千併力攻勦自屬要務劉藻即應迅速相機前進不必等候楊應琚以致徘徊誤事如能於三月瘴盛之前剋期掃蕩更為妥善即楊應琚到彼莽匪業已辦竣尚有木匪滋擾一事應須接續查辦以淨根株或此時適當瘴盛難於勦捕亦不妨緩至秋冬收瘴時再行酌量妥辦著將此傳諭楊應琚劉藻知之○又諭曰莊有恭叅奏段成功科斂

累民一案。經四達審訊。朱奎揚等供稱。係莊有恭授意該員。從寬了事。莊有恭深負朕恩。已降旨。拏交刑部治罪。所有廣東原籍及蘇州寓所貲財。著該督撫等。速即委員嚴行查封。毋任稍有隱匿寄頓。都察院奏遵旨查北城文案。存貯書吏家中。請即飭該城查明收存公署。得旨。都察院查奏此事。甚屬糊塗。著軍機大臣詢問明白。另行辦理。具奏。尋奏五城案卷。向不存貯公署。具呈人等。俱在漢

御史家呈遞。實屬相沿陋習。此次聞有查辦之信。遂聽書吏等潛行運送。是因循復加掩飾。應將該御史等。交部議處。嗣後都察院堂官。務飭各城案卷。俱貯公所。每日進署理事。接收呈詞。公同查辦。或遇昏夜緊急事件。始准在私宅接收。次日仍須赴署會辦。從之。署內閣學士徐以烜。以衰病奏請回籍調理。得旨。准其解任回籍。○乙未。諭向來各省督撫辦理案件。瞻徇欺朦。上下通同舞弊。習氣

最為惡劣。前歲湖北盜犯張洪順一案。經朕徹底查辦。嚴加懲治。以為各省督撫自應滌慮洗心。奉法惟謹。乃未及三年。不意又有罔上行私。毫無顧忌。如莊有恭之甚者。可見各省督撫之錮習。相仍牢不可破。段成功。詐擾累民。賊迹顯著。莊有恭身任巡撫。不思秉公叅究。轉授意臬司知府。令其委罪家人書役。巧為開脫。以遂其解怨市恩之計。居心欺詐。軌法負恩。莫此為甚。此而不痛加懲創。其何

以飭吏治而正人心。故將伊革職。拏交刑部。令軍機大臣會同審擬。外間無識之徒。未必不以此案較之湖北案情。為輕而處之。則同不知。張洪順祇係細民犯盜。愛必達等並非有意袒徇。乃因迴護已過。遂將後案延擱。然究未敢公然授意屬官。乃屬官承其意指。相與顛預了事耳。若段成功則身為職官。索詐部民情節。可惡。莊有恭惟知官官相護。罔知法紀。於查叅段成功時。輒先授意承辦之臬

司知府令其從寬開脫遂爾隱躍其詞以患
病被朦叅劾若非朕留心詳閱洞燭其奸則
貪黷擾民之段成功幾致倖逃法網是此案
之挾私舞弊實倡於莊有恭其罪更浮於愛
必達矣且愛必達已經發遣伊犁並不稍為
寬貸今朱奎揚孔傳炯供詞具在案情歷歷
如繪稍有知識者閱之尚能為莊有恭置一
詞乎昨四達等奏到即令軍機大臣將朱奎
揚等親供交莊有恭閱看伊惟俯首認罪並
不置辯其意不屑與屬員對簿自為得體不
知實小人之尤豈有如此重案聽其含糊認
罪而遂可成信讞之理因命軍機大臣等復
行傳旨訊問則又供朱奎揚等承查月餘延
候觀望直至莊有恭自行訪有款單札司轉
府拘審伊等始將家人書役勒詐得贓情弊
具揭又不將段成功自己標判廳票回明送
看等語所供情節亦係一面之詞難於憑信
即日朱奎揚等拏解到京彼此質証自可得

其底裏設稍有支吾掩飾亦何難加以嚴鞠
使之水落石出耶外省吏治弊端皆由督撫
不能正己率屬專以上下和同聯為一氣以
行其朦蔽欺詐之伎倆各省皆所不免而江
南為尤甚在伊等相習成風恬不為怪不思
此等鬼蜮形迹斷難逃朕洞鑒一經敗露惟
有力加整頓執法不撓務在廓除積習俾吏
治肅清該督撫等各宜猛省自愛毋得以身
試法將此通諭各直省督撫等知之又諭
曰託恩多著兼管工部尚書事務兵部事務
現有尹繼善兼管託庸到任後託恩多不必
兼管調署工部尚書李侍堯署刑部尚書
禮部尚書董邦達為工部尚書以左都御史
張泰開為禮部尚書吏部侍郎范時綬為左
都御史調兵部侍郎陸宗楷為吏部侍郎以
服闋廣東布政使史奕昂為兵部侍郎○丁
酉諭軍機大臣等四達等審擬段成功詐擾
婪贓一案請將從前保舉堪勝知府之上司

查明交部議處等語。和其衷從前濫行保舉段成功。按例自有應得處分。但聞段成功在陽曲縣任內。曾有虧空。當陞用同知離任時。上司代為彌補。若果有此等情節。則是和其衷因曾經保舉。遂為迴護。掩飾其咎更甚。不止於濫舉匪人矣。是否確實。著傳諭彭寶即行詳悉查明。據實覆奏。若彭寶以為事已既往。不行細究。以沽美名。他日或經發覺。恐彭寶不能任其咎。外省彼此掩護之錮習。今正

力除之際。彭寶當自審。和碩怡親王弘曉母兆佳氏薨。予祭如例。戊戌。

上詣長春仙館問

皇太后安奉

皇太后居暢春園。諭朕於二月初十日啟鑒

恭謁

東陵禮成。回次圓明園。恭請

皇太后安於二十二日前詣易州祇謁

泰陵所有應行典禮。各該衙門照例敬謹辦理

○禮部題朝鮮國王李昉遣使表賀萬壽。冬至元旦三大節。及進歲貢方物。賞賚筵宴如例。以阿巴噶郡王索諾木喇布坦子奈布坦。昌中襲封扎薩克多羅郡王。己亥。上詣暢春園問

皇太后安。庚子。諭軍機大臣等。今日刑部奏未獲遣犯劉八案內之解役楊銘等。分別治罪一摺。已降旨將該解役仍行收禁。再勒限一年緝拏。劉八係發遣烏魯木齊重犯。前在江西境內脫逃。至今經年未經弋獲。諒必仍在江西一帶地方潛行藏匿。該撫明山其飭屬一體密速嚴拏。務期就獲。不得視為通緝具文。致該犯倖逃漏網。著將此傳諭知之。○是月浙江按察使圖桑阿奏杭嘉湖寧台溫所屬各縣多係濱海近湖之區。竊匪恃有舟楫可通。朝東暮西。蹤跡靡定。地方官防範稍疎。即乘機出洋。結夥搶竊。現在嚴飭各屬。遴選幹捕。會同汛兵不時出洋協力躡緝。至浙

省州縣每以竊賊無幾率多杖責完結並不照例刺字故再犯三犯之人無可稽查俱以初犯計賊科斷殊非懲惡安良之道現飭各屬務遵初犯刺臂再犯刺面之例辦理得旨嘉獎○河東河道總督李清時奏上年冬南旺閉壩後汶水過多曾奏明於何家壩支河導汶入運由五空橋洩入大清河以消入湖水勢嗣於開放後汶水由支河宣洩甚為迅利民埝俱各穩固田無妨礙查節年運河挑竣南旺啟壩鋪水以待新運因汶水一派兩路分流鋪水恐有遲緩故於柳林閘北開關家大閘放南旺湖水以助北行柳林閘南開安居斗門放馬場湖水以助南行今汶河既減水由何家壩入運而捕河上河兩廳挑工業於歲前全竣乘南旺大壩未開將五空橋照舊堵閉即將何家壩導入之汶水先為鋪灌南旺迤北長塘各河現委幹員前赴臨清自北而南挨次鋪灌不患不足其關家大閘

可以毋庸開放至將來南行鋪水俟南旺大壩開時北行水勢已足應將十里閘下板使全汶之水匯注而南以鋪南行水勢汶水既不分流運河鋪灌亦易安居斗門亦可不開蓋此時湖水多一分儲蓄之功將來重運經臨即多收一分挹注之益得旨嘉獎

大清高宗法天隆運至誠先覺體元立極敷文奮武孝慈神聖純皇帝實錄卷之七百五十三

大清高宗法天隆運至誠先覺體元立極敷文奮武孝慈神聖純皇帝實錄卷之七百五十四

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履桂

總裁官經筵講官太子太傅文淵閣大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆三十一年丙戌二月辛丑朔遣官祭

關帝廟 旌表守正捐軀之雲南寧州民孫

元妻尹氏 壬寅諭前據劉藻等奏莽匪不

法侵擾土司邊界曾降旨令其嚴行勦捕勿

以姑息了事嗣據奏報攻勦九龍江橄欖壩

諸寨已獲全勝惟叅將何瓊詔遊擊明浩等

派赴整控江防禦該弁等不遵軍令冒昧渡

江以致遇賊失事彼時即疑所奏未必盡係

實情今據奏何瓊詔明浩前後回營因將伊

等叅奏審擬治罪已交軍機大臣會同法司

覈擬具奏第該督辦理此案情節甚屬含糊
紕繆何瓊詔明浩等委赴整控防堵莽匪前
至猛往遇賊敗逃又復說報身死此其法所
難宥處該督乃奏稱冒昧前進致失事機是
伊等反覺可嘉何罪之有夫伊等所謂貪功
輕進並非實情不過綠營虛誑欺飾故智耳
況該督所訊供詞於緊要情節全未問及即
如該督初報何瓊詔等俱歿於賊及伊家人
呈繳關防時即應詳究其是否打仗陣亡抑
係窘迫畢命或回營後畏罪自戕以定情罪
乃惟任弁兵張皇說報信為實事一切概置
不究及何瓊詔等陸續逃歸該督又不究從
前說報情由治以畏葸退縮之律尚信其一
面虛詞謂係輕進失事其何以申軍律而懲
欺罔乎即如何瓊詔所供架著藤牌撲殺并
稱被莽子刀戳其馬連馬滾跌入江之語試
思馬上豈能使用藤牌此其支吾捏飾難以
欺三尺之童者而劉藻竟坐受其朦混而不

覺不更可笑乎又如前此所報官兵六百人過江遇賊被傷約剩二百餘人陸續回營者一百餘人而此次奏稱現回思茅兵丁高士德等四百五十五名則合之前此回營之兵固所傷無幾且安知此未回之一百餘兵亦非敗逃藏匿則從前所謂遇賊被傷之說更不可盡信矣又前摺稱明浩等兵器皆馱載行裝猝遇賊人不及措手以致敗衄而此次摺內稱兩相對敵因火藥已盡勢不能支前後自相矛盾該督於此等喫緊關鍵處全不悉心根究何憤憤乃爾劉藻本屬書生軍行機宜非所嫻習故朕不肯責伊以所不能至於調度賞罰諸事尚可力為籌辦乃於審訊此案情節竟舛謬若此豈堪復勝總督之任劉藻著降補湖北巡撫達啟身為滿洲何至懵懂畫諾伊二人皆交部嚴加議處總兵劉德成著交楊應琚查明再降諭旨現今楊應琚前往接辦軍務楊應琚未到之先劉藻須

實力經理若稍存五日京兆之見以致貽誤事機必更重治其罪向因綠營積習浮誕不堪故西陲用兵全未藉此輩也今雲南一案如此可見伊等錮習全未能悔改各該督提等務須實力整頓毋稍姑息將此通行曉諭知之諭軍機大臣等劉藻前後奏報攻剿莽匪一案惟任綠營捏飾據稟具奏辦理全未允協已將伊降補巡撫並將辦理錯謬之處降旨宣諭矣此種莽匪竄跡山野鼠竊狗偷原屬不成事體何至令其肆行侵擾敢於抗拒官兵跳梁邊境皆由該督等平日不能實力整頓遇事嚴懲遂致匪徒積玩無忌釀成事端然此必非一朝一夕之故大約滇省諸務廢弛已久不獨劉藻現在辦理不善即從前吳達善等所辦恐亦未能妥協著交與楊應琚到任後詳晰查訪務得確情據實奏覆倘有不實不盡之處經朕別有訪聞或經發覺惟楊應琚是問本日所降諭旨並劉藻

各摺並著鈔寄楊應琚閱看著將此傳諭知之
鑲紅旗蒙古都統奏領催委署護軍校額琳臣在科布多地方打仗陣亡賞給雲騎尉世職應令伊子阿玉爾扎布承襲查阿玉爾扎布現在駐防伊犁距京甚遠應停其引見照例准其承襲得旨額琳臣之雲騎尉著阿玉爾扎布承襲命陝甘總督楊應琚以大學士管理雲貴總督調湖廣總督吳達善為陝甘總督以福建巡撫定長為湖廣總督調湖南巡撫李因培為福建巡撫雲南巡撫常鈞為湖南巡撫湖北巡撫湯聘為雲南巡撫
癸卯

上詣暢春園問

皇太后安還宮遣官祭昭忠祠諭向來

綠營兵弁專以欺誑捏飾為事積習相沿不知悛改在伊等平時不過隨營差操其選悞狡詐之故態尚無由敗露間或遇有調遣之事不惟惶怯無能且一味張皇虛憊以掩飾

其畏首畏尾之情如劉藻等辦理勦捕莽匪一案何瓊詔等奉委赴整控江防堵賊匪乃將兵器捆載行裝將弁等徒手散行遇賊衝出敗潰奔逃復又謊報陣亡希圖隱飾是其咎無可逭處劉藻不問其懦怯失機之罪轉謂其貪功輕進以致失事與此案情罪全屬相反此於軍伍士心大有關係試思何瓊詔等如果希冀邀功輕率前進猶近於奮勇者之所為即使猝遇敗衄其心尚覺可嘉方且為之憐憫又何罪之有前此辦理西陲之事官兵等勇往前稍著勞績者朕必特加獎賞初不僅以成敗為功罪即如兆惠明瑞未嘗不因輕進失挫然當日不惟不加之罪且更錄敘其功蓋勝負為行軍之常非可逆料而勇往銳進乃將士克敵致果之方軍律當視此為賞罰劉藻即未嫻軍旅豈於臨敵勵勇之大義亦未之前聞乎乃劉藻初報以為冒昧前進俱歿於賊繼乃奏其不備失機之

狀繼又叅其潛行逃歸而終以貪功輕進定罪天下豈有貪功輕進之人而甘心逃竄者乎即如何瓊詔供架藤牌撲殺所騎馬被賊刀砍連馬跌入江內藤牌非馬上之器不可以欺三尺童子且人與馬皆跌入江即不溺死亦應被馬壓致重傷尚能無恙逃歸乎其無恥誕妄可知則前此所謂貪功輕進等語悉出於詭飾此實綠營欺罔惡習不可不大加懲創是以將何瓊詔明浩楊坤等立正典刑並將辦理錯謬之總督劉藻降補巡撫與情懂畫諾之提督達啟一併交部嚴加議處若不明白宣諭恐綠營軍士狃於錮習不知何瓊詔等獲罪之由相率而以輕進為戒退縮不前以遂其苟免自安之計將綠營情竄之風從而益甚其所關於軍政者更大朕素知綠營習氣不堪是以平定準夷回部俱選用滿洲索倫蒙古厄魯特以致克奏膚功並未嘗少藉綠營兵力但內地各省皆係綠旗

標營平日養此輩原以備征調之用如任其詭譎相沿不加整頓又豈能概令其安坐營汎置之不用徒爾虛糜廩餉乎綠營錮疾至此若復聽其故智譁張何以肅軍紀而飭武備著再通諭各省督撫提鎮等一體嚴飭各營痛加湔洗一矯從前浮詐之弊倘仍視為奉行故事不實力振作斷難逃朕洞鑒必當重治其罪勿謂言之不豫也諭軍機大臣等劉藻已降補湖北巡撫俟楊應琚到滇交代後即赴湖北新任彼時定長如尚未到楚劉藻可暫攝總督事務令吳達善前往陝甘總督新任吳達善到任後和其衷仍回西安湯聘再赴雲南巡撫之任楊應琚現在辦理軍務所有巡撫應辦地方事宜自難兼管著湯聘未到任之前或須仍留常鈞在滇辦理著楊應琚酌量行之李因培此時亦不必即赴福建俟常鈞交代到任後再自湖南起程赴任以刑部尚書舒赫德署步軍統領

甲辰以舉行仲春經筵遣官告祭
奉先殿

傳心殿

上御文華殿講官暨侍班之大學士九卿詹事
等行二跪六叩禮分班入殿內序立直講官
四人出就講案前行一跪三叩禮復位直講
官蘊著彭啟豐進講論語無適也無莫也義
之與比三句講畢

上宣御論曰此孔子訓君子以應天下之事而
有天下之責者尤當拳拳服膺不執一己之
見惟以義為權衡而弗失也孔子嘗云無可
無不可而此云無適無莫者何蓋孔子聖之
時從心不踰發皆中節以言乎仕止久速猶
其小焉者若夫君子之於天下其晰理或未
純精義或未當而亦欲信心應變則謝氏所
謂猖狂自恣矣故主於必為則是適宋神宗
之於王安石是也主於必不為則是莫漢惠
帝之於曹參是也雖清靜之畧勝滋擾然其

不比於義而有所偏則一也吾故曰有天下
之責者尤當拳拳服膺不執一己之見惟以
義為權衡而弗失也講官暨侍班官跪聆畢
興直講官觀保王際華進講尚書皇建其有
極斂時五福用敷錫厥庶民三句講畢

上宣御論曰建極斂福不必定指壽富康寧之
類且九疇已對言之何獨於五而又引而未
發也蓋五既為皇極有君道焉君者為人倫
之極五倫無不繫於君則五倫之敘即為君
者之能建極而斂時五福以錫庶民也其或
風俗澆漓君臣父子夫婦昆弟朋友之間不
能盡其道而協其倫則是皇極之建有未臻
夫極以期天下之治其難矣天下大矣兆民
衆矣以此之大以此之衆而有一不能敘其
倫者皆人君之責也敘是五倫斂是五福以
建皇極豈易言哉豈易行哉講官暨侍班官
跪聆畢大學士尹繼善劉統勲奏曰

皇上垂訓以宋王安石為適漢曹參為莫皆不

比於義而有所偏仰見

聖心精義入神直契堯舜允執厥中之旨矣至論皇極之五福不必定指壽富康寧五者而直提五倫之敘即為皇極之建此在漢宋諸儒未曾有窺見及此者臣等幸侍

講筵親承

聖訓不勝榮幸之至奏畢諸臣出就拜位行二

跪六叩禮禮成

上還宮遣官祭

先醫之神諭此次掃雪步軍千總步兵景山等處閒散樂善園等處園戶匠役等俱照前例賞賜○乙巳諭前因各省奏報動用耗羨章程各摺批交該部知道者仍令戶部按例查覈辦理不得僅以動支各數存案了事並令將辦過准駁各案於年終彙奏至於吏部甄別教職佐雜兵部之千總俱定以六年俸滿分別保薦留任勒休並令各督撫於年終彙奏原恐督撫等或曲意姑容致有衰庸

應機是以批令該部知道以便比較查覈若一概存而不論則亦無庸批交該部矣蓋此等甄別年滿員弁其列入保薦者合例與否俱由部覈議請旨惟例應留任之員該部祇照督撫等所議存案向未復加察覈但各員弁分別留任初次定以六年迨下次再行甄別時前後已有十餘年之久其中豈無衰邁龍鍾年歲已逾定例之人若該督撫等或因循姑息不行裁汰該部又以向無查覈之責

聽其朦混濫竽殊非覈實官方之道嗣後著各該部遇有此等照例彙奏事件及一切督撫等題奏經朕批交該部知道者將應否准駁之處俱於年終詳查覈議具奏諭軍機大臣等熊學鵬奏書役黃模在監自縊一摺已降旨將典史拏問知縣革職暨該管各上司交部嚴加議處矣黃模係侵蝕錢糧應斬重犯理宜嚴加看守留心防範何至令其乘間自戕獄卒人等有無知情賄縱情弊固應

詳晰嚴究。至此等狡獪奸吏積慣舞弊鬼域伎倆何所不至。安知非聞有定罪之信。妄思李代桃僵。覓人替死。潛行免脫。著傳諭熊學鵬令其詳加覆驗。是否該犯身屍。並確實訪查。有無頂替脫逃等弊。據實覆奏。不可朦朧了事。尋奏黃模在仁和縣監內。先與諸暨案犯同禁一處。嗣於正月十一日。該犯腹瀉污穢。別犯嘔吐不堪。叅革典史孫良爽將該犯另禁一房。至十三日五更。禁卒睡熟。致被自

縊。訊無賄縱及頂替脫逃等弊。得旨覽。是

日起。

上以祭

社稷壇齋戒三日。丙午諭蒙古內元清吉斯汗之裔均係博爾濟吉特氏。而元史內稱元帝為奇渥溫氏。以漢字譯蒙古文間有語音不合處。然亦不至如此河漢。現在校正史書。書內外誤甚多。而污蟣蒙古之語亦不一而足。不可不為之湔雪。成衮扎布係喀爾喀舊

人或伊得自傳聞。或該處舊有記載。著傳諭令其查明具奏外。並交理藩院亦行文內扎薩克查伊等有無傳聞記載之處。令其各自聲明報部。由部彙題奏聞。禮部議准。浙江學政錢維城奏稱。貢監執照詳載履歷。藉以稽查。而從前工部水利及營田等舊例。無年貌三代。且僅有實收。並無部照。甚至有康熙四五十年執照。尚持以赴考者。殊難憑信。請勅部通行直省。將此等速年執照限一年內

呈繳。由州縣彙送學政咨部。換給逾限除名。至生員加捐貢監。例應驗照。開除近來多有不行呈驗。以致積欠三考。斥革者。請以領照半年為限。如逾一年。即行註銷。再浙省各寺廟均有生監主持。名為檀樾。緣伊祖先在寺曾有創助。以致彼此爭據。甚至合寺田產皆歸掌握。請勅部禁除檀樾名色。以端士習。而清訟源。從之。琉球國中山王尚穆遣使表貢方物。頒勅宴賚如例。丁未祭。

先師孔子。遣和親王弘晝行禮。諭曰。尚書舒赫德現在命往甘肅合水縣有查辦事件。著馳驛前往。所有隨帶司員俱著一併馳驛。又諭曰。侍郎四達現在命往山西一帶。有查辦事件。著馳驛前往。其隨帶司員。著一併馳驛。○諭軍機大臣等。據御史周於禮奏。莽匪情形一摺。該御史藉隸雲南。所奏或無所見。著將原摺鈔寄楊應琚。令其閱看。將摺內各情節。逐細查明。如有應辦之處。即行斟酌辦理。倘地方官果有辦理不善之事。亦著一併查叅。將此傳諭知之。又諭曰。段成功前於山西陽曲縣任內。現有應行質訊之事。著明德速即選派妥幹員弁。小心鎖押解往晉省。交與該撫彭寶收審。沿途務須嚴密加意防範。倘途中稍有疎虞。或致畏罪自戕等事。惟該撫是問。將此傳諭知之。○又諭據常鈞奏。劉藻調取各鎮協營官兵。有調至中途停止。撤回者。或初調赴此處。中途改赴彼處。

更有已改赴彼處。仍令赴此處。并再撤回者。此等兵丁並未到營。其沿途應付口糧鹽菜等項。向無開銷之例。先行據實奏明等語。所奏大不是已。於摺內批示矣。此等兵丁口糧例不應銷。即應將司道等原調駁回。按例辦理。至妄調妄撤糜費口糧。其咎自在劉藻。今不治劉藻之罪。已屬加恩。此項妄費銀糧。即著令劉藻賠補。亦分所應得。常鈞何慮款項無著。而先行入告。豫留站腳地步。以取巧耶。至臺站齎送奏章。如事關緊要。軍務難於遲緩者。自應由六百里馳遞。若同日所奏之摺。俱係尋常事件。即三四百里傳送。亦無不可。乃亦急於馳報。殊屬不知輕重。至莽匪侵擾土司邊境。並非大事。而伊等過於張皇。亦屬非是。常鈞著傳旨申飭。此摺並鈔寄楊應琚閱看。將此傳諭知之。○吏部議覆廣東巡撫王檢奏。海疆為盜匪所聚。外洋之緝捕宜嚴。內地之稽覈尤重。蓋洋盜雖出洋肆劫。而糾

約夥黨製造器械皆在內地經營該州縣如果嚴行保甲實力查察匪徒豈能藏匿除盜犯並非本地者仍照向例議處外其土著居民及流寓匪徒由該地方出口行劫者將專管及兼轄統轄各員均照編排保甲不實力稽查例議處應如所請嗣後海濱地方城鄉口岸漁船會聚之所均照保甲編立字號出入嚴查遇有該地方洋面失事之案分別降調降留從之○以吏部尚書託恩多署步軍

統領以鑲黃旗漢軍叅領楊德蔭為鑲藍旗漢軍副都統仍署鑲紅旗漢軍副都統○戊申祭

大社

大稷

上親詣行禮詣暢春園問

皇太后安○幸圓明園○已酉

上御勤政殿聽政○庚戌春分朝

日於東郊遣裕親王廣祿恭代行禮○

上詣暢春園問

皇太后安○自圓明園啟鑾謁

東陵○諭軍機大臣等熊學鵬奏查拏逆犯吳卜元等一摺已於摺內批示矣該犯等居住深山膽敢聚匪製旗書寫悖逆字句及兵役往拏復敢持械拒捕傷差實屬法所難貸自應嚴行窮究以示懲儆該犯演拳抗法不過愍不畏死之徒觀其符書裒積成帙似非若輩所能為必有畧識文字之人為之主張蓄

謀為匪諒非一朝一夕之事其黨羽傳播恐亦不止此數人該撫務悉心查究盡絕根株雖不可干累無辜亦斷不可使逆黨漏網閱旗內有李元霸之名何以摺內並未言及是否實有其人抑係託名捏造正當詳悉確查使案情無稍遁飾豈可竟置之不問至吳行三首報之逆犯係吳卜元為首摺內復有逆犯吳有功等之稱此案究係何人為首亦未備細聲敘其現獲各犯又未將首從名姓分

別臚列種種情節均未明晰著傳諭熊學鵬將已獲之犯速行審擬正法如此外尚有應行查辦之處務須詳加根究毋得草率了事並將摺內未經聲明各情節逐一查明據實具奏○又諭曰和其衷奏查審合水縣災民開堂罷市一案及派往雅爾屯田兵丁事宜二摺雖已批示仍著將和其衷原摺寄舒赫德閱看如有應行辦理之處即行查辦○四川總督阿爾泰提督岳鍾璜奏據維州副將

同知稟稱上年十二月二十五日半夜聞黨壩額洞一帶鎗聲不絕隨令該土司前往接應見金川番衆聚集圍攻并於格藏嘉噶爾河設卡截斷額洞道路至二十八日將額洞攻破占據用礮轟擊黨壩格藏官寨經劉綽斯甲布千總索國璉撥兵救援又於正月初一日催到從噶克土兵援助已將金川新設營卡攻開番衆現據額洞山梁拒守又據打箭鑪遊擊同知稟稱十二月二十八至正

月初一二等日金川同布拉克底聚衆攻圍巴旺卡卡角燒燬寨房殺擄人口詢係巴旺頭人陸塔爾弟兄勾引現飭革布什咱等土司星速赴援初四日與金川戰於羅哩地方奮力擊退等語查黨壩巴旺地小兵單今被金川分路滋擾亟須援助現飭綽斯甲布三雜谷小金川革布什咱各土司併力協攻務期捷勝得旨看此光景金川又畧有猖獗之勢究當如何制勝不可隱飾姑息是日駐

蹕烟郊行宮 辛亥

孝康章皇后忌辰遣官祭

孝陵 諭曰四達等審擬段成功詐擾婪贓一案請將從前保舉堪勝知府之上司查明議處段成功係和其衷所保按例自有應得處分但聞段成功在陽曲縣任內曾有虧空當陞用同知離任時上司代為彌補朕以為若果有此情節則和其衷之罪更不止於濫舉匪人是以諭令彭寶確實查奏今據奏到段

成功於陞授同知時。虧空銀一萬兩以外。上司知情彌補。俱屬確實。此事可謂大奇。從前蔣洲虧空庫帑。勒派婪贓一案。經朕大加懲治。方謂凡有人心者。皆當知所儆懼。而晉省覆轍在前。尤當引以為戒。不意未及十年。復有上下關通。營私欺罔。若和其衷之甚者。實出朕意料之外。是其罪較莊有恭更重矣。莊有恭奏段成功時。故為隱躍。其辭市恩解怨。已屬有心取巧。和其衷明知屬員虧空盈

萬。不但不叅劾究治。轉為出貲。伙助掩飾。彌縫。其玩法欺蔽之罪。尚可貸乎。若和其衷因曾經保舉。恐叅出虧空。致罹罪戾。不知上司保舉屬員。豈能保其終身之必無過失。或當時見為能事。則登之薦剡。及其劣蹟昭著。即予以糾劾。原屬兩不相妨。且以見封疆大臣立心公正。朕方嘉予之縱使。議以濫舉處分。亦不過止於降調。朕尚予以從寬留任。從未因此等吏議。將舉主遽行罷斥。和其衷久膺

外任。豈尚未深知。而必欲為此委曲隱蔽之事。殊不可解。且段成功僅一縣令。何至虧空如許之多。即云首邑用度較繁。亦不應妄費若此。而通省各上司。何以互相容隱。竟無一人舉發其事。和其衷甚至給銀五百兩。代為湊補。是段成功平日必有交結逢迎之處。不可不徹底根究。若和其衷竟受其餽送。遂爾曲意周旋。則更不能稍稽刑憲矣。和其衷前此曾獲重懲。經朕棄瑕錄用。擢至巡撫。竟敢

如此徇私。藐法深負朕恩。和其衷著革職。拏問。派四達前往山西。會同巡撫彭寶將此案各情節。秉公嚴審。定擬具奏。並著舒赫德前往甘肅。將和其衷鎖拏。就近訊問。明確即遣委幹員押解山西。質審。至文綬係專管錢糧大員。明知屬員虧空。縱容彌補。劉墉係親臨知府。並不揭報。虧空通同容隱。按察使藍欽奎前任冀寧道。富勒渾知情不舉。均非尋常徇庇可比。俱著革職。交與四達等將有無授

意及助銀彌補之處一併究審朕辦理庶務從不豫設成見凡有重大情弊莫不自行敗露即如莊有恭題奏段成功本進呈時朕閱其情節可疑交軍機處題奏嗣經高晉審擬舛謬親加指駁遂得實情至段成功虧空一案伊等自以隱飾為得計不期事閱年餘仍然水落石出可見欺誑營私之事天理難容日久自然發覺不獨內外臣工均當深知畏懼即朕披覽此等案牘益覺彰瘴昭然若有

使之者亦用自惕然矣著將此通諭中外知之尋四達彰寶覆奏段成功僅一縣令且在陽曲半載輒虧空銀一萬兩以外則平日結交餽送必有隱情且查出庫簿開載幫銀州縣共三十二處在交代限內即能彌補足數苟非上司授意焉能迅速齊全容再逐層根究庶無滲漏再段成功陞用同知離任時係鎧宜祿接署因鎧宜祿旋陞甘肅平涼府知府未經收清出結但侵虧何項及如何湊交

還庫各情由該署令必知詳細亦應咨提解晉質審以成信讞得旨既已水落石出不難窮源到底惟應得其實情少有假借惟汝二人是問又諭陝甘總督印務著舒赫德暫行署理俟吳達善到任後再行來京明山著調補陝西巡撫江西巡撫員缺著吳紹詩補授所遺刑部侍郎員缺著周煌補授吳紹詩到任後明山即赴陝西巡撫之任湯聘侯明山到任後即赴雲南新任山西布政使員缺

著喀寧阿補授山西按察使員缺著吳虎炳調補江西按察使員缺著揆義補授山東按察使員缺著勒爾謹補授諭軍機大臣等劉藻奏覆總兵劉德成辦理軍務情形並抽撥調換各營兵二摺不但於用兵機宜毫無頭緒即所奏情節亦俱不甚明晰如摺內稱總兵劉德成既不能先事豫防又不迅速稟報請兵勒逆以致賊匪猖獗等語總兵身膺專閫未能早為防範又不即據實申報自屬

罪無可辭。但地方遇有此等要務。一任總兵悠忽玩視。漫無查察。又是誰之咎。看來莽匪敢於跳梁邊境。抗拒官兵。必係地方官平日不能防於未形。釀成事故。養癰諱非一日。豈得僅諉過於現在。辦理不善之總兵乎。又據稱省兵六百名。除前回普洱思茅四百五十五名之外。連日又有續到者。前劉藻奏省兵高世德等自猛往失事。回至思茅之時。朕即降旨。謂此未回之一百餘名。安知非亦係敗逃藏匿。今果不出朕所料。可見伊等渡整控江時。徒手散行。全無紀律。突遇賊人衝出。星散逃奔。是前此打仗受傷之說。益不可信。緣營狡詐伎倆。實不能逃朕洞鑒。劉藻則受其愚而不覺耳。且摺內祇稱省兵六百名。並未聲明何項兵丁。而續回實有若干人之處。亦未詳悉申敘。尤屬含混。至所稱廠棍漢奸雜入莽匪滋擾於軍務。甚有關係。此輩俱係內地民人。膽敢附入外夷。勾引滋事。實屬罪大

惡極。若不盡法處治。以示懲創。何以申國法而儆兇頑。現在楊應琚奉命前往辦理莽匪。其雜入之廠棍漢奸。務須搜剔根株。俾惡黨均伏顯誅。不可稍存姑息。而縱容若輩得以混入莽匪為亂。亦必有應任其咎者。並將劉藻摺內未能詳晰各情節。一併查明具奏。著將此傳諭楊應琚嚴查叅究。○又諭去歲據明瑞阿桂等奏擬各回城章程。請交各阿奇木伊什罕等查覈回人戶口數。冊存案。以均差務等語。已交軍機大臣議行矣。但各回城俱係新定地方。非內地可比。今若按鄉逐戶查覈。則回人等不無疑懼。且村莊過多。各城大臣等斷不能親詣週查。不得不委之屬員。不肖輩轉得藉此擾累回衆。甚屬不便。著傳諭永貴額爾景額轉諭各城大臣等。仍照舊例辦理。不必定限查覈。再回城男丁十二歲以上者。即登名派差。雖係舊例相沿。亦屬過當。嗣後著照內地之例。十六歲以上者

再令登派將朕施恩之處通行曉諭回衆知之○又諭曰阿什默特因在和闐地方縱令屬下回人呢雅斯等騷擾獲罪併伊妻子解京○因應照例懲治○念伊從前在軍營頗著勞績著加恩仍授公爵○令其在京居住與額色尹等一體賞給俸銀米石○仍交內務府酌辦房間賞給○是日駐蹕白澗行宮○壬子駐蹕隆福寺行宮○癸丑

上謁

昭西陵

孝陵

孝東陵

景陵俱未至碑亭即降輿慟哭步入

隆恩門詣

寶城前行禮躬奠哀慟○王以下文武大臣官員

隨行禮○至

孝賢皇后陵奠酒○是日駐蹕桃花寺行宮○

甲寅駐蹕盤山行宮○至丁巳皆如之

大清高宗法天隆運至誠先覺體元立極敷文奮武孝慈神聖純皇帝實錄卷之七百五十四

實錄卷之七百五十四

七

大清高宗法天隆運至誠先覺體元立極敷文奮武孝慈神聖純皇帝實錄卷之七百五十五

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事務處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣等謹

總裁官經筵講官太子太傅大學士文淵閣領閣事稽察欽奉 上諭事務處管理刑部戶部三庫事務

世襲騎都尉軍功加十九級隨帶加二級又加二級正黃旗內大臣戶部尚書鑲藍旗滿洲都統軍功紀錄五次

尋常紀錄十四次臣等謹將經筵講官太子少保工部尚書紀錄六次臣等謹將奉

敕修

乾隆三十一年丙戌二月丙辰遣官祭黑龍

潭

昭靈沛澤龍王之神王泉山

惠濟慈佑龍王之神○浙江巡撫熊學鵬奏

寧波府鄞縣吳家山逆犯吳卜元等製旗習

拳拒捕殺人一案將各犯刑訊並於幼孩女

子中設法哄誘質証始據供所鈔邪書得自

吳爾康處所演神拳學自石廷揚處逆旗係

吳允明等所造旗上字樣係吳成楨所書成

楨即卜元之子所寫六水趙保天兵扶黑四

將等語俱不能供出原委其符書惟吳卜元能背誦五公之符一段十二句餘犯堅供俱未誦習其起意謀逆者係已死之吳有功吳成楨吳允明並現獲之吳卜元隨從入夥者係已死之吳德裕吳兆美吳德一蔡子成並現獲之吳國孝吳加福張本基張本三吳阿耀吳德章吳成忠此外別無羽黨亦無散割情事各供已得大概而該地情形及謀逆根株仍須親往吳家山查察訪究俟辦畢回省

另奏得旨所辦好餘有旨諭諭軍機大臣等熊學鵬奏查拏逆犯吳卜元等一摺所辦頗是吳爾康傳播邪書石廷揚教演打拳實為此案緊要人犯現在既委按察使圖桑阿就近查拏二犯自可即就弋獲或該犯等豫行聞風避匿必須實力留心躡緝毋任免脫遠颺吳爾康係吳卜元同族石廷揚又係其姐夫二犯蹤跡吳卜元知之必確正可向其推問自不致倖逃法網至吳成忠所供符書乃

土內創出之語顯係為吳爾康豫存開脫地步斷不可信以為實符書哀積成帙必非鄉野愚民所能辦其中必有畧識文字之人為主張吳爾康拏獲到案時務須嚴訊確情逐一根究以絕根株此等狂悖奸民實戾氣所稟自絕生成原屬不成事體然既經干犯大逆自當盡法嚴治顯申刑典以儆頑梗而靖人心至附近居民聞逆犯拒捕之聲陸續聚集幫同兵役往拏其為平日守分良民可知而此次之踴躍急公向義尤可嘉尚著該撫查明與首報之人被害之家一體傳旨從優獎賞所有地方文武員弁辦理此案並非自行訪聞無庸送部引見但一聞首報之信即督率兵役親赴該處將現在逆犯拏獲尚屬黽勉仍著查明請旨交部議敘其在此受傷兵役亦著查明獎賞可將此傳諭熊學鵬知之尋奏吳爾康石廷揚等已經拏獲查究符書來歷據吳爾康供係伊故伯吳進寶遺

留鈔本因見吳德裕演習神拳供設五公牌位即以伊家存有五公經告知吳德裕隨向其取去吳允明吳有功各行鈔寫恐另有正光藏匿復細查吳家山共有七十餘家皆習耕種並無讀書教學之人惟吳允明吳有功畧知文義而允明稍勝似無另有人主張謀逆看來此書藏留已久而鈔錄間有不同字句係吳允明添改則二人起意謀逆無疑又神拳香灰據吳卜元等供得自石廷揚家已各有根源可追供認明確即將逆犯吳卜元等分別首從辦理至附近居民陸續聚集幫同兵役往拏誠為踴躍急公遵即查明與首報之人被害之家一體從優獎賞其應議敘之文武員弁查明另奏得旨覽奏俱悉○戶部議准四川總督阿爾泰奏稱敘州府屬之屏山縣界內大竹堡一帶荒地勘明可墾田十萬六千六百餘畝應招民開墾并將已墾田分別水旱照例升科至開墾處所距縣三

百餘里。田倍縣額一切納糧善後事宜。需員專辦。請將敘州府通判移駐馬邊。仍將附近馬邊之川秧蕎壩上下溪地方。劃歸管理徵收。從之。○以故扎薩克多羅貝勒達爾漢岱青朋蘇克子諾爾布扎木素。照例襲封。○丁巳。諭雲南普洱鎮總兵員缺。著寧珠補授。不必送部引見。○諭軍機大臣等。據劉統勲等將審訊莊有恭朱奎揚孔傳炯供詞呈閱。其中情節。尚未能詳細推究。即如孔傳炯供。係

五月間。即將段成功藉端擾累之事。稟知巡撫朱奎揚。亦供於六月初八日。始將訪單轉發飭稟。莊有恭至七月初八日。始將訪單轉發飭審。既係府司等稟知在前。何以莊有恭又稱係伊先得之訪聞。至莊有恭原發款單內。即有段成功差後患病。諸務廢弛。一任家人書役肆行擾詐等語。是患病之說。莊有恭已先見之紙筆。豈得盡委過於屬員。著傳諭劉統勲等。將以上各情節。悉心根究。務得實情。毋

使案情稍有遁飾。○又諭據永貴等奏。現在前往烏什駐劄。令綽克托暫駐阿克蘇。俟一切事務就緒後。俱移駐烏什等語。昨因玉素布回哈密。曾降旨令額敏和卓赴葉爾羌。與額爾景額一同辦事。又令綽克托赴喀什噶爾。與栢琨一同辦事。綽克托奉到朕旨時。如阿克蘇必需駐劄辦事之人。即著訥蘇肯暫往。若不需人。即仍留烏什。○軍機大臣等議覆原署陝甘總督和其衷奏。稱籌辦換防官

兵應領馬匹。上次領兵官係撥給臺馬乘騎。兵役行李。由肅州雇車載至哈密。再撥給馬駝。送赴各處。今哈密及附近之巴里坤。現存馬匹甚少。不敷支應。且回城地方不宜駝隻。請將附近之甘涼肅各營馬。均勻撥用。並照例一駝折給二馬。由哈密送往烏什。應如所奏。辦理從之。○戊午。諭軍機大臣等。前因劉藻辦理莽匪一案。種種不合機宜。已令楊應琚補授雲貴總督。前往接辦。楊應琚到滇。恐

尚需時日。現在正當調兵進剿之時。劉藻於一切軍務。並須實心經理。不可稍懷畏沮。貽誤事機。俟楊應琚到任交代後。方可完彼分內應辦之責。若此時豫存五日京兆之見。諸事不復經心。則是自速罪戾。朕必不能更為曲宥矣。可將此傳諭劉藻知之。○又諭。此次經行道路。見辦差官員甚多。因詢之布政使觀音保。據稱。

東西兩陵。調派辦道查道諸務。自道員以下。以及府廳州縣佐雜。共二百五十餘員等語。朕恭謁。

兩陵。蹕路所經。不過近畿數百里以內。且為日無多。沿途止須除道清塵。各該地方佐雜各官。足供料理。即欲調他屬協辦。亦當有所限制。何須如許多員。往來僕僕。著傳諭方觀承。嗣後此等差務。止許調取四五十員。不得仍前多派致曠地方公事。○又諭。據吳達善奏。江陵縣差役拏獲巴里坤逃犯熊邦受。係行

刦客民任維獻為從之犯。訊據該犯供稱。於乾隆二十九年七月初一日。與另案江蘇遣犯王有名。在巴里坤同逃。至直隸東光縣地方分路各走。王有名本係金姓。有兄金大金。二在揚州鄉裏居住等語。此等發遣盜犯。原係免死減等之人。乃怙惡不悛。尚敢潛行逃竄。實屬法所難寬。除熊邦受業經該督照例正法外。其王有名。即金三一。犯伊兄。既在揚州居住。未必不私投彼處藏匿。著傳諭高晉。

即行密飭地方官。躡緝務獲。毋致漏網。吳達善摺。並著鈔寄閱看。○又諭。曰。劉藻等於攻勦莽匪一案。種種辦理不善。已屢經降旨飭諭。今日又據劉藻奏。覆該處情形二摺。其含糊紕繆之處尚多。如所稱達啟。即遵諭旨。親赴軍營督勦之語。不但劉藻不知事體輕重。即達啟亦大不是。達啟身任提督。且係滿洲。遇地方有攻勦逆匪之事。自應統率弁兵。身先奮往。豈有俟旨始行之理。試問伊前此安

生何處所辦何事而必待朕之降旨督促耶至叅將何瓊詔等以徒手散行漫無紀律遇賊衝出逃竄潛歸是其罪無可逭處乃劉藻始終深信綠營捏飾之詞謂其貪功失事於伊等情罪全屬相背尤為憤憤如果貪功輕進方當嘉其勇往豈肯均置重典耶前降諭旨甚明劉藻此時諒亦悟從前查辦之外誤矣又奏孟連土司地方上年時有莽子往來查據刁派先稟稟內有先係緬甸支裔之語

此在滇九載以來未之前聞是以無憑具奏而現在莽匪猖獗其中不無勾結串通情弊是以奏請飭行藩臬兩司徹底根究嗣因該土境正在莽匪滋擾又札兩司緩其提訊等語所奏俱不甚明晰劉藻即未嫻軍旅籌畫非其所長何至心神失據於章奏敘事亦不能了了耶其庸懦無能之處如前次聞猛往失事之信遽由思茅退回普洱幸而莽匪蠢野無知不過騷擾土司邊境若窺見伊等如

此餒怯則普洱思茅一帶能保無疎虞乎即此則糊塗不能勝任已可概見此事總非劉藻所能辦理著將二摺鈔寄楊應琚閱看於到任後逐一悉心查辦據實覆奏尋奏三月初八日行抵雲南省城所有沿途節次接奉廷寄當逐一悉心查辦務得確情不敢稍有

不實不盡得旨覽但不存迴護已往不究之意自然能實能盡又諭前因烏什出產硝磺甚旺曾降旨令多為採辦除備該處需用外並令運至各處備用至今未據覆奏伊等或係僅計烏什敷用未經多辦是有畛域之見矣平定準部回疆雖各處分駐大員實則事同一體著傳諭永貴等即多為採辦備用又安泰雅郎阿赴烏魯木齊領取硝磺鐵劬伍彌泰等雖曾供給然伊摺內有採辦人少僅足供本處支用之語亦未免意分畛域雅爾科布多烏魯木齊俱我之地方儘可多派人夫採取若謂採辦硝鐵人多則耕種之兵

不敷即由內地多派兵丁亦無不可並著傳諭伍彌泰等知之○兵部奏臺灣鎮總兵楊瑞逾限不請陞見應照例查辦得旨臺灣鎮遠隔重洋其奏請陞見逾期之處著不必查辦是日駐蹕大新莊行宮○已未予故輔國公額爾克沙喇致祭如例○旌表守正捐軀之甘肅階州民王宏才妻王氏○是日駐蹕三家店行宮○庚申。

上迴鑾詣暢春園間

皇太后安○辛酉刑部議奏莊有恭原發款單即有段成功患病之語而具題叅劾復先敘入豫為將來卸罪之地是此案徇縱實由莊有恭開其端而孔傳炯朱奎揚揣合意指不加究詰莊有恭應照罪該處死巧言諛免暗邀人心律孔傳炯朱奎揚應照聽從上司主使出入人罪律均擬斬監候秋後處決得旨此案莊有恭原叅段成功抱病被勝之處朕初意以莊有恭題叅婪索重案

巧為開脫不過因離任在即為此市恩解怨之舉以博去後之思今據審訊莊有恭及朱奎揚孔傳炯等各供覈其情節莊有恭等並非袒護段成功而於保舉段成功之和其衷則曲意為之瞻徇蓋和其衷為新任巡撫明德弟兄恐事發累及舉主有礙顏面遂爾心存瞻顧上司屬員意會色授各相喻於不言因置段成功受賄情事不復深加詰究妄冀含糊結案若非朕摘發其朦蔽情形則擾民

墨吏不轉得倖免乎殊不知督撫保舉人員其後有以贓敗者定例不過降調處分朕從未有以濫舉之故將原保之督撫遽行降革不過仍行留任蓋以人實難保過出無心也莊有恭等豈見不及此而必為之委曲遷就巧行其輾轉徇私之術耶至和其衷現在所獲罪愆則因與段成功彌補虧空一事天理難容自然敗露若和其衷止係濫舉公錯部議時朕必予以從寬留任何至於拏問治罪

乎。外省上下和同。官官相護。積習最為惡劣。若不急為整飭。將漸啟黨援門戶之弊。於世道人心。深有關係。朕力挽頽風。遇有此等案件。一經發覺。惟有嚴加懲創。以飭紀綱。內外大小臣工。各宜守法奉公。痛自滌洗。務使錮習一清。毋蹈覆轍。莊有恭身為巡撫。屬員視其趨向。自應依律問斬。著監候秋後處決。朱奎揚孔傳炯。究係為從。著從寬免其死罪。發往軍臺効力。並將此通諭中外知之。○江南

河道總督李宏奏。中河廳屬桃源縣運河南岸。尤家灣蕭家莊二處。隄內地勢低窪。舊設石閘二座。宣洩田間積水入運。啟閉以時。甚資利賴。因日久牆石圯裂。尾土塌卸。閘外跌成深塘。難以啟閉。查兩閘原係歸地方官於水利案內詳辦。但河工與地方。苟有利民生事同一體。且中河兩岸。舊有歲搶埽工。其無關緊要者。似可撙節通融辦理。除將舊閘石料拆起。儘用外應添新料無多。請即入於中

河廳歲搶庫貯項下。覈實彙辦。毋庸另籌撥項。報聞。諭軍機大臣等。據李宏奏運河南岸尤家灣蕭家莊石閘二座。日漸損壞。應行修理等語。該處閘座。自乾隆二十二年建設以來。距今未及十載。其閘外跌成深塘。由水勢衝激使然。理尚可信。何至牆石圯裂。尾土塌卸。若是之速。此必當時監工承辦人員。偷減工料。草率從事。以致易於傾圮。著傳諭李宏親往該處。據實確勘。將現在拆卸石料。舊灌

灰漿。逐一查驗。如有偷減草率情弊。即行查叅。著落賠修。並將此傳諭高晉知之。尋李宏奏蕭家莊石閘。因閘外跌成深塘。閘底關石。槓被水搜刷。以致雁翅牆石。蟄裂尾土。遂亦塌卸。惟金門兩邊牆石未動。現將蟄裂雁翅拆起。並拆開未裂三四層。逐細勘驗。舊灌灰漿尚屬凝結。尤家灣石閘。因閘牆西首被水衝塌。水由閘後通流。將尾土衝刷。致石牆坐卸。灰漿縫口已無。從勘驗其東牆未倒之工

拆驗亦無不足至承辦各員雖無偷減情弊但洩水小閘間時啟放非經年衝激者可比乃未及十載即已傾圮各員實難辭咎所用償修工料銀兩即著落追賠還款又該閘工程向令居民防守河員並無專責此次修竣後請歸中河廳專司啟閉地方官協同料理以專責成報聞 壬戌

上詣暢春園問

皇太后安 自圓明園啟鑒謁

泰陵 諭軍機大臣等劉藻辦理莽匪事宜拘於書生之見動輒錯謬伊今日所奏三摺閱其情節又俱不知事體已於摺內批示矣即如施尚賢以內地民人膽敢與莽匪結為姻黨探聽消息實為漢奸之尤其莽匪滋釁情形該犯自必深悉若果嚴行訊究斷無不供出實情之理乃劉藻不過草草一問輒謂嚴鞫無供遽將該犯正法置緊要關鍵於不問復何由知逆匪底裏乎至孟艮土司猛孟容

之堂姪召散與猛孟容父子不協召散遂勾引莽子將猛孟容拏去并欲追殺召丙是莽匪滋釁之由召散實為禍首若將該犯拏獲則惡逆無人煽惑賊黨自更易於掃除劉藻乃欲於既搗整欠後再勦孟艮則昧於先後機宜矣又另摺所稱孟連地方一聞木匪挖溝搭橋之語稟報驚惶不過無知土練等遇事恒怯畧有風聞遂爾張大其事而劉藻概不深察遽患其乘虛蔓延又何無識之甚耶

此事斷非劉藻所能辦理著交楊應琚於到滇後酌量情形逐一查辦至所稱遵奉恩旨軫念瘴鄉整兵稍待再圖大舉等語則更大謬前此降旨原以該處如或調兵未齊至瘴盛之時不妨稍待今既集兵七千有餘定期進剿正當尅日迅奏膚功又豈得託言瘴癘忽爾徹兵寧不慮為遠夷所輕玩乎設我徹兵而莽子或乘此隙進至內地滋事其罪又誰當之况瘴氣所聚並非概地皆然或此處

有瘴彼處即無則兵行祇須越過瘴毒之處便可無患若云烟瘴人必不可觸冒我兵既畏其氣莽匪又何獨不然豈可為此遷延觀望之說以誤事機耶楊應琚到滇後一切進兵機宜自能悉心籌辦現在楊應琚尚未及到劉藻此時仍當督促調集之兵奮勇征勦斷不可惑於瘴癘之說輕議撤回再干罪戾著將劉藻摺鈔寄楊應琚閱看并傳諭劉藻知之尋楊應琚奏查施尚賢既與莽匪結為

姻黨探聽消息其情形自所深知研究即得實情何至嚴鞠無供乃劉藻將原供刪去並未全行奏出今將原供鈔錄呈覽施尚賢罪大惡極家口亦應緣坐已飭查拏究擬又木邦久欲投歸內地懇內地土司轉達是以莽匪欲搭江橋木邦必先通知耿馬土司應即迎機允准查莽匪大局已定惟嚴催追捕賊首訪擒漢奸斷不敢苟且了事得旨嘉獎是日駐蹕黃新莊行宮癸亥吏部議雲貴

總督劉藻雲南提督達啟均應照例革職得旨前因劉藻辦理莽匪一案種種錯謬已將伊降補巡撫今據伊屢次奏報覈其前後所辦理無一事能合機宜即如去歲聞莽匪滋擾土司邊境伊既親行帶兵前赴思茅自應駐守該處就近調度以期速勦醜類乃輕信何瓊詔等說報猛往失事之語心懷畏蒞託稱整控江有小徑可遁內地懼賊竄入遽自思茅退回普洱其怙怯無能實可駭異殊不知思茅為近邊要地總督既駐兵鎮守忽爾退避撤回寧不慮見輕於賊匪耶至何瓊詔等渡整控江失事之故由於將兵器捆載行裝將弁徒手散行毫無紀律突然遇賊衝出星散奔逃旋即陸續投歸劉藻始則率報兵弁陣亡張皇失措繼則罪以貪功輕進何瓊詔等以不備致逃豈為冒勇輕進其顛倒是非前已明降諭旨有識者當無不知其悖謬至其檄調通省兵丁忽調忽撤漫無成算而

節次所奏諸摺可笑可鄙之處尤不可枚舉
督亂乖方實出意料之外設使吳達善在彼
亦如此辦理朕早治其罪矣特念劉藻本係
書生未嫻軍旅不忍即加重譴但復令其覲
顏尚為巡撫其何以示懲創亦何以示各省
督撫慎重封疆耶劉藻著照部議革職留滇
効力所有調兵不合定例糜費軍餉之處將
來報銷時俱著落伊賠補提督達啟身係滿
洲遇有攻勦逆匪之事自應統率兵弁身先
奮往并將辦理機宜隨時奏報乃伊惟聽從
劉藻指使儼若偏裨數月以來毫無調度亦
未據專具一摺入告是誠何心提督平日於
地方事務固不宜干與以掣總督之肘至於
領兵征勦則係提督專責又豈可推諉總督
緘默自安竟若置身局外乎達啟亦著照部
議革職交與楊應琚令其在兵丁上効力贖
罪俟軍務告竣再行請旨○諭軍機大臣等
前經降旨將定長陞授湖廣總督劉藻降補

湖北巡撫今劉藻業已革職留滇効用所有
楚省事務現在需人辦理定長可即速來京
請訓前赴新任 兵部議奏盛京設立宗室
覺羅官學定例五年考試原以稽查學生之
勤惰分別教習之賢否該管將軍等理應照
例奏考豈容屢次展限自乾隆二年立學後
至今已經三十年之久並未考試應將將軍
清保總管吳興等分別議處從之 以荊州
副都統珠魯訥為禮部侍郎 以禮部右侍
郎鄂寧為湖北巡撫○調湖廣提督李勲為
雲南提督以浙江處州鎮總兵李國柱為湖
廣提督漕標中軍副將于文煥為處州鎮總
兵○是日駐蹕半壁店行宮○甲子諭曰鄂
寧已補授湖北巡撫所有多倫諾爾應查稅
務著期成額前往查辦 諭軍機大臣等前
經降旨吳達善令其俟劉藻到任後即交代
前赴甘肅新任今劉藻已經革職其湖北巡
撫員缺令鄂寧補授但鄂寧初任封疆所有

巡撫應辦之事尚須久任者協同經理未能兼攝總督印務著傳諭吳達善於鄂寧抵楚時將巡撫任內一切事宜逐一詳悉告知以便接辦無誤俟定長到任後再行前往甘肅任事至總督任內應辦之事亦俱於交代時備細告知定長可將此於吳達善奏摺之便傳諭知之○又諭曰鄂寧已補授湖北巡撫所有多倫諾爾稅務一事已降旨令侍郎期成額前往查辦鄂寧接到諭旨可速來行在請訓以便赴湖北新任○是日駐蹕梁格莊行宮○乙丑

上謁

泰陵未至碑亭即降輿慟哭步入

隆恩門詣

寶城前行禮躬奠哀慟王以下文武大臣官員

隨行禮○遣官祭

歷代帝王廟○諭軍機大臣等楊廷璋等審

擬鄭謝天一案甚屬錯謬已於另摺批示矣

鄭謝天以副將大員本營火藥局被轟平時既失於防範事後復朦混具稟經署督明山叅奏理應在粵靜候查辦乃以曾請告休竟不候具題給咨故違上司批飭私行逃歸原籍又在浙江稱病不往李治運因護庇已罷臬司回籍如此特旨解送之犯法難寬貸擬以職官負罪逃竄絞候之例實屬罪所應得乃楊廷璋等既已援引此例復請酌減一等擬流有意從輕則大不是矣楊廷璋屢任封

疆王檢前為臬司最久非不明於律例者遇此等案件自當悉心定擬俾得情法之平何竟紕繆至此耶楊廷璋王檢二人何昏憤至此耶俱著傳旨申飭○又諭曰李勲已降旨調補雲南提督其湖廣提督員缺令李國柱補授矣雲南現有攻勦莽匪之事正需提督領兵前往著傳諭吳達善即行派員接署湖廣提督事務令李勲星速前赴雲南新任湖廣提督員缺亦屬緊要李國柱接到諭旨可

即赴湖廣新任其處州鎮事務于文煥未到之前著蘇昌派員暫署可將此傳諭吳達善蘇昌李勲并李國柱知之是日駐蹕秋瀾村行宮丙寅清明節遣官祭

永陵

福陵

昭陵

昭西陵

孝陵

孝東陵

景陵

泰陵遣官祭

孝賢皇后陵

端慧皇太子園寢

孝昭仁皇后忌辰遣官祭

景陵以正藍旗滿洲副都統達桑阿鑲紅旗

滿洲副都統索諾木策凌俱為正白旗漢軍

副都統署正紅旗蒙古副都統呼什圖為正

紅旗漢軍副都統署正藍旗蒙古副都統伊

昌阿為荊州副都統是日駐蹕半壁店行

宮丁卯遣官祭賢良祠諭曰鄂寶台布

額僧額常岳伍彌泰雅郎阿在各該處駐劄

辦事年久應遣人更換文綬著賞給郎中職

銜自備資斧前往庫車更換鄂寶范宜忠賞

給頭等侍衛前往英吉沙爾更換常岳達桑

阿前往科布多更換雅郎阿溫福前往烏魯

木齊更換伍彌泰溫福之倉場總督事務著

實麟署理額僧額回任時存泰之天津總兵

事務著那丹珠署理那丹珠未到天津以前

著該督委員護理又諭曰存泰著前往喀

什噶爾更換額僧額回京又諭伊犁回疆

各處駐劄大臣所發往人犯有逃亡者拏獲

後始行定議具奏未獲之先僅行知各處查

拏並不具奏此等遣犯身獲重罪免死發遣

乃怙惡不悛復行脫逃情殊可惡理宜嚴拏

務獲從重治罪如並不具奏僅行文緝拏恐

各處視為具文必致緝捕不力著交將軍各處大臣嗣後遣犯脫逃如在二十日以内拏獲仍照舊一面具奏一面辦理如逾期不獲即行奏聞候朕降旨 諭軍機大臣等步軍統領衙門奏據北營守備稟稱接到直隸鞏華城都司密封公文一角內開黔省黎平府開泰縣稱逆犯馬朝柱在飯店店主稟縣查拏該犯已乘間脫逃除多差幹役飛檄嚴拏並繪馬朝柱圖牌沿途投遞等語逆犯馬朝柱如果在開泰縣飯店住宿經店主稟縣旋即脫逃該縣自即據情飛稟該撫豈有不即奏聞之理何以方世儒從前並未奏及其中情理殊不可解且所繪圖牌由各營汎輟轉遞送並無黔省原文或係中途遺失或此外另有別情俱難懸定現在派員前往鞏華城一帶挨次查辦著傳諭方世儒將所稱黎平府開泰縣逆犯潛住脫逃之處是否實有其事該省如何嚴緝辦理即行據實覆奏再原

單內開圖牌經由直隸岔道城懷來城新保安等處該管官弁曾否稟報方觀承有無見聞並著傳諭方觀承一併查明具奏尋方觀承奏上年協緝馬逆關文德州係由濟南城守營沂州營郟城銅山宿遷宿州傳來過宿州即無來路河間協復轉移新雄營以次傳至涿州良鄉涑水易州紫荆關等營由蔚州路叅將呈報宣化鎮又一路由保定城守營轉移定州正定及趙州順德廣平等營出直隸境文內俱係查照舊案繪畫馬逆年貌並無木牌而此次所傳開泰縣情形已有實在蹤跡隨差弁訪緝天津永平一路此文又未傳到至鞏華城都司轉移北營守備則係三月內由陝西潼關山西大同傳至保安懷來岔道榆林居庸關鞏華城復傳至良鄉涿州涑水新雄等營與上冬傳單無異惟添有年貌木牌輟轉傳行總無自貴州湖廣等省來歷得旨足見外省此等海捕無實際也然不

即奏聞亦可謂不經心矣。軍機大臣等議准將軍明瑞等奏本年由伊犁遣往雅爾兵一千五百名俱從伊犁各部落攜眷兵內派往途路非遙非內地遣往者可比整裝等項不必支給。惟給與口糧鹽菜銀兩又部定新例滿洲索倫察哈爾戍守兵每人月給銀一兩五錢每二名跟役一名每名月給銀五錢。惟厄魯特兵向無跟役銀兩似屬歧視請照各處之例一體支給。又從前委署官員俱按委署各銜添支口糧鹽菜銀兩此次請照各原職支給。又伊犁兵馬匹多在烏什軍營倒斃而去歲天寒雪大存馬亦甚羸瘦且索倫等兵病者甚多其別部落人等亦染時症請將遣駐雅爾兵稍緩時日以紓馬力從之。又議准庫車辦事大臣鄂寶奏庫車沙雅爾二城回人應交銅餉向例輪年派採往往託故推諉請嗣後不必輪辦每年庫車派四十名沙雅爾派二十名免其應納官糧專令常

川採辦酌給錢文以為置備衣服修理採銅器具之用並撥給驢隻庫車八沙雅爾四令其馱載銅餉從之。以鑲藍旗漢軍副都統范宜宗兼理鑾儀使。是日駐蹕黃新莊行宮。戊辰

上迴鑾詣暢春園問

皇太后安。辛酉明園諭曰成袞扎布等奏

現在自科布多以外接至索郭克展放卡座台吉兵丁及臺站兵丁應領餉米如仍由烏

里雅蘇台支給。輓運維艱查科布多現有存

貯之米亦有由烏里雅蘇台運往餉銀請嗣

後卡座台吉兵丁及自索郭克卡座接設臺

站兵丁應領餉米就近由科布多支給之處

頗合機宜著照所奏辦理。己巳

上詣暢春園問

皇太后安。還宮。是月直隸總督方觀承奏

直隸淀泊河灘淤地前經奏定分給附近貧民認種完租每戶自十畝至三十畝止定例

遇有改移河道開挑引河等事需用民人認種地畝即行免租聽用查淤地以天津河間二府屬為多。今將實係貧民仍聽照數認種。其有為胥役豪強詭名占種者悉行撤出。直隸各州縣設有留養局五百餘處。雖各有經費。而衝途流養較多。所需衣被薪米不敷。俱係地方官捐辦。若將撤出冒占之淤地酌撥各局經理。除完租外以羨餘補留養之需。則貧民之力能受佃者既沾樂利。而荒獨之尤無告者。更慶生全。得旨嘉獎。又奏直隸通省應修城工共估需銀三百餘萬兩。分五年領辦。本年現修之通州拱極。薊州三河。盧龍永年。磁州獲鹿八處。又估辦之懷安。安肅。定興。望都。樂城。柏鄉。內邱七處。通計需銀六十四萬餘兩。除奉撥安徽省三十萬兩。並直隸水利節省等銀撥用外。尚需請領二十六萬九百餘兩。請將積存回贖旗地租銀內照數動撥。可省一領一解往返腳費得旨如所議。

行。河東河道總督李清時奏德州城外西方菴運河逼近州城兜灣迎溜。年年修做埽工所費不貲。前議在對岸魏家莊改挑引河一道。以免城垣受險。原寬十二三丈。深與舊河一律。足資糧艘運行。年來漳衛水未盛漲。兩岸俱係膠泥。未能大刷。經調任河臣李宏以新河窄狹。水盛時恐不能吞納。請將舊河大壩挑開。鑲做挑水壩。裹頭復將西方菴埽工附請鑲做。查此段運河自西南直射西方菴折而東北。形如彎月。該處運隄外臨大溜。內跌深塘。當年創挑引河最為妥協。惟原挑河身過狹。擬再加寬。與上下舊河約畧相等。覈計土方需銀三千餘兩。細算西方菴及挑水壩兩裹頭。每歲搶修所費亦三千餘兩。今展挑引河所需僅一歲搶修之數。一經告成。不獨該處隄工化險為平。德州城垣可資保障。而西方菴等各埽工並可停修。做得旨嘉獎。山東巡撫崔應階奏東省城垣共一百

零七處除前撫臣阿爾泰查明完好者三十
一處勸民黏補者十九處臣任內勸民黏補
者九處尚有應修城垣四十八處內除曹縣
城武二縣城被黃水衝決修費繁重另請確
估題修又文登蓬萊二處因地處海疆亦經
專案題修外其應修之四十四處按地方之
衝僻定辦理之先後共分五次興修現今將
第一次應修之齊河等六處即動支藩庫錢
糧給發先行燒造磚灰清釐基址仍委司道

分路稽查督辦又查東省各縣土城共二十
一處如齊河禹城高唐恩縣路當孔道利津
濱州地處海濱荷澤為曹州府治以上七處
應請改建磚城其餘似可仍循舊制下部知
之福州將軍兼管粵海關事明福奏查閱
南臺涵江泉州廈門等處口岸皆居形勢要
隘左右控制得宜船隻出入易查商賈輸將
甚便惟寧德口稅館舊設縣城東門外自乾
隆十三年間該縣居民鳩資議築東湖海隄

自縣城至酒嶼門十里築隄攔截潮水隄內
盡成民田商船牙行俱遷集酒嶼門之近口
處故稅館亦移駐於此但隄工於十七年告
竣而十八年秋汛大潮佛塔隄隨即坍塌上
年猴毛嶼隄亦坍以致民田俱廢商船俱可
直達縣城請將稅館仍移舊地以扼津要報
聞署陝西巡撫湯聘奏西安移駐涼州莊
浪官兵共計一千二百九十九員名自正月
初六日至二十七日陸續起程計十一起車

輛飭州縣雇備派員護送給發口糧盤費正
在前進適接軍需局傳牌內開官兵必由黃
河過渡今冰橋解凍浮橋尚未搭就令將各
起官兵暫住候橋成再行起程現在第八起
留住長武縣餘在邠州永壽醴泉等處居住
候信查移駐官兵已入甘肅境者七起在西
安境內沿途暫住者四起未經起程者尚有
三起當與署西安將軍副都統偉善等酌諭
未經起程者暫緩束裝並諭領兵官員加意

約束務使兵丁寧帖靜候橋成進發報聞

大清高宗法天隆運至誠先覺體元立極敷文
奮武孝慈神聖純皇帝實錄卷之七百五十五

大清高宗法天隆運至誠先覺體元立極敷文
奮武孝慈神聖純皇帝實錄卷之七百五十六

監修總纂官總纂官太子太傅文淵閣大學士文淵閣領閣事領侍衛內大臣稽察欽奉 上諭事處管理

吏部理藩院事務正堂總辦副統世襲騎都尉軍功加七級隨帶加一級尋常加二級軍功紀錄一次慶隆

總裁官經筵講官太子太傅文華殿大學士文淵閣領閣事稽察欽奉 上諭事處管理刑部戶部三庫事務

世襲騎都尉軍功加十九級隨帶加二級又加二級尋常加二級內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆三十一年丙戌三月庚午朔以兵部左

侍郎期成額管理欽天監 辛未

上御乾清門聽政 諭向來各省知縣內有擎
獲盜犯等案送部引見者皆其留心政務可
造就之材朕加恩錄用令其仍回原任以本
省同知知州陞補其無回任字樣者係一時
降旨所未及並無分別於其間而該部即拘
泥成例祇令在部候選將原缺另行銓補不
知此項人員原因其平日居官能事是以調
取引見加恩擢用俾得及時自効若僅令其

在部候選不能一時銓補而原缺又另選有人是徒有空銜而需次閒居久淹時日非曰愛之其實害之非所以示鼓勵嗣後此等知縣引見時以同知直隸州知州用者俱著仍回原任遇有本省缺出補用其從前在部候選之員均著該部給咨發往原省差遣委用以應得之缺即行題補至知縣十年俸滿引見以同知等官陞用者亦係因其久任民社材具尚可擢用之員並著該部一體辦理

又諭曰恒泰之鑲黃旗漢軍副都統員缺著黃承恩署理德福之正黃旗蒙古副都統員缺著德勒克多爾濟署理舒泰所署之正白旗蒙古副都統員缺著喇特納署理達桑阿之正白旗漢軍副都統員缺著兆啟署理伍岱之鑲紅旗滿洲副都統員缺著傅景署理常復之正藍旗蒙古副都統員缺著書山署理額爾景額之正藍旗蒙古副都統員缺著圖爾都署理 又諭曰元清吉斯汗之後裔

俱係博爾濟吉特氏而元史謂元帝為奇渥溫氏彼此不符因令成衮扎布查奏今據稱蒙古台吉等素稱奇岳特後裔係博爾濟吉特氏查閱清吉斯汗時紀載世系之書亦然看來漢字書為奇渥溫尚屬有因蓋伊等以漢音譯蒙古字故將奇岳特訛為奇渥溫耳著將漢字史書內奇渥溫改書奇岳特並傳諭成衮扎布該處既有清吉斯汗世系記載檔案著錄一分進呈以便史書漢文有應行

查對之處改正畫一 以詹事金柱為內閣學士兼禮部侍郎 旌表守正捐軀之河南舞陽縣民劉顯祿女劉氏 士申

上詣暢春園問

皇太后安 幸圓明園 諭軍機大臣等圖桑阿奏逆犯吳卜元等一摺有各犯陸續供出吳孔懷等二十五名等語檢閱熊學鵬昨日奏到審擬摺內及所錄供詞俱無吳孔懷姓名是否另有一犯而該撫具奏時遺漏未經

敘入抑係一犯二名以致彼此互異之處著傳諭熊學鵬查明具奏尋奏吳孔懷即吳聖全因吳卜元等豎旗之日吳孔懷即率家屬逃避在外故未敘列得旨覽又諭據舍圖肯等奏巡察圍場佐領瑪恒詳報在陽春河地方拏獲偷樹人犯至吉林烏拉所屬隘口被旺多羅束之牧副拜雅斯罕等搶奪拜雅斯罕等私受竊犯財物於前又復率衆奪犯殊屬目無法紀著傳諭舍圖肯等特現獲各犯交盛京刑部嚴禁仍嚴緝未獲各犯毋令遠颺得逃法網並派尚書新柱前往會審再此等匪徒多係吉林人並著傳諭恒祿等拏送 癸酉諭曰劉藻辦理莽匪一事措置乖方畏葸無能已屢降明旨通諭中外矣今日復據奏稱正月初間染患中滿之症於審訊何瓊詔等時勉強支持不能記憶前後情節詳究詐偽等語尤屬支離可鄙劉藻於何瓊詔等一案初次奏報即已荒唐以後節次摺

奏因仍乖舛而於審訊定罪之處全然昧於事理此皆伊庸懦無識所致豈託言患病可能解免况前此並無一語奏及有病今乃忽為此奏明係自覺前非希圖掩飾所謂欲蓋彌彰其誰信之若使患病果實則必由於驚恐使然劉藻尚係讀書明理之人軍務即非其所長何至遇事漫無主見恒怯張皇因而沮喪成疾寧不慮人恥笑而尚靦顏為此奏乎劉藻已降旨革職無庸交部治罪又諭戶部議覆侍郎英廉奏請大出盛京旗民餘地准令無地兵丁閒散人等認買一摺原為旗人生計起見但此等無地人戶貧富不齊其有餘者置產必多而無力之家未必能一律承買恐於伊等資計仍無實濟因念該處冬圍兵丁一切鞍馬之需不無拮据若將此項餘地內酌撥徵租每年賞備資裝於該兵等殊有裨益其應撥用若干及所餘地畝除撥補隨缺各項外或可一體徵租存貯動撥

或聽旗人認買毋致有名無實之處新柱現在出差盛京著會同該將軍府尹等確勘該地實在情形妥協定議具奏尋奏丈出餘地約共三十一萬二千四百晌有奇其撥補官兵隨缺各項地應就本境撥給再有餘者即令原種之旗民照數納租承種按地畝肥瘠糧額等差分別覈計每年共徵租銀十一萬二千四百兩有奇查每年派撥冬圍兵丁一千三百名每名擬賞銀十五兩即於此項租

銀內按數撥給餘銀解交盛京戶部另貯候撥如此一轉移間不特冬圍兵丁鞍馬有資無稍拮据而官員兵丁俱可得地耕種下部議行諭軍機大臣等阿爾泰等奏金蠻圍攻額爾占巴旺卡卡地方各情形一摺看來此次賊番搶奪額卡該處土司未免驚惶失措金蠻在諸番中雖稍強橫若九土司果能齊心協力聯絡聲援不難奪卡進攻搗其巢穴自屬以蠻攻蠻之善策但恐土司等因

連次挫衄心存畏沮遂爾聞風輒怖裹足不前致金蠻益得肆其猖獗究於番地有礙此等邊方小醜不過自相殘殺並未敢稍侵內地不至用大兵申討若僅僅小試兵力又恐於事無裨然金川所攻者非各土司之地乎苟人自為保亦不致失其土地若董之以官則各土司方且以為當官差而猶豫日生氣漸餒而勢漸渙不肯奮勇攻拒久之將孱弱難振此亦不可不告之以為伊等之故也況

以蠻攻蠻止當用其力而不可使之知若坐視其敝而不為之經理伊等或窺見意指豈肯復為我用此非天朝控馭番夷之體該督提等當詳察機宜或於攻勦之時量增賞恤以勵其心或於駐防處所酌助軍聲以壯其氣俾土司兵目有所恃而不恐立效自當較易但須坐鎮運籌不動聲色方合事機著傳諭阿爾泰岳鍾璜將該處情形悉心籌畫斟酌盡善據實妥議覆奏尋奏郎卡雖狡詐強

梁僅於隣近單弱土司侵其一二碉卡無須大兵申討各土司中如松岡校磨卓克基沃日距金川寫遠革布什咱兵少只可隨衆攻守綽斯甲布小金川地勢兵力堪與金川為敵因郎卡未大挫勦觀望不前黨壩巴旺貧懦番民甚少且賊番據險下攻則易而黨壩巴旺仰攻則難現擬擇土練兵之精壯者分撥黨壩巴旺地方助其軍聲果能奮勇攻勦量增賞恤至綽斯甲布小金川等土司若能於防守外奮力進攻亦可使金川挫衄已諭以進攻獲勝不但可分其地兼除伊等子孫之害總使金蠻分頭抵禦黨壩巴旺即可乘虛而入得旨覽 甲戌諭鄂爾多斯地方牲畜因去冬大雪多有損傷著加恩將本年夏季應賠駝隻展限一年此項貧人著交齊旺班珠爾於伊等盟長內加意養贍俾勿失所此後若遇飢荒著該盟長喇錫色楞查明報部具奏另降恩旨 奉天府府丞李綬奏盛

京宗學額立學生二十名副管長二員滿漢弓箭教習各二員嗣因學生僅有七名各奏裁一員今讀書宗室現有十九名滿漢弓箭教習各一員儘數訓導惟副管長有稽查教習約束學生之責一員不敷請照原額得旨如所請行 乙亥

上詣暢春園問

皇太后安 以禮部右侍郎程巖為會試知貢舉兵部尚書尹繼善為正考官戶部左侍郎

裘曰修兵部右侍郎陸宗楷為副考官 命吏部尚書託恩多暫管兵部事務 旌表守正捐軀之江蘇武進縣民徐春生妻姜氏湖北黃安縣民李周棟妻周氏 丙子諭據高晉奏京口副都統瑪爾圖年老有疾不克勝任瑪爾圖著原品休致京口副都統員缺著穆爾泰補授 丁丑皇五子榮親王永琪薨旌表守正捐軀之河南息縣民王檢妻李氏 戊寅

上詣暢春園問

皇太后安 臨皇五子榮親王永琪殯賜奠

迴圓明園 諭軍機大臣等劉藻奏二月十三等日攻勦猛籠萌蘆口連破賊營數處及得猛籠土城木寨十餘座跟查賊蹤潛走猛歇現在進兵追攻等語小小克捷尚無當於攻勦大局此時楊應琚計已到滇一切機宜自能妥協籌辦現在既連破賊營數處賊匪潛逃即宜乘勢鼓勇直前搗其巢穴以期淨掃根株況調集之兵多至七千餘人軍聲甚壯尤當勵其銳氣迅奏膚功斷不可惑於瘴盛之說必待秋冬再舉以致遷延時日坐失事機至莽匪現已竄匿務當悉力窮追不容刻緩而兇渠所在尤當躡跡追擒毋任漏網但摺內既稱賊蹤潛走猛歇為整欠之門戶從此即可直搗整欠賊巢又稱總兵華封與叅將哈國興由猛混攻破賊營之後直達猛遮猛阿莽匪聞風遁據孟艮以為巢穴

等語似莽匪賊巢不止一處抑係賊蹤潛匿處所傳聞未真不可不偵邏得實毋輕信詭詞致有疎縱或當督兵分路追勦或扼其要隘并力殲擒著傳諭楊應琚就彼處情形詳悉深籌剋期報捷劉藻摺並鈔寄楊應琚閱看尋奏前督臣劉藻在滇九載於邊情未悉心訪查以致遇事茫無調度查烟瘴有無輕重原不盡同非槩地皆然已飭兩路軍營乘此兵威直搗巢穴不許藉口瘴發再查孟艮整欠賊首原係兩路勾結至九龍江會合孟艮係召散占據整欠係素領散撰賊巢得旨覽奏俱悉 又諭曰伍彌泰等奏烏魯木齊遣犯太多兵丁甚少不敷管轄請將遣犯暫停發往等語所奏殊屬姑息此等遣犯身獲重罪免死發往自應安分屯田若怙惡不悛仍行滋事或有脫逃者即行正法示眾該管大員果能如此剛決犯人等安得不知儆懼况既知循分耕作則愈多愈善有何不便之

處伍彌泰著傳旨申飭。又諭據成家扎布奏去歲因雪大災疫官馬駝額外倒斃者甚多現在彼處馬四千二百餘匹駝一千八百餘隻需用無多請解送馬廠備用等語在伊意中謂彼處馬匹駝隻甚多遇有倒斃屬下人等賠補未免苦累現今馬廠馬駝儘足敷用毋庸解送但彼處倒斃既多如照例即令賠償伊等未免竭蹶著加恩將本年應賠馬駝俱展限一年以紓其力。又諭據成家扎

布奏自哈沙圖腰站至第二十九臺此五臺地方因雪大馬駝倒斃者多管轄喀爾喀驛站公達錫台吉旺扎勒巴拜塔旺阿扎喇等未請添補協濟因將該游牧人等牲隻儘數供應差務除將本年應給錢糧業經豫行支給外應否加恩之處請旨哈沙圖等五臺因雪大成災達錫等於各游牧出備牲隻急公行走甚屬可憫著加恩將輔國公達錫陞授鎮國公四等台吉旺扎勒巴拜塔旺阿扎喇

等俱授為三等台吉。已卯諭據舒赫德奏訊問和其衷代段成功彌補虧空一案供出伊前赴熱河陞見時係段成功代雇驛腳又帶信令買皮張共用銀九百八十兩回任後先給還四百八十兩段成功臨起身赴任時又找還銀五百兩等語前因段成功虧空何以各上司竟無一人舉發其事甚至和其衷給銀代為湊補早知其平日必有交結饋遺之事今據供認情節果不出朕所料和其衷身為巡撫乃令屬員代辦驛腳皮張等項其罪已無可逭且恐所供尚有未盡之處而其收受段成功餽送更有不止於是者和其衷平素為人頗近深刻若非與屬員有交結之事豈肯為其墊銀彌補且又豈不知濫舉匪人之處分有限而不據實劾轉為之委曲周旋乎又據和其衷供段成功平日與通省州縣俱有交接其自行央懇幫助之處藩司知府俱屬知情又向劉墉面催兩次據稱現

在嚴催彌補等語則是段成功彌補虧空文
綬劉墉顯係通同掩飾其是否授意各屬幫
補及平時有無收受段成功餽遺之事均須
徹底根究和其衷身任巡撫乃於保舉之員
有受賕情事所係於吏治官常者甚大文綬
係藩司大員劉墉係專管知府竟爾串通一
氣彌縫欺庇如此上下和同舞弊充其伎倆
將何事不可為和其衷已經舒赫德委員解
往山西段成功亦據江蘇起解赴晉對質之

下自應水落石出但此等情節重大恐四達
彰實未能根究底裏著傳諭四達等於和其
衷解到時先行嚴鞫確情一面奏聞一面即
著四達押帶和其衷段成功分別解京候審
文綬劉墉並著分別解京審訊至案內有必
須質証要犯著四達等酌量解京其干連應
訊之人及幫銀各州縣即著彰寶就近查審
分別究擬至文綬前已降旨革職尚謂其咎
止於失察是以加恩賞給郎中銜前往庫車

辦事今既有此情節不可復為寬貸已另降
旨將伊革去職銜矣劉墉係大臣之子若與
段成功有餽送情事尤為罪不容誅四達等
倘因此稍有瞻徇斷難逃朕洞鑒諒伊等亦
不敢為他人任咎也舒赫德原摺及和其衷
親供著鈔寄閱看將此傳諭四達彰寶知之
又諭據舒赫德奏審訊段成功虧空銀兩
敝湊墊補一案布政使文綬亦屬知情等語
從前朕於此案以文綬尚無明知墊補情弊

故但革去布政使賞給郎中職銜遣往庫車
更換鄂寶今據奏文綬或係授意屬員迎合
和其衷或係另有別情均未可定著革去郎
中職銜交四達彰寶一併審明具奏 庚辰
孝賢皇后忌辰遣官祭

陵寢 吏部議覆署兩廣總督楊廷璋等奏廣
東新寧縣屬之大澳環山濱海商漁船聚泊
頗有賊匪藏託乘間出洋行劫應如所請以
駐劄二十里外那骨堡地方縣丞移駐大澳

以廣海寨營管理大澳之水陸各汛移歸春
江協兼轄俱可就近彈壓盤詰從之 辛巳

上詣暢春園問

皇太后安 祭

先蠶之神遣妃恭代

皇后行禮 癸未諭曰弘昉著前往庫車更換

鄂寶 旌表守正捐軀之河南寶豐縣民雷

汎妻張氏 甲申

上詣暢春園問

皇太后安 還宮 旌表守正捐軀之廣東開

平縣民司徒泰信妻關氏

大清高宗法天隆運至誠先覺體元立極敷文
奮武孝慈神聖純皇帝實錄卷之七百五十六

大清高宗法天隆運至誠先覺體元立極敷文奮武考慈神聖純皇帝實錄卷之七百五十七

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事務處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次並慶

總裁官經筵講官太子太傅文華殿大學士文淵閣領閣事稽察欽奉 上諭事務處管理刑部戶部庫事務

世襲騎都尉軍功加十九級隨帶加二級又加二級尋常加二級軍功紀錄一次並慶

尋常紀錄十四次並慶

敕修

乾隆三十一年丙戌三月乙酉諭曰固原總

兵四十六著前往葉爾羌更換汪騰龍 又

諭據額爾景額等奏從前葉爾羌每銀一兩

換普爾錢一百文自去秋有喀什噶爾阿克

蘇和闐等處商人攜帶貨物赴葉爾羌貿易

並不購買別物帶錢而回者甚多故自冬季

起錢價漸昂每兩僅換普爾錢七八十文現

在動用葉爾羌庫存錢文每兩合普爾錢九

十文祇換給官兵不准奸商竊換以平市價

等語著傳諭額爾景額嗣後如有似此故昂

錢價牟利匪徒必須嚴密查拏從重治罪其

貨物查明入官以示懲儆並著通行傳諭伊

犁各回城將軍大臣等一體遵行毋得姑息

諭軍機大臣等前據四達等奏段成功虧

空彌補各情由鎧宜祿曾經接署陽曲縣事

自必知詳細請咨提質訊昨據舒赫德奏到

現在委員將鎧宜祿訊供解晉質審各等語

鎧宜祿前經接署陽曲縣印務於段成功虧

空之處知之必真自應詳加訊鞫且鎧宜祿

亦曾經和其衷保舉堪勝知府其任內有無

似段成功交結餽遺之事並著四達等一併

嚴行查究將此傳諭知之 命兵部尚書託

庸在紫禁城內騎馬 丙戌諭曰弘昫所遺

鑲白旗護軍統領員缺著扎拉豐阿署理鑲

黃旗蒙古副都統員缺著永德署理弘昫所

署常岳之鑲藍旗蒙古副都統事務著永慶

署理 又諭據明瑞永貴等奏查烏什地畝

足供六千戶人耕種除從前分給回衆外現

在屯田綠營兵一千名。每名分給二十一畝。餘地尚多。請派阿克蘇無力回人二百戶。賽哩木。拜城。貧乏回人二三十戶。借給耕具。牲畜。籽種。遷往烏什。屯田等語。烏什地畝甚多。合計已撥之數。尚不及半。即就近由阿克蘇。賽哩木。拜城。遷無業回人往種。亦不過二百餘戶。與其將如許田地任其荒蕪。不若招人耕種。雖未便由內地紛紛撥往。而喀什噶爾。葉爾羌等處。亦有似阿克蘇等處無業回人。

其中必有願往者。若派往耕種。伊等既得生計。地畝又不至拋荒。兩有裨益。著傳諭明瑞。永貴等。悉心辦理。並行文各回城大臣等。查明各處無業回人。交伯克頭目。諭知。此內有願往者。即量給耕具。牲畜。酌借籽種。其如何籌辦起程。及每戶給地若干。按畝徵租之處。妥議具奏。○丁亥。

上耕耤詣

先農壇行禮。更服至耤田所。

躬耕三推。復加一推。

御觀耕臺。命裕親王廣祿。誠親王允祕。信郡王德昭。各五推。吏部右侍郎旌額理戶部右侍郎高悌。禮部左侍郎劉星煒。兵部右侍郎鍾音。刑部左侍郎錢維城。工部右侍郎程景伊。左都御史羅源漢。通政使孫灝。大理寺卿申甫。各九推。畢。順天府尹率農夫終畝。賞賚耆老農夫如例。諭據常鈞奏。劉藻於三月初三日夜間自刎。傷痕甚重。氣息將絕。現在

醫治調理等語。此事實屬大奇。劉藻辦理莽匪一案。種種錯謬。不可勝舉。朕因其本係書生。不嫻軍旅。所以加恩保全者。倍至。始而調補總督。繼而降為巡撫。及至審理何瓊詔等一案。以失律脫逃之人。反以冒昧輕進定罪。乖舛已極。且官兵忽調忽撤。全無紀律。始降旨革職。留於軍營効力。以示懲儆。然所辦亦止於此。並未有將伊治罪之意。前後所降諭旨。中外共所聞知。原不屑以軍務大事。於伊

過為吹求。劉藻自當倍加感激。於楊應琚未到之先。督率將弁益加奮勉。以期軍務速竣。方不負朕始終矜全恩意。乃正當進兵得勝之際。竟無端忽爾自戕。實出情理之外。劉藻身任封疆。現在統兵進剿逆匪。所屬將弁。俱視其指揮。乃無故輕生。軍行要務。將欲諉之於誰。若非朕豫令楊應琚前往接辦。則軍務兵弁竟無所統屬。或因軍心惶懼。偶失機宜。豈不貽誤國家大事。劉藻既統官兵。即與主將無異。如前者兆惠、明瑞於喀喇烏蘇被圍時。勢懸呼吸。若伊等彼時畧無主見。畏葸捐軀。則全軍將不可問。又安望其成大功乎。設使劉藻因調度未協。軍行或有失利。遂致抱慚畢命。情尚可恕。現經猛籠等處俱已克復。猛獸混諸路亦俱攻破。正宜乘勝勦洗賊巢之時。有何窘迫。竟至於此。無論屢次降旨傳諭。並未有加伊重譴之語。即使果欲將伊治罪。則國憲所在。為大臣者。亦當靜候成

命。以伏刑誅。又豈可效匹夫之見。豫辦一死。以逃法網。劉藻尚係讀書明理之人。豈於君臣大義。全未講明。耶。從前朕於劉藻曲從寬典。實係格外矜全。今伊無故自刎。罪愆實由自取。不可不加以嚴懲。現據奏劉藻尚未氣絕。楊應琚到普洱時。可撥醫速為調治。俟傷痕平復。即傳旨拏問。將伊因何自刎之故。詳悉嚴訊。奏聞。明正其罪。又據奏劉藻自刎後。書桌上有紙包一封。面寫三月初三日到硃批摺四件。廷寄一件。一併恭繳等語。恐外邊無識之徒。疑硃批及廷寄內或有嚴旨督責勒令自裁之處。今四摺具在。一為請安。其三皆隨事批諭。而廷寄尚係令其不可存五日。京兆之見。一切並須實心經理之諭。則劉藻此舉之荒唐。可詫。衆人當亦不能為之置解也。著將常鈞奏摺及代繳硃批摺四件。廷寄一件。槩行發鈔與衆閱看。並將此通諭中外知之。戊子。

上詣暢春園問

皇太后安。○幸圓明園。己丑諭前以應科舉人積次壅滯思所以籌辦疏通俾得及鋒而試。特降旨令於會試時揀選引見。候朕分別錄用。乃朕嘉惠寒畯格外加恩與尋常揀選下第者不同。現在士子聞風踴躍雲集京師視歷科應試者為數倍多。若循例於榜後始行揀選引見則伊等守候需時未免艱於旅食。朕心深為軫念。莫若即於月內定期揀選。列為三等。其應行引見者候朕於

時享

常雩齋戒進宮時。即行分別帶領引見亦省其赴圓明園車馬往來之費。其入選人員內榜發中式進士者原有簡擢甄錄之途而挑選未入者。下第後即得過程歸里不致久滯都門於寒士尤為有益。至前經大學士九卿等議奏按省分之大小酌定人數多寡雖比較向例量為加增而覈計止七百餘人尚覺限

於成格為數無多並著廣為挑選其列在一二等者統以二千人為率分別簡用其年逾七十以上者著查明具奏候朕酌量加銜俾得普被殊恩。各遂其彈冠慶幸之志。副朕體恤士林樂育羣才至意。著派簡親王裕親王誠親王和親王劉統勳阿里衮陳宏謀託恩多李侍堯福隆安公同遴選該部遵諭速行。○大學士管雲貴總督楊應琚奏莽子一種素出為匪潛入土司境內上年係分兩路一

從左進由猛彝等至小猛倫橄欖壩渡江攻破九龍江。蔓延至猛混一從右邊打樂而進攻破猛遮與左一股莽匪會合焚燬附近村寨。延至整控皆因孟艮應襲土司召丙之堂兄召散謀奪其地勾結莽子打破孟艮召丙逃至南掌國。後又至內地土司猛遮藏匿前經提鎮同請發兵而劉藻含糊其事僅令附近土練前往以致賊益猖獗。輒請由思茅退回普洱。今叅將彭雄楚等連次克復猛籠猛

混總兵華封克復猛遮內附土司境地廓清
已出隘進勦孟良景線等處總兵劉德成打
破外域猛獸猛堪現俱催令乘此搗穴盡絕
根株不許藉言瘴氣漸發稍有疎漏得旨入
境即能得其領要何愁此事不辦欣慰覽之
庚寅

上詣暢春園問

皇太后安○諭據知貢舉程巖等奏稱謄錄所
燭煤失落燒損墨卷五十二本俱不堪謄送

內簾等語此等舉子遠來跋涉志切觀光乃
辛苦風簷三場業經竣事而試藝不獲謄送
內簾同邀閱選其情甚為可憫除謄錄所經
頭人等及失察各員已經分別交部外著軍
機大臣傳知禮部查出被燒各卷其如何加
恩俾伊等文字得以一體補行謄送閱看不
致獨抱向隅之處查明辦理具奏尋奏查出
字跡可辨者三十四本燒燬零落者一十八
本現傳知該舉子等於二十四日赴圓明園

請

欽命四書題二道另試仍令照原卷謄寫封交
知貢舉同二三場原卷謄送內簾從之○又
諭曰愛隆阿在軍營頗著勞績今在伊犁病
故甚屬可惜著加恩賞銀五百兩治喪所有
世職佐領令伊子佛爾卿額承襲在侍衛上
行走○又諭據常復奏往查新展卡座由額
爾齊斯河回據庫克扎拉克帶領衆鄂拓克
人等訴稱哈薩克去歲偶遇大雪向內移住

有駐劄雅爾之巴圖魯大臣在伊各馬羣內
搶擄好馬千餘匹羊千餘隻等語常復未曾
經事人亦怯懦偶遇哈薩克未免畏懼其訴
稱亦未可信伍岱亦係不可深信之人從前
伊具奏有哈薩克五百餘戶來宰桑諾爾游
牧驅之不去遂帶兵拏獲霍集伯爾根留營
三日嚴行訓飭始遣去罰取馬三百九十二
匹又哈薩克急行遺下馬三百二十五匹一
併歸入官牧廠奏到時曾交安泰查辦今覽

哈薩克巴咱爾呼勒稟言向內游牧並未抗拒而伍岱即將霍集伯爾根擒執取其羊馬數雖不符事則屬實哈薩克等越卡向內牧放查出時祇須遣回或抗拒不去即將伊為首之人擒執訓飭若仍不聽從則拏獲治罪亦所應得但斷不可借端騷擾為其所輕況伍岱前奏竟不可信或伊冒昧邀功或屬下搶擄牲畜俱未可定著傳諭明瑞即赴雅爾會同阿桂將此事徹底確究伍岱如有誣奏

及縱其屬下搶擄之處即行叅處審明後著行文曉示哈薩克阿布賚知之○諭軍機大臣等戶部議覆宋邦綏酌定辦運銅觔一摺內將該撫所請廣西省每年委辦滇銅往回統限十八個月之處議駁已照部議行矣廣西與雲南地壤相接即因銅觔裝載沉重行走需時亦不過兩三月程途且每年解員往返至十五六月已屬過遲該撫何得轉請定限至十八個月之久可見宋邦綏於此等事

全未留心覈計惟欲意存寬緩殊屬非是著傳旨申飭並令該撫確按實在情形另行悉心定議具奏將此傳諭知之○尋奏廣西每年額辦滇銅連補色共四十六萬餘觔數多分八起運發計雲南剥隘地方起運自百色至梧州府係下水自梧州至桂林府省城係上水共計程限七個月二十一日倘遇船隻不敷雇用及水涸難行水漲不能趕運准報明地方官勘明結報咨部如無故逗遛者查叅庶運員不敢稽延銅觔得以接濟下部議行○辛卯諭京城內外河道溝渠前經動帑興工以資濬治迄今雖閱有年物料或漸朽敝亦究因估辦之初未能覈實經理所致是以每歲仍事補苴難以經久完善今據該管大臣等議覆御史戈濤請修街道溝渠條奏估需銀十七萬餘兩此項工程關係緊要原不惜多發帑金以為永遠利民之舉然非悉心籌辦實用實銷徒費多帑於事終為無補現

今估料大修。非從前隨時修治者可比。惟在董辦大臣稽覈精詳。毋使工程稍有偷漏。庶從此經途平坦。溝道宣通。足垂悠久。現在如阿里衮等。每日入直內廷。管理事務殷繁。勢難親身督辦。著派英廉期成額會同該管大臣。實力興修。其應需分辦人員。不必泥於成例。僅在工部司員中揀擇。著於各部院衙門遴選明幹司官。奏派委用。令其分段承修。妥協辦理。以專責成。阿里衮等仍不時前往查察。務期帑不虛糜。工歸實用。事竣後當派大臣覆勘。倘工程仍前草率。一經查出。或朕別有所聞。不惟該管大臣及承辦之司員咎無可辭。英廉等係特行添派大臣。責任較重。更難寬貸也。○又諭曰。吐魯番郡王額敏和卓已降旨遣往葉爾羌。同額爾景額辦事。著加恩。每年仍支給養廉銀一千五百兩。○又諭曰。愛隆阿之缺。著授烏勒登為叅贊大臣。在伊犁駐劄辦事。○壬辰。

上御勤政殿聽政。軍機大臣等議准。伊犁將軍明瑞等奏。從前遣往回城兵。因哈密開展路多。戈壁水草不足。俱由巴里坤珠勒都斯行走。去年永貴查勘。數年來收成豐稔。食用均可接濟。本年各回城換班兵。請由哈密開展前往從之。戶部議覆。浙江巡撫熊學鵬奏。仁和錢塘新昌等縣嚴州一所。被旱請緩扣蠲。得旨。仁和等縣所本年應徵漕糧及行月等項銀米。並新舊漕項錢糧。新昌等縣應徵漕項錢糧及蠲剩應徵銀兩。俱著照該撫所請行。以大理寺卿瓦爾達為盛京戶部侍郎。以侍講學士盧明楷為詹事。癸巳。上詣暢春園問。

皇太后安。諭據明瑞奏。伊犁去歲索倫官兵染疫患病者多。索倫達呼爾等收放牲畜亦多倒斃。其牛馬請於伊等俸餉內扣還。羊隻數多無力兼賠。應賠應免。分別請旨等語。此等羊隻係特交伊等孳生。今倒斃數萬。理宜

著落賠還姑念其甫到伊犁尚未服習且去歲雪大人畜俱遭災疫若令賠還伊等生計未免竭蹶著加恩寬免其應賠牛馬亦著暫免坐扣俟屆均齊年分視其生計情形分年賠補著交明瑞酌量定限惟期於伊等有益再索倫等去歲歉收現今口糧不繼著加恩賞給三個月口糧此朕格外施恩著明瑞等宣諭伊等嗣後加意耕種牧放務勤生計甲午諭據額勒登額奏圍場翼長鄂呢濟爾

噶勒拏獲偷伐木植人等解到即親詣查勘共偷伐三千餘株訊據供稱兵丁夥同民人偷砍等情請將驍騎校巴雅爾圖解任委署領催溫都順披甲阿畢什克等及現獲民人解送刑部嚴審治罪併請將總管扎什泰章京衮布並伊交部分別議處圍場坐卡人等專司看守膽敢夥同民人偷伐樹木至數千株之多情殊可惡復敢恃衆奪刀尤為可恨若不嚴審從重治罪不足以示儆伊等不必

解京著派內閣學士伍勒穆集馳驛前往會同額勒登額帶領增福將夥竊兵丁人等嚴緝審擬扎什泰係圍場總管甚屬疎玩著革去翎頂不必交部現令齊哩克忒依前往伊未到之先扎什泰仍以閒散辦總管事務鄂呢濟爾噶勒留心拏獲尚屬可嘉著賞緞二疋諭軍機大臣等湖北省拏獲逃犯鄧悠遠一案經刑部行查該將軍究出該犯跟隨伊主索卜廷查偷竊馬匹逃回原籍而在楚

所供轉賣贖身等語並無其事已將該犯照例擬以斬決乃該撫從前辦理此案既知鄧悠遠係免死問發為奴隨征在逃之犯並不移咨黑龍江將軍查取原案惟憑該犯一面度詞輒照尋常遣犯脫逃之例問擬完結實屬有心寬縱李因培之意必以為此等事屬細微朕未必留心詳閱伊前在閣學侍郎年久豈不知朕於內外臣工章奏無論事之大小悉皆詳細披覽而敢於如此草率了事希

圖混飾耶李因培著傳旨申飭李因培素有沽名習氣於此畧見一斑矣現在調任福建若仍不知悔改決不稍為寬貸也並著傳諭令其小心 乙未諭生事家奴著交刑部問罪貢院各所官家人例不准其擅至別所知貢舉監試等在內彈壓稽察自應嚴加約束何至容此等生事家奴私赴供給所索物爭鬧致滋事端程巖等所司何事著一併交部察議且供給試官日用食物足矣何須烟酒

檳榔之類此所謂慢藏誨盜者也著交軍機大臣按冊查裁 予故喀爾喀扎薩克輔國公齊旺多爾濟致祭如例 丙申諭軍機大臣等阿思哈審題葛繼榮圖產強嫁寡嫂一本該撫原擬祇以杖流完結經刑部駁正始行改擬絞候葛繼榮圖產賣嫂蔑倫喪心莫此為甚刑部所駁甚是該撫從前豈見不及此皆由臬司何燭狃於姑息有心輕縱該撫遂據伊詳勘草率定案以致辦理乖舛前因

何燭平素持齋佞佛妄託慈悲以文其沽名陋習曾特降諭旨令該撫遇事留心持正時加訓飭使之悔改今於此等審案並不詳悉駁覈以昭明允轉效何燭猥鄙之見有意從寬輒爾模稜咨結豈朕委任責成該撫之意阿思哈著傳旨申飭嗣後何燭辦理案件若膠執已見該撫一面駁正一面即據實參奏倘該撫一味隨同漫不經心致乖情法之平朕惟阿思哈是問將此並諭何燭知之 以

署鑲黃旗滿洲副都統扎拉豐阿為正白旗護軍統領仍兼正白旗滿洲副都統內閣學士伍勒穆集為鑲白旗蒙古副都統 大學士管雲貴總督楊應琚奏據總兵劉德成報稱參將劉明智等於三月初四日進勦與整欠相近之猛辛斃賊數十名帶傷者無數生擒莽匪十八名搶獲木城三座糯米五百餘石一面搜勦山箐一面相機前進查猛辛距整欠一百餘里莽匪倚為門戶今副將孫爾

桂已抵整欠總兵劉德成亦將抵大巢莫若令提臣達啟將擬攻猛勇一路官兵亦親身率領進攻整欠三路協勦賊巢不日可平並令於隘口堵截勿任漏網至華封所攻孟良亦係賊巢且有召散首惡在內此路應令專攻不必再分其勢至賊匪中如有厥棍漢奸在內尤須生擒活口以便解赴內地根究懲治得旨諸凡皆妥佇俟捷音 丁酉
上詣暢春園問

皇太后安還宮諭此項溝洫工程是否如此修理之處著交福隆安高恒查明覈實具奏是日起

上以孟夏享

太廟齋戒三日 戊戌諭京城河道溝渠已降旨發帑興修所有應給匠役工食等項若隨時給發錢文尤為便益現在戶工二部局存鼓鑄印錢甚多著總理工程處酌量應行需用之數按照時價支領給發俾工作人等既

可省以銀易錢之煩而市肆益得永遠流通平減於工程民用均為有裨 四川總督阿爾泰提督岳鍾璜奏黨壩添修新硯一十八座有雜谷土兵及維州土練二千餘名分布協防巴旺亦添硯七座與革布什咱嚕密土兵八百餘名協守若用此防兵進攻人數不數且各土司言之似銳而力實不足惟土練稍知紀律各路土兵資其董率至綽斯甲布小金川革布什咱業經委員諭令於本境添

兵防守一面進攻現據綽斯甲布具報於甲索及俄坡等處添兵暗襲互相攻擊殺獲多人金川亦於夾壩搶獲綽斯甲布男婦數人該土司深以為恨力圖報復竊思黨壩巴旺懦怯貧瘠擬在維州土練及沃克什瓦寺木坪明正各土兵內酌撥三千餘名分遣攻守第查黨壩額硯巴旺卡卡角此二處山勢陡險賊番添硯盤踞勢須令各土兵聲東擊西分其勢力乘間而入惟土兵代人攻守勢難

自裹餼糧黨壩已旺地瘠民貧辦糧更艱均
需賞給口糧有功加賞報聞已亥諭前因
歷科舉人銓選壅滯特命揀選分別錄用廣
為疏通其年齒衰邁難以服官任事者並令
查明奏請量予職銜以慰其寒臆攻苦之志
今據王大臣等奏各省舉人內驗看及自呈
實在老邁龍鍾不堪民牧並不能司鐸者共
六十餘名此內八十以上者著加恩賞給六
品京銜七十以上者著賞給七品京銜六十

以上及雖未及六十而驗實屬衰頹者著賞
給八品京銜俾頹齡寒峻均沐殊榮以副朕
格外優卹至意又諭今日明德奏請揀選
知縣發江委用一摺現在無庸辦理昨因舉
人選途壅滯特派王大臣等揀選八百餘員
帶領引見按省分發令以知縣補用並准以
原銜借補州倅縣佐等官此項人員儘足供
各省差委該督撫等自可量材錄用以收臂
指之效若此時復另行揀發則伊等在外需

次仍致積薪非朕疏通舉班本意也著各督
撫等嗣後除應需知州通判以上及主簿以
下各員仍照前請簡外如遇知縣等缺需人
即儘所發舉人差委試用並照吏部奏定各
缺酌量分別通融題補俟伊等用完之後再
行請旨簡發著將此通諭各督撫知之○禮
部以會試中額請得旨這會試滿洲蒙古取
中三名漢軍取中一名直隸取中十八名奉
天取中一名山東取中十三名山西取中十

二名河南取中十二名陝西取中九名江南
取中三十二名浙江取中三十名江西取中
二十一名湖北取中八名湖南取中五名福
建取中十名廣東取中九名廣西取中四名
四川取中七名貴州取中六名雲南取中五
名是月江南河道總督李宏奏桃汛屆臨
徐城外河及洪澤湖等處誌椿長水比上年
較大三寸清口東西壩之啟閉為全河關鍵
向來口門留寬二十丈或一十七丈上年因

霜降後湖水大消只留一十四丈現將東壩先拆六丈連舊共寬二十丈俾洪湖及早騰空豫留容納地收釜底抽薪之益得旨好應如此留心河南巡撫阿思哈奏相國寺建自北齊為豫省名藍祝國保釐之所年久倒塌仰懇酌發帑金重修勅賜嘉名得旨好可於公項內酌動既經復修不可圖省減其舊觀也修成時繪圖來請名可也又奏夏邑縣彭家屏入官貲產銀兩交商生息為豐樂等河歲修用查各省賞兵生息銀業已議停現在豐樂等河已屬深通朱仙鎮太康縣兩處橋工需銀有限應請停息同地畝變價銀貯庫得旨如所議行刑部尚書署陝甘總督舒赫德奏甘省賑務城工均關緊要部撥城工銀二十萬兩約計三月二十後抵蘭急工已於藩庫酌發三五千兩為辦料資以次續給加賑部項查入甘大路多係被災處所應即留於適中之平涼府令被災州縣就近

請領俾災黎早得餬口得旨嘉獎又奏穆壘地方可耕地畝甚多奏准於安西肅州等處招募耕種請選派守備千把四員抽撥兵二百名攜帶牛具籽種前赴穆壘及時墾種收穫糧石即為借給明春送到戶民籽種口糧所派兵秋後撤回本營應招戶民先辦二百戶趕於明年二月內到彼其應用住房及衙署倉庫即令現在移駐之塔爾灣兵迅赴趕造續送戶民照此辦理再官兵係久遠駐劄自應攜眷前往俟明歲秋收充裕搬取完聚應支車脚盤費照例覈銷報聞又奏甘肅應修急工城垣如武威肅州西寧三處本內土外磚應仍用磚其鞏昌府屬之會寧寧遠伏羌通渭四處柴薪既少且不產煤又敦煌玉門巴里坤均在嘉峪關外且土帶沙性難以燒磚均應仍舊惟城圍女牆應用磚以期堅固而壯觀瞻再口外工匠艱於雇覓巴里坤城不臨大道應俟敦煌玉門工竣再辦

一切立定章程使急公者遵循不肖者無所施其伎倆得旨如所議行署兩廣總督楊廷璋廣西巡撫宋邦綏奏沙匪久為交趾邊患餘孽不靖其中或有雲南土民輕聽煽惑潛入交地附和夷匪搶劫敗後竄入內地希冀偷生為邊境蟲賊安南恭順內附有年應亟為戮叛以示體卹俟審明定擬請旨將該犯等押赴隘上照會該國王派遣夷目眼同正法以昭威德得旨是○大學士管雲貴總

督楊應琚奏據總兵華封呈報官兵於猛腊

猛麻四山搜捕餘賊已被兵練截殺又叅將

哈國興帶領兵練並飭召丙頭人在大猛養堵禦截殺土練先由猛養後路進攻莽子三百餘人在大猛養扎營占據當經攻敗賊已逃回孟艮至大猛養大小頭人百姓等原係召丙舊人現已招來投順查係大小二十三寨頭人二十三名夷人男婦一千二百餘名口尚有各處山箐夷人未經到齊令召丙清

查安插哈國興即自猛麻一路進剿華封亦進剿孟艮查大猛養本係外夷應襲土目召丙所屬前為伊堂兄召散等占據今既經召丙招降似應准其投誠至其中如有前已順賊擾害邊境焚掠夷寨抗拒官兵者仍不得一併准降應令召丙查明詳請治罪並飭華封將孟艮賊巢上緊剿平並擒拿賊首召散五定瑞凍召猛烈務獲得旨是此最不可姑息若兵到投降兵徹復叛成何事體總之此

番既用兵威不可苟且了事

又奏據總兵

劉德成報稱三月初五日潛抵整欠江邊紫筏搭橋飛渡至城隨奮勇攻進賊人不能相顧殺死無數連日搜躡近巢已無匿匪但附近整欠賊徑繁多現復各路搜剿得旨嘉獎又奏據總兵華封稟稱三月初八日領兵至邦籠箐令叅將哈國興等進攻賊匪隨拒隨退因路險不能長驅又分遣兵練由賊隘左右深箐潛至山梁初九日辰刻賊潰遂乘

勢砍柵破營一座獲賊首五十餘級鎗礮擊斃二百餘人初十日兵至孟艮壩口之夏法街分三路進攻午刻抵孟艮城砍開盡條空營追至猛引等處亦無蹤跡弁兵同召丙四山搜捕得男婦八十餘名口其孟艮土城係依山挖壕周圍約十一二里得城時倉糧已自燒毀惟得牛百數十隻當交召丙收用召散召猛烈召猛珍尚未獲雖傳言逃赴阿瓦已派令官兵嚴拏得旨知道了即果逃至阿

實錄卷七五七

七

瓦亦應向彼勒索不可苟且了事○又奏前以整欠為翦賊平定之區若聽其荒棄恐無業莽子漸聚滋事請令以先捧管轄照甘省土司例給指揮職銜並以孟艮係召丙故土請兵除匪得復舊業應更傾心向化可否賞給內地土司職銜業經奏聞今孟艮賊巢已得召丙如准為內地土司與以先捧一體給以指揮使職銜俾地土皆附入版圖伊等自長為臣僕至整欠孟艮兩處地方暨原管各

堡寨多水田有業夷戶已散應令招來歸附其並未從賊者即為安插俾速佈種其兩處賊首仍飭該鎮嚴行勦捕與召丙以先捧協力擒拏得旨諸凡妥當如所議行○又奏整欠孟艮賊匪兩路勾結孟艮係召散巢穴整欠係素領散撰巢穴整欠賊首六人已除其四惟召散乃此案構釁渠魁已飭委哈國興等追拏再召散殺死召丙之父占踞孟艮召丙與伊原係深仇並令商同追緝得旨如此

實錄卷七五七

七

認真辦理方是○貴州巡撫方世儒奏郎岱同知所屬寨苗者諾佈散謠言惑騙銀兩現已拏獲出銀苗民及受囑代行斂銀各犯並起獲小紅布旗道巾雲肩及各色布五十段現親至黑賽寨道人董正源廟內搜查尚無不法字迹惟稱其徒然淨暨然華然朗等詭言斂銀免災有不出銀之家必要殺害等語查郎岱水城一帶與川滇接壤已飛飭員弁於境內躡緝並委員各路密拏隨經川督咨

復珙縣將然淨等三犯獲解來黔俟到案與各犯質審嚴究各確情另擬具奏得旨似此等事應由驛速遞何遲至一月始到可謂不知輕重至汝親去速辦尚屬得宜

實錄卷之七十七

主

大清高宗法天隆運至誠先覺體元立極敷文奮武孝慈神聖純皇帝實錄卷之七百五十七

大清高宗法天隆運至誠先覺體元立極敷文奮武孝慈神聖純皇帝實錄卷之七百五十八

乾隆三十一年丙戌夏四月庚子朔享

太廟

上親詣行禮 諭據彰寶奏查訊徇情幫助段成功彌補虧空之各州縣自一千七八百兩至一二百兩不等請勅部議處等語從前蔣洲在山西侵虧庫項令屬員幫銀彌補一案經朕特派大臣前往查辦大加懲治謂此後各員當知所畏懼後改乃未越十年復有盈千累百幫補虧空之事是該省吏治瀆壞竟成積習難返不可不嚴懲創而儆官邪所有查出

實錄卷之七十八

幫銀之各州縣數逾一千兩以上者著交部嚴加議處其餘並著交部分別議處○諭軍機大臣等彰寶奏查出段成功虧空案內徇情幫助之各州縣已降旨交部分別議處至彰寶查辦此事殊屬草率州縣所得養廉極多不過千餘兩即為同寅解囊濟急贈以一二百金尚屬情理所有豈能盡舉其終歲所入以助他人且至盈千累百轉浮於應得養廉之數若非平日貪黷肥家囊資饒裕即係那移庫項以公濟私該撫自應詳悉根究使諸事和盤托出庶足整飭官方何得僅以開單一奏顛預了事著傳諭彰寶將幫銀數多之各州縣有無虧帑婪贓情弊嚴密確查據實覆奏倘此際意存姑

息一任伊等巧為掩飾日後各該員事化敗露或別經訪聞惟於彰寶是問此皆彰寶關係切已之事何乃如此姑息非朕特加恩任使之本意戒之慎之將此傳諭知之是日起上以常零祀

天於

圈丘齋戒三日○辛丑諭據楊應琚奏搗平整欠賊巢近巢一帶已無逆匪現復於整欠之外各路偵查搜剿其益良地方亦據召丙招引夷民投順等語可見莽匪滋擾土司地方不過烏合之衆原屬不成事體從前皆因劉藻中情怵怯漫無設施遂爾張皇其事今楊應琚南蒞滇省將弁兵練俱各奮

貴錄卷七五八

勇出力即能勦平巢穴而外夷召丙亦望風率衆投順益見辦理軍務全在詳審機宜如果得其要領不難剋期竣事所有楊應琚奏到各摺著一併宣諭中外知之諭軍機大臣等據楊應琚奏整欠賊巢業已攻克益良一路亦據召丙將夷民招來投順內有前曾順賊抗拒官兵者已令召丙查明治罪不得概准投降等語辦理甚是已於摺內批示矣此次統兵進剿之總兵副將參將等尚知奮勉著傳諭楊應琚將實在出力之人查明奏聞候朕酌量加恩賞費以示鼓勵又諭前據步軍統領衙門奏黔省查拏逆犯馬朝柱由直隸鞏華城等處闖移前來業經派員前往根查來歷並即降旨

令該督查明覆奏至今尚未奏到現據派員明善稟稱查至宣化一帶總兵恒德曾經稟知該督其緝拿公文則由涿州新雄自涿水易州各汛遞到而新雄營又係來自山東沂州營沂州距新雄涿州相隔路途尚遠何以越境徑達且既至涿州又何以不由良鄉送京復自紫荆關遞至宣化其中失枝脫節之處該督從前接稟時何以未經看出不即根究文書來歷僅以通緝了事予著傳諭方觀承速即查明據實具奏○又諭前據步軍統領衙門奏據北營守備稟稱接到直隸鞏華城都司密封公文一角內開逆犯馬朝柱在黔省鞏平府開泰縣飯店店主稟縣查拏該犯已乘間脫逃除多稟

貴錄卷七五八

幹役飛檄嚴拿並繪馬朝柱圖牌沿途投遞等語當經派員前往鞏華城一帶挨查今據查得直隸宣化鎮總兵具稟總督內稱去年十一月二十七日涿州營准新雄營都司單移准沂州營移准沂州府移開據鄰城縣稟稱准江南宿遷縣關會密緝逆犯等因沂州距涿州相隔州縣營汛甚多何以越站徑達其中恐不無別情且如果來自沂州則該地方文武斷無不具稟該撫之理在應階何以未經奏及且曾否根究文書來歷及如何飭屬查辦之處著傳諭崔應階查明據實速奏 上寅

上請

南郊齋宮齋宿○諭軍機大臣等據明德奏守備錢士麒盤獲
逸盜夏龍山經高晉訊係龔老大案內逸盜一摺已交三法
司覈擬速奏矣錢士麒以調考武弁路過丹徒乃能於途次
留心盤獲逸盜頗屬能事該督曾否予以獎賞及作何鼓勵
之處著傳諭高晉具摺奏聞○又諭前據步軍統領衙門奏
接准鞏華城關移緝等逆犯馬朝柱一案稱係貴州黎平府
開泰縣脫逃已傳諭方世儒查明具奏上年該撫曾奏徐獻
朝捏造徐占鰲容留馬朝柱一案亦係黎平府開泰縣之事
今此案情節雖異而縣府相同如果即係此案則去年早經
辦結何以至今尚行通緝其是否即屬前案抑或另有一案

實錄卷五十五

四

之處著該撫即速查明據實覆奏○又諭據巴爾品奏去冬
口外雪大驛站人等牲畜多被損傷等語驛站人等俱賴牲
畜度日今損傷過多生計不無窘迫著傳諭巴爾品將牧廠
牲畜按數賞給所有伊等錢糧於來年起每年減半坐扣作
六年扣完以示優卹○又諭據阿桂安泰等奏稱伊等訊明
伍岱監禁哈薩克霍集伯爾根收其馬匹牲畜一事緣伍岱
領兵前往驅逐內徙之哈薩克等聞霍集伯爾根擁兵千餘
慮其負固因將霍集伯爾根喚至監禁隨遣兵驅逐凡恭順
聽命者任其遷移其抗拒者取其馬匹牲畜概行逐去霍集
伯爾根始知惶恐願請釋放隨即遣去等語雅爾塔爾巴哈

台等處設卡駐兵原以驅逐內徙之哈薩克逐之不去自應

從重懲治伍岱所辦並不為過著明瑞前赴雅爾將現今查
辦情由及哈薩克不應內徙如違定行重懲之處一一明白
曉諭並移咨阿布齊知之○癸卯常雩祀

天於

園丘

上親詣行禮○詣暢春園問

皇太后安○幸圓明園○命翰林院侍讀學士盧文弨提督湖

南學政○甲辰諭曰侍郎四達等查辦段成功虧空一案已
將和其衷等押解來京著軍機大臣會同刑部審擬具奏尋

實錄卷五十五

五

議奏參革蘇州府同知段成功在陽曲縣任內恣意侵蝕庫
項數至逾萬與徇縱營私之巡撫和其衷均應依律擬斬並
請即行正法扶同容隱之藩司文綬知府劉墉應擬斬監候
徇庇劣員之臬司藍欽奎等已經革職均無庸議得旨段成
功著即處斬和其衷著改為應斬監候秋後處決文綬劉墉
並著從寬免死發往軍臺効力贖罪藍欽奎富勒渾著該部
帶領引見再降諭旨○旌表守正捐軀之河南商邱縣民趙
西崖妻張氏○乙巳諭軍機大臣等彰寶查奏劉標償還段
成功銀兩一摺所辦尚未允協劉標如果平日與段成功交
好通融後向鄉親那借償還亦屬常情所有因此而加以議

處轉不足以服其心若係在陽曲任內虧缺項遺交段成功後聞段成功陞遷離任始行寄還補項則是劉標虧空在前自應按律究擬又豈得僅以議處了事彰寶於接准阿思哈咨覆之日即應切實根究分晰辦理豈可止憑劉標一面之詞遂爾朦朧率結轉以常情借貸為罪耶劉標在任有無虧空訊之陽曲縣書役斷不能代為隱匿而所稱會銀還項一節亦當拘指借之汪廷標到案問明果否屬實此案方無疑義昨因幫借段成功銀數最多之州縣已諭令彰寶嚴密查辦劉標之事亦應遵照前旨一體辦理且如此查辦乃因山西吏治向來不堪陋習相仍所以整飭官方之意彰寶不

實錄卷七五八

六

可不知著傳諭彰寶將各項情節逐一確查據實覆奏尋奏查劉標到任卸事交代文卷及應存錢糧數目相符實無虧短一切交盤悉係實存在庫兌交段成功接收並無前虧後補之事劉標償還一項據稱係陸續那借似屬確情報聞賑盛京被水官莊戶口並蠲額賦○丙午

上詣暢春園問

皇太后安諭軍機大臣等據吳達善奏江夏縣起解發遣新強人犯胡崇德賄囑兵役江海等解至孝感縣脫逃一摺此等緊要違犯該兵役等膽敢受賄縱放實屬大干法紀若不嚴加懲創何以示儆胡崇德現已弋獲回應即正典刑其賄

縱為首之兵役審明後亦應即行正法為從各犯並著發往烏魯木齊以昭炯戒所有在逃之兵役應嚴飭所屬上緊勒緝務獲毋任遠颺漏網至招稱典史劉祿徵明知人犯未到孝感縣投文並不稟縣查究千總熊作相亦置若罔聞其有無通同賄縱情弊該督撫務須徹底嚴行查究江夏縣知縣七十○任家人書役婪贓縱放非尋常失察可比亦應詳悉查訊嚴叅究處縣丞左世卿能留心訪緝尚屬能事該督曾作何獎賞鼓勵之處併著附摺奏聞計此旨到日吳達善諒已起程即交定長查辦○又諭本日阿思哈奏河南各屬於三月十一及二十等日節次得雨已獲普霽昨方觀承亦

實錄卷七五八

七

奏河間天津迤南州縣俱經得有雨澤東省地方毗連直隸河南曾否一律霑濡未據該撫奏聞著傳諭崔應階將該處曾否得雨據實覆奏以慰廑念尋奏春間雨澤調勻入夏霑足若月底再得時雨數寸則二麥結實更為堅碩得旨覽奏俱悉又批看此則係目前亦需雨澤也今得霑濡否○丁未諭雲南附近普洱之十三土司久已輸誠內向編列版圖近日莽匪滋擾各土司邊境夷民鮮得寧居現今發兵平勦已搗整久孟艮賊巢搜捕匪黨各土司得復安故土但既受莽匪蹂躪元氣難免虧損深可軫念即未經被擾土司一切添撥土練修理橋梁急公踴躍其情亦屬可嘉著加恩將普藤

猛旺整董猛烏烏得中里六因倚邦易武猛脂猛遮猛籠猛往十三土司地方所有乾隆三十一年額徵條編正耗暨米折銀三千餘兩正耗糧六百餘石並猛籠一處乾隆三十年舊欠銀二百餘兩概行豁免以示優卹邊夷之意該部遵諭速行○諭軍機大臣等據高誠奏明春臨幸天津所有塢內現存各船繕單請點並請照南巡之例豫備水手等語單內所開船隻如安福驪翔鳳艇及單內簽貼各船俱著照例豫備應用至此次巡閱子牙河等處工程為日無多且所過皆平淀小河非南巡經涉江淮長途可比何必需用水手多人自應倣照霸州水圍之數酌量備用其一切隨營應用船隻

實錄卷一百一

八

並著總理行營大臣傳節酌覈妥協辦理可將此傳諭高誠知之○戊申禮部帶領八旗奉天直隸江南山東山西河南等省選拔貢生引見得旨張起洙琨玉范麗光魏全祿陳章馮埏吳鼎新姚念曾程夢湘蔡淮英龍舜琴王效曾杜彤輝吳忠誥王廷勳等十五名著以知縣試用朱兆熾永恕幹濟王士昕胡率德焦長發朱晉鹿荃劉宋李學沂張恒遜梁璽馬宏錦陳大年舒其紱鄔廷棟李景觀裴林魏翀楊騰楊惟增中國鼎施灝孔繼純周昂楊世綸許贊俊顧鴻志唐大成王灝董正治李夢荃黃朝恩王家樂李容楊彬王鳳蘭孫鳳鳴程楷汪燾葉時鳴劉咸熙閻文玕李偉烈封廷蘭高家駒

蕭九成鄧雲龍葛周玉紀有堂遲昂孫德恭楊嘉幹喬懷祖王可垠胡其敬白維世王之藩李祖望閻秉升杜伯春雷昶梁志學栗培上郎克謙薛清範張叶鼎陳直錢長清朱殿鼐蘇於豐蔣周南崔一機周均喬光載楊貴先等七十六名著交吏部詢問願以教職用者以教職用願以佐貳用者以佐貳等官用○予故喀爾喀輔國公瑯衮扎布致祭如例○旌表守正捐軀之直隸元城縣民常二妻班氏○已酉戶部議准盛京戶部侍郎富德奏乾隆三十年各驛地畝被水成災照例分別加賑其水衝沙壓地畝應納米豆草束分別蠲免並速勘確實畝數照數開除撥補從之○旌表逼嫁捐軀之

實錄卷一百一

九

貴州平遠州民陳洪渭妻余氏○庚戌

上詣暢春園問

皇太后安○諭曰國子監助教陳孝泳舉人徐揚俱在內廷行走有年屢應會試未能中式均著加恩陳孝泳以戶部主事用徐揚以內閣中書用○又諭前據常鈞條奏外省奏摺交兵部鈐用印信以昭慎重經部議覆准行但印信存貯部署往返鈐用日費馬力殊屬煩瑣且交發奏摺即係原齎差弁祇領向來亦未聞有滋弊之事嗣後該部豫將印花存貯軍機處備用所有臨時鈐印之處不必行○諭軍機大臣等前據吳達善奏發遣新疆人犯胡崇德賄囑兵役脫逃一案已

降旨令其將胡崇德立正典刑其賄縱為首之兵役審明後即行正法為從各犯並著發往烏魯木齊以昭炯戒今閱題叅各員升一本其拿獲各犯如何治罪之處該督亦尚未審明定擬此等匪犯挾其兇域伎倆玩視國法串通作奸實屬大干法紀所有在逃兵役自應嚴緝務獲毋使遠颺漏網其現在已經拿獲者尤宜速為辦理完結以防疎縱著傳諭新任總督定長令其將此案就獲各犯速即遵照前旨分別首從嚴審定擬具奏○又諭前因段成功虧空帑項各州縣徇情幫助竟有多至千餘金者尚浮於伊等歲入養廉之數恐以別州縣之庫項移補陽曲縣之虧空日後他人復有虧空

實錄卷七五八

+

又必至那東補西輾轉效尤勢將何所底止若不徹底根究是伊等竟視虧帑公帑為常事晉省吏治之壞復何由整頓是以傳諭彰寶嚴查密辦該撫惟應覈計各員俸廉所入若干每歲餘存即以五百金計亦積至數年始能符所幫之數以此質之幫銀之州縣伊等自難掩飾並查各員庫貯有無短少及訪其任內有無貪贖劣蹟更可得其實情此辦事要領也至段成功虧空帑金數至逾萬既已明正典刑但庫項業已彌補惟當治各上司徇情容隱之罪已將和其衷問擬重辟文綬劉墉亦發往軍臺其幫銀各州縣並交部分別嚴加議處此案俱已大示懲創今彰寶復請將段成功所虧之

項著落各上司及幫銀州縣照數分賠所見甚小金不能仰體朕整飭官方釐剔積弊之意彰寶著傳旨申飭○又諭據阿爾泰奏署珙縣知縣朱孝純盤獲僧道然靜等三人訊稱曾於貴州地方與苗目王老三熟識商謀打搶安順府已據將該犯解交貴州就近質審一摺然靜等與苗人往來又復至川省捏造浮言誑騙惑眾已有應得之罪至所稱王老三等商謀打搶一事有聞官兵已來剿除之語且已委員赴川追緝三犯是此案在黔省業經敗露果否苗目王老三有商謀搶劫之事抑係然靜等捏詞妄供各犯到案後無難嚴切根究訊得實情若苗目果有起意商謀之處自當拘拿質訊

實錄卷七五八

+

以彰國法但此等亦不過尋常打搶之案止須不動聲色妥協嚴辦以盡根株但無得過涉張皇致滋驚擾亦不得存大事化小之見著將此傳諭方世儒速行查奏○辛亥上御勤政殿聽政○諭曰阿敏爾圖在藏患病著官保赴藏辦事更換阿敏爾圖回京以詹事景福為大理寺卿以廣西太平府上龍司休致土巡檢趙宏烈子彥襲職○壬子諭向來新進士殿試朝考後復派王大臣驗看分別等第原因人文並重且使邊方遠省名次在後者亦得均與館選也但思進士原係通行引見其人可造與否朕皆臨時甄別錄用自可無庸豫為揀選嗣後新進士引見時著各按省分仍依

甲第前後分班帶領並將上次每省錄用人數詳晰開單呈覽如有朝考錄取者并於綠頭牌及排單內註明其如何分省分日引見之處該衙門臨時酌辦奏聞○癸丑

上諭暢春園問

皇太后安○甲寅大學士管雲貴總督楊應琚奏莽匪一案原屬不成事體但向來聚匪無多僅於土司境內需索財物糧米無識土司狃於便安亦即賂以財物並不呈報嗣因外域年年殺奪夷戶離散不能種地僻壤收成又薄無業莽子艱於覓食以致賊首召罕彪率眾赴外域之豐寶六官暨南掌國之潑邦均被燒掠漫入邊地土司所管猛籠地方其時莽

貴錄卷五十八

上

匪僅二三百人而沿途脅從者至二千餘人經文武官調六困土弁刁鎮猛混土目召奔等率土練來助剿召奔等被殺總兵劉德成會商知府請添官兵進攻前督臣吳達善未准嗣召罕彪被鎗身死餘賊退去未經嚴懲劉藻接辦之初該鎮等具稟莽匪盤踞九龍江逼近土境亦批令撥練協逐不可擅動官兵輕入夷地此從前之實在情形查莽匪既敢糾眾肆擾彼時即應嚴勦示懲乃惟令土練堵禦並不派撥官兵督率進剿致賊無所顧忌誠由平日不能實力整頓雖地方官據實稟報督臣既不認真飭辦又不令官兵對壘其咎實在吳達善等得旨有旨諭部諭雲南莽匪滋事之由朕料

必因歷任督臣平日姑息不能實力整頓所致因降旨楊應琚令其據實查奏茲據奏到莽匪於乾隆二十八年間即已侵擾土司境內彼時吳達善據總兵知府稟報僅批撥兵防禦不令與賊對壘遂致伊等積玩無忌等語怯懦者必有以吳達善為持重不生邊釁為是者不知督臣膺封疆重寄似此養癰貽患致令匪徒敢於跳梁邊境釀成事端所謂持重不生事者安在今賊巢雖已勦平而前此辦理不善之愆難為曲貸吳達善著交部嚴加議處楊應琚甫經蒞滇辦理動合機宜現在根究賊首逃匿處所四路設法追擒並籌辦善後事宜俱屬井井有條深可嘉予楊應琚著交部議叙夫以

貴錄卷五十八

上

本係易為之事使劉藻居此亦可以告成功而邀恩敘乃畏怯急遽以致自裁為結紳羞不亦大可笑乎所有楊應琚奏到各摺並著發鈔○諭軍機大臣等楊應琚奏賞給土目以先揮指揮職銜管理整欠之處業經軍機大臣議覆降旨准行該督辦理莽匪動合機宜現在籌畫善後事務尤能井井有條朕心深為嘉悅已於摺內批示並降旨交部議敘伊孫楊茂齡昨交領侍衛內大臣帶領引見已授藍翎侍衛矣楊應琚著再賞給大荷包一對小荷包一對藥錠一封以示優眷再著傳諭知之 大學士管雲貴總督楊應琚奏查召丙父猛孟容世居孟良弟召猛必以滋擾夷民被逐攜子召散

住狝狝身故。猛孟容人本無能。整欠大頭目。素領散撥兇惡。常至孟良。欺凌召散。謀占孟良。以一姊一妹。給莽匪召。猛烈為妻。所結莽匪。被官兵勦滅。現恐召散。或赴狝狝藏匿。已飭令召丙遣人至狝狝查拏。又莽匪曾至南掌國。潑邦地方。焚掠召散等。必不投彼藏匿。孟良整欠二處。已留兵各八百名。猛撒江口。係威遠順寧門戶。應將原駐守備一員。把總一員。兵二百名。暫留駐其餘官兵。土練悉撤。得旨處處留心。條條有理。嘉悅之外。更無可諭。已有旨交部議敘矣。

實錄卷七五九

高

大清高宗法天隆運至誠先覺體元立極敷文奮武孝慈神聖
純皇帝實錄卷之七百五十八

大清高宗法天隆運至誠先覺體元立極敷文奮武孝慈神聖
純皇帝實錄卷之七百五十九

乾隆三十一年丙戌四月乙卯諭曰。楊廷璋奏稱。小鎮安守備土司等。巡查隘口。見怕懷隘外山頂山洞。聚集多人。隨據交趾夷目報稱。該國隘口谷旁村夷匪聚集。搶掠現在起兵擒捕。懇求內地堵截等語。已派委將弁嚴守卡隘。慎密堵截。一摺。內有慮邊臣孟浪。稍不特重。或生事端。切諭該地方文武鎮靜。彈壓詳慎。防範之語。楊廷璋此論。似是而實非。交趾素屬恭順。謹守藩服。原不宜無故加兵。即其現在勦捕夷匪。並未干涉內地。亦不過攔其竄逸而止。設夷匪竄入隘口。自

實錄卷七五九

一

當協力擒捕。付彼處分以示懷遠之道。或交趾兵目藉緝匪為名。擅至邊境滋擾。豈可輕縱不完。僅以驅逐出口了事。又或內地人犯逃匿彼境。即應向其索取。倘索而不予。即當聲其罪而追攝之。又豈可置之不問乎。此等邊地夷情。惟應審度事理之當辦與否。因時制宜。若務為特重鎮靜之說。則養癰貽患。其弊有不可勝言者。即如雲南莽匪一案。於乾隆二十七八年間。即有搶劫沿邊土司之事。而總督吳達善不即發兵擒捕。早絕根株。以致日久玩延。究歸於用兵勦除。始得肅清邊徼。已將伊交部嚴加議處。并將其辦理不善之處。宣示中外。今楊廷璋復有此奏。是督撫等惟以息事為樂。邊要

領且恐無識之徒轉以持重不生事為得體其所關於封疆者甚大殊不知邊地當無事之時自當示以鎮靜固不可無端滋擾致邊釁自我而開若番夷一有騷擾情形則是彼自取罪戾隨時懲創理所宜然使一味異悞因循聽其倡獮是欲省事而轉以滋事所為持重者又安在乎將此通諭各督撫知之○又諭昨因舉人選途壅滯特派王大臣通行揀選候朕酌量錄用已據吏部將揀選一等舉人八百四十七名帶領引見二等舉人一千一百五十一名開列名單具奏所有選列一等舉人著該部籤掣分發各省以知縣試用其借補州同州判縣丞經歷鹽庫大使河工等官悉照部議行至

實錄卷五十九

二

揀入二等人員即照該部議定班次以教職用此內有會榜已經中式將來於新進士引見時歸班者其曾經選入一等人員著照新進士分發之例發往各省以知縣用二等人員著先以教授用仍按進士原班銓選○旌表守正捐軀之江蘇贛榆縣民丁智妻李氏○丙辰

孝端文皇后忌辰遣官祭

昭陵○諭前據步軍統領衙門奏稱北營守備接准鞏華城關移緝拿逆犯馬朝柱圖牌稱係在於貴州黎平府開泰縣飯店脫逃等語上年七月間方世儒曾奏徐獻朝陷害徐占鰲捏造逆犯馬朝柱在伊家中住宿經該撫等親往搜查並無

影響審出徐獻朝誣陷實情問擬完結即係黎平府開泰縣之事何以開泰縣同時復有此案該撫不另行奏聞之理彼時即疑其事屬荒唐因派員前往各路根究文書來歷今據查至江南地方始知由四川提督岳鍾璜僅據營員風聞稟報不揣事之虛實即遍處行文偵緝輾轉關查高晉亦不加深察復行通檄緝拿崔應階及方觀承俱依樣葫蘆飭屬通緝殊不知逆犯馬朝柱罪大惡極經各省嚴密查拏歷有年所設使其人尚存早應弋獲斷不能倖逃顯戮今閱時已久諒應早伏冥誅岳鍾璜身為提督遇有查緝奸匪之事如果訪有確據自應上緊緝查乃以黔省已結案件輕信綠營妄

實錄卷五十九

三

稟冒昧關拏張皇滋擾殊屬不諳事體著交部察議高晉崔應階方觀承因仍前路來文率行轉緝亦屬不合並著飭行○諭軍機大臣等據阿桂等奏稱有哈薩克塔塔拜等十一人懇請內附現今暫居雅爾又有一二鄂拓克人戶亦願內附可否令其在珠勒都斯空地居住等語伊犁等處土地遼闊人烟愈多愈善哈薩克如不得游牧地方或畏懼剝掠情願內附者即行收留派員彈壓日久人眾即可編設佐領昂吉但收留後即令居附近地方易資彈壓不必令其往珠勒都斯居住即哈薩克性情無定或私自逃遁亦無關緊要將此傳諭阿桂等將現在內附之塔塔拜等即在雅爾居住不

必支給糧餉委派差役嗣後有來歸者悉令於雅爾地方安插由厄嚕特哈薩克內酌派官員彈壓並諭明瑞等知之又諭據成衮扎布等奏稱霍尼邁拉呼等處已設卡座哈薩克前來就近游牧不免有闖毆盜竊等事請派雅爾大臣或派彼處王公扎薩克帶兵駐劄該處嚴禁游牧等語現據雅爾大臣阿桂奏稱有哈薩克塔塔拜等懇請內附朕諭令安插雅爾地方或由厄魯特或由哈薩克內派員管轄今霍尼邁拉呼等卡與哈薩克相近如哈薩克果係不得游牧處所或懼人劫掠投誠內附者即令於科布多地方居住不必支給錢糧委派差役派令妥員彈壓若非投誠內附恃強占據

實錄卷七五九

四

即應驅逐不可姑息將此傳諭成衮扎布知之○以右贊善李汪度充日講起居注官翰林院侍讀楊述曾修撰畢沅署日講起居注官○丁巳諭軍機大臣等前因外遣人犯在遣所脫逃者該管大臣向未奏聞諭令查明在逃未獲人犯年來約計若干茲據烏嚕木齊辦事大臣奏該處脫逃遣犯乾隆三十年分河南有余方一名山東有趙三一名山西有甯二一名江南有嚴七即姚節一名直隸有賈二一名四川有譚洪一名三十一年分直隸有陳二即陳明玉尤羊即楊四李福兒丁大格子鄧輔即鄧五兒又名鄭大陳三又喀喇河也俞得水共七名山西有程全一名江南有張二陶受二名

浙江有俞佩增一名現在緝拏未獲等語此等皆係身獲重罪免死減等理應在遣所安靜守分乃兩年以來脫逃至十餘名之多遣所久未弋獲該犯等必係乘閒逃回本籍潛行藏匿若不上緊嚴緝按法懲治何以示儆著傳諭各該督撫飭屬嚴密查拏務獲一面照例辦理一面奏聞毋使罪犯竄跡漏網○旌表守正捐軀之山東金鄉縣民李水妻楊氏戊午

上詣暢春園問

皇太后安○直隸總督方觀承疏報乾隆三十年順天保定天津宣化四府并熱河道屬共墾地二百五十六頃二十畝有

實錄卷七五九

五

奇○已未諭節年以來屢經降旨令旗丁餘米准其在通州變賣以資日用現在各省漕艘陸續抵通於正供兌足後旗丁多餘米石如有情願出售者仍著加恩准其就通州糶賣旗丁等既屬便宜而地方糧石益加充裕於民食更有裨益該部遵諭速行○又諭向來各省分發人員在外守候不無壅滯此等人員內材具可用者自必以次題補其或材本平庸不能遇缺補用督撫等惟事姑容不加甄別致各員坐數積薪徒滋旅食轉非所以示體恤著各該督撫將從前分發人員詳加分別除才堪供職實因需次稽時者仍留該省候補其有平庸不堪錄用之員著查明請旨賞給職銜令其各

回原籍俾伊等得邀頂帶之榮而現在揀發之舉人皆得及
鋒而試於地方吏治尤為有益該部可遵諭行命大學士
尹繼善劉統勳協辦大學士吏部尚書陳宏謀戶部侍郎王
際華兵部侍郎鐘音彭啟豐刑部侍郎周煌左都御史觀保
為殿試讀卷官 庚申策試天下貢士胡珊等二百七人於
太和殿前制曰朕繼紹丕基誕撫萬國祇慎夙夜懋勅幾康
三十一年於茲未敢少懈必世昌期幸符熙洽仰荷

上帝之鴻庥

列聖垂裕之嘉祉方內乂寧土宇遐擴士民樂業歲復屢豐朕
履盛思謙勤咨上理緬維經學為出政之原史冊為鑒觀之

實錄卷三十一

六

本察吏治以底績疏選法以程材將以監古宜今胥規實效
勵官造士共勉永圖茲當臨軒發策延攬維殷佇獻嘉言以
佐予休治六經之旨千古範圍約舉數端以規誦習易傳三
義書分六體詩有三作春秋著五始載記多後儒之所增周
禮以冬官為散見其說可臚舉歟窮經致用先務貫通彖傳
象辭何以乾卦獨立於天下二典三謨何以左氏引以為夏
書王風魯頌編詩何以獨異左傳公穀經文何以互殊以禮
記為曲禮易周官為周禮始於何人何代能確鑒言之歟史
以垂彰瘴而體例不必盡同循吏儒林始於史記文苑獨行
始於後漢書忠義始於晉書道學始於宋史其分門各當否

梁書有止足傳隋書有誠節傳唐書有卓行傳同異果何如

也凡人之賢否事之得失俱見於傳復作論贊疑若贅設沿
而不廢毋亦拘於體例耶茲命廷臣重修國史期於據事直
書永昭懲勸有可以援古証今裨益編摩者歟記曰大臣法
小臣廉言乎上與下之相承也周官以六計弊羣吏善能而
下皆冠以廉漢法六條察吏者五良規具在可備列而踵行
歟朕澄叙官方加意整飭期庶司百職共底廉平而任封疆
者或以姑息為心綰銅墨者或未清白率職吏治之不醇民
生其曷攸賴夫大吏者羣有司之主臬也欲使羣吏皆守法
奉公固在大吏之公正明察足以董率而甄覈之矣顧侵漁

實錄卷三十一

七

之弊未盡除黷墨之風未盡息何以杜其源遏其流俾人思
濯磨潔己自愛歟古者三物賓興書升論秀士皆得乘時利
見自九品官人三途並用時勢較異或以猥雜為譏或以壅
滯為患唐之銓法有十數年不得親政者選途之積自昔而
然朕念士之列賢書者需次稽時或少壯策名淹及皓首特
令甄選廣其途而登用之俾無積薪之虞既為疏通繼此果
無慮其復壅歟且及鋒而用為舉人計即為民社計也膺茲
選者何以奮勉供職以毋負拔擢之意歟夫崇經術昭法戒
飭官常勵儒修皆惟其實不惟其文也多士習聖賢之業明
治理之要其悉意敷陳以無負循名責實之義毋勤毋泛朕

將親覽焉○諭軍機大臣等阿思哈奏豫省土城暫緩改建一摺所辦是已於摺內批示矣惟所稱儀封夏邑考城三縣積水難消之處前曾據該撫奏明將此三處城垣緩修距今又閱年餘何以積水尚未消退豈該地方官平日竟未設法疏通抑曾經疏治未能涸出耶該撫自當相度各該處情形視水所歸宿處迅為宣洩毋使日久停滯若地勢實處低窪難於疏通則是消涸無期又豈宜久置城垣於沮洳而不為酌議遷移著傳諭阿思哈逐一確勘如積水尚有可消之勢即上緊實力經理勿致因循誤期如或旱濕不可施工即量遷高地另建城垣以資保障著該撫速即查明妥議據實奏聞

實錄卷七五九

八

○軍機大臣等議奏據雅爾辦事大臣阿桂奏請將各遣犯攜眷者盡改發烏魯木齊屯田等語烏魯木齊地土肥美招募民人一時難以足數且起程一切需費亦繁不如將應遣人犯悉令攜眷遣發該處其能改過者擬定年限給與地畝准入民籍不費帑項地方漸至富庶日久即可編成衛所查例載發遣應攜眷屬者准給官車口糧不應攜眷而自願攜眷者不給但烏魯木齊地屬邊陲極遠該犯有例不攜眷而情願攜眷若非官為料理勢必無力攜往請照阿桂所奏不分例應攜眷與否凡攜眷者一併給與口糧車輛至募民遣往之處仍宜照舊以一千五百戶為一所三千戶為一衛

今地方官管轄又據稱現在烏魯木齊遣犯未曾攜眷者皆以該處地廣田腴易圖生理自悔未曾攜眷請令烏魯木齊大臣等曉諭伊等有情願在彼入籍者即行文該省督撫將伊等家眷照送遣犯例辦給口糧車輛送往從之○辛酉大學士傅恒等奏前奏將陸續選擇清文舊語彙輯成卷現在選擇之文足數十卷恭繕一卷進呈餘陸續繕進謹擬

實錄清文舊語輯畧名目載入卷首得旨允行○江西巡撫明

山疏報乾隆二十九年新喻萬安臨川上饒廣豐鉛山貴溪

樂平建昌南康等十縣墾田地十二頃二十七畝有奇○旌

表守正捐軀之河南閭鄉縣民員近秀妻王氏壬戌廣東

實錄卷七五九

九

巡撫王檢奏粵民多聚族而居每族祠置祭田名為嘗租大戶多至數千畝小戶亦有數百畝租穀按支輪收除祭祀完糧外積至盈千累萬貲財豐厚往往倚強凌弱恃眾暴寡其勢均力敵者不能取勝則祠內糾眾出鬪議定族中鬪傷人厚給嘗租以供藥餌因傷身故者令木主入祠給嘗租以養妻孥如傷斃他姓有肯頂兇認抵者亦照傷故例正犯漏網奸徒愈無顧忌前經按察使潘思渠請將嘗租仿宋臣范仲淹義田例設族正族副經營仍令地方官稽覈奉行日久而械鬪之風未悛竊思聚此貲財適以濟其兇惡不如散彼田產可以息其鬪爭請飭查嘗租田自百畝以上者計每年祭

祀所需酌留數十畝擇安分族人承充族正經理嗣後嚴禁添積其餘田新置者仍歸本人收管年遠及遞年租利所置按支派均散俾貧民有田以資生兇徒無財以滋事得旨另有旨諭諭據王檢奏粵東隨祠嘗租每滋械鬪頂兇之弊請散其田產以禁刁風等語其意特為懲兇息訟起見但欲豫防積弊遽將通省鄉祠田產紛紛查辦恐有司奉行不善吏胥等或致借端滋事而族戶人等賢否不齊亦難免侵漁爭攘之弊徒多擾累況建祠置產以供祭祀贍族之資果能安分敦睦如宋臣范仲淹義田之制閱今已歷數百年其遺規何嘗不善若倚恃族蕃質厚欺壓鄉民甚至聚眾械鬪牟利

寶錄卷三

十

頂兇染成惡俗其漸自不可長此等刁風閩廣兩省為尤甚過年來遇有械鬪傷人之案皆究明兇手盡數抵償入於情實不與尋常鬪殺同科至買兇頂兇之犯亦令部臣嚴定條例盡法懲治雖較前稍知斂戢而澆悍之俗尚未能盡除嗣後令該督撫嚴飭地方官實力查察如有此等自恃祠產豐厚以致糾合族眾械鬪斃命及給產頂兇之事除將本犯按律嚴懲外照該撫所請將祠內所有之田產查明分給一族之人俾兇徒知所警懼而守分之善良仍得保有世業以瞻族人於風俗人心較有裨益不動聲色為之以徐著將此通諭各省督撫飭屬一體留心妥辦又諭據理藩院奏稱貝

子喇什色楞呈稱齊旺班珠爾旗分人等被災請借給一年俸銀又貝子棟多布扎木素等五扎薩克等借給半年俸銀助賑齊旺班珠爾貧民等語齊旺班珠爾旗分人等被災棟多布扎木素等情願借俸助賑固是任卹之意但伊等俱朕奴僕何必令其借俸捐助朕自行加恩著按齊旺班珠爾等借俸數目賞銀賑卹該旗災民再烏喇特公索諾木喇布坦恭格喇布坦等旗其游牧逼近鄂爾多斯亦以被災報部著加恩賞給伊旗公扎薩克等一年俸銀賑卹該旗災民著海明馳驛前往將所需銀兩由口北道庫照數支撥齎往賑給○諭軍機大臣等據阿思哈奏動用耗羨摺內有刊布御製

寶錄卷三

上

詩文集估需銀數前因樂善堂集重加校勘令各省督撫將舊頒原本查明繳回並令將坊間翻刻版片查取交官量給刻資嗣據各省將原集印本陸續繳進其所有原刻舊版惟托思多高晉曾經繳回其餘各省作何辦理之處未據奏明此項版片存留恐不知者誤行刷印轉與新刊定本相混且存貯日久亦徒至朽廢現在既有刊刻御製詩文集何不將舊存之版檢其木料堅厚者酌量剗改以資刊刻化無用為有用殊覺便益著各督撫一體查明辦理具奏可於奏事之便傳諭知之○吏部議准閩浙總督蘇昌等奏稱閩省福州漳州二府倉穀改歸縣倉該倉大使已無經管之事應裁惟

福州府寧德縣霍童地方離縣甚遠地僻民刁又漳州府龍溪縣江東地方為通衢要道奸匪易滋二處均應添設巡檢一員請將福州府所裁倉大使改為巡檢移駐寧德縣霍童地方漳州府所裁倉大使改為巡檢移駐龍溪縣江東地方改鑄印信給發其衙署各將倉大使舊署拆變移改缺歸部選從之○旌表守正捐軀之安徽當塗縣民朱昭乾妻成氏福建詔安縣民黃丕妻余氏 癸亥

上詣暢春園問

皇太后安○還宮○御乾清宮召讀卷官入親閱定進呈十卷

甲第○旌表守正捐軀之直隸安肅縣民崔清妻李氏 甲

實錄卷七五九

七

子

上御太和殿傳臚賜一甲張書勲姚顒劉躍雲三人進士及第

二甲陸費墀等六十八人進士出身三甲黃本田等一百四

十二人同進士出身○幸圓明園 乙丑諭向來八旗遇有

流徒罪名均以枷責發落嗣因旗人漸染惡習竟有不顧顏

面甘為敗類者曾降旨令將旗人流徒案件滿洲則按其情

罪公私輕重分別問遣折抵漢軍則均斥令為民照所犯定

例發遣原以示之懲儆用挽頹風且緣寡廉鮮恥怙終之徒

留之有損無益此專指情罪重大者而言非謂尋常事件亦

不加區別也至包衣漢軍則皆係內務府世僕向無出旗為

民之例與八旗漢軍又自有別尤不應混行援引乃刑部問擬往往未能畫一即如近日哈豐阿等承修溝工一案與去歲伊星阿等辦理車輛一案前後擬罪已不免互異於體制既未允協而定讞參差日久恐致高下其手之弊嗣後問擬旗人罪名務詳覈犯案情節如實係寡廉鮮恥有玷旗籍者不但漢軍當斥令為民依律遣發即滿洲亦當削其名籍投畀遠方其餘尋常罪犯及因公事獲譴者無論滿洲漢軍仍照定例折枷鞭責完結如此則旗人益當知所勸懲而勅罰亦昭平允著傳諭中外問刑衙門知之○旌表守正捐軀之直隸蠡縣民劉九妻崔氏 丙寅

實錄卷七五九

七

上詣暢春園問

皇太后安○戶部議奏盛京開原等城並

三陵內務府所屬地方被水成災五分至十分不等應照成災

分數分別賑蠲從之 大學士管雲貴總督楊應琚奏查孟

良賊首召散謀占孟良將姐妹給召猛烈為妻勾結莽匪殺

害召丙父猛孟容占踞孟良上年召猛烈勾結整欠賊首素

領散撰等率領野夷至九龍江一帶將各土司地方焚掠又

前逆犯施尚賢供稱召猛烈統莽子八九百人糾約擺夷商

量攻破猛遮猛阿從猛緬雲州直抵大理又欲從整控江口

直抵思茅等語是召猛烈實罪大惡極之犯茲四月初一日

總兵華封探得召猛烈在猛補界外深山藏匿初三日遊擊豆福魁等帶兵拏獲召猛烈併家屬共十一名口又召岩一名併家屬共五名口暨隨從男婦二百餘名口現檄提召猛烈等親究召散下落其隨從莽子除將婦女及年未及歲幼子賞給出力將弁土目為奴外概行誅戮其未獲賊首召散召猛珍伍定瑞凍等仍嚴飭躡緝以期必獲得旨好應行鼓勵示勸者即行賞賚○以右庶子觀光署日講起居注官以漕標中軍副將胡大猷為湖南鎮草鎮總兵○旌表守正捐軀之河南寧陵縣民竇志仁婢魏氏○丁卯諭軍機大臣等張若淮奏考試情形一摺有告給衣頂生員置身考試之

實錄卷五

五

外無所拘管轉得為匪作惡官司鄉里均受其累等語生員內果有包攬詞訟把持官府情事一經發覺原不必問其曾否告給衣頂均當嚴行懲治如實係入泮年久不能上進及齒逼衰邁為疾難痊者定例准給衣頂行之已非一日於整飭學校本無關礙若其人不安本分甘自暴棄即當年齒方壯現在應試之時亦未嘗不可特符滋事豈必待告給衣頂之後始得逞其伎倆擾累閭閻况給頂生員雖不復與歲科兩試而名籍仍隸學宮該學教官例當一體管束如有過犯或申報劣行注册或詳請褫革衣頂仍可隨事示以懲儆又何至如所稱縱之宮牆之外得以曠蕩為奸乎若因此輩內

偶有一二敗類生事犯科遂舉年例實在已符者亦不概准給頂未免過於拘泥該學政但當嚴飭教官於所屬生員隨時訓飭防範有犯必懲則士習自漸整頓不必豫設成心致涉煩瑣也可將此傳諭張若淮知之○又諭據方世儒奏樂平土司民楊國臣同貴定文生韋學文等在苗洞散給布照哄誘愚苗一摺此等案犯既經敗露自應上緊根究嚴行查辦以示懲儆至黔省苗民雜處當使之共知守法安分斷不可令內地奸匪潛入洞寨滋事昨黑寨寨地方已有董正源然靜等捏造誣言一案今貴定縣地方復有楊國臣等肆行煽誘之事看來近日該省各苗洞內潛匿漢奸不少倘任其

實錄卷五

五

往來引誘不加查察恐苗民被其蠱惑釀成事端於地方甚有關係不可不豫為防範著傳諭方世儒通飭各屬設法嚴查如有此等奸徒潛跡苗洞誘惑愚苗者務須密行訪察嚴拏重究盡絕根株庶苗各循本分可以久安樂利尤宜不動聲色緜靖苗邊勿稍涉張皇致胥吏借端滋擾將此諭令該撫知之○戊辰諭今日兵部帶領江寧咨到年滿教習領催穆隆阿等引見薩爾圖辦理非是兵部不行議駁亦屬不合此等教習不過教誨該處閒散餘丁數年有何奮勉出色之處如將伊等俱令陞用則該處著有正項勞績者反致壅塞但既由江寧咨送領催穆隆阿英格永安喇錫福森保貴

昌海齡德楞額全福廣英額舒哥華泰著記名交該處將軍
俟有應陞缺出時同該處應陞人等一體揀補嗣後該處年
滿教習咨部引見之處永行停止○湖廣總督前任湖北巡
撫吳達善疏報乾隆三十年長樂縣墾地四頃十八畝○原
任署陝甘總督陝西巡撫和其東疏報乾隆三十年狄道州
墾地一頃五十二畝○是月兩江總督高晉議奏查營伍軍
器地勢平衍者宜用弓矢至山深林密能及遠致勝者莫如
鳥鎗江西形勢或長江大湖或深林密箐汎地險隘利用鳥
鎗應如鎮臣邱若龍所奏照沿邊沿海定例應於標營協弓
箭額兵內每十名改鳥鎗四名教演嫻熟缺出另募壯丁頂
補得旨允行○山西巡撫彰寶奏晉省寶晉局向設鑪六座
鑄錢尚少每年解貯司庫錢除搭放兵餉外餘錢夏冬設廠
出易照時價每千減銀五分以濟民用嗣添銅加鑄搭放兵
餉外餘錢更多均設廠平賣是給兵錢少而與民易者多且
小民需用不過零換設廠期迫富商猾吏乘機囤積貧民沾
惠仍少請將滿漢兵除搭放三分錢文外其應領月餉銀概
照出易民間之價由司支給錢文即將應領餉銀扣存歸庫
餘錢仍設廠換給民間得旨允行

大清高宗法天隆運至誠先覺體元立極敷文奮武孝慈神聖
純皇帝實錄卷之七百五十九

大清高宗法天隆運至誠先覺體元立極敷文奮武孝慈神聖
純皇帝實錄卷之七百六十

乾隆三十一年丙戌五月己巳朔

上詣暢春園問

皇太后安 吏部議准閩浙總督蘇昌等奏稱泉州府同安縣
金門一島地畝日闢民人輻輳向設縣丞微員難資彈壓查
駐泉州府安海地方通判事務既簡且與駐石獅之西倉同
知相距甚近請以安海通判移駐金門安海事務歸併西倉
同知兼理又灌口地方水陸交衝原設巡檢微員難資彈壓
請將金門縣丞移駐灌口又福鼎縣篆與地方為海疆扼要

實錄卷七百六十

一

之區請將灌口巡檢移駐篆與各官俸廉役食仍照原編改
撥支給金門灌口現有衙署惟篆與應另籌估建三缺俱關
緊要應請在外調補各關防印信均照例改鑄從之 庚午
內閣翰林院帶領癸未科散館修撰編修庶吉士引見得旨
修撰秦大成編修沈初章謙恒已經授職其清書庶吉士謝
啟昆祝德麟董誥孟生蕙俱授為編修李鐸易文基黃義尊
俱授為檢討漢書庶吉士吳省欽金士松褚廷璋孫致曾嵇
承謙張燾祥慶胡翹元俱授為編修丁榮祚周位庚龔騄文
官志涵史大勳蔣鳴鹿俱授為檢討卽日榮曹錫寶蘇去疾
顧震白麟鄧大林李調元陳其煥孫含中姚鼎俱以部屬用

馮昌紳張鶴雲著歸進士原班銓選 辛未

孝誠仁皇后忌辰遣官祭

景陵 諭據楊廷璋等奏鎮安府知府韋馱保於拏獲聚眾
滋事之沙匪張凡良等並不立時訊究及供出勾引首犯又
不親自迅往查拏請將韋馱保革職留於該地方勒限緝拏
逸犯等語韋馱保著革職仍留該省協同緝犯如逾限不獲
另行請旨治罪 諭軍機大臣等據楊廷璋奏瓊州府岐黎
猖獗糾黨焚殺客民晝夜聚圍汛地現在飛飭鎮道督率弁
兵在於隘口堵禦並曉諭熟黎人等將兇黎盡數縛獻如敢
負固即勒兵進剿等語已於摺內批示矣此等匪徒蠢悍性

實錄卷七百六十

二

成敢於肆行劫掠實屬目無法紀自當盡數擒獲嚴行懲治
以彰國威而靖邊海該督既經前赴雷州府就近調度務期
盡滅根株大示懲創毋得意存姑息草率了事所有現在督
辦查拏並兇黎曾否全獲情形速即據實覆奏毋得稍有虛
飾可將此傳諭知之尋奏臣自馳赴雷瓊調度勦撫黎匪機
宜隨據鎮臣甘國寶巡道王錦會稟該鎮道同抵崖州查明
黎匪係被客民居住黎村者重利盤剝凌虐難堪黎人挾仇
圖報那隆水滿山為首殺死藤客李林興李孫勁等二十餘
人並焚燒鄰邨逼脅附和趕殺客民客民逃入樂安汛城守
備任賢督兵追捕黎眾逃散陸續獲首犯那隆等惟水滿山

逃入五指山現派兵分堵隘口而先破脅之熟黎等現赴官投結情願入山誘捕贖罪諒可剋期全獲不煩用兵督勦容將善後事宜妥酌具奏得旨嘉獎 山東巡撫崔應階疏報雷化聊城安邱三縣墾地八頃九十一畝有奇 壬申

上御勤政殿聽政 諭京師自四月以來雨水稍覺稀少農民望澤甚殷朕心深為軫念宜申虔禱期沛甘霖著禮部即查照定例敬謹舉行 調禮部侍郎珠爾訥為工部侍郎兼正黃旗滿洲副都統以內閣學士諾穆渾為禮部侍郎正白旗蒙古副都統德福署禮部侍郎正白旗蒙古副都統觀音保為鑲藍旗護軍統領仍兼副都統正白旗漢軍副都統明亮署鑲白旗蒙古副都統 命正白旗蒙古副都統觀音保管理健銳營事務 以翰林院侍讀學士德風為詹事 旌表守正捐軀之直隸蠡縣民李二妻張氏山西祁縣民李永照女李氏 癸酉

上詣暢春園問

皇太后安 諭軍機大臣等蘇昌題參典史方國祥疏脫遣犯楊香請旨將貪差不慎之知縣衛克靖革職勒緝一本有難於限內拏獲不准開復之語所辦未為妥協衛克靖貪解發遣重犯不行詳慎派委以致疎防脫逃自有應得處分但定例止於降留今因該縣將起解日期改遲巧為掩飾擬以革

實錄卷七百六

三

實錄卷七百六

四

職亦不為過但既令該員勒緝自當責其實力查拏若使明知開復之路無可希圖則緝拏之心必因而生懈於事轉為無益即謂該員改期規避之罪宜從重示儆亦不應見之彈章使該員聞知豫生退沮是欲予嚴懲而究無實濟豈得為善於辦事乎況在典史外委等派撥押解中途疎脫如使審無知情故縱情弊亦且革職之外無餘罪若於知縣加以重譴則專司押解之員弁復將何以處之乎所有本內不准開復一語已交部刪節覈議至此案逃犯必須上緊緝獲以正典刑不但勒緝之員責無可辭即通省各屬該督亦應飭令協同嚴速躡緝毋令該犯日久遠颺著將此一併傳諭蘇昌知之 又諭據額爾景額等奏稱本年葉爾羌應徵滿洲官兵需馬一百九十餘匹現在葉爾羌備差官馬止有二百四匹實難全數辦給因咨商永貴將伊犁馬匹通融辦理據永貴以馬匹無多不能通融咨覆請將馬價支借官兵雇商人回空馬直達肅州等語伊犁同部盡入版圖兩處事務並無區別葉爾羌需用馬匹伊犁理合通融辦理即去年有烏什之事兼遇大雪馬多傷斃然現有陸續所買哈薩克之馬即不能多豈百十匹亦不能辦耶乃明瑞竟以不能通融咨覆永貴顯因事緣回疆心存推諉公事如此其何以濟將此傳諭明瑞永貴額爾景額等嗣後伊犁回疆凡有應辦事件互

相商酌務期有濟慎勿心存吟域互相推諉也 甲戌

上詣黑龍潭祈雨 旌表守正捐軀之河南商邱縣民劉文童

妻邢氏 乙亥諭軍機大臣等現今時值炎夏近京地方雨

澤稀少天津一帶濱臨河淀地勢低窪葦業中向為蝗蝻所

聚誠恐此時遺孽潛滋不可不豫為防範著傳諭高誠楊克

信留心查勘如有萌動形跡迅即上緊捕滅毋使漸至滋蔓

有妨禾稼並將現在情形若何即行具摺奏聞尋奏現在督

臣方觀承飭州縣派定護田夫役按鄉巡查臣等亦督屬分

查防範今得雨透足禾稼滋長實無蝗蝻形跡仍實心查察

不敢懈怠報聞○以山西大同鎮總兵額僧格為寧夏將軍

○丙子

上詣暢春園問

皇太后安○授一甲一名進士張書勳為翰林院修撰一甲二

名姚頤一甲三名劉躍雲為翰林院編修 以浙江嚴州協

副將九格為山西大同鎮總兵 丁丑諭軍機大臣等查應

階奏東省各州縣所設民壯一概改習烏鎗教演純熟頗資

防守等因一摺所辦甚好地方設立民壯原為巡緝盜匪防

護監倉第日久懈弛漸至有名無實今東省民壯經該撫概

令改習烏鎗董率各屬如法訓練復親加巡查如此經理自

可望有成效直省各州縣俱有額設民壯或可仿照添設烏

鎗留心教演用以緝盜匪而禦兇頑於地方亦不無裨益若

奉行不力徒爾虛應故事或轉致更張滋擾則又無寧仍舊

著傳諭各督撫就各地方實在情形斟酌妥辦該處或有難

行之勢亦不必勉強滋事可將在應階原摺鈔寄於各督撫

奏事之使傳諭知之 旌表守正捐軀之直隸雄縣民劉致

中女劉氏晉州民張金聲妻吳氏 戊寅諭曰正一真人向

係承襲一品前據左副都御史梅穀成奏請量加裁抑經大

學士會同該部議覆降為五品第念其自宋元以來承襲已

久世守道教即遇有過愆亦應抵其人以罪耳不應議及其

世襲也然舊例一品班序未免太優遽降五品又未免過於

貶損且其法官妻近垣現係四品而伊品秩轉卑亦覺未協

今正一真人既來朝進京著加恩視三品秩永為例該部知

道○已卯皇十七子永璘生○諭伊犁等處戍守官兵俱已

撤回現在該處官員戴翎者甚少伊犁係新定邊疆協領總

管等俱係轄兵大員俱著賞戴花翎以壯觀瞻著為例 又

諭曰阿奇木公茂薩數年以來頗著勞績現在患病本年恐

未能來京入覲著加恩賞發雙眼花翎令其戴用 雲南提

督李勳奏臣與督臣楊應琚會訊召猛烈召岩後即往孟良

督拏召散以期速獲查召猛烈一犯係與召散同惡相濟勾

結整欠賊首分路至九龍江一帶會合將各土司地方大肆

焚掠且逆犯施尚賢供內有該犯尚欲謀入內地之語今訊問原有此言並據遊擊豆福魁面稟沿途土司夷民見召猛烈拏獲無不稱快應亟請將召猛烈正法其妻女幼子遞解京師分賞功臣家為奴至召岩一犯並未隨從焚掠但係召猛烈同祖堂弟自應亦行正法以絕根株召猛烈應否解至焚掠地方斬首梟示抑或即在思茅正法傳首懸示九龍江之處請旨遵行臣到孟良後究明召散等蹤跡督率總兵暨員弁兵練并土司召丙等迅速查拏如潛逃阿叛屬實亦務向索取不使免脫得旨傳首懸示可耳諭軍機大臣等據李敷奏到普洱後與督臣商定善後事宜一摺頗中事機已於摺內批示矣李敷現於四月內前往孟良伊新任提督於初定夷地親身閱視自屬辦理之正但彼處業派有總兵劉德成華封等帶兵追捕未獲賊首自可就擒李敷雖精力尚強究係年老若外域瘴氣稍重不妨即就近在普洱地方督理一切著將此傳諭楊應琚知之○庚辰

上詣暢春園問

皇太后安○還宮○諭曰鄂爾多斯扎薩克多羅貝勒棟多布扎木素獲有舊璽即行恭進誠悃可嘉著加恩賞給郡王銜并賞蟒緞閃緞片金倭緞花緞共五疋大緞五疋大荷包一對小荷包四箇送璽之管旗副章京賽堪著賞緞二疋是

實錄卷七六〇

上

日起
上以夏至祭地於

方澤齋戒三日 辛巳遣官祭

闕帝廟 諭朕昨見十五阿哥所執扇頭有題畫詩句文理字畫尚覺可觀詢之知出十一阿哥之手幼齡所學如此自屬可教但落款作兄鏡泉三字則非皇子所宜此蓋師傅輩書生習氣以別號為美稱妄與取字而不知其鄙俗可憎且於蒙養之道甚有關係皇子讀書惟當講求大義期有裨於立身行已至於尋章摘句已為末務矧以虛名相尚耶皇子

實錄卷七六〇

八

中或年齒已長間有書齋名字見之圖章尚無大礙若十一阿哥方在童年正宜涵養德性尊聞行知又豈可以此種浮偽之事消其見識耶朕昔在藩邸未嘗不留意詩文然從未嘗有彼此唱酬題贈之事亦未敢私取別號猶憶朕年二十二歲時

皇考世宗憲皇帝因辦當今法會一書垂問汝等有號否朕謹以未曾有號對我

皇考因命朕為長春居士和親王為旭日居士朕之有號實由皇考所賜然亦從未以之署款題識此皆和親王所深悉可問而知也我國家世敦淳樸之風所重在乎習國書學騎射凡

我子孫自當恪守

前型崇尚本務以冀垂貽悠久至於飾號美觀何裨實濟豈可效書愚陋習流於虛謾而不加察乎設使不知省改相習成風其流弊必至今羽林侍衛等官咸以脫劍學書為風雅相率而入於無用甚且改易衣冠變更舊俗所關於國運人心良非淺鮮不可不知儆惕朕前此御製皇朝禮器圖序特暢中其旨曾令阿哥等課誦邇來批閱通鑑輯覽於北魏金元諸朝凡政事之守舊可法變更宜戒者無不諄切辨論以資考鑑將來書成時亦必頒賜講習益當仰體朕之思深計遠矣阿哥等誕育皇家資性原非常人可及其於讀書穎悟自易見功至若騎射行圍等事則非身習勞苦不能精熟人情好逸惡勞往往趨於所便若不深自提策必致習為文弱而不能振作久之將

祖宗成憲亦罔識遵循其患且無所底止豈可不豫防其漸耶阿哥等此時即善辭章工書法不過儒生一藝之長朕初不以為喜若能熟諳國語嫻習弓馬乃國家創垂令緒朕所嘉尚實在此而不在彼總師傅等須董率眾師傳教以正道總諸達亦督令眾諸達時刻提撕勸勉勿使阿哥等耽於便安著將此諭實貼尚書房俾諸皇子觸目警心咸體朕意毋忽貴州巡撫方世儒奏貴定狎民韋學文假冒文生與麻哈

實錄卷一百六

九

狎民楊國臣阿受相識商同捏造布照哄騙愚苗得銀分用

經該州將韋學文緝獲起解臣即令該犯當堂照寫照稿俱與起獲布照相同是起意為首實係韋學文無疑當將照內所書將主相主天師朱天子等名目訊係何人據供相主天師皆係自指將主即指楊國臣至朱天子其人實無所指原屬捏言哄騙又追其本戳照簿現存何處據供買自己故陰陽陸姓現交羅士安收藏照簿係一聞事發即已燒燬又供布照實止一百二張係同阿受楊國臣商量本年正月內在楊國臣家所寫約會苗民劉譚保潘之毫即阿講吳阿記并其子阿龍四人分領在獨山一帶散賣實訊楊國臣阿受俱

實錄卷一百六

十

供無異旋據貴陽府知府韓極擎獲羅士安到案起獲木戳一銅戳二字跡不甚分明俱似僧道戳記比對布照所用相同據羅士安供韋學文曾令伊堂弟羅士榮裝作天子唐羊保陳天佑裝作天神保護今年正二月間在洛扭寨偏僻硯內韋學文兩次領人來見俱是黃夜羅士榮所穿即係繭綢袍緞馬褂戴緞邊秋帽唐羊保陳天佑俱係帖金箔紙花袍衙役吆喝帽羅士榮坐硯中間唐羊保陳天佑坐兩旁伊二兄羅士平侍立伺候金朝禮裝作書辦苗子來見朝上磕頭送韋學文見面禮四兩臣即飛委文武員弁帶同兵役四路訪拏於十四日在麻哈州杉木寨地方拏獲羅士榮并陸續

將各犯按名拏獲到案令與羅士安章學文楊國臣等對質皆俯首認罪臣復會同提臣親赴杉木寨羅士榮家并委臬司親赴各犯家搜查俱無另有不法形跡又據糧驛道永泰稟報古州鎮臣諾倫已馳赴獨山一帶將散賣布照之劉譚保等四犯全獲解訊其買照苗民亦已獲二十餘犯追照呈繳餘犯上緊緝拏等因臣查此等逆犯罪大惡極自應迅速審擬一俟劉譚保等四犯解到公同定擬具奏得旨所辦迅速甚屬可嘉有旨諭部諭曰方世儒奏麻哈州民人至苗硯散賣布照一案該撫接據稟報即會同提督譚五格總兵諾倫親赴各該犯家嚴行搜查並飭各屬將案內要犯全行弋

實錄卷七百六

七

獲辦理迅速甚屬可嘉方世儒譚五格諾倫並在事出力之文武各員弁俱著交部議敘該州知州鄭鴻任能訪聞密查據實申報亦屬留心公事並著該撫出具考語送部引見諭軍機大臣等方世儒奏麻哈州屬民人擅入苗硯散賣布照一案辦理迅速甚屬可嘉已於摺內批示並飭部將該撫提督分別議敘矣地方大吏遇有此等案件即能上緊查拏俾要犯早就弋獲奸宄自無從竄迹其於綏靖邊方之道深得要領但苗人生性愚蠢非有漢奸引誘決不敢滋生事端此案捏造逆詞散布惑眾既訊係樂平司民人楊國臣貴定縣民人章學文等起意此輩實漢奸之尤不可不從重治罪

實錄卷七百六

七

至買照苗人皆係昏昧無知被其愚誘止須杖責以示儆不必按律擬罪並於發落時曉諭苗人等此乃朕法外之仁特從寬典使伊等知所感畏著將此傳諭該撫知之令將所獲各犯即酌量情罪分別定擬具奏內閣翰林院帶領新進士引見得旨新科進士一甲三名張書勲姚頤劉躍雲已經授職陸費墀劉種之陳桂森秦潮陳昌圖喻升階善聰沈世焯韓朝衡雷鼎霄王嘉曾查瑩林兆鯤福保陳濂邵玉藻管幹珍尹壯圖莊承錢施學濂王懿修李殿圖錢良棟胡珊盧應胡必達鄧文泮王元英王鍾健宋仁溥林時蕃俱著改為庶吉士王寬范斌姜晟楊鍾嶽浦霖王汝璧孫志祖甘立德黃符錄金潔謝垣閻循觀陳錫唐樂宇覺羅祥奈吳濂李煜熊廷聘戴翼子吳廷瑞秦清俱著分部學習毛應藻溫鶴立張天植徐聯奎陶士麟俱著以知縣即用張友榮著以教職即用餘著歸班銓選壬午諭嗣後正一真人來朝並隨帶法官仍照舊例准其馳驛諭軍機大臣等據楊錫紱等奏四月以來衛河水勢微弱汶水亦不甚充裕將來浙江糧艘行至臨清以北俱有淺阻已飛咨河臣東撫等設法豫備等語去歲因運河間有淤淺經楊錫紱奏請酌定湖口壩水誌或挑深河底曾降旨令該督撫酌量商辦以資接濟今猶覓窩以上三汊河各處既有淤淺而臨清夏津等地方亦多淺

滯想因春夏以來各該處未得透雨所致現在正當重運北
上自應上緊設法調劑俾漕艘得以依限抵通著傳諭李清
時崔應階等將濟寧之蜀山水可以接濟糧運者及時酌
籌宣放並飭地方官凡有應行挑淺等處上緊撈挖并多備
船隻以便起剝毋致臨時貽誤直隸故城地方據奏亦有淺
阻之處並須挑挖起剝著傳諭方觀承一體飭屬豫辦 癸
未夏至祭

地於

方澤

上親詣行禮○詣暢春園問

實錄卷一百一

三

皇太后安○幸圓明園○諭朕於七月初八日啟鑾巡幸木蘭
所有應行備辦事宜著各該衙門照例豫備至駐蹕熱河時
外省督撫提鎮等奏摺俱著齎摺人前赴行在投遞惟進哨
以後仍照例交留京辦事處加封轉交內閣隨本呈送候朕
批示發回仍於留京辦事處交付齎摺人祇領該部通行傳
諭知之

大清高宗法天隆運至誠先覺體元立極敷文奮武孝慈神聖
純皇帝實錄卷之七百六十

實錄卷一百一

四

大清高宗法天隆運至誠先覺體元立極敷文奮武孝慈神聖
純皇帝實錄卷之七百六十一

乾隆三十一年丙戌五月甲申諭軍機大臣等阿思哈奏流
犯陳治學捐銀贖罪一摺措辭非體不便交部定議該撫從
前為陳治學奏請援贖經刑部以罪名未當議駁即欲復為
申請亦止當覈其本罪情節與例尚符另行請贖於義庶為
允協乃該撫摺內將部覆瑣屑聲敘并云該犯之父情願捐
銀若干等語並不論其情罪應贖與否竟似較量銀數多寡
以定准駁所見殊小不知贖刑已屬格外矜原若復執銀數
為詞則是饒於貧者即得倖生又豈欽恤本意乎阿思哈摺

實錄卷七六一

發還並著傳諭知之○又諭前以儀封夏邑考城三處積水
久未消退諭令該撫相度情形迅為宣洩若實在難以疏導
或酌量遷建城垣所降諭旨甚明茲該撫尚未親往查辦遽
稱現飭司道督同地方官另籌擇地重建等語未能得此事
要領儀封等縣雖積久沮洳必非全城盡容水占竟無居民
之理且據稱城隄堅厚容水亦不能入則是該處即遇夏秋
河汎可無外來浸漫之虞止將城內積潦設法疏通便可免
於淤墊或視積水最低地面挑挖成湖俾資蓄蓄或就城外
窪下處所開引深溝使水有歸宿皆為正辦若遽議遷徙匪
但工程浩大一切衙署倉庫改建為難而居人日久相安一

實錄卷七六一

旦驅之他徙亦未免跡涉張皇安土重遷尤非恒情所願向
年江南邳州臨淮等處另建新城該地民人至今仍聚居舊
地不聞以遷居新土為樂此固其明驗也若以另建城垣之
費為該地宣洩疏濬之用通盤籌畫自為事半功倍而舉從
前積水之區以次化為膏壤於民間尤為至便何必輕事紛
更耶著傳諭阿思哈切按實在情形悉心籌度另行妥議具
奏尋奏儀封考城夏邑三城積水已閱百年其地勢外高內
低形同釜底疏濬難施若另建城垣遷徙不易茲查夏邑考
城水逼城根實難修理幸城身堅厚無虞衝漫商民現在高
處居住相安無患應請停修儀封積水雖多尚有露出城脚
處應就城根淺灘培壅隔住積水然後將城池修建完固得
旨如所議行○兵部議准兩江總督高晉奏稱江南綠營紅
白賞卹銀向係營運生息各就標營銀數多寡酌給現停止
營運以裁減兵丁空餘糧餉充賞規條自應畫一白事宜優
紅事畧減娶妻賞銀三兩娶媳嫁女各二兩祖父母故父母
故本兵故各四兩如該兵出差因公身故五兩妻子故各二
兩盈餘銀報部撥用設遇賞卹過多之年或有不足請於八
旗賞卹餘銀內撥給從之 乙酉

上詣暢春園問

皇太后安 軍機大臣等議奏據伊犁將軍明瑞等奏請將發

遣伊犁人犯俱僉妻子遣往等語查現在發遣烏魯木齊人犯不分例應僉妻與否概令攜眷前往屯田議准在案伊犁亦係新疆應照烏魯木齊一體辦理嗣後發往伊犁者概將該犯眷屬遣往又據稱賞給屯田兵為奴人犯皆係積惡盜賊綠營兵得項無幾或難養贍約束請將此項人犯該兵願留用者聽不願留用者改賞侍衛及滿兵役使等語查從前屯田止有綠營兵故專賞綠營令服耕作之役現駐官兵甚眾若綠營不願留用者即改賞能約束之滿兵為奴嗣後有似此者應請照此辦理從之○丙戌

上詣黑龍潭祈雨○丁亥諭嗣後前往駐藏辦事大臣俱著出

寶錄卷一百一

三

缺○大學士管雲貴總督楊應琚奏孟良賊首係召散召猛烈召猛珍伍定瑞凍四人前已拿獲召猛烈又搜獲召散胞兄召猛養嗣於四月十五日守備王瀚千總鄧朝奉探得召猛珍在猛丙界外深山藏匿隨帶兵練拿獲召猛珍及召散之母喃害妻妾喃畏喃占丙妹喃交並家屬男婦共八名口隨令召丙等認明是實委遊擊莫淳研訊召散等蹤跡飭交守備王瀚看守解訊又四月十二日在猛卡深山復搜獲召猛烈妻害英罕係召散之姐幼子交衣妻妹害線亦係召散之姐并使用男婦五名口於十五日解到查召猛珍亦係召散胞兄召散親屬俱已擒拿召散斷難漏網除檄提召猛珍

親訊外仍將未獲賊首召散伍定瑞凍設法查拏務期迅獲得旨好又批嚴催緝獲不可姑息○又奏臣督率將弁勦辦莽匪務期實效嚴禁綠營虛飾之弊自整控江失機奉旨將何瓊詔等正法各營悚懼咸思自効故屢有克捷前進攻二臺坡時賊人獲巢力戰經官兵奮勇攻擊始得破賊是此戰實為得力但攻克二臺坡後未能乘勝追拏賊首致召猛烈召猛珍潛逃隨飭鎮將等竭力追拏以贖前愆即拿獲召猛烈召猛養等惟召散逃往阿狝已屬窮蹙現一面檄飭各處搜捕一面遣人赴阿狝勒索務令獻出至伍定瑞凍據召猛烈供係伊等手下小頭目然亦不便疎縱並飭訪緝務獲所

寶錄卷一百一

四

有此次分路攻勦將弁其有功無過及功過相抵處可否查奏懇請加恩賞賚得旨如此查奏尚可但不可濫 戊子

上詣暢春園問

皇太后安○諭谷回城需馬甚多烏什係回疆腹地土地遼濶水草豐美宜照伊犁設立牧廠數處孳生馬匹以備接濟喀什噶爾葉爾羌等處調用將此傳諭永貴等現與哈薩克交易馬匹著多換駒騾於烏什地方擇水草佳處多置牧廠加意畜養以廣孳生 戶部議准直隸總督方觀承奏稱右衛移駐張家口滿洲蒙古官兵每歲約支米豆一萬九千餘石應需倉廩收貯查萬全縣縣丞倉十七間原備收貯牧丁口

糧及採買兵米之用今收丁口糧改支折色兵米分貯於宣化萬全懷安等三縣倉內無庸運貯至縣丞存剩口糧及過往員役歲需行糧撥倉二間足備收貯除將倉十五間歸張家口同知收貯移駐官兵歲支米豆一萬二千四百餘石外請於下堡地方添建倉廩二座計十四間官廳三間大門一間每間倉約貯米六百石除貯米六千六百石外尚稍寬裕以備翻晾木料就近於富貴山改用工料需銀一千六十六兩又圍牆基地共需工料地價銀一百兩零於司庫節年地糧銀內撥給與建從之○旌表守正捐軀之湖北竹谿縣民陳華山妻李氏甘肅華亭縣民張得朝妻董氏○己丑諭朕

實錄卷七十一

五

此次巡幸木蘭著誠親王和親王大學士劉統勳高書託恩多留京辦事其月選之文員內通判州縣等官武員內八旗護軍校驍騎校及外省送到之補放水手官驍騎校并年滿千總等官弁俱著王大臣照例驗看○諭軍機大臣等方世儒奏查審僧人然靜等誣騙苗民銀兩一案現在獲犯嚴究並查拏出銀各犯質審等語所辦甚覺過當民人敢於捏造謠言恐嚇苗衆斂錢滋事實屬不法自當嚴行查辦以靖苗疆其王老三一犯既代然靜斂錢又復畏罪逃竄亦當嚴緝務獲治以應得之罪至此外出銀買符之苗人皆係無知被騙情可矜原即杖責亦可不必今該撫拘繫至七十餘人之

多未免株連太甚轉恐啓苗峒驚疑或致滋擾著傳諭方世儒將此案正犯即按律嚴究其餘被騙苗民如訊無商謀不法情事即概予省釋仍諭以此後各當安分守己無蹈罪愆俾體朕法外之仁咸知感畏將此傳諭該撫知之 庚寅戶部議准長蘆鹽政高誠奏稱石牌坊從前鹹鹺不毛之地漸被淡水浸透堪以割取煎鹽計地十二頃六十九畝請照草蕩地每畝徵銀六釐例起科即於今年為始按數徵收從之

辛卯

孝恭仁皇后忌辰遣官祭

景陵 戶部議准四川總督阿爾泰奏稱宜賓縣鐵礦試採有

實錄卷七十一

六

效應設鑪二座每鑪夫九名每日每名可獲砂十觔煎鐵三觔除夏秋雨水浸硯不能採取外春冬二季可煎獲生鐵九千九百二十觔應照例抽取稅鐵變價撥充兵餉從之 壬辰

上詣暢春園問

皇太后安 諭軍機大臣等方觀承奏直隸司庫錢糧存貯無幾所有察哈爾等處官兵俸餉除現在撥貯口北道庫外向後恐不敷支用請於隣省協撥貯庫一摺於體制殊屬未協前以巴爾品奏各該處官兵俸餉請由口北道衙門就近支領經戶部議准自乾隆丙戌年為始原以該處庫貯有餘自

以就近支領較為便易今該督既稱庫貯不敷若轉向隣省協撥未免紆途紛擾嗣後如該處有項可支仍著照前議辦理否則仍令赴部關支將此傳諭方觀承知之旌表守正捐軀之山東滕縣民侯小驪妻黃氏○癸巳諭據瑪琿奏阿敏爾圖患病身故等語阿敏爾圖因公出差在藏身故著加恩賞給都統品級其應得卹典著該衙門察例具奏○又諭據富僧阿奏稱審訊逃走發遣賊犯扎蘭泰張子英等語甚屬糊塗伊摺由驛遞到朕以為必係要務及至啟閱乃不過將逃人解送刑部之事何至由驛具奏扎蘭泰等係發遣重犯拏獲時即應正法富僧阿止解送刑部亦屬拘泥且摺內復牽入厄魯特俘虜逃走行文緝捕一事尤屬可笑厄魯特俘虜逃走何足輕重不過照例治罪而已何至如此牽扯辦理著嚴行申飭○又諭曰額爾景額在葉爾羌三年有餘著旌額理前往辦事更換額爾景額回京旌表守正捐軀之河南南召縣民孔福妻王氏○甲午諭今日國史館進呈新纂列傳內洪承疇傳於故明唐王朱聿釗加以偽字於義未為允協明至崇禎甲申其統已亡然福王之在江寧尚與宋南渡相髣髴即唐桂諸王轉徙閩滇苟延一綫亦與宋帝昞帝昺之播遷海嶠無異且唐王等皆明室子孫其封號亦其先世相承非若異姓僭竊及草賊擁立一朱姓以為號召者

實錄卷一百一十五

七

實錄卷一百一十五

八

可比固不必概從貶斥也當國家戡定之初於不順命者自當斥之曰偽以一目而齊心志今承平百有餘年纂輯一代國史傳信天下萬世一字所繫予奪攸分必當衷於是昭史法昨批閱通鑑輯覽至宋末事如元兵既入臨安帝無身為俘虜宋社既屋統系即亡是曷二王竄居窮海殘喘僅存併不得比於紹興偏安之局乃續綱目尚以景炎祥興大書紀年曲徇不公於史例亦未當因持加釐正批示大旨使名分秩然用垂炯戒若明之唐王桂王於是曷亦復何異設竟以為偽則又所謂矯枉過正弗協事理之平即明末諸臣如黃道周史可法等在當時抗拒王師固誅儻之所必及今平情而論諸臣各為其主節義究不容掩朕方嘉予之又豈可概以偽臣目之乎總裁等承修國史於明季事皆從貶固本朝臣子立言之體但此書皆朕親加閱定何必拘牽顧忌漫無區別不準於天理人情之至當乎朕權衡庶務一秉至公況國史筆削事關法戒所繫於綱常名教者至重比事固當徵實正名尤貴持平特明降諭旨俾史館諸臣咸喻朕意奉為準繩用彰大中至正之道○諭軍機大臣等阿桂在雅爾該處事宜俱已就緒現今伊犁安置兵民生齒日繁事務冗劇辦理之初必有準則始可以垂永久明瑞一人恐未能審度周詳阿桂著回伊犁協同明瑞辦事焉勒登前往雅

爾辦事此特以伊犁事繁欲阿桂協同明瑞辦理妥協阿桂至伊犁時凡事與明瑞商酌和衷共濟務期效及久遠不可心存畛域此旨到時諒明瑞亦由雅爾回至伊犁矣烏勒登即前往雅爾更換阿桂赴伊犁辦事將此傳諭阿桂明瑞烏勒登知之○乙未

上詣暢春園問

皇太后安諭曰觀音保曾在健銳營行走陞任未久今復管理營務屬下必多舊識或有礙難管轄處觀音保著不必管理健銳營所遺員缺著勞三傳玉管理○禮部帶領浙江江西福建湖南湖北陝西等省選拔貢生引見得旨徐之寬洪

寶錄卷七十一

九

煦潘汝炯劉學灝徐承勲彭良弼梁震胡守業鍾蕙蔡羹元胡錫瑛王丹芳等十二名著以知縣試用張義年翟方震羅崇朱貴胡宗寅方洪洪枏陳孔揮姜文昭王日華陳蛟騰汪注千從淳王廷楷樂三省王雲洙鍾翔鵬石應璋謝肇清鄭資有林斗南林青珪饒澍黃梅李楷林需董書夏大觀殷璽譚定元陳以邦唐可雋龔大萬張天靖曾曰明程鳳翔張繩祖程文衡馮相德崔景灝呂淵張貞生楊長李如紳等四十四名著交吏部詢問願以教職用者以教職用願以佐貳等官用者以佐貳等官用○丙申

上御勤政殿聽政○署兩廣總督楊廷璋廣東巡撫王檢奏岐

黎仇殺客民一案實因內地及外省客民販買黎崗藤板奇貨間有娶黎婦抽居黎邨者欺黎貧愚放債盤剝凌虐難堪黎圖報復故釀巨案現獲首從各犯定罪另奏查瓊州十三州縣惟文昌一縣絕無黎人餘皆有客民插居黎邨臣等酌籌善後事宜一氏黎離處滋事應將客民久居黎地有家室田園廬墓者使共居一邨其客民現無眷屬插居黎邨者移住客民邨內另編保甲管束其黎邨仍飭該總管哨管黎頭稽查不許黎岐往來民邨私相借貸如違該甲長黎頭稟究一從前錢債數目飭地方官徹底查明其非違例取息已收一本一利者將券繳銷否則仍令清還如係重利盤剝將收

寶錄卷七十一

十

過一本一利外餘息追出充公永禁客民入黎放債違者遞解回籍○瓊南藤板香料及雜貨等物多出黎崗宜酌籌交易以資黎人生理應飭地方官於州縣城外汛地設立墟場兩三處定以墟期交易屆期責成該汛巡檢弁兵督黎頭保甲彈壓如藉端索擾立即參革一黎有生熟兩種生黎深處五指山內窠居野食向不納糧聽其自便熟黎環居五指山脚耕種納糧間亦有雜髮自附齊民者應飭黎崗總管哨管黎頭諭令熟黎普行雜髮杜其假冒生黎滋事一每年例辦進貢花梨沉香向係差票赴黎購買黎頭挨邨撥夫送官領價易滋擾累應將每年額貢曉示豫發價值派總管哨管黎

頭分辦運赴免致差役擾累一各要隘俱有巡檢汛弁凡出入黎山崗口人須盤詰明白然後放行如有漢奸及佐雜營弁出票差人入黎者將員弁參革州縣催糧及勾攝公事祇許票差黎頭不許差役入黎違者參處得旨如所議行爾等撫仍應不時查察以吏部郎中邁拉遜為內閣學士兼禮部侍郎○丁酉諭軍機大臣等據永瑞奏賞給青州驍騎校富昌為奴之厄魯特策布格於本年五月間在青州本處脫逃現飭地方官嚴行緝拏等語該犯以獲罪問擬為奴膽敢乘間逃竄情甚可惡想該犯蹤跡不外內地隣近數省著傳諭直省該督撫通飭所屬密速嚴拏併在各關津隘口上緊

實錄卷三十一

上

盤緝務期弋獲即於拏獲處所立行正法毋使脫漏網○吏部議准黑龍江將軍富僧阿奏稱呼倫貝爾地方原設筆帖式四員前因達呼爾官兵撥回打牲地方裁汰二缺查此地駐鄂爾多斯喀爾喀邊境卡座甚多凡記寫檔冊移咨各處甚屬繁冗請添設無品級筆帖式二員於本處應用人員內挑補從之○戊戌

上詣暢春園問

皇太后安○諭曰達桑阿著往霍尼邁拉呼等處會同伊勒圖公同商酌辦理邊卡事宜到彼處時不可心存吟域務宜和衷共濟妥協辦理將此並諭成衮扎布阿桂等知之○以署

清 實 錄 乾隆三十一年五月下

鑲白旗蒙古副都統明亮為正白旗漢軍副都統仍署鑲白旗蒙古副都統是月河東河道總督李清時奏查下北河廳銅瓦鑲河勢逼近該工頭壩臣與臬司何燭等酌議於堤工後身估築撐隄數十丈現在水勢下坐至二壩前刷出舊埽緣底料久腐不可加鑲致有上實下虛之患但將埽屑紮枕攢護如河勢不移俟舊埽塌盡方靠壩另鑲新埽倘汎水加增應將二壩前舊有膠淤一段挑溜開行埽前仍當於閉現飭臬司何燭相機辦理得旨鑲埽情形何燭實熟應盡其材而不可假以事權○大學士管雲貴總督楊應琚奏滇省內地土司所屬夷民向皆蓄髮狀貌服飾與外域莽子木匪相似是以莽匪及各野夷入境猝難別識常遭偷掠不及隄防請令沿邊土司地方及新定整欠孟良等處夷民一體薙髮留辮俾遵國制並杜莽匪混淆得旨嘉獎○又奏各土司自二品宣慰司至把總蒙恩世襲至土目亦有分管地土夷民之責伊等遇有外侮自應勇往捍禦因向來無所勸懲故辦理莽匪一事勇往者固多懦蕙者亦不少現擬分別功罪量予賞罰俾邊境夷目咸知勸懲得旨是應如此辦理但必須公明毋被屬員偏向欺飾耳

實錄卷三十一

三

三七五

大清高宗法天隆運至誠先覺體元立極敷文奮武孝慈神聖
純皇帝實錄卷之七百六十一

實錄卷之七百六十一

三

大清高宗法天隆運至誠先覺體元立極敷文奮武孝慈神聖
純皇帝實錄卷之七百六十二

乾隆三十一年丙戌六月己亥朔調正黃旗護軍統領傅玉
為右翼前鋒統領正白旗漢軍副都統索諾木策凌為鑲紅
旗滿洲副都統○庚子諭據舒赫德奏玉門縣刁民糾眾塞
署一案該縣知縣張繩武畏葸不敢出署都司韓雲並不擒
拏轉為講說息事署靖逆營參將僧保聞知刁民閑鬧前往
查勘僅止勸令各歸並不拏究俱屬庸懦無能請照溺職例
均予革職署安西府知府額爾登布行至中途聞事已寢息
輒即回署亦屬不合應交部嚴加議處等語張繩武已於另
案革職交部治罪韓雲僧保俱著革職額爾登布著一併交
部嚴加議處○又諭曰楊錫紱奏滁蘇幫旗丁湯聖之漕船
在南皮滄州交界地方遇風失火延燒張公九等三船所有
燒燬米石請令該丁等陸續買補等語湯聖之遭風失火以
至延及鄰艘究係防範不慎自應令其照數買補完倉至張
公九王登三楊禹傳三船因別舟火起倉卒延燒並非疎於
防護所致若一體勒賠於情理殊未平允著加恩免其賠補
其湯聖之應賠米石分作兩年完倉之處著照該督所請行
○辛丑諭據雅德等奏興京通判世昌將冒充衙役私拏賊
人之趙范等並不逐細根究按例處治遽行分別鞭杖草率

實錄卷之七百六十二

一

了事致趙崑受杖傷重斃命請將該通判世昌革職等語世昌著革職○諭軍機大臣等新選江西泰州府知府唐燦請訓召見看其人甚懂從前雖曾任同知位事未久即捐陞離任於地方政務恐未諳悉知府為州縣表率職任綦重著傳諭吳紹詩於該員到任後留心察看如能奮勉向上尚堪供職則隨時訓飭俾無貽誤若實在難以勝任即行具摺奏聞無得稍存姑息○署陝甘總督刑部尚書舒赫德奏據青海王貝子扎薩克等呈稱請將副都統職銜七十五再留該處辦事三年得旨青海更換大臣特為辦理該處事務大臣等辦事妥協分所應爾蒙古扎薩克妄行請留此風斷不可

實錄卷一百一

長七十五如不知伊等呈請即同木偶如知之而聽其呈請尤屬不堪七十五應行更換時該部仍奏請更換○壬寅上詣暢春園問

皇太后安○還宮○諭軍機大臣等李宏泰徐揚兩屬水勢情形一摺所奏不甚明晰現在雨水過多該督將董家溝石羊溝廖家溝芒稻閘等處上游停淤先期挑濬俾得暢洩歸江自屬應辦之事至東隄各閘洞關係下河民田除春間需水之時酌量開放以資灌溉此外原不應漫行故放該督乃稱將閘洞堵閉俟低窪地畝雨水消退再行開放之處殊屬非是總之歸江之路務宜宣洩通暢不得稍有阻塞至流入下

河閘洞豈宜輕易啟放以致妨礙民田著傳諭李宏將現在辦理情形另行具摺奏聞尋奏高郵寶應運河東岸各有支河原以備民田引水灌溉之用向來春間及四五月插秧需水時俱以時啟放接濟今夏雨多無須接濟是以督屬堵閉俟田間水退木苗需水時再行開放前奏未詳致屢詢問現在天晴水消飭屬相機啟放以民田足用而止斷不敢輕易啟放報聞 旌表守正捐軀之山東萊陽縣民王學妻張氏

癸卯

上御太和殿視朝文武陞轉各官謝恩○辛圓明園○甲辰諭曰海明著馳赴西寧辦理青海事務更換七十五來京○旌

實錄卷一百一

表守正捐軀之江蘇睢寧縣民王之玉姪女王氏○乙巳上詣暢春園問

皇太后安○署陝甘總督刑部尚書舒赫德奏現在發往新疆人犯自各省解甘由總督衙門查各省來文或載伊犁或載烏魯木齊字樣分別給牌解往又有文載伊犁烏魯木齊等處者即按文內所開地方如伊犁在前即解伊犁烏魯木齊在前即解烏魯木齊並未定有均撥成例查伊犁地廣田多屯墾耕作在在需人似較烏魯木齊尤當多撥請嗣後將遣犯解甘者除來文指定地方仍照指定地方解往外其擬發烏魯木齊伊犁等處者由總督衙門以伊犁三人烏魯木齊

一人週流派撥得旨允行○丙午諭曰實麟等奏普濟等開
街壞開板以致水消停運並查明街壞之板係二十八九年
年所換請將開官胡兆龍等及坐糧廳俱交部議處等語各
開設立開板全為節宣河水以資轉運其開板逾年抽換例
應厚實堅固何以二十八九年所換之板甫及三年即致
糟朽皺裂乃情理所必無豈能稍為欺飾耶實麟等信以為
實殊屬不達事理此必從前承辦各員不能慎選工料草率
脩葺否則開官不曾看守被人盜換所致著派高恒前往詳
悉確查據實具奏所有啟板遲延及不豫行抽換開板之開
官胡兆龍楊龍翔俱著交部議處其坐糧廳書魯顧光旭不

實錄卷七六二

四

能留心豫為防範並著交部議處倉場侍郎平日所司何事
著一併交部察議諭軍機大臣等據烏魯木齊辦事大臣
伍彌泰等奏本年四月內該處脫逃遣犯有湖廣周琳一名
山東朱國泰一名浙江陳阿進一名江西傅鵬利一名此等
積匪猾賊問擬遣發自宜在遣所安靜守分乃敢乘機潛逃
情理殊為可惡若不上緊嚴緝按法懲治無以示儆著將周
琳等籍貫清單鈔寄各督撫於各該犯原籍地方飭屬嚴密
查拏留心躡緝務獲毋使竄跡漏網大學士管雲貴總督
楊應琚奏外域猛勇頭目召齋召漢喃投誠內附並貢馴象
二隻猛勇向係召齋父管轄前遭莽匪殺死伊父占奪其地

召齋兄弟隨即恢復嗣莽匪在外域刳殺召齋等又失故地
共圖報復乾隆二十八年莽匪擾入猛籠土司時召齋等中
途截殺旋奪回猛勇地方今願內附實出至誠又有猛竜沙
人頭目叭護猛呈稱我所管地方約二千餘里並所管沙人
暨打高共七十餘寨計一千餘戶概請內附查猛勇係孟良
整欠兩處適中之地此地歸附則彼此聯絡聲息相通且召
齋召漢喃人甚勇幹夷眾悅服又素與莽匪為仇若令協擊
匪黨必認真出力至叭護猛等原籍內地廣南夷民流落外
夷居住現聞大兵攻克整欠慕化來歸邊外夷人種類甚多
一種之中又有數種惟沙人止係一種幅員廣闊若准歸附

實錄卷七六二

五

可與整欠孟良犄角相倚直與南掌老撾接壤且沙人武勇
邊方得此尤資防範似應准各頭目投順請賞給召齋召漢
喃土千總職銜歸普洱鎮府管轄沙人向係雄長一方今來
効順請賞給四品銜現在臨元鎮每年派撥弁兵巡查慢丟
地方該處與猛竜路徑相通應將猛竜撥歸臨元鎮元江府
管轄至二處所屬各堡寨暨田地戶口數目并如何輸納貢
賦之處容查酌具奏得旨軍機大臣會同該部議奏尋議猛
勇頭目召齋伊弟召漢喃猛竜沙人頭目叭護猛等率眾來
歸實可收沿邊控制之效應准其投誠將猛勇頭目召齋召
漢喃賞給土千總職銜由該督發給委牌歸普洱鎮普洱府

管轄猛竜沙人叻護猛賞給指揮同知職銜另行題請頒給
號紙歸臨元鎮元江府管轄仍照土司之例缺出准其承襲
并猛勇所進象隻准令入貢從之 丁未刑部議奏軍遣流
徒人犯或逃歸或遠匿者實係怙惡不悛緝獲後均應嚴加
懲治查軍遣逃例已經議加無庸另議外惟流犯逃逃
向例原犯流罪逃至三次及免死流犯逃至二次三次者始
改發充軍餘俱遞回原配枷責加徒似不足蔽辜請將原犯
流罪在配中途脫逃人犯不計次數流二千里二千五百里
者各加五百里三千里者改附近充軍免死減等流犯亦不
計次數改邊衛充軍仍各照例枷責又徒罪脫逃向例仍發
原配計日加杖照原犯該徒年分從新拘役情法已屬相當
惟中途脫逃者止加杖笞亦屬太輕請將五等徒限各於本
罪上加一等從之 戊申

上詣暢春園問

皇太后安 諭曰西洋人郎世寧自康熙年間入直內廷頗著
勤慎曾賞給三品頂帶今患病溘逝念其行走年久齒近八
旬著照戴進賢之例加恩給予侍郎銜並賞內府銀三百兩
料理喪事以示優恤 又諭禮部議覆山東巡撫崔應階題
鉅野縣壽民姚宏毅暨妻張氏年登百歲照例請旌一本姚
宏毅夫婦齊眉並臻上壽洵屬昇平人瑞著照例給以期頤

實錄卷五十五

六

實錄卷五十五

七

偕老坊名為鄉閭表慶仍加恩御製詩章頒賜以示恩榮並
著賞給上用緞二疋銀二十兩 貴州巡撫方世雋奏黔省
民苗雜處苗類不一性俱頑蠢內有一種仲苗語言服食悉
與漢人無異半多讀書識字人甚奸狡若有漢奸與之交結
往來伺察尤易朋謀滋事前散賣布照案內之楊國臣韋學
文捏造妖言案內之王老三等俱係仲苗董正源等俱係漢
奸藉端誘惑為害地方謹遵四月二十八日諭旨飭屬設法
稽查偵緝如有漢奸潛匿苗叻立拏究處並禁兵役不許藉
端滋擾俾民苗各自安分務業以輯邊疆報聞 已酉諭湖
南瀕水州縣每遇春夏湖湘水發易致淹浸本年五月中旬
該省雨澤稍多湖河漲溢民居雖無傷損而隄垸禾苗間有
被淹之處益陽龍陽武陵等縣情形較重民力恐不免拮据
著該撫即董率所屬查明被災戶口加意撫卹其淹損地畝
有可酌量補種者即妥協經理令其及時趕種秋禾俾資接
濟無使閭閻稍有失所至沅江湘陰湘潭寶慶等處是否成
災並著星速確勘照例查辦以副軫念該部即遵諭行 又
諭據方世雋奏然靜等騙斂銀兩一案永寧州知州蔣日烜
並未查稟嚴拏殊屬玩忽疎懈請旨革職其失於覺察之各
上司並請交部照例議處等語蔣日烜著革職安順府知府
珠隆阿前護貴西道韓極現署貴西道王如玉俱著交部議

處該撫方世儒辦理此案尚屬迅速妥協著從寬免其交部
又諭曰楊廷璋等奏粵西小鎮安地方拏獲竄入界內交
匪黃付團等一案知州楊廷芳守備皮廷瓚平日聽容匪徒
在境漫無覺察及獲要犯劉德輝又不親身接解致令在途
斃命知事徐文熊並不靜候叅處遽萌短見把總呂忠於交
匪越邊因循疎縱均請革職審擬等語楊廷芳徐文熊皮廷
瓚呂忠俱著革職所叅各情節著交該督等一併嚴審定擬
具奏○山海關副都統素保奏滿兵駐劄各處教場俱有房
屋惟山海關南門外雖設教場並無房屋查折給山海關官
員俸米地畝內文出地畝每年徵收租銀除支給銀寡孤獨

聖錄卷五十一

八

人等糧餉及官學公費外尚餘銀三百二十八兩請將此項
動撥蓋造又山海關冷口喜峰口三處文出地畝每年徵收
租銀除支給應撥項外尚餘銀一百五十兩請將此項修理
官兵值班及看守城門收貯火藥各官房得旨著照所請行
○庚戌諭發遣新疆人犯皆身獲重譴免死改發若在遣所
脫逃則情罪實難寬貸必當緝獲正法恐各犯或有潛回內
地者是以遇有報逃之案除令該處上緊嚴拏外並諭令各
該督撫於各犯原籍地方嚴行密緝今據哈密辦事薩瀚等
奏到拏獲烏魯木齊逃犯朱國泰傅騰利二名著即傳知小
東江西二省停其蹤緝此等應緝逃遣要犯各督撫接奉諭

聖錄卷五十一

九

旨自必飭屬盡力訪拏既已弋獲即應知照該省銷案則承
緝各員知事皆覈實更不敢玩忽從事聞各省向來遇有重
犯脫逃亦皆行知鄰省協緝但獲犯以後竟有不復關白者
協緝省分何由得知勢必徒勞差役偵訪否或視同海捕具
文苟且塞責於事轉無裨益嗣後凡有通行緝案當其未獲
務須嚴緊查拏毋稍歧視如犯已就獲即彼此互相關會使
緝案不至虛懸而協捕亦歸實濟將此通諭知之○諭軍機
大臣等據哈密辦事道員薩瀚奏該處脫逃遣犯內有江蘇
震澤縣徐惠良一名於乾隆二十六年七月內脫逃又福建
寧化縣邱其昌一名於乾隆二十七年四月內脫逃等語該
犯等在逃已久尚未弋獲或潛回本籍藏匿亦未可定著傳
諭各該督撫即行飭屬上緊查拏務獲按法懲治毋使竄跡
漏網○辛亥兩江總督高晉奏海塘工程向無一定限期每
年歲修未免稍遲驟遇大汛臨期搶修工程不固亦且多費
錢糧嗣後請照河工例每年大汛後冬間即勘估辦料交春
趲期興修四月前完工報驗又塘工做法向用單壩坦水坦
坡前撫臣莊有恭以坡壩橋高石重震撼堪虞改建翼工兼
恐根土受傷不施閘簾排樁查翼工以竹蔑編成若無樁木
閘閘易致朽壞似不若用單壩坦水坦坡簽以長樁方資穩
固嗣後請仍照單壩坦水坦坡之式修築但簽釘樁木入土

宜深凡橋長一丈七八尺者入土丈餘橋頭出土總以五尺為限庶免大潮震撼再沿海土石塘工現有工程處並無專住防守之人請嗣後一交七八月大汛該管知縣於工所塔蓋蓬廠派家人衙役住工看守該管丞雜知縣等官各按地界輪勘倘遇風浪打壞橋石潮退後隨修補完整仍責成道府稽查如違揭叅得旨甚妥如所議行○命兵部侍郎鍾音戶部侍郎王際華教習庶吉士○以山東督糧道宮兆麟為湖南按察使○旌表守正捐軀之直隸安肅縣民商某女商氏○士子

上詣暢春園問

實錄卷一百三

+

皇太后安○直隸天津都統富當阿奏天津水師營向未設立教場雍正七年建官廟二座所剩磚木等料於北門外建小箭亭三間守兵住房四間為官弁操練之所日久坍塌而地方又狹隘卑下操演烏鎗陣式殊多不便請將舊教場房屋拆毀改建南門外寬阜地方需費於本年節省銀內動撥報聞○癸丑安徽布政使富尼漢奏各省民籍屬州縣管轄軍則隸籍衛所但衛冊止有老軍姓名不載子孫且有本衛軍散處各州縣境及隔府隔省者猾軍將心田地項民耕種買民田換戶名為脫軍張本又有民承軍產現運之軍派索不遂輒誣民為軍訐訟多案各州縣有民冊無軍冊辦案關

查衛所既需時日而傳訊保甲鄰佑亦滋拖累查衛所原有軍冊而州縣例當編查保甲臣現令衛所備弁查明軍冊所載老軍何名子孫某現居何地鈔冊移明所居之地方官該州縣編查保甲時將衛冊所開軍丁確查如與冊符亦移明衛所彼此備案倘有冒民脫軍及誣民為軍等案據冊審斷辦理得旨嘉獎○旌表守正捐軀之直隸元城縣民李貴法妻呂氏江蘇通州民張國榮妻胡氏

實錄卷一百三

+

大清高宗法天隆運至誠先覺體元立極敷文奮武孝慈神聖純皇帝實錄卷之七百六十二

大清高宗法天隆運至誠先覺體元立極敷文奮武孝慈神聖
純皇帝實錄卷之七百六十三

乾隆三十一年丙戌六月甲寅

上御勤政殿聽政。諭軍機大臣等。九土司會攻金蠻一事。相
持已將數載。尚無就緒。茲詢之岳鍾璜。亦未有善策。惟奏稱
土司中與金蠻最近之黨。力弱兵單。難以抵禦。其地處阻
遠。如沃日等土司。大率意存觀望。不為策應。而其中綽斯甲
布。又與金酋跡涉姻黨。不無首鼠兩端。看來土司等性多狡
猾。以蠻攻蠻之計。似難責效。伊等並稱金酋倘知悔罪。歸還
黨壩額。懇請網開一面。施恩寬宥等語。所奏未得此事要

實錄卷七六三

一

領金川侵擾土司。乃番夷互相仇殺。並不敢干犯內地。本毋
庸加以兵威。又何罪之可有。若欲為解怨息爭之說。潛遞消
息。令其設誓籲恩。此不過蹈綠營虛誕惡習。以圖掩飾耳目。
於事仍無實濟。如慮金酋漸肆跳梁。欲大加以懲創。則豫籌
運糧。密偵地利。然後厚集兵力。分路夾攻。一舉而殄滅之。並
非難能之事。但用兵究屬無名。亦不值一辦。至該督平日遣
往宣諭之員。文職不過府廳州縣武弁。不過參遊都守。欲得
通達事體者。亦頗難其人。萬一措辭失當。轉致誤事。機而損
國體。且傳述或有粉飾。更不能得該處實情。就目前大局而
計。莫若阿爾泰會同岳鍾璜。親赴該地。傳集九土司詳悉開

實錄卷七六三

二

導。諭以金蠻與爾等構釁殘殺。並不敢侵犯邊境。本與內地
無涉。爾九土司情願協力攻剿。原係爾等自為保守報復。並
非中國欲藉爾眾土司之力。為剿滅金蠻之策。況金酋自悔
罪。抒誠以來。頗為恭順。並不欲加之申討。設彼敢作不靖。為
征伐之所。必及則以國家全盛之勢。鋤強誅暴。不過一舉手
之勞。其事無難立就。即如準噶爾之強橫。諸回部之驍悍。不
數年間。悉已勦平。收其疆土。爾等豈不聞知。何有於最爾金
蠻。取之更不啻摧枯拉朽。奚藉爾眾土司之助力乎。至爾九
土司地廣人眾。如果齊心奮力。聯絡聲援。抵敵亦非難事。豈
有合九土司之力。不能制一金蠻。轉使小醜恣其猖獗之理。
此皆爾等各懷猶豫。畏縮不前。其中又有暗存瞻顧之人。以
致眾志不齊。事功難就。爾等自為計。尚不肯同心盡力。朝廷
豈肯無故發兵。為爾雪仇洩忿乎。爾等如此。因循觀望。致金
蠻得肆鴟張。勢必近者先被其併吞。而由近及遠。漸遭蹂躪。食
甚為非計。此亦爾等自貽切膚之患。於天朝毫無所損。且俟
金蠻將爾眾土司盡行占踞。即當特發大兵。搖平金川巢穴。
並將爾等地方。概行收取。改土歸流。以永靖蠻服。若爾九土
司中。敢有與金蠻潛相勾結。稍犯邊疆者。即將干犯之土司
先行殲滅。再行勦洗金蠻。以申國威。而昭炯戒。朝廷之大旨。
不外乎此。其禍福利害。一任爾等自行決擇。毋貽後悔。如此

明白申諭則九土司必知猛省當不致復蹈從前故轍並可察伊等情形若何得其梗概以定進止至督提大員親臨該地即金酋未必不懾然畏服或可召之使來與九土司同聽約束俾知感悔輸誠否則阿爾泰等竟直入其境愴切曉諭以彰威德亦無不可然此須至彼酌量時勢隨機應變非有一定形跡所能豫為籌度也現已令岳鍾璜回川著將此先行傳諭阿爾泰侯岳鍾璜到日即會同前往悉心妥辦具奏至現在該處情形若何或有應另須籌辦之處並著迅速據實奏聞候朕再行降旨○以內閣學士邁拉遜署吏部侍郎○乙卯

上諭暢春園問

皇太后安○諭曰御史劉天成奏薦舉無許空言以杜冒濫一摺所稱今之薦舉人才不過為精明強幹有守有為通套之語而於平日居官事跡毫無指實請嗣後督撫薦舉人員務必確切著明事迹如虛即坐罪舉主等語其言尚為近理在該御史之意以為必著明事迹始有實際但所云實際者亦不過興學校行保甲等事仍屬空言無補即如保甲一事有司如果實力奉行何至地方遇有匪徒逃犯不能迅就盤獲耶究之有治人無治法不在虛設科條使徒循具文以課吏於實政又何裨益乎若因和其表保舉段成功一案謂凡督

撫所保之人皆不足信則又未免因噎廢食夫段成功侵帑不法未嘗不終歸敗露明正刑章亦足以昭炯戒豈有因此一人之獲罪而疑凡膺薦剡之員皆由奔競亦無此政體且使天下皆如段成功之輩專以逢迎干進為事則段成功之案又何由查察得實乎至摺內所稱賢能本屬兩科能吏足以理國事而賢吏乃以培國脈之語則謬妄實甚夫賢與能理本一致豈容歧而為二設官所以養民即錢穀刑名何一不關斯民要務能者擘畫裕如閭閻陰受其福非賢而何周書推賢讓能又曰舉能其官不聞釐為二事右賢而斥能也若如劉天成所言則是碌碌無能之徒居官一無所表見轉

得自詡為惻悞無華不知其於地方公務廢弛已復不少如是而號為賢員民生其又奚賴若督撫所薦不公謬以小有材者為能或且夤緣奔競則言官風聞原可參奏且朕所簡任督撫大臣以及兩司道府亦皆擇其能理民事者而用之果皆能於其職則大法小廉吏治自有成效此即賢也劉天成之意不過為庸懦者流文其陋劣而強判賢能為二支離害理且誤襲前人撫字心勞之說掉弄筆頭以逞其猥鄙之見殊屬瑣屑總之朕理庶務惟求實蹟似此撫拾空言有虛名而無實益者一概不足動聽劉天成著飭行禮部帶領甘肅四川廣東廣西雲南貴州等省選拔貢生引見得旨胡

贊麟馬乾怡馮元吉年鈴孫世榮歐煥舒伍葆光林潤莊馬聯臻潘觀楊焯萬鍾傑劉朝彥周大本等十四名著以知縣試用羅璋楊震春南國斌呂鏞夏岳陳寶鼎楊藩向彭齡周猷蘇子榮苟宗魯胡嘉言鄧世欽張德化康濟隆徐延翰梁肇文楊玉衡饒慶捷陳名儀莊玉馨張文聰葉儀歐陽立魁李龍濤曾琪張良玉楊自強王廷楊紱劉超凡鄒維慧申興瑞祝世清朱文淵劉憲吉鄒銓李世英等三十八名著交吏部詢問願以教職用者以教職用願以佐貳等官用者以佐貳等官用丙辰戶部議准貴州巡撫方世雋奏稱清平縣永興廠山形豐厚礦鉛旺發試採有效應請設廠開採每百觔抽課二十觔除每年支給各營操演鉛觔外餘即撥運該省錢局鼓鑄從之調正紅旗護軍統領慶泰為鑲紅旗護軍統領正黃旗護軍統領舒泰為正紅旗護軍統領以正白旗滿洲副都統傅景為正黃旗護軍統領仍兼副都統丁巳旌表守正捐軀之山東博平縣民李天章妻喬氏廣東長寧縣民賴必鎮女賴氏戊午

上詣暢春園問

皇太后安諭曰楊廷璋奏查辦黎匪仇殺客民一案所有文武功過據實舉劾等語崖州知州繆廷機署瓊州鎮標試用守備沈作礪擒拏多匪甚為迅速並著該督出具考語送部

實錄卷七六三

五

實錄卷七六三

六

引見總兵甘國寶道員王錦辦理與有勤勞並著交部議敘萬州營遊擊廖國寶斬獲賊匪多人頗屬能事該弁已經病故著該部察例議卹定安縣知縣倪邦良於黎匪犯案漫無覺察又不親往查拏左營守備陳君相防汛月餘不能實力搜擒俱著革職其辦理未協之巡檢千把總並著咨部斥革諭軍機大臣等楊廷璋辦理黎匪一案及查審小鎮安夷人竄入界內情形不憚煩暑往來兩省殊為可念著賞給小荷包八個以示嘉獎又諭曰蘇昌訪叅臺灣淡水境內生番焚殺一案所奏各摺具見悉心籌畫妥協周詳已於摺內批示著賞給小荷包八個以示嘉獎調廣東雷瓊鎮總兵甘國寶為福建臺灣鎮總兵碭石鎮總兵葉相德為雷瓊鎮總兵高州鎮總兵歐陽敏為碭石鎮總兵以龍門協副將馬宜乾為高州鎮總兵已未諭湖南瀘水州縣因本年五月雨澤稍多湖河漲溢田廬間有被淹益陽龍陽武陵等縣情形較重曾經降旨著該撫查明撫卹今據李因培奏五月十八九等日辰沅山水驟下武陵城外長隄正當其衝以致隄口潰漫該縣城鄉房屋多有坍塌人口亦有淹斃等語武陵此次被水頗重朕心深為軫念著該撫即速查明被災戶口先行撫卹一月口糧俾窮民均資接濟所有坍塌房屋人口並著詳查酌賞其水退地畝分別借給籽種令各及時耕作

如有一時不能涸出處所難於補種者并著確查成災分數另行照例辦理該撫其董飭所屬實心查辦毋致閭閻稍有失所該部即遵諭行○諭軍機大臣等李因培奏五月十八九日辰沅山水驟下武陵長隄潰漫被災頗重已降旨令該撫查明賑卹二月矣○至摺內所稱提臣李國柱督率該縣王永芳帶領兵夫日夜堵禦其四鄉被水之民並分遣丁役備船齎糧安頓等語看來該縣王永芳似屬能事之員如該員平日居官尚優著該撫存記遇有應陞缺出將該員奏明簡補以示鼓勵至武陵為常德附府首邑知府所辦何事現在何往何以祇令知縣獨任其勞摺內並未提及著查明覈實

欽定大清會典事例

七

覆奏此旨到後如李因培已起身赴閩即著常鈞查辦將此一併傳諭知之○庚申諭軍機大臣等據綽克托奏薩雅克部落有布魯特瑚圖什噶爾扎屬下之厄魯特庫本等盜馬來投即遣人往問瑚圖什等據瑚圖什稱情願將厄魯特呈獻但懇將所竊馬匹賜還請賞瑚圖什綢疋並將庫本等騎來馬匹發還等語綽克托所辦非是厄魯特來投止須撥發伊犁何必遣人去問布魯特等若布魯特來問但云天朝體統來者即納現已安置伊犁給伊生理便足了此事矣蓋此係厄魯特自願來投並非布魯特甘願獻出何得濫行賞賚至厄魯特騎來之馬令布魯特帶回尤屬乖謬現在伊犁雅

爾由哈薩克來投者甚多共帶來物件馬匹並未給回哈薩克布魯特事屬一體豈可參差辦理殊屬不曉事體著中飭嗣後有來投之厄魯特俱照哈薩克來投者一體辦理○辛酉遣官祭

火神廟○諭近派海明更換七十五海明到彼七十五不必來京即由彼處赴烏什協同永貴辦事○諭蘇肯著為三等侍衛交烏什大臣差遣委用○諭軍機大臣等前據楊應琚奏辦理莽匪一案已將賊黨召猛烈召猛珍及召散親屬俱各擒拿惟賊首召散等尚未弋獲現令總兵華封劉德成分路搜緝等語莽匪巢穴業已掃除賊黨並就擒捕惟召散等竄

欽定大清會典事例

八

身逃匿原屬釜底遊魂不難計日擒獲若因此一二小醜令總鎮大員統兵搜捕久稽時日既徒致虛糜軍餉且其事亦不值如此辦理該督自奏明追捕以來已兩月餘曾否緝有蹤影未據續報倘此時召散等業已就擒自可竣事若尚未拏獲即應將該鎮等所領官兵撤回另籌設法躡緝諒此等逸匪經勒平懲艾之後縱使苟延殘喘斷不敢再行滋事設使稍有蠢動亦不難再行查辦以淨根株著將此傳諭楊應琚等知之並將現在搜捕情形若何據實覆奏尋奏土司叭先捧人雖勇往尚欠老成是以留整欠官兵二百名現於內地土司內選擇能幹土目給土千總土把總銜令分管各猛

地方凡事與先擇商辦俟布置停妥將兵撤回惟孟良路通木梳木邦現籌辦木匪似應留兵彈壓堵禦至台散逃往阿瓦詢知緬甸係真阿瓦其城即謂之阿瓦城現飭土司繕寫緬文前往索取得旨萬里以外之事不可適度卿當相機勉力為之○以兵部侍郎期成額兼署刑部侍郎○壬戌上詣暢春園問

皇太后安○旌表守正捐軀之安徽六安州民黃成章妻陳氏○癸亥諭軍機大臣等今日方觀承題到萬全縣大境門外石壩於五月十八日口外溝水漲發擊碎舊壩根石並衝壞二十八年新修之石壩及虎皮石埧三處請將該縣莊有昌

冊錄卷一百三十三

九

議處工段勒限賠修一疏此項工程經該督於乾隆二十八年三月奏稱該處每逢水發其勢甚猛所有護城壩工非用條石堅砌根腳不足以資捍衛請改估加料興修等語是該處工程業已加帑改築自應堅穩鞏固足禦頂衝何以未及三年復致被水衝壞所謂捍衛者何在且壩埧被衝事關緊要該督何以不即摺奏僅行照例具題著傳諭方觀承據實覆奏尋奏現在被衝工段乃大境門石壩內新工三處係該縣莊有昌承修今於保固限內被衝應行參處並著賠修其水洞內東壩改估加料之工並無衝漫查前壩工被衝係具題之案臣照案辦理實係拘泥報聞○甲子諭曰永安現今

患病著來京調養所遺吉林副都統員缺著明亮補授吏部議准湖北布政使三寶奏稱舉人應選正途惟知縣一項缺少人多現奉定例各省縣缺不准同知通判知州借補請將已經借補者無論原銜係候補試用遇本項缺出俱按銜改補再改補人員尋常參罰案件多寡俱可通融調補如參展之案有關降革離任處分者不准改補從之○豁除江蘇崑山新陽鎮洋婁縣青浦五縣開挖越引二河占廢田地四頃七十畝額賦○乙丑

上詣暢春園問

皇太后安○諭兵部題武職人員請給封贈一本乃乾隆二十

冊錄卷一百三十三

十

六年十一月內所奉恩詔何以稽遲至今方行請領國家覃恩推仁中外俾人子均霑慶澤榮及其親伊等志切顯揚自應及時祇領即所經各衙門加結轉申不嫌考覈詳慎但任意延緩遲越多年不為定以期限於體制殊未允協再從前見各省題旌節孝每援遠年恩詔為詞曾降旨令各督撫採訪屬實即隨時請旌不必沿襲具文若封贈誥勅則更非尋常旌表者可比必遇朝廷有大慶典始舉行一次伊等既得躬逢盛事自當早被恩榮乃竟觀望逾時並不即為請領揆之情理不應出此亦豈所以欽承錫類之典乎所有此次應給封贈人員著該部即行趕辦至嗣後凡遇覃恩應定以二

年為限全行辦給不得仍前怠緩其過期不呈請者即毋庸頒給將此通諭吏兵二部及內外各衙門知之○又諭督撫大吏向不令其歲時進奉屢降諭旨甚明其有以土物充貢如紙筆香扇等類尚可留備賞賜之用亦藉以聯上下之情從不使其購珍奇以滋糜費此中外臣工所共知者昨廣東巡撫王檢貢物內有小珍珠一項甚為不取夫珠寶飢不可食寒不可衣於實用有何裨益業令奏事處發還恐各督撫尚有未能盡喻朕意者著將此明白通諭知之○又諭據烏勒登奏稱左翼厄魯特昂吉閒散大臣兼總管察罕庫本病故察罕庫本數年以來頗著勞績今在伊犁病故甚屬可憫

實錄卷百三

十一

著賞銀一百兩治喪所遺總管員缺著綽爾本補授○丙寅戶部議准漕運總督楊錫紱疏稱徐州衛江北幫漕船向在江寧府成造造竣運漕往返計一千六七百里每致凍阻不獲及時歸次受兌請改於夏鎮地方設廠成造其領價買料及先期運廠照河南前後兩幫成例辦理從之○禮部議准御史積善奏稱向來考取漢教習祇試以書藝二篇教習職司訓課詩文俱宜嫻熟嗣後應請添試排律照拔貢朝考例考試書藝一篇五言八韻詩一首從之○命護軍統領舒泰兼正白旗蒙古副都統丁卯調正紅旗滿洲副都統富勒赫為正紅旗蒙古副都統仍署鑲黃旗滿洲副都統以戶部

侍郎高恒為正白旗漢軍副都統 戊辰上詣暢春園問

皇太后安 諭曰彰寶題參平遙縣知縣李玳審擬縣民雷正宇擲傷總麻服兄雷宗乾身死案內刪減兇犯狡供卸罪情節請予革職一本所辦殊屬過當此案雷正宇與雷士俊酒後忿爭拾磁盤碎片擲打誤中雷宗乾殞命該縣李玳審親驗時雷正宇與伊父雷全仁商謀卸罪捏供雷士俊用刀扎死而伴作亦以刀傷混報經該縣驗明傷口參差究出本係磁器擲傷實情隨即搜起磁片比對相符雷正宇始無可置辯俯首伏罪是該縣辦理此案並無寬縱且因比驗傷痕

實錄卷百三

十二

訊究得實不為誣供所朦尚屬留心勘讞之員至該犯等從前狡賴雷士俊用刀扎死之處本係誑供既已審得實情即非此案喫緊關鍵原可毋庸申敘今該撫以該犯父子屢次藉詞狡辯謂該縣刪減初供所致殊不知地方官辦理獄情於緊要情節自不容妄有增刪致滋疑竇若此等兇犯狡賴之供定案時刪去以省繁混自與妄改初供者迥別豈可過事苛求至該縣於此案失察書役犯贓一節自有應得處分但究係公罪即交議亦不過止於降罰乃該撫遽以為昏庸溺職即請斥革何以服該縣之心督撫職任封疆察吏當分涇渭如果係庸妄劣員自應立登白簡以肅官常如此等詳

慎獄獄之員縱小有過愆尚堪造就當使瑕瑜不掩以昭懲勸之公若指摘微青輒行劾罷將有司更代紛煩屢經新手地方公務必多貽誤且使凡為州縣者意存顧忌一切案件轉致顛預了事不肯悉心研求所關於吏治民生者甚大朕於內外章疏即尋常題達事件亦必披覽周詳此案若非朕細加體察則李玳馨功罪幾無由別白該撫所辦不大失情法之平乎督撫等率屬宣猷當思為國家愛惜人材以收羣力之效嗣後糾劾屬員務須確當其罪期於無縱無苛用副朕整飭官方培勵羣材至意著將此通諭各督撫知之彰實此本著發還

是月安徽布政使富尼漢奏安省吳楚兩界

實錄卷七六四

十三

奸匪易滋防範之法莫若力行保甲臣在山東臬司任內繪有保甲圖說令各州縣查明境內城廂鄉堡各名目繪一總圖各鄉各堡各繪散圖凡山川道路及大小丁口詳登彙冊現將此與臬司參酌頒式繪造據各州縣因到鄉編查盤獲各省逃犯甚多是行之頗有成效益當率屬趕急辦理得旨所辦已是仍在實力妥行

閩浙總督署福建巡撫蘇昌奏

閩省設普濟育嬰二堂係鹽羨生息鹽折租銀田租變價等項每年約得銀三千餘兩通融支給育嬰堂向無定額每年約支銷銀二千兩惟普濟堂額定二百三十五名每年約需銀一千五百餘兩是款已不敷且閩省瘠貧老疾窮民尤衆

紛紛籲養急需籌辦查汀州府並長汀等縣每年共收鹽規銀二千五百兩充育嬰堂公用除支用外現餘存司縣各庫共銀九千餘兩請將此項撥八十兩借給省會鹽商營運按月一分起息添補省會普濟堂經費每年於額數外可增養一百五十餘名似宜通融辦理得旨如所議行

實錄卷七六四

高

大清高宗法天隆運至誠先覺體元立極敷文奮武孝慈神聖純皇帝實錄卷之七百六十三

大清高宗法天隆運至誠先覺體元立極敷文
奮武孝慈神聖純皇帝實錄卷之七百六十四

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事務處管理

吏部理藩院事務黃旗滿洲副都統世襲騎都尉軍功加七級隨帶加一級尋常加二級軍功紀錄一次臣履桂

總裁官經筵講官太子太傅文華殿大學士文淵閣領閣事稽察欽奉 上諭事務處管理刑部戶部工部事務

世襲騎都尉軍功加十九級隨帶加二級又加二級臣董浩內大臣戶部尚書鑲黃旗滿洲副都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆三十一年丙戌秋七月己巳朔享

太廟遣裕親王廣祿恭代行禮○諭甘省每年
額徵地丁等項銀兩不過三十餘萬所有應
支經費皆由隣省撥運協濟存貯庫項為數
無多該省地瘠民貧每需賑恤未免不敷支
給現在戶部帑藏充盈著撥給銀三百萬兩
交與該督吳達善收存藩庫以備應用該部
即遵諭行○又諭聞各省會首縣有代各上
司衙門備辦鋪設等項並應付公事賞需以
及一切宴會繁費之事各上司有祇發半價

者亦有全不給發者每致賠墊拖累於吏治
大有關係首邑近在會城上司遇有應辦公
務自不能不委其經理若修葺廨宇陳設鋪
墊等事皆私家瑣務自應各取給於所得養
廉豈可涉手屬員假其津潤即犒賞或由公
務而既已市名施惠便當量力解囊又豈可
沾剝下僚以懷他人之慨督撫為封疆大臣
司道等亦有表率羣吏之責理宜潔清自矢
以成大法小廉上司若藉此以省購辦之需
下屬即緣此以為逢迎之具獻媚取容勢將
何所底止又有地方公事向不動款者亦令
首縣捐貲知縣每歲俸廉公費極多不過數
千而用項動至盈萬所出數倍於所入未免
支絀時形惟因陋習相沿事難諉謝無可如
何謹飭者遂至視為畏途而不肖者益復毫
無顧忌輒爾明目張膽輾轉挪移終歸虧帑
甚且侵欺掩飾央求幫助之弊種種叢生不
可究結即如近日段成功一案其明證也雖

墨吏已正刑誅自當懲一儆百恐各省尚有類此者或由積重難返。或且僥倖苟全。當此綱紀肅清之時。豈宜聽其日下而不為釐剔。但其事未經敗露姑從寬已往不究外嗣後著各督撫將首縣代辦賠墊之處實力嚴禁永遠革除。其有因公捐墊無項可支者不妨開列清單覈實撙節酌撥開款應用使劣員無可藉口。并著將從前曾否令首縣賠墊之處據實詳悉覆奏。如此番飭禁之後尚不知悛改及奏明向無賠累別經發覺者定將該上司屬員從重治罪決不稍為寬貸也將此通諭各督撫等知之。又諭前因各省應修城垣費繁工鉅特發內帑一律修繕以資鞏固屢經諭令各督撫董率地方官實力承辦並派大員專司查估務期實用實銷工程足垂久遠茲據舒赫德自甘肅回京奏稱該省各屬辦理城垣率多浮估並經親行查勘確覈興修其從前已經修竣城工在定例保固

限內者亦或有未盡覈實之處等語甘肅一省如此恐他省亦不能保無弊混工程冒濫草率將來報竣時特派大臣察驗自不能絲毫掩飾但與其按治於事後莫若防檢於事前現在各省鳩庀伊始物料在廠按冊可稽而夫役食價等項亦正當支發計人計日查考更易周詳著各該督撫於已報興工之各州縣或親往察勘或令原派司道等前往確切查勘如有浮開冒估即行覈減則承辦各員咸知儆惕自不敢任意侵肥及蹈扣剋草率諸弊其已報修竣城工在保固限內者或有浮冒情節並著一體查明覈辦倘各督撫及承辦各大員不以為意或心存姑息以致蝕帑誤公者將來經欽差查出或朕別有訪聞惟於伊等是問著再將此通行曉諭知之○庚午兩江總督高晉江蘇巡撫明德奏淮安府屬山陽鹽城三縣有分轄潤河一道又揚州府屬高郵州有運鹽官河南澄子河二

道係各壩下通海引河該三處河身淤墊奏明借項興挑分年還款今已先後完工臣等親赴勘驗均屬開濬深通并令將三處河道歸於淮揚二屬節年動帑興挑各河案內責成專管兼管各員每歲秋冬水涸勘有淤淺即照業食佃力之例督令近地居民挑濬報聞。辛未。

上詣暢春園問

皇太后安○戶部議覆廣西巡撫宋邦綏疏稱

柳州府屬融縣四頂山開採白鉛礦砂抽課各事宜一四頂山產白鉛礦砂因無煤炭不能煎煉成鉛查羅城縣屬冷崗山躡有煤路可以運往就煤煎煉自乾隆二十九年四月試煎起至三十年十一月止共抽正課撒散白鉛十四萬七千餘觔請准開採煎煉照例每煉鉛一百觔抽正課二十觔撒散三觔一冷崗廠陸續起鑪四十四座煤礮三十二處工丁及買賣人等漸衆其鉛礦自融縣運至

牛鼻壩另換小船撥運抵廠稽查巡防登記造報在在需人應添設書記二名巡攔八名巡役四名照依盧架廠之例支給工食在抽收撒散鉛觔變價銀兩內報銷一課撒鉛觔自冷崗廠至臨桂縣蘇橋一路運至省局查臨桂縣南陡河道業已修復鉛觔運至蘇橋即可由水路運省局較蘇橋旱路可以節省計自廠至局每鉛每觔共需水陸運腳銀二錢三分一釐如遇錢局需鉛甚殷或值秋冬

南陡河水涸仍請雇夫挑運運費在鼓鑄工本銀內報銷一該廠雖開採有效尚未大旺應召募殷商協辦將採煤煉鉛抽收課撒調劑商鑪事務責成羅城縣知縣就近兼管督察其四頂山採煅工丁水陸腳夫船戶責成融縣知縣彈壓稽查不必另設廠員俟大旺日再設專員管理均應如所請從之。壬申。上御勤政殿聽政諭陝甘捐監事例原因籌備倉儲以備緩急賑恤之需行之有年倉穀

尚未能充裕聞近日漸至損本色者少而折色者多遇有需用穀石之處仍不敷支給且以本地折色即向民間採買恐不免勒派滋累而承辦官吏那移侵蝕之弊亦難保其必無於積貯實政間閭生計均無裨益現今降旨發庫帑三百萬兩存留甘省備用如遇年穀順成米值平減之時著即於此項銀兩內酌撥採買陸續購補足數則當歲收豐稔既無慮穀賤傷農即或偶有歉收亦復足資賑糴如庫項買穀間有不足之處並著該督隨時奏聞再行撥給該督等其實心經理飭屬妥辦務使積貯裕如帑歸實用所有陝甘兩省現在捐監之例均著停止如該省有願捐貢監者准其赴部報捐又諭兵部嗣後每隔二三年該部即將各省俸深之滿洲副將叅將開列名單提奏一次大學士管雲貴總督楊應琚奏滇省礦廠甚多各處聚集砂丁人等不下數十萬每省流寓之人聞風來

至以至米價日昂請嗣後示以限制將舊有之老廠子廠存留開採祇許在廠之週圍四十里以內開挖礮硿其四十里以外不准再開庶客戶課長砂丁人等不致日漸加增再現在滇省各廠每年約可辦獲銅一千二百萬觔內解赴京局及本省鼓鑄并外省採買滇銅共約需一千二百餘萬觔所餘不過數十萬觔若外省儘數加買勢必入不敷出請將各省採買滇銅除乾隆十九年奏定之額仍聽按年買運外如有請豫買一運以及加買并借買數十萬觔之處概不准行又舊廠既有界限將來開採年久難保無衰歇之處更應留有餘以補不足查省城臨安東川新舊各局除正鑄之外又經奏准加鑄將餘息銀兩為湯丹大礮等廠加添銅價及永順普洱防邊之用共歲需銅一百七十餘萬觔今滇省正鑄之卯儘足敷搭放兵餉接濟民用其加價一項應即在外省採買滇銅盈餘

銀兩內撥用。本省加鑄各項。亦可酌量停止。請將永順等處防邊經費。所有加鑄之卯。及東川新局加鑄一項。仍行酌留。其餘各局加鑄。概行停止。即以所餘之銅。留備將來不足之用。得旨。如所議行。以左翼前鋒統領傅玉。兼鑲黃旗滿洲副都統。○癸酉諭。滇省山多田少。水陸可耕之地。俱經墾闢無餘。惟山麓河濱。尚有曠土。向令邊民墾種。以供口食。而定例山頭地角。在三畝以上者。照旱田十年之例。水濱河尾。在二畝以上者。照水田六年之例。均以下則升科。第念此等零星地上。本與平原沃壤不同。倘地方官經理不善。一切丈量查勘。胥吏等恐不免從中滋擾。嗣後滇省山頭地角。水濱河尾。俱著聽民耕種。概免升科。以杜分別查勘之累。且使農氓無所顧慮。得以踴躍赴功。力謀本計。至舊有水利地方。如應行開渠築壩之處。小民無力興修。及閒曠地畝。艱於開墾者。並令確切查明。酌

借公項。俾閭閻工作有資。該督其董率所屬。悉心經理。盡地利而裕民食。用副朕廑念邊農之至意。該部遵諭即行。○諭軍機大臣等。李因培奏請來京請訓。無可面諭。惟所陳湖南屬員賢否摺。殊未允當。已於摺內批示矣。即如沈世楓。由臺垣簡用外任。歷膺司道。其為人朕所深知。外貌雖似能辦事。其實乃一模稜兩可。不肯實心出力之人。李因培稱其老成謹慎。尚不得謂之過當。即云心地安和。亦不離其鄉愿本色。至謂其辦理刑名頗盡心力。則大謬矣。沈世楓循分供職。固不致有劣蹟可指。若云其精研案牘。實力整飭。斷有所不能。該臬司前以保舉匪員被議。此次又以審案錯誤降調。朕因其不肯實力奮勉。且兩次獲譴。遂照議實降。該撫乃諉之州縣。不能應手。是有心為之開脫。思以取悅下僚。殊屬非是。李因培素有高自是。而復沽名習氣。至今尚未能化。甚非封疆大吏所宜。該撫

現在調任閩省。海疆要劇。諸事尤當認真。不可稍存陋習。有負任使。若仍不知悔改。復蹈前轍。決不能曲為寬貸也。李因培著傳旨申飭。又諭曰。阿思哈奏請將知府趙瑗等互調一摺。已降旨將趙瑗與艾恩蔭對調矣。至所奏南陽守高趯。調補歸德之處。殊屬非是。高趯為人。朕所深知。不過一庸俗漢軍才具。本非出眾。該撫既稱其在南陽任內。不能實心。恐致因循。豈轉能勝歸德煩劇之任。若以之調補。諒亦難望其振作。高趯著仍留南陽之任。並著傳諭阿思哈。留心察看。如該員辦事。不知實心奮勉。或有貽誤地方之處。即據實具摺參奏。毋得稍有徇隱。○甲戌。諭據富僧阿奏稱。呼倫貝爾掌關防總管由屯病故等語。由屯前在軍前。甚屬奮勉。茲已溘逝。深堪憫惻。著加恩賞銀二百兩。其所遺呼倫貝爾掌關防總管員缺。著薩壘補授。○調正白旗蒙古副都統舒泰。為正黃旗蒙古副都統。

鑲黃旗蒙古副都統德福。為正白旗蒙古副都統。○以故輔國將軍謨廣子善勇襲職。○乙亥。上詣暢春園。問皇太后安。○予故鑲黃旗蒙古副都統加都統品級阿敏爾圖。祭葬如例。○丙子。上以秋獮木蘭。奉皇太后自圓明園啟鑾。○諭工部。每年題派滿漢街道廳各一員。專司外城街道溝渠。乃行之日久。漸成故事。每逢雨後泥濘。溝道並未稍為修治。則所謂管理街道。徒屬有名無實。現在特發帑金。將京城內外街道溝渠。概行修整。專派大臣董司其事。期於經久。工竣以後。必須妥員實心經理。庶有成效。嗣後著工部堂官及步軍統領衙門。各揀選賢能司官二員。並令都察院保送御史二員。帶領引見。候朕派出管理。以專責成。仍每年更換一次。今年所派之員。著於迴鑾時引見。○又諭。前

據湖北按察使雷暢條奏。民間田房稅契。不黏連司印契尾者。立限一年。令業戶首明補稅。以杜侵隱。而稽假冒。經戶部覆准。並令各督撫分別定限。報部查覈。夫隱匿漏稅。若在民。自應查明。令其補交。若係州縣官辦理稅契。於契紙內鈐印。並不黏用司印契尾。是係不肖有司。意圖侵肥。入己所致。其實小民應投稅銀業。已照數輸納。今乃令業戶首明補稅。而不於原稅之州縣名下追還。是百姓受重稅之累。而侵隱之官吏。轉得安享其利。於情理殊未得平。著各該督撫詳悉出示曉諭。凡民間有已經投稅。並無司頒契尾者。令其據實首明。即行補給契尾。其稅銀毋庸重複補納。以卹民力。並查係何員任內經手。除事在五年以前。及該員已經身故者。查明免其勒追外。其現任及陞調各員。均著照原稅銀數。於各員名下定限追還。此次立法以後。如再有止鈐契紙。不連用契尾者。各督撫即行

查叅治罪如此。則閭閻既免重科。州縣共知儆惕。將來小契之弊。亦可不禁自止。可將此通諭知之。是日駐蹕南石槽行宮。丁丑。諭朕此次巡幸木蘭。所有經過地方。本年地丁錢糧。著加恩蠲免十分之三。該部遵諭速行。是日駐蹕密雲縣行宮。戊寅。孝懿仁皇后忌辰。遣官祭景陵。是日駐蹕要亭行宮。己卯。諭曰。阿里衮于敏中。現俱隨從木蘭。所有戶部尚書事務。著舒赫德暫行兼署。又諭曰。翁牛特貝勒諾爾布扎木素。著協理昭烏達盟長事務。工部等部議覆福建巡撫暫留湖南巡撫李因培奏。稱常德府武陵縣護城隄工。本年五月被水衝缺二十四處。城西得勝宮城東半邊街。均與大溜直對。最為緊要。半邊街向係石工。應仍用石築砌。得勝宮一處土隄。不足捍禦。應改下石上土。其餘土隄單薄之處。量行增加高厚。惟費繁工鉅。民力不支。應請

動項興舉。照乾隆十七年湘陰縣護城石隄修築之例。於地丁銀內動撥其工程可以稍緩及原隄單薄易於補築者。仍聽民間分段興修等語。均應如所請從之。是日駐蹕兩間房行宮。庚辰。諭軍機大臣等。前諭各督撫每月將通省糧價奏報一次。原以米糧時價關係民食。欲隨時周知市糴情形。有無增減。以紓屢念。督撫等理應於次月內即將上月各屬糧價彙齊摺奏。今宋邦綏於該省四月分糧價。直至六月初旬始行具奏。殊屬遲延。著傳旨申飭。該撫嗣後務按期奏報。毋得仍前延緩。是日駐蹕常山峪行宮。辛巳。駐蹕喀喇河屯行宮。壬午。未刻。皇后崩。諭今日熱河馬甲八十四站街。妄行叩訴。身係孤子。不願在此居住等語。八十四係派出站街之人。如有此等妄行叩闕之人。伊尚當嚴行管束。反為己身私事如此妄為。實屬目無法紀。且滿洲臣僕遇有差違。孰敢

自稱不願八十四在此駐防。豈得託故規避。設將伊派往軍營。亦將稱不願而不往乎。情殊可惡。八十四著革去馬甲。發往伊犁。不許支給錢糧。充當苦差。如至彼仍不安分生事。即從重治罪。吏部議覆巡視北城御史素爾訥奏。稱五城司坊官員管理命盜逃匪事務繁劇。往往因處分不能。陞轉前經部臣奏明。三年俸滿。即保送引見。附於即陞人員之末。以次陞用。將降革留任處分帶於新任。但該員等選法。例應先儘外省。即陞報滿之人。得缺仍覺壅滯。請嗣後遇選。即陞月分先用。即陞五人。次用照例陞轉一人。輪缺選用等語。應如所請。辦理。再定例各省卓異。應陞人員。俱在各項應陞之後。亦未允協。嗣後除道府班次。即陞人少。卓異人多。不至窒礙。無庸更改成例外。其運同以下等官。凡遇即陞班次。俱先用即陞一人。照例陞轉一人。次用卓異一人。如照例陞轉無人。即將卓異人員抵

陞從之。是日駐蹕避暑山莊至八月壬子
皆如之。癸未中元節遣官祭

永陵

福陵

昭陵

昭西陵

孝陵

孝東陵

景陵

泰陵遣官祭

孝賢皇后陵

端慧皇太子園寢
諭據留京辦事王大臣
奏

皇后於本月十四日未時薨逝

皇后自冊立以來尚無失德去年春朕恭奉

皇太后巡幸江浙正承

歡洽慶之時

皇后性忽改常於

皇太后前不能恪盡孝道比至杭州則舉動尤
乖正理跡類瘋迷因令先程回京在宮調攝
經今一載餘病勢日劇遂爾奄逝此實
皇后福分淺薄不能仰承

聖母慈眷長受朕恩禮所致若論其行事乖違
即予以廢黜亦理所當然朕仍存其名號已
為格外優容但飾終典禮不便復循

孝賢皇后大事辦理所有喪儀止可照皇貴
妃例行交內務府大臣承辦著將此宣諭中

外知之

大清高宗法天隆運至誠先覺體元立極敷文
奮武孝慈神聖純皇帝實錄卷之七百六十四

平定回疆方略

七

大清高宗法天隆運至誠先覺體元立極敷文
奮武孝慈神聖純皇帝實錄卷之七百六十五

監修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履桂

總裁官經筵講官太子太傅文華殿大學士文淵閣領事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆三十一年丙戌七月甲申

上詣

皇太后行宮問安。四川總督阿爾泰奏臣遵
奉諭旨。俟提臣岳鍾璜回川。同往番境相機
妥辦。至現在各土司。於本境設伏巡哨。尚為
嚴密。及至催令進攻。則以為無路可進。必須
潛由僻路。暗放夾壩。乃為有益無損。其實夾
壩殺擄無多。且均有金川守碉番衆救應。迎
敵。各土兵誠恐截其歸路。即回本境。是以攻
襲多次。未能深入。而郎卡見各土司防守嚴

密日夜巡哨。亦不敢輕出滋事。臣俟岳鍾璜回川再往體察各土司是何情形。郎卡是何動作。相機辦理報聞。○乙酉。諭軍機大臣等。據七十五奏稱。郭羅克越境搶擄青海牲畜一案。請交川省大臣。向郭羅克索取給還。原主一摺。朕已降旨。此事令青海王公等會盟。伊等自量其力。能向郭羅克索取。即合力向郭羅克索取。不能則已。不可令川省大臣辦理。但郭羅克係四川所屬。此事朕雖如此降

旨。而阿爾泰亦不可視同局外。理宜悉心辦理。嗣後飭該管官員嚴加約束。不可聽其越境行竊。所有命青海人等會議諭旨。並七十五奏摺著鈔錄傳諭阿爾泰。將如何辦理之處。即行奏聞。○吏部議准。河南布政使佛德奏稱。官員頂帽。例應各按品級戴用。今外省有已經降調。尚未補缺。並業經革職之人。公然仍戴原官頂帽。請申明例禁。通行嚴加查察。如有違犯。即照違制例議處治罪。地方官

縱容瞻徇。隱匿不報。各照例子以處分。從之。○豁除江蘇丹徒縣坍江田地二十四頃五十六畝。有奇額賦。○旌表守正捐軀之江蘇宿遷縣民劉大登妻陳氏。○丙戌。諭軍機大臣等。今歲夏初雨澤稍遲。六月以來京城及近畿各處俱連得透雨。惟聞奉天一帶雨水稀少。地土恐不免乾旱。雅德等何以並未奏聞。著傳諭該侍郎尹等。將奉天各屬現在雨水民田情形。若何。是否不致成旱之處。詳

悉據實速奏。毋得稍存諱飾。以故西藏扎薩克一等台吉噶布倫旺對子索諾木喇什襲職。丁亥。諭軍機大臣等。據舍圖肯奏。奉天各屬自五月以來頗覺亢旱。今七月初四等日。雖得透雨。秋收可望。而市集糧價日漸增長。皆因商販囤積搬運所致。等語。向因奉天糧石充裕。是以直隸山東毗連省分。許其就近販運。以資接濟。今直隸山東現俱豐收。民食自屬有餘。無須更資奉天糧石應用。所

有該二省現在運買商販著暫行停止。並將此傳諭該將軍、府尹及督撫等知之。○軍機大臣等議覆察哈爾總管巴爾品奏稱達里岡愛牧廠請設四品蒙古總管一員。由牧羣翼領內揀選引見簡用。其商都達布遜諾爾牧羣所有翼領等缺酌裁。達里岡愛添設翼領二員。新添牧羣內每羣牧長、牧副各一員。牧丁各八名。均應如所請辦理。並另行鑄給關防。從之。○又議覆伊犁將軍阿桂奏稱伊犁屯田官兵收穫十一石以上者。給予議敘。今各處官兵俱已駐久。非初次屯田之時可比。請嗣後官兵收穫十一石以上者。毋庸議敘。其收穫十八石及二十八石者。給予議敘。應如所請。從之。○戊子。吏部議准大學士管雲貴總督楊應琚奏稱普洱府學因向係夷疆。人文未盛。僅設訓導一員。兼管寧洱縣學事務。但訓導例由歲貢選授。年力率多衰邁。又普洱水土惡劣。衰年之人。到彼易於違疾。

未免職業就荒。且府縣共一學官。尤須教迪得人。應請將普洱府訓導改為寧洱縣教諭。從之。○又議准閩浙總督蘇昌奏稱延平府屬南平縣王臺地方。水陸通衢。五方雜處。距縣城六十里。彈壓難周。應請將延平府通判移駐王臺。并改鑄王臺總捕通判關防。從之。○予故寧夏將軍覺羅永泰祭葬如例。謚恪靖。○予故湖南鎮草鎮總兵祖雲龍祭葬如例。○己丑。諭軍機大臣等。據王檢奏查審富明安開端浮收折價一案。稱係家人婁貴偷費私折。詰訊富明安堅不承認。請提管帳家人李成到粵質審。究擬等語。此案既據婁貴供認浮收米三百餘石。係回明伊主。私賣加收。富明安豈能託辭不知。明係誣過家人。以為卸罪地步。該撫何得任其狡展。且婁貴供前道范時紀交代。有些虧折。因有浮收之事。則自清釐明福一案以後。其端復開於富明安。更無可辨。尚何所容其支吾掩飾乎。近來外

省劣員贓蹟。往往歸罪書役家人。巧為輕減。如莊有恭審擬段成功之案。其尤著者。朕從前尚未查辦。及此。今於莊有恭已大加懲創。期於積弊肅清。王檢倘欲稍存瞻顧。有意為富明安開脫。則莊有恭覆轍具在。惟該撫審所自處。所有富明安家人李成。已飭交步軍統領衙門。查拏解粵。著將此傳諭知之。○又諭曰。李因培奏桂陽州民侯嶽添被毆身死一案。屍親原報。係大功弟侯七郎侯覺添同毆致死。及護州審訊時。侯覺添忽改供。係嶽添大功兄。兩傷皆伊所毆。復駁飭另審。則又添出侯覺添之兄侯學添。自認致命重傷。供情翻覆。仍飭另委賢員究審。務得實情等語。此案關係服制。或兄或弟。罪名輕重懸殊。豈可任兇犯輾轉狡飾。致成輕縱。現在李因培已起身赴閩。著傳諭常鈞。將案內情節。詳悉研審。毋任絲毫遁飾。以成信讞。至於人命案件。乃臬司專主。如果悉心推鞠。何致案犯共

毆獨毆。忽兄忽弟。閃爍遊移。尚煩撫臣駁詰。此皆沈世楓不肯認真辦事所致。沈世楓之為人。朕所深知。外貌雖似明白。平時亦無劣蹟。但其中一味模稜。遇事全不實力擔承。於辦公毫無實際。李因培前奏。尚謂其辦理刑名。頗盡心力。果爾。則此等命案。有何難辦。而任其案情歧誤。不能定讞耶。今李因培復奏。駁令沈世楓另委賢員會審。是其不能辦事。李因培亦未嘗不知。至此真情流露。則前此之曲為護飾。冀以取悅下僚。其蹟更不能掩矣。著將此并諭李因培知之。工部議准。直隸按察使裴宗錫奏。稱各省城工。在保固限外者。令地方官遵照定例。時加保護。仍於年底將是否完固。及有無坍塌之處。具報存查。并令督撫嚴飭該管道府。據實報明。年終彙奏。從之。庚寅

上詔

皇太后行宮問安。諭據楊應琚奏。例應調回

補用之總兵劉德成。前奉旨交臣查明降旨。該鎮熟悉邊情。請仍留滇照例辦理一摺。劉德成當莽匪猖獗時。不能先事豫防。固難辭咎。但此次領兵分剿。屢經攻克賊巢。辦事尚覺奮往。前劉藻奏伊不即迅速稟報。請兵剿逐之處。並據該督查明。亦屬不實。劉德成著照所請。留滇酌量補用。○又諭曰。蘇昌奏福鼎縣知縣趙由俶。首先訪查洋案。拏獲隣省隣境盜犯二十餘名等語。趙由俶頗屬能事。

著出具考語送部引見。此等盜案。近來廣東福建江南浙江等省。拏獲頗多。該犯等出入海洋。前後犯案。不一而足。地方官既已審訊屬實。即應就案完結。雖各省另有犯案。亦不必彼此行查。使兇徒得稽顯戮。至邇年以來。海洋積匪。累累就獲。現在地方官留心查辦。固屬可嘉。但從前數年。何以寂無報聞。皆由所在文武員弁。因循玩忽。故賊匪得潛匿洋面滋事。今各省既上緊訪緝。則匪犯自無可

逋藏。著各督撫再行嚴飭沿海州縣。加意搜捕。其隣境省分。並互相關會。一體協力擒拏。務絕根株。而清海境。毋得稍有縱弛。致奸徒倖逃法網。○諭軍機大臣等。據楊應琚奏。報滇省五月分糧價。內雲南府屬白米紅米。每石竟至四兩一二錢之多。其餘各屬。亦有貴至三兩以外者。該省僻處邊陲。山田旱地居多。所產米糧。僅供本省食用。雖無外來搬運之虞。而商販不通。撥運不便。亦難資隣省接濟。市糴為民食所係。不可不亟為熟籌。前此

該督摺奏。曾有禁止游手無藉之徒。混入滇省。亦搏節冗食之一道。現今糧價昂貴。著傳諭該督。即就彼處情形。通盤籌畫。或有可以裕其源而節其流。俾閭閻生計。永資利賴之處。悉心妥議具奏。至該督另摺所稱。前數年因夏間得雨較少。是以收成不豐。今自六月望前。省城節次獲有透雨。遠近各屬。亦屢得甘霖。高低田畝。處處霑足。豐稔可期等語。覽

奏稍為欣慰。但此時距秋成尚早。該督具摺以後。雨水仍否調勻。約計秋成分數若何。各屬米價能否稍為平減。並著該督查明現在情形。即速據實奏聞。以紓廛念。尋奏。滇省市糶事宜。已酌令近省之安寧等十州縣。每年酌量分別額糧多寡。改徵本色折色。運赴省倉。以資平糶。又滇省燒鍋。專用稻米。亦經出示嚴禁。至六月望後。雨水俱屬調勻。禾苗暢發。早稻已結實。約計秋成在八九分以上。紅白米價。較五月分。每石各減銀五錢三四錢不等。得旨覽奏俱悉。○又諭。據楊應琚奏。木邦土司呈稱。因遭緬酋殘刻。情願歸附。請俟天兵到彼。即將緬匪遣來監視之人擒獻。並現今名散逃往緬甸。已行文前往索取。如其不獻。應發兵辦理等語。已於摺內批示。楊應琚久任封疆。夙稱歷練。籌辦一切事宜。必不至於輕率喜事。其言自屬可信。况緬夷雖僻處南荒。其在明季。尚入隸版圖。亦非不可臣

服之境。但其地究屬遼遠。事須斟酌而行。如將來辦理。或可相機調發。尅期奏功。不至大需兵力。自不妨乘時集事。倘必須勞師籌餉。或致舉動張皇。轉非慎重邊徼之道。該督務須詳審熟籌。期於妥善。以定進止。可將此傳諭知之。○又諭。據楊應琚奏。名散胞弟緬僧召竜。前來投首。該犯雖自幼出家。並無隨同為匪情事。但既係召散胞弟。不便存留孟艮。請發往伊犁安插等語。召竜既係緬僧。必能粗知緬匪情形。著將該犯先行解京候詢。若召竜於內地語言。不能相通。並著僉派一通事之人。押同赴京。○又諭。去歲吳達善至江南迎鑾。曾面奏提督李勲。年力衰老。因調其來京陛見。及召對時。察其言動。頗為明捷。雖齒逾七十。而精力未衰。遂令仍回原任。昨因辦理莽匪之事。調伊為雲南提督。李勲到滇後。節次奏事。頗中機宜。且因首惡召散未就。弋獲遠駐孟艮地方。督率總兵嚴緝。在提督

中尚屬實心出力。可資倚任者。設如吳達善所云。豈衰頽之人。能如此不憚勞劇。黽勉從事乎。看來吳達善不過因其前任湖廣提督時。曾奏地方事件。人皆憎嫉之。吳達善初至楚省。遽逞私臆入告。夫以封疆大臣。於朕前奏提臣優劣。而任性毀譽若此。其他尚可信乎。吳達善著傳旨申飭。李勲摺並著鈔寄閱看。再舒赫德自甘肅回京時。奏及該省首邑皋蘭縣。有為上司代辦鋪設賞需。及應付公事之項。致有賠累等語。吳達善前任巡撫總督數年。何以並未籌辦及此。亦未據實奏聞。可見該督不過奏對尚好。其於地方事務。並不認真整理。嗣後務痛自湔洗。諸事實心妥辦。以無負委任。若仍不知悔改。恐不能長受朕恩矣。至吳達善原係陝西駐防。其地即總督所統轄。尤當小心謹慎。毋任其家屬恃符滋事。倘管束不嚴。致有過犯。朕惟於吳達善是問。著將此一併傳諭知之。○辛卯吏部等

部議准。前署陝甘總督刑部尚書舒赫德疏稱涼州理事同知已移駐伊犁。其涼州理事同知衙署即改為涼莊理事通判衙署。從之。○工部議准。巡視南漕給事中胡澤漢奏稱各衛備弁俸滿引見。由漕臣出具考語。給咨送部。其軍政之年。令糧道詳覈申送。漕臣會同督撫具題。從之。○壬辰。

上詣

皇太后行宮問安。諭曰。御史李玉鳴奏內務

府辦理

皇后喪儀。其上墳滿月。各衙門應有照例齊集之處。今並未聞有傳知。是否遺漏等語。實屬喪心病狂。去歲

皇后一事。天下人所共知。共聞。今病久奄逝。仍存其名號。照皇貴妃喪儀。交內務府辦理。已屬朕格外優恩。前降諭旨甚明。李玉鳴非不深知。乃巧為援引會典。謂內務府辦理未周。其意不過以仿照皇貴妃之例。猶以為未

足而又不取明言。故為隱躍其辭。妄行瀆擾。其居心詐悖。實不可問。李玉鳴著革職鎖拏。發往伊犁。並將此曉諭中外知之。○又諭。木蘭英額溝向有湯泉。在圍場界外。蒙古患病。即前往坐湯。近因扎什泰。恐致驚走牲隻。稟知嚮導大臣。具奏禁止。改由他路行走。嗣後尋常行路之人。令由新改路行走。如蒙古人有願往坐湯者。不必禁止。至索約勒濟圍場內。亦有湯泉。著富僧阿色旺諾爾布。一體無庸禁止。仍不許尋常行路之人行走。○旌表守正捐軀之山東金鄉縣民王振海妻李氏。○癸巳。江西巡撫吳紹詩疏報。德化縣乾隆三十年分開墾九江衛老荒屯地二頃有奇。○甲午。諭曰。崔應階奏東省七月初旬雨水稍多。運河宣洩不及。汶河亦一時漲發。致有漫溢。濟南。東昌。泰安。武定。兗州。曹州等府屬州縣內低窪邨莊。俱有被水之處。穀豆間至損傷。民房亦不無衝塌等語。看來該省被水

情形較重。朕心深為廕念。著該撫即速前往查勘。有應行撫卹者。即照例撫卹。有已經成災處所。並著查明分數。按其輕重。分別悉心妥辦。俾閭閻不致失所。該部即遵諭行。○又諭。據溫福等奏。稱烏魯木齊攜眷駐防兵丁。及該管官員等。每月支領鹽菜銀兩。前經議定。俟數年後居處服習。即行裁汰。今前後移駐兵丁內。有已過三年。將及四年者。嗣後俱以四年為定限。四年限滿。裁去鹽菜銀兩。惟支俸餉等語。烏魯木齊攜眷前往屯田綠營兵丁。除原食錢糧外。復支給鹽菜銀兩。原因烏魯木齊係新定邊疆。諸物昂貴。加恩賞給雙分。使伊等生計有資。今烏魯木齊等處商民雲集。與內地無異。非初派駐防時可比。鹽菜銀兩。自應裁汰。但現在烏魯木齊兵丁。尚有從前軍需應扣之項。如扣項未完。即裁鹽菜銀兩。於伊等生計不便。著加恩暫停裁汰。俟伊等扣項完結。再行裁汰。官員鹽菜銀兩。

亦照兵丁辦理。嗣後陸續派往官兵當為區別。如本營原有欠項。至烏魯木齊應坐扣者。仍支給鹽菜銀兩。俟扣項完結。即行裁汰。其本營無賠項者。念伊等甫經派往。除應支俸餉外。著加恩支給一年鹽菜銀兩。次年即不必支給。○乙未。

上奉

皇太后幸卷阿勝境。侍早晚膳。翼日如之。○賜扈從王公大臣及蒙古王公台吉等食。翼日

如之。○戶部議准直隸按察使裴宗錫奏稱。各省徵收田房稅契銀兩。其契價在一千兩以上者。行令各州縣將所填契尾黏連業戶原契。申送道府直隸州查驗相符後。即行裁截兩半。發還州縣。一給業戶。一送藩司稽覈。並令該督撫隨時察訪。倘州縣不按月申送。及已申送而各上司逾限不給。並查驗不力。以致州縣官仍有私改侵吞情弊者。將該州縣及該管道府直隸州分別予以降級罰俸。

處分從之。○丙申。諭據常鈞奏查辦常德府屬被水撫卹情形摺內。稱面詢災民及各地方官。有已經遵例散給撫卹口糧者。亦有拘泥夏月被水。俟秋成確勘。分別辦理。不敢即行賑卹者等語。所奏殊堪駭異。此次常德等屬猝被異漲。與尋常被災者不同。前經李因培奏報山水漲溢情形。即降旨令其作速查明。先行撫卹一月口糧。俾窮民均資接濟。今據常鈞所奏。該處地方官竟有拘泥成例。俟秋成後始行辦理者。試思現在積水未消。災民露處乏食。豈能坐待秋成賑卹之理。李因培從前所辦何事。至於城工隄垸。皆衛民要務。李因培亦並未具奏。及此實為可怪。其意不過以交代在即。心存五日京兆之見。不復詳悉查辦。督撫身任地方。似此災賑重大。關係民生呼吸之事。輒意存諉卸。置民瘼於度外。則所賴於督撫大吏者何在。殊非朕軫恤愛民之意。李因培著交部議處。所有常德等

屬被災等處。著常鈞速即加意撫卹。俾災黎
普霑實惠。毋致稍有失所。該部遵諭速行。
又諭。據常鈞奏常德府城濱臨朗江。地勢卑
下。西南二面。以城為隄。其中筆架城一段。城
牆最低。遇水勢驟長時。幾乎垛口。請添高加
厚。以備不虞等語。已於摺內批示。照所請行
矣。至另摺所奏應修隄坑一事。雖係官隄。少
而民坑多。但此次山水驟發。漫溢江湖。民間
猝被異漲。非尋常被水者可比。災民口食維
艱。現在加恩賑卹。期無失所。豈能復有餘力。
營修隄坑。從前二十九年湖北監利縣江水
漲溢。衝損孫家月隄。經該撫請借帑興修。曾
降旨官為修築。免其徵還。此次所有應修民
坑。並著一體官為修建。以卹民力。且災後興
舉隄工。無食貧民。兼可資以工代賑之益。著
該撫將積水處所。上緊設法堵禦疏消。即速
勘明應修各隄坑殘缺丈尺。刻日興工。俾災
黎均霑實惠。該部即遵諭行。○以湖北布政

使三寶湖南布政使赫昇額對調。○丁酉諭
據楊應琚奏。新定整欠孟良地方。請仿照普
洱邊外十三土司之例。酌中定賦。於丁亥年
入額徵收等語。整欠孟良業經附入版圖。願
輸糧賦。其酌定徵額之處。俱著照所請辦理。
但念該處地方。連年經莽匪擾害。今雖得安
耕作。而元氣尚難驟復。若遽於丁亥年責令
輸將。恐貽民生計。未免拮据。所有應徵錢糧
著加恩緩至戊子年入額徵收。以示優恤。邊
黎至意。又諭。據常鈞奏。沅陵縣知縣王
元位。於被災輕重情形。並未確查撫卹。辰州
府知府諸重光。亦未親往查辦。扶同該縣欺
朦飾混。請一併革職等語。知府知縣。所以為
民也。而為民之事。莫要於災傷賑卹。凡知府
請訓。無不以為是為諄諄。今諸重光竟若罔聞。
牧民之謂何。常鈞奏甚是。諸重光。王元位。
俱著革職。但僅令其罷官回籍。轉得置身事
外。不足以示儆戒。並著仍留該處差遣。辦理

災賑事務。効力贖罪。至此等辦災不力。玩視民瘼之員。李因培即應據實叅奏。何以俟至新撫常鈞始行查辦。該司道等亦所司何事。李因培昨已降旨交部議處。沈世楓業已降調。所有布政使赫昇額辰沅道富泰並著傳旨申飭。吏部議覆。巡視北城御史素爾訥奏稱。五城兵馬司吏目例管城外地方。但距署遙遠。呼應不靈。請將吏目衙署移建永定等七門安定等六門外。各城適中之地等語。查吏目微員。不足以資彈壓。應將各城副指揮移駐城外。其副指揮原管地方。改歸正指揮及吏目分轄。並改建副指揮衙署。從之。○大學士管雲貴總督楊應琚奏。補哈大頭目噶第牙翁次子麻哈喃率衆投附。又猛撒頭目喇鮮細利解獻莽匪十人。均應准其投順。並請賞給職銜。報聞。下部知之。○是月福建巡撫暫留湖南巡撫李因培奏蒙恩調任閩省。俟常鈞到日。交印詣闕請訓。得旨。不必來。

學問與政事無二總以化習氣為要勉之即如沈世楓之考語未免猶有未化者若不能改雖日面朕何益又奏因調任閩省瀕行時委員盤查長沙善化兩縣庫貯無虧得旨好汝於此等處原可信所謂三代以下惟恐不好名也湖南巡撫常鈞奏湖南瀕水州縣因本年五月雨水過多湖河漲溢成災臣自滇抵任後親行履勘並分委道府各員查得武陵桃源龍陽沅江益陽湘陰華容岳州衛沅陵瀘溪等十縣衛被災較重有應行撫卹及借給籽種之處現在分別辦理得旨覽奏俱悉妥協辦理毋使災黎失所○陝甘總督吳達善奏新疆各處屯防兵均由陝甘二省綠營兵內派往向例三年更換嗣改為五年一換而領兵官員年分未經奏改查官兵事同一例應請將官員換班亦改為五年一次得旨如所議行大學士管雲貴總督楊應琚奏滇省六月望前節次得有透雨糧價

平減民情歡悅得旨欣悅覽之卿去正所謂一路福星耳

大清高宗法天隆運至誠先覺體元立極敷文奮武孝慈神聖純皇帝實錄卷之七百六十五

大清高宗法天隆運至誠先覺體元立極敷文奮武孝慈神聖純皇帝實錄卷之七百六十六

監修總裁官經筵講官太子太傅文淵閣大學士文淵閣領侍衛內大臣稽察欽奉 上諭事件處管理
吏部理藩院事務正黃旗滿洲都統世襲騎都尉軍功加七級隨帶加二級軍功紀錄一次臣慶桂
總裁官經筵講官太子太傅文華殿大學士文淵閣領侍衛內大臣稽察欽奉 上諭事件處管理刑部戶部三庫事務
世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次
尋常紀錄十四次臣德瑛經筵講官太子少保工部尚書紀錄六次臣曹振鏞等奉

乾隆三十一年丙戌八月戊戌朔祭

大社

大稷遣誠親王允祕恭代行禮。諭據富僧阿等奏稱派出巡查厄魯特家口驍騎校齊庫爾特依領催圖壘並不照數帶領馬甲前往向馬甲四保尼堪等索銀。擅令伊等存留不往。齊庫爾特依復因圖壘宰羊細故恣行毆打。請將圖壘四保尼堪等革去領催馬甲。齊庫爾特依革職。與圖壘四保尼堪一併交刑部治罪等語。富僧阿此奏殊屬不成事體。齊

庫爾特依圖壘等。固應治罪。然其罪亦不過斤革差使。懲治完結而已。何至將多人紛紛解部。擾累驛站。齊庫爾特依。即著革去驍騎校圖壘。四保尼堪。俱著褫革。領催馬甲。重加懲治。嗣後此等事件。不必交部。即在本地完成。○河南巡撫阿思哈議奏。河南布政使佛德奏。稱河南通省社穀。截至乾隆三十年歲底。本息共存十五萬六千八百六十石有奇。細查各屬冊報。每屬所貯。自二三百石。至四萬一千餘石不等。甚至有顆粒無存者。多寡太覺懸殊。總緣勸捐之時。地方官辦理未能一律妥善。後或因歉年煮賑。及民欠被災豁免。未經陸續補捐。以致不敷。應請飭令地方官。乘此收成豐稔。勸諭紳士商民。毋拘多寡。令其量力捐輸。其每鄉慎選社長。立簿登記。聽捐戶自行交納。及按數遞加獎勵之處。悉照雍正二年原例遵行。不得稍有抑勒。及經由胥役。致滋擾累。其常漕等倉。如有空廩。儘

先借貯。如無暫寄寺院。俟息穀充裕。另行建倉收貯。并令各道府督率各屬。嗣後俟年歲豐稔。方可出示辦理。倘遇收成歉薄。不得一概勸捐。仍於每年年底。將各屬捐輸社穀數目具摺奏聞。均應如所請。得旨。如所議行。○

已亥
上奉

皇太后幸卷阿勝境。侍早晚膳。至乙巳。皆如之。賜扈從王公大臣及蒙古王公台吉等食。

至乙巳。皆如之。遣官祭

關帝廟。賑卹湖南湘陰。益陽。華容。武陵。桃源。龍陽。沅江。沅陵。瀘溪。辰溪。溆浦。安鄉。岳州等十三縣。衛本年水災飢民。庚子。遣官祭昭忠祠。諭軍機大臣等。今日召見章紳。詢其地方情形。據稱起程時。福州興化。漳州泉州四府。正在望雨。嗣後有無雨澤。未能深悉等語。前據蘇昌奏。該省六月以來。下游一帶雨澤稀少。現在設壇祈禱。如月內即得甘霖。

可望豐收。倘得雨過遲收。成難免稍歉。已於摺內批示。曾否得雨。速即奏來。至今未據奏到。著再傳諭蘇昌。將現在曾否得雨。並秋收有無妨礙。速即查明。據實具奏。以慰厯念。尋奏。七月初一日至初八等日。各屬先後連得大雨。未種高田。趕緊栽插。尚不失時。二十七日。及八月上中二旬。又連次得有透雨。本年晚收。可期豐稔。得旨。欣慰覽之。辛丑刑部議准。江蘇巡撫明德奏。稱。向例搶竊滿貫。及

三犯竊盜。贓至五十兩以上。擬絞各犯。秋審緩決三次者。俱改發烏魯木齊伊犁等處。給兵丁為奴。但此等人犯。情罪本不甚重。既經議緩。即可仰邀寬典。若必羈禁多年。始行改發。恐有年力漸衰。不任耕作之人。請嗣後秋審緩決一次之後。查明該犯年在五十歲以內者。即行僉妻改發。從之。壬寅湖廣提督李國柱奏。湖南常德岳州沅辰地方。本年被水較重。曾經節次奏明。茲復查得湖北嘉魚

沔陽廣濟黃梅石首監利等州縣濱臨江河。民間田廬亦有淹浸。臣已批飭各該營縣確查被水浸淹田畝。現在作何疏洩。曾否補種雜糧晚禾。星飛具報。得旨。倉猝被水之際。汝所辦頗妥。癸卯諭軍機大臣等。劉藻前在雲南總督任內。辦理莽匪一案。張皇失措。種種錯謬。繼復畏葸自戕。是伊係已經革職。應行治罪之員。將來旅櫬回籍。止可照常人歸葬。不得聽其家覲顏建立墓碑。書刻原任總

督及厯官事實。欺誑鄉愚。著將此傳諭。崔應階知之。又諭據李國柱奏。稱武陵縣低處村莊。積水未消。將來退出。亦難補種。其高處田畝。陸續涸出。隨即補種晚禾。不意六月初旬。因積雨水漲。又被淹浸。其退出處所。仍趕種晚禾。亦有候地乾補種雜糧者。乃摺中又稱。未經被水高田。現在收穫。市米漸多等語。所奏殊未明晰。是否該處高田中。原有未經被水之處。抑或另指他處而言。著傳諭常鈞

即將該處實在情形查明覆奏。至武陵今歲被水較重。著該撫查勘確實。有應行撫卹者。即速加意辦理。毋使災黎稍有失所。以紓廑念。尋奏武陵一縣四鄉共轄四十一村。本年五月被水漫淹者計三十村。其十一村地處高阜。原未被淹。至所淹之三十村。因地勢高低不同。內中稍高之處。水退迅速。旋經補種晚禾。至六月初旬。積雨水漲。仍復被浸。雖有陸續涸出。補種晚禾雜糧之處。究屬收成歉薄。統計武邑成災田畝不及十分之四。得旨。此奏明悉矣。大學士管雲貴總督楊應琚奏。御史周於禮所奏莽匪情形。臣遵旨逐細確查。如所稱莽匪起事約有六千餘人。半皆湖廣及滇地流民。以開礦失業。附之者不下千餘。近邊擺夷。脅從亦復不少。臣於整欠孟艮地方。屢飭各總兵詳細訪查。據稱從前曾於小猛養等處擒獲漢奸八人。並非賊中頭目。當即於軍前正法。其餘臨陣所見。並於已

戮賊屍。內遍加查看。悉係莽人。並無漢奸。今復在整欠一帶地方。遍加躡緝。實無厥棍漢奸一人。該御史所稱賊少民多之處。殊無確據。又稱滇省米價少昂。邊界民苗輕剽易動。安插不善。每易滋生事端。並官軍行處所調土練。恐撫之不得其道。或致入賊。臣查滇省米價。現已設法調劑。民苗安堵。至所調土練。內地皆有室家。復有土弁土目。管束前往。伊等此番進剿莽匪。頗知勉力感奮。勇往殺賊。並無他念。現在莽匪巢穴已平。大兵已撤。外域各蠻紛紛歸順。內地及江廣流民亦無須設法安撫。得旨。有旨諭部。諭曰。楊應琚查覆御史周於禮所奏莽匪情形。其言多未確實。應毋庸置議。一摺。此案莽匪緣起。原屬不成事體。皆因劉藻始而隱飾。繼又張皇。且妄信綠營捏飾積習。竟若地方將失。以致自戕。而周於禮輕信傳聞。遂有此奏。彼時即知其言未必可據。是以未經發鈔。但以該御史籍隸

滇省或不無所見。因將原摺鈔寄楊應琚。令逐細查辦。今莽匪巢穴悉皆勦平。官兵已徹外域。各夷聞風歸順。願入版圖。民夷無不安堵。地方官亦無辦理不善之事。可見該御史前此所言。原屬風聞臆怯。紙上談兵。真堪付之一笑耳。但周於禮以本地之人。言本地之事。謬妄若此。尤為惡習。周於禮著傳旨嚴行申飭。楊應琚摺并發。並將此通諭知之。○甲辰。遣官祭黑龍潭。

昭靈沛澤龍王之神玉泉山

惠濟慈佑龍王之神。○諭曰。李清時奏。東昌各州縣坡水盛漲。消掣不及。以致水漫隄堰。除將疎防各官另行查辦外。所有臣不能先事豫防之處。請交部議處等語。東昌一帶雨水過多。運河上游各處坡水分消不及。間有漫淹。李清時正在豫省。自不能分身兼顧。著從寬免其議處。○諭軍機大臣等。湖南辰州府知府員缺。已著在部候補之潘經馭補授。

該處現有賑務需員辦理。著該員即赴新任。不必赴行在請訓。將此傳諭留京辦事王大臣。轉諭該員知之。○戶部議覆。山東巡撫崔應階奏稱。向例蠲免漕糧之年。隨漕米石。仍舊徵收。但此項數目零星。覈之民間。每戶僅止升合勺撮。若按數催徵。小民以零米赴官完納。追呼仍所不免。所有東省今年應徵隨漕米石。應緩至明歲徵收。漕糧之時。隨正帶收。應如所請。其各省有漕地方。所徵漕項米石。有本色折色之分。情形不同。應令有漕各督撫。遇輪應蠲免之年。臨期奏請辦理。從之。○刑部等部會議。廣西小鎮安逆犯農付。接莫英。劉德輝等。造割授官。圖為不軌。分別首從定擬。得旨。農付。搖莫英。劉德輝。俱著凌遲處死。劉德輝已經斃命。仍著劉屍示衆。農付。蟒農。亞耀。農亞。蟒農。付團。張几良。李亞。冷黃。國順。黃付保。陸扶哉。譚亞章。何博陵。王付凜。黃几近。黃几貴。李几全。黃英。黃亞富。黃亞進。

黃付第。黃博陸。譚几揚。莫付周。潘亞沈。李亞
談。羅亞。蜡羅亞。當陸亞。岑。陸亞。章。譚几。孟。黃
几。辰。溫几里。陸扶桂。賴亞保。沈亞周。陸付委。
黃付明。陸付湃。陸付楊。陸付添。陸付也。性。陸
以而。王以匿。王布順。黃付尚。陸付副。游文光。
楊抱好。岑付良。黃文韜。黃付鸞。李世忠。汪德。
清。黃應宿。俱著即處斬。仍分別梟示。餘依議。
乙巳。諭軍機大臣等。據崔應階奏。聊城。博
平。運河漫溢。已於二十七日。一律堵築完固。
而另摺所奏。又有茌平。高唐。一帶。大路。水深
三四尺。一二尺不等之語。該省今年雨水稍
多。坡水漫溢。今隄口雖已堵築。而道路積潦
未消。恐田禾不免減損。該撫現在親往各處
查勘。其被水州縣。約有幾處。是否成災。並著
崔應階。速即查明。妥協辦理。並將目下晴雨
情形若何。一併覆奏。尋奏。東省被淹地方。共
計六十州縣。衛所。大率已屬成災。至現在天
氣。晴明之日居多。河水漸落。窪地積水。漸次

疏消。得旨。覽奏俱悉。○丙午。
太宗文皇帝忌辰。遣官祭
昭陵。○浙江巡撫熊學鵬奏。台州府屬臨海黃
巖等處。於七月初六日。猝被風潮。城垣倉獄
及民居田廬俱有淹沒損壞。臣親往該處查
勘。即將應行撫綏事宜。悉心辦理。得旨。詳悉。
查辦。應撫卹者。即行撫卹。○丁未。祭
先師孔子。遣大學士劉統勳行禮。○
上奉
皇太后幸卷阿勝境。侍早晚膳。○賜扈從王公
大臣。及蒙古王公台吉等食。○直隸總督方
觀承奏。居庸上關南門埦墊滲漏。雨零。券中
並券洞深黑。往往藏虎為患。八達嶺西門。牆
身坍塌。南首相連之牆。裏外坍塌。均應動帑
修築。又居庸上關北十四里之彈琴峽地方。
石道坑窪。一遇水發。行旅阻礙。應照南口山
根石道。依傍東山。添漫石道一段。得旨。著照
所請行。○戊申。

太祖高皇帝忌辰遣官祭

福陵○以故扎薩克台吉喇布坦孫索諾木多

爾濟襲職○已酉

上奉

皇太后章卷阿勝境侍早晚膳至壬子皆如之

○賜扈從王公大臣及蒙古王公台吉等宴

至壬子皆如之○吏部等部議准○前署陝甘

總督刑部尚書舒赫德疏稱巴里坤地方土

田日闢民戶日繁○僅設同知辦理糧餉○照料

難周請裁事簡之平番縣鎮羌巡檢改為巴

里坤巡檢從之○兵部議覆湖北巡撫鄂寧

疏稱安陸府觀音店等處前已移設驛站應

改建馬號棚廠又黃州府長山鋪驛站距武

昌府四十五里距華容站七十五里遠近不

齊將長山鋪移設土橋均應如所請從之○

庚戌

萬壽節遣官祭

太廟後殿○遣官祭

福陵

昭陵

昭西陵

孝陵

孝東陵

景陵

泰陵遣官祭

孝賢皇后陵遣官祭

顯佑宮

東嶽廟

城隍廟○

上詣

皇太后行宮行禮○御澹泊敬誠殿扈從王公

大臣官員及蒙古王公台吉等行慶賀禮○

辛亥諭軍機大臣等福建漳州等屬夏間雨

澤短少前經蘇昌奏明昨章紳陞見來此亦

奏稱該處正在望雨乃今日任澍所奏則稱

漳州等處夏末以來雨水及時雜糧等項俱

皆暢茂。西成可望豐稔。並未將短雨之處據實入告。殊屬非是。任澍身任總兵。既奏地方晴雨歲收之事。理應將實在情形奏聞。若徒事捏辭粉飾。又安用此具文塞責耶。任澍著傳旨申飭。○閩浙總督蘇昌奏。臺灣淡水廳所屬之鶯殼莊民人被兇番焚殺多人。臣飭委臬司余文儀由廈門渡臺查得此案起釁緣由。因淡水之三湖一帶。從前原係界內民田。嗣因遭番人肆虐。劃出界外。小民每生覬覦。不肯廢棄。時往偷種。本年三月間。鶯殼莊民有耕牛越出界外。前往尋覓。未獲。猝遇生番多人。追趕入莊。放火焚寮。戕殺多命。又鶯殼莊上年冬間。有生番出界趕鹿。被莊民射死。以致生番挾仇。乘隙焚殺。臣現札飭余文儀密調就近熟番查探路徑。相機勦辦。得旨覽奏俱悉。○賜江西龍虎山上清宮御書扁曰。真靈福地。○調陝西提督李時升為雲南提督。以甘肅西寧鎮總兵汪騰龍為陝

西提督。○壬子諭曰。雲南提督李勲歷任提鎮宣力有年。今春因查辦莽匪一事調任滇省。該提到滇後親赴孟良等處督率追勦。不辭勞勩。辦理頗合機宜。朕特念其年逾七旬。降旨令其回駐普洱辦事。茲據楊應琚奏李勲回至中途病故。殊堪軫惜。李勲著加恩追贈太子太保。加祭一壇。所有應得卹典仍著該部察例具奏。○諭軍機大臣等。據楊應琚奏提督李勲自孟良回至普洱。於七月初十日行至黑龍潭地方病故等語。李勲於查辦莽匪一事頗能出力。今遽溘逝。甚屬可惜。所有卹贈典禮業經有旨諭部。遺缺亦令李時升調補矣。李勲生有幾子。年歲若干。有無出仕之人。並現在是否隨任滇省。著傳諭楊應琚即行查明具奏。○又諭雲南提督員缺已有旨著李時升調補。所遺員缺著汪騰龍補授矣。雲南提督員缺緊要。李時升接到諭旨即速馳驛前赴新任。其陝西提督事務汪騰

龍未到任之前。著明山暫行署理。將此一併傳諭知之。○大學士管雲貴總督楊應琚奏。整欠所屬地方遼濶。應添設土目以資料理。臣與提臣李勲。選派便委土把總楊虎。石靖。及整欠舊頭目召教。酌給土千把職銜。分管各猛緊要地方。其原酌留官兵全撤。得旨嘉獎。

平定縣志卷六

十六

大清高宗法天隆運至誠先覺體元立極敷文奮武孝慈神聖純皇帝實錄卷之七百六十六

大清高宗法天隆運至誠先覺體元立極敷文奮武孝慈神聖純皇帝實錄卷之七百六十七

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事務處管理
吏部理藩院事務正黃旗滿洲都統世襲騎都尉軍功加七級隨帶加二級奉常加二級軍功紀錄一次直隸
總督官經筵講官太子太傅文華殿大學士文淵閣領閣事稽察欽奉 上諭事務處管理刑部戶部三庫事務
世襲騎都尉軍功加十九級隨帶加二級又加二級直隸總督內大臣戶部尚書鑲藍旗滿洲都統軍功紀錄五次
奉常紀錄十四次直隸總督經筵講官太子少保工部尚書紀錄六次直隸總督等奉

敕修

乾隆三十一年丙戌八月癸丑

上詣

皇太后行宮問安。自避暑山莊啟鑾幸木蘭。諭曰。莊有恭於題叅段成功一案。徇庇欺朦。獲譴實由自取。但此等積習。外省督撫均所難免。莊有恭經此番懲創。諒應知所儆惕。著加恩免罪。補授福建巡撫。以觀後效。○又諭。近因偷砍圍場樹木。朕以扎什泰未免有心偏袒。是以摘去翎頂。今此案業經審明。伊尚無情弊。且此事翼長拏獲盜犯。在伊亦有

勞績。扎什泰世職。蒙古奏事侍衛。著加恩賞還。諭軍機大臣等。前以莊有恭題參段成功一案。有心徇庇。豫為開脫地步。不得。不明示懲儆。是以將伊犁職治罪。今念其事尚屬外省相沿陋習。各督撫中似此者。諒亦不止。莊有恭一人。且所犯亦不至若和其衷之甚。特加恩免罪。仍降旨補授福建巡撫。該省撫篆出缺已久。李因培到閩未幾。今復離任。海疆重地。未便懸缺久待。朕現已啟鑒。辛木蘭

莊有恭。難以進哨。著留京辦事。王大臣傳諭。莊有恭。奉到諭旨。即速前赴新任。不必至行在請訓。即謝恩。原可繕摺具奏也。○以兩廣督標中軍副將趙興宗。為甘肅西寧鎮總兵。○賑卹甘肅紅水縣丞。沙泥州判。鹽茶廳本年旱災飢民。緩皋蘭金縣。會寧。固原。鹽茶廳。武威。平番。中衛。花馬池州。同碾伯等十一廳州縣額賦。並貸給籽糧。○是日。駐蹕中關行宮。○甲寅。諭。據明瑞奏稱。伊犁今歲田禾。被

蝗微傷。不能多積穀石。請將由西安遣駐兵丁。明年暫行停止。俟後年再行遣來。如蒙俞允。請降旨。西安將軍等。令其停止辦理車輛等項等語。西安兵丁。移駐伊犁。非緊急之事。今年伊犁田禾。既被蝗傷。穀石不多。西安移駐兵丁。不但明歲不必遣往。即多停數歲。俟積穀充盈之時。再行移駐。亦無不可。著傳諭西安將軍。巡撫。西安兵丁。明年不必移駐。俟明瑞於應遣之時。具奏。候朕諭旨。再行遣往。

所有車輛等項。均著停止辦理。○是日。駐蹕波羅河屯行宮。○乙卯。諭。軍機大臣等。聞內地農民。皆祀劉猛將軍。及八蜡神。伊犁雖係邊徼。其耕種亦與內地無異。理宜仿倣內地習俗。著傳諭明瑞等。令其建祠設位供奉。亦不必特作一事聲張辦理。○是日。駐蹕濟爾哈朗圖行宮。○丙辰。

上遣侍衛雲保。赴避暑山莊。皇太后行宮問安。○軍機大臣等。議覆直隸總

督方觀承奏稱永定河南北兩岸河灘內村莊共十八處。俱於乾隆十八年二月。遵旨指給隄外村基。令其全數搬移。立碑兩岸。又河道經由之南埝內。大小二十八村。亦經勸諭遷移。給領房價。內十一村全行遷去。十七村遷去六百三十二戶。其餘不願遷各戶。停止給價。亦不許其添建房屋。所有地畝。蒙恩減賦。仍聽各戶守業。又將北埝至范甕口四村。及鳳河十六村。一併查明立碑。豫為限制在

案。今查南埝距河已遠。並相近北埝。水未經由各村。地畝俱可耕種。從前遷去人戶。有回本處搭蓋草房居住。又節據東安。武清。霸州。永清。天津。等州縣屬。三十四村民人。以現今河道改由北埝。遙埝一帶。所有涸出地畝。曾經減糧守業。無如隔遠。不便墾種。懇請暫回原處耕業。房間停其拆毀。其未遷各戶屋旁。暫添草土房居住。所有從前減糧地畝。既可照舊耕種。其錢糧仍依舊額徵收。並減糧存

退旗地一併報部等語。均應如所請。惟查從前遷去各戶。俱經給領房價。今該村民等。既請仍回原處耕種。完糧守業。則原領房價。自應按數繳納歸款。應令該督查明辦理。仍確覈碑載戶口。實力稽查。不得任他處村民。濫行搭蓋窩鋪房間。日漸增益。致妨原定限制。從之。是日。駐蹕阿穆呼朗圖行宮。○丁巳秋分夕。

月於西郊。遣恒親王弘旺恭代行禮。

上行圍。○兵部議覆。湖南布政使赫昇額奏稱。學政回京調任。應停給夫馬船隻。查學政赴任回京。及調任他省。學政原係京官奉使。與職任地方官員。本有區別。應照舊例。仍給夫馬船隻。惟陞調別省他職。不得徑自馳驛從之。是日。駐蹕布都爾昂阿大營。○戊午。上遣侍衛永瑞。赴避暑山莊。

皇太后行宮問安。行圍。是日。駐蹕齊爾伯庫昂阿大營。至庚申。皆如之。已未。福建巡

撫莊有恭奏。祖籍本係福建。遷粵雖久。祖塋尚有在閩者。今蒙恩補授福建巡撫。應否迴避。得旨。不必迴避。力去積習。○庚申。

世宗憲皇帝忌辰。遣官祭。

泰陵。○諭據工部議覆。御史鄭廷楫條奏。扣留工程銀兩。十分之一二。以備覈減。追賠一摺。所議未為妥協。各省修建工程。既經覈實確估。自應照數支給。以便辦料興工。承修之員。如果潔已奉公。帑歸實用。自不致有駁減追

賠之事。倘不肖官員。浮冒侵帑。貽誤工程。即當照律治罪。著落追賠。若慮日後賠繳無著。於估工時。豫為覈減起見。酌留以備扣抵。殊非政體。且實估實銷者。既不應責其先期墊用。而侵冒之員。轉得因此藉口。甚至以不堪物料搪塞。或短發價值。累民種種流弊。皆所不免。所有該御史原奏。應毋庸議。○又諭據李宏奏。八月初八日以後。黃水驟長。已開放峯山四閘。宣洩盛漲。所有銅沛廳屬之韓家

堂地方。因溜勢汕刷大隄。於十八日漫溢。過水六十餘丈。現在集料搶護。飛札督臣高晉。來工商辦。并請將伊嚴加治罪。一摺。此次黃水長發。較往年稍大。以致漫溢。隄工搶築。最為緊要。高晉現赴徐州。著即會同李宏。督率地方河務各員。上緊堵築。務須實力妥辦。剋期竣工。其潰溢處所民戶田廬。有無傷損成災。並著該督等。即速查明。妥協經理。照例撫卹。毋致稍有失所。至韓家堂原係無工之處。且因河水盛漲。漫隄與尋常疎防有間。李宏著從寬免其議處。該部遵諭速行。○諭軍機大臣等。據李宏奏。韓家堂地方。於八月十八日。黃水盛漲。漫口六十餘丈等語。已降旨令該督等速行堵築矣。高晉久任南河。工程素所熟悉。且現任總督。於地方官應行集夫購料諸事。亦無呼應不靈之處。無須特派大臣前往督辦。高晉此時諒已馳赴徐州。著即會同李宏。董率各員。上緊堵築。務期剋日合龍。

以慰廑念。至現在漫口。或係南岸。或係北岸。及是否奪溜。河水趨歸何處。其漫口地方。居民人口有無傷損。田禾是否成熟。李宏摺內並未聲明。著傳諭高晉。逐細查明。妥協經理。仍將各情形。即行繪圖具摺覆奏。並將此傳諭李宏知之。尋奏。韓家堂漫口。在銅沛廳屬黃河南岸。水漫後。大溜並未全奪。其趨入漫口之水。由陵子孟山等湖。匯注洪澤湖。水勢平漫。附近居民人口。尚未傷損。其漫水經由之處。未免被淹。屋舍間有倒塌。現經江蘇撫臣明德。親往徐屬各縣。查勘撫卹。其宿州靈璧虹縣。知會安徽撫臣馮鈐。查辦得旨。佇俟合龍之信。妥速為之。○辛酉。

上行圍。○遣官祭賢良祠。○諭據阿桂等奏。稱雅爾地方。向來雪大。而牧場遙遠。近城所有地畝。不敷五百兵丁耕種。悉心查勘。得塔爾巴哈台山陽。鄂畢特之舊游牧。楚呼楚地方。田土膏腴。水亦充足。牧馬之處。既不甚遠。無庸動移卡座。地方形勢亦頗佳勝。請將雅爾城。移於楚呼楚等語。雅爾地方雪大。牧場遙遠。而附近可耕之地。又屬無多。今阿桂等。勘得楚呼楚地方。田腴水足。牧場近便。地方形勢亦佳。應移城於楚呼楚。至從前立城於雅爾。因大臣等甫經到彼。詢問厄魯特等。聽從其言。酌定建城。尚非甚謬。朕所以不即將伊等治罪。然竟致移城。朕即不加譴責。伊等於心何安。理宜請罪具奏。何得隱忍。不以為事。著傳諭明瑞。阿桂等。查從前究係何人定議建城於雅爾之處。即明白陳奏。○江蘇巡撫明德奏。銅山縣黃河漫溢。居民田廬被淹。臣親身督率。分頭查勘。搭蓋棚廠。散給口糧。照例賑卹。得旨。好。妥速辦理。以救災民。○是日。駐蹕永安。拜昂阿大營。○壬戌。

上行圍。○戶部議准。直隸總督方觀承奏。稱。採辦鼓鑄銅鉛。酌定限期。洋船銅觔進口。令江蘇巡撫起限。統計蘇州至保定交局。請限三

個月十八日。委辦鉛錫。自該省至漢口。及運回保定。共限七個月。二十八日。如無故逾限一月以上。將領解官革職。戴罪管解。完日開復。從之。○是日。駐蹕鄂爾吉庫哈達大營。○癸亥。

上行圍。○諭各省副都統俱與將軍都統一處駐劄辦事。其別城駐劄之副都統。雖隸將軍統轄。一切事務。係自行承辦。惟察哈爾左右翼二副都統。既不與都統一處駐劄辦事。而其下復有總管等員辦理。呈報伊等。不過轉達都統。仍須都統裁定。徒有副都統之名。而無承辦事件。轉非設立副都統本意。不若裁汰之為愈。著將察哈爾左右翼二副都統裁汰。止留一缺。駐劄張家口。與都統一同辦事。一切應報應行事件。著八旗總管等俱呈報都統副都統辦理。在都統既得一協辦之人。遇有巡查差務。印務亦可有人署理。集福即著調補察哈爾八旗副都統。駐劄張家口。與

都統一同辦事。○江西巡撫吳紹詩奏。江西南昌。南康。九江。三府所屬各縣。均濱臨江湖。易被水災。本年六七月間。雨水過多。山水陡發。星子。德化。德安。三縣民居田廬。多有漂沒。衝損。南昌。新建。進賢。建昌。四縣圩隄。亦有損壞。臣現督率屬員。照例勘辦。得旨。妥加撫卹可也。○調察哈爾副都統常青。為歸化城副都統。○豁除江蘇靖江縣。乾隆二十九。三十年分。新坍田五百六十畝。有奇額賦。○是日。駐蹕巴顏圖庫木大營。○甲子。

上行圍。○是日。駐蹕永安湃大營。○乙丑。上行圍。○諭軍機大臣等。據高晉等奏。現在趕辦徐州韓家堂漫口。剋期堵築。全藉料物。但徐屬出產不敷應用。現已飛咨山東。河南兩省。協濟等語。著傳諭崔應階。阿思哈。即照該督等來咨。東省辦解秫稻一百五十萬束。豫省辦解秫稻三百五十萬束。蘇一百六十萬。勦。剋期由水路運赴工次。以濟急需。該撫等

務須上緊督率購辦。或即以在工物料。星夜運交。徐行購補足額。以備來歲之用。亦無不可。總期韓家堂工及早堵築。毋得稍有遲誤。吏部等部議准。兩廣總督楊廷璋奏稱。鎮安府屬小鎮安土司。地處極邊。壤接交趾。與滇省毗連。實為西粵要地。原設土司巡檢。職分卑微。難以控制。現在應襲土巡檢岑繩武。幼穉無知。失察土目舞弊。應請將岑繩武革去世職。家屬徙居桂林。其小鎮安土司改為流官。將歸順州湖潤寨州同一缺。改設鎮安府通判。駐劄小鎮安。令其整飭化導。其湖潤寨地方。將南寧府宣化縣那南寨巡檢移駐。那南地方事務。歸併金城巡檢管理。并改鑄關防印記。從之。是日。駐蹕安巴究和羅大營。丙寅。

稍遲。請分派繁缺州縣。隨同幫辦。錢琦又請於一年之內。不論何缺。先行委署一週。甄別題補各等語。紛紛陳奏。均屬不諳事理。此等分發舉人。原因念其需次較遲。漸至壅滯。是以特降諭旨。揀選分發。廣為疏通。俾得及時効用。復令部臣議借養廉以資路費。所以格外加恩者。已屬極優。伊等領咨到省。後各督撫祇當就其人才。酌量試看。差遣委用。至其得缺遲早。日用瑣屑。又豈能為之總總過計。國家用人行政。自有大綱。若必每事為之籌畫。無論入海算沙。勢有不給。亦復成何政體乎。且此等揀發人員。既得早登仕版。若復得隴望蜀。孳孳計較。必思盡占便宜。亦非敬事後食之義也。且令伊等自思。設非加恩揀發。寒窗株守。筮仕無期。彼此相較。其為榮悴。更復何如耶。在該舉人等。未免過於熱中。而該督撫等。又復曲為無厭之請。豈朕特加之曠典。於伊等轉多委曲。亦可謂不曉事矣。各省

試用人員原有月給公費者。即間有向無成例之省分。該督撫自行通融籌辦。亦無不可。又何必如阿思哈之奏。另行定議乎。其錢琦所奏。委署試看一年。再為甄別題補之處。該督撫等原當如此辦理。亦可無庸置議。至常鈞請分派繁缺州縣幫辦一事。是適蹈一缺兩官之弊。尤為非體。所奏均不可行。但阿思哈常鈞等既有此奏。恐各省大吏中所見亦有類此者。殊非善體朕加惠寒畯之本意。著將此傳諭各督撫知之。○諭軍機大臣等。據表曰。修等奏大興宛平二縣八月糧價。各有增長。詢之經紀。僉稱目下商販甚多。是以市價稍增。當此連歲豐收。糧食充牣。早晚長落不定。惟有聽其自然。價將不禁而自減。若官為示禁。則恐轉致居奇等語。京畿連歲豐稔。本年收成。又復有八九分。市集價值不應轉貴於前。看來大興兩縣向來所報糧價。率皆以多報少。即如夏月戶部奏豆價。其明驗也。

此次或因表曰。修欲覈實奏報。是以轉覺加增。則此時所報貴價。未必非即從前實價。抑或實有奸商射利。因新糧尚未登場。故爾居奇昂價。或因山東地方歲收稍歉。販運者多。是以糧價稍長。雖不必官為示禁。致吏胥輩藉端滋擾。然亦不可不察其致貴之由。著傳諭舒赫德方觀承密行察訪。據實奏聞。并著表曰。修將前後糧價虛實情形具摺覆奏。尋方觀承奏。雄縣白溝河霸州蘇家橋等處。有河間天津商民。因與德州臨清一水可通。多在水次收買粟米。轉販射利。然於鄰省歉地有益。未便概行禁阻。且此時新糧未盡登場。民間趕種秋麥。收攢秸葉。正在忙時。田多糧裕之家。又不似小戶急圖售價。故市集米糧不免時多時少。價亦時貴時賤。報聞。○是日駐蹕庫爾圖察罕大營。○丁卯上行圍。○諭曰。鄂博什前在軍營甚屬奮勉。亦係舊人。著加恩賞給副都統職銜。○是日駐

蹕鄂倫索和圖大營。○是月。浙江黃巖鎮總兵黃士俊奏。台州黃巖縣城。猝被風潮情形。得旨。地方官辦賑妥否。○湖廣總督定長。湖北巡撫鄂寧奏。湖北省羅田縣。在逃首逆馬朝柱。及要犯熊得勝等。節奉諭旨。嚴飭查拏。經各省刊刻年貌。懸賞購緝。並於蘄州。羅田。二屬。選撥認識逆黨之人。作為眼目。議給工食盤費。分派本省。及移送湖南。廣西。雲南。貴州。四省。隨同兵役。徧處根緝。惟查此種人等。從前選撥。多係虛應故事。不免藉端滋擾。且有原未認識逆黨面貌。濫行充數之人。是以十餘年來。要犯未經弋獲。而若輩恃有官符。率多生事訛詐。否則怠惰偷安。實屬有名無實。應請嗣後訪緝逆犯。專責成地方文武。協力嚴拏。其原派本省及外省。現在眼目七十四名。一體撤回。得旨。所奏甚是。陝甘總督吳達善奏。接奉申飭面奏提督李勲。年力不實。諭旨。實深悚愧。努力改悔。並嚴禁首縣承

辦供應。約束西安駐防子弟。毋得生事。得旨。若再不知改。亦惟汝自知耳。廣西巡撫宋邦綏奏。臣到任後。地方事宜。悉心整頓。總以首嚴吏治。次儆奸徒。不敢少存姑息。少近務名。以冀無負委任。得旨。所言頗得領要。實力行之可也。

大清高宗法天隆運至誠先覺體元立極敷文奮武孝慈神聖純皇帝實錄卷之七百六十七

大清高宗法天隆運至誠先覺體元立極敷文奮武孝慈神聖純皇帝實錄卷之七百六十八

駐修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶隆

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部侍郎兼署

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德珠經筵講官太子少保工部尚書紀錄六次臣曹振鏞等奉

教修

乾隆三十一年丙戌九月戊辰朔

上行圍○浙江巡撫熊學鵬疏報乾隆三十年

象山江山二縣開墾田地九頃六十九畝有

奇上虞蘭谿樂清三縣開墾額外田地山蕩

一十五頃八十五畝有奇○是日駐蹕額勒

蘇錫納大營○已巳

上行圍○以少詹事汪廷璵為詹事○是日駐

蹕安巴究和羅昂阿大營翼日如之○庚午

上行圍○辛未

上行圍○賑卹浙江臨海黃巖太平三縣杜瀆

黃巖三場本年水災飢民電戶並蠲新舊額賦是日駐蹕薩岱哈達大營士申

上行圍○諭據李清時等奏博平縣校隄集漫

工現經該道姚立德督率府廳縣汛各官搶

築完竣所用錢糧自行分辦照例將疎防各

員查奏等因一摺運河隄工遇有衝決疎防

各員例應處分但念該處隄工已歷多年復

因坡水過大致有漫溢既經該道府廳縣等

迅速搶築剋期竣工所有應參疎防各員俱

著加恩免其叅處○禮部議覆御史鄭廷楫

奏稱捐職人員毋許擅用執事等語臣等酌

議此等人員平居鄉里自不得濫用儀從若

遇有婚喪亦不便與齊民相等應照條例內

所定器數多寡各按品級置用仍不得冒濫

僭越違者各照違制例治罪從之○河東河

道總督李清時奏臣自豫回東勘查前次水

勢盛漲各廳搶護之工雖保守平穩然撞擊

汕砂多有殘缺坍塌現飭所屬廳汛分投收

拾務令如式完整。又捕河廳屬有三空橋一座。建自前明。係濟水會汶。歸入大清河正路。但橋底高於運河底一丈五寸。宣洩不暢。應將三空橋落低三尺。再將磯心酌量展寬。俾汶水未會沙趙二河之先。多一去路。得旨好。如所議行。○又奏。豫東黃河兩岸大隄地勢高卑。全非一律。必須悉心區別。將長水時隄高水面尺寸。查明登記。將來估修土工。以此權衡。庶無舛誤。又黃河兩岸隄內民田較之

隄外河灘地畝。甚為卑窪。遇有險工。難於退讓。不得不與水爭尺寸之地。查上南河廳屬榮澤汛十一堡。及胡家屯等處。鑲修埽工。由來已久。近來河勢南趨。頗見緊要。臣來往勘工。於隄內民田逐細測量。內外高下。不甚懸殊。應於大隄以內。距河二三百丈。高阜處所。另築月隄一道。以為重障。所需夫工。即在明年歲搶修內通融辦理。俟月隄築成之後。該處埽工。即可察看情形。逐漸停修。得旨。如所

議行。命兵部左侍郎蔣樞。知武舉。禮部左侍郎劉星煒。為武會試正考官。侍講學士李中簡。為副考官。豁免甘肅靖遠會寧山丹武威永昌鎮番古浪平番中衛九縣並紅水東樂二縣丞。乾隆三十年分旱災額賦。是日。駐蹕烏蘭哈達大營。癸酉。

上行圍。是日。駐蹕坡賚昂阿大營。甲戌。上行圍。軍機大臣等議覆。兩廣總督楊廷璋奏稱。西洋人在京効力者。其鄉信往來。向係

粵門夷目。或在省行商。雇人代為傳遞。嗣經奏准嚴禁。行商腳夫等。私行代遞。遇有公務。飭令夷目呈明海防同知。轉詳督臣。分別咨奏。原未嘗阻其轉達。但自定例以來。閱今六七年。未見有西洋人呈請轉達奏咨之事。此係該夷等未能明白例義。中懷疑畏。自行隔越。應請嗣後西洋人來廣。遇有願進土物。及習天文醫科丹青鐘表等技。情願赴京効力者。在粵門。則令其告知夷目。呈明海防同知。

在省行則令其告知行商呈明南海縣隨時詳報代為具奏請旨護送進京等語應如所請俾得共効惓惓至該夷人等通達鄉信之處詢問傳作霖劉松齡等據稱向來西洋人所有書信在廣東畧門者俱由提塘遞至京城交與欽天監收折其從京城寄至廣東者亦由提塘遞送等語查該夷人等從前往來書信俱經提塘轉遞已歷有年並未見有違礙之處似應循照舊例交與提塘寄遞並令其在廣省者呈報海防同知及南海縣查收將原封交與該省提塘遞至京城送欽天監轉付本人其在京夷人亦令其將所寄書信交與提塘遞至廣省仍由同知知縣查收將原封轉寄行商夷目該同知知縣亦隨時詳報總督衙門以備查覈從之陝甘總督吳達善奏承准廷議令於陝西內地操演兵內多派一二千名往烏魯木齊等處屯種並烏魯木齊有無堪耕地畝陝西甘肅派兵前往

有無多費錢糧令悉心籌議查上年十月間烏魯木齊調撥屯兵一千名經調任督臣楊應琚於甘州提標涼州肅州二鎮并安西靖逆三營派撥前往今次續調屯兵六百名應就近於西寧鎮酌派兵二百四十名寧夏固原二鎮各一百八十名並令各該鎮選年力精壯者前往仍按兵數遴委遊擊一員沿途總統稽查又守備一千總二把總三分領彈壓一切軍裝等項照例豫為妥備酌視營分之遠近定於仲冬分別起程俱在肅州彙齊分作二起交遊擊管領出口務令依期抵屯至所需農具查哈密庫貯甚裕已咨詢烏魯木齊大臣彼處有無存剩如有不敷即於屯兵過哈密時帶往其所派游守各員到彼應否仍需管轄及烏魯木齊等處可種地畝需兵若干派兵前往如何不致糜費容臣同新疆經費局司道並咨商溫福另行籌辦報聞是日駐蹕布敦昂阿大營 乙亥

上遣侍衛扎拉豐阿赴避暑山莊

皇太后行宮問安 行圍 吏部議准兩江總督高晉等奏稱蘇州府社壇地方人烟稠密五方雜處向令蘇州府經歷管理不足以資彈壓應請歸蘇州府督糧水利同知就近管轄從之○四川總督阿爾泰等奏提臣岳鍾璜於八月初七日回川臣等悉心酌議此次會同查辦夷務以巡邊為名先期傳示各土司知悉臣等擬於八月十三日自省起程由維州出口巡歷土司處所確查情形嚴切訓飭駕馭如該土司果能畏罪懇求與各土司退還碉卡各安住牧同聽約束自當就便完結倘仍狐疑不決據險防禦臣等亦即查覈情形相機酌辦報聞○江蘇巡撫明德疏報無錫縣乾隆三十年分開墾山地二頃有奇○豁免直隸宛平涿州香河灤州昌黎清苑雄縣高陽交河景州東光南皮鹽山豐潤玉田冀州武邑等十七州縣乾隆二十三。四。五。

六年分帶徵未完額賦 豁除浙江歸安烏程海寧三縣坍荒地九頃十畝有奇額賦是日駐蹕塔哩雅圖昂阿大營 丙子賜蒙古王公台吉兵丁等食 諭曰教漢公羅布藏錫拉布之妻格格現在患病著太醫院即派醫官一員馳驛前往診視 又諭據永貴等奏稱阿克蘇烏什去年自內地調取銀七萬兩除各項需用外現止存銀二萬餘兩請令吳達善自內地撥銀五萬兩解往彼處現存銀兩計至歲底支放官兵鹽菜等項稍有不敷內地撥解一時不能即到已行文薩翰等先於哈密撥解二萬兩俟內地所解之項路過哈密時照數扣留餘銀仍令解往烏什等語著照永貴等所奏令吳達善撥銀五萬兩解往烏什彼處現存銀兩不敷需用內地一時不能解到令薩翰等於哈密庫貯內先撥銀二萬兩解往烏什俟吳達善解項經過哈密時照數扣留餘銀解往烏什○大學

士管雲貴總督楊應琚奏接奉諭旨籌辦緬匪事宜。臣斷不敢冒昧喜功。惟因緬匪屢次侵擾土司邊境。若不乘時辦理。恐土境不得常寧。萬里邊疆之外。須永圖輯寧之計。今緬甸既人心渙散。木邦情願歸順。是機有可乘。前已密選土司所屬妥幹夷民潛往彼處。將地方廣狹道路險易。暗行詳細繪圖。到日進呈御覽。至豫備調撥事宜。現在密為佈置。不令稍有張皇。臣擬於九月內赴迤西查閱永順等鎮官兵。即駐永昌督辦此事。臣仰膺重寄。固不敢坐失事機。亦不敢輕舉妄動。得旨嘉獎。是日駐蹕張三營行宮。丁丑諭向來奉天糧石充裕。准令直隸山東毗連省分就近販運。本年夏間經將軍含圖肯奏。該處雨水稀少。或恐市集昂貴。曾諭令該督撫將商販暫行停止。今奉天續經普得雨澤。仍可一律豐收。將來糧食自必充足。且現在東省歲收稍歉。直隸又因隣省運販糧價亦未免

稍增。商人等如有願往奉省糴運者。尚於事理無礙。設該處米價或昂。往來販買必無餘利。勢將不禁自止。若竟概行示禁。恐不肖官吏轉得藉端紛擾。且射利商人保無私行偷販。更易滋弊。至少米處所民食稍有不敷。方且加恩賑濟。廣為籌畫。若得該商等自為販運流通。俾資接濟於閭閻食用。尤為有益。所有直隸山東二省商民販買奉天米石之處。仍著無庸禁止。又諭據高晉等奏。署上元知縣屠士相。於興化縣地方。拏獲儀徵縣盜案首犯王其生。夥犯張士龍等八人。洵屬急公向上之員。請送部引見等語。屠士相奉文緝拏盜犯。即能四路嚴捕。於隔府所屬連獲多人。頗屬能事。著該督等出具考語。送部引見。又諭據綽克托等奏。稱德福范宜忠俱抵喀什噶爾。令德福接常岳管理喀什噶爾領隊事務。范宜忠往英吉沙爾更換台布等語。喀什噶爾現有綽克托等辦事。領隊亦

無事可辦。英吉沙爾有應承辦之事。前雖派德福前往更換常岳。范宜忠更換台布。但德福較范宜忠更歷較多。德福著即往英吉沙爾辦事。范宜忠著調回喀什噶爾。與綽克托等一處駐劄。在領隊上行走。諭軍機大臣等據方觀承覆奏。大宛二縣糧價增昂情形。摺內稱。訪有河間天津商民。因與德州臨清一水可通。多在水次收買。轉販射利。然於鄰省歉地民食有裨。未便概行禁止。惟各處奸牙。聞此風聲。並非水次。曾無外販。亦復故昂其價。而附京附省為尤甚等語。糧價隨時低昂。雖物情所常有。但此等奸牙囤戶。風聞隣省需米。借端昂價。冀以居奇牟利。實屬可惡。著傳諭舒赫德方觀承等。密速查訪。如有似此奸牙積蠹。擇其尤甚者。立即查拏嚴究。懲治一二。以儆駢儉。而裕民食。但不可虛張聲勢。紛紛出示諭禁。徒致滋擾。轉於事無裨。並將此諭令知之。吏部議准。廣東布政使胡

文伯奏稱。定例佐貳等官。擅准詞狀。降一級調用。正印官不行詳查。罰俸一年。但例內未將有無致斃人命。分晰註明。而印官查出揭報。亦得免議。往往佐貳官濫差拘訊。致釀人命。而印官以一揭了事。平日漫無稽查。請嗣後凡遇佐雜等官。擅受而未致斃人命。及雖斃命而實係例應緝拏之犯。畏罪倉卒自戕。並無差役需索者。仍照舊例辦理。其本非佐雜應理之事。而因擅受致釀人命。除佐雜立即咨革。將該管印官。照防範不嚴例。降一級留任。不得以補揭免議。如印官規避處分。匿不具報。即照諱命例革職。至印官濫批致斃人命。向亦未有明文。請照溺職例革職。如州縣畏懼處分。隱匿濫批情節。該管府州不查出揭。參照徇庇例。降三級調用。并將不詳報題。參之司道督撫。議以降一級留任從之。予故雲南提督李勲祭葬如例。謚壯毅。是日駐蹕波羅河屯行宮。戊寅諭軍機大臣

等四川建昌鎮總兵路我。按察使石禮嘉來京陛見。並於七月中旬自川起程。該督於八月初四日始具摺奏聞。至九月初八日方據奏到。該總兵等即於初十日已抵行在。距接到奏摺之時僅隔兩日。此等奏摺雖係尋常事件。但伊等起程已逾半月。始行入告。未免過於遲緩。而齎摺人員在途一月有餘。亦太稽延時日。著將此傳諭阿爾泰知之。河南巡撫阿思哈奏江南徐州韓家堂黃河漫口急須堵築。豫省應協辦稽料。臣因漫口緊急需料數多。一時採辦未免遲延。先將豫省各工用存舊料盡數撥運。次令委員購買新料續運。以濟急需。計南北兩岸各廳存料查明酌撥。均可得五六百萬觔。已於九月初三日據各運員稟報起運。陸續開行。臣與兩司酌量親詣稽察。儼催得旨。好覽奏實慰朕懷。是日駐蹕中關行宮。已卯上詣

皇太后行宮問安。遣官祭歷代帝王廟。遣官祭都城隍之神。吏部議准兩江總督高晉等奏稱江蘇清河縣地大事繁。水陸衝要。向令典史一員管理河務。勢難兼顧。應將事簡之蘇州府經歷裁改。設清河縣丞從之。調四川按察使石禮嘉為湖北按察使。降福建巡撫李因培為四川按察使。貴州巡撫方世儒疏報南籠都勻思州銅仁四府安南甕安。湄潭。天柱。銅仁。畢節。綏陽。七縣乾隆三十年分開墾額內額外田五百六十七頃有奇。賑卹山東歷城。章邱。鄒平。齊河。齊東。濟陽。禹城。臨邑。長清。陵縣。德州。德平。平原。肥城。東平。東阿。平陰。惠民。陽信。海豐。樂陵。商河。濱州。利津。霑化。蒲臺。金鄉。魚臺。濟寧。嘉祥。汶上。陽穀。壽張。荷澤。單縣。城武。定陶。鉅野。鄆城。濮州。范縣。觀城。朝城。聊城。堂邑。博平。茌平。清平。莘縣。冠縣。臨清。館陶。高唐。恩縣。夏津等五十五

州縣東昌臨清濟寧德州東平等五衛所本年水災飢民並蠲新舊額賦○是日駐蹕避暑山莊至丙戌皆如之○庚辰刑部議覆江蘇巡撫明德奏稱強盜劫擄商民為害最慘拏獲破案即應審明正法應如所請嗣後州縣拏獲盜犯如有供出行劫他邑之案即行通詳督撫無論他邑有無拏獲盜犯總於事主認領贓物之後提解來省并案審擬具題將該犯即行正法不必輾轉關解以致稽延從之○閩浙總督蘇昌等奏臺灣淡水廳屬黨穀莊民被兇番戕殺據臬司余文儀會同該鎮派撥弁兵設法勦撫並委同知知縣帶領通土熟番鄉勇查探路徑由屋鑿獅子等社即可徑通攸武乃社先行傳詢屋鑿獅子等社土目巴然由巴士阿貴等會稱戕殺黨穀莊民實係攸武乃社番與伊等無干情願協力收捕但該土目回社八日之久竟無一番出山回覆恐屬狡飾該鎮司等擬乘其不

備星夜進攻倘道經屋鑿等社番人有敢行阻截者即屬兇番黨夥當先行勦捕使各社瞻落將來受撫必誠現因內山水發未得前進一經水退即當乘機進勦得旨覽奏俱悉
辛巳

上詣

皇太后行宮問安○諭據明瑞等奏稱阿奇木公茂薩病故所遺之缺請將額敏和卓第三子協理台吉鄂囉木扎布補放伊犁阿奇木等語茂薩數年以來甚屬奮勉今聞溘逝殊為憫惻著加恩賞銀二百兩以資喪費伊並無子嗣承襲著加恩將伊第三弟鄂囉木扎布授為頭等台吉仍補放茂薩所遺伊犁阿奇木之缺再額敏和卓聞子茂薩病故必加傷悼伊係年老之人不必過慟惟期永受朕恩善自調攝朕施恩將伊第三子鄂囉木扎布授為頭等台吉補放阿奇木之處著傳諭額敏和卓令其忻悅○又諭據明瑞等具奏

涼州鑲白旗滿洲福齡佐領下閒散富亮。三次由原省脫逃。聽聞該處兵丁移駐伊犁。自行投回。隨伊兄來至伊犁。若將富亮照例發往黑龍江。未免轉置內地。即令其充當步甲。又覺便宜。請將富亮枷號兩個月。鞭一百。交該管官嚴加約束。令當苦差等語。明瑞此奏。尚是。著將富亮即照明瑞等所奏辦理。但伊犁乃新疆。駐兵非內地可比。必立法嚴。俾衆知警惕。方不致混行逃竄。將此交明瑞等嗣後駐防伊犁兵丁內。如有脫逃者。獲日即行正法。不必擬以發遣之罪。著為令。諭軍機大臣等。據海明奏稱。與青海厄魯特王公扎薩克等會盟。會議得將附近郭羅克居住之衆扎薩克等內遷。歸於別扎薩克游牧安置。駐卡兵八百名外。再添兵二百名。共作一千名。令駐劄西寧。理藩院章京筆帖式巡查卡座。遇有空誤。即行叅處等語。海明所奏尚是。但卡座所關綦重。青海人等。原因玩愒。始時

被郭羅克等搶掠。今雖添兵。若仍不以為事。亦屬無益。著傳諭海明。令其派駐西寧之理藩院章京筆帖式等。不時巡察。如有兵丁不齊。軍械殘缺者。即將管卡之王公扎薩克等。指名嚴行叅處。軍機大臣等議奏。據副都統溫福等奏稱。乾隆二十七年鑲藍旗蒙古。查出出旗為民。後復鑽營入旗。食糧。綽勒瑞等一百九十一名。發往烏魯木齊屯田。嗣經奏准。以伊等自到烏魯木齊。盡皆知罪奮勉。即作為烏魯木齊綠旗兵。查烏魯木齊屯田綠旗兵。俱係攜眷。而屯田違犯內。有情願攜眷者。亦係行文本省。送往。此等既作為綠旗兵。其眷口自應令其接取。惟伊等究係加恩寬宥之人。與尋常安插者不同。又難照綠旗兵攜眷例。只可於陝甘官為辦送。伊等接取眷口。請酌給數月錢糧。令其自備。自京接至陝西。再照移駐戶口綠旗兵之例辦給。其所借錢糧。作為一年扣完等語。均應如所請。但

查發往烏魯木齊屯田兵一百九十一名。除發往烏什屯田二十名。並病故一名。尚餘一百七十名。內遣攜家眷再京中並無家屬。及有家屬無力接取之八十四名外。現有應接家屬之六十六名。若令一齊進京接眷。途中不無壅擠。應請交溫福等將此六十六人。分起派員管束。陸續進京。再遣往烏什屯田。兵年滿亦應遣回烏魯木齊。如有願接眷口者。亦准一體辦理。得旨。不必令其親身來京接取。著加恩照綠旗攜眷移駐例。自京官為辦送。○四川總督阿爾泰提督岳鍾璜奏。臣等會同出口查辦郎卡事務。於八月二十八日起程。行抵雜谷腦口外。據郎卡差大頭人當噶爾拉等投稟。內稱。郎卡前蒙

皇上天恩。赦過宥罪。本不敢多事。惟因黨壩各土司連年擾害。我謹依天朝大臣飭諭。拆去戰碉。退還所掠之人。不期黨壩潛來我地。暗放夾壩。我無處稟訴。復來奪占額碉。今奉嚴

諭。自當即行拆還。惟求博魯古留碉五座。保守門戶。並懇諭令綽斯甲布與郎卡連姻。將兩家邊界清楚。至布拉克底所占卡卡角。當勸其退還。並懇賞給新印。賞還自藏回川喇嘛七人。開通赴成都及進西藏之路等語。臣等諭以嶺上碉座。與乾隆十四年所定界址不符。不便准行。郎卡與綽斯甲布結姻。係屬爾土司私事。聽爾等自為說合。不便官為辦理。至明正土司失去人口。應候查辦。爾郎卡

既知感恩畏法。惟有安分住牧。自守巢穴。該頭人等無不戰慄領諾而去。查郎卡一聞臣等出口巡邊之信。即差人迎稟。退地還碉。稟詞雖屬懇切。臣等仍當親至其地。示以威稜。曉以利害。如果感悔輸誠。即飭委員督令退還各處碉卡。並取各土司收明退還地方印結。劃清界址。各安住牧。郎卡既與各土司同聽約束。將來差人赴省投稟貿易等事。似可准其與各土司一律遵行。其求還自藏回川

之喇嘛亦應給予。至金川土司印信。現貯司庫。恐該酋反覆靡常。擬俟察看數月。果屬安靜。明春再行給發。得旨另有旨諭。諭軍機大臣等。阿爾泰等奏。郎卡遣人懇請退碣。息爭及查辦情形一摺。似有將就了事之意。金酋原無干犯內地。不過與衆土司互相仇殺。本無庸聲罪致討。且不值一辦。至九土司各懷觀望。不能併力進剿。以蠻攻蠻之說。既屬無益。斷無轉助其兵力。代為合剿之理。前諭該督提等。親赴該處。明悉曉諭。原欲令細察番衆情形。若何。審度事勢。以定進止。如果郎卡實心畏懼輸誠。面求退還額碣。安靜守分。不敢再行滋擾。或可察其悃忱。酌量奏辦。今該督提等。並未身履其地。又未親見郎卡。祇據伊所遣頭人稟懇之詞。信以為實。及宣諭以後。輒云戰慄領諾。亦未必果屬真情。況其所奪之碣。尚未拆毀。侵占土司之地。亦未退還。是其實在畏威悔罪與否。尚未可定。乃遽聽

其所懇。奏請給還人口喇嘛。並欲給予貯庫印信。與衆土司一體羈縻。諸事悉遂其所欲。為此和事老人之舉。適足為外夷所輕。殊不知蠻性反覆靡常。現在不過懾我先聲。姑為乞憐倖免之計。豈能保其永遠不復滋事。若止圖苟且了局。何以尊國體而靖夷情。阿爾泰年齒就衰。岳鍾璜又復善病。設或各存祇圖目前之念。以為十數年後。皆非伊所及見。不復籌出萬全。則是自貽伊戚。倘此次辦理不善。將來或仍不免跳梁滋擾。朕惟原辦之人是問。伊等各育子孫家業。又豈能保無身後之慮乎。總之此事若無從籌辦。竟不必置論。則可。而欲就事完事。敷衍塞責。則斷不可。著將此傳諭該督提等知之。調鑲黃旗蒙古都統安泰。為察哈爾都統。壬午軍機大臣等議覆。副都統溫福等奏。稱烏魯木齊發遣人犯。有情願攜眷者四百名。已造冊咨行各省。將伊等妻子照原議遞送烏魯木齊。其

現有家屬者。當視其原犯情罪輕重。將原擬死罪者。作為五年軍流罪。輕者作為三年。滿無過犯者。陸續編入民冊。將伊等安插。吉河東現有之舊堡。指給地畝耕種。其未領有馬匹農器者。照原奏所定補行給與。并借給造房銀兩。口糧籽種等項。分年歸還。於種地次年。即令納糧。照民人每畝八升。均應如所請從之。

大清高宗法天隆運至誠先覺體元立極敷文奮武孝慈神聖純皇帝實錄卷之七百六十八

大清高宗法天隆運至誠先覺體元立極敷文奮武孝慈神聖純皇帝實錄卷之七百六十九

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理
吏部理藩院事務鑾儀衛滿洲都統世襲騎都尉軍功加七級隨帶加一級尋常加二級軍功紀錄一次慶桂
總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務
世襲騎都尉軍功加九級隨帶加二級又加二級直隸總督內大臣戶部尚書鑾儀衛滿洲都統軍功紀錄五次
尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆三十一年丙戌九月癸未諭曰明山奏

陝省城工估報數目較之乾隆五年等各年分估修原數倍多。皆由前此糜項廢弛所致。請將此次估修數內。凡有原估以後續冊添修逾額者。著落漫不經心之歷任地方官賠補等語。所奏非是。此次發帑修築城垣。惟應就現在應辦工程。專派大員確覈估計。使工歸實用。帑不虛糜。其中有距從前修葺年分稍遠。剝損較多者。自當據其實在情形。量加增補。以資鞏固。設不肖有司。藉稱年久費多。

致有浮開冒濫等弊。即將此等承辦劣員嚴叅治罪追賠。重示懲儆。庶於現辦工程有裨。若從前歷次黏補已逾二十餘年。即坍塌過多。何由按年覈算。其間承修各員久離本任。存亡皆未可知。且各省俱次第興修。若一律著落分賠。則文移絡繹。勢必追呼滋擾。不但無此政體。亦豈朕發帑裕工本意。而其後究歸於無可著追請賠。仍屬有名無實。明山此奏。徒欲見其精覈。而不自知其瑣碎。且轉使現辦各員。得以諉過前人。任意浮冒。殊非覈實辦公之道。該撫向來尚非不更事之人。不應純謬若此。明山著傳旨申飭。並將此傳諭各省督撫知之。又諭嗣後武會試請定中額本。著照文會試將上次中額卷數。本次卷數一併繕寫清單。隨本進呈。又諭曰。巴爾品所管馬廠牛羊羣軍臺一切事務。俱著安泰兼管。諭軍機大臣等。聞陝撫明山患病。未知邇日光景若何。於地方事務尚能照常

辦理。不致貽誤否。吳達善駐劄甘肅。雖相隔稍遠。但陝省官員常有因公至甘肅謁見者。况其家又係西安駐防。自當有所聞見。著傳諭吳達善。即將明山患病曾否就痊情形。據實奏聞。尋奏。臣五月初過西安省城。接見明山。精神畧欠強健。而料理公事照常。近日陝西武員因公來蘭。臣詳加詢問。均稱明山身體比前已好。現赴中部。耀州。洛川等州縣勘驗城工。是明山病體已經就痊。地方事務可不致貽誤。報聞。甲申。上御依清曠。勾到秋審官犯。服制斬犯二十八人。雲南絞犯一人。貴州斬犯八人。餘四十五人。予勾。諭軍機大臣等。本日勾到湖南省官犯。有得受公費縱容漕書浮收糧石案內之耒陽縣知縣徐維綱一犯。原擬情實。因閱招冊內係伊次子徐曰哲起意作弊。外省定案。罪坐徐維綱。問擬絞候。其中情節尚有可

疑如冊開徐維綱現年三十二歲於乾隆二十四年到任其時該犯止二十五歲即使早年得子其長子亦不過十一二歲次于更屬稚幼豈能經管漕務與書吏等交通舞弊此事理所必無焉知非原問官員意欲為徐維綱開脫却罪伊子亦未可定此等情節不可不徹底根究而罪疑惟輕是以未即予勾今伊子徐曰善徐曰哲雖經病故徐維綱現在監禁加以研究自當水落石出著傳諭常鈞即將該犯徐維綱親提嚴訊務得實情具摺覆奏○又諭據吳達善奏稱雅爾地方需用緞疋須於明歲二月內到彼請令三處織造先將應用各種緞疋於十月內起運十一月解到等語此項緞疋已據該織造等稱移咨該督於九月內辦齊十月內可以起解是現在已經將次齊全著再傳諭該織造等即將此項緞疋內元青素緞小花綠緞荊花絹荊素絹四種上緊趕辦先行運送餘仍按期解

往無誤○又諭曰吳達善奏據駐劄雅爾大臣烏勒登等移稱前定織緞疋務於明歲二月解到請令江寧等三處織造即將該處所需各種緞疋於十月初旬起程十一月內到甘等語此項貿易緞疋向令該織造等分股豫辦按期運解今該督因雅爾需用甚急促令於十月初旬即行遞送而此摺乃於九月初八日拜發十七日奏到計自此地行至江浙亦尚需時日縱使該織造等已經織辦齊全而包裹裝載皆須妥協經理亦不能接到此信立即起程吳達善並未將往返程途日期通盤覈計率為此奏殊屬不諳事理除傳旨各該織造仍行趕緊照例辦理外吳達善著傳旨飭行乙酉兵部以武會試中額請得旨這會試漢軍取中三名直隸取中八名陝西取中七名廣東取中四名河南取中三名山東取中五名江南取中三名山西取中四名湖北取中二名湖南取中一名四川取

中一名。廣西取中一名。福建取中三名。浙江取中二名。江西取中二名。雲南取中一名。貴州取中一名。旌表守正被戕之四川遂寧縣民胡榮臣女胡氏。丙戌上奉

皇太后自避暑山莊迴鑾○詣

皇太后行宮問安。諭據吳紹詩奏伴送暹羅國貢使禮部員外郎湯永祚攜帶伊子同行沿途託雇民夫。並將德安縣家人鞭責滋擾。

據該縣稟報。經司道等逐一質訊。惟原稟索詐得贓之處。審屬子虛。請將湯永祚及捏報之知縣蘇壻。交部查議等語。所奏非是。湯永祚伴送外藩貢使。乃攜帶伊子沿途騷擾。即應參奏治罪。至奉差人員。經過驛站。滋擾生事。地方官往往不敢與較。該縣蘇壻據情稟報。尚屬強幹之員。乃吳紹詩因其所報畧有不實。與湯永祚一體奏請議處。俾兩敗俱傷。是使將來驛站各員。心存畏懼。一任馳驛之

人橫行滋擾。悉皆隱忍不言。勢將益無忌憚。其何以飭郵政而肅使輶。且該撫摺奏意在調停。兩可曲為婉轉。其詞殊屬不合。湯永祚著革職。交刑部治罪。吳紹詩並著交部察議。至所稱若徹留另行委員伴送。恐外藩不免詫異。有關國體之語。尤屬不知事體。伴送貢使官員。於所過地方多事。貢使亦豈不知該督撫即能據實糾參。羈留待罪。另派妥員伴送。正足使外藩陪臣知天朝大法。小康紀綱。

整肅。於國體豈不更為增重。何轉慮其妄生詫異乎。嗣後如有此等情事。該督撫一面奏。一面即將差員徹留。另派妥幹知府同知一員前往伴送。著為令。吳紹詩摺并發並將此通諭中外知之。諭軍機大臣等據崔應階奏甄別該省從前分發人員。其未經得缺者。尚有一十三員。皆年力壯盛。堪備委用等語。前因分發試用舉人為數稍多。是以特降諭旨。令各省將從前人員詳加分別酌量去

留俾揀發之舉人得以及鋒而試數月以來各省俱已陸續奏到東省距京師較近何以崔應階所奏辦理情形獨在他省之後奏報殊太遲滯著將此傳諭知之○戶部議准湖廣總督定長等奏稱武昌府屬沔陽地勢低窪時多水患請將境內上八總民田紅糧三則均改為漁糧上則徵收其軍田科則改為漁糧下則徵收至下八總民地內應徵南米請照上八總南米一併減免從之江西

巡撫吳紹詩奏南昌新建進賢三縣下游一帶地接鄱湖形勢低窪又當章貢兩江之衝民間田廬全賴圩隄障衛向係民募民修官為督理本年夏秋雨水過多江湖盛漲圩隄多被衝浸被水貧民日食維艱勢無餘力興修而來年春汛即至亟宜豫為防築除偶有殘缺工費無多及未被水各圩聽民自行經理外其衝缺最甚圩工南昌縣二十七處新建縣四十九處進賢縣六處應照乾隆七年

撫臣陳宏謀奏准之例於司庫解存鹽規項內借支銀二萬兩遴選幹員會同各該縣一俟水勢稍退趕緊興修一面慎選誠謹圩長將銀按圩分發限於歲內完竣所借鹽規銀兩自乾隆丁亥年為始分作八年帶徵還款得旨如所議行○是日駐蹕喀喇河屯行宮
丁亥

上詣

皇太后行宮問安○是日駐蹕常山峪行宮

戊子

上御行殿勾到四川廣西廣東情實罪犯停決四川斬犯一人廣西絞犯一人廣東斬犯四人餘一百三人予勾○諭軍機大臣等本年勾到湖南省官犯饒佺一名雖已予勾但尚有應查事件著傳諭該撫接到部文將饒佺暫行停決俟查明再行降旨○以正藍旗滿洲副都統烏勒登為鑲黃旗蒙古都統調正藍旗蒙古副都統額爾景額為正黃旗滿洲

副都統以察哈爾副都統七十為正藍旗蒙古副都統。旌表守正捐軀之山東鉅野縣民韓現章女韓氏。是日駐蹕兩間房行宮。○已丑

上詣

皇太后行宮問安。○諭軍機大臣等。據阿爾泰奏。郭羅克賊匪踰青海境搶掠馬匹牲畜一事。交松潘總兵德興等派員前往郭羅克部落嚴查訓飭。再嗣後巡察番人地方。豫為防

範。嚴飭郭羅克約束屬下人等語。近郭羅克賊匪踰境搶掠青海馬匹牲畜。朕曾降旨郭羅克係四川所屬。阿爾泰不可置之度外。不悉心妥辦。阿爾泰接奉此旨。即應將此次郭羅克人等掠去馬匹牲畜追取查出賊首。辦理治罪。今觀阿爾泰所奏。祇於曉諭郭羅克等。又稱嗣後防範查禁。則是此案伊全不以為事。僅以空談具奏。朕從前又何必降旨令其查辦乎。阿爾泰所奏非是。著傳諭阿爾泰

遵朕前旨。妥行辦理。其現在若何籌辦之處。著即行奏聞。閩浙總督蘇昌奏臺灣攸武乃社兇番經臬司余文儀等帶同文武員弁率領兵勇。於八月二十七日往蛤仔口進剿。擒殺番眾三百餘人。餘匪四散奔逃。勢已膽落。即附近屋塾獅子等社生番亦不敢結連幫同拒敵。臣現在批令該司鎮等或假以招撫。誘令投首。或直擣巢穴。盡殲其眾。務使海疆寧謐。得旨嘉獎。○是日駐蹕要亭行宮。

庚寅

上御行殿。勾到福建奉天湖廣情實罪犯停決。福建斬犯一人。奉天斬犯一人。絞犯十六人。朝鮮絞犯一人。湖廣斬犯五人。絞犯二人。餘九十二人。予勾。○諭曰。副將吳士勝數年來辦理屯田事務。甚屬出力。今據奏稱伊母在籍病故時。未得請假歸葬。著加恩准其馳驛回籍。奠親事畢。即赴新任。○諭軍機大臣等。今年江西秋審。經九卿覈擬。由緩決改入情。

實者三起。如絞犯宋猪牙係積匪擬發新疆未解之犯復敢夥同越獄脫逃偷竊絞犯盧榜華圖得蔣冠仁錢文聽從指使將伊弟計誘毆斃絞犯應滿仔原係竊匪因懷忿捕役緝拏糾夥毆斃以上三犯均係兇惡匪徒無可寬貸九卿改擬情實甚是吳紹詩久任刑部司員素稱諳練伊從前在刑部時設遇此等案件豈有不行駁改之理何以身任巡撫乃於秋讞大典不復詳慎覈擬以期平允乎又如該撫前奏湯永祚騷擾驛站之事既經叅劾復請仍留伴送並將原稟之知縣一併叅處欲使兩敗俱傷亦失秉公持正之道吳紹詩甫經簡任封疆不應意存姑息若此著傳旨申飭吏部議准四川總督阿爾泰奏稱叙永廳屬永寧縣向隸黔省故與叙永廳各駐一城但相去不過里許僅隔一河令歸川省叙永廳管轄與各府附郭首邑無異該二城年久頽圯若仍復分城興修殊滋糜費

查叙永廳城民居稀少永寧縣城人烟稠密應請將叙永廳及照磨衙署移駐永寧縣城內從之又議覆江西按察使揆義奏稱竊盜滿貫罪應綏首與命案兇犯罪實相等向例地方官緝捕限滿不獲止議以罰俸未免緝捕懈弛請將承緝接緝等官照命案緝兇例查叅議處等語查竊賊數滿貫呈報時祇係事主一面之詞旁無證據非若命案有尸傷顯蹟可比若照命案緝兇例議處似屬漫無區別惟竊案初叅限滿不獲罰俸一年向後即無展叅地方官未免懈弛應請嗣後竊賊滿貫六箇月限滿不獲罰俸一年再限一年緝拏限滿不獲罰俸三年從之旌表守正捐軀之山東萊蕪縣民亢東印妻李氏是日駐蹕密雲縣行宮 辛卯上詣皇太后行宮問安 軍機大臣等議覆察哈爾都統安泰奏商都達布遜諾爾牧廠共一

百六十座。除衮布扎布等十六座並未虧缺外。各座共虧空馬三萬九百三十六匹。駝二百一十一隻。應著落原任都統巴爾品。暨歷年查廠侍衛等分賠。收長等分別革職留廠効力贖罪。其原任小總管索諾木達爾扎等俱從重擬絞監候。得旨依議。值年侍衛訥默音等查出虧短駝馬。即行具奏。並未隱匿。著施恩免其交部議處。衮布扎布等十六牧廠並未虧短駝馬。宜加恩獎勵。著交安泰將衮

布扎布十六牧廠之人查明。將如何加恩之處。定擬具奏請旨。○是日。駐蹕野營山行宮。○壬辰。駐蹕盤山行宮。至丙申。皆如之。○癸巳。

上詣

皇太后行宮問安。諭前勾到秋審情實官犯內。湖南省饒佺一名。以其迴護已過。業已勾嗣。因閱看浙江招冊內。諸暨縣書吏侵糧一案。知縣黃汝亮即行正法。知府高象震承

審迴護。經侍郎四達等審擬發往軍臺効力。因思兩案情事相類。而一真重典。一發軍臺同罪異罰。不足以昭平允。特命速諭該撫將饒佺暫停處決。一面令刑部詳查高象震供詞。與饒佺案情逐細覈較。再行降旨。今據查奏。高象震因生員陳駒控告書吏侵糧。經巡撫批發親審。乃並不詳細根究。隨即轉詳。復因錢名標等俱未到案。心存成見。一時迴護。前詳遽將原告陳駒詳請斥革。至饒佺則明知十串較冊浮多。恐干失察處分。欲圖迴護授意。知縣等改換印串。以符徵冊。幾至重犯漏網。實屬執法欺朦。是高象震與饒佺雖俱係迴護。而情罪迥不相同。高象震承審時受人朦混。不能究出實情。繼復固執。已見仍照前詳率結。昏憤無能。尚屬無心之過。發往軍臺効力。已足蔽辜。若饒佺授意改串。則因袒護舞弊。屬員曲為徇縱。以知府大員敢於有心欺罔於法。實無可貸。著該撫仍將饒佺即

行處決秋讞為明刑大典朕披覽招冊必詳慎再三以協大中至正之治雖匹夫匹婦稍有一節涉於疑似者亦必悉心推究俾無枉縱即如饒佺一犯初疑其與高象震案或相類雖已予勾仍令停決以待詳覈今既查較得實則予以縲首並不為枉朕於庶務鑑空衡平從不豫設成見輕重悉視其人之自取將此明白曉諭中外知之并使凡為知府等大員者知所炯戒軍機大臣等議覆副都

統索諾木策凌等奏稱臣等查看牧廠馬匹覈對巴爾品查奏印冊除二十四廠並無缺額其餘一百六十八廠共缺馬二萬九千九百七十一匹各廠馬匹內間有未烙火印者臣等傳集兩翼小總管羅布藏班珠克等詢問據稱二十六年以前原有缺額近來滋生有限倒斃過多年復一年以致累有數萬至未烙火印馬匹原有鈴烙不真漸至泯滅者亦有倒斃缺額陸續買補者此皆實在數目

斷不敢輟轉頂換臣等議將現有馬三萬六千八百四十八匹交值年侍衛永平羅庫納等嚴行查辦該總管羅布藏班珠克等應請查明治罪著落分賠統轄上司巴爾品及太僕寺堂官並歷年值年侍衛分別議處等語除將太僕寺歷任堂官免其交部議處令其按照一成分賠外其餘均應照依商都達布遜諾爾之例辦理從之○甲午

孝慈高皇后忌辰遣官祭

福陵諭軍機大臣等熊學鵬奏海鹽縣民朱四謀死胞兄朱三拋屍河內請即正法一摺已批三法司覈擬矣該撫改題為奏雖為事關倫紀起見但外省此等案件亦所常有非逆倫重犯決不待時者可比向俱照例題達何必專摺奏聞熊學鵬曾任刑部侍郎似此題覆之案非未經辦理者何乃視為創見專函入告耶若以該省無可陳奏之事藉此敷衍塞責更非理矣著將此傳諭知之○乙未

工部議准。河南布政使佛德奏稱。河工勸裁小楊日久無效。宜更定章程。請嗣後河工需用楊椿。責成管河丞。俾會同沿河州縣於所屬官地。妥行栽植。每年成活若干。報明上司。委員查勘。出結存案。并令造入交代查覈。所需種費。在道庫銀內動支。給發所有本地紳士富戶捐栽。議叙之例。停止從之。大學士管雲貴總督楊應琚奏。臣前因木邦向化。緬匪可以乘機酌辦。密遣妥幹夷人潛往緬甸。

確探情形。茲據回稱。緬甸幅隕遼濶。南通外洋。所轄土司二十餘處。人民亦衆。建城阿瓦地方。又名三江城。由永昌前往有水陸三路。可通。間有險要之處。木邦蠻蕃二處為緬甸門戶。又係伊屬下最大土司。緬甸自襲籍牙篡位。伊子孟洛孟毒誅求無厭。各土司早已解體。聞天兵平定莽匪。緬人甚為畏懼。又據永昌文武官稟稱。探事夷人陸續回寨。木邦因前定九月內歸順內地。懇請發兵。早為臨

境保護。今已近期。天朝諒已出兵。該酋已將緬匪差來監視之人殺害。懇請天朝大人迅速發官兵到境等語。臣已一面調撥豫備鎮營官兵三千餘名。前赴附近木邦之內地。土司遮放地方駐劄。俟伊等前來。即便受降。又查蠻蕃地方亦與木邦相埒。距阿瓦城不遠。該處為入緬要隘。又居上游。頗稱險要。因知木邦已經投順。亦願來歸。是緬匪之地愈覺控制更自無難。臣於九月十二日起身前往。

永昌察看情形。如果易於集事。即當乘機妥辦。倘木邦歸附之後。緬甸亦有向化之機。自知悔罪。將召散擒獻。臣自當請旨辦理。斷不敢草率。上厪宸衷。并將緬甸輿地形勢。繪圖貼說呈覽。得旨。欣悅。覽之。佇俟佳音。餘有旨諭。諭軍機大臣等。楊應琚奏籌辦緬甸木匪緣由一摺。稱木邦現在傾心歸附。而入緬要隘之蠻蕃亦願來歸。伊現赴永昌察看情形。倘木邦等收撫之後。緬甸亦有向化之機。將

召散擒獻。當請旨辦理等語。所辦甚好。木邦蠻蕃遠在邊陲。今皆懷德畏威。輸誠內附。該督親往受降。順夷情而綏遠徼。深為嘉悅。至緬酋距永昌計二千餘里。該督既圖其道里。悉其情形。自當胸有成算。今復親至永昌。相機督辦。必能動中竅要。籌出萬全。如緬酋此時因所部蠻衆相率內屬。亦知懾我先聲。願効臣服。該督能不動聲色。一併招撫歸降。固為妥善。若其畏避潛匿。即將召散擒獻。則罪

人既得。莽匪全局已竣。天朝本無事求多於外夷。亦可收功歲事。倘或怙惡不悛。果有可乘之會。不致重煩兵力。深入而成戡定之功。以永靖南服。尤為一勞永逸。該督老成歷練。遇事素有斟酌。一切事宜。悉聽其隨時審量。妥協經理可耳。茲因留心籌畫。緬酋招徠。木匪不憚勤勞。遠涉特賞荷包二對。以示優眷。如能順勢集事。招致緬甸。迅奏膚功。另當格外加恩。用昭酬獎。著將此傳諭知之。丙申

孝敬憲皇后忌辰遣官祭

泰陵

上詣

皇太后行宮問安。諭伊犁屯田今年偶被蝗災。收成歉薄。糧價必昂。彼處駐防兵丁俱係甫經移駐。尚未服習。生計不無竭蹶。著明瑞等於伊犁兵丁內除錢糧口糧一併支領之。兵丁不計外。其已裁口糧惟支領錢糧兵丁等。均著賞給一月錢糧。其納糧回子等著照

兵丁減半賞給。何等兵丁應賞給。何等兵丁不應賞給之處。著明瑞等查明奏聞。陝甘總督吳達善奏奉諭甘省撥發庫帑三百萬兩。留備採買糧穀以充積貯。查甘省本年夏秋田禾雖間有偏被旱電之處。其餘收成俱屬豐稔。將來民有餘粟。市糶必廣。謹於撥到銀兩。先買糧一百萬石。如糧廣價平。再請續買。漸補常平定額。倘市值稍昂。即行停止。得旨嘉獎。又奏奉旨撥解烏什銀兩查哈密

庫貯無多不敷動撥。若在甘肅道庫撥往恐不能依期到彼。臣本年抵任後曾撥解闢展奏調歲需。並豫備銀共三萬兩。業於七月間管解出口。於八月間據哈密通判具報轉解計期早已收到。闢展至烏什。比哈密近十二站。較之從哈密解往更為便捷。臣接准永貴等來咨。已飛咨闢展辦事大臣於解到前項三萬兩內撥銀二萬兩。令其就近委員徑解烏什。其內地撥解之銀俟經過闢展時按數截留還項。報聞。○是月兩江總督高晉江蘇巡撫明德奏安東縣城垣歲久傾圯。現在估修。該處係濱海之區。地瘠民貧。本年被災較重。請趁此歉收之年。以工代賑。即於本年冬間購辦物料。明春即行開工。得旨嘉獎。○明德又奏查勘銅蕭二邑被水災民。現在妥為撫卹。並銅山漫口督催料物運解各員俱能妥速。豫省料物亦漸次運至。得旨目今各督撫於此等公務皆實竭力速辦。亦見整飭之

效也。○安徽巡撫馮鈐奏宿州靈璧虹縣三處河水漫漲。臣於八月二十七日由省星馳赴勘。水已漸退。尚無損傷人口。現飭多備筏船接渡。於高阜處所搭棚安頓乏食貧民。先給餅餌麥豆餬口。並委員查明受淹居民分別大小口先給口糧。得旨覽奏俱悉。賑卹事務督率屬員妥速辦理。以救災民。○江西巡撫吳紹詩奏九江等府所屬縣偏被水災。一鄉之中豐歉不等。臣親往履勘。當飭各府縣並委派協辦之員。照依實徵冊內各災分數務期平允的實。不使被災者稍有屈抑。有收者少有冒濫。分別應否賑卹。及貧民極次酌定條款辦理。得旨好。可謂詳而當。○湖南巡撫常鈞奏常德府隄垸衝損。奉旨官為修建。臣於查勘隄工時據各隄民焚香環籲。咸稱此次衝損之處過多。工費浩大。若全係官帑辦理。自問難安。懇請凡零星缺口工程仍係民間修築。即隄工過大之處鄉民亦願出夫

幫修。照民間每年自修工價賞給一半。已足數口食。臣見各隄民等情詞懇切。出於至誠。已批准辦理得旨。好。此所謂斯民三代之直也。

實錄卷七百六十九

帝

大清高宗法天隆運至誠先覺體元立極敷文奮武孝慈神聖純皇帝實錄卷之七百六十九

大清高宗法天隆運至誠先覺體元立極敷文奮武孝慈神聖純皇帝實錄卷之七百七十

監修總裁官總纂官太子太傅文淵閣大學士文淵閣領閣事領銜內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履桂

總裁官經筵講官太子太傅文榮殿大學士文淵閣領閣事稽察欽奉 上諭事件處管理刑部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德保經筵講官太子少保工部尚書紀錄六次臣曹振鏞等奉

敕修

乾隆三十一年丙戌冬十月丁酉朔享

太廟。遣顯親王衍潢恭代行禮。○遣官祭

永陵

福陵

昭陵

昭西陵

孝陵

孝東陵

景陵

泰陵。○遣官祭

孝賢皇后陵。

端慧皇太子園寢。

上詣

皇太后行宮問安。○頒乾隆三十二年時憲書。

○諭據明瑞等奏。今年錫伯索倫達呼爾等十佐領兵丁耕種地畝被蝗。所有前借給籽種。及接濟糧石。刻下不能交納。請俟豐收時歸還。又回子等所種地。大小麥收成歉薄。小米黍子尚可豐登。所有應納麥石。請以小米

黍子准抵。其不敷之數。俟來年補交等語。錫伯索倫等所借籽糧。本當即行歸款。但伊等俱係新往兵丁。在彼未能服習。且今年復被蝗災。生計未免拮据。著加恩將應還籽種。及接濟糧石。俱著寬免。至回子等田地。小米黍子。雖屬豐收。而大小麥歉薄。若以小米黍子抵納。大小麥不敷之數。來年即令交納。尚恐力有不支。著交明瑞等將回子等今年應抵糧石酌減。展限令其

補還。此係朕念伊等生計。格外施恩。不可援以為例。明瑞等將此通諭知之。○又諭據安泰等奏。值年查看馬厰侍衛。不能盡查。每年往返換班。馬匹口糧。俱屬虛糜無益等語。所奏尚是。嗣後著將值年查看馬厰侍衛裁汰。每年於張家口都統。副都統內。輪派一人查看。其商都達布遜諾爾。太僕寺馬羣。著三年一次。上駟院照例奏派大臣清查。○諭軍機大臣等。據楊應琚繪進緬甸地圖內。有附近

阿瓦城之罵達喇地名。因思康熙年間。曾有雲南所進馬達爾名色苗人。在馬前導引行走。是否即係圖內罵達喇之人。罵達喇附近緬甸。從前並未內屬地方。督撫何從致送來京。復於何時遣回。事越多年。無憑查考。滇省或有檔案。亦未可定。其如何遣送往返緣由。著楊應琚查明具奏。至從前進京苗人內。或有二三十歲遣回。迄今尚存者。均未可定。該督現在辦理緬甸。若得此等曾來內地苗人。

就近詢問彼此情形。得悉其大概。豈不更為有裨。著將此傳諭楊應琚。令其遇便留心。亦不必作緊要事件辦理。○又諭。據蘇昌等奏。請將揀發試用舉人。分派各衙門學習一摺。所奏尚屬可行。至請令各省一體仿照派撥。則殊可不必。前因常鈞。阿思哈等。將揀發舉人一事。紛紛陳奏。每事為之籌畫。幾於入海算沙。均屬不諳事理。業經頒發諭旨。通諭各省。想該督等尚未接閱。故復為此奏耳。此等

揀發舉人。原係朕特沛殊恩。欲其廣為疏通。至分發各省後。該督撫等。或欲因材造就。分派各衙門學習。自行各按該處情形酌辦。原屬督撫等分內應行之事。本可無庸入告。若并欲定立章程。通行各省。則是以加恩之事。復欲朕為之瑣屑經理。實無此政體。著將此傳諭蘇昌等知之。○又諭。據李因培奏。該省沿海愚民。遇商船遭風撞礁擱淺。每有乘危搶奪之事。地方官率以愚民。非夥盜可比。意

存姑息。現在報到數起。不可不嚴行懲除等語。李因培現在降補四川按察使。所奏該省既有此等惡俗。著將原摺鈔寄莊有恭。令其留心查辦。並將此傳諭知之。○軍機大臣等議覆。三姓副都統福珠禮奏稱。三姓地方。生齒日繁。各處往來貿易者。較前尤眾。請設立稅務。其馬匹牲畜。悉照拉林。阿勒楚喀等處辦理抽分。再三姓。向未設立監禁。俱於堆鋪店房看守人犯。亦請照例設立。派驍騎校一

員。兵二十名查管。應如所請。從之。○又議覆福珠禮奏稱。吉林所屬佐領。向無圖記。遇有事件。俱以畫押為憑。請照京師佐領例。一體給與等語。係為慎重公事起見。請令盛京等處將軍。將東三省佐領內。查明有無圖記。分別旗分。造冊報部。一體鑄給。從之。○是日。駐蹕大新莊行宮。○戊戌。駐蹕三家店行宮。○己亥。

上迴鑾奉

皇太后居暢春園。問

皇太后安。○詣

安佑宮行禮。○幸圓明園。○庚子。

上詣暢春園。問

皇太后安。○諭。據阿思哈奏。徐州韓家堂堵築漫口。需用工料。業經陸續起運。今據高晉等咨稱。稽料已足敷用。概行停運。此項物料。例應仍給民戶。繳價歸款。其路遠之處。礙難給還。請俟商酌妥辦一摺。此皆高晉等原辦過

當所致。漫口需用工料。自當按照工程。確覈估計。以濟急需。則隣省辦運。既易為力。而事後亦不致籌畫周章。豈可蹈河工多備少用陋習。令協濟省分。徒費採買辦運。今阿思哈請將近地稽料。仍給還民戶。路遠者。另行酌辦之處。所議亦尚未妥協。不知民間物料。一經官辦。地方官即照時價給買。小民已恐不能盡沾實惠。若復將原料給還。令其繳價歸款。則一出一入。耗損必多。難保無吏胥借端

中飽。擾累勢所不免。所有豫省停運工料。除留該省備用外。並可撥山東河工。儲為來年之用。如再有多餘。仍著解運江省備工。概不必給還民戶。以示體卹閭閻之意。嗣後凡有採買物料。官用有餘者。均照此辦理。著為令。○又諭。今日鑲黃旗滿洲。呈進世襲佐領家譜內。副叅領海福。主事伍英。遊擊濟德等之子。俱註養育兵。向來挑補養育兵。原為養贍八旗孤寡。及貧苦兵丁。俾伊等生計有資。至官員子嗣。原不應挑補。即使本佐領下孤寡及貧苦兵丁子嗣。盡行挑補。亦當先儘護軍校。驍騎校等。微員子嗣。如此外尚有餘缺。仍當於一叅領內。通融辦給。今鑲黃一旗。如此挑補。想別旗亦必有如此者。著軍機大臣等。詳查具奏。○諭。軍機大臣等。據熊學鵬題。嘉善縣典史丁觀光。署知縣孫震。疎縱姦犯王五等六名。越獄脫逃一本。監獄羈禁罪囚。因理宜嚴密防閑。勿令縱逸。設間有一二免脫。

該管官已難辭咎。今乃漫無防範。致各犯同時乘間逃竄。至六名之多。更非尋常玩忽可比。在知縣典史。職守攸關。固屬罪無可逭。而該撫之平日不能整飭屬員。於此亦可概見。熊學鵬著傳旨申飭。至逃犯內已經弋獲之陳阿祥。原擬發遣烏魯木齊。向來此等人在遣所。及中途脫逃者。一經拏獲。即於該處正法。今陳阿祥係問遣未經起解之犯。敢於藐法越獄。是於新疆脫逃罪外。又加一越獄情節。尤為可惡。自應即照遣所脫逃之例辦理。可將此傳諭熊學鵬知之。○撫卹長蘆滄州。鹽山。慶雲。海豐等四州縣。嚴鎮。海豐等二場。本年水災。竈戶分別蠲緩額賦如例。○辛丑諭。據永貴奏稱。伊犁應送烏什羊一千五百隻。據派防禦七達色帶領滿洲厄魯特兵十二名解送。於九月初一日送到。羊隻臚分俱好。並無倒斃。應否將該員七達色交部議敘。兵丁賞給一月鹽菜銀兩。以示鼓勵。具奏

請旨等語。著照永貴所奏。伊犁防禦七達色。交部議敘。滿洲厄魯特兵丁各賞給一月鹽菜銀兩。以示鼓勵。○諭軍機大臣等。阿思哈奏。韓家堂漫口工程。所有停運豫省採辦物料。礙難給還戶民一摺。已明降諭旨矣。此項工料。前經高晉等奏請隣省協辦。以濟急需。是以迅諭該撫上緊如數辦運。初以高晉等親在工所覈估。事皆真知灼見。自必按照漫口工程。據實估計。取足敷用。何至停運稽料。至二千二百餘萬觔之多。此皆工員陋習。只圖多備少用。以取便易所致。高晉等何竟聽率行開報。不復詳加覈實。現飭將未經起運之料。俱酌運各工備用。概不必給還民戶。繳價歸官。以免閭閻擾累。但往來需用腳價。已多滋糜費。高晉等實難免辦理不善之咎。所有往返運腳銀兩。著阿思哈查明。除例應開銷外。其有浮多之數。即著高晉。李宏。分賠歸款。至豫省運料船隻。彼時以工程緊急。盡行

封雇裝載。今若仍留徐州工所。於豫省商民貿易。殊多未便。高晉等所辦。更未妥協。著傳旨申飭。此項回空船隻。即著交還豫省。毋得仍前截留。著將此傳諭高晉。李宏。阿思哈。知之。○又諭。向來發遣新疆各犯。有在遣所及中途脫逃者。拏獲之日。即於該處正法。其已經問擬。尚未起解之犯。在獄脫逃。向未立有明條。茲據浙江巡撫熊學鵬奏。嘉善縣問擬發遣烏魯木齊人犯陳阿祥。在監乘間逃竄。

情節可惡。已傳諭該撫。即照遣所脫逃之例辦理矣。此等人犯。本係身獲重罪。發遣以貸其死。一經免脫。已應速正刑章。而問遣候解之犯。情節即與彼無異。乃當身繫囚圉。輒敢藐法潛逃。是較之在遣所脫逃者。又多一越獄之罪。豈復可稍稽憲典。且已至新疆。及解在中途者。雖欲逃回本籍。而道里遼隔。勢尚難於遠遁。若羈囚候遣之時。未離鄉土。該犯等私圖竄逸回家。事尤便易。從前外省。遇此

等案件。率援軍流脫逃舊例。照常科罪。法輕易犯。轉致兇狡之徒。無所畏忌。倖逃法網。此而不嚴行懲創。何以使若輩知所儆懼乎。嗣後各省如有此等逃犯。俱照新定浙省之例辦理。著於各督撫奏事之便。傳諭知之。○壬寅。諭。江南淮徐支河一帶。所有官修河隄。前經特派裴曰修等查辦。距今為時已久。且韓家堂現辦漫工。其下游支河汊港。不無淤墊。亦應酌量疏濬。著派裴曰修。高恒。乘驛前往。

會同高晉。悉心查勘。高恒現在出差。俟差竣回京之後。即行起程。至淮徐河道。或有毗連山東河南地方。並著一併閱看。○廣東巡撫王檢疏報。乾隆三十年。廉州府屬壆額內荒蕪稅。十六頃八畝有奇。廣州。潮州。肇慶。雷州。瓊州等五府屬壆額外荒蕪稅。六十頃四十八畝有奇。又會同縣。壆復難壆荒陷屯稅。二頃十五畝有奇。○癸卯。

上詣暢春園。問

皇太后安。○詣

大高殿

壽皇殿行禮。○還宮。○甲辰。

上御乾清門聽政。○諭曰。土默特蒙古伊什策楞爭控施捨廟宇地畝一案。朕因集福始由歸化城副都統來京。命軍機大臣詢問。據集福稱。伊什策楞如何在將軍前呈控。及將軍如何辦理之處。俱未聞知。將軍行文達部。亦未由歸化城轉行等語。此係土默特蒙古事

體。自當與歸化城副都統。一同商辦。今嵩椿一人專主。並不令副都統與聞。甚屬非是。嵩椿如此行事。集福亦當詢問。或即行奏聞。乃佯為不知。聽其所為。亦屬非是。看來各省將軍。竟有蔑視副都統之事。各省駐防。設立將軍。副都統。原為諸事以將軍承辦。副都統協辦。如事事皆將軍一人專主。則設立副都統。果何為乎。即如京內各部院尚書侍郎。八旗都統。副都統。亦皆一體辦事。尚書都統。又何

嘗一人專主耶。外省副都統。如不循分。與將軍爭執。妄為。將軍即當參奏。如成德在西安副都統任內。與將軍爭執。任意妄為。朕即將伊治罪。將軍如蔑視副都統。諸事自行專主。副都統係二品大臣。有奏事之責。亦應據實陳奏。朕分別是否。亦斷不肯偏護將軍。嗣後各省將軍。副都統等。辦理事務。必須和衷共濟。凡請安奏事。俱令副都統列名。將軍固不可蔑視副都統。副都統亦不可任意。與將軍爭執。著將此通諭知之。○諭軍機大臣等。阿爾泰等奏。自雜谷。親自金川。康八達地方。即卡畏懼。率眾跪迎叩顙。業經退還額碩人口。及辦理各情形一摺。未免存將就了事之見。金酋與眾土司互相仇殺。並未干犯內地。原無庸聲罪致討。且其事亦不值一辦。特因九土司各懷觀望。不能齊心併力。共勦金酋。則以蠻攻蠻之策。難以復行。是以諭令該督提等。親赴該處。明白曉諭各土司。俾其咸知鼓

勵合羣力以自相捍禦使金蠻不敢侵擾隣封如土司等游移兩端致為金蠻蠶食或潛相黨附則并土司之地收勦之改土歸流永靖邊徼仍令細察番衆環聽之際能否畏悟感奮以審事機或并至金川地界傳諭郎卡示以天朝威德覘其情形若何以定進止並非欲招致郎卡完結目前之局也嗣據阿爾泰等奏行至中途郎卡遣人懇請退礮息爭各緣由朕以該督提等尚未見郎卡之面率信其來人稟籲數語遽令盡如其願未中此事竅要當經降旨詳悉飭諭今復據阿爾泰等稱親抵金川地方郎卡率領土舍頭人環跪叩首畏罪輸誠情願將所占額礮山梁並先後所搶各土司人口退還各安住牧不敢再出滋擾該督提業經驗辦完結並面許以准頒承襲新印及給還喇嘛人口既已允其所懇自不便復有改移此時亦只可將錯就錯以完此案矣但該督提如此辦理究未妥

善不知蠻性反覆靡常現在姑為此乞恩俾免之計果能保其永遠不復更滋事端耶即如從前辦理金川時郎卡畏懼兵威歸誠悔罪今甫十餘年已不能謹守約束尚有肆擾隣境之事阿爾泰等自問一督一提親臨其地較前此平定之役聲勢輕重若何而謂蠻酋竟誠心凜惕從此遂與各土司共安住牧永無侵軼耶此奏姑從所請辦理但該督提等遷就苟安實未能體朕原諭大旨著將此傳諭阿爾泰等知之○旌表守正被戕之直隸喀喇河屯民劉三妻林氏○乙巳督理街道御史素爾訥等奏臣等奉命督理街道溝渠辦事須有公所懇將現在移駐永定門外南城兵馬司副指揮所遺衙署賞給臣等得旨著賞給○丙午鑲紅旗蒙古都統奏請補授佐領得旨覽此承襲佐領家譜內人少而佐領多此內既有滋生佐領著於滋生佐領內撤出一缺作為公中佐領○丁未

上御懋勤殿。勾到秋審陝西。浙江。江西。情實罪犯。停決陝西斬犯一人。浙江斬犯五人。絞犯二人。江西斬犯一人。餘七十六人。予勾。○策試中式武舉顧先龍等五十一人於太和殿前。○諭向來外省捐監事例。原令其捐輸本色。以補倉儲。乃行之有年。漸至多捐折色。遇有需用之時。仍屬不敷支給。且州縣官承辦此事。收捐時。難保其不多收勒索。或從中侵蝕。那移。種種弊端。皆所不免。自不若任部援納。額數既有成規。不致浮收滋弊。況各省所捐折色。仍須採買還倉。則撥用部帑。較之動用州縣存貯之項。尤為妥協。是以前經降旨。將陝甘捐例停止。仍令願捐貢監者。赴部報捐。以歸畫一。現在除福建廣東湖南湖北雲南等五省。或在邊遠。或為出米之鄉。著各該督撫查明實在情形。應行應止。詳悉具奏。再降諭旨外。所有直隸安徽山西河南等省。事同甘肅。捐例即著一體停止。均令赴部投捐。

至各該省倉穀積貯。務須籌備充裕。倘有缺額穀石。俱即動項如數買補。嗣後如有本省庫項不敷。應行請撥之處。該督撫等確覈情形。隨時據實奏聞。聽候酌量撥給。該部知道。○諭軍機大臣等。外省常平捐監事例。原令其捐輸本色。以備倉儲。乃行之年久。漸至多收折色。承辦官吏。不無浮收需索。及那移侵蝕等弊。自不若任部報捐者。轉屬簡便妥協。前已降旨。將陝甘捐例停止。仍令赴部報捐。復經查明各省捐監事例。未經停止者。尚有九省。所有安徽直隸山西河南等省。現在降旨。並著一體停止外。其雲南一省。產米本少。商販又難於接濟。福建廣東本地米糧。亦屬不敷。或取資於臺地外洋。或藉給於船舶販運。則常平倉穀。果能多捐本色。自於積貯有益。至湖廣一省。向稱產米充裕。若平時寬餘儲待。不特本省有備無患。設遇隣省需糧。亦可酌量協撥。然祇可多存本色。不可言及折

色。且各該省向設常平事例。是否實在收貯本色。現今或已足額。無需再捐。或尚需仍留本省收納。并果否裨益倉儲。不致有名無實。及啟官吏私徵折色。藉端滋弊之處。著傳諭各該督撫。將實在情形。及此事應行應止。逐一查議。據實奏聞。候朕另降諭旨。○以涼州將軍巴祿。署正白旗漢軍都統。○戊申。

上御紫光閣。閱中式武舉騎射。○軍機大臣等議覆。巴里坤總兵德昌奏。籌辦穆壘屯田事宜。

宜。一穆壘迤西一帶。水澤有大有小。茲就水澤易周處。自吉爾瑪泰。至特訥格爾。計可墾田八萬餘畝。安插民人二千六七百戶。原議本年屯田糧石。建蓋房間。止備明歲召募二百戶之用。未免規模狹小。請於戊子年起。每歲招移三百戶。俟積貯有餘。隨時廣為招徠。一今年原派兵二百名。明年種地四千畝。照本年九分收成計。止得糧三千六百餘石。實不敷用。請自三十二年始。除本年原派兵二

百名外。添派三百名。千把總外委四員。共額定屯兵五百名。種地一萬畝。一現在招徠戶民。每戶有兵蓋土房二間。無庸給修房銀。其每戶給農具一副。馬一匹。令巴里坤同知豫辦。但該處馬匹無多。請改辦牛隻。一原雇工作之泥木匠役六十名。減二十名。拉拽木料馬七十五匹。減二十五匹。一巴里坤兵丁差繁。應將原派在屯之鎮標兵二百名。撤回一百名。明春即於沙州安西。靖逆各營。調兵四百名。千把總外委四員。共合五百名。定額屯田。俟招足時停止。均應如所請。從之。○理藩院議奏。疎防卡座。致郭羅克搶掠之扎薩克貝子。台吉等。請分別斥革。得旨。扎薩克有管人辦事之責。羅布藏色布騰恭格車凌俱係扎薩克。乃選懦無能。致令游牧處所為郭羅克搶掠。著照理藩院議。革去扎薩克。另行派人承襲。伊等之貝子台吉。仍加恩賞留。應如何議處之處。交理藩院再議。○大學士管雲

貴總督楊應琚奏。整賣頭目。召齊約提。景線頭目。訥賽。景海頭目。召罕彪。各率夷民。前來孟良投誠。並據召齊約提稱。六本頭目。召猛齋。隨即前來等語。查整賣舊名景邁。又名八百媳婦國。元時曾大費兵力。征之不下。其景線。景海。亦外域最大部落。今俱歸誠。向化。似應從優賞給。擬將召齊約提。訥賽。均賞四品宣撫司職銜。其景海地方較小。擬將召罕彪同六本頭目。召猛齋。均賞土守備職銜。應納賦稅。請照孟連等土司之例。每年徵收差發銀兩。得旨著照所請行。該部知道。○已酉。上御紫光閣。閱中式武舉技勇。並覆閱騎射。○諭曰。舍圖肯。永寧奏。盛京禮部。工部。所屬壯丁。耕種田地。今夏被旱。入秋被霜。未免收成歉薄。請照盛京旗民地畝。一體辦理。俱著照所奏行。○庚戌。上御懋勤殿。勾到秋審安徽。江蘇。河南。情實罪犯。停決安徽絞犯二人。河南絞犯一人。餘八

十九人。予勾。○辛亥。

上御太和殿傳臚。賜中式武舉一甲白成龍。黃宗傑。彭先龍三人。武進士及第二甲李芳園等五人。武進士出身。三甲趙攀龍等四十三人。同武進士出身。○諭曰。高晉等奏。報韓家堂漫工。於十月十一日合龍。大溜全歸正河。覈計用過工料銀十五萬兩有奇等語。此次堵築漫口工程。高晉等親駐河干。督率文武員弁。晝夜趲辦。自開工以訖合龍。為期迅速。帑不虛糜。經理頗屬盡心。高晉。李宏。及在工員弁。俱著交部議敘。巡撫明德。一聞河流漫溢。即趕赴徐州。協同催運物料。撫卹災民。亦屬出力。著一併交部議敘。所有急公辦料之地方各員。並著該督撫等。查明咨部議敘。以示獎勵。○閩浙總督蘇昌奏。安戢臺郡邊界事宜。劃出界外之地。多係耕久熟田。貧民每於近界處。零星搭蔭居住。圖便私墾偷種。生番見人戶稀少。乘間肆虐。現飭通查各屬。凡逼近

番界之零星住戶。悉令遷移附近大莊居住。其房屋。不過竹蓼草舍。移搭極為便易。二湖。加志閣。兩莊。係後壠汎所轄。離汎俱二十里。每有生番肆虐。不及救護。查後壠莊。已成腹地。不須多兵。現在駐劄外委千總各一員。兵七十四名。請撥兵十四名。駐二湖。十二名。駐加志閣。加志閣。現有熟番空社。可以修葺居住。二湖。應建營房七間。一。向山一帶居民。與生番相近。雖設有隘口。而生番善於走險。隨處出沒。居民每遭焚殺。查乾隆十年定議。逼近生番地界。每屆深秋。令各設望樓一座。懸鑼巡警。互相救援。但生番乘間肆虐。原不盡在深秋。望樓竹木搭架。亦難經久。應於近山各莊。向山一面。建設火磚望樓一座。令莊民每夜輪流。派出四人在樓守望。見有生番蹤跡。立即放礮鳴鑼。俾居民聞聲接應。一。貧民於近界處。搭蓼私墾。至越出界外。零星偷種番地。猝遇生番。鮮不斃命。嗣後無論界外

之三湖蛤仔峙等處。不許私種。即逼近番界之荒埔。悉行嚴禁。責成各巡檢。及附近汎弁。於禁墾各處。每月各帶兵役遊巡。其無巡檢處。即令縣丞輪查。一。乾隆三年。十一年。清釐民番地界。本屬井然。無如番性多愚。漢奸利誘債賂。移滅定界。漸復越占。比年熟番滋生。日衆。生計日蹙。及今不辦。日久必潛入大山。仍作生番。應查照定例。凡從前立明界址。有檔案可稽者。俱逐一清出。再為立界。如有侵越。即追出。歸番耕管。其例後私墾及債剝占抵。各田園。悉行還番。將本人逐令過水。以杜滋訟。惟是番性無常。仍恐復聽奸徒誘騙。再行私賣。應將各社舊存田園。甲數四至。并續後清出。及賈賣斷歸各業。通查造冊。申送存案。地方官奉行不力。即予叅處。並於各社。刊立木榜。將所有番社田園土名。俱刊明榜內。如再有私墾私賣情事。即將田業歸官充公。並按畝科算治罪。得旨。如所議行。

大清高宗法天隆運至誠先覺體元立極敷文
奮武孝慈神聖純皇帝實錄卷之七百七十

實錄卷之七百七十

事

大清高宗法天隆運至誠先覺體元立極敷文
奮武孝慈神聖純皇帝實錄卷之七百七十一

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文淵閣大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書兼管鑾儀衛滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆三十一年丙戌十月壬子諭軍機大臣

實錄卷之七百七十一

等蘇昌奏辦生番一案其事由以勦殺兇番
直擣巢穴為詞始謂伊等此次必已深入番
境掃穴誅兇多所斬獲及細閱所奏情節則
官兵入山僅止追斬兇番一名並將該番等
蘩舍米糧焚燒一二處而回餘番俱四散奔
逃並未勦戮多兇可見外省習氣遇有此等
事務往往過涉矜張揆之所辦情形名實每
不相副該督未加深察亦遂據稟詞入告耳
然蘇昌係滿洲大臣正不宜如此也至此案

起衅之由。原因內地人民。越境滋事所致。其事本非重大。且不法生番。從前業已擒殲三十餘犯。鎗斃一百餘人。今復燬其社。蔡積聚示之懲創。亦足以申國法而昭炯戒。其隣近攸武乃社諸番。又皆畏罪歸誠。就事論事。亦祇可如此完結。其出力員弁兵役。亦只可酌量在外獎賞。不可張大論功。該督奏報之詞。未免誇張失實。殊屬非體。著將此傳諭知之。○貸齊齊哈爾黑龍江。呼蘭等三處。八旗水

師營人等。及官莊壯丁。本年旱災。口糧並免官莊額糧有差。○撫卹江蘇銅山蕭縣及徐州衛坐落銅山縣屯田。本年水災貧民。並蠲緩新舊額賦有差。○撫卹陝西華州華陰潼關等三廳州縣。本年水災貧民。並停徵新舊錢糧有差。○癸丑諭曰。史奕昂。朕念其為大學士。史貽直之子。且曾任藩司。辦事尚無貽誤。服闋來京候補。其階級與侍郎相等。是以擢用兵部侍郎。此係朕垂念老臣。格外推恩。

之曠典。伊履任兵部以來。屢經召見。察其言語舉動。雖似小有聰明。而其不能安分之意。時復流露。偶值召對之次。諭及兵部大臣大學士尹繼善在軍機處行走。不能每日進署。託庸年齒近邁。且係初理部務。彭啟豐又係碌碌無能為之人。鐘音蔣櫟亦未能練習部務。汝與期成額。尚屬解事。應隨處留心。此原不過令其於日行事件。稽覈司員勤惰。查察書役弊端而已。乃伊恃有此諭。遽爾沾沾自

喜。大言不慚。遂欲獨侵事權。放恣自用。意似朕以部務專任伊一人者。即如戶部侍郎英廉。袁曰修等。召見時。朕亦曾諭以傳恒。阿里衮。于敏中。俱兼軍機處。爾等當加意經理部務。又豈即以戶部之事。專委之二人乎。而伊等並未因此。稍有喜事。矜張之態。史奕昂豈未之見耶。昨期成額奏。伊在部面斥彭啟豐。有不稱尚書。只宜為司員之語。今詢之彭啟豐。堅稱史奕昂並無此言。但其平日有願為

外任之意。及召詢鐘音。則稱實係共聞。因令彭啟豐面為質對。伊始唯唯承認。史奕昂此語本屬無稽。彭啟豐亦何妨直陳不諱。而乃自居蓄蘊。不言人過。甘效唾面自乾。則不但選悞無能。其居心並欠誠實。此又彭啟豐之結習未除也。至史奕昂希心外任。如果其材堪任封疆。朕豈不欲多得一人任使。即如鐘音才具並未過人。亦經歷任巡撫。謝事回京。尚可畀以侍郎之任。若史奕昂用為巡撫。其辦事斷不及周琬。而干咎必更有甚於周琬者。何則。周琬以氣凌人。則有之。而操守尚可保。若史奕昂則并操守亦不可信矣。又史奕昂因朕萬壽。曾與鐘音同日進貢物。朕以侍郎秩居二品。原非分所應進。是以一體却回。並無歧視。迨後申飭王檢進貢諭旨內。有聯上下之情一語。史奕昂未免退有後言。向同官遂有我等不用聯情之語。前經蔣櫟奏及朕尚未深信。及詢之期成額鐘音亦稱實有

此語。史奕昂如出之有心。敢於怨望。即置之重辟。亦所應得。但朕深知其平素輕率妄談。心口多不能相應。故不加以深究。但其在部甚不安靜。總因器小易盈。不能承受恩澤。本應重懲示儆。究念其為老臣之子。姑從寬降為三品卿銜。令其回籍閉戶讀書。變化氣質。數年後如能改悔自新。將來或再加恩錄用。亦未可定。倘在家仍怙過不悛。則是伊自取罪戾耳。至其言虛實有無。史奕昂亦當自知。設使期成額將櫟鐘音。和同傾軋。造為此語。史奕昂不妨據實直陳。朕當特派大臣究訊。無難水落石出。即治伊等以誣奏之罪。斷不肯顛預了事也。彭啟豐學問尚優。辦事本非所長。今復意存模稜。並不據實奏對。殊失大臣之體。史奕昂兵部侍郎員缺。即著彭啟豐降補。並將此宣諭中外知之。○命鑲藍旗滿洲副都統永慶前往烏什。協同永貴辦事。以輔國公圖爾都署鑲藍旗滿洲副都統。○旌

表守正捐軀之江蘇宿遷縣民郭得妻郭氏

○甲寅

上詣暢春園問

皇太后安。○幸圓明園。○諭軍機大臣等。崔應階奏請將東省民壯概行改習鳥鎗一摺。傳諭各該督撫酌量該省情形。或可做照一例妥辦之處。查明覆奏。各省業經陸續奏到。閩省視浙省程途更遠。而蘇昌已於八月二十六日奏聞。熊學鵬查奏之摺。直至十月初三

日始行拜發。距奉旨時。已五閱月。未免過於遲緩。此等並非難辦之事件。何至稽延許久。則浙省諸事因循可知。熊學鵬著傳旨申飭。○又諭。前於黃士俊奏報台州被災情形摺內。詢及地方官辦賑安否。茲據奏稱黃巖太平三縣俱即親歷撫綏。惟臨海縣張端木不能親身遍歷災地。措置未免遲鈍等語。該處此番猝被風潮。臨海尤為較甚。該縣張端木不即親勘撫卹。經該撫嚴飭。並委道府等協

理始行查辦。熊學鵬何以並未奏聞。著傳諭該撫將該縣張端木所辦賑務果能奮勉妥協與否。及平日居官若何之處。一併查明即行據實覆奏。尋奏張端木從前辦理災務尚無偷安貽誤。經臣面飭。頗能奮勉。是以未經奏聞。其平日居官操守謹飭。聽斷亦屬平允。得旨知道了。又批。如此策勵屬員。而又不苛求。甚是。○戶部議覆山東巡撫崔應階奏稱兩淮鹽課自江南起程。經由山東直隸。請照

江浙兩省現行之例。填給水路勘合。運送進京等語。應如所請。並嗣後兩淮起運京餉一體照辦從之。○以吏部左侍郎陸宗楷為兵部尚書。調工部左侍郎程景伊為吏部左侍郎。轉工部右侍郎李宗文為左侍郎。調禮部左侍郎劉星煒為工部右侍郎。轉禮部右侍郎程巖為左侍郎。以左副都御史羅源漢為禮部右侍郎。命候補翰林院侍讀學士邊繼祖仍在尚書房行走。○旌表守正捐軀之

直隸邢臺縣民陳開喜妻惠氏○乙卯。戶部議覆署兩廣總督楊廷璋等奏稱奉准部議酌定採辦銅鉛限期查廣東委員運鹽至雲南辦銅回廣東前請統限二十箇月以八箇月運鹽十二箇月運銅今仍照定限辦理至採買白鉛原定限四箇月今改限一百日應如所請從之○蠲免直隸懷安縣本年被霜災民額賦及被旱被水被雹被霜勘不成災之獻縣阜城交河景州吳橋東光寧津青縣

靜海滄州鹽山慶雲尉州宣化萬全西寧懷來等十七州縣分別貸緩有差○丙辰

上詣暢春園問

皇太后安○還宮○軍機大臣等議覆歸化城副都統集福奏稱喜峯口監督兼理歸化城牲隻稅務未免鞭長莫及請由理藩院派章京一員駐歸化城辦理並管該處落地稅務應如所請從之○豁除江蘇丹徒縣卅江田地十四頃三十畝有奇額賦○丁巳軍機大

臣等議覆歸化城副都統集福奏稱歸化城蒙民雜處事務繁多若統歸綏遠城將軍辦理轉多掣肘請頒給副都統印辦事較為簡易應如所請從之○又議覆浙江巡撫熊學鵬奏稱衛所守備千總向與營員按月操演近年並無其事至撫臣調考時每藉漕差不到其來赴考驗者騎射率皆不堪請嗣後除與總漕相近者聽總漕調驗外其與總漕隔省及道途遙遠者不必責令同副參以下營

員操演令就近之督撫提鎮隨時調考與所屬標營操演等語查衛所備弁不隸營汛統屬其託故不肯會操在衛所無所顧畏在營員亦難約束應將此例停止至所稱令就近督撫提鎮隨時調考之處查衛所員弁即不出運時猶有經理錢糧及催兌催開等事若責令一體操演恐妨漕務應無庸議仍照向例於不出運時令各就近督撫每年調考一次從之○兵部議覆本部左侍郎蔣鼎奏武

闡外簾事宜。外闡監試大臣。閱定雙好單好字號。封送外簾。其一切弓刀馬石。向委承辦吏胥。在各所照數填寫。請嗣後。令監試御史等官。親筆填註。并親用雙單字印。執事人員。所帶吏胥。向於受卷彌封後。即行放出。請嗣後。無許先期出場。俟榜發後。逐名點放。均應如所請。從之。○以服闋雲南鶴麗鎮總兵左秀。為直隸正定鎮總兵。○戊午。

上御懋勤殿。勾到秋審山東山西直隸情實罪犯。停決山東斬犯六人。山西斬犯一人。絞犯一人。直隸斬犯一人。絞犯五人。餘八十一人。予勾。○諭。各省分發試用舉人。係朕加恩寒畯。格外曠典。若復為之鰥鰥過計。不特瑣屑難周。亦非用人行政大體。前因阿思哈常鈞。錢琦等。紛紛陳奏。為無厭之請。業經降旨。通諭各省。今顏希深復奏。請將本省出缺一項。暫停部選。俾分發舉人。得以及時補用等語。所奏更為不諳事理。此次揀選。既令舊科舉

人。得以及鋒而試。並使選途廣為疏通。若因此而轉將應歸部選之缺。留減停銓。則在部需次之員。又必至於淹滯。顏希深止知一端。而不顧全體。所見實屬拘墟。況此等揀發人員。若使株守寒窗。數十年尚不得列名仕版。今既分發各省。寬途錄用。不過五六年。遲亦不過十數年。皆可接跡彈冠。若更思占盡便宜。無論伊等不當存得隴望蜀之想。即為之上司者。亦豈應嘵嘵瀆奏。為是不憚煩耶。顏希深著飭行。再將此通諭各省知之。○又諭。曰。顏希深奏。請嗣後各省督撫藩臬陳奏事件。俱由驛馳遞一摺。所見非是。已於摺內批示矣。然此見恐亦非僅出自顏希深一人。希深無知。被眾所惑耳。且各省遇有應行迅奏事宜。原許其填用火牌。由驛馳遞。至尋常奏摺。自有弁役家人。可以齎送。兼程專達。並未嘗稍有稽延。且向來督撫中間。有以非緊要章奏。擅動驛馬者。尚且傳旨申飭。顏希深乃

請將各省奏摺。概用驛遞。各省應摺奏之文武大員甚多。將何以分孰應由驛。孰不應由驛。若皆准行。則紛紛傳送。必致到處繹驛。倘遇衝繁之區。各省奏函並集。往來應付。勢且日不暇給。不但於郵傳有礙。國家亦無此政體。設因省惜程費起見。則督撫藩臬。每年廉俸不薄。即遣人齎奏。途間資斧需用無多。而必欲恡此區區。過為計較。尤屬見小。所奏不可行。並將此通諭知之。○又諭曰。阿思哈奏

嵩縣知縣康基淵開渠溉田。著有成效。經該道府親勘屬實。批司記功。以示獎勵。一摺。州縣為親民之吏。於地方農田水利等事。果能實心經理。裨益民生。實為吏治首務。今該縣康基淵挑濬伊河兩旁古渠。並山澗諸流。可資引導者。一律疏治深通。溉田六萬二千餘頃。洵屬崇尚實政。留心民事之員。僅予記功。不足以示鼓勵。康基淵著交部議敘。但有司承辦此等事務。期在誠心為民。其所經畫溝

洫畦塍。必須有界蹟可指。豐收果有成效。及該上司履勘相符。方足表循績而膺錄敘。若牧令等因有此旨。妄生冀倖。遂爾粉飾沽名。虛文塞責。於閭閻休戚。毫無裨補。甚或辦理不善。紛擾更張。則是名為興利。而轉以滋累。又不可不防其流弊。惟在各督撫覈實體察。以為課最耳。著將此通諭知之。○鑲紅旗滿洲都統奏。池州營遊擊西拉布。以騎射生疎。叅革。其世襲騎都尉。應否准留。得旨。滿洲等

補放綠旗營官。正為伊等表率。今西拉布馬步騎射。平常生疎。以致被叅。非尋常事革職可比。伊本身所有世職。不可仍留伊身。著另行選人承襲。○兩江總督高晉奏。督撫關防向來俱用硃印。與道員同知關防。似無區別。請嗣後除本章仍用硃色蓋印。一切文移。概用紫花印。其布政使用紫花印之處。請停止。得旨。著照所請行。該部知道。○豁免江蘇丹陽縣。卅江田地。乾隆十五年至二十七年未

完米麥一百十石有奇。○己未諭據阿里衮高恒奏稱將軍恒祿至吉林因彼處風俗刁悍往往偵探官長事務捏造流言伊恐家人在外滋事凡出入俱有記載不時訪查惟役使跟班兵丁不敢私用家人大有畏事之意等語將軍副都統為通省董率宜時出操練官兵技藝凡有關生計風化一切事務俱當返其舊俗斟酌辦理似此萎靡不振惟知看守家人則簡放將軍大臣等果何為乎如云

畏人訐訟果其持身清正無簠簋不飭之處即屬下控告亦徒自取罪戾而已朕安肯任其寬抑若持身不能清正即畏懼亦屬無益終必至於敗露又豈能掩人耳目即如家人亦何嘗不可使用苟其肆行滋事一經發覺即應嚴加懲治安有不敢使用之理乃恒祿初不知此一味畏事於將軍體制何在寧不為屬下所笑乎且吉林乃我滿洲故土通省之人皆仰望於將軍大臣皆若此何以使屬

下之人知所懲懼著傳諭恒祿等嗣後惟清正自持正己率下力挽地方頽風以復淳樸舊習無庸如是過於畏事也○庚申諭今年山東歷城等州縣偶被偏災業經降旨令該撫詳悉查勘加意賑卹毋致窮黎稍有失所但念該處毗連災地及勘不成災之地畝村莊秋收究屬歉薄若將新舊錢糧照常徵輸閭閻未免拮据朕心深為軫念著將歷城等五十九州縣衛及勘不成災之泰安青城單

縣三縣凡毗連災地收成稍歉之處所有本年應徵錢糧及民借銀穀等項並著加恩一體緩至明歲麥熟後徵收以紓民力該部遵諭速行○又諭銀庫所奏月摺內地丁款下開寫絲毫忽微等細數緣各省徵收之時必須先有散數方可合併計算彙成總數是以照例開寫但此等名目既已極其纖悉而秤兌時並不能將此絲毫忽微之數分晰彈收徒屬有名無實於政體亦多未協嗣後各省

徵收錢糧及一切奏銷支放等事俱著以釐為斷。不必仍前開寫細數。其如何將奇零名目覈計歸減之處著該部詳悉定議具奏。尋議凡銀數統以釐為斷。其不及一釐之數應請折衷歸減。在五毫以上者作為一釐。歸併造報。不及五毫者悉行刪除。米糧等項以勺為斷。其奇零在五抄以上者作為一勺。不及五抄者刪除。又向來搭放俸餉制錢時原以一丈為止。而冊內登報有絲毫忽微虛數亦應請一概刪除。其各省解辦銅鉛顏料等物以觔兩計者照銀兩之例歸減。至各州縣衛應徵銀糧統令於由單總數之下遇有奇零遵照歸減。其單內前列細款仍存其舊以符賦役全書魚鱗冊籍之數。又各省徵解鹽課關稅并一切雜項錢糧及內外各衙門支放銀米等項每款各有成總亦令於總數之下遵照歸款從之。○辛酉禮部奏

皇太后萬壽聖節慶賀禮儀得旨是照例行禮

奉

皇太后懿旨今年停止筵宴。又奏冬至節應行慶賀禮得旨奉

皇太后懿旨今年冬至著停止行禮。以江西布政使錢琦福建布政使顏希深對調。以廣西龍英土知州趙哭子承業襲職。緩徵安徽安慶懷寧桐城宿松望江貴池銅陵東流當塗蕪湖繁昌無為廬江巢縣靈璧宿州虹縣泗州慶陽廬州等二十州縣衛本年水

災額賦分別賑貸有差其應徵新舊漕項銀兩漕糧特予緩徵。壬戌吏部議覆大學士管雲貴總督楊應琚奏稱滇省迤東道轄曲靖等十三府現在普洱府十三土司之外復設有孟艮整欠二土司該道遠駐尋甸稽察難周請於普洱府添設迤南道一員駐劄府城將附近之鎮沅元江臨安三府併歸管轄又永北一府並無屬邑事務亦簡該府設有同知一員堪以管理請以永北府同知改為

掌印同知將知府裁汰。至迤東道所轄除撥隸迤南道四府外。尚有九府。究屬遼遠。應將雲南武定二府。分隸鹽道。其曲靖廣西廣南開化東川昭通潯江七府。仍歸迤東道轄。均應如所請。從之。○以工部侍郎珠魯訥兼署戶部侍郎。○以翰林院侍講畢沅充日講起居注官。編修王燕緒署日講起居注官。○癸亥。以大理寺卿申甫為左副都御史。○甲子。上御乾清門聽政。○諭軍機大臣等。甘肅提督

王澄來京。陞見。召對時。看其人尚明白。而奏對語言微露依附文墨之意。且為伊子乞賞文舉人。尤非武臣所宜陳請。已令軍機大臣傳旨訓飭。王澄身膺專閫重寄。當以訓練士卒整飭戎行為務。方為稱職。若假託斯文。妄為筆墨。必致廢弛營伍。著傳諭吳達善留心察看。倘該提督或喜文事而疎武備。於該處營務致有貽誤。著該督即據實奏聞。毋稍容隱。○又諭前據馬全奏六月間。駕船巡查洋

面。行抵羊山。陡遇風浪。有標屬右營一號繒船。打至張公嶼。船身擊碎。失去鎗礮等物。尚有未經撈取之紅衣礮一位。劈山百子礮三門。烏鎗腰刀十三件。現飭各員弁。俟小汐時打撈。并呈報督臣。照例查辦等語。自夏月迄今。為日已久。鎗礮等件。曾否續經撈得。未據該督摺奏。著傳諭高晉將如何飭屬辦理。及有無撈取全獲之處。詳悉查明具奏。尋奏先據馬全呈報。撈獲礮位。烏鎗腰刀。鐵錨等件。

尚有紅衣礮劈山礮各一。百子礮二。并鎗刀等件未獲。又續獲劈山礮一。現仍委員設法打撈。得旨。此等事何不速行詳查妥辦。江南文武吏治廢弛。朕未曾諭汝乎。○調正白旗漢軍副都統達桑阿為正藍旗滿洲副都統。以頭等侍衛五福為正白旗漢軍副都統。○以鑲紅旗蒙古副都統承德為正藍旗護軍統領。○乙丑。諭八旗兵丁等。本年十二月。次年正月。應扣庫銀。著展限兩個月。○軍機大

臣等奏查官員子嗣挑養育兵者八旗滿洲每旗二三十名蒙古漢軍每旗約十名此內有泥於甲喇佐領分數挑取者或因家口衆多挑取者或因賠補官項挑取者但有係外任官并叅領等大員部院章京等子嗣挑補者甚多伊等俱現任職官該旗大臣等竟將伊等子嗣挑補養育兵甚屬不合請將伊等養育兵革退并從前驗放之各旗都統等交部查議再此內向係微員兵丁將伊子挑補

後經陸續陞任者其養育兵亦請革退此項革退之缺俱交各該旗大臣等遵旨於應得人等辦給再步軍尉雲騎尉雖係五品但差務殷繁所得無幾請將伊等子嗣所挑養育兵俱照驍騎校護軍校筆帖式等微員之子仍留本身從之○戶部議覆江蘇巡撫明德奏稱奉准部議酌定採辦銅鉛限期請嗣後委員領銀自江蘇至雲南省城定限一百八十二日及領運銅鉛自廣西全州以下至蘇

州應行九十六日等語應如所請至委員自雲南領銅運至剝隘地方酌定期限之處聽雲貴總督定議外其自剝隘至百色百色至全州先據湖北巡撫定限九十四日應令該撫遵照辦理至該省委員在湖北採買鉛錫運回蘇州亦應如所奏定限四十日其自該省領銀至湖北亦如之從之○命吏部尚書託恩多兵部尚書陸宗楷工部尚書董邦達俱在紫禁城騎馬○丙寅

上詣

奉先殿

壽皇殿行禮○命禮部尚書張泰開在紫禁城騎馬○是月盛京將軍舍圖肯等奏軍機大臣等議覆奉天府府丞李綬奏請設瀋陽書院一摺令臣等會議查瀋陽書院始於乾隆七年前任府尹霍備勸捐修建向緣經費無項未經辦理今即就舊有書院延師慎選生徒勤加訓誨實於文風有裨至奉天州縣每

學設立學田一千畝。每年可得租銀七百餘兩。此項租田原以養贍貧士。令其力學。應即以此作束脩膏火之費。餘銀仍酌給貧士。其一切應行事宜。責成治中總理府丞專司考察。從之。○直隸總督方觀承奏武清縣屬范甕口一帶。舊有淤灘葦地。四十七頃八十六畝零。內除河身起土坑蕩。並隄壩占壓。及栽柳空隙等地。八頃九十一畝零。實存地三十八頃九十四畝零。近因積次受淤。已成高灘。

非葦性所宜。應交地方官文明召墾改種禾稼。初種之年。稍寬租數。一二年後。漸成熟地。即可普定租額。以每畝租銀二三錢計。每年可收銀一千餘兩。除歲需河神各廟香火之用。餘銀存貯永定河道庫。遇有河隄等公務動用。得旨如所議行。○江蘇巡撫明德奏。常熟縣福山塘一河。為蘇州等處入海之要津。長三十餘里。兩岸支河汊港八十餘道。其間數萬頃民田。缺雨之時。全賴此河灌溉。祇因

海潮帶沙而入。河底常有淤塞。節經借項挑濬。自二十六年開濬後。現又淤壅。請於司庫借支銀九千七百四十餘兩。乘時挑濬。所借銀分作兩年。於得沾水利各民田按畝徵還。得旨如所請行。陝甘總督吳達善等奏。軍機大臣等議。以烏嚕木齊添兵屯糧。是否有益。並有無糜費。令臣等酌議。查烏嚕木齊等處多有可耕之地。招民耕種。莫如兵屯為善。多一屯兵。即多得一兵之糧。而積貯亦得充

裕。就現派兵六百名。籌算官兵往返支領。暨在屯五年所費。共需銀五萬六千四百七十餘兩。糧一萬五千六十餘石。按屯糧五年約收糧四萬二千餘石。除抵用外。尚存糧二萬六千九百餘石。以每石銀一兩六錢計。共值銀四萬三千九十餘兩。又加以馬步兵各半派撥。內扣缺馬三百匹。停支料草乾銀五年。節省銀二萬一千五百兩。共銀六萬四千六百五十兩零。除抵用外。尚餘銀八千一百八

十餘兩。即內中或盈縮。亦不甚懸殊。如再撥兵一千。或二千名。便可照此遞算出入。至陝甘逼近邊塞。兵額較多。今口外已成內地。即多撥幾千名。辦理亦易。惟烏嚕木齊。現在存糧未裕。若驟撥多兵。恐有不給。俟現撥兵六百名。耕種一年。獲有餘糧。擬於乾隆丁亥年。派赴兵一千名。戊子年再派一千名。此後尚需屯兵若干。臣等酌視情形奏撥。得旨。如所議行。○又奏。從前陝甘出征馬兵。其料草乾

銀。仍給該兵家屬。嗣經臣權其道路遠近。將在庫車以東。差屯馬兵。除本身月餉外。其家屬應得料草乾銀。概行停支。現在伊犁等處。俱成內地。其庫車以西。差屯馬兵。應請一併停支。報聞。○四川總督阿爾泰等奏。查布拉克底。與巴旺爭界。郎卡幫兵。據占卡卡地方。茲郎卡。經臣等親至夷巢宣諭。當即退還黨壩額。及減金嶺。並遵從差遣頭人。跟隨委員。前至布拉克底夷巢。徹退防兵。勸令退還。

卡卡。布拉克底土舍安多。見郎卡不能為力。又經委員嚴切責諭。遂將卡卡地方。退還巴旺收領。並求准其盟誓和好。報聞。

大清高宗法天隆運至誠先覺體元立極敷文奮武孝慈神聖純皇帝實錄卷之七百七十一

大清高宗法天隆運至誠先覺體元立極敷文奮武孝慈神聖純皇帝實錄卷之七百七十二

監修總裁官理藩院學士太子太傅文淵閣大學士文淵閣領閣事領侍衛內大臣稽察欽奉 上諭部內處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣陸桂

總裁官經筵講官太子太傅太常殿大學士文淵閣領閣事稽察欽奉 上諭部內處管理刑部戶部三庫事務

世襲騎都尉軍功加十九級隨帶加二級又加二級尋常加二級軍功紀錄五次

尋常紀錄十四次臣德瑛經筵講官太子少保工部尚書紀錄六次臣曾振鐸等奉

敕修

乾隆三十一年丙戌十一月丁卯朔諭省會

實錄卷七百七十二

一

首縣代各上司衙門備辦鋪設宴會等項實為陋弊前因舒赫德奏及此事特降旨令各督撫查明禁革並將各省有無賄賂之處據實覆奏旋據陸續奏到悉稱並無其事朕此時亦姑不深究止將覆奏各摺俱批交該部存案今吳達善奏稱臯蘭縣向有墊買什物及代辦筵席等事此不過因甘省積習經舒赫德奏明難於掩護不得不畧陳梗概可見各省督撫所奏皆非實在情形莫謂朕果信

各省之皆無其弊而甘省獨有也但經此番嚴飭查禁後諒必實力釐剔不敢復蹈故轍倘仍陽奉陰違將來別經發覺或被言官糾劾不特將本任上司屬員嚴行懲治即原奏不實之督撫亦不能曲為寬貸也著再通行飭諭知之○陝甘總督吳達善奏報巴里坤屯種官田本年共收小麥六千七百六十五石豌豆一千九百八十石青稞四千五百四石下部知之○戊辰

上詣暢春園問

皇太后安○幸圓明園○刑部議准廣西巡撫宋邦綏奏稱桂林府屬全州所轄西延鎮設有州同分駐離州寫遠請嗣後該處村莊呈報命案如去州治一百里者仍令該州親往相驗如在百里以外准令該州同相驗填格取結錄供移州審詳從之○以三等輔國將軍都祥孫德海照例襲封三等奉國將軍○已已諭前因已故雲南提督李勲辦事出力

曾傳吉楊應琚詢其有無子嗣。曾否出仕。今據奏到。李勲有子李逢堯。現年十四歲。並未隨任。著傳諭該督。俟其年至十八歲。即行送部引見。該部知道。○又諭。前經降旨。將各省漕糧。分年普免一次。期使海宇黎元。均沾閭澤。但聞漕糧款內。尚有例徵折色。及民戶輸銀。官為辦漕者。雖徵收銀米不同。其為按田起漕之例。則一也。若仍令其照漕項一例輸將。不得與交納本色民戶。並邀曠典。未免獨

切向隅。著申諭辦漕各省州縣內。有徵收折色者。一體概予蠲免。督撫等務董率所屬。實力經理。再行明白曉諭。毋任胥吏藉名滋弊。副朕嘉惠閭閻。普施膏渥至意。該部遵諭速行。○諭軍機大臣等。楊廷璋奏。粵東總兵副將賢否一摺。單內所開副將孫宗夏一員。據稱曉暢水師。熟習船務。但閱其履歷。該員籍隸陝西。何以遂能熟諳水師營務。著該督查明具奏。至總兵歐陽敏。前因失察洋盜案內。

率轉降調。緣伊事屬因公。是以降旨從寬留任。嗣經碣石總兵員缺。一時乏人。以其久任水師。必能練習。遂行調補。並非特加簡擢之員。今據稱該員心多城府。目無涇渭。赴任過省。面加諄囑。冀其奮勉振刷等語。所奏甚是。碣石為瀕海要區。倘歐陽敏莅任後。於諸務不知實力整飭。該督即行據實奏聞。著將此一併傳諭知之。○庚午。

上詣暢春園。問

皇太后安。○還宮。○辛未。諭。湖南省現有應行查審案件。著侍郎期成額。帶同郎中吳壇。馳驛前往湖北。會同總督定長審理。○諭軍機大臣等。據常鈞奏。桂陽州民侯徽添被毆身死一案。情節殊屬含混。已降旨派侍郎期成額。率同郎中吳壇。前往湖北。會同定長秉公查辦。所有應行質訊人犯。即著官兆麟。親身帶往湖北。交與期成額等審擬。途中須嚴加查察。隔別押解。毋任該犯等串供狡卸。著將

此傳諭宮兆麟知之。○又諭曰常鈞所奏覆審桂陽州民侯徽添被毆身死一案。甚屬含混。此案服制攸關。或弟或兄。定擬生死懸殊。斷不宜聽其稍有疑竇。前因李因培原奏。情節游移。是以諭令常鈞悉心研究。務得實情。乃該撫委派司府會審。案情反覆無定。且會審之員。各存意見。持議參差。尤屬不成事體。該撫如果見侯七郎侯學添翻供之處。實有可據。何妨將宮兆麟指叅。乃摺內惟稱會訊之時。宮兆麟在坐默無一言。則該臬司之是否中心折服。無可置辯。抑或另有所見。不隨同附和。俱未可定。此等關係倫常重案。司府等既不能審訊得實。該撫即當親提嚴鞫。使之水落石出。以昭平允。乃復委之一府一縣會審。安見此所委之員。必能盡無枉縱乎。看來此案。非常鈞等所能定讞。現已派侍郎期成額前往湖北。會同定長審理。併令宮兆麟將應行質訊人犯。隔別解往湖北。毋得令其

串供狡飾。可將此傳諭定長及常鈞知之。○又諭曰常鈞奏前任撫臣李因培移交益陽縣書吏郭湘昭擅造匿名揭帖一案。現在研訊明確。係屬畏刑誣認。應仍令該縣另緝正犯等語。投遞匿名揭帖。最為惡習。當查明實據。從重究治。以示懲儆。郭湘昭原認之供。與揭帖內款蹟不符。今既審明省釋。自不致有輕縱。但此等案件。甚有關係。案犯忽認忽翻。視如常事。而同時又有侯學添等一案。亦屢變供詞。可見湖南民情刁悍。狡詐反覆。是其長技。而地方有司辦理讞牘。又多不能虛心研鞫。愈致長奸。則該省之吏治民風。均屬不堪。不可不實力整頓。常鈞身任巡撫。隨時隨事。務須留心整飭。以挽澆風。著將此傳諭知之。○禮部疏請旌表八世同居。得旨。禮部議覆。陝西巡撫明山題。三水縣民趙資。一家和順。八世同居。應如所請。照例旌獎。民風淳厚。倫紀懋敦。朕用嘉慰。宜推旌淑之恩。益廣型

仁之化。茲親製詩一章。並書扁額以賜。仍著加恩賞上用緞疋。用示優異。其給銀建坊題碑入祠之處。均如議行。○欽差內閣學士邁拉遜。直隸總督方觀承奏。臣等奉命查辦深州辦桃控案。緣深州地方產桃。有民人王羲照等三人。夥典王家莊朱姓等桃園三處。七八月中。有州役三名。同鄉長赴三處園內。採辦官桃二次。共採桃一千五百二十六個。內揀去蟲損二百個。應發價十千六百八文。王

羲照等恐州役再至。因聞內務府辦桃人石位公至州。遂往見石位公。欲將桃園典與官局。石位公因公同設計。假立典契。多開典價。又倒填月日。以見立契在先。州官買桃在後。方是強買官局之桃。以便多開桃數。令州賠還。如不還。即令認還典價。衆人分用。石位公並將內務府執照取出。令人與州役看。使之畏懼。嗣該州差傳桃戶領價。皆不赴領。石位公遂攜假契赴京。呈報掌儀司。捏稱州役率

領多人。不以官照為憑。將園內甜桃盡行摘取。經掌儀司兩次票差領催到州查問。所有石位公種種假捏情節。全未查出。嗣石位公喚王羲照等到京。商量串供。該犯等遂供出。州役四五十人。強摘官桃三百筐。止給錢十千六百文。因不肯領。州官將王羲照掌責等情節。令臣等令石位公。王羲照等質對。據供州役採桃。止三人。同鄉長地方各一人。並挑夫五名。時石位公尚未到州。並未見有官照。

至領價時。係王羲照令伊子代領等語。查石位公明謀設計。假立典契。誣告知州差役。應照例杖一百。流三千里。王羲照等定擬杖徒。州役雖無需索。但摘桃致損一二百枚。亦應責枷。至該州訊無強買短發情弊。但差役傷損民桃。未即查治。應請交部察議。得旨。此案俱係石位公串通經紀。捏立典契。多開錢文。希圖訛詐朋分。甚屬可惡。應行從重治罪。其領催等並當一併查辦。至掌儀司官員。恐其

中不無情弊。著內務府大臣。將一千人犯。提解來京。逐一質訊。確數定擬具奏。○四川成都副都統託雲奏。川省滋生銀。現存四萬七千兩。請酌留三萬生息。已敷賞用。餘銀一萬七千餘兩。應交庫存貯。於內動支銀七千兩。採買豆石。按月分給兵丁餵養馬匹。照原價扣銀彙貯。乘時再買。每年照此辦理。得旨著照所奏行。○壬申。兵部等部議覆。河東河道總督李清時奏。稱上河廳。經管運衛漳河三

百餘里。修守事宜。並無武弁專管。捕河戴村壩。現有分防專管。其餘河務尚簡。請將千總一缺裁汰。改設把總二員。分管捕上。兩廳河道。其捕河汛。原設河兵八十名。酌留六十名。歸捕河把總轄。餘兵二十名。再撥陽穀汛淺夫二十名。聊城汛淺夫十名。歸上河把總轄。至裁汰千總俸餉。酌分兩把總支領。均應如所請。從之。○以奉恩將軍富勒申子素隆阿襲職。○旌表守正捐軀之江蘇蕭縣民武志

高妾劉氏。○癸酉。

上御懋勤殿。勾到朝審情實罪犯。停決官犯斬犯六人。絞犯七人。常犯斬犯三人。絞犯七人。餘十五人。予勾。○諭軍機大臣等。據熊學鵬奏。清查茶引一摺。已批該部議奏矣。至所稱盈餘銀兩。數莫明確。一面委員儘數交內務府查收等語。此項茶引銀兩。既經查有盈餘。或存留該省充公。或解交戶部撥用。俱無不可。該撫請交內務府之處。殊屬非體。著傳諭

熊學鵬知之。○甲戌。遣官祭

先醫之神。○皇八子永璇。移居東三所。

上臨幸。進早膳。○諭軍機大臣等。昨據邁拉遜方觀承會同查審深州辦桃一案。石位公串捏滋事。實為此案罪魁。業交內務府從重治罪。但該州知州帥家相。以賤價摘買民桃。致業戶畏懼釀訟。亦有不合。即將該知州附摺叅處。實所應得。乃聞方觀承定案時。並無意叅劾。直待邁拉遜舉出。方於摺內奏請議處。

未免心存袒庇。夫該州所得處分。本不甚大。即交部議。尚未必至於從重。而該督猶思曲為維護。則其平時之不肯舉發屬員過失。為之彌縫容隱者。更不知凡幾矣。即如前日期成額。查辦雄縣侵食官贖地價一案。該地方官不能早為清晰妥辦。致崔鎔等三人中飽。各佃未得均沾。聯名控部。皆由該縣玩愒無能之故。該督前此豈竟毫無聞見。何乃任意姑容。可見直隸吏治。一味骹骹。全無整飭。率

此以往。更不知何所底止。直省與山東壤地相接。而官常之振作。則遠不逮東省。總由方觀承莅直日久。通復年齒漸增。精力亦遜於昔。遂不肯實力整飭。專務因循。則吏治益將日下。殊不知察吏之道。小懲大戒。未嘗不可因創艾而保全。况萌孽不去。將尋斧柯。方觀承寧不知之。顧欲以煦嫗之仁。博下僚感悅。致伊等益無顧忌。不至大干罪戾不止。豈非愛之適所以害之乎。若該督自恃駕輕就熟。

意以為直省事務。非伊不能辦理。狃於上和。下睦之結習。則是自滿招尤。所見亦太左矣。朕之簡用方觀承。不過因其在直有年。諸事尚屬諳練。是以久留其任。且使將伊調任他省。恐其經理公務。必尚不及直隸之裕如。方觀承自揣分量。能不心服乎。此次所辦未協之處。本應交部議處。因方觀承將內務府屬人過犯審出。恐不知者。妄滋疑議。以為方觀承之處分。因審出石位公而得。故暫從寬宥。

著傳旨申飭。並諭該督嗣後務痛自洗滌。時時提撕警省。以副委任。倘不知改悔。因仍故習。朕亦不能復為曲貸也。○又諭據湯聘奉大學士楊應琚在永昌忽患疾症。病勢似覺稍重。朕亟望其調理速痊。設或不能就愈。該省現有辦理緬匪事務。需人籌畫。員缺最關緊要。接替頗難其人。楊廷璋歷任封疆。尚非選懦之流。堪任此事。但此時未便明降諭旨。因思廣西與雲南接壤。該督可借巡邊為名。

先往廣西邊界候信。兩廣總督員缺。現在亦不降旨另授。如楊應琚已經痊愈。該督可仍回廣東。否則即有旨馳諭。該督即由彼取道。迅赴永昌接辦。但滇省邊外。向多瘴癘。楊廷璋年逾七旬。雖精力尚健。而調護亦宜留心。並著傳諭該督。如赴滇省時。凡有烟瘴地面。不必親身前往。以期珍重。副朕優眷之意。惟在運籌有方。不在身先士卒。凡事與提督李時升和衷妥辦。以得其力為要。所有楊應琚

節次奏到各摺。一併鈔寄閱看。○又諭據湯聘奏楊應琚舊時疾復發。現即束裝前赴永昌。察看病勢等語。覽奏深為廕念。已批交該撫令將近況如何速奏以聞。因永昌遠隔萬餘里。不能遣御醫前往診視。今將內府所製十香返魂丹十九。活絡丹二十九。由驛飛寄。此二藥素有神驗。可以酌量服餌。並賜荷包六個。該督務加意調攝。以冀速痊。一切毋致勞神。慰朕眷念至意。○又諭曰。雲貴總督

楊應琚現在永昌辦事。茲聞其忽患疾。甚為廕念。已將內府所製藥丸馳寄。以冀速痊。但老年病體。侍奉有人。似更易於向愈。伊子楊重穀現任寶慶府知府。距滇尚不甚遠。著傳諭常鈞令其即速前往看視。所有寶慶府知府事務。該撫即揀派妥員暫行署理。○又諭據勒爾謹奏。口外屯防各兵。與出差兵丁在駐防處所領取口糧。俱係按日支給。惟事竣回營之日。差兵則按站給資。屯防各兵。則

實錄卷百二十二

五

計程酌減。如巴里坤至肅州。共二十四站。今給十六日口糧。未免不敷食用。餘處亦大率相類。請將屯防回營兵丁。應支口糧。俱照差兵之例。一體支給等語。此等屯防兵弁。原欲使之生計。裕如。昨提督王澄來京。召見時。曾詢及屯田諸事。據稱兵丁換班回程。衣帽頗能修整。間有蓄積貲財。以資嫁娶者。似兵丁在屯俯仰尚覺寬贍。若一體按日開支。於兵丁固尤有裨益。但若於屯田處滿支。則負重

難行。若於沿路貯米之處支給。則果否足數支給。又當另辦。著傳諭吳達善。確查兵丁往返情形。若何。應否一例計日給食之處。據實具奏。候朕再降諭旨。○兵部議覆署兩廣總督楊廷璋疏。稱。儋州營新英港。萬州營桐棲港。港口現有礮臺。派撥弁兵防守。該二港原設漿船四隻。船身窄小。不能駕駛出洋。應請裁。將配船兵撥歸礮臺。應如所請。從之。○以內閣學士邁拉遜。兼署刑部侍郎。○乙亥。大

實錄卷五十五

五

學士管雲貴總督楊應琚奏。編夷大山頭目壘管遣弟壘榮等。猛育頭目坤線遣子坤巖等。猛答頭目衍歌。遣子衍轟等。猛音頭目衍界。遣子衍宋等。先後至駐劄遮放之總兵烏勒登額軍營投誠。並獻土物。又前次投誠之木邦頭目。呈獻馴象。得旨。覽奏俱悉。○又奏。臣前在甘省。即有心神驚悸。風痰流注之疾。今因自省前赴永昌。舊疾復作。現雖力疾辦事。而軍務重大。臣心神恍惚。恐有貽誤。仰懇

簡員來滇接辦。得旨。已命楊廷璋前往佐卿。俟彼到時。若病勢全愈。亦不妨留彼多住數日。共相籌策。必精神復初。然後可令彼回粵也。交印一事。朕不忍言。卿其善為調攝。以慰懸念。○以湖北東流司把總田堯封姪邦祿襲職。○丙子。戶部議覆廣西巡撫宋邦綏奏。稱。奉准部議。酌定採辦銅鉛限期。自省城至梧州府。限十二日。梧州府至百色。限六十五日。百色至雲南剝隘。限七日。剝隘至雲南省

實錄卷五十五

五

城。限二十一日。領運銅觔。自百色至梧州府。限三十九日。換船雇載。展限十日。梧州府至省城。限二十一日等語。應如所奏。至委員自雲南領銅運至剝隘地方。酌定期限之處。應聽雲貴總督定議外。又自剝隘運銅至百色。前經湖北省定限三十五日。今該省定限五十六日。殊覺太寬。應查照湖北定限辦理。從之。○賜直隸衡水縣衡水橋名安濟橋。○丁丑。諭軍機大臣等。今年江南湖南山東浙江

等省。被災州縣。業經降旨各督撫。照例賑卹。並飭令加意撫綏。無力貧民。自可不致失所。惟是被水之餘。秋收分數。不無稍減。明春青黃不接之時。窮黎生計。未免拮据。其或有尚需加賑之處。著各該督撫。查明實在情形。詳悉覆奏。候朕酌量加恩降旨。可將此傳諭知之。○旌表守正被戕之陝西洵陽縣民馮告妻羅氏。○戊寅。

上御乾清門聽政。○諭曰。明德參奏。南匯縣民

實錄卷七十三

五

瞿揚寶逆惡滅倫。山陽縣民張大順。踴傷堂弟身死二案。已降旨。將承審不實之知縣。依樣率轉之知府。分別革處。並將覆審革率之按察使李永書。交部嚴加議處矣。朕閱此二摺時。即以臬司為刑名總匯。李永書於讞案舛謬若此。豈尚可姑容貽誤。及閱明德另摺。果以李永書不能勝任。另簡賢員為請。適與朕意相合。李永書前在府道任內。尚屬勤練出色之員。是以加恩擢用。及簡任臬司以來。

即心存自滿。不肯如前出力。豈能冀其復自奮勵。李永書著即解任。聽候部議。江蘇按察使員缺。著楊重英補授。向來外省督撫。遇有審案情節游移。每憚親提研訊。而於臬司任意審轉。又往往曲為徇隱。若皆如明德之秉公持正。又何患讞獄之不能平允。吏治之不能整飭乎。明德辦理此事。甚屬可嘉。並將此通諭知之。○諭軍機大臣等。前因大學士楊應琚患病較重。隨即降旨。令楊廷璋先往廣

實錄卷七十三

六

西邊界候信。再赴雲南。今據提督李時升奏到。看來楊應琚病勢。一時不能即痊。該處現在辦理緬匪情形。一切籌畫機宜。俱關緊要。閱李時升所奏之語。未免心存畏怯。且未識此事要領。恐李時升獨肩此任。於事無濟。著傳諭楊廷璋接到此旨。星速前往永昌。接辦緬匪一案。李時升摺。一併鈔寄閱看。若該督至永昌。而楊應琚已痊愈。能辦事。則該督即行回粵。若尚不能辦理。則傳此旨。駐永昌幫

辦。令湯聘回省。此時並未明降諭旨。該督可酌量而行。仍即速奏。○又諭。前據湯聘奏。楊應琚現在患病。已有旨令其加意調攝。並賜荷包及內府藥丸。兼令伊子楊重穀前往省視。以冀速痊。近日以來。未知曾否向愈。著即速奏聞。以慰廑念。至伊次子楊重英。現在降旨補授江蘇按察使。該督病中聞此。諒必益加欣慰。痊癒尤速。著將此傳諭知之。○吏部議覆貴州按察使高積奏。稱貴州苗獮。性喜

貴州苗獮

五

佩刀出入。每釀人命。又孟春男女會合於野。擇平地為月場。謔浪終日。暮挈所私而歸。名曰跳月。應責地方官嚴禁。定以年限處分。明示懲勸等語。查苗疆積習相沿。惟在隨時化導。未便繩以官法。亦難定以限期。應令各督撫飭屬設法曉諭。庶可漸次轉移。得旨。吏部議覆高積條奏。禁止苗人佩刀跳月。請責成地方官。定以年限處分。苗人向化日久。耕鑿安恬。至其習俗相沿。本無庸瑣屑申禁。今內

地齊民。地方官尚且不能道德齊禮。而於苗疆乃欲嚴立科條。紛更滋擾。徒屬有名無實。甚無謂也。著交軍機大臣。另行妥議具奏。○補原任大理寺卿鄧時敏為原官。○己卯。聖祖仁皇帝忌辰。遣官祭

景陵。

上詣

奉先殿

壽皇殿行禮。○戶部議覆漕運總督楊錫紱疏

漕運總督

三

稱。江淮興武二衛。分運蘇松府屬幫船。所有半折月糧。向例每石折銀一兩。因兵餉不敷。每石扣存銀三錢。嗣經臣題准。該二衛免運松江府屬各幫。復給扣三月糧。但近來生齒日繁。運費倍於往昔。且兌運蘇州等府各幫。事同一例。似應一體復給。應如所請。從之。○以年滿調回雲南普洱鎮總兵劉德成。為臨元鎮總兵。○庚辰。上詣暢春園問

皇太后安。○幸圓明園。○諭軍機大臣等。據湯聘李時升先後奏稱。大學士楊應琚患病情形。業經疊降諭旨。令其加意調攝。以冀速痊。現在辦理緬甸一事。楊應琚自不肯因病稍為諉謝。但恐力疾勞神。心思過耗。致病勢急難脫體。轉於公事無裨。自當安心靜養。使沉疴早得霍然。以慰廑念。至此際相機籌畫。斟酌得宜。即係李時升之責。昨閱該提摺奏。未免心存畏怯。已於摺內詳悉批諭。李時升務宜恪遵訓示。審度事機。努力籌辦。勿因督臣偶爾抱恙。遂至茫無主見。張皇失措。以致歧誤也。著將此傳諭楊應琚。並李時升知之。將目下情形若何。即速奏聞。○辛巳。

御書洞庭湖君山神廟扁曰。靈昭楚望。○賑卹甘肅循化。河州。鎮原。環縣。戎格。西寧。碾伯。岷州。文縣。山丹。中衛。隴西。徽縣等十三廳州縣。本年被雹。被水。被蟲。偏災貧民。蠲免額賦。如例。豁除中衛縣沙壓地畝額糧。其勘不成災

之狄道。渭源。安定。會寧。寧遠。伏羌。西和。通渭。漳縣。三岔州。判。禮縣。秦安。階州。固原。靜寧。華亭。平涼。靈臺。隆德。崇信。莊浪。寧州。平番。鹽茶等二十四廳州縣。並予緩徵。

大清高宗法天隆運至誠先覺體元立極敷文奮武孝慈神聖純皇帝實錄卷之七百七十二

大清高宗法天隆運至誠先覺體元立極敷文奮武孝慈神聖純皇帝實錄卷之七百七十三

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲領都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆三十一年丙戌十一月壬午。

上詣暢春園問

皇太后安。○諭軍機大臣等。總兵陳廷桂來京

陛見。看其精神。尚不覺甚老。人亦誠實。南陽

鎮事務稍簡。現在自可勝任。但年邁之人。不

能保其不日就漸衰。著傳諭阿思哈留心察

看。倘一二年後。該總兵精神漸減。不能辦理

營務。訓練兵丁。即隨時據實奏聞。○癸未。

上奉

皇太后還宮。○詣

皇太后宮問安。○還宮。○軍機大臣等議覆烏什辦

事大臣永貴疏稱伊犁臺站馬匹屯田牛隻因

立有勸懲章程。倒斃數目均未至原定分數。

請嗣後耕田馬匹每年准其倒斃三分。牛隻

每年准其倒斃一分五釐。逾者著賠。少者量

獎。其臺站亦以三分為率。至管臺筆帖式。三

年內辦事妥協。而倒斃少於定額者。為一等。

辦事好而倒斃符額者。為二等。辦事平常而

倒斃逾額者。為三等。三等者即行責革。各回

城亦照此辦理。應如所請。從之。○甲申。

上以冬至祀

天於

圜丘。是日起齋戒三日。乙酉。軍機大臣等奏

吏部議覆貴州按察使高積請禁苗人佩刀

跳月一摺。奉旨交臣等另議。查佩刀本苗人

之風好。而跳月亦自仍其土風。原無礙於政

教。即有如該按察使所稱。讎殺淫殺等事。則

向來苗民犯法。自有科條。況現在各省改土

歸流。原與齊民無異。此外生熟各苗。既皆隸之土司。自可隨其舊俗。若如該按察使所奏。欲使苗民習俗。一時盡遵禮教。並責成該管官。定以年限考覈。無論勢所難行。徒滋擾累。且地方官畏顧考成。轉自諱飾。所奏應毋庸議。再乾隆二十五年。刑部議貴州按察使彭寶奏。思南等府。兇徒藏帶褲刀。逞強格鬪。一摺。令照兇器傷人例科斷。今高積所奏。既不准行。所有褲刀之禁。亦停止從之。○以庫車

辦事大臣鄂寶署左副都御史。○丙戌。

上詣

南郊齋宮齋宿。○諭據高晉奏。查閱各標營伍。壽春鎮中營官兵技藝。較左右二營為劣。請將該營溺職之守備陳基宏。及弓馬不堪之把總李遇春等革職等語。弁兵優劣。為軍政所關。倘該鎮果能訓練以時。嚴加懲勸。何至技藝生疎。不堪校閱。況中營於該鎮尤為切近。今轉不如左右二營。則其平日之不能實

力整飭可知。高晉不即參奏。亦屬非是。總兵七十一著交部嚴加議處。尋議上得旨。七十一著降三級調用。○又諭據明德奏。查辦孔繼衮攜帶空白奉祀禮生劄付。審係衍聖公孔昭煥差往江浙清查族譜。令其帶往。請將孔昭煥交部嚴加議處。並將孔繼衮等分別定議一摺。所辦甚屬公正。國家加恩聖裔。禮遇甚優。衍聖公身膺顯爵。自當益矢謹慎。以承先澤。而副優眷。即如承修族譜一事。雖相

沿已久。越數年修正一次。亦祇應就籍隸山東確有支派可考者。隨時查輯。若其同宗散處各省。系次既屬遙遠。勢難逐一清釐。徒使差委之人。藉端滋弊。嗣後應示以限制。至廟庭設立贊禮奉祀各生。原以肅將祀典。自應慎擇本省醇謹之人充補。俾得就近襄助駿奔。若令外籍無稽之人。濫與其選。轉非所以昭虔恪。又豈尊師重道之本意乎。孔昭煥年幼無知。受人愚惑。輒以空白劄付。委交孔繼

衮帶至江南。覓人填給。甚屬不合。孔昭煥著交部嚴加議處。其奉祀生禮生等項。從前任意充補。未免太濫。嗣後亦應酌定額數。會同該巡撫學政。慎選咨文充補。其如何定立章程之處。著大學士會同該部詳悉定議。餘著該部覈擬具奏。尋議各祠宇奉祀生。節經議定額缺。頒給部照。今孔繼衮等。仍有濫給劄付。應飭交該督撫學政。詳查。如有額外濫設。即行裁革。將行聖公所給執照追銷。并將現

充祀生冊送禮部。嗣後山東省祀生缺出。令衍聖公會同該撫學政。於嫡派子孫內選補。其江浙等省祀生缺出。令各該督撫學政。詳查孔氏嫡派子孫頂補。仍取地方官印甘各結咨部換照。再各省先賢先儒奉祀諸生。有無額外浮多。一體飭查送部。其補缺。併照現定章程辦理。至贊禮生前經議定直省文廟。准設四名。皆以生員充設。其餘先賢先儒家廟。並無額設禮生之例。亦應將從前私

給執照追燬。至孔氏承修族譜。應遵旨就籍隸山東確有支派可考者。隨時查輯。無許差委遠出。從之。○諭軍機大臣等。明德奏查辦孔繼衮。審係衍聖公孔昭煥委赴江浙清查族譜。究明各情節。請將孔昭煥嚴加議處。並將孔繼衮等審擬治罪一摺。所奏甚屬公正。明當。設使尹繼善莊有恭任內。遇有此等事。必不肯如此辦理。該撫近來一切俱能認真。即如前此審改南匯山陽兩縣舛錯案情。並

奏奏李永書不勝江蘇臬司之任。俱能適愜朕意。明德能實心任事。若此國家又得一好封疆大臣。朕心實為嘉悅。著賞給荷包六個。以示優獎。並將此傳諭知之。○丁亥冬至祀

天於

園丘

上親詣行禮。○遣官祭

永陵。

福陵

昭陵

昭西陵

孝陵

孝東陵

景陵

泰陵○遣官祭

孝賢皇后陵

端慧皇太子園寢○詣

皇太后宮問安○戊子諭曰王檢奏請將廣東

太平關節省銀兩解交內務府一摺關稅款項自應交部覈收雖係節省水腳亦當歸入正款續經議解節省銀兩交內務府者非是嗣後各關俱著隨正額盈餘一體解交戶部○己丑諭曰嵩椿等接到廷寄詢其未經裁汰輜夫錢糧之處從前因何未行具奏始奏稱從前伊等意見未到因安泰至彼審事之便查取將軍副都統等執事清冊伊等始行覈對查出從前並未清查甚屬糊塗非

是等語嵩椿歷經數任將軍彰武泰多年副都統即綽和諾亦經二年有餘從前因何隱忍並未具奏及至安泰查取時懼其叅奏始行具奏仍未將實情奏明但稱安泰查取冊檔時始行查出尤屬含糊不明嵩椿綽和諾彰武泰俱著交部嚴加議處尋議上得旨嵩椿不勝將軍之任著撤回其降調之處抵罰公俸十年綽和諾著降三級從寬留任彰武泰著降頂帶三級庚寅

上詣

皇太后宮侍宴○諭據明瑞等奏本年伊犁歉收請將烏魯木齊瑪納斯等處存貯穀石由伊犁烏魯木齊二處雇商民牲隻支給腳價會同運解等語現在伊犁戶口日盛今歲歉收穀價勢必騰貴著照所奏傳諭溫福五福將烏魯木齊瑪納斯等處穀石雇覓商人牲隻多為運解但伊犁烏魯木齊距內地甚遠商人稀少覓雇本處牲隻載運恐不能多得

因思哈密闢展。巴里坤相距甚近。牲隻尚可多得。著傳諭高廷棟。德昌薩瀚等。令雇該處商人牲隻。支給腳價。送至烏魯木齊。將彼處穀石。陸續運至伊犁。再據高廷棟奏。開展存貯雜糧八千八百餘石。請陸續出糶等語。伊犁現在需穀。此項雜糧。與其在開展出糶。不若撥運伊犁。但徑由闢展運往。道里遙遠。若運至烏魯木齊。不過數站。輓致尚易。著高廷棟將闢展所貯雜糧八千八百餘石。雇覓商

人牲隻。運送烏魯木齊。俟至烏魯木齊之時。或轉運伊犁。或彌補彼處撥運穀額存貯之處。溫福。五福等。公同商酌。妥協辦理。○辛卯。

皇太后聖壽節。遣官祭

太廟後殿。○

上詣

壽康宮。行慶賀

皇太后禮。王大臣於

慈寧門。衆官於午門。行禮。○奉

皇太后幸壽安宮。侍宴。○壬辰

上詣

皇太后宮問安。○軍機大臣等議。覆察哈爾都統安泰奏。稱。察哈爾八旗都統事務。管理八旗牧廠。及阿爾台一路驛站。事煩地廣。所有巡查緝捕。悉賴綠營官兵。請即以張家口副將為中軍等語。應如所奏。嗣後此一營揀補官員。及軍政大典。悉照京口例。除千把外。委交該都統辦理外。自守備以上各員。俱咨商

直隸總督會奏。從之。○癸巳。以大學士管雲貴總督楊應琚病。令乾清門侍衛福靈安帶御醫馳往診視。○甲午。軍機大臣等議。覆察哈爾都統安泰等奏。稱。商都達布遜諾爾達里剛愛。太僕寺兩翼等處牧羣。向由牧丁內揀選。委署筆帖式五員專管。該員等俱未經事。辦理不能妥協。請將委署筆帖式裁。由上駟院筆帖式內。遴選一員。作為額外主事。內務府候補筆帖式內。遴選一員。作為額外筆

帖式辦理商都達布遜諾爾達里剛愛行查案件。由太僕寺筆帖式內遴選一員。作為額外主事。候補筆帖式內遴選一員。作為額外筆帖式。辦理太僕寺兩翼牧羣行查案件等語。應如所奏辦理。但委署人員。未嘗經事。而候補筆帖式。亦未曾經事之員。不若竟派現任主事筆帖式。更為有益。臣等酌議。遴選上駟院主事筆帖式。各一員。太僕寺主事筆帖式。各一員。遣往彼處辦理事務。俟五年期滿。

果無貽誤。行走奮勉。由該都統保奏。以應陞之缺陞用。其不能辦事。行走平常者。駁回。另行派人更換。至此項人員到彼。若祇與原俸。恐不敷用。查太僕寺右翼牧場隙地。募民墾種。此項地租。儘可作各員養廉。請主事每員歲支銀二百兩。筆帖式銀一百兩。從之。○吏部等部議覆。閩浙總督蘇昌等奏稱。臺灣熟番。戶口衆多。應將淡水。彰化。諸羅。一廳二縣所屬番社。設立理番同知一員。凡有民番交

涉事件。悉歸該同知管理。查內地泉州府西倉同知。地方綏靖無事。請裁。改為臺灣府理番同知。其西倉一帶地方。有晉江縣貼堂縣丞。與知縣同城。並無專管之事。應將該縣丞移駐同知現駐之石獅街。就近管理。至改設理番同知。俸廉役食。即照西倉同知額編之數改撥。書役民壯。亦照西倉額數募充。其衙署。現有彰化縣淡水同知舊署。毋庸另建。祇須頒給臺灣府北路理番同知關防。其南路

臺灣鳳山兩縣社民甚少。查臺灣府海防同知。專管船政。請即以海防同知兼管。換給臺灣府海防兼南路理番同知關防。再晉江縣縣丞。移駐石獅。養廉役食照舊。惟於該縣額設民壯。酌撥十名。即居現有同知舊署。並鑄給晉江縣分駐石獅縣丞關防。均應如所請。從之。○乙未。

上詣

皇太后宮問安。○幸瀛臺。○宗人府奏請恭修

五牒限三年告成。得旨。知道了。修辦五牒。視其所有舊檔案。應改者即改。應添者即添。何需三年。務於一年內即行告竣。著派滿大學士一員催辦。○以服闋四川重慶鎮總兵喬冲杓。為河南南陽鎮總兵。○丙申。諭據方世雋奏。候補知州鄭萬年。試用知縣曾應選。委署縣務。辦理竭蹶。毫無整頓。難勝民社之任。請將該二員按品賞給職銜。令其各回原籍等語。所辦甚是。此等分發人員。各省多有。昨曾

傳諭各督撫。詳加甄別。以定去留。實寓澄敏激揚之意。即如今年揀選分發舉人。亦因其需次稽時。加恩遴選。發往各省寬途委用。俾得及鋒而試。至伊等才具優劣。固非一時所能周知。各該督撫。亦應隨時留心察看。其中或有庸懦無能。不堪策勵之員。即當量其才質。分別辦理。不可有意姑容。因循貽誤。所有方世雋奏請鄭萬年。曾應選。賞給職銜之處。著照所請行。該部知道。并將此通諭知之。○

又諭刑部審擬湯永祚滋擾驛站一案。其家人孫進自縊身死一節。乃案中疑竇。孫進若不過聽從湯永祚鞭責李陞。按律本無大罪。何至畏懼投繯。湯永祚沿途既有擾累需索之處。安知此外不更有未經敗露情弊。恐孫進到案。據實供出。遂令其自縊。以為滅口之計。均未可定。該部於此等緊要情節。竟爾置之不問。豈成信讞。著該部另行詳悉審訊。務得確情。據實具奏。○又諭曰。楊廷璋等奏審

擬富明安浮收糧石一案。總未得此事竅要。前經李侍堯等查奏。從前辦理明福以後。其浮收折色。復始自富明安。則富明安即為此案罪首。是以降旨拏問。令該督撫等嚴究確情。定擬。前據查審奏到。僅委之管倉家人妻貴。意圖開脫。復經嚴飭該督等。另行據實研訊。自應根究富明安。是否於釐剔積弊之後。首先起意復犯。務得確情。使之無可置喙。以定爰書。方成信讞。今摺內祇將浮收食米多

寡之數。瑣屑較量。計賊論罪。而於開端浮收緊要情節。任其供詞輾轉游移。致與妻貴所供不相符合。該督等亦竟不加深究。乃以原解及經手各書役。僉供不知多加之事。率據富明安親供。所開原數為憑。坐以批外勒索七百餘金。併贓擬罪。轉似有意周內。令其委曲承服。不足以服富明安之心。亦豈鞠獄得情。飭吏治而肅法紀之本意乎。看來此案。非該督等所能審理。著將富明安及應行質訊緊要人犯。并冊籍案卷。一併解京。交刑部另行確訊具奏。○是月。江西巡撫吳紹詩奏。前奉諭旨。以山東州縣民壯。改習鳥鎗。各省可否仿照辦理。查江西州縣。額設民壯一千六百六十四名。現將老弱汰除。另募精壯充補。會同營弁。一體較演鳥鎗。自易純熟。並無難行之處。報聞。○福建巡撫莊有恭。以患病奏請賞假調理。得旨。安心靜養。不必過慮。聞汝二人四百里之摺。未視而先憂。憂在督臣也。

彼年老之人。故時刻繫念。至於汝尚年壯。偶爾之病。養好即得復元。何妨。○湖南巡撫常鈞奏。前奉諭旨。以山東州縣民壯。改習鳥鎗。各省可否仿照辦理。查學習鳥鎗。視學習弓箭等項較易。湖南額設民壯一千六七百名。若俱令習熟鳥鎗。於地方有益。現飭伊等原習鳥鎗者。再加習練。原習弓箭等項者。一體改習。下部知之。○河東河道總督李清時奏。豫東黃河工程平穩情形。並商虞廳之辛集向係埽灣。每年水落歸槽後。愈見偏趨側注。近年溜勢漸緩。今冬益見北趨。化險為平。來年察看情形。如果溜不游移。即可停止鑲埽。得旨。是知道了。又批。河員每以作工為喜。應停止者停止。汝職分之事。尚恐不止此耳。○署兩廣總督楊廷璋奏。前奉諭旨。以山東州縣民壯。改習鳥鎗。各省可否仿照辦理。查鳥鎗為制勝先資。然平疇高曠。方能施放得宜。粵東水陸要隘。固多空曠之區。而崗嶺崎嶇。

村墟逼仄。亦所在多有。今酌將各處額設民壯二千三百八十七名。其已習鳥鎗者。仍令兼習鎗刀。未習鳥鎗者。即令改習鳥鎗。同鎗刀並練。其原習之藤牌馬义。似非所急。應令裁除。報聞。○又奏。粵東商漁大小船隻。每州縣不下一二千。易致匪徒竄跡。竊刦為害。現通飭各府州縣。將境內所有商船漁艇。按數編排。十船設一甲長。十甲設一澳長。無論船身大小。令於蓬桅頭艤。書刊某州縣某號某

甲某人某船字樣。除商船。載明船主舵水。貿易何地。往返何時。凡屬漁船。必使出捕定有方向。收港定有限期。配鹽食米。定有章程。俾內河外海。無不明書標識之船。漁戶水手。無不按籍可稽之人。倘有互船混入。一目瞭然。哨巡不難即捕。得旨。好。仍宜實力永久行之。○廣西巡撫宋邦綏奏。前奉諭旨。以山東州縣民壯。改習鳥鎗。各省可否仿照辦理。查粵西額設民壯二千一百餘名。內習鳥鎗者。僅

什之二三。餘或演試弓箭標鎗。或操練藤牌刀棍。緣地多山嶺林箐。短兵相接。施展便利。今若俱改習鳥鎗。未免滋擾。應請酌半改習。此外苗疆漢土各屬。向設有土勇堡卒。猺獞地方。設有狼目狼兵。現有九千五百餘名。亦令酌改一半。共習鳥鎗。報聞。○大學士管雲貴總督楊應琚等奏。據總兵朱崙報稱。督兵赴楞木地方。與緬匪相遇。自十一月十八日接陣。至二十一日。計四晝三夜。並未停息。官兵奮勇爭先。賊匪四路抗拒。該鎮按其險要。分路抄殺。賊匪抵擋不住。俱滾匿山箐。及殺死賊匪約共四千有餘。並奪獲鎗礮等器械甚多。得旨。好。知道了。

大清高宗法天隆運至誠先覺體元立極敷文
奮武孝慈神聖純皇帝實錄卷之七百七十三

實錄卷之七百七十三

一

大清高宗法天隆運至誠先覺體元立極敷文
奮武孝慈神聖純皇帝實錄卷之七百七十四

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務直隸總督滿洲都統世襲騎都尉軍功加七級隨帶加一級尋常加二級軍功紀錄一次臣履桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆三十一年丙戌十二月丁酉朔吏部等

部議覆陝西巡撫明山奏稱洛川縣瀕臨深
溝城基塌陷施工修築甚難查距縣城四十
里之鳳棲堡地方遼濶當縣治適中堡城現
俱完固祇須加高幫厚並將城身向北開展
移造衙署倉庫監獄壇廟均應如所請從之
○雲南臨元鎮總兵阿穆呼朗遺疏聞得旨
阿穆呼朗患病溘逝知道了應得卹典著察
例具奏○戊戌

上詣

皇太后宮問安。○幸瀛臺。○己亥。旌表守正被戕之直隸元城縣民關志忠女關氏。○庚子。宗人府奏請欽派

玉牒館正副總裁。得旨。正總裁著派誠親王允祕。大學士傅恒。副總裁著派理郡王弘曉。鎮國公永璋。協辦大學士吏部尚書陳宏謀。侍郎諾穆渾。戶部議覆。大學士管雲貴總督楊應琚等奏稱。各省辦運滇銅。委員解銀到滇。向例隨到隨收。不出三日。或現有存廠銅

即可指撥。或現存無幾。約計將來某廠可以辦給。豫行辦撥。總不出半月以內。仍請照舊辦理。毋庸另立限期。至領給銅觔。如所撥俱係現銅。即可全數給領。若該廠銅數不敷。須就各子廠協撥。即須守候。委員在廠領銅。彈兌查收。並覓雇腳戶。催趲牛馬。均須時日。不能剋定期限。應俟領足銅觔之日。催令陸續發運。即由該廠報明限期。至向來義都金釵兩廠。辦供外省採買。應就該兩廠至剥隘道

里。覈計程限。查義都廠銅。俱係該廠運至省城。即在省店發給。自省城至剥隘。用牛馬運。按站應限四十日。惟所雇牛馬不能常運。須往返輪流。應加展四十日。沿途或有阻滯。再寬限十日。統計九十日。可運銅十萬觔。至剥隘水次。如辦運至二三十萬者。每十萬加展三十日。金釵廠銅。在蒙自縣給發。自蒙自縣至剥隘。均係牛運。按站應限三十四日。又輪流轉運。加展三十四日。沿途或有阻滯。再

寬限七日。統計七十五日。可運銅十萬觔。至剥隘水次。如辦至二三十萬者。每十萬加展二十五日。至銅數較多。兩官分運者。各照該廠程限。分別扣算。如銅數減少。一官總運者。兩廠分領。仍各照額定限。准其分扣。再馱銅牛馬。俱雇自四鄉。如遇農忙瘴盛。即無牛馬雇運。難以按程遞進。令委員及地方官查報雲南督撫。咨明該省。准其停運展限。均應如所請從之。○禮部等部議覆順天府府尹

竇光鼐奏稱。順天府學滿洲教官二員。本為管轄八旗生員而設。惟是近京五百里內。皆有漢軍及駐防滿洲。一切稽查考課。鞭長莫及等語。應如所請。嗣後在京八旗文武生員。責成滿洲教官實心督率。其在外屯居及各駐防。令滿洲教官冊送學臣。按其住址。分發各州縣教官。照民籍例。就近考課約束。其舉報優劣。併歲科幫補出貢事宜。仍移會滿洲教官查辦。如各州縣教官徇庇失察。照例議處。又稱生員告給衣頂後。學冊業已除名。考課亦行停止。其中優劣。該教官無從查察等語。亦應如所請。嗣後告頂文武各生。照貢監歸地方官約束之例。在京者。令該教官冊送本旗都統管束。其屯居及駐防者。冊送地方官會同理事同知。就近約束從之。○辛丑。

上詣

皇太后宮問安。○幸瀛臺。○諭。據瑪瑞官保等奏。審明辦理西藏糧餉事務。通判武元成。擅

動庫項。私行貿易等情。理宜即行正法。緣西藏係屬佛地。且達賚喇嘛年幼。因將武元成及伊家人書吏等。解送督臣辦理等語。瑪瑞等所辦。甚屬不曉事體。武元成係辦理糧餉官員。乃擅動庫項一萬八千餘兩。貿易射利。其情甚屬可惡。即應於彼處正法。使眾知內地法度森嚴。可以生其儆懼之心。又何必計及佛地。及達賚喇嘛年幼。今將武元成解送阿爾泰。倘中途自盡。是使重犯倖逃顯戮矣。

但既已解送。可傳諭阿爾泰。即派幹員迎往。將武元成嚴加看守。速赴成都。將伊由何年貿易。共購買何等貨物。并貿易過幾次。一一訊明。一面奏聞。一面即行正法。此案失察大員。非尋常可比。著阿爾泰將武元成於藏內貿易時。駐藏大臣內。均係何人之處。查明具奏。至官員貿易。最為陋習。併傳諭阿爾泰。官保。託雲等。此後兵丁遇有出差。稍置微物貿易者。猶可不加深問。若干總以上官員。則斷

乎不可。務須嚴行禁止。如違即行叅奏。從重治罪。○命四川成都副都統託雲駐藏辦事。更換瑪瑞來京。以正紅旗滿洲副都統宗室雅郎阿為成都副都統。○調鑲黃旗蒙古副都統德勒克多爾濟為正藍旗蒙古副都統。○旌表守正被戕之山東海陽縣民馬好仁妻孫氏。○豁除江蘇句容縣濱江坍沒田地八百七十三畝額賦。○壬寅。

孝惠章皇后忌辰遣官祭

孝東陵。○癸卯吏部遵旨覆奏御史戈濤叅奏直隸候補同知王銘琮匿喪引見赴補一摺。查該員赴部引見時。臣部未將丁憂原案查明。聽其遽赴直隸。迨服滿咨部。又未查明叅處。請交都察院分別議處。得旨知道了。此等丁憂人員。該部自應查明。於引見時奏明扣除。乃概行帶領引見。給咨發往。辦理已屬不合。嗣後凡調取引見人員內。有現經丁憂者。該部詳查聲明扣除。俟該員服闋後。補行引

見。如有特旨不拘事故。即令引見者。不在此例。著為令。○甲辰。

上詣

大高殿行禮。○吏部等部議覆閩浙總督蘇昌奏稱建寧府屬建陽縣之南槎村。戶多俗悍。崇安縣之五夫村。烟戶稠密。又該縣武夷星村。為各省販茶馬頭。均屬緊要。請將松溪縣遂應場巡檢。裁改建陽縣南槎村。崇安縣分水關巡檢。移駐五夫村。崇安縣貼堂縣丞。移

駐星村。並建衙署。至崇安縣縣丞。向無關防。應請頒給。兩巡檢均請頒給印信。應如所請。從之。○旌表守正被戕之直隸安平縣民李存妻呂氏。○乙巳。

上詣

皇太后宮問安。○諭曰。常鈞著來京。陸見湖南巡撫員缺。著鄂寧調補。鄂寶著補授湖北巡撫。鄂寶未到任之先。其巡撫印務。著定長暫行兼署。○又諭據期成額。定長奏布政使赫

昇額。有應行審訊事件。請旨革職等語。赫昇額著革職。所遺湖北布政使員缺。著閔鶚元補授。○又諭據期成額。定長奏。查審桂陽州民侯嶽添被毆身死一案。該州知州張宏燧。先審侯學添為兇手。及按察使官兆麟。審出正兇。後仍復迴護原招。湘陰縣知縣劉善謨。長沙縣知縣李蔣。奉委會審。並不秉公勘訊。請旨將該三員革職。署布政使驛鹽道熊學驥。不與官兆麟會印。兼以會訊。並無確供。具稟巡撫。亦請解任等語。張宏燧。劉善謨。李蔣。俱著革職。熊學驥著解任。一併交與期成額等。秉公質訊確情。據實具奏。其初審未得實情之司道府州各官。俱著交部分別議處。○諭軍機大臣等。據期成額等。查審侯嶽添被毆身死。審明侯七郎。確係此案正兇一摺。已降旨將張宏燧等。分別革職解任。交期成額等。秉公質審。至常鈞身為巡撫。乃於審理倫紀攸關命案。一任屬員扶同弊混。不能查究。

據實嚴參。似此糊塗無識。豈復堪勝封疆之任。常鈞已令其來京陛見。湖南巡撫。現今鄂寧調補矣。至另摺所奏。官兆麟呈出知府李拔密稟。張宏燧與赫昇額營私行賄。請將赫昇額革職審訊等語。殊可駭異。赫昇額身任藩司。命案非其專責。何至偏執成見。始終迴護。若此。或赫昇額與張宏燧。別有結交袒庇情弊。定長等或另有訪聞。是以徑請革職。亦已照所請革職。著期成額會同定長。將李拔稟內各情節。逐一研訊。務使水落石出。令事之虛實輕重。毫無遁情。以成信讞。若常鈞有所交涉。亦應審出實情。不可為之隱飾。可將此傳諭知之。○吏部奏。官員失察賭具處分。及拏獲議敘。舊例分別半年內外。得以遷就那移。是以請敘者多。題參者少。請嗣後無庸分別年限。其議敘議處。亦應酌改。凡首先拏獲賭具之員。應加二級者。改為加一級。協拏之員。應紀錄二次者。改為紀錄一次。其失察

置造賭具。例應革職。描畫紙牌。應降二級調用。舊存賭具。應降一級調用者。均准留任。至屬員拏獲賭具。將上司一併議敘。未免過濫。應無庸議敘。失察亦無庸議處。從之。○察哈爾都統安泰奏。張家口現添設副都統一員。其阿爾台軍臺事務。請移給副都統管理。嗣後將蘇魯克牧羣事務。俱著會同都統一併辦理。報聞。○內閣學士鍾蘭枝奏。請終養。允之以太僕寺少卿倪承寬。為內閣學士兼禮

部侍郎。○右衛副都統彰武泰休致。調綏遠城副都統綽和諾。為右衛副都統。○旌表守正被戕之直隸蠡縣民王年兒妻冉氏。○丙午。兵部議覆大學士管雲貴總督楊應琚奏。稱滇省沿邊土司土目。因上年莽匪侵擾土境。覈其功過。分別勸懲。請將奮勉出力之倚邦土千總曹富齋。元江土千總施配臣。六困土千總刁鎮。均賞給土守備職銜。易武土把總伍朝元。賞給土千總職銜。耿馬土目罕朝

璣。六困土目刁銑威。遠夷目周靖。周通。檄攬壩土目喇蘇齋。均賞給土把總職銜。至庸懦無能之車里宣慰司刁紹文。應革職。猛混土目召齋。猛海土目召音。俱革去土目。應如所請。從之。○以直隸天津道陳輝祖。為安徽按察使。○丁未。以奉恩將軍忠順子伊克積善襲職。○蠲緩浙江臨海黃巖太平三縣杜瀆黃巖二場。本年水災額賦。其臨海縣應徵漕項及蠲剩應徵銀。並蠲免帶徵如例。○賑甘

肅鹽茶廳沙泥州判。紅水縣丞。各屬村莊。本年旱災貧民。並蠲緩額賦如例。○戊申。諭軍機大臣等。方觀承題。韓大保子。鷄姦趙二保子。按律問擬斬決。又聲明該犯年僅十五。素性癡傻。尚屬無知。援照舊案。聽候部議一本。經刑部議照例擬斬立決。不准援案聲請。已如議行矣。該犯知識已開。即不得以幼穉為解。況既能起意將趙二保子誘按行姦。豈得謂之素性癡傻。即如各省愚夫愚婦。問擬死

罪者。亦非盡皆知法故犯。其中無知輕懼者。正復不少。但國憲所在。法在必行。又豈能一曲為寬宥。致乖辟以止辟之義乎。至從前高斌題請任邱縣民段四強姦幼女王金姐一案。將段四改為擬斬監候。亦由九卿議覆時。未免意存姑息。今平情論之。段四當日雖經予勾。已屬稍稽顯戮。又豈可引以為例乎。況此例亦惟直隸引之。並非各省通行者。尤不應牽用。致乖平允。著傳諭方觀承。將段四一案舊例刪除。嗣後遇有此等犯案。止照正例覈擬。不得仍前聲請。○又諭據楊應琚奏。賞賜藥丸。調服後精神長發。飲食加進。痰氣日就消滅。可望復元等語。並據湯聘同日奏到。實深喜慰。該督病甫向愈。更宜善為調攝。以冀速痊。至楊廷璋現已自粵東起程。前赴永昌勦助。到彼後。湯聘即可回雲南省城。專辦巡撫事務。所有督臣一切應辦事宜。楊應琚此時且勿分心勞頓。楊廷璋不妨留駐數

日。公同商辦。俾得安心靜養。如楊應琚精神業已充復。可以無需攸助。楊廷璋年齒亦逾七旬。未便久令遠涉兼顧。況兩廣地方事務。亦屬緊要。楊廷璋即可仍回粵東辦事。伊二人俱係朕信任大臣。自皆以公事為重。其應行應止之處。聽二臣自行面商妥酌可耳。朕本日披閱來奏。喜不勝言。前賜藥丸服之既有成效。著照前再行賞寄。又聞良玉左右手各握其一。可療風痰之症。今特寄賞玉子暖手二枚。該督可隨時擎握。用資頤養。並著加賞大荷包一對。小荷包四個。瑤瑯鼻烟壺一件。以誌欣慰。著將此傳諭楊應琚並楊廷璋。湯聘知之。○吏部等部議覆。安徽巡撫馮鈐奏稱。廬州府屬合肥縣。為南北通衢。一切解餉解犯。絡繹不絕。委護員弁。有顧此失彼之處。請將廬州府照磨。移駐合肥縣之梁園地方。其照磨事務。歸經歷辦理等語。查照磨係知府所屬。今移駐縣境。不歸知縣管轄。轉恐

掣肘。應將廬州府照磨裁汰。改設巡檢一員。駐劄梁園。鑄給印信。并建衙署。從之。○兵部議覆。西安將軍容保奏。稱乾隆二十八年。八旗都統議准。各省世職官員。俱交該將軍大臣。歸本省軍政考驗。其騎射當差好者。保送引見。如記名發回原省。以對品應陞缺出坐補。查騎都尉。雲騎尉。對品應以佐領防禦補用。其輕車都尉。與協領品級相同。協領係承辦一旗事務之要任。即以世職補用。稍為越

分。請將輕車都尉等官。亦以佐領坐補。至八品官。七品恩騎尉。外省並無與恩騎尉對品相當之缺。查伊等亦有由領催前鋒承襲者。俱係應以驍騎校揀選之人。請嗣後。如遇保題記名。即以驍騎校坐補。均應如所請。從之。○旌表守正捐軀之河南永寧縣民陳法妻王氏。○己酉。

上御乾清門聽政。○詣

皇太后宮問安。○軍機大臣等奏。工部議准。江

蘇巡撫明德奏。請借司庫公項。挑濟走馬塘新濬。二河一摺。臣等面奉諭旨。此等關係民間水利。酌量自行修理之案。惟在該督撫留心稽察。覈實辦理。務使工歸實濟。若概令造冊報部覈銷。轉致胥吏等需索冊費。徒滋繁擾。嗣後著免其報銷。臣等遵旨。交部存記。嗣後凡民修一切工程。俱遵照辦理。報聞。○以太僕寺卿宮煥文為通政使。○庚戌。

上御重華宮。皇十一子永理。以婚禮成。偕福晉

行禮。○理藩院奏。翁牛特扎薩克郡王布達

扎布四旗內。年已及歲。應得品級者。輔國公之子一人。請授為三等台吉。一等台吉以下子弟。共五百五十六人。均請授為四等台吉。從之。○以故和托輝特扎薩克輔國公多爾濟車登孫車都布喀爾喀輔國公額爾克錫喇弟伊錫扎木楚。各襲職。○辛亥。

上御太和殿視朝。文武陞轉各官謝恩。○理藩院奏。科爾沁扎薩克郡王納旺色布騰七旗

內。一等台吉一員。二等台吉六員。四等台吉十八員。四等塔布囊一員。應照例令伊等子孫承襲從之。

大清高宗法天隆運至誠先覺體元立極敷文奮武孝慈神聖純皇帝實錄卷之七百七十四

大清高宗法天隆運至誠先覺體元立極敷文奮武孝慈神聖純皇帝實錄卷之七百七十五

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理
吏部理藩院事務正黃旗滿洲都統世襲騎都尉軍功加七級隨帶加一級事官加二級軍功紀錄一次臣慶桂
總裁官經筵講官太子太傅文華殿大學士文淵閣領閣事稽察欽奉 上諭事件處管理刑部三庫事務
世襲騎都尉軍功加十九級隨帶加二級又加二級臣董誥內大臣戶部尚書兼監蘇州都統軍功紀錄五次
尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆三十一年丙戌十二月壬子諭陣亡人

員。為國捐軀情殊可憫。是以從前特降諭旨。於伊等子孫承襲世職應完之後。賞給恩騎尉。世襲罔替。俾得永承祭祀。今閱八旗年終進呈世職家譜。其平定伊犁回部時。陣亡人員。所得世職內。註有此次承襲後。世職已完字樣。是部旗諸臣。以此等世職。事在奉旨以後。不得與從前世職一體賞給恩騎尉。但念伊等同係陣亡人員。所有應襲世職。於世次應完之後。獨不能均受隆恩。朕心深為不忍。

且按照世數承襲既畢。竟與尋常旗人子孫無異。則此等員缺日漸減少。於旗下臣僕。永遠生計。亦未免漸形竭蹶。著加恩。將平定伊犁回部時陣亡人員。所得世職。俱照從前陣亡人員例。一體賞給恩騎尉。世襲罔替。則國家億萬斯年。伊等子孫。並得永受朕恩。世守祭祀。而八旗世職。員數衆多。亦得普沾廩祿。永叨利賴矣。著為例。○以一等子齊努子敏珠爾。一等男伊立布子穆克登額。三等男趙連行子永興。各襲爵。○癸丑。

上詣

皇太后宮問安。○諭理藩院奏。據親王旺丹多爾濟帕拉木。郡王索諾木丹津等呈稱。具呈懇留七十五一事。伊等並不知情。係貝子沙克都爾扎布。協理台吉垂中扎木素。二人辦理呈遞。前海明詢問伊等時。伊等即如此回答。後仍照此呈遞海明。經海明申飭。伊等不得已。曲從海明意旨。認為懇留七十五屬實。

具呈認罪等語。前據海明奏。據旺丹多爾濟帕拉木。索諾木丹津呈稱。懇留七十五一事。衆扎薩克俱不得知。係沙克都爾扎布。垂中扎木素。二人辦理。經伊詰查。復具呈認罪等語。朕曾降旨。以事屬已往。不必深究。今旺丹多爾濟帕拉木。索諾木丹津。復如此在理藩院具呈。轉不得不詳查矣。索諾木丹津。現在京城。著派貝子扎拉豐阿。帶領馳往西寧。傳喚旺丹多爾濟帕拉木。同海明詳確質訊。如

實係海明勒令伊等具呈。即一面令海明來京。扎拉豐阿。暫駐彼處。辦理青海番子事務。朕派人前往更換。如海明並無抑勒情事。伊等具呈妄賴。亦著扎拉豐阿。明白回奏。候朕降旨。○以刑部侍郎綽克托。兼正紅旗滿洲副都統。○以涼州副都統恒德。西安副都統偉善對調。○以一等子班扎布姪丹達爾布瑪。襲爵。○甲寅。軍機大臣等議覆。御史星額布條奏。一筆帖式保送知縣。各部悉以資格

久者。引見記名陞用。但論俸咨取。俱係年齒衰邁。難勝民社之人。請嗣後停止較俸之例。令各衙門於京察一等筆帖式內遴選。出具考語。咨送吏部。引見記名。挨次補用等語。查俸深筆帖式。保送知縣。原以其行走日久。事務諳練。並非漫無區別。但計年分。且需引見記名。方行補放。若悉保送一等人員。則本署辦事。必致乏人。且似另設一班。所奏應無庸議。

陵寢司員。新例三年調京。惟筆帖式仍俟六年。但其中多有可造就者。亦請照司員例調京。一各堂司官員內。有親伯叔兄弟同署者。例應迴避。筆帖式並無承辦事件。如令一體迴避。其先經行走年分。皆不計算。而調補別署。亦為新手。殊屬可惜。請嗣後筆帖式遇親伯叔兄弟。得同署司員。若不同司。不必迴避。如同司。令調司行走。同係筆帖式。不必互相迴避。均應如所奏。得旨。這所議星額布條陳事

件內。將由保薦一等筆帖式內。補放知縣一事議駁。將

陵寢筆帖式。照司員例三年調京之處。議准。均屬非是。伊奏請保用一等筆帖式者。即係保用俸深人員之分例。並非另設一班。特為民社得人起見。嗣後俸深筆帖式。補放知縣一項。即將年力富強人去得之筆帖式等。一併遴選。帶領引見。記名補用。至

陵寢司員筆帖式。距京不遠。非盛京可比。筆帖式。仍著六年調京外。司員亦著六年調京。餘依議。○工部議覆。欽差侍郎裴曰。修等奏。臣等會勘江省水利河道。上自洪濰等河。及韓家堂迤下。經過黃水各河。下至歸仁集。烏鴉嶺。安河陡門一帶。沿途查勘。此處係上受毛城鋪減洩之黃水。并承接豫省諸水。入洪澤湖之尾閘。最關緊要。又自宿遷境內之永濟橋。經桃源清河。安東。沭陽。海州。六塘河。上下并兩岸支河。匯歸入海之處。周行察閱。惟毛

城鋪進下。從河尾起。至符離集。濰河。并南北兩岸各河。以及草壩內外。間斷淤淺。並西流黃壠二閘。各有衝壞石塊。西岸子堰。微有殘缺。先經總督高晉勘估奏修。應歸彼案覈報。又韓家堂進下之房村河。牛市河等處。俱為黃水漫衍。淤墊較甚。其峯山閘下河道。亦有淤淺。應官為辦理。又邳州沂河兩岸子堰。衝缺六處。安東縣民便河一道。亦間段淤淺。亟應挑濬。應如所奏辦理。得旨。依議速行。○喀

爾喀親王嗎呢巴達喇。青海輔國公索諾木。巴勒濟故。遣官致祭如例。○賑卹江西南昌新建。進賢。星子。建昌。德化。德安。鄱陽。餘干。南昌。衛。九江。衛等十一縣。衛。本年水災貧民。蠲緩新舊額賦如例。○乙卯。諭軍機大臣等。副都統德雲。總兵德興。索柱。各具摺恭請皇太后聖安。外任副都統。總兵等。如恭遇皇太后萬壽聖節。併元旦令節。自應具摺請安。平素無故。不應屢次請安。今既非

皇太后萬壽聖節。又非元旦令節。德雲等無故請

皇太后安。殊屬非是。著將此遇便通行傳諭各督撫將軍。副都統。提督。總兵。併應行請安之大臣官員等知之。○吏部議覆。陝西按察使秦勇均奏。請定失察新疆逃遣潛匿處分一摺。臣等酌議。請嗣後新疆人犯。若逃回原籍居住。別經發覺。應查明原籍曾經奉文密緝者。無論已未出結。將原籍地方官降二級調用。其未經奉文密緝者。降二級留任。若在別處逗遛半月以上者。將失察之地方官。降一級留任。從之。○盛京將軍舍圖肯等奏。筆帖式覺羅富海。與步軍統領催阿爾布圖毆。請解送宗人府辦理。得旨。覺羅等事務。交宗人府辦理。原為重視伊等。果伊等有不肖之事。豈尚得拘泥此例。況京中覺羅等有犯罪者。尚發往盛京等處。交將軍等管束。豈彼處覺羅犯罪。反不可管束乎。筆帖式覺羅富海。著革

職。交合圖肯等定擬具奏。嗣後有似此者。俱照此辦理。○調浙江按察使圖桑阿。為廣西按察使。以河南河陝道歐陽永禔。為浙江按察使。○丙辰。諭曰。彰寶奏。哈密郡王品級貝勒玉素布。在山西靈石縣病故等語。玉素布宣力多年。甚為奮勉。前聞伊患病。朕即加恩賞藥。令布政使喀寧阿。前往看視。今聞溘逝。朕心深為憫惻。著加恩賞銀五百兩治喪。即動彼處庫帑。命喀寧阿親身帶往。賞給伊子。

宣諭朕旨。賜奠。仍令吳達善。彰寶。明山。沿途派員加意照料。送至伊游牧處。○諭軍機大臣等。定長等奏。審擬錢國賓。即錢廷順。妄帶帽頂。詐稱御舟水手。持帖拜官。屬託訟事。并捏稱同總管頭王廷臣。張文舉。至楚。同辦木料。將錢國賓擬發烏魯木齊。並分咨直隸。江南等省。查明王廷臣等下落一摺。已批該部覈擬矣。錢廷順敢於假冒頂帶。撞騙說事。自應按律定擬。至王廷臣。張文舉。御舟水手內。

實有其人。但該犯平日。如何與此二人認識。輒爾指稱其名。及所稱王廷臣等在通州開板廠之處。又有何據。著傳諭定長等。將錢廷順就近逐一研訊。務得確情。據實覆奏。○軍機大臣等議覆。前任綏遠城將軍嵩椿奏。稱歸化城距綏遠城甚近。請將歸化城副都統。移駐綏遠城。協同將軍管理滿洲蒙古二城。及土默特官兵等語。查歸化城土默特官兵甚眾。若無大員專轄。亦有未便。況綏遠城滿兵止一千五百名。將軍一人。足敷管理。不若將綏遠城副都統裁汰。於右衛歸化城兩處。各設副都統一員。尋常事件。辦定後。申詳將軍。大事。會商辦理。從之。○吏部議覆。河南巡撫阿思哈奏。稱。辦理地方公事。具有印文。並取印結者甚多。結內之語。與文並無異詞。稍不如式。即干駁換。難免需索遲延之弊。請嗣後。如一切甘結。及同鄉官印結。向不用印文者。仍照舊取結外。其餘具題事件。及詳咨文

移內。例於文外加結者。悉行停止。如遇例載冒濫出結處分。即據其文察議。應如所請。從之。○又議覆河南布政使佛德奏。稱各省卓異人員。有任意遲延。不即領咨赴部者。請嗣後接准部文。定以二十日內。詳請委署。扣明交代之限。給咨限日到部。應如所請。從之。○戶部議覆四川總督阿爾泰議。准調任四川按察使石禮嘉。奏夔州府屬石碛司。自改置流官後。田地徵糧。仍循土司舊習。不計畝數。

隨意認納草籽秋糧二項。並無科則。輕重不等。請嗣後該地方補首及墾荒成熟田地。令該廳親赴勘丈。照附近之鄧都縣科則承糧。其原納秋糧及草籽糧各戶。遇有爭占訐訟。即一律勘丈。按則升糧。如伊等慮執業無據。情願升糧者。准其報官查丈等語。應如該督所題。從之。○兵部議覆兩江總督高晉奏。稱海洋戰艦。以繒船為重。繒船目兵。以舵工為重。請嗣後蘇松狼山二鎮。外海繒船舵工。由

該管將領遴選詳送。給以舟師外委之牌。照營中額外外委之例。造冊咨部。遇有經制外委缺出。一體揀補。應如所請。從之。○理藩院奏。索諾木巴勒濟所遺扎薩克鎮國公請襲。得旨。此扎薩克鎮國公。原因伊父噶勒丹什在西藏著有勞績。特與晉封之爵。噶勒丹達什故後。兩次承襲。理藩院奏請應否減等。朕俱令仍襲原爵。祇緣伊有嫡派子嗣。是以格外加恩。今索諾木多爾濟噶勒藏端多布。

俱係族人。並無噶勒丹達什子嗣。不應仍襲原爵。所有索諾木巴勒濟之扎薩克鎮國公。著減等作為扎薩克輔國公。令擬正之索諾木多爾濟承襲。○以大理寺少卿張若潯為太僕寺卿。○以署正白旗漢軍都統巴祿為綏遠城將軍。○以奉國將軍旭英子富寧額。照例襲封奉恩將軍。○撫卹湖南益陽武陵桃源龍陽沅江安鄉等六縣。本年水災貧民。並予蠲緩如例。○丁巳。

上詣

皇太后宮問安。○幸瀛臺。年班回部葉爾羌阿奇木伯克貝勒品級鄂對等十三人入覲。於西苑門外恭迎。

聖駕賜觀承嬉。○諭軍機大臣等。據方觀承奏。脫逃豐潤縣遣犯限滿未獲之解役楊富元。孫起龍等。請旨正法一摺。所奏殊未明晰。楊富元與吳景德一係快頭。一係壯頭。其在該州當役。本屬相同。而楊富元派出龐吉昇。吳

景德派出孫起龍。事又相類。若地方遇有外遣重犯。必應頭役押解。則二人俱應管解之人。乃竟派人前往。厥罪惟均。或壯頭與快頭更番輪往。此次應值快頭管押。而楊富元以己身應當之差。懶於親往。輒敢私派龐吉昇代解。及龐吉昇未到。復令王三頂替。輾轉脫卸。致要犯中途竄逸。則楊富元自為此案罪魁。即應正法。以示懲儆。設或州縣頭役例止派差。向不輪值解送。則楊富元不過私令王

三頂替之罪。覈其案情。尚可不至於死。該督原擬。何以將楊富元與管解疎脫之孫起龍等同科定罪。而於同案派差不慎之吳景德。竟置之不問。該督摺內俱未詳悉聲敘。辦理亦未允協。著傳諭方觀承。逐一查明。據實覆奏。再降諭旨。○以浙江樂清協副將陳杰。為江南壽春鎮總兵。○戊午。諭曰。科爾沁親王吹扎布。年班來京。現因病身故。朕心深為悼惜。著加恩賞銀三千兩。派永璧帶領侍衛十員。前往賜奠。○己未。戶部等部議覆。陝西按察使秦勇均奏。稱州縣倉庫錢糧。責成知府盤查結報。乃有轉委所屬州縣。彼此互盤。即親赴盤查。亦必先期傳示。縱令掩飾。應請嚴定處分等語。查知府盤查不實處分。條例本極詳明。但恐奉行不力。請飭各該督撫。嗣後州縣倉庫錢糧。令各該管府州。遵例親盤。或有如該按察使所奏各弊。即委員馳往親查。如無虧短。將不親盤及豫示盤期之府州題

叅。照不應重公罪例。降二級留任。如查出虧空確數。即照通同徇隱例。一併題叅革職。不得以同時揭報。寬其并叅。亦不得以盤查不實。不行揭報。從輕議以降留。從之。○庚申。禮部左侍郎程巖奏請終養。允之。○辛酉。孝莊文皇后忌辰。遣官祭

昭西陵。○刊刻

大清會典告成。

御製序曰。自

郊

廟朝廷放之千百國。徵荒服屬之倫而莫之脩。

自

創業守文。經之億萬葉。矩矱訓行之久而勿之。

渝。非會典奚由哉。顧維

聖作

明述。政府粲陳。其間有因者。即不能無損與益。

而要之悉損益以善厥因。則方策所麗。乃一

成不易之書。非閱世遞輯之書也。國家膺

大寶命。

列聖肇興。禮樂明備。

皇祖聖祖仁皇帝康熙二十三年。

始勅釐定會典。則以時當大業甫成。實永肩我

太祖

太宗

世祖三朝之統緒。不可以無述。而述固兼作矣。

皇考世宗憲皇帝雍正五年。

申諭閣臣。敬奉

成編。考衷條系。則以累洽重熙。更兼

皇祖景祚延洪。化成久道。不可以無述。而述且

未遑言作矣。暨朕寅紹

丕基。祇祇翼翼。壹惟法

祖宗之法。心

祖宗之心。發冊披圖。罔或恧隄尺寸。會西陲大

功告成。幸續承

祖宗欲竟之

志事。而凡職方官制。郡縣營戍。屯堡親饗貢賦。

錢幣諸大政。於六曹庶司之掌。無所不隸。且我

皇考勵精圖治。十三年之間。立綱陳紀。復不可無紀以垂永世。爰咨館局。次第具草。乙夜手批。是正而諭之曰。嚮者發凡排纂。率用原議舊儀。連篇並載。是典與例無辨也。夫例可通。典不可變。今將援典而傳例。後或撫例以殷典。其可乎。於是區會典則例。各為之部而輔以行。諸臣皆謂若網在綱。咸正無缺。而朕弗敢專也。蓋此日所輯之會典。猶是我

皇祖

皇考所輯之會典。而倪焉從事於茲者。豈真義取述而不作云爾哉。良以抱不得不述之深衷。更推明不容輕述之微指。稽典者當瞭然知宰世馭物所由來。無自疑每朝迭修為故事耳。若夫治法心法。表裏兼賅。精之而貫徹天人。擴之而範圍今古。如往牒所稱。惟睢麟足以行官禮者。是又數典之原。嘉會之本也。

朕其敢不懋諸。敢不與子孫臣民交勗諸。○諭打牲烏拉採珠人等。每月俱支給餉銀五錢。但伊等生齒日繁。生計不無拮据。著加恩每月支給銀一兩。○諭軍機大臣等。前據楊應琚奏稱。病勢日漸向愈。精神長發等語。覽之不勝欣慰。已加賜藥物。令其安心靜養。邇來加意調攝。諒可霍然。至現在緬匪情形。若何。該督等審度事宜。作何妥辦。半月以來。未據奏報。朕心深為廕念。此際正在乘機辦理。所有一切籌畫之事。俱關緊要。應隨時入告。以紓遠懷。楊廷璋此時亦應前抵永昌。公同商榷。該督如自揣精力充復。可以無需伙助。抑或暫留楊廷璋在彼共辦之處。著傳諭該督。即行詳悉馳奏。○是日起

上以歲暮裕祭

太廟。齋戒三日。○壬戌。諭管理

陵寢之員。每年俱給有俸糈。以資養贍。太監等亦俱支領錢糧。所有總管及官員太監等。分

受菜地。本非例內應得之項。著撤回無庸給與。嗣後歲徵各地租。俱交與該處滋生庫。按例料理。○又諭。前據方觀承奏。脫逃豐潤縣遣犯。限滿未獲之解役楊富元。請旨正法等因。一摺。朕披閱時。以快頭楊富元。若係已身應行管解之差。輒敢輾轉私派。致要犯中途竄逸。則楊富元自為此案罪魁。設頭役例止派差。向不輪值解送。則與吳景德事同一體。其罪尚可不至於死。該督請將楊富元。與管

押疎脫之孫起龍等。同科定罪。殊未明晰。惟恐有乖平允。特傳諭詢問該督。令其詳查覆奏。再降諭旨。今據查明通州押解王士蘭一案。楊富元先將輪值應解之龐吉昇派出。而龐吉昇已於前二日回家。及至點解時。楊富元見龐吉昇不到。即將盤纏交給十五歲之聽差人王三頂替前往等語。楊富元身充頭役。於押解此等要犯。見龐吉昇輪值不到。即應回明本官另派。或親自管送。以期慎重。乃

輒令幼童王三頂替代解。以致要犯脫逃。玩視解犯重差。如同兒戲。其情罪較孫起龍等更重。於法實無可貸。楊富元。著即行正法。至該州知州於僉差解犯重事。委之頭役私派。致滋弊誤。亦屬不合。著交部議處。向來各省遞解新疆要犯。往往視為具文。致沿途疎脫之案甚多。雖定例將玩誤之解役擬絞監禁。但未經按法懲治一二。若輩以為不過拘繫囹圄。坐候緝拏。仍不知所做懼。是以將楊富

元正法。示以榜樣。嗣後解送新疆要犯。經過州縣。俱著專派頭役正身嚴密押送。毋許私相代替。如有似此玩法舞弊者。法在必行。斷不稍為姑恕。著將此通行曉諭知之。○又諭。據明瑞等奏。從前各織造辦解大緞。絲色鮮明。質厚體重。是以哈薩克等。俱樂於交易。今年蘇州。杭州。解到緞疋。較前貨料平常。即如摹本大緞一項。乾隆三十年以前解到者。每疋重四十二三兩不等。三十一年解到者。每

疋僅重三十五六兩。請勅交各該織造。將新送緞疋減價。以便辦理等語。此項緞疋。為新疆貿易所需。前此曾經傳諭各該織造。令其慎選物料。加意造辦。並令陝督楊應琚。於緞疋解到時。逐一點驗。如有澆薄不堪等弊。即嚴行駁回。著經手人員賠補。今據明瑞等奏。該織造辦理此次緞疋。照上年所運。每疋輕至六七兩不等。而價值則仍照前次十三兩之數。明係草率浮冒。以致物料減惡。何以惠

遠人而通貿易。現在此項緞疋。著交與明瑞等減價發售。其所減之價。即著落各承辦之織造。照數賠補。並將該織造。交與內務府大臣議處。再此項緞疋。於何時解至甘肅。該督因何不遵旨點驗。輒將澆薄不堪之緞疋。解送伊犁。并著吳達善明白回奏。○癸亥。以歲暮。裕祭。遣官祭

太廟中殿

後殿。○軍機大臣等議覆盛京戶部侍郎瓦爾

達條奏。一。大營常平。新倉三處。俱有守兵。惟內倉無人看守。應請添設。一。奉省王公莊頭。往往以盜典主地。在部自首。及詢問時。俱稱係伊已故之祖父伯叔經手之事。恃無應坐罪之人。希冀白微地畝。請嗣後遇此等事。令伊等回明該王公。即於宗人府具呈查明。咨行臣部辦理。一。各部京員。多係賃房居住。當差甚為拮据。請動項於空地造官房二百六十間。每間每月一錢五分取租。歸還原款。如

自願置房者聽。均應如所請。從之。○甲子。裕祭

太廟。

上親詣行禮。○遣官祭

永陵。

福陵。

昭陵。

昭西陵。

孝陵。

孝東陵。

景陵。

泰陵。○遣官祭

孝賢皇后陵。

端慧皇太子園寢。○遣官祭

太歲之神。○乙丑。

上詣

皇太后宮問安。○御保和殿。筵宴朝正外藩。左翼。科爾沁和碩親王固倫額駙色布騰巴勒

珠爾多羅郡王和碩額駙齊默特多爾濟。多羅冰圖郡王喇特納扎木素。固山貝子多羅額駙班珠爾。輔國公和碩額駙喇什納木扎勒。一等台吉喇特納鄂勒哲依烏珠穆沁和碩車臣親王朋蘇克喇布坦。教漢多羅郡王喇什喇布坦。固山貝子固山額駙垂濟扎勒。和碩額駙朋蘇克喇什。二等台吉色布騰多爾濟。阿巴噶多羅卓哩克圖郡王車凌旺布。輔國公旺沁扎布。鄂爾多斯郡王品級多羅

貝勒棟多布扎木素。多羅貝勒齊旺班珠爾。土默特多羅貝勒索諾木巴勒珠爾。歸化城土默特四等台吉巴勒丹多爾濟。喀爾喀多羅貝勒拉旺多爾濟。袁布多爾濟。鎮國公恭格喇布坦。阿魯科爾沁多羅貝勒達克丹。扎魯特多羅貝勒固魯扎布。二等台吉朋蘇克。杜爾伯特固山貝子博第。巴林輔國公和碩額駙德勒克。多羅額駙丹津。蘇尼特輔國公扎什喇布坦。喀喇沁和碩額駙納木扎布。一

等塔布囊格勒克薩木魯布。翁牛特二等台吉巴彥巴圖爾。三濟扎布。右翼喀爾喀和碩親王成袞扎布。諾爾布扎布。多羅郡王德木楚克。多羅郡王多羅額駙桑寨多爾濟。固山貝子巴爾準多爾濟。鎮國公車登扎布。扎木禪。輔國公旺沁扎布。德勒克多爾濟。公品級一等台吉扎木禪。多爾濟。扎薩克一等台吉多爾濟。齊巴克。桑齋琳沁。厄魯特和碩親王多羅額駙羅布藏多爾濟。綽羅斯多羅郡王

羅布扎回子郡王品級多羅貝勒霍集斯貝勒品級阿奇木伯克鄂對輔國公圖爾都和什克額色尹扎薩克一等台吉瑪木特鄂爾多斯固山貝子丹巴達爾濟烏喇特鎮國公噶勒桑車凌教漢輔國公固山額駙羅布藏錫喇布和碩特輔國公巴勒濟及大學士領侍衛內大臣等召科爾沁和碩親王固倫額駙色布騰巴勒珠爾多羅郡王和碩額駙齊默特多爾濟多羅永圖郡王喇特納扎木素喀爾喀和碩親王成衮扎布諾爾布扎布多羅郡王德木楚克烏珠穆沁和碩車臣親王朋蘇克喇布坦厄魯特和碩親王多羅額駙羅布藏多爾濟教漢多羅郡王喇什喇布坦固山貝子固山額駙垂濟扎勒輔國公固山額駙羅布藏錫喇布綽羅斯多羅郡王羅布扎鄂爾多斯郡王品級多羅貝勒棟多布扎木素回子郡王品級多羅貝勒霍集斯貝勒品級阿奇木伯克鄂對巴林輔國公和碩額

駙德勒克等至

御座前賜酒成禮○是月漕運總督楊錫紱奏各州縣徵完漕米兌與丁船每府例委同知通判一員監兌即令尾押過淮然後回任該員等並無所事轉滋擾累查江西湖廣押淮之員前經臣奏准停止惟安徽仍循舊例應請并停得旨允行下部知之○江蘇按察使楊重葵奏請陞見得旨汝係深知之人何必陞見但當進於老成勉繼汝父可耳○閩浙總督蘇昌奏屋簷未毒獅子等十三社俱係內山生番近見攸武乃社兇番被勦官兵路過各社秋毫無犯衆社番畏威懷德俱請輸誠歸化並每社每年獻納鹿皮四張小米四石以作稅糧報聞○陝甘總督吳達善奏酌定穆壘安戶章程○新安戶口宜編立里甲請按每年招徠戶民編為一里一里之中分為十甲將來戶口丁糧冊籍悉照里甲順莊開造至編設里甲約可安三千戶之數編為

十里酌定里名以分界限。一每里應選立里長渠長保約請按每里設里長一名每百戶設渠長一名鄉約保正各一名給以委牌俾各有職掌。如果勤於勸導照內地例給扁獎勵。一戶民認墾地畝應均勻丈撥請用巴里坤同知衙門部頒步弓丈準地畝引繩畫界每三十畝為一戶書花名於木籌隨手取籌撥給其附近莊堡空閒餘地亦勻撥俾作場圃。一招徠戶民應俟廣集後移駐文員除現

在咨送二百戶移駐尚屬無多仍照原例令守備暫管外至戊子年三百戶之時酌設文員專管戶民。一現在守備暫管戶民審理獄訟應酌立科條請將命盜重案令該守備驗看取供將人犯解送巴里坤同知衙門審擬成招定讞由安西道解司勘轉到臣覆審具題如犯軍流徒罪者由安西道覆訊移司轉詳臣衙門分別咨部批結至戶婚田土賭博打降諸事即令該守備審理仍報明巴里坤

同知覈明發落得旨如所議行。○又奏巴里坤屯田現派兵五百名遣犯二百五十名合力耕作每名額地二十二畝共種地一萬六千五百畝現在種植有效宜廣為添墾查沙州等營分發遣犯內其年力精壯者可得一百五十名請就近撥赴巴里坤隨兵耕作所需籽種口糧農具牲畜等項悉照現在該屯遣犯之例一體辦給得旨好如所議行。○四川總督阿爾泰奏都江堰歲修工程為數十

州縣水利所關本年江水疊漲其淤停汕刷處均應乘時濬築前飭該管廳縣趕辦臣覆親往驗看各工俱屬穩固淤積處一律深通並飭將堰底較往年加深一二尺不等現在業經收工即日開壩放水俾下游各州縣引渠支河各堰塘俱及早得水豫為浸潤稻地其都江堰上游汶保茂一帶沿江山溪河港凡可蓄水處亦豫飭修築埂壩各為蓄水俟來春插秧需水時次第開放臣又順赴附近

各州縣。查看新種茶樹。較前益多。年來餘茶倍增。茶戶茶商。均資其利。又旱地新改水田。蒲江地方。計自二十九年至今。已共有千餘頃。華陽。仁壽。彭山等處。亦改墾數百頃。至馬鞭等處。新墾荒地千餘頃。各墾戶攜眷安居。請領照票。以為恒產。臣恐小民以歲豐登。罔知節儉蓋藏。現飭所屬嚴禁燒鍋賭博。並勸諭士民。酌輸義社穀石。得旨。諸凡皆務民本圖。欣慰覽之。○廣東學政翁方綱奏。請於考

試生童經解時。如有能記新頒

御纂周易述義。詩義折中。春秋直解三書之義者。准予一體錄取。仍於正考日。兼衡其文字。得旨。此在汝妥行。而尤貴以實。不必定為功令也。○署兩廣總督楊廷璋等議奏。據廣西布政使淑寶奏。永寧。養利。永康。寧明。東蘭。天保。歸順。奉議。凌雲。西隆。西林等。十一州縣苗疆。現俱設保分甲。應考納賦。與內地無異。請將該州縣土著客籍烟民。共男婦大小六十

一萬三千餘丁口。彙入民數冊奏報。應如該司所奏行。報聞。○又議奏。據廣西按察使袁守侗奏。粵西邊隅。土苗犷獗雜居。每因小事爭鬪。動輒以刀相加。更有一種兇器。名曰梭標。最為鋒利。致傷身死者甚多。請飭地方官曉諭。除土勇民壯。有捕盜之責者。許其報官編鑿字號。照常習用外。其餘漢土居民。一概勒限銷燬。並嗣後如有用梭標傷人者。照兇器傷人例治罪。其有因而致斃人命。及竊盜拒捕殺傷人者。仍各按本犯罪由。分別照例定擬。至私造私藏者。照不應重律治罪。應如該司所奏行。得旨。如所請行。○是年。追予烏什出師陣亡。副護軍叅領黑達色等二員。侍衛恒斌等三員。護軍校七靈阿等三員。委署驍騎校常在等二員。空銜藍翎玉太一員。外委杜斌等三員。護軍全祿等二十二員。前鋒額爾京額等三名。披甲茂扎木素等十六名。卹賞。俱入祀昭忠祠。○旌表孝子。江蘇等省

貢生孫泰汶等十二名。孝婦。山西謝氏一口。
守節合例。八旗滿洲格爾敏妻完顏氏等八
十五口。蒙古達爾扎妻李氏一口。漢軍郎紫
垣妻張氏等二十五口。盛京等處駐防父達
妻牛氏等二百五十三口。直隸等省生員高
維謙妻張氏等二百八十六口。夫亡殉節。江
蘇等省丁宣範妻沈氏等十六口。未婚守志。
江蘇等省生員程樹聘妻宋氏等十六口。百
歲壽民。婦。山東等省李以良等二十名口。各
給銀建坊如例。○一產三男。安徽等省殷昌
年等十三家。○會計天下民穀數。各省通共
大小男婦。二萬八百九萬五千七百九十六
名口。各省通共存倉米穀。三千六百九十六
萬二千四百三十六石六斗九升二勺。

實錄卷五十五

三

大清高宗法天隆運至誠先覺體元立極敷文
奮武孝慈神聖純皇帝實錄卷之七百七十五

實錄卷五十五

五

大清高宗法天隆運至誠先覺體元立極敷文奮武孝慈神聖純皇帝實錄卷之七百七十六

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次尋常

總裁官經筵講官太子太傅文學殿學士文淵閣領閣事稽察欽奉 上諭事件處管理刑部戶部工部事務

世襲騎都尉軍功加十九級隨帶加二級又加二級尋常加一級尋常加二級軍功紀錄五次尋常紀錄十四次

尋常紀錄十四次臣德瑛經筵講官太子少保工部尚書紀錄六次尋常紀錄尋奉

教修

乾隆三十二年丁亥春正月丙寅朔

上詣

奉先殿行禮○詣

堂子行禮○率王以下文武大臣詣

壽康宮慶賀

皇太后禮成御太和殿受朝作樂宣表如儀○

詣

大高殿

壽皇殿行禮○遣官祭

太廟後殿○御乾清宮賜宗室王公等宴○丁

卯。

上詣

皇太后宮問安○諭昨秋東省武定濟南東昌

泰安兗州曹州等府屬瀕臨運河之處偶被

水災業經飭令該撫加意撫卹蠲賑兼施俾

無失所但念新春東作方興距麥秋尚遠無

力貧民口食尚未免拮据著加恩將被災較

重之惠民陽信海豐樂陵商河濱州利津霑

化蒲臺禹城聊城堂邑博平茌平莘縣高唐

東昌衛等十七屬及被災次重之齊河濟陽

臨邑長清陵縣德州德平原德州衛東平

東阿東平所金鄉魚臺濟寧嘉祥汶上壽張

濟寧衛武城定陶鉅野鄆城濮州范縣觀城

朝城清平臨清衛等二十九屬無論極次貧

民再行加賑一月俾春初力作之時得資接

濟該撫其董率所屬實力奉行務使窮黎均

霑實惠該部遵諭速行○又諭去歲上下江

濱河各州縣因徐州黃水漫溢偶被偏災業

於例賑撫卹外。並酌借籽種。以資耕作。惟念新春正賑已竣。尚當青黃不接之時。貧民口食。未免拮据。著加恩。將下江所屬之銅山。蕭縣。睢寧。宿遷。并銅山縣之徐州衛。上江所屬之宿州。靈璧。虹縣。泗州。共九州縣衛內。被災七八九十分者。極貧加賑兩個月。次貧加賑一個月。用資接濟。該督撫等。其董率各屬。實心經理。俾得均霑惠澤。以副朕軫卹窮黎至意。該部遵諭速行。○又諭。據期成額等。查審

已革知州張宏燧。營私交結一案。究出伊現有虧空。及從前李因培。赫昇額。曾令伊代武陵縣馮其柘。彌補虧空銀一萬餘兩等語。覽奏深為駭異。李因培。前在順天府尹任內。曾經獲罪。朕不次加恩任用。擢至巡撫。乃於查辦常德災賑一事。玩視民瘼。諸未妥協。是以將伊照部議降調。復念其材堪驅策。擯棄殊為可惜。旋即用為四川按察使。初不料其在湖南巡撫任內。竟敢授意張宏燧。代馮其柘

彌補虧空。至一萬餘兩之多。實為深負朕恩。李因培。著革職。拏問。解往湖北。交與侍郎期成額等質訊。至常鈞。辦事本屬平庸。特因其前此曾在軍營出力。是以屢用為巡撫。今於侯七郎毆死侯嶽添一案。迴護固執。庸懦無能。毫無主見。不堪復勝封疆之任。因降旨令其來京。然尚欲畀以侍郎。或副都統。以策後效。今觀其面諭張宏燧等。於會印稟帖內。倒提月日補送。是竟為欺詐矣。又宣表率屬員

者所應出此。但較之李因培。於虧空之屬員。顯然授意徇庇。欺朦之罪。尚可稍從末減。常鈞。著革職。赫昇額。身係滿洲。乃受張宏燧。投拜門生。始終徇庇。實屬卑鄙無恥。應俟此案審明。定擬到日。再降諭旨。向來各省虧空案件。最為銅弊。雍正年間。經

皇考嚴加整頓。稍知斂戢。每恭繹

硃批諭旨。於此事不啻三令五申。人亦不敢輕犯。意諸弊漸就肅清。朕御極以來。三十餘載。

雖未特降旨查辦。然亦有犯必懲。乃邇年來不肖之員。營私亂法之案。疊次發覺。豈若輩因稽察稍疎。故智復萌耶。朕惟自愧水弱之失。與寬誠之不能感人。若再不能執法。則朕亦非甚懦弱姑息之主也。至督撫為國家大吏。乃於屬員虧空。曲為徇隱。其欺罔實法所不容。在伊等平日。未嘗不以彌縫隙漏為得計。孰知

天理昭彰。終歸敗露。即如段成功一案。其貪黷

發自江蘇。而侵虧遂敗於山右。此案本為查究侯七郎命案正亮。乃於張宏燧供吐現在虧帑情形。輾轉究詰。遂至馮其柘之事。水落石出。足見

天道可畏。斷無久而不敗之理。外省似此巧為掩飾之伎倆。未經舉發者。尚恐不免。朕亦不肯令人告訐。惟俟其自敗。即行按法懲治。決不稍為寬貸也。將此通諭中外知之。○諭軍機大臣等。李因培前在湖南巡撫任內。有徇

庇屬員虧空。授意代為彌補之事。現已降旨革職拏問。著傳諭阿爾泰。即將伊鎖拏。慎派幹員。解往湖北。交與期成額等質審。並將李因培任所貲財。嚴密查封。併傳諭明德。湯聘將伊原籍及尚在江陰家口貲財。一併查封。毋使稍有隱匿。○戊辰。諭。昨因李因培令張宏燧代馮其柘彌補虧空一案。將李因培革職拏問。解往湖北質審。所降諭旨。未將李因培徇庇欺罔之罪敘明。恐不知者或疑李因

培已將虧空之員。叅革究擬。似無袒護情形。何以復治其罪。因命取李因培原叅本細閱。即以李因培原叅而論。其欺隱實蹟。已不能掩。今為一一指出。不特衆人知其情真罪當。雖李因培亦無可置喙。如疏內稱馮其柘虧空穀價。係署武陵縣任內之事。此必因交代時。後任不肯接收。是以敗露。且據該道及該署府揭報。復令張宏燧往查實數。則馮其柘虧空至二萬餘兩。雖未詳晰指出。而為數

之多。已隱躍言外。及據張宏燧所查。謂伊正雜錢糧。尚無虧缺。惟穀價一項。實虧銀八千九百餘兩。遂以此糾紛。是顯然使虧帑劣員。得以避重就輕。且以一叅為解紛之計。巧詐欺朦。莫此為甚。而猶得藉口於已列彈章乎。至張宏燧所供。李因培因甫報通省。並無虧空。礙難查辦。是以欲其彌縫。並授意張宏燧設法彌補銀一萬餘兩。種種營私不法。實出情理之外。督撫為封疆表率。辦理此等重案。

敢袒徇欺罔若此。此而不嚴加懲創。何以肅官方而申法紀。特再明白宣示。俾中外共知之。○以內閣學士金甦為禮部左侍郎。○調廣東按察使費元龍為四川按察使。以山西雁平道富勒渾為廣東按察使。○是日起。

上以祈穀於

上帝。齋戒三日。○庚午。享

太廟。遣誠親王允祕恭代行禮。○遣官祭

太歲之神。○

上詣

南郊齋宮齋宿。○辛未。祈穀於

上帝。

上親詣行禮。○詣

皇太后宮問安。○召大學士及內廷翰林等茶

宴。以立春日得辛。祈穀禮成。即事聯句。○是

日。立春。順天府進土牛春山寶座。○壬申。

世祖章皇帝忌辰。遣官祭

孝陵。○癸酉。

上奉

皇太后幸重華宮侍宴。○諭朕於二月二十五

日啟鑾。巡幸天津。閱視河隄。所有應行備辦

事宜。著各該衙門照例豫備。○甲戌。

上詣

皇太后宮問安。○詣

大高殿行禮。○御紫光閣。賜蒙古王公台吉及

回部郡王等宴。○乙亥。諭朕於二月初五日

御經筵。所有應行典禮。著該衙門照例豫備。

諭軍機大臣等。據富僧阿奏。准瑚圖靈阿等咨稱。俄羅斯吉那喇勒。請將巡邊大臣。拏獲伊處屯田之鄂什巴等三人。查明放回。當將本處大臣。並未拏獲人口。回覆等語。前據瑚爾起奏稱。巡邊時。拏獲越界偷盜之鄂什巴等三人。業已解京。乃瑚圖靈阿。接到索取來書。遽以並未巡卡。拏獲人口。為辭。殊屬非是。俄羅斯數年來。屢違原定章程。勒增商稅。於特固斯懇之事。肆行狡詐。因將內地商人。徹回。諸事豫為曉諭。俱已行知。薩納特衙門。乃並無回文。而於此等事件。借端索取。惟應將前此曉諭之事。責令趕緊妥辦。如能諸事恭順。遵照奉行。此事再行酌議。著傳諭瑚圖靈阿等。儻吉那喇勒。再行索取。即遵此旨。回覆。再。瑚圖靈阿。在庫掄已及二載。可於八月初旬。赴熱河山莊。陛見。朕就便詢問該處。及俄羅斯現在情形。併諭令富僧阿等知之。○大學士管雲貴總督楊應琚。雲南巡撫湯聘

提督李時升奏。據總兵朱崙報稱。緬匪自撈木潰敗。大兵復乘勢追勦。二次共殺賊六千餘人。當有伊領兵頭目莽聶眇遮來營懇請。罷兵歸順。並呈獻金燭紅呢花布等物。臣以匪酋猛毒狡詐。恐陽言納款。陰圖益兵再舉。仍飭朱崙加意防勦。旋據報。該酋加調匪眾。不下二三萬。由僻徑越至土司邊界。焚掠經我兵迎擊。於十二月初六七等日。殺賊千餘人。又於十一十二等日。斬獲賊首三百二十餘級。時銅壁關大弄種。二弄種及止丹各野人。均奮勇出力。殺賊千餘人。又於十六日。朱崙劉德成分路抄殺。共斬賊首三百四十餘級。計前後勦殺。已幾及萬人。我兵惟遊擊馬成龍。力戰陣亡。查緬甸原係邊南大國。密菁崇山。阻江為險。水土惡劣。瘴癘時行。若欲直搗巢穴。恐曠日持久。得不償失。如猛毒果傾心凜懼。願効臣服。似即可宥其前愆。酌與自新之路。得旨。另有旨諭。諭軍機大臣等。據楊

應琚等奏。節次勦殺緬匪。幾及萬人。現在緬目等懇請罷兵歸順。並稱若欲直搗巢穴。轉恐曠日持久。得不償失。似可宥其已往之愆。等語。所奏似未協機宜。該督既奏節次勦殺緬匪。多至萬人。我兵現在奮勇直前。軍威大振。緬匪望風懾伏。使果係確切情形。則實有可乘之會。正當厚集兵力。因勢深入。不難迅奏膚功。何以復稱地險瘴多。轉欲將就了事。正恐該督等祇據領兵將弁呈報。不無綠營

舊習。虛張粉飾之弊。其前後所報勦殺克捷之處。俱未盡可信。而緬匪負隅憑險。勢難遽與爭鋒。果爾。亦當將該處實情奏明。候朕酌奪。西師一事。運籌決勝。一切皆斷自朕衷。但從前準夷回部。地勢人情。皆所洞悉。故得隨宜指示。督令直前鼓勇耳。今緬匪地隔邊隅。勢難遙度。而綠旗兵之力。又非滿兵可比。若該督奏報稍有未實。其何以籌畫奏績耶。故此事原令該督相機酌辦。朕亦並無成見。前

此屢降諭旨甚明。該督既身任其事。休戚誼同一體。更無庸稍涉虛浮。猶之一家之事。彼此分理。而仰家長為主持。又何所疑慮。而不以實告耶。前遣侍衛福靈安帶領御醫。往視楊應琚病勢。計此時將抵永昌。福靈安本係侍衛。出兵之事。職所應為。且前此平定回部時。曾隨軍營有年。軍務素所諳習。若已離永昌。則亦可以不必。若尚在永昌。著就近馳往軍前。詳悉體察。如現有可乘之勢。不過一月

半月。可以得彼處要害城池。福靈安即不妨同往統兵進剿。如該處勢難籌辦。伊即可一面據實詳悉入奏。一面回京。朕亦得知。微外確情。以定進止。至福靈安此行。與該處進兵。本屬兩事。楊應琚係公忠體國大臣。所見素為正大。諒必不因有此旨。稍存觀望推諉也。又楊廷璋另摺所奏。先示之威。信豫為陳說之處。想楊應琚前此業經辦及。如尚未籌畫到此。則楊廷璋到永昌後。二人不妨從長面

商妥協行之。至楊應琚現在病勢日漸向愈。精神亦漸能復舊。即可無需助理。楊廷璋到後。恐一省兩督調度事宜。不能無絲毫同異。在該督等均膺重寄。彼此必不稍存意見。但恐屬員等不免窺測疑揣。或致無所適從。於事轉屬無益。况兩廣事務。亦屬緊要。楊廷璋接到諭旨後。可即仍回粵東。楊應琚於進勦緬匪一事。始終經理。責成既專。自更易於集事。若楊應琚尚宜調攝數日。楊廷璋即再住數日幫辦。亦無不可。再現在進勦事宜。及楊應琚病體。刻厯朕懷。此次奏報。殊覺遲滯。嗣後如遇打仗得勝緊要事件。不拘三日五日。俱當隨時加緊馳奏。即軍營尋常光景。及該督就愈情狀。亦當十日一奏。以紓遠念。發去孔雀翎五枝。藍翎十枝。交與該督察看實在出力將弁。酌量賞戴。用示鼓勵。著將此傳諭楊應琚。楊廷璋及福靈安知之。○丙子。

上詣

大高殿行禮。○奉

皇太后居長春仙館。○詣

安佑宮行禮。○幸圓明園。○丁丑。兩江總督高

晉。江南河道總督李宏。兩淮鹽政普福奏。揚

州通泰運鹽河。全藉運河為來源。由金灣閘

下注。經由芒稻河。舊設十閘。常川開放。遇水

小之年。即在芒稻閘迤東築壩。以資停蓄。旋

因每年興築費多。議准停止。然壩祇令口門

下板。相機蓄洩。惟芒稻閘之上。董家。廖家。石

羊等溝。近年一律落低。每遇冬春水小。雖經

閉板。而水勢已從上游各溝歸江。通泰河四

百餘里。竟無來源。即再加挑深。無水可蓄。嗣

後除水勢尚足濟運之年。照舊議毋庸築壩

外。如遇冬春枯涸。請仍於芒稻閘迤東。然壩

蓄水。俟汎水長發。即全行開拆。其經費歸商

捐辦。得旨甚妥。如所議行。○戊寅。

上奉

皇太后幸山高水長。至甲申。皆如之。○己卯。

上奉

皇太后幸同樂園侍早晚膳。至壬辰皆如之。

御奉三無私殿。賜皇子諸王等宴。○庚辰。

上詣

安佑宮行禮。○卯正大光明殿。賜朝正外藩等

宴。召科爾沁和碩親王固倫額駙色布騰巴

勒珠爾多羅郡王和碩額駙齊默特多爾濟

多羅永圖郡王喇特納扎木素烏珠穆沁和

碩車臣親王羽蘇克喇布坦。教漢多羅郡王

喇什喇布坦。固山貝子固山額駙垂濟扎勒

鄂爾多斯郡王品級多羅貝勒棟羅布扎木

素。固山貝子丹巴達爾濟。巴林輔國公和碩

額駙德勒克喀爾喀和碩親王成袞扎布。諾

爾布扎布多羅郡王德木楚克厄魯特和碩

親王多羅額駙羅布藏多爾濟。綽囉斯多羅

郡王羅布扎。同子貝勒品級阿奇木伯克鄂

對等。至御座前。賜酒成禮。○諭軍機大臣等。

據鄂寧奏。已革知州張宏燧。於管理鉛廠內。

兩次赴司捏領腳價銀兩。赫昇額並不詳明指駁。以致張宏燧虧空銀九千餘兩。又張宏燧於署常德府任內。請借武陵縣城工銀一萬兩。赫昇額又私行批發。致張宏燧於庫項內。虧空銀七千餘兩。請交與湖廣總督定長歸案審擬等語。赫昇額身任藩司。乃膜視帑項。於劣員請給銀兩。並不查明詳報。輒敢私行給發。以致侵虧盈萬之多。殊堪駭異。赫昇額所有湖北貲財。著該督嚴行查封。毋使稍有隱匿寄頓。可將此傳諭知之。

大清高宗法天隆運至誠先覺體元立極敷文奮武孝慈神聖純皇帝實錄卷之七百七十六

大清高宗法天隆運至誠先覺體元立極敷文
奮武孝慈神聖純皇帝實錄卷之七百七十七

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉
上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履桂

總裁官經筵講官太子太傅文華殿大學士文淵閣領閣事稽察欽奉上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

教修

乾隆三十二年丁亥正月辛巳

寶鑑卷之七

上御正大光明殿。賜大學士尚書等宴。○諭曰。期成額。定長奏審訊。知府李拔所稟買金賄託各情。不察虛實。輒行稟告。請交部嚴加議處。並訊出張宏燧代熊學驥買金。及張何衢等探信各情。由請分別辦理等語。李拔原稟祇係密送宮兆麟。經宮兆麟呈出。始行逐一研究。並非徑向期成額等捏詞誣控。是其所稟雖不盡實。轉不必以此加罪。其張何衢。吳世賢之探聽。亦屬外省常有之事。均無庸交

部熊學驥令屬員買金。並短發價銀。實屬有罪。著革職。交部覈議具奏。○諭軍機大臣等。期成額等查審馮其柘彌補虧空一案。分別擬罪之處。已批三法司覈擬具奏矣。此案李因培赫昇額授意屬員。以致輾轉那移。巧為彌補。實出情理之外。巡撫為封疆大臣。藩司係錢糧總匯。一省之整飭稽查。惟於撫藩是寄。乃伊等竟敢上下扶同。徇情朦蔽。充其伎倆。將何事不可為。是伊等之罪。實在於有心欺罔。較之監守自盜。更為重大。今期成額等以赫昇額依侵盜錢糧一千兩以上律。問擬斬候。於情罪既不相符。而牽引侵盜錢糧律文。轉似故為周內。亦不足以服赫昇額之心。赫昇額不必就此案完結。李因培前已降旨拏解湖北質審。俟解到後。與赫昇額質對明確。即照此旨定擬。再行具奏。並將諭旨敕入摺內。可傳諭期成額定長知之。○壬午。諭據期成額等查審馮其柘虧空至二萬餘兩之

多。李因培授意張宏燧代為彌縫報少。及赫昇額令屬員幫同彌補一案。飭法營私。實出情理之外。州縣虧空。本有應得之罪。若私自通同幫補。既使劣員倖逃法網。且必復貽累他人。效尤侵蝕。弊將無所底止。深可痛恨。上年山西段成功。虧帑疊疊。各屬幫銀填補。業經大加懲創。不料未及一年。湖南復有此案。可見外間上下扶同之習。固結不解。各省皆然。吏治尚可問乎。從前州縣侵虧那掩之弊。

錮習相沿。經

皇考御極。嚴加整頓。始得肅清。朕方謂謹守成規。即可臻大法小廉之治。而刑罰世輕世重。張弛互用。道亦宜然。不意近年藐法欺朦之案。屢懲屢犯。此未必非因朕三十年來水弱易玩所致。如此則不得不力為整飭。朕亦非不能振綱飭紀者也。督撫為封疆大臣。藩司為錢糧總匯。一省之察吏糾貪。乃其專責。如遇屬員侵虧帑項。據實叅劾。則屬員自必共

知顧忌。何難使諸弊澄清。況督撫等。皆朕所簡畀。深加倚任之人。亦何忍不共勵天良。力持公正。而乃專事彌縫。通同徇隱。甘蹈欺罔重罪而不辭。是使朕竟無一可信之大臣。亦伊等不能承受朕恩。享安靜無事之福也。試思督撫膺高爵厚祿。待之不為不優。而幸際昇平。並無折衝宣力之事。宴然坐享豐盈。其稍可自効者。不過正己率屬。共矢潔清。乃尚不思殫竭丹誠。秉公盡職。又安用此督撫為也。現在已經發覺之案如此。則各省之匿而未發者。大畧相同。非朕之必欲逆詐億不信。實伊等甘於自欺。致不見信於朕耳。此等貪黷欺朦之輩。

天道昭彰。無不自然敗露。隨時嚴治。未嘗不可肅國典而儆官邪。然與其犯而後懲。莫若先為明切申戒。著傳諭各督撫。即就所轄屬員內。通行查察。將有無虧空。據實保奏。計伊等此次覆奏。亦未必遽肯和盤托出。即如前此

查覆首邑賠墊一事。明知其未可盡信。朕惟將各摺批交該部。以待將來證驗。此次各省所奏。實與不實。朕仍姑不深究。奏牘既陳。禍福惟聽其自取。將來或別經犯案。惟於覆奏之該督撫是問。無謂朕言之不豫也。嗣後並著於年終。將屬員有無虧空之處。彙奏一次。以重責成。著為令。並將此通諭中外知之。○諭軍機大臣等。期成額等奏。審訊馮其柘虧空情節。及李因培赫昇額授意張宏燧。代為彌補。竟與山西段成功之案。事同一類。實出意料之外。其所稱李因培。於張宏燧清查稟覆時。告以虧項太多。汝係能辦事之人。好好去辦。我也不用細說等語。於緊要處。概付以隱躍含糊。全不成話。此必非當日實在情節。難以憑信。至赫昇額令各屬員幫同彌補。巡撫斷無不知之理。其事或係李因培未調任之先。或在常鈞接任之後。何以並置不問。且李因培之為人。平日好任機智。立崖岸。又豈

肯隨波逐流。與人分過。即以常鈞之遇事顛
項。亦未必懵懂若此。而謂李因培竟甘受屬
員愚弄而不顧。其誰信之。若云因通省倉庫
錢糧業經題保無虧。恐盡數指參。致受奏報
不實之咎。較伊現在所得罪愆。孰輕孰重。李
因培又豈不知審度決擇。何至昧昧然自貽
他日之累乎。此皆情理所必無。豈足以成信
讞。試問定長。設遇此等虧空之案。肯無故曲
為掩蓋。致日後發覺。因人獲罪乎。看來李因

培與馮其柘若非別有關鍵。必不肯無
端徇情開脫。此中關鍵。豈可不切實根求。將
來李因培到案時。著逐一嚴行詰訊。務得確
切實情。勿少任其狡詞飾混。期成額定長。如
意圖將就完案。稍有不實不盡之處。朕或另
派大臣覆往查訊。恐伊等不能當此罪也。○
又諭。昨期成額等奏。審訊參革知縣馮其柘
虧空一案。據馮其柘供稱。接收原任知府饒
全倉穀虧缺三千餘石。又原任武陵縣知縣

楊嘉植交代時。有虧項二三千兩等語。馮其
柘之虧空。既經供出。接收前任饒全。楊嘉植
原有虧項。自應逐細根究。即云饒全業經正
法。無可質訊。而楊嘉植參革未久。其人尚在。
何難拘提到案。研究實情。乃摺內僅以馮其
柘不能指出確數。聲請無庸辦理。未免有大
事化小之意。州縣侵虧帑項。既經敗露。且據
案犯供明。豈可因其已經離任。不加追詰。使
之獨得漏網。著期成額等。速即行提楊嘉植

到案。質對明確。務使水落石出。以成信讞。著
將此傳諭知之。○癸未。諭軍機大臣等。據烏
勒登奏稱。哈薩克因避雪。越入卡內游牧。伍
岱帶兵前往驅逐等語。想已移咨阿桂矣。哈
薩克等因伊處所雪大。愛惜牲畜。越入卡內。
今被驅逐。如果恭順移去。自毋庸另行辦理。
若復藉端支吾。著照所請。即將頭目人等擒
拏具奏。並將牲畜拘留。其酌量施恩賞回之
處。候朕再降諭旨。惟哈薩克等屢經越卡游

牧。或驅之即去。或託故遷延。若不酌定章程。恐伊等性情狡猾。故為嘗試。卡座人員。亦無所遵循。可傳諭阿桂。即速前往雅爾酌辦。仍曉諭哈薩克等。爾等係歸順大國臣僕。理應輸納貢賦。因大皇帝垂念外夷路遠。免其進獻。爾等若以牲畜遇雪。欲覓妥善地方。進我卡內游牧。亦當稟明我處大臣。呈納貢賦。方為允當。且今安集延布魯特等處部落。來至回城。均令納稅。爾等既藉卡內地方游牧。即宜一體納貢。嗣後將哈薩克馬匹牲畜。如何抽取作貢。及雪融後即行遣回之處。阿桂即向哈薩克等詳悉定議具奏。○軍機大臣等議覆。定邊將軍成衮扎布奏稱。張家口外。安設喀喇沁臺站四十餘座。管站官十五員。除將現發廢員。分管効力。餘均由京派筆帖式前往。今地方寧謐。官兵駐劄多年。事務業經熟習。祇留管臺章京。足資料理。請將遣往十一臺站之筆帖式撤回。又托里布拉克官差。

多以喇嘛牲畜應用。請令理藩院。給與執照。停其應差。均應如所請。其科布多牧廠需人。請於喀爾喀尼魯特等選擇年力精壯者。學習行走。應令該將軍自行酌辦。至稱伊綑等處。踏勘修城。添駐官兵之處。究恐俄羅斯等妄生疑懼。應仍照原議停止。從之。○甲申。諭據永泰奏。解運內務府緞紗等項。行至宿州。地方被竊。嗣據亳州知州潘振瑩緝獲正賊。起有原物。移解宿州收審等語。織造解京物件。向來從無中途失脫之事。此次緞紗等項被竊。皆由永泰不能慎重派役。致有疎虞。至疎防失竊之該地方官。例有應得處分。而緝獲正犯之官役。亦應量示鼓舞。該督撫等。何以並未奏聞。著將此傳諭高晉等。令其即行查明具奏。並諭令永泰知之。○丙戌。直隸總督方觀承奏。報得雪霑渥。得旨。京師亦如之。實深慶慰矣。○丁亥。諭軍機大臣等。據瑪瑞等奏。稱遊擊姚宗弼。申報台布至噶噶地方。

因烏拉馬匹羸瘦。詢問番子頭目。答以並無肥馬。動作不遜。台布令其摘去佩刀。其屬下人等擲石擊打。台布頂際中傷。在扎雅克住宿三日。起程。當已飭交扎雅克喀薩頂之呼圖克圖尚卓特巴等。將肆行擲石人等查報等語。台布因牲隻疲瘦。問及番子頭目。即應將餵養之法。嚴行教導。令其畏懼。縱伊等敢向台布動手。亦當示以鎮靜。何遽令其摘去佩刀。自形怯懦。番子等因懷疑懼。擲石擊打。俱緣急迫所致。然竟敢將欽差侍衛擊傷。實屬目無法紀。可即傳諭瑪瑞等。由藏帶兵二百名。前往噶噶地方查辦。并傳諭阿爾泰於成都滿兵內。派撥二三百名。雅即阿如已到川。即著帶領前往。若尚未到。著於滿總兵或副將內。揀選一員。並派協領一員。一同帶領。前往扎雅克噶噶地方。會同瑪瑞辦理。途次仍聽瑪瑞等信息。如需此項兵時。即速前進。儻未到之先。瑪瑞等業已辦結。亦即將兵

帶回。台布至成都時。阿爾泰即詢明起事之由。再傳旨摘去翎頂送京。俟此事查明後。再行治罪。並將此傳諭瑪瑞等知之。○河東河道總督李清時。吏科給事中巡視濟寧漕務葛峻起。奏東省運河。前因汶水過大。圈隄民堰。防護維艱。商船未能通行。議令俵夫趕辦挑濬。今如捕上下河等廳屬均已挑完。查臺莊一帶。商民船隻。向係南漕抵東。始准隨漕開放。惟東省災區。民食急須接濟。應俟各廳塘長河水勢鋪足後。即令商販米船。先期行走。得旨。覽奏俱悉。○戊子。諭軍機大臣等。據孔昭煥奏。查有管勾周士楷一員。並未咨參。茲准部咨斥革。不知何人捏造印文咨部。現將經管文移之書吏張何。押交曲阜縣究訊。並咨山東巡撫查辦等語。管勾周士楷。既未經孔昭煥咨參。其咨部印文。係何人竊用。捏造之處。不可不嚴加訊治。著崔應階切實審究。務得確情。按律定擬。至孔昭煥。甫有清查

族譜濫給孔繼袞劄付在外滋事一案。何以復有竊用印文之事。或係有人欺伊年幼無能。從中滋弊。或係伊年已長成。漸不安靜。亦未可定。著崔應階留心體察。據實覆奏。○己丑。諭曰。予告工部侍郎范璨患病溘逝。著加恩賜祭一壇。交該撫照例辦理。○諭軍機大臣等。據阿桂奏稱伊犁貿易之哈薩克近甚稀少。詢據哈薩克貝克等稟稱。伊等牲畜均於游牧處。經喀什噶爾之回子易去。恐於伊犁等處需用牲畜有礙。且彼此來往貿易。日久必致滋生事端。已移咨綽克托嚴行禁止。并欲令哈薩克將伊貨物扣留。其回子拏解伊犁治罪等語。阿桂所辦過當。回子係朕臣僕。即與內地民人相等。今民人各處貿易。獲利豐盈。生計饒裕。豈不甚善。回子向哈薩克交易。均屬伊等有益之事。如喀什噶爾等處牲畜既多。伊犁烏魯木齊儘可通融應用。豈有因貿易之故。遽將貨物扣給哈薩克之理。

且喀什噶爾與哈薩克相離較遠。尚有商販往來。則伊犁之厄魯特。伯德爾格回子等。若就近前往交易。亦甚有裨益。而官用牲畜得之亦易。總之伊犁回子俱隸版圖。大臣辦事務持大體。不可存畛域之見。阿桂但期於伊犁有益。並未籌畫及此。前雖有禁止伊等彼此貿易之旨。特以回疆新定。不可令哈薩克紛紛往回地行走。故祇准在伊犁貿易。今回子等前往哈薩克。又非哈薩克攔入回地可比。此等事體亦當因時制宜。不可拘泥成案。著傳諭永貴旌額理綽克托等。惟將新疆回子往哈薩克游牧貿易。如何不致滋生事端。並公私均有裨益之處。酌立章程。會同阿桂詳悉妥議具奏。○命戶部員外郎周曰贊提督河南學政。○庚寅。諭朕巡幸天津。周覽河隄淀閘。指示機宜。永求畿輔民生利賴。翠華臨莅。宜沛恩施。所有經過地方。及天津闔府所屬。本年應徵錢糧。著加恩蠲免十分之三。

以昭乘春布澤之意。該部即遵諭行。○大學士管雲貴總督楊應琚雲南巡撫湯聘提督李時升奏。據總兵朱崙等稟報。緬酋猛毒之弟卜坑。及領兵頭目莽聶眊遮。屢赴軍營乞降。據稱前因蠻暮及各土司。近年貢獻逾期。率衆索取。原非抗拒大兵。今屢被懲創。情願息兵歸順。至蠻暮新街等處。實係夷人資生之路。並懇賞給貿易。批如此。則前此受降之事。何以完結。且能保我兵既撤。彼不誅夷此

二處乎。又批。緬亦一大部落。彼若乞降。當有國王之表。同安南暹羅之例。或可將就了事。然亦必將蠻暮新街獻於中國方可。又奏。臣等隨飭朱崙傳喚卜坑等。詰以猛毒狡詐難信。如果畏服。當先撤兵輸誠。旋據莽聶眊遮等報。於十二月二十八日。已將匪衆遣散。現在委員前往確查。得旨。另有旨諭。此奏大不妥。前已有旨。此更繼為嘗試而來。非公忠體國。與朕同心大臣之所為。大不是矣。寧不想

病後朕所加恩乎。諭軍機大臣等。楊應琚等奏。緬匪屢次乞降。並懇請將蠻暮新街等處賞給貿易。現在酌辦一摺。所奏大不是。已於摺內批示矣。前據該督以木邦蠻暮相率歸誠。已得緬甸要隘。請乘機辦理。朕以該督素稱歷練。必非輕率喜事者。因令其審勢熟籌。以定行止。續經該督親往受降。自必操成算於胸中。豫定善後之計。故爾勇往直前。並非朕意存成見。必令該督如此舉動也。昨據該

督節次奏報。勦殺萬人。軍威大振。又稱地險瘴多。得不償失。前後已自相矛盾。如果我武既揚。賊匪膽落。何難乘勝長驅。膚功迅奏。而轉為畏怯不前之語。恐所奏非該處實情。業經傳諭明切指示。今復據奏。緬目情願遣散兵衆。請賞給蠻暮新街。照常貿易。是緬匪名為乞降。實不過暫退其衆。且欲得其故地。此等狡詐伎倆。其將誰欺。而該督遂甘受其愚。據以入告。可見所奏全非實在情形。不過粉

飾虛詞。藉此以徹兵了局耳。試思緬夷亦一大部落。如實係誠心乞降。願附屬國。其酋自當請罪納款。具表輸誠。效安南暹羅之通職貢。奉正朔。並將蠻蕃新街呈獻中國。尚可將就了事。朕亦無求多於荒服之心。即或事屬難圖。亦當將該地現在情勢。據實奏聞。候朕酌量定奪。今率據綠營將弁捏詞稟報。以匪目遣散兵衆為得意。輒欲還其歸附之地。息事苟安。尚復成何事體。豈該督辦理初意即思如此草率完局耶。獨不計蠻蕃新街等既已納降。並遵定制薙髮。即成內地版圖。今若准其貿易。則其地仍歸緬匪。楊應琚能保此數處人衆。不遭緬匪荼毒乎。且蠻蕃而外。尚有木邦。整欠。整賣等處。前此懇求內附時。並請我兵保護。今該督亦置之不言。是緬匪既得蠻蕃。則木邦等處。亦將悉還之而聽其戕賊乎。如此。則幾視受降如兒戲。何以靖遠夷而尊國體。設因緬匪兵衆既散。遽將我兵撤

回。致有貽誤。則伊等之錯謬。更不可問矣。至於就事完事。乃向來督撫等類預陋習。此施之地方政務。尚且不可。況邊徼用兵。何等重事。而亦欲圖聊且塞責耶。楊應琚尚屬公忠體國大臣。乃竟屢以空言嘗試。頗不類其平日所為。豈伊病體尚未全痊。調度不能自主。或出自湯聘李時升等從旁慫恿。楊應琚亦遂附和苟同。故為此奏耶。且李時升以提督統兵之人。何未一臨陣。而止聽一副將之報。遂欲將就了事乎。楊應琚若神志不昏。則無論朕素日倚重之恩。不當稍存欺飾。即其患病以來。朕日夜繫思。賜醫賜藥。體卹存問。何等優渥。楊應琚寧不知感激奮勵。實心妥辦。以副朕懷。而所奏乃出意料之外。實非所以報答朕之逾格恩施矣。著速傳諭楊應琚等。就該處實在情形。妥協經理。仍速將現在光景如何。切實馳奏。楊廷璋此時或尚在永昌。未經回粵。並著會同確商籌辦。務期妥善。將

此一併傳諭知之。○辛卯諭。適郡王品級貝勒玉素布來京入覲。因在途病故。朕心深為軫念。已施恩賞銀五百兩。交地方官將伊靈柩照料護送。今據吳達善奏稱。玉素布之子伊勒巴喇伊木。又因出痘身故。玉素布父子前來入覲。俱已在途身故。深為可憫。朕心愈加痛惜。此雖係伊父子定數。朕心甚為不忍。著施恩再賞銀五百兩。辦理伊勒巴喇伊木喪事。交吳達善派員沿途善為照料。將玉素布。伊勒巴喇伊木靈柩。送至伊家。仍交道員薩瀚。俟玉素布等靈柩前抵哈密時。在哈密庫貯銀兩內。動撥五百兩。著薩瀚親身送往玉素布家中賞奠。○又諭雲南永昌府。現有辦理事件。著楊寧即速馳驛前往。○諭軍機大臣等。昨楊應琚等奏。緬匪請將蠻暮新街等處賞給貿易等因一摺。所見實大不是。已有旨詳悉飭諭矣。今復細思此事。楊應琚等辦理既已不得竅要。恐其中茫無主持。調度

機宜。必致日益歧誤。於事大有關係。且將來籌畫妥辦。朕仍不能他諉。若俟其債事而後為整理。則須另起鑪錘。不若此時覈實斟酌。審機集事之為愈。因復明白諄諭。使其知所猛省。不墮迷途。從前辦理緬匪之初。原因莽逆召散。竄入彼處。向其索取。若緬酋將召散處。相率投誠。請中國發兵保護為奏。朕彼時原以緬甸僻在荒陬。其事亦不值一辦。並未嘗有興師勤遠之意。因思該督閱歷有年。必非輕率喜事者。故諭令量勢熟籌。以定進止。該督自當慎之於始。如木邦等實因彼等眾心畔散。窘急來歸。固可就其已渙之勢。設法招徠。使其自成瓦解。然亦應計及受降以後。如何撫馭綏靖。禦其外患。俾之永隸版圖。若其間稍慮有棘手之事。原無妨拒而不納。此所謂可行則行。可止則止之要領也。乃該督輒前往親受其降。朕以該督既如此勇往。自

必胸有成算。此後諸事。皆無難迎刃而解。方嘉該督之實心體國。冀奏膚功。以加渥賚。及緬匪率衆至蠻暮騷擾。以業經歸附之疆。自不可聽其蹂躪。既已發兵進剿。即當盡殲賊衆。以衛此降蠻。迨新街小挫。因致退兵。益當策勵士衆。奮勇前進。以揚我武。乃遽聽其頭目一語。謂彼酋長乞降。轉請給還已附之地。遂欲將就了局。方在交鋒之際。並未制勝克捷。遽思歇手。尚復成何事體。朕辦理庶務。從不肯稍任顛預完事。況用兵邊徼乎。試思我大清國全盛之勢。何事不可為。即如前此西師之役。平準夷。定回部。在行間者未嘗不經歷艱險。終成大功。皆由我國家將士同心効忠。有進無退所致。蓋爾小醜。有何足畏。遂欲半途而廢。寧不慮見輕於外夷。楊應琚即未身親軍旅。前在陝甘總督任內。西陲耆定一事。朕如何運籌指示。豈竟毫無聞見乎。至現在調集之兵。一萬四千有餘。兵力不為不盛。

更不當稍存畏阻。乃伊等自新街一戰。即退回楞木。而兩次所報交兵之地。又止稱銅壁關鐵壁關以外。按圖而計。楞木已在新街之內。兩關則并退至我界內矣。而該督所奏屢次殺賊萬餘。究在何地。及如何禦戰。剿殺之處。並未詳晰聲敘。則其所謂得勝。仍不過綠營虛誇粉飾惡習。必不能出朕所料。設果如伊等所云。緬匪此次挾以侵擾。蠻暮新街之衆。前奏止有二萬。若殺至萬餘。則已去其大半。賊匪寧不膽落奔逃。尚敢擁衆相拒。而此次猶以遣散賊衆為詞。則前後奏報之不足信。益顯然矣。又如莽聶耿遮等。既有詣軍營乞降之說。楊應琚現在病中。即不能親往查詢。李時升所司何事。亦豈有不親至軍營。察其誠偽。而率委之總兵朱崙。任其處分。朱崙又不親見匪目。復委之叅將哈國興。出營傳諭。此何等事。而該提鎮輕忽若此。有是理乎。且李時升身為提督。統兵乃其專責。現在駐

守何處。何未聞其親歷行陣。督率進兵。以張軍聲而作士氣。而總兵華封。劉德成。又在何處。何以止令朱崙烏勒登額。分兵守勦。於華封等總不提。及且就地圖覈其形勢。新街只水路要隘。尚有木邦等東中兩路。可通阿瓦城。又何以不派華封等。往彼相機辦理。以成犄角之勢。令其首尾不能相顧耶。况辦理緬匪。本因索取召散。而該督自去歲夏秋以來。於內地如何往索。及緬匪如何答覆。擒獻與

否之處。總未一語奏及。務末而忘其本。又安能得事之肯綮乎。總之此事既已辦理。斷不能如伊等所奏。為草率苟且之計。即此時瘴癘漸發。我衆未可冒涉。亦當俟秋深瘴退之候。另籌分路進勦。擣其巢穴。一舉而殲滅之。使蠻荒永靖。方合正理。若楊應琚實見有必不可辦之處。朕亦非必欲窮兵黷武。但業經選調兵馬。征勦緬甸。衆所共知。豈能遽爾無端中止。而此事實楊應琚始終經理。因何冒

昧舛謬若此。伊實不能辭其責。以楊應琚平素老成。歷練。實不類其所為。或伊赴滇時。本係病後。神志昏憤。一切不能自主。誤聽綠營將弁。謊飾慫恿。遂致辦理貽誤。亦未可定。則當據實陳奏。誤聽之實故。懇請重治其罪。并即嚴叅其誤言起釁之人。朕亦當明降諭旨。以朕誤聽楊應琚之言。辦理緬匪之失。布告天下。且謝朕用人不當之過。庶可罷兵戢事。朕此次開誠訓諭。楊應琚當知感激自勵。盡

佈惻誠。毋得稍有隱飾。以速愆戾。至前寄去孔雀翎藍翎。令其察看實在出力。將弁賞戴。以示鼓勵。從前西陲用兵。亦係如此。但彼時皆我領兵大臣。目擊將士等殺賊立功。並有實蹟可據。故賞罰明而人心益奮。今觀楊應琚等節次奏報。率屬虛詞。恐其功績未能悉當。若不過止給巧於飾對之總兵副將各員戴用。以圖誇耀。則濫賞冒功。其咎更大。亦非朕獎勵本意矣。又昨奏摺內。有弄種止丹等

地名皆前圖所無。著另行詳悉繪圖呈覽。此後或駐兵戰勝之處。其地名有圖所未備者。即將附近圖內何地之處。隨時聲明。以備披覈。將此即速傳諭知之。○又諭曰。楊應琚等辦理緬匪一事。種種舛謬之處。已降旨明切飭示。由六百里加緊馳諭矣。茲復按閱地圖。再四審度。愈覺該督等前後所辦。其大不是。實出情理之外。不勝憤懣。該督前奏蠻暮等投誠時。已令其薙髮留辮。並將我兵駐劄新

街。占據地勢。則此兩處皆為中國版宇。而兩處降附之人。即同內地人民。自當加意守護。扼其險要。以為進兵之地。前此新街小挫。尚意其不過偶然失事。我兵仍駐守其地。以圖勦賊。而其後乃稱退至楞木。漸且止及銅壁鐵壁二關。今按圖詳閱。楞木距新街已隔猛英高里二土司之地。而二關則並在我界內。我兵既已退回。則是蠻暮新街早已棄而不守。其兩處地方。現在作何著落。降附之人。或

盡為緬匪戕害。或復為緬匪脅從。該督屢次奏摺。總無一語提及。若此兩處尚隸內地。何以不照前在彼駐兵。轉退至楞木以內。設仍為緬匪侵占。其地已復為賊有。又何以有請賞給貿易之語。矛盾支離。殊不可解。又如該督兩次所奏殺賊萬餘。是我兵威業已大振。縱不能即乘勝直入。深搗賊巢。亦當及此克捷先聲。復進據蠻暮新街。搜逐賊匪。更不應退回內地矣。看來該督邇日所奏。皆係聽信綠營粉飾。全非實情。即從前所稱受降諸事。亦不過詭語鋪張。希圖聳聽。今則破綻自露。雖欲掩飾而不能盡掩。豈公忠體國大臣所宜出此乎。再從前投誠之衆。如整賣景緣景海等處。俱經該督奏請賞給職銜。已允所請。交部發鈔。又中外所共知者。此等人地。現在作何光景。該督亦未籌及。今於蠻暮新街之事。謬誤若此。設整賣等處。緬匪又復效尤肆擾。該督等亦將置之不顧耶。至李時升前來

陞見。尚覺奮勉。妥練。是以將伊調任滇省提督。冀其出力報効。乃伊自到滇以來。並未聞其親至軍營。督率士卒。奮勉進剿。至今不知其逍遙何地。身為統兵大員。如此養尊處優。玩忽從事。是不能承受朕恩。亦必如達啟之自取愆尤矣。再從前湯聘等。奏趙宏榜。在新街輕進失事。復將傷病官兵器仗。收入草屋。放火焚燒。退回內地。請將伊革職治罪。彼時以趙宏榜如果係輕進。則尚係勇往向前。

猶可原諒。但恐輕進之語。亦未可盡信。是以諭令該督等確查具奏。另辦。迄今數月。何以尚未奏及。不知伊等在彼所辦何事。前因該督聞信。即往永昌。似屬實心為國出力。是以傳諭嘉獎賞賚。並欲待以酬庸渥典。由今以觀。則其前此所奏。不過文飾敷衍。毫無實際。既受朕恩褒。便欲將就了事。其視朕為何如主。此等伎倆。竟能巧為嘗試乎。現已諭令據實覆奏。且俟奏到再行定奪。著將此嚴切傳

諭知之。刑部議覆陝西學政吳綬韶奏稱。例內定擬誣騙等罪。俱分已成未成。惟考棚鎗手。未經區別。請嗣後凡場外經訪拏稟首者。為未成。如已頂名入場。無論當時被獲。事後發覺。俱為已成。未成者。除係積慣隨棚。仍遵例枷號三個月。發烟瘴地方充軍。其審係立有文約。而賊未入手。均照誣騙未成。財未接受。罪應滿徒例。加枷號兩個月。但經口許。罪止杖責者。加枷號一個月。其已成者。不分

有無立約。及口許虛賊。俱照誣騙已成例。枷號三個月。發烟瘴充軍。雇倩之生童同罪。若實係被人撞騙。賊止口許。亦照誣騙未成。財未接受例。杖一百。徒三年。應如所請。至稱父兄子弟。頂名代考。雖與凡人雇倩不同。而亂法作奸。尤難查察。併請設立專條之處。應即照凡人鎗倩例。一體治罪。毋庸另議。從之。○癸巳。

上詣長春仙館問

皇太后安。奉

皇太后居暢春園。○諭曰。西洋人艾啟蒙在內廷行走。尚屬勤慎。著照從前郎世寧之例。加恩賞給奉宸院卿銜。○諭軍機大臣等。昨因提督李時升。身為統兵大員。並不親赴軍營督辦。一味玩忽因循。不堪復膺專閫之寄。是以降旨革職。留滇効力贖罪。適楊寧陞見。即將伊補授雲南提督。並令其馳驛前往。代李時升任事。朕之所以簡用楊寧者。以前此西

陸用兵時。伊曾隨歷行間。身經戰陣。衝鋒殺賊之事。素所諳習。必不致如達啟。李時升輩之畏蒞不前。且伊身係滿洲。亦斷不肯效綠營虛誑惡習。是其實心出力。乃所優為。朕之期望於彼者。亦不過如此。頃曾面諭及之。至軍營一應調度機宜。則仍係楊應琚專責。切不可稍存觀望。況楊寧之職。祇在督兵勦賊。而其可倚。又在誠實不欺。若運籌決勝。原非所嫻。朕並未以此相委寄。即楊應琚始終經

理緬匪一事。功過惟獨任之。此時更不能妄思推諉也。此事初辦時。朕實毫無成見。因該督屢奏有可乘之機。朕以該督素為歷練。必不致輕率喜功。且必胸有成算。方待其建績策勲。不意該督前後所辦。竟為綠營將弁所誑。病昏不察。信以為真。而李時升憚於親往。既為其下所愚。復轉以愚該督。而該督又輕據若輩粉飾虛詞。率爾入告。朕亦誤聽楊應琚之言。為所朦混。今見其諸未妥協。因綜其

始末。詳覈熟籌。始知該督之種種謬妄。至此乃水落石出。而其最甚者。如兩次所報殺賊一萬有餘。尤為荒誕。夫殺賊果至盈萬。則填尸流血。其占蔽地面當復不小。伊等果能悉數其戰勝之處乎。且該督等前奏。自新街小挫。即退回楞木。似蠻暮。新街皆已棄而不守。若斬獲果真。則兵威大振。先聲所布。何事不可為。縱未能乘勝深入。直搗賊巢。而奮我銳氣。逐北追奔。無難徑抵蠻暮新街。搜戮匪徒。

收復故地。何未聞伊等仍至彼兩處駐一兵殺一賊乎。且從前平定準噶爾。回部。征勦盡除。不下百餘戰。統計所戮尚不及萬人。乃謂兩次交鋒。俄頃之間。方隅之地。竟能殺賊如許。有是理乎。楊應琚辦此一事。既已誤之於前。此後不宜再誤。屢次所降諭旨甚明。況辦理緬匪一節。楊應琚既已承擔其任。即與朕誼同一體。更不容稍有隱欺。如該督果見其勢有難行。即遵前旨據實陳奏。亦可另為裁奪。若欲如前奏之虛朦文飾。便圖顛預了事。楊應琚其何以對朕。而朕亦何以對天下。豈朕平日所倚任為公忠體國之大臣可出此耶。至該督前此之誤。原因病軀不能親至軍營。而李時升亦不親往。惟任將弁等捏詞愚弄。今楊寧至彼。自可得該處實在情形。不特朕可灼知萬里以外。即楊應琚深悉實情。亦可相機妥辦。期收效於桑榆。於彼實有裨益。但恐外省陋習。妄疑專遣大員。馳赴軍營。必

倚其主持經畫。則大不然。無論楊應琚至此難以卸責。即朕或以楊應琚為不可復用。何難另簡督臣往代。而專派一提督以掣其肘乎。楊應琚若誤會朕意。畧有瞻顧諉謝之心。則是自速重愆矣。著明白傳諭。即令楊寧齎往。諭令該督知之。○甲午。

上詣暢春園。問

皇太后安。○還宮。○吏部議准。四川布政使張逢堯奏稱。應用教職之歲貢。如有病故。例應

隨時報部銷冊。惟未經查報之地方官。得援引家屬未報聲請免議。往往視為無關緊要。不行申報。致部選後繳憑開缺。往返動經半載。或一缺接選數員。均經物故。曠缺至二三年之久。請嗣後漏報此項之員。俱照定例議處。不得援例請免。應如所奏。至稱每科鄉試後。將應用教職人員。驗看陶汰之處。應仍遵前旨停止。從之。○禮部題朝鮮國王李昫遣使表賀。

萬壽冬至元旦。三大節安南國王黎維禱遣使表謝冊封恩。並進歲貢方物。均賞賚筵宴如例。○以鑲黃旗漢軍副參領一等子馬元凱為鑲白旗漢軍副都統。○調直隸天津鎮總兵那丹珠為馬蘭鎮總兵。以通州協副將楊克信署天津鎮總兵。○是月。江西巡撫吳紹詩奏。據贛州府知府李枝昌稟。洙泗書院學錄孔興珪。同祀生孔興珙。投遞衍聖公孔昭煥移文。來贛清查族譜。旋在贛縣長落方田。西坑三處。索取盤費銀五十兩。當委員將孔興珙並挑夫李曰鳳追回。據供。孔興珪途次患病。已回湖廣通城縣原籍。仍將委牌交伊代查等語。現在咨提孔興珪及隨從書役。來江質訊。併將孔興珪果否奉部發給文憑。及孔興珙是否實係咨部祀生之處。仍飛咨衍聖公查覆得旨。所奏似聞孔昭煥處分後。始趕奏者。頗瞻徇觀望矣。即當究其沿途生事之罪。嚴行叅處。何又問彼之有。汝大不是矣。

○山東巡撫崔應階奏。東省歷城等處。上年收成歉薄。春月東作方殷。農民有需買食。恐商賈藉以居奇。請將官倉米麥雜糧。照時價減糶。每石價在一兩以下者。減銀五分。一兩一錢以下。減銀一錢。一兩二錢以下。減銀一錢五分。倘青黃不接。穀價增長。價在一兩二錢以上者。均照每石一兩出糶。秋成後。仍足敷買補之價。得旨。好。俾貧民皆得實惠。毋致胥役中飽可也。○又奏報。東省州縣。於正月十八日得雪霑渥。得旨。欣悅。覽之。京師亦於是日得雪。可謂普被天恩矣。○陝甘總督吳達善奏。甘省應修次急城工九處。內金縣等七處。均經購料興工。惟安西府屬淵泉縣城。緣從前駐劄提督。規模宏敞。今提督已移駐烏魯木齊。往來改由新路。該處竟成僻徑。且地勢潮礪。春冬消長不一。城垣率多坍塌。駐兵僅六百名。人烟無多。舖戶亦止二十餘家。似無需重費帑金。修此

曠僻大城。現已飭該道府踏勘妥協地方。另為籌議。至巴里坤城垣。經前督臣奏准。俟玉門、敦煌二城工竣接辦。查乾隆二十一年。係奏准派兵修理。今該處已非往來衝途。差使簡少。計需匠夫三萬七千二百二十餘工。仍應於存城鎮標兵內。挑其年力壯健者二百五十名。派撥諳練工程把總。外委各一員。管領督率。該兵等雖有坐糧。但既任以力役。應每名每日酌給銀六分。毋庸另給鹽菜口糧雜麵等項。其土坯木料。即令購買牛車。派做工兵拽拉。俟事竣變價歸款。得旨。如所議行。

○四川總督阿爾泰奏。川省應修城工需費繁多。原議撥用鼓鑄餘息。及餘茶生息等項。除將現存撥應急工外。其餘按年所獲統計祇七八萬兩。若俟陸續撥用。城工未能速竣。查川省試銷餘鹽。量徵公費。經臣奏充辦理夷務。接年共收公費銀三萬四百餘兩。而夷務業經完結。與其另款久貯。不若撥為修城之用。再各竈戶配引外。又有零星餘鹽。自數十觔至一二百觔不等。若按井竈增課。於額引觔數不敷。請仍照試銷例一體報官。併湊成數。交商代銷。所徵公費銀。統歸城工撥用。報聞。

○又奏。據管理夷務各員稟報。金川郎卡。節次查出遞年搶擄南路各土司人口一百三十三名。併前擄革布什咱人口八名。及革酋之母。均情願送還。經各委員眼同該土司收領。郎卡並將伊女許配小金川土司澤旺之子僧格桑為婚。得旨。此又伏一釁端矣。當留心。不可隱諱。又奏。郎卡與隣封各土司。現俱嚴戒番衆。安分住牧。其前懇賞還金川喇嘛七人。已由維州發交領回。至請領新印一事。俟開印後。郎卡另選親信大頭人齎領另報。得旨。覽。

○廣西巡撫宋邦綏議。奏布政使淑寶奏稱。廣西四十七土司。例以巡道總理。知府兼轄。除慶遠府屬之永定、永順、正副長官。及思恩府屬九土巡檢。因職微地狹。

未經設有流官。又鎮安府屬之小鎮安。現已改土歸流外。餘俱分駐佐雜彈壓。其命盜重案。均歸州縣廳員承審。而失察疎防。僅將道府佐雜議處。致承審各員。以案件無關考成。常懷觀望。而近年土官懈玩。率委土目經理。其逞刁唆訟。擾累土民。佐雜書役。多係土目戚族。難於稽查。而兼轄知府。相距寫遠。耳目更難周徧。請嗣後各土司地方。均歸承審州縣廳員就近兼轄。遇有叅處事件。照例題叅。其該管知府。以統轄議處。仍令各州縣廳員率同土司。及分駐佐雜。先將各土目逐一查驗。有曾經滋事玩法者。悉行革除。另選安分土人。取結充補。並令佐雜會同土司。將外籍流寓民人。一併清查造冊。送兼轄官稽察。如土目容留匪類。立拏重懲。佐雜土官。藉端滋擾。亦即嚴叅治罪。若兼轄官有意瞻徇。一併叅處。仍於每歲冬季清查一次。造冊結報。其向無佐雜同駐之永定等十二土司。應令知

府委員一例查辦。均應如所奏。至巡道原係親轄上司。土司承襲。及巡查邊隘。均由加結轉報。自應留心考察。嗣後有應行議處事件。請仍將該管道員職名。一併開叅。得旨。如所議行。

大清高宗法天隆運至誠先覺體元立極敷文奮武孝慈神聖純皇帝實錄卷之七百七十七

大清高宗法天隆運至誠先覺體元立極敷文奮武孝慈神聖純皇帝實錄卷之七百七十八

歷修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲副都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董浩內大臣戶部尚書鑲藍旗滿洲副都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆三十二年丁亥二月乙未朔諭軍機大

臣等福靈安奏據御醫李彭年診視楊應琚病勢尚未痊愈等語是楊應琚等節次所奏辦理緬匪種種錯誤之處皆因該督病中神志恍惚不能主持致聽將弁捏飾謊報之詞復為李時升等所愚遽爾入告否則楊應琚平昔頗為歷練老成何前此擔任勇往忽圖草率完結耶現在征勦緬匪關係緊要楊應琚病既未痊惟為眾所欺哄經理恐難妥協伊子楊重英向來尚屬明幹任事不失世家

舊族之風著即令其馳驛迅往永昌省視伊父並勦助一切軍務楊應琚復得一子在側病體自更易就痊且調度有未當之處伊子亦可從旁代為籌畫於公事自屬有益并可令其隨楊寧前往軍營做古來監軍之意協同辦事則彼處實在情形楊重英皆得備知可以轉告伊父並可一面據實奏聞從前楊應琚因病軀未能親蒞行間邊外確情未經目擊故領兵將弁得而朦蔽之遂致有捏報殺賊萬餘荒唐不可信之語然在旁人或可粉飾虛詞以欺楊應琚致楊應琚誤信亦以飾詞妄奏今楊重英親往斷不肯稍欺其父亦復不肯更欺朕以致其父仍蹈前此虛謬之愆即朕亦得灼知聞外切實形勢得以指示裁度諒楊重英所奏必不敢稍涉虛浮也所有前後寄信楊應琚諭旨並著鈔寄楊重英閱看伊現在江蘇著傳諭明德接到此旨即令其迅速前往所有江蘇按察使員缺著

明德另委委員暫行署理。併將此寄與楊應琚知之。○又諭據馮鈐奏拏獲行竊解京緞箱賊犯王福尹等訊供俱係甘肅回民。有該處賊首馬得鰲為積年巨窩。現在飛咨該督查拏等因。一摺。馬得鰲糾合匪徒。資其盤費。肆出行竊。坐地分贓。大為民害。實屬匪黨首惡。非尋常窩賊可比。著傳諭吳達善即速妥選弁員。嚴密上緊緝捕。務期迅即弋獲。以正刑誅。倘不實力查拏。致該犯聞風免脫。惟該督是問。所有王福尹等供出各犯。並著一併躡緝。毋使漏網。即就近嚴行究訊。分別定擬具奏。馮鈐原摺並著鈔寄。○又諭前據永泰奏解京緞疋於宿州地方被竊。經亳州知州潘振瑩緝獲賊犯王福尹等一摺。曾經降旨令高晉等將失察之地方官照例議處。其拏獲正犯之官役酌量鼓勵。今據馮鈐奏稱潘振瑩將賊犯等解送宿州收審。經該州知州李允升究出巨窩。馬得鰲在甘肅留藏匪黨。

出外肆竊等情。已降旨令吳達善嚴緝務獲矣。該州李允升前於境內被竊。例有應得處分。但其詳悉嚴訊。審出巨窩。並黨夥多人。尚屬能事之員。州縣若果如此悉心根究。務得根株。奸宄何患不除。地方何患不靖。該州前此雖有失事之咎。功過正不相掩。著傳諭高晉馮鈐將是否果係李允升究出之處。查明據實覆奏。候朕再降諭旨。○長蘆鹽政高誠疏報豐財場乾隆三十一年開墾官灘餘地一頃十畝有奇。○是日起

上以祭

社稷壇。齋戒三日。○丙申。諭前開館續纂文獻通考一書。並添輯本朝一切典制。分門進呈。朕親加披覽。隨時裁定。全書現在告竣。經該總裁等奏請將館務停止。因思馬端臨通考原踵杜佑通典。鄭樵通志而作。三書實相輔而行。不可偏廢。曩因舊本多訛。曾命儒臣詳為校勘。鐫刻流傳。嘉惠海內。今續通考復因

王圻舊本。改訂增修。惟通典通志。向未議及補輯。士林未免抱闕如之憾。著仍行開館。一體編輯。所有開館事宜。著大學士詳悉定議具奏。其修書義例。有應仍應改之處。該總裁等務博稽前典。參酌時宜。而要之以紀實無訛。可垂久遠。至現輯續通考一書。從前所進各門。僅載至乾隆二十五年以前。而陸續呈進者。並纂入三十一年之事。先後體製。尚未畫一。著交新開書館。將所纂二十四考。槩行增輯。編載事實。悉以本年為準。增添各卷。即速繕呈覽。以便刊版頒行。其通典通志二書。亦以三十一年為限。以期畫一。至於朕之勅修諸書。固以闡往開來。備乙覽而牖後學。亦使詞館諸臣。得效編摩之職。且於常俸以外。復叨月給餐錢。用示朕體恤之惠。承辦各員。自當悉心蒐考。無漏無訛。以期完善。所有節次繕進各書。皆經朕詳加釐定。其間字句差訛。及文義錯謬者。即為指示改正。不一而足。

諸編纂者。亦當知愧改過。實心校錄矣。而茲閱輿地考內。所載南海子一條。言自萬泉莊匯注於此。試思萬泉莊水勢南高北下。從清河一帶。迤邐通行。即有涓流旁溢。亦當入長河。以達會通。與南海子無涉。而該纂修竟以旁近之萬泉寺。誤為萬泉莊。此係目前易考之地。何以不加詳覈。踈畧若此。著將該纂修交部議處。嗣後在館諸臣。務益加意參稽。勿得率爾操觚。致貽譌謬。以副朕典學右文之意。尋大學士等議奏。一通考館舊派總裁三員。今新開三通館。請簡派正副總裁各三員。一通考館向在宣武門內。地處西偏。往來未便。現在三書並纂。冊籍繁多。纂修等應與總裁面同商訂。請將午門內迤西舊給國史館房屋。給與藏書編纂。一各館課程規條。不一今增纂通考。自應速繕成編。而通典通志。纂排伊始。尤在嚴其考課。應令派出之總裁。分別先後。酌定限期。交與稽察。上諭處照例按

季彙奏。一增纂通考。均係二十五年以後事宜。應於各部院檔案。分晰詳查。俟咨取到日。即行釐辦。其通典通志。原有史書志傳。可憑采輯。即令一同編撰。分門按次進呈。一通典通志。凡唐宋以來典章制度。均須詳加輯錄。至通志內之六書金石草木蟲魚等畧。又宜博採旁搜。除將通考館現有書籍移交外。其應用各種書。應於武英殿內閣等處。酌量取用。一纂修官十員。仍由翰詹選派。與提調官二員。收掌官二員。均照舊支領公費。至原設謄錄十二缺。不敷繕寫。應酌添四缺。供事匠役。亦應各添二名。其工食錢糧。均照例支給。一需用心紅紙張等項。行文戶部支取。歸於年終覈銷。其應用什物。除通考館移交外。如有不敷。應於各衙門隨時咨取。得旨允行。○命大學士傅恒。尹繼善。劉統勳。充三通館正總裁。吏部尚書協辦大學士陳宏謀。兵部尚書陸宗楷。刑部尚書舒赫德。充副總裁。○丁

酉。祭

先師孔子。遣和親王弘晝行禮。○諭據期成額等。究訊馮其柘等。供出虧空緣由。實係李因培。與赫昇額。商令張宏燧。代為彌補。扶同欺飾。一摺。是李因培。心存欺罔。巧為授意。已無疑義。因檢閱赫昇額供詞。據稱。馮其柘。虧空事發時。即往見李因培。李因培。向言。馮其柘。虧空倉庫二萬多兩。其倉穀一項。即缺一萬幾千。我纔保題通省倉穀無虧。如何辦得出去。遂與赫昇額相商。令張宏燧設法辦理。而張宏燧。則供稱。李因培傳我進見。說。錫爾達。並不上省面稟。即將馮其柘。虧空。如此通揭混鬧。你往見藩司。即往武陵妥辦。及張宏燧查辦後。與錫爾達先後回省。錫爾達又續揭馮其柘。署龍陽縣任內。虧空五千餘兩。李因培傳張宏燧面言。近日馮有如此大虧空。必致有欽差查辦。倉穀虧缺。仍舊要出來。須辦小些纔好。當時李因培。還要尋別事。叅錫

爾達。令圖明阿查伊庫項。並訪其款蹟各等語。其於李因培神情口吻。歷歷如繪。自屬實在情形。李因培身為巡撫。察吏是其專責。乃聞知府揭報屬員虧空。不即據實糾參。轉因其不先面稟。遽行通揭為嫌。欲圖尋事叅劾。而於劣員虧空。轉授意屬吏設法彌縫。諱多作少。上下扶同。希圖朦混。其居心險詐。敢於罔上行私。已足定其罪案。其餘情弊。雖不可不徹底根究。然亦未必更浮於此。李因培並非昏庸無識之人。其於利害輕重。豈不自知決擇。即云甫經題報倉穀無虧。恐馮其柘虧空太多。欲圖掩飾。寧不思彼時即按實情叅出。雖亦有應得處分。不過止於失察。及查報不實之咎。其事尚屬因公。豈若此之有心欺飾。情無可恕乎。而李因培竟以此獲譴。較和其衷受段成功之賄。而曲為庇護者。其情更不可解。必係李因培平素處心積慮。隱微多不可問。為

天理所不容。故令其自取重懲。輾轉敗露。報應昭然。不可為炯戒乎。至錫爾達揭報屬員虧空。絲毫無隱。為上司者。方當獎其持正。且幸得一實心欣助之員。共襄廉法。豈可因其不先請示。轉嫉之如仇。意圖尋隙洩忿。即此已見其心術之不端。看來此等惡習。未必創自李因培。或伊久任外差。習見各省風氣如此。遂爾效尤滋甚。亦未可定。但未經發覺。朕亦不肯輕為逆億。故復明切訓誡。朕辦理庶務。一秉至公。從不豫設成見。而於大小臣工。悉推誠相待。惟冀多得一公忠體國之人。乃督撫等尚不知實心圖報。朕常深味為君難之言。即知人任用。亦其一端矣。至封疆大吏。坐享高爵重祿。且受朕倚任厚恩。若自昧天良。忍於欺隱。上蒼必誅其心。而奪之魄。使之自撓法網。李因培車鑒具在。督撫等不可不痛自猛省。復蹈覆轍也。錫爾達揭報馮其柘虧空。不顧上司

情面甚屬可嘉。著該部調取來京引見。期成額等摺併發。並將此通諭中外知之。○又諭今日吏部將降調按察使沈世楓。照例擬選山西雁平道。繕寫排單。豫備引見。沈世楓係朕深知之人。歷任藩臬。屢獲過愆。經朕棄瑕錄用。前此面加訓飭。伊未嘗不稱痛自改悔。且至飾為感激涕零之態。及蒞任後。故智復萌。辦理一切。仍不肯實心出力。看來始終一摸稜無用。虛偽不可信之人。即補授道員。亦難望其湔洗前非。奮勉任事。沈世楓著扣除。以同知降補。○軍機大臣等議覆。拉林阿勒楚喀副都統耀成奏。稱阿勒楚喀寧古塔。伯都訥三姓。拉林地方。刑名案件。俱係旗員辦理。咨送將軍。每以未諳法律。究擬不當。駁審多至四五次。未能速結。請嗣後凡笞杖以下罪犯。仍由各屬審結。如徒流以上罪。訊取確供。即併犯解送將軍衙門審辦。又阿勒楚喀向無監獄。請將現裁倉房六十間。挑選十間。

設立義倉。餘即折蓋監房。撥兵防守。均應如所請。至稱各屬閒散滿洲人等。每年賞給銀各五兩。例於十年後裁減二兩五錢。仍請加恩全給之處。查閒散人等。非食糧當差可比。應仍照原議減半給發。得旨。此等人雖係無差。耕田度日。每歲惟各支銀二兩五錢。實屬微少。著加恩每歲增加一倍。每人仍給銀五兩。餘依議。○戊戌祭

大社

大稷

上親詣行禮。○軍機大臣等議覆。山西右衛副都統綽和諾奏。稱右衛步兵六百名。向設專管翼長二員。步軍校八員。嗣經陸續撥防張家口。綏遠城等處。現存步兵一百二十五名。為數無多。請照綏遠城例。即由該處八旗官員內。選派佐領。防禦驍騎校。各一員兼管。其舊設之步兵翼長。步軍校全裁。所裁之員。俟綏遠城右衛二處佐領防禦缺出。按翼對品

調補。應如所請。從之。○調西安將軍容保為廣州將軍。荊州將軍素玉為西安將軍。以山東青州副都統永瑞為荊州將軍。貴州古州鎮總兵諾倫為青州副都統。○己亥。以舉行仲春經筵。遣官告祭奉先殿。

傳心殿

上御文華殿。講官暨侍班之大學士九卿詹事等。行二跪六叩禮。分班入殿內序立。直講官

四人出就講案前。行一跪三叩禮。復位。直講官蘊著裘曰。修進講四書不逆詐不億不信。抑亦先覺者是賢乎。一節講畢。

上宣御論曰。此語宜與誠明相參看。蓋不逆詐不億不信是誠也。抑亦先覺是明也。人情變幻莫齊。而可以齊之者莫如誠。使事事皆逆其詐而億其不信。是已先以不誠待人。人亦將以逆者億者應之。此亦一不誠也。彼亦一不誠也。夢擾虛偽。莫可究詰。雖云涵其泥而

揚其波而已。已處污濁之內。欲其先覺。抑亦難矣。若夫誠以待人。譬之鏡清衡平。初不以妍媸輕重示物。而物之照者懸者。妍媸輕重。自呈於當前。而無纖毫之可隱焉。明何如之。賢何如之。雖然。誠明性也。豈易言哉。易曰。閑邪存其誠。斯則人人所宜自勉乎。講官暨侍班官跪聆畢。興直講官觀保王際華進講。易經日新之謂盛德一句講畢。

上宣御論曰。張子曰。日新者久而無窮。此語最親切。故日新非必日日務求有所新益。蓋君子自強不息。即所以進德也。且四時運行。春生夏長。萬物散殊。其新若非故矣。然今歲之春。即去歲之春。推而至於四時之運。萬物之殊。又豈非一氣之不息。所以為新。而別有所為新哉。天地聖人。無不以為是為極。而學者進德。亦必以是為法。若夫化民成俗。蘊之中而發諸外。非勵悠久無逸之心。又何以成光大。有永之治。設其無忠信之本。而徒務新奇之

為幾見其不失故而敗事哉講官暨侍班官跪聆畢大學士尹繼善劉統勳奏曰

皇上聰明睿知一本至誠萬方情偽無不先幾洞照鴻猷駿烈日異月新而法宮密勿之中猶且時以保泰持盈自強不息是誠古聖帝明王之用心也臣等幸侍

講筵親承

聖訓不勝榮幸奏畢諸臣出就拜位行二跪六叩禮禮成

上還宮遣官祭

關帝廟臨莊親王允祿第視疾詣暢春園問

皇太后安幸圓明園庚子遣官祭昭忠祠諭曰巴爾品著賞給副都統銜在青海辦理番子事務扎拉豐阿著即來京辛丑

上詣暢春園問

皇太后安諭曰三和在內廷行走有年現已年屆七旬著加恩授為內大臣仍兼侍郎

軍機大臣等議覆直隸總督方觀承奏稱張家口副將所轄營路向歸宣化鎮標管轄嗣經改隸察哈爾都統惟查左衛懷安二處係腹內汎地為山陝軍站大路若歸都統管轄究於軍站差務上下不相聯屬請仍將二城改歸宣化鎮標其沿邊一帶之張家口中左右三營萬全繕房新河口洗馬林柴溝西陽河等營堡仍照原議統歸都統至懷安城既隸宣鎮應照懷來路之例改為懷安路其左

衛城額設守備官兵即歸懷安管轄均應如所請從之壬寅諭曰御史曹學閔奏各省有無虧空之處從前彌補尚有同官通融嗣後則不能保無勒借勒派擾累部民之弊請差侍郎以上大員盤查通省倉庫錢糧並稽察諸弊一摺所奏殊屬不諳事體州縣侵虧那補之弊屢懲屢犯現在各省之匿而未發者原不能保其必無但不忍不教而誅是以特降諭旨令各督撫徹底查明據實保奏即

伊等所奏未能盡實。或閱一二年。特派大員前往清查。或其中有可信其無弊者。不復派員查察。朕臨時自有權衡。現在亦不當不戒視成也。至牧令等。如果虧缺帑項。公然派擾閭閻。豈能掩衆人耳目。此何如事。督撫敢於徇情縱庇。以自取重愆乎。設或有之。無論小民受累難堪。不能禁其不迫切上控。何慮敗露無由。即臺臣分省稽查。又各有本省之人。豈無聞見。更不難據實入告。自可隨時嚴治。

以肅國典而儆官邪。倘督撫敢於如此營私藐法。劣員敢於如此黷貨殃民。則是自棄生成之外。朕又豈肯稍加寬貸乎。第就現今各省吏治而論。雖未能盡臻大法小廉。但當綱紀肅清之時。而朕之愛養生民。不容墨吏稍肆魚肉。即微員亦所深悉。其或虧空多金。同官幫助之事。固所不免。而有犯必懲。亦不患其始終怙惡。若如曹學閔所奏。勒借勒派之弊。則可信其未必喪心至此。即督撫等亦斷

不敢不自惜身命。甘於輕試也。著將此通諭中外知之。○諭軍機大臣等。前將圖桑阿調補廣西按察使。原以浙省布按均係滿員。粵西布按均係漢員。是以將伊調補。且廣西巡撫宋邦綏係循分供職之人。圖桑阿尚可協助辦事。並非有別項情節。今日閱伊奏摺。乃似因伊有罪。故為更調。恐懼之意。形於奏牘。如果獲咎。朕何難明治其罪。且朕於大小臣工。有罪即加罷斥。又何必含糊調補。俟其來

京乎。著傳諭圖桑阿。不必前來請訓。惟當悉心辦事。用副任使之意。○又諭曰。楊應琚屢次所奏。殺賊盈萬。及緬酋乞降。欲圖將就了事。種種舛誤。不一而足。業經節降諭旨。明白開示。嚴切訓戒矣。茲據奏稱。查緬匪反覆不常。應豫集兵馬。俟春夏瘴過。進剿以期永靖。南服等語。已於摺內詳悉批示。該督此次摺奏。較前稍覺醒悟。是其近日病勢漸次就痊。神志不復似從前昏憤。果爾。則伊自當畧得

主見於情事虛實。勦捕機宜。必悉心參酌。籌畫一正。向來之謬。以贖前愆。實亦朕所深願。辦理緬匪一事。朕初無成見。以該督謂有可乘之機。遂聽其籌辦。不意該督自受降以後。茫無主持。日就差錯。至連次所奏。愈覺失枝。脫節。則底裏已畢露矣。看來該督初辦時。必係誤聽趙宏榜之言。未免稍涉喜事。不復通盤籌算。遽謂可指日奏功。及見新街小挫。事稍棘手。以致惶愧成疾。而朱崙遂乘該督病中。替惑。又見阿穆呼朗病亡。因詭捏虛詞。夸張報捷。以逞綠營欺詐伎倆。楊應琚當風痰迷眩之後。不復能細加體察。信以為真。湯聘李時升等。見朕軫念楊應琚病勢優渥。加恩便思趁此機會。急圖結局。楊應琚為伊等惑。憑亦竟不能自主。遂欲將錯就錯。草率告竣。伊等隱微若揭。實不能逃朕之洞鑒也。殊不知朕之所以加恩楊應琚者。原因其為國家出力。且此事始終係伊經手。恐其因病貽誤。

故速冀其痊。以期於事有濟。若以恩眷加隆。即圖恃以息事。試思朕辦理庶務。從不肯聽其顛預完案。況邊陲軍務。何等重大。豈有因優恤大臣之故。遽爾中止乎。緬甸為南荒僻壤。並未嘗必欲加兵。此與從前籌辦準噶爾回部之不得不勦平者。情事有間。但蠻蕃木邦等衆。既已相率歸誠。隸我土宇。早為衆所共知。且就伊等退兵情形而計。似蠻蕃新街亦皆得而復失。豈可竟置之度外。該督此時若能嚴飭將士。奮勇進兵。仍將蠻蕃新街收復。驅殺賊衆。撫輯降蠻。使我軍威大振。緬首或聞而驚怖。悔過輸誠。並將召散擒獻。未始不可予以自新。若因其頭目乞降一語。遽思乘勢撤兵。其何以申國憲而靖蠻服。即伊等此時含混歇手。又寧不慮將來之必無後患。自貽伊戚耶。至朱崙歷次所報殺賊萬餘之語。實為荒唐不可信。夫殺賊盈萬。其勢甚大。非復尋常之捷。遠近傳聞。必皆如風聲鶴唳。

驚而却走。何有此區區賊衆。尚爾擁聚不退。敢冒鋒鏑之理。且朱崙並未親歷行陣。率衆力戰。是其畏怯。較之趙宏榜更甚。該督何以始終甘受其欺。不據實嚴叅治罪耶。又所稱差員查探實情。未據回覆。更不成話。此等軍營要務。楊應琚即因病後不能親往。李時升乃提督大員。統兵是其專責。何以亦憚於親赴該處。確覈形勢督辦。前既為將弁等所誑惑。至此仍復委之屬員往查。又安保其不扶同朦混。是終不得其要領。該提督以專閫之人。竟若身處局外。所司何事。至請將趙宏榜賞給都司職銜。効力之處。更屬非是。前因湯聘等劾奏趙宏榜藐敵輕進。致損官兵。請將伊治罪。彼時以趙宏榜如止係輕進。則尚知臨敵勇往。情稍可原。是以令該督等查奏。今既據查非畏葸遁逃。自可貸其軍律。但甫經獲譴革職之員。即云熟悉邊情。亦止應令其赴軍前奮勉立功。以圖自贖。如果能實心出

力克復蠻蕃新街。即仍授以副將。亦未為不可。若此時並未稍著勞績。豈可遽請給銜示獎乎。楊廷璋既經回粵。此事全係該督責成。朕如此推誠開導。該督益當幡然猛省。務宜妥協籌辦。仍將確實情形奏聞。毋得仍蹈故轍。自取罪戾也。將此傳諭知之。○又諭據楊廷璋奏。現在楊應琚疾疾已愈。即由雲南回粵等語。已於摺內批示矣。看來楊廷璋不過以此事難於辦理。因即遄回粵省。其畏難避事之意。已見於言表。但兩廣事務亦關緊要。督篆未便久懸。且雲南一省兩督調度事宜。或不能無絲毫同異。恐轉致屬員無所適從。於事亦屬無益。楊廷璋此時既回粵省。朕亦不深加責備。至緬匪現在情形。該督既與楊應琚會摺具奏。有業已訪查另行籌辦之語。則於將弁等之捏詞粉飾。及楊應琚誤信人言。辦理舛謬之處。當已窺見端倪。著即將在永昌時所見所聞據實覆奏。以備覈証。如稍

存模稜兩可之見。故為隱躍其詞。希冀顓頊了事。則是自取罪愆。現飭各處查奏實情。斷不能終於掩飾。將來水落石出。該督豈能辭欺罔之咎乎。可將此傳諭知之。○予故多羅貝勒弘明祭葬如例。謚恭勤。○予故雲南臨元鎮總兵阿穆呼朗祭葬如例。○癸卯。

上御勤政殿聽政。○諭曰。王神保尙庇長余。勒索婪贓一案。已降旨革任矣。直隸吏治廢弛。若不加以懲儆。勢必效尤。日甚。是以照部議斥革。但該員於工程尚屬諳習。著留於直省。交與方觀承。於應辦工程之事。差遣委用。令其自備資斧。効力贖罪。俟三年無過。再行奏聞請旨。○吏部奏。請簡放山東學政。得旨。張若桂著仍留山東學政之任。嗣後凡遇學政陞任。無論品級大小。將應否留任之處。概行請旨。著為令。○以祭酒曹秀先為內閣學士兼禮部侍郎。○甲辰。

上詣暢春園。問。

皇太后安。○辛靜宜園駐蹕。至丁未。皆如之。○遣官祭。

先醫之神。○遣官祭黑龍潭。

昭靈沛澤龍王之神。玉泉山。

惠濟慈佑龍王之神。○乙巳。

孝康章皇后忌辰。遣官祭。

孝陵。○

上閱健銳營兵。○直隸總督方觀承奏。直隸州縣倉庫。曾於上年三月。飭各道府廳州盤查。節據結報。並無虧缺。似屬可信。惟牧令賢否不齊。或初終易轍。仍應設法防範。臣現酌擬四條。一。州縣倉庫。款項繁多。應令將現存實數。按兩月一次。造報該管上司。有弊即時抽查。並於每年五月。十一月。將所屬一切款項。各造冊一次。詳覈地丁內除解軍餉。及留支俸工等項外。悉行勒限起解。旗地租銀。一例隨徵隨解。又米穀糶價。如遇停買之時。即令提貯道府庫內。一向例開徵後。每十日。二十。

日。知府委員監拆。並令教官佐貳。眼同封貯。惟府屬雜職無多。州縣或無佐貳。吏目典史。均係微員。請專令教官監拆。事竣後。開具月日銀數申報。一向例拆封後。限三日起解。但期日過促。傾鎔不及。請嗣後銀數在三千兩以內者。限十日。每千兩加二日。不得過二十日。逾限分別查叅。一倉廩啟放。例令佐貳公同驗報。請照監拆錢糧一例。責成教官監視。隨時具報。得旨。此即明云正未必可信也。總

之不教而殺。朕必不為。既教矣而復犯之。則莫怪朕。可詳悉告之各屬。頗聞直隸較他處尤甚也。慎之。其四條另交部議。然有治人。無治法也。尋議均應如所請。從之。調四川北鎮總兵索柱。為貴州古州鎮總兵。以四川夔州協副將常保住。為川北鎮總兵。○丙午。諭軍機大臣等。據福靈安奏。稱伊在祿豐縣地方。接奉諭旨。即回軍營查看情形。如有攻取之機。即帶兵進剿。若無機可乘。另將實情

詳察具奏等語。福靈安業已起身來京。接奉朕旨。即迅速回至永昌。尚屬有心奮勉。著加恩授為副都統。遇缺即補。可傳諭知之。仍令將前在永昌時所見用兵情形。及伊等所奏屬實與否。衆論如何。均作速詳細奏聞。○宗人府奏。已故奉恩將軍寶月無嗣。毋庸另議承襲。得旨。寶月之奉恩將軍。既無人承襲。著加恩賞伊孀婦半俸。以為養贍之資。嗣後有似此者。俱照此辦理。永著為令。○吏部議准。

直隸總督方觀承遵旨議奏。查直隸道員。除熱河大名二道。現有兼銜。及霸昌通永清河永定四道。或近京畿。或附省會。均無庸加銜。惟天津口北二道。俱與總兵同城。兵民錯處。事多交涉。應加兵備道銜。並鑄給關防。從之。○丁未。大學士管雲貴總督楊應琚。雲南提督李時升。奏。前因緬匪散衆乞降。委員前往確查。據查報。猛卯邊外有匪衆數千。欲至木邦等處滋擾。批。如何。向之所稱。非欺而何。又

奏臣李時升會同朱崙派撥官兵迎勦於正月十六日至十八日約殺賊二千有餘追至底麻江賊衆浮水渡江計溺斃及鎗礮傷死又約二千餘餘俱過江逃遁打死賊馬五十匹奪獲軍械無算又批此等虛辭祇可欺汝不能欺朕必無之事也又批四千餘賊祇可惡非正法一二人伊等斷不知懼又奏此次官兵惟避擊毛大經都司徐斌守備高乾

追抵江邊被賊回馬標傷陣亡臣等因緬匪既已乞降又復率衆侵擾反覆背叛現在揀選將備仍飭朱崙親督官兵星馳進剿得旨李時升總戎大員不身歷行陣惟稱調度豈伊自比於楊應琚之運籌帷幄耶可笑可恨諭曰提督李時升辦勦緬夷諸事退惹不前總兵朱崙捏詞誑報並不實心出力殊屬可惡李時升朱崙俱著革職拏解來京交刑部治罪所遺雲南提督員缺著楊寧補授永北

鎮總兵員缺著索柱調補即馳驛往軍營辦事其古州鎮總兵員缺著德興調補所遺松潘鎮總兵員缺著永昌補授諭軍機大臣等據楊應琚奏猛卯邊外匪衆數千欲至木邦滋擾經李時升會同朱崙派兵迎勦前後殺賊四千有餘等語荒唐舛謬實出情理之外閱之不勝駭異楊應琚前此輕信綠營誑語屢報殺賊萬餘早知其必係虛妄已節次降旨明切訓飭今又奏稱殺賊四千有餘

果爾是我軍威大振賊當望風披靡何至避擊毛大經等轉為賊兵傷害其為捏飾欺罔尤屬顯然而前次所奏緬酋遣頭目乞降之語亦全係粉飾捏報今復滋擾木邦何以楊應琚總視為泛常之事又摺內稱李時升會同朱崙派撥官兵星馳迎勦等語可見李時升自到滇後總未一至軍營督勦即朱崙始終亦從未統兵臨陣如此畏惹偷安實堪髮指伊等身為提鎮大員衝鋒打仗是其專職

當此軍務緊要之時。乃僅派弁兵迎敵塞責。仍不親往督率調度。竟若置身局外。全不以事為事。玩律負恩。莫此為甚。若不嚴加懲治。何以使凡隸戎行者。知所儆懼。李時升。朱崙。並著革職。拏解來京。交刑部治罪。至李時升。朱崙。如此怠玩事機。該督何以視若尋常。不行叅劾。轉據伊等虛詞入告。是誠何心。而華封。劉德成。現在何處。又何以不令其領兵赴木邦勦賊。摺內亦從未提及此二人。殊不可

解。楊應琚辦理此事。前後錯謬之處。屢經開導指示。如該督福運未盡。當及早醒悟。遵旨據實妥辦。尚可稍贖前愆。或可仍前受朕恩眷。若再不知改悔。甘為將弁欺朦。致有貽誤。則其取罪更大。斷不能曲為原貸矣。將此嚴切傳諭知之。○又諭。朕昨將諾倫補授青州副都統。所遺古州總兵員缺。已將索柱調補。今雲南用兵需人。索柱復調補永北鎮總兵。朱崙之缺。益以伊係滿洲。又在軍營年久。必

無緣營欺飾陋習。如果實心奮勉。必能承受朕恩。若復畏葸欺朦。其罪更重於漢人。著傳諭阿爾泰。即速令其馳赴永昌。會見楊應琚。前往軍營帶兵行走。○戊申。

上詣暢春園問

皇太后安。○迴圓明園。○諭。據瑪瑞等奏。審擬吳元澄盜用庫銀貿易案內。將查出厯任失察之大臣具奏等語。阿敏爾圖傳景俱係朕特簡之員。駐藏均已三年。乃於盜用庫銀一案。並未查出。非尋常失察可比。傳景著革去護軍統領副都統。逐出乾清門。作為藍翎侍衛。在大門上行走。瑪瑞僅失察一次。且曾在軍營出力。著加恩革去前鋒統領。作為二等侍衛。仍在乾清門行走。官保於途次悉心訪查。到藏即經究出。甚屬急公。著交部議敘。阿敏爾圖若在尚應從重治罪。但伊既身故。其吳元澄盜用銀兩。著令賠交十分之八。餘著傳景交出。至瑪瑞任內應賠之項。亦著阿敏

爾圖賠補○吏部議覆原任湖南巡撫常鈞疏稱湖南耒陽縣新城市之下街向歸清泉縣管理已添設巡檢一員而耒陽管理之上街橫街鋪戶較倍並無專員彈壓請將耒陽所屬之新城市上街橫街併河東三公廟馬頭河西水西坪及迤北之南木坪至黃草州地方均責令下街巡檢就近稽查解報耒邑如事關兩縣即飛報兩邑會辦又安東縣石期市濱臨大河民鋪五百餘戶請將永明縣枇杷巡檢移駐石期市其枇杷地方烟民稀少應即歸近城之祖岡山把總彈壓又武陵縣屬牛鼻灘離城寫遠商賈雲集而隄園水利均在附近請將專管水利之武陵縣縣丞移駐牛鼻灘又桃源縣新店驛縣丞無地方之責難以稽查鋪戶應將驛丞裁改為巡檢兼管驛務又郴州良田地方烟戶衆多該州石陂巡檢現在資寓州城應請移駐良田又慈利縣九谿衛兵民雜處請將安福縣九谿

巡檢移駐又澧州津石商販要路原設巡檢不足以資彈壓而石門縣水南渡地方亦係商民湊集之所請將津石巡檢移駐石門之水南渡其津石即令澧州州判駐劄各缺均係部選移駐後遇有缺出應仍照例歸部銓補均應如所請從之○以侍衛福靈等為正白旗滿洲副都統○已酉諭據楊錫綬等奏揚州二幫糧船停泊清口之三草壩內被洪湖擁下之水鏟破船三隻米石全行沉失請於抵通時著該丁每船買通幫餘米三百石交倉其餘於來年新運賠足等語漕船偶值水凌迅下船身鏟破人力難施並非該丁等防護不慎所致所有沉失米石著加恩免其賠補○又諭曰鄂寧著調補雲南巡撫即馳驛前赴新任湯聘著調補貴州巡撫俟鄂寧到任再赴新任其湖南巡撫員缺著方世儒調補方世儒將印交良卿護理即往湖南方世儒未到任之前所有巡撫印務著三寶暫

行護理○又諭著領侍衛內大臣健銳營火
器營並八旗護軍統領速將曾經出兵効力
及弓馬漢仗可觀者秉公挑取各保送數員
交軍機大臣會同該部揀選堪勝副將遊擊
都司人員帶領引見發往雲南差遣委用○
諭軍機大臣等據阿爾泰奏現派索柱帶成
都滿兵三百名前赴扎雅克噶噶地方等語
昨因雲南用兵需人曾經降旨將索柱調補
永北鎮總兵併傳諭阿爾泰矣雲南兵事甚
為要緊著寄信阿爾泰另行揀派一人前往
扎雅克噶噶更換索柱仍遵前旨即令其馳
赴永昌辦事○吏部議准河南道御史覺羅
扎進泰奏稱在京各部院衙門每年造送河
南道應刷卷宗惟稽查錢糧物料出納之數
考隱埋釐弊竇實與戶工等部相為維制若
如吏部之補調官員補參疎防等件每月各
道註銷無待一年之後始行補查遲誤況各
部事務繁多原不能盡行開造僅留此數件

於錢糧會計之中轉覺龐雜不類請嗣後各
衙門內凡有關係錢糧卷宗全行造送其無
關錢糧案件概行停止送刷從之○以內閣
學士伍勒穆集為理藩院侍郎

大清高宗法天隆運至誠先覺體元立極敷文
奮武孝慈神聖純皇帝實錄卷之七百七十八

大清高宗法天隆運至誠先覺體元立極敷文奮武孝慈神聖純皇帝實錄卷之七百七十九

監修總裁官經筵講官太子太傅文淵閣大學士文淵閣領閣事領銜內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部工部事務

世襲騎都尉軍功加九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆三十二年丁亥二月庚戌諭軍機大臣

等楊應琚等節次奏報捏飾謬妄種種未協已屢降旨嚴飭矣茲復按圖校閱其間舛謬不符之處不一而足如上年九月趙宏榜帶兵駐劄新街已得緬地要隘即猝遇賊人偶爾小挫亦當整兵拒守以待應援何致即退回鐵壁關內則不但蠻暮棄而不顧即新街亦不能守矣而楞木自十一月打仗之後亦不言及有無官兵駐守是我兵惟在銅壁鐵壁二關以內此後並未聞有出關勦戰之事

何以能殺賊多至萬餘則其荒唐不足信更不待言矣且圖說聲明以藍線為界而前奏所稱緬匪偷越蓋達及今次所奏至猛卯邊境二處皆在藍線以內而蓋達之外則有萬仞巨石等關隘猛卯相近則有虎踞天馬二關何以容賊匪出入無忌且現在調集之兵已一萬四千有餘縱不能統率大軍鼓勇進勦收復蠻暮新街等處而沿邊一帶緊要關隘亦當分兵嚴密防守又豈得諉為兵力不敷乃前此緬匪至蓋達焚燒由何路偷越竟未聞稍有堵禦而此次至猛卯滋擾我兵亦僅前往迎敵而非勦截則伊等惟株守銅壁鐵壁兩關而置其餘關隘皆一概視如膜外當此軍務緊急之時邊防疎懈若此有是理乎又昨摺內稱賊衆欲從猛卯侵擾木邦緬匪向在鐵壁等關之西因何繞關而東得至猛卯其由何地竄入亦未據聲明至猛卯距木邦尚遠今賊兵既過底麻江而去則已偏

近木邦華封。劉德成現在何處。何以不飛檄兩鎮。至木邦邀殺賊兵。而僅云派兵尾追。又於事何濟。且底麻與宛頂相近。烏勒登額既駐兵在彼。又何以不聞率兵掩擊。該督於一切喫緊關鍵。均未能籌畫調度。詳悉奏聞。惟據朱崙等一面虛詞。代為轉報。實所不解。總由楊應琚病後。神志昏憤。甘受綠營將弁之欺而不悟。其胸中全無主持。已可概見。率是以往。軍務其何由倚賴。著將該督所進原圖。照繪一分。黏簽發去。令其將諭旨詢問情節。及圖內簽註之處。即速逐一明晰。速行覆奏。毋得再有支飾。將此傳諭知之。○辛亥。

上詣暢春園。問皇太后安。○大學士管雲貴總督楊應琚覆奏節次所報殺賊幾及萬人。均經臣差人察覈。又經李時升就近查明。實係確情。批此即欺罔之一端。又奏緬匪部衆繁多。遇有殺傷。即隨時加添。而永昌邊外十四土司。延袤四千

餘里。山僻要隘。在在均需防守。現加調官兵七千餘名。僅敷分遣。如直搗賊巢。仍恐兵分勢寡。惟應鼓勵官兵。奮勇扼要截殺。又批。既分防要隘。何以緬匪尚入內地。又奏楊廷璋所奏。先示威信。豫為陳說之處。臣早經辦及於該首節次乞降時。宣播天威。曉以大義。但該首執迷不悟。反視侵擾邊地為得計。又批。既執迷不悟。何又節次乞降。此等語句。欺汝昏憤糊塗之楊應琚則可。欺朕則不能也。又奏該匪現已屢經敗衄。凜懼更深。已非前此情形可比。似有可乘之機。又批。真是大言不慙可笑。不謂楊應琚一至於此。又奏臣現與李時升揀選將備。仍飭朱崙由木邦一路進勦。又批。此二人誤事不小。已有旨拏問。速即派人送京。若至自戕。汝當隨之。又奏。臣身受國恩。乃以病軀刻厘聖懷。近得御醫診視。痰氣已清。願勿以臣病為念。得旨。不妥之處。不可枚舉。大不是矣。朕之過矣。何不起福靈

安一句。蓋汝恐彼到軍營。將汝等欺罔處盡露耳。此時汝先喪膽矣。又另摺奏。總兵朱崙統領軍務。宣力為多。現又親督官兵追勦。臣已宣示恩諭。賞戴花翎。得旨。此當正法之人。而汝與之花翎。不知何意。諭軍機大臣等。楊應琚節次奏報。辦理緬匪一事。捏飾乖謬。屢降旨嚴切飭責。并令將該處情形。查明據實覆奏。尚冀其悔悟猛省。不致終涉虛浮。債事獲譴。今閱奏到之摺。仍屬一派虛詞。不意其竟忍於負朕厚恩。甘蹈欺罔而不顧。實出情理之外。不勝憤懣。已於摺內逐一批抹嚴飭矣。如所稱節次勦殺萬人。此等荒唐不可信之事。朕豈能為所朦蔽。而楊應琚尚覲顏屢以為言。雖病後昏憤糊塗。何竟昧心若此。又稱添兵分防各處要隘。果爾。則盜達猛卯等邊境。何以復容賊匪竄入。而我兵並未聞有出境勦殺之事。其為欺飾。尤屬顯然。至稱鼓勵官兵。扼要截殺。更不成語。試思伊等數月

以來扼要者何地。截殺者何時。不過堅守銅壁鐵壁二關。並未能統兵出邊。奮勇掩擊。收回蠻幕新街二處。所謂鼓勵者。又係何事。是其頓兵不前。畏葸退縮之情形畢露。方為賊衆所輕。肆其猖獗。乃尚云欲使其懾我軍威。紙上誑談。竟恃以為得算。有是理乎。且既稱緬酋屢次遣人詣軍營乞降。何以又稱其執迷不悟。即云緬匪反覆無常。亦斷無一面乞降一面執迷之理。看來即乞降之說。亦是伊等粉飾虛詞。而楊應琚竟言之鑿鑿。不自知其支離可笑。此等綠營詐妄伎倆。在楊應琚神志昏惑。自爾恬不為怪。乃欲於朕前售其欺偽。能乎不能。至謂現在該匪喪亡日衆。稟懼更深等語。如此大言不慙。不知楊應琚何以形之奏牘。緬匪如果因喪亡稟懼。則必勢窮力絀。風鶴皆驚。方奔潰之不暇。又安能久聚邊境。屢肆滋擾乎。且所云賊衆約三萬餘。遇有殺傷。隨時加添之語。尤屬荒誕。此不過

朱崙因前報殺賊萬餘。而賊仍不減。故飾為此語。希圖迴護。前非耳。緬地近邊。即有十餘土司。豈能調補如此之便。楊應琚總深信前報殺賊之語。一切概不加詢察。似此毫無見識。軍務尚足倚賴乎。至前發翎枝。原以鼓勵行間實心出力之人。若朱崙之畏怯不進。捏詞欺罔。獲罪重大。所當立正刑章。以示懲警。而楊應琚輒以花翎濫行賞給。更不知其具何肺腸。李時升朱崙前已降旨革職。拏問。此旨到後。著即將伊二人鎖拏。選派妥員。速行押解來京。倘途中管解疎虞。致有自戕等事。恐楊應琚不能當其罪也。計楊寧將到永昌。提鎮事務。不患無人接辦。即彼尚未到滇。此時委人暫署。亦無不可。李時升朱崙二人在軍營原無濟於事。此時即將伊等解。於軍務毫無關輕重。朕已籌度及此。楊應琚奉旨後。更不必稍有遲疑也。至前遣福靈安帶同御醫診視該督病勢。旋復有旨。令其就近體察。

軍營實情。今福靈安已奏於祿豐縣接奉諭旨。迅即馳回永昌。何楊應琚摺內並未提及一字。蓋其意亦知事勢已涉虛妄。難於掩蓋。恐福靈安到彼底裏畢露。此際遂爾神魂失據。故佯為置之不論耳。此次辦理緬匪一事。專心委寄。因其久任封疆。素稱練達。故爾深信不疑。又因其從前尚屬黽勉任事。優獎軫念。格外加恩。初不料其荒謬欺飾。乃至於此。朕於彼亦竟不能復有所期望。且視其往後所辦若何。禍福惟聽其自取。摺內矛盾之處。非批示所能盡。著將此再行明切嚴諭知之。○蠲江蘇銅山蕭縣睢寧宿遷沛縣碭山邳州清河桃源安東高郵泰州興化海州沭陽上元江寧江浦六合常熟昭文崑山新陽陽湖無錫金匱江陰宜興荆溪金壇溧陽太倉鎮洋并徐州淮安大河太倉鎮海等三十八州縣衛。乾隆三十一年水災地丁河租蘆課銀三萬九千三百六十兩有奇。米豆一千一

百六十六石有奇。○壬子。以正藍旗滿洲副都統署正藍旗護軍統領莽古賚為正黃旗護軍統領。仍兼副都統。○予故哈密扎薩克郡王品級貝勒玉素布致祭如例。○癸丑。上御勤政殿聽政。○舉行乾隆三十一年奉天直隸江蘇安徽江西浙江河南山東山西陝西甘肅四川廣東廣西雲南貴州等省。及江南河東等河員大計。不謹官十八員。浮躁官五員。罷軟官十九員。才力不及官四十八員。年老官一百九員。有疾官四十一員。分別處分如例。○甲寅。

上詣暢春園問

皇太后安。○諭前據馮銓奏拏獲賊犯王福尹等供出甘肅回民馬得鰲為積年巨窩。因傳諭吳達善令其嚴密上緊緝拏。茲據奏到。業將該犯及夥黨弋獲。現在派委道府審擬等語。所辦甚屬妥速。但積窩巨匪。非尋常盜犯可比。既經緝獲解省。該督即當親率司道府

縣等公同審訊。迅速定案。使匪徒立正刑章。以除民害。乃仍照常派委道府。輾轉承審。稽延時日。實外省相沿惡習。豈以道府以下等官分位相懸。會同審事。即為褻體。督撫等如此養尊處優。殊非為國家實心任事之道。即如朕為天下主。堂廉體統。自極尊崇。至綜理庶政。不遑暇逸。凡事機有應指示者。必召大臣等面為籌辦。而引見文武員弁。即知縣守備千總等官。品級較微。亦無不親加鑒別。此中外臣工所共知者。督撫等豈宜高自位置。不親細事耶。況積年盜匪。心尤叵測。若令久稽顯戮。則黨夥串供。乘間竄逸。皆所不免。亦不可不防其漸。乃外省每有本案已經審明。仍行監候待覈。動輒關移他省。俟各案訊明。方始結案者。亦非所以警兇頑而杜流弊。嗣後各督撫遇有情罪重大之犯。即督同屬員會審。一得實情。迅行定擬歸結。不必俟他省關查到日。始行定案。著將此通諭知之。○諭

軍機大臣等。前據蘇昌奏。莊有恭陡中風寒。病難速痊。將巡撫印篆。於十一月十二日。暫交督臣兼管。當即賞賜內府藥丸。諭令加意調攝。以期痊愈。迄今已三月餘。未據該督將曾否交還印信之處具奏。福建總督事務已繁。再加一巡撫應辦事件。兼顧亦殊非易。諒蘇昌未必以兼攝撫篆為樂。久戀代庖。自係莊有恭病勢纏綿。未能剋期向愈。或莊有恭因屢獲重愆。經朕加恩復行起用。蒞任未久。不敢遽以有病為辭。奏請回籍。亦未可知。著傳諭蘇昌。即將莊有恭現在病勢若何。能否照常辦事之處。據實速行覆奏。如或抱疴稍深。調治難期速效。即勉強在公。亦與地方政務無益。又何妨予給回籍。俾其安心調理。以冀復元。俟將來病體全愈。原可再加任用也。著即將此傳諭蘇昌。將實在情形速奏。尋奏莊有恭病勢。已於正月內痊愈。臣隨將撫篆移交接受。月餘以來。檢閱文案。料理公務。均

無貽誤。惟左足行動無力。現在上緊調治。報聞。吏部議准。閩浙總督蘇昌奏稱。臺灣府淡水同知所屬八里岔。舊設巡檢一員。近來海口漲塞。無船隻往來。該員兼轄之新莊地方。商賈輻輳。且北連艋舺。大加臘民番雜處。南距霄裏汛。大溪乾一帶。曠野平原。難免奸匪藏聚。應將八里岔巡檢移駐新莊。併請改給淡水廳新莊巡檢印信。從之。○又議准。山西巡撫彰寶遵旨議奏。查山西道員。除河東歸綏二道。現有兼銜。及冀寧道駐太原省會。均無庸加銜。惟雁平道駐守代州邊關要地。與大同鎮各營。均有兵民交涉事件。應加兵備道銜。并鑄給關防。從之。乙卯。遣官祭賢良祠。諭曰。和碩莊親王老成端謹。懋著勤勞。現在諸叔中年。德最幼前。聞抱病。曾親往問疾。並擬於明晨再至邸第看視。尚冀調理速痊。遽聞薨逝。深為震悼。即於次日親臨奠醊。并命皇四子。皇十二子穿孝。所有一切喪

儀及飾終典禮。各該衙門察例具奏。以展朕
萬念懿親至意。○軍機大臣等議。覆盛京將
軍舍圖肯等議。奏據盛京兵部侍郎富德奏
稱。盛京現丈出旗民餘地三十一萬餘晌。每
年租銀十一萬二千四百餘兩。請令銀米兼
收。俟各城倉貯足用。仍照例全收租銀。查各
屬地方遼濶。道路紆長。運腳難免飛灑。且每
銀一兩折交米一石。較市價過賤。旗民勢難
輸納。應請仍照舊例徵銀。惟各城倉貯本屬
無多。應於秋收價平時。令各屬就近採買。價
昂即行停止。俟倉米足數。遇青黃不接之時
即如所奏。以三成減價出糶。秋成後照數買
補還倉。均應如所議從之。○以江蘇按察使
揆義為江西布政使。調山西按察使吳虎炳
為江蘇按察使。湖北按察使石禮嘉為山西
按察使。以原任福建按察使朱珪為湖北按
察使。○丙辰春分朝。
日於東郊。遣愉郡王弘慶行禮。○

上臨莊親王允祿第賜奠。○迴圓明園。○丁巳
上詣暢春園問。

皇太后安。○諭軍機大臣等。從前湖北武昌府
屬馬蹟嶺地方。有吳姓一族盤踞為匪。怙惡
不悛。曾經降旨。令將該族分徙安西瓜州為
一處。巴里坤為一處。烏嚕木齊為一處。經該
督李侍堯查明分起解往。此事在乾隆二十
八年間。距今已閱五載。此等遷往戶口。作何
安插管束。並其情形若何。是否安靜。解往時
有脫逃者否。逃後緝獲。作何處治。該督可即
行速查明確。據實奏聞。至窩犯馬得鰲一案。
前已有旨。令該督將案內要犯。迅即審擬。其
同莊五十餘戶。應即照分徙吳姓同族之案
辦理。使敗類析居。散其黨羽。以安良善。而靖
地方。其如何按地分起。並遴選幹員押解。毋
致中途疎縱滋事之處。並著吳達善妥協籌
辦。可將此傳諭知之。所有前此諭旨。及李侍
堯原摺。一併鈔寄。令其閱看。尋奏。湖北吳姓

一案係分三起解甘。第一起九戶。遞發烏魯木齊。分交寧邊城通判及特訥格爾巡檢收管。二起七戶。遞發巴里坤。交該同知收管。均由各駐劄大臣酌量安插。其第三起六戶。即交安西府屬淵泉縣收管。並經前督臣於近水荒地內酌給房地牛種。令其墾種升科。數年內均無脫逃之案。現在巨窩馬得熬同莊五十餘戶。除重犯家屬及餘犯例應食妻充發伊犁者。均俟查明家口。分起撥解外。其餘戶口應分發巴里坤。穆壘。烏魯木齊三處安插。仍酌分三起。解赴各地方。照例撥給房地耕種。得旨嘉獎。○戊午。吏部議准。安徽布政使富尼漢奏稱。直隸州知州向係從五品。而管轄屬員。體制與知府相等。本任又有專轄地方刑錢事件。遇有缺出。例由本省知州知縣內揀選調補。送部引見。實與陞任無異。且係與同知較俸陞轉。請照同知例改為正五品。其行文所轄知縣用牌。縣用申文均照舊

例。至不屬知縣。亦請改用牒呈。直隸州用墨筆照會從之。○又議准。山東巡撫崔應階遵旨議奏。查東省道員除運河道現有兼銜及駐省之濟東泰武道鹽道駐劄德州不與提鎮同城之糧道均無庸加銜惟兗沂曹道係與兗鎮同城又登萊青道雖與登鎮分駐但整飭海防每有文武交涉事件均應加兵備道銜并鑄給關防從之。○兵部議覆漕運總督楊錫紱奏稱各省衛所守備千總俱為漕運而設其官員均總漕所素悉凡五年軍政六年俸滿及年老有病告休勒休親老改近等案均經改歸漕臣辦理惟患病解任親老終養仍由督撫題咨未昭畫一請令統歸漕臣主稿咨會督撫應如所請至稱各備弁每年甄別祇係具文請行停止之處應仍照舊例。年終考覈造冊送部從之。○長蘆鹽政高誠疏報豐財場乾隆三十一年開墾官荒地十七畝。○旌表守正捐軀之山東費縣民張

洪亮女張氏○已未。

上詣暢春園問。

皇太后安。○自圓明園啟鑾巡幸天津。○諭曰德保著調補雲南永北鎮總兵。即著馳驛前往永昌。其甘肅涼州鎮總兵著李雲標調補。所遺員缺。即著索柱調補。○是日駐蹕黃新莊行宮。○庚申。

孝昭仁皇后忌辰遣官祭

景陵。○諭據高晉等查奏宿州地方被竊緞疋

一案。所有巨窩馬得鰲在甘省留藏匪黨各情節。實係宿州知州李允升究出等語。李允升前於境內被竊解京緞疋。雖例有應得處分。但能將賊犯詳加根究。審出巨窩。並黨夥多人。尚屬能事之員。著該部行文調取來京引見。○諭軍機大臣等。楊應琚辦理緬匪一事。種種錯謬。所奏情節。更不成話。已於摺內批示。看來伊病體究未全愈。是以毫無主見。若此。至朱崙業經降旨拏問。雲南永北鎮總

兵員缺。已補放索柱。昨又將德保調補。但德保到任尚需時日。總兵有統兵勦賊之責。未便久懸。所有永北鎮總兵員缺。著福靈安暫行署理。伊此時諒已前抵軍營。帶兵進勦。著將該處現在情形。查明據實具奏。將此傳諭楊應琚及福靈安知之。○是日駐蹕涿州行宮。○辛酉。以故哈密扎薩克郡王品級貝勒玉素布次子伊薩克襲爵。○是日駐蹕紫泉行宮。○壬戌。諭軍機大臣等。據永貴奏稱霍罕安集延塔什干納木干商人併喀什噶爾哈薩克等。驅馬匹牛羊來烏什地方貿易。派人前往究問。雖無誣誘勾通情弊。但與伊犁市易有礙。已飭交阿奇木伯克等。將牲畜賤價售買。其回衆及哈薩克等。均分別遣回。仍行知喀什噶爾大臣。將嗣後回衆哈薩克。彼此往來交易之處。嚴行飭禁等語。伊犁駐防大兵一切需用牲畜。全賴哈薩克貿易。回衆等串通謀利。將各部落牲畜販至回城交易。

自應飭禁。但來烏什之人。既稱伊等百餘人。一半販往喀什噶爾地方。永貴即應前往查辦。今既未親往。但已行文綽克托等。亦未為不可。著傳諭永貴嗣後如有此等事件。伊等至何城貿易。即當親往查辦。斷不可任聽奸回與哈薩克等合夥謀利。以致有礙伊犁官用也。○是日。駐蹕趙北口行宮。○癸亥。

上遣侍衛索諾木策凌赴暢春園問。

皇太后安。○閱淀河。○諭朕此次巡幸天津。閱視河隄。經過陸路水程。該地方官。豫備座落數處。以供憩頓。恐應銷公項銀兩。不敷需用。著於長蘆應解內務府銀兩內。賞給銀三萬兩。以為辦差之費。○又諭。據明德覆奏。從前辦理于文濬改歸民籍一案。查係乾隆三十年。先經莊有恭將于文濬名下應追伊父未完銀兩。應否仍行解旗擬罪之處。咨請部示。經工部議覆。行令在於民籍著追旋因無力完繳。照例具題請豁。復准工部行令解旗辦

理等語。于文濬既有應追銀兩。自應解旗追繳。工部於該撫請示時。因何令其在民籍著追。該堂官明白回奏。此案辦理錯誤之處。自在工部與明德無涉。不必交部。○戶部議覆盛京工部侍郎兼管奉天府府尹雅德條奏賑卹事宜。一。承德鐵嶺開原廣寧四縣。乾隆三十一年旱災水災飢民。前借給一月口糧。請作為初賑。仍按被災分數。分別極次貧。照例加賑。一。奉天倉儲。接年賑撫支放。均屬缺少。撥運維艱。除以借作賑米石。仍用本色外。其加賑米。請以銀米兼半給發。每米一石。折給銀六錢。所需銀即於各屬徵存地丁項下動撥。一。辦納丁徭之戶。及無地無丁土著。併鰥寡孤獨。應各就被災屯堡分數。分別極次貧。一體銀米兼賑。一。承德開原二縣倉米。不敷支放。請於附近之遼陽海城蓋平廣寧錦州等處存倉米內。酌撥三萬石。分貯二縣。其腳價每石每百里。給銀一釐二毫。由奉天府

理事通判庫貯項下動支一承德等四縣災地錢糧請照例分別蠲免其蠲剩銀及本年民借糧石併舊欠帶徵銀均予緩徵一奉天所屬丁銀向係另款徵收請將承德等四縣按被災分數照蠲剩錢糧例緩至次年分年帶徵又復州一處收成亦屬歉薄其丁銀應予一體緩徵一承德等州縣學田無多被災各貧生應飭教官開送地方官由山海關撥解耗羨餘剩項下酌量賑給一出旗入民戶口仍在興京鳳凰城一帶居住者甚多所種地畝被災均係旗員勘報而戶口例應民員點查應令旗員將被災分數移知民員分別大小口一體給賑其應予蠲緩事宜仍歸旗員照例辦理均應如所請從之○是日駐蹕于家村馬頭大營○甲子駐蹕左格莊馬頭大營○是月盛京工部侍郎兼管奉天府尹雅德奏現丈出餘地應徵租銀前經議准銀錢兼收解盛京戶部存貯所收錢除撥給

冬圍兵恩賞餘俱按成搭放春秋兵餉惟查每年租銀十一萬二千有奇大半交納錢文按數起解勢必另籌運價且祇盛京一城搭放各城未能流通恐奸商居奇擡價有妨旗民日用請將徵收租錢存貯各該州縣庫惟將實收數報明移咨盛京戶部酌覈各城應發兵餉並派撥冬圍兵應領恩賞銀兩按各該城徵錢多寡盡數配給所徵銀仍按限解交盛京戶部兌收得旨所奏甚是如所議行○江西巡撫吳紹詩奏進賢縣知縣孫鐸接遞隣屬積匪猾賊改發新疆人犯戴復得汪東生二名中途均被脫逃例應降級留任限年緝拏惟查疎防要犯二名較之祇逃一犯更為加重若令留任緝拏恐仍不知儆惕或以犯難必獲未能久任轉致諸事玩愒請將孫鐸降級離任協同接任官嚴緝如能一年拏獲仍准開復另補不獲照例降一級調用得旨著照所請行○浙江布政使覺羅承德

奏浙省仁寧二邑塘工。向係每二十丈按千
字文編為一號。嗣因海寧縣東西魚鱗石塘
陸續修築改建。委員分段承辦。一切估報文
冊。遂指為某員原修之某段。現查每段或數
丈數十丈。及百餘丈不等。多寡懸殊。且先後
派修員名屢易。又或年久之員。節次委修多
段。遇有保固限內坍塌應賠工程。難免朦混
支飾。請仍照舊編號立碣。造具字號清冊送
部。凡有應修工程文冊。均令指明某號塘工。
併將某號原修係何人。及完工日期報部存
案。得旨。如所議行。○湖南巡撫方世儒奏謝
調任恩。得旨覽。湖南吏治不堪。汝宜加之意
也。○河東河道總督李清時。山東巡撫崔應
階奏。臨清地處下游。碑閘月河。為汶水入衛
尾閘。但衛水湍悍渾濁。伏秋長發時。設汶力
不足相抵。每致倒灌停淤。即於月河臨時築
壩堵閉。又恐汶水一時並漲。無從宣洩。應於
月河上口建單閘一座。汶強衛弱。則起板開

放。如遇汶弱衛強。即閉板抵禦。又東阿縣運
河東岸平水三閘。並五空橋一座。上年伏秋
汛內。汶河及沙趙二河水。同時並漲。橋閘多
被衝跌。急應照舊修整。均請動撥司庫銀兩。
及時趕辦。報聞。○山西巡撫彭寶奏。大同府
屬大有倉。併渾源州倉。實存黑豆二萬二百
五十九石。經前撫臣奏准。每石變價一兩四
錢六分。解司估餉。惟接年豐稔。豆價平減。已
在一兩以內。州縣未能出糶。若照時價售賣。
較原定成價虧缺。且市豆充裕。減價亦難速
售。查現貯豆。乾隆二十五年。出易歸倉。並不
陳久。請停止變價。照數存貯。仍將大同渾源
二處每年額徵支兵新豆。與大有等倉舊存
豆。按年出陳易新。更換支放。得旨。是。○陝西
巡撫明山奏。西安寶陝局。因乾隆三十年。改
辦滇銅。不能如期接濟。經前撫臣奏准。每鑪
每月減鑄銅五百觔。以一年為率。今已減鑄
一年有餘。但局內現存銅。如照舊發鑪配鑄。

仍屬不敷續辦銅餉到需時日查存局餘錢除應撥甘省外尚足敷搭放兵餉應請再行減鑄一年統俟滇銅運到即令照舊增鑄報聞

平定縣志卷十九

十一

大清高宗法天隆運至誠先覺體元立極敷文奮武孝慈神聖純皇帝實錄卷之七百七十九

大清高宗法天隆運至誠先覺體元立極敷文奮武孝慈神聖純皇帝實錄卷之七百八十

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉
吏部理藩院事務直隸總督滿洲都統世襲騎都尉軍功加七級隨帶加一級尋常加二級軍功紀錄一次臣等謹
總裁官經筵講官太子太傅文華殿大學士又副領閣事稽察欽奉 上諭事件處管理刑部戶部五庫事務
世襲騎都尉軍功加十九級隨帶加二級又加二級臣等謹將內大臣戶部尚書鑲黃旗滿洲都統軍功紀錄九次
尋常紀錄十四次臣等謹將經筵講官太子少保工部尚書紀錄六次臣等謹將尋常

敕修

乾隆三十二年丁亥三月乙丑朔

上閱子牙河隄○諭朕此次巡幸天津閱視淀河隄閘按圖披覽內有千里長隄之三灘里起至格淀隄莊兒頭止中間並無隄岸詢之該督稱向來未經辦理每遇淀水長發地畝民居不無淹浸殊堪軫念本日朕閱看子牙河特命阿里衮分道往勘據稱無隄處所東西約長十餘里其中間有民修隄埝被水衝缺數處每當雨水過多之年村民一二千戶地畝千餘頃常被水患村民見有欽差前往

踏勘築隄。無不歡欣踴躍。僉云從此子子孫孫皆可永遠霑恩。且隄內之地亦可盡成膏腴。實於居民有益等語。從前修築格淀隄。原為捍衛村民。今三灘里至莊兒頭十餘里。獨無隄岸以資保禦。村民未免向隅。著交與方觀承再行詳悉相度。接築長隄。即覈實估計。妥議具奏。尋奏接築隄。自文安縣屬之三灘里千里長隄起。至大城縣屬之莊兒頭格淀隄止。共長二千七百七十二丈。頂寬一丈六

尺。底寬五丈。酌就地勢。高五六尺不等。需用土方估銀六千九百五十兩零。現飭大城。文安二縣分段興築。務於汛前完竣。仍飭該管之子牙廳。並天津道往來督察。報聞。○又諭朕鑾輅時巡。經過畿南一帶。夾道麗眉皓首。扶杖歡迎。足徵盛世耆年之瑞。所有老民老婦著地方官照恩詔之例賞賚。其天津駐防年老男婦並著一體加恩賞給。○又諭此次辦差文武官員任內如有降級罰俸住俸之案。

俱著開復。其無此等案件者各加一級。○又諭前年因莽匪滋擾。劉藻辦理不善。特用楊應琚為雲貴總督。前往接辦。彼時尚有木匪一案。經常鈞具奏請。俟剿滅莽匪後再行辦及朕以此等邊外蠻觸原屬不成事體。皆因吳達善。劉藻各任內不能實力查辦。養癰貽患所致。亦諭令一併辦理。務使悉絕根株。以昭懲創。為永靖邊圉之計。楊應琚到滇後。莽匪業已剿平。不過經理疆界。搜剿逸賊。諸務

嗣因莽匪名散。逃入緬甸。楊應琚行文向彼索取。并奏稱如彼不將逆酋擒獻。即與問罪之師。朕以緬甸僻在荒陬。從未敢侵犯內地。其事亦不值窮兵勤遠。旋據奏木邦蠻暮相率投誠。朕以楊應琚久任封疆。歷練有素。必非輕率喜事者。比諭令酌審情形。以定行止。楊應琚自應將邊備夷情通盤籌畫。或木邦等實因緬酋殘暴。衆心渙散。窮蹙來歸。固可設法招徠。使成瓦解之勢。並當計及受降以

後如何撫綏防禦。俾之永隸輿圖。不貽後患。乃該督即親往永昌受降。且云機有可乘。不難籌辦。朕謂該督必已操成算於胸中。自能相機妥辦。方嘉其實心體國。勇往任事。隨即以獎諭。並望其迅奏膚功。以膺懋賞。不意該督自受降以後。毫無調度。新街雖已駐兵。而一旅孤懸於蠻暮。並無聲援掎角之勢。所謂善後事宜。安在。迨緬匪率衆侵擾蠻暮。副將趙宏榜於新街抵禦。以衆寡不敵。小挫退

兵。自當鼓勵戎行。前驅深入。剋復蠻暮新街。以揚我武。乃李時升朱崙節次退回內地。置新附地方於不顧。而楊應琚見事稍棘手。憂惶成疾。朕以該督為國宣力。忽染沉疴。深為軫念。賜藥賜醫。體恤倍至。以冀速痊。而該督病後神志昏憤。竟毫無主宰。且又適當總兵阿穆呼朗病故。軍營重務。惟委之朱崙一人。李時升又不親自董率。任其逞綠營虛張粉飾惡習。屢次誑報。楊應琚竟甘受其愚。漫不

加察。惟知據稟轉奏。全不見有運籌決勝機宜。則是以辦理軍務之總督。竟成軍營報事之人。不甚可笑乎。朕覽其屢次所奏殺賊一萬餘人。即疑其未必確實。旋復據奏。緬酋屢遣其頭目。詣營乞降。情願遣散兵衆。懇請賞給蠻暮新街照常貿易。且云地勢險惡。進兵得不償失。是該督始則冒昧貪功。繼則欲圖苟且完事。肺肝如揭。而前此奏報殺賊之虛誑。益復顯然。因按所繪地圖。詳加審度。前後所奏種種乖謬。不可枚舉。因傳諭詢問該督。即如蠻暮新街等投誠時。已令其遵制薙髮留辮。即成內地板圖。自當扼其險要。以為進兵之地。乃新街一挫。遽爾退回鐵壁關內。則是蠻暮新街早已棄而不守。賊衆又何必復請賞給貿易。似此支離荒誕。其將誰欺。且緬匪亦一大部落。如果誠心乞降。願附屬國。其酋長自當請罪納款。具表輸誠。效安南暹羅之通職貢。奉正朔。並將蠻暮新街呈獻。或尚

可議及徹兵藏事。乃率據綠營將弁。捏詞誑報以匪目遣散匪衆為得計。輒欲還其歸附之地。且蠻暮而外。尚有木邦整欠。整賣景線等處。前此均准其內附。設緬匪又復效尤滋擾。該督亦將置之不顧。有是理乎。又如前奏殺賊萬餘。則是軍威大振。縱不能乘勝深入。直搗賊巢。亦當及此克捷先聲。收復蠻暮新街。搜剿賊匪。不應退回內地。又伊等前奏賊衆二萬人。如果剿殺萬餘。則業已殲滅大半。

羣賊寧不望風驚潰。膽落奔逃。又何敢糾合餘燼。偷越邊境。肆其滋擾。如果殺賊盈萬。則我之兵威。可謂大盛。何反讓地退兵。又不知楊應琚何以深信不疑。受其朦蔽而不悟。因念該督病雖小愈。而志氣未清。致為人所愚惑。特明白開示。令將該處情形據實查奏。即果有難辦之處。亦應切實奏聞。候朕裁奪。今據覆奏。仍屬虛詞。而於事之關鍵。總不明晰。似此執迷不悟。可見該督之病憤無能矣。至

於賞罰嚴明。尤行軍之要領。李時升以提督大員。衝鋒勦賊。是其專責。乃動輒派委弁兵迎敵。並不躬親行陣。督率進剿。若無與已事者。然且按圖詳校。由楞木退至鐵壁關。復以次退至杉木籠。而朱崙亦自戶腊撤退。至隴川。皆係漸回內地。並未奮勇進兵。惟以捏詞欺罔為能事。是二人實為此案罪魁。業經降旨革職。拏問。乃楊應琚此次仍不將李時升、朱崙嚴行叅處。僅以副將陳廷蛟等五員奏

請革職。如果伊等臨陣退縮。即當以軍法從事。亦非止予罷斥可了。若不過尋常過犯。又豈可以劾此數人便足示軍營懲創。種種錯謬。均出情理之外。此楊應琚前後辦理緬匪情節也。總之辦理緬匪一事。朕初無欲辦之心。因楊應琚以為機有可乘。故聽其辦理。及至緬匪侵擾內地。則必當殲渠掃穴。以申國威。豈可遽爾中止。且我國家正當全盛之時。準夷回部。悉皆底定。何有此區區緬甸而不

如翦滅乎。而楊應琚竟思就事完事實為大謬。至此時尚不知翻然改悔奮勇自効。深負委任之恩。若非念其疲病糊塗。必將重治其罪。但如此漫無措置。軍務斷非伊所能辦理。若仍令其復膺重任。必致債事失機。其為貽誤更大。楊應琚著回京入閣辦事。俾得安心調攝。其功過於事定後再降諭旨。雲貴總督員缺著明瑞補授。前往經理軍務。相度辦理。并將此通諭中外知之。○諭軍機大臣等。楊

應琚辦理緬匪一事。種種錯誤。屢經降旨飭詢。今據覆奏前後情形。仍以虛詞塞責。所奏之語。全不明晰。不料其執迷不悟。若此。已於摺內批示。復按圖查閱。李時升始由楞木退至鐵壁關。復由鐵壁關退至杉木籠。而朱崙亦從戶腊撒退至隴川。是伊等俱係漸次退回內地。其挫衄情形。已可概見。何以尚稱有楞木之捷。其為支離誕妄。尤屬顯然。且李時升既退至杉木籠。何以復在宛頂一帶督辦。

而賊衆初在銅壁關以西。又何由遶關而東。得至猛卯。種種虛誣掩飾情節。皆李時升朱崙罪案彰著之處。將來即以此定讞立置重典。而楊應琚總憤然罔覺。仍復為之庇護。惟以副將陳廷蛟等五人參奏了事。伊等如果臨陣退縮。即當以軍法從事。又豈僅參劾所能示懲。真不解該督之是何肺腑也。至華封既調。其駐劄普洱。彈壓新附地方。而劉德成亦調赴蓋達。於銅壁關軍營辦事。伊等皆總

鎮大員。檄調往來。甚有關係。前此何以並未奏聞。該督如此舛謬。實負委任之意。若非念其病後神志昏憤。必當重治其罪。看來此事斷非楊應琚所能辦理。現已降旨令明瑞補授雲貴總督。馳赴永昌接辦。但明瑞到滇。尚需時日。楊應琚此時若能深悔從前錯謬之愆。實心任事。及早勦賊奏功。則收效桑榆。或可仍受朕恩眷。倘以受代有人。稍存五日京兆之見。觀望延挨。以致貽誤軍務。則是楊應

琚自速重罪朕必不能復為寬貸也。楊應琚俟明瑞到任交代後再行進京辦理閣務。著將此傳諭知之。○又諭曰。楊應琚辦理緬匪一事種種錯謬不能復勝此任。已降旨令其回京入閣辦事。其雲貴總督員缺令明瑞補授。前往永昌接辦軍務。明瑞此行專為進剿緬匪調度軍營一切機宜並令其奮勵將士鼓勇奏功。是其專責。至於地方應辦之刑名錢穀銅廠等事斷難兼顧。鄂寧以巡撫駐劄

省城一切皆當實心承辦。並不必關白督臣。即稽察屬員侵漁貪劣諸事亦不責之明瑞。設有徇庇疎容惟於鄂寧是問。鄂寧斷不可稍存畛域。慮有越俎之嫌。即明瑞亦斷不至心存見小。疑鄂寧有侵攬事權之意。朕當於其陞辭時面為諭及也。可將此詳諭該撫知之。○軍機大臣等奏喜峯口等處駐防官兵已令山海關副都統兼管。惟獨石口古北口錢家店昌平州四處仍由京出派大員管理。

未經議改。請以古北口官兵令熱河副都統兼管。獨石口錢家店昌平州三處令張家口都統兼管。其由京特派大員之處即行停止。至寶坻固安雄縣霸州彰谷保定良鄉東安等八處切近京師駐防大員等均與該處相隔。竊遠請仍照舊例由京派員管理從之。○刑部奏前議發遣新疆人犯俱令僉帶妻子定以三年五年無過准其為民。其年限已滿本犯身故者妻子已入民籍即照民例辦理。

惟未滿年限以前本犯病故其妻子應否回籍及可否准入民籍安插之處未經議及。查此項人犯妻子原以新疆孳生戶口議准僉帶若因限內病故聽其回籍每苦道途跋涉遞解亦煩。應照年限已滿例一體入民籍安插不必復令為奴。至本犯未到配所中途身故其妻子應量為區別請嗣後如有離家遠或子任力作自願到配為民者令地方官查明仍解往配所安插不令為奴。其自願回

籍者照例遞回從之。命賞天津駐防兵一月錢糧辦差綠營兵兩月錢糧。賑卹奉天盛京驛舊邊甸驪河白旗堡二道井十三山廣寧小黑山開原法庫嚴千戶屯噶布喇村薩爾滸等十三驛乾隆三十一年水災旱災飢民併蠲應徵額賦緩徵蠲剩銀米有差。蠲山東永阜場乾隆三十一年水災竈地額賦蠲剩銀併予緩徵。是日駐蹕臺頭行宮。○丙寅諭畿輔為首善之區人文漸被多士

蔚興茲因循覽河隄水利臨幸天津業已恩施黎庶而觀風所蒞並宜嘉惠士林用光黌序所有直隸本年入學名數大學增額五名中學增額四名小學增額三名該學政其悉心甄錄務拔其尤以副朕樂育人材之意。又諭此次巡幸天津經由水程所有隨從官員等需用船隻雖為數無多且為期亦不過數日但水手多從南來守凍未回口食未免拮据著加恩於每水手一名日給銀五分常

價之外每名日增給銀三分承辦官員務須按名散給俾得均霑實惠。調兵部尚書託庸為工部尚書以雲貴總督明瑞為兵部尚書。是日駐蹕揚芬港行宮。丁卯遣官祭歷代帝王廟。諭此次臨幸天津閱澤覃敷俾羣黎各得其所而清理庶獄予以自新亦恩施所宜逮所有直隸省軍流以下人犯著該督飭屬查覈案情分別減等發落以示矜恤。是日駐蹕王家場馬頭大營。戊辰

上遣侍衛扎拉豐阿赴暢春園問皇太后安。諭朕巡幸天津閱視海河隄淀以期利賴民生啓鑒之前已降旨將天津府屬本年應徵錢糧蠲免十分之三茲翠華臨蒞小民扶老携幼歡迎道左愛戴之忱倍切朕心深為喜悅著再加恩將天津府屬節年尾欠及上年勘不成災緩徵銀七萬三千二百餘兩屯穀三千四百餘石又節年因災出借舊欠及上年被水出借穀十三萬一千一

百餘石。普行蠲免。俾海濱節屋。益慶盈寧。共安樂利。以示省方施惠之意。該部即遵諭行。又諭曰。郎中傅顯。馮光熊。著隨總督明瑞。馳驛前往雲南辦事。○又諭曰。諾穆親。著調補雲南驛鹽道。錢受穀。調補雲南迤東道。俱隨總督明瑞前往辦事。○諭軍機大臣等。據福靈安奏。前赴永昌。經楊應琚告知。現在瘴氣方盛。交秋始可進兵。並告以朱崙雖赴木邦堵禦。並未進剿等語。楊應琚從前奏報節次辦理緬匪各摺。乖謬已極。經朕命福靈安親往軍營體察實情。楊應琚既知措置乖方。自應將該處實在事宜。詳悉相告。乃復以秋後進兵之語。含糊粉飾。希冀苟為塞責。夫軍營進止。有關於機宜者。甚大。楊應琚即不能督率戎行。為搗穴殲渠之計。亦當察看地方形勢。將何時進剿之處。先行詳悉奏聞。候朕酌定。何以前此並不籌及進兵日期。竟以勦賊重務置之度外。經朕諭令酌量春夏瘴過。

興師進剿。楊應琚即藉以為苟且了事。稍延時日之局。實不知其具何肺腸也。又楊應琚前奏。令朱崙統兵進剿。今告福靈安。則以朱崙切齒緬匪。往彼堵禦。俟賊至即可多殺數人。不但荒唐不堪。亦自相矛盾。朱崙前由楞木退回戶腊。撒復由戶腊撒而至隴川。漸次退回內地。其怯懦無能。可知。今復自西而東。豈得謂之統兵前進。况朱崙往木邦一路。在賊匪由猛卯渡底麻江之後。朱崙尾追。尚不能及。又安能越過賊衆。至木邦堵剿。是朱崙之往木邦。不過僅圖退守。即堵禦且不可言。又豈得謂之前進乎。竟不料楊應琚信口支吾。欺誕至於此極。伊從前飾詞奏報。朕猶意其風痰病後。神志昏迷。為將弁所朦混。今病已就痊。仍復為此支離誑飾之語。以文過遂非。其居心更不可問。楊應琚從前受朕深恩。歷任封疆。至於入叅綸閣。及伊患病。賜藥賜醫。多方軫卹。不意其天良盡喪。至於如此。所

有指出錯謬之處。著楊應琚逐一據實明白回奏。可將此嚴切傳諭知之。○又諭前因福靈安於途次接奉諭旨。即迅速回至永昌。朕嘉其奮勉。已授為副都統。並令查看該處情形。據實具奏。旋因總兵德保一時未能抵滇。復令其署理總兵。相機進剿。福靈安既至永昌。自應將此事原委詳悉體察。乃聞楊應琚瘴氣方盛之語。仍行起程回京。殊屬不曉事體。此事因楊應琚辦理不妥。徂於綠營習氣。

難以信任。現已降旨。將明瑞補授總督。著傳諭福靈安。接到此旨。速赴軍營。署理朱崙總兵之缺。統領兵丁。相度情形。如瘴氣不至大盛。即迅速領兵前進。倘春夏實難進兵。即將兵撤回。至無瘴氣地方屯紮。守候明瑞。○又諭據綽克托等奏。准阿桂咨稱。禁回子等往哈薩克地方貿易。當經嚴行飭禁。但喀什噶爾回衆習於商販。不諳牧養。若將霍罕安集延各處牲畜全行禁止。實於生計有損等語。

前據阿桂奏。各城回子往哈薩克貿易。請將伊等貨物扣留。併拏送伊犁治罪。朕以所辦過當。已諭令酌議章程。今綽克托等所奏。惟曉諭喀什噶爾等回衆。嗣後毋許容留哈薩克等貿易。伊等亦不得攔入哈薩克界內。尚合機宜。回衆皆朕臣僕。商販事所常有。若將各處貿易盡行停止。既於生計有礙。而伊犁雅爾等處亦無所裨益。著傳諭阿桂。永貴旌額理綽克托等。除禁止回衆往哈薩克地方

貿易外。其在霍罕安集延等處交易者。仍遵前旨。將如何不致滋事。並公私有益之處。酌議具奏。○豁江蘇阜寧縣原續報坍荒民賦。河租併漲。復民賦田地未漲以前。乾隆十一年至二十六年。民欠銀四千八百四十三兩。米麥七千七百二十石有奇。是日駐蹕天津府行宮。已巳祭。

先蠶之神。遣妃行禮。諭東西二淀為畿輔匯萃清流之所。邇年蓄蓄安恬。節宣有藉。近

淀村莊田土泛溢無虞而菰蒲魚蟹之饒利賴於民生者更大茲者春巡郊甸循覽河隄鳳艇乘流祥飈助順尤足徵神貺之昭宜建專祠用答靈佑著該督方觀承卜地興工特崇廟祀以示安神報功之典尋奏霸州泰堡莊南臨玉帶河西近于家村形勢爽塏建祠為宜計應建正殿前殿東西配殿佛閣併東西廂房大門共三十四間又御碑亭一座左右鐘鼓二樓石獅二座估需銀兩請於司庫

地糧內動支俟秋後擇吉興工得旨嘉獎○又諭朕此次臨幸天津業將該府閩屬節年尾欠並被水緩徵出借未完銀米概行蠲免復念畿輔地方共切近光之慕茲者翠華所至愷澤覃敷若不獲均霑實惠小民未免向隅著將直隸通省各屬節年尾欠未完地糧銀四萬九千五百餘兩屯糧六萬六千四百餘石一體加恩蠲免俾郊圻黎庶益遂盈寧之慶該部即遵諭行○又諭朕此次臨幸天

津該商等趨事辦公頗稱踴躍因念長蘆通綱引課每年十月內奏銷正屆銷售菜鹽之時鹽價未及收齊而奏限已屆商力未能舒徐著將長蘆通綱鹽課嗣後改至十一月底奏銷俾得從容完納以示體恤○諭軍機大臣等今日檢閱楊應琚楊廷璋商榷會奏一摺有若緬匪仍不誠心効順難保將來不致滋生事端等語實屬自相矛盾我兵自新街失挫之後朱崙李時升漸次退回內地以致

賊眾猖獗偷越蓋達邊境復竄入猛卯侵擾土司界地我兵從無抵禦是賊眾現在毫無悔懼尚安得謂彼有歸順之意乎其為荒唐不足信尤屬顯然至所稱差委安人前往查探尚未據探明回奏等語今距該督前發奏摺時已將兩月所探情形若何亦當早已覆到何以遲緩多時該督屢次奏報並無一語提及更不可解看來楊應琚前此尚因病後神昏輒據朱崙等誑報欺彼之言轉奏欺朕

今病已就痊。經朕屢次降旨嚴飭。伊計無所施。遂為此朦混支離之語。希圖塞責。朕何如主而容彼逞此等伎倆乎。著傳諭楊應琚。因何含糊覆奏。及差探之人所探實在情形。若何。即據實覆奏。無得仍前支飾。自速罪愆。

是日駐蹕楊惠莊行宮。翼日如之。庚午。

上閱鹽池。閱天津駐防滿洲兵。諭本日閱

看天津滿兵技藝。均屬平庸。且未能嫻習國語。前經賞給拴養馬四百匹。而兩翼隊內並

無騎馬者。皆由怯懦不能乘騎。故令步下演習。有是理乎。伊等駐防年久。該大臣等果能勤加訓導。何遽至此。是皆歷任大臣等未能悉心操演所致。各省駐防兵。若皆似此。成何事體。姑念與兵丁無涉。仍著加恩賞給該都統富當阿等著交軍機大臣等嚴行議處。尋奏富當阿。雅隆武。均應革職。其歷任之都統副都統及現任協領佐領等官。均應查明分別議處。又查前賞拴馬內缺額二十三匹。現

存馬三百七十七匹。請交直隸總督將疲羸之馬照例變價。餘俱作為八旗官馬。再天津兵因近年疎懈。習氣已成。應移撥各駐防令其隨同學習。俟查明原設之案酌議。請旨得旨。依議。富當阿。雅隆武著暫行留任。兵丁未移撥之前。仍著管理事務。又諭曰。明瑞到京已差往滇省。其總理伊犁等處將軍員缺。即著阿桂補授。諭軍機大臣等。前因噶噶地方番子將赴藏侍衛擲石擊傷。朕曾降旨

著瑪瑞雅郎阿各帶兵二三百名前往查辦。此特以擲傷欽差。不得不從嚴辦理。但番子等均係愚頑無識。且部落甚眾。見我兵過往。恐復妄行擾動。反於事體無益。著傳諭瑪瑞雅郎阿等。凡帶兵經過地方及附近番眾。俱宜豫為曉示。以爾等擊傷大皇帝欽差侍衛。殊屬目無法紀。今祇將擲石為首之人擒拿治罪。蓋因侍衛受傷。不重實係汝等之幸。併令將擊打台布之人自行執獻。解往成都候

旨庶可完事若支吾不給斷不可稍為姑容
即當毅然以兵力從事此旨到時諒伊等已
早抵該處仍將番子舉動及現在如何辦理
之處急速奏聞併傳諭阿爾泰偵探得信亦
即速行具奏○兵部議准廣西巡撫宋邦綏
奏稱粵西泗城府西林縣八盤那比二寨均
離縣一百數十里為濱江要路渡江以南處
處可通滇境非添設汛卡弁兵不足以資巡
緝請將上林營額外外委一員改駐八盤汛

併兼轄那比地方其需用兵丁應於潞城汛
抽撥十五名派防八盤並於八柴汛抽撥十
名派防那比均令該外委督率巡緝從之○
予故和碩莊親王允祿祭墓如例諡曰恪
辛未清明節遣官祭

永陵

福陵

昭陵

昭西陵

孝陵

孝東陵

景陵

泰陵 遣官祭

孝賢皇后陵

端慧皇太子園寢 諭軍機大臣等前於錢
琦奏事之便批詢吳紹詩聲名若何今據覆
奏吳紹詩年已七旬兼有胃疾精力不能盡
副而本質淳厚人傳有老菩薩之名等語朕

因吳紹詩久歷外任事尚熟練且見其心地
誠實是以簡任巡撫恐其邇來或果年衰多
病精力不充於公務未能整頓況人皆稱菩
薩更恐姑息因循貽誤地方政事亦未可定
著密諭高晉將吳紹詩近日精力若何有無
貽誤之處據實密行覆奏毋得稍存隱飾錢
琦摺並鈔寄閱看尋奏臣與吳紹詩素不認
識該撫到任江西以來所辦刑錢案件尚屬
練達江西屬員來南時詢知精力尚健至其

感患胃疾並傳有老菩薩之名容臣閱過安慶營伍前赴江西時察訪覆奏得旨覽旌表守正捐軀之四川長壽縣民徐在庠妻王氏○是日駐蹕天津府行宮至癸酉皆如之

○壬申

上閱天津鎮標兵○賜扈從王公大臣及直隸總督鹽政官員等食○旌表守正捐軀之山東鄆城縣民張孝友妻王氏○癸酉上遣侍衛索諾木策凌赴暢春園問

皇太后安○諭伊犁屯田回人等接年拖欠應交麥穀共七萬八千七百餘石已著展限分為四年帶徵但念去歲伊犁歉收若於今歲秋成後即將帶徵之項與本年正項糧石並徵究恐生計拮据著加恩將本年應行帶徵麥穀一萬九千六百餘石全行豁免以紓回力○諭軍機大臣等據福靈安奏稱於龍陵地方遇見李時升告知朱崙在暮董地方駐兵將及一月等語前楊應琚節次奏稱朱崙

已由木邦一路進剿匪衆並稱李時升親率官兵占據新街以為進兵之計朕彼時即知其荒唐捏飾業經降旨飭問今福靈安稱朱崙在暮董駐劄已將一月暮董又在木邦之內朱崙駐彼遲留觀望退縮不前與木邦有何干涉而楊應琚猶詭稱其統兵前進天下有如此不顧情理任意掉說者乎至李時升既現在龍陵其地在騰越州以東更屬內地土司境界距新街甚為遼濶與楊應琚前奏率兵進剿據新街之語尤相矛盾况李時升朱崙俱係軍營統兵大員既皆由西而東則銅壁關一帶又諉之何人經理其各該處要隘現在作何駐兵防守緬匪賊衆現聚何處並未見其明晰具奏行軍何等重務而可如此漫不經意乎至從前新街小挫之後兵既退回朕料及蠻幕新街必皆棄而不守因諭楊應琚以該處既隸版圖自當奮進收復扼其險要為進兵之地伊即當按其地風土情

形據實籌辦。或如交春瘴發不宜輕涉亦應將實情奏聞候朕定奪。乃以李時升進兵一語希圖搪塞。其將誰欺。且此時徼外瘴癘漸盛。朕豈肯令我士卒冒瘴遠涉不加體恤乎。楊應琚不懲。李時升朱崙從前畏蒞債事之失。至此復冒昧妄行。既不因時又不恤下。種種乖謬。是誠何心。若因錯誤在前。曲為迴護。冀以虛詞朦蔽。朕何如主。而容彼施此等伎倆乎。楊應琚如此迷而不悟。恐其福氣已盡。不至自取罪愆而不止。著嚴切傳諭楊應琚。令其即行據實明白回奏。毋再仍前支離違咎。

御書濟寧

天后廟扁曰靈昭恬順。旌表守正被戕之安徽阜陽縣民馬治增妻朱氏。○甲戌兵部議覆陝甘總督吳達善奏稱巴里坤鎮安西營舊設叅將守備各一員。經前督臣奏准將安西叅將移駐靖逆營。以靖逆營原設遊擊

調駐安西。查靖逆介在衝途。地濶差繁。現以千總作為中軍承上接下。究多未便。請併將安西守備移駐作為叅將中軍。其安西遊擊即以該營左哨千總為中軍。應如所請。從之。

是日駐蹕興福寺馬頭大營 乙亥 孝賢皇后忌辰遣官祭

陵寢 諭朕此次巡行河淀閱視隄防。今由運河迴鑾。經臨筐兒港察看減河形勢。見壩身出水處高於河底七尺。則遇汛漲時所減之水下注過猛。易致跌落成坑。排椿不無撼動。自應於石工之外接築灰工十五丈。使坦坡漸平以導其勢。至王家務捷地興濟三處減河。皆所以宣洩盛漲。保衛隄工。別由一路入海。不使三岔河之水滙積。尤為畿南水利攸關。亦宜一律疏濬。留淤期於深通。易達再子牙河故道。自谷家莊以下至吳家溝一帶。河身窄狹。並應普律展寬。用消滬水。以衛民田。所有各處工程。著該督方觀承按工覈實估

計奏聞動帑興修務使疏洩得宜俾河務民生永資利賴副朕省方疇咨至意尋秦筐兒港口工外加築灰工十五丈每丈等溜四寸六分零每五丈安排樁一路地腳滿簽栢丁並加築補築大小夯灰土估需工料銀二萬八千八百二十餘兩至壩口出水處河槽北面淤高應挑展斜長九十丈自十六丈至六丈折算均寬十一丈三尺深二尺又王藕莊起至梅廠東止淤墊一千四百八十丈應於河底抽槽面寬八丈底六丈深二三尺不等共需銀三千一百三十餘兩王家務壩門上首併迎水海墘南北岸淤土四段共計一百八十餘丈高五六尺不等均應挑除又水口中心應挑河槽一道長二百三十丈面底均寬十三丈五尺深三尺共需銀二千七百五十餘兩捷地減河自壩口起至孫正家莊止長一萬七千六百四十九丈興濟減河自壩口起至道口止長一萬三千二百六十丈均

應展新舊面寬八九丈底四五丈深七八九尺不等共需銀四萬一千四十餘兩至子牙河故道由谷家莊至吳家溝長一千一百四十丈普加挑展以面寬六丈五尺底三丈五尺深三尺為率其上游劉家莊以下積淤十四段均應於河底抽槽共需銀二千三百六十兩零查各工惟筐兒港壩面灰土應俟汛過辦理其四減河及子牙故道均擬於汛前辦竣得旨如所議行吏部議准四川總督阿爾泰遵旨議奏查川省道員除松茂道現有兼銜及駐省之驛鹽道無提鎮同城之永寧道均無庸加銜惟川北川東二道係與各鎮同駐又建昌道駐守瀘州管轄各土司地方尤資彈壓並請加兵備道銜又陝甘總督吳達善奏查甘肅道員除安西平慶二道現有兼銜及駐省之驛傳道無提鎮同城之秦階道均無庸加銜惟肅州涼莊寧夏西寧四道俱與各鎮同駐兵民錯處均應加兵備道銜

併鑄給關防從之。○旌表守正捐軀之河南
密縣民黃添誥妻張氏。四川江津縣民周正
明妻王氏。○是日駐蹕定福莊馬頭大營。
丙子吏部議准江蘇巡撫明德奏稱江蘇省
會政務殷繁委辦一切常資大員料理查蘇
松糧道駐劄常熟縣各屬解交漕項錢糧幫
丁支領行月往來遠涉漕船水次蘇州最多
請將蘇松糧道移駐省會兼巡蘇州一府至
原設分巡蘇松太倉道現駐上海縣祇令分
巡松江太倉二府州其糧道庫大使一員亦
一併移駐從之。○旌表守正捐軀之河南輝
縣民韓某妻楊氏。○是日駐蹕南紅門行宮。
丁丑

上幸南苑行圍。諭緬甸僻居荒徼前此未聞
其跳梁侵軼本無庸加以兵誅並未嘗因國
家當全盛之時邇年來平定準夷回部我武
遠揚更欲并此炎方蠻服一併掃平為拓土
開疆計也。今據楊應琚覆奏稱緬酋惜駁頗

年滋擾土司邊境若不乘時捷伐誠恐養癰
貽患等語此皆從前吳達善劉藻等不以為
事因循貽誤所致使伊等將此情形早行入
告朕斷不肯過示姑容必特派能任事之大
臣前往督理亦決不以此委之楊應琚矣。至
楊應琚初到滇時以緬匪自作不靖欲為籌
辦其意亦未嘗不善但既欲用兵亦須通盤
計算扼肯綮以決機宜朕尚謂楊應琚久蒞
外任閱歷已多雖軍旅非其素嫻而審勢運
籌自當確有成算孰意其當蠻暮新街等處
相率歸誠時惟稱有可乘之機不致重勞兵
力並未統籌全局布置周詳使新附之區永
隸輿圖無貽後患遽爾輕率受降已為失算
至於新街一帶既為緬地扼要又不知嚴兵
駐守據為入緬先聲致趙宏榜冒昧徑行一
旅孤懸無援敗衄更屬毫無調度而楊應琚
自新街小挫旋即憂惶成疾其後病雖愈而
神志終迷漫無主宰一任綠營將弁捏詞虛

報轉輟欺朦恬不為怪朕節次覽其奏牘覺情節多屬可疑始詳悉指駁令其據實陳奏今據奏到則從前所稱殺賊盈萬及緬酋乞降俱係朱崙趙宏榜等虛張粉飾歷來錯誤之處一一不出朕之所料楊應琚諸事荒謬至此若再令其在滇經理其誤事更不知何所底止而緬匪本篡逆餘孽且敢侵擾邊疆惡貫已盈罪難輕宥更不可不亟加翦滅因命明瑞代其總督之任奮勵將士務期克捷奏勲此皆仰賴

上天默佑啟迪朕衷先幾已燭其情偽尚可及早圖功並非有人能指其誤謬將萬里以外情形陳於朕前也楊應琚覆奏原摺並發衆人見之當無不共曉者可將此通諭中外知之是日駐蹕舊衙門行宮戊寅

上詣

永慕寺行禮行圍諭軍機大臣等吳達善奏竿獲巨富馬得鰲並夥黨閭景彩等分別

斬決發遣一摺已諭令法司速議具奏以正刑章矣該犯馬得鰲等敢於積聚多匪助貲外出行劫客商積案累累實為罪大惡極現在首犯雖經伏法而黨夥未獲者尚有二十八人著傳諭吳達善飭屬悉心躡緝務期兇黨盡獲以絕根株至該犯等既已四出行竊自必竄伏各省希冀匿避著傳諭各省督撫並將各犯名單鈔寄閱看一體設法查拏迅速緝獲毋致聞風遠颺倖逃法網○軍機大

臣等議覆江寧將軍富春奏稱自裁京口將軍令江寧將軍兼管京口將軍分內每年應得鹽菜銀二千八百九十兩貯公備用嗣經前任將軍等奏准由此項內每年支給京口旗分綠營查江銀八百兩江寧京口二處祭礮造箭銀五十八兩江寧滿洲兵修理堆房官差路費銀一千二百兩尚餘銀八百餘兩京口蒙古兵一千一百餘名一切官差與江寧兵無異請每年賞給銀四百兩修理堆房

併作為官差路費。查江寧查江費用內每年尚餘銀一百五十餘兩。按年餘銀足敷京口四年之需。俟動用完竣後。即由貯官銀內動支二百五十兩。合查江餘銀一百五十兩。按年賞給。應如所請。從之。○工部議准。廣東巡撫王檢疏稱。粵東花縣中洞煤山。前據商民呈報開採。每年認輸餉銀六十兩。今試採已驗。應即定為額餉。仍飭將工丁編立保甲。併令該地方文武各員。按季查察結報。從之。○

調鑲藍旗蒙古副都統常岳為齊齊哈爾副都統。○旌表守正捐軀之安徽六安州民孔朝魁妻梅氏。○是日駐蹕新衙門行宮。翼日如之。○已卯

上行圍。○諭軍機大臣等。據烏勒登奏稱。協領巴尼等已將越卡游牧之哈薩克等。拿獲八名。均係牧丁。現在圍禁看守。並令三達等前往搜查驅逐等語。哈薩克歸附有年。甚屬恭順。但以游牧遇雪累次越界。若竟將所獲牲

畜全行拘留。朕心殊覺不忍。近據阿桂遵旨議奏。秋冬雪落後。請將塔爾巴哈台卡座稍為內徙。暫令哈薩克等住牧。每牲百隻抽一交卡上官員收取。以充貢賦。春季仍行遣回。已交明瑞等公同議准。此次即應照所議辦理。可傳諭阿桂。伊或親往雅爾。或將拿獲之牧丁人等解至伊犁。明白曉諭。並令將文書帶回。交伊頭目遵照辦理。至所獲之牧丁八名。究係議前越界。仍應酌量懲治。遣往併將

此傳諭烏勒登等知之。○雲南平彝縣土縣丞海兆昌病故。子繼昌年幼。以官男之母隴氏管理地方事務。予故蘇尼特扎薩克多羅郡王車凌衮布致祭如例。○蠲緩長蘆海豐場乾隆三十一年水災竈地額賦有差。其勘不成災之滄州。鹽山。慶雲。嚴鎮等四州縣場。應徵錢糧。併予緩徵。○旌表守正捐軀之安徽舒城縣民張錦純妻陶氏。

大清高宗法天隆運至誠先覺體元立極敷文
奮武孝慈神聖純皇帝實錄卷之七百八十

大清高宗法天隆運至誠先覺體元立極敷文
奮武孝慈神聖純皇帝實錄卷之七百八十一

監修總纂官經筵講官太子太傅文淵閣大學士文淵閣領事領銜內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級各常加二級軍功紀錄一次日慶程

總裁官經筵講官太子太傅文學殿大學士文淵閣領事稽察欽奉 上諭事件處管理刑部戶部五庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

各常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆三十二年丁亥三月庚辰

上迴鑾詣暢春園問

皇太后安○辛酉○諭曰楊應琚辦理緬匪一事種種欺飾錯謬不可枚舉已將此事始末宣諭中外矣即此番覆奏各摺調度乖方更出情理之外如總兵劉德成本與華封同在東路駐守朱崙在西路征勦乃楊應琚於去冬輒將劉德成調至近西之蓋達一帶而勒截底麻江賊衆則又舍附近之烏勒登額不行專檄堵殺又不委東路之華封

等相機迎擊。轉令朱崙自西而東。從後尾追。當此軍務緊要之時。而東西更調。措置失宜。實不解其何意。想該督漫無定見。亦未調度。任無能之總兵等。東西自由。雖稱勦賊。實乃避賊耳。至另摺所奏。劉德成遷延不進。乃去冬之事。何以直至今年二月杪。始與烏勒登額之觀望不前。一併叅劾。明係楊應琚此時。自知難以隱諱。姑為此奏塞責。夫賞罰嚴明。乃行軍先務。而漫忽因循若此。尚何以示勸懲。勵將士乎。但二人俱係總兵大員。而習為畏葸怯懦。既據叅奏。亦斷不可姑容貽誤。劉德成烏勒登額。俱著革職。拏問。解交刑部治罪。總之楊應琚辦理此事。徂於前此勦除莽匪之易。以為緬夷亦不過偶爾滋擾。無難驅散。便思倣倖居功。及賊衆侵據新街等處。又毫無主宰。不能決機制勝。鼓勵前進。振我軍聲。惟任綠營將弁。粉飾欺勝。於賊少處駐兵躲避。而楊應琚不知事理輕重。尚據軍營謊

報。謂緬酋遣人乞降。求賞新附之地。冀朕允行。使得將就了事。若非朕燭其情偽。嚴切飭詢。其底裏安能畢露。設如楊應琚前奏遽爾罷兵。則竟視內地土司。任賊匪侵凌而不顧。尚復成何事體。而緬賊稔惡至此。若不亟加翦滅。又何以申國威。而靖邊徼乎。朕前此尚原楊應琚病迷所致。是以加恩降旨。令其入閣辦事。其功過俟事竣再定。今舛誤日甚一日。斷難期其後效。雖稱親赴沿邊一帶督辦。現在已非進兵之時。諒亦不過虛應故事。楊應琚負朕委任恩眷。豈可以虛偽詐妄之人。謬廁綸扉。著革去大學士。仍交部嚴加議處。又諭曰。陳宏謀著補授大學士。劉綸現已服闋。著補授吏部尚書。仍協辦大學士事務。劉綸未到京之前。吏部事務著陳宏謀暫行兼管。○以火器營翼長世良為鑲藍旗蒙古副都統。○壬午

上詣

安佑宮行禮。○詣暢春園。問

皇太后安。○諭曰。楊應琚辦理緬匪。種種謬妄。已屢降諭旨。宣示中外矣。茲據覆奏。從前詢問各情節。其乖舛荒唐之處。皆不出朕所料。如所稱沿邊地方。表延一千餘里。附近各關。山僻小路。並未設法堵剿。其餘巨石萬仞等關。亦止各派兵二百名。以致匪衆越至蓋達。並漫入戶腊撒隴川等語。我兵自新街小挫之後。使能得其要領。鼓勇直前。收剿新街等

處。擒斬一二賊渠。則烏合之衆。自必聞風奔潰。何轉致紛竄內地。皆由李時升。朱崙。畏葸。餒怯。惟擇賊少處所。逃避倖安。不能掩擊。追捕。轉使賊衆乘虛闖入。益無忌憚。敢於肆行滋擾。二人皆統兵大員。如此懼敵失機。此而不予以重懲。何以示警。而楊應琚從前竟視為泛常。姑容貽誤。不知具何肺腸。且自十二月以後。總未出關剿賊。及烏勒登額駐劄宛頂。並不就近掩擊底麻渡江賊衆。皆經朕洞

燭及之。按圖嚴詰。楊應琚知難以再為隱飾。始一一傾吐。則伊前此所調度者何事。屢次所謊報者何心。不意其盡昧天良。一至於此。著再將此諭部知之。○又諭雲南臨元鎮總兵員缺。著王玉廷調補。永順鎮總兵員缺。著李全補授。俱著馳驛速行前往。○諭軍機大臣等。據楊應琚覆奏。詰問各情節。其種種舛謬。果不出朕所料。實為盡昧天良。業經明降諭旨矣。即如總兵烏勒登額。駐劄宛頂。於賊

匪過底麻江逃竄時。並不調兵掩擊。其坐失事機之處。從前奏報。並無一語提及。經朕降旨嚴詢。昨始據將該總兵叅劾。乃楊應琚今日奏到。則稱前已叅奏在案。計其發摺之期。相距僅隔一日。而竟若其事已早經辦理者。明係因朕切責及此。自知叅奏遲延。難以支飾。故倒提月日。先為前奏。然亦不過隔一日耳。何能希圖站脚。復作此含糊之語。朦朧文過。其居心更不可問。著將此嚴切傳諭楊應

琚令將前後兩奏。是何意見。據實覆奏。○又諭肅州前赴哈密。向由安西一帶。設立軍臺。嗣經楊應琚奏稱。沙州地方。水草豐裕。輓運便易。各項運費脚價。亦多節省。請改由沙州行走。自乾隆二十八年以來。節據各該督每年奏報。節省銀四五萬兩不等。今據明瑞面奏。沙州一帶。名為較安西近便。其實程站遼遠。轉不若舊臺直捷。且水泉性劣。人馬汲飲多不相宜。行旅往來。僉以由舊為便等語。軍

臺孔道。期於安坦利行。若旅客經由。更可各從其便。以順輿情。至歷年所報節省銀兩。是否實在庫貯。抑係作何開銷。著傳諭吳達善。即行詳晰查明。據實覆奏。其安西沙州兩路。究以何路最為妥協。亦著將確實情形。一併奏聞。尋奏肅州至哈密。向由安西一帶。程站適均。水土不劣。行路俱稱便宜。其改由沙州新路。情形素未深悉。俟親赴哈密查勘後。即行據實奏聞。至接年節省鹽菜口糧料草脚

價。統計銀十七萬七千八百十二兩零。原係每歲經費項下減發之項。並未另立款項貯庫。報聞。○癸未諭軍機大臣等。今日據鄂寧奏到。已於二月二十四日起程。前赴新任。但現在湯聘等因聞緬匪滋擾。景遂景線。及孟艮。整欠等處。率同按察使夔舒。前往普洱籌辦軍旅之事。非湯聘所嫻。雲南省城。亦不可無大員經理。鄂寧著速赴普洱接辦。鄂寧到後。湯聘即赴貴州新任。並令夔舒回省辦事。

鄂寧察看情形。若普洱現無可辦之事。亦不必在彼久駐。即回至省城。專辦巡撫事務。○又諭。據湯聘等奏。緬匪竄入孟艮地方。將整賣景線。乘虛侵占。已同楊重英。夔舒。前往普洱。就近督率料理一摺。已另有旨諭矣。此事先據楊應琚奏稱。探聞緬匪。有欲滋擾整賣之信。普洱相距尚遠。已飭該土司。並附近土司。協力防禦。現在作何辦理。及堵剿情形。若何。此次緬匪竄入孟艮等處。楊應琚曾否據

報籌辦著傳諭楊應琚即速覆奏。湯聘摺並著鈔寄閱看。又諭曰。楊應琚辦理緬匪一案。調度乖方。種種舛謬。錢度同在永昌軍營辦事。一切情形。自所深知。楊應琚屢次奏摺。謬妄支離。不可枚舉。而近日覽其覆奏各摺。似覺稍有條理。或由錢度代為商酌。亦未可定。著傳諭錢度將楊應琚前後辦理各情節。及李時升、朱崙欺罔軍情各實蹟。速即據實詳晰覆奏。藩臬兩司遇地方緊要事務。督撫辦理不善。原許其具摺奏聞。錢度從前不行入告。或以事關軍務。不敢從旁干與。朕亦不加深責。此次經朕詢問。若不據實陳奏。則是自取罪戾矣。况楊應琚乖張欺飾之處。皆經朕豫為燭照。因而底裏畢露。並非有人指摘。此時楊應琚罪狀已定。錢度即和盤托出。於楊應琚功罪亦毫無增減。錢度更不必稍存掩護。代為受過也。著將此傳諭知之。尋奏。楊應琚辦理緬匪一案。先因騰越副將趙宏榜

稟稱蠻暮土司投誠。我兵已駐新街。遂以為機。有可乘。調兵三千六百名。即令趙宏榜先往受降。迨行至漾漫地方。接據趙宏榜告急文書。知新街已失。始加調各鎮營兵。併提督李時升、總兵朱崙。於十月初同至永昌督辦。十一月十八日。官兵初抵楞木。與緬匪接仗。彼此互有殺傷。詎緬匪分眾由萬仭關小路竄入永順。將蓋達焚燒。延及戶腊撒。併將銅壁官兵衝散。楊應琚隨飭總兵劉德成。於蓋達等處勦殺。李時升亦遣游擊馬成龍。由戶腊撒堵禦。旋被緬匪衝散。馬成龍陣亡。賊眾將截鐵壁關。李時升、朱崙竟將楞木兵一齊撤出。以致新街之賊乘空竄入。會同戶腊撒賊匪焚燒隴川。十二月底。官兵陸續到齊。又誤聽該匪投誠之詐。未經環擊。致匪眾伺懈。於正月初旬竄入猛卯。由底麻渡江。宛頂官兵未能截殺。緬匪遂將木邦占據。楊應琚隨飭李時升等奪取新街。朱崙等追勦木邦賊

衆官兵復遷延未進。僅將新街收復。查滇省綠旗兵除昭通、東川、開化、曲尋四鎮尚敢與賊對仗。餘皆退縮不前。李時升、朱崙均未親臨行陣。混報斬獲。並不以首級耳記為憑。楊應琚馭下姑息。染患痰症。既未能察究虛實。迨病勢稍定。又不立將畏葸官弁叅處。惟以該匪投誠具奏。實屬欺罔。得旨覽奏俱悉。○又諭曰。新授西安將軍素玉違例自荊州帶官員兵丁跟隨前來。已被叅奏。著傳諭明山

素玉到西安時。即傳旨摘去翎頂。併將隨伊前來之章京色楚及兵丁等一併拘拏。派委幹員押解來京。如尚未到西安。明山仍應秘密。俟到後即行拏解。其將軍印務著明山署理。○刑部等衙門議奏。欽差侍郎期成額等審訊原任湖南巡撫李因培。於署常德府錫爾達揭報武陵縣知縣馮其柘虧缺錢糧二萬餘兩。因甫經保題倉庫無虧。礙難奏辦。與布政使赫昇額商令桂陽州知州張宏燧。前

往查覈代為彌補。祇將有抵之項八千餘兩轉揭題叅。並欲將原揭之錫爾達尋事叅劾。實屬營私欺罔。赫昇額扶同徇隱。并擅發藩庫銀五千兩給張宏燧代為補苴。任意舞弊。請照軍務錢糧合奏公事規避增減緊要情節。朦朧奏准。因事發露。斬候例擬斬。請旨即行正法。至馮其柘侵虧錢糧至二萬餘兩。張宏燧迎合上司。擅將官項挪移。代人彌補。并致本任庫項虧缺一萬餘兩。俱合依侵盜錢

糧一千兩以上斬候例擬斬候。查該犯等恣意侵蝕。數至逾萬。應請立決。均應如所擬得旨。李因培著從寬改為應斬監候。秋後處決。馮其柘侵虧公帑至二萬餘兩之多。張宏燧專事結納交通。輒敢將帑項任意取攜。私行彌補虧空。實屬湖南通省劣員罪魁。均屬法無可逭。張宏燧馮其柘俱著照部議即行處斬。至赫昇額於馮其柘一案。令張宏燧覆查減改虧項。代為彌縫。事由李因培專主。赫昇

額扶同巡撫辦理情節自較李因培為輕。不應以此為赫昇額罪案。其擅將鉛價五千兩發給劣員。並素與張宏燧交結保舉。及侯七郎一案。慫恿常鈞。拘庇張宏燧。顛倒案情。其罪實在於此。著軍機大臣會同刑部再行覆訊明確。另擬具奏。再降諭旨。○以齊齊哈爾副都統常岳熊岳副都統倭昇額對調。○豁江南興武衛二幫運丁傅公侯遇風漂沒米五百九十一石有奇。○甲申。

上御勤政殿聽政。○軍機大臣等議奏。

陵寢官員太監。從前分給菜地。以非例內應得之項。均經撤回。惟查

東陵總管。尚有分受官地。應照

泰陵總管向未給予例全徹。至

兩陵官員太監茶膳人等。均各有官地。自三十

畝至二十四畝不等。坐落遵化薊州新城安

肅四處。其應否仍行賞給之處。現飭查明請

旨。得旨。官員太監。一概不必給予。○又奏。現

派健銳營兵五百名。令護軍統領觀音保帶往雲南。應請照例賞給護軍統領。及營總章京護軍校各二年俸。兵丁每人各銀四十兩。製裝此次由驛站前往。經過南省。道路紆狹。一時全行。恐車馬未能猝辦。請作為十隊。每隊五十名。頭隊即於四月初四日。隨總督明瑞起程。餘俱隔二日一隊起行。每隊令營總章京一名帶領。仍著觀音保總管前後行走。妥為約束。其沿途經過地方。均交各督撫照

例豫備。勿致遲誤。得旨。依議。兵丁經過直省。著觀音保。河南著佛德。湖北著閔鶚元。湖南著三寶。貴州著良卿。善為照料起程。○以詹事德風為內閣學士。兼禮部侍郎。○以陝西潼關協副將和邦額。為興漢鎮總兵。○乙酉。上詣暢春園。問

皇太后安。還宮。○諭太學

文廟。前經改用黃瓦。楹桶鼎新。迄今閱年已久。宜重加丹雘。式煥宮牆。著交現在派脩宮

殿工程處諏日鳩工。敬謹繕葺。用副朕重道右文至意。○又諭各省駐防滿洲官兵。原以騎射精強。習俗淳厚。為綠旗弁兵表率。平日訓練精勤。乃各該將軍大臣等專責。昨朕巡幸天津。閱看滿兵技藝。平常。又不嫻習國語。徒拴官馬。不能乘騎。已將該都統副都統等治罪。天津如此。其餘各駐防官兵。恐亦未必操演純熟。朕屢次巡幸江浙。曾閱看該處兵丁弓馬尚屬可觀。此特知朕巡幸。豫為之備。

若巡幸不及之處。即恐任意廢弛。簡任各將軍大臣等。果何為耶。嗣後務將該管官兵。悉心訓練。毋失滿洲舊規。若復如天津頹靡。一經查出。維將該將軍大臣等從重治罪。決不輕貸。○吏部議准。閩浙總督蘇昌遵旨議奏。查閩省道員。除糧驛鹽道。同駐福州省會。及延建邵道。祇與副將同城。兵額無多。均無庸加銜。惟興泉永道。駐廈門。汀漳龍道。駐漳州府。係與各提鎮同城。又臺灣道。海疆保障。撫

禦諸番。與臺灣鎮同駐。均請加兵備道銜。併鑄給關防。從之。○戶部議准。四川總督阿爾泰疏。稱川省西充儀隴平武瀘州等屬。產有餘茶。應增腹引八十九張。請於每年額外豫頒茶引內。先行給發。其課銀十一兩有奇。稅銀二十二兩有奇。照例徵收。從之。○又議准。山東巡撫崔應階奏。稱東省德州德州衛恩縣三州縣衛。前因挑開四女寺支河。占壓民地十一頃七十五畝有奇。請以乾隆三十一

年為始。豁除地丁銀三十五兩有奇。米麥十石二斗零。又應給地價銀一千二百九十七兩。即於司庫地丁項下動支。從之。○兵部議准。山西巡撫彰寶奏。稱山西綠旗兵制。現定撫標左右兩營。太原鎮轄二十七營。大同鎮七十二營。分隸井然。惟兵馬錢糧報銷冊籍。仍列三關腹裏二鎮。名目難免蒙混之弊。請以三關鎮歸入大同。腹裏鎮歸入太原。彙總造報。將冊內名目刪除。從之。○丙戌。諭前廣

東糧道有折收米石之案。因思此事。自查辦明福以後。積弊既清。復自何人發端。不可不徹底根究。重懲示儆。諭令李侍堯。明山。據實查奏。旋據李侍堯等奏稱。折色之弊。復始自富明安。是以降旨革職。等因。令該督撫等嚴審定擬。嗣經楊廷璋。王檢。訊奏。則於富明安是否首犯。並不能確有證據。轉以所供例得折色之數。浮多七百餘兩。遂指為批外勒索。併贓科罪。當時閱其情節支離。似乎有意周

內。不足以服其心。因諭將富明安解京。令軍機大臣會同刑部質訊。今據查覈卷冊。詳悉研究。則楊廷璋等所審富明安批外勒索一款。毫無影響。即原奏未經入版之米一百一十七石。業經富明安移交後任糧道張曾接收。現有交代印冊可據。是富明安並非此案罪首。而作俑之故。又當於張曾是問。至李侍堯等初次查奏時。據收米草簿。見富明安任內有未注入版之項。且經倉書人等供認。因

指富明安為首先復犯。但不根查交代冊籍。亦難辭疎忽之咎。李侍堯。明山。均著交部察議。至楊廷璋。王檢。等於富明安到案時。犯證具在。無難質訊明確。以成信讞。如其事屬子虛。即應據實奏聞。另行審辦。何必遷就原案。曲為入罪。使非朕令解京覆訊。幾致重輕顛倒。豈所以協情法之平。楊廷璋。王檢。及承審各員。並著交部嚴加議處。朕辦理庶務。一秉至公。從不稍存成見。使富明安果為此案罪

魁。自難輕宥。今既訊與富明安無涉。自應究及接收之張曾。倘張曾到案後。又能供辨有據。確指始自何人。則張曾又為無罪之人。亦不難遞行根訊。接收之人。朕於富明安。張曾。並無所愛憎於其間。惟欲使其事水落石出。實在首犯毫無遁情。以正刑章。而飭吏治。斷不肯聽其含糊了事也。恐外省督撫。審理案件。似此依違迎合者。正復不少。可將此通諭各督撫知之。○通政使宮煥文。乞假回籍修

墓允之。○調杭州將軍福祿為西安將軍。寧夏將軍額僧格為杭州將軍。以京口副都統穆爾奏為寧夏將軍。二等侍衛侯圖桑阿為京口副都統。○丁亥。

上耕耤詣

先農壇行禮。更服至耤田所。

躬耕三推。復加一推。

御觀耕臺。命簡親王豐訥。裕親王廣祿。愉郡王弘慶。各五推。署吏部左侍郎慶桂。戶部右

侍郎高恒。禮部右侍郎羅源漢。兵部右侍郎鍾音。刑部尚書李侍堯。工部右侍郎珠魯訥。左副都御史溫敏。通政使覺羅志信。大理寺卿景福。各九推畢。順天府府尹率農夫終畝。賞賚耆老農夫如例。○戊子。

上詣暢春園。問

皇太后安。○幸圓明園。○諭據福靈安覆奏。查詢楊應琚並李時升等辦理緬匪情形。前後所奏俱非實情。一摺。此事初辦時。朕於楊應

琚深相信任。後見其奏到各摺。情節漸覺支離。恐其病後受人欺誑。因遣福靈安帶同御醫前往永昌。診視楊應琚病勢。降旨福靈安就近親赴軍營。將彼處實在情形查明具奏。今據奏到。則趙宏榜從新街失事之後。即逃回鐵壁關。朱崙榜木一戰。即退回一站。並為緬匪所欺。信其乞降。遽將兵丁撤退。以致賊匪從各隘口竄入我境。至李時升並未親身打仗。節次所奏殺賊萬餘。並無其事。其虛誕

各情節。與朕屢次詰詢之處。無不適相吻合。竟不意楊應琚盡泯天良。荒謬一至於此。楊應琚種種欺飾之罪。終歸敗露。實由

天道昭彰。從未有人在朕前豫為指其舛謬也。即福靈安此次覆奏。其初意尚欲俟回京復命時詳悉面陳。及朕復傳旨詢問。伊始將所知彼處實情。一一入告。此皆仰賴

上蒼默佑。啟迪朕衷。得以先幾燭其情偽。不致終於貽誤。並非因福靈安此奏始定。楊應琚

罪案也。所有福靈安奏到各摺俱著譯發。並諭中外知之。○諭軍機大臣等據福靈安奏稱楊應琚前此所奏緬匪乞降及隴川打仗殺賊萬餘之處悉屬虛妄。果不出朕所料。已將伊原摺譯出通諭矣。去冬因楊應琚患病令楊廷璋馳往永昌協辦軍務。該督入滇以後自必沿途體察一切如福靈安現在所奏種種情節楊廷璋當時豈竟毫無見聞何以今春尚扶同楊應琚飾詞會奏遽行回粵及

朕傳旨詢問令將實情查覆仍不據實入告該督本係局外之人即據耳目所及和盤托出於彼有何干涉明係因辦理緬匪一事稍為棘手恐將實情舉露即沾累及彼不能脫身故爾顛預塞責巧於趨避此等雖外省惡習尚屬情理所有但以受恩深重之大臣止圖自便而不知實心任事良心何在楊廷璋著傳旨嚴行申飭并著回奏○已丑諭曰常鈞著自備資斧前往喀什噶爾協同綽克托

辦事柏琨著即來京常鈞有應得雲騎尉仍加恩准其本身隨帶○又諭前湯聘等奏趙宏榜在新街輕進失事請將伊革職看守彼時以趙宏榜如果係輕進尚屬勇往向前猶可稍從末減因止將伊革職令在軍前効力贖罪今覈此案情節則趙宏榜於新街挫衄之後即逃回鐵壁關以致新附地方棄而不守且此前又係伊慫恿楊應琚啟釁此後又從未聞其鼓勵戎行率兵前進而楊應琚方且保奏欲以都司復用是其諂媚總督畏蒞貽誤軍情之罪不可不重懲以昭軍律趙宏榜著即拏交刑部治罪○福建道御史姚晉錫條奏一各省知縣缺出例准佐貳陞署但縣丞等居官日久不設關防與鄉紳書吏常相往來若陞署本縣難免報復瞻徇之弊請嗣後縣丞及鹽場大使駐劄之處併府經歷之同城者祇令陞署隔縣一。向來州縣缺出督撫每將現任州縣委署一人兼理兩處

未免顧此失彼。又或假公濟私。酌取兩地贏餘。彌補一人虧空。嗣後應概不准兼署。即一時實無勝任之員。必須委之現任州縣。請以該員暫離之缺。另委一人。外省鄉試同考官。間有參用候補人員。查此項人員。閒居省會。士子聲氣易通。請申明舊例。於現任州縣內考選。其在省候補。及暫行委署。並借補佐貳者。概不准入內簾。一府州縣童試。有委之現任本學教官者。教官均係本省。多與童生

熟悉。若委令閱卷。又任其朝來暮往。擅離試所。難保無請託情弊。應請禁止。得旨。此奏似有所見。該部議奏。尋議查督撫量才陞調。偶以人地相需。將本城佐貳題陞本縣。原因平日才守可信。始行保題。又可隨時稽察。辦理本屬周詳。毋庸飭禁。餘均應如所請。從之。○庚寅。

上詣暢春園。問

皇太后安。○諭曰。李侍堯服制將滿。著迴兩廣

總督之任。楊廷璋著來京。補授刑部尚書。○又諭曰。彰寶奏。遊擊盧武畧。因聞總兵台布到任。藉稱公費不敷。派索各營銀兩。經署總兵敬善。欲行揭參。畏懼退還。又於台布赴任時。盧武畧備轎伺候。台布亦即乘坐。請將盧武畧革職。台布一併參奏等語。盧武畧著革職。台布違例坐轎。亦有應得處分。著來京候旨。其山西大同鎮總兵員缺。即著敬善補授。○又諭曰。楊重英。著以按察使銜。留於雲南。

聽總督明瑞派辦軍營事務。所遺江蘇按察使員缺。著吳壇補授。○吏部奏請。新授大學士陳宏謀。應定何殿閣。及兼銜。得旨。陳宏謀著為東閣大學士。兼工部尚書。○兵部奏。拏獲賭具等案。前經吏部奏准。首先訪拏之員。應加二級者。改為加一級。協拏之員。應紀錄二次者。改為紀錄一次。其拏獲描畫紙牌。及販賣賭具之案。未經議及。請嗣後將首先緝獲此等人犯。併能訪究根原。銷燬器具之員。

例加二級者亦改為加一級。協拏之員改為紀錄一次。至但經拏獲不能訪究銷燬者應將首先訪緝之員改為紀錄一次。協拏毋庸議叙從之。○以故杜爾伯特扎薩克貝子根敦子扣肯襲爵。○辛卯兵部議覆閩浙總督蘇昌奏稱福建長福營左軍應建營房三百間。右軍二百間。把總外委署舍十八間。一時建造多糜經費。請先於福清縣城教場隙地建給左軍一百間。長樂縣治東西分司塔山等處盈餘官地建給右軍一百間。擇無力緊要之兵先行配住。工料銀均於本年存公項下動支。應如所請。從之。○賑卹安徽懷寧桐城宿松望江貴池銅陵東流當塗蕪湖繁昌無為廬江巢縣宿州虹縣靈璧泗州等十七州縣及安慶建陽廬州三衛乾隆三十一年水災飢民併蠲應徵額賦。緩徵蠲剩銀米有差其勘不成災之鳳陽懷遠和州三州縣應徵新舊錢糧併予緩徵。○壬辰諭軍機大臣

等乾隆二十九年七月內據高晉奏江防廳所屬之迴瀾壩江灘塌陷距水洲城十一二丈及三四丈不等原有之護崖埽既經塌卸已成坑塘難以施工填補議將新修埽工簽樁壓實並築子堰為靠及於埽外拋填碎石以資鞏固旋據奏報工竣三十年春朕南巡親臨相度埽工俱已修固江流頗覺安瀾惟與水洲城逼近處所恐岸或續坍即不得不籌及避讓溜勢收築城垣為一勞永逸之計迄今又閱數年夏秋潮汛若何埽岸有無汕刷沿江一帶曾否長有沙灘足資保護未據奏聞著傳諭高晉將週年潮汛隄工及現在護沙長落情形確切查明據實覆奏以慰廑念尋奏江防廳屬迴瀾壩工自修築後節年用柴加鍊厚壓重土又於埽外加填碎石兩年潮汛均慶安瀾形勢平穩如舊惟大溜雖已開行碎石之外坑塘尚未淤平故未長有沙灘現擬本年赴工防汛時再加碎石俾坑

塘逐漸填平。即可望其長灘。毋庸收小城垣。讓地與水。得旨覽。又批。應如是妥辦。○癸巳。

上詣暢春園。問。

皇太后安。○諭曰。楊應琚辦理緬匪一事。種種捏飾乖張。俱非情理所有。節經明降諭旨宣示矣。今復據奏。因聞緬匪竄入孟艮。擬親往普洱。就近督率堵剿等語。所奏尤屬荒謬可笑。楊應琚前此具奏。親往沿邊一帶。督率將士。亟圖克復新街。以為進兵之地。今忽將新

街一路。委之一副將哈國興。藉稱堵禦孟艮。前往普洱。試思普洱距永昌尚遠。計伊到彼。賊匪又不知竄往何地。且目下已非進兵之時。伊即親往。又何益於事。明係因新街有賊。憚於前進。故欲退回普洱。希圖潛避。顛倒錯謬。若此。實不解其具何肺腸。此皆楊應琚罪案彰著之處。難以自行掩飾者。所有楊應琚奏到之摺。並著鈔發。俾中外知之。○諭軍機大臣等。鄂寧密奏。楊應琚毫無調度。粉飾遷

延一摺。已於摺內批示。又楊應琚奏。現在親往普洱。就近督率堵禦等語。明係欲避新街之役。故藉詞往普洱堵禦。亦降旨宣示中外矣。楊應琚辦理緬匪一案。債事失機。乖張錯謬。種種不可枚舉。此事已斷非伊所能籌畫。且伊大學士及總督。業經革退。即令伊仍在雲南暫管事務。將弁等亦必不能聽其約束。徒因彼在前。得以售其欺誑。更於事體無益。楊應琚著革職拏問。傳諭鄂寧。即遴委妥員。

押解赴京。交刑部治罪。明瑞未到之先。所有總督印務。即著鄂寧暫行署理。緬匪敢於侵擾內地。抗拒官兵。不可不與師問罪。大示懲創。但此時已非進兵之期。楊應琚零星調兵抵禦。並未能有克捷之處。徒傷官兵元氣。益令將士心生畏怯。即鄂寧所奏。慶舒稟請加調貴州官兵之說。亦屬無益。且恐衆人聞之。轉生驚疑。鄂寧此時。惟當示以靜鎮。不可稍涉張皇。況邊外瘴癘已盛。亦不必復令將士

冒觸輕進。莫若暫為按兵不動。使得養蓄銳氣。俟明瑞到彼。相度時勢。剋期深入。以奏膚功。至楊應琚請將召丙革職。拏問。並欲將臨陣退縮。土練等正法一節。尤屬不知事體。楊應琚以督臣膺勦賊重任。尚不能督率士卒。鼓勇長驅。致綠營將弁。畏葸債事。楊應琚前此。惟任欺朦。曲為徇庇。此時乃欲於新附土司。求全責備。何顛倒若是乎。況召丙並未為緬匪脅從。僅因力弱無能。攜家潛避。尚屬情理所有。而土練等尤不宜令其獨當一面。如果善於驅策。自當與官兵同効疆場。又豈可脅以刑威。過於刻責乎。若此時將伊等一體治罪。既不足以服其心。轉使徼外土司。心生疑畏。又安能望其歸誠。用命乎。召丙及土練等。俱不應如楊應琚所奏辦理。若彼已將召丙拘執。即令鄂寧釋放。並宣示朕旨。俾其感戴德意。永受綏懷。其現在一切軍營應辦之事。並著鄂寧悉心籌畫。務期妥協。至進勦機

宜。俟明瑞到滇。辦理可將此傳諭知之。○又諭曰。楊應琚辦理緬匪。舛謬乖張。已降旨革職。拏問。伊子楊重穀。亦經革職。所有楊重穀任所資財。昨已諭令鄂寧派員赴湖南查抄。但往返稽時。或致彼聞風。豫為寄匿。著傳諭方世儒。即就近派委司道大員。速行嚴密查抄。毋使稍有隱匿。寄頓。其實慶府知府員缺。候朕另行簡員補放。楊重穀此時應已回至湖南。俟楊應琚拏解經過該省時。該撫即令

楊重穀。隨同來京候旨。○是月。奉天府府丞李綬奏。盛京宗室覺羅二學。章程本極詳明。緣奉行不力。日久漸就廢弛。自上年二月份內。業經臣等嚴立課程。每月逢五逢十。繙譯作文。作詩。逢三六九日。射箭。仍將所習清漢各功課。按日登簿。臣等仍於每月面課一次。將軍府尹。亦每月前往一次查驗。現在諸生學業稍有進境。從前怠玩之習。均已革除。得旨。好。實力為之。○直隸總督方觀承奏。子牙新

河係淳沱河下游。上年伏秋水盛。自大姚鋪以下至窪子頭十里以內。隄身祇高出水面至七八寸。又夏秋大汛時。新舊兩河合而為一。水面寬濶。每遇北風鼓浪。撞擊雖用埽由塘護。隄身仍多汕刷。應請將隄幫冊刷處所一律修補。並將大姚鋪以下隄身就地勢高下酌量加高一二三尺不等。所需土方夯礮銀兩。請於天津道庫存貯節年河淤租銀內動撥報聞。○漕運總督楊錫紱奏。每年二進

糧艘過淮。例於江南江安蘇松二糧道內。輪委督押抵東。原以船幫過多。必須大員彈壓。而南漕道員以江安蘇松為近。故定為遞年輪委。但糧艘行走迅速。及不致滋事。總由沿途委催得人。請嗣後如遇運河水小。需大員前往籌水接濟。並辦理剥船諸事。漕臣臨時仍於二道內奏派一員。如水勢充足。即可毋庸專員押解。得旨如所議行。○江西巡撫吳紹詩奏。江省各州縣社穀。通計七十五萬八

千七百六十餘石。惟倉廩甚少。多係零星寄貯。雖經前撫臣飭議士民捐建。僅據武寧縣具報興工。且易滋勒索。擾累應即酌撥息穀變價興修。現已責成府州親赴各屬勘明各村適中之地。統計社穀多寡。酌定間數。建設總倉收貯。仍遴選社長社副加謹主守。春借秋還。冊報州縣報聞。○閩浙總督蘇昌。福建巡撫莊有恭奏。閩省信巫尚鬼。迎賽闖神。前飭地方官實力查禁。其風已戢。而省城內外。

又有虔事五帝者。謂其神專司瘟疫。偶逢時症傳染。奸徒乘機斂錢。設壇建醮。擡像出巡。其費竟以千百金為計。不獨廢時失業。勞民傷財。即種種不法之事。皆由此起。現已痛切曉諭。并飭地方官收土木之偶。投畀水火。倡言奸棍嚴拏治罪。得旨嘉獎。○山東巡撫崔應階奏。東省武定府屬逼近海濱。地多窪下。每遇伏秋汛漲。汶河及沙趙二河水灌注。運河往往宣洩不及。全恃東岸之大清河。及徒

駭馬頰。二河分流入海。大清河現在深通。徒馬二河自聊城博平河頭至霑化海豐入海之處。各長五百餘里。均已逐段挑濬。惟徒駭上游河面俱寬百餘丈。及六七十丈不等。獨至霑化將次入海之處。自小牟家莊起至齊家園止。計五十餘里。地形獨高。河身過窄。僅十二三丈。且曲折紆回。掣消未能迅速。若逐段開挖。需費過多。又河身太曲。即挑濬仍難暢達。查壩上莊東北有舊時漫口一道。極為徑直。長二十五里。寬自二十餘丈至四五十丈不等。若開挑寬深。即可兩路分洩。惟民地洩水。非運河可比。祇應勸民用力。而工程稍鉅。又值積歉之後。請照河工開挑引河例。每土一方。准賞食米銀八分一釐。又武定府城西北有八方泊。上承臨邑德平商河惠民陽信各處坡水。泊之東北為古鈎盤河。由海豐之石橋莊入海。久成湮廢。每遇伏秋霖雨。泊水東下。河身不能容納。水勢倒漾旁溢。急宜開濬。俟再加查勘。後如夫工有限。即勸用民

力挑修。倘經費浩繁。臣仍另行據實請旨。得旨甚好。如所議行。又奏東省城工原估未盡妥協。如東平州土城周圍十六里。估銀十八萬六千四百五十九兩零。惟導汶濟運以來。兗泰各處山泉俱歸汶河。環遶州城。每遇伏秋漲漫。土城易於浸塌。又居民稀少。西南隅多係空地。請將西面收搏二里三分。改土為磚。城身祇高二丈。應改估銀十六萬五千四百餘兩。又臨清州磚城原估銀十一萬二千八百五十五兩。係將西南二面拆修。東北間段挖補。但磚塊多係酥裂。應手坍塌。若僅以挖補完結。恐新工甫竣。舊牆又坍。更費周章。應將原議城高二丈六尺之處。搏低五尺。即以所減項作東北二面全行拆修之費。又滕縣磚城原估銀八萬三千九十三兩零。嗣因該縣知縣僅擬黏補殘缺。估銀一萬三千七百餘兩。目下現應興工。但城墻坍塌不堪。實非黏補可完。即原估之數尚恐不敷。仍應

據實另估題修得旨如所議行○河東河道總督李清時奏東省運淤二廳所屬南陽以下運河西岸碎石隄工係漕船挽繹之路但興築已閱十年土漚水泡難免朽腐斷折石無椿管土隨石卸急須修補查運河廳自田家單閘起至徐家營房止長二千九百餘丈洳河廳自葛墟店起至郝山上下止長一千五百餘丈湖河相夾兩面皆水現在全無隄頂塌卸過甚應補發排椿砌石加工估需銀

兩請由司庫動支得旨如所議行○河南巡撫阿思哈奏據澠池靈寶陝州陸續稟報衙署被竊隨飭各屬多派幹役躡緝茲據該州縣等報稱陝省臨潼縣拏獲拒捕毆傷事主賊犯李世德訊出夥犯馬大漢等五名均係甘肅回民並供出行竊澠池等州縣署現仍嚴飭各屬務將逸犯拏獲究報得旨汝向稱留心盜竊常令嚴緝今果若何此案宜速即嚴行審究莫又如外省惡習近亦有旨何不

面會司道即審陝西巡撫明山奏據長武縣知縣稟報該縣里民夥衆百餘入城以告借籽種為詞將書役七家房屋拆毀現已會同營員獲犯三十餘名臣當即馳抵該縣查勘被拆房屋屬實隨將獲犯逐一研究惟武肖等十一名係夥同滋事之犯又據陸續供出姓名續獲三十五名訊係尚景福起意指使武肖首先糾約胡良孝喊令拆房但夥犯尚未拘齊應俟全獲後從重究懲至知縣曹

立基都司趙廷棟既不能查察於先臨時又不實力擒捉均容另摺參奏得旨所辦好速行審擬定案俟罪人正法後再參官可也不然將啟刃民挾制長官惡習署兩廣總督楊廷璋廣西巡撫宋邦綏奏粵西太平鎮安二府地處極邊漢土相間並南寧府屬之遷隆土崗皆與安南接壤廣袤二千餘里中間三關百隘均屬緊要向例每年冬月令知府副將查勘一次但一年之久各隘磚石柵欄

遇有損壞。府協相離。寫遠耳目難周。請嗣後於春夏秋三季。責成太平等三府同知通判會同汎弁。前往各所屬隘口。逐一查勘。隨時修整結報。冬季仍令府協親履遍查。至各關隘原設汎弁。現已飭令製造戳旗。填明某汎名目。各於所轄隘內。率兵梭織遊巡。戳往旗來。輪班交替。仍按月具報。汎弁疎懈。令丞倅詳報懲治。丞倅偷惰。由府協查報。倘府協草率。即令鎮道揭叅報聞。

高宗實錄

卷七八二

大清高宗法天隆運至誠先覺體元立極敷文奮武孝慈神聖純皇帝實錄卷之七百八十一

大清高宗法天隆運至誠先覺體元立極敷文奮武孝慈神聖純皇帝實錄卷之七百八十二

監修總裁官經筵講官太子太傅文淵閣大學士文淵閣領閣事領銜內大臣稽察欽奉 上諭事件處管理吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂
總裁官經筵講官太子太傅文淵閣大學士文淵閣領閣事稽察欽奉 上諭事件處管理刑部戶部三庫事務世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆三十二年丁亥夏四月甲午朔享

太廟。遣顯親王衍潢恭代行禮。○乙未。諭昨鄂寧奏抵滇查詢緣由一摺。內有接據署普洱府黑光等稟稱。欽差監軍楊之語。其名甚屬不經。已於摺內批示。恐該省無識之人。尚有襲為謬稱者。不可不明白宣諭。前令楊重英馳往雲南軍營辦事。其時楊應琚乖張荒謬。各罪狀。尚未昭著。朕念其或因病後心神失據。致為綠營將弁所朦貽誤重務。伊子楊重英平日尚屬曉事。是以令其星馳前往襄助。

伊父辦理一切至原諭內所云仿監軍之意亦猶楊廷璋前在粵西義寧以道員而該省督撫委以辦監軍之事今楊重英在滇亦不過令其同總兵等與聞軍營諸務並非加以監軍之名也乃該省竟稱為監軍且冠以欽差字樣實為不諳事體楊應琚以總督膺勦賊重寄斷無命他省臬司往監督臣之理況楊重英又係其子豈有以子而監父乎設朕前此欲遣人往監其軍必特派大臣前往經畧彼一按察使烏足以當之看來此稱未必非出於楊應琚之意或以伊子奉命赴滇輒自引為榮寵遂爾張大其詞不顧稱名之妄而所屬各員轉相傳述加以艷稱幾如明季令內監監軍之事成何體制不可不亟為改正現在已命明瑞前往總督雲南辦理軍務楊重英交與明瑞以道府銜聽候差委至楊重穀前此諭令至永昌侍伊父疾今已回省城將赴湖南原任楊應琚現在自取重戾雖

罪人不孥其子原無庸一體坐罪但楊應琚如此負恩誤國其子豈可仍舊服官晏然安享爵祿乎楊重穀著革職同楊應琚進京有問訊之處并將此通諭知之又諭曰楊應琚奏副將哈國興等兵抵新街緬匪一面應敵一面上船逃遁現在我兵據守新街嚴行搜捕防禦等語可見緬匪原屬不成事體即從前楊應琚節次所奏賊眾數萬聚集新街之語亦全不足信皆由將弁畏葸退怯不肯出邊勦賊遂至賊眾得蟻聚新街今我兵一到緬匪即不敢抵敵惟事奔逃則烏合之眾猥劣無能更可概見使楊應琚早能策勵士眾奮往直前不獨新街久經克復即乘勝長驅徑搗賊巢亦易為之事何至遷延玩誤動以虛詞謊報自取重戾乎將此宣諭中外知之移派天津水師營官兵於福州廣州涼州分駐軍機大臣等議奏前因天津駐防水師營兵武藝平常甚至不能清語乘騎奉旨

將該都統等治罪。仍著臣等查明天津水師營設自何年兵額若干。及應如何分遣另駐之處。詳議具奏。查天津向無滿兵。雍正三年。因天津界海。為福建浙江南盛京等處商船出入要隘。駐兵二千名。乾隆九年。增一千名。二十五年。奏裁五百。現駐二千五百名。養育兵三百四十二名。此項兵為防海口而設。今海面久已寧謐。自可移撥他省。查福州駐防末隊兵二百二十九名。現經該將軍奏請調取廣州駐防二隊兵四百九十八名。向來缺出。亦係由京調取。似可將此項兵分別派往福州。現在請調到時。即可補額。廣州現未有積缺。請調到時。令暫食原餉。俟缺出。續補再查涼州兵前經移駐伊犁。所遺駐額。亦可派一千名。往補原缺。餘兵七百餘名。請分駐山海關。保定府。永平。玉田。三河。昌平等州縣。所剩養育兵三百餘名。亦應一體分派。帶往所有水師營額悉裁。再查天津有滋生銀兩。

及官房操船等項。請特派大臣會同直督詳查。妥議具奏。得旨。著新柱。珠魯訥去。以江寧副都統薩爾圖京口副都統圖桑阿對調。丙申。兵部等部議覆兩江總督高晉奏。稱疎防重犯越獄。積至數案。該管府州例止罰俸。不足示懲。查越獄之案。府州初叅罰俸一年。二叅亦議罰俸。原屬過輕。應如所請。嗣後如有疎防越獄。府州罰俸一年。逾限不獲降一級留任。或經前案發覺以後。及未經開復以前。又遇所屬重犯越獄者。降一級調用。督撫司道。初叅罰俸六個月。限滿不獲。罰俸一年。再發遣等犯越獄。經督撫將該管上司查叅到部。應逐案議處。向例計案併議之條。請停止。從之。丁酉。命鑲白旗漢軍都統四格。工部侍郎三和。俱在紫禁城騎馬。是日起。上以常雩祀。天於園丘齋戒三日。戊戌。諭軍機大臣等。馮鈐奏。

審究行竊衙署賊犯丁雲等亦係馬得鰲夥黨并陸續供出同夥為匪之馬老六等共四十八名現在飛咨陝省查拏等語馬得鰲案內未經就獲之夥犯尚多前已諭令該督飭屬嚴緝今馮鈐復究出同夥賊匪四十八名不可不全行拏獲盡法懲治以絕根株著傳諭吳達善速即嚴飭各屬上緊緝拏務期盡數弋獲毋使稍有免脫漏網又諭曰阿思哈題陳善賢及伊女陳氏勒縊身死一案先

據新野令方鳴球審係李矩嫗李閔氏等起意致死嗣因府審時案犯稱冤經該府高趨駁飭覆勘復經臬司以案關重大檄犯赴省委員覆訊究出陳善賢自將伊女勒死旋即自縊殞命該縣原審時妄聽快役鄧純士等誣刑逼認擬將方鳴球擬流鄧純士擬發烏魯木齊一本內情節未免可疑陳善賢之女雖與其夫不睦屢次逃匿回家並無別項醜蹟陳善賢何致遽將伊女勒死即或一時氣

憤手斃其女尚屬情理所有其女既死復有何情急難堪遽爾投繯自盡種種疑竇難成信讞此案係臬司提審翻駁何謂平素念佛吃齋每欲心存姑息或見案內擬抵多人冀為開脫適府審有呼冤之事遂爾委員另審藉口平反以為活人積德之地亦未可定事關出入死生不容稍滋疑義著傳諭阿思哈即將方鳴球并案內應訊各犯証密速提齊遴委幹員隔別押解來京毋致中途串供所

有一切卷宗並著封固送部到京日交軍機大臣會同刑部詳加研鞫定擬具奏其何燭能勝臬司與否一併據實速奏命鑲白旗蒙古都統扎拉豐阿在紫禁城騎馬已亥上詣

南郊齋宮齋宿諭曰楊應琚奏伊子楊重穀進京行抵雲南省城將原任騰越州知州陳廷獻長隨汪朝杖責身死請革職交撫臣審擬等語楊重穀前已降旨革職解京今復據

奏擅將無辜之人杖責致斃。其事實出情理之外。著沿途地方官鎖拏解送雲南。交與該撫鄂寧嚴審定擬具奏。又諭今日朕恭視雩祭祝版。見侍班講官勵守謙足立欹邪。有愆儀度。講官職司記注。典禮所在。凡朕躬言動必書。自應恪恭將事。况勵守謙係舊家子弟。身列清班。豈可不知檢飭。同於市井輕浮之習。甚屬不敬。勵守謙著交部嚴加議處。又諭據安泰等奏稱喀什噶爾自第七臺至第

十臺並腰站所養牲隻俱被雪傷請借給該處領催烏拉齊等一年錢糧。於每年應得項下坐扣等語。臺站人等既遇雪傷牲隻著加恩賞給一年錢糧。無庸坐扣。諭軍機大臣等楊應琚奏伊子楊重穀同御醫李彭年進京行抵雲南省城楊重穀將原任騰越州知州陳廷獻長隨汪朝杖責身死已飛飭沿途地方官追拏解省交撫臣審擬等語。楊重穀前已降旨革職與楊應琚一同解京。今復將

無辜之人杖責致斃。其事更出情理之外。現已有旨交與鄂寧嚴審定擬。但楊應琚摺內稱楊重穀業已自雲南省城起程進京著傳諭沿途巡撫派委妥員於孔道探聽。不拘何處途遇即行鎖拏解至雲南交與該撫鄂寧收審。並須小心防範押解。毋任有自戕等事。至御醫李彭年現在行抵何處仍令該撫等照例料理送京。可將此傳諭知之。庚子常雩祀。

天於

圖丘。

上親詣行禮。詣暢春園問

皇太后安。幸圓明園。諭曰周琬前在刑部

有年。著加恩授為刑部郎中。辛丑。諭據崔

應階奏此次分發舉人請照京官告假回籍

之例量為變通到籍後限一年期滿即由本

省給咨赴原發省分補用一摺。詢之吏部據

稱此等舉人告假回籍即由本省給咨起用

之處。業於上年揀選引見後。辦理通行各直省在案等語。如此則崔應階並未查照案情。率為此奏。實屬疎忽。著飭行朕因舉人銓選壅滯。是以加恩揀發各省。俾得及鋒而試。其未經得缺以前。原與現任官員有間。伊等如有情願告假回籍者。不妨聽其自便。並無庸定以一年限期。可將此通諭各督撫知之。又諭曰。戴第元奏請增至聖誕辰祭祀一摺。殊非正理。誕辰之說出

於二氏。為經傳所不載。國家尊

師重道。備極優崇。釋奠二丁。自有常制。援據

禮經。實不同於尋常廟祀。且昔人於

孔子生日。辨論紛如。尤難臆定。况

孔子。儒者之宗也。尊

孔子者。當即以儒者所聞

孔子之道尊之。戴第元乃欲於彝典之外。輕

增一祭。轉為褻越。而不足以昭隆禮。士不通

經。所奏宜擯。又諭曰。湯聘奏前在永昌於

緬匪一案。絲毫不能贊理。及賊眾滋擾。整賣復不能先事豫防。請交部嚴加議處等語。湯聘本一庸懦書生。軍旅非其所嫻。朕原不以勦賊之事。責成該撫。但伊駐劄永昌日久。目擊楊應琚種種乖張欺飾。從前並未據實入告。直待朕萬里之外。覺其詐妄。屢次降嚴旨。將楊應琚治罪。伊方知徇隱之咎。斷無可辭。姑為此奏塞責。悔已晚矣。湯聘著交部嚴加議處。此次辦理軍務。種種不合機宜。所有動

用帑項。內虛糜妄費者。自應著落楊應琚名下賠補。如楊應琚不能賠完。即著湯聘賠繳。至湯聘之罪。自不同楊應琚。內地無事處巡撫。尚可循分供職。鄂寧已經到滇。湯聘仍著即赴貴州新任。又諭曰。湯聘奏總兵華封寧珠。平時既安坐普洱。並不加意防禦。及緬匪滋擾。孟艮等處。又不親往統兵截殺。以致賊匪乘虛蔓入。遊擊權恕司邦直都司甘其卓守備潘鴻臣。當賊匪竄入。打樂猛混時。

一味遷延觀望。及聞賊至。遽行退避。轉以接陣殺賊。捏報。並請革職治罪等語。華封寧珠係總兵大員。權恕等均身為將領。如此畏葸不前。種種貽誤。情殊可惡。華封寧珠。權恕司邦真。甘其卓。潘鴻臣。俱著革職。拏問。即令鄂寧派委妥員解送刑部治罪。又諭曰。額爾德蒙額。駐劄庫爾喀喇烏蘇年久。著三等侍衛伍吉前往更換來京。諭軍機大臣等據阿桂奏。四川省發遣伊犁為奴人犯饒玉相。於本年二月內脫逃。現在嚴拏未獲等語。饒玉相本係身獲重罪。免死發遣之犯。乃敢乘間脫逃。情殊可惡。朕觀饒姓係江西廣東流入四川者。著傳諭四川廣東江西各督撫。速飭各屬上緊緝拏務獲。即於該處正法。毋使免脫漏網。又諭曰。湯聘奏。緬匪侵擾邊境情形。及叅劾華封寧珠等各摺。已分別降旨矣。前聞湯聘親往普洱辦理緬匪事務。因軍旅非其所嫻。曾諭令鄂寧前往普洱接辦。鄂

寧此時諒已起程。九龍江一帶隘口。為邊境藩籬。豈容賊匪竄入滋擾。自應即速督率兵弁。悉力勦逐。勿使稍侵內地。但現在邊外瘴氣方盛。已非進兵之期。况官軍元氣受傷。未免心存畏怯。此時即長驅深入。於事轉為無益。鄂寧於驅賊出境後。仍遵前諭。示以鎮靜。不必輕舉妄動。所有該處用兵事宜。統俟明瑞到後。於秋冬厚集兵力。尅期大舉。以張撻伐。再整欠土司。以先搃前。此征勦莽匪時。即能奮勇出力。其人本屬可用。茲復率領土練堅守整固。又招集散亡聚練二三千名。情願截路勦殺。甚屬可嘉。著鄂寧即行酌量獎賞。以示鼓勵。至總兵華封寧珠及遊擊權恕等。現已有旨革職。拏問。鄂寧可即派委妥員押解來京。其普洱鎮總兵員缺。令德保調補。永北鎮總兵員缺。仍著福靈安署理。鄂寧即帶同德保前往普洱辦理。現在堵勦事宜。著將此傳諭知之。壬寅。

上詣暢春園問

皇太后安。以正白旗蒙古副都統觀音保署雲南楚姚鎮總兵。旌表守正捐軀之山東陽穀縣民李克緒媳朱氏。癸卯諭軍機大臣等。據彰寶奏。查出晉省應發新疆遣犯閔良有。即係馬得鰲案內餘黨閔三白子。又遣犯陳福海。雖不在通緝二十八人數內。亦係馬得鰲餘黨。俱應解甘辦理。又馬得才等六名。均係甘省回民。所知夥類亦多。恐有狡飾。亦咨會陝督。再行究明發遣等語。閔三白子等二犯。皆馬得鰲餘黨。自應嚴切根究。即馬得才等六名。既皆甘省回民。或亦係馬得鰲同夥。捏改姓名。希圖避罪。皆未可定。並須逐一詰訊。毋任狡飾。至馬得鰲一案。夥黨多人。散布肆竊。情罪重大。實非尋常竊盜可比。所有未獲各犯。務上緊嚴加躡緝。迅即弋獲。盡法懲治。并不妨從重多辦數人。大示懲創。俾匪徒永絕根株。著將此傳諭吳達善知之。

軍機大臣等議奏。兵部尚書雲貴總督前伊犁將軍明瑞奏稱。伊犁索倫錫伯察哈爾兵原編佐領。每二百戶。設一佐領。每一昂吉。設六佐領。今戶口日增。佐領六員。管理不敷。請於厄魯特昂吉下。增佐領二。索倫錫伯察哈爾等。四昂吉下。亦每昂吉增佐領二。共增八員。統按八旗。分派管轄。應如所請。從之。以告退奉恩將軍託禪子倭克星額襲職。甲辰諭據湯聘叅奏。已革嶧縣知縣顧銓。虧缺庫項。署縣裴瓚。擔認賠補。通海縣知縣何泰。身任監盤。並不據實揭報。請旨革審。其前署令歐陽飛。雖未接收交盤。但明知虧缺。徇情不舉。該管知府王文治。漫無覺察。均請交部嚴加議處等語。裴瓚何泰俱著革職。與已革知縣顧銓。均交該撫鄂寧將因何虧項及徇情代補各緣由。一併嚴審定擬具奏。歐陽飛王文治並著交部嚴加議處。諭軍機大臣等。據阿爾泰奏稱。託雲瑪璫至扎雅克等

處呼圖克圖尚卓特巴等執獻擲石案犯十一名。俟解至成都。訊明即行正法等語。前據阿爾泰奏稱扎雅克地方之尚卓特巴。查出擲石番子二名獻出。奏到時。朕即降旨以番子等擲石擊打台布時。其人必多。何以止將二人執獻。託雲等到彼。將獻出番子嚴訊動手之人。尚有若干。務期全獲。今經獻出十一人。恐其中尚有隱匿。託雲等現已帶兵前往。斷不可草率了事。著傳諭阿爾泰俟十一人

解到時。暫緩正法。訊明此事因何起釁。伊等是否動手正犯。此外或另有倡率之人。勿使漏網。○又諭。今日閱楊應琚明白回奏一摺。更不成話。如所稱前與楊廷璋會奏當厚集兵力。俟至秋間分路進剿。以期永靖邊陲等語。實屬支離掩飾。上年十一月以後。節次披閱楊應琚等奏報。知緬匪負固跳梁。斷不可苟且了事。是以傳諭伊等。令其豫為調度。俟春夏瘴過興師。乃朕籌度邊情。先期指示。並

非楊應琚等從前已有此議。且其與楊廷璋會奏摺內所稱遵旨務集兵馬。俟瘴過進兵。亦係中無定見。故作此語。以為嘗試之計。或幸朕從其納降。苟且完事之意。非能實心痛恨緬賊。決機進剿之奏也。今楊應琚乃以奉旨飭辦之事。遂據為先行籌及之事。有是理乎。至楊應琚初辦緬匪時。朕尚不知緬酋前此滋擾情形。因思緬酋如果將召散獻出。即可無事多求。且其國僻在荒徼。亦不值一辦。

是以諭令楊應琚等酌量事機。妥協經理。今緬匪敢於抗拒大兵。傷我士卒。並且竄入內地侵擾。已成騎虎之勢。斷難中止。此而不大張撻伐。何以振國威而申天討耶。楊應琚前此所為相機籌畫者何事。後此遽欲草率了局者何心。不可不詳加詰訊。前已降旨將伊革職。解來京。著傳諭明瑞於中途相遇時。即將此等情節逐一究詢。錄供覆奏。況緬匪一事。係楊應琚始終承辦。其一切情形及詳

晰始末。明瑞亦當向彼細問。以備稽覈。如所言尚存虛飾。或果為將弁欺朦。種種情節。明瑞到軍營後。覆加考察。其底裏自然畢露。既可知其確切罪狀。即軍務邊情。亦未嘗不可因以糾辦酌籌。得其竅要。至李時升、朱崙等並經拏解在途。明瑞不拘何處遇見。亦著將應行研鞫之處。詳加訊問。一併奏聞。即稍稽半日之程。亦無不可。將此傳諭明瑞知之。以通政司副使卑保為太僕寺卿。乙巳。刑

部議奏。福建巡撫莊有恭疏稱。疎脫遣犯楊香之解役張金萬等。監禁一年。限滿無獲。應照例分別首犯絞決。為從杖流。與囚同罪。得旨。向來發遣新疆人犯。有中途竄逸者。除將該犯緝獲正法外。其疎縱之差役。例應問擬絞候。一年不獲。請旨正法。同日刑部即有奏請應辦之江西省解役楊銘、胡定潮、福建省兵丁張金萬二案。因思此等兵役。管解重犯。膽敢怠玩疎縱。以致免脫遠颺。不可不嚴示

儆戒。所有新疆要犯脫逃之案。除審係有心賄縱。仍照與囚同罪例定擬。其餘應問絞候監禁一年之兵役。內為首情重者。著改發伊犁等處。既足以昭創懲。而若輩又皆年力強壯。堪資力作之人。非若積匪猾賊等類。反教人為匪可比。其於屯田墾闢。自屬有益。現在刑部所奏楊銘等三犯。即照此例行。嗣後由新疆改發烟瘴及黑龍江等處人犯。如有脫逃者。既照新疆例拏獲正法。其疎縱兵役。亦

著照新定發往伊犁等處之例辦理。其餘為從情輕之兵役。仍以杖流問擬。至此等改發人犯。情罪重大。本屬去死一問。今雖仍發內地。其僉解當與新疆遣犯一體嚴密。著各督撫嚴飭所屬文武員弁。並當遴選妥幹兵役。小心管押。毋令稍有疎虞。致罹法網。可將此通諭知之。更定停發新疆遣犯例。軍機大臣等議奏。伊犁、烏魯木齊等處。前因新置屯田。需人耕牧。是以於內地軍流人犯內。酌其

情節較重者。奏准改發。定例以來。每年各省改發不下六七百名。積而愈多。此等遣犯。多係頑梗性成。約束非易。臣等遵旨於舊定應發各款酌按情節。其非積兇。尚易約束。仍照例遣發者。六條。其積匪猾賊及回人行竊等犯。應將向例停止發遣者。十六條。請飭部分別行文各直省。凡未結及已結未解案犯。俱遵照新例辦理。從之。丙午。

上詣暢春園問

皇太后安。諭前因各省將軍大臣等出入攜帶該管兵弁。曾降旨悉行禁止。繼念伊等入內家奴。不准隨入。復降旨准其隨帶數人。原以伊等或年班。或陞見。仍可帶回原任。非調任別省。亦准帶往。今詢之容保。伊係調任廣東將軍。來京仍帶西安兵弁。近日伊昌阿。亦奏素玉擅帶杭州弁員前往西安。是伊等因朕有准帶數人恩旨。即藉端任意攜帶。殊無節制。著通行曉諭嗣後。如來京仍回本任

者。照例准帶該管兵弁。如調任不准越省。帶往有違例者。一經查出。必嚴加治罪。諭軍機大臣等。託雲等至噶噶地方該處呼圖克圖尚卓特巴等獻出擲石案犯十一名。託雲等正應加以嚴訊。前動手擲石時。必不止此數人。務期全犯就獲。即欲完案。亦應將彼處呼圖克圖尚卓特巴及眾頭目等齊集一處。示以兵威。俾知永遠懾服。乃奏稱餘犯若加深究。恐信口攀及無辜。是不過欲草率了事。

辦理殊不合朕意。此事尚無關緊要。祇可就此結案。託雲係駐藏辦事之人。若盡如此姑息。於事必多貽誤。著傳旨申飭刑部奏。甘肅巨富馬得鰲聯結匪徒。積案累累。懲治之法。不得拘於常例。其有滿貫為首已踰數次者。應照前案之閩景彩馬甫臣等從重擬絞。滿貫一次者。應照現案之苟老三擬絞。入於秋審情實。至滿貫為從已踰數次。其分贓。又在一百二十兩以上者。亦應即照為首例擬

較秋審時一併入於情實。其僅係為從一二
次分贓又未滿貫者。亦應加重改發黑龍江。
從之。○工部奏各省城垣倉庫隄岸閘壩等
工。於詳請興修時。各該督撫先應派員將所
修工段。長高寬厚丈尺。確估報明。工竣由該
督撫開明丈尺報部。以憑覈減。如籠統題銷。
應將造冊之員。指名叅處。各該管上司一併
察議。從之。○豁山東新城等縣。鰥荒水田二
十八頃有奇額賦。旌表守正捐軀之湖北

襄陽縣民陳章妻汪氏。○丁未諭京師自三
月以來。雨水稍稀。大田待澤維殷。朕心深為
軫念。宜申虔禱。期沛甘霖。著禮部即查照定
例。敬謹舉行。諭軍機大臣等。今春三月以
來。京師雨澤稀少。天津等處。曾否得有透雨。
亦未據奏報。該處濱海沮洳。葦蕩叢生。當此
晴煦日久。炎氣漸蒸。蝗蝻尤易滋長。現已令
方觀承。留心查勘。再傳諭高誠。楊克信。於附
近天津各處。實力搜尋。毋使稍有萌動。並將

通日地方有無得雨。及是否不誤大田各情
形。即速據實具奏。又諭今春畿輔地方雨
澤稀少。月初近京各州縣。雖得有微雨。未能
需足。即宣化古北口等處。該提鎮報雨。亦止
二三寸。今立夏已將旬日。是否無誤大田。各
屬曾否得有透雨。未據該督奏報。朕心深為
廑念。再該督前奏青滄窪地一帶。分委弁員
申嚴捕蝗之禁。業於摺內批令嚴飭搜查。第
恐海濱沮洳之地。久晴滋生蝻孽。並著方觀

承嚴飭所屬地方。先期留心查捕。毋使稍有
萌滋。並將有無得雨情形。即速據實奏聞。
旌表守正捐軀之安徽歙縣民汪某女汪氏。
○戊申。直隸總督方觀承議奏。大學士陳宏
謀奏稱。宣惠河於海豐縣境之老黃河入海。
老黃河年久淤淺。誠恐與所挑之河。淺深相
等。仍不免於倒漾。請自河頭起。至歸海處止。
逐段測量。酌定丈尺挑濬等語。臣遵旨親往
查勘。宣惠河流經東光。南皮。滄州。鹽山。四州

縣。自東光張家莊起。至鹽山無棣溝下口。河
身高昂者五段。淤墊者九段。兼以河南河北
之漑水溝。悉歸此河。往往泥沙衝灌。應於水
過後。歲加挑濬。至無棣溝入老黃河處。近年
大沽口海潮逾溝西上。直至小泊頭村。六七
月間。河流為潮所阻。一日內常有數時停緩。
潮退即隨之而落。臣循河勘至山東海豐縣
境。向東地勢一律就下。現在分派東光等四
州縣。各將境內高昂淤墊段落。節次開挖。並

查老黃河下游。距海豐張仲橋祇二十餘里。
張仲橋自乾隆二十九年以來。衝刷漸寬。足
以受水。自不虞其倒漾。得旨。如所議行。(四
川成都副都統宗室雅郎阿奏。成都駐防兵
米。經前任副都統臣卓鼐奏准。於每歲米折
項下。存貯藩庫銀一萬七千兩。交就近十五
州縣。採買米二萬石。運送滿城。存倉支放。其
額設駐防等官。共七十四員。今生齒日繁。不
下六百餘口。歲需米約及千石。前此未經籌

及查賞給兵丁牧場內有開墾水田三千三
百十八畝。旱田一千零七畝。歲交米一千九
百十石八斗。向係折價存公。此項糧米。交納
後復行變價。徒滋輾轉。請照例每稻二石。交
米一石。即令駐防各員指買。每石作價一兩
四錢。於各該員歲俸內坐扣歸款。從之。(四
川總督阿爾泰疏報。巴州鄰水等十廳州縣。
首墾地一百六十五頃九十七畝有奇。涪州
廣元等七廳州縣。首墾田七頃一十九畝有

奇。

大清高宗法天隆運至誠先覺體元立極敷文
奮武孝慈神聖純皇帝實錄卷之七百八十二

實錄卷之七百八十二

庚戌

大清高宗法天隆運至誠先覺體元立極敷文
奮武孝慈神聖純皇帝實錄卷之七百八十三

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣等謹

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部工部事務

世襲騎都尉軍功加十九級隨帶加二級又加二級臣等謹將內大臣戶部尚書鑲藍旗滿洲都統軍功紀錄五次

尋常紀錄十四次臣等謹將經筵講官太子少保工部尚書紀錄六次臣等謹將尋常

敕修

乾隆三十二年丁亥四月己酉

上詣黑龍潭祈雨 吏部議准御史戈濤奏

南城吏目楊錫吾擅留革役除將該員革職

外嗣後各該坊書吏應定限五年為滿另行

募充從之 庚戌

孝端文皇后忌辰遣官祭

昭陵 諭昨楊應琚覆奏辦理緬匪一摺支離

謬妄之處更不能掩今日又據鄂寧奏其欺

飾乖謬情形皆彼實在罪案無可置辯者如

朱崙等以統兵大員並不奮勇勦賊漸次退

回其畏憚不前之罪。皆經朕於萬里外洞燭其情偽。屢行嚴切飭諭。楊應琚前此並未早為叅劾。且據朱崙遣散匪衆一語。妄行飾奏。其摺具在。無從狡飾也。今見朕將朱崙等治罪。轉稱前據稟時。即疑其言未必確實。果如是。則前摺何以不言及。為大臣而如此居心巧詐。尚得謂之稍有天良乎。至所稱差遣民人李自新往東路查探等語。所奏尤為錯謬。探訪賊情。乃軍營要務。自當慎重辦理。楊應

琚所屬。豈無幹練員弁。足供任使。顧令一介小民前往偵探。安能得賊中真實消息。即使其言之鑿鑿。又果足盡信乎。如此措置失宜。更不可解其具何肺腸矣。至鄂寧摺內所稱湯聘懷詐塞責之處。湯聘誠不能無罪。前已降旨將伊交部嚴加議處。但湯聘本屬書生。未諳軍旅用兵之事。朕原不於彼責成。況楊應琚身膺重寄。尚且庸謬若此。於湯聘更無足怪。但楊應琚種種欺罔乖張。湯聘若早如

鄂寧之據實陳奏。朕必嘉其公正。乃竟隱忍不言。是誠何心。其咎固在此而不在彼耳。著再將此宣諭中外知之。諭軍機大臣等。前因閱視河淀情形。見鳳河有斷流之處。於迴鑾駐蹕南苑時。令查勘上源疏濬。以達河流。今據阿里衮等查奏。圈河下游。即為鳳河一畝泉下游。即歸張家灣運河。俱應行開挖深通。已有旨給發帑金。及時修濬矣。但此二河下游。皆係地方官應行經理之事。聞其中亦不無淤淺阻塞。今上游既議修治。而下游若仍聽其淤梗。是尾閘不能暢達。即疏濬水源亦屬無益。著傳諭方觀承。即派委明習妥員。前往查勘。將應行開挑之處。及時興工。務使一律暢流。以資宣洩。仍將勘估情形。據實覆奏。尋奏鳳河自南苑東南閘口起。經大興通州東安武清各境。其自南宮村至大清河口入北淀下游一律深通。南宮村以上。憑水下注泥沙衝入。每易淤墊。一畝泉自南苑東紅

門開口起至張家灣入北運河水盛時未能暢注臣遵旨率同明習工程之員逐段查勘鳳河自閘至南宮村長二萬一千一百二丈內大興境一百八十丈通州境九十五丈武清境七千四百七十三丈無庸挑挖實應挑河身一萬三千三百五十四丈一畝泉自開口起至張家灣運河長六千九百二十七丈河身本窄兼有需裁灣取直之處兩河均應展寬河面五六丈底寬三四丈深五六尺不等現已派員分段興修得旨嘉獎又諭曰鄂寧據實密奏一摺已於摺內批示並發鈔宣諭矣所稱該處春夏瘴發人馬皆不能當兵將畏瘴氣已餒弱之語與朕前降諭旨大意相合目下正當瘴甚之時原不必急於輕進且滇省弁兵因楊應琚等不善調度屢經挫衄衆心多懷怛怯難遽望其奮勵直前早已諭鄂寧暫停進兵俾得養其銳氣俟明瑞到後再行定期進剿鄂寧此時著仍遵前旨

實錄卷一百一十五

四

行至揚寧福靈安等現赴木邦一帶進剿伊等自皆勇於前進此時如有可收復地界功在垂成原不妨應機集事若尚無可乘之勢即不必觸冒瘴熱輕於深入著鄂寧即令伊等暫回內地駐兵統俟明瑞到時籌辦又如所稱綠營惡習非張皇失錯即粉飾虛捏實為深中竅要但此等惡習在將領不在兵丁從前捏飾妄報皆朱崙李時升之故與兵丁無涉若將弁督率有方未始不可勵戎行而作士氣如前此西師之役豆斌閔相師等所領綠旗兵何嘗不奮勇出力効命疆場此尤近事可徵者著將此旨宣諭衆兵俾知奮勉再楊應琚昨日奏到酌籌進剿事宜一摺已如軍機大臣所議令交該撫查辦其原摺所云勸諭土民量借籽糧廣為播種以備軍行購用一節尚屬可行並著該撫悉心籌畫妥協經理至楊應琚屢次所奏加調官兵至一萬四千有餘前據福靈安奏未必實有此數

實錄卷一百一十五

五

已諭令楊寧福靈安查奏恐伊等亦係新到未能得其底裏鄂寧現今暫署總督事務查覈軍營兵數自更易於周悉著即查明確數據實覆奏可將此傳諭知之○又諭昨楊應琚奏秋冬進剿緬匪事宜一摺種種未協已經軍機大臣議駁矣如摺內首請調撥官兵五萬之處全然不知事體從前勘定準夷回部迅奏膚功所需兵力亦未嘗動至數萬楊應琚歷任陝甘豈無聞見而為此悠謬之說

明係其心仍不欲進兵故為張大其詞以見事非易集苟不如數撥給又可藉口於兵力不足非伊退阻不前之咎如此取巧伎倆敢於朕前嘗試其天良不幾喪盡耶至欲約會暹羅夾攻一節更屬荒唐可笑用兵而藉力外藩不但於事無濟且徒為屬國所輕乃斷不可行之事明李資其援助實為恒怯無能豈可引以為據況我朝兵威遠播所向懾服安藉此海外窮荒為王師犄角若將來緬酋

窮蹙竄入暹羅或匿其近境則馳檄索取飭其擒獻如巴達克山之於霍集占獻誠歲功未嘗不可相機籌辦此時固不必豫為計及也摺內惟兵糧一條令各土司乘春廣為播種以備進兵時購用之需其事尚屬可行明瑞到彼與鄂寧悉心熟籌妥辦所有楊應琚原奏及軍機大臣議覆各摺俱著鈔寄閱看可將此傳諭知之○辛亥諭軍機大臣等吏部彙奏甄別教職佐雜摺內各省俱有休致斥革之員獨山東一省止有保題留任並無甄別休革者此等微員人數衆多豈通省皆堪留任竟無一人應行罷斥恐未免心存姑息曲示優容著傳諭崔應階令其據實具奏再東省春夏以來雨澤尚覺稀少現在京師於四月十六日甘霖霑渥近畿各處亦同日均霑未知山東曾否得有透雨麥收大田情形若何並著即速奏聞○又諭曰鄂寧奏自普洱回省一摺內有據華封差探九龍江外

賊匪俱已潛遁之語。最為綠營將弁惡習。緬匪蹤跡。本自無定。現在並未與我兵打仗。致有敗北奔竄情形。不過自行解散。何得遽稱潛遁。虛張聲勢。此皆伊等向來浮偽相沿。恬不知恥。實為可鄙。可憎。著傳諭明瑞。鄂寧等。嗣後奏報軍務。斷不得率據營弁稟詞。以此等語。輒形奏牘。至另單所奏。迤東道甘肅。才非幹練。頗形竭蹶。請另揀一員來滇等語。前已有旨。將該員調補陝西漢興道。所遣迤東

道員缺。即令錢受穀調補。馳驛赴任。著將此

一併傳諭知之。以右春坊庶子嵩貴充日

講起居注官。壬子。

上詣暢春園。問。

皇太后安。諭曰。楊應琚明白回奏。一摺。奏李

時升朱崙畏葸遷延各情節。無不一如朕所

豫降諭旨。此二人之罪。固無可逭。但前此楊

應琚何以並不據實參奏。及至朕洞燭其欺

詐情形。屢降旨詰問。始據將朱崙等參革治

罪。豈欲以事後一劾。遂思掩其前愆耶。又據稱從前種種辦理乖謬。實係病中貽誤。初時朕亦何嘗不鑒諒及此。迨伊病既就痊。而掩飾支離。仍復如故。則又何說之辭。至緬匪前自新街至猛卯渡江。復往木邦滋擾。毫無顧忌。朱崙領兵。不過尾追其後。其沿途耽延。並不肯急為掩擊。賊眾何至奔逃。而摺內尚稱緬匪遁往木邦。此皆綠營將弁惡習。信口謊談。恬然不以為恥。實屬鄙惡不堪。至於蠻蕃

新街。前此已為賊踞。今賊眾散去。我兵仍駐

其地。並非用力攻勦所得。而覲顏謂之克復。

猶得謂有羞惡之心乎。所有楊應琚奏摺。並

著鈔發。俾眾知之。蠲山東永埠場電地一

十八頃。有奇。乾隆三十一年水災額賦。並緩

徵蠲餘銀兩。有差。癸丑。

上御勤政殿聽政。以太僕寺少卿張若蓀為

通政使。以翰林院侍讀阿肅為詹事。甲

寅。浙江巡撫熊學鵬奏。向來各省大計。藩臬

係特簡之員。均不在考覈之內。惟是兩司與督撫最為親近。三載考績。其平日居官如何之處。亦應據實入告。請嗣後遇大計年分。令督撫出具考語。另單進呈。得旨。如所議行。乙卯。

上詣暢春園。問

皇太后安。諭。現在滇省辦理緬匪事務。一切奏報。郵函關係最為緊要。昨鄂寧奏普洱至省。不過千里。所發六百里奏摺文書。亦須五

六日始到等語。此皆各站遞馬臺員經理不善所致。不可不加意整飭。即經過各省。亦當一體稽查。加緊遞送。若非特派大員督辦。無以專責成。而免稽誤。雲南著派夔舒。貴州派良卿。湖南派三寶。湖北派朱珪。河南派佛德。直隸派裴宗錫。將經過各驛站。接遞交送。及沿途催趲事宜。實力查察。董率辦理。如有稽遲舛錯之處。惟專派之員是問。○諭軍機大臣等。明山奏。尚景福等。糾眾借糧。挾制縣官。

一案止將為首二犯。問擬斬決。其同謀糾眾之武肖武應參。則僅擬絞候。且將為從之杜炳等六犯。比照被脅同行例。擬以枷杖完結。實屬輕縱。已經刑部改擬。照議准行矣。此等聚眾行兇之犯。目無法紀。其風斷不可長。非多辦數人。不足以示創懲。明山辦理此案。未免意存姑息。著傳旨申飭。又諭據湯聘等奏。緬匪近日情形。一摺。稱四月尚在瘴癘未甚之時。亟宜上緊進剿。書敏已到普洱。即令

統領續調現到之兵。迅速前進等語。殊非因時籌辦之道。現在邊外瘴氣方甚。已非進兵之期。前經降旨。令鄂寧於驅賊出境後。惟應示以鎮靜。不必輕舉妄動。俟明瑞到後。於秋深剋期大舉。況湯聘等既稱此時九龍江外已無賊匪。而楊應琚所派將弁。亦尚無一人到普洱。徒令士卒冒瘴深入。於事轉屬無裨。鄂寧應仍遵屢次所降諭旨辦理。即已進之兵。若朝夕即可成功者。自不應撤。苟或不然。

亦應徹回。養蓄銳氣。聽候明瑞至期調遣。至摺內稱上年孟良駐兵千兵。瘴故者八百。染病者百餘等語。其說尤不可信。該處瘴氣縱甚。亦何至兵丁染患之多。十損其九。必係將打仗傷亡。及畏葸逃匿者。一併混入染瘴數內。開除。以圖掩飾。此等綠營積慣惡習。所關匪細。尤不可不徹底清查。以期覈實。著傳諭明瑞鄂寧。將此項兵丁傷損緣由。即行確切查明。據實覆奏。○丙辰。諭軍機大臣等。從前節據楊應琚等。繪呈莽匪緬匪等圖。合之前後奏摺內。所開地名。多有圖中所未載。即二圖道里形勢方隅。亦未能悉合。著將原圖發去。交明瑞鄂寧。確覈該地情形。另行總繪一圖。貼說進呈。並將現在情形。自永昌至普洱沿邊一帶。關隘及內地與緬匪莽匪接界處。所並道里遠近。詳晰註明。以便披覽。軍機大臣等議奏。尚書新柱等奏。天津水師營官兵分駐各事宜。一天津駐防兵二千五百名。

除另記檔案及分駐涼州福州廣州外。尚餘八十一名。請一併派往涼州。其涼州額派一千名內。蒙古三百四十三名。請將滿洲兵撥補一百五十三名。再養育兵三百三十三名。除孤單無靠。不能派往三十四名外。計隨家屬往涼州者一百九十二名。福州三十七名。廣州七十名。一移駐各兵。需員彈壓。查天津駐防內。除遵照部議革職十五員外。所有降留一員。革留一員。免議三員。及議革者。尚有七十八員。驗其才力。尚堪驅策。請仍准其留任。彈壓前往。一分派彈壓各員。涼州派滿洲蒙古協領各二員。滿洲蒙古佐領防禦驍騎校各二員。額外驍騎校一員。廣州滿洲協領一員。佐領防禦驍騎校各五員。額外驍騎校二員。再水師營舊設滿洲蒙古筆帖式二員。請作為涼州副都統衙門筆帖式。又由部考取記名筆帖式七員。內派涼州五員。福州廣州各一員。均由分派駐所。按原考名次咨部。

補用。一記名領俸以驍騎校補用之員。請咨送各該處。與彼處記名人員。一體錄用。又議革復甄別之員。應聽其隨同親丁。分派前往。內防禦二格。額楞格二員。俱無親丁。佐領兼騎都尉書魯有子尚幼。該員等隨往。養贍無資。請給養育兵空糧一分。一移駐涼州兵沿途車輛口糧。照從前陸路之例給發。福州廣州兵。若概用車輛。載至臺莊換船。未免滋費。請照臺莊以南用船之例。即自天津下船。

送至臺莊。一移駐兵起程。直隸派天津都統及鎮道沿途照料。至經過地方。請由部行文該省。派員彈壓。一另記檔案。願改綠營兵三百三十四名。請撥直隸督提。及各鎮標營。於馬戰守兵缺出頂補。一營內滋生銀五萬六千五百五兩。覈與原數相符。所有現存本利銀數。請仍交長蘆鹽政生息。內有官兵未完及鋪架估變二項。未能即時完繳。向來山海關兵賞取給於此。請於藩庫酌撥開款。先交

鹽政生息。兵欠令分駐處所。按月餉坐扣。鋪架著落地方官估變。均交藩庫歸款。一滋生銀內有另記檔案准予出旗之兵。未完銀一千五百八十五兩。又現隨分駐革職協領伍靈阿等十四員。未完銀三百八十五兩。無項可扣。請一併豁免。一水師營所遺衙署兵房。請將大沽汛遊擊。並撥兵三百名。移駐其地。以都統署為遊擊衙門。每兵一撥房二間。其把總外委等員。亦酌給官房。城外教場。留為

操演之地。餘房交地方官變價。一營內趕造船八隻。舢板船八隻。原由福建江浙三省造送。請行文該省委員來津。駕送回南。其教習把總內。已滿五年限者三員。請由該省都統咨部辦理。未滿年限一員。仍交本省照例查辦。一官兵既經移駐。向設之理事同知。請改駐天津府城。倉大使一員。裁汰存米歸地方倉貯。一世職官佛爾格圖。銅山年力尚強。請交本旗當差。五十六。曾經出兵。年老失明。請

令回旗仍給半俸。繙譯生六十三。亦令回旗。准其就近應試。其無依之閑散幼弱。難以泳往者。三十四名。令回京歸於各佐領下。挑補養育兵以上各條。均應如所請。又續籌移駐各事宜。一官兵所領綿甲烏鎗。其赴涼州者。應令帶往福州。廣州該處原有軍裝。毋庸給領。請交送兵工二部收貯。一官兵分駐後。議撥綠營弁兵駐劄。庫存火藥火繩。請交天津鎮收貯。一上年長蘆鹽政修理兵房除將息

銀歸款外。不敷銀一萬一千九百餘兩。請將餘房五千餘間。交地方官估變歸款。一涼州福州廣州駐兵起程。請豫給兩月錢糧。咨明移駐各該處查扣。一官兵戶口冊內有刑部發遣為奴之厄魯特三十二名。應令帶往移駐處所。遣犯三名。係黑龍江披甲閑散。請改發保定府駐防一名。滄州駐防二名。以上各條亦應如所請。至滄州駐防向例天津都統兼轄。今水師營已裁。應統歸稽查保定等處

之副都統管束。所有滄州駐防兵五百十五名。應一體撥歸鈴轄從之。吏部議覆廣東巡撫王檢奏。稱臣等遵旨議奏。查廣東巡道六缺。內惠潮嘉高廉雷瓊各道。本有加銜。糧道即駐廣州省城。肇羅道駐肇慶府治。距省亦近。俱毋庸加銜。外惟南韶連道駐韶州府。治與右翼鎮同城。請加兵備銜。應如所請。並咨部鑄給關防從之。丁巳賜在籍尚書沈德潛人夔一觔。戊午諭此次天津接駕人

員據吏兵二部查開履歷案情。朕詳加檢閱。覈其緣事情節。內因考試休致之編修戈岱。檢討周人騏。李臺。鄭岱。鍾陳本敬。並革職編修汪存寬等六員。有情願來京考試者。准其自行來京交軍機大臣考試。再行請旨。至因事休致降革之陳文榜。徐祖燾。董鈞。賈三禮。李鳳集。吳映白。王心銘。張綬佩。郝本茂。賈六奇。莊楠。周元愷。楊起元等十三員。著該部行文調取來京引見。再降諭旨。其不願來者亦

聽 又諭據伊昌阿奏素玉調任西安將軍向荊州協領官員等索取銀兩等情其中即有與伊應行質對之處著交永瑞等將伊昌阿解任派員解送來京與素玉質訊 諭軍機大臣等昨據新柱等奏查辦天津水師營兵丁分駐事宜一摺已交軍機大臣議奏矣此項兵丁內移駐福州廣州二處者向用船隻裝運自可即從水程分起前行其移駐涼州兵丁必須雇備車輛送往現在時值農忙恐防耕作且青苗在地兵丁等結帳住宿亦多未便著傳諭該督將應移涼州一處俟秋田收穫之後再行分起前往其未行以前仍著富當阿雅隆武等在彼暫行經理管束將此傳諭方觀承並新柱等知之 又諭曰李時升朱崙身獲重譴已降旨革職等因業經楊應琚奏報於三月初三初七等日押解起程迄今為時已久何以尚未據鄂寧奏及伊等到省及管押出境日期恐不無任其託故

遷延之弊著傳諭鄂寧如伊等尚在滇省即催令速解進京併諭經過之各督撫於李時升朱崙到境時即派委妥幹員弁協同小心防範即時催趲前行毋使沿途遲滯致有患病及自戕等事可將此傳諭知之 兵部議覆河南巡撫阿思哈奏稱向例馬兵缺出止於弓箭步兵內拔補鎗兵例不與挑伏思火器為行兵制勝之要鎗兵拔補無路似未允協查八旗兵馬上演放鳥鎗最為勁利綠營似可做照演習請將叅將以上各標營馬兵之缺撥出十分之二遇有缺出如步鎗手兼能習馬鎗者准其拔補後令習馬射與弓箭手一例考拔應如所請從之 已未

上詣暢春園問

皇太后安 諭據宗人府奏承襲弘明貝勒一摺內稱例載親王郡王承襲視所生之爵貝勒以下遞降至輔國公等語似親郡王之後必應如例承襲無降封矣朕思諸王爵宜視

其祖有無功績。如簡親王信郡王等王爵。實由乃祖於國家定鼎之初。戮力宣猷。是以寵列勲階。世襲罔替。亦必其子孫勤慎無過。方克承受。若平郡王因慶恒獲罪。朕即降旨。將伊一代暫為貝子。再襲仍依郡王誠。以諸王之祖。著有勲勞。日久不宜泯沒。因降旨。刊列宗室王公功勲表傳。以示列爵。用以酬庸。非謂盡屬天潢。受封之後。遂得與功封王爵。一律承襲也。所引例文不合。著交宗人府。嗣後

奏請王公襲爵摺內。先將此旨繕入具奏。○
蠲江西南昌新建進賢星子建昌德化德安鄱陽餘干等九縣。乾隆三十一年水災。額賦並緩。蠲餘銀兩有差。諮浙江東江等四圍。冊廢灘場三千六百三十七弓有奇。蕩地五千二百畝有奇。額賦。庚申諭曰。張泰開著以禮部尚書專管左都御史事。所有禮部尚書事務。著嵇璜署理。旌表守正捐軀之湖南桂陽縣民何先佑妻孫氏。辛酉諭。前於

乾隆十一年。通行蠲免直省應徵錢糧。曾令各督撫轉飭州縣官。勸諭有田之家。酌減佃戶租糧。使之均霑惠澤。上年春初。朕特沛恩施。降旨。將各省起運漕糧。分年蠲免一週。俾薄海農畝。共叨樂利。在有田業戶。於輪蠲漕米之年。已得倍裕蓋藏。而佃戶等。尚未得一體仰邀贍典。著各省督撫。屆輪蠲年分。通行曉示。勸諭各業戶等。照每畝應蠲漕米數內。亦令佃戶免交一半。務期愷澤均敷。使納糧力穡之人。倉箱並資盈阜。該部遵諭即行。○
戶部議覆閩浙總督署福建巡撫蘇昌疏稱。臺灣府倉。因運到內地捐穀。廩口不敷存貯。請添建一百五十七間。應如所請。從之。○壬戌

上詣暢春園問

皇太后安。諭軍機大臣等。前令視五壩水誌。展拓清口。以資宣洩。使洪湖異漲。不致漫溢。為災。邇年來頗收其效。但啟放固當治於未

然而堵築亦不可不以時消息蓋洪湖上承淮北諸山水易長易落而黃流迅駛歲以為常若湖水暢消以後清口收蓄稍遲則清流易弱勢不足以刷黃恐致倒灌停淤不可不防其流弊著傳諭高晉等嗣後遇應展清口時仍照舊定章程及時妥辦如略覺清流平緩即宜速為收堵勿稍濡滯以符蓄清敵黃之制高晉等務實心經理並將現在清口情形若何勘實奏聞又諭曰高晉等奏審擬

肆竊解京緞紗並官署銀鞘之李子有丁雲等斬決一摺現經刑部覈擬准行矣查李子有等供詞內稱馬得鰲同夥有白美生蘇爾林在豫旺城及靈州渭州城等處窩留匪類出外行竊分贓此等匪徒既係馬得鰲黨羽敢於盤踞連結實屬同惡相濟自應上緊嚴緝重懲吳達善前辦馬得鰲一案時曾否據將該二犯供出有無弋獲審辦之處並未詳悉聲明著傳諭吳達善嚴飭所屬文武員弁

即行密速查拏嚴審定擬以清餘黨毋使聞風遠颺致逃法網可將此傳諭知之旌表守正捐軀之湖南桃源縣民鍾朝選妻張氏癸亥諭上年春特頒恩旨將各省漕糧按年普免一週本年輪屆江蘇省應免蘇太等衛之年漕艘概行停運旗丁等閏月銀米例應扣除第思此次幫船全數減歇出自朕蠲免特恩非若年滿輪減及截漕冰減可比今閏閏既得普裕蓋藏旗丁等亦應一體均沾渥澤著加恩將本年蘇太鎮等衛幫船旗丁閏月錢糧照月糧例減半給予以示體恤該部即遵諭行諭軍機大臣等聞高晉在江省察吏過寬屬員不甚畏懼殊非朕委任之意兩江吏治廢弛尹繼善在任年久未能整頓高晉前為總河時辦事頗知認真年力又未衰是以用為總督乃高晉自蒞任以來於地方事務不過照常辦理從未見有實力整飭之處而於道府大員亦未經稍加甄別至

於審擬段成功一案。附會原叅。其姑息模稜之意。更可概見。頃召見嵇璜詢問及之。據稱該督遇事過於寬緩。屬員畏之。反不若尹繼善等語。與朕所料高晉辦事情形相合。似屬輿論公評。且嵇璜與高晉素無交涉。高晉又非能令人含怨者。何致嵇璜有挾嫌妄奏之事。設嵇璜有心齟齬。又豈能逃朕洞鑒乎。督撫膺封疆重寄。察吏是其專責。向來上和下睦。優容瞻徇之風。最為錮習。將謂高晉必有一番整理。今待之數年。何以反不若尹繼善。大非朕用高晉之意矣。著傳旨申飭。是月。安徽巡撫馮鈐奏。安徽省三四兩月以來。雨水霑足。現在二麥將次熟收。水田即日插秧。糧價平減。沿江一帶。上年被水歉收之處。已飭各該州縣查明無力窮農。照例借給籽種。又宿靈虹泗四州縣被水災民。加賑兩月。俱於三月底放竣。刻下麥收足資接濟。無庸更籌借糶報聞。河南巡撫阿思哈奏。豫省於三

月二十八九及四月初一等日。節次得雨。各屬普霑。惟臨漳湯陰內黃武安林縣密縣商水等邑。得雨二寸。尚未透足。得旨所聞。恐不止此。數縣一切應留心。不可諱災也。

大清高宗法天隆運至誠先覺體元立極敷文奮武孝慈神聖純皇帝實錄卷之七百八十三

大清高宗法天隆運至誠先覺體元立極敷文奮武孝慈神聖純皇帝實錄卷之七百八十四

監修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領事稽察欽奉 上諭事件處管理理部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆三十二年丁亥五月甲子朔諭前因安

省緝獲賊匪究出固原州巨窩馬得鰲盤踞多年分遣夥黨出外肆竊業將首夥各犯擒捕正法示懲並飭嚴緝餘黨以淨根株茲據吳達善奏尚有三十人未經弋獲自應速飭所屬員弁上緊緝拏毋任遠颺漏網至此等積惡巨窩糾蓄賊匪四出行竊地方有司平日豈竟毫無見聞何致鼠輩橫行無忌蔓延各省直待安省犯案始得究出積窩情節該地方官所司何事可見伊等全不以緝盜

安民為務所謂奉行保甲徒屬具文竟容奸匪潛蹤境內漫無覺察不可不示以懲儆除年遠難稽者毋庸追究其馬得鰲等犯案原供內有月日可考者俱著吳達善查明歷任府州各員職名交部分別嚴加議處至該督吳達善前後在甘歷有年所不能留心訪察飭屬躑躅以靖地方亦屬不合著察議又諭曰永瑞奏稱素玉自荊州前往西安私將親隨兵丁帶往新任實屬違例副都統阿爾薩蘭伊昌阿並未攔阻亦屬不合等語昨因伊昌阿有應與素玉對詞審訊之事是以將伊解任來京俟審明時另降諭旨外阿爾薩蘭著交部察議諭軍機大臣等李時升朱崙早經革職拏問迄今已及兩月未據解京前經降旨令鄂寧併沿途之該督撫等速即委員解送何以尚未奏聞著再傳諭鄂寧令其將李時升朱崙自軍營拏問後於何時到永昌又於何時自永昌到省其未出境以前

有無逗遛之處逐一詳悉奏明併傳諭貴州湖南巡撫一俟李時升朱崙遞入該省即一面具奏一面添派幹員小心管押迅速出境毋得任其託故稽遲至有患病自戕等事軍機大臣等議奏兵部尚書管理國子監陸宗楷奏稱下五旗包衣人等自裁去義學讀書應考無階請每旗各設額缺十名附入國子監官學再向設有義學時包衣人等准考繙譯生員文生員中書筆帖式監生等項今

請照滿洲蒙古漢軍之例一體與考又查八旗官學生錢糧係由本旗養育兵項下動撥下五旗包衣佐領下並無養育兵無項可撥增額之後但准應考不必給予錢糧應如所請從之 乙丑

上詣暢春園問

皇太后安 諭軍機大臣等前以永昌邊外春夏瘴甚降旨俟深秋酌量進剿今思本年初秋逢閏節氣自應早涼瘴癘亦易消解若必

拘定秋冬之交始行進兵恐或遇驟寒軍行不無阻礙若稍濡滯又近明年春瘴曠日持久非兵貴神速之道著明瑞前赴永昌時將應行籌辦事宜豫為經理齊全酌看天時涼燠或於九月初即統率勁旅前進迅速進攻可於明瑞奏事之便傳諭知之 以故貝勒弘明子永碩照例襲封貝子 丙寅

考誠仁皇后忌辰遣官祭

景陵 諭曰蔣櫟係大學士蔣溥之子因加恩

擢用至兵部侍郎伊受任以來尚知感恩勤慎今聞溘逝深為憫惻所有應得卹典該部察例具奏伊子原任知州蔣日烜俟服闋之日該部帶領引見 吏部議覆陝甘總督吳達善奏稱臣等遵旨議奏查陝西省道員五缺內潼商道本有加銜糧鹽二道即駐西安省城漢興道駐漢中府治城守兵額無多俱可毋庸加銜外惟延榆綏道駐榆林府治與延綏鎮同城請加兵備銜又雲貴總督楊應

据奏稱查貴州巡道三缺內貴東道本有加
銜糧驛道即駐貴陽省城毋庸加銜外其貴
西道駐威寧州治與威寧鎮同城請加兵備
銜均應如所請並咨部鑄給關防從之調
刑部侍郎周煌為兵部侍郎以服闋刑部侍
郎蔡新為原官丁卯諭據護理貴州巡撫
良卿奏拏獲鈔傳邪教書冊一摺已批交三
法司覈擬速奏矣此案要犯一經地方稟首
該管各官即能全數拏獲辦理尚屬妥速所
請交部議處之處俱著寬免至巡檢黃鎮馳
赴各犯家內搜出逆書尚屬能事著該撫覈
其平日居官如何出具考語送部引見又
諭滿洲蒙古人員內由道府等官丁憂回旗
者與漢員不同漢員丁憂回籍必待二十七
個月服闋始以原官補用滿員則滿百日後
例應行走當差既令在原衙門分別補用即
有俸糈飯銀足資養贍非家居持服者可比
原不應復照漢員一體起復銓補但思伊等

曾任外省於地方事務自較熟練且現在遇
有道府缺出除授需人著吏部將各衙門由
道府服滿改補京職人員查明帶領引見如
有堪勝外任者交軍機處記名俟請旨缺出
開單進呈候朕簡用其服滿同知通判州縣
等官亦著該部帶領引見如果其人仍堪外
用即交部照例銓選又諭今日鑲白旗滿
洲請補無根源公中佐領關泰員缺蒙古補
無根源公中佐領福格員缺看所進家譜伊
等雖俱係無根源公中佐領滿洲關泰佐領
有伊原帶來人丁又管理多次該旗將伊家
之人揀選前列理應如此辦理蒙古福格佐
領雖亦係無根源公中佐領福格之祖喜佛
並非原編佐領之人因初管佐領之孟格絕
嗣始令喜佛管理喜佛管理一輩缺出又令
孟格之弟孟格圖管理孟格圖之子孫管理
數輩又絕嗣始令喜佛之孫管理此如何與
關泰佐領一樣辦理著將福格佐領竟作為

公中佐領照例揀選應授人員帶領引見補授嗣後補授關泰佐領即伊原管佐領人子孫內雖品級不到亦應將伊家之人揀選前列同應放人員一併帶領引見補授著交該旗照此辦理○豁江西南昌縣已墾未熟地一十畝有奇額賦 戊辰

上奉

皇太后幸萬方安和侍膳○諭上年五月間因崔應階奏請將東省民壯概行改習烏鎗一

摺傳諭各督撫酌量該省情形或可做照一律妥辦之處查明覆奏業經各該省陸續奏聞兩江距京師程途初非遼遠而高晉等至今始行奏到計去奉旨時已及一年實屬過於急緩此等並非難辦事件何至稽遲許久若地方諸事皆如此因循吏治尚何由整飭乎高晉馮鈐明德俱著交部察議 諭軍機大臣等喬冲杓奏地方雨水一摺並非實在情形前據該撫阿思哈奏報豫省各屬入夏

以來望澤甚殷設壇祈禱至三月杪四月初始經得雨尚有未能普遍之處經朕降旨詢問目今得雨及成災與否尚未據該撫覆奏朕心方為廕念該鎮既將地方雨澤情形具奏自應據實入告乃稱南陽陳汝信陽等處今春雨暘時若復於四月初一日得雨深透歸德望雨方殷亦於是日得雨三四寸至六七寸不等既與阿思哈所奏各屬前此盼雨之處不同且得雨已遲二麥豈盡能暢茂收

獲亦未必一律可期該鎮率以虛詞粉飾殊屬不合喬冲杓著傳旨申飭 又諭據工部議駁鹽政普福儀徵運河工程覈銷一本此案業經屢次議駁現在又復竟行覈減因思此項工程前係高恒經手當即詳加詢問據稱該處河道雖經築有攔水壩座河底仍屬稀淤是以開報水土至烏塔溝帶子溝河身與原題尺寸不符因係挑挖丈尺不能與舊河形相較只就南北中泓水深尺寸牽算並

非少扣河形等語。該處工程既經實用實銷。何以工部屢行指駁。此必有工部書辦勒索不得之弊。著傳諭普福。如原題內果有應行覈減之處。當時何以浮冒請銷。如係實在並無浮冒。而該部書辦因勒索未遂。故為覈駁。亦不難問之辦理此案之人。著普福即行詳悉查明。據實覆奏。務使水落石出。亦足懲一警百。斷不可謂原辦工程本無侵冒。而部中書辦亦無需索等情。作和事老人之見。以冀

實錄卷七八四

九

顛預了事也。兩江總督高晉奏。本年正月。興挑宿州境內毛城鋪迤下之洪河。符離集一帶支河溝段。並築西流黃壩。二閘子堰。及韓家堂迤下靈壁銅山。睢寧蕭縣境內之望州河。奎河小洪。牛市等河。并峯山閘洩水河道。及安東之民便河。現經各屬次第報竣。臣於河工防汛時。仍往查驗。得旨覽奏俱悉。又奏民辦工程。例應造冊題銷。此次山陽鹽城高郵三州縣挑濬澗河。鹽河南澄子河。三

道均係民間自行經理。董事者不諳工程。則例難以如式造報。查民修工段領項之人。即係還項之人。不必慮其浮冒。即所辦之工。不能盡與例符。或應覈減。亦係伊等自出已貲。毋庸追繳。請免其造冊題銷。得旨如所議行。

己巳

上詣暢春園問

皇太后安。諭曰。楊應琚辦理緬匪一事。種種乖謬。湯聘從前並未奏聞。朕以軍營之事。湯

實錄卷七八四

十

聘或未能深悉。尚可不加深責。僅從寬交部議處。仍將伊調任貴州巡撫。今據明瑞奏到。李時升呈出書札稿本。則李時升於此事前後情形。無一不告知湯聘。李時升係提督大員。一應軍務。皆當隨時入告。固不能因此稍寬其罪。但湯聘既據李時升手札。則於楊應琚債事乖方之處。詳悉備知。竟爾扶同諱飾。匿不上聞。封疆大臣敢於瞻徇朦蔽若此。其心實不可問。湯聘著革職。拏交刑部治罪。所

有貴州巡撫員缺著鄂寶調補即由該處馳驛前赴新任其湖北巡撫印務著定長暫行兼署又諭據阿桂奏伊犁各游牧邊界巡察需人所有參贊員缺請旨簡放伊犁圖原係該處參贊大臣仍著補授原缺諭軍機大臣等本日明瑞奏到事件已於摺內批諭矣同日據揚寧奏稱木邦約有賊匪萬餘我兵未及四千彼此相持等語現在木邦統兵打仗之事自屬揚寧專責至一切調度機宜

非其所長計明瑞此時已抵滇省即當悉心籌辦前曾降旨鄂寧令其於驅賊出界後將沿邊一帶嚴密堵禦其進剿官兵暫行撤回俟秋深厚集兵力再行深入但賊匪現在江內結寨恐我兵一撤彼即尾隨入內侵占地方亦不可不加審慎目下雖瘴氣方盛已非進兵之期但今已屆五月距深秋進兵之期不及半年撤回後仍須調遣往來僕僕亦不免徒滋勞頓况瘴癘非隨地皆有賊衆既在

木邦屯聚或該處瘴癘稍輕如此際機有可乘自不妨添選官兵先將木邦收復剿殺賊匪震以先聲且為將來進兵之地或佯為徵兵誘彼出砦得以出其不意邀截掩殺亦設奇制勝之一法或在彼駐兵無益即撤回以蓄我兵銳氣秋間更調新兵亦無不可俱著明瑞確按該處實在情形熟籌妥辦再覈閱李時升所存書稟稿本內有漢奸勾引賊匪從萬仞關竄入蓋達之語是此次緬匪滋事

皆漢奸暗中勾結此必當先行查辦使謀無所施賊無所恃最為關要乃楊應琚李時升前此並未辦及亦未奏及一語其失機債事病根蓋由於此明瑞到彼可即速留心偵訪嚴密查拏盡法處治務使盡絕根株以杜奸宄可將此傳諭明瑞悉心經理將籌辦各情由即速奏聞又諭曰湯聘已革職拏交刑部治罪其貴州巡撫員缺著鄂寶調補鄂寶未到任之前著良卿暫行署理如湯聘尚在

滇省明瑞等接到此旨。即遴委幹員。速行拏解。如已赴貴州新任。即著良卿將伊鎖拏。派員小心押解送京。毋致疎虞。將此傳諭知之。庚午諭昨降旨。將湯聘革職拏問。其獲罪之由。外間尚未能悉。知因再明白宣示。從前鄂寧奏湯聘懷詐塞責。朕以其本屬書生。不諳軍務。用兵之事。原不於彼責成。即其未將楊應琚乖謬之處。奏聞。或以軍營機要。伊未必備知。故不加罪。深罪。僅將伊交部議處。且念其人尚謹飭。內地事簡之缺。猶可勝任。是以仍調為貴州巡撫。今閱李時升書稿。則辦理緬匪一事。皆經節次告知湯聘。凡楊應琚等舛謬貽誤之處。歷歷可據。使湯聘稍有天良。何忍不據實入告。乃一味代為諱飾。諸事匿不上聞。其居心實不可問。督撫同應封圻重寄。若挾私傾軋。自難逃朕洞鑒。至於事關軍國。目擊督臣如此欺飾乖張。竟若置身局外。並未一語奏及。設使畧具人心。斷不應出

此湯聘本一選懦。恒怯猥瑣無能之人。惟恐稍有舉發。即拂楊應琚之意。因而畏葸緘默。全不知以國事為念。充其伎倆。將何事不可為耶。且使湯聘接據李時升書札時。即隨事陳奏。則楊應琚等欺罔情形。朕得早為深悉。亦可及時籌度。何致任伊等乖方僨事。若此。直俟朕於萬里以外。燭其偽妄。節次指飭。始行水落石出。則湯聘懷私負恩。誤國之罪。又可逭乎。此而不嚴加懲治。何以令各省督撫戒朋比而儆欺飾。但恐外間無識之徒。或疑湯聘本無軍旅之寄。何以與楊應琚一併拏問。不知其朦蔽隱飾之罪。實由自取。可將此宣諭中外。俾眾共知之。又諭曰。范時綬著放湖北巡撫。常鈞不必赴喀什噶爾。即往哈喇沙爾。更換范時綬來京。常鈞即駐哈喇沙爾辦事。諭軍機大臣等。李時升身為提督大員。乃於進剿緬匪一事。畏葸偷安。從未親臨行陣。朱崙虛張欺飾。恒怯不前。均為此案。

罪魁至劉德成從前辦理莽匪已經革職朕加恩復以總兵補用乃庸懦無能並不奮勇出力業俱降旨革職拏交刑部治罪著傳諭河南山西雲南各巡撫及奉天府尹將李時升朱崙劉德成任所及本籍家產貲財速即嚴密查封毋使稍有隱匿寄頓將來伊等妄用軍需應行追賠之處即將此項併入計算又諭昨據明瑞奏到李時升呈出往來書稟稿二本內有永昌府檄緬甸文稿閱之深可駭異緬匪連年侵擾邊界自應加以問罪之師非可僅煩文告設欲責諭大義使之震懾先聲尤當奏聞請旨豈可匿不上聞率行馳檄且傳諭外夷立言亦自有體乃其中有數應歸漢一語實屬舛謬夫對遠人頌述朝廷或稱天朝或稱中國乃一定之理況我國家中外一統即蠻荒亦無不知大清聲教何忽撰此歸漢不經之語妄行宣示悖誕已極即如前此平定準夷回部時如哈薩克巴達

克山未嘗不加傳諭曾有如此荒唐者乎且召散逃往緬甸向彼索取檄內何無一字提及俱不可解而所稱調集精兵五十萬大礮千尊等語既張大虛詞不成事體至稱揚大學士威德之語尤為恬不知恥永昌府知府何人率意妄行乃爾必係楊應琚授意所致但檄文出自誰手及差何人持往緬甸緬甸又如何回覆並楊應琚如何不先行入告之處俱著明瑞逐一確查覆奏將此傳諭知之

又諭曰鄂寶已調補貴州巡撫令其馳驛前赴新任矣現在滇省辦理緬匪一案俟明瑞到後酌量剋期大舉貴州與雲南隣近一應軍需事宜俱有交涉之處因鄂寶前曾派往新疆辦事烏什用兵時伊亦曾隨行軍務尚所諳悉是以將伊調任著傳諭鄂寶如遇官兵過黔以及調撥該省兵馬並文報往來諸事務宜悉心經理實力承辦毋得稍有遲延貽誤以副委任並將此傳諭明瑞知之

軍機大臣等議奏。昨遣往滇省健銳營兵五百名。請照乾隆十九年遣往西路官兵之例。大臣官員等給俸二年前鋒護軍等賞銀四十兩。官兵跟役各賞給皮襖價。鎗箭軍器。除伊等自有隨帶外。武備院支給棉甲五百件。所有遣往之兵。分為十起。每起五十名。隔二日起程一起。每起派營總參領一員帶領。護軍統領觀音保百日服滿。即令其帶未起兵前進。一路驛馬車輛。行文經過各該省遵照

妥辦。從之。以左都御史嵇璜禮部尚書張泰開對調。旌表守正捐軀之山西平陸縣民姜狗饒妻車氏。辛未。

上御勤政殿聽政。諭曰。國柱原係健銳營翼長。著派領健銳營頭隊兵前往滇省。到彼俟有總兵缺出奏補。其未得缺以前。即著以總兵銜帶兵。定文武各官雨衣品級。禮器館總裁于敏中等奏。恭查御用雨衣雨帽。用明黃色一品大臣以上。及御前行走侍衛各省

巡撫用大紅色。文三品。武二品。祇用大紅雨帽。至三品以下官員及跟役人等。亦用區別。以辨等威。今擬文武三品皆准用大紅雨帽。四品五品六品用紅頂黑邊。七品八品九品及有頂帶人員。用黑頂紅邊。交禮器館增入官服圖。並入會典。知照禮部通行在京各衙門及直省文武一體遵照。再內廷行走之員。向不論品級。俱戴大紅雨帽。仍應照例得旨所奏。是應照此辦理。以大理寺少卿傅為

訥。為宗人府府丞。以通政司副使陳兆崙為太僕寺卿。壬申。

上詣暢春園問

皇太后安。諭曰。劉綸現已到京。陳宏謀不必署理吏部。著管理工部事務。託恩多無庸兼管工部。又諭。節年以來。屢經降旨。准令旗丁在通變賣餘米。以資日用。現在各該省漕艘陸續抵通。於兌足正供後。旗丁餘多米石。如有情願出售者。仍著加恩准其在通州糶

賣旗丁等既屬便宜。而地方糧石。益加充裕。於民食更有裨益。該部遵諭速行。諭軍機大臣等。據阿爾泰覆奏。禁止各省民人赴川一摺。內稱。川省荒地。業經認墾無餘。嗣後各省民人。藉詞赴川墾地者。不必給票。並轉飭沿途關津。查無照票者。即行阻回等語。所奏尚於事理未協。前因岳鍾璜奏。外省民人入川。往往習為匪類。應請設法稽覈。曾降旨。阿爾泰令其詳酌經理。特為地方剔除囑匪起見。初非為各省民人強分畛域。多方防禁。徒滋紛擾也。況此等無業貧民。轉徙往來。不過以川省地廣糧多。為自求口食之計。使該省果無餘田可耕。難以自贍。勢將不禁而自止。若該處糧價平減。力作有資。則生計所趨。又豈能概行阻絕。且隣近該地之湖廣江西等省。均屬朝廷子民。撫綏本無異視。即如口外各處。向來直隸山東等屬貧民。前往墾荒餬口者。亦難盡行驅逐。又何論蜀中腹地耶。倘

此等民人入川。或有滋事為匪。致為鄉里之害。即按罪嚴懲。以儆其餘。亦督撫等分所應辦。又何事鯁鯁過慮。立定章程。轉使胥吏等乘間苛求。徒滋紛擾。否則有名無實耶。阿爾泰奏定關隘查盤。給票驗放。及咨移各省曉示民人之處。不必行。將此傳諭該督及各該督撫知之。癸酉諭軍機大臣等。據湯聘奏。到運送糧石一摺。內稱。若俟進兵之日。再行滾運。誠恐不敷接濟。現在運至附近九龍江之茨通地方。委員駐劄收管等語。軍行糧石所關綦重。固應先事豫籌。但此時大兵未集。茨通地面。又與邊界毗連。若防範稍有不周。轉為首黨。覬覦潛謀。掠竊或致藉寇兵而齎盜糧。不可不慎。重籌畫。以防意外。著傳諭明瑞鄂寧等。酌量該地情形。應於何處可以存貯。並沿途加謹護送。於軍儲庶無貽誤。再。昨明瑞奏到李時升呈出書稿。內有李時升札稱。遊擊班第不知下落之語。而楊應琚回札

即以班第未便作為陣亡。止可作為受傷身故。又謂班第身故。外間多有所聞。若作為傷亡冒賞。恐有後慮。或以病故聲報。庶為妥協等語。是班第之存亡。現在尚無著落。使其臨陣逃亡。即須嚴究重懲。用申軍律。若果係効命捐軀。自應奏請賞卹。以酬忠蓋。乃楊應琚往返商同。僅欲以病故聲報。顛預了事。實不知其是何居心。明瑞到滇後。即將該遊擊班第實在蹤跡。悉心詳訪覈實具奏。以左春

坊庶子觀光。充日講起居注官。甲戌。直隸按察使裴宗錫奏滇省軍報。由直隸磁州入境。共計抵京一十九站。各站相距。自五十里至六七十里不等。一馬奔馳。恐形竭蹶。請於上下驛適中地方。添設腰站。即於本驛內撥馬十餘匹。夫十數名。一遇遞到。立即更換轉遞前進。再馬遞公文。向止一夫一馬。今每站撥馬二匹。夫二名。一人齎馳。一人隨送。倘遇馬驚人病等事。其隨行者。即可接取馳遞。至

於經由各驛。有在城內者。令每夜豫撥夫馬。於城外關廂安設。隨到隨遞。以事關軍務。業經詳明督臣。通行飭辦。得旨嘉獎。乙亥。諭滇省綠營兵。甚屬輟懦。著將健銳火器營兵內酌量再揀派二千名發往。所有應給分例。俱照前派一千名辦理。速令起程。又諭。昨吏部帶領引見之滿吉善。係滿保之子。乃又名滿吉善。似竟以滿為姓矣。伊本係覺羅。何必學漢人更立姓氏。著即名吉善。並交宗人

府王公等查宗室內有似此者。一律更改。定發遣烟瘴人犯例。刑部奏。例載極邊充軍者。發四千里烟瘴充軍。亦四千里。如無烟瘴地方。以極邊為烟瘴。查烟瘴地方。祇有廣東。廣西。雲南。貴州。四省。因例以四千里為限。是以該四省遇有遣犯。皆聲明不足四千里。改發極邊。嗣經乾隆二十八年議。准應發烟瘴人犯。不必拘泥里數。均於隔遠本籍之烟瘴省分。互相遞發。此專指廣東等四省而言。其

隣近烟瘴之湖南福建四川亦係不足四千里應一體更正烟瘴充軍原係去死一間之犯與問擬極邊者輕重有別若拘泥里數改發極邊是轉減輕一等且所謂極邊者不過扣足四千里而止湖南福建四川編發極邊多係江西南山西等省是使應發烟瘴之人轉得徙居善地於律義未合請嗣後凡係烟瘴人犯無論四千里內外總於有烟瘴省分安置將不足四千里改發極邊之例停止得旨

此奏是著照所請行○陝甘總督吳達善奏臣至哈密據巴里坤鎮將德昌面呈穆壘守備劉生芝原稟內稱本年三月十四日西葛根戶民任大俊在本堡見一達子向彼說話因不解其語伊即擲一木牌而去旋告知戶頭王世雄將木牌持送該備該備即赴東吉爾瑪交塔爾灣營守備敦柱閱看復親赴西葛根一帶踏勘蹤跡復有戶民牛天成稟稱前次所見達子又於本堡南山口遞一木牌

隨知會敦柱馳赴山內查看並無影響至四月十九日戶民等見達子又來哄引入堡即帶往敦柱處詢係噶勒丹多爾濟戶下達子名伊什特格因想投誠所以遞此牌子敦柱隨帶兵五名至西葛根復留四名止帶兵史大朋戶民朱唐牛天成前往至晚未回次日牛天成出山言敦守備並跟隨人俱經被戕臣當即令德昌親赴穆壘查明確情稟報德昌到彼將戶頭王世雄等訊供據稱四月有

戶民朱唐畧曉蒙古話將此達子引令入堡適戶民牛天成帶同伊妻來看伊妻一見達子即哭認為親戚當晚留住隨將達子送往敦柱處訊問敦柱帶兵一名戶民二人同達子入山不知如何被害復訊牛天成據供敦柱是晚即住於達子帳房次日牛天成出外與達子找尋馬匹回來見敦守備並朱唐俱已被殺正將史大朋用小刀按戳見伊即加綁縛因掙脫得以逃出臣思牛天成之妻與

此賊認為親戚留住敦柱帶同兵民四人入山何以三人被害牛天成獨得掙脫是敦柱被害情由牛天成夫婦未必不知實為此案要犯是應嚴究現飭該鎮於穆壘一帶搜緝務獲毋致踈脫並咨安西提督於沿山一帶協緝報聞 丙子

上詣暢春園問

皇太后安 遣官祭

關帝廟 諭前經降旨令各省提鎮照藩臬

之例三年奏請陞見一次如未允准仍於次年具摺請旨此指曾經陞見者而言今顧鉉自補授總兵以來未經陞見雖於到任之初奏請一次其時並未允准該鎮仍當於次年專摺請旨何得率照已經陞見人員之例復越三年始行續奏殊屬不合顧鉉著交部議處嗣後各提鎮有似此逾期者並著該部查明叅奏又諭現續派京兵二千名前往雲南令觀音保為領隊大臣帶兵之員仍屬不

敷著護軍統領扎拉豐阿熱河副都統額勒登額並為領隊大臣其熱河副都統即著新柱署理更換額勒登額來京帶兵迅往諭軍機大臣等據揚寧等奏稱四月十七日夜賊寨施放鎗礮不絕我兵相持至曉賊勢甚衆臣等調集各營官兵盡力決戰詎右翼各營弁兵散亂賊遂趁勢侵擾所餘兵丁俱由山梁退避賊分兩翼將營盤圍住臣等聚集散兵退至龍陵拒守請將臣等嚴加治罪等語緬酋等敢於滋擾邊境抗拒王師皆由前此楊應琚等毫無調度所致揚寧等甫至軍營未及二旬且現在大軍未集賊兵乘隙跳梁楊寧等原未可深罪至軍內所列逃兵二百四十餘名伊等臨陣畏葸望風遠颺情罪甚為可惡我朝軍紀嚴明人知奮勇自効從未有見敵潛逃毫無顧忌至於若此之甚者此等皆軍律國法所不容著交與明瑞鄂寧逐一查明嚴行緝獲即正顯戮以昭炯戒其

右營官兵因何遽行散亂。領兵員弁俱係何人。俱應一併查辦嚴懲。但此時明瑞等方經到滇。應辦重務甚多。且不必倉皇急辦。總於進兵以前。詳悉查明。分別情節。俾正其罪。以示軍紀。看來滇省綠營兵丁。積習選輟不堪。實難望其奮勉出力。現在續撥滿兵二千。分次前往。合前次共有三千。此外綠旗之兵。尚需若干。即於四川貴州兩省內。就近酌量調用。不必更用滇省之兵。以收實濟。須於進兵

九月以前到永昌。方不誤事。明瑞可一面辦理。一面奏聞。再揚寧奏稱至遮放地方。所有運糧文員及帶兵防守之守備陳謨等。俱已散去。此等文武員弁。非兵丁等可比。情罪尤為重大。著交與明瑞等一體嚴行查辦。所有揚寧摺併單並鈔寄閱看。速行覆奏。又諭前據明瑞奏到李時升呈出書稿。并員弁各稟二冊。內有應交明瑞查辦者十餘條。已分別簽出鈔寄。但明瑞此時甫經抵滇。一切軍

營重務。皆須亟為經理。所有寄查各件。量其事情緊要。或易於體察者。即行隨時查辦覆奏。如有端緒紛歧。一時未能得實。而事又可緩者。竟不妨從容訪查。毋庸刻日速辦。以分心力。轉致貽誤正務。至此內羅源浩稟稱阿瓦招贅之李萬全。先年曾與吳尚賢合夥。後投木梳夷兵燒搶耿馬。皆其指使。又據烏勒登額稟稱。差往緬甸探事之寸存福。寸盈科等。俱係騰越等處民人。各等語。此等內地民

人。出入邊境。率非安民之人。顧其中良莠不同。亦有難於概視之為漢奸者。如其人實係心懷叵測。為緬首探聽軍情。潛通信息。甚至為賊衆前導。滋擾邊疆。其罪實無可逭。此即加之寸磔。予以族誅。亦所應得。若軍營偵探所資。原在兼詢博採。設非曾經往來賊寨之人。何由得其端緒。若因懲創漢奸起見。一切痛加屏斥。是欲廣見聞而先蔽其耳目。於事理殊為未合。明瑞到彼。遇有實在作奸不軌

之徒。即嚴緝重懲。毋稍姑息。但此時不得過涉張皇。一切急為搜捕。使邊民望風疑畏。因而裹足不前。以致外情壅遏也。前鄂寧奏。楊應琚辦理緬匪一事。係龔士樸趙宏榜從中慫恿。曾經降旨。令將龔士樸果否實有可惡情節。即行查覆。今閱李時升書稟內。永昌府知府陳大呂亦多密稟事宜之處。伊等皆近邊府治。賊匪情形。自當悉心偵探。况奉上司派委。豈有抗不遵辦之理。今以楊應琚負恩誤國。種種乖方。自嬰重罪。是以龔士樸等所有從前體訪事宜。終歸無濟。設使楊應琚果能經理妥協。克奏膚功。則伊等節次稟陳。可謂有功無過。方當加之獎賞。以明激勸。豈可轉為責備。如趙宏榜先因輕進被劾。朕尚以輕進猶屬勇往。未即重治其罪。直至查明趙宏榜新街挫衄。即行逃回鐵壁關內。明係畏葸失機。始降旨革職等因。若無識之徒。以知府偏裨等。為該督密陳賊情。妄謂啟釁滋事。

此與井蛙之見何異。從前緬匪潛擾土司邊境。吳達善劉藻等既已養癰貽患於前。迨楊應琚到滇接任。奏請乘機辦理。其事原屬應行。朕何嘗不為許可。特其後措置全無。甚欲以欺朦了事。遂致自干大戾。是楊應琚罪案實在此。而不在彼也。再遊擊班第是否陣亡。已降旨諭明瑞等查明具奏。此外尚有守備江紀一員。據楊應琚與李時升書內有該員不知下落。若遽作陣亡。恐冒濫賞卹之語。江紀如係臨陣逃亡。自應嚴究。以申軍律。若確係効命疆場。亦當奏請賞卹。用勵戎行。並著明瑞一併詳加查訪。據實奏聞。又諭據刑部議覆阿爾泰定擬擲石擊打台布為首之番子扎什衮固木布楚克。應如所擬斬決。為從之索諾木扎什九人。絞決。朕已降旨將為首者立斬梟示。為從者免死。發極邊烟瘴安置。將此傳諭阿爾泰。並令傳集扎雅克喀薩頂呼圖克圖等。諭以番子擲石擊打台布。伊

等不即將動手之人。拏送總督處治罪。必俟大臣等帶兵前往。始行獻出。甚屬非是。本應一併治罪。姑念伊等係庸愚喇嘛。加恩寬免。伊等嗣後務將屬下番子。嚴加約束。倘復有滋事之處。必將伊等一併治罪。以總兵銜帶兵。國柱補雲南楚姚鎮總兵。○丁丑諭。近因緬匪滋擾。緣邊土司司事者。調度失宜。現在豫籌進剿。一切軍行儲峙。雖絲毫不累民間。但大兵所過。物價易致翔涌。而糧運轉輸。亦不無消資民力。從前平定準夷回部時。陝甘各省。俱經節次緩徵蠲賦。今滇省軍務方殷。宜特沛殊恩。以示體恤。所有該省本年應徵地丁錢糧。其大兵經過之地。及永昌騰越普洱三府州。著全行蠲免。其非經過地方。亦著蠲免十分之五。俾得一體沾恩。於邊陲生計。更為饒裕。該督撫等。其飭屬實力奉行。無任吏胥侵漁中飽。副朕嘉惠邊氓至意。該部遵諭速行。諭軍機大臣等。雲南現在進剿

緬匪。軍行馬匹最關緊要。應豫為籌畫。以應急需。四川廣西兩省地方接壤滇南。協濟較為便捷。著該督等悉心部署。就營驛馬匹內妥協抽撥。能得膽壯堪用者。每省多則三千。少則二千。匹一面解交滇省應用。四川現有調用之兵馬。匹即可隨便酌量帶往。其粵西馬匹。可遴委妥員押赴。務令先時豫備。毋誤秋間進剿之期。將此傳諭阿爾泰李侍堯。並宋邦綏知之。李侍堯著即速往廣西辦理此事。又諭。昨因揚寧奏木邦勦賊時。右翼兵丁有望風散亂及臨陣逃避者。恐滇兵恒怯。選輟已久。難望其奮勉自勵。業經降旨調取四川貴州兩省兵丁前往協濟。不必再用滇省之兵。今思此等倡亂脫逃之人。固罪無可逭。但不可因此敗類。遂概及他人。况滇兵自調派以來。隨歷行間。辛勤日久。未嘗不望奮志立功。伊等具有天良。豈盡不堪驅策。總由楊應琚前此經理不善。糧餉屢缺。致令枵

腹從征。而軍營各將弁。漫無紀律。又致挫其銳氣。是其罪不在兵丁。而在將領。且綠營兵衆原不乏精練可用之人。如果統率有方。亦能鼓勇建績。即如前此平定西陲。綠營兵多有效力行間。勇往得功者。可見督率得人。則兵為將用。若因木邦一事。將滇兵概行擯棄。使伊等有志未酬。亦非所以示體恤。今命明瑞前往總督軍務。其提督總兵諸大員。亦皆另行簡用。將來措置自合機宜。兵丁等當無不共知敵愾。以期奏膚功而膺懋賞。其各省提鎮隨標之兵。調度得宜。原可資臂指之用。而分防隘口等事。本處兵丁。於彼地情形。更為熟習。戍守亦屬有裨。著傳諭明瑞。一面將應調貴州四川之兵。酌定名數。飛咨辦理外。其現在滇兵。仍著選錄取用。並將此旨宣諭各兵。俾知感激自新。以圖後效。至應調黔蜀之兵若干。仍留本省之兵若干。即著速行奏聞。○又諭。辦理緬匪一事。現在添派滿兵前

往。並令明瑞酌量於四川貴州兩省調撥綠旗弁兵。應用軍行糧石。所關綦重。不可不先事籌辦。以裕兵食。昨據楊寧等奏。軍營米石不敷時有缺乏之處。而李時升呈出書稟稿。本內亦有軍營缺糧數日。及運糧夫役往往不敷應用之語。皆由楊應琚前此辦理不善所致。現距進兵之期。不過數月。及此時早為調度。臨時自不致周章。其應如何設法。或酌籌協濟採買。務使儲備充盈。源源不匱。並量度該處情形。應於何處分地存貯。陸續轉輸。以及運赴軍前。沿途夫役更番輓送之處。著交與鄂寧。即速悉心酌議。妥協經理。總期無誤軍儲。足資接濟。仍將辦理情形。一面知會明瑞。一面奏聞。再。楊寧奏。由暮董前至遮放。所有辦理運糧文職官。皆已散去等語。官員管運糧石。責成甚重。自當加謹防護。性命以之。况伊等平日受朝廷爵祿。豈可不明大義。乃竟畏賊潛逃。將兵糧任意委棄。情罪深為

可惡。揆之軍律。斷難姑貸。著鄂寧作速查明。棄糧逃避之員。嚴行緝獲。會同該督。即於軍前正法示衆。以昭炯戒。並將此諭。令明瑞知之。戊寅。諭。現在雲南進剿緬匪。所有直隸河南湖北湖南貴州雲南各省。地當孔道之驛站。弁兵經過。文報往來。均關緊要。著將各處站馬。即行確查。或從前曾議裁減。現在仍復舊額。或向未議裁。而原額不敷。應行酌量抽撥加增。其如何覈定章程。俾長途得資接濟。裨益軍行之處。著軍機大臣會同該部詳悉查明。定議速奏。尋議直隸通雲南孔道十七站。現馬一千八百二匹。向未議裁。各站百有餘匹。足敷應用。毋庸抽撥。河南經行十八站。現馬一千六百二十一匹。裁過九百。應暫復二百。每站各設百匹。湖北經行十站。現馬七百五十七匹。裁過六百。應暫復一百。每站設八十餘匹。湖南經行十八站。現馬八百一十二匹。裁過三百。應於舊額全復外。再增四

軍機處手摺

奉

十

奏從之

軍機處手摺

奉

十

百每站設八十餘匹。貴州經行二十三站。現馬一千一百六十匹。不敷應用。應另增七百。每站設八十餘匹。雲南境首站至省城十站。現馬三百三十六匹。應另增五百。每站設八十餘匹。行知各該省。遵照添設。其自雲南省城至永昌等處。向無驛站。現值軍興。所有添設軍臺馬匹之處。令該督撫酌量情形。妥協辦理。以上復額撥增。共馬二千二百匹。俟軍務告竣。應如何裁汰。至時令該督撫查明具

大清高宗法天隆運至誠先覺體元立極敷文
奮武孝慈神聖純皇帝實錄卷之七百八十四

實錄卷之七百八十四

七

大清高宗法天隆運至誠先覺體元立極敷文
奮武孝慈神聖純皇帝實錄卷之七百八十五

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部主事事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆三十二年丁亥五月己卯

上詣暢春園問

皇太后安。諭曰。期成額現在出差。所有兵部
侍郎事務。著珠魯訥暫行署理。庚辰。諭昨
因滇省緣邊一帶。官兵進剿緬匪。已降旨將
該省本年地丁錢糧。分別蠲免。因念近邊各
該土司地方。毗連外夷。自莽匪滋事以來。伊
等均能奉公効力。宜一體加恩。俾資生計。所
有該土司等應徵本年糧銀。普行蠲免。以示
體恤。該部遵諭速行。軍機大臣等議奏。查

三月內派出前往雲南之健銳營兵五百名。分作十起。間日行走。每起五十名。於五月初一日。業已全行。續派五百名。亦照前分起。計至六月十五日。始可全行。今又添派健銳營兵五百。火器營兵一千五百。共二千名。若仍前五十名一起。到軍前未免太遲。查前續派之五百名。頭起二起。於本月十七二十等日。起程。業經派定。仍按五十名之數行走。其餘四百名。應併為百名一起。計至六月初三日。

即可全行。至添派之二千名。併為二百名一起。頭起。令於六月初六日起行。計至七月初三日。即可全行。約八月初間。先後所派。可悉抵永昌。所有經過直隸河南二省。驛道寬濶。車馬供頓。自可照例給發。其湖廣貴州等省。多係山路。或支架帳房。搭蓋草棚。皆可住宿。食物隨路可買。無庸過事周章。當即行文沿途督撫。及前派出專辦之藩臬各員。遵照妥速辦理。從之。○河東河道總督李清時奏。准

撫臣來咨天津水師營滿兵。移駐閩廣。分作六起。於五月初六日。由運河南下。計兵船抵東。正值江廣糧艘輓運之時。開流較弱。雖有南旺馬場蜀山等湖。節節輸灌。而各閘仍須上啟下閉。將來兵船抵閘。未便一律啟放。以致有礙糧艘。現飭酌量各開水勢。將六起兵船。分作兩塘。先後相機啟放。於糧運無礙。而兵船行走。亦不致濡滯。報聞。○又奏豫省黃河北岸陽武一帶隄工。土性鬆浮。查武陟汎

之丁家庵河岸。經河水漫灘。刷成窪形四道。僅高大河水面七八寸。及一尺三四寸不等。河水稍長。即由此漫入。今將各道窪地。離河三四十丈。修築土格各一道。內有窪形較寬者。多築一二道。均與灘面相平。兩面密釘柳樁。並用柳枝編紮成笆。以攔土格。共計修築土格八道。現在一律工竣。將來土格之內。漸次淤平。於隄岸益臻穩固。得旨嘉獎。○辛巳諭據護理貴州巡撫良卿奏。署永寧州知

州王讌縱役裁賊誣良為盜請旨革審該管知府珠隆阿既漫無覺察迨事主控府又不親提查訊請交部議處等語王讌著革職交該撫將案內有名人犯一併嚴審究擬具奏珠隆阿著交部議處○江南河道總督李宏奏本年挑汛高堰誌樁節次長水四尺二寸五滾壩高出水面四尺以上清口口門上年留寬二十丈覈計現存湖水尚未屆啟拆清口定誌但目今上游淮水節次報長應豫為宣洩之計現拆東壩六丈連舊存口門共寬二十六丈以資暢注再宿遷駱馬湖尾閘五壩每年於重運過後次第開放使湖水由永濟河流入六塘河東注歸海今歲糧艘於四月二十九日業經全數渡黃而駱馬湖下游六塘河一帶兩岸灘地民田尚未收割應俟二麥收竣再行開放報聞○壬午諭軍機大臣等鄂寧奏揚寧等退兵情形請旨治罪一摺已於摺內批諭揚寧等前抵軍營甫及半

月因該處兵丁素無紀律又缺軍糧以致一時力不能支然尚能直前打仗退保龍陵其去李時升朱崙等之畏葸誤事者迥不相同設使伊等統兵已久因循挫衄必將重治其罪又安能復邀矜宥以觀後效耶朕於諸臣功罪一秉至公本無成見於伊等情節所在權衡審度不肯使有一毫畸輕畸重之處該撫當亦知之甚悉至遺失軍裝等項即應賠補亦當於辦理不善之楊應琚等名下著追方為平允又摺內所稱若調兵黔省事涉張皇之語殊於現在事理情形未協前以緬匪尚未擾及邊陲伊等蠻觸公廩原自不值一辦今既鴟張恣肆抗我顏行則天朝聲罪致討出於勢不容已安得拘泥張皇之名一任其跳梁無忌耶至調兵一節除由京派往健銳營兵三千外復降旨隣近之貴州四川等省督撫酌量調撥并籌辦馬匹應用現在約計明瑞已將到軍營距進兵日期不遠各處

兵丁馬匹。此時即應陸續催趨會集。以備臨時進剿。弗致遲誤。著將此傳諭明瑞鄂寧知之。○補行福建省乾隆三十一年大計。不謹官一員。才力不及官三員。年老官四員。有疾官二員。分別處分如例。○癸未。

上詣暢春園。問

皇太后安。○諭軍機大臣等。據彰寶奏查閱營伍情形一摺。請將年久技藝稍次之馬兵。降補步兵。遺缺即於步兵內挑選陞補等語。所

辦自屬允協。馬兵當以勇壯精嫺為上。若年力既已就衰。即不復能勝騎射。設仍姑容濫廁。其何以收實用。轉使年壯技優之步卒。拔補無由。亦非所以示鼓勵。自當照晉省辦理之法。甄別精詳。用資覈實。著傳諭各省督撫於各省營伍內。察馬兵之衰憊生疎者。降為步兵。其糧缺即於步兵中。選擇年力强壯。技藝出眾者充補。不必拘十分挑二成例。於營制更有裨益。著於伊等奏事之便。傳諭知之。

○旌表守正捐軀之河南魯山縣民晏仁妻王氏。○甲申。諭軍機大臣等。今日新選江西南康府知府裴志濂。請訓召見。看來不過一謹飭之人。詢問所及。奏對亦不甚明晰。伊原係刑部分別以簡缺知府選用之員。其才具恐難勝表率之任。著傳諭吳紹詩於該員到任後。留心察看。如果不能稱職。即行據實具奏。毋得稍有姑容。致滋貽誤。○蠲江蘇丹徒縣。坍江田一十四頃有奇。乾隆三十年積欠

額賦。○乙酉。

上詣暢春園。問

皇太后安。○諭軍機大臣等。阿思哈奏查封李時升原籍貲財。據伊兄李時乘供稱。李時升作官年久。從無寄贈銀錢。母老多病。亦不顧養等語。是李時升之平素不孝不友。天良盡喪。洵為天理國法所難容。所有伊另置魯山縣房屋地畝。並借給各項銀兩。應即嚴追入官。至其母兄等向來既並不得李時升贍養。

惟藉祖遺房地什物。以棲身餬口。若因伊子獲罪。致失自給之資。其情轉覺可憫。著加恩。仍行賞伊母兄毋庸一併查辦。可將此傳諭阿思哈知之。○又諭前揚寧奏。伊等在木邦打仗。因右翼兵散。退避龍陵一摺。業經詳悉傳諭明瑞矣。今接據明瑞奏到摺內。有揚寧等縱不能據守木邦。何不於宛頂等處要隘地方屯駐之語。揚寧甫抵軍營。正值前人辦理不善之後。該處兵丁。素無紀律。而軍糧又復不足。覈其情事。原未可與從前在軍日久有心玩誤者。相提並論。明瑞到彼。自當度勢準情。可毋庸深為苛責。但今日審訊李時升。據供內有前此打仗時。我兵火藥被炸之語。軍行約束嚴明。最關緊要。乃任情疎懈。至以擊賊之火藥。轉致自轟。此復成何軍律。現在挑派健銳各營官兵。俱係向經練習。可資倚任之人。將來凡有一切遣派調用之處。即將此等諳練可信人員。令其於緊要事件。俱悉

心經理。以收實效。母仍任綠營將弁。因循積習。稍致貽誤。可將此傳諭知之。○以故科爾沁達爾漢烏爾圖納蘇圖子巴哩瑪特。故蘇尼特扎薩克多羅郡王車凌衮布子阿爾達什第。均襲爵。○丙戌。孝恭仁皇后忌辰。遣官祭

景陵。○

上詣暢春園。問

皇太后安。○還宮。○諭滇省辦理緬匪一事。楊

應琚挾詐乖張。提鎮等復退却貽誤。屢經明降諭旨。其尤足寒心者。彼此一味欺朦。而於軍中弁兵功罪。一切置之膜外。若不明白曉示。何以作士氣而振戎行。昨覽李時升呈出札稿。內有遊擊班第守備江紀。不知下落。而楊應琚並不查明具奏。遽謂班第等未便作為陣亡。止可作為受傷身故等語。咨商李時升。及廷訊李時升。亦有用兵以來。不乏陣亡將士之供。此等將士。皆心知大義。捐軀報國。

使其一登奏牘。朕必優加軫卹。楊應琚竟甘昧天良。使忠蓋之氣鬱而莫訴。於天理國法。尚可容乎。朕撫馭臣民。賞功罰罪。不使稍有失當。而於軍律尤為慎重。嚮者西師之役。刑賞勸懲。不遺纖悉。天下莫不共見共聞。此等隨營士卒。日久未回者。其中脫有臨陣潛逃之事。固當嚴行究緝。俾正明章。若其効力疆場。致命遂志。而統軍大員。竟爾視同草菅。不得一與錄功之典。將復何以用人。何以集事。

著明瑞鄂寧將歷次打仗之陣亡官弁兵丁。詳悉查明。奏請卹賞。以昭激勸。其有雖非陣亡。而迷失不歸。及染瘴身故者。亦屬以死勤事之人。著一併查奏。候朕酌量加恩。用昭軍紀。將此通諭中外知之。○諭軍機大臣等。前以本年七月逢閏。入秋節氣早涼。瘴癘自當消解。曾傳諭明瑞。九月間如可進兵。即當豫為籌備。近因李時升。朱崙。到京勸訊。因便詳詢解員蕭日章等。據稱邊外節候。惟十月至

三月。此五月內可以進兵。其自四月至九月。則係瘴氣方上等語。伊等在邊日久。風土自必周知。況時令不齊。原非萬里外所能懸度。可寄知明瑞。令其隨時審度。如果秋深瘴癘全清。固不妨乘時進發。倘餘氣未淨。即靜俟初冬。亦不為遲滯。況量度瘴氣情形。其最重者。大率界乎內外之交。若深入緬酋聚落。其勢必不如緣邊之甚。自可就冬春五月之間。剋期奏績。固毋庸拘泥前旨。使弁兵觸瘴前

行。致乖體恤之道。但邊圍軍行。貴在神速。將來進勦。務宜一舉集事。亦不得過存持重之見。或致時日久淹。反至誤事也。再據解員等稱。滇省運米至各處軍營。腳價甚貴。或由各州縣運送。或於土司境內採買等語。看來該省米糧。上年價值本昂。今時際軍興。勢必有增無減。明瑞等應察勘該處附近米石可購之區。先事悉心設法籌辦。以益軍儲。在內地買運者。飭屬按照時價。妥協採辦。至於土司

地方經理尤宜加意。伊等地處邊陲。正與緬夷接壤。但用兵以來。亦多効力之處。若就該境辦糧。不為寬裕給價。中間或任胥吏等侵漁短扣。則緬匪尚未勦除。而土司已滋擾累。於此事大有關係。著明瑞。鄂寧。照依該處現在平價。再量加擴充。俾得稍有贏餘。庶於恤屬安邊。俱中竅要。至於一入緬境。正當資糧於寇。而又不可使運糧員弁。影射開銷。此時解員等押送竣事。已令即速回滇。伊等前此

承辦一切事宜。練習有素。明瑞等可量材差遣委用。以收驅策之效。所有詢問各員清單。著一併鈔寄閱看。將此詳悉傳諭知之。○是日起。

上以夏至祭

地於

方澤齋戒三日。○丁亥。諭曰。明山奏長武縣民尚景福。糾衆借糧一案。知縣曹立基。都司趙廷棟。皆情無能。不即擒獲要犯。任其當場免

脫。知州韓成基。既漫無覺察。又不督率查拏等語。曹立基。趙廷棟。俱著革職。韓成基。著交部嚴加議處。其曹立基短發草價。并失察書辦需索各情節。著該撫一併嚴審定擬具奏。○已丑。夏至。祭

地於

方澤。

上親詣行禮。○詣暢春園。問

皇太后安。○幸圓明園。○庚寅。

上御勤政殿聽政。○諭朕於七月二十日啟鑾前往木蘭。應派人員。應備事件。交各該處豫備。將派出人等。照例射布靶。○以正黃旗滿洲副都統阿哈尼堪。為荊州副都統。○辛卯。軍機大臣等議奏。山西巡撫彭寶奏稱。右衛牧廠餘地。現經派員履勘。招墾辦理。並將召募起科管轄各事宜。酌擬條款。一查勘五旗牧廠餘地。正藍旗為一段。正黃。正紅。鑲紅。三旗為一段。鑲藍旗為一段。其中堪以墾種者。

共計一千六百餘頃。應於歸綏道所屬五廳及大同朔平二府屬沿邊州縣招募佃民。每地五頃為一分。各量資本。或一戶認種一分。或數人合認一分。入冊後給以印照管業。當初經認種之年。免其輸納。於次年起科。其餘逐年耕熟陸續升報。此項地畝較察哈爾土性瘠薄。祇可種植雜糧。應照口外不分等則之例起科。其牧廠俱坐落和林格爾及清水河二廳地方。所有應徵租銀。即交該處通判經徵。就近解交綏遠城同知衙門撥充旗營兵餉。此項地畝除現在招墾一千六百餘頃外。尚有八百餘頃。係砂磧山溝。不成片段。俟佃民將好地墾成後。飭令零星開種。以盡地利。又此項應募佃民約需千有餘戶。將來俟認種人多。即令該處兩通判相度適中之地。設立村莊。以便稽察彈壓。無須另設專員。以上均應如所請。惟稱該處地畝土性瘠薄。應照口外例不分等則之處。查徵賦之重

輕。應準收成之厚薄。此時未可懸定。應令試看成熟後再行定則。又該處佃民聚集既多。其中或不無遊民攔入滋生事端。並抗租逃避各情弊。宜嚴飭承辦之員。時加稽察。從之。○蠲陝西華州華陰潼關三廳州縣乾隆三十一年水災額賦有差。並緩徵蠲餘銀兩及勘不成災之渭南興平大荔朝邑保安安塞榆林米脂等八縣未完銀米。蠲奉天承德鐵嶺開原復州廣寧五州縣乾隆三十一年水災霜災額賦並緩徵蠲餘銀米。○壬辰上詣暢春園。問皇太后安。○諭據吳達善等會訊塔勒納沁管屯都司劉得等。並無減報收成分數。及盜賣屯糧情弊。從前薩瀚等揭報各情節。審係全虛。請將薩瀚元保並交部嚴加議處等語。薩瀚有總理屯田之責。乃於各工收成不能查驗確實。輒任意逼勒。將分數加倍結報。及劉得等被叅革審。又不候委員到日。秉公研訊

先自酷刑煅鍊。以冀迴護前非。種種錯謬。乖張。非尋常舛誤可比。薩瀚著革職。交刑部治罪。亢保雖與薩瀚共事。但旋經調赴闕展嚴刑逼供。係薩瀚一人專主。惟從前附和揭咨。亦屬不合。著交部嚴加議處。其率行揭咨之副將福璉。並著交部議處。○又諭曰。容保前因京口挑補隨甲錯誤一案。已照部議降級調用。不准抵銷。但念該員歷任將軍。尚無大過。著從寬改為革職留任。免其降調。○又諭。現今勦辦緬匪。著額勒登額回熱河。於彼處厄魯特內。或官或兵。遴選五十人。每員賞銀百兩。兵五十兩。以玉魯斯為領隊。大臣帶往。八旗索倫厄魯特侍衛拜唐阿內。令軍機大臣等亦選五十人。各賞銀五十兩。整裝應得之項。照舊支給。所有乾清門侍衛烏三泰伊柱。德爾森保。殷濟圖。亦著派往。○諭軍機大臣等。鄂寧奏楊應琚辦理緬匪。種種欺飾乖謬一摺。其於此事前後原委。實能切中。已

於摺內批示矣。在緬匪么麼伎倆。原屬不成事體。今楊應琚乖張貽誤。已至於此。勢不得不整頓進剿。重示懲創。所有籌辦弁兵糧運馬匹等事宜。業經節次傳諭各該處。併寄知明瑞等。以期剋日進兵。一舉集事。明瑞此時已經到滇。一切軍營統率。是其專責。其派撥兵丁。及催集軍需各項。源源接濟。則責在鄂寧悉心妥辦。但分任固不可不專。而協力和衷。彼此又不得稍存畛域之見。伊等並受委畀重寄。諒無不深體朕懷。勉圖迅奏膚功也。至現在查辦前此軍前臨陣逃避兵丁。及中途拋棄糧餉官弁一節。尤宜詳加分別。使情罪輕重得宜。如兵丁等實係身在行陣。敢於倡率逃亡。及運饗濟軍。竟悍然拋棄不顧。此等皆失律渠魁。自應嚴行查緝。俾正刑章。若營伍中偶因染瘴患病。逡巡遲誤。與隨從押糧。非首先倡率奔竄者。伊等均屬附和脅從。且係屢經楊應琚養成恇怯之後。此時如過

為吹求刻責。未免多事。其於軍伍人心。大有關係。可傳諭明瑞鄂寧。令其分別從寬辦理。以昭節制。再新街造船一事。看來瘴起時。工匠既不能存駐興作。一入秋冬。正當進兵之候。又豈能久需時日。以待臨河造船。此事只可置之弗論。惟應就木邦一路。豫為相度。取道遄征。庶為扼要耳。其湖南造船兵匠。爾等酌量。若無用。即遣回可也。著詳悉諭令明瑞鄂寧知之。○陝甘總督吳達善等奏。哈密所屬蔡把什湖額田三千畝。分為三工。設有把總經管。又牛毛湖新墾地二百五畝。亦歸兼管。查該弁已管有蔡把什湖三工。誠恐顧此失彼。應令哈密副將於春秋之際。酌派千把一員督辦。並令哈密營都司。前赴該屯。查其籽種。是否照例播種。成熟後。親試碾打。實報收成分數。該副將仍不時親往稽察。至塔勒納沁額地六千畝。分二十二工。設有都司一員總理。千總一員。外委三員。分工經管。工段

畸零。其間相距數十里不等。雖有都司管理。恐難徧及。應令該副將派遊擊一員。赴屯與該都司分地督耕。收割時。該副將即由蔡把什湖前往。一律稽查。得旨。如所議行。○是月兩江總督高晉等奏。江省崇明一邑。向有儲備窖銀七萬五千餘兩。嗣因魏荔彤虧空案內。除豁免外。實存窖銀六萬三千九百四十七兩。查各省儲備銀兩。皆應庫貯。今窖存年久。銀色易變。請將此項銀兩。全數提解蘇州藩庫。由藩庫正項內。撥銀四萬兩。發崇明縣貯庫備用。報聞。○又奏。江省崇明縣之北。通州之南。新漲沙灘一處。自乾隆二十八年以來。該州縣詳報頃畝多寡不等。查此項沙灘淤漲頗廣。未便任聽地方官草率辦理。致滋影射。現委員查勘。草灘二百四十五頃有奇。泥灘二百八十四頃有奇。水灘三百八十四頃有奇。應將漲出沙地。北歸通州。南歸崇明。分界管轄。目下情形。沙尚低嫩。請俟灘地堅

實。再由該州縣詳報。查明丈尺。估報定則報聞。

大清高宗法天隆運至誠先覺體元立極敷文奮武孝慈神聖純皇帝實錄卷之七百八十五

大清高宗法天隆運至誠先覺體元立極敷文奮武孝慈神聖純皇帝實錄卷之七百八十六

監修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理
吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂
總裁官經筵講官太子太傅文華殿大學士文淵閣領事稽察欽奉 上諭事件處管理刑部戶部三庫事務
世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次
尋常紀錄十四次臣德瑛經筵講官太子少保工部尚書紀錄六次臣曹振鏞等奉

教修

乾隆三十二年丁亥六月癸巳朔湖北按察使朱珪奏滇省軍報由公安縣之孫黃驛入楚省南境經襄陽縣之漢江呂堰等驛出楚省北境臣逐站選驗夫馬度量遠近分設腰站十六處並查勘南北大江及小溪渡河共九道分設船隻於渡口晝夜輪候並飭各站較驗時刻明立賞罰俾緊件隨到隨遞得旨好今既添馬想爾等不費周章矣○以鑲藍旗蒙古副都統世良荊州副都統阿哈尼堪對調○甲午諭軍機大臣等據成衮扎布奏

烏梁海總管察達克病故。察達克自投誠以來。諸事奮勉。著賞銀一百兩。其總管並加恩。令伊子承襲。再烏梁海地界。與俄羅斯毗連。著傳諭成衮扎布。向辦理烏梁海事務之莫尼扎布詢問。如有明白堪接管該處事務之人。查明奏聞。○以故莊親王允祿孫公永瑞襲爵。○旌表守正捐軀之山東即墨縣民王茂伯妻汪氏。○乙未。軍機大臣等議奏健銳營兵除遣往回城換班九百名。及奏留伊犁等處并遣往滇省一千五百名外。現存五百餘名。操演分隊不敷。查京城前鋒護軍兩營兵數甚多。請由此等人內。選年壯有造就者。移駐健銳營。以增兵額。且撥赴軍前各兵家口。有仍駐彼處。亦有移居京內者。所遺兵房足敷一千名居住。應令健銳營大臣會同前鋒統領。護軍統領等。於八旗前鋒護軍內。選撥移駐。並不令出缺。至移駐後應用軍器等項。俱照從前所遺之前鋒一體辦理。并照例

賞銀十兩。以為移家之費。至管理兵丁。查初次設健銳營。移駐前鋒一千名時。曾放翼長二。護軍叅領八。副護軍叅領八。前鋒校五十。空銜藍翎長五十。續添派委前鋒一千名時。曾添放前鋒叅領十六。副前鋒校四十。後移駐護軍一千名時。因有兼健銳營行走之侍衛副護軍叅領委前鋒叅領雲騎尉等官。由此內對品。曾放護軍叅領二。副護軍叅領八。委護軍叅領八。於本營副前鋒校內。每旗曾放前鋒校三。茲查健銳營翼長叅領前鋒校內。除赴軍前者。現有翼長二。前鋒護軍叅領七。前鋒校九。不敷統轄。除翼長無庸另派外。仍照初次移駐之例。派叅領八。副叅領八。護軍校五十。所派叅領護軍校等。亦不令出缺。應令健銳營大臣會同護軍統領等。選其才具優長者。酌量各旗缺數。勻派。叅領賞銀四十兩。副叅領三十兩。護軍校二十兩。以為移家之費。合計健銳營連前所遣兵數。共駐四

千名。俟滇省兵回時。如住房不敷。該管大臣另行具奏。從之。○丁酉。

上詣暢春園。問

皇太后安。○諭軍機大臣等。高晉等奏。刊刻逆書之舉。人蔡顯等。究擬分別凌遲斬決一摺。已批三法司覈擬速奏。蔡顯身係舉人。輒敢造作書詞。恣行怨誹。情罪重大。實為天理國法所難容。但閱原書內簽出各條。多屬佻條無聊。失志怨憤之語。朕方以該犯尚無詆毀

朝政字句。其情與叛逆猶去一間。或可原情酌減。及細檢未簽各處。如稱戴名世以南山集棄市。錢名世以年案得罪。又雨風從所好。南北香難分。及題友聚漿照。有莫教行化烏場國。風雨龍王欲怒。等句。則係有心隱躍其詞。甘與惡逆之人為伍。實為該犯罪案所繫。而冊內轉不簽出。明係該督等自以文義未精。竟委之一二幕友。代為披檢。而幕友等從來錮習。每遇用兵之事。及以文事獲罪者。

輒一切諱匿不言。是以畧撫無關緊要之文。巧為塞責。而於嚙緊關鍵。不肯復加指摘。高晉等使若輩得售其術。朕則豈能依樣葫蘆。漫然不為省視乎。至為逆犯作序之聞。人從目擊書詞狂悖。甘為附和。並不舉首。其情深屬可惡。非僅援杖流之例。可蔽厥辜。現據法司覈擬。改發伊犁等處。庶足明正其罰。其書內列名曾從逆犯受業之劉朝棟等。自當逐一嚴加根究。安得概以素不知情。竟乃置之

不議。即書賈吳姓業為刷印流傳。豈無知傳播者可比。亦應治以應得之罪。該督何竟意存姑息。仍不免大事化小。小事化無之陋習。況該督等平日既漫無覺察。不能豫發其奸。直至自行敗露。尚圖苟且完事。何以申國憲而快人心。看來此等逆犯。本屬戾氣所鍾。兼以粗識文字。而家居又不能得志。遂爾逞其詭譎。侈為狂吠。意或倖逃顯戮。即可借此市名於後。恐不獨一蔡顯為然。於世道人心。深

有關係。封疆大臣。可不思力杜逆萌。執法究治耶。蔡顯已降旨從寬。改為斬決。伊子蔡必聰。並改為應斬監候。至摺內指駁情節。仍著高晉等再行詳覈。審擬覆奏。並著於各省督撫奏事之便。通行傳諭知之。○戊戌。兩江總督高晉等奏查瓜洲城外迴瀾壩工三段。上段四十五丈。離城寬二三十丈。埽外九丈。以內水深四五六尺。中段二十丈。離城四五六丈。下段五十五丈。離城二三十丈。埽外五丈。

以內。均水深一二三丈不等。目下正值大汛。上段離城丈尺既遠。水勢亦淺。中段下段。離城近而水較深。現於埽根加拋碎石。日久可冀淤灘外護。報聞。○己亥。諭據宗人府奏稱永璘現已承襲王爵。所遺輔國公。非軍功所得。且和碩莊恪親王之子孫內。現有三人襲替將軍。此公爵應不必承襲等語。永璘公爵。原非軍功所得。自應不准承襲。朕垂念莊親王。特加殊恩。著弘晷承襲公爵。○又諭曰。內

大臣傅森在內廷行走多年。今聞溘逝。朕心深為憫惻。著加恩賞銀一千兩治喪。仍派散秩大臣一員帶領侍衛十員奠醊。○諭軍機大臣等。阿爾泰奏調撥川省兵丁馬匹。前赴滇省一摺。所辦甚屬妥協。至需派統領大員著達興阿帶領前往。○庚子。

上詣暢春園。問

皇太后安。○諭曰。薩瀚現已革職。拏問。哈密辦事需人。文綬著加恩賞給道員銜。令其自備

資斧。前往哈密辦事。劉墉亦著加恩。令其回京。在修書處効力行走。○諭軍機大臣等。鄂寶奏宜城縣民袁飛鵬之妻王氏。毆傷伊翁袁秀文身死。已將王氏即行凌遲處死一摺。自應照例辦理。至所稱袁飛鵬審係外出未歸。實不知情之處。固亦難於深究。但袁飛鵬不能養贍伊父。反向伊父借穀碾食。屢索不還。則平日之情。四肢而不顧養。不孝之罪。已無可逭。雖不必並正刑誅。但其父死於惡婦。

之手。而袁飛鵬竟置不議。尚令其覲顏鄉里。仍齒齊民。其何以維風化。袁飛鵬著即發往伊犁賞給厄魯特為奴。將此傳諭該督知之。○又諭前據定長奏護送健銳營兵丁。雇備竹兜乘坐一節。殊屬不知事理。業經傳旨申飭。今復據奏官兵跟役亦為雇給竹兜。以便過行等語。益復荒唐可笑。初不意定長之全不曉事。竟至於此。官兵等奉派征勦。策馬馳驅。乃其本分。間遇徑路崎嶇。及馬力疲乏之際。雖徒行亦當不憚艱辛。豈可令其安坐肩輿。前往衝鋒殺賊之理。即或因兵丁等馬匹不敷。酌借竹兜。以代其跋涉。尚云事出權宜。然我滿洲兵弁。俱知顧惜顏面。亦未必肯貪圖安逸。以貽坐轎打仗之誚。至跟役亦令一體乘坐竹兜。尤為非體。夫以輿僮賤役奔走是供。轉使良民顏肩舁送。而伊等遽爾適體乘軒。殊駭觀聽。定長竟不計為人嗤笑。尚自以為籌畫得宜。並令湖南照伊辦理。實為厚

顏。況我國家遇有軍旅之事。兵弁往來。一切悉由官辦。絲毫不以累民。若令百姓供彼兜夫。是以力由耕作之人。而驅之僕僕道路。豈能無擾閭閻。前此平定準部回部軍行經過。從未輕役一人。定長豈不聞知。現在征緬官兵。仍照前官為資送。又何必更煩民力乎。定長著再傳旨申飭。所有該省及湖南辦給竹兜之處。著速行停止。其湖北省已經雇備竹兜銀兩。不准開銷。即於定長等名下追賠還項。至雲貴兩省。與楚省毗連。恐亦聞風相效。併著傳諭知之。○又諭曰。休致遊擊唐開中。從前曾任總兵。緣事叅革。因其曾經出兵打仗。加恩用為遊擊。旋以老病休致。唐開中籍隸雲南。於邊徼情形。素所諳悉。且曾領兵進勦。尚能奮勉出力。該員回籍。又經數載。若實係龍鍾病廢。即當聽其安養。餘年如精力尚不致十分衰憊。或可酌量錄用。著傳諭明瑞。鄂寧。即行查明據實具奏。戶部議奏。安徽

巡撫馮鈴咨稱。祁門縣常平倉穀。查於乾隆六年。造報冊內。誤登實存穀八百四十餘石。未經補足。請令該縣王名捷。戴廷掄。二員賠補。查事隔多年。其間歷任交代。混行接受。該管上司。亦未查出。未便僅令該二員分賠塞責。請飭歷任該管督撫。分股賠繳。得旨。此項缺少穀石。經二十餘年之久。並未買補。何以從前竟未辦及。歷任督撫等。稽覈盤查。所司何事。及新任之員詳報。高晉等仍欲咨部。顯預了結。江南吏治廢弛。即此可見。著高晉。馮鈴。明白回奏。○辛丑諭。此次巡幸木蘭。著誠親王。和親王。大學士劉統勳。尚書託恩多。留京辦事。其月選之文員內。通判州縣等官。武員內。八旗護軍校。驍騎校。及外省送到之補放水手官。驍騎校。并年滿千總等官。并俱著王大臣照例驗看。至駐蹕熱河時。外省督撫提鎮等。奏摺。俱著齎摺人。前赴行在投遞。惟進哨以後。仍照例交留京辦事處加封。轉交

內閣隨本呈送。候朕批示發回。仍於留京辦事處交付齎摺人祇領。該部通行傳諭知之。○壬寅。以四川松茂道屬商巴寨土千戶路六笑叔那木拉亞克襲職。○癸卯

上詣暢春園。問

皇太后安。○甲辰

上御勤政殿聽政。○以莊親王永璘管鑲紅旗蒙古都統。○乙巳。予故兵部侍郎蔣樞祭葬如例。○豁山東德州開河占壓民田三頃五

十一畝額賦。並酌給地價。○丙午

上詣暢春園。問

皇太后安。○諭軍機大臣等。昨據明瑞等奏軍務情形一摺。看來該處馬匹軍械。俱屬短少。而辦運糧餉。尤為費力。將來剋期進剿。自當豫為籌辦寬裕。以資接濟。斷不可因目前軍實未充。畧存寬緩之見。以致曠日稽時。其馬匹一項。前已傳旨四川。廣西。兩省。各購二千匹備調。昨據阿爾泰奏稱。已撥馬二千八

百匹。運送滇省。諒粵西亦可如數辦給。明瑞等當約計軍營所需。或尚覺不敷。並可於隣省多方購買。所缺軍裝器械。亦當飭令趨辦精足。毋使貽誤。惟糧餉一事。外省既難於協濟。勢不得不在民間採買。反向各土司購辦。果能寬裕給價。伊等自更踴躍從事。前已撥銀三百萬兩。解滇為軍需之用。現復令戶部再撥銀三百萬兩。運赴該省。俾軍營帑項充盈。則一切自易為力。凡糧馬等項。不必照尋

常覈銷成例。較量時值。止期糗糒充饒。有裨軍食。並當令沿邊內外人民土司等。樂於趨利而忘其勞。自更易於集事。但不可令不肖員弁。及承辦胥役。借端浮冒侵剋。致民間不沾實惠。倘有此等情弊。查出即於該處正法。以昭炯戒。至火藥鉛彈。尤軍行所必需。現今赴滇兵丁一千三百名。每名酌帶火藥一觔。鉛子四十箇。以備進兵應用。此外如有不敷。該督等仍當先時籌辦。即或本省缺少。湖廣

向產硝磺。亦當速行知會定長等。令其就近採運。著將此傳諭明瑞鄂寧知之。丁未。諭前據定長奏。護送健銳營兵丁。酌雇竹兜應用。並跟役亦為雇兜乘坐一節。所辦全屬不知事體。已經傳旨申飭。官兵奉派進剿。自應奮往遄征。固無緩坐肩輿之理。至於兵丁跟隨僕役。責在効力服勤。尤宜身耐勞苦。即云道途遼遠。乘騎不敷。自應給予應得馬價。或願沿途轉雇。或願省費徒行。皆未為不可。若

如定長所奏。使輿臺之賤。得一體乘兜。而驅策昇送者。皆地方清白良民。毋論道路傳聞。駭人觀聽。且使該役等。見所過地方。如此多方體恤。必將因情生驕。諸凡抑勒平人。繹騷鄉里。勢又何所不至。其於軍行政體。所關甚重。若僅傳旨教誡。不足示懲。定長著交部嚴加議處。並通諭官兵。經過地方。各督撫知之。○又諭曰。高晉等奏。請簡選候補知縣十員。發往江蘇試用一摺。甚屬非是。前以舉人班

次壅積。特令王大臣詳加揀選。分發各省。酌量委用。各督撫等遇地方要缺。先將熟練幹員調補。所遺之缺。自可於新發人員內擇其才堪造就者。以次充補。庶於疏通本意允符。如其人已經委署試看。實在難勝民牧之任。亦當隨時留心甄別。據實奏聞。或可酌量改教。或以應得品級給銜回籍。俾不致在省需次經年。徒受資斧拮据之苦。是於慎重官守之中。兼寓愛惜人材之義。封疆大臣。所以奉

公率屬者。其道固應如是也。若如該督等所奏。概以舉人初任未諳吏治。平時並不悉心體察。凡有題調之缺。一切奏請簡發。則部發候補之人日增。本省得調之人日減。縣官止有此數。要缺滯而簡缺愈滯。將欲疏舉人進身之路。而先塞邑令出缺之途。此特書吏等墨守科條。虛應故事。而於國家用人權衡之得失。與朕不得已調劑之苦心。皆漠然不一為體驗。其何以副委畀之任。而重親民之職。

耶。且前此大挑舉人後。已明降諭旨。令直省不得率請簡發在部人員。高晉等何以尚為此奏。所請已勒部不准行。並通諭各該督撫。令將現在到省舉人。詳加試看。將來可以留省補用者若干。并實在難資驅策。應行甄別改教給銜者若干。即行據實彙摺奏聞。候朕酌量降旨。毋得模稜姑息。致乖政體。又諭昨考試原任翰林內汪存寬。戈岱著加恩。仍以編修用。其李臺。陳本敬。鄭岱鍾。每員著賞

給紗葛各一匹。○諭軍機大臣等。據吳達善查奏。守備敦柱被賊戕害一案。現在搜捕兇犯。尚無蹤蹟等語。該犯本係瑪哈沁。又住居西葛根山。距內地不甚遼遠。即云山深林密。然此等匪徒行蹤寥落。別無夥黨為羽翼。果能實力搜捕。何至經時尚無弋獲。可見該處綠營兵弁懦弱。已成積習。更難望其悔改。著傳諭吳達善務速遴選能事弁兵。嚴行躡緝。俾兇徒不致漏網。再此時或有乘間遠颺。投

奔伊犁雅爾等處情事現已諭令各該處協力根查毋任竄逸將此並諭吳達善知之

大清高宗法天隆運至誠先覺體元立極敷文奮武孝慈神聖純皇帝實錄卷之七百八十六

大清高宗法天隆運至誠先覺體元立極敷文奮武孝慈神聖純皇帝實錄卷之七百八十七

監修總纂官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理
吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂
總纂官經筵講官太子太傅文淵閣大學士文淵閣領閣事稽察欽奉 上諭事件處管理刑部戶部工部事務
世襲騎都尉軍功加十九級隨帶加二級又加二級臣董誥內火臣戶部尚書鑲藍旗滿洲都統軍功紀錄五次
尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆三十二年丁亥六月戊申兵部議覆貴

州巡撫良卿奏稱黔省馳遞文報每站向設一馬一夫現有軍報請照直隸軍臺之例每站添派千把外委各一員輪流馳遞又稱該省路險站長非一馬之力所能到請於每站適中之地添設腰站並於現在增設各站馬八十四匹內挑四十四匹正站腰站各撥二十四匹馳遞軍報均應如所請得旨依議速行己酉

上詣暢春園問

皇太后安。諭軍機大臣等。據馮鈐奏廣德州
巧匪強搶拒捕毆傷官兵。現在案犯全獲。分
別按擬一摺。此等流丐聚集多人。用強索討。
已為地方之害。至該州會同都司等前往查
拏。輒敢拾磚擲打。致傷兵役。實為不法之尤。
理應執法嚴懲。按律治罪。以昭炯戒。不得稍
存姑息。了事之見。至摺內所稱都司識認徽
州夥衆強乞案內十人。現俱改換姓名一節。
情事殊未明晰。流丐蹤蹟無常。都司因何識

認。且前此既經犯事。地方官自當定罪立案。
今復改換名姓。肆行滋事。是此十人。業經再
犯。情罪尤為可惡。即應照積匪猾賊之例。從
重究擬。其前此如何辦理。并是否定擬寬縱
之處。並著馮鈐一併詳查覆奏。又諭。現在
滇省辦理緬匪。已定於秋冬間。刻期進剿。殲
滅兇渠。大兵既臨。么膺計窮力蹙。將來必有
鉅險奔逃。希冀苟延殘喘之事。遲羅與緬境
相通。竄入尤為近便。著傳諭李侍堯。行文飭

知遲羅。諭以該國久備藩封。夙稱恭順。且與
緬酋頗歲。構兵久成讎隙。此時王師大舉。士
馬精彊。原不需該國徵發協援之力。但恐搗
穴傾巢。以後緬酋航海遠颺。或即潛投遲羅
境內。該國務宜悉心偵探。盡力追擒。於以効
順。中朝翦除外寇。洵為一舉兩得。況該國果
能迅行縛獻。朕必優加眷賚。以勵忠忱。如或
隱匿稽延。以致該酋游魂更投別島。是該國
不能承受朕恩。自取譴責。亦惟於該國是問。

毋貽後悔。至李侍堯遵旨。檄諭應先酌量水
程。遠近計算。遲羅可於今年十一月間。奉到
此旨。大約寧遲毋早。方於軍營歲事之期。不
先不後。尤為允協。將此詳悉諭令知之。庚
戌。諭曰。阿思哈題叅署杞縣知縣蔡淮英。因
派往雲南健銳營兵丁。經由豫省。借端派累
民間。任意滋擾。一本所辦。甚是已降旨。將蔡
淮英革職。交與該撫嚴審定擬。具奏矣。國家
辦理公務。一切均動支官項。絲毫從不累民。

地方官遇此等送兵事件。尤宜加意經理。毋使稍有派擾。俾閭閻安堵如常。乃蔡淮英輒敢借辦公之名。遂其侵漁之慾。縱恣無忌。罔恤民艱。貪劣不法。實出情理之外。若不嚴行懲治。無以示儆。著該撫將蔡淮英。逐一研訊明確。從重治罪。阿思哈一有訪聞。即據實題叅。不肯稍為容隱。懲一儆衆。使各屬知所炯戒。不愧封疆大臣之體。著交部議敘。至此次征緬官兵。經過地方。不止河南一省。今杞縣

既有敗露之案。恐他省不肖官吏。似此藉端科斂者。亦所不免。若均能如阿思哈之實力查辦。則墨吏不患不除。地方不患不寧矣。著傳諭各該督撫。務各留心稽察。遇有此等劣員。即行秉公叅奏。請旨治罪。以肅吏治。而安民生。倘稍為徇庇。不即嚴加糾劾。將來別經發覺。則是督撫等之自取咎戾矣。該部遵諭速行。又諭前經降旨。將各直省應徵漕米。普蠲一年。本年輪免江蘇一省。昨據尚書嵇

璜奏請。按照府分。勻作兩年蠲免。業經戶部議駁。旋據高晉明德會奏。請將各州縣額漕。本年先蠲一半。其餘一半。俟明年再蠲。復經該部以高晉等身任其地。自就該省實在情形籌辦。當經議覆。准行在伊等通融調劑。原為地方米石均平。及貨物流通起見。但當此閭閻單數。自應籌酌萬全。以期妥協。高晉等所奏各州縣概免一半之處。雖通行出示曉諭。而僻壤窮鄉。勢難家喻戶曉。江蘇糧額。甲

於他省。條目繁多。既易滋混淆。且恐不肖吏胥。因緣為奸。不無高下其手。影射侵漁之弊。轉不如間府分免。尤為妥善。著高晉明德等將該省漕糧。通盤籌畫。按額適均。統計本年應免若干府。次年應免若干府。使界限犁然。蠹役無由滋弊。輸將者既易於遵循。蠲免者更普霑實惠。而於裕食便民之道。亦均有裨益。該督等迅速悉心定議。一面奏聞。一面通行各屬。實力辦理。以副朕籌咨民隱之至意。

該部遵諭速行。諭軍機大臣等。阿思哈題
叅署杞縣知縣蔡淮英藉端派累。任意滋擾
一本。業經降旨將蔡淮英革職究擬。并將該
撫交部議敘。傳諭各督撫一體實力稽察矣。
蔡淮英借辦公名色侵漁無忌。殊屬可惡。著
阿思哈即速提齊犯證。逐一嚴訊確情。按律
定擬。即行專摺奏聞。以故鎮國將軍謙德
弟順德照例襲封奉恩將軍。辛亥諭軍機
大臣等。據明瑞等奏。前此各路打仗兵丁內
被賊衝散。因而逃匿者。正復不少。現在通飭
嚴拏等語。兵丁等身列戎行。敢於散亂逃亡。
理宜嚴緝重懲。用申軍律。但前此調度乖張。
釀成怙怯積習。皆由楊應琚貽誤所致。綠營
提鎮如李時升等尚爾望風退縮。又何有於
部曲之兵。且即此等逃兵而論。其中情罪亦
自不同。如其人實率先倡導。鼓煽衆人。其罪
萬難寬貸。者自應詳訊明確。將為首一二人
即正刑章。以示炯戒。若其餘附和同行。人數

衆多。且與甘心首禍者。究屬有間。明瑞等可
悉遵前旨。毋庸過事吹求。俾伊等知此案之
處治從寬。特因將領等行軍毫無部伍之故。
並非欲為失律之徒。曲加矜宥。則於軍紀人
心。均為允協。將此傳諭明瑞併鄂寧知之。
又諭據鄂寧奏稱。擬於六月初三日。回至省
城辦理一切事件。所見甚是。現在去進兵之
期。時日尚遠。明瑞又已抵永昌。省城所有待
理之事。鄂寧正可乘時籌辦。惟秋冬之交。大
兵即當進發。明瑞既統兵深入。所有接濟餽
餉。運送軍裝。乃鄂寧之專責。非前往永昌恣
心調度。未免呼應不靈。鄂寧可約計於進兵
之前。自赴永昌。與明瑞面商一切。軍行後。即
在彼駐劄辦理。俾得聲息聯絡。以資接應。尤
為妥協。將此傳諭鄂寧及明瑞知之。旌表
守正捐軀之貴州仁懷縣民張世虞妻楊氏。
壬子諭曰。永泰年已七旬。著來京另行補
用江寧布政使員缺。著卓爾岱補授。諭軍

機大臣等。本日閱高晉奏。江蘇安徽武職等獲尋常逃犯一摺。例應年終彙奏之件。何至延隔半年始行奏到。該省距京既非遼遠。且係循例分別年限等第。其事亦非難辦。高晉竟爾疎懈。若此。是其平日毫無整頓。沾染廢弛積習。已可概見。高晉著傳旨申飭。又諭據工部奏各省衙署倉庫等項。以及大小船隻。遇有遷移裁汰各員。估變舊料。銀數短少。一經照駁。即稱歷年久遠。鈔朽破損。不能再有增加。請照工部承修工程之例。分別奏報。其盛京等處木植變價。亦令據實確估一摺。所奏甚是。諭令准行矣。各處廨宇等項。原為改設遷移。因而變估。並非實係年久朽壞。不堪居住者可比。何得藉詞鈔爛。遽思減值。至於船隻。既可以資乘坐。豈有一經減汰。即至朽腐無用。竟不及原估數十分之一二。況木植既經改折。尤宜速為變售。以收實用。更不應聽其滯積多年。日益朽蠹。即此可見外省

因循玩忽陋習。而承辦之員。得藉端朦混。希圖侵蝕。俱未可定。著傳諭各督撫。嗣後承辦一應房屋船隻。均照工部此次奏定之例。分別辦理。其應變物料。俱隨時估變。毋得任意遷延。即數在二百兩以下者。除按次報部外。仍於年終彙奏一次。俾經手官員。知事關入告。自不敢仍前延緩滋弊。可於奏事之便。將此傳諭知之。又諭據方世儒奏。稱准定長咨。續派赴滇官兵。需馬較多。所有兵丁跟役等。俱添雇竹兜乘坐等語。兵丁乘坐竹兜。已屬非體。至跟役人等。亦令一體乘坐。以與臺下賤之人。而令良民昇送。實屬駭人觀聽。前據定長節次奏到。屢經降旨申飭。並將伊交部嚴加議處。併傳諭經過地方各督撫。通行飭禁。方世儒具奏時。想尚未接奉前旨。著再傳諭該撫。務遵前諭。不可效尤。致啟兵役驕惰之漸。並將第幾起官兵跟役內。曾坐竹兜者若干人。領兵佐領。係屬何員。其官員內亦

有乘坐者否。一併詳悉查明。據實覆奏。毋得稍有徇飾。河南巡撫阿思哈奏。豫省為發往雲南官兵所由孔道。勢不得不雇用民車。或恐胥吏濫行科派。不無累及閭閻。莫若墊銀代辦。仿照委員購備河工料物之例。豫借司庫閒款。發給各臺承辦大員。凡各屬民車到站。按日分別給價。至差竣日止。仍飭各道府層層稽查。務使情弊肅清。所有借項。另籌歸款。得旨。所辦甚好。具見實心。已將汝議敘

矣。癸丑。諭軍機大臣等。御史紀復亨奏。貴州省差派苗人。竟有扣剋發價。遇事鞭笞等弊。請飭該撫嚴加查察一摺。向來地方官辦差。多係假手吏胥。此種情弊。在在不免。現在軍行所過。該省正當孔道。苗人等既與民人一體服勤趨事。正宜加意體察。使勞逸適均。以示優恤。著傳諭鄂寶。令其實力稽查。如例用正夫者。不得冒銷夫價。暗用苗人更替。其例應派苗人者。亦毋許短發價值。至私行鞭

責及勒令多送下站等弊。一經查出。即從重懲治。其失察官員。亦分別叅處。俾邊徼苗氓。不致稍滋擾累。可將此傳諭知之。兩廣總督李侍堯奏。臣遵旨籌辦協濟滇省馬匹。查廣西營馬額止一千四百八十九匹。當即酌撥一千匹。迅速解往。計八月可到永昌。惟是軍營馬匹最關緊要。若於東省附近粵西營分酌量抽撥。尚可得七八百匹。現飭各營加意餵養。如滇省尚有需馬之處。十月間即可解到無誤。得旨。好。即宜辦解。甲寅。

上詣暢春園。問

皇太后安。軍機大臣等議奏伊犁將軍阿桂等奏。稱回部向在準噶爾時。本不與哈薩克交通貿易。惟與布魯特安集延互易馬畜。嗣因伊犁雅爾駐劄大兵。距內地較遠。馬匹解往需時。是以令向哈薩克互易馬匹。且念回衆歸誠。生計不無拮据。因准其一律貿易。今詢之伊等。即不與哈薩克通商。惟向布魯特

安集延貿易馬匹亦不致缺短於生計亦無妨礙請嗣後各分處所回衆於布魯特安集延霍罕等部貿易伊犁雅爾與哈薩克貿易兩得其便並先行曉諭布魯特安集延於貿易時酌派頭目約束勿令滋事回民前往給與執照若不往原定處所輒敢越境謀利者將牲畜一半入官示罰應如所請從之○刑部等部奏直隸南皮縣知縣程如震短發地價擬發往烏魯木齊當差其該管知府金文淳請照例降調得旨依議金文淳曾經身獲重譴加恩錄用自復任知府以來並未見其實心任事今於程如震短發地價一案又復漫無覺察僅予降調不足以示懲儆金文淳著革職發往軍臺効力贖罪○山東巡撫崔應階奏查九河故道徒駭一支由霑化縣入海向來運河異漲每資宣洩今地形轉高河身窄曲一時難議興挑勘有舊河漫口河形徑二十五里南高北低地勢順利於此間挑

挖支河俾兩道分洩歸海較速茲於四月興工計河長四千三百餘丈岸寬二十丈及四五十丈不等今河身挖寬五丈五尺至十一丈不等深五六尺不等兩岸俱築新隄於五月內一律工竣報聞○乙卯遣官祭火神廟○湖廣總督定長奏荊門州地處環山於五月二十四日大雨之後夜半發蛟將北關外橋座衝坍帶損臨河民房併淹斃人口當飭布政使等親往查勘半日間水即消退田禾並無傷損所坍民房給貲修葺並分別賑卹是日往漢第十起官兵適至該州關外水發時各兵所住之房皆在高埠並無妨礙橋座雖經衝斷當經紮筏以渡官兵照常按程前進報聞○丙辰上詣暢春園問皇太后安○還宮○旌表守正捐軀之江西新喻縣民段高十妻胡氏○丁巳上御太和殿視朝文武陞轉各官謝恩○幸圓

明園。戊午。旌表守正捐軀之河南息縣民張作正妻王氏。福建同安縣民陳表妻楊氏。己未。

上詣暢春園。問。

皇太后安。諭軍機大臣等。戶部查議明山題覆。潼關廳盤驗茶引。酌留書役紙劄。藍紅銀兩一案。該撫從前奏請裁革。今復題請仍聽商衆供給。輟轉變更。漫無定見。應令查明覆奏等語。已降旨如議行矣。此案前此既經該

撫奏請裁汰。並將歷任各員分別降革。所得陋規按數追繳。繼復咨部令官為捐辦。今又稱必須之項。照舊仍令商人出給。事關題定章程。何以前後游移。自相矛盾。若此。著傳諭明山。即將辦理互異情由。明白回奏。庚申。諭軍機大臣等。據宋邦綏奏。陸川縣訟棍陳先昇之子陳應通。圖刺該縣知縣。致傷書役等五人。內謝諦興。因傷身死一案。已據法司覈覆定罪。降旨依擬正法。此等逆惡兇徒。謀

刺本管官。情罪重大。非尋常鬪很傷人可比。在陳應通私挾屠刀。直前行刺。犯上橫行。其罪固無可逭。而伊父陳光昇。以積年訟棍。令子赴縣尋釁。其為目無三尺。更無待言。律以積惡逞兇。明正顯戮。情法庶為平允。宋邦綏辦理重案。未免意存姑息。有拘牽失當之處。嗣後當自知警省。遇關係重大案件。務執法重懲。以副弼教協中之義。至該縣書役等。力為救護。各受重傷。尚屬能知大義。不獨謝諦

興。因傷殞命。情堪憫惻。該縣自應破格賞卹。即其餘受傷之役。該縣亦當一體從優加賞。以示獎勵。將此傳諭宋邦綏知之。辛酉。上御勤政殿聽政。諭朕恭閱

實錄內。所載海澄公黃芳度。闔門殉節。忠盡可嘉。業經准襲公爵十二次。以酬義烈。因思綠旗世職。向無承襲罔替之條。但如黃芳度之捐軀授命。大義炳然。自應破格施恩。賞延於世。以昭褒忠盛典。至如征勦吳逆時。將軍張

勇趙良棟。王進寶。平定噶爾丹時。提督孫思克諸人。並各懋建勲庸。昭垂史冊。其承襲世職。亦當一體加恩。予以罔替。又如提督陳福於王輔臣之亂。勤勞間寄。被賊暗戕。及近日勦平回部時。提督豆斌。總兵高天喜等。雖不如張勇等之勲勞茂著。然均能奮勇疆場。抒丹效命。皆宜厚予恩卹。用慰忠魂。其襲次滿時。俱著照八旗之例。賞給恩騎尉。俾其子孫得資以上進。永遠承恩。世食忠貞之報。此外有似此等。應行分別加以優卹者。著軍機大臣。會同該部詳悉查明具奏。候朕再降諭旨。國家承平百餘年。中外一統。滿洲漢人。皆我臣僕。朕亦從不肯稍分畛域。綠旗將弁中。果有盡誠為國。克奏膚功者。自應錄敘從優。恩施後裔。若其身歷戎行。而選輟恒怯。債事失機。如近日李時升。朱崙等之負恩誤國。亦必明正典刑。俾師武臣力。知所儆戒。總之示懲示勸。一惟其人功罪所自取。而無所容心曲。

徇於其間。所以昭信賞必罰之大經。皆於是乎在。將此通諭中外知之。又諭據明瑞等查奏。同知胡邦祐解運軍糧。一聞提督退兵之信。觀望不前。雖與棄糧逃避者有間。究屬畏蒞無能。現在監禁恭候諭旨等語。胡邦祐著革職。留於軍營効力贖罪。又諭曰。尹繼善現在患病調理。病痊後尚須隨往木蘭。所有兵部事務著託恩多暫行兼署。俟尹繼善回京時再行交與接管。又諭曰。侍郎額爾景額著馳驛前往雲南。在叅贊大臣上行走。著給與欽差大臣關防。又諭曰。額爾景額現在出差。刑部侍郎事務著珠魯訥兼署。珠魯訥現署兵部事務。今期成額將次回京。即可交令接管。諭軍機大臣等。前據明瑞等奏福靈安王王廷李全雖俱染瘴。然不致為大患等語。今已時逾半月。福靈安等在永昌作何調理。并現在曾否就痊。此次奏事摺內何以並未聲明。著傳諭該督令其將近日情

形已未全愈之處。具摺奏聞。又諭曰。明瑞等奏籌辦進兵各事宜。俱甚妥協。已於摺內批示矣。惟木邦乃進兵要路。距永昌尚千餘里。為內地至阿瓦城適中重地。必需大員統兵三數千駐劄。如從前西路用兵時。巴里坤駐辦事大臣之例。則一應軍務自更易於策應。現已降旨著侍郎額爾景額前往。在叅贊大臣上行走。俟明瑞秋冬進勦時。鄂寧仍於永昌駐劄。額爾景額即在木邦駐劄。俾明瑞得以專力進攻。直搗賊巢。而軍營一帶聲勢連絡。於調度機宜。更為有益。所有應駐木邦兵丁。著明瑞酌量調撥。至所奏查辦管糧官弁一摺。胡邦祐已著革職。留於軍前効力贖罪。陳謨罪案。俟孫爾桂到京後。訊明再定。著一併傳諭知之。以庫爾喀喇烏蘇辦事大臣額爾德蒙額為鑲黃旗漢軍副都統。○壬戌。

上詣暢春園問

皇太后安。諭軍機大臣等。昨據明瑞等奏沿

邊關隘甚多。在在駐兵防守。則兵力四分。適為敵餌。若秋冬大舉深入。則賊匪必救護巢穴。不暇分兵他出等語。所見甚是。已於摺內批示。今木邦重地。已令額爾景額帶兵駐劄。最為扼要。其餘如九龍江。隴川。黑山門等緊要處所。固宜簡派精練。并力防守。至於邊界延袤一千餘里。隘口零星。原難概行備禦。且將來我兵大振聲威。直搗巢穴。賊匪等方將自救不暇。又何能四出滋擾。即間有游魂假息。竄入邊隘。以為牽制大軍之計。亦不過所屬土司之地。當令其堅壁清野以待。彼亦何從肆其侵掠。轉不必僕僕調撥。致分兵力。且如戶腊撒等沿邊一帶。本屬土境地方。該處夷民並非有蓋藏積聚。戀土難遷。即遇賊警。不難暫匿山箐。避其焚劫。原無庸屑屑為之顧計也。可將此傳諭明瑞知之。又諭。昨以木邦為永昌至阿瓦城適中重地。將來進兵

時聲勢宜於聯絡。已命侍郎額爾景額為叅贊大臣前往駐劄。併傳諭明瑞選撥兵丁三數千赴木邦駐守。計現在軍營兵數如派往京營勁旅及調撥四川貴州標兵並擇滇兵之可用者約共二萬五千。此內如足數撥駐木邦固屬便宜。設或僅供將來征勦之用。則木邦所需防兵尚須另為籌畫。著明瑞即行妥協酌調。選撥馬步兵三數千隨額爾景額往駐木邦。並於巴圖魯侍衛中酌派十數人同往。以資差調策應。至額爾景額到彼。文移往返動關緊要。已諭部給以欽差大臣關防。著將此一併傳諭知之。吏部議覆前任兩廣總督楊應琚疏稱南海縣民人李成瑞運洋米入內地。出糶以濟民食。請議敘給以九品頂戴。應如所請。從之。是月江南河道總督李宏奏洪澤湖水盛旺。節次將清口東西壩展寬五十八丈。以資宣洩。茲自四月中旬以來仍見加長。高堰誌椿長至七尺八寸。山

盱五滾壩高出水面七寸及一尺上下不等。應乘此五滾壩未過水之先將東壩再拆去八丈止。留壩臺十五丈。西壩拆去一丈止。留壩臺十丈。清口東西壩連前共展寬六十七丈。再黃河水勢交伏汛後加長三尺八寸。徐城誌椿長至八尺一寸。下游外河山安海防一帶因洪湖清水交會東注。水勢盛大。臣前往各廳查勘岸工均屬穩固。其間或有出水界矮段落當令紮枕圍鑲以資抵禦。各工存料足備修防。現在水勢平定。上游淮水亦漸次消退。報聞。陝西布政使程燾奏洛川縣由鳳棲過仙姑河二十里即入大山山南北約徑百里東西距亦相埒。宜君中部韓城澄城白水諸邑皆環其外。山中有泉土性饒沃。方圓百里之內不下數千頃。洛川小邑民力未能廣為墾種。現飭該縣於附近農民廣為招募。有認墾者劃明界址給以執照以杜私墾之弊。於成熟後咨報定則得旨嘉獎。

大清高宗法天隆運至誠先覺體元立極敷文
奮武考慈神聖純皇帝實錄卷之七百八十七

實錄卷之七百八十七

七

大清高宗法天隆運至誠先覺體元立極敷文奮武考慈神聖
純皇帝實錄卷之七百八十八

乾隆三十二年丁亥秋七月癸亥朔享

太廟造和親王弘晷恭代行禮軍機大臣等議覆陝甘總督
吳達善奏稱嘉峪關外至哈密一路軍臺係屬新疆孔道一
切遞送報面暨商旅往來不絕該處安設臺站原由安西行
走前督臣楊應琚奏稱自靖逆沙州至哈密較靖逆歷安西
而至哈密近一百六十里係將多餘里數勻分於各站之中
以致人馬往還均虞疲乏經臣逐站查勘丈量沙州新路較
之安西舊路實遠二百里有餘且沙州一帶水泉惡劣戈壁

實錄卷之七百八十八

山坡綿長車輛易於竭蹶不惟文報稽遲即馬匹亦多倒斃
實為官民往來之累若由舊路至哈密其長流水黃蘆岡二
站水草豐美即格子烟墩數站間多戈壁而沿途挖有井泉
味平可飲兼之自安西以歷靖逆烟村相望民戶團居尤屬
輿情所便自宜循照前規將沙州臺站仍設安西至楊應琚
於紅柳峽設有拽運柴水車輛本屬苟且塗飾之計今臺站
既議改移其車輛亦裁應如所請從之又議覆陝甘總督
吳達善條奏改復安西舊站官兵應行事宜一哈密既有欽
差駐劄又有通判佐雜足資料理現在移駐哈密之安西道
無甚緊要應令仍回安西彈壓一軍站既設安西原路請照

舊將安西營遊擊千總改歸靖逆其靖逆營參將守備仍歸安西至安西額兵八百名除裁撥告駐外該處差務繁多勢難敷用查軍站既移之後踏實營已屬僻壤額兵三百名又沙州協額兵一千二百名俱屬過多請於兩處協營內裁撥兵二百名歸足安西八百名原額其千把外委安西既有九員無庸另行派撥一新疆往來官員及入覲回目伯克等向係肅州標鎮并沙州哈密二協營各拴餉馬一百匹供應乘騎今安西係適中之地差程絡繹勢必應接難周該處并補足額兵八百名共止存馬二百餘匹不敷撥遣請於哈密協及巴里坤鎮標營馬內各酌抽十匹歸安西營應差一淵泉

督辦奏行

縣丞原係分防馬蓮井子同派撥弁兵駐劄自改由新路將縣丞移駐淵泉所撥官兵亦即撤回今軍站仍復舊路應將該縣丞仍駐馬蓮井子每年派撥千總一員兵三十名與縣丞互相稽查一安西一路除現有墩臺汛房塘兵外每站應行添建者即將沙州新路木植拆移修建並每站派兵五名防守再舊路各站房屋坍塌無存者應一併將新路木植拆移建蓋均應如所請至該督所稱安西營兵八百名應復舊額現除裁撥巴里坤並告駐烏魯木齊共二百八十五名外止存五百一十五名乃僅請於沙州踏實兩處共裁撥二百名補數與原額仍有未符應令該督覆查詳晰咨明兵部察

覈從之甲子諭軍機大臣等據揚寧等奏稱伊等已抵木邦於四月初五初十等日賊匪四面環營來攻伊等親率官兵盡力拒戰官兵多有陣亡應查明造冊行知督臣咨部又詢問陸續奔出之把總馬彭三等據稱曾見已革遊擊蘇克進泰守備程策盧懷亮千總馬自錦把總陳遇慈委千總李天偉委把總李虎臣張耀祖及兵丁約計四五百名為賊所執等語官兵與賊接戰陣亡理宜施恩著交部照例議卹至為賊所執如蘇克進泰身係滿洲其程策盧懷亮等雖係漢人俱係官員不能効命疆場為賊所獲豈可留其軀命此際伊等已死則已若大兵到後投出著即行正法至於兵丁係

督辦奏行

愚魯小人如有投出者宜從寬宥不必照此辦理再木邦人眾前已歸附今又叛而助逆與官兵接戰其情殊堪痛恨不可不痛加懲治著傳諭明瑞進兵時務宜大伸軍威查明與官兵接戰賊匪如係前已歸附旋復助賊者必宜痛加懲辦如出於不得已依違其間者尚屬可原著明瑞酌量辦理並將此傳諭揚寧知之又諭緬地僻在南荒向阻聲教將來大兵進勦必得通曉語言熟諳徑路者用為嚮導自更易於集事現在軍營將弁中既無深習夷情之人而內地經商者雖略能識途其誠偽殊不足信因思各土司內如整欠上司必先捧屨能堵禦賊眾奮勇出力曾經賞以指揮職銜節予

優養必知感恩圖報。若將伊調至軍前時，加獎勵以備諮詢。差違自足資臂指之效。此外有如先捧其人者，並不妨留心體察量為錄用。亦驅策羣力之一助。即如從前戡定準夷，回部頗得各部落投誠頭目之力，乃明瑞所深知。今集衆直擣阿瓦城，若得細地誠幹可任者，用其所長，俾一切情形可以隨時隨地洞悉機宜於軍務，更有裨益。著將此傳諭明瑞知之。又諭從前辦理準夷回部時，將軍大臣等俱用清字摺奏。此次進剿緬匪，明瑞兼管總督，若具奏地方事件，不得已而必須用漢字者，著用漢字摺具奏。若進兵事務，則不宜用漢字，仍用清字摺具奏。為是。至向來滿洲用兵，俱以鳴角為號，與賊接仗，步伐止齋，足壯軍威。今遣往之健銳營兵丁，俱已攜帶前往。明瑞進兵時，於應鳴角地方，宜鳴角以壯軍勢。著傳諭明瑞即遵照此旨辦理。○乙丑

上詣暢春園問

皇太后安。諭軍機大臣等，據定長等奏稱明瑞等咨取馬二千匹，湖南綠營馬匹揀擇不能足數，因由湖北綠營內一併揀擇派官兵解送雲南等語。雲南既派滿兵數千名前往，則馬匹需用自屬多多益善。湖廣地近雲南，定長接得明瑞咨文，自應多撥數千匹，即綠營馬匹不敷，現有荊州滿營馬匹，彼處兵丁並未調撥，其馬正可調用，乃定長不行調用，自以

實錄卷六十八

四

實錄卷六十八

五

滿營馬匹，不便妄調，何其拘執之甚。此次兵丁經過，定長辦理不妥之處甚多。著傳諭定長、永瑞等，由荊州滿營馬匹內擇其肥壯者，選取二千匹解送雲南。此二千匹馬額，著定長出貲買補，仍著派安幹官兵沿途解送，斷不可致有虧傷。此事朕一委之定長，如護送失宜，致例斃過多，惟定長是問。軍機大臣等議覆太僕寺卿卓保奏稱牧場馬匹數年以來甚屬虧缺，因向無嚴禁蒙古盜賣馬匹之例，是以不肖蒙古等惟圖目前射利，以致盜賣日多。今除殘廢馬匹照例官為變賣外，蒙古等有盜賣官馬者，請交察哈爾都統等查拏，其私相售買之人，并著直隸總督山西巡撫及管關隘官員等沿邊黏貼告示，嚴禁商人私買官馬。倘經嚴禁之後，違禁私買者，或被拏獲，或經旁人告發，賣主買主俱照盜賣官馬例治罪。外將馬追出，仍歸原厥，其馬價在賣主名下追出。一半入官，一半賞給首告之人。其失察之該管官員等分別議處，應如所請從之。○吏部議覆山西巡撫彰寶疏稱山西雁平道一缺，向列為銜繁中缺，歸部銓選。今經部議加銜兵備其職守較重，應改為請旨簡用之缺。其都司以下員弁亦准其照例管轄，應如所請從之。丙寅。刑部議覆廣西巡撫宋邦綏奏稱太平府屬龍州地方於雍正六年改土歸流後，將該府通判移駐彈壓，遇有命盜等案，責令該通判承緝轉發，崇

善縣承審。其上龍土司並上下凍土州之勘驗審解亦俱歸崇善縣辦理。但查該縣係附郭首邑。政務既繁。又與龍州並上龍土司相距一百八十里。與上下凍土州相距二百二十里。往返數日。提解犯證。難免疎脫。拖累龍州通判。距上龍土司僅十五里。上下凍土州離通判衙門亦止四十里。請嗣後將龍州上龍上下凍土州三處命盜等案。統歸該通判勘驗緝獲。按限審擬解府。至通判既經承辦。命盜重案。應添設監獄專員管理。查上下凍土司原設吏目一員。事務頗簡。應將該吏目移駐龍州。為通判首領。專司獄務。其上下凍稽查巡緝等事。仍令該吏目兼管。應如所請。從之。○理藩院奏科爾沁台吉蘇魯木之妻格格們圖之妻格格旺舒克之妻格格等呈請來京請安。得旨。蘇魯木之妻格格下嫁已逾十年。准其來京請安。們圖之妻格格及旺舒克之妻格格下嫁甫及四五年。為時不久。著不必來京。嗣後凡下嫁蒙古額駙之格格等。出口已逾十年。呈請來京請安者。該院請旨具奏。如未過十年者。即行議駁。此內如有親喪等要事。必須來京者。該院聲明請旨具奏。丁卯諭曰。副都統福靈安去冬奉命前往雲南。朕因其從前征勦回部。曾經宣績。行間諳習軍務。是以暫留彼處。令其察看軍營情事。以便回京時面奏。嗣以其行走奮勉。勇往任事。特授為副都統。并令署理永北鎮總兵。

實錄卷七十八

六

實錄卷七十八

七

統兵進勦。今據明瑞奏。福靈安前從永昌力疾趨赴木邦。中途病勢加劇。復回永昌調理。不痊。於六月中旬身故。朕心深為軫惜。著加恩交部議卹。所有應得卹典。仍著該部察例具奏。其靈柩還京。著官為辦理。諭軍機大臣等。軍機大臣會同刑部審訊。湯聘據稱。孟良土司召丙人甚庸懦。夷情不服。以致該處地方復為賊匪殘破。蔓延九龍江。實係楊應琚用人之誤。又稱支放糧餉。並無憑據。可查以致承辦之知府達成阿不能銷算等語。孟良當緬匪滋擾之後。必得強幹土司方足資其整頓。楊應琚徒以召丙曾為召散所逐。遂不察其人之庸懦。率令管理地方。種種貽誤。舛謬已極。著明瑞鄂寧即體察孟良情形。召丙不堪勝任。另擇夷人中素所畏服。足資彈壓之人。令其襲職。以收驅策之效。至辦理糧餉。必以檔冊為憑。始可杜冒濫侵漁之弊。乃該處雖有派員一切支放。竟無稽查實據。至今難於覈銷。尤楊應琚措置乖方所致。並著該督撫將前後所辦軍需。詳悉確查。立法妥辦。乘便即行奏聞。○戊辰

上詣暢春園問

皇太后安。諭據阿桂烏勒登等奏。稱從前雅爾地方築城。曾鑄給雅爾參贊大臣印信。今楚呼楚亦築城垣。印信字樣不符。請鑄給駐劄塔爾巴哈台辦事參贊大臣印信。再塔爾巴

哈台人不識回子字印信請免鑄回子字樣惟用滿洲托忒二體字樣頒發并此新城三門額名色亦請賞發等語楚呼楚新修城名交軍機大臣定名具奏另發外所有參贊大臣印信即照所奏交禮部以滿洲托忒二體字樣鑄駐劄塔爾巴哈台辦事參贊大臣印發給兵部議覆兩江總督高晉奏稱命盜案內脫逃首犯照案緝拏後一年限滿將承緝接緝各員於年底彙奏按未獲名數議處又承緝官雖經四奉本身不致離任者仍入於年底彙題按年議處請嗣後彙奏武職仍照彙奏文職例分案彙題應如該督所請嗣後江省案緝盜首未獲并首夥全未弋獲之案以三十一年為始將

實錄卷一百八

八

承緝接緝督緝武職各員一併開奏武職既與文員一例參處自應改照文職彙奏例辦理從之○調四川重慶鎮總兵建興阿為雲南永北鎮總兵已已諭曰亢保病故著派秦璜前往開展辦事軍機大臣等議准四川總督阿爾泰奏稱駐劄嘉木達拉哩兵與察木多之遊擊相去甚遠請移駐西藏遊擊管轄從之○庚午調陝西興漢鎮總兵和邦額為四川重慶鎮總兵以江南安慶協副將張兆璠為興漢鎮總兵 辛未

上詣暢春園問

皇太后安 諭軍機大臣等我兵進勦緬甸現在廣集兵糧期

清 實 錄 乾隆三十二年七月上

以秋冬大舉自必勢如破竹迅奏膚功使西南邊境戢戢為一勞永逸之計但思緬甸僻在荒徼兼以山巒重阻風氣隔閼將來平定以後自難設立郡縣同於內地即欲如新疆回部留駐大臣坐鎮彈壓亦恐水土惡劣瘴癘時發我兵久駐非宜至匪酋情駭自其父契籍牙纂弒以來濟惡虐眾連年侵擾邊地近復敢犯我顏行尤為貫盈孽重自當犁其巢穴翦彼鯨鯢以彰天朝威遠服叛之典而既經剿滅其土地人民皆我幅隕赤子亦不可不為撫靖俾共享太平之福若欲另立酋長自無如仍擇莽瑞體苗裔但恐其後人久經禍亂或復選悞無能設竟委以重任未必能控羣蠻而聞聲救甚

實錄卷一百八

九

或同於井蛙之見仍然蠻觸相尋自滋猜嫌轉於柔遠無益莫若量各城大小分置土司使各守其疆界不相聯屬則伊等勢渙情睽不能驟合為一或可不致滋生事端亦衆建而少其力之意而各土司定則納賦咸受吏職更為易於制馭但須度其疆域險易詳審制宜如何瓦猛密木邦諸城自較為重要其餘亦當酌量道里遠近畫界區分俾不相侵附而所擇土司尤宜視其傾誠向化才堪効用而心可信任者授以土官俾之長世自衛其沐國恩其或桀驁巨測及強宗大姓雖一時震懾降附難必其不心懷兩端則當如回部之霍集斯等移其族黨妥為安置以示保全策可永杜後患此皆

六八七

大功告成後所必應籌辦及之者明瑞進兵時當隨地留心豫操成算將來辦理善後事宜即可就所經歷秩然有條措置自裕如矣至我大兵入聲勢甚盛所向必皆披靡自不難掃蕩賊巢而既定阿瓦規模甫就遠人心志未必遽能齊一又不可不暫駐重兵以鎮之或外地不便久留則於邊境要區權宜遙控此亦凱旋時所當計及者著於明瑞奏報之便諭知之俾得從容籌度以期萬全又諭前據鄂寧奏報楊應琚於四月二十八日自永昌起解續據明瑞奏於五月十五日在祿豐縣遇楊應琚擊解到彼等語距今將及兩月並未見貴州湖南等省奏聞或楊應琚在途行站濡遲抑係

實錄卷七百八

十

該撫等遺忘未奏著傳諭貴州湖南並沿途各督撫將楊應琚於何時遞入該省又於何時管押出境之處即行具摺覆奏仍於楊應琚解到時催令迅速解京尋貴州巡撫鄂寶奏覆楊應琚於五月二十九日入貴州境之亦資孔驛六月二十日出貴州境之玉屏驛共行二十一日報聞(壬申)孝懿仁皇后忌辰遣官祭

景陵諭前經降旨著泰璜前往開展辦事現今開展尚屬無事喀什噶爾有應辦事件泰璜著往喀什噶爾協助綽克托辦事其開展事務著柏琨前赴辦理兵部議覆兩江總督高晉等奏請江南小羊山棚廠樵採人等令官給印照按冊

實錄卷七百八

十一

查驗并請將疎漏隱匿之守巡員弁分別叅處一摺應如所請嗣後凡有赴山傭工貿易地方官給與印票守口官弁稽查驗放并該山畧口六處每畧官設廠頭一名分管約束倘仍有無照之人混迹採樵除照例押回原籍究治外即將疎漏之守口各員弁分別叅處從之○癸酉工部議奏查各省修理一切城垣衙署倉庫房屋等工定例保固三年嗣於乾隆二十八年原任河南巡撫葉存仁奏准將磚城改為保固五年至直隸江南河南山東等省黃運兩河隄岸閘壩各工其保固有一二年之不同俱經分別辦理在案但直省估修各案僅於文內聲明歷年久遠坍塌應修并不將建造年月承修官員及保固限期逐一開注明晰臣部無憑察覈往迅駁查致稽時日應請勅令各督撫嗣後凡有應行修理一切工程先將保固限期分別覈明除限內坍塌應行賠修者該督撫即行照例查辦其保固限外應請動項修理之工亦即將何年修造何員承辦曾否保固限滿均於估報案內詳細聲明臣部覈實辦理得旨允行(乙亥)

上詣暢春園

皇太后安諭滇省現在辦理進剿緬匪調兵撥餉所有經過各省地方一切供億雖俱動支官項絲毫不以累民但直隸河南兩省道路寬平車馬往來支應較為便易其湖北湖南

貴州等處毗連滇境本省驛馬不敷應用未免稍資民力前曾降旨將雲南一省地丁錢糧分別蠲免著再加恩將湖北湖南貴州三省軍行所過地方應徵本年地丁錢糧全行緩徵以紓民力該督撫其悉心察覈妥辦俾閭閻均霑實惠副朕軫念黎民至意該部遵諭速行 又諭今日進呈本內有湖南省夫察不行銷票應行降調之通判曾文鶴內閣擬票詢問督撫該員居官如何之處雙簽請旨雖係向來舊例但日久相沿恐開封疆大員庇護屬員之陋習不可不亟為釐正各省實授官員遇有因公里誤之案例應處分雖其人居官尚能稱職猶必出具考語送部引見候朕酌量降旨至於

實錄卷七百八

上

試用人員但經部議詢問督撫才具如尚可用即准仍留本省並不送部引見是陽設差等之名而陰啓姑容之漸何可為訓在實授人員經督撫等將伊平日於地方頗屬相宜已不無姑息既已據實出考朕引見時為駕輕就熟起見從寬免其降革者居多然其中或有實係平庸衰邁之人則督撫等必不敢妄加上考於朕前僥倖一試是引見一節所以衡量人材即所以澄清吏道所關實非淺鮮若試用里誤人員則其資更淺其賢否更知之不深乃經詢問即免去官並不取必於引見督撫等即不敢破格為之徇隱然或任其平日愛憎之私不無意為高下其手雖在公正之督撫猶且不免

況有下此者更復何所不至耶且此等人員各督撫從無有不稱職而令其罷去者率可知矣嗣後此等試用之員有因公里誤者俱照實授人員例督撫出具考語送部引見以昭畫一以杜弊端此案曾文鶴即照此辦理 又諭前經降旨令各督撫將所屬州縣有無虧空覈明保奏嗣據各督撫陸續奏到惟方觀承僅將上屆道府盤查并自列條陳於春間具奏塞責而於直屬倉庫現在有無虧空至今未見入告看來此事督撫等各有揣摩情形在直隸之觀望依違者固非而各省之循例彙陳者亦未必盡是也方觀承久任督撫寧不知取一結具一摺便可就案完案但以朕前此曾有一

實錄卷七百八

上

二年差員往查之旨直隸密邇京師倘差員朝發夕至如謗所言迅雷不及掩耳何由先事補苴而保奏一上即可操券責成無由委却是以該督既經塗飾於前復又逡巡於後真情於此畢露已另傳旨切責至於各省督撫等奉到前諭亦自必詳慎稽覈勉思飭屬奉公但其中一二明黠之人逆料所轄地方距京遼遠即有差員覆勘亦當先期豫聞州縣帑項稍有短長猶可綢繆未雨則雖體訪未甚真確此時仍不妨籠統奏開以符著令蓋朕各就伊等遲速參差一一揆其事理斷不出此兩端並非過為逆億深文者第既洞悉及此則將來因弊立法愈不得不力為揀正務使在近省者不得

試其模稜之智在遠省者亦不得逞其措置之工如有侵虧劣蹟一經體訪得實者必當執法痛懲以示炯戒各督撫等尚其切鑒前車毋謂不教將此再行通諭知之 諭軍機大臣等前因湖南省有彌補虧空之案曾通諭直省各督撫就所轄屬員內逐一查覈將有無虧空據實保奏今各省督撫業經節次奏到惟直隸所屬僅據該督於二月間援引上年三月內曾經道府等循例盤查結報之文以為似屬可信當即於摺內明悉批示並將條奏交議而該督於直屬各州縣倉庫實在有無虧空之處至今未據覈明覆奏揣其意不過因朕從前曾有閱一二年或派大員前往清查之旨在各省

高宗實錄卷七八八

高

道路遼遠京員出差先期聞信尚可設法補苴若直隸地近京城差員可以朝發夕至勢難豫事綢繆倘保奏之摺一經奏上便已信如成券無可委却看來該督之前次空文搪塞與現今之觀望不前情形當不出此然此乃著令飭遵之事豈有行於遠省而轉格於近畿者著傳諭方觀承令將所屬州縣實在有無虧空即速具摺奏聞毋得仍前支飾尋奏臣奉諭即行知藩司分飭各道府切實盤查結報直屬一百四十九州縣於庫項外尚有常平義倉等穀三百八十餘萬石數月以來雖節據該道府等清查結送而一切收支徵解各數目是否相符有無那掩必須藩司總匯衙門覈明方可憑

高宗實錄卷七八八

五

信適因藩司辦理兵差臣俱於四月公出容差竣回省趕緊查辦不敢觀望支飾得旨即速行查奏不可再緩 丙子上御勤政殿聽政 諭軍機大臣等據明瑞奏普洱離永昌稍遠一切軍郵約須旬日遞到而於省會較近現在鄂寧回駐省城嗣後普洱軍營事件令該鎮將兼報撫臣就近指示妥辦以免稽遲等語所奏甚是朕心深為嘉獎已於摺內批示普洱距省既較永昌稍近該處間有緊要事件兼報撫臣自得就近早為籌辦可省郵程往返稽遲亦足見伊等公忠任事彼此不分畛域於軍務最為有益至秋冬剋期進剿時明瑞統兵深入鄂寧即當移駐永昌接應一切兵馬糧餉諸要事普洱文報似不必復由省城且彼時我兵大振聲威直搗巢穴賊匪方將自救不暇又何能復至近邊滋擾則普洱一帶諒更無重要軍情必須急遞況目今原因永昌驛程偶為水阻一俟秋深潦退馳郵當更不慮耽延矣著將此傳諭明瑞鄂寧知之 吏部議覆江西巡撫吳紹詩奏稱廣信府屬弋陽縣西鄉距縣百餘里山深地僻向無專員駐劄以致賊匪巢穴無從查緝查弋陽縣縣丞名司糧務實屬閒曹應請將該縣丞移駐西鄉適中之大橋地方又撫州府屬金谿縣許灣一鎮離縣六十里民居稠密金谿與東鄉二縣漕倉俱在該鎮每屆徵漕時民夫雜遝更須專員彈壓查金谿縣縣

丞職司佐理並無專責應請將縣丞移駐許灣又撫州屬宜黃縣棠陰一鎮商賈絡繹該鎮離城遙遠亦無專員分駐查該縣止馬司巡檢實為冗設應請移駐棠陰均應如所請從之以通政司副使蔣元益為順天府府尹旌表守正捐軀之廣西蒼梧縣民譚現茂妻陳氏丁丑中元節

上詣

安佑宮行禮 遣官祭

永陵

福陵

昭陵

實錄卷七百八

六

昭西陵

孝陵

孝東陵

景陵

泰陵 遣官祭

孝賢皇后陵

端慧皇太子園寢 諭據熊學鵬奏伊弟熊學驥原任湖南鹽驛道任內令屬員代為買金一案問擬杖徒原屬罪所應得但伊父年邁思子情殷懇請代為捐贖情詞懇切著照所請加恩准其贖罪

大清高宗法天隆運至誠先覺體元立極敷文奮武孝慈神聖純皇帝實錄卷之七百八十八

實錄卷七百八十八

七

大清高宗法天隆運至誠先覺體元立極敷文奮武孝慈神聖
純皇帝實錄卷之七百八十九

乾隆三十二年丁亥七月戊寅

上詣暢春園問

皇太后安○兩江總督高晉江蘇巡撫明德奏奉諭江蘇糧額
飭令間府分免查江蘇省十一府州額徵漕白糧統計一百
九十七萬餘石江以南六府州漕糧較多本年應請間免松
江太倉常州三府州江以北五府州漕糧較少本年應請間
免揚州徐州海州三府州共漕白糧九十六萬餘石其江寧
蘇州鎮江淮安通州五府州漕白糧一百萬零八十餘石俟

實錄卷百九

二

明年再行蠲免得旨嘉獎 江南河道總督李宏奏洪澤湖
水自清口拆寬七十二丈之後水勢平定數日嗣據各廳營
稟報初三至初五等日湖水又陸續加長仁義禮三壩俱已
過水但查下游高郵寶應邵伯諸湖本年存水甚小三壩所
過之水無多諸湖儘可容納至清口東西壩為洪湖關鍵宜
洩宜於豫辦收束貴於及時所有收束清口正雜料物現已
豫備齊全至應行接築時即可相機趕辦得旨覽奏俱悉又
批既已三壩過水為何不言及復拆東西壩而但豫為收束
之計是又見小矣 已卯予故內大臣三等輕車都尉傅森
祭葬如例謚恪慎 予故鑲紅旗蒙古都統那親祭如例謚

恪勤 予故正白旗滿洲副都統福靈安祭葬如例 庚辰
諭軍機大臣等吳紹詩摺奏瑞金縣鄧之清主使誣告隣人
張德全強姦逼命一案將該縣陳素書寧都州知州書圖並
典史趙元綱附叅已批交該部察議矣此案劉氏本屬犯姦
之婦不復知有廉恥豈有因姦情敗露遽肯投河畢命其中
安保無潛逃隱匿之事且現在生死未明何能據為定案著
傳諭吳紹詩速即遴簡幹員確覈案情悉心研鞠務使水落
石出以成信讞 辛巳

上詣暢春園問

實錄卷百九

二

皇太后安 吏部議准閩浙總督蘇昌等奏稱臺灣一郡遠隔
重洋為全閩緊要門戶所屬四縣皆定為海疆要缺撫綏彈
壓勝任頗難請嗣後臺灣四縣缺出如有人地相宜准其不
拘繁簡通融揀調內地海疆不得援以為例從之 浙江巡
撫熊學鵬奏乾隆十九年前督臣喀爾吉善奏准將凡有塘
工各縣之巡檢典史皆令分管地段查點堡夫但江海塘工
當伏秋大汛之期必須專員駐守典史有監獄之責非巡檢
可比以之兼護塘工必有顧此失彼之慮查山陰會稽蕭山
餘姚上虞五縣俱設有縣丞並無別項專責應請改派各該
縣縣丞駐工管理而典史亦得專心監獄其巡檢分管地段
仍照原議遵行報聞 調山東巡撫崔應階為福建巡撫以

河東河道總督李清時為山東巡撫禮部尚書嵇璜為河東河道總督戶部左侍郎袁日修為禮部尚書命刑部尚書楊廷璋仍管正紅旗漢軍都統以正白旗蒙古都統永璋署鑲紅旗漢軍都統調正白旗漢軍副都統高恒為正白旗滿洲副都統以健銳營前鋒叅領富勒渾為正白旗漢軍副都統鑲紅旗漢軍都統王進泰為直隸古北口提督旌表守正捐軀之福建惠安縣民柯答妻黃氏 壬午

上以秋獮木蘭奉

皇太后自圓明園啟鑒諭朕此次巡幸木蘭所有經過地方本年地丁錢糧著加恩蠲免十分之三該部遵諭速行○諭

實錄卷百十九

三

軍機大臣等適聞提督岳鍾璜現在患病不能見人雖仍照常辦事年齒亦未甚老但恐精力漸就衰頹四川提督員缺緊要倘伊係勉強支持究慮照料未周公事不無貽誤著阿爾泰察看岳鍾璜目下病勢如何於公務有無貽誤之處據實奏聞將此遇便傳諭知之尋奏岳鍾璜夙患脚疾六月後漸就痊愈臣察其精神較前稍減勉力辦公尚無貽誤報聞 命禮部尚書袁日修仍兼管順天府事 是日駐蹕南石槽行宮 癸未駐蹕密雲縣行宮 甲申諭軍機大臣等從前青海郡王衮楚克達什請令伊承繼之子出家一事赴藏呈報彼處大臣陳奏因此獲罪該院議以罰俸二年經朕

加恩改為罰俸一年今多爾濟來京向伊詢問據稱從前衮

楚克達什並未向伊告知伊並不知情等語多爾濟係該處辦事大臣衮楚克達什此等事件並未向伊告知轉向駐藏大臣呈報代為陳奏殊屬不合雖事屬已往朕已施恩仍著傳諭留保住於會盟之便齊集眾人將衮楚克達什傳來作為己意曉諭彼云王之一切事件俱宜呈報本處駐劄大臣轉奏達部乃從前欲令汝承繼之子出家並不呈報本處大臣而鑽營班禪額爾德尼具奏殊屬非是部議罰俸二年蒙皇上格外施恩改為罰俸一年汝宜痛改前非嗣後凡事務宜呈報於我代汝具奏應達部者代為達部不得仍前恣意

實錄卷百十九

四

妄為倘不知悔改經我奏奏皇上亦斷無寬宥之理必從重治罪如此嚴加訓誨曉諭於眾知之 是日駐蹕要亭行宮 乙酉駐蹕兩間房行宮 丙戌諭軍機大臣等額爾德尼伯克處遣使進京請安其起程途次豫備等項雖不比初次來使若同歷年入覲之回子伯克等一體辦理稍覺過薄著傳諭駐劄喀什噶爾哈密大臣及經過各省督撫等一切筵宴等項照初次來使稍減照年班回子伯克稍增斟酌辦理妥協 調倉場侍郎范時紀為戶部侍郎禮部侍郎羅源漢為倉場侍郎以內閣學士倪承寬為禮部侍郎 是日駐蹕常山峪行宮 丁亥諭據明瑞奏稱曲尋鎮總兵索柱於專

委查勘之軍情要務急玩不前耽延用詐奏請革職等語案柱著革職留滇効力所有曲尋鎮總兵員缺即著明瑞於發往副將內揀選一員奏聞補授又諭曰譚五格著調補雲南提督其貴州提督員缺著楊寧調補譚五格現已赴滇楊寧著即赴貴州新任諭軍機大臣等據明瑞奏稱楊寧於進剿提調之任似非所長且自本邦退回不能服將士之心譚五格曾任滇省有年請將譚五格就近與楊寧對調等語已明降諭旨將該提等對調矣楊寧原止令其統兵剿戰至於軍營提調諸務本非其所長且年齒漸就衰老留之在滇亦屬無益今既調任貴州即令其赴黔任事譚五格久任滇

實錄卷七八九

五

中於該處情形素所諳習自可資其臂指之效至黔兵調赴滇南協剿者原係譚五格統領前往該提久與士卒相習驅策原易於用命且黔省尚有帶兵之副將等於本營董率約束亦為便易所有在滇黔兵仍著譚五格兼管尤無呼應不靈之慮將來統率進剿時總在明瑞斟酌調度以期迅速集事至索柱挾詐偷安已照所請革職令其自備資斧留滇効力所遺員缺緊要若由京補放恐道途遼遠到任需時該省現有揀發以副將委用人員著明瑞即於此內揀選妥員一面奏聞補授更為妥速可將此傳諭知之軍機大臣等奏訊問湖北黃梅縣民瞿實桂因伊父瞿學富前在

刑部控告舉人黎明五等派費承修隄工經刑部發回原籍定擬杖流等情請旨查辦得旨著刑部查明回奏此案派侍郎邁拉遜即速前往湖北會同定長秉公審訊不必來請訓是日駐蹕喀喇河屯行宮戊子駐蹕避暑山莊至八月丙子皆如之已丑上奉

皇太后駐蹕避暑山莊諭據期成額奏管理獲局之佐領王睿開設鋪面影射漁利驍騎校舒汝安幫同辦事情弊顯然請革職審擬並請將獲局協領明德鄂山一併解任質審其將軍金圖肯聲名亦甚平常應俟審明後再行參奏等語王睿舒汝安著革職明德鄂山著解任交與期成額等審明定

實錄卷七八九

六

擬具奏金圖肯亦著解任候訊其將軍印務著福僧額暫行署理步軍統領衙門奏湖南邵陽縣民唐秀山控告孫中立占伊妻房地並教令夥竊該府縣並不查辦請將唐秀山交該撫查審得旨邁拉遜現往湖北查審事件此案亦著交與邁拉遜會同定長審擬具奏○以正紅旗蒙古都統新柱為盛京將軍西藏辦事大臣官保為正紅旗蒙古都統以二等侍衛瑪瑞署熱河副都統庚寅

上詣

皇太后行宮問安諭據明瑞等奏永昌府知府陳大呂採買軍需糧石縱容家人胥吏等串同舞弊剋價浮收請旨革職

以便究審等語軍糧最關緊要前經降旨令地方官寬裕給值俾小民得需實惠乃該府輒敢派令額外浮交復縱容僕役扣剋剝民非尋常採買擾累者可比陳大呂著革職等因交與鄂寧速即嚴審治罪其案內有名人犯著該撫一併確訊定擬具奏○諭軍機大臣等今日明瑞奏到各摺已明降諭旨並將原摺改寫臣字發鈔矣嗣後如奏報軍務及一切地方公事俱照例稱臣著將此諭令明瑞知之○辛卯工部議覆盛京工部侍郎兼管奉天府尹雅德疏稱查望祭長白山神殿柱木剝爛牆院倒塌柵欄柱木亦俱朽損業經委員勘估懇請動項興修應如所請從之○兵部尚書雲貴

實錄卷三十九

七

總督明瑞雲南巡撫鄂寧奏覆查木邦頭人原係罕莽底與緬匪變藉牙父子不睦彼此不時攻殺乾隆二十七年間罕莽底病故緬匪擅將罕莽底異母弟昆象立為頭人木邦人眾不服將昆象戕害罕莽底子線五格被緬匪挾以為質木邦人又將罕莽底胞弟夔團立為頭人去歲楊應琚招撫夔團以木邦頭人在前明時原係宣慰司職銜是以賞給夔團二品頂戴授為宣慰司嗣因賊匪至木邦占據地方該處夷民或為賊匪所擄或竄伏山林惟夔團自攜三百餘戶來奔線五格亦由賊地逃出與夔團同在莽什南山居住此次在木邦打仗其頭目人等並未幫助賊匪惟微末夷人內有不

及避入山菁者被賊擄去役使尚無與賊合夥與我兵打仗等情報聞以故奉恩將軍伊克積善弟和克積善襲職旌表守正捐軀之山東滕縣民韓景妻李氏是月江南河道總督李宏奏夏間雨水連綿黃河水勢旋長旋消臣赴清口察看情形東西灣滾壩現止過水五寸及一尺五寸不等臣遵諭先事籌辦自以五壩免致過水為要目下黃水日消清水出口溜勢甚湧東壩尚可再拆五丈以資暢洩通計清口共寬七十二丈嗣後上游雨水不多可期不致過壩得旨覽奏俱悉人批何不再拆東壩為此先入之言乎○漕運總督楊錫紱奏報雨水情形得旨覽奏欣慰今年各省秋成景

實錄卷三十九

八

象實屬

天恩優厚朕惟益深欽承惕息耳○安徽巡撫馮鈐奏續據太平府屬之當塗縣廬州府屬之無為州和州屬之含山縣先後稟報七月十六七等日烈風驟雨江水加長尺餘濱江臨河圩圍田禾俱被漫淹房屋間有坍塌被水人民遷移高阜搭棚居處並無淹斃人口當經飭員照例撫卹得旨所有成災處所善為妥辦賑卹不可令屬員蠹役侵食百姓不得實惠也○河南巡撫阿思哈奏靈寶縣知縣稟報南鄉地方七月初七日雨勢狂驟澗水暴漲漫溢澗東澗西及簷下三村近澗居民倉猝不及趨避以致被水者四十八戶淹斃男婦

大小二十四名口倒塌草房一百一十九間其沿灘地畝間亦衝壞臣親赴該縣督同印官確勘水已消落照例給葬埋修費銀兩極貧者酌予口糧其被淹地九十八畝尚可補種蒺藜菜蔬亦酌給籽種銀報聞調任河東河道總督李清時奏黃河水勢消退工程俱已平穩但渾流一過即當留心收蓄以濟來歲運行除微山一湖地處下游上承曹單金鄉等州縣坡水來源既廣應將韓莊湖口雙閣滾水壩聽其洩放外所有蜀山馬踏南旺等三湖重運過時放水接濟現伏汛將完自應早為收蓄臣飭令將三湖進水引渠一律挑深又開放臨汶斗門閘座使汶水隨長隨收三湖有所貯蓄得

實錄卷百十九

九

旨嘉獎○又奏謝補授山東巡撫恩得旨覽山東自阿爾泰崔應階二人整理之後吏治頗佳汝但守而勿失可也陝甘總督吳達善等奏哈密倉貯歷年軍需案內下剩並塔勒納沁屯田收穫等項共存豌豆一萬六千餘石每年各處進馬並哈密應差駝隻屯田牛馬等項零星支用祇需豆一千六百餘石近年哈密雨水較勤恐盈餘久貯難免霉濕之虞查軍臺奉旨改由安西舊路哈密所管營塘安設馬驛暨應差馬匹每年應需飼餵豆五千九百餘石向由淵泉玉門二縣在額徵豆石內按年運供每年計需腳價銀二萬五千餘兩使費較繁應請將哈密倉內舊存豆石除每歲酌留一千

實錄卷百十九

十

六百餘石外其餘一萬四千餘石即按年撥供軍臺營塘暨應差馬匹之用所有淵泉玉門二縣應運豆石暫令停止得旨嘉獎又奏查巴里坤向止播種青稞而哈密塔勒納沁惟植麥豆細糧兩處供支原宜以有易無互相接濟但近年以來巴里坤地氣和暖屯種小麥連獲豐登民戶墾種亦俱有收彼地麥價較之哈密轉賤而哈密青稞較之巴里坤亦不甚昂若彼此互撥不惟無益於倉貯抑且徒糜押運往返之費請將哈密巴里坤互運麥稞稟行停止如兩處供支需用不敷各於就近採買備供報聞四川總督阿爾泰奏據奉節縣知縣詳稱於四月十六七八等日密雨連綿十八夜雷雨交作城北山水陡發由關廟溝入城分趨大缺口軍裝溝流出將沿溝舊城基址悉行衝陷請將城腳移改另辦臣批飭川東道履勘查報緣該縣城垣坐落山麓前臨大江後枕峭嶺城後諸山溪水均由關廟溝等處穿城而出城基係跨溝建造前估報時仍循舊制今各溝被水衝陷城根護土亦被埽動難照舊址施工查城身舊基之內儘有餘地應將城身移進數丈於平曠地面另築城腳砌造堅固其被衝各溝口仍令加築護坎以防汎刷報聞貴州學政陳夔龍奏黔省所屬地方均與各省毗連每有湖廣四川附近之人希圖貴州人少額多獲售較易遂私通康保竄名冒考以致土著

生童艱於進取文風日就頽廢查乾隆二十五年奉旨勅令雲貴川廣各學臣徹底清釐准其改撥各生均係違例冒入襖革本所應得既邀寬典自應據實呈首乃復希冀便宜多方隱匿理應嚴加懲創以昭定制臣現飭各府及所屬教官逐一細查分別辦理其在乾隆二十五年未經清釐以前者該生不行具首應科其隱匿之罪將衣頂襖革照違制律問擬杖責失察教官照例議處其在二十五年以後者係已經清釐之後仍敢勾通冒籍情罪較重除將該生治罪外濫保之廩生一併查究示懲報聞

實錄卷之七百八十九

土

大清高宗法天隆運至誠先覺體元立極敷文奮武孝慈神聖
純皇帝實錄卷之七百八十九

大清高宗法天隆運至誠先覺體元立極敷文奮武孝慈神聖
純皇帝實錄卷之七百九十

乾隆三十二年丁亥閏七月壬辰朔諭據定長奏湖北黃梅廣濟等州縣六月間雨水過多江湖陡漲隄垸受衝田廬間有淹浸現在親往查勘等語該處州縣濱臨江湖每遇夏秋盛漲易致浸溢此次黃梅廣濟等處被災稍重朕心深為軫念所有黃梅廣濟二縣著該督即速照例撫卹仍著詳勘被災情形妥協經理毋使稍有失所其黃岡漢陽漢川沔陽江夏武昌嘉魚等各州縣衛並著迅速查明成分數分別賑卹該督其董率所屬加意籌辦實力撫綏務俾小民均霑實

實錄卷之七百九十

惠毋致胥吏從中滋弊以副朕軫卹災黎至意該部遵諭速行刑部奏湖北黃梅縣民瞿實桂控告黎明五等侵蝕隄工銀兩一案前經伊父瞿學富在部具呈當將人犯遞交該撫鄂寧審係虛控覈擬杖流嗣據瞿學富之子瞿伯寄復來京呈訴又咨署撫定長查辦尚未咨覆得旨知道了從前瞿學富赴部控告時該部何以不行奏聞發審所辦非是刑部堂官著交部察議摺內情節著交與邁拉遜二併查辦
已諭據馮鈐奏安徽宿松等州縣臨江濱湖七月以來大雨時行江水陡長以致圩洲田地房屋間有淹浸倒塌現在飭屬查勘照例撫卹等語該處沿江州縣地勢低窪此次江水

盛漲被災稍重朕心深為軫念所有安慶府屬之懷寧桐城宿松望江太湖池州府屬之貴池銅陵東流太平府屬之繁昌蕪湖并和州等處著該撫速行酌撥撫卹妥協經理仍飭各州縣設法疏消酌量借給籽種俾得乘時補種晚秋以資接濟並確勘現在被水情形及將來收成分數詳覆是否成災分別辦理該撫務督率所屬實力籌辦使被水窮黎不致失所以副朕軫卹至意該部遵諭速行 諭軍機大臣等期成額等查辦幫貼沒票銀兩一案究出佐領王睿韓朝鳳等開設德聚德錦店鋪壟斷圖利並恃韓朝鳳為將軍親信之人倚藉聲勢朋比為奸舍國肯曾知王睿等聲名不好仍令

實錄卷七十九

二

在局盤踞多年其中自有別情等語舍國肯身為將軍何竟容管理漫局各員通同舞弊若此深堪駭異舍國肯韓朝鳳俱著革職與已革職之王睿舒汝安一併拏問交與期成額等即行詳細研鞫不必俟新柱到任會同辦理倘各犯證狡飾不吐即行嚴加刑訊務得實情如舍國肯等實有染指分肥之處即將各該員任所貲財查封一面具摺奏聞將伊等本旗所有家產一併查辦將此傳諭期成額等知之 又諭昨據定長奏湖北黃梅廣濟等州縣六月間江湖盛漲隄垸圯廬間有受衝當經降旨諭令該督即速照例撫卹並著詳勘黃岡漢陽漢川沔陽江夏武昌嘉魚等各州縣銜被災分

實錄卷七十九

三

數分別賑卹矣今復據該督奏黃梅一帶先後被災情形較重其羅田穀城二縣亦因蛟水長發衝淹民房現在確查辦理等語該處頻經被水已屬積歉之區貧民生計難免拮据該督務即詳覆被災輕重於撫賑各事宜飭屬妥速籌辦加意撫綏俾窮黎均霑實惠毋致稍有失所以副朕軫念閭閻至意著將此傳諭定長知之 甲午吏部議覆山西巡撫郭寶奏稱豐鎮廳舊設高廟子巡檢一員係在牧廠之東今勘明大莊科距高廟子百餘里地處適中堪以安設請將石王縣成遠堡巡檢一員移駐大莊科其大莊科迤東村莊歸原設高廟子之巡檢管理大莊科迤西村莊仍撥歸新設之巡檢管理均隸豐鎮廳管轄鑄給大莊科巡檢司新印其成遠堡巡檢印信俟移駐後繳銷應如所請從之 添建山東福山縣巡檢衙署從調任巡撫崔應階請也 旌表守正捐軀之江蘇宿遷縣民陳某妻張氏 乙未陝甘總督吳達善奏報巴里坤開墾田地七千五百五十畝有奇 丙申諭曰巡撫莊有恭已經病故所有伊學政任內未完銀六萬餘兩著加恩寬免 丁酉河南巡撫阿思哈奏臣審擬蔡淮英辦理車輛濫行科派一案緣本年四月內健銳營官兵五百名前赴雲南由豫省經過各站俱需車輛應付杞縣派車十一輛詎蔡淮英不照定價發給濫行科斂共派四百三十二戶每

名勒交銀三兩共收銀一千二百九十六兩交武生李振遠等赴站辦理又多派餘車十四輛每大戶三十名出車一輛先令駕驗蔡淮英混行駁換勒令另購肥驢價值昂貴合計買驢銀一千九百餘兩又縱差役勒詐彼此分肥至李振遠同書役等押車赴站蔡淮英明知派項多餘並不確數撙節聽憑李振遠徇情多給夫役工飯銀兩恣意花銷以致民怨沸騰臣反覆嚴審雖無從中染指情弊而任情科派苦累閭閻蔡淮英應照因公科斂所屬財物不入己生贓論律加一等杖一百流二千里武生李振遠訊無侵蝕銀錢但徇情多給應照不應重律杖八十照例納贖尚非行止有虧應免斤

實錄卷七十五

四

革餘分別輕重辦理得旨另有旨諭未免大題小作有事化無事大不是矣諭軍機大臣等據阿思哈奏已革署杞縣知縣蔡淮英辦理送兵車輛濫行苛派一案審無染指情弊閭閻杖流等因一摺所辦甚屬非是已於摺內批示矣蔡淮英辦送兵車輛敢借端科斂恣意派累若非該撫即時訪聞叅劾安知所派銀兩不即從中侵蝕為自肥囊橐之計且李振遠以武生承辦地方公務徇情多給安知其非親故或事後索謝皆未可知既經擬杖亦豈有不行斤革反行開復之理前因該撫據實查叅曾交部議敘乃今審擬此案忽爾意存姑息曲為開脫希冀化大事為小事殊非朕期獎之意阿思

哈著傳旨申飭此摺且不必交部覆擬仍著該撫另行嚴審務得確情定擬具奏可將此傳諭知之○旌表守正捐軀之河南郟城縣民劉智媳馬氏○戊戌

上諭

皇太后行宮問安○戶部議覆浙江巡撫熊學鵬奏稱浙省向例每年於漕白二糧開行後糧儲道會同布按二司將辦漕之府州縣並衛所備弁等官開具賢否事實填註考語造冊咨送倉場侍郎衙門備查倉場侍郎總理天庾各省漕糧到通交卸米色是否純潔糧石有無虧缺以及押運員弁如有營私等弊原可隨時叅究至於外省辦漕各官並不由倉

實錄卷七十五

五

場衙門考覈如府州縣所司案件甚多不止漕糧一項各衙所備弁另有所司屯田及弓馬考驗其賢否自有各該管督撫及漕運督臣查辦即遇舉劾之年亦向不與倉場侍郎會覈辦理所有此項文冊乃是虛文請嗣後倉場衙門令外省每年開送各官賢否文冊之處永行停止等語查前項造送文冊漕運全書內並未載有此條每年倉場亦無咨報臣部之案隨咨查倉場衙門據覆止係浙江江西兩省相沿造送節年存案亦無辦理之處是此項文冊該衙門並無查覈事例且辦漕之省有八而相沿造送者止有浙江江西兩省其為虛文而無關考覈可見應如該撫所請停止至江西省亦

係相沿造送。應請一例停止。從之。○己亥。諭軍機大臣等。前降旨令各督撫就所轄屬員內通行盤查。有無虧空之處。據實覆奏。候朕酌量派大臣前往覆查。昨據阿思哈奏。河南通省並無虧缺。而所派查虧空之員。河南陝州一屬。則委南汝道逮彭齡。南陽汝州一屬。則委候補道畢來玉。此二人均非能事之員。其所查各屬。恐未必即可深信。邁拉遜現在差往湖廣查審事件。著於差竣回京。路過豫省時。將河南陝州南陽汝州四屬倉庫錢糧查驗。是否果無虧缺。據實覆奏。可將此諭令知之。○庚子。諭今日召見原任臺灣鎮總兵楊瑞年。力實已衰頹。著以原品休致。所有任內應行罰俸之處。著加恩寬免。○吏部議覆浙江按察使歐陽永禔奏稱各省外府州縣不得藉端赴省。其因緊要事件赴省者。准照例扣展日期。如無端赴省延誤。概不准援例展限。得旨吏部議覆歐陽永禔條奏。州縣不得擅離職守一本。所稱分別公出事由。准展限不准展限之處。殊為有名無實。州縣官每藉公務為名進省謁見上司。以圖識面。不顧曠日誤公。此等陋習。於吏治大有關係。雖屢經嚴禁。而各省比比皆然。若如吏部所議。因緊要事件赴省。仍准扣展限期。則安知狡猾之吏。不假捏名目奔馳會城。既得幸免處分。復可遂其私智。督撫又從而加之庇護。誰復糾察其非。雖名為增一科條。究屬具文無當。又

實錄卷七十九

六

實錄卷七十九

七

安能杜黃緣巧託之弊。嗣後州縣官概不許託故赴省扣展公出日期。其有派委會審及查辦緊要事件。必須檄調到省者。該督撫將應行扣展之故。於年終彙奏一次。交部查覈。如有假公濟私。並無實據者。或由部查出。或別經發覺。惟該督撫是問。禮部議准。四川布政使張逢堯奏稱。查僧人例應投師傳牒。披剃川省無業之徒。每多濶跡空門。仍不披剃。名為帶髮修行。以不僧不俗之身。潛居菴觀。勾引為匪。花消寺產。尤為縹流敗類。請勅令各省督撫嚴飭所屬地方官。將一切菴觀寺廟。實力稽查。如有此等髮僧。勒令還俗。外來者驅逐回籍。俱令編管為民。倘地方官稽查不力。別經發覺。照例叅處。並將容隱不報之該管僧官及地保。按律治罪。從之。予故工部侍郎范燦祭如例。○辛丑

上諭

皇太后行宮問安。○癸卯。蠲免甘肅皋蘭金縣河州隴西寧遠通渭安定漳縣會寧伏羌平涼隆德固原涇州莊浪崇信靜寧靈臺鎮原鹽茶廳華亭安化寧州合水環縣張掖永昌平番寧夏寧朔靈州中衛花馬池州同巴燕戎格廳西寧碾伯等三十六廳州縣災地四萬九千六百五十四頃五十八畝。有奇額賦。旌表守正被戕之廣東新安縣民胡得勝妻楊氏。甲辰諭曰。馮鈐審擬廣德州丐匪恃眾搶奪擾民。拒捕

一案已批交法司覈擬逮奏矣。此次獲犯內有前在徽州休寧境內夥眾強乞偷竊滋事者十人。彼時巡撫託庸並未奏明嚴行治罪。僅擬以枷杖在外完結。致匪眾復改名犯案。辦理殊未得輕重之宜。託庸著交部察議。流丐聚眾滋擾。實為地方之害。自當盡法處治。以儆兇頑。若因其係游食丐徒。稍存姑息之見。顛預了事。則伊等益肆無忌憚。轉徙他處復生事端。所謂萌蘖不去。將尋斧柯。不可不防其漸。嗣後各督撫遇有此等案犯。務當按律嚴懲。無得僅以外結輕率完案。

實錄卷七十九

諭軍機大臣等。馮鈴審擬廣德州丐匪滋擾一案。已批交法司覈擬逮奏矣。此等匪徒敢於聚眾搶奪擾民。拒捕情節殊屬可惡。若不嚴加懲治。無以示儆。著傳諭刑部堂官將原摺悉心覈擬。如案犯內有情罪較重。該撫審擬從輕。未得情法之平者。可另行改擬具奏。又諭據刑部等覈改河南睢州民劉玉樹謀死楊鳳來一案。已照擬准行矣。此案劉玉樹始則誑財謀命。繼復殺命取財。實屬兇惡之尤。自應速正刑章。以昭信讞。乃該撫率稱其初欲騙財。並無害命之意。擬以斬候辦理。殊屬寬縱。此必何燭扭於修積陰功之見。有意從輕。所致。前因其念佛茹齋。素有沽名之習。屢經降旨訓飭。應知悔改。乃於此等案件仍復如此定擬。是其痼疾未除。即此可見著傳諭阿思哈將何燭是否勝任臬司之處。據實奏聞。毋

實錄卷七十九

得稍存徇隱。尋奏查何燭久任河工。熟習機要。其於吏治向非諳練。初辦原覺生疎。近日頗知遜勉。學習尚可勝任臬司。報聞。又諭據期成額朝銓奏稱。審辦佐領王睿韓朝鳳等開鋪購買私漫。互相謀利一案。審出將軍舍圖肯因韓朝鳳欠銀未償。將所獵鹿隻變賣抵還。又收韓朝鳳朝衣物件等語。期成額等不將正案內情節明白研審。反將舍圖肯瑣細事件究辦。殊屬錯謬。且期成額等奏稱王睿韓朝鳳開設德聚德錦等鋪。購買私漫。轉賣與交漫之人。於中取利。將軍舍圖肯明知王睿聲名惡劣。將王睿私行喚入。遂不復究。仍令王睿辦理漫務等語。奏到時朕以舍圖肯身係將軍總理彼處事務。誠知屬下行徑不端。旋復中止不究。仍令辦理漫務。舍圖肯定有情弊。自應審明治罪。是以將舍圖肯革職交期成額等審訊。乃期成額等置正案不究。另生枝節。非因舍圖肯實有情弊。應獲重罪。意欲從輕完結耶。況舍圖肯賣鹿買漫。所獲幾何。果於漫務內有弊事。已有年。豈止此數百兩之數。期成額等豈皆見不及此。朕將新柱補授盛京將軍。令其馳驛前往諒此時已到彼處。將此傳諭新柱。令其會同期成額朝銓。務將漫務案內舍圖肯實在有無私弊及染指與否之處。逐細審明。斷不可草率了事。又諭曰。期成額等審辦盛京漫務一案。將正項應審事件。並不明白審究。反另尋枝

節以瑣事具奏甚屬非是因降旨復交新柱期成額朝銓等務將舍圖肯於漫案內有無私弊之處審明具奏但期成額辦理此事已屬錯謬著傳諭新柱將此案內應審之王容韓朝鳳舒汝安及案內干涉之伊等子弟俱交期成額朝銓領赴行營交軍機大臣審明具奏 乙巳諭軍機大臣等方觀承奏永定河水勢情形一摺殊未明晰該處被水田畝如在隄埝之外本係民間恒業即應查明被水輕重加意撫卹分別成災與否按例辦理而疎防之河工文武各官亦應查叅議處若所淹止在埝內則其地當屬官地應留讓與水原非近埝居民所得藝植何竟據為故有於一水一麥之外漸種

實錄卷七十九

十

秋禾且梁穀不已復爾廣植穀豆平時既與水爭利侵占河灘今又因其低稼偶漫并與緩徵於情理未為允協且埝內之地又何得有租而緩徵於朕向旨讓地與水之處顯已違背此等情形摺內並未分晰申敘著傳諭方觀承即行據實詳悉覆奏尋奏查下口兩埝內地畝准除糧額早經奉有恩旨而民情則以除糧即恐失業為慮且近河居民習知水勢水過淤停即得化瘠為腴故皆不以水為害而轉與水爭利遇有水大年分及水道遷改之區臣惟有察其被淹情形分別額賦灘租酌量辦理凡上游六工灘地熟則徵租荒則免租原無緩徵名色至下口埝內雖係有糧之地然例無賑卹

實錄卷七十九

二

惟酌請緩徵臣此次查勘水道村民援照舊例懇請將埝內村莊被淹地畝照上屆酌予緩徵但未將上游灘地無緩徵下口糧地有緩徵之處分晰聲明報聞丙午諭朕以杜爾伯特扎哈沁烏梁海台吉頭目每部落各派一人在科布多駐班未免竭蹶因降旨令伊等互相輪值三部落各合派一人駐班或一月或半月更換今據將軍成衮扎布等奏稱若將伊等均令輪值駐班此中不盡屬曉事之人杜爾伯特烏梁海同在一處遇有事件既屬近便且地方情形大臣等詢問甚屬有益可否添人與車凌烏巴什等按月輪值駐班之處行文請示又據軍機大臣等覆奏科布多駐班之人與車凌烏巴什等一同輪值駐班雖屬有益但伊等習於游牧若同喀爾喀一體常川駐班未免過勞將伊等分為四班每班二人輪值更換一年八人輪流行走亦不至過勞再此四班內著將圖布慎察達克之子塔斯呼勒作為一班此外由成衮扎布處將曉事之人派二三名與車凌烏巴什巴桑扎木禪參配駐班伊等游牧無事令其輪駐如有事故二人可以均回游牧但伊等既與喀爾喀一體駐班所有應得口糧等項著施恩照喀爾喀一體支給將此傳諭成衮扎布遵照辦理 閩浙總督蘇昌浙江巡撫熊學鵬奏覆臣接准兵部咨議浙省沿海船隻應行嚴密巡防一案臣等將浙江通省情

形逐細察。除各府屬或係內地並非海疆。或久經封禁。不許採樵搭廠。或地屬荒山。雖未封禁。無可樵採。外惟查附近定海縣衙山之倒斗。愚沙塘。獺頭。與小衙山等處。查屬禁地。但每年春冬漁期。有暫時搭披貯養貿易。又寧海縣之金漆門林門二處。每當漁汛時。亦有暫時搭廠貿易之人。海洋關係綦重。自應嚴密巡防。所有搭披貿易漁船。應令各將弁查明執照。於何日搭廠。何日撤回之處。一一造冊稟報。加意巡察。毋使在地滋匪。又查溫台等處。洋面漁船。每遇漁期。在洋張網捕魚。名曰守行。此等守行之人。因在本境。並不出洋貿易。是以向未給照。查此項守行船隻。雖在本地。究係海洋。難

實錄卷之九十九

主

保無借口。遭風飄往別處。以致為匪等事。現飭地方官查明一體給照。倘有飄往別處者。彼處守口員弁查明遞解回籍。至浙省商漁船隻及出入口岸。原有令地方官驗烙給照。並令汛口官弁稽查驗放之例。如有無照船隻及人。照不符并私越往來逗遛在外者。應即查拏治罪。倘該員弁不實力查辦。立即嚴參究處。下部知之。四川總督阿爾泰奏查川省派赴滇省兵八千名。除解馬之兵二千二百五十名。分為十餘起前進外。尚有兵五千數百名。隨會飭各營以三百名為一起。逐日起程。計自六月十九日至七月十二日。省標十營及川北松潘重慶各鎮官兵全數起程。臣令領兵總兵達興

阿及各隊將備等官弁。加意照料。務期八月以內趕至永昌軍營。以備調遣。至川省前准滇咨代辦牛馬等項。除抽撥營驛馬二千二百五十匹。業已全數起行外。其餘又添辦馬七百五十匹。現亦陸續代買解滇。其牛隻一項。滇省需用既多。臣已催令各屬將先辦之二千頭趕緊起運。餘再設法盡力湊辦。得旨嘉獎。旌表守正被戕之四川郫縣民蘇萬吉女蘇氏。

實錄卷之九十九

主

大清高宗法天隆運至誠先覺體元立極敷文奮武孝慈神聖純皇帝實錄卷之七百九十

大清高宗法天隆運至誠先覺體元立極敷文武孝慈神聖
純皇帝實錄卷之七百九十一

乾隆三十二年丁亥閏七月丁未

上詣

皇太后行宮問安。戊申軍機大臣等議覆伊犁將軍阿桂等
奏稱伊犁地方遼濶陸續添派駐防滿洲錫伯索倫察哈爾
厄魯特攜眷官兵及屯田回民將及二萬戶屯田修城之綠
營兵効力贖罪及發遣人犯亦有數千名。惠遠綏定二城商
民漸多此皆由各處湊集良善者少。所有訟獄案牘彈壓地
方等事惟同知一員經理而監獄亦係該同知管轄未免過

伊犁奏書三

一

煩恐有顧此失彼之患查烏魯木齊等處俱已設立巡檢伊
犁請照例於惠遠城添設巡檢一員兼理典史事管理監獄
綏定城添設巡檢一員兼理倉大使事彈壓商民該巡檢除
管理監獄倉務外如遇地方有不法情事即行查拏解送同
知衙門審擬定罪其應給鈴記擬定惠遠城巡檢圖記綏定
城巡檢圖記字樣行文咨部鑄給伊犁乃新定邊疆事務殷
繁所有添設巡檢二員請由陝甘二省相當官員內揀選賢
能者撥往俟三年期滿時出具考語照苗疆俸滿之例陞用
均應如所請從之。又議奏伊犁將軍阿桂等奏稱管理伊
犁索倫錫伯察哈爾厄魯特昂吉之領隊大臣等各統領一

伊犁奏書三

一

部落事務一切註冊行文若無鈴記不無私行添改等弊請
將管理索倫錫伯察哈爾厄魯特領隊大臣等亦照辦理庫
車英吉沙爾等小城大臣等一體各鑄給鈴記再糧餉處係
辦理官兵俸餉等事駝馬處係收交各部落牲畜調用一切
牲畜等事關係帑項請每處各鑄給關防即交該司員等掌
管再固勒扎倉官及惠遠城倉庫官亦係收放糧餉緞布等
項所關尤重請每處各給鈴記以免私行添改之弊應如所
請從之。已酉諭前因湖北省黃梅廣濟及黃岡漢陽等州
縣衛間有被水之處業經降旨即速據實查勘分別加恩賑
卹毋致失所今據定長續奏湖南之湘陰益陽等處亦於六
七月間雨後水漲以致隄垸田廬間有淹損等語朕心深為
軫念所有湘陰益陽沅江龍陽武陵安鄉華容并澧州祁陽
等州縣被災情形著該督撫即董率所屬詳覈確勘加意撫
綏務俾均霑實惠毋使稍有拮据以副朕軫卹窮黎至意該
部遵諭速行。吏部議覆兩江總督高晉疏稱案准部咨淮
揚淮徐兩河道均係衝繁難三項在外揀選題補之缺今既
加以兵備道銜嗣後缺出是否仍令在外題補或由部請旨
簡用應令查明具題定議查淮揚淮徐兩河道各有經管一
切修防事宜黃運湖河緩急工程均須該道董率必須平日
熟諳河務之員題補方與河道民生有裨今雖俱加兵備道

銜而職任仍然如舊。應請嗣後淮揚淮徐兩道缺出。仍照舊例在外揀選題補。應如所請。從之。○兵部議覆廣東巡撫王檢咨稱廣州將軍及左右翼副都統衙門。請各裁去儀從八名共二十四名。應如所請。從之。工部議覆調任河東河道總督李清時疏稱。沁河廳屬嶧汛運河西岸韓莊閘上下湖面大石工程。為湖河保障。緯輓要區。單隄一線。喫緊非常。該工歷年久遠。去歲大水衝激。又兼冰凌層疊。直撞以致該工打壞三段。共長三十丈。舊石已坍入湖中。土餞隨之傾卸。業經委員勘估。懇請動項興修。應如所請。從之。○豁除浙江太平縣坍沒沙塗田地一百五十三頃四十畝。有奇額賦。○庚

實錄卷之三

三

戌諭曰。御史虞鳴球奏請禁止河臣用屬員為內幕。并直隸河員係本籍者。概不得委署地方一摺。所奏甚是。各省河臣辦理一應河防事宜。原應另延幕客。慎重關防。即有熟悉河務人員。亦祇宜留其隨轅差委。若竟令為入幕之賓。則一不安分者。或即借此招搖。自所不免。今虞鳴球既有此奏。嗣後各河臣。概不得調屬員為內幕。至河員中。以本籍之人。委署地方事務。尤非整飭吏治之道。亦著永行停止。諭軍機大臣等。御史虞鳴球奏請禁河臣用屬員為內幕一摺。已降旨允行矣。至所稱總河李清時幕中有河南湯陰縣縣丞章輅一員。遇事生風。尤為眾所側目。至有小總河之稱等語。該

員以丞倅微員。若果如該御史所云倚藉河臣聲勢。遇事招搖。至為眾所側目。阿思哈近在同省。豈竟毫無見聞。何以從前並不參奏。著傳諭該撫。將縣丞章輅如何借總河內幕名色。遇事生風。及眾人稱為小總河之處。逐一查明。據實奏聞。毋得稍有瞻徇。尋奏查湯陰縣縣丞章輅。前河臣李宏暨李清時兩任。俱在幕中留辦幕務。李宏調任南河。曾將章輅奏請留江調用。部駁未准。上年十一月。李清時又委署山東東平州州判。其湯陰縣縣丞雖已實授。並未至任。每年隨總河來豫防汛。不過數月。未有招搖生事之處。亦無小總河之稱。下部知之。○又諭曰。御史虞鳴球奏請禁止河臣延請屬員

實錄卷之三

四

以充內幕一摺。已交部准行矣。摺內稱李清時幕中佐雜共有五人。而湯陰縣縣丞章輅一員。遇事生風。尤為眾所側目。至有小總河之稱等語。河臣延請屬員為內幕。本非體制所宜。即或踵沿陋習。亦當慎重關防。以杜弊竇。何得聽其遇事生風。竟至如該御史所奏。著將原摺鈔寄李清時。令其明白回奏。○又諭曰。期成額等奏到查封合圖肯等任所貲財一摺。所辦甚屬不合。前曾降旨。如合圖肯於幫貼漫票一案。果有染指分肥之處。即將伊貲財查封。原謂伊身為將軍。如不能潔已率屬。致漫局內實有上下婪贓。款跡其罪。自不可逃。則豈但查抄家產。即將伊置之重典。亦所應得。乃期成額等

奉有此旨並未將案內情節確切研求止審出舍圖肯換漫一兩五錢尚係已經給價此外亦未查有漫局染指之處遂爾將伊等贐產一例查封辦理實為錯謬昨已有旨令將案內人犯解交軍機大臣審究著再傳諭新桂將一切案卷即行檢查解送其舍圖肯等財產並著給還又另摺所奏各城幫貼漫票銀兩一案亦著將案卷一併解送查辦（辛亥）上詣

皇太后行宮問安 諭軍機大臣等昨據奏曰修等奏京師米價因道途泥濘較前稍昂高粱穀豆價值漸次平減等語所奏於情理殊屬未協高粱穀豆運販皆自外來或謂天雨泥

／省錄卷七九一

五

濘馱載維艱因致價值稍昂尚屬事之所有至米石一項兵丁月糧皆按時於京倉支領每以所餘售糶市中米糧多資其益本無藉於外運即道路間有泥濘何至轉增其值今奏曰修等所奏似非實在情形著傳諭奏曰修等令其查明據實覆奏又諭昨據奏曰修奏京師米價稍昂因道途泥濘所致高粱穀豆價值漸次平減等語於情理殊未符協已傳諭該尚書等確查覆奏矣京師米糧本屬充餘本年秋成又屬豐收何以價值轉致昂貴恐不無奸商射利居奇別情著傳諭舒赫德密行察訪妥辦並將現在市價如何確實查明具奏 壬子浙江巡撫熊學鵬疏報仁和太平二縣開墾額

／省錄卷七九一

六

外沙地共三百七十二頃二畝有奇富陽安吉慈谿瑞安四州縣開墾新漲沙地共十一頃八十七畝有奇 詔除浙江海寧縣坍沒錢江公地二十六頃三十八畝有奇額賦旌表守正捐軀之山西陽城縣民原奎妻盧氏 癸丑諭前因安徽懷寧桐城等州縣雨後江漲間被漫淹業經降旨即行撫卹并令設法疏消酌借籽種俾得補種晚秋以資接濟今復據高晉奏安徽之當塗無為含山江蘇之上元江寧江浦江西之德化德安湖口彭澤建昌新建等州縣俱有續經被水之處內有被淹地段稍寬情形較重計時已屆處暑即有涸出地畝難望補種已成偏災等語朕心深為軫念著各該督撫等飭屬上緊疏消酌撥撫卹並確勘現在成災分數分別蠲緩妥協辦理務俾被水窮黎不致稍有失所以副朕軫卹至意該部遵諭速行 又諭曰奏曰修等奏京師因道塗泥濘通州交倉餘米商販等艱於輓運是以上月米價稍昂請將八月甲米移前數日開放等語八月甲米原係官兵等應支之項今豫為開放市價自可就平於兵民均為有益著即將八月甲米於本月二十五日開倉支放該部遵諭速行 諭軍機大臣等李宏奏黃運湖河水勢長落情形一摺有毛城鋪滾壩及北岸蘇家灣水勢俱經消退即日可以斷流等語覽奏殊慰朕懷但毛城鋪蘇家灣二壩過水經由之處

不無淤沙存積若不乘時疏濬恐將來水勢再大即難容納李宏等可督飭工員及時相度形勢實力挑濬務俾一律通利以資宣導著將此一併傳諭高晉知之○又諭曰阿思哈奏閏七月初一二日楊橋壩外水勢陡漲將各埽抽刷間段掀墊勢頗危險飛飭按察使何燭即刻赴工連夜督率搶護已將墊陷各埽鑲復等語看來何燭辦理此事頗為迅速於工程甚屬得濟前因該撫阿思哈審擬劉玉樹一案問擬過寬恐係何燭扭於修積陰功之見有意從輕曾降旨詢問該撫令其將何燭是否勝任臬司之處據實奏覆今思何燭向喜茹齋念佛於辦理刑名事務雖不相宜而一切河道工程

實錄卷一百一

七

久經熟悉於防堵修濬事宜是所優為如該員果不能勝臬司之任阿思哈亦無庸過為迴護將來或可用為布政使俾令專管錢穀兼司河務則該員得以盡其所長於河工亦為有益可將此傳諭阿思哈知之 甲寅

上詣

皇太后行宮問安 諭曰楊應琚辦理緬匪一事調度乖方種種錯謬屢次所降諭旨甚明而其情罪難恕為法所不容則不在於失機債事而在前後掩飾支離有心欺罔去歲用楊應琚為雲南總督查辦莽匪木匪事宜朕實推心委任伊於一切邊情軍務自當據實詳陳無稍隱飾方不負倚畀之恩

迨其節次奏報殺賊萬人及欲受降徹兵朕覽奏時察其語涉荒唐傳諭詢問其欺偽情形乃漸次敗露並未有人在朕前奏奏一字也至其罪狀彰著朕猶念其或係病中受人欺誑猶可云誤於不知屢於伊摺內詳悉批示並傳寄諭旨反復開導不啻再三尚冀其翻然悔悟逐一和盤托出以圖收效桑榆乃伊始終執迷不悟歷次覆奏各摺仍然含混遮掩即云病後神志昏迷實不能任此重務亦應早為披瀝直陳朕必另派人前往更代斷不令其耽延貽誤伊又計不及此但一味朦朧心存欺飾實係伊自速重罪朕雖欲格外原之亦不能廢法曲貸矣今楊應琚於鞠訊時俱已無可抵諱惟

實錄卷一百一

八

叩求立置重典即將伊明正典刑以彰國憲實屬情真罪當特念緬匪一事原因劉藻前此養癰貽患以致畏懼自戕楊應琚至彼實有不能不辦之勢而其初辦時尚無畏難之見情稍可原姑從寬免其肆市但伊措置乖張致在事兵丁多所傷損此時朕即欲貸其一死伊亦何顏立於人世耶著派署刑部侍郎珠魯訥前往將此旨傳諭楊應琚加恩賜令其自盡所有伊此次供單及從前覆奏各摺并朕前後所降勸導各諭旨俱著一併鈔發俾中外咸共知之○乙卯諭軍機大臣等前據裘曰修等奏京師米價稍昂高粱穀豆漸次平減茲閱舒赫德奏糧價清單高粱穀豆等價亦俱比上月稍

增今歲禾稼繁碩秋成景象較常倍覺豐稔況登場在即糧價應平雖閏七月初雨水稍多亦係晴雨相間不似二十六年之淫霖也即道路微有泥濘於秋田本為無礙何以市糶轉致加增自不無奸商射利居奇之事著傳諭舒赫德留心緝訪如果查有奸商巨販一二人倡議齊行擡價勒捐售主者此等實於民食有關不可不加嚴究即當拏獲一二人重治其罪庶足懲一儆百若不過尋常囤積圖獲微利即查出亦不過示以薄懲伊等轉不知畏懼則又不如聽其自然俟新穀上市勢將不禁自平也至八月分甲米業已降旨豫放於老米等項已足資接濟九月米石自可無庸續行早放

實錄卷七九一

九

將此一併諭令知之○旌表守正捐軀之江蘇山陽縣民余得水女余氏○丙辰雲南巡撫鄂寧提督譚五格奏閏七月十二日據總兵書敏專差千總高起霈到省面稟七月二十九日賊匪約有千餘潛渡小猛崙江將防守兵練衝散閏七月初三日已到茨通總兵書敏由補角馳來堵逐請速添兵援應等語臣鄂寧查九龍江一帶要隘俱分佈防兵何以賊匪竟敢深入其茨通原駐兵一千二百名書敏等先又移駐何處添防未據報明遂細詢該千總據稱猛崙一隘駐防兵大半染瘴至此股賊匪是否即係召工等與必先捧風有響嫌尋蹤關殺抑或係猛彝等處難民結隊流竄詢之千總俱

不能辨悉臣譚五格已於是日抵雲南省城蒙恩調補雲南提督普洱邊境情形即當親行閱歷但書敏亟請添兵援應自必該處防兵多染瘴癘難以禦敵必須益以精銳臣等商議現在調到黔兵即撥留一千名臣譚五格親自帶往普洱應用此外滇省臨元鎮標及新營元江二營官兵俱附近普洱臣等先行飛調臨元鎮兵四百新營營兵二百元江營兵三百星夜前往臣譚五格即於閏七月十六日帶領黔兵起程俟到茨通查明實在情形一面相機迅速辦理一面將賊匪如何潛渡混竄及書敏等因何疎於防禦之處一併具奏得旨覽奏俱悉譚五格領兵前去甚合機宜速將一切詳悉

實錄卷七九一

情形奏來○丁巳

上奉

皇太后章卷阿勝境侍早晚膳至辛酉皆如之 賜扈從王公大臣及蒙古王公台吉等食至辛酉皆如之 諭前據高晉奏江西之德化德安湖口彭澤建昌新建等州縣內有被淹稍重之處業經降旨撫卹並令確勘妥辦今據吳紹詩奏南昌進賢鄱陽餘干瑞昌皇子等縣其貼近江湖低田亦續被漫淹現在尚未涸出栽種無及等語南昌等各縣上年已間被水淹茲復被偏災閭閻生計未免拮据朕心深為軫念著該撫妥速加意撫卹嚴飭所屬履畝詳勘分別妥協辦理實

力撫綏務俾窮黎均霑實惠不致稍有失所副朕軫卹至意該部遵諭速行○戊午諭軍機大臣等鄂寧等奏據總兵書敏差弁到省面稟小猛崙地方約有賊匪千餘將防守兵練衝散閏七月初三日已到茨通現經提督譚五格帶領黔兵前往辦理等語已於摺內批諭矣看來此次竄至茨通賊匪似與緬子無涉若係緬匪敢於滋擾則當在永昌一路不應繞至普洱此等烏合之衆或是召散餘黨與必先捧有仇見其退避遂乘勢欲圖報復或邊外難民結隊流竄因而滋事皆未可知現在譚五格統兵前往甚合機宜到彼總須相度實在情形或勦或逐迅速妥辦此時瘴氣尚盛譚五格亦不

平定縣志卷之十一

必帶兵深入靜聽明瑞於九月以後剋期大舉但滇省弁兵大率氣餒膽怯遇事不免風聲鶴唳驟難期其鼓勵將來進兵之時總恃京城勁旅壯軍聲而資制勝并濟以川黔新調之兵用其銳氣自即可克敵奏功至各處所有滇兵除防守外不必調充征勦鄂寧現在省城辦理普洱之事總以鎮靜為主即譚五格書敏亦不可稍涉張皇著將此傳諭明瑞鄂寧譚五格知之補行湖南省乾隆三十一年大計卓異官四員罷軟官二員年老有疾官一員才力不及官一員浮躁官一員分別議敘處分如例已未諭曰內務府大臣請將雍和宮香燈地畝新舊租銀交與直隸總督辦理一摺所奏殊

屬非是此項地畝徵租原係專管王大臣自辦之事伊等畏其微催費力委之於內務府而內務府復請交與直隸總督似此輾轉推諉殊非辦事之道況此事究與地方官何涉地方官民社之事甚多豈可令其無暇正務所有此項地畝新舊租銀俱著交與內務府大臣另行查辦○又諭曰阿思哈奏蔡淮英案內領銀濫用之武生李振遠發交署府朱家濂收管該犯心生畏懼乘間脫逃請將朱家濂交部嚴加議處等語朱家濂係管押之員疎於防範以致該犯脫逃固有應得處分至該撫於案內應訊要犯不令收禁亦難辭疎縱之咎阿思哈著一併交部議處○諭軍機大臣等據阿思哈奏

平定縣志卷之十一

審擬蔡淮英借端婪索一摺已飭令部議矣至供單內所稱用刑夾訊一語殊屬非是蔡淮英借辦兵差為名肆行派累特因上司即行訪聞參劾是以未及侵用此理顯然易見不待刑訊始明況既審係賊未入已罪犯尚不甚重若此等遽行夾訊則遇侵蝕肥索及貪贖多贓之重犯又將何以處之阿思哈不過因前次奏結時存大事化小之見經朕飭詢故為夾供套語以見其認真查審其實夾訊亦未必實在刑刑不過紙上虛詞掩飾轉使無知者謂該撫鍛鍊刑求殊非明慎讞獄之道此固外省陋習相沿阿思哈不應如此著傳旨嚴行申飭又諭曰梅立本奏生員梁培被害身死沉屍滅

跡一事迄今五載懸案未結此時不便率以病故開除應俟將來結案日另行覈報等語已於摺內批諭矣梁培被害身死一案始於二十八年事關人命重情當時即應審明完結即或案多疑竇亦當上緊訪查何以懸案五年至今未結著傳諭宋邦綏即將此案情節速行查明具奏（庚申諭軍機大臣等定長奏湖北省各屬查無虧空一摺已批交該部存案矣道拉遜現在該省查審事件著於事竣之後將順道經過地方擇其錢糧倉庫最多者及附府首邑抽查一二處據實奏聞並將原摺鈔寄）辛酉軍機大臣等議准烏魯木齊辦事大臣溫福等奏稱烏魯木齊各項人犯准其年滿為民

欽定大清會典事例

十三

一業臣等當即委安西提標城守營把總邵昌易前赴該地管理此等為民之人將來日漸增多必須立法稽查照內地戶民之例編立保甲即於各戶內選擇勤慎練達之人充當凡遇戶民一切事件隨時呈報該把總查辦但把總既令管民應刊給管理昌吉頭屯戶民事務把總字樣條記一切關毆細事責令把總就近稽查遇有命盜重大情事即照佐雜例令把總呈報該管同知訊詳再此等人犯既已准其為民倘為民之後頗思故土或攜眷潛逃或隻身遠遁自應嚴拏務獲其承緝督緝各官亦應照軍流人犯脫逃之例辦理請以把總為專管同知為兼轄道員為總轄照例一百日限內

欽定大清會典事例

十四

拏獲逾限不獲即照例分別叅處至現今已准為民之人本年撥給地畝明年即應升科若令均赴迪化倉完納往返一百餘里輓運維艱應照烏魯木齊建蓋倉廩之例無須動項於本年農隙時派人在昌吉附近砍取木植即在頭屯蓋造倉廩責成專管之把總經理該同知不時查察得旨允行予故阿巴噶輔國公旺親扎布致祭如例是月直隸總督方觀承奏直隸各屬於七月下旬及閏七月初間大雨連綿低田窪地多有積水如武清永清東安天津靜海一帶晚豆棉花稍覺受傷而行旅亦多未便臣會同查勘設法疏導將武清來自大興之米育鎮滙水向南導入永定遙趁減河標岱小屯等十數村莊滙水東南導入鳳河永清縣境在永定南岸遙南之水導入黃家河北岸遙北之水導入王居引渠東安縣北五大窪之水導入永定趙趁減河亦係歸入鳳河積水深祇尺許今已消落大半天津南窪之水來自靜海者於海河疊過雙港白塘口二關視海潮長落以為啟閉隨時宣洩積水日漸消落晚禾雖微減分數而大勢可望有秋得旨正為此厘念覽奏曷勝欣慰調任山東巡撫崔應階奏東省自本月十一日後時雨連綿窪地積水早穀甫經收割未獲尚多其登場者未得曬晾不無稍損業經委員確查疏導臣今道經濟寧即可沿途親查將情形告知新撫李清時

聽其查辦得旨覽奏俱悉光景成災否據實奏來入批不以
去任而留心民瘼實得大臣之體可嘉之至 湖北布政使
閔鄂元奏臣遵諭照料進勸緬匪官兵頭撥之健銳營兵五
百業經照料出境嗣奉續派健銳營兵五百分作六起行走
又續派健銳火器兩營兵二十並索倫厄魯特官兵一百分
作十一起行走頭起兵於六月初八日入湖北境以次陸續
進發臣率同道府往來督率并委員加謹照料各兵一入楚
境得有馬騾乘騎較車行更為便捷所過城市鄉村毫無驚
擾奉硃筆旁點驚字批此字不當用不過恐無知廝役擾累
閭閻嚴禁即無事何致百姓有驚惶耶此等語句真不知天

齊錄卷五十二

五

日之迂談可怪可笑○河南巡撫阿思哈奏署洛陽縣知縣
稟報七月二十六日大雨近城之北邙山水發瀝河之水亦
一時俱漲宣洩不及以致北關東南一帶白衣堂煤土溝等
處間被水災該縣即飛赴確查居民房屋共衝塌二百六十
七間淹斃大小男婦四十一名口照例給予修費葬埋銀兩
分別撫卹報聞 調任河東河道總督李清時奏查豫東黃
河入秋以來水勢漸退至閏七月初一二三等日晝夜長水
數尺低窪河灘間有漫水串至堤根其臨河埽壩亦有卑矮
受險之處臣督員巡查乘機搶護初六日水漸消落一切工
程均極穩固至蘭陽耿家寨埽工河勢兜灣入袖向為豫東

第一險要之區查前經河臣張師載在畢家寨河灘挑有大
引渠一道尚可因勢利導隨挑切渠頭膠淤於伏汛內開放
引溜此次長水大溜分入引渠約有三四分正河溜已較緩
從此渠頭漸刷漸深溜勢分暢耿家寨險工可期穩固得旨
覽奏欣慰 陝甘總督吳達善奏陝省自乾隆二十三年至
今均有民備未完糧石今歲雨澤及時夏禾豐稔秋禾又復
滋長民情樂於輸將惟是原借糧色係就倉儲所有或因本
倉不敷撥自他邑並非本邑皆產之糧而民間種植則就土
性之宜所獲糧石不能與歷年色樣適符若責令糴易完官
小民不無折耗臣遵諭以上色抵交上色下色抵交下色仍

齊錄卷五十二

五

照節次通融徵收之案以粟米小麥為上色青稞青豆為下
色一體徵收惟豌豆一項雖稍次於米麥而河西需用甚廣
價值亦與米麥相仿應請一併抵交至河東本年豌豆收成
稍減現據各州縣詳報民間願以小麥抵完豌豆亦應准其
一例抵交報聞 兩廣總督李侍堯奏覆臣遵旨檄諭暹羅
國搜擒奔竄緬匪一節臣旋抵東省傳詢曾充暹羅國貢使
船戶及通事等據稱自廣東虎門開船至安南港口地名河
仙鎮計水程七千三百里該處係安南管轄有土官莫姓駐
劄又自河仙鎮至占澤間地方計水程一千四百里係暹羅
管轄有土官普蘭駐劄自占澤間至暹羅城計水程一千六

百餘里統計自廣東虎門至暹羅共一萬三百餘里九月中旬北風順利即可開行如遇好風半月可到風帆不順約須四十餘日如有公文照會暹羅交付土官莫姓及普蘭均可齋去但前往該國係屬外洋內地兵船水道不熟未便令其前赴茲查有本港商船於九月中旬自粵前往安南港口貿易計到彼日期正係十一月間查有左翼鎮標中營遊擊許全熟諳水務臣遵諭備繕照會暹羅國王之文發交許全屆期附搭商船齋往南港口諭令查探或交莫土目或至占澤問交付夷目普蘭齋投仍令取該國王回文齋回報聞

實錄卷之七十九

七

大清高宗法天隆運至誠先覺體元立極敷文奮武孝慈神聖
純皇帝實錄卷之七百九十一

大清高宗法天隆運至誠先覺體元立極敷文奮武孝慈神聖
純皇帝實錄卷之七百九十二

乾隆三十二年丁亥八月壬戌朔秋分夕

月於西郊遣裕親王廣祿行禮(癸亥遣官祭

關帝廟 甲子

上奉

皇太后幸卷阿勝境侍早晚膳至戊辰皆如之(賜扈從王公

大臣及蒙古王公台吉等食至戊辰皆如之 遣官祭昭忠

祠 豁除江蘇上元縣坍沒洲地二百六十畝有奇額賦

乙丑吏部議覆山西巡撫彭寶奏稱徐溝縣前因疆界與清

實錄卷之七十九

七

源縣毗連所轄村莊均非廣潤於乾隆二十八年清源縣裁
歸徐溝縣管理其清源之城市關廂共有居民一千七百餘
戶惟有訓導一員專司學校並未另設官員彈壓徐溝縣相
距三十餘里查察難周必須添設佐雜一員分駐清源縣就
近稽查查陽曲縣天門關巡檢地處偏僻並無專辦事件堪
以裁汰請移駐清源縣舊城應如所請從之 丙寅諭前據
御史虞鳴球奏請禁河臣延請屬員以充內幕一摺已降旨
允行至所稱李清時幕中佐雜有湯陰縣縣丞章輅一員遇
事生風尤為衆所側目至有小總河之稱各情節當經傳旨
李清時令其明白回奏今據奏到河工事務與地方稍有不

同幕客學習河務者甚少歷任河臣向俱檄調河工佐雜在署辦事今縣丞章輅於本年六月就近調赴黃河工次為期不過兩月並無如所奏遇事生風之處等語縣丞章輅經李清時調赴工次僅止兩月為期甚淺何能倚恃上官委用軌爾藉端滋事在外招搖揆之情理似不應有但該御史言之鑿鑿自必確有所見著虞鳴球將章輅如何遇事生風之處確實指出朕當再行詢問李清時如果無辭置辯則既不能慎密關防又從而曲為欺飾即重治其罪亦復何辭朕辦理庶務總期覈實以定是非從不肯任其顛預了事不加詳究也李清時摺并著鈔發○丁卯祭

寶錄卷之三

二

先師孔子遣大學士劉統勳行禮○工部議覆調任山東巡撫崔應階疏稱泰安縣城垣因三十一年七月大雨衝塌六十三大業經委員勘估懇請動項興修應如所請從之旌表守正捐軀之四川隣水縣民鄔金聲妻熊氏○戊辰祭大社

大稷遣誠親王允祕恭代行禮○諭軍機大臣等據定長奏湖北黃梅縣董家口以下即係江南地方舊有隄隄一道自順治年間修復後並未重修若能修復舊隄一百里不特黃梅廣濟可資捍禦即江西德化江南宿松等縣胥受其益等語黃梅等縣居全楚下游內湖外江易致淹浸據圖內所繪情形

而論如涼亭商家各口未嘗非節年修築之隄工一經江湖異漲即不免衝潰今欲於董家口以東復築隄百里則是加之堵束與江爭地當水發之時上流不更激而激溢乎且此處隄工自順治年間旋建旋廢經久未加修葺可見江水勢大原非一綫隄塍所能抵禦此時即勘估修復亦未必能一勞永逸則又不如順其自然之為得也定長於江防諸務未經諳習茲但據道員盧謙所稟欲議興修恐於江湖形勢未必實有裨益此地與安徽江西毗連定長原有與三省會辦之語高晉總理河務有年籌辦水利素所熟悉著交與高晉前往相度情形將應否辦理之處會同定長熟商妥議具奏

寶錄卷之三

上

○又諭曰德保奏七月初八日賊匪滋擾小猛養地方是夜五鼓官兵聽得九龍江內有賊匪船隻聲言即將軍裝器械拋去各自逃散德保現在退駐思茅等語前據鄂寧譚五格奏稱有賊匪千餘潛渡小猛養江已到茨通書敏由補角馳往堵逐至德保在九龍江曾否馳援詢之書敏所差千總未能詳知譚五格隨帶點兵千名前往辦理已傳諭譚五格相度妥辦矣德保在九龍江駐劄原係帶兵防守乃該兵丁等一聞賊匪聲息輒爾棄仗紛逃固由滇兵怯懦不堪風鶴皆驚難以復期鼓勵但兵丁遇有賊蹤竟敢不顧統兵將領四散奔竄其情實為可惡此必因前次揚寧在木邦打仗時石

翼官兵逃散未將查出逃兵嚴行治罪故九龍江兵丁仍蹈故轍此次若再不示以嚴懲則各處兵丁相率效尤何以飭軍律而作士氣況木邦之事尚可云揚寧等初到正值楊應琚辦理不善之後是以未能振作茲則鄂寧在省籌辦普洱事宜明瑞到滇已將三月一切措置自當另具規模何以賊匪竄入邊界該處兵丁復有望風逃避之事豈明瑞等僅於永昌一帶籌畫進剿機宜而於普洱邊外未經留心調度乎亦不免疎畧之失念其尚係初次姑從寬宥此後若再有此等情事明瑞鄂寧即不能辭咎矣譚五格現雖馳往九龍江一帶其責在於勦逐賊匪至查辦逃兵一事非伊所能經理

附錄六十二

四

著鄂寧即行前往該處確查辦理俟辦竣此事再赴永昌亦正當集兵進剿之時矣至德保所奏兵丁聞有賊船即行潛逃遠避如果係實情則德保尚可從寬免究以勵後效所有逃兵速即查拏重加治罪以示懲儆若德保所奏不實或別有畏葸退縮情事即將德保嚴叅重處再此項賊匪或係緬子由木邦繞至其地或係莽子由整欠關入邊內抑係邊外避難土民借端滋擾俱應明晰確查又所稱兵丁多因染瘴患病不能禦賊果爾則賊衆又何能冒瘴遠來看來兵丁內未必無藉稱受瘴巧為躲避者亦不可不徹底查覈並著明瑞鄂寧一併查明據實覆奏將此速行傳諭知之德保摺并

著鈔寄已巳兩淮鹽政普福奏淮安府屬之山陽清河桃源徐州府屬之邳州宿遷睢寧海州屬之贛榆沐陽共八州縣額行淮北食鹽二萬六千七百一十引向因地近場壩壩所小民貪賤買食貧難老幼背負鹽舫及埽積拋撒泥鹽以致官引壅滯難銷經前鹽政吉慶節次奏准分撥網地融銷照網納課俟食引疏通日仍照定例辦理在案查自甲午網起至今十有七年山陽等八州縣食引仍未暢銷臣細加訪察緣認運食岸之商半多貧乏無力整頓且特有融網之例習為故常以致私愈盛而引愈滯日久不得疏通今臣於淮北總散各商內擇其才力優裕能於整頓口岸者僉點六商責令分股辦運并酌覈八州縣口岸情形請自本年丁亥網起以七分留運食岸儘數行銷其餘三分仍暫融網地暢銷提引納課并飭各州縣加緊緝私俾官引日銷查催償運二三年後即可全復原額網食攸分仍照定例辦理報聞 庚午

附錄六十二

上

太宗文皇帝忌辰遣官祭

昭陵

上詣

皇太后行宮問安 諭軍機大臣等前聞刑部覈改河南睢州民劉玉樹謀死楊鳳來一案因該撫原辦寬縱曾經降旨訓

飭今據阿恩哈覆奏前撫臣胡寶瑣題寶豐縣張毛兒謀死王姓剝衣一案原係照圖財害命得財殺人命例均擬斬決嗣經刑部改照謀殺人本律擬斬監候今劉玉樹一案與張毛兒之案情相似是以拘泥成案辦理等語張毛兒劉玉樹兩案情節既屬相似該部均係駁改前後何以互異著傳諭刑部堂官令其查明具奏○以烏里雅蘇台辦事大臣額爾德蒙額為盛京副都統辛未諭軍機大臣等德保奏總兵書敏於閏七月二十日在九疊地方病故小猛崙等處俱被賊匪占踞關係緊要已於二十四日帶領官兵五百名自思茅前進剿賊一摺所奏總不明晰已於摺內批諭矣前經

實錄卷之三

六

降旨令該撫鄂寧前往該處確查辦理鄂寧到後所有賊匪情形及係何處烏合之衆並德保從前因何退至思茅今又領兵前進各情節自能查明具奏至九龍江邊外一帶現在瘴氣既盛諱五格帶領兵前往止宜相機剿逐妥協速辦使內地土司無擾以待將來大舉斷不可冒瘴深入亦無庸帶兵久駐邊外此等賊衆看來並非緬匪正賊不過召散餘黨或邊外流民借端滋擾土境原屬不成事體此時總宜靜鎮諱五格於辦竣此事後可暫回至思茅駐兵防守候將來進兵時再聽明瑞調度至所奏書敏病故一事或係病亡或係染瘴身故及該鎮領兵向在何處因何欲回思茅在中途

病故且書敏既在前德保何以先行退回亦著鄂寧查明覆奏再降諭旨著將此傳諭鄂寧諱五格及明瑞知之尋鄂寧奏覆查德保駐守九龍江於閏七月十七日逃回思茅復於二十四日領兵前往彼時賊匪已散無賊可剿乃並不據實奏明猶敢以虛詞妄瀆其畏葸欺朦情節經臣等查奏自難逃洞鑒批實在可惡罪浮於李時升等亦是汝等公忠方能如此查奏若楊應琚又復欺奏矣然豈終能欺朕耶又奏查此股賊匪係召工召淵等為首勾結鬼家整欠等處烏合之衆實非緬匪正賊書敏自賊匪竄入小猛崙不能堵禦由猛寬茨通退駐倚邦前據普洱府等報稱於閏七月二十日行

實錄卷之三

七

至九疊地方病故查明委係染瘴所致至書敏與德保本係兩路分駐一在補角一在九龍江書敏因賊匪竄入退至倚邦離思茅尚有五站德保則在九龍江宵遁由小路直奔思茅是以德保退回在書敏之先批亦係退回無可寬罪○河東河道總督嵇璜奏查河南兩岸埽壩惟楊橋里堤銅瓦廂耿家寨三家莊為要工而楊橋尤為緊要緣該工於乾隆二十六年合龍之後未經議築越隄而河心挺出大灘逼溜南趨埽底楷料已經多年難資抵禦應俟水落時另行籌辦堅固現節屆白露其餘零星埽工俱應停緩再查河南黃河形勢與江南不同江南土性堅實本屬槽河一灣一工兩岸相

對河南河身本寬溜勢往來原無一定遇汎水長發時上流沁洛諸水並漲入河挾沙而行水過之後在在停淤或溜勢歸入中流即可省一工段惟在儲料以備用相機以施功庶工帑不致虛糜得旨覽（護理山東巡撫布政使梁鶴鴻奏東省常平倉穀額貯二百八十八萬二千石除應徵應買及本年平糶借撥兵米外實存穀一百八十二萬三千七百六十三石尚有缺穀二十一萬一千五百餘石係歷年蠲賑動支未經買補今年各處豐收應請酌動地丁銀兩發價採買再應徵民借穀五十七萬一千餘石其中零星小戶有僅種雜糧者若令買穀交倉殊費周折並飭各州縣照乾隆二十

五年奏明之例一體兼收報聞（壬申）

太祖高皇帝忌辰遣官祭

福陵（軍機大臣等奏覆臣等遵旨審辦盛京瀋局舞弊一案緣佐領王睿驍騎校舒汝安等在瀋局行走多年王睿又與佐領韓朝鳳合夥出銀令伊子姪等開設德聚德錦號兩鋪舒汝安等亦有股分按股分利并有劉夫在伊鋪內買瀋還交官欠王睿等因於官局收瀋為之照應以免吹求俱已供認不諱應照違制律辦理至舍圖肯於瀋局有無染指之處詳加訊鞠據王睿等供並無將軍分肥之事但任聽攬派不行查辦所有歷任該管將軍府尹應請一併交部查議從

之 癸酉

上奉

皇太后幸卷阿勝境侍早晚膳至丙子皆如之 賜扈從王公大臣及蒙古王公台吉等宴至丙子皆如之 以禮部尚書兼日修工部尚書董邦達對調（補行湖北省乾隆三十一年大計不謹官一員罷軟官一員有疾官一員才力不及官一員分別處分如例 甲戌

萬壽節遣官祭

太廟後殿 遣官祭

福陵

昭陵

昭西陵

孝陵

孝東陵

景陵

泰陵 遣官祭

孝賢皇后陵 遣官祭

顯佑宮

東嶽廟

城隍廟

上詣

皇太后行宮行禮。御澹泊敬誠殿。扈從王公大臣官員及蒙古王公台吉等行慶賀禮。乙亥。軍機大臣等議覆御史西平奏稱八旗養育兵每年各賞給米一石八斗八升。按春秋二季。放給三色米石。因伊等年幼。不能親身赴領者。甚多。是以令領催代領。該領催因米數無多。概行售賣。折給錢文。不免有賣多給少之弊。嗣後請將養育兵每年應支三色米石。折給後米。統作一季。於每年二月。照數放給。仍令該旗傳令親身赴領。如實係年幼。不能親身赴領者。著本佐領下領催代領。如該領催售賣折價。將該領催從重治罪。外。仍將該佐

實錄卷一百一十二

領驍騎校嚴行議處。應如所請。從之。丙子。諭曰。吳達善等奏推陞貴州遊擊許宗奕。自留陝辦理屯田事務。以來已逾二年。昨於豫保案內具題。經部議駁。一摺。兵部固屬循例辦理。但許宗奕因派令管理新疆屯務。未能前赴推陞。新任該督等既稱其自推陞以後。留心辦事。又經二載奮勉出力。始終不渝。尚屬實心辦事之員。若因其在貴州尚未到任。在陝省又已推陞。不得與實缺人員一體豫保。是因資熟手辦公。轉令其虛懸。無著。非所以示鼓勵。許宗奕著准其豫保。俟屯務年滿。送部引見。至許宗奕在屯辦事。須扣至乾隆三十三年。始屆期滿。黔省員缺。亦不便久懸。自應另行銓補。嗣後遇

有此等推陞人員。仍留本省。不能即赴新任者。其如何開缺。

另補。並於本省照陞銜題授。及入於軍政保覈之處。著該部一併定議具奏。又諭曰。楊寧著來京。以蒙古都統用。貴州提督員缺。著李國柱調補。速赴新任。湖廣提督員缺。著福永補授。福永未到之先。著定長於兩省總兵內揀選一員。暫行署理。其寧夏鎮總兵員缺。著張玉琦補授。又諭雲南開化鎮總兵員缺。著明瑞於發往該省之副將人員內揀選一員。奏聞補授。諭軍機大臣等。據永貴奏稱。喀什噶爾地方緊要。綽克托性情褊急。柏琨人雖明白。微少決斷。二人共駐一處於地方無益。永貴請親赴喀什噶爾。駐劄將柏琨調在烏

實錄卷一百一十三

什與永慶一同辦事。令綽克托與伊一同辦事等語。永貴所奏。甚屬含糊。看來綽克托。柏琨在喀什噶爾辦事。彼此不合。伊應早將緣由聲明具奏。朕自有裁處。何至如此。張皇。烏什係新定地方。移駐許多兵丁。且係回疆腹地。永貴係總理回城之人。駐劄該處。各回城事務。皆可遙為控制。若赴喀什噶爾。各城相距路遠。勢有鞭長莫及之虞。永貴不必赴喀什噶爾。仍在烏什總理事務。綽克托亦不便仍留彼處。著前往伊犁。授為領隊大臣。柏琨前往開展辦事。伊勒圖著赴喀什噶爾。與泰璜協同辦理。永貴既補授參贊總理回城事務。喀什噶爾。葉爾羌。無庸再放參贊。均著以原銜在彼處駐劄辦事。

將此傳諭水貴遵辦外仍傳諭阿桂知之軍機大臣等議
准熱河副都統瑪瑞奏稱查熱河等處新舊駐防滿洲兵一
千五百九十五名蒙古兵四百零五名滿洲佐領十六員而
驍騎校止十二員蒙古佐領四員驍騎校四員因向有入滿
洲旗分之蒙古兵一百名是以又放蒙古驍騎校四員亦附
入滿洲旗分今蒙古兵撥入滿洲者止有五名應將此項驍
騎校四員仍歸滿缺以符定額又稱滿洲兵撥在左翼蒙古
者三十四名請徹出仍歸正黃正紅滿洲蒙古兵撥在滿洲
者三十九名請徹三十四名仍歸左翼四蒙古旗分其餘蒙
古兵五名著暫在滿洲當差俟出缺後即挑取滿洲計滿洲
十六佐領下十六驍騎校蒙古四佐領下四驍騎校每佐領
下各轄兵一百名從之○以左副都御史溫敏為盛京禮部
侍郎

實錄卷七百九十二

二

實錄卷七百九十二

二

大清高宗法天隆運至誠先覺體元立極敷文奮武孝慈神聖
純皇帝實錄卷之七百九十二

大清高宗法天隆運至誠先覺體元立極敷文奮武孝慈神聖
純皇帝實錄卷之七百九十三

乾隆三十二年丁亥八月丁丑

上詣

皇太后行宮問安○自避暑山莊啟鑾幸木蘭浙江巡撫熊
學鵬奏江山縣知縣稟報閏七月初九等日陰雨連綿山水
並發沙石衝瀉計南鄉二十八都三鄉口等處被水衝壓田
地約有一千九百餘畝現飭各農佃上緊挑復趕種收穫應
請借給籽種其衝成河道之田有難挑復者應行查明請給
其衝塌房屋共三百六十餘間照例給予修費并查明實在

升欽天曆三十一

貧佃先行撫卹一月至一帶道路橋梁營房關棧等項亦有
衝塌之處現逐細確估請修臣於閏七月二十八日自省起
程前往各該處逐一履勘照例分別辦理得旨詳查妥辦應
行撫卹者即行撫卹○是日駐蹕中關行宮 戊寅駐蹕波
羅河屯行宮○已卯

上遣侍衛雲保赴避暑山莊

皇太后行宮問安 遣官祭賢良祠 諭曰嗣後蒙古王公等
保送其子一人報院為應襲者著加恩不必計其年歲即給
與應得職銜 吏部議准閩浙總督蘇昌奏稱浙江紹興府
屬之餘姚縣向定為衝繁中缺歸部銓選但該縣地大政繁

民刁吏猾辦理良難又寧波府屬之慈谿奉化二縣向俱列
為海疆要缺在外調補三年俸滿即陞但該二縣不過一隅
濱海並無緊要口岸迥非各屬海疆可比請將餘姚縣一缺
改為繁疲難兼三要缺在外揀選調補其慈谿奉化二缺應
請改去海疆字樣慈谿作為要缺在外調補奉化作為中缺
歸部銓選從之○雲南巡撫鄂寧奏據普洱府達成阿稟稱
普洱鎮總兵德保於閏七月十七日由九龍江軍營回至思
茅詢其情由據云閏七月初八日宣慰報稱小猛養起火我
即帶刀紹文前往迎敵兵丁隨後因聽江上船響兵丁疑是
賊人過渡一聞而散令之不遵喚之不應我無奈令刀紹文

實欽天曆三十一

引路而走嗣於八月初四日接總兵德保來劄亦稱誤聽有
警以致失散批特因此事有旨令汝前往查辦若德保有畏
怯不堪實據即行拏解來京又奏德保由九龍江退回既因
兵丁自相驚疑逃散並未遇有賊匪則前此所報茨通小猛
為猛寬之賊亦大約兵弁得之傳聞相率而潰已可概見批
兵丁實可惡已有旨了又奏兵丁畏賊聞風奔避一切情形
容臣查明據實辦理批蓋因木邦兵丁逃散爾等所辦過寬
之故已有旨了此次再不可姑息矣又奏臣現在加添精銳
同時並集如九龍江茨通等處果猶有賊匪蟻聚自當分路
撲滅以安土境倘烏合之眾已各鳥獸散則惟應收集官兵

揀擇扼要之區屯駐嚴防以待大兵直搗阿瓦後軍威所至即有餘孽亦不難以次清釐至普洱思茅夷民現俱安堵如常並無賊警報聞是日駐蹕張三營行宮庚辰

上行園遣官祭黑龍潭

昭靈沛澤龍王之神玉泉山

惠濟慈佑龍王之神諭軍機大臣等據阿桂奏稱現今伊犁換獲哈薩克馬匹稍多烏魯木齊巴里坤哈密等處營馬每年必須添補請照軍機處原議在官牧廠揀選騰好馬二千匹派撥官兵分起運送烏魯木齊添補營馬外其餘馬匹送往巴里坤哈密添補彼處營臺馬匹如尚有餘剩再轉送

行營奏卷之二

內地應用其如何定價交納之處請交吳達善酌量辦理等語烏魯木齊巴里坤哈密等處每年應補營臺缺額馬匹從各處購買長途趕回不無周章今阿桂奏請於換獲哈薩克馬匹揀選二千騰好馬匹送往烏魯木齊等處添補營臺應用所辦好著寄信吳達善俟伊犁送到馬匹時即添補營臺馬匹其如何交價並較內地買馬價值節省若干之處一併奏聞尋奏查伊犁換馬價本頭等每匹價銀四兩八錢二等三兩六錢三等二兩五錢折中覈算每匹約三兩六錢有奇加以沿途解送雜費等項連價本約銀四兩一錢有奇較買馬一匹定價八兩之例每匹可省銀三兩八錢以外其此項

添補營臺扣留馬價存貯司庫撥用得旨軍機大臣議奏是日駐蹕阿貴圖大營辛巳

上遣侍衛索諾木策凌赴避暑山莊

皇太后行宮問安行園哈薩克使臣公品級都勒特克呼等七人入覲

上於和門宣見賜素韃裘服并令隨園從觀諭軍機大臣等刑部覆奏改擬謀死楊鳳來之劉玉樹斬決一案與從前覈駁原議斬決之圖財害命張毛兒改為斬候緣由據稱兩案情節大概相同但劉玉樹騙銀豫約之期即屬謀殺之日其圖謀已屬顯然且較之張毛兒計圖滅迹者情罪亦更重等

實錄奏卷之二

語此兩案情事究屬相同該部雖委曲剖析亦不能確為分別其前後改駁互異之處實為一事兩辦但事閱數年現在堂官均已更換姑無庸置議惟是定擬案件審情比律辦理應歸畫一嗣後務宜悉心酌覈毋得彼此參差致有畸輕畸重之弊可將此傳諭刑部堂官知之又諭曰方世儒奏雷綏寧縣犯沖地方開礦一案內稱赫昇額因欲調劑鼓鑄固執已見任意詳開研訊各犯俱供赫昇額除聽家人藉端索賄外別無請託受賄之處等語所訊供詞未可盡信開礦係湖南公事並無迫不及待之勢赫昇額既已調任湖北何以當離任之時急欲趕辦詳請撫臣批准即云赫昇額志切辦

公亦何至急遽若此此中情節恐或有未實未盡之處赫昇
額現在刑部監禁著傳諭刑部堂官就近確切嚴訊據實具
奏方世儒摺並著鈔寄 又諭據吳紹詩奏江西廬陵縣屬
吳蕭等姓尚有信奉天主教之人並有吳均尚於今年二月
內託同教將日達赴廣東尋曾到江西之西洋人林若漢來
村傳教旋在廣東被獲現經飛咨廣東撫臣訊取將日達等
確供等語吳均尚託將日達赴粵尋覓西洋人傳教即於廣
東被獲何以王檢前此未經奏聞著傳諭王檢詳查據實覆
奏吳紹詩摺並鈔寄閱看 以雲南維西協副將長青為曲
尋鎮總兵 是日駐蹕海拉蘇台大營 壬午

平定回疆方略卷一百一

上行圍 調廣東雷瓊鎮總兵葉相德為福建漳州鎮總兵江
西南贛鎮總兵何思和為雷瓊鎮總兵以江西九江協副將
王濤為南贛鎮總兵 是日駐蹕呼魯蘇台大營 癸未
上行圍 諭軍機大臣等據李侍堯奏查辦陳容宗繪畫雲南
軍營圖一摺已於摺內批諭矣現在正當用兵征勦緬匪之
時乃有此等喜傳新聞之人捕風捉影描畫圖張在外傳播
該督一有訪聞即行查辦俾知懲儆甚得封疆大臣之體至
摺稱圖內有不法悖逆字跡及細閱原圖並無不法之處即
簽出旗幟興漢鎮道四字必因現在雲南之總兵王玉廷係
由興漢鎮調往遂從而傳訛附會且圖內又有天朝軍營字

樣可知其並非悖逆而所繪地名形勢疆界亦全非該處實
在情形此不過不安本分之人欲藉此希圖射利自可無庸
照大逆例辦理現據該督審出草圖係由新會客人張傑奏
處帳轉傳得但滇省與廣東並非接壤若由滇省訛傳即當
先自廣西傳及何以轉得自廣東此或去冬隨楊廷璋前往
永昌兵役聽聞影響回粵後傳述新聞遂編繪此圖誇張愚
俗亦未可知該督現在集犯親訊就此留心推究或可得繪
圖來歷著將此傳諭李侍堯知之 又諭據王檢奏稱前因
病後失調神氣日見消耗披閱案牘不能明晰已將巡撫印
務移交督臣兼署等語已於摺內批示令其善為調攝矣該

平定回疆方略卷一百一

撫本因感冒風寒遷延致病現在巡撫印務已交李侍堯署
理該撫惟當安心調養以冀速痊如調治向愈精神日就平
復原可接受撫篆辦事至近日病勢是否輕減仍著即行奏
聞以慰廑念將此傳諭知之 陝甘總督吳達善奏軍機大
臣議覆伊犁添建倉廩積貯糧石應添派屯兵以資耕作除
差兵二百名外至屯兵一千五百名應請再派三百名共成
二千整數業經奏准移咨到臣臣就陝甘各標營兵數之多
寡酌量添派應於甘肅提標派兵五十涼州鎮屬派兵七十
寧夏鎮屬派兵七十西寧鎮屬派兵一百一十共三百名仍
按兵數遵委都守一員沿途統率稽查千把三員外委三員

分領押送一切軍裝等項照例妥備即於今冬派往以便開春耕作報聞 詔除奉天承德遼陽海城鐵嶺開原等五州縣水災田地九千三百二十三畝有奇額賦是日駐蹕準烏拉岱大營翼日如之 甲申

世宗憲皇帝忌辰遣官祭

泰陵 諭據御史福陞所奏此次雲南用兵動用部庫銀兩三百萬此項庫銀亦應籌畫填補請照豫工例開捐二年等語福陞所奏甚屬荒唐今雖有緬甸軍需部庫銀兩甚多何至遽行開捐之例福陞著嚴加飭行摺擲還○諭軍機大臣等據周曰贊奏涉縣生員郭良肱遞有呈詞一紙狂悖不法並

查出該生親筆自圖書二本語雖論古內含訕刺難以枚舉請將該管教職革職聽審並自請嚴加議處等語朕始閱周曰贊之摺以為學校中果有如此喪心病狂之人自應照例懲治該管之教職學政等官亦當分別議處是以批交諭部及細閱所呈親筆書二本不過泛詞論古即該學政簽出各條亦並無悖逆訕刺之語是其人乃一迂陋書愚假附道學文理本屬庸庸特以熱中躁進向學臣投遞呈詞妄希薦錄究屬不安本分之人予以斥革示懲已足整飭士習若照悖逆查辦轉非所以覈情罪而昭平允現據該學政奏稱移交撫臣訊擬著傳諭阿思哈酌量治以應得之罪不必照悖逆

例辦理原呈原書並發阿思哈閱看再聞周曰贊在京時曾得有癡迷之症該員自補放學政以來曾否全愈抑時或舉發神氣未能清爽並著阿思哈留心查察據實具奏 又諭戶部奏鄂寶咨請停運漢口鉛筋不如暫停京局半年鉛運一摺該部通融酌辦所奏甚是已依議行矣鄂寶於停運鉛筋之事何以不行奏聞遽爾咨部已屬不合且黔省接送京兵採辦馬匹不過暫時籌辦原可計日就竣何致張皇竭蹶若此即如滇省亦有運解銅筋並未聞其因承辦軍需難於兼顧黔省何轉以此藉口聲張咨部耶鄂寶著傳旨申飭又諭戶部議覆吳達善題前署涼州鎮後營把總革退馬兵支正應賠倒斃驢騾價銀無完請照例豁免一本辦理殊屬非是支正係一署把總馬兵所有應賠倒斃銀數乃至一千六百六十餘兩之多則其名下管解驢騾為數甚夥現據該督稱其後經緣事革退名糧家貧如洗遂至出外乞討度日是其人不過一微末兵丁哈密解送聞展牲隻關係緊要營中豈無能事弁員可資分管而乃令此等窮兵管解如許及至倒斃溢額銀數逾千又不責令原派兼管各員按數攤賠而專誣之貧無可追之兵丁勒賠請豁種種情理均不可解著吳達善即行逐一明白回奏所有戶部議覆原本俟吳達善奏覆到時再降諭旨尋奏查支正由肅州管解驢頭自哈

密以抵聞。展在途倒斃者止應賠銀二百兩零。此外皆在聞展牧放勞傷病廢驛頭是以倒斃較各弁獨多。但彼時不將此病驛勻派各弁分牧乃悉歸於署把總支正一廠經管致倒斃如許之多。計應賠銀一千六百六十餘兩。從前在廠兼管之武職及原派之各員自應咨查著令分賠得旨覽。○又諭曰舒赫德奏獻縣民杜桂控告知縣朱蘭挾仇誣坐問擬發遣一案若專交地方官查審恐不免意存瞻徇。而此等計控細事又不值特派大員前往著交與邁拉遜侯湖廣查辦事竣由豫回直即會同方觀承將案內情節詳悉研究確情具奏原摺一併鈔寄並諭令舒赫德知之。○乙酉

上行圍。○以兵部右侍郎鍾音為廣東巡撫內閣學士覺羅奉寬為兵部右侍郎。是日駐蹕都穆達烏拉岱大營。丙戌上行圍。軍機大臣等議准陝甘總督吳達善奏稱安西哈密地方先因地處極邊議令該處多貯銀兩備用繼因兵加增需用日多節次寬為儲備自乾隆二十四年西陲平定之後疆域式廓安西哈密等處已成內地安西提督改駐巴里坤後復由巴里坤移駐烏魯木齊并於巴里坤議添總兵哈密改設副將今昔情形不同則此貯備銀兩亦當隨時減貯茲查烏魯木齊提標三營額兵四千名巴里坤暨所屬哈密各協營共兵六千五百餘名兩處均距內地數千餘里自應按

兵數多寡寬為籌備請於安西提標原設備用銀八萬六千五百餘兩內烏魯木齊提督庫內分貯銀三萬兩巴里坤總兵庫內分貯銀四萬兩除哈密前後兩次已撥銀一萬兩請再照數撥貯以敷接濟再安西提標原設備用銀八萬六千五百餘兩除分撥外尚餘銀一萬六千五百餘兩應行解交蘭州司庫兌收充用但由巴里坤至藩庫路途遙遠應令該司俟支發巴里坤官兵俸餉時扣收貯庫即於巴里坤鎮庫存貯項下按數撥支以省遠解之煩從之。吏部議覆調任山東巡撫崔應階奏稱陽穀縣所轄之阿城鎮烟戶稠密船隻絡繹為五方雜處之區必須專設文員彈壓查陽穀縣縣丞並無專司應請將縣丞移駐阿城鎮又萊陽縣距城九十里之姜山集商旅孔道亦須專員駐劄查該縣向設軍糧縣丞實無額徵漕米久為閒曹請將縣丞移駐姜山集應如所請從之。詔除江蘇丹徒縣丹江田地二十三頃四十畝有奇額賦旌表守正捐軀之福建同安縣民洪慶妻陳氏河南中年縣民妻二小妻蔣氏是日駐蹕巴顏布爾噶蘇台大營。丁亥

上行圍。諭前據周曰贊奏涉縣生員郭良肱遞有呈詞一紙並親筆自國書二本語含訕刺狂悖不法請交撫臣嚴行審訊並請將該管教官革職聽審一摺朕彼時閱所呈親筆書

不過泛詞論古即周曰贊發出各條亦並無悖逆訛刺之語當即降旨阿思哈謂其人乃一迂陋書愚假附道學文理本屬庸庸特以熱中躁進向學臣妄希薦錄究係不安本分之人予以斥革示懲亦所應得斷不至照悖逆例辦理今據阿思哈奏到與朕前旨適相脗合可見遇事虛公體認自得其平公是公非人所共見周曰贊直是全不解事矣此案著阿思哈仍遵前旨辦理即教職亦無庸參處至該學政發府查辦時諭以不必通報及該撫飭府向取原書又以該生語多悖逆奏請嚴審治罪是周曰贊始欲含糊了事及聞撫臣已知此事又復故為吹求種種均屬不合周曰贊不勝學政之

任著交部嚴加議處諭軍機大臣等戶部議駁方觀承奏寶直局各匠工食錢文易銀給發請將淘洗餘銅加給鑄額添補工食一摺朕初閱之以為該督所奏與高恒等奏辦寶泉局情形相同其事似屬可行而該部執行議駁或係英廉因與方觀承向日芥蒂有意苛求不准所請及細閱摺內稱各省鼓鑄與京局情形不同其工價原經題明費給錢文每年亦係開造錢數報銷該督所稱易銀給發之處部中無案可稽等語是該部議駁係照定例辦理確有根據方觀承何以將向係費給錢文之項照京局易銀之例為此陳請著傳諭該督將戶部指駁情節確實覆奏朕辦理庶務總欲得切

當實據從不肯稍存疑義此方觀承所素知也戶部摺並鈔寄閱看尋奏查前督臣高斌具題開鑄原案內稱各匠工食請照京局例給發並前督臣那蘇圖以保定開鑄一切畧與京城相仿應俱照京局辦理經戶部議准支給報銷在案但查京局令鑪頭將錢易銀給發所以防夾帶之弊保局鑪座無多稽察易周本無需易銀給發而鑪頭轉復自行易銀者緣保局鑪匠雇自京師而保定錢價又常賤於京師故各匠援就京局發銀之例皆不肯領錢鑪頭因匠役人眾勢難強雇而彼時以錢易銀所賠尚屬無幾遂爾允從日久不能復改此保局密通京師難與他省一例之情形也因係鑪頭自

行易銀給發非由官辦歲底報銷仍照官給鑪頭錢數開造是以並無另有奏報之案至京局鑪頭易銀不敷之項已蒙加恩將淘汰餘銅變價賞給數至盈萬臣請將寶直局每年淘汰餘銅照京局例賞給鑪頭添補工食報聞又諭據德保奏自思茅帶領兵丁於八月初二日至小猛養賊匪聞官兵聲勢俱已遠遁次日在九龍江一帶搜查並無蹤跡現在冰兵防守一招所奏甚屬荒唐可笑前此德保在小猛養並未遇賊第因滇兵怯懦不堪一聞江中船行聲息遂爾棄仗紛逃德保彼時不但不能約束兵弁恐未必無倡率徒步而回之事其恒怯已可概見及退至思茅探知九龍江一帶實

無賊蹤因復帶兵前進思以文其退避之咎今乃由六百里加緊馳奏謂賊衆聞風逃遁並籌及防守事宜其意尚欲飾其能事竟不計及彼處本無賊匪安得有逃遁情形況譚五格現已帶兵前往德保又何妨少待而必欲急遽入告若此有此種種情節德保於此事不能無罪昨已屢降諭旨令鄂寧前往普洱查辦逃避兵丁及德保是否畏憚退縮據實奏奏今有此奏明係伊懼怯而又誣奏鄂寧到彼即行傳旨將德保革職嚴審定擬具奏其總兵員缺即著明瑞鄂寧商酌奏補並將此傳諭明瑞知之○兩廣總督李侍堯廣東巡撫王檢奏據署廣東南雄協副將署保昌縣知縣先後稟報

平定縣志

卷一

於本年五月二十四日罕獲江西邪教將日達劉芳名西洋人安當呢都船戶李嶺南五犯并於蔣日達身上搜出鈔書六本鈔單二紙查係天主教經卷即將人犯書單批解兩司嚴究定擬另行具奏報聞是日駐蹕巴顏溝大營戊子上行圍諭軍機大臣等近據明瑞奏稱揚寧於進剿緬匪一切事宜辦理頗形拮据且自木邦回後官兵等亦不心服等語朕以揚寧雖稍覺衰老究係軍營閱歷之人是以遣彼前往乃稱官兵等不服未識何故前據伊奏稱衆兵潰散之後伊已奔出等語此語未知確否或衆兵潰散伊隨後奔出或因伊首先奔出以至衆心不服或另有別情之處著順便傳

諭明瑞令其據伊所知奏聞命少詹事嵩貴提督河南學政是日駐蹕鄂爾楚克哈達大營翼日如之已止

上行圍賜扈從王公大臣蒙古王公台吉及哈薩克使臣公品級都勒特克等食勅諭哈薩克汗阿布賚曰伊犁將軍大臣派員護送爾使臣至木蘭入覲將爾所呈之書具奏霍罕額爾德尼伯克於去歲殺爾弟依斯干達爾汗又殺其四子擄其妻子以去爾等前往攻戰擊殺多人額爾德尼敗北入畢什克特城內不出爾欲攻取城池又無大礮仰懇大皇帝發兵二萬並乞大礮等語所奏甚屬過當爾哈薩克霍罕等皆係歸服朕之臣僕額爾德尼在朕前並無過犯豈有助一臣僕攻一臣僕之理如因爾請兵攻額爾德尼朕即行賞給倘伊亦因攻擊爾等請兵朕又將何以處之此事斷不可行且數年爾等漸近內地游牧經我將軍大臣等具奏欲行治罪朕加恩曲為寬免茲復降旨卡座以內空閒地方准爾等窮民游牧此特因爾等均屬恭順之藩夷俾各得休養安生爾宜與同藩和好以圖永沐朕恩如一味仇殺彼此報復又向所底此兩敗俱傷之事也適額爾德尼亦遣使恭請朕安到時朕亦如此訓示朕為天下共主所有歸服藩夷臣僕俱一體眷顧並無左袒爾所遣來使都勒特克等朕施恩令其瞻仰隨圍與宴賞賚有加又特賜爾蟒緞等物交爾

使臣齋回爾惟恪共臣職和睦同藩勿替朕嘉惠至意特諭
諭軍機大臣等譚五格奏德保在九龍江聞有賊至將兵
糧軍械拋棄倡率兵丁退逃一摺已另降諭旨辦理矣譚五
格以提督全省軍務之員帶兵前往勦賊既已查明賊匪不
過烏合之衆德保並未見有賊蹤一聞虛信即恒怯退回致
官兵相從潰走如此畏縮不堪之員譚五格並不嚴行叅劾
請治其罪僅於摺內申敘奏聞看來此人竟全不解事前據
明瑞奏秋間進勦時提督大員須另統一路正兵請將譚五
格調為雲南提督專任其責今觀其查奏此事胸中全無條
理若令其獨當一面恐於調度機宜不能切當是分路統兵
之事不可專委之譚五格矣因思副都統額勒登額從前平
定回部時曾經宣力建功領兵之事是所熟悉或可令其代
譚五格分路領兵再侍郎額爾景額素有才幹將來大兵進
勦時木邦一帶無須伊駐兵接應即令額爾景額領一路正
兵較額勒登額自當更勝著明瑞酌量該處情形臨時籌辦
至譚五格止可隨明瑞軍營聽候遣委令其管束滇黔官兵
尚彼力所能為也將此諭令明瑞知之 又諭前據德保屢
次奏報見其詞語閃爍支離即料其必有畏葸捏飾情形諭
令鄂寧前往查辦昨德保復由六百里馳奏則於賊退之後
領兵前往詭稱賊匪逃遁冀文其過種種荒唐欺飾之處不

能自掩已降旨將伊革職今據譚五格奏德保在九龍江並
未見有賊蹤一聞千總蘇起文稟報橄欖壩官兵被賊衝散
之信即令土司刀維屏引往小路而走衆官兵亦隨俱走致
所存兵糧軍械被賊燒搶等語情罪甚屬可惡實出常理之
外閱之不勝髮指前因滇省綠營將領怯懦債事嚴行懲創
德保於今春陞見時請赴軍營出力念其係滿洲世僕必知
顧惜顏面倍加奮勉是以將伊調任滇省乃伊於九龍江一
帶並未遇賊輒爾心存恒怯一聞謠報賊信不但不能董率
兵丁向前勦擊轉從小路退回致官兵相隨潰散並將兵糧
軍械棄置不顧且屢次誑奏欲飾其退避之跡其無耻喪心
與綠營惡習何異思之實堪痛恨著傳諭鄂寧將德保鎖拿
解京治罪並須遴選妥幹之員沿途小心管解毋稍疎虞致
令畏罪自戕所有報聞賊信之千總蘇起文亦著革職等因
解京究訊德保家產現已查封其任所貲財著鄂寧一併查
辦至書敏在小猛崙遇賊不能身先士卒衝鋒打仗僅隔江
施放鎗礮已屬畏葸不堪乃僅留都司那蘇泰在彼堵禦而
已退回三十里外之緬甸駐劄其罪更為可惡使伊尚在必
當重治其罪今既身故已為倖逃軍律其屍骸不必官為料
理送京至譚五格身任提督所屬總兵皆資統轄乃見德保
如此退縮並不嚴行叅劾請治其罪僅照常申敘奏聞殊屬

不知事體諱五格著傳旨嚴行申飭並傳諭明瑞知之 庚寅

上行圍 禮部議覆貴州學政陳奎奏稱各省府試已畢每有奸胥猾吏將未經府取及緣事誤考童生暗受賄賂續入冊尾學政收考無從稽查應請於各府試畢榜示後限一月內將所取姓名造具清冊覈對鈐印申送學政衙門等語查學政考試時卷面鈐號不令姓名顯露係專指試卷而言其實學政點名時原以名冊為憑向例止令提調官申報錄總數未議及將所取姓名一併申送於稽查之道尚未周密但如該學政所奏一月之內造冊申送仍覺遲緩轉恐滋弊請

字錄永三三

嗣後令各府考試事畢揭案之後提調即於一二日內將錄取童生姓名人數造冊封固鈐印申送學政存貯學政不得豫先拆看至試日點名時將名冊取出公同驗封拆開同臨期所送點名冊一併稽查覈對如有竄易名姓與前冊不符及增添人數者即立時指交提調官查辦從之 工部議覆江南河道總督李宏疏稱外河廳屬清口存工木龍護盤五架上下挑溜護灘均屬有益內第五架木龍係三十年添建經臣查勘情形應將該龍坐盤各陞關拆起於五龍後尾加接長十丈其頭二三架木龍護盤尚可加纜修整至第四架木龍歷經多汎纜朽木鬆更兼水凌剝削龍身大半淤沈應

拆卸改築仍移灘外安設業經委員勘估懇請動項興修應如所請從之 是日駐蹕扎克丹鄂佛囉大營 辛卯

上行圍 是日駐蹕依綿峪大營 是月湖北布政使閔鶚元奏查湖北之公安江陵荊門宜城襄陽五州縣為雲貴進京孔道計程七百五十里向設驛遞十站五州縣分管惟荊門州兼管麗陽石橋建陽州城四驛計程三百里驛務稍繁內建陽離城南九十里石橋離城北六十里尚易兼顧惟麗陽一驛離城北一百二十里為荊門及鍾祥縣交界之所驛屬荊門地屬鍾祥其附近村莊亦多隸鍾祥管轄該處雖有荊門之仙居司巡檢兼司驛務因地多隔屬呼應不靈應請將

字錄永三三

麗陽驛驛務改歸鍾祥管理其兼管驛務之仙居巡檢即請改屬鍾祥為麗陽司巡檢并將鍾祥縣附近麗陽村莊量撥數處歸其管轄其一切衙署書役俸工均仍其舊再查沿途各驛如呂堰漢江鄆城荊南房陵孫黃等處俱額設排夫自八十名至百餘名不等惟麗陽石橋州城建陽相連四驛祇於州城設排夫一百一十名其麗陽石橋建陽有馬無夫遇有差違則由宜城等處召撥易致稽遲除石橋距上下站較近毋庸添夫外請於麗陽設排夫一百名建陽設排夫八十名均於湖北省內驛務稍簡之處酌量抽撥毋庸額外加增得旨嘉獎 陝甘總督吳達善奏覆分徙徐帽兒莊戶民一

案臣即飭委署固原州知州姚榮等確查據該州稟覆該莊回民共五十八戶為匪犯案者三十八戶所剩戶口傳訊隣莊鄉保人等會稱向係業農實未同夥行竊臣按照巴里坤穆里烏魯木齊三處地方酌量戶口多寡分撥安插分作三起遵員護解查各戶並無田產均係赤貧應照戶民例酌給房地籽種牛具以裨耕屯再查馬得蕪案內安省咨緝及甘肅訊出各夥犯共九十名業經拏獲審擬者七十九名餘尚未獲十一名節經嚴飭各屬并分咨各省躡緝務獲得旨覽又批不可視為通緝完案之事仍宜嚴緝設法務獲年終將緝獲幾名具摺奏聞又奏沙州一路軍臺經臣奏准改由

安西舊路但軍臺改移雖有舊轍可尋恐其間或尚須因地制宜之處復令肅州鎮總兵會同該道府商辦據該鎮道等酌議沙州新路軍臺十四塘每塘於新路內先抽撥馬十匹兵夫五名隔塘間徹十把一員於閏七月十五日移往安西舊路安設一切軍臺奏摺文報均由舊路行走其餘一半弁兵夫馬於閏七月二十五日全數徹安舊路其各塘汛兵照依新路一律添設五名分布查防報聞四川總督阿爾泰奏臣巡查川北一帶營伍沿途經過各州縣凡有關於水利農田及疏濬河渠興修城工處所臣俱親臨查勘籌辦查成都東北百里有金堂縣之趙家堰該堰上承成都內江分洩

之水下達數州縣引渠分灌田疇臣飭令該縣於春初都江堰開放後即令趙家堰以上各河口築壩截水分灌引渠至夏秋盛漲趙家堰又為成都附近各河渠洩水尾閘本年夏秋江水疊漲臣飭該縣將趙家堰大壩拆卸俾上游餘水得以宣洩暢注復親赴查勘酌定蓄洩水則疏築章程以收水利實效又潼川府之中江縣城身濱臨大河因河流對岸淤沙大溜直趨城隍易致衝刷臣飭令該府縣將對岸沙灘開挖支河引水暢注而城隍亦令培築完整又保寧府首邑閬中縣為鎮道駐劄要地該縣現動帑興修城工臣周環查視西面城身因逼近大江每至伏秋江漲水抵城根查該江順西奔流至城身西南角一帶折溜南注其對岸率皆沙崗惟西南折溜最窄之處山角石嘴橫截江流故每有水衝城根之患臣酌籌於上游江身王家灘處所修築挑水壩使大溜趨江仍於對岸開挖引渠以水刷沙復於下游石嘴逼仄之處開鑿數丈使江流去路寬暢不致水溢城基然後培修城隍以資捍禦又自保寧回至綿州順查該處修城事宜據該州稟該城西南二面現僅存殘缺城基東北二面民居之外即係大河城基蕩然無存緣綿城逼近涪江前因大水衝刷成河臣親復查勘該處既無可改支河之處而城西城南又復兩河環繞若仍於該處修城勢不免於衝刷殊非一勞永

逸之計容臣另行籌辦妥協得旨諸凡留心經理妥協嘉悅
覽之 廣西布政使淑寶奏查粵西額徵關稅除桂林首府
一廠外餘多距省遠稽察難周該道府州向無考成亦恐
日就因循請將平樂梧州潯州南寧慶遠五府廠責成該管
道員富川賀縣昭平懷集懷遠博白北流陸川等八縣小稅
責成該管府州惟土田州稅係土司經營為滇粵要道密邇
百色請責成百色同知各就近稽察耳目易周如無苛剥商
民隱漏侵欺情事即按季各具印文申送撫臣及臣衙門備
案仍將各屬徵存稅銀據旬報收單覈有成數隨時委員監
拆解送以杜虧那該道府州徇縱失察發覺一併揭參報聞

大清高宗法天隆運至誠先覺體元立極敷文奮武孝慈神聖
純皇帝實錄卷之七百九十三

大清高宗法天隆運至誠先覺體元立極敷文奮武孝慈神聖
純皇帝實錄卷之七百九十四
乾隆三十二年丁亥九月壬辰朔
上行園 遣官祭

歷代帝王廟 遣官祭

都城隍之神 諭曰內閣學士慶桂著往庫倫辦事立即馳
驛赴京治裝數日將頒給將軍成衮扎布之欽差大臣印信
攜帶速即馳驛前往所奏帶往筆帖式巴克坦布亦准其帶
往 又諭曰巴爾品著以叅贊大臣前往雅爾更換烏勒登
來京巴爾品與哈薩克接壤辦事著施恩賞戴花翎不必來

京請訓即由彼處馳驛前往 諭軍機大臣等據達桑阿奏
稱布古爾庫爾勒回人等所種地畝現屆升科之年派噶爾
扎前往查勘伊等所種禾苗據稱布古爾所種麥收均屬暢
茂共收八十一百石庫爾勒因遇蝗災祇收三百十七石等
語回人耕種全賴灌溉然蝗蝻偏災亦為事所不免伊等所
種地畝原有應納額賦如遇此等偏災雖不便照內地一律
蠲免若將伊等額賦全徵恐於生計不無拮据所有庫爾勒
本年應徵額賦著加恩量減其應如何辦理之處著即行議
奏嗣後別城回人所種地畝遇有偏災其額賦應如何減免
之處著傳諭永貴會同各城大臣擬定章程具奏以示朕撫

循新附之至意○又諭現今青海無甚事件不必特設大臣
辦理事務且該省又有總督就近著交總督兼管甚屬簡便
不致掣肘將駐劄青海辦理番子事務大臣之缺裁汰歸於
陝甘總督管理每年如何前往巡查及彼處所有部院司員
筆帖式是否應裁應留其如何歸併該督兼管之處著吳達
善詳悉定議具奏○又諭據明瑞奏稱總兵書敏領兵在小
猛崙地方與賊隔江接戰時將兵丁交於都司那蘇泰伊不
顧顏面逃回緬寺等語書敏身為總兵且係滿洲臣僕乃遇
賊並不奮勇打仗不顧顏面逃回其情甚屬可惡伊等雖已
病故亦不可寬宥將此傳諭舒赫德查書敏之子如係官員
著革職交刑部治罪若非官員亦交刑部治罪并將伊家
產查抄以刑部郎中鄂忻為左副都御史是日駐蹕薩
勒巴爾哈達大營 癸巳

平定回疆方略

二

上行圍○諭軍機大臣等青海之王公台吉等俱係蒙古地方
官員辦理伊等事務彼此意見難免不無扞格不若仍令大
臣等駐劄專辦伊等事務於伊等有益護軍統領莽古賚前
曾駐劄彼處辦事著莽古賚前赴青海暫駐彼處辦事俟屆
更換之期朕另降諭旨○又諭昨鄂寧奏小猛崙竄入賊匪
雖據查明即係召工等并被脅之孟良等處夷民但來歷尚
未明晰已選差幹役前往並令龔士模等調取必先捧到普

洱詳詢原由等語已於摺內批令俟辦理緬賊功成回兵時
順勦矣似此烏合之眾敢於擾掠邊境罪不容誅將來平緬
旋兵必應一併勦除以期永靖遠徼但辦理此等事務機宜
最當慎密現在為期尚早一切查詢來歷及將來作何籌辦
之處切不可豫露端倪使賊匪有所知覺至進兵直搗阿瓦
時與九龍江一帶相距遼遠并匪餘孽自毋庸亟為查辦若
經過道路或有匪黨竄聚相隣敢於潛助緬逆者即不妨順
勢剪滅一二狡窟以壯先聲且此輩賊匪往來無定若知我
勦辦風聲先期遁避或匿跡軍臺左近伺間潛為偷竊亦不
可不籌慮及之即如前此西路用兵時克呼特烏喇特曹桑
我不備侵擾臺站乃明瑞所身經深悉者此於軍行甚有關
係尤當一體留心防範著於明瑞奏事之便將此傳諭知之
是日駐蹕安巴究和羅昂阿大營 甲午

平定回疆方略

三

上行圍○諭曰傳景著賞給副都統品級前往青海辦理事務
毋庸給俸其養廉等項照舊支給是日駐蹕烏蘭哈達大
營 乙未

上行圍 是日駐蹕坡魯昂阿大營 丙申

上行圍 吏部議覆雲南巡撫鄂寧奏稱滇省道員惟新設普
洱府之迤南道與總兵同城駐有重兵統轄上司外接邊境
分巡普洱鎮沅元江臨安四府一切稽查彈壓與邊防事宜

必須文武大員會商妥辦又迤西道駐劄大理府與提督同城管轄大理鶴慶麗江永北永昌順寧楚雄姚安景東蒙化十府地廣事繁有兵民交涉事件二道俱係分駐邊要均應准加兵備道銜俾文武聲勢聯絡其各該道關防武職都司以下聽其節制之處仍照例辦理應如所請從之又議覆貴州巡撫鄂寶奏稱貴西道向駐安順府城自前撫臣開泰題准移駐威寧州該處界連四川及雲南之東川烏蒙昭通等處控制實難今遵旨准加兵備道銜都司以下令其節制責成太重非部選新任之員所能勝任應請改為銜繁難兼三要缺頒給貴州分巡貴西威寧等處兵備道關防請旨簡用應如所請從之○以鑲黃旗漢軍參領艾肇昌為鑲黃旗漢軍副都統是日駐蹕舒穆爾台大營丁酉

上遣侍衛索諾木策凌赴避暑山莊

皇太后行宮問安○行圍是日駐蹕塔哩雅圖昂阿大營

戊戌賜扈從王公大臣及蒙古王公台吉等食諭軍機大臣等據彰寶奏驗收省北州縣修竣城工一摺已交軍機大臣照殊筆刪節發交該部知道矣此等奏摺事關城工要務

理應交部存案至五臺行宮及名勝座落等項間有剝落損傷隨時黏補與城垣工程有何干涉乃該撫摺內軌行牽連聲敘殊屬不合著將此傳諭知之軍機大臣等議覆伊犁

將軍阿桂等奏稱雅爾地方並未設立驛站一切應用物件俱自內地運至烏魯木齊復由該處取道伊犁所屬之呼蘇圖布拉克其間有大河數道濟渡時物件多被沾濕請由楚

呼楚至色特爾默多沙喇呼魯蘇伊瑪圖烏爾圖布拉克地方設臺四座由奎屯至庫爾河沙喇烏蘇鄂倫布拉克地方

設臺三座將一切應用物件轉運每臺設兵十五名馬十五

匹牛五隻兩臺添設委署筆帖式一員管理應如所請從之

是日駐蹕張三營行宮已亥吏部議覆湖廣總督定長

奏稱孝感縣屬之楊店北至小河溪九十里南至澗口一百

里東至黃陂縣城七十里西至孝感縣城五十里為四路居

中要站差使絡繹該處向係孝感縣馬溪河巡檢管轄該巡

檢現駐三汊埠不臨大路烟戶無多請將巡檢移駐楊店應

如所請從之○豁除江蘇崑山新陽鎮洋婁縣青浦等五縣

衛挖廢田地四頃七十畝有奇額賦旌表守正捐軀之安

徽宿州民鄒伯蒼女鄒氏是日駐蹕波羅河屯行宮庚

子戶部議准湖廣總督定長疏報江夏武昌嘉魚蒲圻興國

大冶漢陽漢川黃陂沔陽黃岡蘄水蘄州廣濟天門潛江安

陸雲夢隨州應山江陵石首監利等二十三州縣武昌武左

沔陽黃州蘄州荊州荊左七衛陸續詳報本年夏秋之間陰

雨連綿山水江水一時並漲低窪田地多被淹浸業經委員

將軍阿桂等奏稱雅爾地方並未設立驛站一切應用物件

俱自內地運至烏魯木齊復由該處取道伊犁所屬之呼蘇

圖布拉克其間有大河數道濟渡時物件多被沾濕請由楚

呼楚至色特爾默多沙喇呼魯蘇伊瑪圖烏爾圖布拉克地

方設臺四座由奎屯至庫爾河沙喇烏蘇鄂倫布拉克地方

設臺三座將一切應用物件轉運每臺設兵十五名馬十五

匹牛五隻兩臺添設委署筆帖式一員管理應如所請從之

分頭查勘是否成災分數另行詳報應行急賑者先行撫卹
一月口糧其倒塌房屋淹斃人口均飭令查明一例辦理所
有本年應完民屯額賦暫請緩徵得旨依議速行 蠲免緩
遠城助馬口外拒門保安等處電災田地七百六十一頃五
十五畝有奇額賦 豁除安徽無為州挖廢田地六十五頃
七十六畝有奇額賦 是日駐蹕中關行宮 辛丑
上詣

皇太后行宮問安 諭軍機大臣等刑部九卿所進四川秋審
本內將該省定擬緩決之劉錫宏史孝章劉義位三犯改入
情實甚得情法之平該犯等或係誣人為竊致其情急投河

實錄卷七九四

六

或係行竊拒傷事主或係搶奪傷人情罪均為重大何得驟
行議緩秋讞為明刑大典雖經總督覆覈具題其分別緩實
皆由於臬司定議此三案是否現任臬司費元龍所辦抑係
前任臬司覈定何以寬縱若此費元龍前任廣東按察使時
聞其性近沽名且於刑名事件未能諳習彼時從寬不加深
責原以觀其後效若此數案皆係彼經手則惟知姑息以邀
虛譽即難望其實心任事矣著阿爾泰將何人定擬及費元
龍是否堪勝臬司之處一併查明據實具奏可將此傳諭知
之尋奏查承辦此三案之員係前署按察使川北道劉益該
員擬議失當臣未能覈明更正咎無可辭至臬司費元龍於

秋審後七月間始行到任此三案並未承辦該員自到任以
來入雖遲鈍但本任事件尚無錯誤報聞 又諭前內務府
大臣奏請將

雍和宮香燈地畝新舊租銀交與直隸總督辦理朕因地方官
民社之事甚多恐其無暇兼顧是以降旨交內務府另行查
辦州縣既可省催科之事且免經徵不力處分已屬朕體卹
加恩今內務府派員查辦若地方官仍視為與己無涉則無
此情理矣再據內務府查奏大興宛平等八州縣自乾隆十
五年以來積欠至二萬三千餘兩是前次經徵各官奉行不
力已可概見著傳諭方觀承專派妥員會同內務府司官將

實錄卷七九四

七

積欠各州縣悉心體察實力查催以完應款而裨公務並令
該督將作何酌定章程幫辦之處據實奏聞內務府摺并抄
寄尋奏臣遵諭遴委幹員會同內務府委員及地方官履畝
查勘將新欠限歲內全完舊欠分別催追將來內務府收租
應照錢糧莊頭地租委員收取之例先將應完租數知照地
方官傳催於麥秋後委員到境傳令各佃親交如無故欠租
地方官查實追比或佃戶貧頑無力即由地方官另召頂種
則應款易清章程可定得旨如所議行 又諭據常鈞奏稱
哈喇沙爾應行換班之屯田官兵請於明歲二月初旬乘耕
作之候先派一半前往將舊官兵更換一半其新到兵丁令

舊存官兵帶領詳細指示俟熟悉時至十月底再行更換一半今其速回至此項屯田兵丁俱係榆林鎮所屬相距八千餘里若臣處行文多需時日懇請降旨陝甘總督等語常鈞此奏事尚可行但應行更換官兵俱係榆林所屬距哈喇沙爾遙遠明歲二月間似未能必到著寄信吳達善若果於明歲二月可到不誤耕期即照常鈞所奏先派一半前往倘料理不及將應行如何辦理之處酌定辦理奏聞尋奏臣酌量先派一半除飛行延綏鎮總兵德寧照原派之數減半先派兵三百五十名都守一員千把四員外委四員仍令於十月初旬前往明歲正月抵哈喇沙爾以資耕作其餘一半官兵俟秋間再往更換報聞是日駐蹕避暑山莊至丙午皆如之 壬寅

上詣

皇太后行宮問安 諭軍機大臣等據宋邦綏奏廣東省協濟雲南馬匹於十月初旬可以全抵永昌等語前該撫奏廣西解解馬匹須十月中旬到彼已於摺內批諭催令速赴矣廣西與雲南接壤較廣東省道路為近其解滇馬匹自應到在廣東之先何以廣東協濟之馬於十月初即抵軍營而廣西解馬反到在廣東之後著傳諭宋邦綏將因何遲滯緣由速行查明具奏 癸卯

上御依清曠勾到秋審官犯服制及雲南貴州情實罪犯停決官犯六人服制斬犯二十九人雲南絞犯一人貴州斬犯七人餘四十九人予勾 諭本日勾到官犯內因公勒索侵蝕隄工銀兩擬絞之黎慕蓮一犯刑部九卿因其業經司鐸即入於本年官犯情實但該犯斂費修隄時尚未服官不過以地方劣衿充當首事遂爾起意作弊派收隄費覈其情罪究與現任職官貪婪者有間是以姑免其勾決至案內陳世鎮身為典史輒指稱撞騙至二百餘兩而與黎慕蓮同辦隄工之余函秀曾任教職於前且侵用銀兩亦比之黎慕蓮為數較多計贓論罪何以反輕於黎慕蓮是原審原擬均未得輕

重之平此案著該部另行覈擬明白回奏至貴州省奪犯毆差一案起意之楊傑士業已予勾此案內該犯之弟楊靈岩糾約多人復又毆傷差役而楊哲士附和前行隨同助毆二犯僅擬以為從杖流夫楊傑士時已就拘繫不能動手奪犯則奪犯毆差之為首者究屬何人並著該部一併另擬明白回奏 吏部議覆閩浙總督蘇昌奏稱邵武縣禾坪地方離城寫遠耳目難周必須於適中之地添駐員弁查邵武縣禾坪口縣丞公事甚簡應請將縣丞移駐禾坪其竿口地方係驛路通衢未便乏員駐守查有邵武府司獄一員專管府監一無所事應裁改為巡檢一員駐劄竿口將縣丞所管十都村

鄉歸設巡檢管轄其司獄事務歸併邵武府經歷專管再木坪既設有縣丞必須添設武員協同防守應將東路原防橋頭汛之把總一員撤歸移駐木坪於左營存城兵內酌撥二十名歸把總管轄駐劄防守再於存城之額外委內酌撥一員赴擘口汛隨同把總協防應如所請從之旌表逼嫁捐軀之江蘇上海縣民朱意觀妻沈氏甲辰兵部尚書雲貴總督明瑞署刑部侍郎參贊大臣額爾景額奏查進勦緬匪由京派出八旗滿兵三千名檄調四川兵八千貴州兵一萬內除派往普洱兵一千尚餘九千本省兵五千共綠旗兵二萬二千名俟陸續到齊日臣等擬將大臣侍衛各官員分領三路互相策應一路自宛頂出口由木邦前進木邦係夷部四通之地最為緊要應派兩營滿兵一千餘名三省綠旗兵七千餘名臣明瑞親自統領派滿洲領隊大臣扎拉豐阿伯玉魯斯總兵國柱李全一同行走一路自鐵壁關出口由猛密前進此一路與新街水路較近大金江以外夷人亦宜鎮以威力應派兩營滿兵九百餘名三省綠旗兵七千餘名臣額爾景額同提督譚五格統領商辦派總兵王玉廷一同行走批令額爾景額在此路總統木邦又令珠魯訥前往珠魯訥未到之前如木邦地方需人時將譚五格暫行留駐又奏再札防以南由山前經過猛古猛浦此一路更屬險隘由

此派兵前往與猛密中路互為聲援且可直搗賊匪巢穴但此路不能多容兵馬應酌派兩營滿兵九百名三省綠旗兵三千餘名令領隊大臣觀音保統領派總兵長清一同行走又批額爾景額觀音保此二人汝再酌定又奏將乾清門侍衛及一百名巴圖魯侍衛官員兵丁分為三隊在緊要地方備用尚餘三省綠旗兵四千餘名令總兵達興阿統領至木邦後駐防但永昌至木邦山多路窄各隊兵不能擁集一處令駐劄木邦兵在進勦兵之後兩三日陸續起程再將該夷部兵調撥四千名伊等熟悉山路林箐帶領行走以為犄角之勢使賊匪驚潰可蓄我兵力以備臨陣接衝將續行趕到者酌派各隊餘添於騰越州駐劄防守又查龍陵原有駐兵千餘名杉木龍駐兵二千餘名進兵之後龍陵已屬內地毋庸駐兵將此駐兵千餘名挑取數百名令其在木邦行走使之熟悉道路餘移於宛頂黑山門等處駐劄以為木邦接應杉木龍原駐兵二千餘名特為防守騰越州隘口而設未便改移仍駐劄總匯之處臣思賊匪節次抗拒官兵今秋大兵進勦伊等亦必揣知豫防惟及早進兵乘其不備三路合攻咸功似屬較易得旨許待汝等捷音雲南巡撫鄂寧奏查德保領兵防守九龍江原以拒賊乃始則收拾賞號銀兩緞疋等項交與宣慰刀維屏收存豫為逃避之計旋遣刀名廳

查探道塗以自謀出路於半夜騎馬先走其倉皇倡逃之狀已屬顯然乃復肆行欺罔欲卸罪於兵吏為喪心無恥經督臣明瑞飛札提臣譚五格將德保摘印委員押赴永昌一面鎖拏接解赴京得旨好速解來可惡之極 乙巳

上詣

皇太后行宮問安 御依清曠勾到四川廣西廣東情實罪犯停決四川斬犯二人絞犯二人廣西絞犯一人廣東斬犯六人絞犯三人餘八十三人予勾 丙午吏部議覆福建按察使余文儀奏稱查例載一切命案扣限六個月完結如有卑幼擅殺期功尊長等案承審官限一月內審解府司督撫各限十日審轉具題統限止許扣定兩個月稍有遲延即照例分別叅處蓋以事關倫紀務使兇頑速正典刑乃足快人心而昭炯戒但此等重案推求原自不易其在骨肉周親互相掩護尤難免串供巧避之弊雖例載案情繁重實有不能依限完結者准督撫先期題咨展限但罪囚情偽必經審勘而後明州縣一月限期轉瞬即屆迨知案有疑難詳明請奏而定限已逾又恐難免叅處必有草率定供顛預了事者請嗣後州縣承審卑幼擅殺期功尊長之案如供証明確仍照定限辦理外倘果有情節難明或經上司駁飭以致例限稍逾准令督撫於審題時據實附疏聲明可否准予免議之處請

旨辦理再查殺死三命四命之案悉照卑幼擅殺期功尊長例扣限兩個月具題但其中情形亦有不同如一人殺死三命四命証據確鑿無可狡卸者自可依限完結若係數人同謀共毆必須究明起意加功分別首從乃可定案如果有不能速結情節一併准其附疏聲明均應如所請從之

大清高宗法天隆運至誠先覺體元立極敷文奮武孝慈神聖純皇帝實錄卷之七百九十四

大清高宗法天隆運至誠先覺體元立極敷文奮武孝慈神聖
純皇帝實錄卷之七百九十五

乾隆三十二年丁亥九月丁未

上奉

皇太后自避暑山莊迴鑾○詣

皇太后行宮問安○諭曰署吏部侍郎慶桂署刑部侍郎珠魯

訥現俱出差高恒著兼署吏部侍郎事務喀寧阿著來京署

理刑部侍郎事務所遺山西布政使員缺著富明安署理○

是日駐蹕喀喇河屯行宮○戊申

上詣

皇太后行宮問安○諭曰李景高柏琨在烏魯木齊開辦事

俱已三年期滿著原任侍郎永寧前往烏魯木齊更換李景

高原任副都統福僧額前往關展更換柏琨○諭軍機大臣

等昨據明瑞奏現在統集大兵於九月內剋期分路進剿此

次我兵聲勢甚盛克敵制勝自可立奏膚功緬匪此時或懾

我軍威詭稱服罪輸款冀遁天誅明瑞等切不可稍存姑息

輕許納降此等賊匪狡詐性成去歲楞木鐵壁關等處屢次

詐降以緩我兵及兵稍退旋復抗叛其反覆無常之伎倆明

瑞等皆所深悉斷不應為其所愚況我兵自去歲新街至今

春木邦臨陣損傷者頗亦不少此非犁穴誅渠盡殲醜類不

足以中國威而彰天討尤不可僅以受降藏事若我兵直抵

阿瓦攻克其城即當戮其逆酋勦其兇黨大示懲創并就其

地界酌量分置土司以永靖蠻服或王師將抵賊巢匪黨等

果有仇彼渠魁擒縛來獻者即倖囚奏捷並多執其助惡逆

黨解送京師彼時或可貸以不死另為處置而進兵之始則

不可豫存寬宥之心也可將此傳諭明瑞鄂寧額爾景額等

知之○是日駐蹕常山峪行宮○己酉

上御行殿勾到福建奉天陝西情實罪犯停決福建斬犯二人

絞犯一人奉天斬犯一人絞犯十七人陝西斬犯一人餘七

十四人予勾○諭曰達崇阿侵蝕官鋪銀兩一案前據新柱

等奏稱達崇阿聞給事中伯興將至開原城盤查起意假造

帳本掩飾呈遞等語伯興有稽察錢糧之責達崇阿侵用鋪

銀至一千六百餘兩之多伯興既經盤查何以任其欺朦並

未查出所有伯興未經參劾情節著即明白回奏○又諭曰

玉柱在科布多已滿三年著伯都訥副都統扎隆阿往科布

多更換扎隆阿所遺副都統員缺著同福柱補授○軍機大

臣等奏伊犁換獲哈薩克馬匹近年為數漸多經將軍阿桂

奏准於牧廠內揀選二千匹運送烏魯木齊巴里坤哈密等

處添補營臺缺馬如尚有餘剩再轉送內地甘肅各標營等

因惟是伊犁貿易馬匹每年逐漸增多而內地倒缺應補者

正不止於甘肅一省。查與甘肅鄰境之陝西及山西河南山東直隸等省各標營馬例報倒斃十分之三除直隸一省暫停購買赴張家口收廠領補外餘陝西等省遇有缺額之馬俱給價在各口買補今伊犁既有此項餘馬與其給價購買不若通融撥補請嗣後將伊犁貿易馬匹除將盈餘解送甘省內地外即由近及遠遞次充補陝西山西河南山東等省缺額但查伊犁至陝西等省道路遙遠若竟將原馬長途解送馬力未免疲乏臣等酌議如伊犁馬匹解至甘省除撥補本省缺額外所餘之馬亦全數存留而於甘省附近陝西營分就近照數撥往至由陝西及山西河南由山西河南及山

軍機處手摺

上

東相承換替亦均照此例辦理從之。又議陝甘總督吳達善奏稱伊犁解往內地馬匹到巴里坤時已屆十月哈密以東路多戈壁兼水凍草枯難以趕收請暫留巴里坤牧放俟來年春草發長時解至安西等處充補各標營缺額等語查此項馬匹解往內地既非一時急需且自伊犁至內地道路遙遠沿途若無停牧處所馬力亦不免疲乏自應如該督所請至嗣後陸續解送內地馬匹既非急需應用原無庸限定時日將來自伊犁起解時如沿途適逢冬令即不妨暫留牧放俟天氣和暖後緩解其由烏魯木齊巴里坤哈密等處解赴內地者亦酌量時令應於何處擇水草休息餵養之處

均交與該將軍及該督酌辦從之。湖南巡撫方世儒疏報湘陰瀏陽醴陵湘潭茶陵道州江華武岡武陵龍陽郴州綏寧等十二州縣共開墾額外田地一百五十一頃六十九畝有奇是日駐蹕兩間房行宮 庚戌

上詣

皇太后行宮問安 刑部議奏查例載凡犯死罪非常赦所不原而祖父母父母老疾家無次丁者請旨留養等語嗣經節次定例視該犯理之曲直傷之重輕并是否獨子分別應准不應准於朝審時取結報部請旨發落惟是家無次丁者必本犯並無兄弟子姪或雖有而年未及丁力難養贍方與獨

軍機處手摺

上

子之例符合並無出繼承繼者俱准作為獨子之文乃向來各省將此等人犯一體聲請留養亦間有聲明與例不符不准留養者辦理未能盡一查律載若養同宗之人為子本生父母無子欲還者聽是出繼之子律得歸還不至缺所生者之養又無子者例許同宗昭穆相當之姪承繼由親及疎并遠房同姓之人皆可為嗣是為人後者本非所生原可另行承繼亦不至絕所養之親況本有兄弟并姪出繼及身為人後原與生而為獨子者不同若概得藉以脫罪既無以示懲創而出繼承繼虛實難憑亦易以滋詐偽應請旨申明定例勅令各省督撫嗣後遇此等人犯概不得以留養聲請秋審

時無庸取結報部得旨允行○是日駐蹕要亭行宮○辛亥
上御行殿勾到湖廣浙江情實罪犯停決湖廣斬犯五人絞犯
三人浙江斬犯四人絞犯一人餘七十三人予勾○以甘肅
西寧道尹嘉銓為山西按察使○鑄給督理蘇松常鎮太糧
道分巡蘇州兼管水利關防分巡松江太倉兵備道兼管水
利關防從江蘇巡撫明德請也○豁除江西星子縣衝坍民
田四十畝有奇屯田二十二畝有奇額賦○是日駐蹕密雲
縣行宮○壬子諭曰阿思哈奏新野縣知縣曹承宣捏稱
辦差賠墊勒令士民捐派人心不服縣差復任意作踐以致
革役楊蛟等聚眾扒毀書役等房屋事後復捏稱刁民聚眾
報復私仇請將該縣革職拏問究審等語曹承宣身為民牧
乃敢於差後捏稱賠累名色公然設簿勒索貪虐無忌實出
情理之外曹承宣著革職拏問與案內有名人犯嚴審從重
究擬以示懲儆○至楊蛟等於該縣派累之事並不赴上司控
理靜聽查辦輒敢糾聚多人肆行滋事亦屬目無法紀務即
嚴緝全獲另行審明按律定擬具奏○是日駐蹕南石槽行
宮○癸丑

上迴鑾奉

皇太后居暢春園○詣

安佑宮行禮○幸圓明園○諭江西省南昌新建進賢鄱陽餘

上詣暢春園問

于建昌都昌等七縣本年秋田偶被偏災業經降旨該撫令
其加意賑卹分別蠲緩更念此數縣連年被水民力倍為拮
据所有明歲輪免漕糧著加恩豫行蠲免至本年應完漕糧
仍緩至己丑年開徵分作三年帶完俾災黎益得寬舒以副
朕軫卹至意該部遵諭速行○諭軍機大臣等德保於九龍
江一帶退逃欺飾種種不堪已降旨革職拏問令鄂寧委員
解送來京著傳諭貴州湖南湖北河南直隸各省督撫於德
保到境時即添派妥幹員弁沿途協同小心護送作速馳解
毋得稍有疎虞可將此傳諭知之○命左都御史觀保教習庶
吉士○以兵部侍郎覺羅奉寬為鑲白旗滿洲副都統○甲寅
皇太后安○諭曰珠魯訥現在出差工部侍郎事務著鄂忻暫
行兼署所有錢法堂印鑰即交鄂忻帶管○又諭前因尹繼
善隨往熱河降旨令託恩多暫署兵部事務今尹繼善雖已
回京照舊兼管但明瑞現在滇南辦理軍務兵部滿尚書事
務仍著託恩多署理○諭軍機大臣等遼拉遜續奏舞陽縣
知縣書明阿虧短倉穀六十餘石又浮收七石餘斗將該縣
摘印看守請旨辦理等語已批交阿思哈並案叅處矣州縣
侵虧錢穀自應嚴究重懲使劣員知所儆惕今據摺內所稱
該縣短少浮出各穀總計不出百石之內以全倉數之其數

無多。不至遽獲重咎。且查覈時。盤量手輕。手重。贏絀因之互異。豈能較若畫一。邁拉遜查辦此案。或因書明阿同係滿洲。未免意存避嫌。或平日與書明阿別有芥蒂。不無稍事吹求。雖未便即為懸斷。但其中如管倉家人蘭姓投井自盡一節。或係一時愚昧。畏罪捐生。亦事之未可知者。著傳諭阿思哈。令其秉公研審該縣及家人。如有別項情弊。務即徹底根究。按例定擬。若情事僅止於此。亦祇予以應得處分。不必苛刻。深求有乖平允之道。阿思哈身為封疆大臣。自行迴護失察。不即據實悉心辦理。固不可。若因人參其屬員。而避迴護之名。不為之理枉。亦不可也。將此傳諭知之。○賑山東高苑博

實錄卷五十五

上

興樂安三縣被水災。民并予緩徵。○乙卯諭曰。福建提督馬。負書久膺專閫。奉職恪勤。今聞溘逝。深為軫惜。所有應得卹典。該部察例具奏。調廣東提督黃仕簡為福建提督。以福建臺灣鎮總兵甘國寶為廣東提督。調廣東南澳鎮總兵王。巍為臺灣鎮總兵。廣東瓊州鎮總兵何思和為南澳鎮總兵。以廣東澄海協副將林昌韜為瓊州鎮總兵。○丙辰

上詣暢春園問

皇太后安。詣

大高殿

壽皇殿行禮。還宮。

御書河南陝州三門

禹王廟扁曰功垂疏鑿江蘇安東縣雲梯關

禹王廟扁曰利導東漸安徽盱眙縣龜山

淮濱廟扁曰佑孚川人○兵部議覆兩江總督管江南河道

總督高晉等奏稱江南運河向設桃清中河通判一守備一

宿遷運河通判一守備一其邳州境內運河上自黃林莊起

下至窑灣口止共一百二十里歸邳州廳管兼管嗣於

乾隆二十三年經河臣白鍾山奏准將邳州廳所管運河改

併運河廳管理惟邳州營黃河北岸守備止管一岸似可兼

管運河當日未經一併改隸查運河守備專管宿遷境內運

實錄卷五十五

河工段無多其邳州運河毗連緊接策應近便與運河通判

同駐宿遷實可相資為理應將邳州黃河營所管運河自黃

林莊至窑灣口一百二十里一併改歸運河守備就近會同

該廳管理應如所請從之○丁巳諭軍機大臣等周景柱奏

請陞見一摺已批令不必來矣○甘省刑名案件較之他省雖

不甚繁然臬司職司定讞責任綦重看來周景柱為人似屬

謹飭但才具未見出色且年齒漸老現在辦事是否果能勝

任著傳諭吳達善令其留心察看即行據實奏聞○又諭據

馮鈴奏蒙城縣民張繼載與僧人源輪同謀殺死伊祖張瑞

甫已將張繼載凌遲處死其源輪各犯另行定擬一摺張繼

載以孫害祖實為戾氣所鍾自當決不待時以彰顯戮至源輪本係僧人乃以妬奸起釁挾被逐之嫌謀斃人命即其孫干犯逆倫重罪亦該犯實為戾階應立行正法庶足蔽辜其源朝雖係聽從竊牛圖害亦非尋常同行而不加功者可比並應按律定擬抵罪入於秋審情實方為情法允符可將此傳諭該撫知之 又諭據明瑞奏稱雲南綠營兵丁習氣頹靡已甚若於辦理緬甸事竣將賞給陝甘官兵為奴之厄魯特查出移來滇省分於沿邊營汛充補綠營馬糧額缺教以孳生牧放以收其力可成勁卒一旅請降旨該督此際將賞給官兵為奴之厄魯特等盡數查明以便移駐等語此等厄

魯特雖經賞給官兵為奴但伊等既不甘服役而養給伊等又多糜費若如所奏移之雲南轉為兩便著傳諭吳達善將此項厄魯特等盡數查明俟平定緬匪後將如何移駐之處定議具奏明瑞等奏摺一併鈔錄發往 戊午

孝慈高皇后忌辰遣官祭

福陵 諭山東海豐霑化樂陵商河陽信清平高唐恩縣夏津章邱鄒平等處因本年雨水過多秋收稍薄業經借給麥本口糧俾資播種第念該處積年歉收帶徵銀穀為數較多若新舊並徵輸將未免拮据著加恩將海豐等十二州縣所有本年應帶徵三十三一兩年舊欠地丁錢糧及各年

民借未完倉穀麥本等銀俱緩至明年麥收後開徵以紓民力該部遵諭速行 豁除江蘇句容縣衛冊沒田地乾隆十一年至三十年舊欠額賦 是日起

上以孟冬享

太廟齋戒三日 己未諭現在雲南綠營兵丁武藝平常而戰陣懦弱毫無勇往之氣風俗頹敝此皆由歷任督臣不行整頓任其積習相沿所致從前愛必達劉藻吳達善皆曾任彼處總督平日不以武備為事以致流弊至於此極也膺封疆要任者如此辦事必當嚴示懲創愛必達已治其罪劉藻亦業已物故吳達善著交部嚴加察議為各省督臣炯戒 又

諭據阿桂奏稱管理伊犁屯田事務副將瑪琥三年期滿又曾効力二年理合遣回肅州總兵俞金鰲辦事尚屬奮勉即將俞金鰲遣往伊犁再將瑪琥留駐數月令其協辦俾諳習之後再行遣回於屯田事務有益等語即照阿桂所奏著肅州總兵俞金鰲前往伊犁管理屯田事務再留瑪琥數月協同辦理俟其諳習時遣回 諭軍機大臣等前因宋邦綏奏廣西省解滇馬六百匹於十月中旬定可全抵永昌一摺當即於摺內批示有十月中旬豈不誤事之旨嗣據該撫奏報廣東省協濟雲南馬匹十月初旬可到永昌因思廣西與雲南接壤道路較廣東更近廣東馬匹何以轉到在廣西之前

傳諭該撫令將遲滯緣由速行查奏今宋邦綏雖未奉到後次傳諭而覆奏前批之摺率將豈不誤事豈字誤寫定字且所敘情節亦不甚明晰可見該撫經理此事曾中竟未了了馬匹關係軍需解送既已遲延若必待奉到傳諭始行催趨進發更屬無及不知該撫何以始終歧誤若此著將此詳諭知之國子監奏臣等辦理監務留心搜訪積有歲月擬恭

纂

皇朝太學志證類分門導揚盛典其纂修提調擬就監丞助教等官內遴選文理尚優者臣等隨時董率令其分門編輯上緊趕辦毋庸另行開館亦毋庸給予公費并即於在監肄業

諸生內揀選謄錄十二名繪圖者二名至於差遣行走酌派書吏數名兼修書處効力無庸給與飯食等項俟全書告竣日可否准其照各館謄錄供事例量加議敘出自特恩報聞

庚申

孝敬憲皇后忌辰遣官祭

泰陵 諭軍機大臣等據明德奏拏獲長洲縣民王裕元等私銷制錢分別治罪一摺已批交三法司覈擬速奏矣私銷之罪重於私鑄而此等人犯別無器具蹤跡蹤緝更難得實所有拏獲此案罪犯之守備韋永福把總蔡飛鵬看來尚屬能事著明德即將該員弁等出具考語送部引見是月盛京

戶部侍郎瓦爾達奏臣部所屬莊頭每年秋收後應交黑豆四千八百八十五石入臣部內倉收貯又於內倉地糧項下撥出黑豆二千三百四石二共豆七千一百八十九石於來年春夏之交派員由內倉運至牛莊暫貯由牛莊運到海口上船遞運至通州交納每年共用腳價銀二十二百餘兩查莊頭等多住居遼陽其餘散處於盛京牛莊界等處遼陽距盛京一百二十里距牛莊亦係一百二十里莊頭等每年所交黑豆運至盛京內倉交納臣部復派員由內倉運至海口兩番腳價折耗殊屬虛糜應請嗣後除地丁項下所撥黑豆仍照向例運送外其莊頭等應交豆四千八百八十五石秋

收後毋庸運至盛京內倉即徑赴牛莊旗倉內交納俟明春起運時計程不過三十里即可運至海口上船腳費無多較為便捷得旨著照所請行直隸總督方觀承奏臣查勘壩工前因山水來自西溝而西溝北山勢峭數處並近壩相對之山屋五十餘丈挑水南射屋壩之間溝身寬僅八丈迫束驟漲之水鑽沙撞石每至為患臣遵諭將西溝山嘴並石壩對面山屋悉行剷削壩下溝道原寬八丈者今展至二十餘丈其剷鑿之山石將壩岸地基墊高又於北面壩根堆疊沙石坦坡寬約二丈以為重層障護向來循壩專趨東溝之水今因水道寬展漲發時大半分入北溝所有新修條石虎皮

石壩等工七十七丈七尺並舊工甚為穩固報聞 江蘇巡撫明德奏江蘇地方自蘇州府屬吳江至鎮江府屬丹陽運河塘路綿亘四百餘里為閩浙赴京大路公文商艘絡繹不絕必須塘路高寬方可以資馳驅繚繞且沿河低窪田畝尤賴塘工保護查蘇州一帶南受浙江天目諸山經由太湖之水北受揚子江由鎮江入運河之水匯流至蘇由吳淞妻江白泖等江宣洩入海蘇常一帶塘路卑矮遇伏秋汛發南北之水汹涌灌注宣洩不及多致漫淹所有往來公文及商艘緯路俱多未便且沿河低窪地畝往往被淹臣委員逐段查勘計吳江震澤長洲元和吳縣無錫金匱武進陽湖丹陽等

十縣塘工應請動項興修報可 浙江巡撫熊學鵬奏浙省各屬所存截漕并捐監米石例應以米一石易穀二石秋收盡數改易存倉現浙東寧波等八府俱在本地採購穀石存貯惟查浙西杭州嘉興湖州三府屬常平倉內現有存米自數千石至萬餘石不等緣此三府均係外江三河運漕棕陽和州舍山等處採買外江市行賣米者多賣穀者少購米較易又因春夏借給秋成還倉米穀兼收是以節年仍有米石存貯今據布政使詳稱所有各屬應徵應買倉糧請自今秋為始俱令徵買好穀其現存米石明歲青黃不接時先將米石動支借糶秋收易穀還倉不數年間東西兩浙均得一律

改貯穀石等語查穀堪久貯米易紅朽況浙省地氣卑濕難免黧黧之虞應如該司所議辦理得旨嘉獎 江西巡撫吳紹詩奏江西軍籍屯田原為幫貼漕船而設前因屯丁典賣隱占以致領運維艱經前撫阿思哈奏明通行清丈分限贖回除扣還屯糧正耗外餘給運丁為造船領運之費但田地星散清釐不易前撫阿思哈原奏每屆四年清編一次內有屯產不符者於清編時據實更正臣於三十一年到任後咨訪各屬利弊據九江南康袁州贛州各府均以所屬屯田除應納屯糧年清年款外其餘租銀兩多以加科過重徵解不前又贛衛之贛縣雩都二縣共缺田三千餘畝無從徵租紛紛稟詳均以租重缺額為詞臣往返駁查一則由從前清丈之時限期緊迫各委員未及查明田地之肥磽及上中下確據按則科徵是以有租重之累又丈量之時田未正茂難以施弓僅用繩索圍量數多浮溢兼因贛衛舊額短缺委員將依山傍澗初墾未熟之田俱行造入清丈後水衝沙壓漸成荒土是以有缺額之累查軍丁向年在籍者享田多租輕之利而出運者有租輕費繁之苦近年則出運之造船運費均屬有餘而在籍之完糧納租殊多拮据似應少為變通清理妥協現有建昌府知府黃肇隆久任江西熟悉屯田情形臣委該員協同九江贛州南康袁州各守將缺額數目查勘明

確其租重地方。果否因田地肥磽不分料則未確以致多寡不均並將缺額應否豁除租重應否酌減豁減之後是否不礙漕運之處一併詳查妥議容與督臣漕臣會覈另奏報聞

河東河道總督嵇璜河南巡撫阿思哈奏查楊橋大壩為豫省第一要工自乾隆二十六年合龍之後雖未建築越隄然從前河分兩股一由北岸順直遶行一由壩外埽灣東注是以數年俱屬穩固迨本年春夏以來兩河大溜匯為一河併力全注南岸直趨楊橋埽前水深三四丈不等閏七月初旬黃河盛漲水高埽面五六尺埽多墊裂臣阿思哈飛飭州縣督率搶護平穩臣嵇璜於閏七月二十二日至楊橋查該

實錄卷五十五

上

工向係稽料堵閉外當大溜內有深潭時虞滲漏率同按察使何燭開歸河道孫廷槐細加察勘北岸河灘順直既不能開挑引河以分溜勢而大壩迤裏又係偏地飛沙亦不能建築越隄以為重障又有龍門深潭繞越千有餘丈不特建隄需費浩繁抑且繞築遙遠更不能為楊橋內護應請將壩身裏餞再為加培寬厚以為保障更為費省功倍又查從前堵築楊橋漫口時係就鄭中越隄頭盤築壩臺進埽合龍遂改越隄為臨河大隄該工土性純沙難資鞏固閏七月初二日黃河湧注衝刷隄身坐墊三處幾乎過水雖經竭力搶堵幸保無虞但以沙性之隄禦黃河之水實難恃以無恐應請擇

選淤土幫築裏餞庶幾可資捍禦得旨自應如是但期節歸實用久資鞏固可也嵇璜又奏上北河廳屬之陽武七堡八堡係乾隆二十六年堵築漫工現外灘日漸淤高隄根已成窪形每遇漫灘水至存積寬深沙隄難資抵禦查本年漫灘水大該處停有膠淤應將隄身臨河一面刮取淤土幫培窪形責令兵夫多築順水土壩以期漫灘串溝之水漸次受淤則隄工自固又下南河廳屬之蘭陽汎河渠越隄亦係二十六年堵築漫工該隄一千七百餘丈形勢過於寬長挺占河身阻遏水勢必須展拓以順河流該處大隄漫口三處雖於二十九年奏明補築而毗連漫口之大隄卑薄並未加幫

實錄卷五十五

上

臣現飭該道廳將大隄確加丈估幫培高厚即可將越隄放淤以免河流壅阻其餘各廳隄根以外多有支河積水尚須設法疏通臣嚴飭廳員多築土壩俾支河之水逐漸停淤其隄根無柳處并令補栽柳株以禦漫灘風浪得旨覽奏俱悉

大清高宗法天隆運至誠先覺體元立極敷文奮武孝慈神聖
純皇帝實錄卷之七百九十五

實錄卷之七百九十五

七

大清高宗法天隆運至誠先覺體元立極敷文
奮武孝慈神聖純皇帝實錄卷之七百九十六

監修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆三十二年丁亥冬十月辛酉朔享

實錄卷之七百九十六

七

十

太廟

上親詣行禮○遣官祭

永陵。

福陵。

昭陵。

昭西陵。

孝陵。

孝東陵。

景陵。

泰陵○遣官祭

孝賢皇后陵

端慧皇太子園寢○頒乾隆三十三年時憲書○諭軍機大臣等。鄂寶具題。動支赴滇黔兵鹽菜口糧一本。全然不曉事體。已交部覈覆行知矣。此等支給弁兵銀米。如應行動給之項。自不妨隨便具摺聲明。無庸特繕題本。該撫乃遽張皇其詞。以為加調黔兵云云。以此發傳鈔報。徒令無識之人。妄滋擬議。甚屬無謂。況緬子本係么膺。初非西陲用兵可比。此次明瑞等節籌酌調弁兵。豈止如鄂寶所奏一千之數。然其循例辦給各項。皆用摺具奏。並已經畫完妥。若照鄂寶此次辦理。將日題一本。日給一遞。又當成何措置耶。該撫身任封疆。豈應冒昧乖錯。若此。鄂寶著傳旨嚴行申飭。○以原任盛京禮部侍郎永寧為內閣學士。兼禮部侍郎。○壬戌

上御乾清門聽政○諭朕檢閱朝審官犯冊內

李因培辦理馮其柘虧空一案。始為減數具題。繼復授意彌補。甚至將據實揭報之知府錫爾達。不惟不加賞識。轉欲別為構釁。指參其為昧天良而翫國憲。實非尋常干犯功令者可比。封疆大臣。受朕深恩。分應奉公守法。乃因迴護。曾經保題庫貯無虧。而甘心罔上行私。推其流弊。勢將何所不至。即明正顯戮。亦其罪所應得。第念前此和其衷徇庇段成功之案。雖同一彌補虧空。而先經收受賂遺。其貪黷欺蒙。情尤可惡。是以即行予勾。以李因培較之。尚無得贓之款。與和其衷究屬有間。若概令肆市。權衡殊未允符。然欲更為曲貸。則準之情法。均不可以為訓。因命侍郎四達御前侍衛索諾木策凌前往傳諭。加恩賜令自盡。以存大臣之體。特恐庸愚無識之徒。或謂李因培與莊有恭。皆係巡撫徇庇屬員。獲譴而一則竟與復職。一則僅令自殺。未免

妄生擬議。殊不知莊有恭於段成功之巧為開脫。與臬司知府等有意從寬。彼此相喻。無言。尚未有顯然授意指使情節。猶屬外吏相沿積習。是以定讞示懲。旋仍施恩錄用。揆諸李因培之任意舞文。乖張挾詐者。迴不相類。並非輕於莊有恭而重於李因培也。再如湯聘身為撫臣。目擊總督楊應琚欺誣債事。並無一言入告。自不得不加以重罰。然湯聘不過一庸懦。無能隨人俯仰之人耳。使以他人

處此。亦未必不蹈其故轍。求其一莅滇境。即具摺盡發其奸。不過鄂寧等公忠體國者能之。豈可以之深責湯聘哉。是其罪尚可量從末減。已命法司改入緩決。以昭平允。夫刑賞國家大柄。朕臨御以來。慎重刑章。雖細民案牘。無不詳加校覈。務使無纖毫之爽。况以大員重案。視其情罪。虛衷斟酌。適輕適重。各如其人之自取。而無所容心。其犯出無心者。雖必示之懲創。未嘗不許其湔滌自新。且或棄

瑕錄用。若其營私藐法。肇由自作。此而曲為姑息。將使職任封圻者。互相效尤。如用人何。如國典何。四人皆係大臣。其治罪差等。判然難以概例者。如此。不得不明切曉示。俾各省督撫。知朕明罰勅法。一秉大公。即朕亦不得自主。惟其人之自取。尚其共知儆惕。副朕整飭官方。澄清吏治之至意。將此通諭中外知之。○又諭朕本日御門內閣學士塔永阿讀本畢。奏稱現有護軍統領缺出。請加恩令伊署理。以便効力等語。朕簡派大臣管理諸凡事。務惟視其人之勝任與否。軍營効力。原有自請之例。管理護軍統領事務。豈可妄行奏請耶。塔永阿所奏。殊屬無恥。著交部嚴加議處。○諭軍機大臣等。前據邁拉遜奏。舞陽縣知縣書明阿短少倉穀一案。已經降旨交與阿思哈查辦矣。今據續叅盤查該縣常平社倉。復經虧缺貯穀九百餘石。又浮收斛面八十餘石等語。著傳諭阿思哈與前案一併

東公查審具奏。原摺併鈔寄閱看。○以內閣侍讀學士伊克坦布、翰林院侍讀學士謝墻俱為內閣學士兼禮部侍郎。○以故奉國將軍永恬子綿緒襲封奉恩將軍。○旌表守正捐軀之安徽六安州民李早妹李氏。○癸亥諭據烏勒登奏稱徹回卡座後。哈薩克有前來游牧者。將人數牲畜。詢明記檔。令各卡座官員等就地稽查。如有潛行游牧者。即速逐去。不令容留等語。烏勒登此奏。亦因卡座官

員衆多。良莠不一。恐不肖之徒潛受哈薩克牲畜。私行容留。果爾不惟失天朝體統。且一經發覺。伊等罪亦匪輕。著傳諭烏勒登。曉諭各卡座官員等。凡與外藩連界之處。不得私受牲畜。姑息容留。並令加意詳查。有蹈此轍者。即據實參奏。從重治罪。如無此情弊。亦據實保奏。候朕加恩。○諭軍機大臣等。據熊學鵬奏。拏獲應發烏魯木齊改發烟瘴之脫逃監犯孫耀周。即於該處正法等語。此等積匪

猾賊。本係免死發遣之犯。在烏魯木齊等處。如有脫逃被獲。本應即行正法。今既改發烟瘴。乃於監禁時伺隙潛逃。其情罪與發遣烏魯木齊之犯無異。熊學鵬所辦甚是。著傳諭各省督撫。嗣後凡遇此等改發之犯。再有脫逃被獲者。均照此例辦理。毋得稍有寬縱。即至遣所。亦應照烏魯木齊之例。○又諭據明瑞等奏稱。猛密一路進兵。必得更事大員。方與事務有益。現派額勒登額、譚五格同往。一

切進攻事宜。委之額勒登額、綠營兵丁。令譚五格統領。至駐劄木邦辦事。最為緊要。珠魯訥一時不能遽到。進兵後一切機宜。明瑞仍同額爾景額辦理。俟珠魯訥到日。額爾景額再領兵由猛密一路續進等語。明瑞等此奏。殊未達朕意。朕命額爾景額統領此路者。非不用譚五格與額勒登額也。祇以各路進兵。參以綠營。必和衷共濟。方於事體有益。譚五格出自包衣佐領。雖久任提臣。未更戰陣。額

勒登額雖久任戎行。未免有烏拉齊習氣。度狹隘。若令二人同在一路。必至各執已見。與事無益。額爾景額身係滿洲。雖未經戰陣。若論辦事。額勒登額決不能及。伊係叅贊大臣。令其統領大兵。應約束者約束。應調停者調停。既可收兵丁之加。而額勒登額等亦不至各執已見矣。若謂珠魯訥不能遽到。進兵後。木邦辦事乏人。殊不知大兵前發。木邦已成腹地。有何可慮。一切事務。留一軍機章京在彼。俟珠魯訥到時。即可交代明白。著傳諭明瑞等。即遵照辦理。○命雲南按察使夔舒來京候旨。○調湖南按察使宮兆麟為雲南按察使。以山西冀寧道梁國治為湖南按察使。○調河南南陽鎮總兵喬冲杓為雲南開化鎮總兵。以哈密協副將吳士勝為南陽鎮總兵。調湖南鎮草鎮總兵胡大猷為雲南普洱鎮總兵。湖北襄陽鎮總兵立桂為鎮草鎮總兵。以湖南寶慶協副將牛天昇為襄陽鎮

總兵。○改江蘇泰州屬東臺鎮為東臺縣。裁東臺同知缺為知縣。泰州州判缺為東臺水利縣丞。西溪司巡檢缺為東臺典史。移泰州訓導。隸東臺。從兩江總督高晉請也。○甲子。上御懋勤殿。勾到江西安徽江蘇情實罪犯。停決江西斬犯一人。絞犯一人。安徽絞犯一人。江蘇斬犯二人。絞犯一人。餘八十二人。予勾。○諭八旗都統副都統前鋒統領護軍統領內有一人兼署二三任者。所兼過多。辦理未能周到。於事無益。其傅玉所署舒泰之正紅旗護軍統領著努三署理。達桑阿之正藍旗滿洲副都統著雲保署理。高恒所署德保之正黃旗漢軍副都統著艾肇昌署理。永德所署弘晌之鑲黃旗蒙古副都統著伯成署理。期成額所署珠魯訥之正黃旗滿洲副都統著永璧署理。○又諭據新柱奏稱。盛京將軍衙署內向無私宅住所。往往租房居住。今漢軍八旗官學年久傾圮。請將各旗現有官房

令其兩旗設立一學。餘房於盛京銀庫內借銀六百兩。建立將軍公廨。所借銀於將軍應得養廉內。十年扣繳。均著照所請行。○諭軍機大臣等。前鄂寶動支赴滇兵鹽菜口糧一事。輒專具題本。全然不知事體。已傳旨嚴行申飭。兵丁所得銀糧原屬應給之項。即例須戶部覈覆。亦惟用摺具奏。交部覈定。行文知會。從前西北兩路軍營。所給軍需。不為不多。從未有遽用題本者。乃鄂寶襲用幕賓書

吏惡套。將飛調黔兵等語。張大其詞。倘照此傳鈔。徒令無知之徒。妄滋擬議。甚屬無謂。且明瑞等請給弁兵等銀糧。何止貴州之數。早經奏明交部。又何嘗如鄂寶之徒費張皇耶。將此傳諭四川。廣東。廣西。湖南。湖北。及雲南。督撫知之。○軍機大臣等議覆。據定邊左副將軍成衮扎布奏。稱駐劄庫倫大臣。應用馬駝及差遣兵役。請照烏里雅蘇台例。於附近部落撥兵移駐。再於呼圖克圖徒衆等處。照

例發價購馬五百匹。駝一百隻。應如所請。由庫倫附近部落撥兵二百名駐劄。每名給口糧銀二兩一錢。至所稱購買馬駝。查現在烏里雅蘇台科布多等處。喀爾喀所交馬駝甚多。儘可調用。應令該將軍於來春草青時。照數挑取。無庸購買。得旨。依議速行。○以翰林院侍讀學士觀文。侍讀熊為霖。編修芮永肩。俱充日講起居注官。侍讀紀昀。洗馬福明。安。盧穀。俱署日講起居注官。○乙丑

上御太和殿視朝。文武陞轉各官謝恩。○諭據鄂寶查奏。永寧州知州王懋縱役誣良。虧空倉穀案內。復審據王懋呈出前任已革知州蔣日烜欠約書札。顯有瞻徇。認情弊。請將蔣日烜一併發審等語。蔣日烜著交與該撫一併嚴審。究擬具奏。○禮部奏冬至應行慶賀禮。得旨。奉

皇太后懿旨。今年冬至著停止行禮。○丙寅上詣暢春園問

皇太后安。○幸圓明園。○旌表守正被戕之江西新昌縣民晏封妻素氏。○丁卯諭凡新定疆宇。派往辦事大臣。自當遵所定章程辦理。常鈞到哈喇沙爾。即奏請裁海都一臺。於阿哈爾布拉克。添設臺站。並將察罕通格牧放馬匹。撤回餵養。此皆從前大臣等。按彼處情形妥辦之事。即偶須調停。亦當確查具奏。伊甫到任。並未諳彼處情形。輒議更張。經軍機大臣議駁甚是。即如近日遣霍罕伯克使人

起程。朕前降旨。令照上屆畧加損抑。照年班回人畧加優異。不必過為供應。常鈞豈未奉到此旨。乃使人經過時。設館筵宴。極其豐厚。並將疲馬盡行換給走馬。甚屬不成事體。著傳旨嚴行申飭。○調正白旗蒙古副都統德福。為正藍旗滿洲副都統。以散秩大臣伊松阿。為正白旗蒙古副都統。○戊辰。

上詣暢春園。問。

皇太后安。○還宮。○緩江蘇上元。江寧。江浦六

令。句容。溧水。高淳。儀徵。丹徒。金壇。溧陽。揚州等十二縣。衛本年被水災。民應徵額賦。○已諭朕。檢閱朝審招冊。內有太僕寺。及商都達布遜諾爾。達里剛愛等處牧廠。虧缺馬匹三案。所有官犯二十三人。俱經刑部九卿。覈擬情實。候勾。但詳覈案情。其中輕重迴殊。有不可不為區別者。如達里剛愛一案。十四犯。不惟馬匹虧缺數多。且於收丁錢糧。內攤扣彌補。甚至自行侵蝕銀四千餘兩。覈其情罪。

實屬重大。然其中亦自有首從差等。俟勾到時。另為酌定。至太僕寺。及商都達布遜諾爾兩案內。九犯。則並無扣派侵肥情事。其罪止於虧少馬匹。安得以其均係牧廠犯案。遂為一例。概視。所有兩案內之索諾木。達爾扎。五巴。付雲敦。阿敏達。瓦羅布桑。巴忠。車里瑪。巴忒瑪。古木扎布。俱著改為緩決。以示平允。○又諭。前以御史虞鳴球。叅奏李清時。令湯陰縣縣丞章輅。辦理幕務。招搖生事一摺。先後

傳諭李清時及該御史各行指實回奏務得確情乃節次陳奏彼此仍屬牴牾不合因諭阿思哈就近訪查覈覆茲據奏到兩人底裏畢露在李清時之按款剖白而於章輅曾經在署一節徑行隱躍其詞未免迴護前非而虞鳴球則以撫拾道路流傳之言張大其事若章輅號稱小總河及為妾斂分諸語均屬毫無影響實為輕率喜事之尤不得不分別示懲俾知警戒李清時著交部察議虞鳴球

著交部嚴加議處御史為朝廷耳目之官內外大臣果有婪贓亂法任意徇私見聞既確立登白簡不獨被參之人立即重治其罪其據實糾劾之該御史朕亦必深加獎勵用昭彰瘅之公若徒毛舉風聞細故肆意鋪張紛呶不已顯博建白之名陰行擠排之實所關於政體官方者甚大即如前明臺諫諸臣遇事生風肆行抨擊以致各分門戶挾制大臣究之國事日非積重難返可為炯鑒當此綱

紀肅清言官中諒不敢遽挾私心於異己之人藉詞齟齬以速重愆但杜漸防微不得不豫為明切禁制朕於此案不過從寬予以議處倘言官等不知猛省有以愛憎挾私巧為嘗試者經朕察出必執法從重治罪以為分門排擠者戒其大員等或自甘敗檢致挂彈章則言者被殊褒而犯者膺顯罰雖欲強顏狡辯又可得耶著將此通諭中外知之○又諭曰舒赫德差往湖南現有查辦事件著馳

驛前往○庚午兵部議奏據原任陝西關山營外委木廷梁呈稱廷梁於乾隆二十年因汧陽縣民李登榮被劫案勒限緝拏將屆四衆賊犯未獲隨於二十三年十月內奉派伊犁屯田又改派出征於二十四年六月內進剿喀什噶爾收服回衆議敘功加一等紀錄二次又追趕霍集占至拔達克山地界議敘功加三等二十六年伊犁屯田議敘紀錄二次嗣於三十二年三月內奉撤回營即接緝

前案未獲賊犯扣至十一月。四叅限滿革職。廷梁屢得功加及紀錄未邀恩抵銷情實堪憫。查盜案四叅不獲例。專汎千總把總降一級。外委官革退以千把外委同一專管汎地。惟外委無級可降。獨議革職。但其中不無出征効力議敘之人。一遇四叅不論勞績概行革退。究未允協請嗣後外委官遇有盜案四叅應革。係出征得有功加及紀錄者照降級例抵銷。木廷梁請即照此辦理。再向例承緝

盜案。武弁不准調離防汎。因公出境亦仍按限查叅。原以杜規避而專責成。如係派委出征屯田與規避調離迥別。且經數載回營。原緝盜犯亦恐遠颺難獲。請嗣後承緝盜案限內派委出征屯田均照離任官例罰俸一年。盜犯交接緝官勒限緝拿從之。○旌表守正捐軀之河南鄆城縣民徐騾妻張氏。○辛未上御懋勤殿。勾到河南山東情實罪犯停決山東斬犯二人。餘七十人。予勾。○諭曰明瑞現

在統兵進剿緬匪。所有總督關防業經隨帶前往。巡撫鄂寧駐劄永昌。滇省營務皆須該撫代辦。所有各鎮協營一應公事俱著聽其節制。至黔省營務係貴州提督辦理。遇有應會總督事件即就近會同黔撫查辦。無庸咨會滇省。該部遵諭速行。○壬申

上御乾清門聽政。○兩江總督高晉湖廣總督定長等覆奏。臣高晉與定長於九月十三日齊至黃梅縣。率同湖北布政使閔鶚元。武漢黃德道盧謙等。逐勘隄工。並詢該處土人緣黃梅一帶地勢稍高。偶值大水。外江內湖亦易消退。惟二十九年及本年。因雨澤過多。江湖一時並漲。消退不及以致成災。此亦數十年僅有之事。今若重建百餘里長隄。不特費繁工鉅。設遇江湖並漲之年。更阻礙上游湖水宣洩之路。所有董家口以下舊隄。臣等公同商酌。應請毋庸議修。至董家口以上黃梅縣并界連江西德化境內一帶江隄。由來已

久地勢外高內窪。江水一經長發。易致漫淹。全賴隄塍保護。是以按段設有隄長。每年如有衝刷。係各該縣民人同力修補。因係百姓自修之工。地方官稽查不周。以致工程多不堅實。現潰口殘缺之處。若不一律修補。明春水發。必致淹沒為患。臣等逐細勘估。所有黃梅縣境內應補潰口七處。計工長七百六十三丈。修補殘缺計工長一萬三百六丈五尺。又董家口以下舊隄。地形窪下。隄尾並無收

煞。應接長隄工七百二十八丈。又連界之江西德化縣。應補築潰口五處。計工長一百五十一丈。修補殘缺計工長三千三百四十六丈。查此項工程。向係民修。此次應照例仍交民修。但該地係積歉之區。本年被災較重。若令其修補江隄。民力實屬拮据。應懇借動公項銀兩。慎選殷實士民。分段估修。仍派妥員。協同地方官督率。勒限報竣。得旨另有旨諭。諭據高晉定長等奏會勘湖北黃梅等縣

董家口以上。界連江西德化境內一帶江隄潰缺之處。應行修築。估需銀一萬七千九百餘兩。請借動公項。照例交民自修。分年徵收還款。一摺。該處地濱江湖。所有隄工。自應及時修補。以資保障。但念黃梅等縣。頻年偏被水災。閭閻不無竭蹶。況借項鳩工。按年攤扣。民力終多拮据。而一切派委董事。仍令紳衿承辦。勢必仍蹈黎明五等故轍。於事更無裨益。所有此次隄工。著加恩即動用公項交地

方官實力妥辦。毋庸借帑扣還。俾貧民得以赴工餬口。是於捍衛田廬之中。推廣以工代賑之法。實屬一舉兩得。該部即遵諭行。諭軍機大臣等。此次勾到河南情實人犯內。經刑部九卿由緩改入者。共有四案。如岳懷孔。以絞候留養之犯。復因索錢啟釁。毆傷劉成雲身死。楚禿子本係竊賊。又復誣良致斃。孫景周於伊妻所帶前夫幼子。有心故殺。戴可法既姦李福之妻。旋斃其命。此等情形兇惡。

非尋常案犯可比該撫俱擬入緩決實為輕縱阿思哈著傳旨申飭至各省秋錄必經臬司問擬再由巡撫覈定具題此四案定擬錯謬之處阿思哈與何燭究係何人意見居多並著阿思哈據實覆奏可將此傳諭知之尋奏秋審重案雖經臬司酌擬必由臣逐一覆覈此四案內岳懷孔一案係照何燭原擬楚禿子孫景周二案何燭原擬情實臣因楚禿子雖誣良致死究係自盡孫景周係屬繼父與平人有間簽商何燭改為緩決戴可法一案何燭原擬緩決臣以死者究係本夫似應情實與何燭簽商據稱姦係本夫故縱殺因鬪毆與因姦殺死本夫不同因復照原擬入緩錯謬之處臣意見居多請交部議處得旨亦不必議處但以後詳慎定擬可也此奏尚公但甄別屬員一事實屬姑息以後慎之○癸酉

上御懋勤殿勾到山西直隸情實罪犯停決山

西斬犯一人直隸斬犯一人絞犯一人餘九十六人予勾○諭軍機大臣等邁拉遜奏到盤查舞陽縣社倉穀石各摺所辦殊屬過當社穀一項本係民間捐貯自備緩急非官項倉庫可比若一一過事吹求非朕令盤查實在保題侵虧本意惟摺內所稱地保李成玠等送給鄉民盧念先錢四百餘文算常平穀二石後遂催繳錢一千五百餘文一節在鄉保勒借累民自當按例懲治而地方官毫無覺察亦有應得處分亦難置之不問耳著傳諭舒赫德會同阿思哈東公查訊據實具奏邁拉遜摺一併鈔寄○旌表守正捐軀之安徽天長縣民王嘉進妻王氏○甲戌諭據鄂寶奏善安州遞解滇省餉銀兩次被竊賊賊尚未緝獲請將撥解押解等官照例議處一摺此案前經戶部奏明即降旨該撫令其明白回奏今始據該撫查叅而賊犯仍在遠颺未能弋獲除將疎防之該地方官及解餉文

武員弁等。交部議處外。至鄂寶於閏七月內。應奏之事。延至九月十八日始行奏聞。殊屬遲誤。著一併交部察議。○又諭曰。方世雋。奏沅州府丁憂。知府湯大寧。於前任督臣吳達善由滇赴楚時。巡檢謝彬備辦尖宿公館等項。藉差滋擾。該府不能覺察。禁止并催令妥辦。及至士民告發。又復含混。揭叅致被反噬。請將湯大寧革職。等因。一摺。湯大寧著革去知府職銜。與案內應質人犯交與該督一併審明。究擬具奏。督撫等因公出署。及調赴新任。途間一切日用所需。理宜自行備辦。毋許地方官稍為供應。以啟逢迎。而滋派累。前此屢經降旨。通行飭禁。此次吳達善並不與知。亦無收受情事。而知府巡檢等因何復沿積習。此皆該上司等並不實力奉行所致。除本案照例審擬外。嗣後倘有再蹈前轍。不知悔改者。一經發覺。朕必從重懲治。決不稍為姑息。將此通諭各督撫等知之。

大清高宗法天隆運至誠先覺體元立極敷文奮武孝慈神聖純皇帝實錄卷之七百九十六

大清高宗法天隆運至誠先覺體元立極敷文奮武孝慈神聖純皇帝實錄卷之七百九十七

監修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭事務處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領事稽察欽奉 上諭事務處管理刑部戶部二庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆三十二年丁亥十月丙子諭軍機大臣

等前湖南武陵縣知縣馮其柘彌補虧空一案。知府錫爾達先經揭報數至二萬餘兩。及李因培令張宏燧會同錫爾達往查。止將實在虧空穀價八千九百餘兩具詳。在李因培化大為小。原出有心。而錫爾達何以既經據實直揭於前。輒復扶同勘報於後。其會同查勘時。曾否自行出結。或其出結。乃由抑勒所為。抑竟聽任張宏燧所為。漠然置之不問。錫爾達身為知府。見上司如此欺謾。即直揭部

科。或於欽差到省時。據情具控。皆無不可。因何始終默無一語。此事雖已完案。但其中情事。殊不可解。錫爾達現任歸綏道。著傳諭彰寶。令其就近詢問明悉。即行據實奏聞。尋奏遵旨詢問錫爾達。據供。前署常德府知府。查出馮其柘虧空二萬餘兩。當即據實揭報。巡撫李因培復委張宏燧會查。數亦相符。隨將馮其柘解省。適李因培赴常德查災。我在省羈留五六日。後張宏燧來說。馮其柘已現有銀一萬餘兩。祇少八千餘金。及李因培回省。亦說除彼現有銀兩外。祇就其餘虧缺數目。叅究便是。另委長沙府知府圖明阿將前項銀兩。交新任武陵縣收明出結。彼時張宏燧寫就實在虧缺揭稿會印。我因馮其柘現有銀一萬餘兩。庫項有著。因照依會揭至其銀兩來歷。全然不知。是以未敢徑揭部科。及欽差到湖南。我已陞任福州府知府。離省既久。且情弊業經審出。無須再控。報聞。○予故福

建提督馬負書祭葬如例。謚昭毅。旌表守
正被戕之浙江上虞縣民姚大芳妻張氏。○
丁丑兵部議准兩江總督高晉奏稱營汛繁
簡。今昔異形。應變通調劑。查孟河營都司靖
江營守備楊舍營都司江陰營遊擊並守備
向係在外題補之缺。但現在事務頗簡。請改
為部推。平望營都司常州營右軍守備浦口
營都司奇兵營遊擊並守備。向係部推簡缺。
但各有巡查要務。應請改為題缺。在外揀選
題補。應如所請。從之。○戊寅。諭軍機大臣等
今年江蘇安徽江西湖北湖南山東等省。被
災州縣。業經降旨各督撫照例賑卹。並飭令
加意撫綏。無力貧民。自可不致失所。惟是被
水之餘。秋收分數。不無稍減。明春青黃不接
之時。窮黎生計。未免拮据。其或有尚需加賑
之處。著各該督撫查明實在情形。詳悉覆奏。
候朕酌量加恩降旨。可將此傳諭知之。尋山
東巡撫李清時奏。東省止高苑博興樂安三

縣偏災。現俱照例撫卹。秋後糧價。亦不甚昂。
災民不致拮据。湖南巡撫方世儒奏。本年華
容沅江安鄉岳州四縣。衛本屬偏災。其未經
被水地畝。早中稻實有七八分收成。除照例
撫卹外。無需加賑。均報聞。兩江總督高晉等
奏。上下江沿江各州縣。被水頗重。兼連歲歉
收。請於明春按照被災分數。分別加賑。得旨。
屆時有旨。江西巡撫吳紹詩奏。江西被災州
縣。民情實屬拮据。應請加賑。得旨。有旨。諭部。

湖廣總督署湖北巡撫定長奏。湖北被水成
災之黃梅等二十州縣。衛冬底停賑。災民難
免拮据。請暫緩催徵。俟來年秋收後。按限徵
還。得旨。新正有旨。諭部。○旌表守正捐軀之
直隸安州民李天容妻王氏。○己卯。諭軍機
大臣等。據明瑞奏稱。猛密一路。甚屬緊要。額
勒登額事體。練達。故派於此路。額爾景額。暫
留木邦。俟珠魯訥到彼。即帶兵續進等語。明
瑞此奏。竟視額爾景額與額勒登額等矣。前

據伊等以猛密一路派額勒登額並令譚五格同往管轄綠旗兵丁。額爾景額同明瑞暫駐木邦辦事。俟珠魯訥到日再行領兵前進。朕即降旨以譚五格出自包衣佐領未更戰陣。額勒登額雖經戰陣而有烏拉齊習氣。額爾景額身係滿洲辦事亦非額勒登額所能及。令其統領大兵既可收兵丁之力而額勒登額等亦不敢各執己見。今明瑞尚未奉到此旨是以復為此奏。著傳諭明瑞猛密一路仍遵朕前旨。令額爾景額統領行走。至伊等已抵何處情形若何即速奏聞。額爾景額亦不可稍存推諉。總當彼此和衷以期濟事。朕深為爾等望之。○庚辰諭曰明瑞前在伊犁原任將軍今又帶兵前往雲南整飭兵丁進剿緬匪一切事宜係伊統理雖係總督現在行間究以將軍名號足彰威烈。明瑞著為將軍管理總督事務。○又諭據富僧阿奏稱俄羅斯校點不可深信現在恰克圖停止貿易。

請嗣後巡邊兵丁均不准帶貨與俄羅斯交易等語。從前黑龍江原未有貿易之事偶或有之亦不過卡座人等交易零星物件若概行禁止既與內地無益且轉啟俄羅斯之疑慮。著傳諭富僧阿如有奸猾人等知恰克圖已停貿易多帶貨物來黑龍江貿易者自當嚴懲若卡座人等照舊與俄羅斯交易零星物件不必禁止。○戶部議奏直隸總督方觀承奏稱

東陵

西陵兩處內務府官員人等官地菜地均已撤回其八旗禮工等部官員筆帖式及兵丁人等地方亦應一體撤回得旨此內之總管翼領郎中員外主事等官每年例得俸糈較多足資養贍伊等所給官地自應一體撤回其防禦祝贊等官以及兵丁人等均係微末員弁若一併撤回恐於生計不無拮据著加恩仍行給予至內務府官地前經降旨將官員

人等一概不准給予今八旗防禦以下人等既未撤回所有內務府副管領以下亦著加恩給予撫卹直隸永清東安靜海慶雲清河威縣宣化萬全西寧懷來蔚州龍門懷安十三州縣被水電災民並予緩徵○辛巳上御懋勤殿勾到朝審情實罪犯停決官犯斬犯六人絞犯七人常犯斬犯二人絞犯四人餘三十四人予勾○諭太學修葺

文廟現係承修宮殿工程大臣兼管但伊等事務較繁著添派工部尚書裘曰修一同管理○諭軍機大臣等阿思哈奏到審擬新野縣革役楊蛟等聚眾扒毀民房一摺未免意存輕縱已交刑部另行覈議分別定擬矣地方聚眾抗官肆行無忌非尋常罪犯可比理應盡法懲創俾愚頑之徒知所儆惕此案糾眾數至累百而該撫所擬立決監候抵法者僅止摘取數人何以正人心而申國憲况該省此等積習相仍已非一日前此河陰縣曾

有士民號召罷市之案布政使佛德不即具摺奏聞但稟知該撫循例辦理是此案之故智復萌安知非前案姑息實釀成之耶當此法紀肅清該犯等尚爾逞其刁悍遇事生風設遇州縣偏隅歲收荒歉鄉民易於鼓煽之時似此惡犯從中把持勢將何所不至該撫寧不思力為防杜耶看來阿思哈此番審奏仍為何媚佞佛積陰功之陋習所轉移而不自覺嗣後當痛自警省毋得再蹈前轍阿思

哈著傳旨申飭○壬午

上詣暢春園問

皇太后安○幸圓明園○諭據烏勒登奏稱哈薩克等進貢馬匹現派侍衛觀德等往收並嚴禁兵丁私索滋事等語前據烏勒登奏稱撤回卡座後哈薩克前來游牧者將人數牲畜詢問記檔嚴飭卡座官員等不得私行容留朕已降旨令其嚴查奏聞今烏勒登復有此奏著再行曉諭若有不肖作弊之人務必

據實奏。斷不可姑息從事。○軍機大臣等議覆伊犁將軍阿桂奏稱。由京發遣伊犁年滿無過之滿洲蒙古人等。請入於駐防八旗兵內。漢軍入於綠營兵內。一體挑取。給與錢糧。有願接取家眷者。咨行該旗查明伊等眷屬。咨送兵部官為辦理護送。又稱。年老尚能當差者。賞給步甲半分錢糧。不能當差者。給口糧一分度日。均應如所請。至所稱不能接取家眷者。擇其年力精壯。助給軍器馬匹。並給鹽菜銀兩。發往楚呼楚防守。查伊犁駐防兵遣往他處。俱動官項。此項遣往楚呼楚人等。無庸助給軍器馬匹。請即於伊犁存貯稅課銀兩內。動項辦給。從之。○癸未。諭。據熊學鵬奏。查審仁和縣書役改串侵糧一案。請將並未查究之知縣李學李革職等語。此案既經糧房書辦稟首。乃該縣僅從輕發落。匿不通詳。顯有瞻徇庇護情弊。李學李著革職。所有先侵後補。以及匿名投揭各犯。交該撫一

併嚴審定擬具奏。至該撫熊學鵬布政使永德業。經查出叅奏俱著從寬免其交部。○諭軍機大臣等。前據邁拉遜奏。葉縣知縣程鍾岳。虧短倉穀。聞風彌補一摺。辦理未免過當。已令舒赫德。阿思哈。秉公查辦矣。茲復據邁拉遜奏。該縣四處社倉。共短穀五百八十八石。顯有情弊等語。社穀虧缺。責在社長。知縣止有應得失察處分。必無侵用之事。邁拉遜前後所奏。均有過事吹求之意。著傳諭舒赫德。阿思哈。將所有續奏情節。即行併案查辦。原摺並著鈔寄。○又諭曰。熊學鵬奏。黃巖縣民潘兆有謀產逆倫一摺。已據該撫按例辦理。但此等惡犯。滅棄天良。多有以圖得贓產。為子孫溫飽私謀。竟不惜以身為逆。喪命者。若仍將該犯分內應得家貲。復令伊子孫承受管業。則該犯轉得遂其所欲。且似此逆惡遺種。縱罪不至於連坐。亦何必復令安享遺財。所有潘兆有名下應得膳田租穀等項。

別授伊弟等管業。俾喪心甘為梟獍者。生既難逭刑誅。死亦難圖僥倖。庶得情法之平。著將此傳諭熊學鵬知之。○甲申。

上詣暢春園問。

皇太后安。○還宮。豁除江蘇元和吳縣崑山新陽金山五縣乾隆二十三。四年衝塌不能墾復地一百七十二畝有奇額賦。○乙酉。禮部奏。

皇太后萬壽聖節慶賀禮儀得旨是。照例行禮。

奉

皇太后懿旨。今年停止筵宴。○丙戌。

上御乾清門聽政。諭曰。周景柱著來京。照例以京堂補用。○以甘肅鞏秦階道蔡鴻業為甘肅按察使。○丁亥。諭。向來綠旗世職。無承襲罔替之例。第念官弁等果能宣力効忠。勲猷卓越。則國家延賞酬庸。誼難歧視。前經降旨。將黃芳度張勇等特予加恩。令其子孫永遠承襲世職。並令軍機大臣會同兵部詳查。

國初以來。凡有功冊可稽者。分別等差通行列名具奏。請旨。茲據覆奏。內有殉節陣亡之張國彥徐勇鄭之文賈大第鄭鈺房星趙邦試林芳康泰康海許雲游崇功羅萬倉徐宗仁李國勲劉貴才劉芳雨等十七員。又軍功較著之惠應詔梁化鳳全光英黃熙瓚李皇詔李之芳陳世凱許正蔣懋勲趙應奎潘育龍藍廷珍樊廷治大雄等十四員。覈其事蹟。或致命疆場。克昭義烈。或折衝閭外。茂著勤勞。均宜錫以殊施。俾臣工共知激勸。所有張國彥等子孫其世職有尚應承襲者。俟將來襲次滿日。著加恩各賞給恩騎尉。其現在襲次已滿者。亦著一體賞給恩騎尉。並准其世襲罔替。庶盡臣後裔。得以長荷渥恩。副朕格外嘉績褒忠之至意。○諭軍機大臣等。鄂寧奏審訊千總蘇起文供詞稱。伊趕上德鎮說。此是小路。不是打仗路徑。旁有將官四達色。就拏馬鞭子毆打。催令快走等語。是德保立

意潛逃。四達色實豫知其謀。情罪甚屬可惡。四達色前經明瑞奏補都司。現在曾否隨衆進兵。著傳諭鄂寧即速查明。將四達色革職。慎揀妥員拏解來京。己丑。

上以冬至祀

天於

園丘。是日起齋戒三日。○庚寅。吏部議奏。山西巡撫彰寶奏請將大同縣知縣宋乾金陞補忻州直隸州知州。查該員由直隸玉田縣知

縣革職。捐復揀發山西。於乾隆二十四年。奏補興縣知縣。旋調大同縣。係捐復例。應試俸之員。未據該撫題報銷去試俸字樣。例當議駁。但試俸例。以三年為限。宋乾金業於乾隆二十四年補授知縣。迄今久已逾期。該撫既題請陞補知州。自與不能稱職未經題報實授者不同。若照例議駁。俟該省補報到日。再行准陞。未免員缺久懸。請嗣後遇有捐復捐納人員。題陞到部。除試俸未滿。照例議駁外。

其已經逾期。而未曾題銷試俸。非本員遺漏呈報。即該管上司遺漏具題。一面查取職名。分別議處。一面仍准陞用。以省駁詰。宋乾金請即照此辦理。從之。是月。欽差侍郎邁拉遜奏。清查河南南陽府屬葉縣倉庫。見倉門有無數車輛運穀進倉。傳詢該縣據供。因新建倉廩。撥穀還貯。及訊管倉書吏。均稱常平倉現存穀一萬一千餘石。實在虧短穀七十石。本官聞欽差在舞陽縣盤查。因買補添還。

查該縣虧空倉穀七十石。並不早為買補。及聞盤查。始行買補。殊屬巧為彌縫。請將該知縣程鍾岳解任。交河南撫臣查審。得旨。覽。又批。七十石豈得謂之虧空。皆因汝辦理過甚。始有此事。若再任性。將無底止。已差舒赫德前往。汝應同彼辦理。庶可挽回。朕今汝所查者。實在虧空有無。非令汝遇事生風。過當苛刻也。奈何。奈何。直隸總督方觀承奏。天津水師營兵。除移駐閩廣涼州外。計出旗者六

百九十二名其中為民者三百五十八名願歸綠營入伍者三百三十四名前議分派直隸督提及各鎮標俟有馬戰守兵缺出頂補又水師營所駐新城地方議以大沽營遊擊移駐並於各標營抽撥兵三百名均經軍機大臣議准查大沽營應移駐新城兵一百八名其餘應在各標營抽撥不若就近將水師營出旗候補之兵即令先補新城額設兵數餘兵仍照原議於督標及各鎮標營俟有缺出頂補得旨嘉獎○天津鹽政高誠奏報盤查山東運庫錢糧均無虧缺得旨知道了地方年成光景如何不奏○兩江總督高晉奏遵旨密察江西撫臣吳紹詩精力如何有無貽誤地方查該撫居心醇正現舊病全愈辦事更加奮勉不致貽誤得旨好知道了人材難得如果不誤事朕豈樂於更用哉○又奏江西南昌鎮總兵邱若龍整頓營伍實能留心惟該鎮與撫臣吳紹詩係屬同鄉往來甚

親且聞彼此換帖有愚兄愚弟之稱在文武和衷共濟固屬美事第外省奔競成習恐文員見撫鎮交好或向鎮臣窺探意指交結逢迎是邱若龍於南昌鎮任頗為不宜請將該鎮與別省總兵對調得旨所奏甚是徐即有旨○江南河道總督李宏奏本年清口東西壩因湖水盛漲將壩口先後拆寬七十二丈自八月開工接築至九月二十八日共築成壩工五十六丈留口門寬一十六丈現在洪湖高堰誌椿存水四尺二寸甚為合宜再洪澤湖上承淮水發源於河南桐柏縣漸注江南霍邱等縣向以上江壽州屬之正陽關為淮水上下關鍵該處設立水誌專委正陽關巡檢於每年秋汎水發時按日探報俾下游先事豫防本年大汎經臨有時上游報長數尺而下游長水無多有時上游久已報消而下游仍然加長水勢消長上下全不符合臣現擬前往正陽關親履查勘得旨知道了又

批若係所報有不經心詳查。謊報之處。即應咨處易人。安徽巡撫馮鈐奏。常平倉額貯穀遇有動用。例應隨時買補。安徽一省額貯倉穀。自乾隆二十六年後。節次災賑動用。及蠲免民欠籽種口糧。共缺額穀六十七萬八千零。除業經買補外。尚缺穀五十一萬八千零。本年潁州府屬秋收豐稔。已撥司庫銀分發各州縣採買。查本年安省沿江地方。間成偏災。未經被水各屬。仍屬豐收。現在含山縣之運漕。桐城縣之棕陽。舒城縣之三河各鎮。米穀聚集。價值平減。未便因偶有成災處所。致使倉額久缺。拘泥停買。得旨嘉獎。○山東巡撫李清時奏。東省應修城垣四十四處。業經奏准動帑興修。查各處城基原屬堅固。止須剝槽添換磚石。不必那動舊址。現在最應嚴查者。一在底面高寬。不得偷減尺寸。一在燒磚。不得雜用沙土。及燒未透熟。易致剝落。一在裏皮中心灰土。不得減少。若不及時督

辦。俟告竣後。始經查出。即將承辦之員。叅處而已。成之工。不能復為拆造。斷難經久。現飭各道府巡查。並多委試用知縣分段監工。臣仍與藩司不時親勘。得旨好。實力為之。

大清高宗法天隆運至誠先覺體元立極敷文奮武孝慈神聖純皇帝實錄卷之七百九十七

大清高宗法天隆運至誠先覺體元立極敷文奮武孝慈神聖純皇帝實錄卷之七百九十八

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆三十二年丁亥十一月辛卯朔

上詣

南郊齋宮齋宿○諭曰四川提督岳鍾璜歷膺

閩寄宣力有年今聞溘逝深為軫惻所有應

得卹典該部察例具奏○調江南提督馬銘

勲為四川提督浙江提督黃正綱為江南提

督以浙江温州鎮總兵段秀林為浙江提督

○予故福建漳州鎮總兵任澍祭葬如例○

壬辰冬至祀

天於

園丘

上親詣行禮○遣官祭

永陵

福陵

昭陵

昭西陵

孝陵

孝東陵

景陵

泰陵○遣官祭

孝賢皇后陵

端慧皇太子園寢○調四川松潘鎮總兵永

昌為浙江温州鎮總兵以四川維州協副將

董天弼為松潘鎮總兵○癸巳

上詣暢春園問

皇太后安○幸圓明園○蠲緩安徽桐城懷寧

潛山太湖宿松望江南陵貴池青陽銅陵東

流當塗蕪湖繁昌無為合肥廬江巢縣壽州

鳳陽懷遠靈璧鳳臺泗州盱眙五河和州含山并安慶建陽廬州鳳陽長淮泗州等三十州縣衛。本年被水災民額賦。旌表守正被戕之陝西洵陽縣民陳允彩妻范氏。甲午遣官祭先醫之神。乙未。

上詣暢春園問

皇太后安。還宮。吏部議覆江蘇按察使吳壇奏稱外省卓異知縣皆係才品優長素著

循績遇有陞遷自當用稱其材。例載知縣應陞缺在京六部主事大理寺評事太常寺博士中書科中書都察院通政司鑾儀衛經歷兵馬司指揮京府通判京縣知縣等官在外府同知知州鹽運司運副府通判等官皆係卓異及俸滿知縣陞用但各缺皆有應辦要事惟都察院通政司鑾儀衛各經歷及評事博士中書科中書均係閒曹以卓異賢員擢轉未免用違其長請將應陞班次畧加區別

查定例外官推陞班每年二四六十月各月應用卓異人員八月十二月應用俸滿人員立法平允既難更改況都察院經歷等官各有專辦事件以之陞用豈盡屈抑其材但該按察使以卓異人員皆係久膺民社散秩無由見長意屬愛惜人材請嗣後遇卓異知縣陞用都察院經歷等官於引見時聲明請旨果係才具出眾即將現陞缺扣除交部另以同知知州等官選用否仍以現陞缺補用從之。丙申刑部議覆江蘇按察使吳壇奏稱秋審定例外省審錄後由刑部九卿會覈繕冊進呈按其情罪分別勾決權衡至精外省拘守律例罔知變通每年審錄經九卿改擬者多至數十案請於秋審事竣將奉旨予勾免勾及九卿改擬案件彙冊分別輕重並於各案後將刑部原定改擬說帖後尾敘入通行各省遵辦查勾到時奉旨予勾免勾非通閱案情面領諭訓未能體會至九卿改輕改重

各案在本省承辦衙門全案無難查覈其非本省案件即將改擬及說帖後尾數語通行該省亦難灼見情形查臣部有秋審條例一冊載向奉諭旨及臣工條奏於九卿上班時分送請嗣後將此冊及節年改定條款分類刷印通行各省問刑衙門遵守有續奉諭旨及條奏關秋讞者增入從之以故奉恩將軍尚福弟達喜照例襲爵裁四川南部縣西河口鹽大使缺為富村驛縣丞中江縣盛家池鹽大使缺為胖子店巡檢從總督阿爾泰請也○旌表守正捐軀之河南西平縣民李先榮妻劉氏○丁酉諭據永貴等奏稱三品頂帶阿奇木伯克素勒坦和卓自補授英吉沙爾阿奇木以來招募無業回衆墾田耕作且能約束小伯克頭目撫字窮苦回民四品頂帶伊什罕伯克托喀於交辦一切事件均能黽勉等語伊等感激朕恩一切均知奮勉素勒坦和卓著賞給二品頂帶托喀著賞

給三品頂帶以示獎勵○戶部議覆江西巡撫吳紹詩奏稱本年六月間江湖漲溢被淹成災之南昌新建進賢鄱陽餘干星子建昌德化德安瑞昌湖口彭澤都昌十三縣應徵地丁錢糧請將被災十分者免十分之七九分者免十分之六八分者免十分之四七分者免十分之二六分者免十分之一蠲剩錢糧分作二年三年帶徵極次貧戶分別加賑又德化湖口彭澤三縣南昌九江二衛應徵蘆課錢糧亦請一例蠲緩查江西省蘆課錢糧向例從無蠲緩該撫所請應無庸議其所稱南昌等十三縣應徵地丁錢糧按被災分數蠲緩及加賑事宜均應如所請得旨依議其應徵蘆課錢糧該部以向來不在蠲緩之例照例議駁但念各該處本年被災稍重民力未免拮据著加恩將德化湖口彭澤南昌九江等縣衛應徵蘆課一體蠲緩以示軫卹該部遵諭速行○予故喀爾喀輔國公扎木

釋致祭如例。○旌表守正捐軀之山東曹縣民張德妻邵氏。○戊戌諭。月令有冬至麋角解之文。欽天監時憲書久經沿襲登載。前以鹿與麋皆解角於夏。即疑禮經傳習不無承譌。嘗著鹿角記為之辨論。而未究其所由。昨因時值長至。偶憶南苑內嚮有馴育之麋。俗名長尾鹿者。此時曾否解角。令御前侍衛五福前往驗視。則蛻角或雙或隻。正與節候相叶。並持新蛻之角呈覽。自來疑義為之頓釋。

說文有訓麋為麋屬之語。名苑又稱鹿大者曰麋。然三者實迥然不同。北人知之。而南人則弗能辨。是以展轉滋舛。夫窮理格物。乃稽古所必資。已詳為著說以識。並著將此交與欽天監。自後時憲書內。即行改麋為麋。俾示信四海。毋仍昔誤。○停河員不避原籍例。諭曰。方觀承題參子牙河通判張森怠玩誤公。復擾累舖民一本。已降旨將該員革職。看來張森曠官滋事。雖咎由自取。然究其所以實

因本籍之人得為本地河員。以致易滋弊端。則向來河工各官。准令原籍人員投効。立法未為盡善。在定例之意。雖為人地相習起見。殊不知各地方官。迴避本省。何嘗因籍貫遠離。必難資駕輕就熟之效。學養子而後嫁。已為自古所譏。且如河道總督及河道等大員。隔省簡用於河務。自能諳練。又何必獨令屬員就近服官。不為防微杜漸之計耶。嗣後所有河員不避原籍之例。永行停止。其現在河工本省人員。作何對調之處。著各該總河酌量分別咨部。另行妥議具奏。○諭軍機大臣等。前經降旨。令各省督撫將揀發舉人詳加甄別。其有實在難勝民社之任者。酌量改教給銜。俾得各需恩澤。而於地方政務亦不致濫竽貽誤。嗣據陸續奏到。如山東山西四川福建廣西浙江江蘇陝西江西湖南湖北南河各督撫俱經詳行察看。分款甄別。辦理固應如此。其直隸安徽河南甘肅等省。則概稱

尚堪留用。並無改教給銜之處。殊屬非是。此項人員業經揀選。年力自不至於衰邁。但其人才分高下。非到省體察。無由深悉。況各省分發至數十員之多。其中豈竟無一二不堪驅策之人。各該督撫自應仰體朕調劑苦心。據實甄別。奏聞辦理。乃一味藉口姑容。毫無別白。惟知取悅衆人。及至用違其才。因事再加叅劾。而官方既多曠廢。人才復難保全。如此遇事模稜。並不實心奉公。豈朕委任封疆本意。方觀承馮鈴阿思哈吳達善俱著傳旨申飭。並令再加體察。明白回奏。尋方觀承奏直隸分發舉人先後到省者七十員。咨送鹽政以大使委用者六員。實計留省共六十四員。臣與兩司公同察看。其中材質稍次者。雖難勝民牧之任。而年力精壯。均尚可効奔走。查知縣才力不及。例應降補佐貳。直隸差務紛繁。在在需人查辦。乾隆十五年定例。直隸揀發佐雜十八員。差遣委用。用完准再請發。

臣以不勝民牧之員。似可照揀發佐貳。令其効力。現計六十四員內。節經定為降補佐貳者二十八員。是以並無改教給銜之處。得旨知道了。既有此情。何不奏明馮鈴奏安徽試用舉人實計二十八人。臣前同兩司逐加甄別。才具堪以知縣補用者二十人。其餘八人才具稍次。但差委辦事。俱各奮勉。若用以州同州判等官。可期勝任。茲遵旨覆覈。惟熊篤曹衍姬喻宗溥三員。才識終覺拘迂。請均以教職改用。下部知之。阿思哈奏豫省試用舉人四十五員。前奉旨甄別。臣以人材優秀。須委以地方事務。始知梗概。其時委署甫及一半。尚無難資驅策之人。未經委署者。將來才識稍有未充。亦可借補佐貳。是以概留豫省。茲再加體察。除湯相傳鄔焜各因親老情願回籍改教外。查有余克家駱天衢二員。頗不諳政務。應請改教報聞。吳達善奏。現在甘省揀發舉人二十一員。臣再加覆覈。惟周颺渭

一人才具平庸。應改教職。其餘均堪補用。下部知之。○軍機大臣等覆奏。御史興德、朱嵇、參奏副都御史申甫請託內閣中書程晉芳家人匿收銀信一事。遵旨詢問申甫。興德、朱嵇等俱係各執一詞。未能符合。但申甫與中書程晉芳係屬同鄉。該中書親戚寄信來京。脚子已經交訖。次日復稱有銀八十兩。係屬誤交。其接收家人又稱並未收受。互相爭鬧。該中書已經呈送巡城御史交發司坊審理。

又復往懇坊官。而申甫即向御史面說實屬瞻徇。至此案司坊審斷情形。申甫既稱報都察院註銷。而興德等又稱尚未完結。司坊官將所爭誤送銀兩。斷令家人脚子分賠。究竟曲在中書家人。或在脚子。自當根究明晰。不應以分賠了案。得旨申甫於程晉芳家人匿收銀信一案。如果因城坊各官辦理未協。理應據實摺奏。乃於飯殿向該御史面說。並於都察院署指斥坊官詳斷之非。安知不為程

晉芳家人著賠銀兩起見。形迹之間。為公為私。難以分辨。轉致該巡城御史等得據以劾奏。咎無可辭。申甫著交部嚴加議處。至興德、朱嵇及該坊官審理此案。並不分割是非。僅令兩造分股賠銀。其調停了事之處。亦屬非是。但業據陳奏著從寬免其處分。○己亥。以雲南騰越協副將哈國興為楚姚鎮總兵。○庚子。諭前據雅郎阿奏稱前任成都副都統等挑取披甲拜唐阿。不挑成丁善射之人。惟計出缺人戶。可得養贍。盡挑幼丁等語。朕即降旨詢問富椿。據奏挑補時萬不得已。間或挑取出缺人家幼丁。並非遇缺即挑。復降旨令阿爾泰再行查明具奏。茲據阿爾泰奏稱查明富椿任內挑披甲拜唐阿共五百二名。內係出缺人家挑補者六十八名。其未成丁者十一名。託雲任內挑幼丁十三名。阿爾泰署任內挑幼丁三名。看來前任副都統等並非盡行挑補出缺人家幼丁。雅郎阿蒙朕加

恩擢用一切事務。自宜實心經理。乃敢妄行具奏。意存取巧。著傳旨嚴行申飭。○諭軍機大臣等。明瑞現在進剿緬匪。計此時可到木邦。至直抵阿瓦城。約在臘月中旬。即軍務速竣。而辦理善後事宜。轉盼即屆春初。爾時若遽議凱旋。途次或值瘴氣漸生之時。殊於軍行無益。阿瓦城向為聚落之地。水土自與邊界不同。朕意不若在彼暫駐。一切從長經理。待至來年秋爽。徐回內地。方為妥協。惟是現在裹帶口糧。不過足支數月之用。已一面傳諭鄂寧。令其將起程辦理情形。并將來作何接濟之處。一一據實籌畫具奏。但思目今剋期銳入。如需攻城打仗。自可因糧於敵。若一舉掃平緬衆。既入其城。則彼舊時窟穴。即我版圖赤子。又須加之體卹。緬酋懾駭。必有歲徵賦稅。明瑞到彼撫定之後。自須酌立章程。即覈其歲收所入。是否足供大兵駐劄供儲。若大兵酌留在彼。是否足資彈壓。如欲令永

昌近邊。源源接續。而道里相距遼遠。或就阿瓦城附近土司等採辦給軍。而該處甫經懲創。物力不免稍艱。又須酌量寬裕發價。俾不致拮据滋累。以示恩威並濟。此等處務宜先時通盤計議。成算在胸。以便次第行之。無不洞中竅要。將此寄知明瑞。一面留心規畫。一面隨進摺之便。詳悉奏聞。○又諭。現在進剿緬匪。所有官兵經過各省。其一切儲侍供億。俱屬動支公帑。絲毫不累民間。而長途護送車馬人夫。或不無稍資民力。近據阿思哈舒赫德前後摺奏。河南湖廣等省。辦理兵差。除按例正項支銷外。所有未敷。酌令各州縣公同協濟。在小民感戴國恩。踴躍急公。固屬分誼。應為之事。而國家於此等子來恐後之民。亦宜量予加恩。著傳諭各該督撫。就該省辦差之項。逐一覈算。除動支官項外。其經過地方及通省協濟。約需民力若干。即速查明。將銀數據實詳晰覆奏。毋得稍有隱飾。候朕酌

量加恩降旨。可將此傳諭知之。又諭前據鄂寧奏明瑞統兵進剿緬匪。所有行糧等項。俱已備帶寬裕。現在存貯米石甚屬充餘。可資接濟等語。軍行糧石最關緊要。從前明瑞奏籌辦進剿事宜摺內。曾稱兵丁口糧約須裹帶兩月。此時大兵深入。約計將次木邦。至直抵阿瓦城。已在臘月中旬。即迅速奏功。轉瞬將及春初。或值瘴氣漸生。莫若在彼存駐。經畫善後事宜。以待秋來振旅凱旋。計議方為盡善。現在大軍在途。或需打仗攻城。自可因糧於敵。但自永昌直達阿瓦城道途既遠。時日亦長。其沿路齎糧如有未敷。作何源源接濟之處。著傳諭鄂寧。令其通盤計算。與明瑞彼此熟籌。詳悉奏聞。調江西南昌鎮總兵邱若龍為河南河北鎮總兵。陝西興漢鎮總兵張兆璠為南昌鎮總兵。河北鎮總兵馬建學為河南南陽鎮總兵。南陽鎮總兵吳士勝為興漢鎮總兵。○旌表守正捐軀之廣東

仁化縣民陳謙瑞妻楊氏 辛丑

上御乾清門聽政。○旌表守正被戕之直隸雞澤縣民吳士傑女吳氏。壬寅御史常德奏各部院衙門八旗一切文案事件。應立限稽查。庶無遲誤。請嗣後令各衙門將何日收何日到之處。註明鈐印。限三日內咨送該稽查科道衙門查覈。從之。○撫卹甘肅平涼靈臺莊浪合水環縣西寧碾伯大通河州涇州平羅安化武威寧夏寧朔靈州肅州高臺花馬池漳縣狄道伏羌安定西和洮州崇信靜寧隆德固原寧州撫彝古浪中衛敦煌等三十州縣廳。本年旱雹災民。並蠲緩額賦有差。○豁除甘肅靈州乾隆二十五。六。七。八。九。等年被水衝塌不能墾復田四十四頃五十八畝。有奇額賦。以散秩大臣福璉為鑲紅旗漢軍副都統。癸卯。

聖祖仁皇帝忌辰遣官祭

景陵○

上詣

奉先殿

壽皇殿行禮○諭軍機大臣等據舒赫德等奏查審張舒挾嫌捏控一案已於摺內批諭矣所擬將張舒改發伊犁等處充當苦差之處甚屬允協但該犯因與王以唐挾有私嫌即捏造滅倫姦情汚人名節繼以誣告未遂所欲輒復捏砌各款挾制官長實屬刁頑之尤著傳諭定長將張舒於起解時重責四十板再行發往○甲辰諭曰御史劉天成奏請將已經刊布之康濟錄令各省學臣另刻發生童肆習一摺所見甚屬猥瑣於實事毫無裨益從前給事中倪國璉所進康濟錄原本業經官刻流傳士民並不艱於購覓况恤貧振乏為地方官有司職業所繫而隨宜措置要在實心實力行之方能有濟否則古法具存而措施未善於閭閻亦復何補至諸生等家居肄業凡經史所垂何一不可增廣學識若

謂墨守此書即可身膺民社尤為不通之論至該御史所稱每部定價三錢令教官發給生童繳價一節學舍生徒勢必徒滋紛擾更屬不成政體明季臺諫積習每以文具空言紛紛建白其實無益於治朕辦理庶政務求實濟此等紙上空談深所不取劉天成所奏不准行又諭朕幾務之暇時及臨池閱年既多每自驗詣力覺往日所書未能愜意凡內府藏弃卷軸及宮殿苑囿題詠者屢經更易惟從前頒賜臣工御書尚多舊時筆法昔宋米芾以轉益多師擅長藝苑麻牋十萬散布人間每欲持以換少年之作人或靳之朕非欲與藝林文士較長翰墨之間第工候淺深既堪自證又豈肯惜一舉手之勞而不臻覈實求精之境耶所有乾隆二十年以前賞過內外大臣等御書俱著繳進候朕酌量換寫給還其已經成造扁聯及摹勒上石者仍將墨蹟原本呈繳聽候另換○兵部奏本年

軍政屆期。謹將武職大臣都統前鋒統領各員開列進呈。得旨。都統伍彌泰到處不肯實心任事。一味沽名釣譽。著交該部察議。副都統阿哈尼堪年已衰邁。著以原品休致。餘著照舊供職。○以翰林院侍讀學士邊繼祖侍讀紀昀俱充日講起居注官。侍讀柯瑾署日講起居注官。鑄給江蘇崇明縣五澉鎮分防縣丞關防。從巡撫明德請也。○乙巳。吏部議准御史王懿德奏稱翰林院讀講學士及詹事府庶子等官。選入清華。職品與小京堂相等。向遇京察。未同四五品衙門堂官一體辦理。體制未能盡一。請嗣後將學士庶子等官同四五品京堂一體請旨。歸王大臣驗看。列為等次。引見。應如所請。從之。

大清高宗法天隆運至誠先覺體元立極敷文奮武孝慈神聖純皇帝實錄卷之七百九十八

大清高宗法天隆運至誠先覺體元立極敷文奮武孝慈神聖純皇帝實錄卷之七百九十九

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事務處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文學殿大學士文淵閣領閣事稽察欽奉 上諭事務處管理刑部戶部工部事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆三十二年丁亥十一月丙午

上幸瀛臺○賑卹山東高苑博興樂安三縣本年

年被水災民並蠲緩額賦有差○丁未

上詣暢春園問

皇太后安○幸圓明園○諭軍機大臣等昨召

見河南布政使佛德因伊曾任永昌府知府

問及該處情形據稱木邦南境有茂隆銀廠

為邊外土司葫蘆苗長所屬向設廠委二人

凡有行廠事件例由鎮康土知州轉送木邦

給與該廠其廠委申稟文書亦由木邦土司

呈遞該廠丁夫甚衆葫蘆苗長向來歸順亦

非木邦所屬等語是茂隆銀廠毗連木邦向

來一切文移資其遞送今木邦尚未克復葫

蘆苗長現在何屬此一年之內往來文報又

從何處轉行且檢閱明瑞呈繪地圖廠地雖

在木邦東南中間尚隔一滾弄江原與內屬

土司相近或別有水路可通非木邦所能梗

阻亦未可定又念該廠聚集多人自必夷民

雜處今用兵之地與彼處相距不遠此等烏

合之衆是否不致為賊匪誘脅附從再此輩

既在彼傭工覓食於緬匪風土情形必素所

熟悉即就近調廠丁以供驅策自屬便宜但

於公事是否有益難於懸揣著鄂寧詳悉查

明或可與明瑞商辦遇有奏事之便隨摺附

聞○又諭據額爾景額奏稱生擒賊諜四名

內審出漢奸謝思道係湖南寶慶府武岡州

人於乾隆十九年投入緬地等語謝思道係

內地民人膽敢投順緬匪前來偵探殊堪痛

恨著傳諭定長將謝思道父母兄弟妻子及其族人無論男婦悉行拏解來京嚴行治罪併將此諭衆知之○又諭據額爾景額奏稱伊等抵隴川拏獲緬匪偵探人四名官弁疎防逃走二名當即捕獲一名一名派乾清門侍衛伊柱躡緝於六十里外山谷間擒獲殊屬可嘉伊柱著加恩補授鑲藍旗蒙古副都統○署福州將軍副都統達色等奏查三江口洋澱水師營向由福州滿洲兵分作八班派往與彼處兵一體訓練嗣因另記檔案人等出旗為民暫止今由京派來滿洲兵業經到齊臣等請於明年二月為始每月派二百名往彼處照舊操練每班仍派協領一員佐領二員雲騎尉一員驍騎校二員管束從前官兵駐防設有官房三十間年久滲漏請於官房租銀內動項興修得旨有何緊要何不待將軍回任○戊申諭曰吳士勝奏謝補總兵並請陞見一摺由驛馳遞深屬不曉事

體向來各省督撫於地方尋常事件尚不准輕用驛遞況此等謝恩奏摺係該總兵本身事件並於公務無涉何得由驛馳遞吳士勝著交該部察議現在已降旨將伊調補興漢鎮總兵可即赴新任不必來京陞見○又諭據阿桂奏稱准京城鑲黃旗漢軍正紅旗滿洲等旗咨稱明歲戊子科鄉試伊犁有無貢監生員應試著咨報國子監並造滿漢冊咨送各該旗查該處並無學習漢文之人請嗣後毋庸咨取等語伊犁係新定疆域雖移駐滿洲蒙古官兵究非內地駐防可比該處人等止宜勤習清語騎射學漢文何為況道途遙遠不惟鄉試不應咨取即遇考試清文亦不准行查此次冒昧咨取之都統實屬不曉事體著查明何旗行文令該都統明白回奏○諭軍機大臣等今日廷鞠德保據供在九龍江退回時尚有四達色德勝釋迦保三人商同退避等語四達色德勝業經病故其釋

迦保一員現任遊擊。如現隨明瑞進兵。著明瑞就近訊問。若未經派往。即著鄂寧查訊。將該弁有無商同逃遁情由。據實具奏。尋奏釋迦保現在普洱小猛養軍營防守。臣飛調研訊。據供前調往普洱。在九龍江聽德鎮差遣。後德鎮聞小猛養有賊。將賞號銀兩等物。發交土司收領。並令將火藥鉛子埋藏。隨傳諭土司將備等繞小路回思茅再議。遊擊稟稱從前曾隨兆將軍被圍。斷然逃不得。德鎮以兵少賊多。難以防守。不聽。我一遊擊。既無派帶兵丁。抗拒不住。只得隨行。實無商同情弊。得旨釋迦保著革職。發往軍前効力。○已酉上奉

皇太后還宮。○詣

皇太后宮問安。○諭軍機大臣等。據明瑞等奏稱大兵至底麻地方遇賊。遣莽喀察齊哩克齊等帶兵前往。共殺賊匪三十餘人。並生擒三名。隨整兵向木邦前進等語。莽喀察等遵

派殺賊甚屬可嘉。交明瑞分別賞賚。明瑞統兵前進。賊匪懾於兵威。自必潛行逃竄。斷無攖拒之力。然彼處路徑。官兵多所未悉。萬一賊匪從曲徑旁出。或潛躡我軍之尾。搶掠口糧。均未可定。宜加意防備。再將來大兵撲滅賊匪。克取阿瓦城。安插此等緬子。必須置一頭目人。求其耆舊用之。令衆心傾服。即木邦安置頭目人。亦宜擇衆心悅服之人用之。始於事務有益。著傳諭明瑞等。豫先妥籌。以便臨時辦理。至功成回兵。恐值瘴作。朕深為廕念。不如在新定地方多住數日。著傳諭明瑞妥協辦理。此際伊等已至何處。殲賊情形。若何。即速奏聞。併傳諭額爾景額等知之。○庚戌。

上詣

皇太后宮問安。○幸瀛臺。○諭軍機大臣等。李清時覆奏運解木植一摺。有知係內廷需用之語。已交軍機大臣刪改交部。此等需用木

植均係工部按照則例辦理以資各處工程之用。至內廷或有需用何嘗取給工部解辦之木。李清時所奏甚屬不知事體。著傳旨申飭。○刑部議覆湖南按察使官兆麟奏請各省解往湖南軍流人犯應照道里表原定地方仍發苗疆業經請旨交湖南巡撫會同該督議奏。今據該督等稱除永順府屬之永順龍山保靖桑植四縣辰州府屬之乾州永綏鳳凰三廳例無安置軍流外其從前停發之苗疆各屬內永州府屬之江華縣寶慶府屬之城步縣沅州府屬之芷江縣靖州本州暨所屬之綏寧通道二縣均係苗疆要區應仍停發往至辰州府屬之沅陵瀘溪辰溪溆浦四縣永州府屬之道州永明二州縣沅州府屬之黔陽麻陽二縣靖州屬之會同縣雖隣苗疆究非要區仍發往安置應如所請。又稱苗疆與腹地不同若各省軍流人犯悉照道里表指定處所發往恐一時遣犯過多聚衆

滋事所有各省應發辰沅靖等府屬軍流令交巡撫衙門覈明各屬安插數目派撥亦應如所請從之。○以四川豐溪營土百戶郁盛弟鴻甘肅黃羊川土千戶管仲子卜各襲職。○旌表守正捐軀之河南桐柏縣民李天成妻張氏。○辛亥諭據明福奏稱伊已起程前來陛見等語總督將軍均係承辦省城要務之人明福蘇昌同在一省蘇昌業經來京明福自應俟其回任再行起程乃不待蘇昌回任通省二大員全行來京殊屬非是。明福著嚴行申飭。○諭軍機大臣等熊學鵬所奏州縣徵收錢糧於拆封時註明成色解交布政使傾鎔一摺朕初謂各省情形未必相同其勢難以概行惟該撫現在浙省或有所見是以摺內批令自行試看今詢據軍機大臣覆奏民間完糧業將足色紋銀自封投櫃即間有不足者亦自向銀匠易換交完地方官傾鎔元寶解司成例相沿已久若將一省無數

零星糧戶銀封解司拆驗傾鎔無論布政使為錢糧總匯事務紛繁倘必一一纖悉檢查既恐日不暇給如或籠統即付鎔化其中脫有短少低潮漫無記識又復於誰取足勢不可行此言甚當況多此一番更改該司或假手吏胥從中任意駁換層層設法自肥而在不肖有司因有飭交補足之文豫張聲勢因而專務取贏以為自便之計且該撫奏中又有多餘者充公之語是額定耗銀之外復為

閭閻增累名為杜弊非實以滋弊耶以國家惟正之供而計及造報盈餘之數所見尤為瑣細看來不獨別省即浙江亦難以奉行此摺毋庸置議著將此傳諭熊學鵬知之○鑲黃旗滿洲都統奏查每屆鄉試年國子監咨取八旗應考由旗轉行各省駐防將應試各生送監錄科臣等每次行文俱覆稱並無應考者看來伊等專以騎射清語為要不習漢文往返行文徒滋繁擾請停從之○壬子諭

曰范時綬來京召見奏對時神氣短弱恐於封疆重寄難任煩勞著留京另用湖北巡撫員缺著鄂寶調補其貴州巡撫員缺著良卿署理○癸丑諭軍機大臣等據明瑞奏稱伊等領兵至木邦緬匪棄城而遁所遺糧米除給兵丁口糧外尚有贏糧五六百石俟珠魯訥到時碾米以為木邦駐劄兵丁口糧其遙遠村莊人戶俱已逃匿糧米應令搜查等語軍行口糧最為緊要明瑞所辦深合機宜但

木邦之人為緬匪蹂躪暫出逃匿一聞大兵駐劄必陸續來歸前據明瑞奏稱變團尚屬可用即將變團留於珠魯訥處令其招聚伊屬下逃散人戶伊等逃竄之際糧米諒多埋藏來歸人等將所知者獻出加以獎賞或給價購買可省內地轉運之勞著傳諭明瑞珠魯訥等留意遵照辦理再附近木邦土司宜招撫者即行招撫其難信者亦宜作速辦理以靖進兵後路以原任湖北巡撫范時綬

署正白旗漢軍都統○調四川布政使張逢堯為貴州布政使甘肅布政使海明為四川布政使河南布政使佛德為甘肅布政使以河南按察使何燭為河南布政使仍兼管河工事務○甲寅

上奉

皇太后幸壽安宮侍宴○以福建汀漳龍道楊景素為河南按察使○乙卯

皇太后聖壽節遣官祭

太廟後殿○

上詣

壽康宮行慶賀

皇太后禮王大臣於

慈寧門眾官於午門行禮○奉

皇太后幸壽安宮侍宴○諭三殿工程業經

特派大臣管理但工程事務究係工部專

司該堂官會同原派大臣妥協經理○諭軍

機大臣等昨四川永寧道孟端請訓召見詢

及該省採辦木植一事據稱阿爾泰於雷波山中採購大木自出已力辦運現已在途計該處山中大木尚可購覓等語

天壇內舊建望燈竿年久已需更換因圍長丈尺甚大一時難得合式木植是以向來部中屢次行文究未辦得今雷波山中如果有良材自當及時採覓備用此係壇內所需自應動正項報銷毋庸該督自出已資著傳諭阿爾泰照發去望燈竿丈尺籌酌該處情形妥協辦理仍行遇便奏聞尋奏委員赴雷波山中採辦獲有長九丈五尺以外之楠木二株杉木一株與發單丈尺相符現已鑲架道路由山妥運得旨好按例奏銷更不可累民其辦理之員仍咨部議敘○丙辰

上詣

皇太后宮問安○幸瀛臺○諭軍機大臣等據明瑞奏稱現在珠魯訥已到木邦伊領兵前進路徑險阻難行額爾景額之隊亦走險途

斷不能先抵阿瓦城再兵過之後木邦以外難設臺站特派騎兵一隊將事件送至木邦再由臺站馳遞等語明瑞進兵將一切事務盡心籌畫殊屬可嘉諒不日即可剿殲賊匪但明瑞額爾景額兩路行走近阿瓦城時方可合一此際兩路互相通信最為緊要或於土司擺夷人等內擇其識路徑可信任者俾同官兵送信兩處之事彼此得知於進剿自為得力至木邦以外不設臺站派兵遞送事件雖為防賊匪抄襲起見但大兵深入後不設臺站畢竟不便且派一騎兵遞送事件軍營即少一騎兵現在珠魯訥駐劄木邦兵丁四千有餘彼處事務無多著派千餘名接續明瑞之隊或百五六十里或二百餘里擇其穩妥處所酌以二三百兵為一臺遞送事件則軍營信息自無滯礙著傳諭明瑞珠魯訥妥協辦理再此際明瑞已抵何處事體若何之處得便即速奏聞○丁巳吏部議奏銓選

知府班次定例單月一補班一捐班雙月一內班一外班一捐班現在單月捐補班俱無人缺出皆歸雙月推陞而雙月亦因捐班無人僅以內班郎中、外班同知、直隸州兩項輪用。但郎中二年俸滿始得截取倘一時知府缺多不敷陞選必至盡用外班未免偏枯查員外郎向准論俸截取陞用知府今郎中俸滿乏人請將員外郎閱俸已滿二年者照舊截取俟有知府缺出先儘郎中陞用乏人即以引見記名員外郎按俸抵補其記名之員後經陞任郎中滿二年俸者即歸現在郎中班內選用未滿者仍歸員外班選用再外官應陞知府祇同知、直隸州查同知職任本簡處分亦輕往往閱俸未久因無參罰事故遂得早邀陞選直隸州有本任應辦事件又復管轄屬員每遇俸深班次輒以處分較多有礙陞用竊思直隸州多係繁劇缺與其因參罰停陞盡用事簡之同知不如推陞後令其

完納銷案請嗣後除俸深同知仍照舊辦理外其直隸州俸深人員有罰俸降俸住俸參罰無闕降調者俱准其一體陞用住罰俸銀限推陞到任後一年完繳逾限不完仍飭令離任降補原官從之○兵部奏本年軍政屆期謹將武職大臣將軍副都統各員開列進呈得旨西安右翼副都統興德才具平庸不能辦事著交兵部察議荊州左翼副都統阿爾薩蘭年逾七旬精力就衰著以原品休致餘俱著照舊供職○定豫保卓異推陞員弁依限給咨送部引見例兵部議奏各省題補武職各員俱係要缺至豫行保舉一項尤為地處邊遠缺出行文題補恐致稽遲是以先行保舉隨時掣補各省督撫自應於部覆到日即行咨送今查福建豫保之金門鎮標右營守備江永泰澎湖水師左營守備卓其祥均係例應送部之員業於上年十二月部議具題行文調取已滿一年未據該督咨送查

應行送部人員向無例限請嗣後遇題補豫保卓異員弁該督撫於接准部覆日限四個月咨送兼管二省總督所轄隔省人員限六個月咨送逾限議處其承辦要差不能依限者令該督撫聲明咨報事竣即令送部從之○裁甘肅靈州惠安堡鹽大使改設巴里坤同知經歷從陝甘總督吳達善請也○戊午諭據達色奏河東運使吳雲從不能嚴督衆商加工澆曬池鹽及配運不敷轉為稟請帶銷停領餘引實屬徇商沽名請旨革職等語若僅如所奏情節則吳雲從止於不勝任尚不至於革職或此外別有情弊亦不可不覈實查辦吳雲從著解任交與彰寶會同該鹽政秉公訊明具奏到日再降諭旨○諭軍機大臣等前朕降旨令明瑞等攻克阿瓦城將諸事辦訖回兵時若值瘴作即在新定地方多住數月明瑞等統兵前進諒不日即抵阿瓦城可以蕆功萬一兵至彼處圍攻賊匪死

守不出。則曠日持久。其城不能遽下。我兵口糧饒裕。甚屬妥協。倘稍有不敷。與其在彼拒守。不若撤回木邦。相度情形。如現在兵數尚少。即奏請由京派兵前往。再行進剿。但此不過設想之言。諒亦未必至此。著密諭明瑞知之。伊統兵現抵何處。情形若何之處。奉到此旨。即速覆奏。○又諭前以明瑞現由木邦統兵進剿。其自木邦至阿瓦城一路軍報。往來最關緊要。業經降旨。令珠魯訥於駐守木邦兵丁內。挑選千餘名。派員帶領。跟隨明瑞之後。沿途相度形勢。安設臺站。每站相距或一百五六十里。或二百餘里。各酌留兵二三百名。為遞送軍營文報之用。因思額爾景額由猛密進兵。其行走之處。與木邦另為一路。所過程途。亦須安放軍臺。以資聯絡。額爾景額進兵以來。其如何派撥料理之處。未經奏聞。若尚未籌及此事。應即照木邦一路安臺之法。沿途派兵分置。至鐵壁關地屬緊要。與木

邦形勢相仿。亦當派兵數百名駐守。以為接應。自鐵壁關以外。亦應計算道里。酌派兵丁安設臺站。其需用兵數若干。須揀選精壯勇往之人應用。不得以滇省疲懦不堪者充數。即領駐將弁。亦應揀用曉事勇往者。其在何處調撥。俱著鄂寧一面詳悉妥協籌辦。一面速即奏聞。並知會額爾景額一體遵辦。尋鄂寧奏猛密一路大兵前由虎踞關行走。並未經由鐵壁關。馳遞軍報。業於杉木籠駐防兵及永順鎮標存城兵內。各撥馬步兵三百名。並於永昌留養馬內。撥馬百匹。交副將孫爾桂管領。駐劄虎踞關。嗣據額勒登額咨稱。大兵現進至老官屯。攻取賊人木城。距虎踞關頗近。軍報俱可派員帶兵護送。若將來大兵漸次前進。路途遙遠。應沿途留兵接遞。聞猛密司有通木邦捷路。俟攻取猛密司後。詢明路徑。將此路軍營事件。即交木邦叅贊大臣處轉送。又咨稱馬騁子地方係屬要區。應撥

兵駐劄。臣查老官屯軍營文報往來雖無阻滯。但大兵深入後。勢難撥兵遠送。馬牌子下距老官屯一百三十餘里。上距虎踞關一百五十餘里。正屬適中之區。應即於此處駐兵。安臺接遞軍報。虎踞關現有兵六百名。可即分撥一半前往。並揀派守備一員。速赴駐劄。報聞。奏內又稱。前大兵由虎踞關出境。路較近。便是以未由鐵壁關行走。批爾等未奏。明朕何由得知。又稱。自老官屯攻勦前進。沿途安臺雖據額勒登額咨稱酌量留兵。但進勦兵未便多分。請於附近永昌之提標大理城守營調兵一千名。再於附近騰越之緬甸黃林岡原駐防兵內酌撥安臺。又批。好。但雲南綠旗兵逃遁成習。若有私逃者一名。不可漏網。此事惟汝是問。上次逃者幾名。獲者幾名。即速奏來。○己未

上詣

皇太后宮問安。○幸瀛臺。○庚申。諭軍機大臣

等前以各省駐防綠營俱有生息銀兩。為兵丁等紅白賞卹之用。雖事屬久行。終非政體所應有。曾令督撫等各就本省情形酌量籌畫。以次抽撥停止。乃自二十四年降旨以後。駐防兵丁惟保定河南太原三處綠營兵丁。惟直隸河南江西山西陝西五處業經議停。其餘現在生息者尚多。即如江南一省。雖以裁糧充賞。而城工未畢。生息猶在。暫留亦宜一體盡撤。今查數已停各省中。或以裁兵扣餉作為賞卹。或以朋扣馬價及鹽當規禮充撥。辦理均有端緒。其未停各處豈必竟無別款可以通融調劑。正當詳悉措置。使恩賞有資。而此等生息名目一切蠲除。於營伍體制並為允協。著即傳諭將軍督撫等。是否尚有兵糧可裁。及有無別款可以動用。經理使此項銀兩通行永停之處。悉心詳議。據實奏聞。○又諭。據明瑞奏。稱大兵抵白小地方。莽喀察等率兵襲賊營。殺賊六十九名。生擒五名。

獲其馬匹器械等語。侍衛官員兵丁等遇賊
勦殺殊屬可嘉。看來我滿洲官兵。各自奮勉。
從此即可藏功告捷。莽喀察著賞給副都統
職銜。賞戴花翎之斗濟勒圖。即授為三等侍
衛。賞戴藍翎之克木訥克。即授為藍翎侍衛。
其賞戴花翎哈勒察。藍翎侍衛已雅爾。亦授
為三等侍衛。此時伊等已抵何處。情形若何
之處。得便即行速奏。發去花翎十枝。藍翎二
十枝。交明瑞獎賞奮勉官兵。○吏部議覆調
任河南布政使佛德泰。稱向例直隸州要缺。
不准同知調補。查直隸州同知品級相符。請
嗣後直隸州缺出。現任同知內有才具出眾
者。准其一體調補。應如所請。直隸州缺出。無
現任知州。知縣陞調之員。准其於同知曾任
州縣正印內調補。從之。○是月江南河道總
督李宏奏。壽州正陽關為淮河關鍵。查淮水
發源於河南桐柏。經信陽光州。固始。霍邱。潁
上。以達正陽。千有餘里。其間所挾支水。至正

陽關合而東注。該關水誌。設立三官廟石岸。
考驗水痕。今年所報消長。與下游所以不符
者。緣正陽以下。尚有沙河一道。東西肥河二
道。又迤至硤石山下。有汴河洛河。天河。茨河。
俱入於淮。至懷遠縣之荆山塗山兩山夾峙。
淮出其中。經鳳陽縣之臨淮鎮。又有渦河。解
河。東濠。西濠。及沱。澮。漳。滴。諸水。俱匯淮而入。
洪湖。故有時上游報長數尺。而正陽以下支
水未漲。下游長水固亦無多。有時上游久已
報消。而正陽以下支水漲發。下游仍然加長。
也。請於荆山塗山之間。添設誌椿一處。飭令
懷遠縣於大汛時。探報以驗沙肥。得洛諸水
之長落。於臨淮鎮添設誌椿一處。飭令該管
巡檢探報。以驗渦濠諸水之長消。再合以正
陽所報。權其消息。下游自易宣防。謹繪圖呈
覽。得旨甚好。知道了。圖留覽。○安徽巡撫馮
鈴奏。據和州知州詳報。在陳橋洲大江中間。
拏獲海口沙船一隻。裝載私鹽。訊據各犯供

稱係由關東錦州二島口私運由海口進通州直抵和州查海船出口例將船戶水手姓名籍貫開載照單以備各口查驗今該犯等結夥多人越海私販保無為匪不法情事除一面提解各犯到省嚴訊外並查取各口失察職名分別覈叅得旨知道了又批嚴審定擬至失察各口更不宜輕縱應會該督者會商嚴辦○山東巡撫李清時以患病奏請解任並稱將東撫印務暫交藩司梁翥鴻代理得旨何必解任寬心調理若尋常細事藩司原可代理也今若何速奏來○山西按察使尹嘉銓奏請陞見得旨不必來一切盡心秉公不可入沽名之習則足勝任矣勉之戒之○陝甘總督吳達善奏哈密為新疆總匯之區一切過往差馬並軍臺馬匹歲需料豆向由安西府屬淵泉各縣運供每年約計六千餘石除採買豆價外歲需運腳銀二萬五千餘兩查哈密節年豆料每石需銀五六兩不

等今歲收成豐稔現據哈密廳詳報每豆一石需價銀三兩三錢乘時收買既免淵泉等縣運轉之勞運腳亦可全省請動支藩庫銀兩飭發該廳採買貯用得旨如所議行○四川總督阿爾泰奏赴滇兵馬經由寧遠府屬地勢崎嶇前飭各處修造橋道查驗俱極穩固該地山多田少臣將近水旱地令其設法改種稻田其山角隙地墾種雜糧不能布種處所令種茶椒桑麻該處係屬苗疆城垣最要查勘新修物料堅實可久再雅州所屬銅鉛廠頻年不敷鼓鑄臣相度情形恐有透漏遴委丞倅等員監察並於運銅出山路口設卡盤查復將經過府縣倉庫錢糧查驗均無虧那情弊得旨覽奏俱悉卿亦年老矣如此往來奔走曾勞苦否

大清高宗法天隆運至誠先覺體元立極敷文
奮武孝慈神聖純皇帝實錄卷之七百九十九

實錄卷之七百九十九

七

大清高宗法天隆運至誠先覺體元立極敷文
奮武孝慈神聖純皇帝實錄卷之八百

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履歷

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹煥鎮等奉

敕修

乾隆三十二年丁亥十二月辛酉朔諭軍機

實錄卷之八百

大臣等前據額爾景額具奏分兵自猛密一路前進於龍泉地方生擒謀賊審訊等語迄今半月有餘並無摺奏額爾景額前進距馬膊子山老官屯不遠諒不日即可抵阿瓦城伊等到彼情形何以不行具奏朕深為廕念昨據明瑞奏稱自本邦前進不設臺站派兵遞送事件朕節經降旨令珠魯訥由留駐木邦兵內派千餘名接應設臺額爾景額一路如何馳遞事件亦宜與明瑞豫為熟籌乃明

瑞將木邦以外馳遞之事具奏而額爾景額並未籌及又許久亦未奏事朕已降旨鄂寧令其亦照木邦一路辦理至明瑞自木邦前進抵白小地方攻取賊匪隘口營壘令官兵分頭登兩面山峰攀緣憑高而下賊匪措手不及攻破營壘所辦深為得力著傳諭額爾景額攻取隘口亦應照此辦理再發去花翎十枝藍翎二十枝交鄂寧遣官兵送交額爾景額秉公賞給奮勉官兵以示鼓勵此時伊至何處事體若何之處奉到此旨即速奏聞

壬戌

上御乾清門聽政

皇太后宮問安 命刑部右侍郎蔡新提督直隸學政 以詹事汪廷璣為內閣學士兼禮部侍郎宗人府府丞傳為訥為左副都御史 以署禮部侍郎德福署正藍旗滿洲副都統 癸亥諭禮部議覆福建海澄縣壽民甘靖百歲請旌一疏此件於本年七月內即交

部議部中豈無定限何以至今始行題覆稽察各處又何以漫無查覈著該衙門即將緣由明白回奏 諭軍機大臣等據舒赫德等審擬桃源縣民林鳳鳴控告該縣狄如煥藉差苛歛一案實係毫無指實妄行控愬等語此案既係林鳳鳴藉端誣告自應按律究治即在外照擬完結毋庸另行報部至所請狄如煥等交部議處及該管上司失察處分俱著寬免將此傳諭知之 甲子諭據熊學鵬奏天台縣逆犯齊周華黨惡狂悖按律定擬並稱該犯係原任侍郎齊召南堂兄一併參奏請旨等語齊召南身為侍郎見近族有此逆犯何以並不據實奏聞齊召南著來京候旨 兵部奏本年軍政屆期謹將武職大臣提鎮各員開列進呈得旨廣東碣石鎮總兵歐陽敏年力衰邁著以原品休致廣東右翼總兵編柱四川北鎮總兵常保佳著來京候旨另用福建金門水師總兵楊元超廣東

左翼總兵陳應鍾著來京陛見餘俱著照舊供職 乙丑

上詣

皇太后宮問安 諭諸王等均有屬下旗人若於私事肆行挫折互相派撥固為不可倘遇喪事及移送金棺奉安園寢各事宜包衣人數不敷需用屬下該管大臣以未經具奏拘執不給亦覺太過朕辦理事務一秉至公嗣後諸王如有正項事務應用該屬下無庸具

奏即照所需派給○吏部議覆山東按察使勒爾謹奏定例上司經過地方許佐貳官於驛亭迎送正印官非公事傳詢不准出城外省積習相沿正印官不惟近郊迎送且竟奔走二三十里或直抵交界處所者殊干例禁但屬員於上司逢迎固當嚴絕禮節亦難盡廢若如例稱上司經過不許出城勢必仍蹈故轍請嗣後府州縣官遇上司經過該地方祇准城外接送不得擅過一二里違者該上

司指名參奏隱匿不叅別經發覺將該上司交部議處應如所請正印官迎送過一二里者請從重降一級調用該上司容隱不舉同律降調從之 丙寅

孝惠章皇后忌辰遣官祭

孝東陵 諭軍機大臣等鄂寶奏黔省赴滇兵丁內脫逃餘丁五十四名現在拏獲六名請旨正法一摺此時在逃應緝之犯為數尚多若先行正法恐各犯聞風竄匿轉難弋獲已

傳諭該撫令其暫行監禁俟全獲時再行請旨矣但此等餘丁派赴軍營各有將領管押稽查何至漫無約束聽其紛紛逃遁該管將弁所司何事從前黔省帶兵各官在途如何行走餘丁陸續脫逃皆在何處曾否報明滇省督撫查辦今明瑞已領兵進討此時作何彼此照會嚴速密緝務獲之處著傳諭鄂寧令其詳悉查明具奏並滇省亦有似此者否一併嚴查速奏尋奏黔省赴滇餘丁沿途脫

逃各領兵官當時俱報明督臣所逃之處在入滇境。以至永昌普洱兩路。經由之昆明。祿豐。廣通。楚雄。及寧洱。思茅等府廳州縣地方。或行走時。住宿時。潛逃報獲。兩省均有檔案。關會督緝。至滇省前。雖報有逃兵。而各營召募餘丁。並無逃脫得旨。另有旨諭。又批。餘丁雖無逃逃者。正兵反有。不可謂滇省之律善也。又諭。據鄂寶奏。黔省調滇兵丁內。沿途脫逃。餘丁五十四名。現已拏獲六名。請即行正法等語。此等在逃餘丁。一經拏獲。自應明正典刑。以肅軍紀。但現在拏獲祇有六名。而應行嚴緝者。尚有四十餘犯。若將已獲之犯。先行正法。恐在逃者。益復聞風生畏。潛匿遠颺。且有為之掩飾藏匿者。轉難剋期弋獲。著將現獲餘丁楊明龍等。嚴行監禁。俟躡緝齊全之日。再行具奏請旨。可將此傳諭。貴州巡撫良卿知之。此時復續獲幾人。亦令速奏。吏部奏。臣等即傳詢稽察禮部之禮

科給事中巴延三等。據稱各部按月註銷。向於下半年註銷。上半月事件。本年閏七月初七日。註銷七月十七日。福撫請旌一疏。註寫二十六日。交本房並未踰限等語。但科道既有稽查之責。亦應隨時查察。未便一經註銷。視為完結。應請將巴延三等。交部察議得旨。據奏。科道稽察各衙門題本。俱以各堂官畫齊之日。註銷。既係向日相沿辦理。巴延三等。費揚武等。不必交部。但一切應題事件。該衙門曾否出本。無憑考覈。究未周密。嗣後應如何酌定章程。不致遲延之處。著吏部定議具奏。尋議。各部具題案件。應於交本房後。限十日內具題。至彙題限二十日內具題。如遇例不進本日期。仍按日扣算。令督催所司員於題稿交到後五日。一次造冊送科。至註銷之期。令本房按出本日期。造冊送科。踰限查叅從之。以廣東龍門水師副將孫宗夏為碣石鎮總兵。貴州清江協副將樊經文為廣東右

翼總兵甘肅寧夏鎮中衛協副將福昌為四川川北鎮總兵丁卯諭據阿桂奏伊犁地處荒微每年巡察哈薩克等邊界及照料夷使須得戴翎人員始壯觀瞻外藩且易聽命除現在總管協領戴翎外請以滿營委前鋒翼長二員委前鋒章京四員俱戴花翎委前鋒校三十二員驍騎校內擇技藝出衆者八員均戴藍翎等語伊犁係新定疆宇官員內戴翎者多外藩視之自覺壯觀著即照所請

行○諭軍機大臣等據珠魯訥奏稱駐劄木邦派兵查搜兩旁山谷百餘里村莊燒燬廬舍傾倒無一完整比屋週看於土鬆處掘發並無掩埋米穀等語看來賊匪畏大兵將至早已整頓什物驅其人遠遁但緬匪愚蠢無識何以解此是必內地漢奸詳為畫策著傳諭明瑞額爾景額等留心訪查緝獲時嚴加刑訊一面行文該省拏其眷屬一面奏聞○又諭據珠魯訥奏現駐木邦招撫附近夷民

三百餘人及搜尋緬匪蹤蹟俱已遠遁亦並未續獲糧石看來必有漢奸從中指使設為堅壁清野之狡計更無疑義但官兵現在整隊深入道路既遠時日亦多所有起程時裹帶口糧為數不過兩月自應悉心籌畫善為源源接濟方於軍行有裨著傳諭鄂寧令其詳悉經畫應作何辦理之處一面知會珠魯訥彼此照應務須接濟妥速無致延誤珠魯訥處亦應商之明瑞或得因糧於敵不藉運

餉之處亦應隨時相機一面奏明至於普洱一帶及思茅九龍江等處此時土司是否寧靜並實在情形若何亦著即速查明據實具奏並將此傳諭珠魯訥知之○刑部議覆山東按察使勒爾謹奏稱強盜得財本律不分首從皆斬辦理時將其中情有可原夥犯免死發遣原屬法外施仁至以應死減等之犯在配潛逃自應重治其罪向例惟逃後行兇為匪照原犯死罪正法無行兇為匪脫逃仍

遞回原配枷責發落即犯至數次罪亦如之
法輕未足懲兇請嗣後免死發遣盜犯在配
脫逃無論有無行兇為匪悉照新疆遣犯脫
逃例拏獲請旨正法應如所請從之 戊辰
上詣

大高殿行禮 予故雲南楚姚鎮總兵國柱祭
葬如例 己巳

上詣

皇太后宮問安 諭朕披閱清文鑑定本見所

列文武官階尚有未盡妥協者如文職自二
品以下咸分正從惟一品俱誥授光祿大夫
未別等差而一品武職所授榮祿大夫考之
前代本屬文臣一品所授之階若移為從一
品文臣封典於體制更為盡善至文武事同
一體武職二品至六品並分正從而一品七
品獨未區分亦未免參差失當著吏兵二部
酌古準今詳覈定議具奏至清文內所有文
武官階繙譯之處並著繙書房詳妥改定俾

品目秩然以昭畫一尋議嗣後文職從一品
誥授榮祿大夫武職正一品誥授建威大夫
從一品誥授振威大夫正七品授奮武郎從
七品授奮武佐郎從之 予故河南儀封縣
河東河道總督張師戴入祀鄉賢祠從巡撫
阿思哈請也 旌表守正被戕之湖北房縣
民楊從林妻呂氏 庚午軍機大臣等議覆
涼州副都統偉善奏稱天津移來滿洲蒙古
馬兵一千名官五十九員及涼州駐防馬步

兵一千五百名官二十四員請將兩處官兵
分為八旗每旗設佐領二蒙古亦分為八旗
每旗設佐領一其兵均勻分隸又天津移來
養育兵一百九十一名均攤入八旗當差俟
缺出挑補八旗滿洲蒙古各分左右兩翼滿
洲每二旗合設協領一員佐領防禦驍騎校
各二員蒙古共設協領一員佐領防禦驍騎
校各一員其協領均兼佐領另鑄關防餘俱
候缺補放其馬匹餉銀口糧鉛彈火藥等項

悉照涼州例支給等語。應如所請。至稱天津兵遇婚喪事。將涼州生息銀一體分賞之處。暫如所請。現今各省將軍等查辦覆到時。再令該副都統遵辦從之。兵部議覆陝甘總督吳達善奏稱。甘肅鞏昌秦州二營向隸洮岷協。查鞏昌營距洮岷一千餘里。距固原五百里。秦州營距洮岷六百五十里。距固原五百一十里。均應改隸固原鎮。令其就近管轄。應如所請。又稱慶陽協所屬涇州營。係入甘門戶。差務殷繁。向設存營兵三十一名。該營所屬瓦雲汛。係由陝入甘孔道。向撥防兵五名。不敷差遣。請於紅德城營撥馬守兵十名。添入涇州營。於慶陽協營撥經制外委一員。紅德城營撥馬守兵五名。添入瓦雲汛。亦應如所請。從之。○壬申。命翁牛特貝勒諾爾布扎木素在御前行走。以教漢輔國公羅布藏錫喇布為理藩院額外侍郎。予故土爾扈特扎薩克多羅貝勒羅布藏達爾扎致祭。

如例 癸酉

上詣

皇太后宮問安。諭曰。刑部侍郎四達著馳驛前往山西。有查辦事件。所有隨帶司員並著一併馳驛。諭軍機大臣等。彰寶奏據安邑縣知縣馮兆觀稟稱。鹽政達色遇事堅執。商情惶惑。並置買器物。勒派商人賠墊及需索。贊儀餽送各情節。或係吳雲從授意。馮兆觀以為報復之計。俱未可定。等語。已於摺內批示。令彰寶不必來京。並派四達馳驛前往。會同該撫審理矣。從前達色奏吳雲從徇商沽名廢弛鹽務。參請革職。朕意吳雲從如止不能經理鹽務事宜。其罪尚不至於革職。達色所奏稍覺過當。因令達色會同彰寶查奏。今彰寶既據馮兆觀稟出達色有勒派各情節。若係吳雲從因參劾私忿。指使該縣捏造款蹟。希圖報復。自當重治其罪。至達色前在天津鹽政任內。曾與商人交結。獲罪。今若果

有該縣所稟情事。則是始終不知悔改。故智復萌。亦當徹底根究。擬議重懲。此案既經彰寶查叅。若竟交該撫審訊。不知者或疑撫臣與鹽政不無嫌隙。且不足以服達色之心。今令四達會審。可一秉虛公。詳悉研究。案情定擬。毋得稍存成見。以乖信讞。將此傳諭知之。○以陝西定邊協副將萬岱為興漢鎮總兵。甲戌諭曰。揚寧在木邦與賊匪打仗。未能盡力勦滅。且辦理諸事。均不妥協。著革職。發往伊犁自備資斧。効力贖罪。○諭軍機大臣等。李質穎奏鳳陽關盈餘較少一摺。內稱。因夏秋水漲。豫省米豆商船過關稀少。尚屬事所應有。至稱泗州一帶秋成稍薄。外來商販無多等語。所奏殊未明晰。該處收成既歉。正藉外來糧石以資接濟。商人趨利如鶩。估舶益當雲集。何以商販轉少於往年。揆之情理。實不可解。若云該處舊產糧石。每歲外來商人搬運者多。今年因偶被偏災。收成歉薄。商

船不赴該境採糴。亦應聲敘明白。豈可如此含糊入告。著傳諭李質穎將實在情形詳悉覆奏。尋奏鳳陽關坐落壽州正陽鎮。凡豫省米豆自西而東。俱在關報稅。兼該處素產米糧。商販採糴者亦來交稅。今該地收成減薄。而糧價較豫省相去無幾。是以無外境糧食來糴。但既已歉收。誠如諭旨所云。商船亦不復赴該境採糴。報聞。以廣州副都統曹瑞署鑲紅旗漢軍都統。正黃旗漢軍叅領劉沛德為廣州副都統。乙亥。上御太和殿視朝。文武陞轉各官謝恩。○諭曰。雲南鶴麗鎮總兵寶泰奏。稱到任已滿三年。請進京陛見等語。三年奏請陛見。雖屬成例。亦當視該任有無事務。雲南現在行軍。伊係本省總兵。雖未身赴軍營。一切調選兵丁。豈得與伊無涉。自當奏停陛見。在彼豫備。乃冒昧陳請。殊屬喪盡天良。不曉事體。著嚴行申飭。刑部議覆。兩廣總督李侍堯奏。稱江西

廬陵縣民吳均尚使人來粵勾引西洋人行教請分別治罪得旨吳均尚勾引西洋僧人意圖傳教實屬滋事但尚無不法別情著從寬免死改發伊犁給與種地兵丁為奴其安當呢都不能安分守法姑念外夷無知並著加恩免其永遠監禁交與該督即令飭回本國毋任再行出外妄為自干重罪諭軍機大臣等刑部議覆江西廬陵縣民吳均尚主使蔣日達等來粵勾引夷人安當呢都前往江

西行教將吳均尚等分別絞決發遣並安當呢都圈禁省城一摺吳均尚意圖傳教滋事妄為自屬不安本分之人但尚無不法別情律以異端煽惑之條自稍有間可以量從末減已有旨將吳均尚從寬免死改發伊犁其蔣日達等三犯仍照例發遣黑龍江等處給與披甲人為奴至安當呢都潛至舉門改裝同行亦干罪戾第念外夷未諳中朝律令著李侍堯將該犯明白宣示以江省刁民與伊

等勾通行教為國法所必懲業經刑部依律治罪奉旨特念汝等乃屬外夷如前此鄧類斯懇求留住粵省之事且為准照所請今安當呢都自罹憲典猶復格外加恩免其永遠監禁飭回本國汝等當安分守法毋得再行出外滋事嗣後如不知悛改別經發覺則當執法重治不能曲為寬宥將此傳諭李侍堯知之舉行各省駐防軍政吉林才力不及官一員年老官一員黑龍江卓異官二員西

安卓異官二員罷軟官四員寧夏卓異官二員江寧卓異官三員年老官一員罷軟官一員福州卓異官一員察哈爾卓異官四員才力不及官一員年老官一員罷軟官一員山海關卓異官一員年老官一員罷軟官一員河南卓異官一員分別議敘處分如例其曾經出兵打仗之年老患病以原品休致各員加恩給與全俸半俸有差○舉行本年軍政京營卓異官四員年老官一員江蘇省卓異

官七員。不謹官一員。罷軟官一員。年老官五員。有疾官二員。才力不及官九員。浮躁官一員。江西省卓異官六員。年老官四員。才力不及官二員。福建省卓異官三員。罷軟官一員。年老官三員。有疾官一員。浙江省卓異官六員。不謹官一員。罷軟官二員。年老官四員。有疾官一員。才力不及官三員。湖北省卓異官一員。有疾官一員。湖南省卓異官一員。河南省卓異官四員。有疾官一員。才力不及官一員。浮躁官一員。山東省卓異官一員。年老官一員。山西省卓異官十二員。罷軟官四員。年老官三員。才力不及官四員。陝西省卓異官五員。年老官二員。甘肅省卓異官七員。年老官二員。四川省年老官一員。有疾官一員。才力不及官一員。分別議敘處分如例。其曾經出兵打仗之年老患病。以原品休致各員。加恩給與全俸半俸有差。○以故阿巴噶輔國公旺沁扎布子齊巴克扎布襲爵。

大清高宗法天隆運至誠先覺體元立極敷文奮武孝慈神聖純皇帝實錄卷之八百

大清高宗法天隆運至誠先覺體元立極敷文奮武孝慈神聖純皇帝實錄卷之八百一

監修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履歷

總裁官經筵講官太子太傅文華殿大學士文淵閣領事稽察欽奉 上諭事件處管理刑部戶部工部事務

世襲騎都尉軍功加十九級隨帶加二級又加二級臣履歷內大臣戶部尚書鑲藍旗滿洲都統軍功紀錄五次

尋常紀錄十四次臣德璜經筵講官太子少保工部尚書紀錄六次臣曹振鏞等奉

教修

乾隆三十二年丁亥十二月丙子

上御乾清門聽政○詣

皇太后宮問安○諭曰湖南學政盧文弨條奏

一摺全屬不諳事體其意專務弋取虛名於

學校士習大有關係已據各該部按款縷晰

議駁即如所奏州縣官責處生員應申報學

臣一條此係乾隆元年議准條例載在學政

全書者已為深切著明今該學政復多方附

會有心為不肖青衿開寬縱之漸殊不知士

子果能安分自愛地方有司自應優以禮貌

若其甘為敗檢法所難寬則按律示懲俾知

悛改且以警戒其餘則其所保全者甚多該

學政乃巧為袒庇撫拾瀆陳是將使恃符滋

事者恣意妄為自干法網愛之非適以害之

乎至所稱民人控士令教官接受傳訊劣等

苗徭生員免其對讀及散給貧生租銀請照

兵丁紅白事例數條既使司鐸者侵官滋弊

且令考覈失勸懲之義卹貧開冒濫之端皆

屬曲意徇市恩邀譽於整飭士風之道毫

無裨益盧文弨所見如此紕繆若仍令其典

司學政必致諸生罔知繩檢風氣日漓豈朕

造就多士之本意耶盧文弨著即徹回交該

部嚴加議處○以太常寺卿黃登賢為宗人

府府丞○以少詹事錢載為詹事○以鑲黃

旗滿洲護軍叅領德克慎為荊州副都統科

布多叅贊大臣玉柱為西安副都統○以故

一等承恩公納穆圖子嗣存三等子色布騰

子索諾木策凌三等子善福子長明三等男

溫布子那涵保各襲爵。○是日戊子年立春。順天府進土牛春山寶座。○丁丑命禮科給事中陳科捷提督湖南學政。○以故一等子貳古斯弟巴圖章襲爵。○戊寅諭軍機大臣等據明瑞奏稱帶兵至大疊江選會水兵丁。搶搭橋梁過渡直抵錫箔生擒賊匪五名。據供錫箔向有緬子擺夷千餘人數日前聞大兵進剿俱各避去。隨將捉獲賊匪正法。復於附近地方搜出埋藏米穀等語。明瑞帶兵抵大疊江搭橋搶渡。訊得賊匪情形搜獲米穀甚屬可嘉。大兵一至賊匪聞風即遁。儻欲於險要地方合力以拒我兵。我兵過渡畢竟費力。今此等險要地方並無賊匪拒守。即使合力拒我。諒亦有限。大兵雲集自可剿滅。奏功著傳諭明瑞伊等現抵何處。如何剿戮賊匪。一得捷音迅速奏聞。再今日賞御前大臣額駙等福字。明瑞奏摺適到。昨已賞伊福字。今再賞給伊母。並發去小荷包六個火鍊一個。

鼻烟壺一個。賞賜明瑞。著傳諭知之。○又諭據珠魯訥奏稱土司擺夷人等來歸者甚衆。請照寶團所請於清水河地方仍設貿易。但內地民人在彼處糾結為匪者頗多。現據坐卡前鋒呼什布等捕獲五十名。均係木邦之人。除脫逃七人外。餘俱正法。並將疎縱該犯官兵定擬具奏。珠魯訥此奏所謂祇知其一。不知其二。設立貿易原為多集土司擺夷人等接濟官兵口糧。前此降旨命嚴行稽查。漢奸特以此等人歸順緬匪轉為賊匪偵探。我之消息深屬可恨。今大兵已自木邦深入。即難保必無奸民。亦祇稽查通賊之莠民而已。至隨我兵之後行走。及於新克地方出口貿易。不妨聽其自便。著傳諭鄂寧令其密諭沿邊官員祇宜佯為不知。聽其前赴木邦貿易。再捕獲之四十三人。初呼什布等帶兵擒拏。雖欲抗拒。但一經喝叱。即棄器械就執。罪尚不至正法。若謂前此降賊。則現今招撫之土

司獵夷人等。寧非前此降賊者乎。今方招集貿易接濟兵丁口糧。若皆正法。恐自此土司獵夷人等。必甘於從賊。而不敢來歸。於事反多不便。或珠魯訥詢之甕團。另有可恨情節。始俱行正法耳。但摺內並未聲明。著珠魯訥查明奏聞。至疎縱賊犯官兵。著重責褫革。插耳箭游營。游擊福倌守備楊國相千總劉恩達著革職重責四十板。仍留軍營効力。再將傳諭額爾景額之旨一併發寄珠魯訥遣人迅速送往。並將陸續所得明瑞額爾景額各營之信。即速奏聞。○將軍管雲貴總督明瑞奏大兵出木邦交界。經過大山所屬波竜等處。土司頭目均極恭順。並稱伊等被緬匪蹂躪。不能為敵。今大兵一到。各部落均享太平。該地米糧甚豐。酌量採買。作為木邦兵丁口糧。可省內地轉運。前來獻馬牛人等。已量加獎賞。並給土司羅外耀特頂帶。令往木邦見叅贊大臣珠魯訥。即會同彼處土司甕團協

助防守。並將大兵經過隘口及軍營情形。俱寓清字一分。令其遣熟識路途之人。從深山捷徑。送至猛密。交額爾景額閱看。得旨所辦可嘉。額爾景額之摺。月餘未至。甚為厯念。不能釋懷。汝處若得信時。速行具奏。○己卯。諭據額勒登額奏。稱叅贊大臣額爾景額領兵攻取緬匪木城。晝夜靡寧。積勞身死。殊堪憫惻。朕心不勝悼惜。著加恩贈都統職銜。應得卹典。該部查例具奏。再額爾景額雖係病故。

然時在戰陣。與軍營病故不同。著該部將應給世職之處議奏。○諭軍機大臣等。據額勒登額等奏。稱伊等帶兵至老官屯圍攻木城。賊匪死守。驟不能下。恐傷損兵丁。因收兵於形勝地方。設卡防範。以便相機辦理等語。此路勦辦賊匪。最為緊要。額爾景額業經病故。額勒登額著授叅贊大臣。伊柱授領隊大臣。看來賊匪為官兵圍攻。勢已窮蹙。額勒登額等宜相度機宜。擣其巢穴。以奏膚功。但路險

地狹賊匪結壘固守而我兵一力以攻城為務難保必無傷損不若以計攻取即如賊匪固守木城其旁有江我兵或於遠處為造舟搭橋之形設疑以誘倘賊匪前來衝擊則乘機可以勦戮即彼覺而不出不過櫻城自守諒無他技我若別尋路徑紆道而進置此城於軍後賊必棄城不守亦可乘機勦殺若專以攻城為務賊反得以逸待勞矣惟宜斟酌萬全方為有益觀額勒登額此路情形明瑞前進若遇此等要隘賊匪亦必死守能即行勦克固好如稍費力總當以計攻取或明瑞暫撤兵回木邦額勒登額暫撤兵回鐵壁關熟計情形再進俾得迅速完結但此亦設想之言諒亦必不至此惟地方遙遠總宜熟籌妥辦如於無益之地徒傷兵丁或遇險阻之處伊等拚命死戰則斷不可著傳諭明瑞額勒登額等知之再額勒登額此次攻取木城官兵陣亡者九十名得傷者四百餘名此內

或係滿洲係綠旗或有土司擺夷人等之處著查明奏聞○禮部議准前任湖北巡撫范時綬奏稱湖北鶴峯州長樂縣自改土歸流後人文漸有可觀請照湖南保靖等縣創設立學校鶴峯州取進文童八名長樂縣取進文童七名並撥長陽縣訓導歸鶴峯州興山縣訓導歸長樂縣俾資教訓均應如所請從之○庚辰諭曰肅州總兵俞金鰲派往伊犁奏報起程一摺由驛馳遞殊屬非是向來各省督撫等於地方尋常公事俱不准輕用驛馬至以本身私事而由驛遞奏於例更為不合前以總兵吳士勝擅動驛馬奏摺謝恩並請陞見業經交部議以降調今俞金鰲於肅州奏報起程日期自應遣人齎進乃亦擅用驛遞本應一併交部察議但吳士勝屢用總兵屢干吏議且動驛不過因謝恩私事若俞金鰲則係初任且前往新疆辦理屯務是以姑從寬免但恐外省提鎮中似此不曉事體

者尚復不少。著通行傳諭。嗣後非遇緊要公務。概不准由驛馳奏。倘有不諳輕重。復蹈此轍者。定行照例議處。○以洗馬盧穀充日講起居注官。編修彭冠暑日講起居注官。○原任禮部侍郎齊召南坐徇隱近族齊周華逆詞革職。○以故杜爾伯特貝勒羅布藏達爾扎子旺扎勒車凌襲爵。○予故科爾沁扎薩克和碩土謝圖親王納旺致祭如例。○辛巳上詣

皇太后宮問安。○幸瀛臺。○回部喀什噶爾阿奇木伯克噶岱默特及霍罕額爾德尼使人等於西華門外瞻覲。○定河員距原籍三百里外無庸迴避。外諭前經降旨令河員一體迴避原籍。旋據總河嵇璜奏請將河南山東兩省河工人員彼此酌量調補。吏部議覆欲俟直隸江南一併詳查。咨明到部再為通行。覈議。朕意各該省河工員數多寡既不能適均。即酌量對調。亦難於恰當。而其中酌調江

南河員一節。視他省尤不免更費周章。蓋南河額缺本繁。若撥往北省。惟河南山東毗連各處情形。猶不甚懸。至以直隸工務相較。南北不同。辦理轉恐未能妥協。因思此等人員。專管河工。原非地方有司。經理民事者可比。但不至近隣鄉里。與親故難以避嫌。其於職守官方。原無隔礙。嗣後凡河工同知以下各員。有官居本省而距家在三百里以外者。俱准其毋庸迴避。如此。則工員不致移調紛繁。

而河務益可駕輕就熟。實為一舉兩得。著各該督等。即遵旨妥協籌辦。具摺奏聞。○又諭曰。普福奏兩淮各商等急公念切。呈請捐銀一百萬兩。解交內務府以供賞賚。不敢仰邀議敘等語。前經該鹽政據情入告。並未允行。今復據普福面奏。該商等復環籲轉奏。情詞懇切。因念該商等感恩抒悃。既屬實情。且兩淮各商人多引裕。較他處情形不同。著准其所請。不必解交內務府。現在滇省辦理軍需。

著該鹽政將此項銀兩動支公項解送雲南備用。該商等仍交部議敘。至此外各處物力非兩淮可比。倘有聞風援請者。斷不准行。該鹽政等亦毋得瀆奏。○諭軍機大臣等。大兵進剿緬匪。所有軍需。皆係鄂寧籌辦。前經飭發帑金六百萬兩。解交該省備用軍餉。現在已用若干。是否足敷撥給。該撫經理以來。作何部署。覈定章程。雖將來自必按例報部覈銷。但目下情形若何。該撫未經奏及。著傳諭

鄂寧。即行確實查明覆奏。尋奏。發到帑金六百萬兩。自上年七月至今。用銀二百五萬有餘。存貯銀三百九十四萬餘兩。查錫箔猛密兩路軍餉。及內地臺站各項。每月約計不過二十萬兩。實屬充裕。報聞。○裁浙江溫州府司獄。改設樂清縣磐石巡檢。從巡撫熊學鵬請也。○壬午。諭軍機大臣等。前據佛德奏。稱木邦南境有茂隆銀廠。凡行廠事件。及廠委文稟。例由鎮康土知州轉送。經由木邦等語。

當經降旨詢問鄂寧。今據覆奏。該廠文移向來自永昌起程。計十二站。所過地方。別有程站。並不經由木邦。佛德所奏。實屬訛錯。該員曾任永昌府知府。於該處情形。自宜熟悉。何以其言舛錯至此。著將鄂寧原摺鈔寄吳達善。令其傳諭佛德。詳悉閱看。明白回奏。尋奏。傳旨詢問佛德。並令將鄂寧摺閱看。該員始悉茂隆廠在滾弄江以內。木邦在江以外。前面奏行廠事件。經由木邦。實係錯訛。報聞。○

定受業師生迴避例。吏部議覆廣東布政使胡文伯奏。鄉會試考官取中之人。適為上司下屬。或迴避另補。或咨部存案。定例綦嚴。惟受業師生。向無其例。查受業師生情誼較鄉會師生尤為親切。自應一體照辦。應如該布政使所奏。嗣後外任官員。受業之人。為上司而業師為屬員。令官小者迴避。業師為督撫司道。受業為屬員者。分別報部存案。遇有舉劾。隨本聲明。至知府直隸州知州與所屬州

縣刑名錢穀盤查尤關緊要。業師為知府直隸州知州。受業為屬員。亦令官小者迴避。著該督撫於現任別府州縣內酌調。若在部月選出缺。有受業師生應迴避者。令該員於過堂時呈明。以別缺掣補。隱匿不報。及捏稱師生希圖規避者。議處從之。○癸未。浙江黃巖鎮總兵黃士俊病休。以廣東香山山水師副將林國彩為黃巖鎮總兵。○甲申。諭昨據鄂寧奏進剿緬匪在途脫逃兵丁。有自行投首者。請發給烏魯木齊等處種地兵丁為奴一摺。其為寬縱失當殊出意料之外。已於摺內詳悉批飭矣。鄂寧自簡任巡撫以來。諸事尚知竭力整頓。從未有如此錯誤者。滇省綠營兵弁恒怯已成痼習。非大加懲創。無以振刷頹風。前此鄂寶奏報黔省餘丁脫逃。尚應按律正法。何況身隸綠營正兵。又當入隊出征之際。敢於藐視軍紀。若是。若因一經投首。遽免其死。是該犯等前因貪生而不肯冒瘴衝鋒。

後復以畏死而詭為束身自首。使怯懦之徒始終售其巧計。而國法不得一伸。為督撫者倘更從而曲貸之。將劣兵等輾轉效尤。非導之使為不逞乎。況現在新疆屯收有資已成樂土。名為遣發。實獲安生。揆之情法。豈可謂平。從前明瑞未即嚴查奏辦。已屬非是。且將來大兵功成奏凱時。明瑞自不能久駐滇中。一切督理營伍。正係鄂寧專責。此時所以力為執法懲一儆百者。正為該撫將來永靖邊疆計耳。倘存姑息從事之見。無論於弁兵習氣無裨。即於該撫職守庸有益乎。鄂寧著傳旨嚴行申飭。再從前隨營脫逃兵丁。自應查有確數。現在正法者幾人。其未經拏獲者仍有若干名。著鄂寧即行查奏。一面上緊嚴拏。倘不實力躡緝。任其倖逃。法網則惟鄂寧是問。仍著明白回奏。○乙酉。孝莊文皇后忌辰。遣官祭昭西陵。○

上詣

皇太后宮問安。○諭據方觀承奏。霸州披甲阿林在典鋪闖毆滋事。該管官員曲為袒護。難以定案。請解交刑部審理等語。駐防兵丁與典鋪押當啟釁肆毆。該管章京領催等。已難辭約束不嚴之咎。何得上下通同串捏迴護。以致地方官礙難定案。此風斷不可長。著將防禦西蘭泰。驍騎校安泰及常德等革職。與案內有名犯證一併交與方觀承研究確情。

秉公定擬具奏。○是日起。

上以歲暮裕祭

太廟齋戒三日。○丙戌。諭前據都察院奏。安邱縣民人谷顯控告韓汝英捏契誣良及該縣刑逼刻命一案。當經派刑部司員前往會同該撫查訊。茲據李清時等奏。前任安邱縣知縣馮履謙於韓汝英捏契呈控之處。並不虛心研鞫。輒將谷德掌嘴以致自刎。益都縣知縣張述孔奉委審理。聽從說和調停。希冀將

就結案。請革職審擬等語。馮履謙張述孔俱著革職。交李清時等與案內有名人犯一併嚴審定擬具奏。○諭軍機大臣等。李清時拏獲改發烟瘴之中途脫逃。遣犯馮五。據供與同案軍犯賈二。馮七。遞至江西建昌縣一同脫逃。潛至江南地方。與賈二。馮七分路。獨自逃回原籍。經陵縣知縣訪聞拏獲。正法等語。此案遣犯在江西地方脫逃。雖據該撫奏聞。而既已逃至江南。追遘自非一日。該地方官何以漫無聞見。至今要犯潛蹤久而不獲。則平日所為編查保甲。又屬何事。此時二犯或尚藏匿該省。亦未可定。著傳諭高晉。速飭各屬嚴密躡緝。務獲毋得僅以通緝了事。○丁亥。以歲暮裕祭。遣官祭

太廟中殿

後殿。○諭據值年旗奏。稱嗣後莊浪河南等處城守尉缺出。請將健銳營火器營護軍叅領一併揀選引見等語。健銳營火器營護軍叅

領均係緊要員缺。補授城守尉。轉覺事簡身逸。況品級相同。並非陞階。所奏不准行。著仍照舊辦理。○諭軍機大臣等。據珠魯訥奏稱。明瑞於大疊江搭造橋梁。官兵俱飛渡深入。往來遞送事件。此橋最為緊要。前送事官兵。路遇賊匪劫掠。若不除去。恐誤軍報。隨派綠旗馬步兵五百名。護軍校前鋒護軍十名。令叅將守備等統領。於錫箔城江岸駐劄防守。等語。所辦甚合機宜。前朕降旨。明瑞大兵深入之後。當由駐劄木邦兵內。派兵設站遞送事件。今珠魯訥遣官兵防守橋梁。辦理甚是。但兵數尚少。今木邦已成腹地。事務無多。現駐兵四千餘名。若遣一二十人前往。令巴圖魯侍衛等統領。方為妥協。著傳諭珠魯訥遵照辦理。再遞送事件官兵。途次遇賊。或係賊匪知大兵深入。用計自側路而出。襲斷我兵之後。或係僻處竄伏。乘間劫掠。均未可定。珠魯訥宜多帶官兵。不時搜捕。並將明瑞隊內

事體若何之處。得信即速奏聞。○戊子。袷祭

太廟。

上親詣行禮。○遣官祭

永陵。

福陵。

昭陵。

昭西陵。

孝陵。

孝東陵。

景陵。

泰陵。○遣官祭

孝賢皇后陵。

端慧皇太子園寢。○遣官祭

太歲之神。○己丑。

上詣

皇太后宮問安。○御保和殿。筵宴朝正外藩。左

翼。科爾沁多羅扎薩克圖郡王納旺色布騰

多羅貝勒古穆扎布。鎮國公索諾木色楞輔

國公諾觀達喇和碩額駙敏珠爾多爾濟固
山額駙多爾濟瑚一等台吉喇特納二等台
吉巴勒珠爾三等台吉巴克巴扎布阿巴噶
多羅郡王烏布坦常忠固山貝子朋楚克浩
齊特多羅郡王達什喇布坦蘇尼特多羅都
梭郡王車凌多爾濟鄂爾多斯郡王品級多
羅貝勒棟囉布扎木素翁牛特多羅貝勒諾
爾布扎木素多羅額駙班珠爾二等台吉袞
布車布登阿巴哈納爾多羅貝勒達什敏珠

爾喀喇沁固山貝子多羅額駙扎拉豐阿輔
國公拉扎布溫都爾瑚固山額駙敦珠布色
布騰一等塔布囊達克丹扎魯特鎮國公納
遜額爾克圖敖漢輔國公多羅額駙桑濟扎
勒輔國公羅布藏錫喇布二等台吉巴勒珠
喇布坦巴林輔國公和碩額駙德勒克烏珠
穆沁輔國公敦多布色梭烏喇特輔國公恭
格喇布坦土默特和碩額駙納遜特古斯奈
曼固山額駙敦多布扎魯特一等台吉朋蘇

克右翼喀爾喀車臣汗車布登扎布多羅郡
王多羅額駙桑寨多爾濟多羅貝勒達克丹
多爾濟固山貝子敦多布多爾濟車布登多
爾濟貝子品級扎薩克一等台吉齊旺多爾
濟鎮國公雲丹輔國公德勒克多爾濟佛保
車凌多岳特拉旺多爾濟貢楚克達付扎薩
克一等台吉班第納旺伊付拜音珠爾車登
噶爾瑪扎布薩木丕勒喀喇沁多羅都梭郡
王喇特納錫第綽囉斯多羅郡王羅布扎回
子郡王品級貝勒霍集斯輔國公圖爾都額
色君扎薩克一等台吉瑪木特歸化城多羅
貝勒車木伯勒固山貝子羅布藏色布騰扎
薩克一等台吉吹忠扎布巴爾巴特厄魯特
固山貝子朋楚克浩齊特輔國公色布騰和
碩特扎薩克一等台吉特默齊及領侍衛內
大臣等召科爾沁多羅扎薩克圖郡王納旺
色布騰阿巴噶多羅郡王烏布坦常忠鄂爾
多斯郡王品級多羅貝勒棟囉布扎木素翁

牛特多羅貝勒諾爾布扎木素喀喇沁固山
貝子多羅額駙扎拉豐阿敦漢輔國公羅布
藏錫喇布多羅額駙桑濟扎勒巴林輔國公
和碩額駙德勒克喀爾喀車臣汗車布登扎
布多羅貝勒達克丹多爾濟喀喇沁多羅都
稜郡王喇特納錫第綽羅斯多羅郡王羅布
扎回子郡王品級貝勒霍集斯歸化城多羅
貝勒車木伯勒等至

御座前賜酒成禮○是月浙江提督段秀林奏

在浙服官由嚴州千總遞陞温州總兵前後
攜眷任所計四十餘年原籍陝西榆林縣並
無寸土乾隆三十年於温州任內在寧波府
城內買房一所住居眷屬原非鎮任所轄之
地今授提督統制全省形蹟未宜得旨既已
奏明一切秉公不涉嫌疑可也或有應調用
處亦未可知候旨而行○福建臺灣鎮總兵
王巍奏報到任日期並稱臺地民番雜處戡
匪安良諸惟實心實力辦理得旨覽奏俱悉

實心實力為之不可隨綠旗習氣徒事空言
也○河南布政使何燭奏請陛見得旨不必
來但莫自滿莫用聰明則得之矣○陝甘總
督吳達善奏巴里坤所屬穆壘地方可墾地
畝甚多前軍機處議准於安西肅州等屬招
募無業貧民安插該處耕種業經節次派往
但該處地勢曠濶須民人認墾方得日漸開
闢現據巴里坤鎮臣德昌報有奇臺商民芮
友等三十名呈稱穆壘地廣土肥情願開渠

引水認墾荒地並自購籽種牛隻農具查該
商民等攜貲貿易係有工本之人請飭巴里
坤鎮臣給予執照令其認墾耕種仍與派撥
戶民一體安插得旨嘉獎○兩廣總督李侍
堯奏餘丁拔補守兵實為士卒進身之始定
例各省標協營伍將各兵有無子弟確查註
冊遇有糧缺驗明年力強壯者頂補無合式
餘丁始行另募原以兵丁子弟披堅執銳既
屬世業步伐止齊素亦目染立法最善近來

緣營將領每遇守糧缺出。置兵丁子弟不補。往往以外來無藉。或曾在別營充伍革退更。名人頂補。殊失整飭營伍之意。除密查叅究外。先將臣標六營驗明各兵名下餘丁。實係親子弟者共一千二百餘名。以現今覈定堪補之丁。備每年守糧出缺之數。足用十餘載。可見各營濫募。並非餘丁乏人。已移行東西兩省。各標鎮協營。飭令將領大員。悉依臣標例照辦。並令先將驗實餘丁冊報。俟查閱營伍時驗補。得旨嘉獎。○雲南巡撫鄧寧奏。大兵出境。自宛頂至木邦七站。各該臺馳遞文報。木邦以外。不能安臺。即用駐劄木邦馬兵遞送。至猛密一路。大兵自虎踞關出境。境外亦難安臺。已派兵駐劄該關。接遞軍報。至軍營需用火藥鉛彈。已從杉木籠存貯內運送。杉木籠應補項。即於永昌備貯內解撥。採買各土司米石。陸續運至虎踞關。並撥永昌留養馬委員轉運。得旨覽。此應早辦。早奏。以慰

朕心。繫望之事。殊屬遲緩矣。今既經設臺。仍應督催速遞。一切軍報。毋致延緩。○又奏。軍行沿途齎糧。屢接明瑞札。大兵連次克捷。均獲米糧。惟木邦連年蹂躪。多未耕種。臣將採買米石運往屯貯備運。至普洱九龍江邊境。雖俱寧靜。但賊匪遁伏。未淨根株。須兵克阿瓦城。始可以次掃除。得旨明瑞一路。竟可不以糧為慮。實屬大幸。又批。伊內顧不暇。何能更肆搶掠。又批。既得阿瓦。此甚易事。當權輕重。壯我兵威。為是。○是年。追予烏什等處出師陣亡之侍衛瑚雅克圖等五員。護軍校六十九員。前鋒校額勒渾等三員。藍翎長卓靈阿一員。把總李友普等五員。護軍披甲馬步兵等四十九名。祭塋卹賞如例。俱入祀昭忠祠。○旌表孝子福建等省周相龍等三名。守節合例八旗滿洲第臣妻佟佳氏等八十。五口。蒙古五十三妻韓氏等十八口。漢軍劉維妻祁氏等十五口。內務府傅奇文妻馬氏

等七口盛京等省駐防五格妻舒舒覺羅氏
 等一百十五口直隸等省李洪倫妻王氏等
 三百零九口夫亡殉節江南等省王迪德妻
 裴氏等十一口未婚守志盛京等省才登魁
 聘妻崔氏等十三口百歲壽民婦福建等省
 甘靖等十五名口各給銀建坊如例○一產
 三男直隸等省安平縣民李保玉妻夏氏等
 五家○會計天下民穀數各省通共大小男
 婦二萬九百八十三萬九千五百四十六名
 口各省通共存倉米穀三千八百六十一萬
 九千二百二十四石七斗五升九合四勺

大清高宗法天隆運至誠先覺體元立極敷文
 奮武孝慈神聖純皇帝實錄卷之八百一

大清高宗法天隆運至誠先覺體元立極敷文奮武孝慈神聖純皇帝實錄卷之八百二

纂修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲副都統副都統加七級隨帶加二級尋常功紀錄次日慶莊

總裁官經筵講官太子太傅文華殿大學士文淵閣領事稽察欽奉 上諭事件處管理刑部戶部三庫事務

世襲副都統副都統加九級隨帶加二級又加二級且童語內大臣戶部尚書鑲藍旗滿洲都統軍功紀錄五次

尋常紀錄十四次且德興經筵講官太子少保工部尚書紀錄六次且曹振鏞等奉

敕修

乾隆三十三年戊子春正月庚寅朔

上詣

奉先殿行禮○詣

堂子行禮○率王以下文武大臣詣

壽康宮慶賀

皇太后禮成御太和殿受朝作樂宣表如儀○詣

大高殿

壽皇殿行禮○遣官祭

太廟後殿○御乾清宮賜宗室王公等宴○辛

卯

上詣

皇太后宮問安○諭上年湖北省黃梅等十三

州縣並屯坐各州縣之武昌等七衛夏秋間

被水災業經該督等照例分別撫卹加賑惟

念停賑之後即值青黃不接之時貧民口食

不無拮据著加恩將被災較重之黃梅廣濟

黃岡漢陽漢川五縣及屯坐各縣之武昌武

左黃州蘄州四衛并蘄州衛屯坐江南宿松

黃梅等十三

州

江西德化瑞昌三縣地方無論極貧次貧軍

民概行加賑一個月其黃梅等州縣上年應

徵錢糧雖已分別蠲緩所有乾隆二十九年

被水以後未完帶徵錢糧及領借籽種口糧

若仍按限徵追尚恐積歉之區輸將無力並

著加恩統緩至本年秋收豐稔後再行帶徵

該督撫等其督率所屬實力奉行務使災黎

均霑實惠該部即遵諭行○又諭上年江西

省南昌等一十三縣偶被偏災業經降旨該

撫等照例賑卹今念賑期已竣正值青黃不接之候貧民口食未免拮据著加恩將南昌新建進賢鄱陽餘干星子建昌德化德安等九縣被災七八九十分之極貧與被災九十分之次貧各加賑兩個月被災七八九十分之次貧加賑一個月其湖口彭澤瑞昌都昌四縣低田偶遇偏災情形較輕所有被災七八九十分之極貧及被災九十分之次貧各加賑一個月該撫等其督率所屬實心經理務俾

實錄卷八十八

上

窮黎均霑實惠毋致稍有失所該部遵諭速行○將軍管雲貴總督明瑞奏自大疊江進兵於十一月二十七日勦殺賊匪五百餘人次日遇伏復殺賊四十餘人生擒四人二十九日兵抵蠻結賊由密林內突出我兵盡力勦殺賊匪敗回斃賊二百餘人臣親登山瞭望見賊匪甚多所設十六寨俱屬險要密林之內隱約見有埋伏又見排有象陣不但山勢峻險兼深林密箐並無可通之路設法挑

誘終不出戰因與諸大臣各侍衛官員商議先破其中堅餘寨自不能據守於十二月初二日分隊前進時值大霧我兵衝擊木寨賊匪施放鎗礮臣等俱在兵弁之前首先追擊人人奮勇用鎗刀砍傷象隻象即倒奔衝突賊匪不支紛紛敗竄我兵衝冒鎗礮盡力攻擊甚至彼此抱持以手相搏賊人不及施放鎗礮但隔木寨用鎗刀砍戳並拋擲火毯我兵力戰不退奮身直入木寨先係扎拉豐阿

攻得一處臣明瑞續攻得一處觀音保亦攻得一處至晚賊復來奪我兵奮力擊殺相持至二更時所有埋伏賊人及他處防守各匪俱棄寨奔逸我兵進勦搜拏地方俱已廓清計殺賊二千餘人報聞○又奏攻寨打仗時有貴州藤牌兵王連進抵第二寨攀柵直上飛身躍入於數百賊中縱橫砍殺十餘人以致頭帶刀傷仍拔毀柵木接應衆兵我兵乃得蜂擁而進請加優獎得旨王連著即賞給

遊擊仍給花鉗○又奏此次攻奪木寨臣審度情形不得不身先行列不意臨陣時右眼眶被有鎗傷臣毫無因乏惟稍覺頭暈看字費力以致奏報稍遲伏思統領戎務不應輕身冒險請交部議罪以為領兵重臣不能持重者戒得旨何忍治卿之罪以後稍為留意可耳○又奏臣由蠻結進兵行至隔弄山相近天生橋渡口係有名險隘聞從前鬼家部落宮裏雁曾將數百名堅守此地緬匪數萬皆不能過臣因遣官兵偵視據稱天生橋乃隔弄山中斷之處下有河一道其勢險急兩岸石峯高出二三里峯上盤曲小徑只容一人行走其橋係天生一片大石賊人將兩旁舊有幫植大木俱行拔毀不但乘騎不能過渡即步行亦難詢之通事民人馬必興告稱往北有小路可以繞過遂令達興阿帶兵二千名仍留大路作奪取渡口之勢臣等帶兵進至河水發源處水雖不深而湍流甚急臣

等催趲兵丁於十二月初十日俱行渡河先將山梁占據是日拏獲三賊訊稱賊眾以大兵但知大路是以加緊防守至此地水源渡口雖立兩木柵尚未撥人看守忽聞大兵已渡賊各驚惶逃赴宋賽等語臣等已過奇險之地惟有協力勦賊以成大功報聞○署貴州巡撫良卿覆奏黔省脫逃餘丁楊明龍等六犯遵旨嚴行監禁復據普安州等屬續獲丁明亮等八名又盤獲私回餘丁張文貴等十名其餘未獲各犯飭屬設法躡緝得旨上緊緝獲與汝三月限限滿奏聞若已獲者復致逃則看守者當代其罪將此諭各屬○壬辰諭上年上下兩江沿江各州縣因江水稍大間有淹浸業經疊降諭旨撫賑兼施惟念賑竣之後去麥秋尚遠貧民口食未免拮据著加恩將下江所屬之上元江寧江浦六合句容溧水高淳丹徒金壇溧陽儀徵等十一縣并揚州衛上江所屬之懷寧桐城宿松望

江貴池東流銅陵當塗蕪湖繁昌無為和州
含山十三州縣并安慶建陽廬州三衛被災
七八分者無論極次貧民均加賑一個月其
被災九分十分者極貧加賑兩個月次貧加
賑一個月用資接濟該督撫等其董率各屬
實心經理俾得均霑惠澤以副朕軫念窮黎
至意該部遵諭速行○又諭據明瑞奏報現
在進剿緬夷已過蠻結地方官兵奮勇攻擊
連破賊壘十六座殺賊二千有餘賊匪喪膽

竄逸等語明瑞秉性純誠才優幹濟前者西
陲之役每身先士卒効績宣猷昨歲自伊犁
來京陛見方值緬酋滋事前督臣調度失宜
因令節制雲貴並授為將軍領兵進剿自任
事以來凡辦理軍營諸務均能悉心籌畫動
合機宜近自木邦整隊深入於白小地方統
衆毀柵今行次蠻結復親冒矢石殲賊因糧
摧堅陷銳以致目受鎗傷猶鼓勇直前克揚
我武自此首衆望風驚潰刻日直搗賊巢佇

聞捷奏朕心深為嘉慰明瑞現在所襲之公
係承恩世爵今既屢著殊績自應特沛恩施
用示優異明瑞著授為一等誠嘉毅勇公賞
給黃帶子紅寶石頂四團龍補服服用所有
原襲承恩公著伊弟奎林承襲並將原摺鈔
發俾中外知之○又諭據額勒登額等奏稱
副都統伊柱染患傷寒身故總兵官王玉廷
從前攻取賊城左腿受有烏鎗傷今傷發身
故等語伊柱此次進剿緬匪捉生對敵俱屬

奮勉今患病身故王玉廷因傷發身故伊等
雖非陣亡但俱奮勇打仗受傷身故實屬可
憫著加恩將伊柱王玉廷交該部照陣亡之
例議卹○諭軍機大臣等此次明瑞身先士
卒奮勇直前大臣侍衛及綠營兵丁亦屬奮
勉宜沛恩施扎拉豐阿著賞給都統銜烏三
泰音濟圖德爾森保玉魯斯齊哩克齊均著
賞給副都統銜德爾森保齊哩克齊前在西
路軍營業經賞給巴圖魯名號音濟圖著賞

哈布台巴圖魯玉魯斯賞烏克台巴圖魯副將本進忠賞法式善巴圖魯併賞戴花翎藤牌步兵王連已有旨賞授遊擊賞戴花翎並著賞奇成額巴圖魯額魯特馬甲庫克新授為藍翎侍衛賞克圖爾克依巴圖魯獎賞花翎索倫藍翎侍衛三保前鋒校圖欽保俱授為三等侍衛獎賞藍翎委前鋒校立保住委護軍校倭星額豐昇額額魯特驍騎校瑪察克前鋒六十一護軍和倫額魯特領催諾爾布三都布把總韓朝吉俱授為藍翎侍衛先渡河之額魯特一名亦著賞戴藍翎仍賞三保綽克托巴圖魯圖欽保法富哩巴圖魯立保住賽尚阿巴圖魯豐昇額伊勒圖巴圖魯倭星額噶克察巴圖魯六十一格綳額巴圖魯和倫多克新巴圖魯瑪察克哈什哈巴圖魯諾爾布三都布鄂摩克巴圖魯韓朝吉景文巴圖魯引路之額魯特一名霍碩齊巴圖魯馬必興伊濟斯歡巴圖魯照例每人各賞

銀一百兩其餘出力陣亡得傷官兵著明瑞查明交部議敘議卹發去花翎二十支藍翎四十支交明瑞酌量獎賞出力官兵○又諭據額勒登額奏稱帶兵圍攻老官屯木城賊人死守不出孟連壩速帕等處賊匪若在旱塔馬脖子要隘處所紮寨必致分我兵勢因移兵旱塔擊退襲後賊匪賊皆藏匿木城因馬牌子山不可令賊占據先派綠營兵三百沙練兵三百至馬牌子山於通新街銅壁鐵壁等關各要隘建立卡座令可固守復調取虎踞關杉木籠等處兵丁如此數處兵少另於騰越永昌酌量添撥已移咨鄂寧等語額勒登額此奏甚不明晰伊等或仍由老官屯一路前進或由別路前進並未明白陳奏儻仍欲由老官屯進兵現賊固守不出伊等已撤兵在旱塔駐守如何能進儻欲由別路進兵伊等並未籌及可以進兵之路惟思在旱塔馬牌子山固守豈有固守即能勦賊之理

額勒登額等前往老官屯。惟欲攻賊木城曠日持久。徒勞兵力。已屬無能。今尚不另籌破賊之計。更屬錯謬。著傳諭額勒登額。如勦辦賊匪。已過老官屯。即整頓兵威。由猛密一路直抵阿瓦城。儘尚在旱塔駐守。即捨老官屯。帶兵探聽明瑞一路。接應前進。再據奏稱有上年投誠賞以六品頂帶之擺夷頭人線官猛帶兵三百名。來營効力等語。此等擺夷宜多為招撫。安插軍行所過。就各村莊覓購糧石。甚有裨益。若查明並非土司擺夷。即係緬匪種類。沿途勦辦。既可多得糧石。復省內地解運之煩。額勒登額等宜盡心籌辦。並傳諭明瑞知之。○又諭據額勒登額奏老官屯木砦現在尚未攻破。擬於旱塔駐兵。分派官兵駐守馬脖子山。及鐵壁等關隘口等語。昨經明瑞等奏報大兵於蠻結地方奮勇擊破木砦十六座。殺賊二千有餘。所獲糧械甚夥。並渡天生橋險隘要害。賊衆膽落驚潰。現在平

定阿瓦則老官屯等處可以不戰自戢。緬酋何暇分兵侵軼西邊一路。但此時老官屯既不便久駐圍攻。坐需時日。而額勒登額等現已降旨令其從旱塔波竜前往與明瑞合軍。會同進勦。自此聯絡聲援。軍威倍增。壯盛其鐵壁等關沿邊一帶。或有賊匪乘虛窺伺。亦不可不留心防範。騰越州現有駐守官兵足敷調用。著鄂寧即速簡派壯健兵丁量度應行防範各處分布駐守。保護軍臺。脫有賊匪侵擾。務期力為勦創。庶為有備無患。總之明瑞等均已領兵前進。其內地一切堵禦機宜。自即係鄂寧專責。至額勒登額等奏稱軍士糧石無多。請於騰越州撥給一月口糧等語。前此明瑞進兵。並無續運糧儲之事。但額勒登額既經以此奏請。並著鄂寧一併選派弁員酌量運送接濟。以裕軍食。毋致疎虞。該撫務宜悉心籌畫。妥協經理。仍一面奏聞。將此傳諭知之。○以四川永寧協副將本進忠為

雲南臨元鎮總兵○癸巳諭前因進勦緬匪官兵所過各省一切例支正項外所有夫馬運送不無或需民力且據河南湖廣等省查奏俱有各州縣公同協濟之事聞閭急公踴躍固屬可嘉而朕之本意則不肯使一絲一粟有累民也當即傳諭各該督撫令將各屬實需民力若干奏聞候朕加恩今據貴州巡撫良卿奏稱民間所用夫馬銀數多寡參差無從覈數聞呈等語不獨辦理模稜且於飭

屬安民之本義大相刺謬地方偶遇辦差供頓悉支官帑其正款不能賅備之處即些微有資民力亦當官為檢覈使出納多寡一一按籍可稽則官吏無由滋擾而小民得以霑恩其法實為盡善若督撫大吏猥以此等款項悉由鄉保人等自行措辦遂爾置之不問上司首倡下屬效尤民瘼將何所仰賴在州縣官潔己自愛者已難概見下此如吏役等因無憑察覈藉端滋弊且又何所不至耶良

卿由布政使署理巡撫於此等事務豈得諉為不知思以顯預了事鄂寶調任未久曾經承辦此事亦竟漫無稽覈著一併交部嚴加議處貴州民苗急公効力之處俟朕酌量加恩先將此通諭知之尋議良卿鄂寶均應照不行確查具題降調例降三級調用得旨良卿鄂寶俱著革職從寬留任○諭軍機大臣等前因官兵經過地方一切動支正項外所有夫馬運送不無稍資民力降旨各該督撫令將所屬實在協濟銀數若干具摺速奏候朕酌量加恩隨據定長阿思哈已將實數詳覈奏聞而良卿則以不能覈算實數為辭顯預覆奏甚屬非是已於摺內批飭並將該撫等交部嚴加議處矣官兵經過各省除雲南距京稍遠或因軍務倥傯未及即行覈定猶屬事所應有至直隸湖南等省軍行早經過境何以遲遲至今尚未查奏著傳諭方觀承方世儒即將通省添派協濟實數悉心詳查

具摺速奏。儻因有此番傳諭詢問。或謂其中些須幫貼細數。實在難以確覈。藉此却責了事。則甘蹈欺罔。有鄂寶良卿之例在著。即行傳諭知之。○甲午享

太廟。遣誠親王允祕恭代行禮。○遣官祭太歲之神。○

上奉

皇太后幸重華宮侍宴。○湖廣總督定長覆奏官兵經過湖北一切經費。俱係地方印官及

遴委各州縣協辦。並未動用民力。惟馬騾一項。湖北計設八臺。約備九千六百餘頭。除准銷一萬二千餘兩外。實用民間幫貼銀五萬五千二百餘兩。又各站牽馬人夫口糧及荆襄二江船戶工食。除准銷一千九百餘兩外。實用民力三千八百餘兩。得旨。俟到齊有恩旨。○乙未

上詣

皇太后宮問安。○御紫光閣賜蒙古王公台吉

及回部郡王等宴。○召大學士及內廷翰林等茶宴。以三清茶聯句。○浙江巡撫熊學鵬奏溫州府所轄永嘉長林雙穗三場分隸永嘉樂清瑞安平陽四縣。丁竈三千餘戶。男婦二萬數千人。向遇市米昂貴。即赴省城鹽義倉請借銀兩買穀運往。但距省千有餘里。難以剋期接濟。請於鹽義倉項下劃銀二萬兩。交四縣買穀存貯府城倉內。不惟可以接濟三場。即鄰近之處州府亦可隨時撥濟得旨。

嘉獎。○丙申

世祖章皇帝忌辰遣官祭

孝陵。○諭軍機大臣等。鄂寧覆奏運送兵糧摺內。既稱普洱邊境及九龍江俱無賊匪。又稱佟國英等於小猛養要區帶領官兵土練嚴防等語。看來該撫不無旁慮。却顧遇事防範之意。已於摺內詳悉批示。現在大兵聲罪致討。專務直搗阿瓦城。緬匪巢穴。既傾賊衆。自然解體。方且內顧不暇。豈能轉向近邊內地。

更肆搶掠此時若一一抽撥備禦使我兵力徒分於軍行殊屬無益前已降旨該撫令將各處防兵酌量前進以助聲援想伊尚未接到是以尚有此奏耳其實現在所重惟邊外新設臺站應悉力防護以便遞送往來文報而運解軍糧衛送亦必須得人二者最關緊要明瑞如即勘定阿瓦城則各處自無庸另辦如尚稍需時日不但木邦一帶應令併力接應即普洱邊外防守之兵亦宜委員督率以次前進俾軍勢倍加壯盛斯為扼要之策約計明瑞已前抵阿瓦鄂寧可明體朕意妥協籌辦仍俟軍臺之便一併傳諭明瑞珠魯訥知之○又諭據鄂寧奏黔省脫逃餘丁現在兩省關會嚴緝至滇省召募餘丁並無報有脫逃之事等語滇省餘丁雖無脫逃而隨征之正兵轉多逃逸是綠旗漫無紀律自應重懲示儆鄂寧前奏將逃回自首之正兵改發烏魯木齊之處甚屬疎縱不合事理昨已

降旨嚴飭並令將在逃之兵上緊緝拏毋致漏網現在曾否拏獲若干著再傳諭鄂寧即速據實具奏○命刑部尚書楊廷璋入覲閩浙總督蘇昌俱在紫禁城內騎馬○丁酉上詣大高殿行禮○奉皇太后居長春仙館○詣安佑宮行禮○辛酉明園○諭軍機大臣等朕因明瑞等帶兵襲取賊巢若能犂庭掃穴甚善儻賊恃其城堅死守不戰我兵攻城不得軍糧稍有不繼則與其曠日圍攻不如徹回木邦另籌進取或欲急速竣事即添派滿兵亦可此朕因木邦以外道路不熟恐一時難於措置故有相機辦理之意今觀明瑞之兵已抵宋賽等處離阿瓦城不遠若復回駐木邦則前以兵力攻取地方又致棄捐賊知我兵退必復據寨固守我兵自宜於宋賽等處擇形勝之區聯絡結營再籌兵餉整師

勦辦著傳諭明瑞令其留意辦理○又諭據珠魯訥奏稱派遊擊福住遞送事件至將軍大營我兵未至宋賽之先賊已遠遁明瑞等現在探聽猛密一路進兵等語觀此則賊匪因大兵破其十六寨喪膽遠遁將軍明瑞在宋賽駐劄以俟額勒登額等之兵昨朕屢降諭旨令額勒登額不可執意攻取木城宜捨老官屯另往接應明瑞今將軍之兵已逼近阿瓦城額勒登額逗留早塔從前已經遲誤若再觀望周章不以接應明瑞大軍為事伊試自思能當此重咎乎著傳諭額勒登額令將何時由早塔起程現至何處速行奏聞○又諭據吳達善奏己丑年新疆貿易綱緞共應一萬二千五十疋請勅下三處織造照樣織辦等語此項緞疋為數既多自應先期製備以便解送甘省分運各處貿易著傳諭三處織造即照吳達善所開數目清單上緊織辦務期顏色鮮明質地厚重毋得草率從事

吳達善摺單俱著一併鈔寄○戊戌上還宮○諭目總兵王玉廷因帶兵進勦受傷身故業經降旨照陣亡之例賜卹念伊向在西路軍營著有勞績今復効力戎行因傷殞命非尋常出力者可比朕心深為憫惻著加恩照高天喜之例賞給伊子世職該部察例具奏○諭軍機大臣等據額勒登額奏稱伊等退至早塔後賊人潛出於林箐深處扎大寨七八座施放鎗礮固守不戰等語額勒登額等初至老官屯若果身先士卒攻取木城則老官屯得之已久既稱誘賊勦辦而賊出復不能勦反致賊人乘隙扎寨伊等並未設計討賊其前奏身先士卒攻取木城等語皆不可信明係退回早塔觀望而已著傳諭明瑞令伊於破阿瓦城後將額勒登額等所奏進兵情形及帶兵奮勉虛實之處留心詳查據實具奏不可稍存姑息瞻徇之意○是日起

上以祈穀於

上帝齋戒三日 己亥

御批歷代通鑑輯覽告成

御製序曰編年之書莫備於

皇祖御批之資治通鑑綱目蓋是書集三編為

一部自三皇以至元末明初振綱挈目謹予

嚴奪足以昭萬世法戒為人君者不可不日

手其帙而心其義也然

皇祖雖嘗挾精微徽辭旨著論百餘首亦惟析

疑正陋垂教後世耳於其書則一仍厥舊無

所筆削也故全書篇幅雖多而議論乃什倍

於事實即如前編之中總論史論音釋辨疑

考證紛不一家正編之中凡例發明書法考

異集覽考證正誤質實濫觴益甚至於續編

之作成於有明諸臣其時周禮沿尹起革例

作發明而廣義則出於張時泰敘劉友益書

法而為之者夫發明書法其於歷朝興革正

統偏安之際已不能得執中之論而況敘而

為之者哉且以本朝之臣而紀其開國之事
自不能不右本朝而左勝國此亦理之常也
況三編中嬗代崛起之際稱太祖而繫以我
者不一而足亦非體例也故命儒臣纂歷代
通鑑輯覽一書盡去歷朝臣各私其君之習
而歸之正自隆古以至本朝四千五百五十
九年事實編為一部全書於凡正統偏安天
命人心繫屬存亡必公必平惟嚴惟謹而無
所容心曲徇於其間觀是書者凜天命之無

常知統系之應守則所以教萬世之為君者
即所以教萬世之為臣者也書中批論一依
皇祖之例自述所見據事以書者十之三儒臣
擬批者十之七而經筆削塗乙者七之五即
用其語弗點竄者亦七之二云直隸總督
方觀承覆奏此次進勦緬匪兵差係循照從
前送兵章程在良鄉清苑正定順德設四大
站令附站數百里內州縣雇車輪送民間或
有車之戶幫貼受雇之車或按村按畝均派

公幫悉係自行經理官役並不經手今奉旨查覈計民間幫貼之費約銀一萬五千八百餘兩此外別無資用民力之處得旨俟到齊有旨○貴州巡撫鄂寶奏謝調任湖北恩得旨亦以汝不能獨當一面當知慚愧而加勉○庚子

上詣

南郊齋宮齋宿○諭朕於二月初五日舉行經筵所有應行典禮著各該衙門照例豫備○

調山西巡撫彰寶為山東巡撫以江蘇布政使蘇爾德為山西巡撫調廣東布政使胡文伯為江蘇布政使以浙江按察使歐陽永禔為廣東布政使○辛丑祈穀於

上帝

上親詣行禮○詣長春仙館問

皇太后安○幸圓明園○諭軍機大臣等前據彰寶奏鹽政達色勒派商人並需索餽送一案業遣四達馳驛前往會同該撫秉公查訊

迄今兩旬有餘未據審明奏覆現在彰寶已降旨調任山東巡撫著該撫等速將此案研審明確定擬具奏彰寶即一面來京請訓前赴新任所有山西巡撫印務著富明安護理可將此傳諭知之○又諭據珠魯訥奏稱木邦附近林箐溝澗中恐尚有藏匿賊匪今若領兵前進木邦存兵無幾恐有意外之虞新調驛馬已從永昌起程俟此項馬匹到時酌派官兵整威前進等語看來木邦現無藏匿

賊匪原不須多兵屯駐況明瑞已經帶兵深入接應極為緊要珠魯訥即未奉朕指示諭旨亦宜即在木邦官兵內酌量揀選督領進發乃珠魯訥之意以為木邦無事伊責已塞並不思接應明瑞僅有疎虞珠魯訥能當此咎乎珠魯訥如此拘泥不往援應明瑞甚屬不堪著傳諭珠魯訥令其遵朕前降諭旨迅速派兵帶往如再推委貽誤決不輕恕○雲南巡撫鄂寧奏駐防虎踞關副將孫爾桂回

至永昌據稱官兵十一月十一日到老官屯有緬賊拒守江邊木柵甚屬堅固官兵連日攻打均未得手賊黨漸增至數千人初九日領隊大臣額勒登額等差探新街猛密等處有賊窺伺欲襲我兵後路旱塔戶域等處即將官兵撤回旱塔旱塔離老官屯約四十餘里初十日賊亦出至旱塔在小河南岸立柵官兵在河北田壩內劄營十二日有騎象賊出柵官兵用礮轟擊賊即退回堅守不出二

十一日有賊數百由猛密一路衝出戶域截路叅將達桑阿帶兵將賊殺敗逃往新街一路等語查賊匪雖經殺退而新街路通鐵壁關內地防守益宜加嚴再接額勒登額等來咨自黃菓樹至虎踞關約一百六七十里其中尚須安臺并虎踞關亦應添兵駐守臣已撥兵分駐并飭各處將備勤加哨探實力嚴防得旨此皆不知軍務之言我兩路大軍之進為勦賊乎為防賊乎如深入得其阿瓦則

此散寇不勦而自服即如防邊不過汝地方之事即有賊闖入亦非大事若處處防邊則誰為進勦之兵汝不將額勒登額譚五格之逗遛無能查叅而反聽其言處處增添防兵守地方成何事體今明瑞已懸軍深入而額勒登額等祇以守地為辭不繼進其罪已不可問而汝亦可謂不知事體輕重矣又批此奏大非鄂爾泰之子口中所宜出者急宜猛省不可模稜聽漢幕賓庸懦無能輩之言也

又奏查普洱九龍江等處賊匪自逃遁後夥黨未必解散且外境道路叢雜占踞何所未知的實而自普洱至阿瓦路程遙遠若將防兵前進恐中途或致梗阻現在明瑞大兵已抵宋賽此時自必攻克阿瓦其普洱防兵應暫且仍前駐守得旨爾等總以各守地方為重不以接應大兵深入為念但爾等已如此辦理鞭長莫及朕惟有靜俟天恩之佑明瑞成功耳諭軍機大臣等據鄂寧

奏查看額勒登額軍營情形及籌辦普洱邊境二摺其意專在各處分兵防守甚屬錯謬已於摺內詳悉批飭此次用兵原為直搗賊巢勦擒首首以伸國威而靖邊徼現在我軍深入如已攻得阿瓦則其餘零星賊黨勢成瓦解方且逃竄不暇焉敢闖入邊界此理本屬易曉今鄂寧惟以撥兵嚴防鐵壁虎踞等關為計不但兵力徒分於事無益且沿邊一帶千有餘里又安能處處分布周密如此措置則與楊應琚前此之調度乖張又何以異且以此等防守兵力彙集繼進以助明瑞聲援則我軍倍增壯盛自益望風膽落可以迅奏膚功乃計不出此但知職在守邊總總以備禦為事竟不顧明瑞業已懸軍深入鄂寧果能悉力欣助則明瑞功成之日鄂寧亦當並與酬庸倘明瑞或以後無兵眾接應稍有貽誤則鄂寧不獨無顏見朕又安能以邊防無失遂足保其首領乎至額勒登額等逗遛

旱塔不進鄂寧既遣孫爾桂前往查探孫爾桂回至永昌自必將額勒登額等不能振作情形詳悉告知鄂寧即應將額勒登額譚五格遷延誤事之處據實叅奏何得轉據伊等之言分兵四處防堵況朕意鄂寧聞額勒登額軍營信息必以伊等為不足任大事方將自請前往督辦庶不愧大學士鄂爾泰之子試問孫爾桂既可直抵旱塔一路鄂寧又有何艱阻而憚於一行乎顧惟信庸懦無能幕賓之言並不知事理之輕重且欲模稜了事大非朕委任之意亦殊玷其家聲鄂寧著傳旨嚴行申飭然不可因有此旨倉忙前進反誤永昌接應之事但將額勒登額軍營之情一切據實奏來或免罪譴耳況已有旨令明瑞嚴查軍營眾人耳目將來班師豈能瞞朕並將此傳諭珠魯訥知之○以江南河庫道曾曰理為浙江按察使○壬寅

上奉

皇太后幸山高水長至甲辰皆如之○諭軍機大臣等昨經降旨令彰寶會同四達速將鹽政達色一案查審完結即來京請訓前赴山東新任再歸化城商民控告浮徵稅課之事業經交與該撫會同審訊著傳諭彰寶等將此案亦即速行查審完竣再行來京○又諭昨據鄂寧奏額勒登額軍營情形並籌辦普洱邊境等摺全不知事理之輕重已降旨嚴行申飭今思鄂寧身親其事何以籌措荒唐

可笑若此實令人不解現據伊等摺奏明瑞於臘月十三日已到宋賽計至今將及一月自應直抵阿瓦此時懸軍深入其後如更得繼進之兵賊人見我聲威倍壯其勢豈不更易克捷乃該撫所總總過計者惟在分兵駐守保護邊境試思此次用兵本意原為直搗賊巢一舉集事並非徒為處處堵禦設防起見一俟阿瓦底定無論賊匪不暇擾我邊界即有零星匪黨未經淨盡沿邊一帶自有土

司等悉力抵禦無庸更費中朝兵力試思前此九龍江滋擾時賊衆尚不敢侵軼邊境此時大兵直入轉需如此張皇却顧耶若如鄂寧所奏胸中全無成算與楊應琚前此輕分兵力措置乖方又何以異且自普洱以至銅壁鐵壁等處袤延千有餘里此內間段隘口正復不少若每處各需駐兵數百積算即不下數千或至累萬豈不大耗兵力若能將此分駐之兵彙集續進其於聯絡應援掃穴擒

酋之策所得裨益更當何如鄂寧接到前諭固不得自行冒昧直前以致接應無人其一切軍務應即通盤酌定惟在厚集兵衆量度機宜以次前進俾大功剋日速成以副委任不得更扭於俗論自為掣肘坐致貽誤其現在究竟作何籌辦情形著即速據實奏聞將此傳諭知之○癸卯

上奉

皇太后幸同樂園侍早晚膳至丙辰皆如之○

御奉三無私殿賜皇子諸王等宴○甲辰

上詣

安佑宮行禮○御正大光明殿賜朝正外藩等
宴召科爾沁多羅扎薩克圖郡王納旺色布
騰喀喇沁多羅都稜郡王喇特納錫第固山
貝子多羅額駙扎拉豐阿鄂爾多斯郡王品
級多羅貝勒棟囉布扎木素翁牛特多羅達
爾漢貝勒諾爾布扎木素敖漢輔國公固山
額駙羅布藏錫喇布輔國公多羅額駙桑濟
扎勒巴林輔國公和碩額駙德勒克喀爾喀
車臣汗車布登扎布輔國公佛保巴林多羅
郡王巴圖阿巴噶多羅郡王鼐布坦常忠綽
囉斯多羅郡王羅布扎回子郡王品級多羅
貝勒霍集斯輔國公圖爾都青海多羅貝勒
車木伯勒等至御座前賜酒成禮

大清高宗法天隆運至誠先覺體元立極敷文
奮武孝慈神聖純皇帝實錄卷之八百二

大清高宗法天隆運至誠先覺體元立極敷文奮武孝慈神聖純皇帝實錄卷之八百三

敕修

乾隆三十三年戊子正月乙巳

上御正大光明殿賜大學士尚書等宴○諭西達等奏審訊達色派累商人墊償及收受贄儀門包各情節請旨解任一摺達色前在長蘆鹽政任內曾與商人往來交結經朕降旨掣回未加深究前此已屬漏網後復用為河東鹽政理應感恩悔過潔己奉公乃恬然不知悛改輒敢勒令商人買墊物件並索取餽送種種戕法其罪實無可貸達色著革職交四達等逐一嚴審按律定擬至運使吳雲從

前經達色招叅之時朕即以為其罪不至於革職或因意見向與鹽政齟齬致被叅劾是以僅令解任交彰寶會同查辦今覈其情形則吳雲從於達色婪索款蹟見聞已為確鑿伊並非不應奏事之員因何隱忍不發即以職係道員為解又何難直揭部科並據實詳明巡撫夫運使亦國家命官若鹽政無私自當聽其指令竭力辦公若鹽政有私即據實叅奏亦無不可若鹽政不尋釁則聽其徇私納賄而自託不知至鹽政叅已然後思報復朝廷亦何賴有此運使乎吳雲從直俟被叅以後始與知縣馮兆觀彼此串通將鹽政劣蹟具稟希圖中傷報復其居心立品實屬模稜無恥吳雲從之罪乃在於此吳雲從馮兆觀俱著革職與案內有名人等一併審擬具奏 新調四川布政使海明奏請陞見得旨且赴新任此非調遠蓋調要也一切勉之不可生疑 丙午諭據瓦爾達等奏稱盛京將

軍新柱於正月十四日病故等語新柱內廷行走年久今聞溘逝朕心深為軫惻著加恩賞銀一千兩辦理喪事應得卹典該部察例具奏○調福州將軍明福為盛京將軍以錦州副都統常在為福州將軍○丁未諭曰閩浙總督蘇昌自簡任封疆以來老成謹恪宣力有年茲以陞見來京患疾溘逝深為憫惻所有應得卹典著該部察例具奏○又諭曰將軍公明瑞現在自宋賽統兵進剿其猛密

一路叅贊大臣雖已降旨令額勒登額補授但於督率調度未能勝任協辦大學士公阿里袞著前往雲南辦理軍營策應機宜即授為叅贊大臣所有隨帶人員俱著一體馳驛○又諭曰索柱前於總兵任內經總督明瑞等委勘杉木籠黃林崗等處情形並未親身前往飾詞欺詐已干律令後從寬僅予革職令其仍在軍前効力自當倍知感激奮勉贖罪乃據珠魯訥奏派令索柱前往安臺伊帶

兵千人一遇賊匪不即鼓勇迎勦轉自棄要隘輒行退回畏葸貽誤莫此為甚已令珠魯訥嚴行審訊治罪索柱之子並著拏交刑部監禁○諭軍機大臣等據珠魯訥奏稱原任總兵索柱等防守錫箔橋有賊千餘拒戰二日被賊占據橋梁等語著傳諭額勒登額令其尋路速通大營信息沿途殲勦以期肅清道路為將軍聲援至早塔馬牌子等處皆係新得地方儻復被賊占據則我兩路大兵均

難退出宜留雲南兵數千交譚五格防守額勒登額簡選貴州等處強壯綠營兵丁暨滿兵四五千名令滿兵在前遙發接應明瑞可也○又諭曰索柱甘心畏葸貽誤實屬大干軍律現今珠魯訥就近嚴訊治罪所有伊任所貲財著鄂寧嚴密查封至隨索柱前往之王棟身為叅將一同退縮情亦可惡著鄂寧查明王棟原籍何處將伊家產一併查抄其王棟之子并著一面監禁奏聞請旨將此傳

諭知之。以福建巡撫崔應階為閩浙總督。安徽布政使富尼漢為福建巡撫。安徽按察使陳輝祖為安徽布政使。○戊申諭曰：阿里衮現在出差，禮部尚書事務著觀保暫行署理。○又諭派出隨阿里衮前往雲南之乾清門侍衛烏爾袞、保塔瑪、索模克、偉托、納木扎舒、昌豐、盛額、鄂蘭等著各賞銀一百兩，馳驛前往。○諭軍機大臣等：現在明瑞自宋賽領兵深入，

據珠魯訥奏稱錫箔天生橋一帶臺站竟有賊匪攔截情事，其永昌至木邦一帶軍臺關係緊要，亦不可不悉心防範。鄂寧務須嚴密督查，俾聲息聯絡，毋誤接應。至木邦兵力現須加添，已經珠魯訥知會鄂寧，自必迅速籌辦。但滇省綠營兵弁，恒怯性成，如其中果能挑得勇往濟用之兵，自當撥赴木邦，以資驅遣。若仍有名無實，徒以選懦不堪者濫行充數於事，轉屬無益，則斷斷不可再據珠魯訥

奏索柱帶領安臺兵九百名於途次遇賊退至木邦止剩一百餘名等語。索柱所遇賊匪不過千餘，何至傷損七八百名之多？看來必係一經見賊即行望風逃竄，現在或散匿山谷，或轉從間道，竟潛回本籍，均未可定。現已降旨珠魯訥令其嚴密查拏鄂寧，亦即一面嚴飭各屬根緝，務獲盡法懲治，毋得稍有寬縱。再現有傳諭明瑞及珠魯訥旨，須迅速馳遞，今封寄鄂寧如永昌至木邦一路安靜無阻，仍由軍臺發往，僅附近木邦之處不無匪眾繞道滋事。鄂寧務須慎擇妥速，可任之人選帶兵弁防護，令其速往木邦交珠魯訥。再另揀妥員慎重轉送明瑞軍營，勿致延誤。將此一併傳諭知之。○又諭征勦緬匪與準夷回部情形不同，準夷生蠻抗拒，又逼近喀爾喀地方，回眾則初為準夷所困，自我平定伊犁釋放，霍集占伊不知感恩，反行戕害。使臣此皆不可寬貸者，是以朕決計勦滅，專派

大臣駐劄彈壓若緬甸係絕徼極邊部落即得其地斷無遣派大臣駐劄之理特以劉藻辦理不善楊應琚又復貪功輕進使賊勢猖狂驟難結局朕始派將軍大臣分路進討特欲揚天朝兵威使賊知懼並非必欲破阿瓦城也况緬地瘴盛我兵雖勇止能臨陣奮勉賊若堅守不戰亦無用武之地今自明瑞進兵以來連破堅寨想賊已經喪膽若果有畏懼情形理宜酌量辦理不可拘泥必破阿瓦城如準夷回部之例也儻賊不知懼竟有抗拒猖狂形狀則決不可輕恕○又諭進勦緬匪大兵業經深入儻一時不能速行勦滅自須暫行撤兵俟秋冬另進索倫達呼爾人甚悍勇打仗得力著傳諭富僧阿令於索倫達呼爾兵內選派一千名即令噶布舒豫備帶領俟再有諭旨即起程由京前往雲南○軍機大臣等議奏滇省進勦緬匪及大功告成凱旋時需馬甚多應豫撥解永昌沿途緩解

馬可不致傷殘到時如值緊急需用亦屬得力查西安荊州兩處駐防馬額甚寬請於荊州滿營內挑撥二千匹西安滿營內挑撥三千匹派員分起緩解永昌交鄂寧餵養備用其撥解缺額馬陸續購買補足報聞○兩江總督高晉奏江南省武鄉試向例與文場一體令上下兩江撫臣輪赴江寧辦理查武闈自外場以至揭曉數十日中殆無片刻之暇且兩撫臣分駐蘇州安慶距江寧皆數百里與他省撫臣駐劄本城者情形迥異巡撫遠來江寧隨帶書役文卷既多勞費一應刑錢案件又有不能兼顧之勢况內場雖由巡撫取中而外場仍須先行會同總督校閱請將江南武鄉試改歸總督主考毋庸巡撫遠赴江寧辦理得旨著照所請行○以江寧驛鹽道瞿善為安徽按察使○己酉諭昨歲大兵進勦緬匪所有經過各省儲侍供億一切動支帑藏絲毫不累閭閻第以沿途夫馬運送

不無稍資民力。疊經降旨，將滇省地丁及各土司應徵銀糧分別蠲免。復將湖南湖北貴州三省軍行所過地方錢糧全行緩徵，以示體恤。繼思各省民人感戴國恩，深明急公大義，踴躍効力，自當格外加恩，用示獎勵。因令各該督撫詳細確查將各屬軍行所需除正項開銷外，實在所資民力若干，覈明具奏。候朕酌量施恩。嗣據陸續奏到，惟阿思哈稱河南實數有八萬六千餘兩，而良卿則以貴州所有幫貼夫馬銀數多係鄉保措辦，地方官無從覈算，為辭意在顛預了事，甚屬非是。已經交部議處。後覽方觀承所奏，直屬所有幫銀亦數止一萬五千餘兩，恐亦事後約舉民車一項而言，尚非實數。於朕憂恤民隱，屏除弊端之本意，均未能實心體會也。在民人等既知殫心竭力，以佐軍行，其惻忱深有足嘉。則推恩亦倍當優渥。然所在有司必先於辦理之時，悉心察覈，使芻簷一絲一粟皆有細

數可稽。經理方為妥協。否則收令付之不知，胥役安得不因緣蠹蝕督撫置之不問。州縣又安保無恣意侵牟。將吏治奚以澄清。恩澤何由下究。耶著將直隸河南湖北湖南貴州等五省一例從優加賞於藩庫地糧銀內，每省給銀十萬兩，交各督撫酌量情形視其款項數目妥協分給。毋得草率模稜，致小民不得均霑實惠。至雲南一省，所有本年應徵地丁錢糧，其大兵所過之地及永昌府屬俱著全行蠲免。其非經過地方亦著蠲免十分之五。該督撫等務期實力飭屬詳慎妥辦，無令稍有影射滋弊。副朕廣沛殊恩，軫念羣黎至意。該部遵諭速行。○諭軍機大臣等現在降旨將軍行所過各省及雲南所屬分別加恩賞給銀兩蠲免錢糧，用示體恤。至沿邊一帶土司前此已經加恩，此次大兵進剿土司等有無出力及可否加恩之處，著傳諭鄂寧詳悉查明具奏。候朕再降諭旨。尋奏滇省沿邊

土司從前尚稱強勁近年疊經更換柔輟怯懦習與性成其所屬擺夷更為無用一聞賊信紛紛藏匿山菁永昌普洱用兵數載各土司土練未曾荷戈禦敵並無出力之處惟大兵進勦夷民擡送軍裝糧米尚堪供役俱已酌給運價勉其勤力報聞○雲南巡撫鄂寧奏正月初八日有叅贊大臣珠魯訥八百里加緊奏摺到永昌並無文移及摺底寄臣臣即將摺拆閱始知錫箔橋梁為賊占據查該處為將軍明瑞文報往來之路急須剋日奪回因思旱塔離木邦不過十餘站目今旱塔官兵不下八九千名既為緬賊據險固守不能前進似可留兵數千防守分兵數千里即接應木邦尚為捷近已札商額勒登額令其分別留防援應得旨所想亦是但有旨令額勒登額直進接應大軍不知此旨到否爾等再速為酌量將摺拆閱句批是如此方為知輕重可嘉之至緬賊據險固守句批此處額

勒登額未奏明甚誤事矣又奏將軍明瑞已經深入雖蠻結一捷賊已膽落餘匪根株未盡仍須痛勦滇省兵丁零星調撥恐難濟用臣已飛咨貴州撫提酌調官兵二千名以備遣撥得旨更好滇省兵丁皆遇敵即遁實不可用矣餘有旨諭諭軍機大臣等據鄂寧奏將旱塔兵丁分撥接應木邦等處一摺所見亦是已於摺內詳悉批諭矣但前此曾經傳諭額勒登額令其由猛密一帶接應大軍未知此時曾否接到現在復諭額勒登額如尚未奉到進兵猛密之旨即班兵回至木邦與珠魯訥妥協商酌或取道大山為明瑞策應以壯軍威而通聲息鄂寧惟妥速探聽情形有應籌畫接應者即上緊辦理總以速通明瑞信息為要至該撫摺內稱旱塔官兵既為緬賊據險固守尚在相持不能前進等語此必孫爾桂前自軍營回時將所見情形告知該撫者可見該撫前此未嘗不知額勒登額

迺遵情節乃該撫前摺並未詳悉入告殊非公忠大臣體國之意是以傳旨申飭今朕亦不復追究惟期妥籌速辦於事有濟軍務告竣之日功罪亦自無難定論也此時惟以妥協辦理速得明瑞大軍消息為要所得信息即速奏聞將此傳諭知之○賞予告禮部尚書銜沈德潛人淺一觔○庚戌諭軍機大臣等明瑞等現在進攻緬匪節據奏報該處寨柵俱用溼木排列人力驟難摧陷因思攻堅

之策莫如用礮所向無不潰裂現在軍行所帶諒不過子母等礮其力量未必能如大礮之得濟此外未知曾否帶有別項礮位足資應用至內地所有威遠大神等礮酌兩重大山路崎嶇長途馱載自屬匪易但滇省產銅素為充裕若能豫將物料運赴適中之地如木邦及鐵壁虎踞關等處選調工匠就近鑄造以備軍營之用其勢較為便利但從木邦等處運往軍前仍須酌量沿途情形務俾便

捷利行方可迅速集事著將此傳諭鄂寧悉心經理並即與明瑞等彼此知會妥協商推一面趲辦一面奏聞○又諭曰額勒登額辦理諸事不善不勝參贊之任阿里衮到滇時可即傳旨令額勒登額仍在領隊大臣上行走○辛亥諭曰直隸正定鎮總兵左秀前在西路軍營曾經出兵著即馳驛前往雲南交與明瑞阿里衮以領隊大員委用其正定鎮總兵員缺著張和署理○又諭曰四川北

鎮總兵常保佳昨有旨令其來京今派伊前往雲南軍營在領隊大臣上帶兵行走著即速馳驛由永昌一路隨同阿里衮前往○又諭著派散秩大臣副都統富廉馳驛赴雲南軍營即隨阿里衮前往加恩賞給治裝銀一百兩○壬子諭軍機大臣等前經降旨令原任四川北鎮總兵常保佳來京另用今派令該鎮前往雲南委用並馳驛速赴永昌該鎮此時諒已起程赴京定由西安河南二省

經過著傳諭明山阿思哈即行豫辦勘合飭屬探聽該鎮所到之處即行給付俾得迅速前行如尚在四川界內即著阿爾泰速給勘合星赴永昌毋稍遲誤○雲南巡撫鄂寧奏正月初九日接統領木邦官兵普洱鎮總兵胡大猷稟稱正月初四日珠魯訥遣兵往護錫箔橋行五六十里即聞橋已失總兵索桂參將王棟俱由千家寨撤兵回葫蘆口因聞賊匪分兩路來抄木邦現在俱回木邦保護

同知陳元震知府郭鵬翀等俱於是日逃回永昌等語臣因事在緊急即飛行額勒登額星夜帶兵赴援查木邦有兵有糧何至如此光景胡大猷稟內情節恐未必的確但珠魯訥不能撫輯招徠前將棄擲軍器就擒之四十餘人盡行斬戮以致匪衆無路可投鋌而走險至錫箔橋實為要地乃毫無措置竟至不能抵禦種種不善實難辭咎總兵胡大猷於失橋時始帶兵前往及遇撤回之兵既不

能整頓戎行又不能堵禦葫蘆隘口致本邦軍營張皇紊亂應請旨治罪再查木邦早塔兩路軍營參贊止額勒登額一人仰懇簡派熟諳軍務曉暢戎行之大臣速赴軍營管理一切得旨已派阿里衮前往但恐路遠未能速至又批另有旨諭諭軍機大臣等鄂寧奏胡大猷稟報軍營情形一摺初疑木邦及沿途臺站或有賊匪猖獗及將全摺閱畢乃知胡大猷所稟悉屬訛傳誕謬遇事張皇即如

木邦裹帶糧石可至正月而又有滾運接濟之糧乃遽稱木邦現已無糧又陳元震懷印逃回等語尤荒唐不可信胡大猷身為總兵大員統兵防守橋道遇賊不能奮擊輒爾率衆退回已屬罪無可逭乃復敢捏飾虛詞驚惶妄稟搖惑軍心其情罪甚屬可惡現經降旨珠魯訥將伊革職拏解永昌俟解到之日著鄂寧嚴加刑訊完其捏詞誑報實出何心及得自何人傳播逐一研審明確即於永昌

正法示衆以為綠營怯懦虛誑者戒其布造謠言之人亦應查出從重治罪至額勒登額久駐旱塔逗撓貽誤殊屬不堪今已派阿里衮前往督率調度鄂寧此時一切總宜鎮靜以安衆心有應接濟策應者務上緊妥協辦理現在木邦情形若何並曾否探有明瑞軍營信息及額勒登額領兵現至何處各情節速行詳晰具奏○癸丑諭軍機大臣等據李侍堯奏稱向例標協營伍缺出將各兵子弟

驗明實係年力強壯者頂補現已查明餘丁一千二百餘名以備補用等語所辦實為妥協兵丁子弟補缺向本著為成例邇來綠營陋習輒以外來無藉之徒濫行充伍人材技藝既不足觀而選懦狡猾之風亦且因之日甚何以作士氣而勵戎行况此等兵丁子弟既係生長兵家則執銳披堅見聞習慣訓練尤易見功自於營務有益著傳諭各省督撫可倣照李侍堯挑選餘丁豫待備用之意各

按該省營伍情形酌量照辦務使額鮮濫充以收實效李侍堯摺並著鈔寄閱看○軍機大臣等議覆大學士陳宏謀奏稱此次賞給直隸河南湖北湖南貴州五省銀各十萬兩作為各該處社倉穀本按出雇車馬之鄉里酌定數目發給里民令於秋後交穀納倉永為社本等語查各處社倉法自古傳事從民便聽其自為捐輸並不官為督責與此次因兵差加惠羣黎之意本無干涉若以恩賞之帑金雜於民輸之糧石則必派委催迫徒滋紛擾如令發給里民任其意為出入則在出力者或不獲及時沾被而司事者難保無乘間侵牟之弊况自直隸至貴州毗連數省如於秋收時以五十萬官帑收買穀石市集糧價必致倍增所奏應毋庸議但各省辦理本有不同請交各督撫詳悉籌畫如本係按糧均派者可於應徵錢糧按數扣還如係就谷鄉有車驟之家備應者亦可按戶分賞此外

如實有零星難覈者或將銀兩暫行存貯俟凱旋時抵補幫貼之用應令各督撫一面妥辦一面奏聞從之○兩廣總督李侍堯奏東西兩粵撥解赴滇軍需馬正餘共二千匹均全數解抵永昌得旨此時恐未能即行結局當再辦數千豫備但毋致聲揚聞信即能速送為要○甲寅停保舉撫民同知通判派員考試例諭向來各衙門保舉撫民同知通判例由吏部請旨特派大員考試第思此項人

員原不過取其通曉字義標判文書而止並非場屋衡文可比若一一傳集校藝恐其中轉易滋代倩傳遞諸弊甚屬無謂嗣後各衙門保舉此項人員彙送吏部照月選官之例令其赴部親筆繕寫履歷以憑覈對不必另為派員考試著為令○諭軍機大臣等吳虎炳奏請定立約束流丐之法以靖地方一摺業經該部議駁矣外省流丐為匪犯事之日自應執法懲創其平日稽查約束亦惟在地

方官留心體察實力奉行匪類自難滋事若徒多立科條紛紛滋擾而事勢實屬難行又何以懲奸宄而安良善況如該按察使所奏流丐限定鄉村討乞不令他往甚至回籍之時必需官為資送不但案牘紛繁日不暇給亦復成何政體耶吳虎炳身任臬司何以所見猥瑣若此著傳旨申飭又諭雲南進勦緬匪軍行馬匹現在尚須接濟除上年川省抽撥馬三千匹業經解滇應用外該督尚有

奏明駐防馬匹內揀選一千六百匹加意餵養聽候調撥著傳諭阿爾泰可將前經豫備之馬再於各營驛內量力通籌酌撥臚壯堪用之馬連前共數千匹豫行選擇飼秣俟諭旨到日即行撥解前往庶辦理既得從容而馬力亦無虞疲乏如軍務早竣無需此項馬匹撥歸各營亦屬便易上年川省曾辦運牛隻赴滇此次亦須設法購辦數千頭以備撥用該督務期慎密悉心經理毋致稍涉張皇

又諭昨李侍堯奏粵東西二省撥解馬二千匹已經全抵永昌交收一摺已於摺內批示令其再辦數千豫備聞信即行速送矣現在大兵進勒馬匹尚須接濟著李侍堯先就各營驛內量力通行籌辦揀選臙足壯大之馬數千匹豫行選備俟諭旨到日即行撥送按程飼秣行走庶備辦既得從容而馬力亦不致疲乏如軍務早竣無需此項馬匹即仍歸入各營亦為便易該督等務期慎密經理

毋致稍涉張皇將此傳諭李侍堯宋邦綏並令鍾音知之陝西按察使秦勇均奏州縣耗財最甚者莫如衙署演戲一事笙簫歌舞之際家人胥役往往瞞官作弊且珍羞雜陳費更不貲養廉不敷因而那移公項積成虧空請通行飭禁得旨此在汝等上司董率稽察之事不值明頒諭旨也○又奏外省陋習凡上司到任及屬員到任三日內謁見上司俱濫穿蟒袍殊覺褻越請敕部議定處分又

蟒袍俱四爪而例應分別九蟒八蟒五蟒近有顧繡刻絲二種工價既昂且無區別請敕部議應自幾品官以上穿用得旨此事亦瑣

○乙卯諭朕於二月十三日啟鑾恭謁

泰陵所有應行典禮各該衙門照例敬謹豫備○諭軍機大臣等據鄂寧奏稱遊擊袁夢麟在篆經塔地方途遇沙練二十餘名詢據該練等知將軍於十二月二十四日帶兵往猛密司去等語明瑞懸軍深入接應最為緊要

昨已令額勒登額分帶兵丁前赴木邦覓路至明瑞軍營策應而譚五格則仍在早塔相持此時如能將賊堡攻破渡江前進甚善否則早塔距猛密一路甚近現巴圖魯侍衛在軍營者應不乏人著譚五格揀選數員並挑勇銳兵丁數百名令其帶領間道往猛密一帶迅速接應譚五格此時如已探有明瑞信息並著即速奏聞可將此傳諭知之○又諭前因上年官兵進勒緬匪所過各省州縣其

夫馬運送正項開銷之外不無稍資民力已特頒恩旨每省給銀十萬兩令各督撫酌量分給妥辦矣此時大兵已經入量度軍務如可以次告竣自不須更為措置儻一時不能遽行藏事則續辦繼進之兵仍應豫籌備用現已約派京兵及索倫等兵共計七千名約撥各處馬共計一萬匹其沿途一切按撥遞送務期軍旅遄行而閭閻不擾各省均當先時悉心部署臨時自免周章儻或軍營已有就緒竟可不須續辦亦無難隨時知會停止著傳諭直隸河南湖北湖南貴州雲南各督撫即將應行豫備事宜先行留心熟籌妥議一面具摺奏聞但不得稍涉張皇或致轉滋紛擾也將此詳悉傳諭知之○又諭曰常保住原係吉林烏拉之人曾在西路軍營出兵打仗但久任總兵恐不無沾染綠營習氣是以令其來京另用現降旨著馳驛前往雲南在領隊大臣上行走此次帶兵勦賊與尋

常坐鎮辦事不同將來遇有該省總兵員缺可酌量奏請補授將此諭令明瑞阿里衮及鄂寧知之○又諭據按察使秦勇均奏稱州縣等官不得在署演戲及接送上司不得濫服蟒袍二摺所見殊屬瑣細此等事件雖屬近理應行然惟在各該上司董率稽查如所屬中果有任意置酒演劇及服飾過於侈靡漫然不知檢約者原不妨隨時飭禁使知恪守官方足矣若必特頒諭旨多方設立科條不惟政體有乖抑且日久奉行又成具文但封疆大吏於所屬各員亦不可不留心裁抑用以式浮靡而崇體制可於各督撫奏事之便將此傳諭知之○湖南巡撫方世雋覆奏進剿緬匪官兵經過湖南共十八站每驛備馬六百匹夫一千四百名輪流接替計用銀十萬三千四百餘兩除例得報銷一萬八千五百餘兩外實用民力約八萬四千九百餘兩得旨已有旨了目下尚有自京發兵之事

汝豫知之可密為料理○雲南巡撫鄂寧奏正月十四日有永昌府學生員黃樹極投交參贊大臣珠魯訥來咨內載印信俱交與陳元震等語查同知陳元震係革職効力隨參贊辦事之員乃於木邦被圍時竟攜帶參贊印信潛逃現在專差前往緝拏得旨此人可惡應嚴拏極刑問明然後處以極刑磔死又奏大理府知府郭鵬翀係派往支放之員同時逃匿均可痛恨俟拏獲日嚴審監禁候旨

正法得旨豈止正法亦當處以極刑皆不必復請旨若有別故仍行請旨諭軍機大臣等據鄂寧奏珠魯訥咨稱同知陳元震於珠魯訥出城禦賊時將參贊大臣印信及賞賜將軍荷包攜帶潛逃知府郭鵬翀亦不知何往等語陳元震本係革職人員今在軍前隨參贊大臣辦事當此軍務緊要之時乃以看守印信等物輒行攜往潛逃而郭鵬翀以知府大員且專派支放糧石乃一同竄逸按其情

罪重大幾與叛逆無異著鄂寧將陳元震郭鵬翀迅速拏至永昌嚴行訊鞫一俟審得實情著即行凌遲處死所有伊等任所貲財一併嚴密查封並查二人之子隨任者著拏送刑部治罪至革職總兵胡大猷前經該撫以其謊報軍情摺參治罪當降旨令將胡大猷審明正法今據該撫查得賊匪實有圍擾木邦陳元震等潛逃之事則其所報尚非造言生事全無蹤影者可比該撫於審訊時如無別項情節惟坐以應得本條用昭平允至明瑞現在統兵采入看來一時尚未能剋日奏功現據鄂寧選派幹弁前往探信如此時軍務可竣自不必更為措置若不能即時藏事則俟回至木邦永昌等處時即傳旨於明瑞令其速行馳驛來京將該處形勢一切面為陳奏商酌再定添兵事宜方為妥協已傳諭調撥西安駐防馬三千匹荊州駐防馬二千匹解送滇省接應復令四川廣東廣西等省

酌備壯健馬匹陸續解送約計可得一萬有餘京兵及索倫兵亦令挑撥七千名現在酌量豫為籌備此等兵馬沿途各該督撫已傳諭令其從容經理其到滇以後一應口糧草豆等項需用緊要尤宜先為部署儻將來不需應用臨時自可知會停止若俟明瑞進京後始行措辦恐已緩不及濟將此傳諭鄂寧酌量滇省情形悉心妥密籌辦仍一面即速奏聞○又秦木邦雖有賊匪圍住但此等散

而後聚之賊諒屬無多珠魯訥處有兵數千即不能痛剿亦儘可固守待援自不致於棄失臣已飛飭遊擊袁夢麟帶兵援剿衝開道路會合木邦之兵以通糧運再聞明瑞現往猛密則由旱塔一路探信甚為直捷目今路尚未通自可設法往探已飭各屬訪覓能至阿瓦木梳等處明瑞軍營投文之夷人以期通達信息得旨如此方是現今惟以得明瑞大軍信息為要○又覆奏滇兵懦怯成習往

往潛逃據各鎮營具報兵三百三十七名現已獲二十三名其未獲之犯嚴檄勒限緝拏如限滿不獲將承緝文武官查叅得旨如此之多汝等所司何事若再不嚴緝務獲即汝不能辭其責矣又批另有旨諭諭軍機大臣等據鄂寧奏各鎮營陸續具報逃兵共三百三十七名已獲正法者二十餘名現在嚴檄緝拏等語滇省綠營兵弁懦怯性成種種逃竄失律俱出情理之外若不嚴密查拏盡法

處治將何以肅士氣而飭戎行今逃兵至三百三十餘名之多而弋獲者不及十分之一皆由鄂寧前此辦理寬縱而地方各官遂視檄緝為具文並不實力嚴辦以致逃兵等積習相沿罔知懲創是直導之藐視軍紀耳其情殊屬可惡所有未獲逃兵將來如仍不上緊緝拏竟爾任其免脫致稽顯戮豈僅如該撫所奏照例議處遂足蔽辜必應將承緝之員奏請正法以示炯戒目今又拏獲若干並

著查明一月一奏必俟全獲方稱完事也鄂寧並著傳旨申飭○琉球國中山王尚穆遣使表貢方物頒敕宴賚如例○丙辰諭曰普洱鎮總兵胡大猷現在革職有應行審訊之處所遺普洱鎮總兵員缺著左秀調補張和即著補授正定鎮總兵○諭軍機大臣等滇省綠營兵弁怯懦成習不堪應用自出兵以來逃亡散失缺額必多前已據明瑞等奏稱軍興之際愚民畏怯不願食糧且將領等均已分派征防難期訓練此時再行召募實屬無裨應俟大兵凱旋另籌挑補等語所奏甚是著再傳諭鄂寧此時且不必明言其故惟將現在尚未頂補名糧及此後續出糧缺一概停其充補所有空缺名數密記檔案將來大兵凱旋再行請旨辦理○署理陝西巡撫布政使程燾奏洛川縣民楊涼十一世共龔同居請旌表下部議行○以署禮部侍郎德福為正黃旗滿洲副都統圓明園營總福僧

阿為錦州副都統○丁巳上詣長春仙館問

皇太后安奉

皇太后居暢春園○諭軍機大臣等據良卿奏拏獲應發烏魯木齊改發烟瘴脫逃之軍犯陳潮即於該處正法等因一摺所辦甚是此等積匪猾賊本係免死發遣雖經改發烟瘴仍與發遣烏魯木齊無異前於熊學鵬奏拏獲孫耀周一案已經降旨各督撫遇有此等

遣犯脫逃者均照烏魯木齊之例即行正法方足中憲典而儆奸頑但恐各省奉行日久或致懈弛嗣後各省並著於年終將有無脫逃及拏獲幾犯之處彙摺具奏著於各督撫奏事之便傳諭知之○又諭前經降旨良卿令將拏獲逃逸餘丁暫行監禁俟躡緝齊全之日請旨正法復令將續獲幾人即行速奏距今已及數月該省曾否續獲若干未經覆奏著傳諭良卿速飭各屬嚴密緝拏毋令遠

颺漏網再滇省綠營正兵逃竄者竟至三百餘名之多非嚴拏務獲按律正法無以整飭軍紀已傳諭鄂寧上緊查辦此等逃兵或因本省查辦緊急因而潛竄毗連黔省地界均未可定並著良卿實力灑緝一經拏獲即行奏明正法○鑲紅旗蒙古都統奏公中佐領什德現在緣事革退查伊所管之佐領已連襲九世照例揀選應襲子孫及本旗應補人員引見得旨此佐領自喀爾拉岱承襲以來

伊之子孫連襲九世理應作為世管佐領但覽伊家譜內補授佐領之人犯罪革退者極多此次施恩仍著喀爾拉岱之孫花沙布承襲襲此一世果奮勉得力便著作為世管佐領如仍復蹈罪戾致干革退即著作為公中佐領○戊午

上詣暢春園問

皇太后安○還宮○諭軍機大臣等高晉奏審擬江寧不法僧人恆昭誘姦民婦一摺僅請

改發伊犁所辦殊屬輕縱此等淫惡劣僧久為地方風俗之害一經敗露即當立予杖斃以示懲儆何得更為寬貸其在逃之月千平日濟惡貫盈拏獲之日亦當一併杖斃情法庶為允符至所稱另招戒僧居住酌留齋田二頃之處其數未免過多此寺既以聚徒挾貲自作不靖向後即須酌覓住持不過令其稍敷餬口足矣又豈應優給產業轉滋游蕩著將此項田畝再加酌減存給外其餘盡數

估變作為修理幽棲寺等處之用此案該督即遵旨執法辦理完結並不值交部覈覆更增讞牘也將此傳諭知之○又諭據額勒登額奏稱接到鄂寧令伊往援木邦移文因各處要隘賊皆扎寨防守其勢日增若即分兵從間道前往計程雖近但路甚逼窄不能乘騎宜暫收兵退至鐵壁關之隴川地方再派兵三千或臣額勒登額或臣譚五格帶領急速往援俟至隴川相機籌辦等語額勒登額

此奏愈屬不堪。木邦係將軍明瑞退兵要路。將軍已經深入。若失木邦。則退兵無路。而珠魯訥所領者。又係綠營無用之兵。額勒登額豈不知之。既得鄂寧。移咨反欲緩緩撤兵。至隴川再議。是何言耶。至譚五格專管綠營。不能管轄滿兵。使往援木邦。但令綠營前往。然則額勒登額竟帶領滿兵在隴川坐守乎。伊帶領重兵。安坐早塔。不能勦賊。致賊多扎寨。壘今尚言相機進勦。無恥之極。朕數年來辦

理準夷回部事宜。信賞必罰。毫無姑息。額勒登額豈不知之。伊此時如已迅速接應。木邦朕或另有辦理。若仍在隴川等處坐守。恐伊不能保其首領也。將此詳悉傳諭知之。○又諭據鄂寧轉奏。接到珠魯訥移咨。正月初八初十等日。與賊拒戰情形。珠魯訥帶領數千綠營無用之兵。晝夜防守。木邦未被賊占。伊豈但無罪。尚屬能辦事之人。今鄂寧已派袁夢麟陳言志前往。又令喬冲杓繼進。珠魯訥

此時協力夾攻。必能勦賊。著傳諭珠魯訥。勿以木邦被圍。將軍信息不通。引罪自懼。惟當加意防守。俟援兵至時。內外夾擊。諸事熟籌辦理。○吏部議准。四川總督阿爾泰奏。稱雅州府通判兼管雅關稅務。查雅州道府知縣同城駐劄。知縣儘可兼理稅務。其通判一缺。應裁從之。○雲南巡撫鄂寧奏。正月十六日。接參贊大臣珠魯訥來咨。謹將原文呈覽。查珠魯訥所言。木邦情形尚堪固守。額勒登額

援兵雖尚未接。何時前往之信。但查早塔軍營由隴川猛卯渡江。即可直抵木邦。計算日期。應已可到。臣又調開化總兵喬冲杓帶附近提標兵。速往攻勦。並飭遊擊袁夢麟守備陳言志。各兵奮勇偕進。務先開通道路。保護糧石。此等賊匪。自必一驅而散。即乘勝前進。奪回錫箔橋。搜勦餘賊。亦不難於辦理。得旨。好。以速為要。又批。此原錫箔敗散之賊。是索柱退回。以致賊勢復張。諭軍機大臣等。前因

明瑞懸軍深入額勒登額在旱塔遷延不進曾降旨令其即行帶兵前往接應嗣據鄂寧奏稱聞木邦一帶現有賊匪飛調額勒登額星赴應援隨即諭令馳往木邦並覓路至明瑞軍營接應額勒登額久駐旱塔與賊相持不能稍有振作意其聞鄂寧檄調自必分兵邁進既可救援木邦兼可策應明瑞茲據額勒登額奏到則因在旱塔為賊所困竟欲退至鐵壁關再議分兵往援並有酌令譚五格前往之語是其始則逗遛觀望繼復畏葸退縮實出情理之外若伊於接奉諭旨業已趕赴木邦尚可姑緩其罪以待奮勉自贖設或退駐鐵壁關玩延不進則是有心貽誤即著鄂寧將伊革職拏解來京重治其罪額勒登額拏問之後所有帶兵事宜即於該處軍營內酌派巴圖魯侍衛如海蘭察克車德者領率滿洲兵并選擇綠營中之勇銳者迅速至木邦勦賊應援賊退之後並覓路赴明瑞軍

營接應至此時木邦情形閱珠魯訥咨稿所稱現在盡力抵禦自可固守無虞但賊眾尚多而外援不能即至亦恐難以持久不可不亟亟熟籌袁夢麟陳言志兩次帶兵計日可早至木邦但兩人所帶兵數無多尚恐不能濟事據鄂寧奏調喬冲杓赴援想亦陸續可至我兵果能絡繹繼進賊匪自無難計日驅除至所稱沿途糧石現在防護所見甚是俟賊退後再行設法滾運可耳其吏目黃詔鳳把總張傑跟隨珠魯訥出城禦賊輒敢潛行逃竄其情可惡實與郭鵬翀陳元震之罪相等亦當審訊明確即行盡法處死再本日所寄珠魯訥諭旨並著鄂寧選派幹弁妥速送往毋致遲誤○是月直隸總督方觀承奏懷安縣城西南諸山上接大同遇雨行水漲匯於近城之南山口分為兩派西一派繞城西北面舊有護城石壩三百二十丈足資捍禦其南一派自西南注東北水大輒浸城根請

於新建虎皮石壩一百五十丈外接築土壩二百六十八丈下部知之。雲南巡撫鄂寧奏運糧腳價馬運每站每石給銀二錢夫運每石用夫三名每名給銀五分五釐此滇省向來成例但永昌騰越一帶夷民元氣未復其自內地運至出口俱用土司人夫馬牛民力未免拮据請每石每站加銀一錢以示體卹得旨自應如此。○署貴州巡撫良卿貴州提督李國柱奏滇省辦理緬匪已調撥貴州兵一萬一千名茲准雲南撫臣鄂寧續行咨調二千名以備安臺搜賊之用隨選得鎗手兵一千八百名礮手兵二百名上游令遊擊楊榮總率下游令參將李時擴總率復委副將程國相統領分起趕督起程報聞

大清高宗法天隆運至誠先覺體元立極敷文奮武孝慈神聖純皇帝實錄卷之八百三

大清高宗法天隆運至誠先覺體元立極敷文奮武孝慈神聖純皇帝實錄卷之八百四

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事

侍從管理吏部理藩院事務兵部鴻臚寺卿都察院御史內閣學士內閣典籍廳掌印給事中 禮部

總裁官經筵講官太子太傅文華殿大學士內閣領閣事稽察欽奉 上諭事侍從管理吏部戶部三庫事務

世襲騎都尉軍功加七級隨帶加二級又加二級 董誥內大臣戶部尚書鑲藍旗滿洲都統軍功紀錄五次尋常

紀錄五次臣德瑛經筵講官太子少保工部尚書紀錄六次臣曹振鏞等奉

敕修

乾隆三十三年戊子二月己未朔諭軍機大

臣等明德審擬江寧府知府郭永寧婪索多贓一案。問擬杖流。所辦實為輕縱。先經刑部議駁。甚為允當。今據明德另行覈擬題到。將郭永寧遵駁改正。擬絞監候。可見該撫前此審擬未免意存姑息。郭永寧以知府大員。婪得所部財物。至二千餘兩之多。實非尋常犯贓可比。該撫初審時。欲以遣罪定讞。何以警官邪而申國憲。在他人尚可。明德不應出此著傳旨申飭。○吏部等部議准。陞任福建巡

撫崔應階疏稱福寧府學文武生員人數衆多。該學僅設教授一員。似難督課。查壽寧縣學人數甚少。毋庸教諭訓導兩員共理。請裁壽寧縣學訓導。改設福寧府學訓導。從之。○庚申。諭軍機大臣等。朕前降旨令安泰於察哈爾八旗額魯特內。挑選年壯。已經出痘者。查明豫備。俟調取時。即令由京前往雲南。著再傳諭安泰於總管塔尼布成果。二人內酌派一員。統領來京。○吏部等部議准。陞任福

建巡撫崔應階奏稱莆田縣所轄平海地方。逼處海濱。與臺灣之竹塹相對。離城遙遠。應設專員駐守。查莆田縣原有縣丞一員。請移駐平海。以資彈壓。定為在外揀選調補要缺。從之。○調張家口副都統集福為熱河副都統。以圍場總管齊哩克齊為張家口副都統。○辛酉春分朝。日於東郊。遣理郡王弘曉恭代行禮。○諭軍機大臣等。明德奏柴世進造作逆詞一案。請按

律凌遲處死。初聞摺時。以其事屬悖逆。已批三法司覈擬速奏。及詳閱該撫封進各帖原詞。則該犯乃係瘋狂喪心。多勒引小說家謬誕不根之語。不值交法司覆讞。視同重案。但此等怙病妄行。實足誣民惑世。其人究不可留。著該撫將該犯柴世進。即行杖斃。以示懲儆。所有援引律內應行緣坐各條。概予寬免。將此傳諭該撫知之。○軍機大臣會同刑部議。原任侍郎齊召南。於堂兄齊周華逆案。為之隱諱。詞不能稽察糾參。應照律擬流。得旨。齊召南曾為侍郎。乃於堂兄齊周華逆案。為之隱諱。不即參奏。實難辭咎。念其曾為大員。所有問擬杖流之處。著加恩寬免。○吏部議准。奉天府尹尹耀海奏。稱查定例。試用人員。應俟調補所遺之缺。方准署理。奉天州縣僅十二缺。非各省缺多。易於揀調者可比。每遇調缺出時。無合例之員。必須歸部揀補。以致試用人員得缺無期。請嗣後奉天州縣調缺出時。如

現任內實無合例之員。准於試用人員內擇其明白諳練者。揀選題署。從之。○又議准。陝西布政使程燾奏。稱各省陞調官員。本內遺漏參罰案件。向例祇將具題之督撫議處。而造冊具詳之藩臬。未有處分。請嗣後查明遺漏之案。如係錢糧處分。將藩司罰俸一年。臬司半年。係刑名處分。將臬司罰俸一年。藩司半年。從之。○壬戌。諭軍機大臣等。齊召南於堂兄齊周華逆案。為之隱諱。不奏。咎實難辭。是以令其來京候旨。今據軍機大臣會同刑部訊問。擬以杖流。朕念其曾為大員。已加恩寬免。遞回原籍。並傳旨令其閉戶安分。僅再不知感恩警惕。或掉弄筆頭。語含怨誹。則齊周華炯戒具在。不能更為曲宥矣。前據熊學鵬查出齊周華控告齊召南原詞。有將銀寄與江姓生息之事。伊平素以讀書立身為事。豈應自蹈商賈牟利惡習。且現已邀恩免其治罪。又何得安然無事。坐享贏餘。著傳諭熊

學鵬可即密行查辦。惟酌留餉口外所有生息餘貲。即盡數查出歸公。以充本地公用。毋任稍有隱匿。儻該撫以同僚科目中人。或意存徇隱。則是自取罪戾矣。將此傳諭該撫知之。尋浙江巡撫承德奏。齊召南家產業。經前撫臣熊學鵬飭屬查辦。請留田地山塘六十八畝。資給餉口。其餘田地房屋變價充公。至齊召南將銀寄存淮商江姓一節。現准兩江總督高晉鹽政尤拔世查明。並無其事。確鑿

咨覆。其為齊周華混控無疑。應毋庸議。得旨。覽。○又諭。上年赴滇官兵。經過之直隸。河南。湖北。湖南。貴州。五省。動支帑項之外。或不無稍需民力。特頒恩旨。每省各賞銀十萬兩。以示體恤。其作何籌辦之處。已令軍機大臣詳議。交與地方官妥協經理。第念經理兵差。各省情形不同。而一省州縣所屬。其有無幫貼及數目多寡。亦自難於畫一。今據裘曰修奏。稱直隸近地。如大興宛平等縣。並無民間協

濟之事。其餘如派用腳力等項。州縣官但就現有車馬之家量取應用。其中有回空守候之日。額給未敷。則同里之人。不無出貲佐助。然為數零星參錯。州縣官本不登籍稽查。即使曾立檔冊。而鄉保書役從中經手。乘間改移甲乙。希圖肥橐。皆勢所必有。今即加恩優賞。而有司以悉心覈實。即自干失察之咎。又必顛預了事。實惠何由下逮。在良民之安守本分者。即曾經出力。既未能如數盡酬。而一

二狡黠之徒。轉得詭計冒支。種種弊端。賞項虛糜何益。因思嘉惠閭閻。原期事歸實用。與其將此帑金。費而無濟。何如明諭衆人。且將此款暫時收貯。或俟將來滇兵凱旋經過。或今歲尚有應須續辦。繼進之兵。俱可備給正項不敷之用。民人見識雖淺。然其為得銀於此時。與仍待出銀於向後。其數原屬相等。亦無不共知感恩之理。如此。則在民既無絲毫累及。而在官辦理亦一切不費。周章揆之。施

思本意實為允協等語。著將此再行傳諭各該督撫。令其悉心斟酌。飭屬妥協辦理。○又諭據鄂寧轉奏珠魯訥差人送到移咨。據稱賊匪兩次約請楊重英議事。因欲得將軍信息。賞賊緞匹。賊復來請。以賊詭詐未可深信。斥逐而退等語。賊匪遣人乞降。自因明瑞追勦深入之故。珠魯訥於賊叩請時。即令楊重英前往。甚是。但將急探將軍信息之意。洩露於賊。已屬錯謬。而賊再來時。並未將天朝兵力厚集之處。明白宣諭。僅僅斥逐。尤為失體。著傳旨申飭。○又諭曰。原任總兵索柱。叅將王棟。如珠魯訥已奉前旨。業將該二員正法。則無庸議。若尚未正法。即派妥員將索柱。王棟。拏解來京。沿途加意看守。○雲南巡撫鄂寧奏。把總李進采等。由木邦小路回至永昌。臣細加詢問。據稱木邦大營五座。木城木柵甚堅。溝亦深闊。營中牛馬甚多。有米一倉。可支數十日。緬賊於小河之南立營。時來窺伺。

不敢逼近大營等語。查木邦營盤尚堅。兵食未乏。賊匪不敢逼近。現在總兵喬冲杓馳往并統領遊擊袁夢麟守備陳言志各兵飛往援應。自可由木邦洗勦深入。接應將軍明瑞得旨何尚無勦賊之信。總之綠旗兵甚無用耳。一得信息。即速奏報。諭軍機大臣等。據鄂寧奏木邦現在情形一摺。內稱珠魯訥遣把總李進采等。由小路到底磨前至永昌。遞到清字文書。已於摺內批示。并將應辦事宜。諭知珠魯訥矣。木邦既可遣人回至永昌。是永昌遣人前往送信。亦屬便易。所有發去珠魯訥諭旨一道。著鄂寧即速選派妥人。迅加馳送。至所派袁夢麟。陳言志前後統兵八百餘名往援。而喬冲杓亦自永昌前進。所調大理兵三百名。亦經續往。若鄂寧作速檄催各將領星飛赴援。盡力協勦。實為此時最要關鍵。但綠營兵丁。恒怯退縮。惡習實可痛恨。此次喬冲杓等所帶援勦之兵。仍由綠營挑往。恐

不足恃。著鄂寧傳諭喬冲杓等督率約束。促令向前力戰。如有臨陣退逃等事。即於軍前正法示衆。庶此輩稍知懲創。至額勒登額所統滿洲兵將及千餘。合以川黔所調之兵。得力者尚可得五六千。若即馳援木邦。於事實屬有濟。已屢降嚴旨促其進援。鄂寧奉到此旨。再行傳旨嚴催額勒登額迅速前進。毋稍逗遛貽誤。至所稱分路遣人至明瑞軍營探信。並將節次諭旨錄寄。所辦甚是一得。明瑞

信息。即行加緊馳奏。再前次珠魯訥所差之生員黃樹樞。遞送文報。尚屬妥協。自應量加頂帶。或給予職銜。以示鼓勵。其現在派往明瑞軍營送信之人。如往來迅捷。并著一併酌量從優獎賞。將此傳諭鄂寧知之。○癸亥。以舉行仲春經筵。遣官告祭。

奉先殿

傳心殿

上御文華殿。講官暨侍班之大學士九卿詹事

等行二跪六叩禮。分班入殿內序立。直講官四人出就講案前。行一跪三叩禮。復位。直講官觀保表曰。修進講大學。是以君子有絜矩之道也。一句講畢。

上宣御論曰。曾子得聞夫子一貫之旨。及至門人問之。則答曰。夫子之道。忠恕而已矣。蓋盡己之謂忠。推己之謂恕。斯二語也。學者以之修身。而有國天下之責者。以之治國平天下。夫治國平天下。豈有別術哉。亦曰盡己推己而已。盡己推己。非絜矩之謂乎。是故老老長

長恤孤。無非盡己推己之為。而初無意於民之興孝興弟不倍也。惟其無意而行之。以忠恕。是以民之觀感。亦有不知其然而然。相與興孝興弟不倍者焉。然則曾子之釋經所云絜矩者。豈事事物物而絜之哉。亦曰一貫而已矣。講官暨侍班官跪聆畢。興直講官奉寬王際華進講尚書。一日二日萬幾一句講畢。上宣御論曰。書曰。一日二日萬幾。蔡氏解之曰。

一日二日之間。事幾之來。且至萬焉。然予以
為此。幾應訓心。而不應訓事。夫事之來於外
者。非以心應之於內乎。且事雖至多。一日二
日之間。未必至萬。設果至萬。則一日二日之
間。亦必不能盡酬。叢勝之失。斯不免矣。若夫
心蘊於中。則無一息之停。無一息之停。則其
思慮有不啻以萬數者。故曰。幾者動之微。吉
之先見者也。使非兢兢以守之。業業以持之。
則所謂朋從爾思。逸欲於是乎生矣。是皐陶
亦有聞精一執中之傳。特具體而微耳。無曠
庶官。蓋見之施行者。然則帝廷吁咈咨儆。豈
有外於一心哉。講官暨侍班官跪聆畢。大學
士尹繼善劉統勳奏曰。

皇上垂訓以忠恕二字。明絜矩之道。仰見
聖心精義入神。直揭孔氏傳心之要。至尚書一
日二日萬幾。不訓事而訓心。誠上接堯舜精
一執中之旨。自漢宋諸儒。未有能窺見此者。
臣等幸侍

講筵親承

聖訓。不勝榮幸。奏畢。諸臣出就拜位。行二跪六
叩禮。禮成。

上還宮。○諭軍機大臣等。現在進剿緬匪軍務。
一時未能告竣。或尚需撥調水師。以資分路。
會剿。福建水師兵丁。於駕駛戰船等事。素稱
精熟。著准應階於沿海營伍內。豫行簡選。利
捷諳練兵丁。酌派三千名。以備應用。其水師
所需之器具軍械。可供攜帶者。亦先期部署。

俟再降諭旨到時。即令漳州鎮總兵葉相德。
帶領前往永昌等處。聽候調遣。再閩粵洋面
毗連。舟行自易。其自粵東西以上。往滇路站。
有無水道可通。及何處最為便利。並著崔應
階。悉心詢訪。覈實覆奏。如將來毋需調用。另
行降旨停止。○軍機大臣等奏貴州省封貯
銀三十萬兩。上年調撥官兵案內。經該撫題
咨。陸續動用。自應再為籌備。昨臣等請於江
蘇兩淮。撥銀八十萬兩。奉有撥給貴州三十

萬兩餘著酌撥湖北湖南河南之旨查湖北湖南額徵銀數俱較河南減少請各撥二十萬兩交該二省收貯備用併撥給貴州之項共七十萬兩至河南額徵銀兩本屬寬裕又現存酌留銀三十餘萬兩似可毋庸協撥報聞○甲子

上御乾清門聽政○遣官祭

先醫之神○諭軍機大臣等朕前屢降諭旨因明瑞深入勦賊如大功指日可成甚善若

一時不能勦辦與其徒傷精銳不如暫時徹兵令明瑞馳驛來京熟籌該處情形再圖秋冬大舉今思木邦為扼要之區明瑞接奉朕連次徹兵諭旨即將大兵屯駐木邦滿兵交觀音保綠營兵交總兵喬冲杓等管轄駐守明瑞即與珠魯訥馳驛來京此際明瑞之兵已回木邦否事機如何著速行奏聞○吏部議准兩廣總督李侍堯奏稱廣西義寧縣所屬之龍勝地方烟瘴深重水土惡劣請將原

定苗疆久任之桂林府龍勝通判并五年俸滿在任候陞之龍勝巡檢二缺俱改為三年俸滿徹回內地候陞其原定駐劄龍勝五年俸滿保題之義寧協副將左營都司二缺改為三年俸滿在任候陞從之○轉禮部右侍郎諾穆渾為左侍郎以正黃旗滿洲副都統德福為禮部右侍郎○以通政司副使王鏐為太常寺卿○乙丑遣官祭

關帝廟○諭軍機大臣等滇省辦運銅觔以供各省鼓鑄所關甚為緊要上年冬間戶部因鄂寧咨現在辦理軍需牛馬不能赴廠應用油米炭到廠亦少以致辦銅短絀未能如數應付委員採買請令各省自行籌畫等語戶部以各省赴滇採運供鑄未便貽誤卯期議令將本年應運京銅暫行緩解一半撥給各省以資鼓鑄仍令多方設法調劑照舊辦買供用當即照議允行今聞明山奏陝省第五運銅觔業經委員領項赴滇購買一摺因

思各省採辦滇銅例有程限必得源源接濟方能無誤開鑪今滇省軍務未能即竣夫馬米糧尚須籌畫但鼓鑄錢文關係民間日用未便因軍需緊急而視銅餉為末務若不即為熟籌妥辦則採辦之員勢必守候耽延致各省錢局不能接鑄流通所係非淺鄂寧現在永昌綜理軍務自難分身兼顧但該處銅廠尚有總辦道員開採銅餉乃其專責自當隨時籌畫以裕泉流即或牛馬稍缺亦當設

法通融或米炭短少價昂並不妨奏明暫增定值小民見有利可趨自必踴躍從事一切斷不至於掣肘俟大功告成之後仍可按照舊定章程如此則籌餉辦銅原可兩不相礙著傳諭鄂寧嚴飭委辦道員妥協經理毋稍稽誤○鑲黃旗滿洲都統奏請將明瑞奎林所兼之騎都尉雲騎尉仍各令其兼襲得旨明瑞原襲之承恩公乃伊一族皆有分者是

色奮勉經朕加恩將伊舊襲之承恩公令伊弟奎林承襲另賞伊一公爵如由騎都尉照例加增豈易至頭等公爵若如所奏仍令兼襲設有由侯爵晉封公爵者其侯爵又應另襲乎所奏殊屬不曉事體都統和親王副都統傅勒赫著交部察議副都統傅玉尤不應列名同奏明瑞乃伊之姪伊知有此奏不行阻止著交部嚴察議奏○黑龍江將軍富僧阿等奏查向來發遣黑龍江為奴人犯俱係賞給出力兵丁至官員等例不賞給但邊地官員受田耕種全賴奴僕力作且各員內有軍功差使俱甚勤奮而家計艱難者請嗣後准於發遣為奴人犯二十分中以一分賞給出力官員得旨如所請行○雲南巡撫鄂寧奏查此次大舉經將軍明瑞商定由猛密木邦兩路進剿至前途會同以壯聲援乃額勒登額譚五格為猛密一路統領久駐老官屯既不能攻破賊寨又不能繞道進取轉退回

早塔老師糜餉。臣因額勒登額久歷戎行。退回早塔。必有長策。乃名為誘賊。實未設伏出奇。反使賊匪得以連築木柵。致明瑞大兵深入。不能會合援應。賊匪得以要截木邦。肆其猖獗。道路阻梗。大軍音信不通。臣恐他處檄調官兵。緩不濟急。隨將汎卡各兵。盡數撥往。并飛行額勒登額等。速為援應。伊等果具人心。即當速往。勒逐接應。明瑞大營。乃半月來。經臣七次飛催。尚未前抵木邦。致臣遣去之

遊擊袁夢麟。守備陳言志。所帶兵八百餘名。因無接應。被賊衝散。置將軍明瑞於膜外。坐失事機。實屬罪不容誅。應請旨將額勒登額。譴五格。嚴加治罪。以昭炯戒。得旨。有旨諭部。○又奏。臣前與將軍明瑞熟商。大兵前進。直搗巢穴。賊匪自顧不暇。必不能旁及。是以將可用之兵。明瑞盡行帶往。僅留一千數百名。於杉木籠等處防禦。永昌亦祇留數百。以運軍糧。而普洱一路。又離阿瓦遼遠。其餘皆懦

弱之兵。未便前進。致成鞭長莫及之勢。得旨。朕早知此事。去歲朕及爾等。皆失於輕敵。然悔之於前。不若慎之於後。另行熟籌。無不可成之事也。又奏。臣妄意額勒登額熟練戎行。自必具有籌畫。乃如此非謬。未早奏。應將臣交部治罪。得旨。朕謂此人不可獨當一面。去歲已屢諭汝等。豈今日事後之言乎。爾等實應服朕。將此與明瑞看。目下汝所辦尚妥。此可寬矣。又奏。臣以我兵兩路深入。賊匪必

顧巢穴。木邦駐兵數千。已不為少。旁無可慮。不意賊匪狡詐百端。俟明瑞深入。後復聚眾侵擾木邦。得旨。即朕亦如此想。此即輕敵之處。又豈料滇兵懦弱如此乎。又奏。珠魯訥不能先事豫防。又不奮勇攻殺。以致賊匪四面猖獗。援兵又緩不濟急。得旨。伊乃初次辦理軍情。罪尚可寬。非若額勒登額有心誤事。又奏。永昌為各路總匯之地。兵馬糧石。均須豫籌。臣是以未敢擅離。現在軍務緊急。更須於

永昌總為料理。未敢冒昧請往。致有貽誤。得旨。汝此時豈可離永昌。與前降旨時情形不同。不去者正是。若去。更大不是矣。○禮部題。朝鮮國王李昫遣使表賀。

萬壽冬至元旦三大節。及進歲貢方物。賞賚筵宴如例。○原任山東巡撫李清時疏報。濰縣乾隆三十一年分勸墾荒田一項五十五畝。有奇。○是日起。

上以祭

社稷壇。齋戒三日。○丙寅。諭緬甸本南徼么膺。久置化外。原不足重煩天朝兵力。即與沿邊土司。蠻觸相尋。亦屬事所常有。封疆大吏。果能綏靖有方。俾知懾我德威。自可相安無事。乃自愛必達。吳達善等先後姑息因循。不克示之節制。遂致養癰貽患。及劉藻以書生接任。一聞與土境交訐。無故自生惶擾。既以貽誤邊陲。輕生殞命。因令楊應琚往督滇省。意其久稱歷練。自可不動聲色。示以創懲。便可

一舉集事。詎伊始則意在招納投誠。旋墮賊計。一經棘手。措置茫然。復以病迷之際。甘受人愚。且不惜懷欺罔上。乖張僨事。更僕難言。其實或稱莽匪。或稱木匪。究與緬酋是二是一。且不能悉其種類。何由責以奏功。因將往事將領。正其失律之誅。以申軍紀。而聲罪之舉。遂至勢難中輟。其實朕於此等不足比數之小醜。何嘗有必欲用兵之意。即至一誤再誤。不得已命明瑞往蒞其事。然啟行之前。但授以總督。並不冠以將軍之號。本意固曉然可見。中外臣民。宜無不共知者。從來重言用兵之人。每云得其人。不足臣。得其地。不足守。若蠢茲緬匪。并難齒於不足臣。不足守之列。而當新疆式闢之後。幅隕二萬餘里。若準夷回部。莫不為我臣僕。又何有於彈丸僻處。勝不為武之緬匪乎。即在辦理西陲之始。亦因車凌車凌烏巴什等請師問罪。因為命將申討。其後逆回霍集占等。復有負恩反噬之事。

是以驅我勝兵。乘勢埽蕩。蓋皆出於不得已。並非有意武功。今該酋惜駭。始則侵擾土境。繼乃抗拒顏行。若不急加翦滅。何以申國憲而輯邊隅。惟是明瑞受任之日。朕以輕量窮蠻。謂其不值張皇措置。惟簡派巴圖魯侍衛官兵百人。並選健銳火器二營勁旅三千人。以為可備軍營調遣之用。無如滇省綠營弁卒。經楊應琚不善駕馭。以致恇怯性成。遇賊輒退。不足充用。而命往禁軍。在在分資調撥。未免不敷。是朕之蔑視緬酋。未為深思遠計。不得不引為已過者。然兵之強弱。視將之能否。如明瑞之殫誠勵衆。行間莫不自奮。觀於白小之立毀木城。蠻結之連拔十六寨。如此陷銳摧堅。即綠營亦何嘗無感激効命之人哉。其猛密一路。明瑞初議額勒登額譚五格督領前進。朕即為傳諭。額勒登額只可供人驅使。不能獨當一面。而譚五格未經戰陣。又係內務府微末出身。器局本小。不足以壓衆。

諄訓不啻再三。軍機大臣聞之至熟。後乃命額爾景額為叅贊。以資調度。詎伊病故之後。二人果皆觀望不前。而索柱等駐防天生橋。錫箔江等處。以已據之險。亦皆棄而不守。遂任擊敗餘賊。潛行滋擾木邦。設使去年即用阿里袞分勦猛密。舒赫德鎮守木邦。居中接應。大功早已告成。特以其事本屬不值大舉。是以未經策遣。今猛密既已貽誤。無從追悔。現命阿里袞等赴滇。整理戎行。率兵繼進。伊等身為大臣。自能和衷集事。動出萬全。至朕於臣工功罪。一切各如其人所自取。絲毫不存成見。即如明瑞晉加公爵。厚加優賞。緣前在西路軍營。屢著勲績。現又鼓勵將士。督率有方。是以特示優崇。而鄂寧駐劄永昌。籌辦軍儲等項。頗屬盡心。朕亦深為嘉許。若珠魯訥駐守木邦。其權衡失當之處。惟在妄誅降匪一節。賊黨因生疑懼。但此乃其限於才識所致。論其悉力守禦。與賊相持。即係任事出

力之員。並不加之責備。惟額勒登額。於接應將軍之事。視同膜外。及鄂寧調赴木邦。策應七檄不行。其意猶以林守早塔。於兵眾並無損失。欲為卸責之計。其居心豈可復問。譚五格。雖較額勒登額。清罪有間。而以提督領兵之大員。附和隨同推諉。亦自有應得之罪。總之軍行勸懲。全在信賞必罰。凡諸臣有心之惡。與無心之過。雖尋常辦理公務。無不鑑空衡平。諸王大臣固已共聞共見。况在行師重

寄。尚可稍容。畸重畸輕。致乖馭眾之道乎。明瑞現在沿途殲勦。屢挫賊鋒。兼之攻克猛弄。搜獲糧石。以濟儲積。則雖懸軍深入。後乏應援。而士飽馬騰。無虞匱竭。是皆仰荷

上天恩眷。曲加護佑。此後在事臣工。自必益知奮勉。共奏膚功。以為外夷敢抗天威者之炯戒。所有用兵始末。恐中外未能盡曉。著將此通諭知之。○又諭曰。將軍公明瑞統軍進勦。屢殄賊兵。自蠻結連拔十六城。進至宋賽。復

趨猛密。乘勝直前。軍威克振。今據鄂寧奏報。明瑞現由猛弄一帶。因糧破壘。將次旋師。著伊第公奎林。馳驛往迎。所有隨營將士。奮勵用命。勞勩可嘉。並著宣旨優獎。○又諭曰。譚五格。以提督分統官兵。不能奮勇攻勦。乃退回早塔。逗遛不前。貽誤軍機。現在降旨革職。拏問。所遺雲南提督員缺。著立柱補授。即馳驛速赴軍營。○又諭曰。丁田樹之子。與尤拔世家。今爭毆一事。該御史既以職係巡城。又

事關親屬。自應據實奏聞。或令伊子等赴該管巡城處訴理。方為得體。乃竟不避嫌疑。徑行飭役查拏。移交北城辦理。而興德朱嵇等。明知事涉同官之子。又不奏請交部。遂爾審結完案。此事釁起闕毆。案情本非重大。而於政體官方。深有關係。不可不防其漸。明季臺諫諸臣。每以誼屬同寅。彼此連為一氣。牢不可破。最為班聯惡習。朕屢經降旨訓誡。以冀力挽頽風。豈可令伊等復萌此等伎倆耶。丁

田樹興德朱嵇俱著解任將此案情節一併交與刑部秉公確訊具奏其中城滿御史書通阿有無扶同瞻顧丁田樹之處亦著一併傳訊尋刑部奏此案釁起鬪毆委無別情但巡視中城給事中丁田樹徑將人犯自行查拏巡視北城御史興德給事中朱嵇不避嫌疑遽行審結均請交部嚴加議處書通阿隨同丁田樹備文移送請一併交部察議從之○又諭圓明園八旗滋生銀兩向來均以一分生息乃於正借之外復有以二分取息出借者其辦理起自何年曾否奏明著軍機大臣會同管理圓明園旗務大臣查明具奏○諭軍機大臣等據鄂寧奏額勒登額譚五格為猛密一路官兵統領乃於老官屯久駐既不能攻克賊柵轉行退回旱塔後令其前赴木邦珠魯訥軍營應援飛催七次尚未往抵木邦坐失事機實為罪不容誅等語前鄂寧奏孫爾桂往探情形摺內已批令應將額勒

登額等嚴行叅奏今直待奉到此旨始為此奏辦理已在事後但額勒登額為人止可供人驅策不能獨當一面譚五格局面甚小朕亦早已見及屢向明瑞降旨不必令其分統一路詎伊等自額爾景額病故之後遷延觀望種種坐失事機覈其情罪則額勒登額既以畏葸貽誤復自以為堅守不前弁兵別無損失尚欲藉此以為無過可摘殊不思軍行何事如此視同膜外其心實不可問額勒登額已有旨拏解來京治罪至譚五格之罪較額勒登額之有心貽誤原屬有間然以提督領兵亦當力為奮勉乃竟因循推諉軍紀攸關自有應得之咎著諭令鄂寧知悉將伊一併革職拏解送京所有伊等任所贓財並著一併查抄朕於臣工功罪從不存絲毫成見在有心之惡法在必懲如其事非才力所及偶致蹉跌而其過本不出於有意亦必深為原諒如珠魯訥之在木邦惟將沙練正法一

節不免權衡失當致匪徒懷疑滋事固不得為無過但其兢兢固守能不改其本心何嘗過為責備此即其明驗也著將此旨亦令珠魯訥知之至鄂寧現在永昌料理一切軍務繁多所奏稱未敢親往軍營致有貽誤所見允協已於摺內批示矣將此一併傳諭阿里衮鄂寧并珠魯訥知之○又諭前經降旨令明瑞回至木邦即來京面受機宜再行前往辦理進勦事務計明瑞起身時阿里衮亦已到滇所有雲貴總督印務即著阿里衮暫行署理留駐永昌鄂寧可將現辦軍營諸事交代暫回省城將地方應辦事件悉心料理即如採買鼓鑄銅餉之類及一切吏治民務皆需該撫親行酌辦不能遠駐永昌分身兼顧俟明瑞自京回滇將屆進兵之期鄂寧再行前駐永昌照料一切至伊此時雖回省城專辦巡撫之事而軍行所需辦理諸務仍係鄂寧分內之責不特阿里衮暫署時不可膜視

即明瑞回滇後一切仍當鄂寧力任不容稍諉也至鄂寧簡任巡撫未久此次辦理軍營諸事尚屬妥協以後務期益加奮勉以副委任將此諭令鄂寧並明瑞阿里衮知之總之爾三人合為一人方於事有濟○又諭朕因額勒登額此次辦理諸事不善令阿里衮迅速前往諸事相機辦理朕現今明瑞回至木邦後馳驛來京以阿里衮暫署雲貴總督著傳諭阿里衮如明瑞尚無至木邦信息即急速前往帶領額勒登額之兵接應大營并將額勒登額拏解前來○又諭此次進勦緬匪將軍公明瑞統領兵弁奮勉深入所向鼓勇直前深可嘉尚師旋之日著明瑞阿里衮鄂寧查明從優獎賞以示鼓勵至額勒登額一路既不能力攻老官屯甚且退回旱塔種種逗遛貽誤並無出力之處並著明瑞等詳諭弁兵汝等同在行間祇因統率非人以致眾人不能自著功績咎雖不在爾等但既無成

勞可見。自難復邀獎賞。現在正須整兵繼進。爾等自當奮勉自効。以受殊恩。至其攻勦賊匪。柵寨軍士。得傷陣亡。情殊堪憫。即著明瑞等。覈實查明。照例請卹。再據鄂寧奏。遊擊袁夢麟。守備陳言志。先後帶兵八百餘名。前援木邦。俱被賊匪衝散等語。滇省兵丁積習怯懦不堪。已斷難期其出力用命。所報衝散情形。未據該撫分晰陳明。恐其中不無捏飾潰逃情事。並著明瑞等。詳悉查辦覆奏。可將此

傳諭知之。○又諭據高晉奏。將江南省駐防綠營生息本銀。盡行撤回。報部撥用等語。現在雲南辦理緬匪。以此撥項應用。尤為便捷。著傳諭高晉。即將此項銀兩。委員解送永昌存貯備用。○又諭昨曾降旨。阿爾泰將從前奏明備用馬一千六百匹。加意餵養。聽候調撥。再於各營驛內。量力通籌。酌選臙壯之馬。連前共數千匹。並購辦牛隻數千頭。以備撥解。此時滇省軍務未竣。現派京兵分撥前往。

俟冬間厚集進勦。須寬裕裹糧。以濟軍食。需用牛馬甚多。著傳諭阿爾泰。多覓馬匹牛隻。派委妥協員弁。儘數解往。並酌量程期。遠近從容運解。毋致牲力疲乏。以資軍行實濟。○又諭昨曾降旨。李侍堯等。選辦馬匹數千。豫備撥解滇省。俟諭旨到時。即行撥送。此時滇省軍務未竣。現派京兵分撥前往。俟冬間厚集進勦。須寬裕裹糧。以濟軍食。需用牛馬甚多。著李侍堯。即於兩廣地方。多覓馬數千匹。

並於廣西產牛地方。購辦牛數千頭。儘數撥解。李侍堯接奉此旨。將廣東馬匹妥辦。即行馳赴廣西。會同宋邦綏。妥協經理。至運解牛馬。務須選派妥協員弁。按程站遠近。從容解往。毋致牲力疲乏。以資軍營實濟。並將此諭令鐘音宋邦綏知之。○又諭現在征勦緬匪。需用水師兵丁。吉林兵平日渡河戰陣。勇敢得力。著傳諭恒祿等。於該處兵內。擇熟習水性。能造船者。酌派一千名。令明亮帶領來京。

到時即授明亮為叅贊大臣領兵前往○又諭現在降旨酌調吉林所屬熟悉水性兵一千名并福建水師三千名豫備分路會剿所需駕駛船隻此時即應豫為造辦庶免緩不及濟著傳諭鄂寧將一切需用物料迅即購備齊全並知會楚省選撥熟習造船兵匠星即赴滇辦理再上年明瑞摺奏於沿江將木梯順流飄下原因不用水師故作疑兵之意今趨辦船隻以利師行則不可先期洩漏致

賊匪得為豫備應於新街上游內地與賊人隔遠之處慎密妥辦毋令竹頭木屑稍入江流使之猝不及防鄂寧可約計船隻足數四千人之用上緊豫造完足以待冬初應用並將此諭令叅贊大臣阿里衮知之尋奏新街上游水路與內地相通者乃騰越州西南之銀江一帶水道紆迴崇山屈曲舟楫不能通達其南甸所屬蓋西檳榔江直至壩尾二百餘里水深數尺數寸不等然均係砂石節節

坎壈人力決難開鑿得旨既如此則造船一事竟可不言矣○丁卯祭

先師孔子遣大學士尹繼善行禮○諭曰紀昀在翰林內學問素優予以外任轉恐不能盡其所長著以四品銜仍留庶子之任所有都勻府知府員缺著王國祚補授○又諭進剿緬匪一事昨經降旨將用兵始末宣示中外現在軍務尚未能即時告竣仍須簡派京兵前往所有經過各省絲毫不累閭閻惟沿途夫馬運送或不無稍資民力之處業經疊沛殊恩於上年將湖南湖北貴州三省軍行所過地方錢糧全行緩徵並今歲加賞直隸河南等五省藩庫地糧銀各十萬兩以資辦理俾小民均霑實惠在百姓等深明大義急公固出於惻誠而朕之軫念羣黎推恩亦倍加優渥昨已有旨將雲南一省本年地丁錢糧分別蠲免著再加恩將直隸河南湖北湖南貴州五省所有軍行經過各處本年地丁

錢糧概予緩徵用普恩澤該督撫等務期實力飭屬遵照妥辦副朕體卹民隱至意該部遵諭速行○諭軍機大臣等前據珠魯訥寄鄂寧咨摺內稱緬匪乞降經楊重英親往察看所有賊衆情形楊重英既得之目擊自必詳悉周知但摺內未經分晰聲敘現已降旨令明瑞珠魯訥速行馳驛赴京面示方畧明瑞等可即將楊重英隨帶至京以備詢問著將此傳諭明瑞珠魯訥並鄂寧知之○又諭

彰寶奏達色急圖鹽數加多吳雲從迎合其意遂以虛數捏報短少鹽觔現在不敷配運俟新任鹽臣到日再行查辦等語吳雲從前以徇商沽名被達色叅劾之後輒授意地方官羅列達色款蹟計圖報復業經四達等審擬交部覈議今彰寶所奏虛報短少一節覈其情事於前案重款未必更有增加毋庸另為交議惟是吳雲從在運使任內有年鹽觔短缺既不早為籌辦復又以虛數詳報實屬

有非職守如此項短缺虛數鹽觔今年不能澆灑補足即將配運不敷之數著落吳雲從賠補該撫已調任山東著即交與蘇爾德普福遵照辦理並將此傳諭知之○雲南巡撫鄂寧奏正月二十六日據怕免臺站遞到將軍明瑞移珠魯訥咨文因木邦道路不通夷人由猛尾猛卯一帶遞交遮放土司送至永昌臣折閱來文查大山一路去木邦不遠當即飛札額勒登額加緊速赴木邦取道會合謹將明瑞原札六張呈覽得旨知道了速將後得音信奏來○戊辰祭

大社

大稷

上親詣行禮○詣暢春園問

皇太后安○幸圓明園○以署直隸天津鎮總

兵楊克信為湖南鎮筵鎮總兵○已巳

孝康章皇后忌辰遣官祭

孝陵○諭據阿桂奏新授之伊犁伊什罕伯克

阿克伯克一時不能到任。欲留素資瑞協助。伊弟鄂囉木咱布辦理屯田事務。詢之素資瑞。據稱情願再留一二年等語。素資瑞感激。朕恩。請留伊犁協辦屯務。甚屬可嘉。著賞緞四疋。以示鼓勵。○兵部議准。直隸總督方觀承奏稱。獨石。張家口。二口同屬邊地。張家口副將。向例定為滿缺。查獨石口一協。管轄多倫諾爾。兼有稽查魚諾兒。克什克騰。山場事務。請將該協亦定為滿缺。將來遇輪調滿員缺

出。請與張家口副將一體揀選。從之。○四川總督阿爾泰奏。准雲南撫臣鄂寧咨。調川省上年揀備滿營馬一千六百匹。並令動項辦壯騾一千四百頭。一併解滇。事關軍需。臣即派委弁兵。將揀備馬分起押解。一面採買騾頭。隨有隨解。因同途並運。未免擁擠。若挨次魚貫而進。又恐耽延。酌將滿營馬由川東之永寧。取道貴州畢節及滇境宣威一路。赴永昌。其騾頭由川南之建昌。取道滇境之元謀。

趙州一路赴永昌。得旨。恐尚有應用之處。加意購覓。以濟軍需。毋誤。○以直隸通州協副將達翎阿。署天津鎮總兵。○庚午。遣官祭昭忠祠。○諭據阿桂等奏。伊犁屯田回人。應還三十年未及入倉。被雪潮溼。徽變糧。並三十一年被災。未能交納糧。共七萬餘石。曾經展限四年帶還。其去年應帶交糧一萬九千餘石。已蒙恩寬免外。尚有三年應行帶交糧五萬九千餘石等語。回人等所欠糧石。前經朕

加恩。展四年完交。且將上年應帶交糧一萬餘石。又經朕加恩寬免。其餘未完糧石。自應令其照數帶交。但回人等。俱係甫經移駐伊犁。生業尚未充裕。若每年交納正糧外。又令帶還糧石。於伊等生計。未免拮据。所有回人等。應分限三年帶交糧五萬餘石。俱著加恩免其交納。○軍機大臣等議奏。此次豫備雲南進剿馬匹。前議於西安駐防營內撥三千。荆州撥二千。第大兵進討。尚應寬為籌備。查

湖廣接壤雲貴。且多係土馬。撥往協濟。程途既便。馬性亦為馴習。荊州駐防營馬四千。前已調撥二千。所餘二千。應請一併撥往。再於兩湖附近大路各營驛內。挑選一二千匹解往。其荊州營馬之缺。於河南附近標營撥補。河南馬缺。於直隸撥補。從之。○吏部議准。陞任浙江按察使歐陽永椅奏稱。督撫新蒞。司道大員。止許差役至本省境內迎接一次。府州縣官。許於本管地方十里內躬迎。其並不經由及離城十里之外之屬員。概不准其迎接。違者請議處。從之。○又議准。陝甘總督吳達善奏稱。烏魯木齊特訥格爾地方。舊設巡檢一員。所管民戶屯糧等事。均關緊要。任重職微。實難彈壓。請裁事簡之陝西扶風縣縣丞一缺。改為特訥格爾縣丞。再迪化城路當伊犁雅爾之衝。現設同知一員。遇有查辦事件。難以遠離職守。請將特訥格爾巡檢一缺。改為迪化城巡檢。從之。○戶部議准。直隸總

督方觀承疏稱。乾隆三十一年。奉旨賞給額魯特牧廠。占用熱河廳民地五頃四十三畝。有奇。請除糧額。並照例賞給地價。從之。○禮部議覆陝西學政吳綬詔條陳學校規制各事宜。○生童命名。往往好為怪異。甚至僭越誇大。毫無避忌。現飭各學嚴查更正。請通飭府州縣。於收考時。查勘更改。○府州縣試閱卷。近例不許延請本屬教官。查本地書院院長。及他省流寓文人。地方官往往延請校閱。殊非遠嫌防弊之道。請通行禁止。其隔屬延請者。仍令謹密迅速。於進行署宿之際。一體關防。○童生未隸庠序。原與生員有間。頂冒各案。地方官或委各學查詳。虛實固難憑信。甚或扶同捏飾。請責成提調辦理。不得更委教官。均應如所請行。至所奏庠生濫保鎗信。除知情受賄者。革除衣頂。問擬外。其一時疎忽。及被人欺蔽者。請即停廩開缺。降作附生等語。查冒保鎗代例。應斥革。若分別降附。則

知情冒保之廩生轉得藉詞託故避重就輕更開有意作奸之漸應毋庸議從之○河南巡撫阿思哈奏豫省辦理兵差蒙恩賞銀十萬兩當即謄黃徧行曉諭據各屬士民環集謝恩并呈稱大兵即日凱旋請將賞銀暫存公處俟官兵過境儘先給用事竣將此項即作為民間協濟等語查豫省一百八屬每屬有車糧戶不下數千百家雖有細冊可稽而逐戶零星賞給勢難一一清楚似應俯如所

請辦理報聞○甘肅布政使佛德奏雲南茂隆廠在滾弄江以內與木邦遠隔一江並不毗連臣前率據訛謬傳聞冒昧陳奏請交部從重議處得旨汝在京言之鑿鑿有據何謂率據訛謬傳聞足見汝諸事不留心據實惟循外官欺罔惡習耳實應議處○辛未

上詣暢春園問

皇太后安○自圓明園啟鑾謁

泰陵○諭前據方觀承奏寶直局淘洗餘銅請

照京局之例變價賞給等因經戶部以各省鼓鑄工價原題給錢並無以銀給發之案議駁今念保局開鑄之初原即與京局相同且鑪匠雇自京師而目下錢價又為較賤其但願領銀不肯領錢亦屬情理所應有著加恩將寶直局所有淘洗餘銅准照京局之例一體變價賞給鑪匠俾得寬裕辦公以示體卹○又諭曰佛德前在京陛見因伊曾任永昌府知府詢以該處情形據稱木邦南境有茂

隆銀廠凡行廠事件及廠委文稟俱由木邦等語當經傳旨詢問鄂寧則茂隆廠在木邦東南中阻一江彼此隔越並不毗連佛德所奏全屬舛謬因令明白回奏伊亦自知難以自解惟有請旨交部從重議處足見平日於地方諸事並不留心據實辦理雖在任有年而該處情形全然不知體察一經垂問輒爾冒昧陳奏此等隨口支吾言之轉似鑿鑿有據深屬外官惡習佛德著交部嚴加議處尋

議上得旨佛德著降二級調用○又諭大兵進勒緬匪所有鄰近雲南之四川省前經調撥兵丁牛馬以濟軍行現在尚有續行調撥之事所有該省兵丁等項經過州縣一應接遞護送除動支公項外不無稍資民力著加恩將川省赴滇兵丁等項所過該省地方本年應徵地丁錢糧緩至次年徵收以示嘉惠閭閻至意該部遵諭速行○諭軍機大臣等現在添派滿兵六千索倫兵一千吉林兵一

千及福建水師兵三千進勒緬匪但必知該處實在情形方可定議著速傳諭明瑞如秋冬可一鼓殲賊則各處之兵即應迅發或事有不能萬全之處亦未可定明瑞係閱歷諳練之人又深悉雲南形勢可一面熟籌奏聞一面來京○又諭進勒緬匪綠營兵甚為無用著派永瑞帶領荆州滿兵二千五百名雅郎阿帶領成都滿兵一千五百名迅往永昌其荆州將軍印務著永瑞奏派副都統一員

署理成都副都統印務著阿爾泰兼署○又諭雲南永昌等處宜速派滿兵以壯軍勢現於四川湖廣簡調滿兵業經另降諭旨著傳諭舒赫德將由京派往之滿兵六千速即會同該管大臣等按隊料理起程健銳火器二營皆係豐訥亨管轄著即回京與舒赫德會同該管大臣等妥辦○雲南巡撫鄂寧奏木邦臺站被賊衝散將軍大兵在外急須援應額勒登額等擁兵不進臣前後十次飛催置

若罔聞茲於二月初一日據副將王振元孫爾桂稟稱額勒登額譚五格因猛卯有賊衝出將滿漢官兵沙練俱撤回蠻籠駐劄並徹虎踞鐵壁等關官兵同至蠻籠另候分撥等語不勝駭異查蠻籠在隴川之內係內地土司地方額勒登額等何以漸次退回內地即使猛卯有賊何難奮力勒逐乃退入蠻籠離宛頂木邦一路更為遙遠臣飛行總兵喬冲杓帶兵星夜前往通路接應將軍大兵額勒

登額等可痛恨之處。實難枚舉。得旨實實可恨。○又奏據木邦軍營之前鋒委署筆帖式官德稟稱木邦四面被賊圍困。至正月十八日晚間。將叅贊珠魯訥中營圍住。五更時。珠魯訥自盡身故等語。查木邦既已殘破。急須整頓恢復。現將陸續調到之兵。飛令前進。其已調未到者。催令隨到。隨即撥往。并覓素諳緬地道路之人。給與清字書札。令其探聽將軍明瑞大營投遞。知會明瑞。現在兩路光景。酌量統兵勦回。再圖進取。得旨一得信息。即速具奏。○是日駐蹕黃新莊行宮。○壬申。兵部奏八旗武職官員。一品至八品。近俱增有從階。惟查旗員降補。例分滿洲蒙古漢軍。指有一定應補之缺。其統領大員及品級相當而職任不相類者。俱不以為降補之階。若照正從階級。分別降補。如從一品之都統將軍。俱係統領大員。從二品之散秩大臣。並非額設之缺。從三品至從八品之護衛典儀等官。

俱係王府所屬。均未便定為降補之階。嗣後旗員降補。請仍照中樞政考內指缺補用。其降留之員。應照降級食俸者。亦照舊例辦理。毋庸分別正從。從之。○是日駐蹕半壁店行宮。○癸酉。諭軍機大臣等。前因額勒登額帶兵至老官屯。不能勦辦賊匪。反移兵旱塔。致賊乘隙扎立多寨。仍不奮勉打仗。安坐貽誤。抄其家產時。以伊所犯之罪。尚不至連坐弟兄。故止拏伊父子監禁。伊弟隆安保家產。仍行賞還。今明瑞深入木邦。復被賊圍。鄂寧咨催十餘次。伊並不急速援應。帶兵退回蠻籠內地。伊隊內有兵數千。反調取孫爾桂之兵。使棄要隘。保護伊等。情甚可惡。著傳諭舒赫德。仍將隆安保家產查抄。並拏交刑部監禁。○又諭。征勒緬匪。前經降旨派索倫兵一千名。由京發往。但為數無多。恐到滇不敷差遣。著傳諭富僧阿等。再於索倫達呼爾內。派出一千名。照軍機大臣原議辦理。陸續由京前

往續派之兵。即著達什扎布。里古子。統領前來。應得之項。照噶布舒阿提木保之例給予。○又諭據良卿覆奏。恩賞兵差銀兩。現在確查散給。務期無濫無遺等語。所辦非是。前該撫摺奏。幫貼夫馬銀數。多係鄉保措辦。地方官無從覈算。則現在散給。憑何稽覈。若約畧村莊分派。其勢非濫即遺。況有胥吏地保。從中高下其手。民間安得均霑實惠。殊不中事理之竅要。前經軍機大臣議准。行令各督撫酌量情形。將官賞銀兩。或留給大兵凱旋。或即以為繼進官兵。一切協助運送之用。該撫奉到前次知會。自可遵照妥辦。至所稱封貯銀兩。亦已諭部撥給三十萬兩備用矣。將此一併傳諭知之。○署貴州巡撫良卿。貴州提督李國柱。奏准雲南撫臣鄂寧來咨。於黔省再採買馬二千匹。查下游各府。距滇較遠。惟恐採送稽遲。當飭上游之安順。遵義。南籠三府。各買馬四百。貴陽。大定二府。各買三百。平

實錄本全書中

聖上

越一府。買二百。派員速解備用。報聞。○是日。駐蹕梁格莊行宮。

實錄本全書中

聖上

大清高宗法天隆運至誠先覺體元立極敷文奮武孝慈神聖純皇帝實錄卷之八百四

大清高宗法天隆運至誠先覺體元立極敷文奮武孝慈神聖純皇帝實錄卷之八百五

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事務處管理處

吏部理藩院事務處黃旗滿洲都統世襲將軍都統軍功七級隨帶加級尋常加二級軍功紀錄一次 戶部

總裁官經筵講官太子太傅文華殿大學士文淵閣領閣事稽察欽奉 上諭事務處管理處刑部都察院

世襲將軍都統軍功九級隨帶加二級文加二級 重誥內大臣戶部尚書順直總督滿洲都統軍功紀錄五次

尋常紀錄十四次 臣德英經筵講官太子少保工部尚書紀錄六次 臣曹振鏞等奉

敕修

乾隆三十三年戊子二月甲戌

上謁

泰陵未至碑亭即降輿慟哭步入

隆恩門詣

寶城前行禮躬奠哀慟王以下文武大臣官員

隨行禮○遣官祭

歷代帝王廟○諭兵部議駁直督方觀承題

守備塔進泰親老留直一本所辦甚是已有

旨依議矣文武各官親老調補近省之例乃

係專指漢員而言若旗員身任外官有以親

老為請者俱著回旗在原處當差從前所降諭旨甚明塔進泰既知引漢員之例何以轉將旗員本例置之不問明係規避違行而又戀棧外缺至撫拾取具同鄉官印結等語尤為荒唐可笑試問八旗同一滿洲安得復有同鄉之稱謂乎塔進泰若准其以旗員對品補用不足示儆著回京以驍騎校護軍校等官補用方觀承據該員陳請率行具題亦屬不合並著傳旨申飭○又諭派往雲南之健

銳營兵一千名首隊令巴圖濟爾噶勒帶領二隊令普爾普帶領三隊令達禮善帶領四隊令興兆帶領五隊令玉麟帶領○諭軍機大臣等前經揀選西安滿營馬三千送往永昌備用今需馬更多西安近邊易於購買除原派三千匹外尚有二千著傳諭福祿明令於西安餘馬內儘數擇臚壯者分隊差幹員緩程解送永昌沿途加意餵養不可稍致傷斃其缺額馬照例購覓填補○是日駐蹕

秋瀾村行宮○乙亥諭軍機大臣等雲南進剿緬匪一切調度軍行事務最關緊要江蘇巡撫明德久任封疆且曾隨黃廷桂辦理軍需素稱幹練欲令前赴滇省經理兵馬糧餉諸事必得該撫即速來京先行面授事宜方為妥善現已降旨高晉令其赴蘇兼管撫篆明德著即馳驛起程○又諭曰明德現有旨令其馳驛來京陛見後前赴雲南辦理軍行事宜所有江蘇巡撫事務關係亦屬緊要著

傳諭高晉速即赴蘇兼攝撫篆○雲南巡撫鄂寧奏臣前聞額勒登額等退駐蠻籠之信飛飭孫爾桂等查探據孫爾桂稟稱賊匪近日潛伏猛卯之底麻江邊其邦中山並未見賊虎踞鐵壁關外之賊不知潛伏何處並未竄入旋據額勒登額譚五格札稱賊人將邦中山占踞龍江渡口亦被賊擾擬帶兵由猛岳小道前赴宛頂現今虎踞鐵壁猛卯各路探聽賊有數萬等語查額勒登額等與孫爾

桂所言大相刺謬額勒登額等擁八九千有用之兵不能鼓勇勦賊以致銳氣消磨今又徘徊觀望不能速援木邦乃為此驚惶失措之言必是豫為欺罔張本實實可恨罪不容誅得旨竟誤事至此之極惟有速拏二人解京正法消恨耳○又奏景蒙營外委閻國英楚姚鎮外委朱芳留於宛頂護糧潛行逃匿現已拏獲經總兵喬冲杓在宛頂先後正法得旨覽看此宛頂尚屬無妨近日情形如何

○又奏將軍明瑞遣木邦擺夷線當弄線二今來內地投文臣面加詢問據稱該擺夷係木邦頭目線五格手下之人隨將軍大營自木邦進兵一路俱獲全勝到宋賽往前三站之窩哄地方糧食無可尋覓聞猛弄有糧故徹兵由猛弄一路勦殺打破夷寨得有糧石現在將軍又往勦大山大山土司辦糧數百石解送大營因賊人攔截尚未前進等語臣面加獎賞仍令該擺夷迅即前往探聽得旨

覽此則明瑞大軍自屬無妨。直是額勒登額誤事不淺。可恨可恨。○又奏額勒登額等既退回蠻籠。繞赴宛頂。道路紆迴。必稽時日。今既得將軍明瑞在大山一帶信息。而總兵喬冲杓所帶滇兵。難恃以鼓勇衝突。臣現遣熟悉夷地之通事擺夷。覓路往明瑞軍營。囑其退回宛頂。再行進剿。得旨甚好。看來此時此勢。不能即行進剿。惟待京兵到齊。再商量耳。○調烏魯木齊提督五福為雲南提督。雲南

提督立柱為貴州提督。貴州提督李國柱為湖廣提督。湖廣提督福永為烏魯木齊提督。○是日駐蹕半壁店行宮。○丙子清明節。遣官祭

永陵。

福陵。

昭陵。

昭西陵。

孝陵。

孝東陵。

景陵。

泰陵。○遣官祭

孝賢皇后陵。

端慧皇太子園寢。○諭昨據兵部奏稱。此次派往雲南兵丁。為數較多。兵部車輛。不敷載送。請交五城順天府辦應等語。此項需用車輛。著交與裘日修等。雇備應用。不必令五城分辦。○又諭日鄂寧奏報調度接應軍營情形。各摺所見。俱中窺要。該撫自調任滇撫以來。一切籌畫軍行。具見實心經理。於邊疆事宜。毫無貽誤。又能持以鎮靜。並不稍涉張皇。實不愧為大學士鄂爾泰之子。朕心深為嘉許。著加恩賞給內大臣銜。並賞荷包四個。以示優眷。○諭軍機大臣等。據鄂寧奏額勒登額等不能速援木邦。接應將軍大營。乃捏稱邦中山等處。俱有賊兵。已由猛岳小路前進。宛頂等語。額勒登額諱五格二人。貽誤軍務。

實出情理之外。前曾有旨令該撫拏解來京。但計額勒登額等此時將抵宛頂。該處現在乏人。該撫如尚未將伊等拏問。可俟阿里衮到時再行傳旨鎖拏解京。再索柱。王棟二人前在天生橋錫箔江等處棄避退回。情罪實為可惡。曾降旨將伊等鎖拏。令珠魯訥審明。後即於軍前正法。想珠魯訥未能辦及。此人如已自木邦打仗一次。作何下落。並著查明具奏。○又諭朕連降旨以明瑞帶兵深入

時漸暄熱。若不能勦賊。令其撤回木邦。明瑞即行來京。熟籌再舉之計。今木邦已被賊據。現派京兵及吉林索倫兵即行遣往。昨又調荊州成都滿兵。由彼處趨行前進。明瑞此時想已由大山退回內地。儻回時經過木邦。度兵力可以勦賊。即駐木邦。如賊堅守不出。不必拘泥前旨。徒勞兵力。尚宜暫捨木邦。回駐永昌。以籌再舉。再大山人等接應餱糧甚屬可嘉。宜示獎勵。鄂寧可辦緞匹等物。齎交明

瑞。明瑞接到時。即宜曉諭大山頭人。以此次進兵。爾等恭順可嘉。已奏知大皇帝。大皇帝深加嘉獎。賞給緞疋荷包等物。因天時漸熱。難以直趨阿瓦城。今且撤兵內地。俟再進兵時。必將緬匪盡行勦滅。爾等承受大皇帝深恩。可安心靜守。不須疑懼。將此明白曉諭。頒賞。有應賞給頂帶職銜者。明瑞即傳此旨酌量賞給。目下軍營情形如何。著遇便速行奏聞。○四川總督阿爾泰覆奏滇省軍需緊要

奉旨令臣再行豫備馬匹。并辦牛隻。以候撥用。除駐防滿營馬一千六百匹。及採買騾一千四百頭。業准雲南巡撫鄂寧咨調。分起趕解外。擬再於各營買補額馬內。抽調一千八百匹。通省驛馬內。抽撥二百匹。加意餵飼。俟旨解往。至牛隻行走遲緩。且易倒斃。現擬再辦馱載馬騾一千匹。備撥較之解牛。似為得力。得旨好。即速行辦給。仍嚴交解員。毋致倒斃。○是日駐蹕黃新莊行宮。○丁丑。

上迴鑾詣暢春園問

皇太后安。○幸圓明園。○諭昨降旨將五福調補雲南提督。立柱調補貴州提督。李國柱調補湖廣提督。其烏魯木齊提督員缺。將福永調補。但立柱現在雲南軍營。有應辦事務。不能即赴新任。所有貴州提督。仍著李國柱暫署。湖廣提督。著福永暫署。烏魯木齊提督。著溫福暫署。俟將來立柱到貴州提督任時。李國柱等再行各赴新任。○又諭曰。巴圖濟爾

噶勒領隊到雲南時。著在叅贊大臣上行走。○諭軍機大臣等。昨令喀寧阿前赴湖南。照料送兵事宜。今念黔省民苗雜處。一切備辦差使。尤須經理妥協。已有旨傳諭良卿。令其加意籌辦。喀寧阿著調往貴州。會同該撫悉心商酌。苗人供役。是其本分。固應示以節制。然亦不可不加之體卹。益勵其急公踴躍之心。庶於差務更為有益。所有湖南送兵事務。即著邁拉遜往辦。可將此傳諭喀寧阿。並邁

拉遜知之。○又諭現在續派京兵赴滇進剿緬匪。黔省一切辦運差務。派用民夫之外。勢必兼用苗人供役。伊等出力急公。固屬分所應然。而國家軍行所資。甚關緊要。此等民苗均宜隨時留心體恤。俾伊等益知踴躍奉公。則於軍行方為有益。況前有恩旨加賞銀十萬兩。昨經傳諭該撫。照軍機處原議。妥協籌辦。民苗等有應行賞賚之處。即可於此項內酌量撥用。以示鼓勵。昨令邁拉遜會同該撫

照料。今已改令喀寧阿前來貴州。會同該撫經理。良卿可與喀寧阿悉心體察。固不可過事優柔。徒長苗人驕惰之習。而於服勤襄事之人。亦當酌予獎賞。毋令苗人以勞勩莫恤。稍生含怨。則軍行不致滋擾。而公務尤易於就理。將此傳諭良卿知之。○戊寅。定京察二三等人員。內年至六十五歲以上者。帶領引見。例。諭向來部院各衙門。京察屆期。所有列入一等人員。均由吏部帶領引見。至二三等

留任各官。並無引見之例。該堂官等以其循分供職。無關黜陟之典。且人數衆多。其中即有年力衰庸。不無稍為姑息。人材既難考覈。公務未免曠瘵。大典何由克副。嗣後京察二三等人員內。凡年至六十五歲以上者。並令吏部帶領引見。候朕鑒定。庶曹司不至濫竽戀棧。而該堂官甄別公私。亦可立辨。於澄敘官方。益昭慎重。著為例。○諭軍機大臣等。據宋邦綏奏。接准熊學鵬咨稱。浙江逆犯齊周華書內。有已故謝濟世。贈該犯添聲記敘。移交查辦。當即委員嚴查伊家內。並無此件原稿。惟有所作梅莊雜著一本。中多乖謬。怨悵之語。現將伊子謝夢熊等。研審究擬等語。謝濟世性情乖戾。屢獲罪愆。今閱雜著所簽各條。誠不免語含怨望。使其尚在。自當明正其罪。以昭懲創。但其人已物故多年。自可無庸復加審究。惟伊所作書詞。既多謬妄。不應復任存留。該撫即飭令地方官。將已刷之書。及

原刊板片。盡行查出銷燬。毋使稍有疎漏。著將此傳諭知之。○又諭據宋邦綏奏。請陞見一摺。深屬不知事體。粵西現在因經理解滇軍需牛馬。事關緊要。特令李侍堯前往督辦。宋邦綏身任巡撫。正宜在省會同妥辦。乃轉以來京陞見陳請。是全然不知事理之輕重矣。宋邦綏著傳旨申飭。再昨令該撫等辦送牛馬一事。前據阿爾泰奏稱。四川解滇牛隻。長途運送。多有倒斃。業經改辦驛馬濟用。川省如此。廣西情形。想亦相同。宋邦綏何未奏及。著即與李侍堯悉心籌畫。如牛隻難於致遠。酌量該省情形。兼辦驛馬。務期妥協充裕。以利軍行。並速令李侍堯知之。○署貴州巡撫良卿奏。黔省兵丁。膂力弓馬。雖遜北省。而極能走險耐瘴。滇省辦理緬匪。先後調貴州兵一萬三千名。聞在軍營。甚為得力。查貴州現存營兵一萬九千名。雖於防汛無缺。然亦並無多餘。請於各營兵丁子弟。及土著流寓

民人內酌募鎗礮藤牌兵五千名。交各營操練。儻滇省尚須調撥。先儘舊兵挑選。新兵內如有漢仗技藝可用者。一併入選。即以所餘新兵防守汛卡。將來既可挨補額缺。並可就近調充滇省營伍。黔省各營無虞溢額。得旨所見甚好。即有旨諭。○己卯。

上詣暢春園問

皇太后安。○諭曰。良卿此次辦理雲南調兵之事。盡心料理。著加恩賞戴孔雀翎。○諭軍機

大臣等據良卿奏。請於黔省各營兵丁子弟。及土著流寓民人內酌募兵五千名。以備防守調撥之用。一摺。所奏甚是。具見實心籌畫。深合事宜。已於摺內批示矣。黔省此次調赴征緬之兵。較之滇省綠營尚屬奮勉出力。現在軍務未竣。正資調遣。滇黔連界。傳調較他處尤便。自宜豫行挑選。勤加操練。以備濟師。至於滇兵怯懦性成。動輒逃潰。難以復供驅策。即該處餘丁。漸染惡習。亦不可令其頂補。

充伍。現在雲南逃亡兵額甚多。將來亦須選補。莫若將黔省新兵撥往頂缺。於事更為有益。著該撫廣為儲擇。多多益善。不必限以五千之數。其入選新兵。有情願即赴軍營者。即可令補滇兵缺額。但此內黔兵子弟。或戀其家室故土。不必勉強遣行。其流寓等項應募者。自更無可繫戀。於撥滇充伍尤屬相宜。著傳諭良卿妥協經理。並諭阿里衮鄂寧查明應補兵數若干。知會良卿。並將作何遣送撥補之處。彼此咨商。熟籌妥辦。以收實濟。阿里衮鄂寧良卿等。辦理此事。總宜不動聲色。祇如出自伊等之意。不必云奉旨遵行。更為得體。著一併傳諭知之。○又諭。昨據額勒登額奏稱。綠營兵丁於扎筏過江時。輒行潰散。復將鎗礮任意遺棄。數至千有餘人。此等怯懦性成。罔知軍律。實為法所不宥。但額勒登額營中所帶滿洲勁旅。幾及千數。前派伊等赴滇。原欲令其率領綠營衝鋒陷陣。使疲懦之

衆皆知觀感奮興。庶可轉移積習。額勒登額乃將滿洲兵丁。悉留軍營。以為自護之計。而一切派遣。專令綠營士卒。獨任其勞。不惟調度失當。抑且役使不均。復何以鼓舞綠營士卒。俾知踴躍用命耶。此則額勒登額之顛倒非謬。深堪痛恨。著阿里衮等。將此宣諭綠營兵丁。爾等執法潰逃。本當盡行正法。然係額勒登額統領失宜所致。自當分別辦理。現在額勒登額已令拏解來京。盡法處治。其所屬

綠營兵丁內。如有首先倡率逃竄者。情法更無可恕。自應嚴拏正法。示衆外。其餘附和同逃之兵。罪在統領。此次姑從寬免。以觀後效。可將此傳諭阿里衮。並鄂寧。令其通行曉諭。○軍機大臣等議。覆陝甘總督吳達善奏。稱奉旨於賞給綠營為奴之額魯特內。挑選強壯男丁。撥往雲南邊汛充當馬兵。現在挑選三百四十名。均年在五十歲以下。十八歲以上。酌分四起。間二日行走。即於額魯特內。遴

選明白能事者四名。作為頭目。並派都守等官押護等語。查額魯特兵。人本強壯。此內如曾經戰陣。且精力尚強者。雖年逾五十。正堪挑選。以資出兵打仗。其十八歲以下者。雖係少壯。但或生長內地。未經臨陣衝鋒。且恐漸染綠營習氣。該督等祇應揀選漢仗技藝。儘數撥往。不必拘定年歲額數。即由四川一路赴滇。更為近便。至程途寫遠。兼以山路崎嶇。若僅給予口糧。自行徒步炊爨。不免遲滯。應

如所請。每名日給銀一錢。四名共給車一輛。如遇險路。即以車價雇覓騾馬乘騎。得旨依議速行。○江西巡撫吳紹詩奏。本年輪應江西蠲免漕糧。若全行停運。不但兵弁舵水人等。概置空閒。而南北貨物阻隔。市儈亦恐借此居奇。請將南昌。饒州。南康。廣信。各屬漕三十八萬八千石有奇。於今年豁免。其瑞州。臨江。吉安。撫州。建昌。贛州。各屬漕三十八萬二千石有奇。改於明歲蠲免。得旨著照所請行。

○湖廣總督定長奏。臣抵荊州。會辦派撥滿營馬匹赴滇事宜。現在按起次第起行。臣即順道查察漢陽漢川二縣加賑事務。回省得旨。汝應仍往荊州。辦荊州駐防及京兵往滇之事。鄂寶不能妥協。一切汝極力為之。○調直隸天津鎮總兵存泰為甘肅巴里坤總兵。○庚辰。遣官祭黑龍潭。昭靈沛澤龍王之神。玉泉山。惠濟慈佑龍王之神。○

上至寧壽宮視

溫惠皇貴太妃疾。○諭軍機大臣等。據鄂寧奏稱。額勒登額之兵。計日可至宛頂等語。額勒登額前接鄂寧移咨。如果奮勉進兵。尚可與將軍夾攻痛剿。今事已貽誤。伊即至宛頂接應將軍而出。亦不足以為功。著仍遵朕前旨。將額勒登額譴五格。拏解來京治罪。○兵部議。准湖廣總督定長奏稱。湖北衛昌營遊擊駐鶴峯州。城守備及右司把總駐長樂縣。

之灣潭。相距甚遠。遇緊要事件。未免往返紆迴。請將該守備及右司把總移駐州城。俾得就近辦理。查灣潭地方。兵民無多。請即將原駐州城之千總移於灣潭駐劄。從之。○雲南巡撫鄂寧奏。二月十二日。接効力原任建水州知州徐名道稟稱。差往大山投文之馬夫董上勳。回到宛頂。據稟伊同獵夷二名。自宛頂起身。由暮董寒蓋小路到猛腊。見將軍明瑞大營。扎在坡頂。四圍賊扎營盤七座。伊等住二日。不能進去。是以回來等語。查猛腊係猛育地方。離宛頂不過八站。而此八站。董上勳等只兩三日。即回至宛頂。則取道甚易。臣現飛行額勒登額。喬冲杓等。裹糧速往援應。得旨嘉獎。○又奏。知府郭鵬翀同知陳元震等。解至永昌。訊明。恒怯竄逸屬實。遵旨將該二員極刑處死。至吏目黃詔鳳。係派往辦事之員。竟隨同逃匿。亦應請旨正法。其把總張傑。不過在營聽差。陳元震既假參贊之諭。令

伊護送印信。該弁自不敢不遵。實非竄逃。尚
可寬宥。報聞。○鑄給直隸省分巡直隸天津
河間等處地方兼管河務兵備道。分守口北
兵備道。整飭宣府張獨多三廳等處山東省
分巡兗沂曹兼管水利黃河兵備道。分守登
萊青整飭海防兼管水利兵備道。江西省分
巡吉南贛寧兼管水利兵備道。分巡廣饒九
南兼管水利兵備道。浙江省分巡寧紹台兼
管水利海防兵備道。分巡溫處兵備道兼管
水利事務。湖北省分守安襄鄖兵備道兼管
水利事務。甘肅省撫治西寧兵備道各關防。
從各督撫請也。○添建直隸河間縣倉廩十
五間。從總督方觀承請也。○辛巳。
上御勤政殿聽政。○諭刑部奏盛京將軍咨送
孔興林被王鳳翔毆傷一案。據孔興林供稱。
因行聖公孔昭煥令其前往鐵嶺縣清查族
譜。潛住同族之六十二家。致與王鳳翔角口
被毆等語。曲阜孔氏查修家譜一事。前因其

差人至外省滋事。曾將孔昭煥議處。並下部
議飭禁。如孔昭煥不知悔改。於奉禁之後。仍
復遣人外出。即應嚴加議處。若係孔興林假
託奉差查訪宗支為名。需索不法。亦當查明
重治其罪。所有孔興林是否實係聖裔。果否
係孔昭煥差往鐵嶺之處。均著孔昭煥明白
回奏。到日再降諭旨。至六十二係王鳳翔家
契買家人。王鳳翔因往六十二家比下。孔興
林輒與認為同族。將六十二藏匿。強出尋釁。
是王鳳翔之毆孔興林。因其袒護六十二所
致。與尋常爭毆不同。不應予以笞責。刑部所
擬。尚未得其平。朕辦理庶務。悉惟折衷至當。
即小罰亦期平允。從不稍令絲毫屈抑也。尋
孔昭煥奏。孔興林係臣遠族。平素並未識面。
實無差委外出之事。但臣難辭失察之咎。請
飭部察議。得旨。該部察議具奏。○又諭現在
滇省至京緊要文報。均能星馳無誤。昨遞鄂
寧於本月十二日永昌所發摺奏。尤為迅速。

著各該督撫將沿途遞報人夫酌量分別獎賞以示鼓勵○又諭旨方觀承奏乾隆二十七年賑卹案内所有應扣建曠日期及粥廠內有接賑二十日經戶部駁令刪除懇請一體准銷一摺在該部議駁原係遵照成例辦理但據方觀承所奏地方急賑本有扣足一月之例而粥廠亦以京師五城煮賑未停是以隨同接辦亦屬地方實情國家加惠閭閻遇有偏災無不格外從優體卹此案該督既經通融籌辦自毋庸援例斥駁所有應扣建曠日期及應刪減二十日米薪等項均著加恩准其開銷○諭軍機大臣等永貴等奏稱烏什銀兩稍有不敷就近由關展哈密調取銀二萬兩解送烏什俟內地調取銀五萬兩由關展哈密經過照數截留還項等語著照永貴等所奏交吳達善照數解銀五萬兩送往烏什其先由哈密關展調銀應用及內地銀兩由哈密關展經過照數截留之處俱照

永貴等所奏辦理○以四川建昌鎮總兵路戡為甘肅提督湖南永順協副將六格為建昌鎮總兵直隸通州協副將達翎阿為天津鎮總兵○以故科爾沁扎薩克土謝圖親王納旺弟喇什納木扎勒襲爵○蠲免直隸龍門懷安二縣乾隆三十二年水雹霜災應徵額賦○蠲免安徽懷寧桐城潛山太湖宿松望江貴池青陽銅陵東流當塗蕪湖繁昌無為合肥廬江巢縣壽州鳳陽懷遠靈璧鳳臺泗州盱眙五河和州含山等二十七州縣安慶建陽廬州鳳陽長淮泗州等六衛乾隆三十二年水災田地六萬一千七百一頃有奇額賦○壬午
上詣暢春園問
皇太后安○諭旨泰寧鎮總兵滿保沾染綠營習氣不稱總兵之任著來京在頭等侍衛上行走所遺員缺著布扎納補授○暫管山東巡撫布政使梁肅鴻奏准軍機處咨查各省

戰船悉心籌辦。以歸實用。查膠州。登州。成山。三汛。現存戰船十。船船二。分駐操防。未便議裁。且三汛均係大洋。各船俱係龍骨尖底。衝風破浪。駕駛便穩。亦無庸另行改造。報聞。○癸未。吏部等部議。准。原任盛京將軍新柱奏。稱。盛京五部主事。遇各驛站監督等差。俱可揀選。差竣保舉議敘。惟將軍衙門堂主事一缺。只許揆俸陞轉。查堂主事係總辦事務之員。較五部主事。倍加勤苦。而各差不與揀選。似未平允。請嗣後凡有驛站監督內倉正副監督及中江稅差。將軍衙門堂主事。准其一體開列揀選。其驛站監督年滿議敘之處。亦准照例保題。從之。○甲申。

孝昭仁皇后忌辰遣官祭

景陵。○軍機大臣等議。奏。上年查辦各省將軍都統養廉。所有江寧將軍應得銀。因尹繼善曾記另有鹽規一款。未經報部。奏請行查。今據高晉等奏。鹽規及地租二項。每年將軍得

銀三千零六十二兩。合之原編隨旗歲支名糧。通計四千五百五十兩。為數過多。應酌定歲給養廉二千五百兩。其江寧左右副都統。鹽規及地租二項。每年各得銀五百九十六兩。合之原編隨甲歲支名糧。通計各得一千六百七十餘兩。亦屬過多。應酌定歲給養廉各五百兩。至地租一項。應於每年徵收後。歸駐防營內充公。其裁扣銀。請存貯司庫。歸款辦理。從之。○雲南巡撫鄂寧奏。據總兵喬冲

杓稟稱。二月十三日。途遇總兵長清哈國興。詢問將軍明瑞信息。伊等不肯細說。竟馳往宛頂。見額勒登額。譚五格。並有副參遊守滿漢兵丁甚多。俱隨二鎮赴宛頂等語。查長清哈國興係隨將軍明瑞之員。今俱銜出。必有他故。額勒登額等前此已失機宜。後由小隴川一路紆遶。將及一月。始到宛頂。且既知將軍大營所在。又不即日星馳前往。致明瑞懸軍無援。此時不知若何。臣實痛心切骨。擬俟

阿里衮到滇。即傳旨將額勒登額革職。拏解送京。譚五格亦應請旨革職。拏問得旨是。○予故閩浙總督蘇昌祭葬如例。謚愍勤。○旌表守正捐軀之廣西桂平縣民何竈榮妻梁氏。○乙酉。

上詣暢春園問

皇太后安。○幸豐澤園演耕。○還宮。○至寧壽宮視

溫惠皇貴太妃疾。○諭前據江寧將軍富椿

奏。據協領錫蘭泰八十等呈報。查出步甲明阿圖勾引私鑄民人劉七等。僦賃馬甲額勒登房屋。將明阿圖交地方官審擬。並將該協領等叅奏。朕即以富椿所奏不甚明晰。降旨令高晉查明此事。如實係該協領等查出呈報。則是幹員何得叅奏。若地方官先行查拏。而富椿以該協領等查出具奏。則竟屬欺誑矣。今據高晉覆奏。上元縣知縣杜世祥拏獲私鑄民人。稟知將軍。交協領錫蘭泰等將旗

人明阿圖額勒登等交地方官查辦等語。竟不出朕之所料。富椿含糊具奏。甚屬無恥。著交部嚴加察議。錫蘭泰等亦著交部察議。○諭軍機大臣等。據鄂寧奏喬冲杓報稱。明瑞軍營信息已傳。旨阿里衮此時不可輕進。鄂寧可速選派妥幹之員。星馳前赴軍營。告知明瑞。令其即速退回內地。切勿稍涉游移。伊懸軍深入。外援不繼。但能整兵衝出。即為妥善。若徒轉戰稽留。轉與軍務無益。並將朕盼望之意。切實告知。現在如續得明確確信。仍速行馳奏。○又諭據李侍堯奏。粵東籌辦解滇馬匹。於通省各營及駐防處所。約可得馬三千匹。現在調撥餵養。派委員弁。尅日管解等語。此次調撥。粵省馬匹為滇省續進官兵之用。最關緊要。務宜悉心經畫。總以多多益善為期。至解往程途。此時又當從容頓置。且餒且行。不得過於催趨。以致馬力疲乏。前已有旨令該督前赴廣西。會同宋邦綏悉心籌

畫此時當已奉到。李侍堯可即飭令該省官弁一切妥協辦理。俾士卒乘騎寬裕。庶於軍行有裨。將此傳諭知之。○又諭旨良卿奏請將恩賞銀十萬兩暫存藩庫。候大兵凱旋支給一摺。所辦非是。此項恩賞銀兩或酌量留為凱旋之用。乃係軍機大臣前議。至現在正有續派兵行之事。則地方正須撥用。豈得復泥前說。且續派之諭先經傳寄良卿。其同日另摺內已聲明奉到。何以尚為膠柱鼓瑟之奏。殊不可解。良卿前此奏請挑選兵丁子弟以備防守調撥一摺。所見甚為當理。朕即降旨嘉獎。若本日所奏則大為拘牽失當。甚乖事理之宜。總之諸臣之是非功過彼此自難相掩。朕亦從不稍存成見也。良卿著傳旨申飭。仍將此詳悉諭知。令其知所勉勵。○湖廣總督定長湖北巡撫鄂寶湖南巡撫方世儒覆奏兩湖辦理兵差蒙恩賞銀十萬兩若逐一傳集散給勢難清楚如不一例加賞又覺

未昭平允。查將來凱旋經費先經奏明應於通省按糧徵收。今賞銀留為辦理凱旋或續辦兵差之需。既免此時按戶查給之繁。復省將來按畝徵輸之費。與普被恩膏事無二致。在官在民均屬妥便。得旨知道了。既有此項目今辦理再不可稍資民力矣。慎之勉之。○定長鄂寶又奏京兵指日過境奉旨先行籌議。查湖北境內十站應照向例於呂堰樊城宜城麇陽荊門建陽江陵公安分設八臺。屯扎驛馬接替。於各臺適中處安設八尖。惟馬驛最為緊要。襄陽所屬地近豫省。尚易雇備。其鍾祥荊門江陵公安所轄五臺應於鄖陽宜昌德安漢陽黃州施南等府分別酌撥。至一切經費蒙恩賞銀十萬兩現議留為凱旋或續辦兵差之用。諸可妥為儲備。不致貽誤。得旨覽。仍在爾等不辭勞往來稽察妥辦耳。勉之。○署貴州巡撫良卿覆奏黔省隨師餘丁脫逃者前已將拏獲數目具奏。現又據思

南等府續獲四名。飭審收禁。並滇省逃竄之綠營兵三百餘名。一併上緊協拏。得旨覽所奏。續獲僅只四名。足見未實心嚴緝也。日久更無從得矣。今復獲幾名。可即奏來。○丙戌。諭曰。將軍公明瑞。自蠻結大破賊兵之後。進至宋賽。因前路並無賊匪蹤跡。而額勒登額等。又不能從猛密取道。會兵同進。遂由猛弄一路。破壘因糧。屢有斬獲。繼復由大山移駐小猛育。數日間攻擊賊營。連次取勝。此時若額勒登額領兵由外進援。腹背夾攻。賊衆何難靡潰。詎額勒登額始於早塔逗遛。老師挫銳。迨退回虎踞關。又因賊衆尾至猛卯一路。轉避賊繞從內地。由小隴川等處紆緩而行。以數日可達之程。遲至二十餘日。方抵宛頂。經鄂寧屢檄促援。一切置之不問。致老官屯賊衆。轉得併力拒我大軍。是額勒登額喪盡天良。有心貽誤。其罪可勝誅乎。時將軍公明瑞方統衆奮力勦禦。以綠營兵丁疲病者多。

不忍拋棄過行。令將領等分整隊伍。以次衝出。明瑞親冒矢石。督師殿後。猶殺賊數千。我軍藉以保護。而明瑞悉力擊戰。以致受傷身殞。其相隨之都統扎拉豐阿。護軍統領觀音保。總兵李全。亦先後陣亡。聞之深為軫悼。在緬匪徼外么膺。本不值興兵辦理。朕並無必欲勦滅之意。前降諭旨甚明。特以劉藻楊應琚。糾謬失律於前。而額勒登額等。喪心債事。又出意料之外。致將軍大臣。奮勇捐軀。辦理勢難中止。現已特派經畧將軍。參贊大臣。並調撥八旗勁旅。厚集繼進。以期掃蕩蠻氛。至明瑞等。夙秉純誠。盡心國事。効命疆場。並宜優加恩卹。以慰忠藎。明瑞著照班第之例。從優議卹。其一等誠嘉毅勇公。即著伊子承襲。扎拉豐阿。觀音保。李全。亦著一併優予卹典。俱入祀昭忠祠。該部詳悉察例具奏。所有陣亡兵丁。並著行文該督等。查明卹賞。○又諭曰。明瑞應賠一切銀兩。俱著加恩寬免。○又

諭現在續派官兵赴滇籌辦進剿緬匪一切機宜關係緊要必須重臣前往督率調度以期迅奏膚功大學士忠勇公傅恆著授為經畧阿里衮阿桂著授為副將軍舒赫德著授為叅贊大臣阿桂現已傳旨令其來京再赴滇省舒赫德即行馳驛前往雲南與阿里衮鄂寧豫辦軍營事務傳恆俟將次進兵再行前往所有雲貴總督員缺即著鄂寧補授明德著調補雲南巡撫明德未到之先其總督

印務著阿里衮暫行管理鄂寧仍著辦理巡撫印務至隨舒赫德前往之司員等并著一併馳驛○又諭日額勒登額身為叅贊大臣統兵進剿乃有心退縮貽誤經撫臣屢調進援一切置之不問實為罪不容誅現今降旨革職拏解來京治罪額勒登額本烏拉齊微末之前此皆由富德袒庇庇護多方緣飾迭次保薦擢至大員派往軍營竟債軍旅大事從來外省濫舉匪人該督撫等尚有應得

處分今額勒登額喪心失律至此非尋常敗檢劣員可比為舉主者安得聽其置身事外以長朋比頹風富德著革去散秩大臣拏交刑部治罪○諭軍機大臣等伊犁將軍阿桂經歷戰陣伊犁現亦無事著即馳驛來京候朕訓示後遣伊前往雲南伊犁將軍印務著伊勒圖署理額敏和卓著往喀什噶爾總統事務阿桂不必俟伊勒圖至彼交代奉旨後即將印務委該處副都統一員先行暫署○又諭現在滇省尚需接濟馬匹前經傳諭各該督撫上緊購辦以備軍行但此時酌定進兵應在來年秋末冬初而目下天時漸次向炎長途催趕馬力易疲自應從長計議著各該督撫等除已經起送之馬飭令解員在途緩頓徐行外其餘未經解送者一面採辦齊全擇地分廠散牧務令餵養臙壯俟應行解送時酌量另降諭旨再行從容解滇應用至於來年進兵之語祇可督撫等知之當密之

又密令賊不測何時進兵豫備自勞其力耳。可即將此傳諭知之。○又諭前以本年進剿緬匪曾令崔應階於該省水師內揀選三千名令葉相德帶領由廣東一路往滇今酌定進剿事宜尚需時日所有該省水師兵丁此時且不必即行前往可傳諭崔應階並葉相德知之須密之又密毋洩機宜也。○盛京禮部侍郎溫敏奏高麗龍川居民董芳春金官一。金文愛駕船捕魚遇風漂至鳳凰城小島子地方當即行文該國王查覆屬實現在資給衣服口糧遣回下部知之。○以鑾儀衛掌衛事大臣福隆安為兵部尚書命在軍機處學習行走。○以吏部尚書託恩多署步軍統領事務。○浙江巡撫熊學鵬丁憂以浙江布政使永德為浙江巡撫浙江杭嘉湖道劉純燁為浙江布政使。○調山東巡撫彭寶為江蘇巡撫福建巡撫富尼漢為山東巡撫湖北巡撫鄂寶為福建巡撫以陝西布政使程壽

為湖北巡撫山東按察使勒爾謹為陝西布政使調山西按察使尹嘉銓為山東按察使以原任雲南按察使夔舒為山西按察使。○命江寧將軍富椿來京候旨調廣州將軍容保為江寧將軍。○調西安副都統玉柱為正紅旗漢軍副都統以科布多叅贊大臣扎隆阿為西安副都統熱河副都統集福為科布多叅贊大臣正紅旗漢軍副都統呼什圖為熱河副都統。○旌表守正捐軀之河南內黃縣民左谷多妻董氏。○丁亥。上耕藉詣先農壇行禮更服至藉田所躬耕三推復加一推。御觀耕臺命莊親王永璫裕親王廣祿和親王弘書各五推吏部右侍郎何逢僖戶部右侍郎高恆禮部右侍郎倪承寬兵部右侍郎覺羅奉寬刑部左侍郎錢維城工部右侍郎劉星煒都察院左副都御史鄂忻通政使覺羅

志信大理寺卿景福各九推舉順天府府尹。率農夫終畝。賞賚耆老農夫如例。○諭目額勒登額統兵分勦緬匪。既在旱塔逗遛。老師糜餉。及將軍等懸軍深入。復不能剋期赴援。是額勒登額之喪良債事。罪不容誅。其在事兵丁等。皆由將領所誤。尚可原恕。但既曠日持久。亦復無功足錄。可宣諭伊等。益當奮勉自勵。以觀後效。至將軍明瑞所統滿漢官兵。深入賊境。蠻結之戰。奮勇摧堅。繼復破壘。因糧著有勞績。即此番由猛腊回至宛頂。亦係將軍護令旋師。並非伊等棄逃潰散。所有明瑞軍營隨行官弁。及滿漢兵丁。著阿里衮鄂寧。詳悉查明。加恩分別賞賚。以示鼓勵。○諭軍機大臣等。據鄂寧奏滇省辦理馬匹維艱。自屬該省實在情形。本地既產馬無多。連年採買。原難多有寬裕。此時轉不必復向民間購辦。稍滋紛擾。其牛隻不慣跋涉。前辦多有損傷之處。昨阿爾泰亦曾奏及。竟可無庸復

辦。川省既議以馬騾抵用。並令粵西亦就該處所產。悉心籌辦矣。至京兵現已起程。原為彈壓地方。至進勦日期。今年或趕辦不及。俟來歲秋冬。再議大舉。則諸事措置。皆得從容。所有京兵在途行程各事宜。現今軍機大臣詳悉議覆。其荊州四川駐防兵丁。到滇後。即可在省城暫駐。先儘京兵遊行。則沿途頓宿諸事。更為便易。但明年進兵之說。務須密之又密。毋令外間傳布。此外尚有應行密籌之事。已面諭舒赫德。俟其到滇後。與阿里衮鄂寧。公同妥議。據實覆奏。將此傳諭知之。○又諭據阿爾泰奏。將豫備之營驛馬匹。及採買馬騾。盡數解滇。並購備牛隻運送等語。昨因赴滇馬騾等項。長途趕解。牲力易疲。已傳諭阿爾泰。令將已經起送者。飭委解員緩站徐行。其未經解送之馬。另擇涼爽處所。分廠牧放。務令餵養臃壯。俟應行送往時。另降諭旨。再行從容解送。該督自當遵照辦理。至川省

購覓牛隻一事。因昨歲曾經採辦。故飭令豫備。但前據該督奏稱。川省牛隻赴滇。易於倒斃。現在改辦驛馬。頃鄂寧所奏。亦復相同。自係該處實在情形。即無庸復辦牛隻。致道途難行。徒費無益。著傳諭該督悉心籌辦。多行購備馬驛。俟臨期緩程妥解。俾資實用。○軍機大臣等奏。此次赴滇官兵。前議以二百名為一起。原為進剿迅速。自當剋日遄行。現在籌辦尚需時日。則行走無庸過急。茲據雲南

撫臣鄂寧奏。稱自平彝至永昌。計三十站。道路綿長。夫馬難以敷用。請分一百名為一起。應如所請。再派出之荊州四川駐防兵。已奉旨令於雲南省城駐劄。如途中或遇京兵同時到站。應令京兵先行。前抵永昌。所調駐防兵。俟需用時。再行前進。至經過各省。夫馬如果充裕。則照臣等原議辦理。或應付稍艱。不妨亦照鄂寧所奏。以一百名為一起。不必拘泥前議。得旨。依議速行。○湖南巡撫方世儒

覆奏。京兵即日赴滇。奉旨將豫備事宜。令臣籌議。查遞送官兵。全賴夫馬。民夫係就本地派雇。尚易集事。惟楚南素不產馬。上年雇備應差。及撥動營驛各馬。已多勞傷倒斃。紛紛購補。民馬益覺短少。現覈計有驛各屬馬酌量抽撥協濟。並令各屬通融雇備。至楚省辦差章程。向照豫省之例。將添雇夫馬若干。覈明應用各數。除例准開銷外。不敷之數。於通省按糧攤派。今蒙恩賞銀十萬兩。現議暫行存貯。以備官兵經過正項不敷之用。此次所需夫馬幫貼銀兩。請即於恩賞銀內動給。得旨。覽奏俱悉。如所議行。○陞任雲南巡撫鄂寧奏。接額勒登額等來文。知將軍明瑞在猛腊地方。與賊鏖戰。被烏鎗傷陣亡。查官兵既已撤回內地。各隘口自當防禦。隨飛行各鎮將相度機宜。並查明收回官兵若干。現在宛項官兵若干。統俟阿里衮到日。再行熟商辦理。得旨。此時祇可如此。難言進剿。俟舒赫德

到時爾等密商據實奏來○戊子

上詣暢春園問

皇太后安○幸圓明園○遣官祭賢良祠○諭曰阿思哈奏各省每年秋審請照京師按冊覆讞之例停其提犯到省一摺所見甚是而其中尚有計議未盡周當之處蓋此等罪犯所有案情久經督撫臬司等確覈詳定及秋審屆期亦不過循用故事就招冊分別情實緩決可矜三項而在省過堂時亦從不聞有

聲屈平反之事徒令因徒輾轉提解紛擾疎虞種種不免自應酌議停止以省具文第各屬成案頗繁研究務宜詳慎若概免提解而執法之司惟知抱牘從事於貌稽辭聽之義猶屬未協朕意從古按部錄囚原有舊典在督撫統轄全省臬司亦刑名總匯勢難親臨州縣一一按問至本管道府職司既專而分轄地方又不甚遼遠若令於每年秋審之前巡歷所屬逐案悉心審勘其情罪允符毫無

疑義者自可彙冊具申上司間遇有獄成未孚臨時呼寃之犯亦祇什伯中之一二仍應據實另繕招冊將本案犯證一併解送司院覆訊定擬是於減除陋例之中兼寓慎重祥刑之意立法庶為盡善至道府錄報各冊無論情罪與原案有無異同俱令加結備案以杜徇庇屬員及有心翻駁諸弊於責成尤有專屬其應如何酌定條例并本年秋審可否即照新例辦理俱著該部詳議速奏尋議各省道員所轄州縣多者三四十處遠者千有餘里若必待臨期遍歷轉恐草率從事查道員本有每年巡歷地方之責應令皆以冬季為期於所屬定案應入秋審人犯率同知府就各州縣研訊覆勘其定案在巡歷以後應行續入者仍令該道於秋審前就案按臨審勘均加結申送督撫臬查覈聞有情罪未協臨時呼寃之犯訊非捏詞翻異者即另繕招冊將本犯解送司院覆審儻有事本寃抑而

徇庇屬員不為辨明。及案無可疑。而有心翻異者。聽督撫叅處。督撫不加稽覈。別經發覺。一併議處。本管道員。或另有委辦要件。不能分身親歷者。聽督撫酌派糧鹽各道。或別屬事簡道員。代行審錄。各省直隸州知州。及並無知府統轄之廳員。並照知府辦理。惟直隸州本州案件。該知州即係承審之員。應聽本管道員覆勘。再查每年各省秋審。多在三四月。各州縣人犯。有在一兩月前。豫行提解者。此時已屆三月。請通行各省。如本年人犯。已經起解。仍照向例辦理外。其未經起解者。即令遵照新例辦理。從之。○又諭。日將軍公明瑞。夙秉忠誠。歷著勲績。昨命統兵進剿緬匪。明瑞身先士卒。屢挫賊鋒。乃以懸軍深入。而額勒登額等。有心逗遛。後援不繼。因於猛腊地方。保護諸軍。身留殿後。衝冒矢石。以致受傷身殞。已降旨加恩優卹。並入祀昭忠祠。以酬忠蓋。從前駐藏大臣。傳清拉布敦。鋤兇死

事。曾勅建雙忠祠。秩在祀典。茲明瑞勤事捐軀。戰烈尤堪嘉尚。著循前例。於京師特建專祠。舉行歲祀。其先後陣亡之都統扎拉豐阿。護軍統領觀音保。總兵李舍王。玉廷。均予入祠從祀。用慰忠魂。所有應錫祠名。及建祠事宜。各衙門察例具奏。尋建祠於地安門外。賜名曰旌勇。○又諭。日侍郎珠魯訥。以叅贊大臣。駐劄木邦。策應軍營。因索桂領兵赴天生橋。遇賊退回。並棄錫箔橋梁不守。以致賊匪尾入。滋擾木邦。珠魯訥悉力拒守禦戰。相持經十餘日。尋以所統兵丁。俱係綠營。懦怯成習。見旁近小營失火。紛紛潰散。珠魯訥獨力不支。即於營內自盡。雖與臨陣捐軀者相去一間。其情亦屬可憫。所有應行優卹之處。該部察例具奏。至總兵胡大猷。前此不能堅守葫蘆隘口。曾降旨革職。今既隨同珠魯訥堵禦賊匪陣亡。前愆可無追論。著加恩仍給還總兵原銜。以昭平允。○又諭。前派京兵六千。

索倫吉林兵三千。分隊前往雲南。今恩同時進發。未免擁擠。著先遣京兵前往。其索倫吉林兵。明年再行起程。前所派之領隊侍衛。為數既多。著交領侍衛內大臣等。將派出之侍衛。另行帶領引見。多者裁撤。○諭軍機大臣等。朕連次降旨。令挑選察哈爾八旗額魯特兵丁。豫備調往雲南。復令安泰來京。今已暫止進兵。除安泰仍遵前旨。即行來京外。其所派總管及兵丁。且不必前來。俱著各在原游牧處駐劄。候朕臨期降旨。○河南巡撫阿思哈奏。此次赴滇官兵八千名。共四十起。間二日行走。約需四個月。方能過竣。現在束裝前詣首站。照料彈壓。得旨。好。知道了。總以不累民為要。勉之。○以西安副都統扎隆阿正紅旗漢軍副都統玉桂對調。○旌表守正捐軀之江西都昌縣民王道商妻陳氏。○是月。河東河道總督嵇璜奏。加河廳屬劉昌莊通湖水口一道。原寬二十八丈。分洩彭口山河異

漲。以達微山湖。伏秋汛發。口門刷寬。湖河相連。有礙糧船緯纜。每年築壩架橋。不能經久。請於水口中間。設兩空減水石閘一座。上架橋梁。兩頭接修土隄。報聞。○又奏。各廳塘長河內挑工告竣。隨開南旺大壩。汶水南北分流。鋪灌閘塘。以待新運。查向來鋪水時。柳林以北。開閘家大閘。放南旺湖水。以助北行。柳林以南。開安居斗門。放馬場湖水。以助南行。今歲汶水較旺。運河水足。關家大閘。安居斗門。均可毋庸開放。使上游儲水。以俟重運。經臨。至下游之微山湖。自去冬堵閘蓄水。現存水一丈一尺五寸。較奏定水誌。尚多五寸。灌輸實為充裕。報聞。○又奏。東平州屬戴廟三空橋。係宣洩汶水由鹽河歸海正路。前經奏改三空為五空。落低三尺。伏秋汛內洩水。已較往年加倍。惟查橋下支河歸入鹽河之處。河身淺窄。尾閘高仰。計長一千八百餘丈。未經挑挖。恐五空橋洩下之水。支河不能容納。

即致旁溢民田。現在撥夫興挑。務期寬深。以資暢洩。得旨覽奏俱悉。○調任山西巡撫彰寶奏賞卹兵丁紅白銀兩。向須營員查明。結報上司。批准後方得給發。緩不濟急。仍復指項稱貸。利息不貲。查紅白之事。隊伍兩鄰。共見共聞。而賞項亦有成規。不能捏報冒濫。應將賞卹銀兩。隨餉按月發交貯庫。遇兵丁實有紅白事件。該管員弁查明。速即就近照數給發。報聞。

實錄卷八〇六

四十五

大清高宗法天隆運至誠先覺體元立極敷文奮武孝慈神聖純皇帝實錄卷之八百五

大清高宗法天隆運至誠先覺體元立極敷文奮武孝慈神聖純皇帝實錄卷之八百六

監修總裁官經筵講官太子太傅文淵閣大學士文淵閣領侍衛內大臣稽察欽奉 諭旨事件處管理
吏部理藩院事務內務府副都統世襲騎都尉軍功加七級隨帶加級尋常加級軍功紀錄五次
總裁官經筵講官太子太傅文淵閣大學士文淵閣領侍衛內大臣稽察欽奉 諭旨事件處管理
世襲騎都尉軍功加九級隨帶加二級又加二級 臣等謹將內務府部內各屬旗滿洲都統軍功紀錄五次
尋常紀錄十四次 臣德英經筵講官太子少保工部尚書紀錄六次 臣 曹振鏞等奉
敕修

乾隆三十三年戊子三月己丑朔諭朕惟

闕帝歷代尊崇遠經國朝尤昭靈貺前於順

治九年

勅封忠義神武闕聖大帝至康熙雍正年間復

爵晉所生澤延世裔典禮備極優隆朕式展

明禋以

神原謚壯繆未孚定論爰飭禮官易謚神勇

是皆考行定名俾彰義烈若夫靈威默相屢

荷嘉庥宜備懿稱益昭美報可加封

忠義神武靈佑闕聖大帝其官建祠宇秩在

祀典者並依新號敬謹設立

神牌以申崇奉 又諭曰額勒登額獲罪甚大孥戮不足蔽辜著將額勒登額之妻即行發往伊犁賞給額魯特為奴 又諭曰保寧著授為領隊大臣前往雲南軍營 諭軍機大臣等征勦緬匪今歲暫止進兵伊犁將軍阿桂可不必趲行前來著仍在伊犁駐劄辦事候朕再行降旨阿桂既不前來著伊犁圖仍在喀什噶爾額敏和卓仍在葉爾羌辦事

○軍機大臣等議覆河南巡撫阿思哈奏稱河南撥補荊州駐防馬四千匹已備二千六百四十六匹酌籌分別妥辦等語查荊州駐防撥解雲南馬業經奉旨令未起程者加意餵養聽候調撥是此項馬在荊州既暫緩運解則豫省毋庸急為撥補况現在西安駐防馬經由豫省已須設站支應且續派赴滇京兵又將抵豫若以撥補荊州馬匹參雜行走誠未免辦理周章應俟京兵過後先撥二千

匹緩程解送荊州以補去年缺額其續撥二千匹俟荊州解滇後再行陸續解往至所稱撥補荊州馬尚缺一千三百五十四匹查臣等前議河南缺額馬令直隸撥補今直隸亦辦軍需應俟差竣後再將應補豫省馬從容滾運如尚有短少該省距口甚近亦無難隨時購買得旨依議速行 以正黃旗滿洲副都統鄂忻為工部侍郎 以原任湖北巡撫范時綬為正白旗漢軍都統內閣學士塔永阿為正白旗蒙古副都統副都統銜烏三泰為正白旗滿洲副都統喀什噶爾辦事大臣伊勒圖為正白旗護軍統領正紅旗漢軍副都統扎隆阿兼正黃旗護軍統領鑲紅旗漢軍副都統富廉兼鑲藍旗護軍統領 豁除浙江江山縣水衝成河田地三項十六畝有奇額賦 庚寅以甘肅按察使蔡鴻業為甘肅布政使甘肅肅州道宋弼為甘肅按察使 予故盛京將軍新柱謚勤肅陣亡總兵王

王廷謐勤義並祭葬如例○補行直隸省乾隆三十二年軍政卓異官三員年老官二員分別議敘處分如例○辛卯

上詣暢春園問

皇太后安○軍機大臣等議覆陞任雲南巡撫鄂寧奏京兵乘騎馬匹酌籌辦理一摺查滇省軍務所需馬匹前經該撫奏請京兵到滇以一百名為一起則每站豫備之馬已可節省一半今復據奏自平彝到省七站省城到永昌二十三站需馬甚多辦理尚難充裕請每名於省城先給馬一匹跟役一匹乘騎長行直赴永昌其不敷馱載馬於撥解購辦馬驛內照給等語應如所請惟是陝西荊州四川貴州廣東廣西各省解滇馬業經奉旨將解送在途者從容行走未解者存留候撥應令該撫將現在到滇之馬即留省城餵養俟京兵到省給與乘騎至各省綠營兵將來或需調撥俟奉諭旨臣等行知派出兵丁省分

令將騎馱馬自行辦備充足帶赴永昌得旨依議速行陞任雲南巡撫鄂寧奏滇省民間幫貼軍需款項奉旨詳覈銀數查自平彝縣至永昌府屬保山縣計三十站又自省城至普洱府十七站兩路夫馬約用十七萬六千餘兩至保山騰越寧洱思茅為大兵匯集之地其數倍於他處約四萬八千餘兩其餘運送糧石等項又約七萬四千餘兩皆係小民按糧均派幫給應夫應馬之戶得旨有旨諭部諭滇省年來辦理軍需該處民人踴躍急公深知大義甚屬可嘉已疊次降旨加恩將地丁錢糧分別蠲免以示優卹今思該省現在辦理軍務較他省更屬殷繁雖一切動支帑項絲毫不以累民而解送兵馬辦運糧餉均不無稍資民力朕心尤為軫念著再加恩賞銀三十萬兩該督撫等飭屬妥協辦理俾閭閻得沾實惠副朕加惠黎元至意○子故鑲藍旗蒙古副都統伊柱祭葬如例○士

辰諭軍機大臣等吳紹詩奏查出李紱各集語多憤嫉請革去生前官秩並將伊子孫革職解赴質審其李任漢傳占衡集內亦多狂悖不法並將伊子孫查辦一摺所奏未免過當檢閱各簽如李紱所作詩文其間誠有牢騷已甚之辭但覈之多係標榜欺人惡習尚無悖謬訛謗實跡即其與戴名世七夕同飲原在戴名世未經犯案以前且坐中不止一人無足深究至李任漢之於呂留良語多推許然其所指不過專為講章時文而言彼時該犯罪案亦未發覺初非甘心附會逆惡若傳占衡狂吠之語其人生於明季濡染末流無知妄作之風當時類此者恐不特傳占衡一人且其人均久經物故子孫又閱世遠邇如一一根究滋擾蔓延於事體既為未協並恐無識之流或疑其以文字獲罪轉得遂其詭激沽名之隱甚屬無謂該撫所奏將李紱子孫革職審擬及查封家口房屋並查覈李

茹旻馮詠馮謙萬承倉吳名岸黃石麟等之處一併無庸置議但此等紕繆語言既已刊刻成書倘仍聽其謬種流傳其於世道人心貽誤不淺所有各項書本版片該撫可逐一查明即行銷燬毋令稍有留遺原摺並發還將此傳諭知之○又諭曰鄂寧奏到籌辦京兵到滇事宜及查奏民間幫貼銀數各摺內稱滇省連年辦理軍務人夫馬匹實為拮据等語該督辦事勤幹素無模稜畏難之習所奏自是地方實在情形現已降旨加恩賞給該省銀三十萬兩令補民間幫貼各數但此項銀兩若以零星散給不獨實數難稽兼恐吏胥不無從中滋弊之事莫若即將此項暫行存貯以為此次續派京兵到滇之用該督可即飭屬悉心妥協經理不得更有絲毫擾累閭閻至所稱各省解滇馬匹即於省城分給京兵騎赴永昌一事已令軍機大臣定議速行矣所有一切應辦機宜已詳悉密諭舒

赫德俟伊一到滇省自可會同阿里衮鄂寧熟籌妥議但明年進兵之信務須密之又密非特賊匪窺探消息應行防範即本省兵民亦不宜稍有洩漏致令傳播也將此詳諭知之○癸巳祭

先蠶之神遣妃行禮○蠲免山東高苑博興樂安三縣乾隆三十二年水災地六千三百四十四頃九十八畝有奇額賦○甲午諭曰都統扎拉豐阿護軍統領觀音保隨明瑞進

勦緬匪勤事捐軀深堪嘉尚已降旨兵部從優議卹若僅循例議給世職殊未副朕逾格酬庸之意扎拉豐阿舊有承襲一等輕車都尉世職著加恩給予世襲男爵觀音保舊有騎都尉世職著加恩給予世襲輕車都尉其總兵李全著照王玉廷之例給予世襲騎都尉加一雲騎尉○諭軍機大臣等吳達善奏將哈薩克貿易馬匹撥補內地額缺各事宜一摺經軍機大臣議駁數條甚是已依議准

行矣此項馬匹係緩程遞送內地補額迥非辦解軍需馬匹可比該督乃稱由肅州解送每馬四匹用兵一名是解馬三四千匹即須千人拉拽試思出口買馬俱係成羣趕回豈有牽拉行走之理况口外生馬素不食料該督於途次多支草束之外又欲加給料豆虛糜更屬無謂此必緣營狃於內地買馬於中可得餘利不樂辦此事故為多費之狀該督如此辦理可謂一味模稜太不認真矣吳達善著傳旨申飭湖廣總督定長奏續撥荆州駐防馬二千匹將軍永瑞業已帶領前往雲南其各標協營馬現於湖北派撥八百湖南派撥一千二百仍分十起於荆州會齊按起陸續趕解報聞 乙未

上詣暢春園問

皇太后安○諭據阿桂奏稱伊犁駐兵衆多需糧甚殷若多移回人數百名於屯田甚有裨益因商之鄂對據稱葉爾羌和闐回人精壯

請揀選三百五十戶。照前次遣往烏什之例辦理。於冬間遣往伊犁等語。鄂對近來實心奮勉殊屬可嘉。著加恩賞大綬四疋。○諭軍機大臣等。今日閣工部議駁熊學鵬估變裁汰船隻一本。已依議准行矣。此項裁汰艍船。統覈拆造工料銀數。三船計共需銀六千七百餘兩。今估變價銀僅止五百五十餘兩。竟不及十分之一。即云現屆拆造之期。亦何至朽爛不堪若此。顯係承辦之員。以多報少。希圖染指分肥。該撫熊學鵬一任屬員弊混。漫不加察。率行報請覈銷。辦理殊屬非是。著傳諭永德另委妥員。逐一切實估報。毋使稍有朦隱。並將確勘情形。即具摺覆奏。不必另行題報。○戶部議准調任江蘇巡撫明德奏稱。江蘇同知養廉例給五百兩。通判四百兩。辦公俱屬不敷。查蘇州督糧同知太湖同知地廣事繁。請各增五百兩。其餘同知九同判十。各增一百兩。清河縣原定一千三百五十兩。

請增四百五十兩。崇明縣原定一千兩。請增三百兩。至武進陽湖二縣原定各一千六百兩。請裁武進一百兩。陽湖四百兩。高郵寶應金匱三州縣原定各一千五百兩。請各裁三百兩。奉賢青浦三縣原定各一千五百兩。請各裁五百兩。常熟昭文崑山新陽江陰溧陽泰州鹽城阜寧鎮洋嘉定十一州縣原定各一千二百兩。請各裁二百兩。從之。○以故廣西太平府屬萬承土知州許健子戴屏襲職。

丙申諭前於兵部軍政摺內見廣東左翼鎮總兵陳應鍾年逾六旬。是以降旨令其來京。陛見。今陳應鍾到京。召對。察其精力尚未就衰。著仍回原任。諭軍機大臣等。現在雲南軍營無事。玉魯斯莽喀察齊哩克齊等俱著遣回京師。滇省天氣炎熱。其在營之額魯特等。恐不能受。今歲既不進剿。伊等無可差委之處。阿里衮可查明現在彼處之額魯特等。交玉魯斯帶領回京。俟進剿時再行遣往。

旌表守正被戕之山東濟陽縣民趙淇妻劉氏。丁酉諭軍機大臣等先據良卿摺奏將恩賞銀十萬兩暫貯藩庫留為將來大兵凱旋之用所奏甚屬不合。蓋從前軍機大臣議覆時尚未有續派官兵赴滇之事。是以如此定議。及官兵已經出派當即降旨令所過各省督撫將此項賞銀作為此次抵補幫貼之需。而良卿仍冒昧具奏。是以傳諭申飭。乃今日良卿奏到摺內仍以存給凱旋兵丁之

用為詞。何始終拘泥糊塗若此。且所稱遵照妥辦者。究係如何妥辦。遵照何文。尤不可解。著再傳旨申飭。戊戌。

上御勤政殿聽政。諭軍機大臣等李侍堯所奏籌辦牛隻馬匹一摺。前於該督奏解粵省馬匹赴滇時曾諭令從容頓置不必過於催趲。致疲馬力。其所辦牛隻亦經傳諭宋邦綏以川省所解牛隻倒斃甚多。並著會同該督照川省改辦騾馬應用矣。看來牛隻一項既

不耐長途運解。又係民間耕種所需。則粵省竟可毋庸購辦。即騾馬為軍儲所資現在辦理時日尚寬。自不妨以次購買餵養。俟應行調撥時再行分起緩程解送。總期措置妥協。俾一切均歸實用。無須催趲。張皇徒致耗費物力也。將此詳諭該督知之。○蠲緩湖南華容沅江安鄉三縣岳州衛乾隆三十二年水災額賦並予加賑。○已亥。

孝賢皇后忌辰遣官祭

陵寢。諭雲南現有續辦軍務著戶部於各省留協項下再撥銀二百萬兩解往備用。○戶部議准四川總督阿爾泰疏稱南部西充射洪雲陽四縣竈民開淘鹽井一百四十六眼。配增水引五十二張。陸引一百三十張。請自乾隆三十二年為始給引權課徵稅。定地行銷從之。○協辦大學士公署雲貴總督阿里衮陞任雲南巡撫鄂寧奏查騰越一路戶撒腊撒上下壩尾并隴川遮坎一帶現無賊匪。

宛頂一路。募董磚橋以外。亦無匪黨。沿邊既尚安靜。則夷民田地。急須耕種。隴川。猛卯。宛頂。遮放。一帶土司夷民。官兵撤回時。不無聞警躲避。已飭各鎮將會同地方官曉諭招集。均使復業。并查明無力者。酌借籽粒。得旨是。○又奏。昨奉旨令楊重英至京。以備詢問。查楊重英並未自木邦出來。嗣據伊家人朱貴。到永昌稟稱。正月十九日。楊重英走離木邦。至金塔緬寺地方。遇賊截住。楊重英拔刀衝突。連馬跌入溝內。被賊擒去等語。查朱貴係楊重英家人。且得之目擊。自是實情。得旨覽。○直隸總督方觀承疏報霸州。固安。永清。東安。涿州。良鄉。宛平。香河。灤州。盧龍。遷安。昌黎。樂亭。文安。大城。任邱。交河。故城。吳橋。東光。天津。青縣。靜海。滄州。南皮。鹽山。慶雲。清河。高陽。正定。元氏等三十一州縣。墾種淀泊河灘新淤地。五百四十八頃九十七畝有奇。○庚子。上詣暢春園問。

皇太后安。○諭據阿里衮等奏。滇省辦理軍務。一切督率差委各員。現在不敷分派。請於隣近之廣東。廣西。四川。湖南。貴州等五省。現任道府丞倅牧令。及佐雜等官內。每省酌派赴滇等語。著照所請。派遣員觀音保。李天培。法明等三員。知府祿成。博明。趙翼。王洸。蘇勒通。阿賡音等六員。即由本任就近赴滇。並著各該督撫。於所屬同知。通判。知州。知縣內。每省選派四五員。佐雜內。每省選派五六員。前往雲南聽候差遣。所有各該員本任。均著酌量委員署理。不必開缺。○諭軍機大臣等。據阿里衮等奏。滇省辦理軍務。所有道府以下人員。不敷調委。請於隣近各省內。選派前往。現已降旨。於各該省道員內。派出觀音保。李天培。法明三員。知府內。派出祿成。博明。趙翼。王洸。蘇勒通。阿賡音六員。令即赴滇委用。但現在各該省。均有應辦差務。必需幹員經理。其道府內原係衝要繁劇之任。朕俱未經派往。

即派出各員或本省現有承辦緊要事務一時驟難得人更替者該督撫亦不妨酌量另擇妥員更換仍一面奏聞其丞倅州縣及佐雜各員該督撫即遵旨詳慎簡選一併奏明發往○辛丑諭軍機大臣等自雲南用兵以來明瑞所領之兵深入賊巢歷經戰陣額勒登額所領之兵雖無勞績皆由額勒登額等有意耽延誤事致我滿洲精銳不得効忠宣力深為可惜朕已節次降旨阿里袞抵永昌時將彼處應行籌辦之事與鄂寧會商後即應趕赴軍營將朕所降諭旨明白宣諭永昌去宛頂不遠阿里袞到彼既可撫慰將軍營伍官兵使知朕矜憫之意併可曉諭額勒登額隊內官兵因額勒登額等誤事故拏問治罪與衆無涉則伊等亦皆心安如此方合朕特遣大臣往辦之體再阿里袞鄂寧奏稱額勒登額由永昌解京並未向伊詢及一言其意必謂額勒登額到京朕必親訊但額

勒登額因何耽延誤事情節伊等亦當先行詢問具奏鄂寧因額勒登額不行急往木邦救援屢次憤恨奏今額勒登額已至永昌鄂寧何以反無一言阿里袞前往雲南時氣甚勇銳沿途辦理亦皆妥協今迺安坐永昌甚不滿朕意額勒登額雖將大兵撤回然距宛頂不遠阿里袞若能前往查勘一切情形並將彼處患病得傷兵丁次第辦理再揀選精壯兵丁在彼多駐數日於事甚為有益著傳諭阿里袞鄂寧如各隊官兵全抵永昌將朕前降諭旨明白宣諭兩隊官兵俾衆共知之若尚未全回阿里袞仍應前往○又諭前命阿里袞赴滇原以辦理軍營事務是其專責嗣因新任撫臣明德到滇尚須時日是以仍令鄂寧暫署巡撫其總督印務著阿里袞暫行管理所有地方一切調度事宜究係鄂寧分內之事現在舒赫德又已往滇參贊軍務伊等四人俱屬朕信任大臣自應共矢和

衷彼此無分畛域方為合理今閱阿里衮鄂寧奏到摺內似不無稍存意見即如額勒登額貽誤軍行從前節經鄂寧奏泰不獨毫無瞻顧且深為痛恨今解至永昌鄂寧自當將伊畏憊情狀嚴加究詰據實奏聞乃摺內並未將曾否究訊之處一語提及鄂寧如因阿里衮到彼不無稍存推諉是豈公忠體國之義總之伊等四人事同一體而地方一切事務自應仍為鄂寧分內之事嗣後遇有公務

必須悉心會商妥辦其孰為督撫孰為將軍孰為欽差宜一切不存成見方足副朕委任屬望之至意將此詳諭知之再土司甕團每聞賊信即行潛避將來官兵如進木邦其人豈足復用此時若訪知下落即令回至內地善為安頓毋令知覺驚惶至索柱現在作何著落胡大猷前奏已經陣亡今阿里衮等奏到尚無實在信息可一併訪查奏聞○又諭前降旨將額勒登額之妻發遣伊犁乃額勒

登額之叔上駟院侍衛佛爾賽膽敢將額勒登額之妻鳩死實屬目無法紀可惡之極著將佛爾賽拏交軍機大臣嚴審定擬佛爾賽之妻著發伊犁給額魯特為奴其子俱著拏交刑部監禁○壬寅諭今年京察屆期吏部開列在京各部院三品以上大臣暨督撫等

奏請甄別內閣大學士職長班寮向不與列第念大學士傅恒等或叅贊綸扉兼領部務或厯膺節鉞宣力有年均各敬慎恪恭克稱厥職宜加優敘以獎勤勞傅恒尹繼善劉統勲陳宏謀俱著交部議敘○又諭吏部開具在京部院三品以上官請旨甄別以重考績大典協辦大學士尚書阿里衮劉綸尚書託恩多于敏中舒赫德託庸裘白修侍郎程景伊四達均勤慎稱職宜加優獎著交部議敘侍郎彭啟豐副都御史呂熾才識拘牽服官竭蹶內務府總管蘇和訥年逾七十精力就衰均著以原品休致餘俱著照舊供職○又

諭今年京察屆期吏部將在外之總督巡撫開列名單進呈請旨甄別總督方觀承高晉崔應階阿爾泰李侍堯鄂寧楊錫紱巡撫方世儒阿思哈明德俱散歷封疆勤慎稱職著交部議敘以示獎勵廣西巡撫宋邦綏辦理地方事務限於材質未免時形竭蹶著來京補授兵部侍郎餘俱著照舊供職○又諭據李侍堯奏奏左江道李天培因道員加兵備銜請將都司以下官弁造冊送道巡查約束並請定接見儀注一摺道員加兵備銜原以地方緊要應令體制稍優兵民不致歧視乃李天培竟欲以兼銜管轄營弁兵丁妄思越俎看來其人甚不安分著交部嚴加議處尋議李天培妄思越俎實屬違制應照違制杖一百公罪降四級調用律降四級調用從之○長蘆鹽政高誠疏報永阜場勸墾灘地七十四畝有奇○癸卯

上至吉安所

溫惠皇貴太妃金棺前奠酒○諭曰李天培現在交部議處所有派赴滇省差委道員著右江道李鏐前往○以盛京佐領永泰為西陵總管內務府大臣○以湖北按察使朱珪山西按察使夔舒對調

大清高宗法天隆運至誠先覺體元立極敷文奮武孝慈神聖純皇帝實錄卷之八百六

大清高宗法天隆運至誠先覺體元立極敷文奮武孝慈神聖純皇帝實錄卷之八百七

監修總裁官經筵講官太子太傅文淵閣大學士文淵閣領事內大臣稽察欽奉 上諭事件處管理

吏部理藩院事務正堂總辦副都統世襲騎都尉軍功加七級隨帶加二級軍功紀錄一次以慶

懋戴官經筵講官太子太傅文華殿大學士文淵閣領事稽察欽奉 上諭事件處管理刑部戶部三庫事務

世襲騎都尉軍功加九級隨帶加二級又加二級軍功內大臣戶部尚書鑲黃旗滿洲副都統軍功紀錄五次

尋常紀錄十四次日德琿經筵講官太子少保工部尚書紀錄六次日曹振鏞等奉

敕修

乾隆三十三年戊子三月甲辰諭前有旨令

布扎納補授泰寧鎮總兵計伊到任尚需時

日所有泰寧鎮事務著公弘眺暫行署理

乙巳

上詣暢春園問

皇太后安○還宮○諭軍機大臣等據光拔世

奏稱諄諭商人教以節儉冀挽澆風以示簡

樸等語所見甚屬鄙迂此等殷商坐擁厚貲

即費用略多亦復何礙且使游手好閒之徒

藉以資其膏潤若徒拘崇儉之虛名更復加

以禁遏則伊等轉以自封為得計於酌盈劑

虛之道深屬無當此時如未舉行著即停止

若已經出示曉諭亦即行撤回並將撤回緣

由諭知商眾尤拔世纔赴兩淮持論輒爾如

此殊為不曉事體若執此謬見復何以辦理

釐政耶尤拔世著傳旨申飭○又諭昨據阿

里袞等奏額勒登額已經鎖拏於二月二十

九日自永昌起程押解進京著傳諭沿途各

督撫一俟該犯到境即派妥妥員速行護解

毋任稍有稽遲并令小心防範勿致疎虞並

於各省入境出境時一面即速奏報將此傳

諭知之○閩浙總督崔應階奏遵旨挑選內

地水師兵三千名照會葉相德聽候調撥赴

滇每百名酌配烏鎗手七十名藤牌手二十

名大礮手十名並選製造火器工匠隨往至

閩粵洋面毗連廈門舟行遇風三五日即抵

廣東由廣東水路至廣西經梧州柳州等府

直至貴州獨山州三腳屯起旱赴滇惟五六

月間南風盛時海船逆風折戣竊恐稽延復查自漳州府陸路由詔安縣至廣東之海陽縣上船可通廣西俟臨期酌看風色辦理得旨且不用矣再候旨可也○調福建巡撫鄂寶為廣西巡撫廣東巡撫鐘音為福建巡撫貴州巡撫良卿為廣東巡撫以雲南布政使錢度為貴州巡撫雲南按察使官兆麟為雲南布政使○以江西按察使吳虎炳廣西按察使圖桑阿對調○以喀什噶爾辦事大臣

伊勒圖署伊犁將軍察哈爾都統安泰為喀什噶爾辦事大臣綏遠城將軍巴祿為察哈爾都統鑲藍旗漢軍都統傅良為綏遠城將軍○丙午

上至吉安所臨送

溫惠皇貴太妃金棺○幸圓明園諭曰都爾嘉著賞給副都統銜授為伊犁領隊大臣○諭軍機大臣等雲南綠營兵丁恒怯性成屢屢棄逃潰散玩律誤機實已不堪應用此

等應出名糧斷不便復於該省伊等子弟招募徒令糜官帑而損軍威是以前曾降旨鄂寧令將歷來未經項補名糧及此後續出糧缺一概停其充補密記檔案俟將來另行辦理現在派往京兵原為彈壓地方整飭滇兵起見此時距進兵之期尚早月需鹽菜口糧為費不貲伊等遠涉邊徼代滇省懦劣之兵攻戰防守則以綠營坐耗銀糧贍我八旗勁旅既化無用為有用而權衡亦得其平因命軍機大臣覈計各兵月支銀米總數約減滇兵三分之一已足數京兵等供給著諭阿里衮舒赫德鄂寧總計滇兵革退逃亡應出額數若干停其本省挑補即以曠缺銀米為京兵等月需之用如此轉移調劑於情事實為妥便舒赫德鄂寧等悉心妥辦並覈計所扣會同阿里衮鄂寧等悉心妥辦並覈計所扣銀米是否足以相抵務裨實用總須不動聲色毋得稍涉張皇仍將籌辦情形據實具奏

○河南巡撫阿思哈奏大兵過境蒙恩賞銀十萬兩。復將本年地丁錢糧概予緩徵。查安陽等十五州縣地丁錢糧內有漕項銀二萬四千五百餘兩。係隨同地丁徵收分款起解。今若摘出徵收。為數零星。而下年又須扣除。亦易滋弊。請一體緩徵。免其先行完納。得旨著照所請行。○丁未

上詣暢春園。問

皇太后安。○諭軍機大臣等。阿里衮等奏稱據

陸續投出之乾清門侍衛官員等稟告之詞。情殊可疑。恐有臨陣退縮情事。俟侍衛等到齊。明白質詢具奏外。已將烏三泰長清遣回京師。又詢之陸續投出官兵。俱稱賊匪內塗面漢奸甚多。殊為可恨。俟進兵時。嚴行查辦等語。阿里衮等此奏。恐侍衛官員內有不顧將軍。先行逃出者。欲行查明治罪之意。但此次將軍所領官兵。非木邦可比。木邦之兵。先事逃散。以致債事。理宜查辦。若將軍所領之

兵。深入賊巢。奮勉久戰。即有先將軍而出者。亦必將軍大臣等。先行遣出。竟可不必深究。伊等既將烏三泰長清遣回京師。候朕詢問。其總兵達興阿。亦著由驛遣回。至奸民為賊匪所用者。半皆游食無藉之徒。輾轉查辦。亦非政體。現在惟以查探賊勢為要。可將此諭令知之。○又諭據立柱等奏。俟提臣五福到滇。即赴貴州新任等語。於朕前降諭旨。殊未體會。現在雲南軍務未竣。即五福到滇。立柱自有應行承辦之事。並非謂五福到彼。一經更替。即令交代起程也。著傳諭立柱。將來五福到任後。立柱仍須留滇。辦理事務。統俟軍營藏事。再赴貴州新任。並將此諭令李國柱知之。○刑部議覆廣西按察使圖桑阿奏。稱軍罪五等。俱刺配衛所。屯田戍守。充當苦差。流罪三等。則安置為民。並無役使。軍罪雖重。於流而自衛所裁併後。各省軍犯。均歸州縣管束。是軍流已同一僉配。定例中途在配脫

逃流犯俱不記次數原流二千里改二千五百里二千五百里改三千里已屬平允惟流三千里改附近充軍計程止二千里免死減等亦罪應滿流改發邊衛充軍止二千五百里雖由流改軍罪名較重但以流三千里之犯因逃加等反調發二千里及二千五百里充軍未免欲重反輕等語查軍流發配定例由罪人原籍按里計算至已經到配脫逃復行改調若仍就原籍計程定地誠不免有相離轉近者請嗣後俱就該犯現配地方計程定地改發充軍并迴避各犯本省相近之處從之○以待講柯瑾編修曹文填充日講起居注官右中允陳聖時署日講起居注官以原任四川北鎮總兵常保任為雲南永順鎮總兵○湖北巡撫定長疏報當陽縣勸墾地一項四十二畝有奇○旌表守正捐軀之直隸安平縣民常金科女常氏河南商水縣民文先能媳王氏○戊申署貴州巡撫良

卿奏脫逃餘下經臣復立賞格嚴飭地方官勒限躡緝現續獲十一名牢固監禁得旨俟拏齊即行奏聞尚有幾名未獲耶○以雲南鹽驛道諾穆親為雲南按察使○兩廣總督李侍堯疏報廣東歸善縣墩白場墾築鹽田三十二壩○旌表守正捐軀之江蘇新陽縣民尹雙林母徐氏陝西長安縣民馬世龍妻馬氏○已酉諭據定長奏拏獲荊門州逆犯孫大有何佩玉等嚴行究治一摺逆犯等兇悖性成敢於製械造謀圖為不軌實屬極惡不法之尤地方員弁一經聞信即能協力迅往全數擒拏甚屬能事著定長即將出力之文武員弁詳悉查明咨部議敘其尤出眾者並著送部引見○諭軍機大臣等永昌軍營留駐之兵不下一二萬人現在由京陸續派往滿兵又有六千餘人若俱屯駐永昌恐難彈壓因思普洱一路俱係滇省無用之兵若將滿兵分駐更可藉壯聲援著傳諭永瑞所

領湖廣滿兵二千五百名不必前赴永昌即往普洱擇無煙瘴地方屯駐並諭阿里衮鄂寧等將應行儲備軍糧等項速行隨時籌辦○又諭曰定長奏逆犯孫大有何佩玉等製造器械旗幟謀為不軌抗拒官兵業經拏獲各犯究審等語已有旨令將妥速獲犯之地方文武員弁查明咨部議敘矣至此等奸民原為戾氣所生比之惡獸毒蛇宇宙間不能無此種類其天良滅絕自外生成實為覆載之所不容一經破案即當盡法嚴究大示創懲若僅將首犯數人正法餘黨概從寬典則匪犯罔知警戒何以戢奸宄而靖地方著傳諭該督務將現獲各犯嚴加審鞫其黨逆助惡者均當按律駢誅不可稍存姑息此外或有餘孽未獲並當實力根究毋使稍有漏網可將此傳諭定長知之○賜卹受傷身殞之將軍公明瑞諡果烈陣亡之都統扎拉豐阿諡昭節護軍統領觀音保總兵李全並予祭

葬○賜卹軍營自盡之叅贊大臣侍郎珠魯訥並予祭葬給雲騎尉世職○旌表守正捐軀之河南商水縣民胡曰仁妻康氏○庚戌上詣暢春園問

皇太后安○諭軍機大臣等前據鄂寧奏遊擊袁夢麟守備陳言志帶兵應援木邦被賊衝散該弁等被衝之後作何下落尚未據鄂寧等奏及袁夢麟等雖所統兵數無多亦當奮力抵禦若一遇賊匪遽行潰散即當按律治罪以肅軍紀著該督等秉公確查如果有怙怯逃竄情形即行據實奏聞辦理不可稍存姑息著於奏事之便傳諭知之○禮部議准四川總督阿爾泰疏稱雅州一府向例附邛州考棚考試今人文日盛請另立一棚該處舊有空房堂宇號舍業經修葺齊全毋庸動支公項從之○賑甘肅平涼靈臺莊浪安化合水環縣平羅西寧碾伯大通肅州高臺等十二州縣乾隆三十二年水災饑民○豁福

建臺灣外洋遭風漂沒兵米一千一百六十石有奇。○辛亥諭軍機大臣等山東巡撫富尼漢所具奏摺於體制未合嗣後陳請安謝恩等摺仍照此次款式其陳奏地方公事各摺俱應書寫臣字著將此傳諭知之。○以寧古塔副都統宗室增海為廣州將軍。○以故湖南龍山縣大喇司土把總彭炳子榮魁四川建昌道屬中渡啞出卡土百戶阿雜拉子噶爾藏策凌襲職。○陞任福建巡撫崔應階疏報侯官長樂羅源古田將樂沙縣建安政和歸化上杭霞浦福鼎漳平龍巖鳳山諸羅彰化淡防晉江龍溪詔安金門通判等二十二州縣廳開墾田園地六十三頃九十九畝有奇。○豁福建彰化縣水衝園地一百三十甲有奇額賦。○壬子諭今年鄉試屆期所有各衙門應行開列試差之進士出身人員著吏部傳齊帶領引見。○諭軍機大臣等今日召見新授汝寧府知府徐紹洵看來其人謹

飭有餘尚知兢兢自守而才識未免拘牽於方面重任恐未能料理裕如汝寧一缺雖不甚繁劇然知府有表率屬員整飭地方之責未便因循貽誤著傳諭阿思哈令其留心體察徐紹洵是否能勝此任即行據實具奏。○又諭曰吳達善奏陝甘挑選額魯特兵丁三百四十六名前赴雲南現已分起起程由川省前進等語此等派往雲南之額魯特為數本屬無多若於到滇後復令分派各營與綠營兵丁零星錯處不但不能轉移滇兵怯懦舊習且恐日久因循轉為其所漸染殊非派令前往本意五福向在新疆於額魯特素為熟悉自必約束得宜著傳諭阿里衮鄂寧將此項派出額魯特兵丁三百餘人專交與提標管轄俾得聚居一處遇有應行派用之事酌量調遣以收實用不必更行散撥並將此諭令五福知之。○癸丑諭滇省進剿緬匪閭閻急公效力已疊經降旨蠲免正賦賞給帑

銀以普恩施。現在續調官兵繼進。一切解運糧石軍裝。並需內地夫馬接遞護送。所有應支腳價。若仍照定例給發。不足以示鼓舞。著加恩將運送糧石。不論夫馬。每日每石給銀三錢。其擡送軍裝人夫。准照黔省之例。每日每夫給銀八分。該督等其務飭所屬。悉心經理。俾小民均霑實惠。用昭體卹。該部即遵諭行。○諭軍機大臣等。據无拔世奏。浙省逆犯齊周華。控告齊召南。曾將銀兩寄存江姓。今查江昉父子。並無收存齊召南銀兩。代為生息之事等語。齊召南現已回籍。其寄存銀兩之江姓。的係何人。著傳諭永德。令其就近詢問齊召南。即行據實具奏。○又諭曰。哈國興自帶兵進剿以來。在綠營將領中。尚屬奮勉出力。現在委署雲南提督事務。著傳諭阿里衮等。俟五福到滇後。即令其馳驛速行來京。陛見。○協辦大學士公署雲貴總督阿里衮。陞任雲南巡撫。鄂寧奏邊外賊匪。俱已遠退。

實錄卷八十七

十三

現酌留官兵駐防要隘。餘俱陸續撤回永昌。臣阿里衮勤加訓練。以期精銳。臣鄂寧遵旨回省。辦理地方事件。并就近督辦京兵入滇事宜。得旨。舒赫德到時。仍應共至永昌詳議。○又奏。宛頂遮放。芒市。龍陵等處。前經臣鄂寧陸續運糧貯備。是以木邦錫箔散回之兵。并額勒登額帶往猛密兵。共二萬餘名。於宛頂遮放駐劄多日。得以供應無誤。茲宛頂刺米二千餘石。大兵撤回後。即運回芒市存貯。現存芒市存三千餘石。龍陵存二千餘石。足供支放報聞。○又奏。虎踞關糧員張遐齡。同至永昌。該員係隨額勒登額之員。臣等因細詢額勒登額逗遛情形。據稱額勒登額等。正月十七日到虎踞關。住一日。十九日抵遮坎。又住六日。二十六日起營不遠。即將營紮在二十七日。由大隴川復回蠻籠。二十九日由杉木籠山至喇咪。住五日。因連奉諭旨。始於二月初四日。由喇咪岔小隴川。芒市赴宛頂。

到遮坎時糧員即稟知離宛頂甚近乃額勒登額先檄調二十日口糧又在喇嘛裏帶滿兵五日綠營兵十日口糧先檄調軍裝馬一千匹又令騰越州買馬四五百匹又檄取軍需銀二千兩無非藉以遷延之計且忽而撥兵鐵壁關忽而撥兵邦中山忽而調兵堵禦南甸沙冲口到處停留延緩其實自入虎踞關後沿途未遇一賊等語查遮坎距宛頂祇三站額勒登額正月十九日已抵遮坎即應順道星馳乃忽前忽却有意耽延貽誤至於此極其心不可問罪不容誅臣等既又查出情節自當據實續奏得旨實實可惡○調吉林副都統明亮為寧古塔副都統以鑲白旗滿洲印務叅領卞桂為吉林副都統張家口副都統齊哩克齊為鑲藍旗蒙古副都統○蠲免江西南昌新建進賢鄱陽餘干皇子都昌建昌德化德安瑞昌湖口彭澤等十三縣乾隆三十二年水災應徵額賦其蠲剩緩徵

等項並予分年帶徵○甲寅
上詣暢春園問

皇太后安○諭曰鄂寧在滇已逾一載彼處情形自能諳悉且伊母年老鄂寧著來京省視其母俟朕面詢軍營一切情形後再行回任○諭軍機大臣等本年暫停雲南進兵之事由京派出之滿兵六千名若全數遣往未免虛糜餉項今酌減前鋒護軍二千名即明年再需進兵索倫等甚屬得力俟屆期指派可也將此傳諭阿里衮舒赫德知之○乙卯河東鹽政普福奏河東各商其世業相承者原屬藉為生計並非贅力有餘即自二十五年以來於潞安澤州等處選充之商辦理數年亦多勉力往往藉口消乏希圖退避現在紛紛具呈求退當經嚴切曉諭趁時加工澆曬將來刮鹽既多自不至於苦累得旨若此任再不盡心依舊模稜則不可問矣汝非不能辦此者少有不妥即是汝不盡心再看○丙

辰諭今年鄉試應行開列試差人員已降旨令該部帶領引見但此次既停其考試則應開人員為數衆多其中間有年力就衰學殖荒落者若令概行開送恐不足副衡文之任著各該衙門於合例人員內即速揀選彙送吏部帶領引見○旌表守正被戕之直隸昌黎縣民齊敦榜妻李氏○丁巳

上詣暢春園問

皇太后安○還宮○是日起

上以常雩祀

天於

圜丘齋戒三日○是月浙江巡撫熊學鵬奏天台縣逆犯齊周華悖逆一案其書內所載為作齊巨山序之新昌縣人呂撫早經身故於其家中查出聖學圖一張一貫圖一張所刻圖說雖無狂悖語句但所稱四大三際等語半出撫拾附會又列無稽國名於一貫圖之下怪誕不經至所稱六年穰六年旱十二年

一大飢大熟等語乃係妄言禍福應追板銷燬以維正學得旨覽○閩浙總督崔應階奏閩省各營配兵騎操馬匹向係差弁赴口外購買嗣議於本省及兩湖貴州廣西買補查現在辦理軍需各省購買維艱請暫循舊例仍赴口外收買俟雲南軍需告竣後再行就近辦理得旨如所議行○山東巡撫富尼漢奏准江西撫臣吳紹詩咨稱臨川縣故官李紱曾為天台縣逆犯齊周華作天台山諸人集序李紱之子李孝洋現在山東試用業經叅奏革職移咨拏解看守等語當將署博山縣知縣李孝洋及家口解省看守候旨遵行得旨不必辦理○護理山西巡撫布政使富明安奏寶晉局積年存貯補色秤頭餘銅六萬四千二百餘觔鉛錫七百九十餘觔銅多而鉛錫少不敷配搭是以未經籌辦現在採買正案鼓鑄鉛錫陸續運局請將前項積存銅觔除動本案積存鉛錫七百餘觔外其不

數鉛錫六萬三千四百餘觔。即於正案鉛錫項下借動。按卯搭鑄。應補鉛錫。俟下次委員採買時。照數搭還。俾餘銅不致久貯。錢文益覺充裕。得旨。如所議行。○四川總督阿爾泰奏。松潘雜谷。打箭鑪三廳兵民雜處。食指浩繁。雖該處俱設有倉儲。但所存無幾。每遇糧少價昂。殊難接濟。似宜籌酌儲備。查錢局鼓鑄餘息。犒賞番屯項下。現積存銀六萬兩。並無動用之處。擬於此項內。先撥五千兩。分貯

松茂建昌道庫。遇糧價平減之後。松潘廳發銀二千兩。雜谷打箭鑪兩廳。各發一千五百兩。即就本地酌量採買貯倉。如行之有效。再覈定章程。隨時酌辦。得旨。如所議行。○陞任雲南巡撫鄂寧奏。滇省開採銅廠。經前督臣楊應琚奏准。祇許在舊廠週圍四十里內開挖。礮硿。其四十里外。不准再開。以節耗米浮費。查舊有老廠子廠。近年因硿老礦。微銅觔較前大減。若非多開新廠。趨辦添補。實不足

敷撥用。且新開子廠。仍係素識苗引之民。移舊廠丁夫。往彼開挖。即或另有招募。亦不過衰廠之砂丁。聞有新開旺廠。舍彼趨此。是雖多開一廠。而廠民並未加增。前督臣楊應琚以為因此耗米。原未籌畫確實。請仍循舊例。無論離廠遠近。均聽開採。不必拘定四十里以內之限制。得旨。如所議行。

大清高宗法天隆運至誠先覺體元立極敷文奮武孝慈神聖純皇帝實錄卷之八百七

大清高宗法天隆運至誠先覺體元立極敷文奮武孝慈神聖純皇帝實錄卷之八百八

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣等謹將

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級 董誥內大臣戶部尚書鑲藍旗滿洲都統軍功紀錄五次

尋常紀錄十四次 臣等謹將經筵講官太子少保工部尚書紀錄六次 臣等謹將

敘修

乾隆三十三年。戊子。夏。四月。戊午朔。享

太廟。遣誠親王允祕恭代行禮。○諭本年鄉試。應開試差人員。降旨令各該衙門堂官。量其年力學殖揀選。帶領引見。今贊善路斯道一員。年逾七旬。久經衰邁。乃詹事府堂官仍行開送。顯係瞻徇情面。所有該堂官著交部議處。○又諭翰林院詹事府應考人員。自乾隆二十八年考試之後。迄今已閱五年。著於初五日在正大光明殿考試。○又諭曰。郭鵬翬。陳元震。以軍營辦事之員。輒敢私自逃回。其

情甚屬可惡。業經正法示衆。所有該二犯之子。俱著削去旗籍。發往伊犁。給與厄魯特為奴。○已未

上詣

南郊齋宮齋宿。○諭今日引見試差人員內。給事中閻循琦。係派辦工程之員。何以一體開送。著將都察院堂官交部議處。○又諭上年軍政時。因福建金門鎮總兵楊元超。年逾六旬。是以降旨令其來京陛見。今察其精力未甚衰邁。猶可勉供職守。楊元超著仍回原任。○諭軍機大臣等。永德所奏。齊召南將銀兩託江姓商人生息一事。並未詳查得實。據稱齊周南誣控無疑。不惟冒昧疎忽。且深蹈外吏消弭卸責陋習。齊召南已令押回原籍。將來到浙時。何難向伊查問。江姓的係何人。自可得其確實。乃永德一接尤拔世來咨。遽謂毋庸辦理。試問江姓充商者。豈承玠之外。別無一人耶。永德甫經簡任巡撫。正當實心奮

勉。何即有意沽名若此。殊失委任封疆之意。無福承受矣。永德著傳旨申飭。再該撫嗣後除請安謝恩各摺外。其辦理地方公務奏摺。俱應書寫臣字。以符體制。並將此傳諭知之。

○又諭此時大兵陸續到滇。省駐劄。賊等畏懼。遣人乞降。亦未可定。但賊等甚屬詭詐。或係誠心乞降。或係使人試探。均宜詳察辦理。將此傳諭舒赫德。伊到彼時。賊匪遣人乞降。或其酋長親來。或遣大頭人來時。舒赫德代

為具奏請旨。若僅遣微末頭人前來。則不可信。即向伊等云。爾等係叢爾小部。敢與天朝抗拒。情甚可惡。斷難輕宥。我今統兵將爾等盡行勦滅。爾等果自悔罪。誠心乞降。必得爾王親來。或遣大頭人來。我當代為奏懇。大皇帝或憐爾愚蠢。從寬末減。亦未可定。若但遣微末頭人來。不但不代為具奏。爾等所呈文書。亦不折看。如此曉諭。一面駁回。一面奏聞。若乘賊等遣人乞降。即藉此苟且了事。斷乎

不可。著傳諭舒赫德會同阿里衮。鄂寧遵照辦理。尋奏。查此番緬匪呈遞乞降文書。其大頭人一名未到。僅交與被擒之兵丁帶呈。且所呈文書內。復牽率土司獯夷為辭。看來仍屬藉此試探。臣等竊議。不但不代為奏請。亦不須給與回文。但現在出來兵丁許爾功等云。賊匪自知罪重。大頭人不敢即來。

大皇帝如肯恩准。伊等投誠。隨後即遣頭人呈進貢物表文等語。是以本年暫不進兵。且聽伊信。臣等遵訓。作擬駁文呈覽。其應如何之處。出自睿裁。得旨是。少加修飾。但徑行發文前往。反似先去催逼矣。莫若權且不發。俟伊著急。自必復遣人來。○庚申。常雩。祀

天於

園丘。

上親詣行禮。○詣暢春園。問

皇太后安。○幸圓明園。○諭曰。簡親王現丁母憂。不能當差。正紅旗滿洲都統事務。著色克

慎署理。○辛酉。諭軍機大臣等。雲南永昌邊外茂隆廠附近滾弄江。所有廠內砂丁。本係夷民雜處。近來是否安靜供役。各銀礦是否照舊開採。內地人民是否照常往來。至該廠西南與葫蘆苗壤地相接。從前雖據鄂寧等奏。該苗並無為緬匪誘脅附從之事。但不知此時實在民情若何。至普洱邊外一帶土司。如十三版納等。共有若干名目。是否照常內附。不為緬匪所用。一切邊境情形事宜。該督撫等。何以未見奏及。著傳諭阿里衮。舒赫德。鄂寧等。即行悉心體訪。詳晰奏聞。可於伊等奏事之便。傳諭知之。尋奏。查茂隆廠在耿馬土司南界。係葫蘆苗長所轄。現在承辦該處砂丁。均係內地人民。照舊開採納課。甚屬安靜。民間亦照舊往來。並無滋事不法之徒。其葫蘆苗長。亦照舊恭順。無為緬匪誘脅附從之事。該處民情。俱各寧帖。至十三版納各名目。照常內附。不為緬匪所用。得旨覽。○吏部

帶領王大臣京察驗看之四五品京堂。通政司副使德爾泰等。四十二員引見。得旨。德爾泰。德成。歐陽瑾。觀文。李中簡。宗室良誠。劉松齡。傅作霖。施世琦。俱准其一等。觀保年老。著以原品休致。富森不稱翰苑職任。亦著原品休致。餘依議。○壬戌。諭據布政使張逢堯條奏。請將各省歲貢生應用教職人員。無論已未截取。每逢鄉試之後。即行驗看淘汰。經該部議駁。以貢生等選授發憑。自有考驗之例。毋庸每科豫為甄別。降旨允行。第念督撫等臨期考驗。積漸因循。既不免徒成具文。而該員等年齒就衰。憚於赴驗。或部選已久。尚未蒞任。致諸生督課廢弛。於學校殊有關係。嗣後督撫考驗。務須詳慎甄別。不得稍事姑容。其新選之員。有遲逾定限。久不到任者。即照例嚴叅。開缺另選。至教職遇有懸缺。向來率委別學教官代理。此等司鐸微員。兩任豈能兼顧。現在各省有挑選二等舉人在籍候選

教職之員。伊等得缺尚遲。如有情願及時自効者。即赴本省督撫處報明。遇有缺出。需人聽候該督撫會同學政。挨次派委暫署。則員缺既不致久懸。而需次者亦不令閒曠。自為一舉兩得。該部即遵諭行。○諭軍機大臣等。昨適念及普洱邊外一帶土司。近日作何情形。未據鄂寧等奏聞。因傳旨詢問。今日果據阿里衮奏報。九龍江橄欖壩等處現有賊匪滋擾等語。可見該處沿邊一帶。原不應置之不問。今既有賊匪蠢動之事。尤須查究。此項賊衆。是莽是緬。或止係召散餘黨。潛蹤生事。且又聞宮裏雁之妻囊占在彼煽誘。總未得其確信。該處土司如必先捧等。皆熟悉夷情者。若即就近查問。必當得其實在。至摺內所稱。俟大兵進勦阿瓦後。順道翦除等語。又非目下籌辦機宜。征勦緬匪一事。今年已暫緩進兵。自應將普洱邊外零星賊黨。先行勦滅。將來或必須進兵。即由此路直抵阿瓦。似屬

出其不意。況現在派往京兵四千名。合上年舊存之兵二千餘。聲勢亦不為小。即使攻勦賊巢。或不無尚須籌畫。若以此力量。殲除此輩么膺小醜。又有何難。著傳諭阿里衮等。先行查明賊匪底裏。至秋冬瘴退時。阿里衮即統京兵赴九龍江外一帶查辦。如遇賊衆抗拒者。即勦殺無遺。使之聞風膽落。設有誠心降附者。亦當令其畏服德威。不敢復存反側。方為妥協。彼時舒赫德亦當至普洱。思茅等處。策應聲援。現今雲南省城。並無急需辦理事務。而舒赫德到永昌後。尚有應與鄂寧等面商事宜。鄂寧著仍回永昌。會同悉心妥辦。鄂寧此番辦理諸事。尚屬妥協。獨急於迴省城。朕所不喜。○又諭。昨經降旨永瑞帶兵至滇省。不必前往永昌。即往普洱。覓無瘴氣處所屯兵。如思茅等處無瘴氣。即進兵於思茅等處駐劄。尤為妥協。將此傳諭永瑞。令其帶荊州之兵。即行前往普洱。著一併傳諭阿

里哀舒赫德鄂寧知之。○閩浙總督崔應階奏漳浦縣杜澤地方有奸匪盧茂編造詭名悖逆詩詞并分散花藍號布煽誘各村莊愚民聚匪百餘人欲圖搶劫縣城適該縣知縣徐觀孫往鄉相驗途次聞知連夜回縣與把總曾大猷等并力堵截該鎮道府一時俱到漳浦四路追緝提臣黃仕簡亦到督率員弁先後拏獲逆匪二百餘名要犯均已拏獲一面究審一面查拏餘黨務淨根株得旨好餘有旨諭諭軍機大臣等據崔應階奏漳浦縣奸匪聚眾圖謀搶劫經該管員弁等拏獲多人一案已於摺內批示並將黃仕簡所奏把總曾大猷令其送部引見矣此案該督督率所屬辦理迅速而葉相德孫孝愉等均屬勤幹有為是以奸民已多就獲所有在事出力員弁及該縣知縣如有應行鼓勵者可一併查明具奏候朕酌量降旨至案內匪黨尚多務即密速查拏盡法嚴行懲治若止將首犯

數人正法其餘黨惡僅照為從以次寬減則惡逆之徒固知警戒何以戢奸宄而靖地方著該督將現在未獲各犯悉力擒捕毋令一人漏網不但首兇宜正顯戮即助逆各犯亦當按律駢誅不得稍存姑息之見將此傳諭該督知之○豁除江西星子縣乾隆三十二年水衝二則民田三十二畝有奇又屯田九畝有奇額賦○蠲緩湖北江夏武昌嘉魚漢陽漢川黃陂沔陽黃岡黃梅廣濟雲夢江陵

監利十三州縣并武昌武昌左沔陽黃州蘄州荊州荊州左等七衛乾隆三十二年水災額賦有差○癸亥

上詣暢春園問

皇太后安○吏部帶領京察保送一等之內閣侍讀學士重祿等五十三員引見得旨重祿湯先甲德昌福明安陳聖時曹文埴俱准其一等穆克登泰五彰阿毓奇錦格滿岱張三賓靈保福森布福喜納色柱綸法保福哈富

興圖已圖桑阿。珅爾喜齊禮克圖。吳恩詔陸錫熊。郭元澄。天保百歲文福。常德宗室懇特宗室炳文。宗室五壯。宗室麟寧。徐恕已寧阿。宗室嶽山。瑞齡。德成。孟超然。富躬。陳用敷。寧泰。恩特赫謨。阿克棟。阿策。亶白璣。俱准其一等加一級。新泰。額勒登額。宗室蔚文。富明。那繼德。三藏保。俱著改為二等。○甲子。

上御勤政殿聽政。○諭曰。鄂寧覆奏。額勒登額退却遷延。喪心貽誤。所有奉到廷寄。及清字奏摺。並不告知。譚五格一摺。實出情理之外。深堪痛恨。今日適當理事之期。諸王大臣等俱在。因將鄂寧奏摺。及朕去歲秋間。極論額勒登額。譚五格之不堪任事。節經傳諭案檔。令衆閱看。可知朕早已豫料及之矣。進勸緬匪一事。前經劉藻。楊應琚等。種種措置乖方。其勢出於不得不辦。屢降諭旨甚明。至明瑞奉命往藏其事。一切經畫調度。俱能勇往振作。所至致果克捷。賊衆望風披靡。計自木邦。

宋賽以至猛密一路。摧破賊壘。擊敗醜徒。一力爭勝勢。亦已宣示中外。莫不共見共聞。惟明瑞初議。欲令額勒登額分道督兵前進。一節。朕早燭其委任非人。疊為傳旨訓飭。不得已特令額爾景額前往叅贊。以資救正。迨額爾景額在軍營病故。雖非意料所及。然使爾時朕若早計及一軍整頓乏人。即令阿里衮前往統率。即不能直進阿瓦。亦必能應援明瑞。而木邦已得之城。又何至復為賊衆覬覦。乃朕既以輕視緬匪。且以道里遼遠。恐鞭長不及。未即別簡大臣往代其軍。致額勒登額節節貽誤。紆道曠期。甘心引賊并力於我大軍。試問從來債事失律之人。有至於此極者乎。此則朕不能不深自引咎者。至明瑞深入賊境。鼓勵將士。殲馘因糧。無不自搽勝算。即至小猛育之役。猶分遣偏裨率領前隊。自以大營疲病之兵。不忍輕棄。乃身為殿後。擁衛全軍。且行且戰。迨乎屢冒鋒鏑。履險如夷。

遂不惜捐軀臨陣。蓋其秉志堅貞。先有自誓百折不回者。否則文員在軍。如錢受穀。馮光熊等。尚皆隨隊旋歸。並無撓阻。況以將軍統率大衆。更何難回至宛頂哉。又如明瑞所領兵衆。為數萬餘。數月經歷瘴鄉。處處衝突接仗。今合計次第撤回者。所失乃不過十分之一二。可見前此采入以來。我兵奮擊連勝。並不至大有損傷。特緬首以不足比數之汙裸。而失我為國勤事之蓋臣。為重可軫悼耳。若

額勒登額之罪大惡極。迥非情理所應有。但其素行即甚無良。敢於悍然不顧。亦何至冥心決裂。竟出於此。朕細思之。或由比年來西域大奏膚功。國家勢當全盛。而朕持盈保泰之心。猶有揜持未至。是以

天心仁愛。於席豐履順時。默示以滿損之儆耶。朕於此又不敢不倍增寅畏矣。現在阿里衮。舒赫德等。已先後抵滇。與督撫鄂寧。明德等會同熟計。俟京兵陸續會集。將戢邊進剿機

宜。詳籌定議外。所有此次軍行始末。及朕前後辦理。不肯委過臣下之本懷。明切宣諭。俾衆共知之。○又諭曰。額勒登額所犯之罪甚重。情殊可惡。著將伊女交刑部監禁。其已嫁者。令其離異。查抄家產。亦交刑部監禁。○諭軍機大臣等。昨經降旨。阿里衮等。今年進兵。既經暫緩。所有普洱邊外零星賊匪。自可先期剿滅。以靖邊徼。今據鄂寧奏。九龍江外莽子等。不過三四百人。其中有頭目召光。召齋

等在彼滋擾。此等當即係召散餘黨。並非緬匪出沒。但召散既逃匿緬甸。必與緬賊聲息相通。況其地亦有路可通木邦。安知前此侵擾木邦。非即此等烏合之衆。往彼助惡。況又敢時肆竊發。尤不可不先為悉力撲剿。以振軍威。著再傳諭阿里衮等。遵照前旨。酌量情形。於秋冬瘴退時。調集兵衆。前往該處。相機籌辦。現在京師勁旅陸續赴滇。統計前後不下六千有餘。以此殲除烏合么膺。勢如摧枯

拉朽。務令沿邊一帶奸宄淨盡根株。不致少留餘孽。則黨與廓清。於將來進剿聲勢。亦為有益。將此詳悉傳諭知之。○又諭。昨經降旨。鄂寧在永昌將至一年。深知彼處情形。俟伊與阿里衮。舒赫德查辦逃兵後。即行來京。候朕問明彼處情形。再令前往。但本年秋冬。尚須搜查附近普洱地方。隱匿賊匪。永昌不可無人。鄂寧著早行起程。能於九月內回滇。方為允協。再昨阿里衮等奏稱。審訊侍衛茂漢之事。朕曾降旨。木邦綠營兵動。即逃散。甚屬可惡。將首先逃避者查出辦理。著鄂寧。阿里衮等將如何辦理之處。一面具奏。一面來京。如人數衆多。一時不能查明。不如緩辦。鄂寧即行來京。阿里衮。舒赫德在彼留心查察。俟鄂寧來京。朕面加訓諭。回滇後再與阿里衮。舒赫德會同辦理。此時且勿洩露。並傳諭舒赫德。阿里衮知之。○吏部帶領京察保送一等之戶部郎中阿敏達等五十九員引見。得

旨。阿敏達。申保。興泰。秦雄飛。查虞昌。寧舞立。西成。永來。博清。額靈毓。王曾翼。陸耀。李慶葵。陳孝泳。長際泰。松柱。明興。薩爾圖。普璉。富惠。文燾。薩爾楚。穆精安。金培。伊里納。惠齡。高大德。七十五。觀音保。奕志。薩連。鄂奇。善富。明本。忠。固世衡。富森布。巴哈布。書璜。富昇。觀音保。五爾泰。墨爾更額。沈清任。哈琳。郎圖。富琦。汪獻芝。圖桑阿。運泰。智常德。克進布。隆保。覺羅誠光。興順。伍林泰。興安。瑪興阿。覺羅奉和。寶山。俱准其一等加一級。○以大理寺卿景福。通政使張若淮。俱為左副都御史。○以鑲藍旗護軍統領富廉。為鑲藍旗漢軍都統。○丙寅。上詣暢春園。問皇太后安。○幸靜宜園駐蹕。至庚午皆如之。○諭。圓明園綠營兵丁。差務較繁。看守之處亦多。著加恩添給一百名。以供差遣。所有添派事宜。著該管大臣照例辦理。○諭軍機大臣

等。今日良卿奏到各摺。有陳奏地方公務。而未書寫臣字者。殊於體制未合。嗣後該撫除請安謝恩等摺外。凡陳奏地方事件。俱著書寫臣字。可將此傳諭知之。○吏部等部議准。陝甘總督吳達善奏。稱安西府屬之淵泉縣。地窪潮鹹。城垣易於坍塌。查有相距舊城二里之郭壁地方。地高無鹹。水泉味淡。且距蘇勒河不遠。縣城移建於此。既可免潮鹹之虞。又於口外派兵合作。亦屬相宜。從之。○丁卯。

諭軍機大臣等。前據阿里衮奏。九龍江外。現有賊匪滋擾。當經降旨。阿里衮等。俟秋冬瘴退時。酌量機宜。將普洱以外零星賊匪。先期剿滅。今據阿里衮奏到。據該處鎮將等稟報。有探事兵目。路遇自賊營逃回夷人。詢係眼見莽子約有三四百人。其餘是猛勇整欠。猛迭。蠻狃。蠻累。擺夷。共有八九百人。聽得說官兵很多。伊等傷損二百餘人。連夜逃往猛混等語。猛混距九龍江不遠。豈可令賊匪在彼

盤踞。且此等烏合之衆。屢在土司邊界。敢於侵擾。若不大示懲創。恐伊等玩視肆行。罔知畏懼。至此輩係召散餘黨。其勢必與緬賊狼狽為奸。縱令近邊侵軼。是尤當先翦其羽翼。以壯我聲威。計京兵前後赴滇者。幾及六千餘人。又有西安新選之厄魯特兵。皆係得力之人。征剿緬匪。今年已暫緩進兵。若集我勁旅。以除么膺小醜。自非難事。阿里衮可遵照前旨。至期統兵前往。相機妥辦。至整欠土司

叭先捧。久經內附。且為土司中出力之人。伊現在何往。何以整欠擺夷。亦有隨賊之事。其猛勇。猛迭。蠻狃。蠻累。各處。前此曾否內附。有無土司管理。並著阿里衮。鄂寧。一併查明。即速奏覆。可將此傳諭知之。○又諭。蠻暮新街一帶。聞向為緬夷貿易處所。沿江而下。并有緬夷稅口。則其地交易之貨必多。但彼處所恃以通商者何物。其仰給內地。必於欲得者何物。除與中國交易外。復有何處行商。往彼

貨販。前此騰越州等處民人往來貿易。習為常事。必能備知其詳。今自用兵以來。各關隘久已禁人外出。新街等處。是否尚有貨市。或關口間有奸民偷越。或邊外土司潛赴經商。或緬夷界外。別種番夷往彼市易。抑或市集改徙他處。此等皆宜詢訪而知。且緬匪既藉貨物抽稅。連年貨稅不通。叢爾邊夷。豈能不稍形缺乏。各土司等詎竟茫無見聞。似亦無難廣為體覈。得其底裏。此皆督撫等所當隨時留心探索。據實奏聞者。再近邊各土司。素以耕種為業。去歲曾向彼購易米糧。此次行軍後。各該土境。是否仍安耕作。今歲若往彼採買。能否照前供應。又大山土司。久請內附。昨明瑞至彼。亦曾供饋軍糧。極為恭順。前諭鄂寧酌加賞賚。曾否辦及。該土司近日動靜若何。我大兵退出後。該土司曾否遣人前來。復申前說。其木邦土司。甕團。現在作何下落。俱未見阿里衮等奏及。著傳諭阿里衮鄂寧

將以上各情形。逐一確查。即行切實覆奏。尋奏查緬夷仰給內地者。鋼鐵鑼鍋。綢緞。鹽布。磁器。烟茶等物。至黃絲。針線之類。需用尤亟。彼處所產。珀玉。棉花。牙角。鹽魚。為內地商民所取資。往來俱有稅口。自用兵以來。概行禁止。臣等嚴加防範。商民俱不敢偷越。至該土司等。或有潛往商販。亦所不免。自新街蠻幕一帶。經兵火後。已成廢墟。近亦無人到彼。惟緬夷地界荒裔。或通海洋。或通西藏。番夷貿易。自必尚有市肆。但內地貨販。久經斷絕。緬夷必不能不形缺乏。至近邊土司。每歲秋成。俱有餘糧。足供採買。今歲又雨澤應時。可望豐收。必敷購買。其大山土司。前據差探木邦消息之姚濶海等回稱。我兵撤回後。緬賊將大山寨子殘毀。該土司兄弟。俱無下落。報聞。○又諭。前經降旨。著良卿調補廣東巡撫。鍾音調補福建巡撫。錢度陞授貴州巡撫。并諭令良卿俟錢度到黔。再赴粵東。鍾音亦俟良

卿到粵。再赴新任。今思良卿現在貴州辦理兵差。且有募選兵丁事務。一切難以遠易生手。良卿仍應留黔撫之任。所有廣東巡撫員缺。應即著錢度調補。第滇省軍餉事宜。錢度經手辦理有年。此時宮兆麟新任藩司。一切恐未能諳悉。著傳諭阿里衮。鄂寧酌量該處情形。如必需錢度始終承辦。即以巡撫銜。仍留管理布政使事務。亦無不可。俟軍務告竣。再赴陞任。阿里衮奉到此旨。即與鄂寧妥商。

覆奏。候朕再降諭旨。並諭良卿知之。○又諭據阿里衮奏稱。從前金川兵鑄造九節大銅礮。甚屬得力。此項礮分節易駝。即遇狹窄處所。亦可攜行。現咨阿爾泰選挑從前造礮匠役。派監造官一同前往等語。但金川用兵以來。業經二十餘年。從前造礮匠役尚難必其有無。著傳諭阿爾泰。四川如有從前礮匠。即照阿里衮所奏。將匠役監造官一併遣往。如無舊時匠役。及現在照式能造者。阿爾泰速

行奏聞。將京內有善鑄造者派往。併傳諭阿里衮知之。○署貴州巡撫良卿奏。尚書舒赫德。至貴陽省城。詢及募兵事。查撫標貴陽三營。及提鎮協各標。應募入伍充操者。情殊踴躍。且多係精壯之人。現已可得五千名。統俟滇省知會調撥。先將現在新兵送往。再有不敷。另行續募。商之舒赫德。據稱意見相同。俟到滇後。催查兵數。會商檄調。得旨嘉獎。○戊辰。軍機大臣等議。覆奉天將軍明福奏。稱奉

天地方。於乾隆二十五年起。留銀三十五萬兩。作本生息。現在既經停止。自應以次收撤。但其中如布錢估衣雜貨糧石等局。及當舖。皆易清結。請以一年為限。惟官兵旗民鋪戶人等。借欠之項。多寡貧富不齊。一時難以歸結。請限年歸款等語。查所定限期。三年至五年。均屬太寬。請交與該將軍等。再行察覈妥議。又稱生息銀既停。其兵丁紅白賞項。請於旗地租銀內動撥。查旗民餘地。每年共徵銀

十一萬兩有零。除常用外。每年尚餘銀七萬餘兩。應如所奏。即於此項內撥用。又稱。廣寧縣修理橋道。向有生息之項。應請一例。徹除等語。但該處橋道工程經費。作何辦理。亦請交與該將軍等悉心籌酌。得旨。依議速行。○吏部議准。調任江蘇巡撫明德等奏。稱查江蘇直隸通州。向有海門一縣。明季裁歸通州管轄。現因屢漲沙洲。其東南與崇明接壤。兩處居民爭搶沙地。通州崇明均礙難斷理。應如所奏。將蘇州海防同知裁改海門同知。移設沙洲適中之地。凡通州崇明新漲各沙。歸併海門同知管理。其通州狼山司巡檢。准其改為海門廳照磨。兼管司獄事務。其原設之通州沙務州同。即裁。崇明縣原設之半洋巡檢。准其移駐豹貓鎮。新設海門同知。海門廳照磨二缺。俱定為要缺。准其在外揀選調補。從之。○命兵部尚書陸宗楷兼管國子監事務。○己巳。諭軍機大臣等。阿思哈奏駐防兵

丁出缺挑補。所有馬械。往往私相頂售。流弊無窮。請於馬價項下。借給月餉銀內扣還等語。馬械為兵丁所必需。乃豫省積習。竟至新舊頂售。重利倍償。輾轉受困不已。實為兵累。今若借支官項。令其扣清辦理。則挑補新甲。既按月出利。而舊甲之家。又得有現給整銀。自屬兩便。但弓刀等項。所值無幾。若借給銀五十兩。未免過多。今為量酌調劑。即予以四十兩。已足敷用。該撫可即遵照辦理。將此傳諭知之。○護理山東巡撫布政使梁肅鴻疏報。乾隆二十七年。新城濰縣二縣。勸墾水地。共一十二頃二十一畝有奇。○庚午。諭軍機大臣等。今日彭寶奏到。沿途雨水情形一摺。據稱運河水勢較小。昨嵇璜奏勘河工摺內。亦有今歲運河水小之語。今春雨水未聞缺少。何以運河水勢不能暢足。自係去歲秋冬未能蓄蓄得宜所致。從前李宏李清時等總督河東時。經理妥協。運河並無淺阻。今歲因

何頓不如前。著傳諭嵇璜嗣後務須如法豫為籌辦。毋致河水稍有欠缺。并將該處運河因何水淺及近日情形若何。即速詳晰據實奏聞。○蠲免安徽安慶池州太平廬州鳳陽泗州和州七府州屬乾隆三十二年水災額賦。○辛未。

上詣暢春園。問

皇太后安。○迴圓明園。○諭軍機大臣等據阿里衮等奏大山土司瓦喇之姪阿隴因伊父

羅旺育特隨在軍營行走。阿隴於小路相失。同都司哈廷標來至永昌。現在給與養贍俟進兵時帶往。酌量交還等語。所辦非是。昨以大山土司久經投誠。極為恭順。未知邇日情形若何。已降旨詢問阿里衮等查明速奏。今其姪阿隴因在軍營迷道。隨回兵來至永昌。若即時將伊護送歸巢。示以天朝恩德。或可因此得彼處虛實。自是極好機會。況彼處無人前來。尚當遣人往探消息。豈有其親屬來

投轉為羈留不遣之理。可謂不善辦事。著傳諭阿里衮等。即於貴州兵丁內選派妥幹能事之人及沙練擺夷內之熟悉路徑者約四五十人。令哈廷標帶領將阿隴送回大山途中。設遇賊匪止須繞道相避。不可與之接仗。總期令彼遄歸該境。至阿隴起程時可諭以該土司屢次迎導大軍。饋送糧食。誠悃可嘉。特加恩賞給瓦喇二品頂帶。並酌量賞賚緞疋等物。以示獎勵。使外夷益感國恩。彌思報効。并使其聞知現在厚集八旗勁旅。剋期進剿。且不妨鋪張聲勢。聽伊回至該境傳播。壯我軍威。但不必告以進兵時日路徑。既以固大山內嚮之心。即使緬賊聞之。益令賊衆懷疑。聞風震懼。宣諭阿隴時。阿里衮等務督令通事人等詳悉開示。使彼明晰感悅。哈廷標所帶兵衆等前往大山。如能得緬匪的確信息。及彼處實在情形。回至永昌告稟阿里衮等。即可據以奏聞。并將探信之人量加優賞。

此旨到時。若瘴氣已盛。阿隴或以幼稚。憚於冒暑遠行。亦不必相強。姑暫行留住。加意撫卹。俟秋深再行遣送。可將此次所降之旨。詳諭阿隴。俾知感慰。或另得妥便。將阿隴不願觸瘴回程。及加恩之處。先行傳諭。瓦喇於事亦為有益。再哈廷標可任此事否。若不能。另派賢員妥當曉事者往。著將此詳諭知之。尋奏查大山土司。外似恭順。察其心尚不免首鼠兩端。即其兩次遣人饋糧。共不及二百石。聞其饋送緬匪糧食較多。是其實在傾心向化與否。及現在作何光景。自應乘伊姪阿隴迷道。隨來永昌之機會。即為遣人護送回巢。藉以探聽虛實。但聞大山寨子。已被緬匪殘毀。該土司瓦喇。及阿隴之父羅旺育特。俱無下落。臣等酌商。暫留阿隴在永昌。俟得大山確信。再送回阿隴。並遵旨查辦一切。得旨覽。○又諭據舒赫德奏稱貴州大路。俱係山嶺。行走甚難。計出境有一千數百里。大兵經過。

較別省宿處甚多。所用夫馬。有七分出自苗民。去年送兵三千。今年又復加倍。貴州經過地方甚多。幾有數月之程。請降旨良卿等將出馬苗民。如何鼓勵施恩之處。請旨辦理於事更屬有益等語。去歲用兵以來。貴州苗民辦理送兵夫馬。應付無誤。甚可軫念。自應加恩。以示鼓勵。著寄信良卿喀寧阿此等苗民。應如何施恩獎勵之處。即速定議具奏。尋奏苗民辦理送兵夫馬。每馬請於正雇定價外。加賞銀三兩。每夫脚價外。添給倉米一升。應差之日。再加賞銀二分。報聞。○又諭據阿里衮等奏稱。將審擬隨額勒登額隊伍先行妄動之綠營兵蕭貴周世賓徐洪正法外。其該都司瑚圖禮。遊擊什德。守備聘義等。請交部嚴加議處等語。瑚圖禮等俱係督兵之員。不能嚴束所屬。致令妄動。甚屬無能。不必交部。即著革職。留於彼處効力行走。○兵部議准。陝甘總督吳達善奏稱。查安西提標額設中。

左右城守四營。每營各設兵一千。共四千名。中左二營。每營額設千總二。把總四中。營原設經制外委六。又添撥告駐經制外委一。左營原設經制外委五。又添撥告駐經制外委一。至右營及城守營。額兵均係一千。右營設千總二。把總四。經制外委四。城守營止設千總一。把總二。經制外委四。較中左二營。未能盡一。應如所奏。照中左二營之例。右營添經制外委二。城守營添千總一。把總二。經制外

委二。於內地偏僻各營裁撥。安西提標中營裁撥經制外委一。固原鎮屬之階州營裁撥千總一。涼州鎮屬之鎮番營寧夏鎮之興武營各裁撥把總一。延綏鎮標中營興漢鎮屬之舊縣關營。西寧鎮屬之河州協各裁撥經制外委一。以上共七員。添入安西提標右營及城守營。以符營制。從之。○壬申。諭。昨於正大光明殿考試滿洲。由別衙門陞用翰詹等官。既閱其文。又驗其人材。分別等次。一等覺

羅巴彥學一員。二等恒濟。哈靖阿二員。三等覺羅德成格。德昌。觀文。覺羅吉善。博通阿。五員。四等鶴齡一員。不入等兆毅一員。侍講覺羅巴彥學。左中允恒濟。俱著陞授侍讀學士。侍讀學士觀文。著降為左中允。侍讀學士博通阿。著降為侍講。侍講學士覺羅德成格。侍講德昌。右贊善覺羅吉善。均著罰俸一年。左贊善鶴齡。著休致。侍讀兆毅。著革職。○又諭。昨於正大光明殿考試翰詹等官。朕親加詳

閱。按其文字優劣。分別等次。一等吳省欽。褚廷璋。張曾敝。三員。二等宋銳。胡高望。彭冠蔣雍植。金士松。曹仁虎。孫效曾。朱筠。秦承恩。彭紹觀。朱棻元。唐淮。王大鶴。韋謙恒。謝啟昆。紀昀。張燾。饒學曙。十八員。三等袁鑑。鄒奕孝。卜祚光。嵇承謙。沈士駿。葛正華。易文基。黃義尊。蔣良騏。蕭芝。李孔揚。福明安。國柱。勵守謙。孟生。蔥熊。為霖。汪上林。陳蘭森。丁榮祚。劉惇。張翬。柯瑾。陳于疇。徐光文。李鐸。胡翹元。劉經傳。

路斯道祥慶陳聖時三十員四等祝德麟龔駢文陳淦張世祿周位庚汪存寬于宗瑛郭潔雪格盧穀蔣鳴鹿戈岱吳鼎勝格明山十五員不入等德昌博棟二員編修吳省欽陞授侍讀編修褚廷璋陞授侍講少詹事張曾敬著賞緞四疋編修宋銑陞授洗馬編修胡高望陞授侍讀編修彭冠陞授中允編修金士松陞授侍讀編修孫效曾陞授侍講贊善朱筠陞授侍讀學士編修秦承恩彭紹觀均陞授贊善編修韋謙恒陞授庶子其二等未陞用者著記名於應陞處題奏侍讀熊為霖贊善路斯道均降為編修侍講柯瑾中允陳聖時均降為檢討編修汪上林劉焯檢討陳于疇李鐸均著以知縣用洗馬福明安侍講學士國柱均著罰俸一年檢討易文基蕭芝編修孟生蕙陳蘭森均著休致侍讀陳淦降為編修洗馬盧穀降為檢討侍讀勝格明山均降為檢討侍講雪格吳鼎編修張世祿郭

潔檢討龔駢文周位庚于宗瑛蔣鳴鹿均著休致其四等之未經降調休致者均著罰俸一年不入等之庶子德昌中允博棟俱著革職○京察本年滿漢各官年老有疾官九員才力不及官三員分別處分如例○直隸總督方觀承疏報乾隆三十三年順天永平保定天津宣化遵化等六府州并熱河道屬共墾田三百五十二頃八十一畝有奇○四川總督阿爾泰疏報乾隆三十二年南部巴州榮縣廣安清溪屏山馬邊達州新寧九廳州縣補首中下田地一百四十三頃三十三畝有奇富順屏山馬邊奉節天全達州太平酉陽八廳州縣共墾中下田一十七頃九十六畝有奇上中地一百三十頃八十二畝有奇

大清高宗法天隆運至誠先覺體元立極敷文
奮武孝慈神聖純皇帝實錄卷之八百八

實錄卷八百八

三十一

大清高宗法天隆運至誠先覺體元立極敷文
奮武孝慈神聖純皇帝實錄卷之八百九

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次 臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級 臣董誥內大臣戶部尚書鑲藍旗滿洲都統軍功紀錄五次

尋常紀錄十四次 臣德瑛經筵講官太子少保工部尚書紀錄六次 臣曹振鏞等奉

敕修

乾隆三十三年戊子四月癸酉諭軍機大臣

等昨據舒赫德奏黔省招募兵丁一事因該
處糧價較滇省稍平赴募者恐到滇後所得
名糧不敷糴買口食之用未免裹足不前自
屬該省實在情形因思新挑充伍必自步兵
始而步兵每月餉銀有限設遇穀貴之時買
食原屬不敷若馬糧月給較厚便可無虞歎
少聞黔兵在軍營者比他處綠旗兵頗為得
力而現在滇省兵丁惟怯性成實係不堪驅
策與其虛糜帑項以贍此無用之輩何如汰

除妄費。厚給黔兵。以收實濟乎。著傳諭良卿。曉諭應募兵丁。如伊等有情願赴滇。永充該省額兵者。即准其頂食馬糧。人情自必踴躍樂赴。其如何挑募前往頂補之處。良卿可就近咨商阿里衮等。妥協經理。至黔省自去歲及今。派赴滇省兵丁內。並著阿里衮等。徧為詢問。如將來軍務告竣。有願留滇補伍者。亦並給以馬糧。俾得生計充裕。所有現在派往之厄魯特。亦著支食馬糧。以示體恤。阿里衮。

舒赫德。鄂寧等。奉到此旨。可與前諭將滿洲兵丁抵補滇兵額缺糧餉之處。一併通融籌辦。並將如何辦理情形。詳悉奏聞。尋良卿奏。臣奉諭後。即傳集標兵。面加詢問。無不歡欣願往。現在招募新兵。據提標。四鎮。九協。二十四營。陸續開報。挑選年力精壯者。已足五千名之數。以備調滇充補。其貴州本省所缺額名。容陸續募補。報聞。○吏部帶領京察保送一等之兵部郎中賦泰等。五十五員。引見得。

旨。賦泰。色欽。東書邊廷掄。福安。色爾布。恒臨。錢策。福德。德成。善泰。德平。根長。那繼。福盛。保尚。喀碩克。額爾克圖。蘇忠阿。保綏。書魯。穆精阿。博爾敦。依蘭泰。覺羅阿揚阿。覺羅阿爾賽。阜起。福德。李師敏。王昶。朱岐。范家相。杜玉林。榮柱。周際清。覺羅德麟。圖山布。書德。鄂謨。伊薩布。覺羅福祝。竈神保。覺羅德成。書英。額素誠。額景祿。覺羅巴彥泰。克興額。巴哈。慈保。果勒明阿。李錦。保成。發哈。申大年。俱准其一等。

加一級。○吏部議准。兩江總督高晉奏。稱。原駐洮涇鎮金山縣知縣典史。仍舊移駐衛城。金山衛同知。巡檢衙署。改為知縣。典史衙署。監獄。縣庫。及教官衙署。將洮涇舊料。酌量移建。該縣漕倉。仍留洮涇。金山海防同知。並金華司巡檢。俱移駐洮涇鎮。其洮涇鎮之知縣。典史。衙署。即為同知巡檢居住。金山衛城。分隸華亭縣之地方。歸併金山縣管轄。從之。○雲貴總督暫管巡撫鄂寧奏。滇省舊銅廠。硃。

深礦薄。其新開于廠甚少。更兼辦理軍務之際。牛馬不敷。油米炭等雜項。到廠價昂。費倍。廠民竭蹶。請每銅百觔。增價銀六錢。以舒廠力。俟大功告成之後。仍照舊定章程辦理。得旨。著照所請行。○甲戌。

孝端文皇后忌辰。遣官祭。

昭陵。○乙亥。吏部帶領京察保送一等之工部。

郎中農起等五十一員引見。得旨。農起。福重。

薩穆哈。裕義。姚珪。克興。額和。隆武。玉琳。德霑。

薩泰。伯起。圖丙。忠覺。羅佛德。諾穆。渾留。保住。

佛祿。阿林。巴海。薩音。博爾克。圖太平。阿喇。

布坦。伊昌。阿富。慶隆。昌。專泰。永明。查星。阿賽。

尚阿。興隆。白紹。覺羅扎進泰。素爾訥。趙鏐。紀。

復亨。王懿德。富勒敏。覺羅敦岱。噶勒炳阿。阿。

隆安。齊珉。官泰。福永。圖章。佛爾慶。額伍雲珠。

舒啟善。俱准其一等。加一級。巴克唐阿。恩成。

伊祿。八格。圖桑。阿俱。著改為二等。○軍機大。

臣等議奏。據奉天將軍明福奏。覆前奉諭議。

裁戰船。查奉天現在止存趕繒船六隻。每年操演。須四隻駕駛。二隻鎮守。又歷年以三隻防海。三隻巡海。不能裁汰等語。查奉天瀕臨大洋。非船身稍大。難以涉歷風濤。所有戰船六隻。應如所請。照舊存留。從之。○丙子。

上詣暢春園。問。

皇太后安。○諭曰。良卿前已降旨。調補廣東巡撫。但伊在黔。現在有承辦赴滇兵差事務。未便遽易生手。著仍留貴州巡撫之任。其廣東。

巡撫。著候旨行。錢度即速來京請訓。○又諭。朕前以譚五格之罪。視額勒登額較輕。因降旨。將伊提京審訊。再行治罪。昨據阿里衮奏。稱譚五格曾與額勒登額商議。欲由騰越州行走。是譚五格顯係畏縮不前。欲回內地。情殊可惡。譚五格之子。亦著拏交刑部監禁。○諭軍機大臣等。前經降旨。將錢度調補廣東巡撫。並諭令該督撫等。如錢度任內經手事件。必須伊始終料理。即以巡撫銜留滇辦事。

俟軍務告竣再赴新任。至哈國興亦曾令俟五福到後來京。今舒赫德鄂寧奏令伊二人設法招致緬匪。所見大謬。雖已傳諭停止。但伊二人在彼尚恐稍徇於鄙陋之見。著傳諭阿里衮等令錢度哈國興即速起程來京。○又諭昨降旨令安泰前往喀什噶爾。更換伊勒圖。伊勒圖前往伊犁。更換阿桂。伊勒圖不必候安泰。即赴伊犁。阿桂俟伊勒圖到時速行來京。將此併傳諭伊勒圖知之。○尚書叅

贊大臣舒赫德雲貴總督暫管巡撫鄂寧奏查訪宮裏雁之妻子。詢問久住孟良地方之郭榮禮周通等並稱宮裏雁之妻囊占其子小宮裏雁自乾隆二十七年焚燒孟連後居住孟良之景夏壩。後因莽匪蹂躪孟良移住三島山外之猛叭山。三十一年囊占帶領頭目百十餘戶赴孟良華總兵營投誠。三十二年緬匪竄入孟良囊占仍奔回猛叭山。又稱囊占已嫁鬼家遂凍四臘。其子仍稱宮裏雁

等語。是其人必尚在邊外。得旨另有旨諭諭軍機大臣等舒赫德鄂寧等另摺所奏招服宮裏雁之妻囊占一事。亦可不。聞普洱邊外賊衆侵擾土司地界時。即有鬼家黨羽在內。果爾自不便輕宥。且此等殘敗餘孽本屬不成事體。而其與緬匪是合是分。亦難輕信。此時無庸招撫。俟秋間應辦猛混等處賊匪時。一併隨宜籌辦。將此傳諭阿里衮等知之。○又奏查緬匪敢於抗拒王師。必當大申天討。特以邊未禽獸。其事本不足辦。且滇省山多路遠。一切籌辦不易。查滿兵千名。須騎馬二千。馱馬三百。裹糧及跟役需馬一千五百。是滿兵萬名。須馬三萬八千。綠旗兵千名。須騎馬三百。馱馬三百。裹糧餘丁。須馬一千三百。是綠旗兵萬名。須馬一萬九千。若三萬名。即須用五萬七千。而官員乘騎。馱載裹糧。及安臺續運軍裝糧石。又須備馬數萬。以滿漢兵四萬名計算。共需馬十萬。各省撥解既費

周章購備草料亦復匪易此辦馬之難也至於米石查永昌地處極邊官鮮積貯民少蓋藏且連年用兵米糧消耗今計兵備糧兵四萬名日需米四百石以十個月計算需米十二萬石永昌無馬料以米代之馬十萬匹每馬一升日需米千石現在通省可撥之倉糧只三十五六萬石糧既不敷加以每三夫運米一石用夫百餘萬人且遠者二三十站往返轉運沿途須三四十萬人路費腳價甚繁此辦糧之難也又查永昌出口道路一由騰越之虎踞等關一由永昌之宛頂等處兩路山峻道窄兩人不能並行每路數萬人綿長至數十餘里前營已到後營尚未起程前後難以相顧聞邊外更險勢難通行至永昌之沿江以外騰越之南甸以外俱係土司地方連年用兵夷民逃避一切軍裝糧運無夫可雇內地民人雇令赴口雖重價不應即迫脅使行往往半路逃亡若仗馬騾馱載馬夫亦

無從雇覓若用兵牽趕需兵又復不少口糧草料在在掣肘又永昌所產食物菜蔬僅敷一郡之用今聚兵累萬不獨食物昂貴且恐不給是以臣等現議分駐以裕兵食再查永昌百里之外至潞江烟瘴漸盛其餘土司地方亦皆有瘴每年冬月漸減至正月復生一年之內無瘴時甚少且邊外冬月雖無瘴癘而水寒土濕易患瘧痢是以舊歲錫箔一路官兵病者接踵即猛密路之官兵雖未深入而駐劄老官屯旱塔等處水土惡劣亦病者纍纍又聞其地險隘異常賊人形同狗兔登山下箐如平地而我兵無可用武及至深入兵將即精壯如常馬行險峻數月大半疲敝無用加之入賊境一二千里之遙糧不能繼實無勝算可操臣等悉心計議賊匪雖屢次抗我頻行皆是自救其死並未敢稍軼內地必有留為求作天朝僕隸地步之心臣鄂寧當妥密訪查若得其實情可以仰邀恩赦之

時即行奏聞請旨。得旨。朕早知爾等必為此無恥之見。大非矣。且舒赫德臨去時。朕未曾面諭乎。汝一離朕前。必有乖張之事。竟是不知改之庸愚耳。○又奏。臣鄂寧曾囑錢度。哈國興密商設法招致緬夷投誠。今舒赫德到滇。公同反復商定。即密札錢度。囑與哈鎮密辦之事。即妥速辦理。但錢度現奉諭令赴黔撫新任。可否懇恩。將伊暫留滇省。將軍務料理清楚。再赴新任。若錢度可以暫留永昌。官

兆麟即可在省城辦事。得旨。另有旨諭。諭軍機大臣等。舒赫德鄂寧所奏密陳情形一摺。深屬乖謬。進剿緬匪之事。朕審度全局。此時原無必欲殲渠掃穴之意。但事勢遽難中止。自不得不熟籌妥辦。至滇省辦理糧馬。未免艱難。朕前閱鄂寧奏摺。早已鑒悉。并屢誨伊等從長計議。舒赫德在京。尤熟聞之。何待伊等復為瑣屑指陳。且軍行需馬。給用雖有成數。然亦何妨因時因地酌量調度。若必如此

斤斤計數。則是跬步不可行矣。即如康熙年間。征勦吳逆。滇黔一帶。未嘗不調集兵衆。何彼時未聞辦馬竭蹶耶。若所稱招致緬夷一節。更屬無恥。大出意料之外。緬匪屢抗顏行。實聲罪致討所必及。即或以其地險瘴重。不值勞師勤遠。亦當整頓兵力。審勢繕邊。徐圖機會。設果難措手。即明降諭旨。暫行撤兵。猶屬光明正大。何至為此掩耳盜鈴伎倆。且前經傳諭。以此時緬匪即有投誠之信。尚當責

其首親至懇求。或遣大頭目奉表輸忱。不得僅以無名賊衆一詰軍門。便欲了事。舒赫德在朕前。不惟習聞朕旨。即伊在京時。亦曾言斷不可遣人往彼招致。何一至滇省。頓作此不顧顏面之詞。至於此極。試問此事即降旨中報。於國體已非所宜。若彼未來求。而先示之以意。此宋明諸朝庸餒不堪者所為。豈我國家勢當全盛。轉效彼自欺欺人之計耶。是必舒赫德因長途勞頓。其氣已怯。且沿途目

擊辦理兵差。故欲為此息肩之地。而鄂寧去年籌辦糧馬諸事。已覺竭力。此時未免畏難。是以兩人意見相投。遂不復顧計。率爾為此。若謂其事專出自鄂寧之意。則亦不類大學士鄂爾泰之子矣。至舒赫德在京受朕調度。承辦諸事。頗能盡心。而一離朕前。即有此冒昧乖張之舉。實難倚任。舒赫德、鄂寧俱著傳旨申飭。摺內所奏。令錢度、哈國興密為設法之處。斷斷不可。著傳諭阿里衮。速令停止。若

哈國興處。已遣人赴緬。亦當即速追回。切不可稍露形迹。為賊所輕笑。前已有旨。令鄂寧來京面受機宜。此時舒赫德留滇。亦屬無益。奉到此旨。二人即一同馳驛。作速來京。著將此速行傳諭知之。○吏部帶領京察保送一等之吏科給事中閻循琦。并翰林院陞任編修吳省欽等。四十一員引見。得旨。吳省欽、褚廷璋、宋銑俱准其一等。德成、覺羅巴延三、范宜賓、塘古泰、戈濤、庚音成善、達哈布、明安、英

泰、卓靈阿、鈕洪成、明李本楫、圖起、瑚什理、范宜清、彭元瑞、蔣雍植、卜祚光、圖拉、積福、楊義那、禮善、富昇、懷誠、甯廷璋、傅英、雙全、德積、達敏、阿山、福慶、德敷、德明、素楞額、保長俱准其一等。加一級。閻循琦著改為二等。○丁丑諭曰。中允曹文植、編修彭元瑞、沈初、董誥、學問俱優。因內廷有承辦事件。考試翰詹。降旨停免。未得與諸臣一體陞轉。著加恩各加一級。○諭軍機大臣等。昨舒赫德、鄂寧奏摺內稱。

現在辦理馬匹。甚屬艱難。拘泥可笑。已降旨申飭。但思從前兩路官兵。自撤回宛頂之後。所有騎馱馬匹。尚存若干。現在加意餵養。是否臆分尚堪應用。其滇省各營額設馬匹。現有若干。及本地土馬。尚可購覓若干。外如成都、西安、荊州等處。已經解送雲南之馬。又有若干。均當逐一查明。通盤覈計。以備將來應用。前經降旨。將普洱邊外零星賊黨。於今歲秋冬間。阿里衮統兵前往。相機勦滅。以示創

懲若目下馬匹不甚充裕則九龍江外一帶亦可毋庸汲汲籌辦不妨統俟明年經畫全局再行辦理阿里衮等奉到此旨即將實在馬匹數目逐一確查今秋可用不可用之處一併據實奏聞○又諭上年明瑞摺奏滇兵怯懦不堪將來遇有缺出請暫停選補曾經降旨鄂寧令將歷年未備名糧及續出額缺密記檔案另行籌辦實因滇兵扭於積疲之習不足復用遇缺另扣以示振作理所當然節次所降諭旨甚明昨總兵長清來京召見詢稱曲尋鎮現在兵丁糧缺仍於該省綠營中揀選充補等語滇兵既經扣缺另辦何以該鎮尚有缺出選補之事是否降旨之後尚未遵辦或該省各鎮未能畫一辦理抑係長清所奏未確著傳諭阿里衮等即速查明據實奏聞仍將應辦滇兵扣缺另補事宜遵旨妥協籌辦○又諭昨舒赫德鄂寧密陳情形一摺所見大謬已傳旨申飭矣征勦緬匪一

事朕初未嘗有必辦之心因楊應琚措置乖張其事出於不得不辦然現在相機籌辦其地路險瘴重不得不審慎為之原非必欲殲渠搗穴為勞師勤遠之策舒赫德在朕前皆所習聞何以一經赴滇竟茫然不省若此即如辦理糧馬該省情形未免拮据朕於新正閱鄂寧摺早已鑒悉即降旨詢問且令鄂寧來京面商一切舒赫德在京同軍機大臣無日不備聆訓旨豈滇省辦理棘手之處朕尚未周知而必待伊等張皇其詞妄為恐嚇耶至所云每京兵千名需馬三千九百此亦拘泥成例而言若因時制宜自當通融酌量況前此西北兩路用兵五年之內成此大功亦未嘗必需十萬之馬舒赫德在軍營寧不知之又如康熙年間征勦吳逆未嘗不用兵滇黔若必如此措置周章則吳逆尚不知若何猖獗又安能剋期翦滅耶至欲設法招致緬匪一節尤為荒唐無恥可鄙可怪緬匪僻在

荒微即果艱於進勸亦何妨降旨徹兵尚屬光明正大之舉特以國體所關勢難中輟此時原可從容經畫以俟機會即彼有乞降之信尚當加之駁斥不宜輕許屢經傳旨甚明伊等豈得委為不知且舒赫德前此聞楊應琚受莽聶眇遮之降有進獻鹽魚等語方且以為非笑即起程前朕慮其偏於苟且完事舒赫德自以更歷已久斷不致復蹈前轍為奏乃一離朕前竟爾自相刺謬實在情理之外獨不思緬匪專以詐降為長技彼自來尚當拒絕豈有轉授意招之使來是其可笑并出進獻鹽魚下矣至摺內稱鄂寧在永昌時即與錢度商酌招致之事其見幾與綠營粉飾陋習無異大學士鄂爾泰之子不應若此且鄂寧與明瑞同任此事明瑞勤事捐軀始將伊擢用總督伊寧不動於心思欲殄仇雪憤顧忍付之漠然且甘為不惜顏面急圖草率完事耶今年既暫緩進兵諸事正可從長

籌度有何迫不及待遽為此自欺欺人之事此必舒赫德目擊沿途接辦兵差彼又兼程勞頓遂爾氣餒鄂寧亦因承辦軍需不無竭蹶即欲藉此息肩是以一見投合不自知其謬妄二人俱委任軍務而庸猥至於此極獨不捫心自問天良耶舒赫德鄂寧著再傳旨嚴行申飭至舒赫德奉差原因滇兵惟怯不堪動輒退避逃散必須大加整頓是以令伊前往專任此事俟京兵到齊即會同阿里衮鄂寧悉心查辦以示懲創繼復降旨以京兵抵滇或尚需時則俟鄂寧陞見回滇再辦今伊二人既有旨令其即速來京此事如尚未辦及不妨暫緩之處竟待鄂寧將來回任再行妥辦著將此併諭阿里衮明德知之吏部帶領京察保送一等之光祿寺署正福寧等三十七員引見得旨福寧蘇明阿沐特恩海福奇成額邁拉遜瑪爾賽期成阿王鎮福生額舒明曾恒德什勒密梁景鸞勒保永泰

張肱薩靈阿。董步青。伍隆阿。楊桑阿。永齡。福通。覺羅法海。那澄。常慶。富勒渾。德慶。羅敏。塔章阿。汪承霈。八十九。保定俱准其一等加一級。鈕兆鳳。郎致安。福隆額。寶岱俱著改為二等。欽天監事務本簡。一切算法俱係西洋人辦理。此次保送一等人數較上次過多。著將該堂官交部議處。西洋人免其交部。○以太常寺卿王鋌為通政使。○戊寅。

上御勤政殿聽政。○諭昨舒赫德鄂寧奏密陳籌辦情形一摺。甚屬乖謬。可鄙可笑。已傳旨嚴飭。今日將原摺令王大臣等閱看。內如計算進兵馬匹一事。拘泥成數。每兵千名。應給馬三千九百。通計需馬十萬餘匹。其說甚誕。兵丁給馬。自應隨宜調度。使必膠柱鼓瑟。勢將跬步難行。試問前者平定準夷回部。豈此么膺可比。然用馬何嘗至如許之多。即康熙年間。征勦吳逆。滇黔一帶。未始不調集兵衆。亦不聞辦馬竭蹶若此。滇省籌辦糧馬。原不

無少有拮据。朕新正閱鄂寧奏摺。即已洞鑒。所以密諭舒赫德往辦此事。并屢諭該督撫從長計議。乃舒赫德一到滇省。未見面目。即張皇其詞。忽忙入告。有似滇省之事。朕總不知。藉彼奏而朕始悉其端委者然。有是理乎。至摺內稱設法招致緬匪投誠。所見尤屬荒唐。無恥。迥非情理所應有。進勦緬匪一事。朕初無必欲辦理之意。屢降諭旨甚明。因楊應琚措置乖張。其勢難以中止。遂令明瑞往蒞其事。明瑞統兵果入督率將士奮勇攻堅。自蠻結一路連摧賊砦。殲賊因糧。確操勝算。即由宋賽整軍前進。直至小猛育。轉戰幾數千里。凡遇賊衆。無不擊斬披靡。所統萬人皆不至大有損傷。獨以額勒登額逗遛債事。屢促赴援。喪心不顧。以致賊匪轉由猛卯抄出前路。窺伺大營。時明瑞猶於猛腊坡前駐劄。兵勢尚整。因營中間有疲病兵丁。不忍輕棄。遂遣偏裨按隊先行。自率扎拉豐阿。觀音保等

殿後擁護。使明瑞等彼時亦欲取道而出。則統率全軍。同回宛頂。亦復何難。即如錢受穀。馮光熊等。以文職漢人從軍。尚且旋歸無阻。何況將軍。蓋其秉志堅貞。豫存不肯中道輕還之意。是以親冒鋒鏑。寧為臨陣捐軀。其實覈計陸續回營。升士所損不過十之一二。此軍行實在情事。莫不共見共聞。至現在籌辦機宜。原欲從長審慎。並無急於掃穴殲渠之計。第將軍叅贊。既勤事効節。誼難置之不問。

而國體所係。應行應止。亦當隨時制宜。如機有可乘。則整兵繕邊。厚集繼進。無妨稍需時日。設以其地險瘴重。不值勞師勤遠。而明瑞在軍營。所有經歷形勢。急難措手之處。亦囑令侍衛等詳悉轉奏。夫知彼知己。為自來行兵大要。使將來果不必辦理。朕即明降諭旨。暫行撤兵。中外聞之。孰不以為光明正大。若如舒赫德所奏。乃漢唐宋明庸懦無能之君。臣所為。我堂堂大清勢當全盛。簡卒侍糧。殄

此醜類。於力有何不給。而肯效掩耳盜鈴。恬不為恥耶。且緬匪每以詐降為狡獪。長技楊應琚等已屢受其愚。即此時賊眾自知得罪。天朝懼干申討。或有遣人乞降之信。尚當嚴加拒斥。責令覓酋束身歸命。或遣大頭目齎表輸忱。庶可允其代奏。朕亦屢經諭及。并曾傳諭阿里衮等。舒赫德在京早熟聞之。即起程前。朕慮其偏於將就完局。曾面加訓誡。伊亦自以更歷已久。必不敢再致荒唐。為對何

一離朕前。竟爾自相刺謬。至是幸而當今綱紀肅清。一切皆稟承朕旨。伊等欲為此鄙謬之舉。尚不敢不先行入告。朕得及時飭駁。急令停止。倘如前代庸懦無能之時。其臣粉飾以諛其上。其君亦竟不加深詰。聽其所為。有不為賊人輕笑者耶。朝廷一舉一動。皆臣民耳目所屬。何所庸其粉飾。況軍國重務。豈可自欺欺人。設無知之徒。聞有此奏。疑朕授意舒赫德所為。無論朕不肯受。且朕何如主。若

於此等事稍有游移前此底定西陲何以克奏膚功於二萬餘里之外哉舒赫德向在左右承朕指示調度辦事尚能妥協一經奉差輒難專任此次所奏竟爾復蹈故轍鄂寧自簡任滇撫以來諸事尚知奮勉今籌議此事又何以前後如出兩人舒赫德鄂寧俱著交部嚴加議處并將此通諭中外知之○又諭曰舒赫德現在交部嚴加議處刑部尚書員缺著託庸調補工部尚書員缺著福隆安調補阿桂著補授兵部尚書阿桂未到之先兵部尚書事務著託恩多兼署○諭軍機大臣等昨舒赫德鄂寧所奏密陳情形一摺荒唐乖謬已疊經傳旨訓飭至摺內稱鄂寧在永昌囑錢度與哈國興密商設法招致緬夷投誠等語是鄂寧當未回省城時早已商度及此但此等鄙陋無恥之見究係始自何人哈國興在軍營親與緬匪接仗並未見賊衆有悔罪之狀今既回至永昌又何從復得賊中

信息或係鄂寧承辦軍務以來諸事竭蹶因存畏難之意急圖息肩致有此謬妄之舉商之錢度或係錢度徂於外任粉飾陋習又復逞其小智為掩耳盜鈴之計告之鄂寧二人意見相投成此大錯不可不徹底究明著傳諭鄂寧即將此事實係何人起意作速據實覆奏斷不可稍涉含糊思欲顛頂了事自取罪戾也○又諭向例各省綠營兵缺原准於該兵子弟內挑補嗣因奉行不力多將外來無籍之徒濫行充數以致積疲成習經李侍堯奏請申明舊例詳查餘丁登記檔冊以次挨補已降旨允准並令各省一體遵行但思整頓營伍惟在揀選得人務收實效若督撫提鎮等不能實力甄拔而惟於餘丁外募斤斤致辨是所謂知其一不知其二也蓋兵丁子弟見聞習慣訓練雖易見功然使人材技勇本無足觀而徒藉父兄之力濫食名糧則鑽營之弊既不可禁防而入伍者幾成世及

又何以實戎行而懲冒濫。轉不如兼收慎擇。確程材藝之為得矣。著傳諭各省督撫。並提鎮等。各兵子弟內。有實在可用者。務須詳慎挑補。不得以曾奉諭旨通行。稍為假借。如果一時艱於足額。於外來壯丁。不妨量為變通。庶於營伍有裨。倘因例許通融。或從中高下其手。以致補額滋弊。則惟於該管各官是問。○吏部帶領京察二三等官。年六十五歲以上。內閣侍讀兆明等四十員。引見得旨。兆明。

武爾圖那蘇圖。託羅納錫泰。傳齊。進補德平。和植。覺羅順寧。雅琦。福祿。朱紹琨。蘇章。阿覺。羅彰。古禮。寶雲。金柱。薩滿達。那音圖。羅典。平治。來熙。書明。永安。福祿。路斯道。瑪塞。遜德保。兆柱。額爾登額。六十八。六十七。張樂盛。沙珠。蘭。德爾泰。塞爾吞。曾尚治。明福。綬。毛嘉梧。胡在慧。俱著留任。長泰。年力已衰。著以原品休致。戶部堂官不行甄別。殊屬姑息。著交部察議。○吏部議准。御史虞鳴球奏。稱。呈詳案件。

即由州縣查明。上司祇據文數轉。應以具呈之日為始。限三個月。分別題咨完結。或應駁查者。亦必於文內。將初次具呈日期聲明等語。應如所請。嗣後如有逾限。照欽部案件遲延例議處。倘原呈內實有舛錯遺漏。應駁查者。於案內將初次呈報及批駁換詳月日。摘簡明情由聲叙。如有毛舉細疵。故為駁飭者。除按遲延日期。照例議處外。仍照故意駁查例。再罰俸六個月。其捏改月日者。仍照官文。

書增減以避舛錯律。再罰俸九個月。從之。○己卯。軍機大臣等奏。察哈爾都統安泰。參奏。翼長阿扎拉等。將羊羣牧丁空缺。捏名頂替。侵蝕錢糧一案。請旨派員前往審擬得旨。此案著派侍郎伍勒穆集。郎中阿揚阿。馳驛前往。會同都統已祿。查審定擬具奏。○旌表守正捐軀之四川灌縣民張廷貴妻呂氏。○庚辰。上詣暢春園。問皇太后安。○以翰林院侍講孫致曾。為雲南鄉。

試正考官。御史胡紹昂為副考官。翰林院侍讀吳省欽為貴州鄉試正考官。御史孟邵為副考官。○辛巳。詔除浙江西興場。坍沒沙地。三百五十四頃一十四畝。有奇。額課。○壬午。諭軍機大臣等。前高晉進呈南巡盛典。經軍機大臣奏。請將直隸山東浙江等省所有巡幸事宜。一併交與高晉纂輯全書。業經行令該督。知照各該省一體彙送。茲據原任浙江巡撫熊學鵬。進呈幸浙盛典。該省既經纂有成編。自應歸併酌辦。以昭畫一。熊學鵬現在住居江寧。與高晉就近諮商。亦屬便易。著將幸浙盛典。交與高晉會同熊學鵬。酌辦。將此傳諭知之。○軍機大臣等議覆兩廣總督李侍堯奏。稱查粵西通省常平等倉。現貯米。共計一百七十萬石。有奇。茲擬於附近水次之南寧潯州等府屬。動撥倉穀。碾米解滇接濟。自各水次。至思恩府屬之百色地方。用船裝載。自百色起。早至滇省廣南府屬剥隘

地方。雇夫挑運。統計粵西境內水陸運脚。并包裹工價。每石需銀七八錢。至一兩一二錢不等。自剥隘至永昌。計陸路三十餘站。挑價銀每石約需銀二兩七八錢。連粵西境內水陸運脚。包裹工價等項。統計每石需銀三兩四五錢。至九錢不等。於秋深灘淺時。陸續起運。約計明年二三月間。可以全抵永昌等語。應如所奏行。但前據鄂寧奏。稱滇省常平倉穀。通計可撥三十五萬餘石。而滇省運送糧石。夫馬脚費。現奉旨每日每石增給三錢。民間輓運。必更踴躍。請交與阿里衮。明德酌量滇省撥用倉穀。及今歲所買米石。是否足敷兵食。如已經足數。粵西米石。即可無庸撥濟。倘有不敷。或覈計粵省運送價值。與本省採買駁運所費相同。及轉有浮多之處。亦無庸長途解往。若價脚各項。較有節省。即酌定應撥米數若干。一面奏聞。一面咨明粵省。從容碾出。如期派員起運。其廣西至永昌。所有水

陸脚價挑費及需用包裹蓆袋等項俟運送事竣之後令雲貴廣西該督撫等按本省章程分別報部從之○癸未禮部議題

玉牒需次告成於本年五月初五日進呈恭請

皇上陞中和殿閱

玉牒得旨是朕照康熙五十四年之例在宮中

恭覽

玉牒不必陞殿○吏部議准調任江蘇巡撫明

德奏稱常州府屬宜興荆溪二縣所轄之楊

港鎮及江陰縣所轄之顧山鎮地廣人雜最

易藏奸均未設有巡緝官役查宜興縣縣丞

駐劄城中無專管之事請移駐楊港鎮又江

陰縣之石頭港巡檢亦屬冗設請移駐顧山

鎮從之○甲申

上詣暢春園問

皇太后安○安設新封

忠義神武靈佑關聖大帝神牌并遣官致祭

○諭曰額勒登額著即凌遲處死譚五格著

即處斬額勒登額身為叅贊大臣乃逗遛貽

誤決裂乖張債事失機甘心引賊實與叛逆

無異經軍機大臣會同刑部定擬將伊父雲

代及親叔兄弟姪等均照大逆緣坐律擬斬

立決實屬罪所應得第本朝法制從無族誅

之條雲代著從寬免死交刑部永遠監禁其

親叔及親弟姪等並著從寬發往伊犁給與

厄魯特兵丁為奴○又諭曰巴圖濟爾噶勒

係蒙古人不能受熱本年且不進兵彼處無

事著即行來京俟進兵時再行遣往伊所屬

兵丁令彼處領隊大臣等管理巴圖濟爾噶

勒之子普爾普年壯正係奮勉之時仍留彼

處効力行走著傳諭阿里衮遵行○旌表守

正被戕之湖北襄陽縣民王必柱王氏○

乙酉

上親臨故將軍公明瑞都統扎拉豐阿護軍統

領觀音保靈前賜奠○諭軍機大臣等良卿

奏列緝獲逃丁限滿一摺此等逃竄餘丁必

須上緊緝拏。無使一名漏網。方足以示懲儆。貴州兵丁在綠營中較為出力。乃前後逃脫餘丁尚至數十名之多。況雲南綠營尤為怯懦性成。每致臨陣遁逃。前據鄂寧陸續奏報逃兵三百餘名。屢經降旨嚴緝。而鄂寧節次奏獲者為數甚少。顯係不行實力查辦所致。兵丁脫逃實為法所不貸。督撫等若不嚴飭文武員弁。連拏治罪。則伊等轉相效尤。視為得計。勢必益難振作。何以肅軍紀而勵戎行。

鄂寧著明白回奏。伊現令馳驛來京。所有雲南逃兵著特交明德即行查辦。至四川赴滇之兵亦有中途竄逸者。何以阿爾泰未經專摺詳奏。並著傳諭阿爾泰將脫逃若干。未獲若干之處一併查明具奏。其貴州所有未獲之犯著良卿加緊嚴拏。剋期務獲。其已獲者仍照前降諭旨。俟躡緝齊全之日再行請旨。尋明德奏查各營逃兵共計三百三十七名。先後拏獲正法及畏罪自戕者共五十四名。

未獲者二百八十三名。現飭各屬文武官懸立重賞上緊查拏。并飛咨隣省一體嚴緝。得旨與汝三月限滿即奏。阿爾泰奏查川省派赴滇省出師兵八千名。滇省咨調餘丁二千四百名。中途前後脫逃兵共四十名。餘丁共四十三名。陸續緝獲唐連陞等四名。即行正法。現又拏獲餘丁七名。俱監禁審擬具奏。遲延至蒙垂詢請將臣交部議處。至未獲逃兵尚有三十六名。餘丁三十六名。現在上緊嚴緝。得旨此尚可寬。至未獲者尚有如許之多。若半年內不全獲。則不能辭其責矣。俟半年即奏。又諭去年由京遣往雲南之滿兵內隨將軍明瑞之兵俱屬奮勉。不免過於勞苦。即使復留亦未必得力。今年又遣京兵四千名。著傳諭阿里衮俟此項兵到後即將去年所遣隨明瑞之滿兵編隊陸續回京歇息。此內如有誠心願留者。阿里衮酌量歸於新遣兵內効力。如非出於誠心藉口願留者決

不可留。○旌表守正捐軀之直隸武邑縣民王傑女王氏。青縣民孟之有女孟氏。○丙戌江西巡撫吳紹詩疏報。乾隆三十一年。清江吉水。萬安。安福。鉛山等五縣。勸墾老荒。及額外新生田地。共一頃一十一畝有奇。○旌表守正捐軀之直隸通州民邢德重妻王氏。完縣民王福貴妻梁氏。山東冠縣民趙儉女趙氏。○丁亥。豁除四川中江。綿州。南部。榮昌。隆昌。內江。井研等七州縣。坍廢鹽井一百三十

三眼額課。○是月。協辦大學士公副將軍阿里衮等奏查永昌府城偏狹。近自錫箔。猛密木邦。各路撤回雲貴。四川三省官兵。一切供支浩繁。計此時距進勦之期尚早。本省官兵各有原營可歸。不必聚處永昌。應悉令歸伍差操。或有酌調處。近在本省。亦屬便易。至貴州馬步兵共七千六百餘名。四川共四千九百餘名。現在並撤回永昌。其中強弱老壯不同。挑精壯者留用外。其餘撤回原省。以節糜

費。得旨是。○又奏。臣等查辦減退兵丁。除將軍明瑞及額勒登額兩路。先行陸續撤回外。其木邦一路逃兵。現在密查。得旨覽。○雲貴總督暫管巡撫鄂寧奏查賊匪已出猛混。赴猛籠一帶。檄攬壩江外。並無賊蹤。小猛養百姓。前此避入山箐。已有歸業者。其餘未回夷民。現亦逐一招徠。至普洱。思茅。備貯軍糧。除供支外。現存米一萬數千石。又有額貯兵米。可以動用。至該處舊駐防兵三千五百餘名。

新從永昌撥往黔兵二千名。現又奉諭命荊州將軍永瑞。帶領湖廣滿兵二千五百名。赴普洱一帶。無烟瘴處屯駐。前貯米已足供支數月。兵糧其餘附近普洱之鎮沅。景東。元江。臨安。開化。廣南等府屬倉糧。未經撥動。自可隨時接濟。再成都滿洲兵一千五百名。已陸續全到滇省。此次兵俱令分住附近教場之空閒廟宇。以便操練。報聞。雲南巡撫明德奏查各省協濟及本省採辦軍需馬騾除解

永昌外其截留本省者不下二萬匹頭需用草料繁多運送堆貯俱費周章擬分撥附近省城州縣飼餵較便至今秋辦理普洱一路現有荊州兵及綠營土練兵共八千餘名將來阿里家等進兵又添新舊兵六千名官員跟役不下萬人以及馬騾草料普洱地方需糧較多現在商辦豫籌以備供支得旨俱屬得要

實錄卷八百九

高

大清高宗法天隆運至誠先覺體元立極敷文奮武孝慈神聖純皇帝實錄卷之八百九

大清高宗法天隆運至誠先覺體元立極敷文奮武孝慈神聖純皇帝實錄卷之八百十

監修總裁官總纂官太子太傅文淵閣大學士文淵閣領閣事領侍衛內大臣稽察欽奉 上諭事件處管理吏部理藩院事務正黃旗滿洲都統世襲騎都尉果功加七級隨帶加一級尋常加二級軍功紀錄一次臣慶桂
總裁官經筵講官太子太傅大學士文淵閣領閣事稽察欽奉 上諭事件處管理吏部理藩院事務正黃旗滿洲都統世襲騎都尉果功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次尋常紀錄十四次臣德瑛經筵講官太子少保工部尚書紀錄六次臣曹振鏞等奉
敕修

乾隆三十三年戊子五月戊子朔以廣西太

平府屬故江州土知州黃承烈孫一鳳襲職

○已丑陝西巡撫明山奏延安榆林二府屬

地處沿邊向建堡城二十七座除從前已修

六座外尚有未修二十一座查延安屬堡城

六座在靖邊定邊二縣相距不遠均可同時

興修至榆林屬堡城一十五座分隸榆林懷

遠神木府谷四縣每縣三四堡不等各堡相

距甚遠工料等件必須該管知縣親身督辦

若同時興修照料難周應分以年限查榆林

縣之漁河常樂二堡懷遠縣之波羅嚮水二堡神木縣之高家堡及府谷縣之孤山木瓜園二堡俱當要路即於本年興修其榆林之保寧雙山懷遠之威武清平神木之永興大柏油府谷之黃甫清水共八堡地稍偏僻俟明年再行續修得旨好如所議行○旌表守正捐軀之直隸衡水縣民張進喜女張氏南皮縣民何富興妻傅氏○庚寅

孝誠仁皇后忌辰遣官祭

景陵○諭軍機大臣等前因彰寶摺奏雨水情形內有運河水勢較小之語而嵇璜亦曾奏及當即傳諭嵇璜令其查明具奏隨據奏覆四月初旬得雨五寸各幫已銜尾進行乃今日倉場侍郎等摺奏又稱濟寧等處糧艘過津前後脫幫自一二日至四五日不等情形迥不相同此實近年希有之事東省運道全在諸湖水櫃啟閉得宜為轉漕第一關鍵而河臣先期酌量調劑所繫尤非淺鮮前此李

清時經管有年辦理俱屬妥協從未聞以湖河淺溢致漕運或有濡遲至春末夏初非大雨時行之候雨水較少亦北方常事況今春已得雨數次何至糧艘脫幫多稽時日看來東河一帶所有一切湖閘淤蓄宣洩事宜嵇璜到任後不無調度失當河員從中欺蔽之處或伊不肯實心督辦所致著傳諭阿思哈富尼漢將嵇璜身任總河以來於河務究係作何經理以致輓運不能安速應時並於屬員中平日有無任意偏聽情事可即悉心體察據實奏聞毋得稍存隱飾模稜之見從來外省大吏彼此迴護之習朕所素知若特旨詢問而尚用此智則將來恐二人不能任其罪矣尋阿思哈奏查嵇璜到任以來河務頗為明晰辦理得宜於屬員中亦無任意偏聽情事報聞富尼漢奏嵇璜到任後一切興工收工等事均係親身督辦淤蓄宣洩事宜亦並無調度失當任意偏聽及屬員欺蔽等情

得旨覽。○辛卯。

上詣暢春園問。

皇太后安。○還宮。○是日起。

上以夏至祭

地於

方澤。齋戒三日。○壬辰。諭此次恭修

玉牒。甚為迅速。所有總裁王大臣。及在事人員。

均著交部議敘。○又諭。前因彰寶摺奏。有運

河水勢較小之語。而嵇璜亦曾奏及。當即傳

諭該總河。令其查明覆奏。隨據奏到。四月初

旬得雨五寸。各幫已銜尾遶行。乃近日倉場

侍郎等具奏。又稱濟寧等處糧艘過津。前後

脫幫。自一二日至四五日不等。情形迥不相

符。此實近年希有之事。運河糧艘。全賴諸湖

水櫃啟閉應時。以利浮送。而先期酌量調劑。

尤係河臣專責。前此李清時經管有年。辦理

妥協。從未聞以湖河淺溢。致轉漕或有濡遲。

至春末夏初。雨水較少。亦北方常事。況今春

已得雨數次。而糧艘脫幫。轉致多稽時日。若此。此豈藉口雨澤稀少。遂可以為卸責之計。況嵇璜到任以來。於瀦蓄宣洩事宜。既已辦理不善於前。及降旨詢問。又復自行掩覆。於後。是何意見。著嵇璜明白回奏。尋奏。查糧船脫幫。在所不免。或因阻風。或因船中多帶土物。遇有可起卸之地。必將停泊。查臺莊閘報。江南漕船。自二月至五月。共有三十五日。無船入境。而東省各閘亦有之。即檢上年各廳

報單。亦多有無船入境之日。向來總以統限為斷。其逾統限者。運弁照例議處。今湖北船已於十三日過濟。湖南船。接續北上。惟江西船。於十三日抵臺莊。喫水獨重。臣親往驗明。蜀山等各湖水。俱高於運河二尺。至三尺不等。儘足浮送。祇以重船在後。各湖蓄水。未便輕放。以致有稽時日。此係實在情形。至頭進糧船不能迅速。實係督辦不善所致。得旨。該部察議具奏。○諭軍機大臣等。阿里衮奏稱

本年勦辦附近普洱小賊。必由雲南經過京兵四千名。不必赴永昌。令其駐劄雲南府守候。將成都之一千五百滿兵。遣赴永昌防駐。俟伊等於普洱進兵時。將在永昌舊隊滿兵二千名帶往等語。所見非是。永昌甚屬緊要。本年所遣京兵四千名。理應遣往彼處駐防。勦辦就近普洱小賊。事屬至易。如不甚緊要。本年暫不必辦理。節次諭知阿里衮。至永瑞帶往之荊州兵二千五百名。昨亦降旨令其

前往普洱。阿里衮秋間前往。不過由永昌再帶滿兵一千名。亦足敷用。再去年所遣隨明瑞之舊隊滿兵。昨經降旨令其來京。今阿里衮等將永昌舊隊之滿兵二千名。欲行帶往。而本年所遣之滿兵四千名。又欲令駐雲南等處。甚屬不論輕重。辦理普洱等處賊匪。何需多兵。此皆阿里衮偏聽舒赫德。鄂寧欲遣哈國興招安緬賊。於一切俱不留心。草率從事。觀望舒赫德。鄂寧所奏情形也。若如此辦

理斷然不可。永昌甚屬緊要。著傳諭阿里衮將本年所遣京兵四千名。仍赴彼處防守。至本年辦理普洱等處賊匪。究屬有益與否之處。阿里衮詳悉酌量。如有益。俟秋後可帶滿兵一千名前往。會同永瑞所帶荊州兵一併調遣。如無益。暫行停止。至彼處隨明瑞之舊隊滿兵。仍遵昨降諭旨。令其來京。○甲午夏至祭

地於

方澤。

上親詣行禮。○詣暢春園問

皇太后安。○辛圓明園。○乙未諭傳為訢奏請停止御史兼辦部務一摺。向來各部司員補授御史該堂官等有奏請仍兼本部行走者。雖為熟諳部務起見。但御史有稽察各部之責。若仍令兼司部事。不無意存瞻徇。究於政體未協。傳為訢所請事屬可行。嗣後司員改任御史。奏請留部之處。著永行停止。其現在

御史中兼部行走者。並著徹回至摺內所奏科道輪班條奏一節。所奏甚屬無謂。御史職任建言。遇有應行指陳彈劾之事。果能據實入告。朕必深為嘉予。若遽定為輪班奏事。按人限日。令其虛應故事。不惟剽竊浮言。毛舉細故。且有撰擬條陳。轉相購覓。不惜貽笑班聯者。於政務更何裨益。況前此何嘗不試行之。而文具相沿。毫無實際。傳為訐寧不聞之。顧以必不可行之說。撫拾具奏耶。且御史留部不便之處。一二語即可明白。乃得撻鷹犬猛獸等陳編謬悠之詞。希冀張皇聳聽。夫朕何忍以鷹犬畜類視御史耶。此緣甫經遷擢。思以此博建白之名。而不知其自蹈陋習。自比禽獸矣。雖邊省見聞淺陋。然已服官有年。亦何至不諳事體若此。傳為訐著傳旨申飭。○諭軍機大臣等。朕乙酉春巡視河工。親臨清口相視。復令於陶莊積土相對處。添建木龍一具。俾益收挑溜之用。迄今已閱四載。未

據該督等奏及不知所建木龍於清口果否有益。著傳諭高晉李宏等。將現在情形查明覆奏。尋奏查乾隆三十年遵旨於陶莊添設木龍一架。臣高晉當經攢辦。計長五十丈。正值伏秋大汛。頗收挑溜之益。臣李宏於秋汛後復會同高晉查勘南岸新建木龍迤下淤出灘長一百九十七丈。北岸陶莊積土尾段刷去長十餘丈。臣等復加相度。又將新建木龍接長十丈。挑溜護灘。更為得力。報聞。○又諭。昨阿里衮等奏請本年由京遣往之滿兵四千名。不必赴永昌。駐劄雲南府。俟伊等秋後普洱進兵時。將永昌舊隊滿兵二千名一併帶往成都之滿兵一千五百名。遣往永昌駐防等語。永昌較普洱尤要。本年由京所遣之滿兵四千名。俱應在彼處防駐。附近普洱之賊。不過宮裏雁之餘黨。辦理甚易。且本年辦不辦皆可。業經節次傳諭阿里衮。況即辦此等小賊。亦不必多兵。不過由永昌帶滿兵

一千赴普洱。會同永瑞所帶之荊州兵一併調遣。亦足敷用。阿里袞舒赫德反以永昌不甚緊要。將得力精兵俱欲帶往普洱。成都滿兵雖不似綠營兵。究不及京兵。京兵俱行帶往。如永昌有事。由普洱調遣。其能立至乎。伊等何以不知輕重至此。著傳諭申飭。至奏稱由彼處逃出之兵丁方汝霖供稱。楊重英被賊拏獲。賊匪令其戴白頂。乘馬帶至阿瓦城等語。此次賊匪。如果遣伊來呈遞文書。阿里袞暫且安慰。將賊之阿瓦城形跡如何。賊勢如何。一切詳細訊明。俟得實後。將楊重英即行正法。再審訊楊重英時。將賊匪酋長見楊重英。或起見。或坐見。賊匪如何動作。伊如何見賊。說何等話。賊匪酋長係何等人在傍。皆係何人。有我天朝奸民否。再賊匪所居房屋如何。猶有款式否。似我何處地方。俱詳細審訊奏聞。○又諭昨遣舒赫德赴永昌。一切俱已降旨訓諭。舒赫德起程後。復又降旨我大

兵赴永昌時。賊匪不免恐懼。遣使懇恩。如果懇請。或伊酋長親來。或遣伊大頭人來。方可代為奏請。如僅遣小頭目來。決不可草率了事。已降旨諭舒赫德矣。嗣據舒赫德奏臣到滇省後。會同鄂寧商議進兵。馬匹口糧俱屬難辦。且賊地窄險。錢度。哈國興俱熟悉彼處情形。此時賊匪或遣使來。可乘此機會。交伊等辦理等語。顯係舒赫德鄂寧專以招降為事。不顧國體。朕意舒赫德到永昌。必將此告知阿里袞。阿里袞必不以為然。另行具奏。乃朕前經降旨。令哈國興來京。今據伊等奏稱。現有令哈國興交辦事件。俟辦理後。再遵旨遣回。哈國興又有何事。必係舒赫德招降之事耳。阿里袞亦附和舒赫德。其平日勇敢之氣安在。且昨降諭旨。令其斷不可草率了事。俟伊等大頭人來。再行奏聞。係四月初二日發往。計其日期。舒赫德早已奉到。而伊等今日所奏摺內。並未提及。此直有意觀望。俟伊

等前摺批到後。希圖另有諭旨。以便肆行其志耳。此而忍為復。何不可為。至楊重英被賊拏獲。而猶戴賊頂帶。乘賊之馬前往。甚屬選悞無恥。玷辱天朝。將此傳諭阿里衮遵辦外。將逃出兵丁方汝霖。即派人馳驛速解來京。以備訊問。尋阿里衮奏。舒赫德在途接奉廷寄。至永昌時。亦曾與臣閱看。本月十八日。賊匪懇請罷兵。將所呈臣等文書進呈外。仍遵奉從前訓示。作為文書斥駁。亦經具奏矣。再

臣曾奏楊重英等被賊擒獲。苟且偷生。為賊譯寫緬字。無恥已極。其或與賊同來。或自行脫出。必將伊等問。請旨從重治罪。楊重英等若同賊來。臣等遵旨曉諭賊衆後。將楊重英等。即在賊前正法。再方汝霖等於五月十一日。已令各回本營。今遵旨派委把總李章追趕。即由彼馳驛解京報聞。○以翰林院侍讀學士恒濟。庶子福明安。侍讀胡高望。中允彭冠贊。善彭紹觀。俱充日講起居注官。侍讀德

昌。署日講起居注官。○丙申。諭。朕於七月初八日啟鑾。巡幸木蘭。所有應行事宜。著各該衙門豫備辦理。○又諭曰。永德參奏寧紹台道方桂。估變裁汰船隻。一任丁役以多報少。並將未經准變之船。遽行拆賣。又擅收營員折給變價銀兩。種種弊竇。顯係知情故縱。通同染指。請旨革職。訊究等語。方桂以監司大員。承辦估變船料。自應據實查辦。乃敢朦混短報。希冀分肥。非嚴究示懲。不足以正官邪。而申法紀。方桂著革職。交該撫與案內有名人犯。一併嚴審定擬具奏。○又諭。前據工部覈駁熊學鵬估變裁汰船隻一本。閱其情節。顯係承辦之員。以多報少。希圖染指分肥。當經傳諭永德。另委妥員確實估報。今據該撫覆奏。果有寧紹台道方桂。弊混情節。摺參革職審擬。並請定例。凡限滿拆造船隻。不得仍循部定估變成規。逐案委員據實確勘報部。變價等語。所辦甚是。已如所議行矣。此等船

隻俱係動用官帑修造。每隻不下數千金。即經歷年久。拆卸變價。亦何至每隻僅止數十金之少。其為官吏欺公肥橐。不問可知。今浙省明驗如此。則其餘各省。已可概見。著將此通諭各督撫提鎮等。嗣後遇有屆限應行拆造船隻。悉照浙省所辦。嚴飭各屬悉心確估變價。務使物料皆歸實用。而帑項不致虛糜。毋任稍有中飽侵漁。自干咎戾。著為令。○諭軍機大臣等。戶部覈覆九江關短少稅銀一

摺。已降旨令暉善前往查覈矣。關稅贏餘銀數。例將上屆比較。即偶有短少。亦不應大相懸殊。今九江關稅。何以遞年短少。竟至四萬五千之多。况舒善去歲奏報平餘銀兩。情節支離。經造辦處屢次駁飭。是其經理關務。恐亦未能妥協。不無聽信在關胥役。從中舞弊情事。豈得藉口過關船少。不為徹底清查。但此事若仍交督撫查覆。仍不免虛應故事。苟且塞責。看來暉善尚屬能事。是以特派查辦。

著傳諭暉善迅速赴關。將因何短少緣由。確實稽查。分晰考覈。並其平日操守聲名如何之處。俱著悉心嚴查。毋得稍存扶同瞻顧之見。自干咎戾。查明即行摺奏。尋奏查舒善操守聲名。尚無狼藉之處。惟不能精察。致在關弓手人等。不免串通家人書役。暗地得銀隱漏課稅之弊。報聞。○戊戌。

上詣暢春園問

皇太后安。○以廣西梧州協副將同泰為右江

鎮總兵。○旌表守正捐軀之江西安福縣民蕭省登妻王氏。○已亥諭軍機大臣等。明德奏調駐滿洲兵丁一摺。前據阿里衮等奏。請將成都兵丁撥赴永昌。而以京兵分駐普洱。所辦不妥。已降旨令將京兵全駐永昌。其普洱一帶。令荊州成都滿兵撥駐。今明德此奏。自因前旨尚未奉到。但兵丁屢議更調。沿途供應糧馬。未免紛繁。而人情亦因此游移不定。恐於事無益。現在舒赫德鄂寧已有旨令

其來京。滇省一應事務。皆阿里衮明德專責。所有軍營全局。自應就該處情形。通盤籌畫。以免往來遷就之煩。著明德即赴永昌。會同阿里衮。悉心妥議。即速具奏。至所稱省城留餽馬騾。不下二萬匹。現在分令餽養。令其臆壯。看來已覺周章。而二萬匹為數亦無多。不足供將來進兵之用。又聞北省解送之馬。與該處水草不甚相宜。自應於烏蒙。四川。及本省土馬內。購辦應用。但此各處所產。是否足敷採買。阿里衮明德等亦當先事豫圖。即云。明歲秋冬進兵。此時亦不可不早為籌及。若必俟明年始行辦理。恐不無臨事周章。著阿里衮等詳悉籌議。計自今歲採買。至明歲秋間。約可得馬若干。及如何分餽運送之處。逐一明晰具奏。至該省逃兵。情罪實無可恕。今黔省報獲者已及十之六七。而滇省尚屬寥寥。必係鄂寧年來專事籌辦軍需。而此事竟未注意。著交與明德。上緊督飭屬員。勒限嚴

緝務。獲盡法創懲。毋使稍有漏網。至九龍江邊外賊匪。前有旨令阿里衮於秋冬時帶兵前往搜勦。今永昌一路既暫緩進兵。若專辦普洱邊外之賊。恐此輩畏懼竄逸。轉為緬匪所用。因思緬匪罪大惡極。斷不可輕受其降。而此等烏合之衆。原不成事體。若量遣總兵副將及道府大員之曉事能幹者一二人前往該處。以該督撫之意傳諭云。爾等俱係近邊之人。向為莽匪蹂躪。不安生理。天朝前次勦逐莽賊。並不肯絲毫累及爾等。其已經歸順之各夷境。並皆撫輯加恩。今爾等因渙散無屬。時在近邊土司地界滋擾。本應加兵搜捕。我等仰體大皇帝好生之仁。不忍爾等無知就戮。特行詳悉傳諭。爾等如果知悔悟。傾心內屬。即至該鎮將處。披誠懇求。我等當為爾等轉奏。仍令管理土境。永受天朝恩惠。如有能擒獲緬匪。及召散呈獻者。並請優加爵賞。爾等自計。與其飄泊無依。為緬匪迫脅騷

擾何如為中朝百姓安享昇平之福如此明切曉示自當共知順逆踴躍歸誠則今歲九龍江進兵之事竟可毋庸辦理於繕邊之道實為一舉兩得其宮裏雁妻子如果有著落俟招撫九龍江賊匪後仍酌量機宜或勦或撫一併辦理並將所辦情形隨時據實速行奏聞再前此諭令回大山土司之姪阿隴一事阿里袞等何以尚未奏到著將如何辦理之處速即奏聞可將此傳諭知之○又諭曰

楊錫紱等摺奏南省運河水勢情形稱現在貓兒窩宿遷關上下及古城溜崔鎮等處俱有淺阻糧艘不能暢行與河臣李宏酌開駱馬湖水以資接濟等語今歲東省漕運淺澁糧艘屢經起剝甚且前後脫幫已屬頻年希有之事至南省運道水勢向尤寬裕即雨水稍稀河臣亦應先事調濟隨時量開湖水俾浮送無虞遲滯何以李宏竟未豫為籌及亦並不據實奏聞著即行傳諭李宏速即會商

妥辦並將辦理緣由據實奏聞尋奏查河水雖較小於往年而各省糧艘足資浮送惟江廣船重喫水較深臣飭員弁酌開駱馬湖柳園頭石閘洩水放行湖廣各船隨後江西幫亦陸續全數渡黃隨即委員往古城溜貓兒窩宿遷關上下將柳園頭王家溝二閘全行啟板開放湖水江西漕船俱可儻行一二日內即可出江南境報聞○庚子遣官祭關帝廟○諭旗丁餘米節年以來准在通州

變賣以資日用現在各省糧艘陸續抵通如旗丁於兌足正供之後尚有多餘米石情願出售仍著加恩准其於通州糶賣在旗丁等既屬便宜而地方糧石益加充裕於民食更有裨益該部遵諭速行○又諭據李侍堯等奏署鎮平縣知縣閻睿蒲等疎縱遣犯至五六名之多請照重犯越獄之例將閻睿蒲並典史魯端似巡檢印寅曾一併革職留任戴罪督緝如逾限不獲分別名數降級革職等

語所奏甚是已允其所請。勅部准行矣。此等積匪猾賊。本係免死改發內地之犯。乃該州縣等既不能嚴密周防於前。復不能密速追拏於後。致多犯久稽弋獲。豈疎脫常犯可比。皆由向來督撫等僅沿常例查叅。直至四叅不獲。始行分別降調。以致地方有司。不知懲惕。事理實為未協。廣東如此。恐他省正復不少。嗣後各省疎脫遣犯。如有逃逸多人。逾限未獲者。其知縣等官。俱照李侍堯等所奏。按依限期。從重叅處。仍將現在有無似此縱逸多犯之案。令各該督撫查明具奏。○諭軍機大臣等。近據阿思哈富尼漢先後奏到。本月初旬。晚田正在播種。望雨頗殷等語。看來該二省所屬。晚種尚需膏澤。不知數日以來。各該屬地方。曾否甘霖普被。未據該撫等續行奏到。朕心深為廕望。著傳諭阿思哈富尼漢。即將通日曾否得雨情形。據實速行奏聞。以慰廕念。尋河南巡撫阿思哈奏。查各屬自四

月初得有透雨。後四旬以來。惟開封所屬及歸德河南南陽汝寧陳州陝州光州於五月初間得有雨三四寸。處省城及彰衛懷汝州五屬。均未得雨。嗣於五月初五七八等日。得雨僅一二三寸。亦未能霑潤通省。現在祈雨甚殷。農民或稱旬日內外得雨。尚可無礙秋成。山東巡撫富尼漢奏。東省自五月以來。各屬俱得有雨澤。惟濟南武定曹州三府屬得雨處較少。茲於十四五兩日。齊東高唐萊蕪青城濟寧等處。各得雨三四五寸不等。省城於十五六兩日。陰雲密布。得有小雨。現在未止。俟甘霖大沛。即當馳奏。俱報聞。○辛丑。諭曰。雲南鶴麗鎮總兵實泰。現在患病。著回旗調理。俟病痊之日。該部照例帶領引見。開化鎮總兵喬冲杓。著來京陞見。再降諭旨。所遺鶴麗鎮總兵員缺。著德福補授。開化鎮總兵員缺。著永平補授。○又諭曰。革職總兵烏勒登額。寧珠華封。副將趙宏榜。均於楊應琚任

內貽誤軍務。拏交刑部治罪。覈其情節。尚不至如李時升。朱崙之甚。是以從寬監候。念伊等獲罪。固由自取。但彼時皆因楊應琚辦理不善所致。且伊等尚非屢次退縮甘心債事者可比。著加恩發往雲南。交與阿里衮。令其在軍營効力贖罪。如伊等果能痛自悔改。奮勉出力。阿里衮原可隨時奏請酌量錄用。倘不知感悔。復蹈前愆。即當重治其罪。不能再邀寬宥矣。○諭軍機大臣等。阿里衮等覆奏。

招致緬匪一節。據稱。哈國興到永昌。錢度問其情形。哈國興稱。緬賊狡詐。全不可信。錢度即未與之商論。鄂寧舒赫德到永昌後。阿里衮詢錢度。據云。此事無可辦理等語。前此阿里衮曾奏。哈國興現有交辦事件。請暫留滇。若如今日所稱。已詢之錢度云。此事無可商辦。則前奏所請留滇交辦。又有何事。前後自相矛盾。已屬顯然。朕初以阿里衮聞舒赫德招降之說。必能持正。今所奏如此。則是阿里

衮一見舒赫德。胸中即無定見。故前此亦欲將哈國興留滇交辦。此事及奉到諭旨。又復為含糊之詞。希圖完事。伊等前後摺奏情形。已自難掩覆。朕豈肯以模稜置之乎。著傳諭阿里衮。將此事情節查明。據實覆奏。尋奏查前奏有交哈國興查辦事件。因彼時提督立柱甫經到永。未悉軍前原委。計惟該鎮尚能查辦。故有此奏。但未將交辦之事詳敘。究屬糊塗。得旨覽。已不深究矣。○又諭前舒赫德。

鄂寧奏。招致緬夷投誠一摺。內稱。鄂寧在永昌時。曾囑錢度與哈國興密商設法招降。又續奏。請將哈國興暫留永昌辦事等語。當即降旨傳諭鄂寧。令其將此事究係何人首先倡議。或係鄂寧自辦。理軍需以來。諸事竭蹶。因欲借此急圖了事。或係錢度狃於外任粉飾陋習。輒思掩耳盜鈴。告之鄂寧。二人遂爾意見相同。可作速據實覆奏。今據奏到。則稱鄂寧曾聞緬賊有在將軍明瑞軍營乞降之

事因囑錢度俟哈國興到日詢問再行計議。後哈國興到永昌稱緬賊狡詐全不可信。錢度即未與之商議等語。與前此所奏迥不相符。而於何人起意緣由。究未指實明確。著將此傳諭錢度。令將前後實在情形并確係始自何人。據實詳悉覆奏。毋得稍為捏飾調停。自干咎戾。尋奏。鄂寧前曾面諭臣云。聞緬匪有投降之意。可詢之哈國興。數日後臣見哈國興。以鄂寧之言詢之。彼云。緬賊狡獪。投降

之說斷不可信。臣即面告鄂寧。此事無可辦。此阿里袞等所共知。得旨。此事過不在汝。○又諭。昨據阿里袞等奏稱。緬賊於猛卜等處屯田。駐兵紮營。防守等語。我前往偵探之人。由永昌行十日。即至木邦。路不甚遠。四月間尚能往來。所言夏令瘴氣難行。亦屬太過。如進兵踏擾賊匪所耕之田。尚屬美事。選彼處厄魯特滿兵一二千名。別項兵一二千名。現存二萬馬匹內。每人或撥二匹。或三匹。遣往。

著阿里袞會同明德。五福及隨明瑞經事大臣官員。熟思定擬。具奏辦理。如果難行。即不必遣兵。但本年賊匪必恐我進兵。以全力備兵防守。如俟瘴氣稍緩。始行進兵。恐寡不敵衆。反至受傷。斷然不可。若乘賊苗未獲七八月間。雖有瘴氣。尚可避行。猝然衝入賊匪。一切不暇。可望得利。我若不時擾踏。賊勢必窮。但兵在健銳。不在於多。綠營兵無用。切不可派。只派滿洲厄魯特兵。著再傳諭阿里袞。由

中書奏

上

滿洲厄魯特兵內。挑派精壯奮勇二千名。作為二隊。著五福帶頭隊先行。派經事領隊大臣一名。帶兵續進。阿里袞再帶兵數百名。於宛頂等處。駐劄聲援。仍明白告知五福等。如能衝入。即行衝入。然我兵勢單弱。不比全力之兵。即能敗賊。遠逃。不過追至附近。曰小之處。即止。不可深入。偶有挫衄。反損我威。無庸強辦。如果可辦。本年辦理亦可。明年亦可。本年明年節次能辦。愈為妥協。如必不能辦理。

不妨據情奏請停止。可相機籌辦。切勿拘旨
強為。○又諭曰。阿里衮等奏稱。四川現無能
造九節礮匠役。舊有礮十尊。請解永昌備用。
移咨阿爾泰等語。昨據阿爾泰奏。四川現無
能造九節礮之匠。從前有造成礮十尊。如用
解送雲南。即經降旨。本年又不進兵。且不用
礮。無庸解滇。惟以鉛子之輕重。礮之長短。錄
寫尺寸。隨時具奏。著傳諭阿里衮。阿爾泰。仍
遵前旨行。無庸解送永昌。如已起程。即聽其
解送。○壬寅。四川總督阿爾泰疏報。射洪縣
開淘鹽井。一十三眼。歲產鹽三萬五千八百
觔。有奇。

平定縣志

卷十

大清高宗法天隆運至誠先覺體元立極敷文
奮武孝慈神聖純皇帝實錄卷之八百十

平定縣志

卷十

大清高宗法天隆運至誠先覺體元立極敷文奮武考慈神聖純皇帝實錄卷之八百十一

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆三十三年戊子五月癸卯

上詣暢春園問

皇太后安○甲辰協辦大學士公副將軍阿里衮尚書叅贊大臣舒赫德覆奏查普洱邊外九龍江橄欖壩等處九龍江土司即古之車里係緬甸分支康熙年間土司刀孟挑內附屬宣慰司統轄普騰六因整董猛旺烏得猛烏猛腊猛阿猛遮倚邦易武猛籠是為十二土司加以宣慰司為十三版納自各土司內附緬甸屢屢滋擾土境而各土司俱不為賊

用至召散本係緬甸所置孟艮土司猛孟容之姪後謀奪伊叔之職衆夷不服共立猛孟容之子召丙為土目復為召散驅逐召散遂分擾打樂九龍江等處其整欠夷人亦係緬甸附屬前年官兵出口該夷逃竄楊應琚將隨征効力之土目以先捧立為整欠土指揮衆夷不服致整欠頭人召教召淵及猛勇之召工等勾結緬賊與以先捧仇殺由整欠攻破猛彝追逐以先捧此等賊匪實與緬賊狼狽為奸至是莽是緬在內地夷民呼為緬子外夷則稱莽子不過強為分別其實各種皆為緬賊實屬一事統容臣等秋深瘴退後帶兵親往普洱思茅一帶確勘情形務在剿殺以清邊境得旨另有旨諭諭軍機大臣等今日阿里衮等奏到各摺其中多有早經傳旨詢問久應覆奏之事阿里衮前此何以未經次第辦理直至舒赫德到彼方行彙奏看來阿里衮於領兵頗能向前而經理事務則未

能剖決明捷。若舒赫德於常行案件。似所優為。而於大處又不足恃。可見用人之難。著傳諭阿里衮。嗣後諸事務須加意提策。隨到隨辦。毋致再有遲擱。○又諭曰。阿里衮等奏籌辦普洱邊境及賊匪情形各摺。前降諭旨已明。九龍江邊外零星賊匪。原屬不成事體。不值注意專辦。今年既不厚集進兵。則該處亦竟可停其勦捕。惟於白小一帶。選派京兵二千名。令五福等帶往。躡其田禾。使彼不能倚糧。以為牽掣之策。若不甚費我兵力。於事亦屬有益。倘彼處莊稼無多。而派往兵丁給馬轉餉。諸事所需浩繁。則是得不償失。又莫若並此不辦。統俟明年再行相機進勦。又另摺奏。緬夷所需內地貨物。其各隘口已嚴禁商民外出。現在俱不敢私自偷越等語。緬匪於內地貨物。既在所必需。而商民等又藉以取利。自當嚴行防範。不可令其絲毫透漏。此時立法之始。商民等自不敢違犯。恐逾時漸致

懈弛。仍有故智復萌者。著傳諭阿里衮。明德始終實力體察申禁。若稍有疎忽。惟伊等是問。○又諭曰。阿里衮等奏查辦逃兵一摺。錫箔。葫蘆口。木邦等處脫逃兵丁。俱罪無可逭。今僅正法四十餘名。仍係姑息了事。何以警其餘而申紀律。舒赫德係面奉諭旨。專往查辦此事。何以一到永昌。竟作如此措置。而阿里衮亦隨同不復救正。甚屬非是。昨歲揚寧在木邦有營兵潰逃一案。交明瑞鄂寧查辦。彼時治罪者少。兵丁無所畏懼。以致屢有棄伍潛遁之事。此次又不嚴行整頓。將來復可用若輩乎。但業已辦結。難以復為更動。現在雲南逃兵尚有三百餘人。至今未獲。著交與阿里衮。明德等限三個月。即速飭屬上緊緝拏。務獲顯正刑章。以示炯戒。三個月後。即行具奏所獲幾何。若再事因循。不即實力搜捕。及復稍存寬貸之見。阿里衮明德皆不得辭其咎。至另摺奏滇省兵額量為裁扣一萬名。

以贍滿洲兵丁一節止能如此籌畫而巡守汛地押運軍裝糧馬等事其勢亦不能不用滇兵但此項補缺時正當挑取壯健堪用之人其逃兵子弟等則萬無仍令入伍補糧之理阿里衮明德倘不實心承辦令伊等復行冒濫充數以致兵無實濟人不知懲則惟於阿里衮明德是問將此傳諭知之○又諭曰舒赫德在京時與軍機大臣日聆朕訓差往雲南復諄諄教諭矣伊抵雲南何乃諸事昏

憤不善辦理至此即今日阿里衮等奏到摺內查出首先敗走正法者僅止四十四人伊起程時朕如何訓諭如許兵內豈止四十四人首先敗走耶如此辦理顯係舒赫德庸懦所致且如今日鄂寧奏摺內飭令錢度哈國興招服緬匪一事伊從前將緬匪投誠虛實之處飭令錢度詢問哈國興是實舒赫德至彼向伊告云征緬一事暫且不能剿滅賊巢賊若來降尚係機會汝即權為遣人偵探亦

無不可等語似此妄為是何意見必是舒赫德前見沿路經過兵丁行走稍艱且伊趨行勞苦心生畏怯乃與鄂寧如此商議伊意以為將此事草率完結即得回來如此辦事尚望來京乎將鄂寧奏摺鈔錄給伊閱看著明白回奏除另降旨外著再嚴行申飭尋奏臣未至永昌之先阿里衮等即嚴飭立柱哈國興將逃兵密行查辦及臣至時將諭旨曉諭阿里衮臣等公議各隊官兵現在永昌即嚴飭立柱哈國興將各隊官員兵丁齊集互相質証共報出十五人再行徹底詳查務須一名不漏復飭立柱哈國興晝夜細查止得四十四名即行正法更無餘人至諸事辦理不善實屬糊塗若云草率了事臣實無此心臣初至滇省一切不知駐劄永昌數日悉心訪問稍知賊匪情形與阿里衮等公同商議籌辦不敢稍存己見報聞○以內閣侍讀孫士毅為四川鄉試正考官編修王大鶴為副考

官。內閣侍讀學士湯先甲。為廣東鄉試正考官。檢討柯瑾。為副考官。宗人府主事徐恕。為廣西鄉試正考官。工部主事李廷揚。為副考官。侍講學士汪永錫。為福建鄉試正考官。給事中戈濤。為副考官。侍講學士李中簡。為湖南鄉試正考官。中允彭冠。為副考官。○乙巳。上御勤政殿聽政。○以原任盛京戶部侍郎長福。為大理寺卿。光祿寺卿謝溶生。為太常寺卿。○以鑲白旗蒙古副都統鄂津。為鑲藍旗護軍統領。○丙午。

上詣暢春園。問

皇太后安。○諭。向來外省請簡文職各員。俱特派大臣揀發。而武職則止交兵部揀選。引見嗣後遇有請發參將以上人員。著兵部臨時奏派大員。會同該部揀選。帶領引見。發往著為令。○又諭。據內務府奏請將廣儲司銀。一百五十萬兩。交戶部收存備用。現在部庫帑藏充盈。此項毋庸存貯部庫。著交戶部照例

派員解往雲南。以供軍需之用。○舉行廣西省軍政。卓異官三員。罷軟官二員。年老官一員。有疾官二員。分別議敘處分如例。○戊申。諭軍機大臣等。廣西四川貴州各省。節經採買馬匹。解滇應用。但臨時購覓。諸凡未免拮据。不若先期留心籌辦。自可從容就理。況廣西等處。本係出產土馬之地。而北省所撥馬匹。到滇又不甚適用。自應豫為酌量。以裕軍儲。著各督撫等於所屬產馬處所。各就本地情形。量可得馬若干。陸續採買。從容分廠餵飼。臚壯。以收實用。且本年既無須解往。則為時尚寬。更可隨宜妥辦。斷不得稍涉張皇。一俟明歲軍行應用時。先期照會。再為分起。緩程解送。將此傳諭李侍堯阿爾泰及鄂寶良卿等。並將可以購備馬匹若干之處。先行據實奏聞。尋兩廣總督李侍堯奏。粵西雖向產馬匹。節經買補。豫備解滇馬。及兩粵福建等省例補營馬。統計不下六七千匹。若欲概買

駟馬恐難購覓現飭各屬不拘駟馬騾馬派定二千匹之數一併購備四川總督阿爾泰奏請於辦就備解騾馬五千匹外再採辦三千匹一體牧養候解廣西巡撫鄂寶奏現在查照督臣李侍堯酌定二千匹之數飭屬購辦貴州巡撫良卿奏黔省現在短馬擬於應差馬內收買二千五百匹分給撫提等標營兵餉餉屆期即令各該營解運俱報聞○己酉吏部議奏各省同知通判州縣俸深赴部如展叅事關降革無論二叅三叅到部均免其駁回一體帶領引見任內事故仍於摺內聲明如奉旨以同知等官題補者回任後應俟叅處銷案再行陞用如未經銷案仍不准陞從之○庚戌

孝恭仁皇后忌辰遣官祭

景陵○軍機大臣等議奏奉天將軍明福等覆稱該處官鋪賒出貨帳共銀七千四百餘兩為數無多請限以六個月收完歸本其借欠

之官兵旗民人數太多款項紛繁現在派員清查俟查對明確再行奏聞至廣寧縣橋道向於官鋪內撥銀生息以為修理之資今除歷年用過外尚存利銀三千二百餘兩請將原本撤回其餘剩利銀交廣寧縣備用等語查前項生息銀其官鋪賒出貨銀七千四百餘兩應令如限催完至借貸之項頭緒紛繁該將軍等既經派員查辦應令徹底清查如限催繳其廣寧縣橋道工程所需所有原本

銀五千兩及息銀三千餘兩均係不應生息之項應一併撤回貯庫該縣如遇雨水過多之年橋道有應修處即勘估請修應費若干移咨部庫支給得旨此項生息銀兩雖頭緒繁雜何至經久不能清釐著定限三個月將款項徹底查清具奏仍酌定年限歸款並派雅德朝銓會同該將軍等上緊催辦不得再有遲逾○旌表守正被戕之山西代州民郎起發妻馬氏○辛亥

上詣暢春園問

皇太后安○諭曰御史曹學閔奏熊學鵬於丁憂後拜發奏章一摺所見拘墟於事理無關輕重各省督撫大吏設有徇私骫法御史列款糾彈者如其事審實朕必深為嘉予若其人適遇丁憂事故一切經手案件及交代印篆日期不得不具摺奏聞乃情理所應有而必斤斤較量於拜摺衣冠儀節之間遽指為忘親不敬正所謂吹毛求疵於國家政務有何裨益明季言官陋習專務撻拾浮文陽博建言之名陰行箝制之計使封疆大吏望風生畏內外官僚動成水火最為弊政此時網紀肅清科道等諒不敢以此種狡獪伎倆輕為嘗試然不可不防其漸曹學閔著飭行摺擲還○又諭曰雲南臨元鎮總兵本進忠在軍營著有勞績尚屬奮勉出力之員著即馳驛來京陛見○壬子諭軍機大臣等今日閱戶部題銷湖南省派往雲南造船兵匠應

支行裝鹽菜等項一本雖係照例覈銷但此項造船兵匠係上年調往備用今春據阿里衮鄂寧覆奏新街蠻暮一帶內地船隻難以前達無庸打造等語是該兵匠等業已無所用之自應及早撤回不當久留滇省仍滋糜費阿里衮等尙未聞籌辦及此至頻年經畫軍營諸務凡有先行調集豫備而其後無可需用者當不止此一事阿里衮等並宜逐一查明即行酌量緩急分別去留庶事歸實濟而帑項亦不致虛糜仍將如何辦理之處迅即奏聞再新街一帶向為緬夷貿易之所自用兵以來節經飭禁商民外出昨因詢問緬匪歷來交易情形旋據阿里衮等奏稱緬匪向時仰給內地銅鐵綢布等物而黃絲針線之類尤所必需現在各口隘俱嚴行查禁不許商人偷越隨即降旨令伊等實力稽察申禁無或始勤終懈稍任透漏但沿邊各隘袤長遼遠僻險小徑處處可通且目今瘴氣方

盛。官弁兵役。不免憚避遠居。致疎盤詰。而奸民趨利如鶩。無所畏懼。或窺伺禁防稍懈。冒瘴行險。私越外境者。不能保其必無。不可不加意防閑。以杜奸弊。至騰越等處所有馬匹。向聞緬匪以貴價買之。此而不查。是借寇兵而資盜糧也。尤關緊要。更宜不時稽察。毋致偷販出境。或官以厚價買之。收為我用。阿里衮等。其即嚴飭防守官兵。日夜巡邏。不得絲毫疎漏。倘奉行不力。致奸民仍有違禁私出情事。一經發覺。恐阿里衮明德不能任其咎也。將此傳諭知之。○又諭據良卿奏黔省兵丁。聞有挑赴雲南。即以步兵頂食馬糧之事。莫不歡欣願往。現在撫提各標營挑選年力精壯者。已足五千名等語。前以滇省兵丁。恒怯不堪。積懦成習。遇賊輒爾逃避。實不足復供驅使。不可不大加振刷。而黔兵在綠營中。較為出力。是以諭令良卿。就黔省各營中。挑往充伍。以收實用。今既據稱。已足五千名之

數。即令赴滇頂補於營伍。自為有益。但此項兵丁。一至滇省。即需支食月糧。著傳諭阿里衮。即將滇省疲玩無能之兵。多為沙汰。俾伊等即有額缺可補。仍將現在出缺若干。及陸續裁汰之數。一面奏聞。一面就近知會良卿。令其按數分隊赴滇入伍。並將籌辦情形。據實奏聞。至滇兵萎靡不前。錮溺已久。實為可惡。總由歷任督撫。平時不加訓練。整頓致昧。有勇知方之義。又不申明紀律。遂爾毫無畏懼。用兵以來。如去歲之木邦普洱。今歲之錫箔天生橋木邦等處。滇兵之潰散竄匿者。屢屢而是。若再不大示懲創。後將何以用兵。因特命舒赫德往滇。專辦此事。乃伊一到永昌。仍不過姑息了事。而阿里衮亦復不能救正。業經傳旨申飭。特以現已辦定。難於另行究治。因令勒限嚴緝在逃之兵。盡法懲處。庶衆人稍知炯戒。蓋調撥征勦之兵。滇營斷不堪復用。必須多為汰除。若仍稍事因循。姑容戀

棧此等無用之輩。雖數盈累萬。又安望其能殺賊致勝。有裨軍行乎。至一切巡守汛地。押運軍裝糧馬等事。勢不得盡不用滇兵。然於本地召補時。如遇逃兵子弟。斷不可令其冒濫頂補。蓋若輩既已竄逸漏網。若子弟仍得混入營額。將來日久潛回鄉里。轉得以家有正丁。居然安享廩糈。國法軍律。又復何在。前已切諭阿里衮。明德務須加意經理。俾各知所奮勵。庶營伍改觀。可資得人之益。即此項黔兵到滇後。留營聽候調遣。阿里衮等須時加督察。養其果銳。勿令沾染滇省惡習。將此傳諭知之。尋奏查滇省停補兵數內。有馬糧四百八十一名。除將厄魯特兵先儘頂補。該提標馬糧四十五名。尚有各標營空缺馬糧已咨貴州撫臣良卿先撥四百三十六名。來滇補伍。其不敷充補馬糧之黔兵。亦令陸續送滇。暫補步兵。俟有馬糧缺出。即行頂補。得旨。如所議行。○癸丑。考察本年在京八旗軍

政。罷軟官三員。年老官十八員。有疾官九員。才力不及官五員。浮躁官三員。分別議處。如例。○甲寅。

上詣暢春園。問

皇太后安。○予故科爾沁鎮國公敏珠爾多爾濟祭一次。○旌表守正捐軀之山西榆次縣民李福妻張氏。○乙卯。諭軍機大臣等。李侍堯奏。廣東省裁汰內河槽漿船四隻。初次共估銀五十一兩零。嗣准部駁。又增估銀三十五兩零等語。此項船隻。係裁汰估變之案。與年久拆造材料。虧朽者不同。何至四船共估價僅五十餘兩。及經部駁。又止共增銀三十餘兩。並未將原造價值若干。所估約及十分之幾。據實聲明。恐承辦各員。不無以多報少情弊。近日閱工部覈駁浙省估變船隻一本。原造船時。需費六千七百餘兩。而估變僅止五百餘兩。難保無弊混分肥之事。因令該撫另委妥員查估。嗣據覆奏。果有寧紹台道方

桂朦隱欺混估值私收折價各情節已降旨革職審擬。可見此等估變物料經手官吏往往希圖染指。一經根究即時敗露。浙省其明驗也。今該督所奏瓊州裁汰四船原估增估合計不及百金。或此項船隻原造時費本無多。今變價如此自非隱飾。若覈之原造動用之數多寡懸殊不及十之一二則初估已屬短少。續估又不過增長些須希冀搪塞了事。其中情弊幾與浙省無異。著傳諭李侍堯將

李侍堯

李侍堯

李侍堯

造船原用銀數若干詳覈兩次估值是否輕重相懸。及其中有無官吏欺公肥橐之處。即行逐一確查。據實覆奏。尋奏查前裁船四隻。詹字一號船一原造工料銀一百二十六兩四錢零。乾隆二十五年造。已歷七年。估變銀三十七兩二錢零。詹字二號船一原造銀六十二兩九錢零。乾隆十三年造。已歷十九年。估變銀九兩五分。萬字一號船一原造銀五十六兩二錢零。乾隆二十四年造。已歷八年。

估變銀二十三兩四錢零。萬字二號船一原造銀三十九兩五錢零。乾隆二十四年造。已歷八年。估變銀一十七兩五錢零。此係雷瓊道王錦估計。茲復密札崖州營叅將陳標確查。據覆委係據實估變。並無別項情弊。報聞。○丙辰諭軍機大臣等據蘇爾德奏太原鎮標都司覃邦舜在教場操演被伴當白公濂從背後放鎗打傷身死。白公濂隨拔小刀自將頸項戳傷。言語不清。難以取供等語。白公濂以兵丁謀害本管將弁實為罪大惡極。不可不重示嚴懲。而起釁情由亦不可不詳悉根究。即該犯傷未平復。難於鞫訊。豈無同伴兵丁可以究詰。況白公濂敢於戕害本官。蓄意必非一日。其平時釀惡原委斷不能盡掩衆人見聞。非特同營火伴難以諉為不知。即該都司家人輩亦豈不悉其就裏。或係該都司平日凌虐該犯。及有勒索苦累情節。抑或該犯年少。該都司有曖昧不明之事。以致怨

積恨深。遂爾肆惡無忌。種種情節。均須徹底
詢查。逐一研覈。以成信讞。著該撫即行提齊
應訊人等。悉心詳鞠。務得確情。至該犯白公
濂。身隸軍伍。非不知法度之人。本管官果有
虐下踰閑之事。情急難堪。亦應具控上司。為
之伸理。乃敢於教場公所。顯肆兇謀。實為可
惡。不但該犯應即按律正法。毋使因傷殞斃。
倖逃顯戮。即其妻子。亦當查明治罪。俾衆人
知此等逆惡之犯。非僅拚一命所能蔽辜。庶

奉奉奉奉奉

王

足以示炯戒。著傳諭蘇爾德。安速辦理。並將
審擬情節。即行覆奏。尋奏查白公濂。及都司
覃邦舜。均與伴當廖思有有曖昧情事。覃邦
舜每借端辱責白公濂。因此仇殺本官是實。
除取該管官職名查叅外。已將白公濂戮屍
梟示下部知之。○兵部議覆陝甘總督吳達
善奏請改兵一摺。應如所奏。准其將烏嚕木
齊駐屯守兵六百八十六名。按數改為步兵。
所需餉銀。即在於所奏各營內裁兵名下。扣

實錄卷八十五

王

數添給。至應裁守兵六百八十六名。除現在
衰老不堪差操等兵。即行開缺。其餘照向例
遇有事故缺出。於一年內裁汰移補。從之。○
是月。協辦大學士公副將軍阿里衮等奏。前
奉旨詢問遊擊袁夢麟等兵。被賊衝散緣由。
查訊跟隨袁夢麟之把總曾必成。及跟隨陳
言志之把總趙之貴。及兵丁等。據供袁遊擊
奉委領兵三百餘名。駐劄二龍山。欲往木邦
應援。隨後守備陳言志。又帶兵四百名到營。
即與袁遊擊商議禦賊。不料黃昏時分。賊兵
前左右三路來攻。袁遊擊等即帶兵往後營
門下山。被賊將官兵衝散等語。袁夢麟等見
賊勢衆多。恒怯下山。罪無可寬。但現在尚無
下落。是否陣亡。亦未有確據。得旨。伊等若回
即拏禁請旨。○雲南巡撫明德覆奏。成都滿
兵一千五百名。分作十五起。間日一起陸續
赴永。查自省赴永。有大理府屬之趙州。雲南
縣。均可岔路由蒙化。景東。二府前赴普洱。路

平無瘴。現飭前五起成都兵。即由此路前赴
普洱。至京兵百名。連官員跟役需馬一百七
八十匹。通計需馬七八千匹。現尚不敷。查前
此黔蜀三省。解到馬騾甚好。且與滇省水草
相投。該二省又係產馬之鄉。現擬量加購辦。
得旨。諸凡皆妥。勉為之。

實錄卷八十二

辛

大清高宗法天隆運至誠先覺體元立極敷文
奮武孝慈神聖純皇帝實錄卷之八百十一

大清高宗法天隆運至誠先覺體元立極敷文
奮武孝慈神聖純皇帝實錄卷之八百十二

監修總裁官經筵講官太子太傅文淵閣大學士文淵閣領侍衛內大臣稽察欽奉
吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次
總裁官經筵講官太子太傅文華殿大學士文淵閣領侍衛內大臣稽察欽奉
世襲騎都尉軍功加十九級隨帶加二級又加二級
尋常加二級軍功紀錄五次
尋常紀錄十四次
臣德瑛經筵講官太子少保工部尚書紀錄六次
臣曹振鏞等奉

數修

乾隆三十三年戊子六月丁巳朔

上詣黑龍潭祈雨。軍機大臣會同兵部議覆
河南巡撫阿思哈條奏河南省營馬撥解楚
省荊州事宜一馬匹解楚應仿照伊犁換獲
哈薩克馬匹撥補內地倒馬缺額例成羣趕
送不必牽拉但大路兩旁均有莊稼非比口
外空地恐逸入民田踐食禾苗若趕馬人少
難以照管應如所奏以五十匹為一羣每羣
用兵十名趕解仍令轉飭管兵員弁彈壓兵
役加謹照管毋任馬匹逸入民田致損禾稼

一解運官弁分作三運十二起每運委遊擊都司一員總運每起委千把總一員管解南陽鎮屬八營馬俱在南陽府會齊由南陽起解為頭運河北鎮屬六營馬俱在襄陽城會齊由河北鎮起解為二運撫標營滿營及附近省之鎮標開封等三營馬俱會齊省城即由省城起解為三運陸續運送交楚省委員驗收應如所奏行一解送馬匹若令河南直送荊州交替隔省地方恐呼應不靈不如於

交界處所委員接收為妥應如所奏解至襄陽縣令湖廣總督定長署荊州將軍世良先期遴選幹員前往襄陽接收至將來直隸應解河南馬亦於交界處所接收一馬匹沿途趕解每匹日支豆三升七觔重草一束燈油雜費銀四分四釐其管解將弁每員日給飯食銀一錢兵役日給飯食銀四分一起解馬匹擬於七月二十日頭運自南陽起程十八日二運自襄城起程十四日三運自省城起

程分起前進至湖北襄陽縣交收其直隸解豫馬應於八月初旬解至彰德交收均應如所奏行從之○戊午

上詣暢春園問

皇太后安○諭軍機大臣等定長現已降旨令其兼署荊州將軍伊係滿洲總督於駐防事務不難兼管且荊州距省不遠照應亦較便易但總督駐劄省會應辦之事甚多荊州滿營尚有副都統在彼一切尋常事件原可隨

時關白商酌而行定長不必時常親往惟該處遇有要務及解滇馬匹等事定長自應親身前往悉心督辦著將此傳諭知之○己未兵部議准湖廣總督定長奏稱查武昌城守營信字二號巡江船一漢陽營清字一號至四號虎船四又豐字十六號戰船一襄陽城守營慶字號哨船一均應裁其黃州等協營戰巡等船共八十七隻照舊存留從之○庚申諭曰御史張光憲奏請設立大姓族長一

摺所見甚屬乖謬。於事理毫無裨益。民間戶族繁盛。其中不逞之徒。每因自恃人衆。滋生事端。向來聚衆械鬪各案。大半起於大姓。乃其明驗。惟在地方官實力彈壓。有犯必懲。以靖竄凌之習。政體不過如是。若於各戶專立族長名目。無論同宗。桀驁子弟。未必遽能受其約束。甚者所立非人。必致藉端把持。倚強鋤弱。重為鄉曲之累。正所謂救弊轉以滋弊耳。至該御史所稱父兄之教。不先子弟之率。不謹此。尤陳編庸腐之談。按之全無實濟。使由此類推。彼井田封建諸事。豈亦可仿而沿之耶。張光憲所請不可行。摺發還。○又諭雲南省城無甚緊要事件。著明德不必駐劄省城。即赴永昌會同阿里衮辦理一切事務。○又諭前據鄂寧覆奏。自稱誤聽舒赫德之言。冒昧入告。因令舒赫德明白回奏。今據覆奏。則稱鄂寧先已密交錢度辦理。自書奏摺。邀同具奏等語。是伊二人所見乖謬相等。舒赫

德鄂寧並著交部嚴加議處。○又諭曰。舒赫德著賞給都統職銜。前往烏什更換永貴。鄂寧俟到京日。再降諭旨。○協辦大學士公副將軍阿里衮奏。五月十六日。據遊擊巴勒塔等由龍陵驛送貴州兵許爾功等齎緬匪乞降文書。來到永昌。臣等詳細根究。據供許爾功劉先元楊清係貴州兵。羅以德係雲南兵。俱隨珠叅贊駐劄木邦。本年二月被賊拏至阿瓦。分給被拏我處官員使用。聞賊酋惜駁之母不願與。天朝打仗時常勸沮伊子惜駁與其屬下頭人等。聞大兵到來亦皆望風生畏。是以商議乞降。其所呈文書初意。遣楊重英等齎送。後因伊頭人眇旺模勸沮。遂改派我等八人呈送文書。因一人病死。三人落後。是以我等四人前來等語。臣等拆看。一係賊匪呈遞。我大將軍文書。因緬字難識。經楊重英譯出漢字。其大概不過懇恩罷息干戈。仍通買賣之意。一

係楊重英等呈稟。內稱守備程轍盧懷亮馬子健王呈瑞等於上年四月內。道府銜楊重英等於本年二月內。俱在本邦遭擒。先後解到阿瓦。詎料緬王不殺。屢有投誠之議。且緬國各頭目俱願投誠。是以苟延至今。又有內地人李萬全尹士份等貿易緬城。熟悉夷情。與我等宣諭我國德威。極力招撫。先議遣官前來。後又改易。是以一同留住阿瓦。今具緬文。專差擒來兵丁許爾功劉先元等八人。齎呈祈懇。如蒙允准。望即差官兵持文前來。該國即辦貢物。遣令緬目同楊重英等解送前來。等因。今將緬匪原文二件。并楊重英等譯出緬匪文書。並伊等所呈文書。共三件。及訊問許爾功等供摺。一併呈奏外。竊思明瑞一隊之兵。逼近阿瓦。又由猛籠等處往返殺賊。將及萬人。復將蠻結蠻化二處賊匪痛勦。賊等畏懼。是以呈請投誠。但賊匪如果誠心乞降。理宜惜駁親來。尚可代為奏請。今惟令我

兵齎來文書。伊頭人一名未到。緬匪狡猾難信。不過力竭計窮。為此緩兵之計。臣等公議此時仍當整兵前進。肅清邊徼。至齎文兵丁四人內。擇其能指賊之地勢。及知賊等情形之許爾功劉先元解送軍機處。以備訊問。至楊重英程轍等俱係職官。被賊拏獲。並不自裁。苟且偷生。為賊譯文。甚屬選悞。無恥若經賊處送至。或脫身前來。即將伊等囚禁。奏請從重治罪。得旨。已有旨諭。諭曰。阿里袞奏緬匪遣回兵丁許爾功等呈送緬文祈請投誠進貢。并擬斥駁文檄呈覽一摺。所辦尚於事理未協。前經傳諭阿里袞等。以緬匪即有悔罪乞降之事。亦必該酋束身歸命。或專遣大頭目齎表前來。始可酌量代為奏達。今該匪並未專遣一人。僅令內地被掠兵丁齎文投獻。實屬不成事體。此種猥夷醜類。即用檄嚴詞指斥。其跡亦已同於酬答。於中朝體制。斷不應出此。現已傳旨。阿里袞竟無庸給發。

回文。俟日後緬酋作何行徑。再為辦理。並將原摺譯漢發鈔。令中外共知之。至楊重英世受國恩。身為大員。被賊拘執。不能捐軀致命。乃復覲顏視息。轉據賊情。具呈軍營大臣實屬喪盡天良。不得更齒人類。所有楊重英之子。著拏交刑部治罪。其程轍盧懷亮馬子健王呈瑞等。身為守備。非微末弁兵可比。乃亦無恥偷生。隨同具稟。情罪均為可惡。所有伊等之子。著一併查拏。解交刑部治罪。○諭軍機大臣等。據阿里袞奏稱。有被緬匪捉去綠營兵許爾功等四人。持緬匪乞降書而來。據稱賊匪惜駁之母。及伊手下頭目。不願與天朝打仗。彼此商議。派來齎獻降書。觀其書詞。大約停止進兵。祈請照舊貿易之意。此可不必發給回書。繕寫駁回咨文。一併呈覽等語。緬匪甚屬狡猾。殊難憑信。今來請降。並未遣伊處之人。止遣我兵獻書。顯係嘗試於我。此不惟不可發回書。亦不必給駁回咨文。竟可

置之不問。嗣後若復遣我兵來。仍照此辦理。一面奏聞。若伊等誠心畏懼。遣其人來獻書。即行奏明。應如何發給回書之處。再為另議。如遣楊重英與伊處人同來。阿里袞等仍遵前旨。問明楊重英一切得有實據。即於賊前將楊重英正法。如獨遣楊重英。並無伊處人同來。則亦問明正法。再楊重英等稟內所稱李萬全者。常在緬匪地方行走。竟係順從緬匪之漢奸矣。伊係騰越州人。彼處必有伊家口。恐彼此勾通。理宜查辦。此外有無似此等之人。阿里袞等亦加意查察。務宜慎密。○又諭著傳諭阿里袞。明德如緬匪復遣人探問。因何不發回信。阿里袞等即諭伊等云。爾等並不使汝人來。惟使我處人。我處無發回書之理。汝等如誠心乞降。或是汝國王惜駁親來。或遣大頭目人來。我等始可奏懇大皇帝施恩。如仍遣尋常人獻書。我等亦無即奏大皇帝之理。況並不遣汝處人來。只遣我處之

人甚屬不合爾等復敢探問乎。爾等歸時。明告與爾惜駁知之等語。曉諭遣回。此際如使楊重英與伊人同來。阿里袞仍遵前旨。問明一切。當伊人前正法。如無彼處人同來。可將楊重英解京。但須嚴防為妥。楊重英妻子。俱已治罪。家產亦俱抄沒。伊若聞知。途中恐致自盡。阿里袞務派幹員防護解京。切勿令其知覺。再賊處尚有被擒守備等數人。此等俱係微員。非楊重英可比。賊匪或獨遣伊等。或

遣伊處人同來。無庸在彼正法。俱解送來京。再楊重英等所呈書內。尚有尹士份一人。既與李萬全一黨。亦當查辦。但不知係何處人。如亦係騰越州人。即照李萬全辦理。如係別處人。查明奏聞。候朕另降諭旨。○又諭永昌地甚緊要。現在滿洲兵間往滇省。莫若酌派數千。移駐永昌。防範賊匪。甚屬有益。再此際騰越州亦屬緊要。彼處之兵。恐不敷防守。著於永昌滿兵內。派一千名。再派貴州兵一千

名。同赴騰越州駐劄。既可壯騰越兵威。而辦理糧餉。亦屬便易。再騰越僅有副將一員。今既遣兵前往。著阿里袞另派總兵一員。往騰越管轄綠營兵。再於領隊大臣內。酌派一人。遣往道員錢受穀。甚有才幹。騰越如無道員。即令伊在彼駐劄。其騰越州知州才具如何。著阿里袞查察。如可。則仍留彼處。如平常。即另選賢員遣往更換。○辛酉。

上詣暢春園。問

皇太后安。○諭奉

皇太后懿旨。慶妃著晉封貴妃。容嬪著封為妃。貴人鈕祜祿氏著封為嬪。欽此。所有應行典禮。各該衙門察例具奏。○諭軍機大臣等。昨已降旨。阿里袞等令將緬匪遣回。兵丁許爾功四人送京。復閱摺內有許爾功等供稱。尚有三人因病落後之語。計此時亦可續到永昌。著傳諭阿里袞等。並即派人續送來京。以備詢問。○壬戌。諭據明德奏。四川貴州辦解

滇省馬匹均臆壯適用等語。阿爾泰良卿自辦理軍需以來一切俱能悉心籌畫。節次辦送馬騾尤屬妥速。著交部議敘。所有該省承辦屬員並著該督撫等查明一併交部議敘。○諭軍機大臣等據阿爾泰奏到九節銅礮圖說按所開礮身礮子均較京城礮位加重。著傳諭阿爾泰於川省現存銅礮十尊內先將四尊運往永昌交與阿里衮豫行演試其礮子一項據阿爾泰單開計重三觔以上並未分晰銅鐵而京城所有礮子純鐵者僅重一觔八兩其銅包鉛子雖大小一樣而分兩重至二觔八兩若川省三觔以上礮子原係純鐵則依銅包鉛法製造分兩自可更重。況滇省銅鉛素多製用自必甚易。著阿里衮於收到礮位後擇地做架木城將兩種礮子演放試看銅包鉛子是否得力並此項礮位果否宜於攻打木城之處即行明晰奏聞再將川省餘礮應送應停酌量辦理尋阿爾泰奏

遵旨將川省九節銅礮撥出四尊配礮子四十個委員妥解至礮子重三觔以上俱係純鐵製就報聞○以直隸清河道周元理為直隸按察使○癸亥諭軍機大臣等普福有應行查詢事件著蘇爾德派委妥員伴送來京交軍機大臣詢問其河東鹽政員缺著薩哈岱前往暫行署理將此傳諭蘇爾德知之○又諭據尤拔世奏稱上年普福奏請豫提戊子綱引目仍令各商每引繳銀三兩以備公用共繳貯運庫銀二十七萬八千兩有零普福任內共動支過銀八萬五千餘兩其餘現存十九萬餘兩請交內務府查收等語此項銀兩該鹽政等何以歷來並未奏明私行動用甚可駭異因令軍機大臣檢查戶部檔案並無造報派項用數文冊可稽顯有朦混不清私行侵蝕情弊且自乾隆十一年提引之後每年提引自二十萬至四十萬不等若以每引三兩計算二十年來銀數應有千萬餘

兩自須徹底清查。但閱年既久其中頭緒紛繁恐尤拔世一人不能獨辦。著彰寶密速前往揚州。會同該鹽政詳悉清查。務使水落石出。毋得絲毫隱飾。此事雖係尤拔世陳奏。現在查辦緣由並未豫令知悉。所有原奏及軍機大臣奏片均著封寄彰寶閱看。該撫自行帶至揚州。見尤拔世後再行告知。會同辦理。即速據實覆奏。不可畏難姑息了事。亦不得少有瞻徇。可將此傳諭知之。○甲子

上詣暢春園問

皇太后安。○乙丑諭曰額駙色布騰巴勒珠爾現在患病。理藩院尚書員缺著伊勒圖補授。○諭軍機大臣等昨罕朝璣到京詢以緣邊各土司情形。據稱前在九龍江出兵見猛遮土司之弟刀謹德妹夫刀召謙及猛海土把總之弟召囊人尚奮勇等語著阿里衮即將刀謹德等調至軍營留心詢察如其人果勇幹情願隨營効用而一切夷情素能熟悉即

可暫留軍營以收差遣驅策之用。如其人材力量不足以供驅使心亦不甚踴躍則又毋庸稍為勉強至各土司毗近緬境於賊匪情事見聞較為真切隨時體察自可得其端緒。即如罕朝璣在此隨問登答於邊外情事頗有梗概其言雖未必盡確然未始不可以備採擇。永昌軍營類此者當復不少何以阿里衮到滇以來總未將詢及何人得何情節之處詳悉入告豈有所聞而不以為事耶抑從

未詢及一人耶。著傳諭阿里衮嗣後遇有外來土司等衆務宜隨時悉心諮訪每有所得即據原詞奏聞并將此諭明德知之。○旌表守正捐軀之河南光州民黃朝忠妻龔氏。○丙寅諭軍機大臣等昨據阿里衮奏稱緬匪擒獲我兵遣令來送降書將擬發回書繕寫具奏朕即降旨以為賊人只遣我兵數人齎書我若回覆似乎急欲了事此時只可佯為不知若賊人情急另遣大頭人前來再行奏

聞辦理。但賊人不得回書。恐遣人潛入我境。將境上之人掠去。詢問若果如此。大有關礙。著寄信阿里衮。明德嚴行密飭。駐劄各要口。大臣官員。務各加意防範。不可疎怠。○吏部議覆。御史蔣曰綸奏。稱內閣中書。請於每科新進士內添用。查中書一官。向為舉人進士。兩項進身之路。而其職掌。則專以字畫工楷為重。請將朝考入選。未用人員試卷。另行封固。以備選擇。其舉人一項。向來專就硃卷酌取。無憑校覈字畫。請嗣後於薦卷內酌取舉人硃墨各卷。同朝考入選。未用進士試卷。一併奏派大臣。彙總校閱。錄其文字俱優者。帶領引見。從之。○丁卯

上詣暢春園。問

皇太后安。○諭曰。提督海澄公黃仕簡。著在乾清門行走。○以承恩公奎林。為鑲白旗蒙古副都統。○予故琉球國副使阮大鼎。祭一次。○戊辰

上御勤政殿聽政。○諭曰。大門上侍衛等。皆在內廷當差。一切進班扈從。甚屬緊要。伊等各宜謹慎小心。黽勉差務。今據領侍衛內大臣等奏稱。侍衛等在紫禁城東園南園進班。及跟隨阿哥等出入。有空班者數人。進班之散秩大臣。非正管之人。往往含糊了事。請飭散秩大臣等。嗣後進班。務須嚴查侍衛等語。侍衛等疎懶成習。朕屢經降旨訓飭。伊等仍復不悛。皆因領侍衛內大臣。平日並不嚴查所致。如傳恒。阿里衮。係軍機大臣。管項甚多。無暇及此。其餘該管大臣。扎拉豐阿。兆德達。色等。所司何事。理宜留心稽查。嚴加管束。嗣後各該管大臣。如不嚴查。以致因循空班。查出必將伊等一併從重治罪。并令進班之散秩大臣等。留心稽查。本班侍衛空班。應叅奏者。叅奏。應稟知領侍衛內大臣者。即行稟知。倘不以為事。因循故縱。被領侍衛內大臣查出。將散秩大臣一併叅奏。再前恐紫禁城內進

班之護軍等。坐更送籌疎懶。特飭委員嚴查。至今並未派委。日久又恐怠惰。著將此旨。併交各該管大臣。通行曉諭。侍衛護軍。敬謹遵行。○諭軍機大臣等。聞浙江一帶。傳言起建橋座。因而偷割髮髮衣襟等物。搗墊橋樑。以為厭勝之用者。流傳并及山東地面。其言甚為荒誕。或係市井翦絡匪徒。借端捏造。冀得逞其鼠竊伎倆。亦未可定。但此等造作訛言。最易煽惑民聽。理應留心查禁。以杜澆風。著

奉
上

下

傳諭各該督撫。飭屬密行體察。如果有此等情事。即行嚴拏。重治其罪。否則將倡播之人。查拏一二。嚴加懲治。以儆其餘。並須不動聲色。妥協查辦。不得任聽胥役等。從中藉端滋事。致累閭閻。○以通政司副使李友棠為光祿寺卿。○以刑部尚書託庸為鑲紅旗滿洲都統。○己巳。諭軍機大臣等。璟善查奏九江關監督舒善辦理不善。以致弓手人等暗得銀錢。朦混捏報。短少稅銀。緣由一摺。已批交

該部嚴察議奏矣。看來舒善難以復勝監督之任。所有關務緊要著傳諭吳紹詩。即速飭令驛鹽道瑯琦前往暫行接辦。俟簡放有人再行交代。舒善於瑯琦到後。即來京候旨。至所奏作弊人役。現已查明。交縣收管。候訊該撫可即詳悉研審確情。按律定擬具奏。如舒善於中有染指情弊。亦即查審毋得瞻顧。○陝甘總督吳達善奏查烏魯木齊眷兵定額四千名。請嗣後遇有缺出。即於該處眷兵子弟內強壯者挑補。無庸照舊例由內地挑發。以節資送浮費。得旨。如所議行。○庚午

奉
上

下

上詣暢春園問

皇太后安。○予故教漢郡王垂濟刺什祭葬如例。○辛未。諭曰。託庸管轄之處甚多。其理藩院尚書事務不必兼管。著官保署理。○廣西巡撫宋邦綏疏報平樂府屬之永安鎮安府屬之歸順二州。勸墾水旱田共一頃七畝有奇。又鎮安府屬之天保縣開墾旱田五十三

畝。

實錄卷八十三

手

大清高宗法天隆運至誠先覺體元立極敷文
奮武孝慈神聖純皇帝實錄卷之八百十二

大清高宗法天隆運至誠先覺體元立極敷文
奮武孝慈神聖純皇帝實錄卷之八百十三

監修總裁官總纂官太子太傅文淵閣大學士文淵閣領侍衛內大臣稽察欽奉 上諭事件處管理
吏部理藩院事務正黃旗滿洲都統世襲副都統軍功加七級隨帶加一級尋常加二級軍功紀錄一次臣慶桂
總裁官總纂官太子太傅文華殿大學士文淵閣領侍衛內大臣稽察欽奉 上諭事件處管理刑部戶部三庫事務
世襲副都統軍功加十九級隨帶加二級又加二級臣董誥內大臣戶部尚書錢謙益滿洲都統軍功紀錄五次
尋常紀錄十四次臣德瑛總纂官太子少保工部尚書紀錄六次臣曹振鏞等奉
敕修

乾隆三十三年戊子六月壬申諭軍機大臣

等據蘇爾德奏兵丁白公濂鎗傷都司覃邦
舜身死一案內請將餘犯廖思有加重問擬
杖徒並該管官議處一摺此案本屬不成事
體毋庸屢形奏牘所有廖思有一犯即照本
例問擬不必加等重科其該管各官均從寬
免其議處將此傳諭知之○又諭昨聞山東
江浙一帶地方有傳言偷割髮辮之事業經
降旨令各該督撫嚴拏究治今據富尼漢奏
到東省鄒縣嶧縣等處已經拏獲匪犯二名

一蔡廷章係浙江僧人吳元為首一靳貫子係江南僧人玉石為首現在嚴加審究等語此等邪術迷人行蹤詭秘大為閭閻之害伊等匪黨未經發覺者自必尚多富尼漢現已行文江浙體訪根緝著傳諭各督撫等務即專派妥員將現在有名未獲各犯及同案黨羽一併嚴密查拏盡法懲治以絕根株毋得稍有疎縱致令聞風遠颺○又諭昨聞山東江浙一帶地方有傳言偷割髮辮衣襟以為厭勝之用者已降旨各該督撫等令其嚴拏究治今富尼漢奏到據鄒縣嶧縣等處拏獲剪辮之蔡廷章靳貫子二犯現在飭提究審等語此等匪徒逞其邪術迷誘善良為閭閻之害不可不嚴行查辦痛絕根株此案經該地方官留心體訪及時拏獲各犯頗屬能事著富尼漢於審辦完案後將實力訪拏之員出具考語送部引見至此案要犯通元據供在濟寧乘間脫逃恐尚潛匿該省地面且該

犯等分路四出行蹤詭秘恐夥黨未經敗露者尚多該撫務宜飭屬徹底根究務獲毋令潛藏外逸致兇頑得以漏網現已傳諭江浙二省令其實力躡緝如有應行知照之處即行文移密速查辦○癸酉

上詣暢春園問

皇太后安○諭據鄂寶奏學政梅立本因逼索供應凌辱陸川縣知縣楊樾致該縣忿恨自刎等語梅立本身任學政不知潔已奉公乃敢以考試供應勒取短發多役人夫已屬大千功令甚至威逼縣令致使情急自戕其情甚屬可惡則其考試別縣亦必有遇事生風需索曖昧之事梅立本著革職拏問交與鄂寶嚴審定擬具奏○諭軍機大臣等據鄂寶奏學政梅立本考試鬱林州時勒索供應恣意凌辱陸川縣知縣楊樾致該縣忿恨自刎一案其情甚屬可惡已降旨該撫將梅立本革職拏問嚴審定擬並將任所貲財即行查

封矣。學政優給養廉。乃不知潔已奉公。以考試供應。恣意勒索。凌辱逼命。實出情理之外。若將本身治罪。而家屬仍得安享餘貲。何以示儆。著傳諭馮鈐。令其於接到諭旨時。密委幹員前往該犯原籍。將所有貲財嚴行查究。毋得稍有瞻徇。自干咎戾。如馮鈐尚未回任。即著高晉遵旨嚴辦。

玉牒告成。照例恩賞總裁纂修各官銀幣有差。○甲戌。諭軍機大臣等。據鄂寶奏。學政梅立本。逼勒供應。致陸川縣知縣楊棟。忿恨自刎。殞命一摺。已降旨革職。拏問。交與該撫嚴審。定擬具奏矣。學政優給養廉。於考試供應。理當奉公潔已。謹守官箴。梅立本按臨所至。用夫至數百名之多。任意勒取短價。悍然不顧。已屬大干功令。乃復恣睢縱肆。將縣官庭跪凌虐。致令受辱難堪。忿極自盡。其情實屬可惡。理應問擬抵償。以肅法紀。著傳諭該撫等。嚴審定案。即行具摺。趕入本年秋審情實。以

昭炯戒。其任所貲財。並著鄂寶嚴密查抄。毋任稍有寄頓隱匿。至梅立本如此恣肆妄為。其平日考過各屬。豈無類此抑勒乖張情事。並別有婪贓不法之處。亦未可知。鄂寶雖係新任。於學政劣蹟。寧竟毫無見聞。何以直至釀成逼命之案。始行叅奏。此時如再不盡法定擬。并實力訪查。俾平日在任敗檢實款盡行發露。則是自取罪戾。不能復為鄂寶寬也。○命工科給事中朱丕烈。提督廣西學政。

御批歷代通鑑輯覽告成。議敘纂修收掌等官有差。○以司業博卿額為浙江鄉試正考官。內閣中書陸錫熊為副考官。工部右侍郎劉星煒為江西鄉試正考官。內閣中書郭元濬為副考官。祭酒良誠為湖北鄉試正考官。主事鄭步雲為副考官。○乙亥。諭現在派往雲南火器營兵四千五百名。健銳營兵二千五百名。兩營所餘兵不過數百。不敷操演。著火器營再添兵二千名。健銳營添兵一千名。演

習應如何添移之處。著軍機大臣等議奏。尋議查八旗前鋒護軍。及滿洲蒙古兵額尚贏。請於護軍內揀選二千名。移入火器營。每旗酌添參領。副參領各一。委參領二。護軍校八。藍翎長八。以資管轄。馬甲內揀選一千名。移駐健銳營。每旗酌添參領一。副參領一。管轄操演。至應用軍器等項。及移徙應給費銀均請照移兵舊例辦理。從之。○丙子。

上詣暢春園問

皇太后安。○諭據管理三庫大臣奏。驗兌粵海關委解關稅一項。共短少銀六千四百餘兩。請令德魁明白回奏一摺。關稅解部。自應按數兌准。即偶有短缺。何至數千餘兩之多。且每錠竟有不按十兩定例。短少數錢。至一兩者。更不得藉口於彈兌時之手輕手重。并不得以備帶添平之數。改解水腳正項為詞。妄行牽混。著傳諭李侍堯。將此項關稅。因何致有短平之故。詳悉查明。據實覆奏。關務原係

督臣兼管。見聞尤為親切。斷不可稍有瞻徇。思欲顛預了事。至德魁前次差人進京。即有私帶稅物銀兩之事。今起解關稅。復短少如許。看來德魁在任。一切不甚妥協。著李侍堯將伊平日辦事若何。居官聲名若何。是否能勝監督之任。一併據實奏聞。候朕另降諭旨。原摺併鈔寄閱看。尋奏查粵海關起解稅銀。舊例於水腳項下。備帶添平銀。嗣因水腳歸公。德魁起解乾隆三十一年稅銀。因將水腳

內扣除添平銀。仍歸本款解交。遂致無項可支。兌收短少。查德魁為人。小心謹慎。經理權政。並屬妥協。至前次進貢。帶有銀物。查伊在任二年。或係積存廉俸。帶往京中。至侵公營私。尚無其事。報聞。○諭軍機大臣等。良卿奏黔省採辦馬匹。可得二千五百。現在加意挑揀。收槽餵養。以備屆期專員解送等語。所辦尚屬妥協。軍營需用馬匹甚多。自應廣為購買。方足以資接濟。黔省向屬產馬之地。且與

滇省毗連運送較便。若止得二千五百匹。則兩廣四川三省。即如數合計。亦僅足一萬之數。於軍營未為寬裕。著傳諭良卿。乘此未即進剿之時。豫為籌辦。多多益善。但須不動聲色。不可稍涉張皇。至該省馬匹。非購自民間。即向土苗市易。該撫務須酌量定價。勿致有虧本值。並嚴察所屬。毋任絲毫扣剋短發。則伊等以得價較贏。自益踴躍從事。而運滇馬匹。亦倍加充裕矣。並將能否續購若干之處。據實附便奏聞。尋奏。現在購備之馬。酌給價銀十五兩。與本值有贏無絀。除將原派二千五百匹。儘數挑足。如再有可選之馬。及近地民苗有願賣者。當酌增價值。廣為買備。得旨嘉獎。○命兵部左侍郎周煌。提督浙江學政。○丁丑。諭。前因鄂寧辦理軍營糧餉諸務。尚能黽勉。是以賞戴孔雀翎。並加恩給予內大臣銜。以示優異。乃伊與舒赫德。連銜所奏招降緬匪一事。甚屬乖謬。因交部議處。並令來

京。陛見再行降旨。今面詢一切。觀其胸中全無定見。於軍行重務。難以擔承。所有原賞之內大臣銜。著革去。亦不必戴翎。餘仍候朕再降諭旨。○諭軍機大臣等。朕昨降旨。順從緬匪奸民李萬全。其家口必在騰越。俟兵駐定後。查辦尹士份。亦著查辦。儻再有似此之人。密為查察。但李萬全係騰越州人。其家口必在彼處。伊如何與賊勾結。往來行走。係何等之人。彼處人豈有不知。著阿里衮。明德。密行奏聞。再此等人。並係與賊勾通。黨與必衆。儻查出一二人。即張皇辦理。其餘匪窮。慮反激其助賊。事既無益。亦難盡查。著阿里衮。明德。佯為不知。加意留心密查。俟有實跡。再行痛加懲治。如毫無顯露。暫行存記。留心將伊家口防守。至應辦時。具奏請旨。總在阿里衮。明德。妥籌辦理。○又諭。前經阿里衮等奏。九龍江有賊。朕曾降旨。命阿里衮於秋後。帶兵前往剿滅。繼又降旨。本年永昌既不進兵。若獨

將普洱賊匪勦辦。賊勢窘迫。恐反為緬匪所用。莫若且停止辦理。況聞彼處並無要寇。普洱現有綠營兵。又有荊州滿洲兵。足資防守。若因蠢爾小寇。即勞我大兵。轉致徒糜軍餉。著傳諭阿里衮。明德。但令普洱駐劄之將軍永瑞。及總兵等。加意防範。儻遇賊來。即行勦殺。再據阿里衮奏。騰越龍陵地皆緊要。現在雖有綠營兵一千八百名在彼。但屢經挫衄。後兵氣不振。若仍留彼處。甚屬無益。著阿里衮。明德。仍遵朕前旨。派滿兵一千名。貴州兵一千名。在騰越駐劄。其龍陵酌調滿兵。亦著貴州綠營兵前往駐劄。其本省兵既不堪用。可調回內地。○旌表守正捐軀之河南輝縣民郭安妻魏氏。○戊寅諭此次巡幸木蘭。著裕親王。和親王。大學士。劉統勳。尚書。託恩多。留京辦事。其月選之文員內通判州縣等官。武員內八旗護軍校。驍騎校。及外省送到之補放水手官。驍騎校。並年滿千總等官弁。俱

著王大臣照例驗看。至駐蹕熱河時。外省督撫提鎮等奏摺。俱著齎摺人前赴行在投遞。惟進哨以後。仍照例交留京辦事處加封轉交內閣。隨本呈送。候朕批示發回。仍於留京辦事處交付齎摺人祇領。該部通行傳諭知之。○又諭據張泰開奏年老患病。給假調治。已及三月。尚未痊愈。懇請解任。休致等語。張泰開在尚書房行走有年。頗著勤慎。年躋八袞。因病乞休。著加恩賞給太子少傅。禮部尚書銜。准其致仕回籍。○諭軍機大臣等。阿里衮奏稱本年於永昌不進兵。俟秋後赴普洱。遵旨於總兵副將內選一二員。遣往安撫沿邊賊匪。又稱苗賊踏擾大山地方。拉等俱被拏獲。大山土司之姪阿隴請暫留永昌。俟瘴氣消後。探聽大山實信。再行遣回等語。附近普洱九龍江等處。止係零星賊匪。無甚緊要。不值阿里衮親赴辦理。永昌係險要口隘。阿里衮如駐劄在此。一切有益。俟秋後巡查

附近普洱九龍江等處。安撫沿邊賊匪。甚屬便易。事如可辦。即令哈國興前往。會同永瑞五福。到彼辦理。如不必辦。本年莫如且緩。俟哈國興來京定擬。著傳諭阿里衮。明德。阿里衮不必赴普洱。祇駐劄永昌。會同明德辦理一切。至大山土司法拉。已被賊拏獲。伊姪如回。能安撫伊等人衆。俟瘴氣消後。遣送伊回。如幼穉無知。即送回亦無益於事。莫如弗遣。令其駐劄永昌。尚屬妥協。再將此傳諭阿里衮。明德知之。○調浙江衢州鎮總兵拜凌阿。為貴州古州鎮總兵。雲南開化鎮總兵喬冲杓。為衢州鎮總兵。○己卯。遣官祭火神廟。○諭。據邁拉遜等奏。赴滇火器營兵丁清保。行至澧州之清化站地方。因跟役備馬。與同行兵丁長海角口。清保將長海毆傷身死。可否照例解部治罪。抑或即留犯事地方。審明定擬等語。旗人互毆致斃。定例即應入於秋審情實。况該犯係派出進剿之兵。非

不知法度。在途按部行走。尤關紀律。乃敢肆意互毆。立斃同行伴侶。若不即正刑章。無以示儆。清保著即於犯事地方。按律即行正法。所有約束不嚴之各該管官員等。均著交部分別議處。○諭軍機大臣等。前因舒赫德鄂寧具奏密陳情形一摺。內有設法招致緬匪投誠之語。所見荒唐乖謬。降旨令伊等明白回奏。嗣經奏到。彼此爭執推諉。益復不成事體。是以將舒赫德等並交部嚴加議處。今鄂寧來京。朕面加詢問。務得二人在滇如何商辦實情。據鄂寧一一指出。內有舒赫德自稱面奏。若該匪有幾分投降光景。奴才等柴點幾分。還可以使得。及稱朕泛言。鄂寧就打發人去也。使得罷了等語。其言深堪駭異。尤出情理之外。前命舒赫德往滇之前。將軍營事宜。往復商榷。并慮舒赫德或意存苟且完局。屢經諄切戒諭。此不獨舒赫德一人聞之。即軍機大臣等。具在朕前。孰不共聞之。今以此

二節。遍問軍機大臣。無不以為怪誕。甚至失笑者。舒赫德獨何心乎。在此事久經明白宣諭。且已將伊等議處。原可不必再行深究。但天下無知之徒。好生擬議。或以朕實曾經示意舒赫德。及伊具摺奏請。轉加指斥處分。遂爾難於見面。因令赴烏什辦事。則此事竟成莫大疑團。牢不可破矣。試思朕辦理庶務。三十三年以來。即朕有過。何難自己承當。雖微末之員。尚不使稍有屈抑。中外莫不共見共

聞。何惡於舒赫德。而忍加之文致耶。然其言駭異若此。而不徹底明究。則直欲歸曲於朕。朕豈肯受耶。著將鄂寧自書清單。鈔寄舒赫德。令其速行據實覆奏。現在有旨詢問阿里衮。自必直陳。不能代為解釋。舒赫德如尚存迴護掩覆之見。希冀顛預了事。則是重取罪戾。不能曲為之貸也。并著將鄂寧自書清單。鈔寄阿里衮。令其將三人在永昌實在面言情節。秉公據實覆奏。倘稍存瞻顧調停之意。

斷難逃朕洞鑒也。尋阿里衮奏查舒赫德到永昌時。鄂寧尚未到來。舒赫德先將會同鄂寧具奏摺稿示臣。并告知在京面奉諭旨等因。並與鈔發鄂寧所書清單相符。報聞。○又諭據方觀承奏景州境內有被割髮辦民人孟士會。夏葛白二人。伊等隨將髮辦全行剃去。未致受傷。並用藥煎洗解毒等語。此等匪徒。前經降旨飭令山東等處嚴密查拏。今直隸亦有此案。尤當詳加根究。至孟士會等如

因髮辦被煎。恐其毒氣傳染。因而暫行剪剃。將來仍舊留髮。尚屬愚民情理所有。且恐被害之人。類此者亦復不少。自可毋庸推求。如竟甘心剃髮為僧。並不自顧父母妻子。則蹤跡可疑。其中轉不無暗通匪黨情事。自應詳悉究訊。務得確情。著傳諭方觀承。即將孟士會等二人。委妥員解京。交軍機大臣等詢問。後發回。至此等奸匪。來自何方。藏匿何所。並著該督飭屬實力搜查。毋得令其漏網。○又

諭前據該撫奏拏獲偷割髮辮匪犯二名當即降旨務即悉心體訪密速根緝究治並傳諭江浙督撫等一體查拏以絕根株昨據方觀承奏直隸景州地方亦有被割髮辮之事可見此等奸匪竟至蔓延直隸夥黨甚多其在山東潛藏出沒者恐不止現在發覺之一二人矣不可不及時設法搜捕以除民害今日該撫奏到提犯審擬一摺亦止辦理前案未有續獲之犯其江南浙江關拏為首惡僧想亦尚未到案除一面寄知該省督撫實力嚴緝外著再傳諭富尼漢即行盡法質訊令該犯等將黨惡一一供出並簡派幹員上緊密緝嚴拏以靖地方毋得稍有疎縱並嚴訊其竄入直隸一帶係何姓名隱匿何所務令據實招出以憑分路偵緝仍將審訊確供及查拏有無續獲情形即速奏聞○又諭前聞山東江浙一帶有用藥迷人偷割髮辮之事當即降旨各督撫留心嚴緝究治以除民害

嗣據山東巡撫富尼漢奏到東省鄒縣嶧縣等處已經拏獲匪犯二名一係浙江僧人吳元為首一係江南僧人玉石為首復諭該督撫等務將首惡餘黨嚴密查拏今復據方觀承奏景州境內有被割髮辮之孟士會等二人可見此等匪徒傳播邪術者已蔓延數省而東省供出造謀為首則浙江僧人等乃其渠魁不可不剋日就獲俾案內奸徒盡行敗露以安良善而靖地方況據富尼漢移關江浙之文既有指名處所何以尚未查拏到案又首兇潛匿之地黨羽必多該省豈早無見聞更何以至今別無發覺之犯著即傳諭該督撫等將現在為首要犯吳元等及案內同夥各犯一併上緊緝拏嚴究毋得稍有疎縱遲延致令聞風兔脫並將現在查辦情形即速奏聞○庚辰

上詣暢春園問

皇太后安○諭曰阿里衮現在出差傳恒于敏

中復隨往木蘭。所有戶部尚書事務。著劉綸暫行兼署。○諭軍機大臣等。昨崔應階代副將徐英謝恩一摺。內稱徐英之父徐宗仁先經賞給騎都尉世職。茲復准其世襲罔替等語。所奏殊未明晰。上年因綠旗世職。向無承襲罔替之例。特降旨覈議。令將陣亡殉節之子孫。其世職尚有應襲者。俟將來襲次滿日。加恩各賞給恩騎尉世職。罔替。所降諭旨甚明。是徐宗仁所有騎都尉之職。將來次數滿後。即應改襲恩騎尉罔替。茲崔應階所據徐英原稟。並未將改襲恩騎尉之處敘及。似係誤會朕旨。著傳諭崔應階。詳悉諭知徐英。俾其永遠知所遵守。○又諭曰。阿爾泰奏。奉到諭旨。於辦就備解驃馬五千匹之外。再行陸續採辦馬三千匹。務期購備足數等語。軍營需用馬匹甚多。川省素稱產馬。又地近滇省。風土尚為便習。較之北方。及他省遠道。撥解不能適用者。迥不相同。自應廣為部署。務期

多多益善。以裕軍儲。或因今年購辦已多。急切難以再為增覓。即俟來春採辦。亦無不可。著傳諭阿爾泰。將所奏三千匹。如數辦足之後。仍行留心妥協經理。設法從容購買。但須隨宜熟籌。方為妥善。至馬匹購自民間。切不可官勢派買。致令畏難。務須比照市值。無虧。并不妨量為優給。仍嚴飭所屬實力稽查。毋任吏胥人等。從中稍有扣剋抑勒諸弊。庶有馬之家。聞風踴躍爭先。而分路承辦各官。一切易於措置。倘該督不能留心體察。致各屬辦理不善。藉端滋弊。少累閭閻。惟該撫是問。○以翰林院侍讀學士哈靖阿。為陝西鄉試正考官。編修鄒奕孝。為副考官。戶部左侍郎王際華。為江南鄉試正考官。翰林院侍讀學士紀昀。為副考官。○旌表守正捐軀之貴州永從縣民鍾長生妻趙氏。○辛巳。江蘇巡撫彭寶奏。臣抵揚後。即會同尤拔世。查辦豫提綱引。當日本係奏辦之事。但其中尚有餘

利。每引繳公費若干。亦應一併奏聞。乃竟隱匿不報。前鹽政等居心實不可問。查普福任內。豫提丁亥綱銀十八萬九千餘兩。曾開銷銀八萬四千餘兩。惟是豫提引張銀兩一切俱係總商經手。因傳喚總商詳訊。并令其開出清單。查歷年提引各商。共獲餘利銀一千九十餘萬兩。據稱歷年辦貢及豫備差務。共用過銀四百六十七萬餘兩。尚有各商未繳餘利銀六百數十餘萬兩。伏思此項銀必與

鹽政等有暗行餽送情弊。復加嚴訊。據總商黃源德。江廣達等供稱。辛巳綱兩次繳過高鹽政銀八萬五千九百餘兩。丙戌綱又送銀四萬兩。乙酉綱又送銀一萬兩。均係管事人顧蓼懷經手收進。又自乾隆十四年起。代吉鹽政辦貢物。共墊銀三千餘兩。又二十一年。代普鹽政辦如意銀三百二十兩。此外有無另項。並未吐實。得旨。另有旨諭。諭據彰寶。尤拔世。查奏兩淮節年豫行提引。商人交納餘

息銀兩。共有一千九十餘萬兩之多。歷任鹽政未經奏明歸公。均有營私侵蝕等弊。現在徹底查究。並請將商人黃源德等六人革去職銜。運使趙之璧暫行解任。等語。種種情節。殊堪駭異。朕屢次巡幸江南。一切行宮道路諸費。俱係官為經理。絲毫不累閭閻。惟兩淮坐落陳設等事。向係商人承辦。雖伊等情申報効分所當然。朕尚以其捐貲急公微勞。宜錄是以疊次加賞職銜。賚予至為優渥。今閱

彰寶所奏。則該商人等一切辦公物件。均於應交官項內動支。是不但不應加恩。并當查明治罪。所有從前賞給奉宸苑卿銜之黃源德。徐尚志。王履泰。布政使銜之江廣達。按察使銜之程謙德。汪啟源。均著革去職銜。交與彰寶嚴切根究。務得實情。運使趙之璧並著解任。至從前運使盧見曾在兩淮日久。經手之事尤多。盧見曾亦著革去職銜。解往揚州。交與彰寶一併審訊。至高恒普。福等久任鹽

政竟將豫提引張散給商人輒將官項任意侵肥高恒任內則查出收受商人所繳銀兩至十三萬之多。普福任內則收受丁亥綱銀私行開銷者已八萬餘兩其歷年代購物件借端開用者尚未逐一查出正不知更有若干。伊等受朕厚恩乃敢明目張膽肆行染指實出情理之外。高恒普福均著革職嚴行看守。俟彰寶等審覆到日再行逐款審擬具奏。

○諭軍機大臣等據彰寶等奏查辦兩淮節

年提引一案其中各商未繳及鹽政等收受支用情弊甚大現在徹底根究一摺已降旨將高恒等革職運使趙之璧暫行解任並將該商等革去職銜令彰寶詳悉訊問矣。盧見曾久任兩淮運使提引一事皆伊經手承辦似此上下通同舞弊豈得諉為不知著傳諭富尼漢即行傳旨將伊革去職銜派委委員解送兩淮交彰寶併案審訊仍一面將盧見曾原籍貲財即行嚴密查封無使少有隱匿

寄頓○又諭據彰寶等奏查辦兩淮節年提引一案歷任鹽政等均有營私侵蝕等弊實出情理之外已降旨將高恒普福革職運使趙之璧暫行解任該商等革去職銜并傳諭富尼漢傳旨將原任運使盧見曾革去職銜派員解赴揚州併案質訊矣該商等藉稱辦公名色以提引應交官帑冒稱樂輸報効濫邀褒獎又將支用所餘應輸運庫之項亦乾沒不交其情甚屬可惡理應徹底查辦示以懲創著傳諭彰寶等即速按款查究除摺內

所稱綱引應交官帑各商未繳餘利六百數十餘萬兩并該商等代鹽政等一切冒濫支銷應行追出歸公之項自應按數查辦外至歷任鹽政等如此任意侵肥審明有應著追之項如力不能完亦應於商人等名下按數分賠再該鹽政等在任日久其中必有留寄兩淮等處令商人生息漁利情事該商等即應一一供明和盤托出如此時稍有含糊將

來一經發覺亦惟該商等是問並著彰寶曉諭各該商前此意謂伊等勉力自効即加之優獎今假公濟私恣意肥橐即應照款著賠示儆國家賞罰一秉至公初無成見該撫等仍將本案嚴查確訊詳悉據實具奏並將此傳諭尤拔世知之○以正白旗漢軍都統范時綬為左都御史○壬午諭曰汪永錫現在丁憂福建正考官著改派戈濤郭元澄著改派福建副考官即令馳驛迅速前往所有江西副考官著馮晉祚去○又諭前因舒赫德鄂寧妄奏招致緬匪投降一事經部議處革職降旨俟鄂寧到京再降諭旨今詳詢鄂寧此事尚由聽信舒赫德之言不能力為主持所致而鄂寧之最難辭咎者則在前此屢檄額勒登額進援不應而不身赴軍營督辦也在額勒登額乖張決裂其事本非意料所及但鄂寧以滿洲總督且係大學士鄂爾泰之子目擊大軍深入而援師又任催罔應即親

赴旱塔一路自行部勒額勒登額之兵相機策應朕方嘉其能知緩急機宜深得大臣之體豈有轉以專擅奪軍責備鄂寧之理乃不知出此而惟以難離永昌藉口試問鄂寧果能統衆直進則身當賊人前路何由繞道窺伺永昌設云賊衆甚張其勢竟可逼近內境則鄂寧雖株守永昌於事亦復何益此事理所易曉非委畀封疆重任者所當力圖自効者乎今雖事屬既往而其原委不可不明白宣示以訓將來之封疆大臣也鄂寧既於籌畫軍務不能確有所見已降旨革去內大臣所有雲貴總督事務亦難望其勝任第念伊前在湖北等省於內地巡撫事務尚能黽勉辦理鄂寧著降補福建巡撫其革職之案帶於新任十年無過方准開復雲貴總督員缺著阿桂補授至良鄉前有旨仍任貴州巡撫鐘音亦著仍留廣東巡撫之任錢度著補授廣西巡撫鄂寧著來京以侍郎用○又諭昨

據彰寶等查奏兩淮豫行提引一案。歷任鹽政。運使等。營私侵蝕。情弊甚大。已降旨分別革職解任。令該撫等徹底查審具奏。但思從來總督有稽察鹽政之責。伊等如此恣意妄為。寧竟毫無聞見。尹繼善久任江南。何以視同局外。不行據實參奏。至高晉與高恒。更非尋常同官可比。乃伊弟蓋蓋不飭若是。而甘心緘默隱忍。尤不得辭其咎。均著交部嚴加議處。○諭軍機大臣等。彰寶奏到。查辦兩淮

提引一案。其中彼此通同。情弊甚大。現在徹底根究一摺。已降旨將普福革職。伊所有任所貲財。著傳諭薩哈岱。即行嚴密查封。毋使稍有隱匿寄頓。○又諭。宋邦綏來京。傳旨詢問。梅立本於考試鬱林州時。凌辱陸川令楊捷自戕一事。據稱梅立本平日性情不無偏執。但伊兩年考試各府。據各提調稟覆。並無弊竇。其有無似此需索供應。多用夫馬。亦未據各府稟報等語。梅立本在鬱林州。既乖張

若此。則其平日按試各府。未必無似此任性妄為。需索凌虐之事。各該府或以其事未至顯著。遂爾隱忍不報。則為提調者。固有應得處分。而宋邦綏之漫無覺察。亦難辭咎。著傳諭鄂寶。即將梅立本考過各府。逐一詳細嚴查。據實覆奏。毋得少有瞻徇隱諱。現已降旨。著該撫來京補授侍郎。如此案辦理。未能速竣。即交與新任巡撫錢度。確查奏覆。再傳諭鄂寶。接到前旨。即應徹底查辦。今若因已經

調京。遂爾意存推諉。竟不實力查究。希圖草率了事。將來錢度到任之後。遵旨查辦。和盤托出。惟於鄂寶是問。將此傳諭知之。○又諭。昨據該撫摺奏內。有商人送交高恒銀兩。係家人顧蓼懷收受之語。是此人乃案內釀成事端之要犯。不可令其漏網。今日令軍機大臣詢之高恒。據稱顧蓼懷並非家人。係伊從前自蘇州聘來辦貢之人。一切事務。皆其經手。此時想現在蘇州等語。著傳諭彰寶。如接

到此旨時。已將顧夢懷提至揚州。則俟質訊一有端緒。即派委委員。將顧夢懷解交刑部審擬。如尚未到案。亦即速往蘇州。提取押解送部。毋得稍有洩漏。致令潛匿遠颺。○又諭向與高恒經手辦事之蘇州人顧夢懷。已降旨令彰寶拏解揚州審訊。該犯往來鹽政衙門辦事多年。其平日借端肥橐。情罪殊重。所有顧夢懷原籍家產。亦著逮委委員密速查鈔。但不得事外株連。致滋擾累。彰寶等宜嚴飭委員妥協辦理。並將此諭令尤拔世知之。○又諭兩淮豫提鹽引一案。現今彰寶等詳悉嚴查辦理。俾私蝕官項之總商。不得侵公自肥。且令其餘衆商。共知儆惕。惟是兩淮鹽務關係數省民食。現在各商俱有應行質訊之處。若因此稍有推諉觀望。致應運鹽艱。或有壅滯。則是有心貽誤。恐衆商等不能任其咎。尤拔世即悉心籌畫。並明切傳諭各商務。使源源出運。不致稍有停阻。自干重罪。至此

後各處口岸。如有能暢銷。仍須豫提鹽引情形。原可照常奏聞辦理。不得以此番懲創遂致因噎廢食。將此傳諭知之。○命刑部侍郎四達兼管光祿寺事務。○癸未旌表守正捐軀之直隸沙河縣民宋興禮姪女宋氏。○甲申。

上詣暢春園問

皇太后安。○乙酉。

上御勤政殿聽政。○諭據方觀承奏署密雲

縣知縣任寶坊違例妄行。將黍谷山別谷院柏木私砍百數十株。請旨革審等語。任寶坊於境內名山古柏。違禁出差擅自砍伐。借僧人出賣名色。短價購買。圖得大木。實屬鄙劣。妄為任寶坊著革職。交該督與案內有名入犯一併嚴審定擬具奏。○諭軍機大臣等據方觀承奏雨水河道情形一摺。所稱永定河數次發水。全河大溜悉走中泓下口。極為通暢兩隄之外。並少停潦。禾稼在在彌望等語。

近日得雨深透。且時陰時霽。早禾晚種可望有秋。但該督此次奏摺。係本月二十七日拜發。而京師地面於二十七。八兩日入夜以後。雨勢甚稠。恐自此連陰。不無過多之慮。未知該督發摺之後。地方情形若何。倘附近河隄。及各處窪地。民田廬舍。伏雨旋作旋止。不致為患。則已。如陰雨連綿。田禾間被淹損。該督即當一面妥速查勘。一面據實奏聞。毋得稍存粉飾之見。著將此傳諭方觀承。令其將日

平奏奉
上

上

來雨水實在情形。即行確查覆奏。尋奏。查六月二十七日。至七月初二日。夜雨甚大。但俱係夜雨朝晴。是以禾稼轉茂。至永定河。於每次大雨後。長水不過尺許。並未漲出漫灘。臨河灘地。可望全收。民廬亦無損傷。又蘄運河連日山水暴漲。長至一丈三尺。已飭河員於水落後。即行堵塞。不至汎濫。得旨覽奏稍慰。○是月。兩江總督高晉奏。本年三四月間。臣署撫篆時。聞浙省有割取衣辦之事。當飭各

屬密訪。嗣據長洲等縣報稱。訛言起自杭州。本境並無被割髮辮者。旋將傳播之人密拏查禁。訛言亦息。得旨未必。今自江南蔓延山東直隸。即京城亦有被割之人。何江南反言無耶。足見爾江南吏治不堪。惟事化有為無之陋習。甚可痛恨。此旨到。即嚴督屬員。將山東審出指名逆僧。務獲。或可稍解汝罪。此奏大不是。欺罔之甚矣。○欽差侍郎期成額。湖廣總督定長奏。查本年京兵。經由湖北設早站八臺。今按水道情形。請將來繼進京兵。於襄陽呂堰驛入境。至樊城一站。陸路六十里。仍設早站一臺。用驛馬伺候。自樊城之襄河登舟。直達荊州府屬之丫角廟。水程六百一十里。改設水站七臺。自丫角廟盤過荆隄。陸路九十里。仍設早站一臺。過荆江進虎渡口。至湖南澧州。觀音港。水程二百二十里。於適中孟家溪地方。改設水站一臺。比較本年全設早站八臺。僅多二臺。而驛馬人夫。安宿橋

平奏奉
上

上

道等項。實多節省。於兵行亦無遲誤。得旨。好。如所議行。○定長又奏。謝兼署荊州將軍恩。得旨。汝諸事不認真。恐此亦不過隨分了事而已。言謝。豈不靦顏。○陝甘總督吳達善奏。烏魯木齊額定眷兵四千名。現缺額三百七十七名。請於該處單身差屯兵內。遇有事故。缺出。即在該標眷兵子弟內挑補。無庸再照咨四留六之例辦理。得旨。如所議行。○協辦大學士公副將軍阿里衮。雲南巡撫明德奏。雲南省城至永昌程途一千三百餘里。均屬坡坎陡險。向來因非通衢。並未修理。積年殘缺甚多。糧運不免遲誤。請動項修理。得旨。甚屬應辦之事。即速行妥辦。○又奏。緬酋悖逆跳梁。不便仍令內地往來貿易。以資其用。請嗣後奸民販貨出口。拏獲即行正法。隘口兵丁。審係得財賣放者。一併正法。失察之文武官弁。查明叅革。如能拏獲者。即將貨物給賞。得旨。甚是。如所議行。○貴州巡撫良卿奏。黔

省官兵出師滇省。除陣亡病廢外。現留永昌普洱等處。尚有八九千名。該處諸物昂貴。食用維艱。騾馬倒斃。亦需購補。請於滇省軍需項內。分別借支。仍於黔省應領俸餉內。分季半扣。得旨。著照所請行。

大清高宗法天隆運至誠先覺體元立極敷文奮武孝慈神聖純皇帝實錄卷之八百十三

大清高宗法天隆運至誠先覺體元立極敷文
奮武孝慈神聖純皇帝實錄卷之八百十四

監修總裁官經筵講官太子太傅文淵閣大學士文淵閣領閣事領侍衛內大臣稽察奏奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次 慶桂

總裁官經筵講官太子太傅文華殿大學士文淵閣領閣事稽察奏奉 上諭事件處管理刑部戶部三庫事務

世襲騎都尉軍功加十九級隨帶加二級又加二級 重誥內大臣戶部尚書鑲藍旗滿洲都統軍功紀錄五次

尋常紀錄十四次 臣德瑛經筵講官太子少保工部尚書紀錄六次 臣曹振鏞等奉

敕修

乾隆三十三年戊子秋七月丙戌朔享

太廟遣誠親王允祕恭代行禮○

上詣

安佑宮行禮○軍機大臣等奏各衙門公所應
修等工向例銀過二百兩者奏明請修二百
兩以內者咨請修理查二百兩以內為數無
多本衙門不難自行修理准咨承修恐致冒
濫請交與工部嗣後公所咨修之例停止報
聞○丁亥諭軍機大臣等巴爾品奏哈薩克
等販馬之便帶有薰牛皮諸物令願買兵弁

分買等語此等物件皆俄羅斯所產哈薩克

與俄羅斯貿易原屬不禁而內地與俄羅斯

貿易業經停止自未便任其轉販但不准轉

販之處尚未曉示哈薩克等不知是以帶來

此次准其分買嗣後哈薩克等只准販馬不

准攜帶俄羅斯物件如違從重治罪著傳諭

巴爾品曉示哈薩克等知之○又諭去秋李

侍堯奏聞暹羅於前歲即與花肚番構兵被

花肚番將城攻破該國王逃竄無蹤現今遊

擊許全查探虛實等語其探問如何至今未

據覆奏近又聞暹羅即為緬賊所併昨緬賊

遞與將軍文內亦有管理暹羅之語是花肚

番即係緬賊所屬因疆土毗連肆其吞噬亦

未可知但此時暹羅或偶被侵凌或竟為緬

匪蠶食尚無確信粵東疊門等處向為外番

貿易之所該國商船來往必多著傳諭李侍

堯留心察訪該商內曉事之人詢問該國近

日實在情形該國王現在何處及暹羅至緬

旬水程若干。陸程若干。遠近險易若何。逐一詳悉諮詢。如能約畧繪圖得其大概。亦可存備參酌。目下並非必欲由海道捷取。為此迂濶之計。且輕動舟師。經越外洋。恐島外遠夷妄生疑畏。自於事無濟。若該國王尚有志於恢復。心存釋怨。而力不能支。欲求助天朝發兵策應。是即可乘之機。未嘗不可酌調水師。前往攸助。以期一舉兩得。但其事當出之審慎。辦與不辦。尚在未定。李侍堯止宜善為詢訪。密之又密。切不可稍露圭角。致涉張皇。仍將詢得情由。即速據實奏聞。○以奉恩將軍書伯子郡德襲職。○戊子。

上詣暢春園問

皇太后安。○軍機大臣等議奏。據兩江總督高晉議覆。大學士陳宏謀條奏裁汰戰船一摺。江省戰船一百三十四。應裁船艚沙唬船三十六。改造雙蓬快槳船二十六。其舵水兵丁除派撥外。餘水兵四十四名併裁。承修請仍

歸文員等語。應如所請。從之。○又議奏。據兩江總督高晉議覆。大學士陳宏謀條奏巡察海口商船各事宜。一。停泊不出口之船。令一體造報入冊。並飭道員五年一次查辦。查江省出海船。均冊報有案。不須道員詳查。其船照定例一年一換。如有轉買頂補。隨時詳報。惟商船出入緣有闕冊可稽。守口汛員。向不通報移查。請嗣後於汛員查驗後。將出入船號姓名。大口五日一報。小口十日一報。彙送地方官註冊。互相稽察。一。商人照內止須將船隻丈尺鄰甲造入。至舵水人等原係臨時雇覓。應於出口時。另開單交汛官驗明。查成造商漁船。例將在船舵水開填入照。而此等人多係臨時雇覓。前經奏准。照內先將船主年貌姓名籍貫開寫。後留餘紙於出口時。責成守口員弁。再將雇定舵水年貌姓名查填入照。登記號簿。今陳宏謀所奏相同。毋庸再議。一。各省船請以蓬色為別。查江省出海船。

向於船旁編寫字號。又經奏准。書於大小桅蓬。設有為匪行劫。可以一望瞭然。若但以蓬色為別。各省船不下數千。淺深新舊之間。轉有疑似混淆。應仍照舊辦理。一造船之家。無力貿易。聽其租給與人。查租船只應禁其為匪。如所租之人。亦係殷實良民。即與船主及船主親屬無異。但如原奏。止令回明汛官。尚不足昭慎重。應聽船主擇有力之人。赴原給照之地方官呈明。取具鄰甲保結。准其租賃。

一船隻未有一無貨物。而空船出海者。如係空船。即須盤詰。查出海船。除商船載有貨物外。其餘樵採網捕等船。皆係空船。止驗其器具有無違禁。未便因其一無貨物。即予盤阻。至進口時。漁船不許裝載貨物。違者嚴加治罪。如有船貨互異。經關員查出。即送地方官審究。失於查察者。照盤查不實例議處。一沿海汛弁。職在稽查彈壓。必須守備以上。不可止委千把。查江省濱海口岸。大小共二十處。

應請將船隻最多。如劉河等處。於督提鎮各標內。輪委守備以上。及候補人員。按季更替查驗。其餘小口。仍委千把稽察。至蘇松太等處。僻徑小港。節經動項釘樁堵截。並無海船出入。均如所議行。從之。○工部等部議准。調任江蘇巡撫明德疏稱。吳江震澤婁縣金山青浦武進陽湖無錫金匱宜興荆溪等十一縣。原設巡船一百十隻。行駛遲鈍。請首尾改尖。船底改窄。添雙槳雙櫓從之。○轉工部右

侍郎劉星煒。為左侍郎。以內閣學士曹秀先。為工部右侍郎。○命鑲黃旗蒙古都統烏勒登兼管正白旗護軍統領。已丑諭軍機大臣等。前聞江浙山東一帶。有用藥迷人。偷割髮辮之事。即降旨。令該督撫等嚴行訪緝。究治。嗣據山東巡撫奏到。鄒縣等處。拏獲匪犯二名。訊係江南宿州僧人玉石。浙江仁和縣僧人吳元為首。因復諭該督等。切實查拏。今直隸境內。亦查出有割辮情事。而京城現在

並盤獲匪僧確切根究此等匪徒傳播邪術蔓延數省其為首之人實始於江浙奸僧潛匿該處已久豈竟絲毫不露形跡該督撫等平時即應飭屬盤緝奸宄況境內現有割辦之事尤當督飭各州縣並派委妥幹之員上緊躡尋首先拏獲何以山東直隸及京城俱經捕犯破案而江浙等省轉未曾緝獲一二亦未見據實奏聞督撫身任封疆所司何事地方有如此奸匪不能覺察查拏已屬非是及經朕降旨查詢又閱多時迄今猶未覆奏苟非該督撫等於地方事務漫不經心何致毫無聞見抑或曾經稟報置若罔聞竟不復加究詰似此養奸縱惡何以安良善而靖閭閻著再傳諭該督撫等速將為首及夥黨各犯一併實力嚴拏務獲並將現在曾否獲犯及如何設法緝捕之處迅即據實奏聞如再仍前疎懈致要犯久稽弋獲則延玩之咎不能為該督撫等寬也○予廣東崖州營出洋

遭風淹斃外委金魁兵丁陳可榮等賞卹如例○庚寅諭據良卿奏審辦安化縣奸民朱維上等倡立邪教妖言惑眾分別定擬一摺已交三法司覈擬速奏矣此案發覺係由思南府知府張時棟自行訪聞全獲首夥各犯頗屬能事張時棟著交部議敘所有失察處分自應寬免其該管之司道及該撫俱著免其處分至該縣知縣花映陞係地方本管官且知府已經體訪查辦而該員以見聞切近先事漫無覺察咎實難辭花映陞著交部嚴加議處○又諭據明德奏雲南糧儲道羅源浩總理銅廠於各廠銅觔多有透漏並不加意嚴查且於積欠銅本又不實力著追甚屬昏庸不職其借補東川府湯丹通判程之章廢弛銅務均請革職等語羅源浩著革職交與該督撫等將摺內情節據實詳悉究審程之章亦著革職其有無經手情弊該督撫等一併究明查辦○諭軍機大臣等前據方觀

承奏景州地方民人孟士會等被奸匪偷割髮辮。伊即將髮全行剃去。其中情事可疑。已降旨令該督將孟士會等解赴軍機處詢問。其偷割髮辮匪犯至今未據弋獲。該地方官何以不上緊查拏。現在京城盤獲割辮匪僧。正在審究。該犯籍係山東。於京城發覺。而直隸乃往來必由之路。且此等奸徒散布夥黨。蔓延數省。直屬豈竟毫無蹤跡。著即傳諭該督一面將孟士會等即行送京外。一面仍密

委幹員嚴查速辦。務令要犯速獲。並搜捕餘黨。淨絕根株。毋得稍有疎縱。致令聞風遠颺。○軍機大臣等議覆前任伊犁將軍阿桂奏稱定例五年軍政卓異者咨部引見。年老有疾者革職。查伊犁為極邊要地。各員中年老有疾者。即應奏請革職。不必待軍政之年。卓異者。俟有應陞之缺。開載卓異字樣具奏。不必咨部引見。再各省城守尉協領有六年引見之例。伊犁滿營較內地尤為緊要。請嗣後

年滿之城守尉協領等不必咨部引見。能否稱職。出具考語具奏。如果著有勞績者。再遵例引見。其錫伯察哈爾總管等亦請一體辦理。應如所請從之。○又議覆協辦大學士公副將軍暫署雲貴總督阿里衮奏稱明年進剿緬匪事宜。宜一分三路進兵。每路派兵八千。由來卡落卓及猛密戛鳩前進。查分路進剿兵勢即分。莫若由一路分隊前進。至進由何路。俟明年進兵時酌定。一兵止二萬。進剿不

敷。請再添派查現派之索倫吉林兵二千。尚未起程。應令於明年八月間趕至永昌。再就近調貴州兵五千。湖南兵二千備用。一馬數不敷撥給。應令滇省將各營額馬餵養備用。並飭貴州四川湖廣各營豫備馬二萬一千三百匹。綠營兵不必給馬。滿洲兵每人給馬二匹。駐防兵每人給馬一匹。一兵丁口糧需騾馱載。應令貴州四川湖廣各買騾二千。河南買騾四千。於明年解至永昌。一內地驛站

官兵應給兩月口糧。官兵器械帳房俱應修補。各等語均應如所奏從之。○辛卯諭軍機大臣等。直隸山東等處現有偷割髮辮之事。究其窩謀首惡。實在江浙地方。屢經降旨該督撫令其上緊緝捕。何以迄今日久未見弋獲一犯。具摺奏聞。現據富尼漢奏到續獲匪犯五名。併前鄒嶧等縣破案二犯。正在鞠審。是東省查辦此案尚屬認真。其直隸地方雖未獲犯而被割之人猶有數處發覺。京師昨

亦捕獲匪僧。現交軍機大臣會同提督衙門根究。其江南浙江二省係首惡盤踞之地。黨羽必多。蹤跡自難終秘。且前已指出首惡姓名。何難按籍而稽。而遲延怠玩若此。如不專其責成。承辦何由妥速。該撫彰寶現在揚州有查審事件。此案著令其專交吳壇上緊承辦。俟審案就緒仍回蘇州。一體督辦。其東省供出海州匪徒約於七月十五會齊等語。於本案尤有關係。著彰寶就近即簡派妥幹員

弁星往密速根究。明遠等下落迅速查拏。並察勘供內情節。是否匪徒訂期結黨。實有端倪。逐一嚴切辦理。毋稍疎懈。其陳四海王連方均係江南人。著照供單所開各犯原籍。一併訪緝蹤跡。再太湖為江省最易藏奸之所。此等惡黨勢必恃為逋藪。並著彰寶一併派員設法搜緝。毋任漏網。仍傳諭高晉等令其一體悉心督辦。其浙省此案則專交永德飭屬加緊搜捕。如稍因循延誤。致令惡黨潛匿遠颺。該督撫等均不能辭其咎。富尼漢奏到原摺供單並著鈔寄閱看。○又諭曰。阿里衮議奏明年添兵進剿。緬匪豫備馬匹口糧一摺。已交軍機大臣議行矣。但此事尚不必亟辦。進剿機宜當先使賊疲敝。本年賊聞進兵之信。必已防備。明年又復如此。賊仍防備如此。二三年再行前進。則一舉可成。若此時得有機會。即亟辦亦可。昨授阿桂為雲貴總督。即令赴任。與阿里衮籌酌。阿里衮在雲南將

及一年熟諳彼處情形。俟阿桂到任會議後。即著來京面奏一切。再行定擬。此時應加防守之處。照舊辦理。著傳諭阿里衮知之。○以御史虞鳴球為河南鄉試正考官。戶部主事孫含中為副考官。刑部郎中朱岐為山東鄉試正考官。禮部主事姚鼐為副考官。御史秦雄飛為山西鄉試正考官。刑部員外郎王士綦為副考官。○以革任河南布政使佛德為江西按察使。○壬辰

上詣暢春園問

皇太后安。○諭軍機大臣等。據明德奏雲南糧儲道羅源浩總理銅廠。於各廠銅觔多有透漏。並不加意嚴查。又前此積欠銅本七萬六千餘兩。並不實力著追。實屬昏庸不職等語。已降旨革職。交與該督撫等查究矣。羅源浩一人朕知之最深。伊前任浙省道員。朕於南巡時。因湖南省京員甚少。將伊補授京堂。乃召見奏對。之次伊並不踴躍感恩。轉有瞻戀

外任之意。是以令其復補道缺。乃伊惟知圖得養廉。仍不實心供職。銅廠係其專司督辦之事。既不能嚴查透漏銅觔。而廠內工本又不上緊清釐。因循玩忽。居心卑鄙。深為溺職。負恩著傳諭該督撫等。如羅源浩於此案內果審有染指虧空之事。自應嚴行治罪。即使本身尚無侵漁。而所發工本銀兩。鑪戶等不能交官還款之項。一併著落羅源浩名下。勒令按數賠償。以示懲創。倘伊一時未能清繳。

即著留於該省嚴追。不得令其回籍轉得脫身。事外將此詳悉傳諭阿里衮。明德知之。○吏部議覆御史金雲槐奏稱。捐復處分向未定限。得以隨捐隨陞。請將降革留任者扣限半年。降革離任從寬留任者扣限一年。准其捐復等語。查捐復處分原為要缺需人。礙於處分者而設。一例報捐未免無別。若徒定以年限。限將滿時倘又有新案處分。不無延案趕捐情弊。請嗣後題陞各員。礙於處分者專

摺奏請其隨時捐復之例概停從之○以鎮國將軍德春弟德三照例襲封輔國將軍○旌表守正被戕之山西汾陽縣民賀元妻李氏○癸巳

上以秋獮木蘭奉

皇太后自圓明園啟鑒○諭此次巡幸木蘭所有經過地方本年地丁錢糧著加恩蠲免十分之三該部遵諭速行○諭軍機大臣等據高晉李宏摺奏本年清水未長水有容納是

以清口東西壩仍存口門寬一十六丈未經折展等語洪湖水小不更展拓口門固得之矣但前經奏及黃河微有倒漾之象此則清水力弱不能敵黃之故朕前次南巡時令視五壩水誌開清口以洩尾閘專為洪湖異漲而設今黃強清弱則又當收縮清口以為抵禦如果黃水較盛即將清口量收五六丈或七八丈俾得併力刷黃方為有濟此等消息機宜河臣自當隨時籌酌以期妥善朕豈能

一一料及豫為指示而為河臣者又豈可膠柱鼓瑟必待朕指授機要方為辦及耶此時將清口收小禦黃將來洪水或復長發原可按度情形再行展拓若慮收展之間工用需費此又拘泥小節而不知通盤籌畫之計收拆縱資費用為數無多若讓黃水漾入勢必淤過清口漸及運河不至大費挑濬不止工用之孰多孰少事體之有益無益不待智者而知之也朕此次所指機宜高晉等聞之諒

應心服著傳諭高晉李宏即速酌視現在情形妥協辦理嗣後清口收展事宜務須時刻留心隨宜措置毋得稍存沾滯之見致誤河防○又諭江浙等省近有用藥迷人偷割髮辮之事蔓延山東直隸地面今山東獲犯頗多京城亦有盤獲者現在嚴切根究並諭各督撫等實力嚴拏毋稍延緩茲聞湖北省亦有此等割辮匪人并且編造歌詞流傳散布其情尤屬可惡定長身為總督地方有如此

奸匪豈竟毫無聞見何竟未緝獲一犯及將該處情形據實奏聞所司何事著傳諭定長即嚴飭所屬并委妥幹之員分頭上緊查拏務期要犯就獲淨絕根株毋任遠颺兔脫並將現在曾否獲犯及如何設法緝捕之處迅速具奏再湖南與該省毗連恐亦不免有傳習竄匿之事自當一體緝拏並諭程燾方世雋知之○又諭前聞江浙等省有用藥迷人偷割髮辮之事蔓延山東直隸地面近聞湖

北地方亦有此等奸匪已傳諭各督撫令其實力查拏矣豫省與直隸山東江南湖北等省地界毗連今各處既有匪犯蹤跡恐該省亦不無滋蔓之處不可不盡力查緝以淨根株著傳諭阿思哈即速留心查捕並飭屬嚴密訪拏毋任潛匿滋擾並將現在情形及有無拏獲之處據實奏聞○又諭曰富尼漢奏查抄盧見曾家產僅有錢數十千並無金銀首飾即衣物亦甚無幾經出示招人首告始

據監生李容等首出寄頓各項等語已於摺內詳悉批示查封盧見曾家財廷寄於六月二十五日馳發而初次查辦此案諭旨並未傳鈔伊家何以早得風聲於十一十八等日豫先寄頓其中情節甚屬可惡豈有旨未到而外人已知之理必須嚴切究審令將得自何處何人實情供吐不得任其稍涉含糊如盧見曾堅執不吐即應加以刑訊著富尼漢傳旨於彼伊是受朕深恩之人若其天良尚

未盡泯一經訊鞫即將豫通信息之人和盤托出尚可免其用刑若尚模稜則朕之於大小事件必欲水落石出之處想伊亦曉決不苟且完案此係伊等惡貫滿盈之日然伊終屬運司其上自有鹽政在也富尼漢接到此旨著即密速辦理不可遷就了事以要聲譽如審得確情即行據實奏聞再將盧見曾鎖押解赴揚州并案問罪至其家財衣物已據李容及家人陳桐等供首寄頓借欠各項此

外或尚有未據供明潛行隱寄情事亦著該撫一併詳悉追訊具奏○又諭曰富尼漢奏查抄盧見曾家產並無銀物及出示招首始據監生李容等呈出寄頓各項並據家人陳桐供出揚州商人程永益借欠銀五千兩張瑞昌借欠銀四千兩盧輝曾寄放銀七百兩等語盧見曾現留山東交富尼漢嚴行訊究伊因何早得風聲豫行寄頓俟審明再行鎖押赴揚并案治罪所有供出之商人程永益等名下借欠銀兩即著彰寶尤拔世就近嚴審明確照數著追至盧見曾在兩淮日久與鹽商交熟者多今查出家財衣什等項隱寄票票而商人程永益等亦有借欠之事恐此外尚有寄揚藏匿之物及伊在任時託諸商收存營運者諒復不少並著彰寶等一併詳悉根究據實覆奏○又諭據富尼漢奏查封盧見曾家財伊已豫先得信於各處隱匿寄頓已經究出數處今伊子盧瑛伊孫盧蔭恩

現在赴京應試請勅交刑部就近訊問等語著傳諭劉統勲託恩多英廉即將盧瑛盧蔭恩提拏隔別詳細研訊務將豫先得信及隱匿寄頓各處徹底根究毋使稍有支吾遁飾仍即行具摺覆奏富尼漢原摺並著鈔寄○又諭曰彰寶查奏顧蓼懷經手鹽務銀兩一摺稱自乾隆二十三年起陸續收過黃源德等五商銀四萬八千餘兩又收洪充實銀三萬兩三十年收汪啟源銀一萬兩二十五年又收黃源德等五商銀七萬一千餘兩此外尚有家人張文學經手置辦班務銀四萬兩是前後積算已及二十萬兩之多高恒身受朕恩乃敢肆意侵漁若此殊出意料之外但思此項銀兩為數既多其中或全係高恒入已或係顧蓼懷代辦貨物不可不分明查究俾款項分明釐毫不致牽混若僅含糊結局尚不足以定高恒之罪彰寶等即將顧蓼懷嚴行審訊務將從前經手各數實在置辦貨

物銀兩若干高恒收受入已銀兩若干逐款開寫錄供具奏庶情罪得昭平允至運使盧見曾於未奉查封家產諭旨之前即將家產寄頓各處若非伊平日有通同作弊分肥之事何以一聞信息即自忖情虧豫防禍及其惡跡難掩更屬顯然且伊既作此狡獪伎倆則恐寄頓之處尚不僅如監生李容所首及家人陳桐所吐諸家而止而商人既為伊收存銀兩則其平素之與諸商交結尤不問可知彰寶等辦理此案必須徹底窮究無任絲毫隱匿至於運使與鹽政最為切近鹽政凡有舉動運使知之最真若運使稍有執持鹽政何由獨逞其貪壑即或其勸阻不聽何難據實奏聞乃高恒等狼藉若此盧見曾前此從無一言設非與鹽政通同勾結恣意侵漁豈肯甘心代人受過此等情節尤不可不切實嚴究以定罪案毋致稍有不實不盡再趙之璧在任已久恐其任內亦不無交通染指

之處並著彰寶等加意研究如審有朋比貪劣實據可即將伊革職並將任所貲財一併查封若實在查無弊竇則此案審結時彼自有應得之罪亦不必過事吹求著傳諭彰寶等逐一嚴切查辦毋得稍有瞻徇仍即速行奏聞○豁免江南廬州衛運船遭風漂沒米七百六十九石有奇○是日駐蹕南石槽行宮○甲午諭軍機大臣等前以江浙等省現有用藥迷人偷割髮辮之事曾經諭令該撫等速即嚴行緝拏嗣據山東巡撫富尼漢奏聞獲犯供出為首之吳元係浙江人復降旨切諭嚴查訊究乃自六月十六日傳諭以來迄今二十餘日並未據該撫據實覆奏殊不可解地方有此等奸徒傳播邪術擾害閭閻蔓延數省所關不小該撫身為封疆大吏平日豈竟毫無聞見一有犯案即應加緊查辦一面奏聞本不待朕傳旨詢問方行辦及此案實始於浙省諒非一朝一夕何以從前竟

無一語入告及經屢次傳諭仍若視為不急又不將現在情形立即具摺陳奏則其姑息因循之習幾於牢不可破通省民生利病所賴整頓者何人顧乃漫不經心若是耶著再傳諭永德即將從前因何不行具奏及現在如何設法緝捕曾否拏獲匪犯若干並山東省供出首兇有無蹤跡是否訪聞弋獲之處一一詳悉迅速奏聞仍速行上緊查辦盡絕根株毋得仍前延緩自干咎戾○又諭前聞

江浙地方有偷割髮辮之事蔓延數省即降旨該撫嚴切查辦嗣據山東巡撫富尼漢兩次奏報獲犯供出首犯皆係江浙僧人復節降諭旨令該撫上緊躡緝乃自六月十六日傳諭以來迄今已二十餘日並未見該省弋獲一犯及作何辦理情形具摺覆奏彰寶雖現在揚州查辦鹽務但鹽務不過地方公事之一況已查有端倪無甚棘手若匪徒潛匿肆其鬼蜮伎倆擾害閭閻為民之害甚鉅要

犯一日不能盡獲地方一日不得帖寧二者相衡並論輕重較然若該撫因專意審辦提引一案反視緝拏匪犯為末務則是輕重倒置於事體全無理會矣況督撫大吏於通省安民緝匪之事本宜時刻留心體察今此案匪犯既始於該省況敢肆行無忌該撫平日豈竟毫無見聞乃前此既不據實入告及屢次詢問又不即行奏聞一味延緩因循豈朕委任封疆之意著再傳諭彰寶令其將因何不即覆奏並如何設法訪緝有無獲犯及山東省供出首惡縱跡若何曾否弋獲之處逐一速行據實奏聞仍上緊密緝嚴拏毋使漏網務期盡絕根株以靖地方若再漫不經心則是該撫自取罪戾朕亦難為寬貸也○調刑部尚書託庸為兵部尚書以署理藩院尚書書官保為刑部尚書仍兼署理藩院尚書事務○是日駐蹕密雲縣行宮○乙未

孝懿仁皇后忌辰遣官祭

景陵○諭據劉統勲等奏查辦兩淮鹽引一案
盧見曾先得信息藏匿貲財訊問伊孫盧蔭
恩據供伊親紀昀係先告知兩淮鹽務有小
菜銀兩一事現在查辦伊即於六月十四日
差家人送信回家後復見郎中王昶談及王
昶告伊並非小菜銀兩乃係歷年提引事發
隨又雇人送信回家嗣復見刑部司員黃駿
昌傳說高恒現已查抄家產伊叔盧謨心懼
隨於六月二十七日起身回家等語所有漏

洩此案情節之紀昀王昶黃駿昌均著革職
交劉統勲等分別嚴審具奏○諭軍機大臣
等據良卿奏貴州省派赴雲南官兵請豫借
銀兩就近於滇省軍需項下動支仍於貴州
應領俸餉內分季扣還歸款等語已於摺內
批示允行矣永昌調集各省官兵聽候撥用
所需食物等項取給既多市價不免增長伊
等遠離本營若必俟該省將應領俸餉解往
分給難保無不及接濟之慮良卿所奏自屬

調劑之道但此等情形阿里衮等即應早為
籌辦何以據總兵官樊經文等具稟尚不據
情具奏僅批令藩司查議耶著傳諭阿里衮
等據實覆奏尋奏樊經文等具稟係欲於黔
省藩庫豫行借銀隨辦解衣裝之便一同解
永給發臣等以衣裝業據辦解若早借銀恐
滋花費因批令黔省藩司查議報聞○江南
鄉試副考官紀昀緣事革職以侍講學士國
柱為江南鄉試副考官○是日駐蹕要亭行

宮○丙申諭軍機大臣等前據方觀承奏等
獲偷割髮辮犯僧一名當即令軍機大臣審
訊連日詳悉訊究並無實據似非此案正犯
原可無事深求但地方查拏奸匪遇有形跡
可疑即應盤詰不可因此次所獲之犯訊無
影響遂一概置之不問況獲犯審非奸夥原
可隨時省釋更何慮累及無辜此等查捕匪
黨之事與其過縱毋寧認真果能一體挨查
鬼域何由匿跡切不可因現犯未有正供因

而畏難懈怠致奸徒聞風巧避弋獲無期則是因噎廢食矣。著傳諭方觀承再行嚴飭各屬。並簡派幹員上緊密緝嚴拏。以除民害。並將近日有無續獲情形。即速奏聞。尋奏。日內未據各屬報有續獲之案。現飭員弁等認真辦理。毋稍懈怠。得旨。恐未能尚應不時督查。○又諭。前聞江浙有偷割髮辮之事。急應上緊嚴拏。即降旨詢問。旋據山東巡撫富尼漢奏稱。現已獲犯。供有僧人玉石住居宿州。散布黨類在外滋事。復諭該督撫嚴緝務獲。以靖根株。又復降旨飭催數次。今據該督覆奏。轉以為傳自訛言。江省並無其事。欺罔荒唐。實出意料之外。已於摺內嚴切批飭矣。此等匪犯。傳布邪術。擾害閭閻。封疆大吏一有見聞。即當留心查辦。況經朕屢次傳諭。尤當悉心力搜查。據實覆奏。庶足稍贖前此不實心任事之咎。今匪犯已蔓延數省。山東並已發覺獲犯。而江省為此案始事之地。且所供首犯

又潛匿該省。其事已萬難掩飾。乃該督尚欲諉為訛言。希圖迴護。前失是誠。何心。兩江吏治雖素稱闡茸。亦不料其漠然不以民事為念。竟至於此。至摺內稱本年三四月間。在蘇州署撫篆時。即聞有人在蘇揚一帶割取髮辮。衣襟等事。設使當日一聞此信。即行飭屬嚴密查拏。何至黨羽蔓延。旁及他處。致數省閭閻被其擾累。可見此事貽誤全在該省。督撫膺封疆重寄。通省民生休戚。實所倚賴。匪犯一日不獲。則百姓一日不得帖寧。高晉身為總督。於此等事。經朕屢加飭諭。竟爾冥不動念。尚得為稍有良心乎。著傳旨嚴行申飭。如能即將山東省供出有名之犯。剋日就獲。及江省散匿各犯。迅速嚴拏。毋任漏網。尚可稍為寬貸。若仍前一味模稜。要犯全無弋獲。恐伊不能任其咎也。又摺內稱長洲元和吳縣各稟稱。本境並無偷割髮辮之事。等語。此等地方官。即係玩視欺捏之尤。不可不示懲

傲著交高晉一併嚴查各該縣前此被割髮
辦者若干一經查出即將該縣參處以肅吏
治○又諭前聞江浙等省有用藥迷人偷割
髮辦之事屢經傳諭各該督撫上緊嚴緝早
絕根株乃江浙皆因循不辦以致蔓延鄰省
山東直隸被割髮辦者頗多今京城亦漸有
其事而山東已獲犯數起供出為首之人俱
在江浙地面可見奸徒肆行無忌實始於此
二省而其得以流傳四布皆由地方官玩忽

貽誤所致高晉彰寶等並不實心查辦業經
嚴切訓飭蘇州人煙稠密尤易藏奸民間受
匪徒之害亦必甚於他處薩載在彼詎竟毫
無見聞何以從未據實入告織造有奏事之
責該處有如此奸匪擾累不寧所係甚大何
乃漠然絕不動念豈畏懼督撫聲勢恐將地
方官底裏顯出致招嫌怨耶抑以政務非其
專職遂視如隔膜有心緘默耶果爾則是許
織造之專摺陳奏徒屬有名無實豈僅尋常

雨水糧價等事循例列牘遂可為塞責乎著
薩載即將該省從前傳聞若何犯案若何地
方官曾否設法緝拏有無獲犯到案如何審
辦督撫等因何不先行具奏現經飭諭之後
是否實力嚴捕之處逐一據實速行覆奏如
仍稍存瞻顧之見一味支吾隱飾是自干罪
戾矣將此傳諭知之○又諭前以浙江等省
有用藥迷人偷割髮辦之事屢經降旨各該
督撫嚴拏究治並據東省拏獲匪犯供出係

浙江僧人吳元為首當即傳諭永德速行緝
拏復節經嚴切傳諭共有六次乃今日永德
奏到各摺係六月二十三日拜發距六月十
三日初次傳諭之期已經旬日計程應奉到
前旨何以竟無一語奏及殊不可解且屢次
所降之旨皆令一面查辦一面奏聞該撫若
仍由驛馳遞此時亦應奏到何以自傳旨以
來將近一月竟爾付之不問玩忽因循實出
意料之外封疆大吏為通省民生休戚所關

地方有如此匪犯肆行擾害惡黨一日不能全獲則閭閻一日不能帖寧永德身膺重寄竟漠然不以民事為念於心何安且此事始自浙省山東所供首犯又潛匿該境果能上緊緝拏何難盡絕根株又何至蔓延數省是貽誤之咎在浙江為尤甚況蔓延之山東尚且獲犯數起而始事之浙江轉未聞擒捕一人敗露一案實為情理所必無此非地方官視為不急之務竟不認真即係有意彌縫希圖掩蓋前失永德所司何事乃竟漫不經心並不切實飭拏派員督辦一任庸碌有司之稽延玩誤耶永德著傳旨嚴行申飭○又諭前據彰寶等奏顧夢懷供稱伊代高恒經手接收各商銀共有一十六萬三百餘兩並無隱混等語但此項銀兩為數甚多或全係顧夢懷代高恒買辦物件或有交與高恒自行收用之處不可不詳細查明以定罪案著彰寶等即就近嚴行詰訊顧夢懷務令將此項

銀兩實在作何歸著詳盡吐供和盤托出毋使稍有含混再高恒任內屢次收受商人銀兩至有二十餘萬之多普福三任兩淮鹽政辦過提引之事前後共有五次且所提之丁亥綱即有買辦玉器六萬餘兩何以前數次提綱肯將餘利盡歸商眾竟無絲毫染指實為理之所不可信著彰寶等一面留心察訪並即傳集各商總切實訊問令將普福任內各次提綱係如何散給眾商餘利歸於何用並有無代普福承辦物件及普福收受銀兩之處逐一供出務使水落石出若各商代為隱飾別經發覺則伊等之獲罪更重矣彰寶等查明之日仍即速據實奏聞○又諭曰阿里衮奏稱接奉停止本年普洱進兵諭旨請親赴普洱派員往諭九龍江一帶賊匪如來歸順將伊等之地查明賞給再龍陵騰越宛頂虎踞等關應多駐兵請派滿洲兵貴州兵各一千駐防騰越滿洲兵一千駐防龍陵先

選貴州兵二千交總兵德福分駐龍陵騰越再現在駐防龍陵騰越滇省兵二千八百名俱係新兵等語昨阿里衮奏本年領兵前往普洱朕即諭以不必親往著在永昌與明德辦事今所稱遣人招服九龍江賊匪若來歸順將伊等地賞給之處斷不可行派員招服不過安撫以分賊勢並非圖得其力此等賊匪甚屬狡詐雖已歸順賊來仍不免逃逸木邦土司其明驗也阿里衮明德遣人招服後

只可撫慰安插不可賞給伊地再滇省兵積習甚壞即新兵亦不堪用應撤回內地防守龍陵等處要隘應用滿洲兵尋常隘口如滿洲兵不敷再用貴州兵再龍陵地方緊要德福初到不諳情形哈國興軍前曾經歷練著即前往再木邦兵見賊即逃甚屬可惡節經降旨查明正法乃至今僅查辦四十餘人天生橋逃兵三百餘名亦僅查辦二人因循姑息何以整飭軍行著阿里衮等嚴查務獲毋

令一名漏網將來阿桂到雲南時亦令其查辦倘阿里衮不能查出經阿桂查出伊能辭其咎乎再雲南兵積習之壞皆由該管官平日不能訓練所致雖事屬已往免加治罪亦應查明停其陞轉○是日駐蹕兩間房行宮○丁酉諭曰舒赫德前在雲南辦事錯誤當即拔去花翎其應治罪之處朕特寬免賞給都統銜遣往烏什辦事著加恩仍帶花翎以觀後效惟伊係獲罪之人若照常全給養廉

不足示儆著將舒赫德於烏什應得養廉內裁去二千兩每歲給一千兩○諭軍機大臣等劉統勳等奏審訊被割髮辮之孟士會等一案尚有應行訊問之處已傳諭將各犯解送熱河候訊并令原解官景州知州張在即回任緝匪矣解送此等人犯止應於佐貳或武弁內慎選妥員管押知州有地方專責豈可令其久曠職守且孟士會此案即係景州之事尤當責令該員上緊緝拏而被割髮辮

情形頗有疑竇。是以令其解京確訊。今乃令原問官押解。伊等止圖迴護。前失安保。無中途教供情事。而愚民見有本州印官在旁。即有實情。亦不敢盡吐。致與初供互異。其實辦理公事。祇期於事有益。即初供不實。不盡覆訊。究出確情。與承辦之員亦無甚大礙。而外省州縣往往曲為掩飾。結習相沿。最為可鄙。方觀承派令該知州押解之處。其意未必不出於此。甚屬非是。若以為該州查辦之事。即

令該州管押。設該督自行獲犯。亦需親身督解耶。方觀承久任封疆。豈不知事理輕重。或係病中精神不能周到。遂爾疎畧。然究宜加意振作。不當如此舛誤。方觀承著傳旨申飭。○理藩院議覆辦理俄羅斯邊境事務貝子瑚圖靈阿等奏俄羅斯哈屯汗來使廓密薩爾呈請通商各事宜。一請仍前通好。凡貿易悉循法令。不敢狡賴。一通商後。經過邊界地方。謹遵原議罷稅。一請在京之俄羅斯聽彼

處附便寄銀。一請在京之俄羅斯彼此遇便通信。一來年另派彼處喇嘛隨貿易人等來京。將在京者換回。一文移事件。若照舊行知。薩納特衙門。未免路遠。請即交廓密薩爾承辦。一照舊派學生四人。隨貿易人等來京學習文字。一嗣後邊界逃竊等事。詳定章程。嚴查速辦。俱應如所請。一彼處商人赴京。經過地方。請任其貿易等語。恐外夷罔知法禁。轉多未便。仍照舊例辦理。一常遵舊約。不敢妄起爭端。自應如所請。至所請稱謂一事。查彼處哈屯汗。曩無別稱。應毋庸議。一稱此次特派大臣內。孰可專辦事件。共相商定。應即令與瑚圖靈阿等會議。一請將在內地之俄羅斯。照彼處從前來文。悉行給回。查此項人。現無蹤跡。礙難代捕。亦毋庸議。一請將各條議准。著為定例。查邊界事務。業派瑚圖靈阿等辦理。廓密薩爾果知恭順。一切遵照交辦。俟定議後。入於舊定款內。從之。○是日駐蹕常

山峪行宮。○戊戌諭軍機大臣等據彰寶等查奏楊重英寄頓商衆營運及交同知程堂收貯銀共有五萬二千餘兩楊重英在兩淮雖亦年久不過分司監掣何至積蓄如許多即其後陞任司道為時無幾其應得養廉每年僅有數千金亦止數一年盤費食指之用斷不能多有餘剩何來此五萬餘金可以盤剥生息此必以其前在分司及監掣同知任內上而與高恒普福盧見曾趙之璧等串

通結納下而與商人等親近交好是以得從中獲有厚利且即以得之商人者交結鹽政運司上下扶同分肥侵蝕皆情理所必有著傳諭彰寶等令其將楊重英從前在兩淮時如何與商人交好如何與鹽政運司串通漁利並此外有無寄匿之處悉心嚴密訪查並傳齊各商及趙之璧等嚴行審訊務得確情不得任其稍有含混隱飾仍將查出情節即行據實覆奏○又諭曰瑚圖靈阿等奏俄羅

斯廓密薩爾呈請通商一摺已飭理藩院議行矣著傳諭瑚圖靈阿等將所定章程詢問廓密薩爾若一一遵照辦理即准開市通商若稍有遲疑即毋庸與彼復議○是日駐蹕喀喇河屯行宮○己亥

上駐蹕避暑山莊至八月庚午皆如之○諭軍機大臣等本日據劉統勲等奏查出寄信盧見曾之中書徐步雲等一摺自應分別嚴審但此案不過尋常查辦事件非若割辦匪徒

之關係重大何以至今未據奏及匪犯蔓延數省擾害閭閻且敢於輦轂重地潛行匿跡尤不可不盡力搜擒以除民害昨雖據英廉奏到業經分差番役四路訪拏但何以迄今多日尚無一人就獲現在京城中緊要之事無逾於此劉統勲託恩多英廉經朕責成專辦必當時刻留心督飭迅速緝捕著再傳諭劉統勲等上緊嚴查務期弋獲毋令匪犯兔脫遠颺並將現在查辦情形及有無獲犯之

處迅速奏聞其僧人普輝亦即詳細研鞫錄取確供覆奏○吏部議覆貴州按察使高積奏稱命案內兇犯脫逃定例四叅限滿不獲州縣官降一級留任但所犯輕重不同如卑幼擅殺期功尊長屬下人毆殺本管官奴婢毆故殺家長並殺死三命四命重案遇有脫逃照尋常命案例按限查叅未免緝限太寬請嗣後此等兇犯脫逃初叅承緝官住俸限一年緝拏限滿不獲降一級留任再限一年緝拏限滿不獲即照所降之級調用應如所奏從之○又議准河南按察使楊景素奏稱外任官降革處分無加級紀錄可抵者於查叅日先令離任惟雜職微員必待部覆到日出具考語分別離任辦理殊未畫一請嗣後雜職人員遇有降調處分無級紀可抵而平日居官勤能者照例於查叅文內出具考語咨部請予留任若居官平庸者即勒令先行離任隨咨報部開缺從之○工部議准兩廣

總督李侍堯奏稱粵東採取硫磺現存無幾請將前次封閉之英德縣屬猫耳峽等處山場仍行開採從之○庚子中元節遣官祭

永陵

福陵

昭陵

昭西陵

孝陵

孝東陵

景陵

泰陵○遣官祭

孝賢皇后陵

端慧皇太子園寢○諭軍機大臣等彰寶奏查辦割辦一案甚屬不妥已於摺內批飭矣如安東縣拏獲之劉五既已翦辦有據即當切實嚴訊何竟聽其欲乘間扒竊錢文誆供不加究詰且該縣於四月間獲犯何以止憑到案游供遽行延擱直至七月中始行呈報

似此玩忽屬員何不查叅且該撫於春間即有風聞何以不及早查辦致匪徒經久不獲而地方官拏獲之犯亦竟延挨不報可見該省政務因循視此等重案漫不經意故奸匪無所警懼傳播蔓延擾及他省是該省實不能辭養奸貽誤之咎也又沛縣民人所獲山東城武人藏有藥包及木人器具正可逐一根求乃又被愚民聚毆該犯自戕遂無活口可質邳州所獲之王道九亦經村衆疊毆而

實錄卷八十四

聖

斃此亦該省辦理不善之處地方有如此惡匪一有所聞即當早行通飭各屬選派妥幹員役嚴捕并諭百姓協力擒拏送官究治如果豫行飭諭則二犯並無兇橫拒捕情形小民有何迫不及待而竟逞其公憤立置之死耶即如山東所獲各犯內頗有經村民擒獲鳴官訊問得供者江南何獨不然即此可見該二省之吏治優劣辦事之認真與不認真矣至玉石一犯為此案巨匪既經降旨令該

督撫嚴切查拏彰寶於接到諭旨時即應速

差幹員往緝即云地在宿州係安徽所屬該撫不肯越界拏人在尋常捕犯或有此說然亦不妨通關隣省會協緝拏若此等匪魁潛匿他境豈可尚存畛域之見視同膜外經朕屢諭竟不一為辯及亦無一語奏及耶督撫受封疆重寄當以國家公事為重若以鄰封無關己身考成及慮越境或傷同官和氣皆非公忠任事之道若諸臣相率如此則各省

實錄卷八十四

聖

將扞格不通尚成何政體乎彰寶之以宿州非本管地方諉為局外已屬非是若高晉身為總督安徽江蘇兩省皆其所轄而亦如彰寶之玩忽從事又將何以自解高晉彰寶俱著傳旨嚴行申飭並諭該撫速提劉五到案嚴行審訊務得確供以便搜求餘黨高晉彰寶並宜多派幹員上緊訪緝一面嚴拏玉石明遠等務絕根株毋任漏網又諭前聞江浙地方有偷割髮辮之事蔓延數省曾經降

旨該撫嚴切查辦。嗣據山東巡撫富尼漢奏報，拏獲匪黨，供出首犯一係安徽省宿州僧人玉石為首，復節降諭旨，令該撫上緊躡緝。昨據該撫奏，陛見出京後，於六月十五日回任。距今已及一月，何以並未將該省現在查辦情形，即行覆奏？至玉石一犯，據東省獲犯所供，傳授邪術，誘惑多人，擾害鄰省，實為此案罪魁。又九華山道士王昭亦係案內要犯，宿州、青陽皆該撫所屬，一經富尼漢移咨及朕傳旨查辦，即應立時選派員弁星馳前往擒捕巨兇，搜拏黨羽。乃遲至日久，並未見弋獲一犯，查奏一語。該撫所司何事？而竟漠不經心，若此耶？此必馮鈐一經陛見回任，心滿意足，故智復萌矣。著傳旨嚴行申飭，並諭令即速分頭派委妥幹員弁嚴切緝拏，毋任聞風遠颺，如再玩忽從事，是自取咎戾矣。

實錄卷一百一十四

聖

大清高宗法天隆運至誠先覺體元立極敷文奮武孝慈神聖純皇帝實錄卷之八百十四

實錄卷一百一十四

聖

大清高宗法天隆運至誠先覺體元立極敷文奮武孝慈神聖純皇帝實錄卷之八百十五

監修總裁官經筵講官太子太傅文淵閣大學士文淵閣領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領侍衛內大臣稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級尋常加二級軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆三十三年戊子七月辛丑

實錄卷八百十五

上詣

皇太后行宮問安。○以理藩院尚書伊勒圖為伊犁將軍。仍兼理藩院尚書。○以刑部員外郎德福為湖北按察使。○壬寅。刑部議覆。河南按察使楊景素奏稱。毆妻至死之案。其例應留養者。俟秋審時查辦。例應承祀者。即於疏內聲明。查承祀較之父母現存賴以侍養者。勢可從緩。乃得隨疏題請開釋。未免遲速不同。請嗣後例應承祀之犯。照留養例於本

內聲敘。統俟秋審覈擬等語。應如所奏。從之。○癸卯。諭。去歲查審黎明五等。派費修隄。侵蝕入己一案。盧謙係本管道員。當瞿學富控告之始。並不親提審訊。任聽承審屬員問擬。轉將原告坐誣。又定長等奏勘黃梅等縣董家口江隄一事。始由盧謙具稟。請借動公項。交民自修。復欲蹈黎明五等故轍。種種辦理不善。已有應得之罪。今伊父盧見曾。因查辦兩淮提引積弊。豫將家中貲財。私行寄匿。並於兩淮商家。究出從前託人營運銀兩。至於盈千累萬。而盧謙亦有寄銀營運之事。是盧見曾在任時。必係與各鹽政。及各商等交結分肥。自問情虛。故為此狡獪伎倆。將來審明之日。自當按律究治。伊子盧謙。若令其仍任監司。殊不足以示懲儆。盧謙著革職。發往軍臺効力。○又諭。據李侍堯奏。潮州鎮標守備甘廷亮。辦公回署。自縊身死。旋據親屬呈控。係被總兵明達。逼迫所致。請將明達解任。質

審等語。營弁承辦公務。非被上司逼迫。何至遽爾輕生。情急自盡。總兵明達素來本屬平常。此案抑勒甘廷亮。整發齋摺路費等項。不准請領歸款。各情節。自非盡屬屍親虛捏之詞。明達著解任。交與該督李侍堯嚴行審究。如果甘廷亮之子所控屬實。即著將明達一面革職審擬。一面據實奏聞。○諭軍機大臣等。據高晉覆奏。查拏割辦匪犯宿州地面。雖有青龍寺。並無匪僧玉石。邳州亦無五樂戶地方。及張四儒姓名。現在仍咨東省查詢等語。已於摺內批飭。此種奸徒行蹤詭譎。現在各處獲犯。多有供吐游移。不即盡情輸服者。該州既有青龍寺。僧衆聚集八人。焉知玉石不隱匿其內。見事已發覺。遂爾改易法名。乃該督僅據所委道員。及該州等。匆匆訊問。遽爾信為實然。不復根究。轉使鬼域伎倆。潛為得計。豈詳慎查辦之道。著傳諭高晉。務再實力查察。詳晰根究。無使稍有遁飾。又摺內稱

據宿州稟報。拏獲丐匪張四。搜有刀藥辦尖。訊其何人傳授。同夥幾人。吐供尚在游移。現在差提嚴究。張四既有刀藥辦尖。其為此案匪犯。確鑿無疑。該督即應詳悉審訊。令其供吐實情。庶正夥各犯。由此得其蹤跡。此等惟在承審之人。細心推鞠。設法研求。奸匪自無能狡展。若徒事刑訊。或以一加夾杖。輒爾塞責。轉於事無益也。著將此傳諭高晉知之。○又諭。近有用藥迷人。割取髮辦奸匪。蔓延數省。前據山東巡撫富尼漢。拏獲數犯。供出浙江僧人吳元。江南僧人玉石。明遠等。為首節經降旨。各督撫嚴密查拏。務獲首夥各犯。以盡根株。因思此等奸徒。行蹤詭秘。現在正值糧艘回空之際。其沿途暫覓水手。繙夫。以及順道搭船人等。為數甚多。其中保無奸徒藏匿。且或因地方官查拏嚴切。遂爾潛身船內。希圖遠颺。均未可定。著傳諭楊錫紱。即行密飭各幫千總。轉行密諭各船旗丁。將暫覓應

用及搭船回南。并欲來搭船之人。留心察看。如有形跡可疑。或包裹內藏有迷藥。翦刀。髮辮等項。即行擒獲。首報如審明實係真犯者。旗丁特與重賞。千總奏明陞用。並令楊錫綬隨時實心督飭嚴密查辦。俾伊等各知奮勉。不徒以具文塞責。○又諭據劉統勲等奏查拏翦辮匪犯一案。數日以來。報出被翦者。每日均有數起。而匪犯蹤跡全無影響等語。究屬兵役等查拏不力所致。且現在被翦者。既未盡息。豈有偷割賊蹤全無下落之理。劉統勲等仍應督飭官兵番役人等多方密躡。期於必獲。以盡根株。至於被割之人。原可無庸根究。若令其每日報聞傳訊。徒擾人意。而無益事體。且無知之徒。轉相傳述。搖惑聽聞。殊非緝匪安良之道。又如婦女在家被割衣襟。其跡尤屬微曖。未必盡出奸徒。更當置之不問。以杜無稽之口。並聞有門牆書字之說。更屬不根。於事亦毫無干礙。斷不宜詫以為奇。

所謂見怪不怪其怪自敗也。劉統勲等惟當督飭兵役上緊緝匪。此外一切浮言。並不必過於詰問。明示鎮定。而隱飭加嚴。方得辦理此案要領。又本日據高晉奏。山東省提訊蔡廷章等。供稱吳元通元二人。俱係宛平縣人。前供江浙係屬訛錯等語。此等匪犯游供。必不肯將確切住址一時吐露。但該省既據供有宛平之語。寧可信以為實。劉統勲等並當嚴諭番役人等於宛平。大興所屬寺院等處。留心察訪。如有形跡可疑。即行嚴加根究。毋得稍存寬縱。其前獲僧人普輝一犯。並著即速審究。務取確供。止當設法研鞫。不必徒事刑求也。仍速將審訊情節。及有無獲犯之處。即行具摺奏聞。毋致久延時日。○又諭據高晉奏查拏偷割髮辮匪犯。前准東省初咨首犯吳元。係浙江人。通元。並無省分嗣准咨覆提訊蔡廷章等。據供吳元通元均係宛平縣人。前供係屬訛錯等語。此等奸匪黨羽既多。

行蹤詭秘。獲犯訊供。原不能必其盡皆吐實。蔡廷章所供吳元通元本籍。或係初供游移。後供反覆。俱難懸定。即靳貫子所供玉石張四儒二犯。江省查拏。並屬渺茫無據。或係該犯隨口狡飾。亦未可知。著傳諭富尼漢。即派委妥幹員弁。將蔡廷章靳貫子二犯嚴行管押解送行在。聽候質審。至此案蔓延數省。惟東省獲犯獨多。且俱取有供詞。自屬該省吏治整飭實心任事。各處間獲匪犯。俱不能訊得確供。而東省則各犯招詞鑿鑿。或伊等到案不藉刑求。即盡行吐露。抑初到茹刑抵飾。別經設法究詰。始行吐實。並著富尼漢詳細附摺奏聞。尋奏該犯等不待刑求。即將首犯夥黨供出。至現在尚未續獲要犯。亦別無窩巢下落。報聞。○甲辰。諭軍機大臣等。京城查拏割辦匪犯一事。昨已降旨令劉統勲託恩多英廉督飭上緊密拏。務於必獲。以盡根株。至昨摺內稱有被割之人。與旁觀之人俱毫

無知覺。且有夜間閉戶。婦女被割襟髮者。實為理之所不可信。京師地面人烟稠密。匪徒若果於街市用術迷人。豈能盡掩衆人耳目。但聞此等奸匪多於僻陋巷徑。乘人洩便之時。逞其狡計。則仍係兵役等搜查不能周到之故。至城內夜禁森嚴。到處設有柵欄。啟閉盤詰。兼以兵卒終夜巡邏。焉有蹤影全無。潛入人家室之理。若奸徒敢於如此肆行無忌。則柵欄豈不成虛設。而徼巡弁兵所司又何事乎。託恩多兼管提督。此事尤其專責。務須嚴飭官兵番役多方設法。上緊緝拏。並密飭各堆柵留心稽詰。一體查捕。鬼蜮自無由遁形。至於被割之人。本無可根究。不但必傳詢。並不必令其每日呈報。其餘一切浮言。皆當置之不問。諸凡示以鎮靜。俾愚民不致驚疑。而嚴密查緝之法。勿稍疎懈。方得辦理此案。關要。又聞近日京城傳有山西異蟲飛噬傷人。甚至繪畫圖狀。轉相傳播。其說尤屬荒

唐此事與查辦翦辦之案不同。彼則不宜妄聽謠言。此則急宜廓除詭誕。想其始不過市井無知好事之徒。因有割辦一事。創為異說。惑人聽聞。因而輾轉相告。但既形之圖畫。則蹤跡易於根尋。著託恩多。悉心體察。遇有傳售圖張之所。逐一切實追求。務得為首傳造之人。緝獲到案。盡法懲治。庶足以安人心而熄邪說。著將此傳諭知之。並將辦理二案情形。即速覆奏。○又諭曰。彰寶覆奏查拏割辦人犯一摺。辦理殊未得當。已於摺內批諭矣。此案蔓延數省。而其事始於江南。各該地方官。事前之失於覺察。及到案輕縱不報者。皆所不免。但此際正當飭令承緝要犯。其中果有能出力緝拏。搜擒匪衆。原未嘗不可稍贖前愆。若仍玩忽因循。將來辦結此案時。逐一查叅。彼將焉往。且各員任內專責之事。前此或希冀掩飾。至今案已發覺。豈尚不知為晚。蓋之圖。在任勒緝。或可督飭幹役。上緊緝拏。

若以一叅了事。彼亦即甘棄一官。不復措意。而接任之員。又視為前任舊案。漫不關心。正犯何由弋獲。彰寶此舉。可謂全不解事矣。至安東縣獲犯劉五。昨已諭令該撫。拘提嚴訊。並立即提到。留心設法。切實研求。務令其供吐巨魁蹤跡。餘黨下落。即按所在地方。逐一嚴拏。惟期必獲。以絕根株。但此輩狡惡非常。到官恐未必即行承認。該撫審究時。惟當詳細研鞫。使其無所遁情。方得辦事關鍵。切不可徒事刑求。致要犯轉得茹刑狡抵。又或以一經夾訊。即完審事之責。終於不得確供。於事究屬無益。昨高晉奏宿州查獲張四一犯。亦曾諭令詳細詰訊。如彼處查有黨羽。在江蘇地面者。一經咨照。該撫即速上緊協拏。毋存畛域之見。如劉五供有安徽人犯。亦一體派員前往會緝。將此傳諭彰寶知之。○又諭據彰寶等奏查訊兩淮提引一案。辦理尚未詳盡。如所稱各鹽政雖俱在任年久。細加查

察尚無留寄商人生息餘利銀兩。究詰各商。仍無出首。似不敢欺瞞等語。所見非是高恒。普福在兩淮鹽政任內。歷年俱久。今查高恒家產。幾值數十萬。一應精粗什物具存。且其平昔費用奢侈。覈其現存貨產。不甚相懸。似此外不應更有隱飾。若普福家當查辦時。所存貨財無幾。而京城即查有寄代營運之事。則其在任時。豫為寄頓地步。斷不能免。伊用度遠不及高恒。且以每年所得養廉計之。為數亦復不少。何至其家竟空諸所有。乃彰寶等竟謂其並無留寄。朕實所不信。至引盧見曾。楊重英。名下查出隱寄累累。即指為各商不敢他有隱瞞之證。猶為舛謬。盧見曾一案。由東省據供交查。楊重英一案。由該旗奏聞飭辦。該商等知其無從抵賴。不敢不據實承認。並非伊等先期自行首報也。今普福查出財產。既屬寥寥。而其往時。又無多花用。所積歷年廉俸。何所歸著。彼與各商交結甚久。豈

有不託商家代為封殖。而其今年調任之後。心存疑畏。又豈能不向兩淮巧為安頓乎。商人等特因未有指實。故不肯矢口輕承。或念普福多分提引舊情。不肯和盤托出。彰寶等豈可聽其一二支飾之詞。遂據以為實然乎。著傳諭彰寶等。即提各商到案。詳悉開導。逐層研詰。務令供吐實情。水落石出。不得任其含混抵飾。如各商執迷不悟。其事豈能終不敗露。將來別經發覺。則是各商自取重罪。即該撫等亦不能辭其咎也。至餘引無著銀三百九十六萬餘兩。其中雖有代高恒普福盧見曾墊辦器物之項。亦係各商等有意結納。巧於趨奉。且浮冒價值。仍係各商侵蝕所致。所有此項無著銀兩。將來無可追抵。仍應於該商等名下追還。同一應行入官之項。何必為普福狡展隱匿。甘心代人任過耶。各商等前於屢次南巡。承辦陳設諸事。彼時因念伊等出力急公。故稠疊厚加恩賚。孰知伊等即

以官窩正款冒認已貲。既邀頂帶優榮。又復坐獲厚利。且因並無稽查。任意浮開妄費。如此存心。天良何在。今案情自行發露。實屬天理難容。朕從寬不加伊等罪譴。已屬逾格施恩。今止令其歸還款項。於情理既屬當然。而衆力亦非不給。可將此剴切諭商衆知之。至盧見曾令商人辦買古玩。未給價銀至一萬六千餘兩之多。可見其上下串通。分肥侵蝕。俟解到揚州時。一併嚴審究擬具奏。其解任運使趙之璧。既訊無染指情弊。姑免深求。但伊在任目擊鹽政如此妄行。不能阻止。及據實入奏。自有應得處分。俟此案審結時。照例查辦可耳。○乙巳諭曰。高晉奏上下兩江地方。本年五六月間。雖間得雨澤。未能一律普徧。近水低田。尚可車引。高阜之區。難於戽灌。時已立秋。不能趕種雜糧等語。所奏為時太遲。已於摺內批飭矣。朕於農田晴雨。常厯宵旰。每諭各督撫隨時入告。冀得周知。薄海民

生休戚。早施補助。今兩江夏雨。愆期。地方政務孰有要於此者。該督等所司何事。豈竟漠不動念。不及早據實上聞乎。至該處水鄉窪地。可引澆蔣秧者。收成自不致歉薄。其高田山阜。趕種既逾節候。恐不免有偏災。朕心深為軫念。著該督撫迅速查明。通省各屬。有被早成災。應行賑卹之處。即行董率屬員。實力妥協查辦。毋使閭閻稍有失所。以副朕惠愛黎元至意。仍一面將辦理實在情形。速為覆奏。其應緩徵者。即行緩徵。以紓民望。該部即遵諭行。尋奏被旱州縣。祇十分之一二。現查勘辦理。報聞。○諭軍機大臣等。據阿思哈奏。奸僧海印。於湯陰縣地方。偷翦民人申燕子辮尖。經村衆縣捕追赴擒獲。併於擔頭查有檉繩短髮十餘綑。屢經訊問。供詞狡展。惟該僧形頗委頓。若急用刑。夾致斃。反至無可根究等語。所見甚是。此等奸徒。類多詭譎。雖蹤跡顯然。而事發到官。每每茹刑狡抵。希冀

斃於杖夾。轉無從得其底細。昨京城拏獲僧人普輝。情形亦畧相似。可見奸匪鬼域伎倆。大畧相同。自應設法研鞫。不可徒事刑求。致夥黨無由根究。著傳諭阿思哈督率司道等多方研究。一得確情。即按供嚴緝黨羽。毋使漏網。遠颺並一面飭屬上緊搜拏。不拘僧道人衆。凡有蹤跡可疑者。即行緝捕。以絕根株。○又諭今日富尼漢奏盧見曾先期得信寄頓情由一摺。所辦尚有不實不盡之處。已於摺內批諭矣。此案不過尋常查辦事件。東省現有割辦匪犯一案。關係最為重大。該撫既有由驛馳奏之事。何不將近日曾否續獲要犯。及已獲各犯有無續吐供詞。一併具摺奏聞。匪犯蔓延數省。擾害閭閻。不可不及早究出首犯。搜緝餘黨。以除民患。山東雖已拏得數人。而案內為首重犯。至今未能弋獲。昨據高晉奏東省審出首犯玉石。江南並無其人。固係江省督撫等查辦不力。但此輩供詞狡

飾。原難盡信。即如蔡廷章等所供吳元通元籍貫。亦前後互異。可見鬼域伎倆。故將供詞閃爍游移。巧於掩匿。希圖遷延時日。巨魁或倖以漏網。已諭令該撫將蔡廷章。靳貫子二犯。派委幹員。嚴行管押。解赴行在候訊矣。但蔡廷章原供有與通元在濟寧分路之語。恐正犯仍在山東地面藏匿。亦未可知。富尼漢務當上緊督飭所屬。迅速捕緝。不得因已獲數犯。遂謂可以卸責。遽爾疎懈。致要犯潛蹤遠颺。至摺內所敘盧謨供稱。伊於六月二十七日。往見徐步雲。告知揚州提引一事。復至伊戚紀昀家探問。亦與徐步雲所告相同之語。顯係盧謨欲出脫伊戚紀昀。專歸罪於徐步雲之意。昨經劉統勳等。訊明盧陰恩張起及紀昀各供。均係紀昀於六月十三日見盧謨等。告知兩淮鹽政有事。盧謨遂於十四日寄信回家。是紀昀亦係豫露信息之人。今盧謨供稱。二十七日。至紀昀家探問。所告亦如

徐步雲之言與京城訊取供詞迥異盧謨之欲為伊戚開脫不問可知何該撫輒據一面之辭竟信以為實然耶又所訊在家隱寄貲財盧謨不知情由之處亦屬不確盧謨既在京得知提引之事焉知其不豫先通信德州授意家中將貲財早為藏匿現已諭劉統勲等將張起等再行嚴訊無難水落石出著富尼漢將盧謨親提嚴訊不得令其飾詞抵混至盧見曾家財既據查出李容等各家寄頓情節豈有此外更無藏匿之理並著富尼漢一併嚴切研究毋任絲毫隱飾○又諭據富尼漢奏盧見曾先期得信隱寄貲財一摺所錄盧謨供詞顯有出脫紀昀歸罪徐步雲之意紀昀於六月十三日告知盧謨叔姪隨即差人回家送信之處業據劉統勲等審出確情豈盧謨所能代為掩飾現飭富尼漢另行查訊矣至所稱盧見曾寄頓家財情節訊之盧謨堅稱赴京在先不知隱寄情由明係詭

詞狡飾殊不可信並諭令富尼漢再加研訊至伊家人張起先往德州後復跟隨盧謨回家所有盧見曾家內聞信倉皇遽將家貲散寄各處及盧謨如何託寄各情節張起必能深悉今張起現在京緝獲著劉統勲等即就近嚴加審訊務令將盧謨知情寄頓緣由據實供出併即訊盧見曾家財除伊戚李容及家人陳桐供首寄頓之外復於何處潛行隱寄逐一嚴鞫取具確供具摺奏聞所有富尼漢奏摺供詞一併鈔寄閱看○戶部議覆兩廣總督李侍堯疏稱香山縣鴉鵲萌仔等圍鹽田四埧七分因淡水侵注不能煎鹽請改築稻田現文明四十五畝有奇照斥鹵例起徵其鹽課銀豁除應如所請從之○禮部等部議覆山西巡撫蘇爾德奏稱文武生員名冊學政無移送督撫之例教官亦無呈牒地方官之條一遇生員斥革案件無憑查覈請嗣後學政歲科兩試於取進文武新生紅案

發學後飭發地方官造冊呈送督撫其前屆文武生員飭令該學教官造具格眼冊牒地方官一併呈送案件關涉生員者覈其情罪查革移咨學政除名應如所請并通行各省一體遵辦從之○兵部等部議覆湖廣總督定長奏稱湖南水師協營戰巡等船應行裁減事宜洞庭協之罐子口富地白家灣等三塘水淺沙淤請歸併下窖白泥湖明山三汛兼管原設巡船三隻應裁鴨子港下窖南嘴大潭沙堰埂五塘各設有小哨船其原設戰船五隻應裁存城戰船十六隻兵少船多應裁四又岳州營之銅盆湖請歸併鹿角塘金泊港請歸併扁山塘應裁戰船二俱應如所奏從之○江蘇巡撫彭寶疏報靖江縣乾隆三十二年分新漲田八十五畝有奇○調鑲白旗蒙古副都統公奎林為正白旗滿洲副都統鑲黃旗蒙古副都統弘旿為鑲白旗蒙古副都統○豁除江蘇靖江縣乾隆三十二

年分被水衝坍田十四頃六十八畝有奇額賦○蠲免安徽潛山當塗無為等三州縣學田乾隆三十二年分水災額賦○丙午上詣皇太后行宮問安○諭軍機大臣等京城查拏割辦匪犯一案節經傳諭劉統勲託恩多英廉嚴飭官兵番役上緊躡緝劉統勲等自應將辦理情形及有無獲犯之處隨時奏聞乃本日報到並未奏及此事且昨據高晉奏稱山東省提訊割辦匪犯蔡廷章等供出吳元通元二僧俱係宛平縣人當即降旨令劉統勲等於京城內外及各鄉村庵觀寺院嚴密訪緝其曾否密飭官役實力搜拏及有無二僧蹤跡亦當隨報奏覆何竟無片紙入告豈伊等視查拏割辦匪犯一事為無關緊要而不甚經心耶本日又聞有工部筆帖式亦被割去髮辮之語其事漸及職官更非街市愚民可比劉統勲等何以亦不奏聞豈以為前

次諭旨有被割之人不必每日報聞傳訊之語遂並此亦置之不論是又不免過於拘泥矣。著傳諭劉統勳等仍嚴飭官兵等極力盡心搜捕毋得稍懈並將近日匪徒犯案之事是否少減及將現在辦理情形迅速具奏嗣後除拏獲要犯訊得確供即專摺由驛馳奏外其餘並於發報之便將作何查辦及有無獲犯各緣由隨時奏聞普輝一犯曾否訊有切實供招並著一併即行覆奏○又諭曰彰

寶奏安東縣拏獲翦辮人犯劉五及沛縣民人所獲山東城武人姜姓邳州所獲王道九二案俱被村民毆斃一摺所辦甚屬非是已於摺內批抹切諭矣如所稱三月到任即聞有奸民割人髮辮衣襟之事其實本省境內並無被割形跡訛傳之語亦已止息等語已非實在情形此案起自江浙蔓延各省山東現有獲犯供出為首之人多在該撫等所轄地面況蘇州民居稠密尤易藏奸豈得轉無

犯案乃該撫輒諉為浮俗民謠不即究詰查緝輕聽屬員妄稟遽寢其事至此時尚欲以此藉口則匪徒之毫無畏懼肆行滋蔓非該撫養奸貽誤所致乎至安東縣所獲劉五既翦辮有據其為匪黨已無可疑乃聽信該犯狡飾之詞謂圖乘間扒竊並無傳授教令之人不即嚴加訊詰尤於情理未協此等游供即尋常緝獲宵小尚不可信今既當查拏割辮要犯之時而該犯又證據確鑿復有何疑乃不即窮究實情嚴拏餘黨轉以欲圖扒竊巧為開脫尚成何辦事乎又如沛縣所獲山東城武人姜姓碰迷范氏箱內藏有翦子藥包及木人器具被鄉民聚毆交保該犯乘間自戕此特惜其已死無活口可訊而所藏藥物及碰迷婦女則亦顯類匪流乃該撫惟視人命為重緝匪為輕僅委之素性模稜之邵大業研審致死情由該員仰承上司意指不過將就完案寧肯實心查詰乎該撫何不親

提嚴鞫。或係匪犯邂逅致斃。抑村民誣害平人。皆無難立辨。何乃畏勞敦體。輒爾照常批發府屬。遂欲塞乃責乎。至邳州詳報之王道九一犯。與沛縣所獲姜姓微有不同。即所供割襟調戲之語。亦並無證佐。而其已就拘執。不即送官。擅行毆斃。自有應得罪名。此又當就案辦案。並通諭所屬百姓。凡獲面生可疑之人。立即鳴官。不得私行毒毆。自可杜愚民借端擅殺之風。亦可資村衆遇匪協捕之益。設輕重稍一不倫。又必將因噎廢食矣。至所稱因東省翦辦割襟之案發覺。致翦絡之徒。即逞技翦辦。乘機攫竊。更不成語。當此嚴拏匪犯之際。該撫尚為此不切事理之言。可見其胸中全不以此為事。惟欲化大為小。化為無。豈朕委任封疆之意。即所云翦絡之徒。平時本應嚴緝。至敢於逞技翦辦。則已成匪黨矣。豈尚可稍存姑息。從而曲為之辭乎。且此案由江南波及山東。轉以為聞東省發覺。

因而效尤。所見亦屬倒置。若果如所云。亦可見東省之實力查辦。而江南之漫無稽查。更顯然矣。江南向來吏治廢弛。實不意積習不悛。竟至於此。彰寶前任晉撫。諸事頗能認真。乃調任以來。江南之結習復萌。承辦此等大案。漠不經心。一任屬員朦混。毫無振作。豈志足意滿。不復如前此之奮勉乎。彰寶著傳旨嚴行申飭。所有設法嚴訊。劉五務得確供。及上緊緝犯之處。節次所降諭旨。甚明著遵照前旨速行妥辦。○又諭據定長等奏查拏割辦匪犯一案。先於五月內風聞其事。嗣有愚民編造歌詞。以為指破割辦之計。而漢陽縣地藏庵演戲。忽稱捉獲一人。羣毆致斃。此外惟江陵江夏兩處被割者。亦僅止孩童數人。兩月以來。謠言頓息。亦無用藥迷人。並另有編造歌詞等語。所奏殊未可信。匪犯蔓延數省。擾害良民。地方官一有見聞。若即行實力搜拏。要犯自無難就獲。今該省地方既有被

割髮辦之事而匪犯無一就擒。漢陽戲場所獲一人。又被村衆聚毆。立斃。無可質訊。此皆地方官辦理不善所致。該督撫等奉到諭旨。尚不嚴加督飭。上緊緝拏。轉謂謠言惑聽。近已止息。是有心存大事化小。小事化無之見。甚屬非是。前此山東陸續拏獲匪犯。訊有供詞。即現在直隸京城被割之人甚多。是匪徒滋蔓並未斂跡。湖廣豈反獨無安得謔之謠言惑聽。且以為其風已息。耶著傳諭定長。程

燾等務須督飭所屬。並選派妥幹員弁。分投嚴切查辦。務期要犯就擒。窮究餘黨。盡絕根株。若稍有疎縱。致奸徒漏網。遠颺別經發覺。惟於該督撫是問。尋奏臣等屢經責成。該管道府嚴密緝拏。尚無匪犯就獲。得旨甚不成話。近日所獲幾何。速奏來。○又諭曰。永德覆奏查辦翦辦匪犯各摺。辦理甚屬非是。已於摺內批示矣。該省既於二月間。聞有叫魂翦辦之說。彼時即當切實根究。訪查被害者何

人。及何地方最甚。按跡覈查。擒拏一二要犯。盡法懲治。並可追緝餘黨。淨絕根株。則匪徒自當早為斂跡。何至蔓延數省。擾害閭閻。是此案縱惡養奸。貽累各處。浙省實為之首也。至湖州旋有石匠郭廷秀。吳東明先後稟稟莫方周。沈士良計兆美等到案。謊言既以石匠造橋為名。而百姓并有開寫假名探試之事。其說豈盡無因。乃不於石匠切實根求。訊其起意之人。立拏治罪。轉將莫方周等指為

多事。枷示各門。又蕭山縣盤獲僧人正一起。凡等四犯。既於巨成箱內。搜出翦刀三把。且有髮辮在內。賊跡更無可疑。乃不將匪僧嚴切窮究。輒信其妄供。伊子向業皮匠所用。巧為開脫。復將擒獲之縣役蔡瑞。坐以枉栽。枷責重處。如此是非倒置。小民尚何敢再首差役。復何敢拏人。無怪至今不破一案。不獲一犯也。又該撫稱二月間。在藩司任內。聞有此事。即經面稟巡撫熊學鵬。查飭禁戢等語。此

特事後諉過之言。豈能藉詞掩飾。在熊學鵬不即奏聞。誠亦不能辭咎。但永德彼時身任藩司。原有自行奏事之責。地方有此邪術迷人大案。巡撫不認真查辦。藩司何不據實上聞。否則令伊等專牘列奏。又何所取。若藩司不過撫拾錢穀浮詞。臬司不過搜尋刑名陳案。搪塞敷陳。遂為塞奏事之責。又豈朕許令封函徑達之本意乎。或永德庸懦無能。顧懼撫臣。不敢攬越。伊於三月內。即經擢用巡撫。

陞任以後。何亦默無一語。直至此事屢經傳旨飭問。始一具奏。尚多方曲為迴護乎。此案經朕諭。前後凡七次。據摺內稱。六月二十二日。即奉到初次諭旨。該撫是日奏事。並無一語提及。業經傳旨嚴飭。今該撫乃云兩次差人齎奏。錄摺附呈。此等取巧掩蓋之語。其將誰欺。該撫一味沾染外省。化大為小。化為無之惡習。辦理已種種不善。此時若幡然改悟。上緊力擒首夥要犯。或可稍贖前愆。若

恃掉弄筆墨。文過遂非。此等伎倆。豈能於朕前嘗試。永德若仍以此為得計。尚思顛預了事。則是自速重戾矣。又如匪僧吳元一犯。經東撫富尼漢。訊取獲犯供詞。移咨密緝。該處既查有悟源一僧。音與吳元相近。自當反覆研尋。乃草草一問。遂以為與東省指名之匪僧無涉。如此輕率辦事。正犯何由就獲乎。又稱。近日傳言頓息。各屬查拏。未得匪徒實跡。民情久已安靜。更屬不確。此案自浙省延及

江南。漸至山東。河南。廣東。直隸。俱有被割之人。近日京城亦頗有其事。浙江為始事之地。豈轉能獨無。況江南。河南京城。並經獲犯。而山東所獲尤多。何以浙省竟一無弋獲。匪犯一日不能盡緝。閭閻一日不得帖寧。乃以為民情久靜。作此掩耳盜鈴之語。寧不可鄙。此皆該省從前不以為事。惟圖消弭大案。以杜羣言。遂致迷蹤難覓。初不料其輾轉傳播。至於如此。今其事既已發覺。萬難掩覆。乃該撫

尚思含糊諉卸。視地方重案。漠不經心。若再不知猛省。恐該撫福薄。不能承受朕恩眷矣。永德著傳旨嚴行申飭。至德清石匠頭吳東明。郭廷秀。並經地方小民探試。且被人指名。實為此案根線。而蕭山盤獲遊僧正一。超凡。巨成。靜心。四犯。並皆形跡可疑。該撫何憚不一親提覆訊。遽以從前所辦為確切不移耶。著傳諭永德。即將石匠吳東明。郭廷秀。及正一等四僧。並所獲巨成箱內髮辮。剪刀等物。

派委隔屬妥幹員弁。嚴加鎖押。速行解赴行在聽審。若僉委不慎。致有教供串供之弊。及中途稍有疎虞。惟於永德是問。其探試之莫方周。沈士良。計兆美。及縣役蔡瑞。並係案內應行質訊之人。但伊等無罪。途間不必加鎖。亦著善為照料。一併送至行在。○戶部議覆。淮安關監督方體浴奏稱。向例貢物。及官辦銅錫紙張竹木等項。過關俱不報稅。今貢物定報稅新例。此項官物。是否照舊辦理。再銅

船過關。將餘銅填給印花。歸崇文門統報。貢物可否倣照此例等語。貢物報稅。係杜借貢品名色。夾帶私貨之弊。若官辦物件。動項採辦。自無庸納稅。至餘銅。必俟銅赴局交足後。始有確數。是以各關填給印花。歸崇文門統報。若貢物應逐件查驗。未便照銅觔過關之例。從之。○刑部議覆。貴州按察使高積奏稱。道員於每年冬季。按臨所屬。覆勘秋審。黔省距京遙遠。按臨後。始接部咨者甚多。移知補

勘往返紛繁。請嗣後凡已經審結具題之案。約計次年四月初旬以前。可准部咨者。臬司查明移行該道府。於冬季按臨之時。逐加覆審。如至期未准部咨。及部駁另審者。歸入下年秋審。應如所奏。路遠省分。一體辦理。又稱黔省惟遵義一府。無親轄地方。其餘貴陽等十二府。均有屬府分管之處。秋審各案。係知府自行承審。若令隨道員查勘。難免迴護。原招請專聽道員按臨研鞫。亦應如所奏。從之。

○丁未諭軍機大臣等劉統勳等奏究出蔡廷章一犯曾在京城隆長寺松筠庵棲身兼有伊親戚王連王雲王文翰朱然等並曾與康親王門上親軍布勒亨認識往來訊據布勒亨稱蔡廷章有畫符念咒捉鬼等事一摺已於摺內批諭矣是此事查辦似頗有端倪若從此根究或可得其蹤跡昨已有旨令富尼漢將蔡廷章派員解赴行在審訊計月內即可到京劉統勳等可於蔡廷章到京時將該犯與王連等及布勒亨質對明確訊取真切供詞俟無需再行究詰時即派員送至行在並著劉統勳等將割辦一案仍嚴飭官兵番役上緊查拏毋得稍有疎懈其普輝一僧並當悉心設法詳訊務得實情○戊申諭軍機大臣等彰寶奏查拏割辦人犯明遠等一摺所見大不是已將紕謬之處於摺內逐一批抹嚴飭矣此案起自江浙該督撫始初不以為事並未上緊查辦遂至奸匪蔓延總由

伊等沾染外省化有為無惡習固結於中牢不可破而不肖州縣又復仰承意指上下相勝遇事止圖消弭以掩耳盜鈴為得計其咎已不可逭然至今事已發覺惟當痛加愧悔力期速緝要犯早安良善或可稍贖前愆乃猶不自振作一味希冀迴護欲掩其前此辦理不善之跡則重案何由得有端緒如此存心是該撫之取戾愈大矣亦思朕何如主豈伊等聽信幕賓筆墨支吾所能文飾而敢輕於嘗試乎所有歷次舛謬情形俱節經降旨嚴切詳悉飭諭該撫奉到後自當知所猛省但恐積重難返始終迷而不悟如摺內所稱安東縣緝獲之劉五供有沐陽藥店魏鬍子教令翦辮之語自屬緊要根線即當遴委妥員星馳前往查拏到案未必不由此究出正犯蹤跡乃該撫僅照常行查且以為是否確實此尤謬之甚者江省吏治廢弛指名提犯尚恐其不肯認真今該撫轉為此游移未信

之詞顯導劣員以含糊了事之弊如此則案情何由得其肯綮正犯何能早就弋獲乎又如石匠朱殿臣蘇州即無其人亦當留心根究其說本始於湖州造橋即往彼嚴密訪查亦無不可乃輒以並無下落遂思塞責此等模稜之習實可痛恨著再將此嚴切飭諭知之○又諭昨據永德覆奏查辦翦辮匪犯各摺已於摺內批諭並即傳旨嚴切申飭詳悉訓誡矣翦辮惡匪現在延及數省而始事實

由於浙江因湖州造橋遂有石匠叫魂翦辮之說旋又盤獲僧人正一起凡等四犯并於巨成箱內搜出翦刀髮辮各物彼時若即切實根究擒拏為首要犯盡法懲治奸匪自聞風斂息何至滋蔓若此之甚總由該撫等於地方要務漠不關心一味沾染外省化大為小化有為無之惡習遇事惟思消弭以姑息因循為得計而不顧養癰貽患之弊其罪已無可逭若從此早知愧悔上緊力擒首夥要

犯務絕根株以安人心而肅法紀尚可稍贖前愆乃該撫至今猶欲迴護初時辦理不善之失則是取罪愈大況已往之咎欲蓋彌彰極力奮勉或可補救於將來倘仍文過遂非則罪譴斷難倖免永德可不急自猛省乎昨已降旨該撫將石匠吳東明郭廷秀及盤獲之匪僧正一起凡巨成靜心等四犯委派隔屬妥幹員弁嚴加鎖押速行解赴行在候審該撫務宜明飭該員等小心管押趲程馳解

若防閑稍不周密致中途有教供串供情弊及各犯有疎脫自戕之事是該撫之得罪更屬無可解免矣看來此案首犯不外石匠奸僧二種而蹤跡總不離浙江即如湖廣傳聞尚有造橋需用人髮之語并有石匠石和尚自己頂橋梁等語其說非盡荒唐無據該撫務宜嚴飭各屬實力查辦並派妥員協捕於石匠僧人內之形跡可疑者留心上緊躡緝如果能得有正犯根線重案由此廓清庶該

撫尚可藉以為晚蓋耳。又本日彰寶奏安省貴池縣拏獲做戲法之人逢魁先供出蘇州閭門外有石匠朱殿臣。囑伊在外割辦並給與黃紙符五十張等語。業經該撫飭屬查拏蘇州石匠內並無其人。蘇州與浙省毗連而他省所指地名亦不必盡合。湖州既有造橋之事或隱匿該處亦未可知。並著永德將朱殿臣一犯在浙省地面密訪嚴緝毋稍疎縱。尋奏臣先拏獲悟源悟圓二僧繼又獲通元

明遠二犯親訊尚無確供。石匠吳東明郭廷秀與匪僧正一超凡等於七月二十九日起解至朱殿臣一犯現嚴緝務獲報聞。○又諭曰永德奏浙省各府屬今歲霉雨未甚暢足河港水淺地勢稍高處所農民車灌不無多費工本且山田間有無水可引之處刻下望雨維殷現在祈禱等語所奏太遲該省既於五六月間雨澤稀少該撫即應據實及早入告乃直遲至七月初始行陳奏已為緩不及

事。雨暘水旱情形關係民生甚重該撫所司何事前此寧全不以為意乎著傳諭永德即行確查各屬短雨處所山田高阜是否成災有無應加賑卹之處及七月初曾否得有雨澤能否趕種雜糧各確情一併詳細繕摺速奏。尋奏浙省自七月初六以後各屬俱連得透雨田禾暢發惟於潛石門桐鄉三縣得雨畧遲將來收成較他處稍減然並不成災無庸賑卹亦無須補種得旨覽奏俱悉。○鑄給

浙江樂清縣磐石巡檢司印信從巡撫永德請也。○鑄給山西豐川營守備鈐記從巡撫蘇爾德請也。○己酉諭軍機大臣等據劉統勲等奏查辦割辦匪犯及近日京師情形一摺已於摺內批諭矣。蔡廷章自係案內要犯其事頗有端倪俟東省解到時即與布勒亨等彼此詳加質訊務得確情勿任稍有狡展其現獲之僧人照月既有髮辮留藏即可切實根究設法嚴審所供伊徒髮辮之語甚屬

荒唐。即其徒實有其人。伊曾為披剝。留此何用。況目下正當嚴查。割辦匪犯。伊豈無見聞。馬肯藏此無用之物。自露破綻乎。此等游供。乃失枝脫節之大者。正當從此反覆追詰。毋令抵飾。至所稱查拏嚴密。漸次潛蹤等語。未免有將就完事之意。匪犯蔓延各省。且敢於輦轂重地。肆行鬼蜮伎倆。豈可不實力嚴拏。務獲要犯。以申法紀。而靖人心。此時果能拏獲正犯數人。或匪徒畏懼斂跡。尚屬事理所有。今並未弋獲一犯。究出實在根線。奸徒何遽爾潛蹤。或係兵役因緝獲未得。造為此語。以圖卸責。切不可輕信。況以京城地面。分布三營。九門。八旗。官兵番役。巡緝匪人。如果晝夜上緊搜擒。匪黨何從匿跡。且奸徒敢於恣行街市。擾害良民。若竟一人不能就獲。如何完局。寧不有關爾等顏面乎。看來劉統勳等。辦理此案。稍有厭煩之意。此事所係甚大。斷不可畧嫌絮煩。倘厭事之心。一生諸事必從。

而懈怠。兵役等揣見意指。必致日就闌珊。正犯何由速獲乎。總宜耐性安心。毋躁毋倦。每日督飭密拏。不可稍形寬假。方得辦事關鍵。況近日熱河亦間有割辦之事。可見惡犯散布甚廣。安可不悉力偵捕。以淨根株乎。至普輝一犯。前因其曾受夾杖。故爾暫緩刑訊。乃審至於今。並未得一實供。必係奸僧見不復加刑。窺破爾等莫可如何。愈得逞其狡獪伎倆。此等惡僧。本無足惜。若始終不吐一字。即令其備受諸刑。或得其一二招語。更可按供根尋。若仍前茹刑堅執不吐。則是伊惡貫已盈。不得尚存姑息。即行奏聞。將伊罪惡昭布。於市曹正法。俾衆人共知割辦要犯。已服典刑。庶民心共得安帖。此亦就現在情形辦理之一法也。著將此傳諭知之。○又諭曰。薩載覆奏本年三月間。即聞蘇州有偷割髮辮之事。長洲縣民顧貞男被割髮辮。獲住流丐陳漢如等。解縣質審。元和縣流丐陳起龍等三。

人被鄉民沈八等查拏解縣。又吳縣有浙省遊僧淨莊等七人。亦被鄉民李二等盤獲送縣。均經各該縣先後釋放。復出示曉諭。毋許居民不察虛實。拴縛無辜之人。彼時高晉在蘇兼署撫篆。及彰寶到任後。俱曾言及此事等語。是此案實由江蘇辦理不善。以致養癰貽患。蔓延各省。已無可辭咎。民間既有割辦之事。且將匪犯擒獲送官。自應即行嚴訊窮追。迅速搜擒首犯。以淨根株。乃轉信其到案

游供。輒行縱釋。此等劣員。全不以地方民事為重。一味希圖消弭。實可痛恨。該督撫等既知有此等不認真辦事之劣員。即應早為糾參。以示懲儆。乃反視此輩為能事。曲與姑容。並出示曉諭。不許民間輕易拏人。是非全然倒置。無怪蘇州各屬之不能復破一案。復獲一犯也。外間化大為小。化有為無之習。各省皆所不免。而江南實為尤甚。高晉既習於闖冗。毫無振作。彰寶前任藩司日久。原不免沾

染積習。嗣在晉撫任內。諸事尚知奮勉。意其痼習已悛。乃自調任江蘇以來。故智復萌。遇此等大案。惟事模稜。塞責漫不經心。一任不肖屬員。隨同朦混。豈朕委任封疆之意乎。且前據高晉覆奏。春間曾飭府縣留心密訪。嗣據元和縣吳縣各稟稱。謠言之起。傳自杭州。細查本境。並無被割髮辮之事。又據彰寶覆奏。春間曾有浙省傳言。當即密行根問。弁差員弁密緝。四五月以前。俱稱並無被割受害

之人。亦無地方官詳稟發覺之案。各等語。是該督撫皆以為蘇州並無其事。今經薩載查奏。三月間。蘇州即有割辮獲犯送官者。共計三案。皆經地方官隨時釋放。該督撫近在同城。豈竟一無聞見。不將實情奏聞。抑明知各案俱已辦錯。至此時尚欲曲為迴護。覆奏時遂有心欺罔。如此居心。實不解伊等是何肺腑。高晉彰寶俱著傳旨嚴行申飭。並令其明白回奏。至蘇州民人所獲浙省游僧淨莊等

七人及流丐陳漢如並陳起龍等三人形跡實有可疑即當就此追尋根線著交與高晉彰寶即將已經釋放之淨莊等各犯盡行拏獲派委隔屬妥幹員弁解送行在候審如以為遠颺難獲或中途有教供串供及疎脫自戕等情弊惟該督撫是問若此各犯內有一名不獲或將並非原犯假捏頂充則是該督撫取罪愈大朕實不能復為曲貸也著將此傳諭高晉彰寶知之○大學士劉統勳等奏

審訊盧見曾寄頓貲財一案先後究出向與盧見曾認為師生之候補中書徐步雲伊戚翰林院侍讀學士紀昀并軍機處行走中書趙文哲軍機處行走郎中王昶漏洩通信應照例擬徒其刑部郎中黃駿昌信口傳說業經革職應毋庸議得旨徐步雲與盧見曾認為師生遇此等緊要案件敢於私通信息以致盧見曾豫行寄頓甚屬可惡著發往伊犁効力贖罪紀昀瞻顧親情擅行通信情罪亦

重著發往烏魯木齊効力贖罪餘依議○庚戌諭據高晉等奏本年黃河水勢交秋後屢次加長徐城各工經各道叅遊廳備隨時搶護平穩其豐碭廳南岸之徐家莊工尤險急隨挑挖倒勾引河開放水戩現今大溜順行勢已平定等語此次搶護險工辦理迅速甚合機宜現在河流順軌共慶安瀾自應特加優獎以示鼓勵所有在事之淮徐道吳嗣爵等文武各員弁均著交部議敘○又諭據吳

紹詩奏查出舒善管理關務將應解餘平銀八千四百餘兩私行提用請將舒善革職究審一摺舒善經朕加恩派令兩次管理關稅自應潔己奉公倍加奮勉乃將奏明應解之項私自侵用殊屬貪鄙不堪舒善著革職交吳紹詩與案內有名人犯一併嚴審究擬具奏○諭軍機大臣等託恩多英廉奏據管番役郎中金簡拏獲民人宋鬍子於該犯寓中起出謠言三紙又於內務府護軍老格街隣

四達子家中搜出謠言鈔帖並異蟲畫樣現在逐細研究等語已於摺內批示矣此次查拏奸匪金簡頗能盡心是以內務府番役皆奮勉查緝何以步軍統領衙門番役至今未見訪得一案弋獲一人向來該番役等於緝捕尚屬能事且人數較多散布各處並可會合三營兵弁一體協拏如果實力偵查豈有奸匪全無蹤影之理必係託恩多未能嚴切交辦上緊督催故伊等觀望因循不肯實心

出力如此則平日恭養若輩何為而步軍統領之責成又屬何事著傳諭託恩多即速嚴飭番役等各宜實力巡緝務得要犯以盡根株並不時設法督促賞罰嚴明無任仍前懈怠所有現獲各犯著與英廉會同劉統勲等詳細研鞫務取確實供詞尋蹤根究盡心懲治毋令狡展支吾希冀顛頊了事○又諭本日據高晉覆奏查審割辦人犯一摺所奏俱未可盡信如貴池縣拏獲逢魁先一犯前據

彰寶奏稱安徽省移咨供有蘇州石匠朱殿臣給伊符紙教令割辦等語當經降旨彰寶上緊查緝並以蘇州與浙省毗連且其事始自湖州因併令永德一體密訪嚴拏或可得其蹤線今高晉又稱該犯承供石匠朱殿臣實因刑訊妄供其實朱殿臣並非石匠即教授該犯做戲法之人已於二十五年病故等語是該犯前後兩供自相矛盾變詐百出則其平日習為奸詭情節顯然此等供詞俱難憑

信該督等仍當嚴加窮究務令吐露實情以便尋追緝匪不得任其譸張為幻此案根由本起於江浙江省春間當傳聞初起彼時若早能認真緝犯匪黨或可以次就獲乃地方劣員狃於化有事為無事之惡習惟思姑息了事縱惡養奸以致蔓延貽害江省實為罪首即以蘇州各案而論民人所獲流丐陳漢如陳起龍等四名及游僧淨莊等七名皆因實有被割之人是以送官究治該縣等自當

悉力嚴訊匪黨。逐一根究。豈匪犯一面游供。所足盡憑。即使贓證並無指實。形跡俱無可疑。亦當轉訊所送之民人。與此輩僧丐。有何宿嫌。並不妨細詰被獲各犯。與百姓有無仇隙。則曲直自分。何致是非倒置。倘實係百姓誣陷平民。即將原告治以應得之罪。小民亦無可怨尤。如此徹底根求。虛公剖斷。天下豈有難辦之事。總由不肖有司。豫存消弭粉飾之見。惟恐地方有事。累及考成。遇獲犯到官。

不問事理虛實。隨獲隨放。並禁民人擅捕。致匪犯益得肆行無忌。此等劣員。實為縱匪殃民之尤。在無知之上司。當時或未必不獎其能事。思之實可痛恨。昨已有旨詳悉嚴飭。並著高晉等明白回奏。並降旨令將前經釋放之流丐僧人等。一併解送行在聽候審訊。此內如有一名不獲。或將並非原犯。假捏頂充。及沿途或有教供串供。疎脫自戕等事。惟高晉彰實是問。著再傳諭高晉。即遵前旨速行。

妥辦。其有應獲應審之犯。務須上緊辦理。勿稍疎懈。○又諭前據阿里衮奏將認識緬字之人。派員送京。想不日到熱河。著傳諭劉統勳等於在京學習回字人員內。選擇記性聰明口齒伶俐者二人。送至熱河。豫備學習。○又諭曰。吳紹詩奏查出舒善管理關務。將餘平銀私行侵用一摺。已降旨將舒善革職。交與該撫嚴審究擬。並令託恩多等將伊在京家產查封矣。其任所貲財。並著傳諭吳紹

詩一併嚴行查抄。毋使稍有隱匿寄頓。○辛亥諭軍機大臣等。據馮鈐奏宿州拏獲之匪犯張四。經鳳陽府訊究。即係靳貫子供出之要犯張四儒。已解赴督臣究審等語。張四既即係張四儒。實為此案要犯。便可就該犯嚴加根究。務得首犯玉石蹤跡。以期速獲。但此等匪徒變詐百出。忽認忽翻。真情最難吐露。該督審訊時。不可徒事刑求。亦不得稍存姑息。務須設法根問。窮究確情。以便尋追緝匪。

如得有確實招詞。即一面按供查緝。一面具摺速奏。倘該犯狡獪游移。始終堅不實吐。即遴委妥幹員弁。將該犯嚴加鎖押。迅速解送。行在候審。併飭委員沿途嚴密防範。毋致稍有疎虞。○又諭曰。馮鈐奏在宿州地方。拏獲張四父子。搜有迷藥。辨尖。究出張四。即係靳貫子。供出之要犯。張四。儒。現經督臣飭提解往親審。一摺。所稱逢魁先各犯。飭發臬司認真根究辦理。殊屬非是。此等重案。既已獲犯。

該撫自當每日親審。務得真情。乃仍照尋常細故。委之臬司。沾染外省養安敦體惡習。全不知事理輕重。已於摺內批飭。其張四。儒父子並諭高晉。如不能訊得確供。即派委幹員。將該犯嚴行解送。行在審訊矣。此案要犯竄散安徽地方者甚多。該省雖經拏獲張四。儒父子二人。而玉石一犯。尤為首惡。現在並無下落。此外餘黨未經就獲者尚衆。馮鈐仍宜嚴飭各屬。並專派能事之文武員弁。奮勉查

緝。以期惡黨盡獲無遺。不得因擒捕一二夥匪。遂稍弛懈。再二月間。蘇州省城曾有百姓首告。翦辦流丐陳漢如。陳起龍等四人。及遊方僧淨莊等七人。俱經不肖州縣隨時輕縱釋放。昨已傳諭高晉。彰寶。令其拏獲解赴。行在候審。毋得走漏一名。在江蘇自應上緊拏解。但恐該犯等先期竄逸。潛匿安徽地面。亦未可定。該撫宜無分疆界一體協力搜查。不必拘泥姓名籍貫。凡有形蹟可疑之僧道流

丐鼠竊之徒。並須盡心盤詰。稍有蹤影。即徹底追尋。或可得要犯根線。以期弋獲。並當嚴諭所屬視同己身切務。設法躡緝。斷不可以事係隣省。稍存畛域之見。○又諭據彰寶奏接准東省來咨。內有蔡廷章供稱。本年二月十八日。同通元之徒怡安及吳元俱在揚州鈔關門外兩路口。吳勝飯店內。分路翦辦各情節。現在查緝鈔關門外兩路口。果有吳姓飯店名喚吳連。再四究詰。堅不實吐。已解赴

山東質訊等語。蔡廷章等犯前經降旨富尼漢令其派員解至行在審訊。嗣經劉統勳等查得京城有蔡廷章親友蹤跡。並諭劉統勳等即將該犯留京質訊明確。再行解送。昨據富尼漢奏已於本月二十一日將蔡廷章派員起解。此時吳連解至東省已無可質證。著傳諭富尼漢速將吳連一犯派委妥員解京。俟蔡廷章在京質訊明確後。即同該犯一併解至行在候審。並諭劉統勳等知之。○又諭

書錄卷五十五

五

本日據彰寶奏查拏割辦匪犯。獲有遊僧通元。淨涵並外來形跡可疑之僧人楊明。曉明。迅機等。一摺。已於摺內批示。此次所辦較前似稍認真。但此等奸匪狡詐百出。其存頓窟穴。斷非一處。藉貫名姓亦隨時變更。切不可稍存拘泥。致惡犯得以詭詞遁飾。如所獲通元。淨涵二犯。一與蔡廷章所供名字相同。一則帶有合藥器具。其為奸徒羽黨。形跡顯然。務須嚴切詰訊。設法研鞫。從此根尋蹤線。自

可得正犯下落。匪夥雖匿跡散布。不難以次就擒。至安東縣拏獲之劉五。所供沐陽縣開藥店之魏鬍子。教令翦辦一根許錢一百五十文等語。最為此案緊要關鍵。該犯肯出錢收買髮辦。何所需用。其中必別有邪謀。或即係該犯造意傳誘購買。或另有巨魁授令轉傳代售。不可不嚴切根究。實力搜擒。以殲匪黨而除民害。魏鬍子一犯該撫前摺辦理已嚴切飭諭令派妥員速往查拏。此時諒已緝

書錄卷五十五

五

獲到案。該撫務悉心窮究。期於必得實情。毋任稍涉支吾。又迷蹤跡。勉之慎之。其揚州開張飯店之吳連。據稱業經解交東省。與蔡廷章面質。但蔡廷章前已有旨令富尼漢解送行在候訊。今東省無可質對。現降旨交富尼漢將吳連一併解送行在矣。此案之始全由江省地方官意存消弭粉飾。縱匪貽害。其罪實無可逭。該撫等今日所奏查辦似畧知盡心。若從此極力搜緝。速獲要犯。或可稍贖前

愆。倘以現獲數犯。謂可暫時搪塞。復稍萌懈弛之心。則取咎愈大矣。無得僅以空言塞責。○又諭曰。伊勒圖奏。哈薩克阿布勒比斯呈稱。本年秋間。遣伊子卓勒齊入覲等語。昨阿布賚奏。請遣伊子來京。今阿布勒比斯亦呈請。秋間遣伊子卓勒齊前來。若令一同於年終到京。與衆回部伯克入宴。更覺妥協。著傳諭伊勒圖。俟卓勒齊等到伊犁時。令其一同起程。派員伴送。趕於十二月中旬後抵京。○

實錄卷八十五

五

又諭曰。伊勒圖奏。伊犁現無叅贊大臣。請於該處領隊大臣內簡派一員。協同辦事。綽克托曾辦各處事務。請即派伊等語。綽克托素性與衆不能和協。朕所深知。若授為叅贊大臣。協同辦事。伊勒圖轉致掣肘。且軍營始有叅贊領隊之別。今伊犁何須設耶。即如各省將軍。俱係與副都統辦事。並無叅贊。伊犁現設有領隊大臣。儘可公同商辦。不必另設叅贊。將此諭伊勒圖知之。○禮部議覆。御史吳

玉綸奏。稱房考閱卷例。應掣簽分經。查向來順天鄉試。每於十八房內。先擇官階優者。名曰領房。其餘始以次掣簽。實屬相沿舊習。請一體掣簽。毋得更立領房。又各房落卷。令主考照例盡數搜閱。有無取中。於奏報試竣摺內聲明。應如所請。從之。○兵部議。都統職銜烏什辦事大臣舒赫德。前辦理緬匪一事。輒以設法招致投誠。具摺密奏。甚屬乖謬。續經舒赫德自請從重治罪。奉旨交部嚴議。應將舒赫德革去都統職銜。并雲騎尉世職。得旨。舒赫德著革去雲騎尉世職。暫留都統職銜。俟伊回京之日。交該部提奏。○壬子。

實錄卷八十五

五

上奉
皇太后幸卷阿勝境。侍早晚膳。至甲寅皆如之。○賜扈從王公大臣及蒙古王公台吉等食。至甲寅皆如之。○諭。今年江浙地方。霽雨稀少。立秋後。尚有所雨之事。此數省水田居多。全賴雨澤霑足。方得及時蒔插。該督撫自應

早行入告。乃高晉彰寶馮鈴永德等俱遲至。立秋以後。七月初間。始行陳奏。已屬緩不及事。雨暘水旱。關係民生甚大。朕心深為厯念。督撫膺封疆重寄。所司何事。全不知仰體朕意。竟爾漫不關心。泄泄若此乎。高晉彰寶馮鈴永德俱著交部察議。○諭軍機大臣等。割辦匪犯一案。現飭各省實力嚴拏。雖間獲一二匪犯。而供詞狡展游移。於正犯蹤跡。總非實在。該督撫等不可不率屬悉心躡緝。務盡

實錄卷一百十五

五十三

根株。以安善良而靖奸宄。但此案查拏匪犯。尚屬治標之末務。而其根由。甚為叵測。不可不留心訪查。以杜逆跡。現在各省獲犯所供。多有出錢買辦之人。及究其買辦何用。又不肯供吐實情。看來造橋之說。既屬荒唐。不經而被割辦尖之人。多有將辦根全行剝去。其說不知傳自何人。而紛紛效尤若此。其中必另有包藏禍心之人。既傳授匪徒。四散割辦。又復私布割辦身死之謠言。恐嚇愚人。誘其

盡行剝去。安知其心。不以為留辦一事。係本朝制度。剝去髮辮。即非滿洲臣僕。暗為將來引惑之計。其奸謀詭譎。所關不小。實為法所必誅。然此等不軌之徒。大抵不在北省。而在南方。其人非係奸僧。即讀書失志之徒。潛蓄異謀。肆行煽惑。其罪惡浮於割辦匪徒。不啻什倍。江浙為此案發端之始。湖廣人心狡險。且素尚左道邪術。尤恐逆犯潛匿其間。著傳諭高晉定長彰寶馮鈴永德阿思哈富尼漢

實錄卷一百十五

五十四

實力留心設法查辦。稍有形跡。疑似即當徹底根求。務使陰謀不逞之犯。早正刑章。而除梟惡。但辦理此事。與查緝割辦匪犯不同。彼則當肆布兵役。合力協拏。此則當嚴密訪查。不露圭角。若稍有漏洩。恐奸惡聞風。避逸更難。搜尋根線矣。務在必得。毋託空言。勉之慎之。○又諭匪徒割辦一事。屢經傳諭。劉統勳等嚴切查拏。何以京城內外。迄今總未訪得一案。弋獲一人。今熱河被割者。亦有數人。可

見奸匪不但並未滅息。且有竄逸至此者。不可不迅速上緊飭拏。期早弋獲。至被割之人。縱一時為藥所迷。何能遽至殞命。即或用藥水洗滌。尚屬情理所有。若竟連辦根剃去。既於定制有違。且其法傳自何人。竟紛紛效尤。若此。現在各處所獲匪犯。據供俱有出錢買辦之人。及究其買辦何用。皆不肯吐露實情。恐其中必有奸惡不法之人。潛蓄逆謀。既令人四散偷割辦尖。又復散布謠言。誘人連根

實錄卷一百五

五十五

剃去。以為如此。即非滿洲臣僕。藉以煽惑人心。其情甚為叵測。除已密諭江浙湖廣督撫。嚴密訪查緝辦外。著傳諭劉統勳等。即行明白傳諭京城內外人等。嗣後如有被割辦尖之人。止許用藥水洗濯。不許全行剃辦。倘申禁之後。仍有犯者。即將本人及代為剃辦之人。一併查拏治罪。此事祇須令八旗三營官弁等。各按所管之地。詳悉口傳。不必出示曉諭。○又諭前經降旨。令方觀承嚴拏割辦匪

犯。距今半月有餘。並未據該督奏及曾否擒獲。翦辦要犯。並該省近日被割之人多少。亦未據奏聞。現在京城發覺割辦之案頗多。連日熱河被割者亦有四人。何以直隸獨無一犯案。或係州縣等遇有此事。不令聲張。亦不稟報。方觀承為其所朦蔽耳。著傳諭方觀承再行督飭所屬。及所派員弁。上緊嚴緝。務期早獲要犯。以除民害。不可稍涉疎懈。並將邇來直隸一省被割之案如何。及有無續獲匪

實錄卷一百五

五十六

犯情形。迅速據實覆奏。再如從前被割辦尖之孟士會等。即將髮辮全行剃去。以為剃去即可活命。其法又傳自何處。此必即係奸徒造作謠言。煽惑衆聽。其情甚為叵測。不可不嚴行禁止。並著方觀承通飭各屬。令地方官口諭百姓等。謂翦辦者。斷無致死之術。不可輕信妄言。擅將辮根剃去。如仍執迷不悟。一經查出。將本人及代為剃辦之人。一併究處。庶愚民知所感悟。亦破邪說而靖人心之一

端也。○又諭曰：馮鈐奏稱審訊宿州拏獲割辦匪犯張四及逢魁先二摺，係七月初九日拜發。在昨日由驛奏到七月二十一日所發各摺之前。此等要案，僅照常差員齎奏，可謂不知事體輕重。至張四供出徐州之趙三誘令入夥，給與迷藥，且令割辦一根，給錢五百文。及該犯問以要辦何用，而趙三答以不必細問等語。趙三既肯出錢買辦，即為此案要犯，自應迅速緝獲到案，訊究根由。此摺距昨

實錄卷八十五

五十五

由驛馳遞之摺，已十餘日。趙三曾否就獲？昨摺內何以並未提及？此人實此案緊要之犯。著高晉、馮鈐上緊擒拏，務在必得。若已聞風遠颺，必當尋蹤根緝。查張四所供趙三係湖廣人，或仍逃回本籍，亦未可定。並著傳諭定長，派委妥幹員弁一體實力搜捕，毋任免脫。仍將拏獲情形即速奏聞。○又諭：今日胡文伯奏到兩摺，止係循例謝恩及沿途兩水情形，並未將割辦匪犯現在如何設法緝拏及

有無弋獲之處奏及殊屬非是。藩臬大員准其專牘列奏者，原為地方要務，得以隨時入告，以備體察。且可知其人留心政務與否，並非專令其奏報晴雨收成及撫拾一二錢穀刑名事件。條列敷陳，便可為塞責也。今江蘇現有用藥迷人偷割髮辮之事，朕屢次降旨嚴切查辦。胡文伯豈有不知該省目下被割之案多少？若何匪犯有無就獲？及山東供出首夥各犯有無蹤跡？文武各官是否認真躡

實錄卷八十五

五十六

緝。地方應行辦理事件，孰有要於此者？且其赴任所經之直隸山東各省匪徒亦多有蔓延。胡文伯詎竟毫無聞見，何漠然絕不動念，竟無一語置論乎？可謂全不知事體輕重。胡文伯著傳旨申飭，所有緝匪一案亦著一體實心查辦。總之此事若果上下齊心併力，務在徹底搜擒，匪犯豈有不即就獲之理？胡文伯設以為緝犯非其專責，稍存推諉觀望之心，則是自取罪戾矣。將此傳諭知之。○又諭

據良卿奏報。拏獲自滇脫逃回籍之貴州餘丁蕭文斌及雲南逃兵朱章二人。業經遵例即行正法等語。滇省逃兵情罪可惡。屢經降旨。阿里衮等實力查拏。何以迄今。弋獲者尚屬寥寥。而該處軍營脫逃之兵。轉聽其竄入鄰省。始得就獲。可見滇省前此並未實力查辦。致該犯等得以遠颺。著再傳諭阿里衮等。務須上緊緝拏。毋再仍前疎縱。任其漏網。並將現在有無拏獲之處。隨摺奏聞。○癸丑諭

實錄卷八十五

五十九

據良卿奏。綏陽縣知縣單芸。派協普定縣馬匹。擅將應給雇值及恩賞銀兩。私向鄉約頭人取回。派令糧戶繳銀。代為買馬。餵養等語。單芸承辦軍需馬匹。輒敢將雇值及恩賞銀兩。侵欺肥橐。復派糧戶繳銀。情罪甚屬可惡。單芸著革職。拏問。交與該撫嚴審。定擬速奏。○諭軍機大臣等。本日據良卿奏。綏陽縣知縣單芸。擅將應發雇價及恩賞銀兩。於給發之後。私自取回。仍令糧戶繳銀。代買馬匹。

餵養。請旨革職。拏問一摺。已降旨將單芸革職。交該撫嚴審。定擬具奏矣。前以雲南用兵。所有京兵經過州縣。雖一切動用官帑。而豫備夫馬等項。恐不無稍資民力。是以特降恩旨。賞給銀兩。以示優恤。該縣單芸。乃敢取回肥橐。復行派累。繳銀代買馬匹。餵養。應差情罪甚屬可惡。更非尋常婪贓。毆法者可比。著該撫即行嚴加審訊。定擬速奏。趕入本年秋審情實。其漫無覺察之知府鄭廷望。俟審明。

實錄卷八十五

六

單芸定案奏到之日。再降諭旨。○甲寅諭軍機大臣等。據方觀承奏。本月二十日。復冒風寒。較前轉劇。現成瘧症。已於摺內批示。並賞給內廷治瘧藥四丸。方觀承前年已曾服過。即愈。今仍賜與。令其服餌靜養。以期速痊。至偷割髮辮一事。蔓延各處。深為閭閻之害。節經降旨。方觀承飭屬嚴切查拏。今該督現在患病。正須專心調攝。其精神自難照料。及此所有緝拏割辮匪犯。著專交觀音保。周元理。

二人上緊查辦地方此等緊要事件原係藩臬責任此時尤宜專心督緝務期奸匪及早就獲盡絕根株嗣後如有拏獲之犯該藩臬一面具摺馳奏一面嚴訊確供根究首惡搜拏黨羽無致一犯遠颺此外地方一切政事有應行承辦者該督病中諒亦未能照常經理並著觀音保周元理一體悉心妥協幫辦不得稍存歧視若查緝割辦匪犯稍不認真地方事務稍有貽誤並不責之方觀承惟該

實錄卷八十五

五十一

藩臬是問著傳諭方觀承即將此旨傳諭觀音保周元理知之該督服藥後病勢痊減若何即行奏聞以慰廑念○調正紅旗蒙古都統官保為正紅旗滿洲都統○乙卯諭步軍統領等衙門議駁御史陳鴻寶請禁添置會館一摺覈其情節似會館之設於事有益無損而自建造官房以來官員樂於賃居則民間房屋益無從逞其射利之伎何以該御史前稱置屋收租之戶轉益居奇其故殊不可

曉但該御史既經陳奏必當實有所見著留京辦事王大臣詢之陳鴻寶將各處會館如何干礙及添建官房如何民轉居奇之處從實明晰指陳若其言果於事理有當原未嘗不可酌覈採取也所有議駁原摺著暫留俟陳鴻寶覆奏到日再降諭旨○諭軍機大臣等據劉統勳等奏所有山東拏獲匪犯蔡廷章靳貫子二犯業經解送到京究其與僧人通元吳元如何結黨傳授翦辦邪術之事供

實錄卷八十五

五十二

認情節多涉含糊與東省原供不能脗合等語蔡廷章等為此案緊要人犯必須設法研鞫庶從此可以窮追根線搜尋羽黨切不可因其輾轉支吾遂稍生厭煩之見其供出各犯亦當徹底窮詰不得任其游移抵混遽爾顛項了事著傳諭劉統勳等務須詳細究審即該犯等一時不肯盡情供吐亦當平心耐性多方訊問使其無可遁飾以靖奸夥而除民害所有翦辦匪徒仍當嚴飭上緊查拏不

可稍為疎懈○又諭據鑲藍旗漢軍都統奏郭鵬翀之第三子明格在湖北襄陽縣病故又鑲藍旗滿洲都統奏陳元震之第二子六格在直隸邯鄲縣身死等語郭鵬翀陳元震之子俱係解部查辦要犯何以兩人同在途次身故其中恐不無別項情弊所屬地方官當時曾否查明呈報不可不徹底根究著傳諭各該督撫即派該管道員詳悉確查該犯身故時所在知縣曾否親往驗明身屍訊取

實錄卷一百一十五

三

是否因病身死及有無延醫調治各確情並曾否查訊原解人員有無抵換藏匿情節如查明實有確據即出具切實印結咨送部旗存案仍一面據實奏聞若其中或有情弊亦即據實查叅究治尋護理直隸總督布政使觀音保奏確查六格過邯鄲時委因病篤醫者不肯用藥身死該縣知縣親往驗明查訊解員並無換匿等弊湖廣總督定長等奏明格在襄陽病故時經該縣親往驗看取有醫

生解員供結並無捏飾換匿俱報聞○刑部議覆湖南巡撫方世雋奏稱秋審官犯及重案人犯每多監禁在省秋審時應由督撫率同在省司道會勘等語應如所奏但此等人犯亦有監禁在州縣者應令該道府親往詳鞠從之○是月兩江總督高晉江南河道總督李宏奏外河清口伏汎內黃水盛大清水未長間有一二分進口批此係汝等未收清口之病昨已降旨想未接到耳又稱交秋後

實錄卷一百一十五

十四

黃水又長當將清口東壩接築三丈止留口門十三丈得旨遲矣如此等事皆待朕諭則汝河臣所司何事○又奏東壩接築三丈後奉到批示即加鑲三丈現在口門僅寬十丈黃水倒漾之勢頓減得旨此等機宜當刻不可緩千里之外必待朕指示乎爾等所司何事○兩淮鹽政尤拔世奏淮南通泰二運判所屬二十二場自五六兩月以來場河淺涸引鹽船隻不能出場抵壩查淮北現有餘鹽

河流又暢請動項前往收買配運若旬日內雨透河通仍將淮南各場鹽飛輓過壩抵所不必赴買北鹽得旨嘉獎○浙江巡撫覺羅永德覆奏剿辦匪徒認真查辦浙省民情現今實在寧帖得旨汝但知汝浙省而不顧他省乎且即浙省寧帖之語亦未必非受人欺罔非實語也究之未獲一犯何謂認真速奏來○協辦大學士公副將軍署雲貴總督阿里衮雲南巡撫明德奏軍需馬騾現分撥各屬餵養至明歲七月大兵進剿之前須解送永昌查馬騾五六萬匹需料草必多臨期採買或致周章請乘今秋於永昌府屬及附近之大理蒙化順寧三府屬購買收貯備用得旨嘉獎○又奏滇省撥運軍糧動缺常平倉穀三十餘萬石亟宜籌補但買補倉穀每石例給銀五錢價殊不敷請照現在採買軍糧之例依時價購買得旨如所議行○明德又奏昆陽州之平定鄉六街子等村有田二千

實錄卷八十五

六十五

餘畝向資龍泉灌溉近日淤塞另於舊壩下老母標地方湧出流泉宜另築壩開溝以資汲引請借項興修按照得水田畝分作三年徵還得旨如所議行○貴州巡撫良卿奏黔省應募兵五千撥滇充伍今准滇省咨稱有空缺馬糧四百三十六名應即撥送查該兵等攜眷補伍不無需用擬每名借銀一兩咨明滇省於該兵應得馬糧內分季扣還每起派千把總一員管送凡撥滇充伍兵均照此辦理得旨嘉獎

實錄卷八十五

六十五

大清高宗法天隆運至誠先覺體元立極敷文
奮武孝慈神聖純皇帝實錄卷之八百十五

實錄卷八百十五

五十七

大清高宗法天隆運至誠先覺體元立極敷文
奮武孝慈神聖純皇帝實錄卷之八百十六

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履桂

總裁官經筵講官太子太傅文淵閣大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級尋常加二級軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆三十三年戊子八月丙辰朔諭據彰寶

等查出楊重英於監掣同知任內自乾隆十
九年至二十六年勒詐兩淮商衆贓銀至三
萬五千餘兩之多所有鹽政運使各有本身
應得之罪此案自當一併問擬至總督兼管
鹽務巡撫藩司亦有稽查通省屬員之責地
方既有如此貪婪狡詐恣意敗檢之員歷任
督撫藩司豈竟毫無聞見何以視同局外並
未據實叅奏若云鹽院之事不當過問則鹽
政衙門諸弊憑何稽察此非尋常失察可比

著將楊重英在任婪贓之歷年督撫藩司均交部逐一查明嚴加議處○諭軍機大臣等據彰寶等解到顧夢懷一犯並取具畫押供詞即交軍機大臣提訊據顧夢懷供經手銀十五萬餘兩俱係代商人置辦物件並無交與高恒收受情節與揚州所取之供全不相符詰其因何供詞互異情由則稱在揚州時承審之揚州府知府不准說是代辦物件勒令供稱繳進高恒署內等語此項銀兩至十

餘萬之多或係顧夢懷代商置辦物件或係高恒收受私用實為此案緊要關鍵承審之員自當虛公質訊務得實情以昭平允朕辦理庶務總惟覈實無使有絲毫遁情況高恒已有張文學供出自行收受之項足以定其罪案原不在贓數之多寡承審各官固不容其代為掩飾亦豈容其妄事深文楊魁等必欲授意勒供致實事轉成虛捏是誠何心若該上司因原奏有顧夢懷交銀高恒署內之

語後既審出情節原不妨據實更正承審各官又何必曲為迴護有意逢迎附會耶著將承審此案之楊魁等解任令其即赴行在聽候查訊所有顧夢懷供詞及開出總帳著寄交彰寶等傳集衆商詳細訊問如顧夢懷所供情節及所開帳目與當日原辦情形悉皆符合則無庸置問該撫等即行取供奏聞若衆商指出顧夢懷供詞不實伊等另有證據可憑即令總商等公議出二人隨楊魁等同

來與顧夢懷質對將此傳諭彰寶尤拔世知之○又諭兩淮提引一案高恒普福積年分肥貪蝕贓數累累而盧見曾亦查有令商代辦物件不行發價銀一萬六千餘兩已將伊革職解往嚴審究擬今復據彰寶等查出楊重英前在監掣同知任內勒索兩淮商衆至三萬五千餘兩之多業經降旨將歷任各督撫藩司交部嚴加議處矣至解任運司趙之璧該撫雖稱其並無與楊重英扶同結納代

為贍徇諸弊。但趙之璧以世受國恩之人。擢用運使。自當實力奮勉。絲毫不存欺飾。況運使與鹽政最為親近。而監掣同知又其正屬。高恒普福如此。侵蝕公帑數逾鉅萬。趙之璧豈得諉為不知。乃事前既不勸阻。事後又不據實具奏其罪。已無可追。而楊重英借端勒索商人。貪黷敗檢。若此。趙之璧又豈真毫無見聞。乃竟有心徇庇。不行舉發。尤當加以重譴。不得因其並無染指。僅從輕付之吏議也。

使伊亦如盧見曾之貪劣不法。已早將伊一體治罪。特念其尚無婪贓入己情罪。姑從寬典。著彰寶尤拔世。即傳諭趙之璧令其自行議罪具摺奏聞。○又諭前據馮鈐奏稱宿州拏獲割辦匪犯張四。經鳳陽府知府俞成究出。即係靳貫子。供出之要犯張四。儒已經解赴總督究審。而高晉亦稱伊現在徐州就近專差劉提張四。統俟到案嚴審明確。即行奏聞等語。該督撫等拜發前摺以來。距今又逾

旬日。所有訊問張四。儒夥黨蹤跡及首犯下落。自應得有端倪。何以至今並未將訊問確供。若何及現在如何追究查辦之處。續行具奏。該督前既專劄提犯親審。似有認真研究之意。不應經久不得一供。看來該督雖云親審。仍不過敷衍塞責。並未實心設法根究。即再遷延時日。亦未必能得有確情。著傳諭高晉。即將張四。儒一犯派委妥員解赴行在候訊。沿途務須嚴密管押。如有疎脫自戕等事。

惟高晉是問。○丁巳祭

先師孔子。遣大學士劉統勳行禮。○

上奉

皇太后幸卷阿勝境。侍早晚膳。至癸亥。皆如之。

○賜扈從王公大臣及蒙古王公台吉等食。至癸亥。皆如之。○纂修

玉牒告成。議敘總裁纂修各官。加級紀錄有差。

○兵部等部會議。兩廣總督李侍堯等奏覆。兵部議裁廣州將軍標兵弁案內。應否酌留。

一二營歸督提管轄行令臣等議奏查廣州係省會重地若將將軍標四營全裁兵額稍單應酌留兵千餘名撥歸撫標五百七十名廣州協八百二十五名撫標原設官弁足資管轄廣州協原設官弁除分駐外祇有副將帶同千總外委各一員駐省現在兵額既增應分為左右二營添設都司一員為中軍都司以原駐九江守備為左營守備原駐佛山都司為右營都司添設右營守備一員又添

設千總一員把總外委各四員分派左右二營均於將軍標裁弁調撥其都守各就舊署駐劄至將軍標現議撥出兵已將及半應將前後二營先裁其挑撥未盡兵勻歸左右二營兼管俟逐漸裁撥再行酌辦均應如所請從之○鑄給雲南分巡迤西兵備兼管水利道清軍驛傳鹽法分巡雲武二府兼管水利道分巡迤南兵備兼管水利道各關防從巡撫明德請也○戊午祭

大社

大稷遣誠親王允祕恭代行禮○諭據李侍堯奏廣西省上次揀發都司守備十員俱已陸續補用現在遇有缺出乏員委署請揀選都司四員守備六員來粵差遣委用等語著派留京辦事王大臣會同該部照例揀選發往前經降旨各督撫如有需簡發人員委用適當朕巡幸之時或在啟鑒以前或俟迴鑒之後具摺請簡以便帶領引見歷年以來各省

俱遵照辦理李侍堯等豈獨不知且啟鑒日期早經降有明旨外省又何難豫為計及而乃貿貿若是此次李侍堯請簡都司守備前次程燾亦奏請揀選佐雜均屬非是著傳旨申飭並將此通諭各督撫知之○又諭曰刑部侍郎四達差往山西有查辦事件著即行馳驛前往○諭軍機大臣等據都察院奏山西解州安邑縣生員張廷瑞告伊胞叔張如岩陰謀不軌邪言惑衆請勅下該撫嚴密查

辦一摺著派四達前往會同該撫蘇爾德至安邑縣地方嚴行搜查迅速究擬具奏如張廷瑞所供屬實則張如岩等喪心病狂罪大惡極即予以寸磔亦不足以蔽辜或係張廷瑞挾嫌誣控則捏造此等悖逆之詞即當加以反坐之罪但此等逆案恐地方官因起自本屬有礙考成不無迴護之見外省吏治惡習實是如此若僅交該撫查審恐未能徹底根求是以特派四達前往會同查辦該侍郎

奉到諭旨可即馳驛迅速前往山西嚴切審究務得實情不可稍存成見致案情畧涉游移四達即由京束裝前往不必赴熱河請訓至將來審結後一面具摺覆奏一面回京辦理秋審亦不必馳赴行在復命所有原呈一紙送詩二首並著封寄四達帶往會同該撫密辦不得令外人窺見所有原告之張廷瑞即著交四達帶往途中嚴密防範毋致疎虞○又諭據劉統勳等奏審訊山東解到割辦

匪犯蔡廷章靳貫子等供詞閃爍始終無一語確切現在設法研鞫務得實情等語此等奸惡匪徒不肯吐露真情希圖狡展但當耐心細鞫自可尋線根求期獲正犯即其隨口供報忽翻忽認亦寧信其有廣為傳聞逐一研求自然難以遁飾即使指稱被訊之人審無確據原可訊明省釋何致累及無辜劉統勳等切不可稍涉厭煩將就了事尤不可豫存外省獲犯未真之見任其狡賴迷蹤使欲

顛預完案也至日內京城內外被割髮辦之案多少若何及禁不許剃去辮根以後有無仍行全剃之人或私自剃去不敢聲張各情節摺內俱未奏及並著傳諭劉統勳等一併查明即行據實覆奏○已未遣官祭

關帝廟○諭軍機大臣等割辦匪犯一案節經降旨各督撫嚴切查拏究審近據各省奏覆就獲人犯供詞多半游移或其初似有端倪及追究又無影響如此豈能完局非各督

撫不肯耐煩親審。即係心存獲犯。未必盡真。任其支吾遁飾。皆非實心任事之道。若相率因循。正犯何時就獲耶。此等匪犯。但恐各屬不實力緝拏。不慮所獲之過當。况獲犯到案。督撫果皆親提細訊。其取供自較認真。搜捕亦易為力。此等緊要案件。傳訊多人。本不能必其皆實。即使指稱被訊之人。該督撫反覆推求。審無確據。原可隨時省釋。何慮累及無辜。斷不可因州縣獲犯未真。稍加申飭。叅劾。

州縣等平時委拏人犯。尚恐其具文塞責。若再加之嗔斥。必致仰承上司意指。顧畏考成。更不肯實力獲犯矣。總之此案。與其疎縱。毋寧認真。至其虛實。是非全在督撫等之實心研鞫。况州縣等服官知法。自不敢輕累平民。以為一時搪塞之計。但恐不肖胥役。藉端滋擾。誣陷良民。或有意勒索富戶。不可不嚴加懲治。總在各督撫留心督飭。實力查辦。無縱無擾。方足以除匪黨。而靖閭閻。著將此通諭。

各督撫知之。○又諭。據富尼漢奏。審訊拏獲割辦匪犯康懷仁。及割人衣襟之張王氏。俱無確據。張王氏現已病故。而供指各犯。自應仍行嚴緝等語。此等偷割襟褲之犯。一經報獲。該撫即應親提勘驗。如果賊跡相符。自無難追尋根線。而婦人衣襟。尤易辨識。第將顏色尺寸。一為比對。真偽立分。今此案張王氏筐內搜出衣角。與周介年婢女被割之襟。顏色尺寸。是否脗合。該撫查審時。曾否親行提

驗。若割痕相合。及色之深淺。襟之長短。布帛之麤密。俱比量無異。即為匪犯無疑。雖狡供亦不足憑。何得任其游移掩飾。致令病斃。或搜獲之衣角。與衣全不相類。則丐婦筐中零縑碎布。何所不有。又豈能盡指為贓。據該撫摺內並未敘及。可見當時訊問之疎。如此何能得事之肯綮。要犯復何從根緝耶。著富尼漢將原問各情節。即行據實覆奏。再永德奏業將緝獲通元一犯。並與吳元宇音相近之

悟源悟圓二僧押送東省與蔡廷章質對等語。蔡廷章現已解京。其浙省解送之通元等三人。解到東省時亦著富尼漢添派員役一併解送質訊。又該撫另摺所奏泗水縣拏獲之通果其供出被割之馮文興李永良二人既經查明姓名月日俱屬相同似覺畧有端緒亦著派委妥員解送行在候訊將此傳諭知之。○又諭據永德奏現在遣委妥員將拏獲之匪僧通元與悟源悟圓二僧押送東省

與蔡廷章等識認以辨真偽等語。蔡廷章一犯前經降旨令富尼漢解送行在候訊現已解京另有質審之處並諭富尼漢俟通元等解到時添派妥幹員役一併解送確訊矣至摺內所稱在嘉興北門外拏獲之僧人明遠與東省韓沛顯所供傳授邪術之首犯名字相同且已審出該僧曾經行竊為匪蹤跡自屬可疑韓沛顯一犯業經富尼漢奏明於七月二十七日起解其僧人明遠亦著永德一

併派委妥員解送行在候訊並飭委員沿途小心防範毋令免脫自戕倘僉差不慎以致途次稍有疎虞則當惟永德是問將此傳諭永德知之現在如有續獲要犯仍著即速具奏。○又諭前經降旨緬匪若遣人同楊重英前來即於賊前正法若止遣楊重英前來即行解京今思楊重英被擄受賊頂帶用白布纏頭並於同知任內查出與商人勾串婪贓之案業將伊妻子治罪家產籍沒此等情節

若令知覺必畏罪自戕著傳諭阿里衮明德楊重英到時妥解來京不得稍有洩露。○庚申遣官祭昭忠祠。○諭軍機大臣等昨富尼漢奏審訊偷割衣襟之丐婦張王氏等一案已傳諭詢問該撫曾否將衣襟親行提驗之處即據實覆奏矣今日楊錫紱奏到前案情節與富尼漢所奏大畧相同惟二和尚一犯該撫止稱李王氏供出藥係本莊二和尚所給及二和尚到案訊無給藥之事等語而楊

錫紱摺內。則稱張王氏亦有二和尚給藥供詞。兩丐婦所供相同。則二和尚。即係案內應行詳切根究之犯。該撫何以率聽其一面狡供。輒欲輕為開脫。摺內亦未將張王氏供情敘入。殊不可解。今張王氏雖經病斃。李王氏尚存。何難親提質訊。著富尼漢即將二和尚細心反覆研鞫。並與李王氏當面質對。如所指全無影響。及訪查該僧平日果無為匪情事。即詰之李王氏。因何混供。如實係隨口妄

扳。毫無確據。則當另究根線。若二和尚稍涉可疑。即應徹底根究。毋任游移狡展。將此傳諭富尼漢知之。尋奏。張王氏等解到時。委員先審。張王氏本有二和尚給藥供詞。但忽認忽翻。總無確據。訊以割襟。堅不承認。臣正在親訊間。適張王氏病故。查驗被割衣角顏色分寸雖符。但翦口曲折彎環。似非倉猝間所辦。嚴訊二和尚。實係鄉間務農。訪查平日並無為匪情事。其給與迷藥一節。毫無影響。質

之李王氏亦自認妄扳報聞。刑部等部議覆。廣西提督許成麟奏請重懲兵丁脫逃。並嚴定營員稽查疎忽處分。臣等酌議嗣後兵丁脫逃。該營立移各標協營一體查拏。定限一百日務獲。有於限內投回者。仍照舊例枷責外。若被緝獲或逾限投回者。並於面上刺逃兵二字。至綠營挑募兵丁。如將別營犯法逃兵混收入伍。查出將失察之員降一級留任從之。○欽差給事中素爾訥山東巡撫富

尼漢奏查審候補主事王碩呈控黃縣知縣涂祖瀾索規拉贏等事。涂祖瀾不能約束書役藉端需索。復任贏戶藉差拉產。請交部議處。王碩呈報丁憂未敘。親生嫡繼字樣經縣指駁。令家奴唐英頂覆。復控府控司。經批飭審訊。又令家奴匿不到案。亦請交部議處。唐英業經責懲。應免重科。得旨。如此則鄉紳之風必熾。而地方官不能管理矣。涂祖瀾無罪。王碩著交部嚴加議處。惡奴應發烏魯木齊

○以原任廣西右江鎮總兵蘇學讓為福建汀州鎮總兵。○辛酉諭曰雲南迤南道龔士模普洱府知府唐庚衡思茅同知黑光寧洱縣知縣張軾先經該督撫等奏請陞署陞補均已降旨准行。但題陞人員例須送部引見後申報到任日期。方准扣算俸次。今思迤南等四缺均係烟瘴邊地例准三年報滿而龔士模等因現在辦理軍務未得先行引見不能與尋常題陞引見人員一體算俸未足以

示鼓勵。所有業經奏請陞署迤南道之龔士模陞補普洱府知府之唐庚衡思茅同知黑光寧洱縣知縣張軾均著先行申報到任。即准其扣算俸次。俟軍務告竣後再行給咨送部引見。○諭軍機大臣等近聞河南直隸一帶偷翦髮辮者頗多。其風並未盡熄。直隸省已據方觀承奏節據各州縣稟報。共有十七起。現已拏獲面生可疑僧道人等三起。而阿思哈自緝獲奸僧海印之後並未見該撫續

獲一犯。且昨於覆奏審訊海印摺內稱該省近日亦無被翦髮辮之人與朕所聞迥不相符。非該撫心存化大為小。化有為無之見。即係受不肖屬員欺朦而不自知此等惡匪蔓延各處。即宜及早弋獲。以安善良。並恐其中不無深謀遠慮。包藏禍心之人。是以節經降旨令該督撫等嚴加查緝。俾首惡羽黨悉皆敗露就獲。毋任潛蹤漏網。何該撫漫不經心。并不據實入告耶。著傳諭阿思哈務須嚴飭

所屬上緊搜捕。不得稍存懈怠。○順天鄉試以工部尚書兼管順天府府尹裘曰修。順天府府尹蔣元益為監臨官。兵部尚書陸宗楷為正考官。左副都御史景福為副考官。○壬戌貴州巡撫良卿疏報黃平清鎮普安湄潭綏陽天柱婺川銅仁等八州縣乾隆三十二年分開墾額內額外田土坡地四百十六畝有奇。○癸亥山西巡撫蘇爾德疏報鄉寧縣乾隆三十二年分開墾沙石旱地十畝。○甲

子。

太宗文皇帝忌辰遣官祭

昭陵○諭曰富虎著來京扎隆阿著前往雅爾在領隊大臣上行走○諭軍機大臣等方觀承奏保安州盤獲匪犯梁萬明供出孫嘉謀等造作逆詞意欲重興邪教現飭周元理前往查拏餘孽等語此等邪教久經重懲嚴禁今孫嘉謀等復敢倡為逆詞煽惑愚民甚屬可惡著周元理即將案內應行訊究各犯迅速嚴拏親行押赴行在聽候審訊沿途小心防範毋致稍有疎虞並將此傳諭方觀承知之○又諭據劉統勲奏審訊翦辮人犯韓沛顯供有江南海州茅山寺僧人普敬等又供普敬等係東光縣僧人等語自應迅速行文各該督撫飛提各犯解京與韓沛顯對質以便躡跡緝匪至根究傳播謠言詢有得自張家口孫德隆之語本日方觀承奏到保安州現在盤獲逆犯孫顯富等造作逆詞意欲重

興邪教業經降旨臬司周元理緝犯解送行在候審看來宣化既現有邪教之案而謠言又傳自該處或割辮首犯在彼潛匿煽惑同惡相濟均未可知雖翦辮案情自南而北但奸徒詭秘竄逸靡常不可不細加體察以期得實著傳諭劉統勲等將現在人犯即行詳悉研訊務究確情迅速具奏至摺內所稱該犯等供詞狡展忽翻忽認始終未有確供匪徒奸詐百出豈肯遽吐實情自當細心設法

詳究尋問根求務使不能掩飾其所供人犯亦寧信其有飛調詳鞠以便躡跡搜擒早除民害仍將審訊情形及近日京城內外被割髮辮之案較前多少並有無續獲切實要犯之處一併詳晰奏覆○又諭曰馮鈐奏江西副考官馮晉祚家人朱常被割髮辮請將該管之署潛山縣知縣章大官革職協緝等語所辦甚屬非是已於摺內批飭矣此等匪犯蔓延各省擾害閭閻地方官如不實力上緊

查緝將來完案時自應查明嚴加叅處此時尚不必遽行糾劾轉使不肖州縣甘棄一官希圖卸責至於被割案件地方官或匿飾不報必須查出統俟結案併叅若因呈報一案即將該管官特叅則有司必皆自顧考成率以並無犯案之語捏飾朦混該督撫又徇於化有為無之惡習不加體察此後即有犯案尚誰肯呈報又何由盡力查拏使首惡各犯悉皆就獲盡絕根株耶馮鈐如此辦理實為

全不解事所有署潛山縣知縣章大佑無庸革職仍嚴飭該員將剪辮正犯刻日拏獲以觀後效至所稱被割髮辮之人現在拘留查辦亦甚無謂若被割之人悉皆拘訊則是未緝匪犯先累良民有是理乎馮鈐著傳旨嚴行申飭○又諭前據阿思哈奏豫省已無割辮之事朕即知所言不實隨於摺內批飭乃該撫於奉到硃批後即稱洛陽孟津禹州各處稟報被割髮辮者共有九人可見前奏之

有意掩飾果不出朕所料封疆大吏於地方此等要案不能實力查辦已負委任而所奏又復不實直是敢於欺罔則不惟前奏全不可信即現在所謂加緊搜拏不敢稍有懈弛之語亦皆係空言塞責似此筆墨文飾伎倆豈能於朕前朦混乎阿思哈平日尚屬實心任事之人不意其亦染外省摸稜惡習可惡至於如此至辦理此案以來屢經降旨各督撫令由驛六百里馳奏乃阿思哈今日之摺

仍照常遣人齎進該撫何視此等嚴緝要犯之案竟與尋常事件無異可謂全不知事體輕重矣又另摺所奏入場監臨一節更不解事巡撫監臨鄉試不過常例相沿今該省現有應辦緝匪要案即應奏明交布政使入場代理乃惟知拘泥成例竟欲諉緝犯重事於不問是誠何心阿思哈著傳旨嚴行申飭至近日該處情形若何曾否續獲要犯仍著迅速馳奏尋奏近日偃師宜陽嵩縣三處被割

辦者七人分路嚴緝。據南陽祥符等縣獲有僧人通惠廣成二名。盡心推鞠。並無端倪。得旨仍屬空言。何稱汝盡心乎。又諭。緝賊若遣人同楊重英前來。阿里衮等不必拘泥前旨。於賊前正法。著派幹員與所遣之人一併解京。將此傳諭阿里衮知之。吏部議覆。兩廣總督李侍堯等奏稱。叅革前任化州知州焦紹祖。虧空庫銀倉穀。審擬情實在監。自應將化州知州呼延華國。署化州吏目韓培

基革職嚴審。高州府知府張若燠。按察使富勒渾。降一級留任。兩廣總督李侍堯。廣東巡撫鍾音。罰俸一年。得旨。李侍堯、鍾音俱著罰俸一年。富勒渾著降一級留任。此案焦紹祖係虧空庫銀倉穀情實。官犯在獄自戕。非尋常監斃人犯可比。部議照例將化州知州呼延華國。僅擬革職。高州府知府張若燠。擬以降一級留任。尚未允協。臬司雖係刑名總匯。但通省州縣甚多。其勢自難徧及。至知府乃

親臨上司。所屬既有監候緊要官犯。並不嚴飭該州加意防閑。致令自縊。其玩慢曠職咎無可逭。豈可與臬司同科。此而不予以重處。則官官相護。將來必有縱放而報以監斃者矣。至知州於監禁官犯。是其專責。乃竟任其畏罪投繯。安知無徇情故縱情弊。革職不足蔽辜。張若燠著革職。呼延華國著革職。等因。交該督等與吏目韓培基一併嚴審具奏。著為例。○乙丑諭軍機大臣等。偷割髮辮一案。

屢降諭旨。各督撫嚴切查拏。迄今多日。總未見奏報。弋獲真犯。即間有拏獲。訊供亦多屬游移。狡混。昨昌平州民人張二首告關德麟偷翦髮辮。當即諭令軍機大臣遣派司員前往昌平州提至行在。交軍機大臣詳細研鞠。乃係張二因關德麟向索舊欠錢文。扶嫌誣陷。將婦人亂髮編就辮尖。栽害種種情形。供吐如繪。業將張二從重問擬絞候。關德麟等即時分別發落省釋矣。因思此案蔓延數省。

匪徒奸詐百出。各督撫遇有發覺案情。自當迅速擒獲。嚴切辦理。若訊明實係他人挾嫌栽害。即當將被誣之人立時省釋。其有心誣控之犯。情節可惡者。亦照此案問擬。如此真偽分明。不但詭黠之徒共知儆畏。不敢誣陷良民。而偽者既除。不致復有捏混真犯。更無難就獲於緝匪安良。均屬有益。但不可因有此誣捏之案。遂心存游移。於躡緝割辦匪徒。稍有怠玩。俾正犯得以漏網。可將此傳諭方

觀承及各督撫知之。○丙寅

太祖高皇帝忌辰遣官祭

福陵。○諭軍機大臣等。前永德奏據桐鄉縣查出在九華山進香之吳元一犯。雖經地方官訊非匪黨。未敢輕信。現在提到省城。細心親審等語。吳元既與東省蔡廷章供出匪犯名姓相同。自應即速審訊。以辨真偽。乃該撫前摺稱提犯細心親審。迄今已逾多日。尚未見將作何審訊。曾否得供之處。具摺奏聞。所謂

細心者何在。看來該撫等此次奉旨查拏奸匪。不過於覆奏摺內掉弄筆墨。希圖塞責了事。究不能實心實力上緊躡緝。則正犯安能尅期就獲。著傳諭永德。即將現在審訊吳元是否即係東省供出之犯。及目下有無續獲真實匪黨之處。迅速馳奏。尋奏親審吳元實非正犯。至目下尚無真實匪黨就獲。得旨覽尚無頭緒。所謂盡心者何在。益增憤懣耳。○又諭曰。吳壇奏查拏匪犯數起。現在虛衷研

訊等語。各屬獲犯或名姓相同。或形跡詭異。或書籍誕妄。俱應詳悉審訊。務得確情。以便追尋首黨要犯。淨絕根株。但各省所獲匪犯。到案大率狡飾支吾。即有供出人名住址者。又多係荒唐無據。此非奸徒譸張為幻。即屬問官煅鍊成招。兩者皆不足信。似此浮光掠影。真犯何由就獲。重案何由清結。耶該按察使為司員時。於查審事件。頗為諳習。今審究此案。務須實力擔承。平心推鞠。使奸徒底裏

畢露毫無遁情。切勿專事刑求。轉致迷蹤延誤。至所稱各屬報獲無籍之人。查無不法憑據。而來去蹤跡不甚明白者。俱令暫羈公所。等語。所辦尚未妥協。此等人犯一經拏獲。應即立時詳晰訊問。如實有形跡可疑之處。自當亟究根緣。俾要犯迅即就擒。若審明確係無辜。即應急為省釋。以免拖累。豈可無故羈留。至審釋之案。如被獲時或止係旁人心疑。妄指其原首及拏送之人。自可置之不問。如

審有扶嫌害情事。則是有心捏陷。與尋常誣告不同。又當照昨所辦密雲縣張二一案。從重問擬。如此真偽分明。不但詭黠之徒。共知儆畏。不敢設心誣害平民。而偽者既除。不致復有捏混。真犯更無難就獲。但不可偏於慎重。致緝匪之事。畏首畏尾。迄無一獲。則又因噎廢食。更非實心任事之道矣。總之查拏此等匪犯。與其疎脫因循。毋寧認真盤詰。惟在審問時。虛心察訊。使涇渭不致混淆。毋縱

毋枉庶足以靖奸邪而安良善。將此傳諭吳壇知之。○湖北巡撫程燾奏宜城縣典史孟衍孔倉差不慎致遣犯脫逃。照例咨部斥革。仍留該地方協緝。宜城縣知縣溫頤瞻。徇捏詳。應請革職。得旨。這所參溫頤著革職。典史孟衍孔於查點起解要犯。並不實力確查。一任差役當堂頂替。輾轉雇代。致遣犯中途脫逃。又復捏飾具稟。情殊可惡。非尋常倉差不慎者可比。孟衍孔著革職。拏問餘著議奏。○

丁卯秋分夕

月於西郊遣恒親王弘旺行禮○

上奉

皇太后幸卷阿勝境。侍早晚膳。至庚午皆如之。○賜扈從王公大臣及蒙古王公台吉等宴。至庚午皆如之。○諭軍機大臣等。今歲春間有匪徒用藥迷人。偷割髮辮。並截取婦女衣服之事。漸次延及山東河南直隸數省。屢諭各該督撫上緊查拏。所獲各犯。非信口游供。

即畏刑妄指總未得有實在根線七月間京城地面被割者頗多近日熱河亦間有犯者兵役等四路搜拏至今正犯尚未就獲看來此等匪徒形蹤詭秘必不能久匿一處地界按各處所犯情由自屬以次蔓延山西陝西與直隸河南接壤或奸徒因京城及直隸查拏嚴緊畏懼潛逃知山陝尚未查辦就近竄入亦未可定著傳諭蘇爾德明山如該省亦有被割之案切勿隱諱務即飭派官弁悉力

搜拏迅得要犯即現在尚無犯案亦當一體留心飭屬嚴加訪緝毋稍疎懈○又諭曰彰寶奏查緝割辦匪犯各情節一摺已於摺內批示所有劉五一犯前後供詞閃爍其狡獪情形於匪案似覺相近自當詳悉根究令其無可遁飾至曾住賴榆三教堂之僧人長欽既聞風竄避必係畏罪情虛應即速提犯親審及早根尋首夥各犯蹤跡上緊擒拏又臬司吳壇所獲各犯形跡俱有可疑昨據奏到

已諭該按察使平心研鞠務得實供該撫於查辦提引完案後仍即回蘇督同審訊至山東咨拏通果供出各僧其同然一名雖經馮鈐提訊但馮鈐現在入關監臨該撫可即親提查審其餘尚未就獲之犯並須加緊緝拏即或非所屬地界亦當一體躡緝普天莫非王土封疆大臣辦國家公事當善體此意實心任事止期於公務有益勿稍存畛域之見該撫此次所奏諸事較前畧知認真若能如

此實力搜捕研求無稍厭煩懈怠正犯自可期迅就弋獲勉之慎之○又諭曰吳紹詩奏訊據九江關關書聶乘南等供出前任監督海福三十一年報解銀內有豫提三十二年首季銀二萬七千兩當時有無弊竇請就近詢問海福等語著交與劉統勲託恩多英廉即傳諭海福詳加詢問從前因何豫提此項銀兩是否止係那移抑或另有弊竇務得實在情形即行覆奏吳紹詩原摺並鈔寄閱看

○又諭曰。程燾題奏遣犯中途脫逃一案。僅將典史孟衍孔。照常咨革。辦理殊未允協。已降旨將孟衍孔革職。等因。該縣溫順。因事公出。所有僉派差役。即係該典史專責。孟衍孔點解人犯時。一任差役當堂頂替。並不實力稽查。致幫役李朝虞等。輾轉雇替。輒於中途私開鐵鐐。要犯竟得全行脫逃。該典史復又捏飾具稟。其情罪甚屬可惡。自應革職。等因。以示懲儆。該撫僅請將孟衍孔咨革協緝。殊未得情法之平。程燾著傳旨申飭。所有雇替及疎縱之人。仍著嚴審定擬具奏。○又諭曰。瑚圖靈阿等奏。恰克圖通商一事。業將理藩院議定十三條。行知俄羅斯廓密薩爾。廓密薩爾一一欽遵。辦理等語。俄羅斯既知遵照章程。著准其通商。其由內地前往貿易人等。交理藩院辦理。遣往。○命雲南臨元鎮總兵本進忠。在乾清門行走。○戊辰

萬壽節遣官祭

太廟後殿○遣官祭

福陵

昭陵

昭西陵

孝陵

孝東陵

景陵

泰陵○遣官祭

孝賢皇后陵○遣官祭

顯佑宮

東嶽廟

城隍廟○

上詣

皇太后行宮行禮○御澹泊敬誠殿。扈從王公

大臣官員及蒙古王公台吉等行慶賀禮。

已已諭曰。方觀承現在患病。著派御醫羅衡

馳驛前往診視。○諭軍機大臣等。本日薩載

奏稱。聞寶山縣獲有僧人文秀。及昭文縣獲

有僧人吳元等二案。俱經解臬司吳壇審訊等語。前據吳壇覆奏該處割辦情形所敘昭文縣拏獲僧人吳元等一案止稱該僧收藏印花騙人已屬不法。現在嚴加確審與薩載所稱吳元曾與通元明遠二僧認識叫令割辦後因約定同往山東不從被明遠打落牙齒一個通元明遠已往別處各情節不相符合。若果如薩載所奏則吳元既與山東供出之犯名字相同實為此案緊要關鍵正可從此根究首夥惡匪蹤跡以期速獲著傳諭吳壇即行悉心審究務得確情其實山縣拏獲僧人文秀之處吳壇前摺亦未奏及是否該臬司拜摺之後復經續獲抑係遺漏聲敘並著交吳壇研訊根求仍將獲犯情由及審出各犯供詞一併覆奏尋奏薩載所稱吳元情節當昭文縣拏獲該犯時本有此供及臣等再三研鞠實係受刑誣認其實山縣拏獲文秀一案係臣於前次拜摺後續經拏獲審無

割辦確據報聞○吏部等部議覆江西巡撫吳紹詩湖北巡撫程燾會奏湖北蘄州所轄小江口距該州遠隔一百八十里與江西德化縣毗連應改歸德化其該地歲徵屯糧田土雖在小江口而屯丁散處隔屬德化縣不能熟悉應仍歸蘄州衛歲科考試軍籍子弟有應試者另編軍籍取入府學應如所請從之○庚午諭曰方觀承患病頗劇昨已遣醫診視即迅能向愈調理亦需時日畿輔事務緊要所有總督印務著楊廷璋前往暫行署理

大清高宗法天隆運至誠先覺體元立極敷文
奮武孝慈神聖純皇帝實錄卷之八百十六

實錄卷八百十六

三

大清高宗法天隆運至誠先覺體元立極敷文
奮武孝慈神聖純皇帝實錄卷之八百十七

監修總裁官經筵講官太子太傅文淵閣大學士文淵閣領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領侍衛內大臣稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級尋常加二級軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆三十三年戊子八月辛未

實錄卷八百十七

十

上詣

皇太后行宮問安○自避暑山莊啟鑾幸木蘭

諭曰良卿奏貴州省司庫備貯銀兩節經

動支應付請再酌撥濟用等語該省為赴滇

孔道一切需用較多而節次撥解雲南軍需

甚屬寬裕著即於解滇銀兩經過黔省時就

近截留五十萬兩備貯充用該部即遵諭行

○諭軍機大臣等據馮鈐奏拏獲東省審訊

匪僧通果所供之夥犯自然悟澄二名解赴

徐州交該督審訊等語。前據富尼漢摺奏，拏獲匪僧通果業，經批諭令其解京聽候審訊。續據該撫奏報，已於本月初八日押解起程。所有安徽拏獲之自然悟澄二犯，著傳諭高晉即速遴委要員解京，交與大學士劉統勳等併案研鞫。仍飭委員沿途小心防範，毋令該犯免脫自戕。○以四川夔州協副將喀木齊布為建昌鎮總兵。○是日，駐蹕中關行宮。○壬申，直隸總督方觀承遺疏聞，諭曰：方觀承老成歷練，任直隸總督兼理河務二十年來，奉職恪勤，方資倚任。昨該督至石槽迎鑾，見其病後氣弱，即令回任安心靜養。繼因其患瘧增劇，特賜經驗藥丸，並遣醫診視。以冀速痊。今聞溘逝，朕心深為軫惜。所有應得卹典，該部察例具奏。○諭軍機大臣等：瑚圖靈阿等奏與俄羅斯廓密薩爾會議通商一摺，已降旨允行矣。此次通商，特因俄羅斯恭順誠切，一切遵奉章程，是以俯准所請。瑚圖靈

阿等當妥協辦理。從前俄羅斯漸欲增稅，亦因內地商人圖利私增價值之故，以致停止貿易。今復行通商，毋得仍蹈故轍。著傳諭瑚圖靈阿等明白曉示商眾，如有前項情弊，嚴查治罪。即勒保所帶回人，亦令與商人一體貿易，不得以官價爭買。再索琳在恰克圖年久派留，保往前往更換，留保住未到任以前一切事宜，仍交索琳辦理。○以刑部尚書楊廷璋為直隸總督，調工部尚書裘曰修為刑部尚書。以刑部右侍郎蔡新為工部尚書，左副都御史張若淮為刑部右侍郎。○命禮部右侍郎倪承寬提督順天學政。○是日，駐蹕波羅河屯行宮。○癸酉，上遣侍衛雲保赴避暑山莊。皇太后行宮問安。○遣官祭賢良祠。○軍機大臣等議奏據閩浙總督崔應階議覆大學士陳宏謀條奏裁汰戰船一摺：福建省擬裁船三十九，改船一十一。浙江省擬裁船五十五。

改船一十五共裁改船一百二十隻其雇覓民船渡載班兵之議查臺郡米穀全賴民船販運若再令渡載班兵恐誤販糶應毋庸議至修造請仍舊歸道府會辦均應如所奏從之○是日駐蹕張三營行宮○甲戌

上行圍○諭雲南普洱鎮總兵員缺緊要著阿里衮等於通省總兵內揀選一員調補○諭軍機大臣等李侍堯奏暹羅國情形各摺朕初閱其奏聞該國貢使丕雅嵩統呵沛回船

至粵詢問暹羅殘破一事所言殊未明晰又另摺稱遊擊許全奉差在洋患病身故之處亦恐非確情隨於摺內批示及閱至查明覆奏一摺並麥森呈稟莫士麟呈文其事敘述已明許全之死亦無疑義而欲將甘恩勅請封原文擲還嚴飭來人陳美之處所見甚是但辦理尚未能盡合甘恩勅本係內地微賤之人飄流海徼為其夷目與暹羅國王誼屬君臣今彼國破王亡乃敢乘其危亂不復顧

念故主恩誼求其後裔復國報仇輒思自立並欲妄希封勅以為雄長左券實為越理犯分之事若僅將原文擲還或來人陳美回國時不將該督嚴飭之語逐一轉告無以懾服外邦自應給以回文申明大義俾知天朝禮教廣被褒貶一秉大公此等負恩僭竊之人必不肯稍為假借庶奸回有所儆懼而島夷共凜德威但恐該督處措詞未能盡協因令軍機大臣代擬諭稿寄交李侍堯按式行文

付陳美齋回諭示其河仙鎮目莫士麟既將該國形勢繪圖呈送而暹羅國王之孫逃居該境又為安頓留養頗知禮義亦應諭以數行稍示嘉獎已一併令軍機大臣擬就寄發至前諭令查訪暹羅情形如彼有志恢復欲求中國援助或可酌調水師以期一舉兩得原屬備而不用之說今暹羅既遭花肚番侵掠難夷口食不充其所屬祿坤等三府又與甘恩勅稱兵內訌勢已孱弱無餘自顧且不

暇又安能復圖釋怨匪番。所有取道海洋一說竟可不復置議。將此傳諭李侍堯知之。外寄軍機大臣代擬李侍堯諭稿二。諭暹羅國夷目甘恩勅曰。爾遣陳美來粵。齎投該夷目呈文。懇請

天朝封勅。於理不順。暹羅國王越在海嶠。世恪職貢。

大皇帝嘉其恭順。歷

賜褒封。今海被花肚番。侵擾焚掠。國破身亡。爾

既為其夷目。誼屬君臣。目擊爾主遭此鞠山。

即應堅秉忠貞。志圖恢復。以期殄仇雪恥。即

或因殘破之後。夷衆流離艱食。孱弱不支。勢

難驟振。即當求爾主族裔。扶戴復國。以續爾

故主宗祧。則暹羅衆僚目。孰不推爾匡翊忠

勛。共相欽服。即爾嗣王繼立。奏告

天朝。自必欽爾功績。

大皇帝聞之。亦必深為嘉予。況聞爾與烏肚汶

仔。連麻勒殺得勝。又入山搜尋象牙犀角等

物。給贍難民。是爾之才幹。頗為可取。今爾主庶兄詔王吉孫詔萃詔世昌。現皆避難潛居。境內爾不思與衆頭目。擇立擁戴。垂名不朽。乃竟乘其危亂。鴟張自立。并欲妄希封號。僭竊稱王。似此干名犯分。蔑禮負恩。不祥孰大。反之於心。豈能自安。且爾本係內地民人。必知大義。豈不聞中國名教。於亂臣賊子。不少假借乎。即為爾計。挾世祿。祿坤高烈三府。因爾欲雄長其地。共切同仇。與爾稱兵相拒。彼則名正言順。爾則逆理悖倫。

天道助順。惡逆勝負之勢。較然。豈可自貽伊戚乎。

大皇帝撫有夷夏。惟以仁育義正。表率萬方。如爾所陳情節。深乖法紀。不可以據詞入告。仍擲交陳美齋還本部。堂典守封疆。職在宣布中朝德化。矜爾愚迷。特為剴切申諭。爾如翻然改悔。效忠爾主。仰體

聖朝興滅繼絕之經。自可永受

大皇帝無疆福庇慎毋怙終自誤特諭又諭河仙鎮目莫士麟曰爾僻處海疆心知向化因聞

天朝查詢暹羅情事即將海外各夷地形勢繪圖具文差夷官林義等齎投甚屬恭順業經據情奏聞

大皇帝鑒爾之誠深為優獎又聞爾於暹羅國王之孫詔萃逃入境內即為安養資生頗知禮義亦屬可嘉令特給爾回文并賞緞匹用

示

恩意爾其敬承之特諭○又諭曰阿里衮等奏查辦逃兵一摺伊等前此辦理實屬姑息已於摺內批示矣滇省逃兵情罪可惡屢經諭令上緊查拏正法以昭炯戒乃阿里衮等所奏逃兵三百三十七名尚係前任督撫查出而現在弋獲止得十分之一為數已屬寥寥至木邦錫箔等處臨陣逃避者甚多何以僅訊出五十餘名其餘又復何往可見伊等一

平定縣志卷之七

六

一

平定縣志卷之七

六

十

味姑息養奸並未實心查辦著再傳諭阿里衮等嗣後務須嚴飭員弁即速實力查拏毋令稍有漏網至另摺所奏前次新街等處患病兵丁齎有官給印票回營者原可毋庸辦理其實在怯懦逃竄兵丁斷不可曲為寬貸將此傳諭阿里衮等知之○又諭曰阿里衮等奏緬匪頭目苗溫遣擺夷至遮放土司探信彼此遞送夷字一摺所辦尚合機宜但閱譯出緬文有聽得天朝差四位大人來永是

否准其投誠之語未必不因舒赫德前次欲差人招致遂有此訛傳可見緬匪不時探聽內地動靜而沿邊一帶亦不無透漏傳播之事防守隘口最關緊要屢經降旨阿里衮等將各處要隘嚴密稽查毋令奸民夷衆潛行偷越該督等亦節次奏稱嚴禁販貨出口并定官弁失察處分立法似為周密何以內地之事緬匪尚得聽聞恐所為慎密邊防仍屬具文塞責此後務須隨時申警實力稽查毋

任稍有疎懈再緬文內有九土司與八土司如同一家彼此結親之語尤不可不嚴切申禁八土司久歸王化本不應與匪屬相通或僅聽其與木邦等處夷人音問往來令其隨時稟報藉以得緬匪信息未為不可若任其私連姻婭恐內外土司不免有勾通交結之事於邊備夷情甚有關係著傳諭阿里衮等明切曉諭各該土司務令各奉法守分承受天朝德化不許私締姻好致干譴責如緬匪

高宗實錄卷八十七

十

有人前來探信即據實飛稟不得擅行答覆自取罪愆至李進朝探得木邦遣人至遮放土司即首先申報尚屬可嘉著量加獎賞以示鼓勵其夷人多萬福不即具報予以責懲所辦尚是但夷人情性不常惟當恩威並用庶可以得其心且知畏法若一味過於嚴厲恐夷衆聞風畏懼轉為緬匪所用著將此詳悉傳諭知之○又諭曰阿里衮等奏請裁改雲南營制一摺經軍機大臣會同該部議覆

尚有未當之處此摺現在亦不應發鈔已另交阿桂於赴滇時會同妥協商辦矣滇省綠營兵丁懦劣不堪實難望其振作豈可復令虛糜軍餉遇有缺出亦豈可復挑此輩子弟承充此裁汰滇兵本意也至滿洲兵丁在滇者皆需糧餉若不通盤籌畫無以節經費而裕軍儲且與其養滇營無用之卒曷若裁彼名糧贍我八旗勁旅自屬挹注良法但阿里衮等辦理此事須令滇兵知因伊等頑怯無能特裁扣以示懲儆庶使裁存之兵稍知愧懼至以曠缺錢糧充京兵軍餉本係密行籌辦之事切不可稍涉形迹致無知之徒妄議此舉為節省起見則非所以肅軍紀而懲惡習矣至於滇省九鎮本屬過多自應量為裁改但現在正議厚集兵力進剿逆匪若遽行明裁鎮缺與目下情事不甚相合而不議裁改則不敷應汰兵數此時惟當默為調劑遇有應裁之總兵缺出或暫以副參委署是不

高宗實錄卷八十七

十

必明裁而隱已改鎮為協則不動聲色而措置裕如矣。至如摺內所稱久道化成邊氓樂業並非現在實事。鋪張過當之語。朕所不欲居故議摺不令交發。其一切事宜俟阿桂赴滇時詳悉面諭會商妥辦。所有現出普洱鎮總兵員缺已降旨令阿里衮揀選一員調補。如所調適係應裁之鎮即於副將內揀選一員奏聞暫署亦不必聲敘將來裁改之意。著將此傳諭阿里衮等知之。○又諭據阿里衮

書錄奉旨

上

明德議奏本年瘴氣消時派兵防守各隘並令領隊大臣分管等語。龍陵騰越派兵之處應如所奏其普洱思茅一路距永昌較遠阿里衮等不能兼顧著令永瑞五福統轄遇有應奏事件一面具奏一面咨報阿里衮。緬寧一路亦屬要隘著派本達忠前往領兵駐守。再前發往之甘肅厄魯特兵三百餘名實為健銳著分給滿洲大臣駐劄地方設卡防守與滿洲兵一體調用鼓勵著傳諭阿里衮明

德知之。○是日駐蹕阿貴圖大營。○乙亥上遣侍衛奎林赴避暑山莊

皇太后行宮問安。○行圍。○諭昨降旨令扎隆阿前往雅爾。更換富虎來京。富虎不勝副都統之任著革去副都統在健銳營前鋒叅領上行走。○以陝西慶陽協副將馬虎為湖北襄陽鎮總兵。○是日駐蹕海拉蘇台大營。○丙子

書錄奉旨

上

上行圍。○諭曰鄂寶查奏梅立本按試各屬較前任學政通計多用夫七百名又粵西各屬每棚另有捐項銀六十兩為書役飯食現在酌籌閒款另行妥議等語。梅立本鄙陋不堪任意濫取擅作威福逼死縣令已於另案治罪。至於學政按試衡文原應輕騎減從不可絲毫擾累地方。即例有按臨伺候夫馬之說祇為護送勅印及必應隨帶之文卷官物而設為數亦屬無多且各省學政原與養廉其隨帶之行李及攜行之幕友家人所用夫馬

理應自備豈可借卷箱之名濫行需索若一切應用夫馬仍取給有司則各省督撫等養廉甚厚豈遇有公事巡行各屬亦皆令屬員供應夫馬耶梅立本在粵西如此各省情形雖未必盡同或亦有如梅立本之濫用夫馬者各督撫未免存官官相護之見不肯查辦縱容日久遂致積習相沿因有梅立本需索逼命之事此風斷不可長著通諭各督撫查明各該學政按試時有無擅用驛馬多少若

平定縣志

市

何及似梅立本之多用人夫者或間有自行雇覓之處並各學政養廉若干現在情形若何即行據實具奏到日再降諭旨至於學政書役等各有例給工食其飯食豈可令所至地方官捐備亦屬非體並令該督撫一併查明覆奏○又諭曰那旺此次往哈薩克辦事妥協著加恩補授副都統前往伊犁更換勒克○諭軍機大臣等永瑞五福現領兵駐普洱九龍江等處防守要隘賊匪知我不即進

兵必來偵探倘敢侵犯邊界永瑞等即宜領兵勦殺賊衆敗走量力追趕不可輕進若賊匪不敢前來可仍防守再普洱九龍江一帶究係何項賊匪或已歸順緬賊亦應察訪明白以便辦理若來乞降即收納以分賊勢著傳諭永瑞五福留心妥辦並諭阿里衮明德知之○禮部等部議覆陝甘總督吳達善疏稱大通衛改縣以後額取文章二名並無撥府亦未設立廩增查大通未改縣以前取進

平定縣志

市

文章撥歸西寧府學府學增廩各四十名原准其考補今改隸縣學而府學廩增並未減額大通取進又不撥府應將西寧府學廩增額內各撥二名歸大通縣學作缺六年一貢其廩糧一併移支應如所請從之○浙江巡撫覺羅永德疏報象山太平龍游永嘉松陽等五縣乾隆三十二年分開墾田地山塘二十七頃四十四畝有奇○是日駐蹕呼魯蘇台大營○丁丑

上行圍○諭軍機大臣等據定長等奏拏獲川省逃兵楊坤一名已經照例正法究出同逃之周成韓寧金印均係四川營兵等語此次征勦緬匪派出綠旗兵丁竟敢脫逃遠匿情罪甚屬可惡屢經降旨各督撫上緊緝拏正法而所護甚屬寥寥昨良卿曾奏拏獲滇省逃兵今川省逃兵復在湖廣被獲必係此等竄匿之犯恐本省易於識認不敢回至原籍因而逃避隣省希冀漏網不可不一體查拏以肅法紀著傳諭阿爾泰定長良卿程燾方世雋等嚴飭所屬選派妥幹人役留心盤詰躡緝不拘何省逃兵即行捕獲治罪斷不可稍存畛域之見其本案未獲之周成等三名並著一併查拏仍各將獲犯情形隨時具奏○又諭各省查拏割辦匪犯迄今已逾多日雖間有獲犯訊供總屬游移無據本日蘇爾德奏到山西被割之案亦復不少而近日京城及直隸各處較前稍為缺迹是匪犯實由

熱河及宣化一路竄入晉省已無可疑前既自南而北今復由北而西以次蔓延而經過犯案之處亦以次稍熄看來奸徒黨羽究竟不過數十人分投輾轉竄逸查拏稍緊則畏避遠颺遂至急切不能掩捕但方其偷割髮辮時雖在幽僻無人之處為耳目所不及而沿途行走勢不能不飲食住宿豈有不稍露行藏如果於城鄉各處歇店寺院挨查嚴密斷無不得其蹤跡之理乃各省至今均未獲一真實要犯則平日之所謂編查保甲全屬虛應故事更可槩見至京城及直隸被割髮辮之人多有將辮根自行剃去云即可以解迷藥之毒而不剃者亦竟無恙如京城直隸前已諭令各該管官嚴切口傳諭衆不許復剃辮根如有犯者並將為之剃髮之人一併治罪近亦不敢復犯可見此語本自無稽其法傳自何人亦無可考必係奸徒造作邪說誘惑愚民則此等散布匪徒特其所驅使而

非首惡是必另有包藏禍心之人陰圖不軌。妄希變壞國家定制以逞其逆謀。實為可惡。其事既始於江浙。則巨魁巢穴。仍不外此兩省。前已諭令各督撫留心密緝。今亦未見查有端倪。著再傳諭直隸山東河南江南浙江湖廣各督撫。並須實力實心督飭各屬上緊躡緝。毋得僅以虛文塞責。務期奸黨逆渠。早就戈獲。以除泉惡。而靖人心。仍將近日辦理情形。並要犯有無緝獲之處。迅速奏聞。○是

日駐蹕準烏拉岱大營。翼日如之。○戊寅。

世宗憲皇帝忌辰。遣官祭。

泰陵。○諭軍機大臣等。蘇爾德奏。山西省於七八兩月。屢有被割髮辮情事。緣未拏獲匪犯。是以尚未入奏等語。所辦實大不是。迴出情理之外。業於摺內嚴切批飭矣。此等匪犯。肆布黨羽。擾害閭閻。為大吏者。一有見聞。即當上緊擒拏。據實入告。況此案實始於江浙。今春蘇州被割之案頗多。皆因地方官徂於化

小化無之惡習。不肯實力查辦。以致匪犯蔓延數省。貽累各處。是江蘇大吏實為此案罪魁。其時正係蘇爾德藩司任內。蘇爾德在江蘇最久。漸染惡派。錮蔽尤深。遇此等奸匪害民之案。竟視為泛常。思欲朦混了事。匿不上聞。其罪已無可恕。今加恩擢任巡撫。理應痛改前愆。力圖報効。乃復踵其故智。怙惡不悛。該省半月以來。犯案累累。竟不即行舉奏。經朕降旨切諭。始草草聲敘。藉圖塞責。如此居心行事。豈得謂尚有人心乎。是其福分淺薄。不能受朕恩眷。將來通案完結。必統覈伊貽誤之處。重加治罪。此時如能猛省悔悟。上緊力擒首夥要犯。或可稍贖前愆。若再不知儆。覺仍然玩懈支飾。則是自速罪戾。朕實不能復為曲貸也。蘇爾德著傳諭嚴行申飭。現在曾否拏獲匪犯。及有無續被割辮之人。著即速據實具奏。○又諭前因偷割髮辮一事。延及各省。恐山西陝西與直隸河南接壤。奸徒

未免畏緝竄匿境內業經諭令蘇爾德明山一體留心查緝今蘇爾德奏到山西七八月間土默特地方及臨汾洪洞安邑等縣均有被割髮辮之人經朕詢問始行奏及甚屬非是此案始自江浙今春蘇州犯案頗多正係蘇爾德藩司任內之事乃伊沾染江南朦混惡習錮蔽已深遇此等重案輒思消釋了事匿不上聞今為巡撫仍踵其故智實是毫無人心將來完案時必當重治其罪已傳旨嚴切申飭矣但此案自南而北以次蔓延今復自北而西而京師直隸等處其風稍熄是奸徒懼拏竄避已無可疑然緝於既犯之後或難以追蹤莫若防於未犯之前豫為邀截鬼域自無從匿跡現既延至山西而河南亦有與陝省毗連之處勢必將復自陝而甘不可不豫為防範著傳諭吳達善明山令其選派妥幹員役弁兵並嚴飭所屬於豫晉入陝及陝省入甘一切必經之官塘小路及山谷僻

徑俱令四散密躡凡大小歇店及寺觀廟宇如有外來形跡可疑之人投宿借住有類割髮匪徒者立即盤詰查拏審究如此截其去路奸徒庶不致輾轉遠颺該督撫等務視為切要重務實力查辦不得稍事因循玩飾僅以具文塞責尋奏陝西無被割髮之人甘肅並無傳言其事者報聞○己卯

上行圍諭內外大臣中有奉職恪勤及敷歷宣勞者宜晉宮銜以示優眷吏部尚書託恩多戶部尚書于敏中閩浙總督崔應階俱加太子太保兵部尚書託庸直隸總督楊廷璋俱加太子少保吏部等部議覆兩江總督高晉等疏稱泰州裁東臺同知州判巡檢改設東臺縣知縣縣丞典史並以泰州訓導改隸分縣應鑄給縣印縣丞關防縣學訓導條記至養廉俸銀知縣於現裁同知廉俸內抵給縣丞典史於現裁州判巡檢廉俸內抵給泰州額進文章二十五名應分撥縣十二名

武童十五名分撥縣七名。廩增各三十缺分撥縣各十缺。縣三年一貢。常平倉應貯穀二萬石。社倉設社長經理。漕倉即以泰州鳳倉收貯。城垣勘明另建。同知衙署改為知縣衙署。巡檢衙署改為縣丞衙署。其典史訓導衙署並倉庫學宮購地建造。俱應如所請。從之。

○浙江巡撫覺羅承德疏報仁和餘杭臨海寧海龍游樂清烏程平陽等八縣。乾隆三十二年分開墾額外田地池蕩二百十九頃十六畝有奇。○補行乾隆三十二年分直隸省軍政卓異官八員。罷軟官一員。年老官一員。有疾官二員。浮躁官一員。分別議敘處分如例。○豁免奉天運京遭風漂沒豆一千四百五十石。○豁免雲南運銅因風沉溺銅四萬三千八百八十九觔。○旌表守正捐軀之直隸邢臺縣民李安行妻董氏。逼嫁捐軀之山西崞縣民韓伏蘭妻李氏。○是日駐蹕都穆達烏拉岱大營。○庚辰。

上行圓。○遣官祭黑龍潭。

昭靈沛澤龍王之神玉泉山。

惠濟慈佑龍王之神。○諭曰。崔應階奏浙省標營於應製馬鎗四百四桿之外。經前督蘇昌請將其餘步鎗兵丁一萬二千餘名。全行製給馬鎗。嗣因動項過多。復減半製造。均經部議准行。現在已未完工者共五千七百餘桿。需銀一萬七千餘兩。實屬糜費。請撥給閩省馬上鎗兵外。並查閩浙二省駐防滿兵馬鎗廢壞。撥補備用一摺。自應如此辦理。前經阿思哈奏請各省於步兵內挑能馬鎗者充補馬兵十分之二。各省自應俟選定馬鎗後。按照定數製給。豈有全省步兵概為製械。以備學習之理。況閩浙同一總督所隸。閩省既如此辦理。浙省何獨互異。前督蘇昌妄請全給之處。殊不可解。必係該省不肖將弁。希圖冒銷。從中慫恿。蘇昌受其愚弄。遂爾濫行申請。該部亦不據情理權衡。率行准覆。均屬錯誤。

謬此項濫費銀兩。即著於蘇昌家屬名下。及原議准造步兵馬鎗之兵部堂官按數分賠。並著該堂官明白回奏。其浙省所造馬鎗。是否實數。及有無浮冒之處。並著崔應階查明辦理。至各省承辦此事如何。製給馬鎗。亦有似浙省之糜帑濫造與否。著各該督撫。即行查明據實覆奏。諭軍機大臣等。前因江浙等省有偷割髮辮之事。當即傳諭各該督撫留心躡緝。務盡根株。節據山東直隸河南湖

廣山西等省。先後奏報。各有犯案。而所獲匪徒。類皆游移狡展。並無確切供詞。雖所在嚴密訪拏。究竟不得正犯蹤影。因思此案根由。起於江浙。蔓延各省。始則自南而北。今復自北而西。而彼一省有犯。此一省即覺稍戢。看來匪黨雖屬散布。其實不過數十人。往來窺逸。但割辮時。或在偏僻無人之處。難以就獲。而途間斷無不飲食住宿之理。豈能不稍露形迹。皆由各省編查保甲。有名無實。故匪犯

得以肆行罔忌。至各省所獲之犯。大都游僧乞丐。為多。此輩固易涉人疑。自不能捨而不問。但奸徒詭詐百出。安知不飾為尋常過客。在路安行。掩人耳目。亦不可不留意稽查。第其間真偽易淆。設措施稍不合宜。又恐擾及行旅。惟在各督撫嚴飭所屬。妥實查辦。毋縱毋苛。即盤獲僧丐等衆。不但不可輕事刑求。並不得濫行鎖禁。惟於到官時。立即虛衷細訊。如果有可疑情狀。自當設法研鞫。逐一根

求。否則即為省釋。毋許久羈。時日致誤營生。則緝匪之中。自不致有累民之事。然此尚屬治標末務。此等割辮匪犯。究非造意之人。即以各處所犯而論。既不害人命。又不圖人財。其意何取。而各處所錄供詞。並有出錢買辮之人。及究其買辮何用。又復毫無指實。且彼割辮者。多有將辮根全行剃去。妄謂如此。即不致傷生。近經傳諭禁止。並欲將全剃之人。及代為剃髮者一體治罪。其風始熄。而不

剝亦竟無恙可見其說本屬荒唐此等無稽流言其始轉自何人何至轉相仿倣是其中必有包藏禍心之人既分布黨羽在外偷割又造作謠言四散播傳藉以盡惑愚民墮其狡計豫為引誘之地其奸謀巨測實乃罪不容誅又安知其不以此等擾害閭閻之事官法所在自然嚴切查拏民間必互相驚恐不得帖寧或致激而生變彼則從旁逞願且並思隱乘其勢煽眾跳梁圖作不靖亦未可定

尤不可不早杜其萌然若因此畏首畏尾將緝匪之事遽爾中止則是因噎廢食而奸徒輾轉滋擾竟令其倖逃憲網於法於情均無可以自解方今綱紀肅清之時豈宜出此督撫等具有天良朕言及此而尚不憬然省惕共勵悲忱為國家實力妥辦此事是則人心盡泯尚能靦然為封疆大臣乎若督撫等果能將所獲之犯盡心審究細察真偽分別是非實者徹底根尋務窮黨惡虛者立時釋放

毋稍株連其有設心誣陷波累無辜者即加重問擬或奸胥蠹役藉端索詐富戶荼毒平民者察出立置重典是正所以為民除害何慮滋生事端設或辦理不善致窮簷不能安堵畧有怨咨惟於該督撫是問至於蓄謀作俑之巨魁大抵不離江浙二省非係奸僧肆惡即屬讀書失志之人其心甚險而其跡甚秘非特太湖跨連數郡波濤山叢及他處遠谷深巖遠洲小島可為鼠輩窩巢即幽僻村

居荒廢菴宇亦未嘗不可聚匪容奸務須嚴密偵尋勿致罣漏使逆渠及早就擒庶可以靖人心而申國法此一節固責成江浙大吏其餘各督撫等亦當一體訪緝無令鬼域得以遁跡他方始不失公忠體國之道其現在已經破案各省於緝匪自不容玩懈即間有風聞省分亦不可因其僅係訛傳輒存大意並不可令不肖有司希圖化有為無隱諱朦蔽雖遠如雲貴川廣近如盛京吉林亦不可

不知此事。並當早為究心。豫行防緝。如此四面攔截。奸匪方不致逃匿稽誅。此案始能完結。各宜努力。毋自干咎。將此通行傳諭知之。○又諭據崔應階奏本年六月間。傳聞有奸匪潛入閩省割辦之語。即飭屬訪查。總無確據。四處盤詰。亦無蹤影等語。此案始自江浙蔓延數省。屢經降旨嚴密查拏。迄今未得真實要犯。閩省與浙省毗連。恐奸徒潛行竄入。亦未可定。既有此傳聞之語。其事不為無因。

或各該屬亦有被割髮辦之案。因未獲犯。遂欲朦混了事。該督切不可輕信屬員稟覆。執謂毫無蹤跡。務須嚴飭所屬。上緊緝捕。不可稍存疎懈之見。即使現在果無其事。而匪犯形蹤靡定。四處遁逃。安能保其必不潛入閩境。若豫為防截。於入閩路徑。密行盤詰。未嘗不可。因此獲犯。至浙省亦該督所轄地方。尚來總督原有赴浙巡查之例。該督到任後。尚未前往。況此案起自浙江。其鬼域行徑。必有

陰謀不軌之徒。從中主使。已令通諭各該督撫。嚴密查拏。而在浙江則搜尋尤宜盡力。永德初任封疆。自不及該督之歷練。著傳諭崔應階。以巡查所屬為名。即赴浙省留心體察。如太湖連跨數郡。最易藏奸。而浙東之溫台各郡。山深林雜。人心險惡者多。即如去歲台州之逆犯齊周華。其大較也。該督若遇有此等可疑形跡。即設法訪拏。務期匪黨逆渠。均不能倖逃法網。至閩省山海交錯。人情奸悍。

亦恐有逆徒匿跡其中。並當一體實力察緝。將此傳諭知之。是日駐蹕已顏布爾噶蘇台大營。○辛巳。

上行圍。○諭軍機大臣等。據阿里衮明德等奏。現在永昌設局。辦理軍需奏銷。款項繁多。滇省書吏。類皆不能辦事。請於甘肅布政司書吏內。擇其熟諳軍需者四五名。並將一切應准銷定例。鈔錄數冊。覈對清楚。鈐蓋總督藩司印信。釘封發交該書吏等攜帶來滇等語。

甘省書吏歷年銷算西北軍需於一切款項皆所熟悉若調赴雲南辦事自較優於本省之人著交與吳達善於奉到諭旨後即速在藩司書吏內選擇熟諳奏銷者四五人攜帶檔冊馳驛迅赴滇省聽該督撫等撥用至此項書吏到滇後一切衣食盤費等項該省自必從厚給與若果能辦事奮勉將款項一一清楚並令奏明給與議敘錄用以示鼓勵該督並不妨告之該書吏等俾各知踴躍於辦

公更有裨益著將此傳諭吳達善知之○是

日駐蹕巴顏溝大營○壬午

上行圍○是日駐蹕墨爾根烏里雅蘇台大營

○癸未

上行圍○諭本日據湖廣永州鎮總兵顧鉉奏到兩摺一由六百里馳遞一則竟用八百里飛遞朕謂必係地方非常緊要事件及閱奏摺不過緝獲傳布謠言及割辦匪犯之事此等匪徒蔓延數省文武官弁緝有正犯自宜

星速馳奏但由驛六百里已足迅速若八百里郵符本不經見何得妄行填用駭人聽聞且先後止隔一日該鎮有何迫不及待而連發兩報又較常加緊滋擾郵傳可謂全不知事理輕重如此冒昧糊塗於統轄營伍尚安望其措置合宜耶顧鉉著交部嚴加議處○諭軍機大臣等現在秋審將次進呈招冊仍須於行在辦理勾到一二次劉統勳在京現有查審事件起程不必過早可仍照去歲之

期前抵熱河將此傳諭知之○又諭據永州鎮總兵顧鉉馳奏於祁陽縣拏獲傳布謠言之李彩玉等七犯又於寧遠縣城外盤獲割辦匪犯鄔文才等五名等語此案惡匪蔓延數省雖各處皆有弋獲人犯但未得有實在根線今該處獲犯兩起一則傳貼詭異字樣一則攜有符書藥包湖南向習符水邪術與匪犯形跡較為相近自當從此究出頭緒著傳諭方世儒即將解到各犯逐一研鞫如有

應行根緝之犯即速就近查拏並令定長會同設法詳訊務得正犯實供毋稍任其狡展並當由此根尋造謀巨魁以靖逆跡再山東省獲犯通景曾供有湖廣僧人同夥之事昨據程燾奏稱現在赴各地方查捕可見楚省奸黨實與各處通連為惡或即係伊等傳授亦未可知務須平心耐性訊其與山東等省匪黨交結確據以便窮追如該犯一味游供不肯遽行吐實即將該犯等管押解京令與

山東解京各犯質對至湖南既有此等匪徒在彼散布謠言則湖北境內亦不能保無潛蹤滋事之人該督撫等並應上緊嚴密查拏毋使要犯倖逃法網今顧鉉二摺一用六百里一則竟用八百里飛遞如此張皇失措可謂全不知事體輕重已有旨交部嚴加議處觀此舉動則其平日所為大槩可知著定長將該鎮居官如何之處據實奏覆又其初次奏函內有叩賀天喜一摺更不解其何意並

著該督問明顧鉉一併具奏○又諭前經吳紹詩奏舒善管理關務將應解餘平銀八千四百餘兩私行提用已降旨將舒善革職交該撫嚴行審訊今據伊齡阿奏稱舒善應交各項庫銀內共短少一萬五千餘兩業經署監督瑯琦稟明撫臣查辦等語看來舒善竟大不妥吳紹詩查審此案曾否訊明舒善種種情弊因何狼藉若此至伊齡阿所稱舒善豫提銀兩與該撫前奏數目不符著將原摺

鈔寄吳紹詩查覈嚴審定擬又伊齡阿另摺奏景德鎮瓷器廠向存有歷任大小樣器八千四百餘件上年二月間經舒善調取存貯現在向彼查取舒善覆以業經進呈餘者破損無存等語歷任庫存瓷樣理應交代後任舒善因何將此項樣器盡行損壞無存其情節更不可解著交吳紹詩一併詳訊實供具奏○旌表守正捐軀之直隸滄州民田超女田氏是日駐蹕鄂爾楚克哈達大營翼日

如之○甲申

上行圍○諭昨因總兵顧鉉連發六百里八百里摺二件滋擾郵傳駭人聽聞已降旨交部嚴加議處本日又由驛遞到八百里奏摺雖據稱有續獲藏帶牛肉頭髮之僧人五名情節而摺內夾有紅紙單帖內稱查辦割辦匪犯四次諭旨俱係接准提督移咨總督定長並未專行不知何故切勿以臣言申飭等語已極荒唐可詫其餘各摺一請來京陛見有

面陳之語俟伊父九月十六日生辰後起程一請外省設立品級石頒發大清會典及武鄉會試添四書題論諸條奏此等不急細務及陳請陞見豈有由驛加緊馳遞之理又其奏封內有書冊一函朕初以為或查出地方邪教逆詞等事及經拆閱乃係顧國泰詩集並有顧國泰請安叩賀天喜一摺種種妄誕乖謬實出情理之外顯係喪心病狂實屬可惡顧鉉著革職交與總督定長即行鎖拏派

委委員解送來京交軍機大臣嚴行審訊○諭軍機大臣等昨據永州鎮總兵顧鉉奏拏獲傳布謠言及翦辦匪犯二摺係由驛六百里及八百里先後拜發業經降旨將顧鉉交部嚴加議處並傳諭定長等將伊平日居官如何之處查明具奏乃今日復據伊八百里遞到奏摺三件暨顧國泰詩集一冊似此荒唐謬妄實屬喪心病狂已降旨將顧鉉革職著定長即將伊鎖拏派委委員嚴行管押進

京交軍機大臣究審並飭沿途小心防範勿得稍有疎虞顧鉉如此舉動乖張則其平日之妄作妄為必有類此出於情理之外者該督撫豈竟毫無聞見何以不及早參奏定長素性疲懦於此等人每務姑容殊屬非是著即將顧鉉任內種種乖謬不法劣跡據實查明具奏如稍涉瞻顧迴護則是自取罪戾矣至顧鉉昨日所奏拏獲二案已諭方世儒就近查訊有應根緝要犯即上緊查拏並諭定

長悉心研究。追求正犯蹤線。今復據盤獲帶有牛肉頭髮之僧人覺性等五名。並著交定長方世雋一併嚴切詳鞠。不得因顧鉉為人荒謬遂併其所奏之事亦不認真查辦。以致因噎廢食。著傳諭定長等即速審明。務得確情詳晰覆奏。所有顧鉉奏事原摺併著鈔寄閱看。○又諭據吳壇奏近因查緝割辦匪徒於蘇州城外訪出久經奉禁之大乘。無為二教經堂十一處。並將各堂師徒工伙住宿在堂者七十餘人。全數拏獲等語。邪教久經嚴禁。該犯等何得尚敢潛開經堂聚徒傳教。今既經搜拏破案。自應徹底清查。嚴行懲治。此等邪教莫甚於直隸之宣化府。前經屢犯屢懲。昨亦因盤緝割辦匪犯獲有圖謀興教之案。除究出逆詞另行按律從重辦理外。其實在從教怙惡不悛者。並改發新疆。即始從而後改者。亦予以杖徒。俾庸衆知所炯戒。不敢復蹈法網。江南此等案情向未辦及。不可不

書錄全書

卷七

多辦數人以儆將來。或其中亦有如宣化之逆詞。或其中即有割辦匪犯在內。及相干涉之處。更不可不悉心根究。著傳諭彰寶即速親提各犯逐一研訊。分別定擬。毋得少為輕縱。○又諭據四達等奏查審張廷瑞因家財細故捏造逆詞。陷害親叔張如岩一摺。此等逆犯自應處以極刑。已於摺內批示矣。前閱張廷瑞原呈。稱係安邑縣生員。更非無知愚民。可比。乃敢任意編造逆詞。尤為可惡。學校中有此敗類。該學政及教職等平日所為管教者何事。著傳諭四達蘇爾德查明張廷瑞係何項生員。因何得以潛蹤外出。於審擬完案時將學政呂光亨及該學教官一併嚴行參奏。聽候交部從重議處。○予故蘇尼特貝勒甘珠爾致祭如例。○乙酉

書錄全書

卷七

亦據顧鉉稟報情節具摺奏聞已於摺內批示顧鉉以此等緝匪事件疊用八百里馳遞過涉張皇駭人觀聽且以尋常條奏及陳請陛見並將顧國泰詩冊一併附呈實屬喪心病狂已降旨將伊革職拏問觀其舉動乖張若此所獲各犯亦恐不無妄供誣賴之弊但此等游方僧道形迹既涉可疑而謠言帖內又有異樣字跡或果與匪徒交涉或別有邪術流傳均未可定該督等務須平心靜氣反覆研鞫俾無遁情不可因顧鉉之人不足取心存成見致令情偽難分如能審有端倪即須根尋蹤線速獲正犯以靖地方若審明實無影響亦即取保省釋勿累無辜設係兵役等有心誣陷並將被害之人從重治罪如此分別辦理方不致失之枉縱至永州僅屬一隅所獲即有數案其餘各屬何未聞獲有匪犯則所謂認真查緝仍係虛應故事著該督等再行嚴飭所屬上緊查拏勿稍疎懈並諭

文武大小員弁知顧鉉之獲罪乃其荒唐乖謬所致伊等若因此稍懷畏懼緝捕不力是又因噎廢食其取戾更重矣著將此一併傳諭程燾知之仍即速行回奏刑部議覆江蘇巡撫彰寶奏原任兩淮鹽運使盧見曾隱匿提引銀兩私行營運寄頓照例擬絞監候秋後處決應如所奏從之是日駐蹕扎克丹鄂佛囉大營是月直隸布政使觀音保按察使周元理覆奏前辦匪犯現督屬查辦務期必獲得旨汝等徒為此言今所獲要犯為誰○兩江總督高晉覆奏馮鈐奏稱宿州拏獲之匪犯張四訊係即張四儒供出徐州趙三誘令割辦解交臣處究審一案飭員赴徐州府搜查並無趙三蹤影臣親提張四研訊據供前認為張四儒及趙三誘令割辦之處均係受刑捏造並非張四儒亦無趙三其人查張四儒係東省拏獲匪犯靳貫子供出之人現咨明山東將靳貫子解來江省質認

以定虛實得旨此人已提至京將張四亦嚴押送京可也○又奏拏獲割辦匪犯所供多係奸僧指使是僧道急宜清理但恐奸僧不僅江南各省皆有得旨且自汝省實力行之又稱請將稽查僧道之例再行申明於清本澄源之道似有裨益得旨恐未必在此而反致滋擾又稱臣於匪徒竭力辦理不敢徒託空言得旨許久尚未得一要犯何謂非空言耶○又奏請復僧道年終奏報之例得旨此

實錄卷之十七

聖

亦治標而非正本澄源之論況此時更不可行俟事後再講○江蘇按察使吳壇奏查辦匪徒情形得旨汝等在部中尚為出色好司員一至外省即變為模稜養高之惡習實屬可惡且此事特旨交汝即馳驛何妨而緩緩摺奏究無一切實語實孤朕望不知恩之物耳○湖北布政使閔鶚元奏遊方僧道易藏奸偽請嗣後止許在本處寺廟焚修遊方不得過本管府屬得旨此事可緩協辦大學

士公副將軍署雲貴總督阿里衮雲南巡撫明德奏永昌普洱兩路軍糧派撥採買三十餘萬石今歲來年俱已敷用惟沿邊土司所屬先經緬匪蹂躪田地荒蕪請於今冬查明缺乏籽糧牛力之家於明春借給銀兩令其購辦普行耕種俟秋後按照時價交米還項不敷軍糧即在各該土司地方採買得旨嘉獎

實錄卷之十七

聖

大清高宗法天隆運至誠先覺體元立極敦文奮武孝慈神聖純皇帝實錄卷之八百十七

大清高宗法天隆運至誠先覺體元立極敷文奮武孝慈神聖純皇帝實錄卷之八百十八

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次 臣 慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級 臣 董誥內大臣戶部尚書鑲黃旗滿洲都統軍功紀錄五次

尋常紀錄十四次 臣 德瑛經筵講官太子少保工部尚書紀錄六次 臣 曹振鏞等奉

敕修

乾隆三十三年戊子九月丙戌朔

上遣額駙福隆安赴避暑山莊。

皇太后行宮問安。○行圍。○諭曰。四達等審擬

張廷瑞編造逆詞圖害伊叔張如峇一摺。已

批令三法司覈擬速奏矣。至摺內請將張如

峇父子一併緣坐。雖係照例問擬。但張廷瑞

因圖分家產懷挾私怨以致編造逆詞希圖

陷害伊叔。今若仍將張如峇親屬緣坐則反

中張廷瑞誣陷之計。不足以昭平允。所有張

如峇及其子張廷璋等均著免其緣坐。其張

廷瑞之父母妻女仍行按律定擬。○兵部等部議覆兩江總督高晉奏。部議裁汰京口將軍標左右二營官兵案內。實應裁馬步守兵八百五十五名。請酌留二百名。添撥鎮江城守營。派撥千總把總各一員。經制外委二員。額外外委一員。酌分汛防。其餘應裁兵於鎮江城守營及附近京口十三營遇缺輪補。應裁官弁仍照原議辦理。至京口水師營現改歸總督專管。向來將軍副都統分別輪查之

處應停。其將軍等坐名勅書有管轄綠營字樣水師副將傳勅高資營都司關防均有將軍標字樣應換再京口副都統所需隨從人役向於綠營撥用。今請照浙江乍浦副都統之例添設經制均應如所請從之。○又議覆山西巡撫蘇爾德奏。酌擬陝西撥解晉省補缺營驛馬各事宜。一陝省餘剩馬實解晉省數目應豫先知會以便將各營報倒馬扣缺豫備撥補。一晉省蒲州與陝省接壤馬匹到

境應委員接收。即由蒲州一帶各營挨次撥補。餘馬解省辦理。一解到馬。先儘綠營并各州縣驛馬撥補外。如有餘剩。再撥滿營。一河南與陝西接壤。應解河南馬。即由陝徑解至豫。毋庸於晉省替換撥解。一晉省撥補餘剩馬。全數存留省城標營。另於附近隣省營分內。照數抽換撥往。一晉省驛馬除零星分數不撥外。餘請一體撥補。一由蒲州接收馬匹。遞解省城。以及餘剩。撥解隣省。沿途照料兵丁。照例日給口食銀一馬匹到省。未補以前。照例備餵養草料。均應如所請。從之。○以江西九江協副將于秀為湖南永州鎮總兵。○緩徵甘肅皋蘭金縣渭源靖遠隴西伏羌會寧通渭鎮原莊浪固原鹽茶安化武威等十四廳州縣。本年旱災額賦。○予福建臺灣水師營遭風淹斃兵陳御等賞卹如例。○旌表守正捐軀之山西稷山縣民喬三斌妻常氏。○是日駐蹕依綿峪大營。○丁亥。

上行圍。○諭軍機大臣等。昨據吳壇奏。於蘇州城外訪出久經奉禁之大乘。無為二教經堂。拏獲各堂師徒七十餘人。一摺。業經降旨。彰寶悉心根究。嚴切定擬。今據彰寶奏稱。教中之人。非僧非道。慣與各處水手暗地往來。招接存頓等語。此等邪教。久經嚴禁。該犯等尚敢潛設經堂。聚徒傳教。已屬不法。且蘇州遠通海洋。而所屬又跨連數郡。該犯等竟敢與無籍水手往來牟利。更恐滋生事端。即潛謀割辦之正犯。或隱竄其中。或交通勾結。均未可知。彰寶務宜逐一研鞫。毋得稍涉含糊。至近日直隸宣化地方。獲有圖謀興復無為邪教之案。其中并究出悖妄逆詞。另行按律辦理。今蘇州查出經堂。如究有悖逆書詞。即應照宣化之案辦理。不可稍存姑息。所有查辦宣化原案。併著鈔寄。將此傳諭知之。○又諭據永德奏。瑞安縣地方拏獲福建民人李浩。背賣漳浦縣逆犯盧茂等。結盟安良二圖。及

孔明碑記圖一束。并二圖板片。現在分咨閩粵查辦一摺。已批令該撫從重定擬矣。該犯刊印結盟安良二圖。雖係勸人守法。但傳布新聞。冀賺錢文。亦屬不安本分。至孔明碑記圖。其事既荒誕不經。而記語五句。又屬隱語妖言。多不可解。尤當徹底根究。以杜妄言。結盟各圖。該犯既稱得自閩縣民人王三哥。其板亦刻自閩省桐山地方。自應一併查拏。究治。著傳諭崔應階。即飭屬將王三哥並刻字匠傅姓。迅速拏獲。派委妥員押解浙省。併案定擬。毋使免脫。自戕。再閩省既有此圖流傳。該省曾否查辦。粵東之石城縣果否現出石碑。該督有無聞見。著崔應階李侍堯。均即查明據實覆奏。永德原摺。併著鈔寄。○是日。駐蹕安巴。究和羅昂阿大營。○戊子。諭曰。簡親王豐訥。亨。管轄圍場。無故詬詈喀喇沁郡王喇特納錫第。實屬狂妄無知。著革去領侍衛內大臣。併花翎。黃馬褂。不必管轄圍場。仍交

宗人府嚴加議處。○是日。駐蹕沙岱哈達大營。○己丑。上行圍。○諭軍機大臣等。本日據劉統勳等奏。蔡廷章所供揚州鈔關開飯店之吳連。現經該省解到。令其識認。質對據蔡廷章堅供。從未見過。又韓沛顯所供海州東光各處僧人普敬普貴。通義等。分咨各該省密訪查拏。並准移覆查無其人等語。蔡廷章前供在揚州東關吳姓飯店住宿。既經該處查有吳連。開張飯鋪。則前供不得謂之捏飾。何以覲面質訊。又堅稱從未見過。如是反覆狡展。希圖脫卸。即應訊之蔡廷章。從前因何妄供。現在因何狡賴。務得實情。至韓沛顯所供四僧。其寺名僧衆。既據各該處查明毫無影響。亦應仍將韓沛顯詳加嚴訊。豈有任其隨口妄供。遽行完結。著傳諭劉統勳等。即將蔡廷章韓沛顯二犯。再行嚴切審鞫。問其因何妄供。情由。並取具確切供詞。據實具奏。○又諭據

定長等奏在廣濟縣地方拏獲僧人雲霞請迅速解往東省與通景等各僧面質等語前據富尼漢奏拏獲匪僧通景已經降旨令其解京審訊著傳諭富尼漢俟湖北省將雲霞一僧解到時即行添撥員役協同原派解員沿途小心防範送京質審毋得令其自戕免脫○又諭本日據定長等摺奏廣濟縣地方拏獲僧人雲霞請解往東省與通景對質業經降旨富尼漢俟雲霞解到時即行嚴押解京質訊今通景既經解到熱河著傳諭尹繼善即行詰問該犯通景於何處地方與雲霞會聚糾約及在東省拏獲時如何供出雲霞情節一併詳細訊取確供具奏至通景既現在患病即交增福將該犯加意調理就痊俟迴鑾至熱河時再問○又諭據馮鈐奏合肥縣拏獲圓通菴僧人玉明號明遠茹刑不吐實供一摺已於摺內批示矣該犯行李內既搜出小木人符布並鐵拐剪刀等物形蹟已

屬可疑即其所存木戳招牌謊稱思僧蔭襲并察院恩慈字樣其非素安本分之僧更可概見且訊據該犯供稱化緣至劉家村劉鳴奇門首曾手拍幼孩之頭等語而其辯尖尋即被割通數種種情節與割辦匪犯自覺相近此等奸匪狡幻百出惟當細心設法研鞫使其辭窮不能遁飾原不專藉刑求即夾杖所取之供亦未必盡皆可信著傳諭馮鈐即行添委妥員將玉明嚴押解京候審沿途小心防範毋使免脫自戕若該撫此時已經訊有確實供詞仍即一併迅速具奏○大學士等議奏御史陳鴻寶覆奏請禁添置會館一摺據稱自建造官房後會館添置甚多以致民房漸少租戶居奇等語查建造官房以來並未添設會館不得以民房居奇指為添置會館之過又稱租戶索價輒以何不住官房為辭而爭置會館者又假衆力以乘其隙等語若如所奏會館有礙官房亦且無益設無

官房。又無會館。必更受索價之累。所奏仍毋庸議。從之。○吏部等部議覆。山西巡撫蘇爾德奏稱。永寧州青龍渡。向設有巡檢。近日民多遷徙。毋庸專員分駐。查該州屬之柳林鎮。為陝西往來大道。需員稽察。請以青龍渡巡檢。改移柳林鎮。又歸化城屬之色爾登。居民亦少。巡檢實為虛設。查該廳屬之畢齊克齊村。為口外通衢。請以色爾登巡檢。移駐畢齊克齊村。其所居舊署。飭令估變。為新建衙署之用。應如所請。從之。○戶部議覆。湖北巡撫程燾奏。請清理鄖陽山地。併咨照陝西。河南二省。轉飭界連鄖陽之各州縣。查明所轄山地界址。設立保甲。稽查奸匪。其開墾地畝。照例升科。應如所請。從之。○以順天府府尹蔣元益。為左副都御史。○以伊犁將軍伊勒圖。為鑲黃旗領侍衛內大臣。鑲黃旗領侍衛內大臣嵩椿。署伊犁將軍。○豁除浙江錢塘。平湖。龍游。江山。烏程。海寧等六縣。捐置義塚。建

造火藥局。并坍沒衝廢。減徵改則各田地。二十八項。有奇額賦。○是日。駐蹕烏蘭哈達大營。○庚寅。上行圍。○諭軍機大臣等。阿里衮等奏。拏獲收買邊外野人貨物之左國興。解赴騰越正法。梟示一摺。所辦甚是。已於摺內批示矣。邊外野人。既向與左國興熟識。今復至伊家易換貨物。自必談及該處情形。或假託貿易之名。向左國興探聽內地信息。亦未可定。阿里衮等。既將該犯拏至永昌親審。自應訊明此等情節。再行正法。不知阿里衮等當時曾否究問。及此。有無確切供詞。至此次野人。雖在騰越邊外。或係內地土司所屬。或竟係緬匪界內之人。或係中間獮夷。兩無統轄。並著阿里衮等。查明附摺詳悉奏聞。再據稱。騰越州和順鄉一帶。民人向在緬首地方貿易者甚多。今左國興既有與野人私換之事。其餘恐尚有類此者。亦當詳加查察。毋使稍有疎縱。至

於內地民人固當嚴其偷越邊境以防漏洩風聲並當禁其私帶賊匪需用之物出外貿易若邊外野人潛至內地或可藉以探問彼中消息但民間私售既違禁例且恐彼此交通妄為傳布或可聽野人攜貨入邊官為收買除牛馬銅鐵硝磺等項恐資賊用者不准換給外其餘綢布各件無關緊要之物按值與之交易或可聯絡其情藉以訪其虛實似亦籌畫邊防之一法但此事甚有關係不可

不慎重辦理著傳諭阿里衮等確按該處現在情形詳細商酌是否行之有益不致別有流弊之處妥協密籌據實定議覆奏尋奏前擘獲易換野人綿花之左國興曾經研訊實係關外野人並非緬匪假貿易前來探信至野人另是一種非內地土司所屬亦非緬匪之人其騰越州和順鄉一帶民人自嚴禁私販後實無赴緬貿易者再野人與緬匪不通即准其入關貿易亦不能得彼中消息轉恐

緬匪令擺夷假冒野人進關探信報聞○軍機大臣等議覆貴州巡撫良卿奏稱准署雲貴總督阿里衮咨稱征剿緬匪貴州省應共備驛馬六千四百餘匹現在購辦等語查分省購辦驛馬節經奏准該撫自應如阿里衮等約計之數妥辦再黔省係產馬之區如能於阿里衮等所擬外再行採買若干匹備用於軍營更屬有濟從之○是日駐蹕伊遜河西大營○辛卯

上遣侍衛雲保赴避暑山莊

皇太后行宮問安○行圍○是日駐蹕塔哩雅圖昂阿大營○壬辰賜扈從王公大臣及蒙古王公台吉等食○諭山東省樂陵商河德平三縣上年因雨水過多秋成歉薄降旨將應徵節年舊欠緩至本年麥收後開徵今春該處得雨較遲夏麥秋禾收成仍不無稍減若新舊一時並徵小民未免拮据著再加恩將樂陵商河德平三縣應徵未完節年舊欠

銀穀等項。緩至明年麥熟後帶徵。以紓民力。該部遵諭速行。○諭軍機大臣等。據兵部查奏。浙省濫請製造烏鎗一案。係工部覆准已降旨。令該部堂官明白回奏矣。細覈此案。蘇昌於三十一年具奏時。止稱應照馬兵十分之二額數。製造京鎗四百四桿。並稱步兵一萬二千餘名。為數甚多。若按兵統製。殊糜經費。並未聲明續行製給。何以三十二年題銷工料疏內。輒有其餘未製烏鎗陸續製造之語。工部並未移咨兵部會議。遽爾覆准。固屬非是。而蘇昌覈銷題疏。僅帶敘一語。豫為日後開銷地步。其中顯有情弊。看來此事。必係承辦之不肖員弁串通總督藩司衙門書吏。希圖浮冒支銷。故為閃爍其詞。有心朦混。蘇昌不察。遂墮其術中耳。似此舞文作弊。不可不徹底根究。崔應階現在巡查赴浙。著傳諭該督會同永德。詳細查察。將從前因何朦混情由。逐一究明。據實覆奏。再蘇昌原奏及題

疏。俱係永德在藩司任內申詳。永德承辦此事。何以含糊。若此。並著永德即行明白回奏。○又諭。據劉統勲等奏。審訊江南解到割辦匪犯張四儒。本名張四。與山東原供出之靳貫子兩相質對。其名其地。均不符合。且面目彼此。各不相認。似非正犯等語。張四係直隸乞丐。與靳貫子原供之江南張四儒。地籍原不相同。所云即張四儒之語。係承審之地方官誘令該犯幼子承認。亦不足為據。並有宿州趙姓。挾嫌誣陷。原案可證。則張四之非張四儒。似無遁情。但該犯在江南時。何故盡行承認。及到京。又何以全翻前供。其中情節。亦應訊問周密。方足以成信讞。再劉統勲等審辦此等要案。僅以人犯質對。並不相識。遂定匪夥之真偽。則大不然。奸徒狡詐。百出。豈肯輕露真情。何難故作驚愕。飾為未曾見面情狀。以惑問官之聽聞。又安知匪犯等不豫為要約。到官相見。彼此互粧不識。以圖漏網。均

未可定。若僅以當堂一對。遽執為本案確據。轉墮奸匪術中。且恐真犯又迷蹤蹟。豈非差之毫釐。謬以千里乎。可傳諭劉統勲等。查審此事。不但本犯游供全不足信。即提到各犯之彼此認識。亦不可憑。總須耐性平心。反覆駁詰。或其無心吐露。及辭色之間。一經勘出。破綻立即乘勢窮追。庶正線可以從此而得。現在永德奏到。拏獲僧人明遠一犯。亦經押解送京。該犯本係賊匪。而所供雲臺山。又實

有其地。雖廟名僧貌不甚相合。亦不可盡以為無因。該犯解到時。並著詳悉確勘。毋任狡展游移。如審有確供。即行具奏。其餘各省解到人犯。並交伊等會同刑部一併查審。至劉統勲此時。如已起身前赴熱河。即著劉綸託恩多。英廉悉心訊究。○又諭曰。尹繼善等訊問匪僧通果。據供在古林寺時。伊師悟成。給與迷藥。翦刀。傳授咒語。令其割辦等語。通果既將悟成。給與迷藥。翦刀。並經傳授咒語之

處。供吐確鑿。則其割辦何用。情由自必備知。著傳諭尹繼善再行細訊通果。令將悟成主使該犯翦取髮辮。意欲何為確情。詳悉供明。即行奏覆。○又諭曰。周元理查奏僧人廣興所帶符咒方書一摺。既稱劉青供劉三於乾隆二十七年已有九十來歲。外出不知下落。距今又逾七載。計其年應百歲以外。其人豈能尚存。乃摺尾復稱現飭密拏劉三務獲。可見其並非實語。不過藉此敷衍完案。此等外

省積習。最為不堪。周元理向來尚屬曉事。不應沾染惡習。竟至於此。周元理著傳旨申飭。此後辦理一切。務應痛加悛改。毋得稍事虛飾。○又諭前據彰寶奏稱。搜查海州贛榆縣與山東郯城交界有三教堂一處。拏獲住僧明然及蘭山縣交界亦有三教堂一處。拏獲住僧長欽。到案細訊。皆不承認。又有與明遠同名。年貌相符者。並咨明東省將韓沛顯押赴海州。會同勘訊等語。韓沛顯一犯業經富

尼漢委員解京審訊著傳諭彰寶即將應與韓沛顯質訊各犯遴派員弁分別管押迅速解京與韓沛顯質審○是日駐蹕張三營行宮○癸巳諭各省學政現屆差滿順天學政倪承寬浙江學政周煌湖南學政陳科捷廣西學政朱丕烈俱係本年任事無庸更換江蘇學政著景福去安徽學政著德風去江西學政著汪廷璣去山東學政著韋謙恒去山西學政著吳巖去福建學政著阿肅去湖北學政著戴第元去陝西學政著劉摶去四川學政著孟超然去雲南學政著李敏行去河南學政嵩貴廣東學政翁方綱貴州學政陳荃俱著留任○諭軍機大臣等據馮鈐奏合肥縣拏獲之匪僧玉明即明遠審無確供於九月初二日在監身故等語前因該撫奏拏獲僧人玉明種種情節與割辦匪犯相近已降旨令其派委妥員解京候審此次所發之摺距前奏不過數日何以忽稱該犯身故或

係患病身死或係承審各員用刑致斃或竟係防範不嚴致該犯畏罪自戕均不可不徹底根究著傳諭馮鈐即將玉明因何身故之處迅速查明據實具奏毋得稍有掩飾迴護尋奏玉明實係病故報聞○以湖北施南協副將高益為浙江處州鎮總兵○是日駐蹕波羅河屯行宮○甲午諭河南省各屬本年夏間得雨較遲光州等七屬被有旱災業經該撫題報分別確勘照例撫卹其餘開封府屬之蘭陽儀封密縣歸德府屬之考城彰德府屬之安陽湯陰衛輝府屬之延津滑縣懷慶府屬之修武武陟原武共十一縣秋成僅止六分現屆徵收漕糧之期所有春借常社等倉穀石若一時併輸小民未免艱於完納著加恩將蘭陽等十一縣民借常社等倉穀石著緩至次年秋後徵收以紓民力該部遵諭速行○諭軍機大臣等據定長奏總兵顧鉉於八月二十一日陡患疾症眼目無神言

語舉動均無倫次。察其病勢驟難痊愈等語。前因顧鉉連發八百里驛遞。並將無關緊要條奏及伊父顧國泰詩集附進。實屬喪心病狂。已降旨將伊革職。拏問。交定長派員解京。今雖據該督奏稱。顧鉉陡患疾症。但計其發報之時尚在未病以前。何先已荒唐至此。著傳諭定長。仍遵前旨。派委妥幹員弁。將顧鉉解京候審。伊既係痰迷之人。沿途尤宜小心防範。毋得稍有疎虞。所有令該督查訪顧鉉

任內有無乖張不法之事。亦遵前旨速行查明。據實奏覆。至顧國泰具摺稱係乾清門一等侍衛。協理光祿寺卿。並著定長就近查詢。伊係何年侍衛。何年協理卿事。有何憑據。即行覆奏。再顧國泰並無奏事之職。忽爾具摺請安賀喜。殊屬妄誕。看來亦非安分之人。即在伊子任所。亦恐不無滋事情節。該督一併查訪明確。奏聞。并將顧國泰革去頂帶。一併送京。○又諭據溫福奏。昌吉屯田遣犯聚衆

戕官。立即勒戮一摺。溫福一聞賊信。乘其不備。進兵勦戮。殊屬可嘉。著交部議敘。在事官員兵丁內有出力者。著溫福查明。官員交部議敘。兵丁加恩獎賞。通判赫爾喜。把總馬維國。歿於公事。殊堪憫惻。著交該部照例議卹。該管叅將任正國。守備顧成美。俱著革職。作為兵丁。在烏魯木齊効力贖罪。戕害赫爾喜。馬維國之賊。著溫福等審出。令赫爾喜馬維國之親屬子弟。親視凌遲處死。其起意倡首

之賊。亦凌遲處死。餘俱立斬。梟示。賊匪家屬著賞此次出力兵丁等為奴。幼丁十歲以上。俱著正法。該處民人驟經滋擾。不無被賊奪取牲畜物件。著溫福查明。除現存者交給本外。其殘缺者官為賞給。再摺內稱往南路逃去賊衆。派兵追捕。此時曾否全獲。著傳諭溫福等嚴行緝拏。毋使一名免脫。拏獲時。一面具奏。一面正法。○又諭據溫福等奏。昌吉屯田遣犯糾約二百餘人。乘夜開昌吉城門。

竊取存貯兵丁衣履腰刀等物將通判赫爾喜把總馬維國戕害向烏魯木齊一路前來溫福隨親帶兵前往堵截賊衆結隊而立溫福排列兵丁圍住擒拏衆賊抵死拒捕隨施放鎗箭殺死一百餘名生擒三十餘名其越山逃散者差派官兵嚴加追緝等語此等逃散衆賊溫福派兵分路追趕其藏匿山林者難保無一二免脫似此賊犯情甚可惡非尋常逃犯可比務須全數拏獲正法警衆此等賊犯逃散後定從開展哈密巴里坤肅州等處奔竄著傳諭吳達善存泰福僧額文綬等務選妥幹官兵凡賊所經一切隘口山林嚴加搜尋查緝勿致一人漏網拏獲時一面具奏一面即行正法伊等此次緝拏時著互相行文查對姓名俟各處全數拏獲不遺一名後再為停緝○兵部議奏據兩廣總督李侍堯議覆大學士陳宏謀條奏巡察海口商船及裁汰戰船二摺查粵東出海商船節經嚴

定章程毋庸更改至戰船額設外海艚船拖風烏舢舨哨船一百六十七內河櫓槳急跳快哨舢舨船三百八十今請裁外海船三十二內以艚船改造拖風船一以舢舨拖風改造內河快船十又請裁內河船五十六內以櫓船二改造外海拖風船一共裁船八十八改造船十二其承修戰船粵省向責成道府請仍照舊等語俱應如所奏從之○工部等部議覆江西巡撫吳紹詩奏稱南昌縣上泗港有官建石閘一座以衛圩內民田閘當水衝屢致傾圮請移建於王字湖口應如所奏從之○予故直隸總督方觀承祭如例謚恪敏○旌表守正捐軀之山東文登縣民劉成業女劉氏○是日駐蹕中關行宮○乙未上駐蹕避暑山莊至庚子皆如之○詣皇太后行宮問安○協辦大學士公副將軍署雲貴總督阿里衮雲南巡撫明德奏滇省銅廠三十餘處向係糧道專管布政司無稽覈

之責金銀鉛廠二十九處又係布政司專管本地道府縣不得過問均屬未協請將各處金銀銅鉛廠如係州縣管理者責成本地知府專管本道稽查如係府廳管理者責成本道專管統歸布政司總理至糧道既不管銅廠事務太簡查驛鹽道管驛站鹽務政事頗繁請將驛鹽道所轄之雲南武定二府改歸糧道管理所有該道等應換印信咨部換給得旨如所議行○丙申

上詣

皇太后行宮問安○遣官祭

歷代帝王廟○遣官祭

都城隍之神○諭曰增福在熱河道任內年久辦事亦屬奮勉著加恩賞給按察使銜○又諭曰阿里衮等查奏前年去年征勦緬匪所有陣亡傷亡及瘴故打仗未出各弁兵造冊咨部覈辦一摺辦理尚未允協官兵等身臨行陣如果奮勇効命疆場自應查明卹賞

以昭激勸但亦須覈其用力多寡是否殺賊臨陣捐軀必功狀分明權衡悉當始足以昭軍紀而服人心今滇省綠營兵弁積習怙怯木邦等處遇賊率多逃竄甚屬怯懦即有陣亡之人亦非蠻結等處出力打仗者可比若漫無區別一例從優予卹則滇省惟怯弁兵益不知奮勉著該部詳查此內陣亡傷亡官兵俱減半給與卹賞其染瘴病故者既與身冒矢石不同而打仗未出之人更無實在下

落均不應議卹○諭軍機大臣等據阿里衮等奏請責成該管道府專管廠務及統歸布政司總理一摺已批如議行矣至原奏糧儲道羅源浩總理銅廠於銅觔多有透漏及未追積欠銅本至七萬六千餘兩一摺已降旨革職查究並令將應行交官還款之項著落羅源浩名下勒令按數賠償以示懲創今復據阿里衮等奏各廠有弊無弊漫無證據甚至奸商侵蝕工本以致乏費停採窮民失業

帑項虛懸等語此皆從前辦理不善所致羅源浩固罪無可寬而劉藻在滇最久鄂寧蒞任年餘均有督辦銅廠之責何以並未查明及早劾叅妥辦以致廠務廢弛國帑虛懸所有羅源浩應行追繳之項倘將來不能如數賠償即著劉藻家屬及鄂寧名下照數分賠以清帑項尋奏羅源浩等實係辦理不善尚無染指情事其積欠銀議令羅源浩分賠一半各廠員分賠一半倘實不能如數再著落

劉藻家屬及鄂寧名下分賠報聞○又諭曰福永奏續獲僧人覺性等及拏獲散布謠言之王玉祥等現聽督撫二臣審理一摺前已有旨令該督撫等嚴行審究務得確情並據該督奏明前往湖南會辦此時想已得有端緒著再傳諭定長方世儒將前後所獲各項人犯一併詳細研詰訊取實供即行速奏併窮追根線毋致稍有疎縱如果審係無干即予省釋亦不得拖累無辜福永摺並著鈔寄

尋奏覺性所攜頭髮訊係得之和姦民婦別無奸匪形蹟已按例擬議其傳播謠言之王玉祥等亦經訊明均非翦辮匪黨報聞○丁酉諭工部堂官覆奏濫准浙省製造步兵鳥鎗一案內稱一切軍裝器械例由兵部定議行令工部報銷此案兵部並未將原卷內統製先製字樣分晰定議遂致以誤承誤等語所奏殊屬文飾該部原辦此案之堂司官既未將應否准銷之處細心覈議率爾朦混議

准而現在堂司官又不將從前錯謬之處據實指出乃復卸罪兵部迴護前非甚屬非是所有從前議准及現在覆奏之工部堂司官均著交部嚴加議處此項濫費銀兩仍著原議之堂司官與蘇昌名下照數著追○又諭本日進呈奉天秋審本內經九卿由緩決改入情實者乃至五起之多如徐大占產殺弟馬大創墳見屍伊勒圖索欠斃命哈當阿薛三在配行兇均屬兇殘不法本應擬以情實

九卿所改甚是。朝銓久任盛京刑部，非不諳曉律例，何以寬縱至此？朝銓著交部嚴加議處。○又諭向來各省應入秋審官犯，俱於各州縣獄中監禁，勾決本到轉行該地方正法辦理，尚未妥協。嗣後各省官犯於定案時，即在按察使衙門收禁，既與齊民犯罪者稍示區別，而臬司獄禁稽察更為周密，亦可免疎虞替代諸弊。於防微杜漸之中，仍寓仁至義盡之意。秋讞大典更足以昭慎重，至勾本到

省並著照刑部決囚之例，將情實官犯全行綁赴市曹，即令按察使監視行刑。將奉到諭旨當場開讀，按照予勾之犯驗明處決。於體例既為畫一，而省會之地共見共聞，如此立法森嚴，並可使官僚共知儆惕。將此通諭知之。著為令。○諭軍機大臣等，頃通諭各省將嗣後應入秋審官犯俱在按察使收禁，勾決本到全行綁赴市曹，即令按察使監視行刑。現在已屆勾到之期，各省官犯尚有羈禁州

縣獄中者，著即傳諭現有各犯省分之各該督撫迅速飛提各官犯至省城交按察司監禁。臨期遵旨辦理，如勾決部文已到而距省稍遠之州縣官犯尚未提齊，該督撫即將部文密行封貯，毋稍洩漏。俟到齊時再交按察使辦理。途中仍著選派妥幹員弁小心管解，倘有疎虞，惟該督撫是問。所有明發諭旨並著錄寄。○軍機大臣等奏兩淮提引一案前因顧夢懷到京供詞與揚州所供不符，將承

審之揚州府知府楊魁、甘泉縣知縣龍燦岷及總商江廣達等來京質對，緣顧夢懷初到揚州時因無高恒可質，即妄供交高恒收受，及至解京又以無商人可質，即稱係商人託令辦物。其實顧夢懷經手之十五萬兩係高恒託令向商支銀製辦物件，並非高恒盡行侵用，亦非商人託令代辦。承審官委無用刑勒供情事，但不能細加詰問，殊屬疎忽。應將楊魁等及同審之道員交部察議從之。○戊

戌

上御依清曠勾到服制人犯及雲南貴州情實罪犯停決服制斬犯三十人。貴州斬犯七人。餘三十九人。予勾。○軍機大臣會同刑部議奏。原任兩淮鹽政高恒普福侵蝕鹽引餘息。高恒收受銀三萬二千兩。普福私銷銀一萬八千八百餘兩。均應照例擬斬。監候秋後處決。顧夢懷包攬漁利。應依律擬絞。監候秋後處決。從之。○己亥。

上詣

皇太后行宮問安。○諭前日內閣進呈奉天秋審本內有夾片稱徐大等五案俱經九卿改擬情實。朕以奉天案件自係朝銓審擬伊久任盛京刑部非不諳曉律例何以寬縱至此。是以降旨將伊交部嚴加議處。及昨日細閱招冊內則惟徐大一案係朝銓定擬其哈當阿一案乃係黑龍江將軍富僧阿所審而馬大薛三伊勒圖三案均係吉林將軍恒祿承

審之事。是朝銓僅止一案尚不至於交議。使彼不敢陳辯。甘受處分。既不免於屈抑。若據實奏明情節。其將何以答之。朝銓毋庸議處。其恒祿所擬各案。經九卿改入情實者。至三起之多。殊屬意存輕縱。著將恒祿交部議處。庶足以昭平允。至大學士傅恒等進呈閣本尚可云未及細檢招冊。而劉統勲則係承辦秋審之本部。各省冊案皆所閱定。且現在熱河所奉諭旨皆同書呈覽。何以並不據實奏

聞。應將劉統勲交部議處。彼在朕前實亦心悅誠服。朕辦理庶政一秉至公。即有檢閱未周之事。所賴大臣等查明覆奏。何難隨時改正。朕不執意文過也。即如進秋審本時見部駁奉天多案。即降旨將朝銓議處。及親閱招冊知非其罪。即為開釋。並不憚於反汗。亦並無絲毫成心。朕於大臣等尚時加訓勉。不令文過飾非。若稍存迴護之見。其何以風示臣工耶。將此通諭知之。○庚子。諭昨閱視奉天

秋審招冊內德保一案。有延錫保扎傷監婦諾們著拉身死之語。因令刑部查取原案呈閱。緣延錫保之父德保。與諾們著拉通姦。俱擬絞監禁。上年春間。德保曾借諾們著拉皮襖當錢。迨九月內。令該犯贖回送還。延錫保素恨諾們著拉與父通姦。致伊母屢受折挫身亡。遂借送還皮襖之名。進監將諾們著拉登時扎死等語。德保與諾們著拉俱係久擬情實。牢固監禁重犯。而男女各監例應分別

羈管。乃竟聽其私相借物。是因姦收禁之犯。轉因在監。得任意往來。固圖重地。固當漫無檢束。若是乎。至以繫獄要犯。輒容閒人進內逞兇殺斃。可見獄中全無稽查防範。實出情理之外。平時監犯自戕。尚例有處分。此案管獄官卒。更非尋常疎縱可比。將軍富僧阿。一任獄規弛懈。若此。漫不經心。所司何事。富僧阿著交部嚴加議處。獄官搭拉木岱著革職。與看監之水手頭目劉如輝。水手姚榮第俱

發往伊犁當差。○又諭曰。定長等奏黃梅隄工完竣。所有餘剩應還司庫銀一千一百餘兩。請留為歲修之用。並請將動用銀兩每歲照數於通邑按畝隨糧徵收歸款一摺。殊屬非是。此項隄岸。本應民修之工。朕以災歉之後。格外加恩。發帑興築。為該處居民圖計。安全永資保障。今全工甫竣。例有保固年限。何致遽籌及繕完若限內即需重修。則此番糜帑鉅萬。竟屬有名無實。永修各官。所辦何事。

當於伊等是問。至限外有偶需補葺之年。亦有不必修葺之歲。今請將動用銀兩。仍於通邑每歲按畝徵還歸款。則是以朕施恩之事。轉藉端暗地加徵累民。徒供不肖有司開銷肥橐。乖政體而滋吏弊。更屬錯謬。定長。程燾。均著交部議處。○又諭。昨經軍機大臣查訊楊魁等在揚州承審顧蓼懷時。並無用刑勒逼教供情弊。惟不能細加詰問。殊屬疎忽。請將楊魁等與同審之道員。交部察議。今思伊

等承審此案既無刑逼情事即不必復論其
小過況彰寶尤拔世並未交部亦不應獨將
承審之員議處所有知府楊魁知縣龍燦岷
與同審之道員姚成烈圖思德察議之處俱
著加恩寬免○諭軍機大臣等據阿思哈奏
魯山縣拏獲山西算命人席守業搜出字帖
一紙語多謬誕審訊該犯係輾轉鈔來傳聞
湖廣武當山雷雨後水發衝出石碑上有此
記逐層根究始自湖廣竹谿縣捉雞溝地方
張欽鈔得現在飛咨究辦等語此等荒誕不
經之事流播民間惑人聞聽自應嚴切查拏
務得造作為首之人重加懲治既據豫省查
出其事始自湖廣該督豈無聞見曾否追究
查辦何以未據該督奏及著傳諭定長即行
確查武當山果否實有其事及該省有無傳
播犯案之人其河南咨拏之張欽曾否弋獲
訊供根究之處迅速據實覆奏並諭程燾知
之

大清高宗法天隆運至誠先覺體元立極敷文
奮武孝慈神聖純皇帝實錄卷之八百十八

大清高宗法天隆運至誠先覺體元立極敷文奮武孝慈神聖純皇帝實錄卷之八百十九

監修總裁官經筵講官太子太傅文淵閣大學士文淵閣領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次 臣等謹

總裁官經筵講官太子太傅文華殿大學士文淵閣領侍衛內大臣稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級 臣等謹將內大臣戶部尚書錄藍旗滿洲都統軍功紀錄五次

尋常紀錄十四次 臣等謹將經筵講官太子少保工部尚書紀錄六次 臣等謹將

敕修

乾隆三十三年戊子九月辛丑

上奉

皇太后自避暑山莊迴鑾○詣

皇太后行宮問安○諭曰裘曰修之母現在患病

裘曰修不必前來接駕○諭軍機大臣等

本日閱刑部進呈湖北省秋審招冊內九卿

等從緩決改入情實者至有四起之多如袁

四以姒姦持械糾毆斃命吳雲山以竊匪圖

賴殺死幼孩黃國明毆死吳氏復將已女抵

賴連戕二命熊添雲謝懷義以爭刈稻穀致

斃劉以仁父子二命俱屬兇橫不法情殊可

惡九卿所改甚是程燾於秋讞大典並不細

心覈擬輒爾意存輕縱殊屬非是念伊初任

封疆姑從寬免其交部著傳旨申飭嗣後辦

理刑名案件務準情法之平期協明允毋再

稍為姑息致干咎戾○是日駐蹕喀喇河屯

行宮○壬寅

上詣

皇太后行宮問安○諭軍機大臣等據定長等

奏拏獲翦辮僧人普潤供係河南固始縣張

文棟教令翦辮因傳言出去縣裏差拏畏懼

逃出詰其翦辮情形與需辮何用則不待刑

求信口供吐似非臨時編造等語看來此次

所拏普潤一犯較有蹤線可尋但所供翦子

辮尖及抹翦零藥俱藏廣渡寺西邊客房內

石碑下火箱內等語此一節尤為案內緊要

關鍵此寺坐落何處應即星往查起方得切

實憑據著定長等一面查辦一面將普潤一

犯並拏獲該犯之兵役派委幹員弁一併解京候訊沿途小心管解毋致疎虞其所供教令翦辮之張文棟及李明通惺等並係此案要犯著即傳諭阿思哈密速嚴拏務獲押解來京與普潤質對所有定長等原摺著鈔寄阿思哈閱看○又諭據永德奏北新關外查出庵堂十餘處庵內收藏經卷供奉羅像每年糧船回空水手容留託足請將為首皈教之人從重處治毀其經像革除庵名改為

公所仍許水手回空時棲止等語所辦尚未盡妥協杭州各處經堂向係糧船水手所設借棲止為名信奉羅教本應嚴禁從前雖經李衛查毀經像而房屋尚存以致故智復萌各庵內仍藏羅經羅像是其惡習難返非徹底毀禁不能盡絕根株若僅如該撫所奏將庵堂改為公所數年之後查察稍疎伊等勢必又將公所變為庵堂總非正本清源之道至水手棲止之所原不必官為籌畫此輩皆

旗丁臨時雇募應用更非官丁可比即或散居各處至期自能赴幫應雇何必為之鰓鰓過計況有漕之處不止浙江一省即如江南湖廣河南山東均有糧船即均須水手並不聞皆有棲止公所何獨浙省為然況此等游手好閒之人羣居一處必致滋生事端於地方又有何益著傳諭永德除將本案從重辦理外所有各庵堂槩行拆毀毋得仍前留存復貽後患○以湖南按察使梁國治為江南

江寧布政使○緩徵河南光州光山固始息縣商城信陽羅山等七州縣本年旱災額賦並借給籽種銀○旌表守正捐軀之廣東始興縣民鍾松養妻馮氏○是日駐蹕常山峪行宮○癸卯

上御行殿勾到秋審官犯及四川廣西情實罪犯停決官犯斬犯二人絞犯七人四川斬犯一人絞犯六人廣西斬犯一人餘八十人予勾○諭軍機大臣等本日閱刑部進呈四川

省秋審招冊內九卿等從緩決改入情實者至有四起之多。如張運開因忿爭追毆。輒用刀戳人殞命。楊玉先以錢財細故。砍殺胞弟。彭谷隆因妬姦生恚。持斧傷人。段廷章邀人私鑄鉛錢。數在十千以上。俱屬法所難逭。九卿改擬甚是。阿爾泰久任封疆。於秋讞大典。何以寬縱若是。念其向來辦理諸事。尚能實心。姑從寬免其交部。著傳旨申飭。嗣後覈辦刑名案件。務須細心酌覈。期得情法之平。毋

再意存姑息。致干咎戾。○又諭前據蘇爾德奏趙城縣盤獲遊僧印常性空二名。並搜出剪刀藥丸等件。又崞縣盤獲俗裝遊僧普祥通慧二名。搜出鐵釘手搗等物。一稱漢軍。一稱滿洲等語。當即批令該撫將曾否審出實情之處。速行奏聞。距今又閱十餘日。且現據該撫奏稱業於初六日回省。所獲各犯。此時應已提齊到案。逐加細鞫。是否即係割辦要犯。并普祥通慧供稱旗人之處。果否確實。俱

應得有端緒。何以至今未據覆奏。著傳諭蘇爾德速將審訊此二案情形。迅即據實馳奏。並將近日有無續獲要犯之處。一併奏聞。尋奏普祥通慧委屬旗逃。印常性空係四川遊僧。均非割辦之徒。近日亦無續獲要犯。報聞。○又諭先據永德奏德清縣慈相寺僧人悟倫圖奪虔元山觀音殿香火。捏稱虔元山有石匠埋煞書寫招貼惑人。現在查出從重究擬等因。昨又據彰寶奏稱據差往浙省委員

稟稱春間德清縣建造城橋。初有海寧石匠鄭元臣毛天成包攬不遂。嫉妬德清縣石匠吳東明郭廷秀承攬獨造。在虔元山埋煞圖害。其時慈相寺僧人乘機謀奪虔元寺香火。遂以虔元山有石匠埋煞。不如慈相寺清淨之語。寫貼各處等語。在永德所奏是石匠埋煞之事。出之慈相寺僧人捏造。並非實有其事。而江蘇委員所查石匠埋煞之事。則實有鄭元臣等姓名可指。似非盡屬風影浮談。且

該委員既以此稟覆上司。自必確有見聞。可據永德現在查辦此案。著傳諭彰寶。即選派明幹道員一員。帶同原訪委員。前往浙省。會同永德詳訊確查。據實具摺奏聞。併將此傳諭永德知之。○又諭前經降旨。緬賊若遣人同楊重英前來。一併解京。今思緬賊遣人。必不止一二人。聞有解京之信。或懇請遣數人來京。遣數人回緬。斷不可許。宜全行解京。再賊所遣之人。來至內地。若示以軍威。俾賊知

我有意防範。轉不足以示震疊。著照舊屯駐。俾賊莫測淺深。再聞阿里衮在彼操演滿洲兵。令總兵等操演綠營兵。綠營兵本不如滿洲兵。而滇省兵。選懦已極。更不可不加操演。黔省兵。尚屬出力。加以操演。可期健銳。但僅交總兵等訓練。究恐有名無實。阿里衮須親加操演。阿里衮既署督篆。此係伊應辦之事。即阿桂到時。亦不可推諉。一切軍需。並揀選官員。俱宜會商辦理。不得稍存畛域。事竣後

始可分別總督將軍也。○軍機大臣等議覆。綏遠城將軍傅良奏。稱駐防筆帖式調補武職者。例須六年滿後。本地驍騎校缺出。四缺得一。而候補筆帖式於本翼驍騎校缺出。即與領催前鋒等揀選補授。殊屬不均。請嗣後隨印筆帖式。屆三年時。勤慎能事者。遇本翼驍騎校缺出。與領催前鋒一體揀選補授。其尋常供職者。仍俟六年。照例辦理。應如所請。行文各省駐防。一體遵辦。從之。○戶部議奏

江西巡撫吳紹詩。咨稱。挑選二等候選教職。舉人驗看委署。請照揀發試用人員例。遇委署無員之缺。俸齊全支。若暫署原官。仍應回任者。照在任月日正署各半分給。應如所請。并通行各省一體辦理。從之。○以陝西督糧道王太岳為湖南按察使。是日駐蹕兩間房行宮。○甲辰

上詣

皇太后行宮問安。○諭前因逆犯張廷瑞係山

西商籍生員該學政呂光亨有應得處分曾諭軍機大臣交查吏部將歷來辦過學政任內遇有生員犯逆處分舊案開送乃該部司員僅將議處福建學政馮鈐一案查覆朕記憶前此議處學政有從重實降之案若馮鈐之革職留任係朕格外加恩何以止檢此案開送因復降旨諭令該部另行檢查始據將議處福建學政吳華孫河南學政李宗文降三級調用二案開呈該部既有此三案初時

即應全行錄送何以以前此僅將朕特恩留任之案開呈此非尋常錯誤可比明係該司員有心徇庇呂光亨故為避重就輕所有承辦司員著交部嚴加議處至檢查案卷雖係司員經手但在京各堂官所司何事並不悉心詳閱著一併交該衙門察議○吏部議覆湖北巡撫程燾奏稱武昌黃州二府屬江面盜竊之案向歸各州縣承緝嗣改設武黃同知將沿江之黃岡蘄水廣濟蘄州黃梅大冶武

昌興國等八州縣捕務均歸管轄查所轄江面六百四十餘里該同知駐劄廣濟呈報踏勘往返需時請仍歸各州縣就近查報承緝同知統為督催等語應如所請該同知既專司捕務除督催外仍一體偵緝逾限不獲與州縣一例處分從之○廣東巡撫鍾音疏報乾隆三十二年分文昌縣報墾額內荒蕪熟稅六頃七十畝有奇廣州潮州肇慶雷州四府屬報墾額外荒蕪稅十六頃七十四畝有

奇廣州雷州二府屬墾復下則屯稅二頃五十五畝有奇○是日駐蹕要亭行宮○乙巳上御行殿勾到廣東福建情實罪犯停決廣東斬犯六人絞犯三人餘八十八人予勾○諭軍機大臣等昨據溫福奏昌吉屯所遣犯糾眾戕官搶奪官物其向東來之賊伊親身勦殺生擒至向南逃去之賊差派官兵追趕奏到時即降旨吳達善等嚴緝矣今據福僧額奏稱所差官兵遇見騎馬賊十名止射死一

名烏魯木齊兵丁趕往擒獲一名外餘賊俱逃等語。福僧額著嚴行申飭。此等賊犯非尋常人犯可比。甚屬可恨。必須全獲正法。俾各處遣犯知懼。著再傳諭吳達善溫福存泰福僧額文綬等。凡賊犯所行隘口要路加意堵截緝拏。拏獲時伊等互相行文查對冊檔務須全數拏獲正法。如有一名漏網查明何處逃脫。惟該處大臣是問。○是日駐蹕密雲縣行宮。○丙午諭軍機大臣等據馮鈐奏桐城

縣拏獲匪犯丁文學搜有刀藥辦尖等物容俟解到江寧會同督臣研審等語。此案業於高晉前奏摺內批令如得實情迅即奏聞。迄今又逾數日。高晉諒已回省會同馮鈐詳悉研究。是否實係割辦正犯應已得有端緒。所有該犯供出之鳳臺縣僧人引峯潛修曾否弋獲到案俱著即行據實馳奏。尋高晉奏引峯潛修二僧行查鳳臺縣並無其人。丁文學尚未解到。臣因淮城運河漫口赴工堵築。札

致馮鈐俟該犯解到確審具奏報聞。○又諭據阿思哈奏汝陽縣拏獲民人周世祿聚眾念經許州拏獲民人徐國泰等形跡可疑。續據祥符等縣拏獲入教之過永城等二十七犯並於徐國泰過永城家起出鈔書鈔單等件。語多悖謬。徐國泰復自造歌詞肆行煽惑以致陸續入教者竟有七十餘人之多。現在嚴拏審擬等語。徐國泰等以邪教餘孽仍復引誘愚民且敢造作逆詞妄傳惑眾實為罪

不容誅。著傳諭該撫定擬此案應照大逆例辦理。不得少存姑息。至此等奸徒聚集形跡詭秘割辦匪犯未嘗不可由此蹤跡蓋割辦之人尚非巨魁必有奸徒包藏禍心暗中主使分布黨羽欲以此擾害閭閻使民間驚恐不得寧帖。或至激而生變。彼則從旁逞願其情甚為可惡。大抵不出於僧道異端及如前此曾靜輩讀書失志之人而邪教敢為悖逆詞語傳播聳誘其行徑較為相近。該撫可將

現獲各犯悉心根究。若稍有端倪。即從此追尋根線。或能究得首惡。亦未可知。無任狡展脫卸。如審有確據。即速據實奏聞。若實在訊無別情。即就本案從重處治。著將此傳諭阿思哈知之。尋奏徐國泰等審非割辦匪黨。悉心究訊。實無端倪。應就邪教本案嚴審辦理。報聞。○命正白旗護軍統領烏勒登兼管滿洲火器營事。○鑄給山西大同府管糧水利通判大同府分駐豐鎮理事同知各關防。從

巡撫蘇爾德請也。○是日駐蹕南石槽行宮。

○丁未。

上迴鑾奉

皇太后居暢春園問

皇太后安。○詣

安佑宮行禮。○幸圓明園。○戊申。

上詣暢春園問

皇太后安。○諭據高晉等奏洪澤湖水於九月十四日加長。分注運河。夜間因東北風大。致

將裏河南岸王家田頭迤上之隄工漫決十五丈。現在搶築工竣等語。已於摺內批飭矣。洪湖於九月間水既加長。至在在盈隄拍岸。如能及時展拓清口。使宣洩通暢。亦何至有漫溢之事。前於七月間高晉等奏本年清水未長。東西壩口門戶未經折展一摺。即諭伊等以前此南巡時。令視五壩水誌。開清口以洩尾閘。原專為洪湖異漲而設。如果黃強清弱。自當收縮清口。以為抵禦。將來洪水或復

長發。則又當按度情形。再行展拓。此等消息機宜。差之毫釐。謬以千里。全賴河臣隨時籌酌。悉心妥辦。朕豈能一一料及。豫為指示於千里之外。而為河臣者。又豈可膠柱鼓瑟。必待朕指授機宜。方為辦理。前降諭旨甚明。高晉等覆奏。亦自稱此後當時時籌度。不敢稍誤。何以當此清水驟長之時。竟不豫籌妥辦。所司何事。高晉李宏著交部嚴加議處。其該管道府及文武員弁俱著交部察議具奏。○

緩徵江蘇常州揚州二府屬本年水災漕糧○已酉諭曰軍機大臣查奏吏部考功司檢查學政處分一事內有聲明檢查案件滿司員俱不經手之語此係向來辦理錯誤各部承辦案牘滿漢司員俱係公同書押議行若因檢查漢字成案滿員竟不與其事由此例推則漢員亦必以滿文案件自行委卸且畛域一分則滿漢各司其局其中徇徇把持尤易滋生弊端不可不防其漸吏部此案因傳

諭詢問始知相沿陋習之非其各部院似此者恐復不少嗣後各衙門無論滿漢案件俱著專派滿漢司員各一人公同檢查辦理著為令○又諭前因匪犯偷割髮辮一事傳諭各該督撫率屬悉心緝捕務盡根株此事蔓延山東直隸各省而江浙實為首先發覺之地為大吏者果能一有見聞即行嚴督地方有司實力擒拏自可得其端緒正犯不致漏網乃始則因循貽誤不即據實入告希冀化

有為無及朕嚴切訓諭始行飭屬查辦雖據山東安徽江浙各有所獲朕恐其中有刑求屈抑者因命提犯解京質訊經軍機大臣會同刑部步軍統領衙門詳悉研鞫則供詞多涉游移並有畏刑屈指者可見各該省隱瞞於前復又塞責於後而實在首惡究屬未得徒使差役四出滋擾閭閻於政體殊未允協此案現在竟可無庸查辦其江浙兩省養癰貽患之督撫有司不可不明示懲創以飭吏

治高晉明德彭寶馮鈐熊學鵬永德等俱著交部嚴加議處至蘇爾德在江蘇最久漸染惡派錮習尤深此案初發既不行陳奏及擢任山西巡撫該省犯案累累仍復踵其故智不知悛改此豈可副封疆重任貽誤地方蘇爾德著以按察使銜前往新疆與五訥璽更換辦事吳壇素日辦事尚知黽勉在江蘇到任未久而督辦亦屬延緩著與浙江前任按察使馮陽永禕現任按察使曾曰理一併交

部察議。至邵大業。申夢璽。乃屢經獲罪。復用之員。在江南久任方面大員。號稱能事。其實薰染上和下睦之頽風。素性模稜兩可。謂可自居無過。從不肯實心任事。以致地方釀成匪案。又一切置之不問。其情更為可惡。俱著革職。發往臺站。効力贖罪。所有江浙承辦緝犯。旋告旋釋之州縣等官。均著交與該督撫逐一查明。請旨革職。仍出具考語。送部引見。再降諭旨。○諭軍機大臣等。查拏割辦匪犯

一事。始因江浙等省。不知及時查辦。早絕根株。以致蔓延各省。經朕疊降諭旨。上緊緝拏。各省地方官。又復辦理不善。所有拏獲到官之案。不無刑求者。因命提解來京。則供情多涉游移。俱非首惡正犯。多有累及無辜之事。此皆江浙地方官。養癰貽患之所致也。如再紛紛緝捕。徒為閭閻滋擾。於政體殊為未協。現已明降諭旨。將此事停止查拏矣。但封疆大吏。或因有此旨。自幸可以息肩。遂不留心

體訪。則大不可。且此等奸匪巨惡。探知躡訪嚴密。因而銷聲匿跡。及聞禁網稍寬。勢必形跡踈漏。轉致易於敗露。該督撫仍當密飭所屬。時刻設法根尋。一得正犯根線。即為迅速擒治。庶可緝匪安良。而前愆亦可藉以自贖。著將此傳諭知之。○又諭據觀音保奏。奉旨勾決官犯吳龍光時。因臬司周元理公出未回。觀音保即親往監視行刑。一摺。所辦甚是。藩臬均駐省城。事同一體。原不應稍存彼此

之見。嗣後各省官犯勾到時。如臬司現在省城。自當遵旨親往監視。專摺覆奏。或因公出省。即著藩司代辦。仍行具摺奏聞。著為令。將此遇便傳諭各省藩臬知之。○又諭昨據尤拔世奏。前在九江關任內。並無另徵餘平銀三分。並稱伊係接唐英之任。伊子寅保係代辦之人。其任內曾否另行徵收。現可詢據等語。因令軍機大臣傳詢寅保。亦據稱向來彙總彈兌時。或間有平餘。然並無於正耗外另

定分數加徵之事。所有尤拔世原摺及詢問寅保情節俱著鈔寄吳紹詩令其一併查辦。將此傳諭知之。○又諭前因江浙現有查拏割辦匪犯一事。諭令崔應階以巡查為名親赴浙省密行查辦。該督接到諭旨。自應即日起程。著再傳諭崔應階一到浙境。即將巡撫印務暫行兼署。永德著即來京。陸見將此并諭永德知之。○以前任廣西巡撫鄂寶為山西巡撫。○正白旗領侍衛內大臣達色休致。

以西安將軍福祿為正白旗領侍衛內大臣。調黑龍江將軍富僧阿為西安將軍。以前鋒統領傅玉為黑龍江將軍。正白旗護軍統領烏勒登兼管前鋒統領。○調寧夏將軍穆爾泰為杭州將軍。以涼州副都統偉善為寧夏將軍。○命鑲藍旗蒙古都統色布騰巴勒珠爾鑲白旗蒙古都統扎拉豐阿管理健銳營事務。○停徵湖北孝感京山安陸雲夢應城應山六縣武昌武左二衛德安所本年旱災。

應徵地丁屯餉錢糧。○庚戌諭前據吏部議覆吳壇條奏卓異即陞之知縣陞任京員者於引見時聲明如有才具出眾之員另以同知知州等官陞用。已依議准行。但此等卓異即陞人員其中果有才具出眾者該督撫早應題請擢用。即陞任京缺時其中遇有實在人地相需者亦未嘗不可專摺奏留。若必另立科條於引見陞授京職人員一一聲請簡定事例既屬紛繁兼恐耽戀外任之人意存冀倖於政體官方均無裨益嗣後仍著照舊例行。所有陞任京員聲明請旨之例著停止。○諭軍機大臣等據崔應階等奏福建海澄縣境內有被割髮辮三人現在飭屬查拏等語已於摺內批諭應竭力飭屬查辦以靖地方。但所奏被割之人先聞背後說話看時又無人跡之類其語頗涉奇誕未免傳聞附會過甚即或有之而督撫等身司法紀惟當以緝匪安良為事豈可因此稍涉游移啟有司

胥吏等藉詞委卸之漸。前曾傳說被割之人。恐毒氣傳染。竟將辦根全行剃去者有之。此其中必有惡匪。包藏禍心。將此說潛行傳播。以為髮辦全去。即非滿洲臣僕。用此煽惑人心。後經密行飭禁。被割者並自無恙。著將此傳諭崔應階等。即行訪查閩省被割之人。有無將辦根全剃之事。並有無傳播此語之人。通飭各屬。令地方官。諭百姓。以辦尖被割。斷無致死之理。不可輕信妄言。擅剃辦根。如執迷不悟。一經查出。將本人及代為剃辦之人。一併究處。庶得事理之正。至此事蔓延各處。皆因江浙兩省。首先發覺之地。不能及時查拏。以致養癰貽患。及山東等處。所獲各犯。解京質訊。供情又多狡展。並非首惡正犯。徒使差役紛紜四出。累及無辜。殊於政體未協。昨已降旨。將江浙督撫等。分別處分。並通行停止查辦。仍諭各該督撫。一面悉心密訪。根線。毋得因此稍有懈弛。著一併詳諭崔應階。

鄂寧知之。○兵部等部議。覆閩浙總督崔應階等奏。部議裁汰福州將軍標左右二營官兵案內。實應裁兵一千五百五十三名。未能一時盡裁。請照從前辦理出旗漢軍之例。於督撫兩標城守兩軍及附近各營。遇有千把外委缺出。即將裁弁拔補。其兵缺視各營缺出多寡輪補。應裁副遊都守各員。仍照原議辦理。至將軍副都統衙門額設書吏。各裁一半。均應如所請。從之。○以奉恩將軍德克精

額弟敏俊襲職。○辛亥。

上詣暢春園問

皇太后安。○詣

大高殿。

壽皇殿行禮。○還宮。○諭軍機大臣等。巴爾品奏。近日哈薩克阿布勒比斯來文。殊欠明晰。且有交付字樣。業經所呈文件。分別申飭等語。所辦甚是。阿布勒比斯果形驕蹇。即非承受朕恩之人。自應明白曉示。嚴行申飭。但兵

弁等亦須嚴加約束。如近日喀爾喀卡座人等盜取哈薩克馬匹一事。設非經朕洞鑒嚴行查辦。哈薩克等不幾至被誣乎。著傳諭巴爾品加意彈壓兵弁。如有盜竊等事。一面奏聞。一面從重治罪。不可姑息。○又諭曰永貴等奏據素勒坦沙所使探信人回稱愛烏罕之兵已退。素勒坦沙收復拜蘇巴特等城。臣現使人前往探聽。並令訪布拉呢敦子薩木薩克下落。又額敏和卓現亦寄書詢問素勒

坦沙等語。愛烏罕之兵既退。素勒坦沙游牧已復。即可完局。不必遣人探問。素勒坦沙素性每欲爭奪土地。此次收復游牧後。倘不知足。欲請兵進取。永貴等斷不可許。務駁回以絕其望。再布拉呢敦之子下落。亦不必訪查。即使薩木薩克來至巴達克山。豈能至喀什噶爾葉爾羌乎。即使能至。亦無難臨時拏獲。再永貴等寄書於素勒坦沙。何妨公同列名。乃僅書額敏和卓者。蓋恐素勒坦沙請兵。難

以駁回耳。此又過慮矣。葉爾羌現無應辦事件。永貴常駐彼處。反覺聲張。著即回烏什。俟舒赫德到時。交代來京。○調工部尚書蔡新為刑部尚書。以河東河道總督嵇璜為工部尚書。江蘇淮徐道吳嗣爵署河東河道總督。○壬子。

孝慈高皇后忌辰。遣官祭

福陵。○諭軍機大臣等。據定長等奏查審道人鄔文才等五名。俱係遊方賣藥。實非割辦匪黨。並查驗袁加九所帶藥料。一係熬熟硫磺。一係整個澤瀉。並非麻藥等語。該犯所帶藥味。既驗係澤瀉硫磺。前此何以竟指為麻藥。著傳諭定長等查詢原拏兵役。究其因何知係麻藥。曾否試驗。有何憑據。據實訊明。以成信讞。仍將訊明緣由奏聞。○又諭據阿思哈奏查拏普潤所供之張文棟。張明等業經差員赴固始縣逐細搜查。並無張文棟其人。并無翦割髮辮。邪書符藥器具等物。又經查出

名姓相同之張明。現有兩人。俱無同夥。翦辦之事一摺。看來普潤所供全無指實。其中必係平日素有嫌隙。是以到案誣扳。冀圖陷害情事。前經傳諭定長等。令將普潤一犯解京候訊。著傳諭阿思哈。飭查探聽。此時如已過境。則已。若尚在豫省之南。或未出該省境內。即著阿思哈就近截留提訊。是否仇扳。或別有緣由。即詢取確供具奏。毋庸解京辦理。至摺內又稱普潤所供。歷歷如繪。似非憑空捏造。現今藩司星往該縣嚴拏匪黨等語。不過因朕屢次傳諭。是以如此措詞。以見其實力查辦。初非由衷之言。將此一併諭令知之。○又諭。據定長等奏。拏獲傳貼謠詞一案。係黃國中在黃佑均之甥王輔翼家。見伊妹夫楊大章。携有此詞。因取帶在身。轉給李天佑等語。此案造作謠詞。編寫異字。既經逐節追尋。黃國中得自楊大章。則楊大章正係案內緊要之犯。是否首先編造。抑或另有轉相傳述

之人。俱不可不嚴切根究。務得確情。現在曾否拏獲楊大章及黃佑均。王輔翼到案。訊取實在情節。俱著該督等。即行據實具奏。尋奏楊大章黃佑均。王輔翼等業經拏獲。嚴訊均係轉相傳鈔。並非首先編造要犯。應照例分別杖責發落。其正犯再行訪緝。報聞。○又諭。據阿思哈奏。拏獲桐栢縣民人劉天祥。項得臣等五犯。演傳天主教一案。訊據劉天祥供稱。俱係原籍湖廣。遷居桐栢。其同教之袁鬚子。在京城南天主堂住。因回湖廣。經過桐栢。勸人興教。所獲監正諭單一張。係袁鬚子自京帶給湖廣會長劉天相。照鈔收藏。又據項得臣供稱。湖廣隨州會長王象昇會內之人。在桐栢往來行走等語。袁鬚子一犯已交步軍統領衙門就近查拏。但該犯既有曾回湖廣原籍之供。則本地並應一體躡緝。其會長劉天相王象昇等。皆係案內要犯。著傳諭定長。即行密速訪拏。並此外有無同夥。一併查

緝。遣員解赴河南。併案研鞫。無使免脫。遠颺並傳諭程。盡知之。○又諭曰。定長等奏。拏解革職總兵顧鉉一摺。內稱查詢顧鉉。別無登答。惟喊妖說怪。毫無倫次。患病情形。似非虛飾等語。顧鉉即係病狂喪心。一時不能詢得實情。而其父顧國泰。現在伊子任所。並未瘋迷。且摺片內。自稱係乾清門一等待衛協理。光祿寺卿。有何憑據。甚至將自作詩集。封函由驛八百里馳進。荒誕乖張。至此。是誠何心。

定長接奉諭旨。令其就近查奏。何難逐一詢問。乃摺內並未提及一語。甚屬糊塗不堪。所辦何事。著傳諭定長等。即將顧國泰提詢速行覆奏。仍遵前旨。將顧國泰革去頂帶。一併送京。尋奏。前次奉旨後。即將顧國泰革去頂帶。提省親驗。實已年老癱廢。問之。不知對答。其請安等摺。查係顧鉉所為。其自稱侍衛一節。據顧鉉之妻馬氏稱聞。係癸巳年武進士。癸卯年加光祿寺卿銜。甲辰年致仕。然係聽

聞。並無憑據。其在伊子任所。尚無滋事之處。業於九月二十八日。委員送京報聞。○又諭據阿里衮奏。蠻遮頭目金猛。將緬匪所給猛古攏夷書信。送至永昌。看其人尚明白。因遣回。令其探賊消息。八月二十日。緬匪又遣人前來。問前次遣人請和之信。並探問大兵曾否增添。當將金猛喚至永昌。詢問賊人作何防備。據稱不能深知等語。近邊攏夷。殊難憑信。既可送信與我。亦可送信與賊。若必向伊諄諄問賊消息。恐攏夷土司。疑我有急欲了事之意。私通賊信。殊為未協。惟外示靜鎮。不動聲色。則賊匪莫測淺深。著傳諭阿里衮。明德賊匪。若遣頭目到邊。請罪乞降。即將所差之人送京。若祇遣人試探。不必問其動靜。惟示以必進兵之勢。○正白旗都統奏。補宗室閒散佐領。得旨。此等章京。係因宗室。按佐領品級。特恩賞給之官。不宜稱閒散佐領。嗣後著改寫四品官。缺出。將應否承襲之處。照例

具奏請旨。○調雲南楚姚鎮總兵哈國興為普洱鎮總兵。以雲南督標中軍副將孫爾桂署楚姚鎮總兵。○是日起。

上以孟冬享

太廟。齋戒三日。○癸丑。諭軍機大臣等。前以四川秋審人犯。經九卿從緩決。內改入情實者。至四案之多。已傳旨將該督阿爾泰申飭矣。各省秋讞。固由督撫題達。而定擬審轉。則係臬司專責。費元龍向非朕所深悉。因劉藻屢

稱其人。遂加遷擢。該員前在廣東任內。所辦刑名案件。多未允協。即如陳阿夏赴京呈控一案。刑部奏明派司員前往覆審。始得實情。曾將該按察使議處。是其為人。操守或尚謹飭。而姑息邀名。漸染外吏之習。殆所不免。司道等大員。官階既高。俸入亦厚。當此官方肅清之時。誰不知慎持防檢。第專務名高。而於地方政務。不能實心妥辦。豈得以小廉曲謹。遽可藉口勝任乎。著傳諭阿爾泰將費元龍

在四川臬司任內。平日居心辦事實。在如何。并果否勝任臬司之處。著即據實覆奏。若稍意存瞻顧。亦難逃朕洞鑒。○又諭本日戶部議覆李侍堯回奏。粵海關稅餉。彈兌短少。緣由一摺。已降旨依議行矣。但其中原委殊難明晰。該關起解課稅。如果照依部頒法馬足數。彈兌自不至解京時兌收或有短少。即有虧缺。亦何至至六千四百八十餘兩之多。且添平一項。每千兩覈准十五兩。各關俱畫一定

例。何該關獨有不敷。尚須另備添平銀兩。以致歷年牽混開銷。又各鞘所短少之數多寡。大相懸絕。更不得藉口於一時之手重手輕。所致據銀庫詢之解員。領解時從數百餘鞘中抽兌十餘封。已有短少。則其未經抽兌各封短少之數。均可例推。此或該關恃有鞘外添平一項。於入鞘之銀。並未彈兌足數。亦未可知。否則各關同此部頒法馬。內外自應同此兌收。粵海一關稅餉起解。豈自今日始乎。

何以該關餉鞘。兌收獨多虧缺。今雖經該部定議。將該關節次短平銀兩覈追。行令嗣後照各關之例。畫一刪除鞘外加平名目。而該關從前究係如何辦理。致屢有短少。何以同一水脚歸公。各關俱已遵行。而該關獨致辦理周章。該督覆奏時。因何轉謔之解員。并請嗣後徵收稅銀。照依解部法馬足兌。種種情節。俱不可解。著傳諭李侍堯再行詳悉確查。據實明晰覆奏。尋奏兌銀衰鞘。實無別情。惟

實錄卷八十九

幸

添平一項。近因水脚歸公。以致逐年解銀短少。而此次所解正餉。較前幾倍。是以短平之數尤多。至前次覆奏言及解員。誠恐其中途有弊。今既經部查明。所有兌少銀。自應令該關補解。其鞘外加平。久奉部行刪除。獨粵海關辦理未能畫一。請嗣後起解時。照部定章程。逐一兌足。毋許臨時抽兌。報聞。○吏部議山西學政御史呂光亨失察生員張廷瑞。編造逆詞。應照例降調。得旨。呂光亨著降三級。

調用。○又議湖北均州知州馬伯輅。四叅限滿承緝不獲。照例降調。應令該督出具考語送部引見。得旨。馬伯輅係兩次降調之員。該部帶領引見時。提奏。嗣後似此兩次降調之員。該部帶領引見時。俱行提奏。○以侍講德昌編修彭元瑞。饒學曙。俱充日講起居注官。侍講達椿。洗馬那穆齊禮。編修沈初。俱署日講起居注官。○旌表守正捐軀之廣東鎮平縣民邱存灝妻古氏。○甲寅。

實錄卷八十九

幸

孝敬憲皇后忌辰遣官祭

泰陵。○諭軍機大臣等。前據李侍堯奏。裁汰內河槽槳船四隻。共止估銀八十餘兩。並未將原造價值若干聲敘。因降旨該督查覆。今據奏到此項船隻。共原造工料銀二百八十餘兩。現在估變銀八十餘兩等語。此項估變船價。較原造銀數。已逾三分之一。自可毋庸查辦。若前此浙省估變船隻。較原造價值十分中尚不及一大相懸殊。果查出承辦道員方

桂朦隱情弊。即將伊革職治罪。是估變時總當視原值為衡。方可定其有無侵隱也。著傳諭各督撫嗣後遇有奏聞估變案件。即將原造價值隨摺聲明。以便覈定。著於奏事之便傳諭知之。○又諭據增海奏廣州八旗滿洲兵內現查明披甲幼童二百二十九名。其中復有領雙分錢糧者一百三十六名。請即革退。其孀孤無倚之九十三名。請照現由天津撥來養育兵之例支給餉米等語。著照所奏

實錄卷一百九

聖

辦理。各省駐防兵特為防守調遣而設。理應挑取年力精壯者。豈可以不能騎射之幼童充數。今廣州挑補幼童至二百二十九名之多。甚屬非是。從前將軍大臣等所司何事。著交李侍堯增海查明此項糜費糧餉確數。著落歷任將軍大臣等賠補。再各省駐防亦不免有似此者。著交各該督撫將軍副都統等查明據實奏聞。○勅諭哈薩克阿布賚曰。前以厄魯特台吉蒙固勒捐軀行陣。聞伊弟綽

諾寄居爾處。因那旺查辦邊卡之便。向爾詢問。爾即將綽諾送出。並派人同那旺至京。朕甚嘉之。經朕加恩將綽諾承襲伊兄之職。賞戴翎頂。並恩准留京。綽諾係爾養子。爾如思念。越數年可命綽諾暫歸省視。今加恩賞爾蟒緞粧緞各一。錦緞八絲緞五絲緞各二。爾接奉朕旨。益當恭順誠切。以期永沐朕恩。特諭。○是月兩江總督高晉江南河道總督李宏奏河庫道庫向未定盤查保題之例。請嗣

實錄卷一百九

聖

後令河臣督臣盤查。如無虧空據實保題。一有侵那立即嚴叅。又洪澤湖救生樁當設立之初。因其時湖水散漫。舟行危險。近則全湖俱歸清口。並無多危險之處。而救生樁每年仍照額發辦。徒滋糜費。請嗣後照歲搶工程委該管道查勘。將無關緊要處槩停。其必應留存者。確切估辦。得旨如所議行。○江西巡撫吳紹詩奏南安府屬上猶縣營前地方山場寬廣十餘里。鐵砂遇雨自山流出。附近貧

民淘取。每名每日可得砂百觔。請召募殷實商人。設廠收買。置鑪抽稅。令該處縣丞就近管理。報聞。○浙江巡撫覺羅永德奏。浙省需用硝觔。向俱附同營硝。由杭州協委員赴江豫等省採買。嗣因該省產硝稀少。據傾銷餉課之銀匠等。呈請自備資本。隨同營員前往買運。濟用。詎各匠自此以後。遂爾居奇壟斷。應請革除官匠。停其自買。仍照舊歸營採辦。得旨。如所議行。○湖廣總督定長湖南巡撫

實錄卷八百十九

五

方世儒覆奏。永州鎮總兵顧鉉。平日居官尚無乖謬劣蹟。報聞。○兩廣總督李侍堯廣東巡撫鍾音議覆。廣東布政使歐陽永禔奏。請調劑排徭一摺。查排徭為連州暨連山縣所屬。分八大排。二十四小排。又分出三十二沖。現在生齒日繁。地不加廣。似應設法疏通。此內惟沖徭質近淳良。可以稍寬禁令。遇有願遷外地者。聽其陸續出排。編歸民籍。至八大排及二十四小排之徭。止可許其分戶歸沖。

不得遽令越居民境得旨。如所議行。○貴州巡撫良卿奏。黔省現無訛傳割辦之事。得旨。實無此事乎。抑仍是欺飾乎。且吉林已有而內地反無。朕不能信也。

實錄卷八百十九

五

大清高宗法天隆運至誠先覺體元立極敷文奮武孝慈神聖純皇帝實錄卷之八百十九

大清高宗法天隆運至誠先覺體元立極敷文
奮武孝慈神聖純皇帝實錄卷之八百二十

監修總纂官學士太子太傅文淵閣大學士文淵閣領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領侍衛內大臣稽察欽奉 上諭事件處管理理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆三十三年戊子冬十月乙卯朔享

實錄卷八百二十

太廟

上親詣行禮○遣官祭

永陵

福陵

昭陵

昭西陵

孝陵

孝東陵

景陵

泰陵 遣官祭

孝賢皇后陵

端慧皇太子園寢 頒乾隆三十四年時憲

書 丙辰

上御乾清門聽政 諭軍機大臣等前據定長

程燾奏稱湖北省安陸雲夢等州縣因得雨

未足收成不免稍歉俟確勘情形再為酌量

辦理至今未據將如何分別賑卹之處奏聞

各該州縣間被旱災秋收未能豐稔民力自

實錄卷八百二十

二

不免拮据該督撫自應飭屬速為勘查妥辦

無致稍有失所著傳諭定長程燾即董率各

屬詳勘被旱處所是否成災尚有需賑卹緩

徵及借給籽種之處迅速據實覆奏候朕酌

量加恩降旨 又諭今歲山東河南兩江等

省州縣間因得雨稍遲收成不無歉薄業經

節次降旨分別賑卹緩徵其直隸省霸州等

處又因秋雨稍多間被淹浸亦諭令該督即

行勘查加意撫綏無致閭閻失所各督撫等

自當遵旨實力妥辦。但恐被災稍重處。所明歲青黃不接之時。民力未免拮据。著傳諭各該督撫。將被災州縣。明春是否尚須加賑。或借給籽種之處。詳悉查勘。據實奏聞。候朕酌量加恩。以內閣學士伊克坦布為戶部右侍郎。以左副都御史蔣元益為內閣學士。兼禮部侍郎。仍兼管順天府府尹事務。以通政司副使葛峻起為順天府府尹。旌表守正捐軀之廣東鎮平縣民邱存瀨妻古氏。

○丁巳諭曰。副都統那旺著賞銀一百兩。速赴游牧整裝。明歲攜眷前往伊犁。○大學士等奏校對順天闡墨筆跡。並無冒替換卷等弊。得旨。嗣後校對順天闡墨筆跡。不必另請派人。即著派出大臣磨勘時一併校對。○以領侍衛內大臣公嵩椿為正紅旗蒙古都統。以原任廣州副都統曹瑞為正紅旗漢軍都統。仍兼署鑲紅旗漢軍都統。以正白旗蒙古副都統伊松阿。正藍旗蒙古副都統常

福對調。戊午。上御懋勤殿。勾到奉天。陝西。朝鮮情實罪犯。停決。奉天斬犯一人。絞犯十四人。朝鮮絞犯一人。餘五十七人。予勾。○諭。昨日召見新放武漢黃道溫。葆初。據奏。伊胞兄溫葆經。原任吏部驗封司員外郎。乾隆十六年。考功司查辦廢員劉光訓一案。錯誤。吏部正欲檢舉。適有御史黃登賢。奏。吏部堂官遂疑溫葆經。與黃登賢至親。先行洩漏。因將溫葆經獨擬革職。并稱。溫葆經原係驗封司員外。考功司辦事錯誤。與彼更屬無涉等語。朕聞之深為駭異。若果如所言。則吏部堂官可謂有權。率此以往。勢將何所不至。即當查明重治其罪。以救法紀。而警官箴。然當此政治肅清之時。大臣等未必敢以懷私洩忿之事。在朕前嘗試。但既有此語。不可不徹底清查。以定真偽。因諭軍機大臣。交部檢查舊案。則溫葆經彼時兼辦考功司事。因伊戚劉光訓起廢一節。瞻

徇親情囑託同官以致朦混舛誤經刑部審明會同都察院將溫葆經問擬革職杖徒承辦各司員分別降調是溫葆經之獲罪實由自取黃登賢雖屬郎舅至親安肯以自作弊端向其吐露致為叅劾吏部堂官又何至轉疑溫葆經有從中洩漏之事曲為傾陷乎況此案係刑部會同都察院審擬完結若非溫葆經情真罪當何由按律問擬而吏部更何敢授意法司任情軒輊乎當日辦理情節毫

實錄卷一百一十五

無疑義溫葆初昨在朕前朦混陳奏希冀以一面之詞聳聽為伊兄開脫甚屬虛妄溫葆初著交部議處○又諭軍機大臣會同刑部審訊喜峰口監督德興虧空驛站銀一千六百餘兩問擬斬候請將原保之堂官交部察議其家產交理藩院堂官變價完繳一摺已依議准行矣監督虧空官項其保送堂官自有應得處分但彼在外管理關權該堂官無由前往稽查變價完繳之事豈可著為成例

即如喜峰口係熱河副都統所屬例得隨時察覈將來監督名下倘有虧缺之項應令該管之副都統賠補以昭平允至向來各省關務及織造兼管者皆經朕簡派前往並無兼轄大員若尋常稅口由各該衙門保送司員引見派往者該堂官相隔既遠無從查察自應另派所在大員兼管留心稽覈以重責成如該監督有侵蝕情弊叅處後不能完項者即著落該管大員代賠嗣後如何派令大員

實錄卷一百一十五

就近兼管及設法稽查之處著各該衙門詳悉定議具奏○又諭曰按察使圖桑阿著授為領隊大臣前往烏什更換永慶永慶即由該處赴伊犁換綽克托來京○諭軍機大臣等前日戶部奏閩海關盈餘短少請交該督撫查奏一摺已降旨令鄂寧查奏矣向來內地關稅短少尚可云年歲豐歉不齊所致而粵海關則視洋船進口之多寡為準至閩海關每年過關船隻向有定數外洋估舶每歲

常通其稅課自不應大相懸絕何以此次短少至一萬數千餘兩之多看來係明福來京陛見副都統達色接管時辦理不善之故今春將軍常在請訓赴任雖曾諭令密加察訪但常在由旗員出身此等事非伊所能查辦其覆奏委無情弊之處殊不足憑崔應階現赴浙省巡查且令兼署巡撫事務不能即時回閩是以交鄂寧查辦鄂寧前為雲貴總督辦事貽誤經朕格外加恩用為福建巡撫自

實錄卷八百一

七

應痛加改悔實心報効此事非伊力不能辦者務須徹底清釐據實覆奏若稍存瞻徇之見思欲顛預了事則是自取罪戾朕不能復為原宥矣著將此傳諭知之○又諭據方世雋奏拿獲川省逃兵田洪貴李興國飛催該省迅將原案查覆一摺該二犯現在作何辦理並未敘及所奏甚不明晰征勦緬匪兵丁臨陣脫逃遠匿情罪甚屬可惡前經降旨令該督撫等留心躡緝不拘何省逃兵捕獲即

行正法今湖南省既據四川綏寧營移緝將田洪貴等弋獲現有關拏原文可查其年貌籍貫一經覈實即應迅速正法以昭炯戒何必覆咨川滇二省往返移查使此等逃兵轉得遷延月日致稽顯戮所辦殊未允協著傳諭方世雋即遵旨辦理並傳諭雲貴川廣兩湖各該督撫等嗣後盤獲脫逃兵丁立時詳細研鞫審與移緝所開姓名年貌等項覈對無疑者即行按例將該犯明正刑章毋得輟

實錄卷八百一

八

轉咨查徒滋案牘著將此傳諭知之○已未

以冊封

慶貴妃

容妃

順嬪遣官祭告

太廟後殿

奉先殿○

上御太和殿視朝文武陞轉各官謝恩○諭曰

哈國興著補授貴州提督仍留軍營辦事其

雲南普洱鎮總兵員缺緊要著阿里衮明德於通省總兵內揀選調補所遺員缺仍於發往副將內派委一員奏聞署理○又諭曰阿里衮在雲南以副將軍辦理軍務滿洲兵丁固當隨時訓練所有雲貴二省綠營事務亦著一併管理阿桂到任後係以總督兼副將軍一切滿漢營伍自應一體統轄其保題將領拔補弁兵俱著伊二人公同商辦○諭軍機大臣等前以匪犯偷翦髮辮一事蔓延數

聖諭奉旨于

九

省節經嚴飭查拏並通諭各督撫一體訪緝遠如雲貴川廣近如盛京吉林均當早為究心豫行四面攔截庶奸匪不致逃匿稽誅嗣因山東江浙等省拏獲到官之案不無刑求者爰命提解來京質審而供情多涉游移總不得正犯根線外省地方官不能設法躡緝輒致累及無辜若再紛紛緝捕適為閭閻之擾是以明降諭旨停止查辦此等奸匪或聞禁網稍寬蹤跡轉因而疎漏則更容易就擒

因仍諭督撫等密為留心偵捕昨據將軍恒祿奏到吉林地方亦有割辮匪犯並傳有被割後剃去辮根即可不致傷生之語是匪徒分遣黨羽在外偷割又先布無稽邪說煽惑愚民率易墮其狡計且如東邊被翦西邊已哄傳翦辮者將至並教以辮尖被割須全根剃去方保無虞遂爾從風而靡此語斷不起自本地民人必係奸徒豫為驚恐傳播其情實為可惡皆督撫等所當設法豫防以靖地

聖諭奉旨于

十

方者現在各處偷翦之徒日漸效跡而未到之省分先應密訪嚴查如有妄稱匪徒將來本處又云翦辮後應行全剃者即將其人立拏根究悉心推鞠自可知其傳自何人聞自何處根線不難敗露其禁剃辮根一節前已通諭各該督撫等一併悉心辦理自應遵諭奉行總不得因奸徒現在懼拏竄避其風稍熄遂以自幸息肩卒致縱惡累民也著再詳諭各省仍一面飭屬密行體察是否尚有此

種流言惑聽之徒及有無拏獲曾否究得根由之處隨時具摺覆奏工部議准江西巡撫吳紹詩疏稱省城豫章古溝年久失修民居被淹現經紳士捐貲修濬請每年委南昌府通判經管撥役專司啓閉從之命內閣學士莊存與通政司叅議吉夢熊光祿寺少卿毛輝祖俱在尚書房行走免甘肅平涼靈臺莊浪安化合水環縣平羅西寧碾伯大通肅州高臺等十二州縣乾隆三十二年冰雹水霜災地銀五百兩有奇糧三千五百石有奇草三萬九百束有奇武威寧朔三縣水衝地二千二百二十畝零額徵並予豁庚申冊封

慶貴妃

容妃

順嬪命大學士公傅恒為正使內閣學士塔永阿為副使持節冊封慶妃陸氏為貴妃冊文曰朕惟襄化理於宮闈專資淑德

耀恩光於禕翟遞進崇階既珩度之丕昭宜綸音之載錫爾慶妃陸氏秉姿淑慎表範溫恭蘭掖承歡奉

慈徽而有恪椒庭佐治體朕志以無違柔嘉式九御之班已夙勤於表率令則協四星之位應晉被夫褒榮茲奉

皇太后慈諭冊封爾為貴妃尚其贊宣內職彌揚象服之華懋教芳儀永荷龍章之重欽哉命大學士尹繼善為正使內閣學士邁拉遜

為副使持節冊封容嬪霍卓氏為

容妃冊文曰朕惟禕褕著嫺克襄雅化於二南綸綍宣恩宜備崇班於九御爰申茂典式晉榮封爾容嬪霍卓氏端謹持躬柔嘉表則秉小心而有恪久勤服事於

慈闈供內職以無違夙協箴規於女史茲奉

皇太后慈諭冊封爾為容妃尚其仰承錫命最令德以長綏祗荷褒嘉劬芳徽於益懋欽哉命大學士陳宏謀為正使內閣學士栢琨為

副使持節冊封貴人鈕祜祿氏為

順嬪。冊文曰：朕惟職修婦學，聯九御以承恩。

譽起壺儀，迓百祥而贊化；爰昭寵錫，用煥新

綸。爾貴人鈕祜祿氏秉質柔和，持躬端慎，茂

繁禧於蘭殿，分秩內官，荷

慈慶於

璇宮，承華戚屬，茲奉

皇太后慈諭，冊封爾為順嬪，尚其祇崇令德，贊

盛敦以無違，式受鴻庥，膺翟禴而有恪欽哉。

書錄奉旨

主

諭昨據順天府奏本年鄉試取中美二十

號硃卷，誤將美十二號吳嗣德名姓填寫發

榜，請將吳嗣德除名，其美二十號之卷毋庸

議等語。吳嗣德既係誤中，自應於榜內除名，

至原中之美二十號其硃卷既經主司評閱，

取中填榜時未將紅號詳對，以致錯誤填寫，

其咎自在主司，與該生無涉。若因此竟為棄

置，未為平允。著禮部查對墨卷，係何姓名加

恩准作舉人。諭軍機大臣等據明德奏阿

里袞於九月十五日前往龍陵，因夫馬不敷

改至十八日起程等語。阿里袞等赴龍陵巡

察地方，若輕騎減從，不但便於行走，并可減

省夫馬。此或伊等沿照外省習氣，隨帶多人，

以致夫馬不敷。著傳諭阿里袞、明德、嗣後凡

遇巡察不得多帶人夫，致滋遲誤。再上年滇

省進兵糧餉，按日備辦，甚屬拘泥。從前平定

準夷回部、滿洲索倫兵輕裝前進，並未計人

籌餉，亦並未因餉不敷畧生退縮。而綠營兵

書錄奉旨

主

平時不知撙節，虛糜糧餉，一遇行陣輒畏縮

不前。似此等兵丁著阿里袞等明年進兵時

酌量攜帶，令充運糧看礮等役，庶不為其所

誤。一切務從簡便，毋再似前年按人籌餉，並

將此傳諭阿桂知之。又諭現在貴州提督

員缺已降旨令哈國興補授，其普洱鎮總兵

令該督等於通省總兵內揀選調補。所遺總

兵之缺仍令於發往副將內派委一員署理。

矣。前以阿里袞等奏請裁減總兵一事，因滇

省現議厚集兵力進剿逆匪未便明降諭旨。曾傳諭該督等將來遇有應裁總兵缺出或暫以副將委署是不必明裁鎮缺而隱已改鎮為協前令孫爾桂暫署總兵已照此辦理。此次調補總兵所遺之缺仍著派委副將暫署。方與改鎮為協之前旨相合著再諭阿里衮等知之。刑部議覆浙江按察使曾曰理奏請將積匪猾賊就現獲地方審辦不令開解別邑等語地方獲有竊犯若事涉隣境賊

據未確罪關出入自難遽定爰書應請嗣後地方官如拏獲積匪應擬遣者其供出隣省隣邑之案承審官專差關查若賊證相符即令拏獲地方辦結倘賊證不符或隣境人衆勢須移少就多者將必應移審緣由詳明僉役移解從重歸結如借端推諉希冀就事完結原審官叅處從之。辛酉。

上詣暢春園問

皇太后安。幸圓明園。

諭軍機大臣等據崔

應階等奏到臺灣竊賊黃教糾衆豎旗拒捕滋事隨經官兵追拏賊衆四散逃竄首匪尚未弋獲等語奸徒糾衆不法情罪可惡一經拏獲本應立正刑誅況臺灣遠隔重洋更非內地可比尤不當羈禁延緩致有疎虞至鄂寧所稱令解赴廈門質審未免拘泥成例此等匪惡渡海管解防範稍有未周或恐疎脫滋事著派余文儀前往臺灣將就獲各犯隨時審明即在該處正法示衆惟首犯黃教於獲到後多派妥幹員弁沿途小心押解交鄂寧嚴行審訊照例凌遲處死至現據奏到情節不但黃教未經弋獲餘黨之竄逸者尚多著傳諭鄂寧等即速嚴飭該處文武官弁於番界海口加緊防守無使兔脫遠颺務將各犯盡數就擒無使一人漏網又所稱臺灣內山係生番地面賊匪不能竄入揆度事理亦未甚當此等亡命匪惡避罪偷生鋌而走險急何暇擇設或冒死逃往潛匿山箐亦未可

知即當設法曉諭生番令其擒獻或酌量懸賞以勵番衆總期盡絕根株毋使稍留餘孽現在崔應階巡查浙江兼署撫篆不必回閩此案即著鄂寧就近辦理仍將曾否弋獲首夥幾犯之處速行據實具奏並將此傳諭崔應階吳必達知之又諭昨命永瑞五福駐兵九龍江一帶遇有緊要事件一面奏聞一面咨報阿里衮等並屢降旨諭令如有賊匪潛來即帶兵勦殺仍招撫降人以分其勢今閱時既久瘴氣已消伊等竟未將如何分兵駐劄賊匪曾否潛來作何勦殺之處逐一具奏朕業將此路專委伊二人總理豈得仍諉阿里衮等調度耶著傳諭永瑞五福務留心妥辦毋得觀望取咎並諭阿里衮等知之戶部議覆安徽巡撫馮鈐疏稱合肥壽州鳳陽懷遠定遠霍邱六安霍山泗州盱眙天長滁州全椒來安和州含山及廬州鳳陽長淮泗州滁州等二十一州縣衛所本年被旱應

徵新舊錢糧及節年民欠籽種口糧等項請暫停緩除成災各屬來春酌借一月口糧餘俱按月給賑各衛飢軍各學貧生一體散給缺籽種者銀米兼借並請將合肥等十六州縣本年漕項銀米緩至來年帶徵其上年緩徵漕米及未完漕項銀均緩至來年徵完應如所題得旨依議合肥等十六州縣并各衛屯田本年應徵漕項銀米及三十二年緩徵漕米未完漕項銀兩俱著照該撫所請速行撫卹長蘆屬滄州鹽山慶雲青縣衡水等五州縣巖鎮海豐興國富國豐財蘆臺等六場本年被水蟲災貧竈豁除甘肅肅州金塔寺等處原報開墾續被沙石鹹潮地九十

六頃四十畝有奇額賦旌表守正被戕之

河南信陽州民樂起貴妻尹氏

壬戌諭軍機大臣等朝銓題報素林在監病故一本殊

屬未協素林係婪受賄銀擬絞情實應行予

勾之官犯理應加意防護今乃令其在監身

故管獄官例有處分。朝銓何以不照例附參。且安知該犯非自揣罪在不赦。先期服毒殞命。冀逃顯戮。該侍郎於此種情節並未詳細研究。率爾具題。所司何事。著將此傳諭。朝銓令即明白回奏。尋奏查該犯係在監病斃。並無別故。臣未將管獄官照例叅辦。實屬未協。請交部從重議處。得旨該部察議具奏。又諭曰。阿思哈奏。匪僧普潤一犯。委員迎截。提解至省。與現在人証質審具奏等語。前曾降

旨。令該撫將普潤就近截留。訊取確供。毋庸解京辦理。今觀各省查辦割辦一案。督撫等每豫存畏難之見。不肯實心任事。及所獲各犯。供情多涉游移。又以誣拏塞責。其摺內竭力鋪張。皆非本心之語。情形殊不可信。著傳諭阿思哈。俟普潤解到時。即將應行提訊人犯就近質對。錄供奏聞。一面即將各犯派委妥員押解來京。聽候質審。又諭近因昌吉遣犯糾衆戕官一案。經朕降旨。令嚴緝務獲。

昨據文綬奏。尚有十名未獲。向北山逃走。今吳達善又奏。凡通蒙古要隘。均飭防範等語。此等匪犯既越北山。必由巴里坤竄入蒙古地方。著傳諭成衮扎布。存泰等於各該處要隘。速行嚴密查拏。勿令免脫。一經拏獲。一面奏聞。一面即行正法。癸亥。

上詣暢春園問

皇太后安。還宮。諭軍機大臣等。前據阿里

衮等奏。請於貴州四川湖南湖北等省各買

馬二千匹。河南省買騾四十頭。以備馱載之用。今先據阿思哈奏。稱令各州縣豫為購買。每騾一頭。先給銀六兩。烙印造冊。俟明年取用時。覆挑補價等語。辦理殊未妥協。已經軍機大臣議駁矣。軍營馱載馬騾。固當先期籌畫。但滇省尚非急於需用之期。自應各按情形。從容酌辦。若如豫省所奏。未免滋擾閭閻。未知川黔等省。現在如何辦理。著傳諭各該督撫。即行查明據實覆奏。尋湖廣總督定長

奏楚省先期籌備馬騾價值全給收槽後官為飼養四川總督阿爾泰奏動司庫存款豫發州縣備辦如期購足即於各該處牧養候解貴州巡撫良卿奏現陸續酌辦已得十分之五按馬給價並無滋擾俱報聞○軍機大臣等議覆塔爾巴哈台叅贊大臣巴爾品奏稱楚呼楚地廣田多請於烏魯木齊撥綠營兵四百前往耕種以裕儲積而備歉收著照所奏其應行移駐員弁即酌派遣往至該處

地界邊徼固應多存糧石倘貯久紅腐亦屬可虞著巴爾品俟屆每兵年滿將收糧若干存貯若干仍否需兵一千名之處通行覈計有應裁減者即聲明具奏從之○命鑲藍旗蒙古副都統巴圖濟爾噶勒管理健銳營事務○甲子諭曰伊克坦布現在雲南辦事戶部侍郎事務著索琳署理索琳未到京之先著喀寧阿暫行署理○諭軍機大臣等馮鈐奏審訊割辦匪犯丁文學並無確切供詞一

摺用六百里馳遞甚屬非是此等匪犯蔓延各省所在地方各宜實力躡緝不得僅以空言塞責如果拏獲正犯及訊出實在根線自應迅速奏聞若照常審訊並未得有確供何關緊要輒填發六百里之報甚不曉事馮鈐著傳旨申飭○吏部議准湖廣總督定長等奏稱桃源沅陵二縣為雲貴經由通衢差使絡繹仍改為衝繁難要缺又芷江縣接壤黔省經管五驛定為衝繁要缺均應在外揀調

又原定苗疆要缺之江華縣所管徭人久經向化郴州州判缺所辦錫礦事簡並改歸部選從之○乙丑諭軍機大臣等據承德奏逆倫正法之姚岳山一案有勅部查照之語甚屬非是此等逆倫重犯一經審實即行正法止須將辦理情節奏聞非比別項犯案尚須部議覈覆從前所降諭旨甚明即奏摺到日朕亦從不批發該撫豈有不知尚爾漫為此奏即謂地保等有隱匿不報等情亦止須照

例懲治不必存案斷無仍行交部之理永德殊屬不知事體著傳旨申飭以正藍旗滿洲叅領薩炳阿為涼州副都統旌表守正捐軀之山東鄒平縣民曹得福妻張氏丙寅

上御懋勤殿勾到湖廣浙江情實罪犯停決湖廣斬犯五人絞犯五人浙江斬犯八人絞犯一人餘六十人予勾諭曰高晉奏宿遷縣承辦城垣墮土陡直抵縫粗糙並所留走道過狹明係不照原估辦理乃於摺內聲明即在原估內通融改辦殊屬非是著派德成戈濤馳驛前往江南將現在工程與原估工料詳加勘覈據實奏聞戈濤現在福建典試竣事著即於回程之便前往會辦軍機大臣等議奏據閩浙總督崔應階議覆大學士陳宏謀條奏巡查海口船隻各事宜一閩浙二省沿海商漁船成造時報地方官給執照請仿江省定限一年一換應行查報出入口岸

大口五日小口十日由汛員彙送地方官註冊備考一向例船隻閩省用黑蓬白字浙省用白蓬黑字但不得專恃蓬色為別應仍令該管州縣及各口汛弁隨時查察一商船成造後租別人管駕令先報地方官再赴汛口取具互結倘在洋滋事為匪船主租戶問罪租戶遠颺船主是問一閩浙海洋口岸甚多倘守備等官不敷差遣應擇船隻出入較多處所委守備以上一員按月輪替其餘小口仍委千把防守責成該處鎮道稽查從之○兵部等部議准雲南巡撫明德咨稱現撥京兵四千名駐劄騰越龍陵思茅寧洱等處請蓋草房竹棚一千六百六十間以供棲止從之○丁卯諭前因山西學政呂光亨失察逆犯張廷瑞一事交吏部檢查辦過議處成案該司員等但查出馮鈴曾奉特旨從寬革職留任一案而於吳華孫李宗文等實降之案並未查送朕知其中必有瞻徇情事令軍機

大臣再行詰訊則係姚左垣於所管廣東甲內自行檢出此案馬道周又自以值日行文徑行封送而於各案等差俱置之不問因交都察院按例議處該衙門輒以姚左垣等與呂光亨並無同鄉年誼僅將姚左垣照推諉例議以降一級抵銷馬道周照不行詳查例罰俸一年夫有同年鄉誼者必應徇庇而無同年鄉誼者自不徇庇有是理乎姚左垣等雖與呂光亨並無同鄉年誼而所檢之案有意避重就輕其為徇庇更無疑義若非朕屢

經指出該部或竟從輕議結姚左垣等有不向呂光亨市恩結納者乎是伊等查案時彼此特相喻於不言之表以為巧於高下其手耳倘不照例議處將復何以示儆自來官官相護之習為害於官方政體者甚大不可不力防其漸朕於臣工功罪輕重一切惟其自取從不豫設成見此案已將擬議失當之都察院堂官交部嚴加議處姚左垣等均照改

議降調仍將前後緣由通諭中外知之諭軍機大臣等高晉奏勘驗宿遷縣新建城工一摺所辦非是該縣城牆裏面應用斜坡幫築今乃就勢陡直週城磚縫拘抵之灰亦屬粗糙所留走道又甚窄狹明係不照原估辦理該督既不將司事之員隨摺參奏轉於摺內聲明即在原估內通融辦理竟存將就了事甚非覈實辦工之道現已降旨派員前往據實詳勘具奏高晉著傳旨申飭○又諭刑

部審擬王三轉託保山縣家人王二售賣人獲各情節請交滇撫訊明王二確情分別發落一摺已依議行矣至兵丁邵良玉先經軍營報逃及在黔省被獲詭稱王三使令押送行李本屬狡展之詞今復據刑部審明王三並無令其同行之語是該犯實係逃兵當盤獲時捏供卸罪更無疑義著傳諭良卿速將邵良玉一犯嚴究在逃實情於該處即行正法嗣後緝獲逃兵務即嚴訊確供按例辦理

毋再似此聽其狡供稽覈戶部議准直隸總督楊廷璋疏稱直屬本年被水電等災請將最重之霸州保定安州靜海四州縣先給一月口糧並摘賑文安大城永清東安正定晉州藁城寧晉等八州縣極貧民其武清寶坻寧河清苑安肅新城博野望都蠡縣雄縣束鹿高陽新安獻縣肅寧任邱天津青縣滄州慶雲南和平鄉任縣成安曲周廣平豐潤玉田冀州武邑衡水隆平深州武強等三十

四州縣俟十一月起賑貧士旗竈俱一體辦理至涸出地畝貸給籽種應徵錢糧米豆等項并節年舊欠分別緩帶其河間鹽山二縣被災地畝俟勘明另題得旨依議速行前任山西巡撫蘇爾德疏報大同府屬豐鎮廳乾隆三十二年分開墾額外荒地三頃五十畝有奇以侍講褚廷璋為順天武鄉試正考官檢討盧穀為副考官調鑲白旗蒙古副都統弘旿為鑲黃旗滿洲副都統以頭等

侍衛宗室綿康為鑲白旗蒙古副都統○補行乾隆三十二年湖南省軍政年老官三員有疾官二員分別處分如例○旌表守正捐軀之廣東潮陽縣民陳阿興妻翁氏○戊辰上御懋勤殿勾到江西安徽江蘇情實罪犯停決江西斬犯一人絞犯六人安徽斬犯一人絞犯一人江蘇斬犯二人絞犯一人餘七十四人予勾○諭軍機大臣等前據李侍堯奏暹羅國夷目甘恩勅遣人至該督處具呈稱暹

羅為花肚番所殘破該夷目驅逐賊番即欲為該處國王並乞代奏請封等語當即代寫該督檄覆甘恩勅諭稿今即交來人齎回距今已及兩月彼處想應奉到未知此時曾續有回文遞呈該督否今據阿里衮等奏有守備程轍向為賊匪擄去今在阿瓦具稟將軍有暹羅欲圖恢復之語未稔該國實在構釁情形若何自應探詢的確昨河仙鎮目莫士麟將海外夷地繪圖並具暹羅情事差官齎

投已諭該督獎賞緞疋。河仙鎮與暹羅相近。得信較真。而莫士麟亦頗恭順明幹。著傳諭李侍堯即選妥實能事員弁。迅赴河仙鎮。向莫士麟訪問暹羅近日確情。令其詳晰呈覆。速行奏聞。又諭據阿里衮奏。結些現與緬賊構釁。當諭軍機大臣。擬寫傳檄文稿。發交阿里衮等揀選妥人。以將軍等之意。曉諭該夷。令其歸附中朝。以資驅策之用。繼思此時如即遣人往諭。該夷必以中朝先有急於招致之意。徒使中持兩端。游移觀望。將來即欲用之。轉致不能得力。現在莫如且為停止。俟該夷前來請附。然後將此諭知。則靜以待動。尤為適協機宜。著傳諭阿里衮等。自今彼處實在情形。只宜不動聲色。就附近一帶。遴委妥人探聽確信。以便隨宜應變。至緬匪如有入來懇乞投順。仍遵前旨相機辦理。將此詳諭知之。又諭前以緬寧地方緊要。宜令諳練之員前往。本進忠在軍營歷練多年。俟伊

到時。即著在彼駐劄。總兵范進文。曾否在軍前歷練。朕未深悉其人。著阿里衮等查奏。昨據奏請令范進文帶兵駐劄緬寧。僅將履歷奏聞。而於該員平素為人如何。能否轄兵之處。均未奏及。著傳諭阿里衮等。再行查明。遇便覆奏。禮部議覆。浙江按察使曾曰理奏稱。僧道中現執牒照者寥寥。皆由地方官不實力稽查所致。請令各督撫轉飭地方官。申嚴禁令。毋許私行簪剃。及違例招徒。至在籍僧道。應照保甲例。逐名造冊。每廟給門牌懸掛。同民戶查點。應如所請。從之。已已。諭據楊錫紱奏。楊家莊口門外黃水淤灘。回空糧艘不能迅渡。又因本年王家田頭漫溢。將來黃運兩河。恐不無淺阻。有礙明春重運等語。清口隨時收展。為黃運二河緊要關鍵。惟在河臣斟酌緩急機宜。庶無失時貽誤。本年夏間黃水勢盛。該總河等收束清口太遲。及秋月洪湖水長。又不能及時展拓。致運河有停

淤淺阻之處。而九月內王家田頭。復有漫工之事。今楊錫紱所奏。自屬實在情形。高晉李宏。何以不早行陳奏。況楊錫紱向來遇事持重。斷非張大其詞。好功喜事者比。此事頗有關係。應及時籌辦。大為挑挖。俾河身一律深通。無誤漕運。第恐高晉李宏。經理未能盡善。著派大學士劉統勳。前往查勘。侍郎期成額。亦著同往學習辦理。將應行疏濬事宜。會同高晉李宏。楊錫紱。悉心勘估。奏明興工。劉統勳。俟估定工程。即先行回京。仍留期成額在彼督工。所有隨帶司員。並著一體馳驛速往。

○吏部議奏。兩淮運使蔣賜榮。調任山東。泰州運判張景宗。非其所屬。無可迴避。應留原任。並請嗣後京外各官。先遇迴避。嗣因改調。無應行迴避之處。如缺出未補。即不必開缺從之。○禮部奏。冬至節。應行慶賀禮。得旨。奉皇太后懿旨。今年冬至。著停止行禮。

大清高宗法天隆運至誠先覺體元立極敷文奮武孝慈神聖純皇帝實錄卷之八百二十

大清高宗法天隆運至誠先覺體元立極敷文
奮武孝慈神聖純皇帝實錄卷之八百二十一

監修總裁官經筵講官太子太傅文淵閣大學士文淵閣領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領侍衛內大臣稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆三十三年戊子十月庚午

上御乾清門聽政 御懋勤殿勾到河南山東
情實罪犯停決河南斬犯一人絞犯三人山
東斬犯二人餘七十二人予勾 諭曰正藍
旗蒙古都統員缺著福永補授烏魯木齊提
督員缺著馬銘勲補授仍辦湖廣提督事務
俟李國柱回任時再赴新任其四川提督員
缺著董天弼補授 諭軍機大臣等昨覽阿
里衮等奏據守備程轍呈報緬匪將生內亂
如果屬實當有被擄官兵乘隙散出此等兵

丁非官員可比前因行陣之際受傷患病為
賊所掠究屬無罪著傳諭阿里衮明德侯伊
等散回時務宜加以撫慰妥送來京詢問賊
匪情形如人數稍多擇曉事者數名遣送仍
歸原營當差至如程轍等官員內有來歸者
亦不宜在彼處訊辦並著照料送京候朕辦
理另降諭旨 以宗人府府丞黃登賢為左
副都御史 辛未

上御懋勤殿勾到山西直隸情實罪犯停決山

西斬犯一人絞犯一人直隸絞犯二人餘八
十一人予勾 諭曰錢度奏賀縣疎縱逃軍
熊俊越獄脫逃一案請將典史謝霖革職拏
問而於知縣鄭之翀請革職留任殊屬非是
該縣監禁脫逃匪犯既不上緊辦理又不嚴
密巡防致要犯黃夜免脫非尋常疎縱監犯
可比自應將該縣即行革職仍留該處協緝
事理方為允協今錢度初到粵西輒爾心存
寬縱請將該縣留任使庸玩劣員仍得優游

總棧何足以示懲儆。明係錢度有意沾名沾染外省惡習。不知悔改。錢度著交部嚴加議處。鄭之冊著革職。仍留該地方協緝。嗣後有似此者。均照此辦理。著為令。至改發新疆積匪猾賊。在配及中途脫逃。情罪甚為可惡。一經拏獲。即應立正典刑。又何必關查原案。往返需時。致令匪犯在獄日久。得以乘間潛逃。辦理本屬未善。將來各省如盤獲此等要犯。訊究明確。即行正法。毋致曠時貽誤。將此通諭各督撫知之。○又諭曰。錢度另摺議奏學政事宜。其中所定擡送人役。早程用夫一百二十名。水程用船七隻。尤屬有意沾名。並非覈實辦公之道。試問學政巡歷各府。即有應帶文卷。諒不過箱篋數擡。已敷檢閱。何至需用夫船如許之多。其意不過欲務從寬備。以博學政等同官情面之歡。而不知供應紛繁。勢必仍有濫索濫應之弊。為地方擾累。錢度擢任巡撫。不知感恩奮勉。痛自消除外省惡

習。乃到任之後。輒敢以此等伎倆於朕前。巧為嘗試。豈可復稱封疆之寄。姑念其在滇省辦理軍需事務。尚為熟習。著仍補授雲南布政使。以觀後效。倘再不力為悔改。則是自速罪戾。不能再邀曲貸矣。其廣西巡撫員缺。著宮兆麟補授。又諭據護理山西巡撫富明安奏。雁平道時廷藹。巡查州縣縱容家人需索使費。任性責處。致興隸人等毫無顧忌等語。時廷藹身為監司大員。巡查地方不遵定例。輕騎減從。約束家人。以致沿途勒索肆行騷擾。置若罔聞。轉將州縣人役任性責處。甚屬乖張不法。時廷藹著革職。交與該護撫嚴行審訊。秉公辦理。并查該員此外有無貪劣款蹟。一併據實查奏。毋得稍有徇隱。諭軍機大臣等。據明福奏。句驪等河渡船二十六隻。照例折變。共變價銀十三兩等語。實屬不成事體。向來各省折變船隻。每有朦混侵蝕情弊。是以令各督撫專委大員。確實勘報。

並令將原造價值隨摺聲明以便覈議節次所降諭旨甚明。此項渡船既有二十六隻縱使朽爛不堪僅可為柴薪之用所值亦多何至止變價銀十三兩明係該將軍辦理不善一任委員朦混捏報希圖侵隱明福等著傳旨申飭。所有此項船隻著另行估變仍將原造價值一併聲明具奏。又諭曰李宏奏霜降後河湖水勢及相機料理情形一摺內稱日來運河水勢平定清口倒漾亦已稍減目下清水已多入運中泓沙底即經滌刷間有一二淤墊處乘時疏濬可收事半功倍之益毋庸另行挑挖等語所奏似非實情該督等本年收展清口不能適中機宜致黃水有倒漾之勢昨經楊錫紱據實陳奏已派劉統勲等速往會同查勘今李宏此摺故為平淡其詞不無迴護前非之意至另摺所奏現將王營減壩啟放令黃水洩入鹽河由東莞武漳等河歸潮河入海一俟黃河水退即行堵閉

之處尚屬現在應辦事宜著將李宏所奏二摺俱鈔寄劉統勲等閱看俟到彼時一併確查妥辦並將此諭李宏知之。又諭前因廣西學政梅立本需索逼命一案曾降旨各該督撫令查明各學政按試時有無擅動驛馬多少若何及似梅立本之多用人夫並各學政養廉若干現在情形若何即行據實覆奏此旨頒發後已及兩月今僅據富尼漢將東省學政各情形覆奏即遠如廣西一省亦並據該撫查明具摺奏聞何以各該省至今並未奏及著再傳諭各督撫速行詳查據實奏覆毋得更有延緩。又諭據彰寶奏知府鍾光豫查出松江僧人明宗傳貼符籙又知縣林光照復查出句容僧人果賢傳寫硃單現在查究等語此等傳播書符託名張天師希冀煽惑人心前此湖廣亦曾奏及與此相仿必又係翦辦匪犯逞其鬼域伎倆多方散布妄思擾累閭閻以售其奸險之計其情甚為

可惡不可不實力根求以除民害況此等符帖業已見之紙筆顯有根線可尋更非若割辦之形跡閃爍者可比著傳諭彰寶即速將案內情節層層追究尋源竟委務使起意造作之人水落石出不得倖逃法網毋稍游移僅爾顛預了事並嚴飭各屬不可縱役妄拏借端滋擾○又諭曰吳紹詩奏查審舒善叅案各緣由一摺所辦甚屬非是如所稱盤碗孟碟一千餘件係自己留用等語即荒唐不可信日用磁器所需約畧可計即在食指浩繁之家亦未必能踰數百件舒善僅一監督何至備用如許之多不過欲寬餘留存以圖售賣得價耳又如該監督每年所進無過數十件又何得以備貢為詞昨查伊家中託人售賣磁器乃至萬餘件豈盡伊自行燒造挑存次色者即此可見其妄而所稱餘剩各器二千餘件賣價一百四十餘兩亦豈有此等賤值種種俱非確情吳紹詩初辦此案尚似

認真今乃節節巧為開脫妄冀化大事為小事此等伎倆豈能於朕前嘗試該撫平日尚屬小心誠實是以加恩委任封疆何亦漸染外省沽名惡習竟至於此看來竟欲負朕委任之恩矣吳紹詩著傳旨申飭仍著將此案另行詳查確訊數實定擬具奏尋奏舒善前供挑存次色磁器自行燒造之處實屬虛捏查出在京變賣一萬餘件外又運廣變賣八千餘件均應交官項隱匿未吐並與書吏等於正耗餘平外加徵朋分計共虧公項一萬數千兩現訊明定擬得旨該部嚴察議奏○又諭據彰寶奏查出龍華邪教僧人吳時濟之徒張仁杜玉良前經發配甘肅仍敢與舊時同教之人書札來往恐在配所亦不無誘惑之事現經飛咨查拏等語著傳諭該督即將張仁杜玉良二犯緝拏拘禁一面搜查該二犯寓中書籍有無悖逆字句及留存邪教經卷並再配曾否開堂設教煽惑愚民各確

情迅速嚴行根究就近辦理毋得稍存姑息
仍將查辦緣由具摺奏覆 軍機大臣等奏
審訊革職湖南永州鎮總兵顧鉉以無關緊
要事件由八百里馳奏舉動乖悖實由病瘋
所致請交部監禁從之 河南巡撫阿思哈
疏報內鄉裕州二州縣乾隆三十二年分開
墾旱荒地二十九頃七十畝有奇 以鑲藍
旗滿洲都統額駙色布騰巴勒珠爾鑲藍旗
蒙古都統努三對調鑲黃旗蒙古副都統弘

晌鑲藍旗蒙古副都統齊哩克齊對調調鑲
紅旗滿洲副都統索諾木策凌為鑲白旗滿
洲副都統以署刑部侍郎喀寧阿兼鑲紅旗
滿洲副都統內閣學士邁拉遜署鑲黃旗滿
洲副都統 豁除江蘇阜寧桃源甘泉銅山
邳州宿遷贛榆徐州衛等八州縣衛乾隆二
十二年築隄挖廢田地額賦 壬申諭據富
明安奏署寧武營參將之大同鎮遊擊劉
士偉私動公糧銀兩興修演武廳又民人許

姓捐置前明總兵周遇吉祠宇莊田劉士偉
忽稱民人周世榮係周遇吉嫡派曾孫混將
住持僧人逐出概交周世榮經營並令其入
伍食糧請革職審擬等語該營演武廳並無
坍塌劉士偉並不照例詳估擅動公銀修理
既不無藉端侵蝕情事至民人向來公捐廟
田何以突令周世榮占踞且將伊冒補名糧
其中必有串同吞噬希冀分肥情弊自應徹
底嚴究毋任稍有遁情劉士偉著革職交該

撫與案內有名人犯一併嚴審定擬具奏
諭軍機大臣等戶部奏甘肅洪水營已故遊
擊安文前在哈密巴里坤等處同遊擊常清
等十七員經收駝隻應賠逾額倒斃銀一萬
七千三百四十餘兩安文獨賠至七千七百
七十餘兩之多其經收駝隻又同係二十年
及二十一二三等年之事安文既在哈密又
在巴里坤如何兼顧當時該管大臣作何派
委造報原冊又未將各員分收月日及銷賠

各數分晰聲敘。且於安文病故兩載後始將此案奏銷。而安文獨賠其半。不無多為攤卸。希圖請豁情弊。交吳達善詳細清查等語。此案情節甚屬支離。安文既與常清等十七員同時經牧。何以分賠銀兩。獨於安文名下攤至如許之多。又於該員病故兩載後始行奏銷。明係因該員病故。有意多為攤卸。不過輾轉行查。即以無可著追請豁。豈據實辦公之道。著傳諭吳達善即行徹底清查。速即明白回奏。毋得迴護。稍有瞻顧。自速罪戾。尋奏安文於二十年在哈密經牧。二十一年在巴里坤經牧。先後本不同時。奏銷載二十年及二十一年。三等年。乃合衆員經牧起止而言。非該員一人之事。惟該員在廠未久而名下倒斃獨夥。照例著賠。並非多為攤卸。當時該管大員及歷任藩司既覈應賠成數。直俟十餘載該員故後始奏銷請追。咎實難辭。應分別攤賠完項。得旨軍機大臣會同該部查奏。

以故奉國將軍永破子綿昶襲職。癸酉諭軍機大臣等據傳景奏喇嘛諾彥綽爾濟等赴藏熬茶回至哈拉鄂博地方被賊鎗傷三人。搶劫行李。據同行之那旺老賊認係郭羅克之賊。請交總督阿爾泰嚴查辦理等語。郭羅克素不安分。今復敢肆行劫掠。甚屬可惡。不可不嚴加辦理。以示懲創。阿爾泰現在准其來京陛見。恐不及查辦。此事董天弼歷任四川副將。總兵於夷情素所熟悉。昨復將伊補授四川提督。著即將此事交董天弼速行查辦。並諭阿爾泰知之。予故雲南普洱鎮總兵左秀祭葬如例。甲戌上詣暢春園問皇太后安。幸圓明園。諭軍機大臣等高晉奏查辦割辦匪犯各情形一摺。內稱廣德州知州福寧等稟稱該州傳有射工蟲圖貼現在查訊等語。今年七月間京城亦有此訛傳。並云得自山西。欽差侍郎四達往晉省審事。

因令會同蘇爾德查出曾被蟲咬之人安然無恙。並究明認識蟲名之藥鋪。及按本子描摹之畫匠。業經分別責治完案。想又有好事者。妄傳至江南。此等莠言。非割辦匪犯可比。查明後止。須將傳播之人示之懲儆。毋庸紛紛尋緝。株累無辜。至松江句容查出傳播書符。託名張天師。希冀煽惑人心。一事必又係翦辦匪犯。為此鬼蜮伎倆。妄思擾害閭閻。以售其奸險之計。情甚可惡。不可不實力根求。昨據彰寶奏到。諭令逐層追究。務使起意造作之人。水落石出。不得稍涉游移。僅爾顛預了事。該督應再嚴飭各該地方官。實心查辦。務徹底裏。仍不得縱役妄拏。借端滋擾。著將此諭彰寶馮鈴知之。又諭前據定長等奏稱湖北黃岡縣。拏獲割辦匪僧普濶。到案並未刑求。即經供認確鑿。並據供出河南固始縣張文棟。教令翦辦等語。因降旨阿思哈速將張文棟緝獲。俟普濶解至豫省時。就近質

訊一面奏聞。一面解京。今據阿思哈奏到。審明張文棟等一千人證。無不極口呼冤。並據普濶供在楚省時。因赴田都司船上探望伊父楊國謨。即被鎖拏。送縣經黃岡縣樛夾嚴訊。受刑不過。是以混供等語。普濶往田都司處探望伊父。並非形跡可疑。該都司何以不令其父子相見。轉將普濶作為匪犯擒拏。及黃岡縣審訊。又不虛心研鞫。被獲緣由。輒爾嚴刑鍛鍊。以致畏罪誣招。該督等提犯到省。何竟不親自覆訊。究出實情。遽憑都司知縣虛飾之言。率行具奏。且謂並非得自刑求。若非令將案犯解京。復令豫撫就近質訊。幾成冤獄。可見外省辦事。盡屬虛誣。不實全不可信。積習錮蔽。深可痛恨。該督等之草率荒唐。將來結案時。自當另予處分。而田都司及黃岡縣知縣之有心羅織。不可不訊明治罪。著將該都司知縣查明姓名。俱著解任。即派委委員押解來京。聽候訊究。并飭沿途小心防

範母令自戕其普濶之父楊國謨既在田都司署中何以不令相見而黃岡縣審訊時并令其供非親子種種怪誕俱出情理之外此時伊等或將楊國謨致死滅口亦未可定並著將楊國謨善為料理送京以備質對將此傳諭定長等知之 乙亥諭昨以錢度議奏學政事宜有意寬備夫船沽名邀譽已降旨改補雲南布政使以觀後效夫各省學政厚給養廉原以供其任所用度按臨時行李僕從之費本應自備即勅印文卷等項應用夫馬亦屬無多如同日富尼漢奏到山東學政每次用馬不過四五匹夫不過十名其幕友家人書役歷係學政發價自雇車驟並無動用驛站夫馬之例雖坦途山徑各省情形不同而官用私用之分其理則一山東既係自雇車驟廣西獨不可自雇夫船乎況此次酌議章程原以整飭向來因循陋習地方大吏輒敢挾其故智巧為嘗試何以除積弊而肅

官箴且錢度摺內自稱與學政朱丕烈公同酌定可見其外託虛衷之名中存徇徇之實況以學政自行入議誰不圖便已私以冒官為惜費之計耶錢度以撫臣應自行覈議之事轉商學政率以其言為據實屬曲庇同官雖經降用尚不足以示儆著再交部嚴加議處而朱丕烈向稱有心矯矯乃乘巡撫會商任意多開數目冀省養廉自肥私橐居心亦甚可鄙朱丕烈著一併交部嚴加議處 以

貴州銅仁協副將顧起鳳為鎮遠鎮總兵鑄給江南分巡淮徐海及淮揚河務兵備道等關防從河道總督李宏請也 丙子
上詣暢春園問

皇太后安 還宮 諭軍機大臣等前因錢度奏逃遣積匪越獄一案將該縣知縣僅請革職留任有心寬縱已交部嚴加議處至另摺議定學政夫馬一節輒稱水程需船七隻旱程需夫一百二十名並商之學政任其多開

數目尤屬意徇同官沽名邀譽莅任伊始敢於朕前巧為嘗試難稱封疆之任因其在滇辦理軍需日久是以從寬將伊降補雲南布政使但如此居心仍得坐享厚祿不足蔽辜著傳諭阿里衮明德俟錢度到任三年之內停其支給養廉以示懲儆阿桂到滇後並將此諭令知之以大學士尹繼善協辦大學士吏部尚書劉綸兵部尚書陸宗楷刑部尚書蔡新兵部右侍郎覺羅奉寬俱充經筵講

官○免黑龍江中安托爾謨等座官莊本年霜災額糧一千一百石有奇○丁丑諭軍機大臣等前據永德奏到拏獲福建民人李浩背賣孔明碑記圖一案據供得自閩縣民人王三哥云係廣東石城縣風雨現出之語當經降旨閩粵二省督撫令各查訊明確據實覆奏今據李侍堯等奏稱該處石城縣本年二月間並無現出石碑之事亦無天竹山東山寺等名而崔應階奏則稱王三哥在閩供

與李浩素未相識堅不承認永德奏亦稱李浩在浙所供碑記來歷屢易其詞前後支離矛盾是李浩前供石碑出現一節既屬荒唐而給付碑記紙稿之人又游移無定其中必另有編造傳播緣由該犯計圖狡脫不肯實供或係王三哥因無質對故為抵飾著傳諭崔應階即速提犯研訊究其碑記圖實係得自何處傳自何人務得確鑿根據毋任誑詞却罪仍即據實詳悉覆奏又諭據永德覆

奏濫製烏鎗一摺內稱先經蘇昌批准動項製造京鎗四百餘桿係委令同知廣福承造嗣據廣福造完請銷詳內曾敘及餘請陸續製造一語臣並未議明駁正致蘇昌題銷疏內遂照廣福所詳聲敘工部覆議時亦令如式製造等語此項烏鎗蘇昌原奏止請製造四百餘桿今據永德覆奏原詳時亦因需鎗一萬三千餘桿為數甚多無此經費詳奉蘇昌批准俟經費充裕籌辦何以廣福請銷詳

內遠有餘請陸續製造之詞其中必有意圖
朦混浮冒支銷關通部中書吏潛為照應情
弊蘇昌不察既為冒昧具題而部議遂爾含
混覆准不可不徹底根究按例治罪永德現
在來京著傳諭崔應階即將此案承辦官吏
逐一研究作弊根由應解任者即行解任審
訊並密加體訪務使水落石出不得稍為隱
飾含糊以懲奸猾仍將查辦情形據實速奏
(戊寅以故湖南澧州屬石門縣添平所細

沙隘把總伍世春子開代漁洋隘把總覃聲
護孫遠帥各襲職賑兩淮屬富安豐梁
垛東臺何垛丁溪草堰小海劉莊伍佑新興
廟灣等十二場本年旱災貧竈并貸勘不成
災之角斜板浦中正臨興等四場竈戶口糧
旌表守正被戕之山東莘縣民耿秋喜妻
賈氏(已卯諭前以額勒登額有心退縮貽
誤軍事富德係原保之人多方薦舉袒庇威
誼經法司按律擬斬朝審情實自屬罪所應

得今勾到屆期凡情實各犯例應綁赴市曹
候旨處決因念富德獲罪緣由究係因人連
累臨時尚可不至予勾富德著加恩改為緩
決又諭前以守備程轍為緬匪拘留阿瓦
城不能捐軀効命乃復同楊重英據賊情代
為具呈乞降實屬偷生無恥情罪極為可惡
是以降旨將伊子拏交刑部治罪並令將家
產查封近據阿里衮奏稱程轍乘夷民張文
連潛回內地之便密呈軍營大臣將賊匪情

形路徑詳悉稟聞等語是程轍天良尚未盡
泯其罪自當量從末減著加恩將伊子釋放
回籍其家產並著給還(諭軍機大臣等前
以黃水漾入運河淤灘淺阻關係糧運因命
劉統勲等前往會同勘辦昨李宏奏現在清
水暢流衝刷沙淤楊家莊口日漸深通糧艘
陸續徑渡等語業經鈔摺寄劉統勲等閱看
酌辦今楊錫綬所奏自開放臨黃減壩黃水
消落尺許東西壩清水直出抵黃而口門北

岸並鹽河開口築壩閘截中河之水亦得暢流將暗灘衝刷糧艘通行無滯是楊家莊水勢通利已無必須大辦之工惟當就惠濟閘以下裏河一帶至淮安府視其曾經黃水倒漾間段淤墊者酌量及時挑挖以利漕運足矣著將此傳諭劉統勲等令其會同詳勘作速酌辦仍一面將辦理情形具摺奏聞尋會奏惠濟閘迤下運河水勢通流無阻無庸趕辦間有河底淤沙及兩岸逢灣灘嘴係隨時

料理工程臣高晉等當率屬相機挑挖得旨嘉獎○庚辰以正白旗滿洲副都統烏三泰為正白旗護軍統領旌表守正捐軀之浙江仙居縣民汪從進妻周氏守正被戕之山東濰縣民文太女文氏安邱縣民龔得財妻張氏○辛巳

上御懋勤殿勾到朝審情實罪犯停決官犯十三人常犯十二人餘十一人予勾諭今日朝審官犯勾到如高恒普福以鹽政大員於

提引應歸官帑銀兩恣意侵漁數至累萬均屬法無可貸但普福則居心狡黠豫為彌縫高恒則一味驕恣毫無顧忌跡異而所犯則同若於伊等稍從姑息則凡前此官犯以貪黷正法者何以示無屈枉而將來侵虧敗檢之徒將執法示儆乎抑廢法長奸乎且前據高恒供有實係糊塗獲罪之語侵蝕帑項係何等事若亦得以糊塗自解則凡悍然骫法者又何事不可肆意妄為耶又如達色一案

初以其罪不過在短發價值與高恒普福侵貪入己者稍異及閱招冊各款有商人門禮不遂抑令不准進見之事則是示威脅衆豁登無厭設令易河東為兩淮其狼藉豈在二人之下是以一併予勾至通武一犯雖冒銷銀兩至七千有餘即按例予勾彼亦何辭但其人本屬工匠出身又因造辦器具浮開侵用獲罪以物玩之微抵人於法朕亦豈肯出此又提引案內之顧夢懷雖由懲通高恒已

亦牟利釀成大案本難曲宥第該犯乃一商賈末流近利貪財是其常情且彼即能誘人犯法設令高恒能不聽其愚弄又安得售其伎倆是以將此二犯俱停其予勾試思朕之視高恒豈轉不如通武顧夢懷等然情法所在差等自有較然不可移者其海明素械阿拉克多爾濟阿拉西等所犯情節尚有一線可原著於次年朝審一併改入緩決以昭平允慮囚大典所以章國法而正人心關繫甚鉅朕於庶獄權衡銖兩惟虛衷推勘務使適輕適重各如其人情罪所自取此中裁斷一準於

天道之大公非朕所能自主又豈能稍存成見意為高下於其間哉將此通諭中外知之諭軍機大臣等刑部審擬捏造圖記誑騙錢文之趙雲鵬一摺已照部議完結至摺內有直隸文安縣民李仰尼圖免本地差役謀求執照一節殊屬可異現在各省地方丁賦皆

有定籍凡遇公事絲毫不以累民並無撥派徭役之事即以雲南進剿緬匪而論京兵所過雖不無稍資民力尚且官為給值此外復有何事必須驅役平民况李仰尼隸籍文安並非驛路經由之地與兵差更無干涉令李仰尼肯出私錢圖免差役必係該地方官有藉端擾累情事其所關於民生吏治者甚大不可不徹底根究著楊廷璋詳悉查明覆奏並查通省情形據實奏聞毋得稍存隱飾所

有案內未到之劉大小子一犯著富明安速緝解部並交鄂寶於到任後遍行查明具奏至各省或尚有因公差派名色及不肖有司借名抑勒閭閻之處並著傳諭各該督撫一體實力查察將實在情形若何詳悉具摺奏聞尋楊廷璋奏提訊李仰尼據供在京賣簾與趙雲鵬相識言及在縣應差趙雲鵬聲言給照可免因向求取實未許謝錢文後經趙雲鵬嚇逼遂陸續給付地方官並無借差擾

累情事至直省辦理差務均動支帑項查訪各屬實無科派累民惟歲修隄埝及疏濬溝渠等項係民間照例勻派亦無偏枯情形大畧相同下部知之○又諭前因各省查拏割辦匪徒正犯迄無一獲徒致紛紛滋累是以降旨停止近有人奏及直隸各州縣因有此旨并將查緝賊盜等事一概停止以致匪竊滋生肆行無忌等語殊堪駭異巡緝奸盜本係地方官專責即無割辦一事亦宜時刻留

心嚴密查察豈有因此案毋庸查辦轉將一切廢弛之理况割辦一案雖明降諭旨停止查拏仍傳諭各督撫飭屬密加躡緝文武員弁又安得因有停止一語遂豫為息肩地步耶著傳諭楊廷璋嚴查各屬有似此怠玩者即行據實速奏毋得稍存隱飾尋奏直屬七月至十月拏獲匪犯自一二名至八九名不等實無概停查緝情事現嚴飭躡捕不敢稍懈得旨覽○壬午

上御乾清門聽政 諭前因吏部議處刑部辦

理延錫保一案舛錯該堂官將應議職名咨送遲延已降旨交部察議今日據內閣奏稽查月摺內開兵部未完一件係軍機大臣等覆奏內務府審擬民人曹大漢等毆打護軍校永德案內漫無約束之該管步軍翼尉等官應議職名尚未據覆到等語此案因何遲延逾限著步軍統領衙門查明具奏查送應議職名不過開寫銜名移送過部並非難辦

實錄卷之五

吏部

之事何致動輒遲延月餘之久即此可見各衙門諸事懈弛不可不加整飭著吏兵二部將在京各衙門咨送議處職名日期另行定議嗣後並於議處本內將何日查取職名何日覆到之處詳晰聲明至在外各省分均按其道里遠近以次定議倘各省有應在所屬地方轉查不能於定限內開送者即令該督撫將轉查展限若干日之處咨部覈查該部亦於本內將行查覆到日期一併聲明並知

照應行稽查之內閣科道等衙門如有逾限即著據實叅奏。諭軍機大臣等前據高晉摺奏巡撫吳紹詩與總兵邱若龍同鄉交往甚為親切聞彼此換帖有愚兄愚弟之稱恐文員見鎮臣與撫臣交好或向鎮臣窺探意指不能保無交結逢迎之事請與別省總兵對調等語當經降旨將邱若龍調任河北今邱若龍來京陛見名對據奏地方公事如緝拏盜賊等件文武衙門均有交涉向來彼此

高宗實錄

卷八二

十

不能和輯遇事齟齬是以前在江西總兵任內與撫臣吳紹詩諸事和衷實屬因公起見吳紹詩曾因首邑員缺需人向伊諮訪伊即對以事屬遴選文員不應干與迨後見省城豫章溝淤塞應由小港導入隣湖以資暢洩曾告之吳紹詩未及舉行適督臣高晉前來即行稟述督臣因轉告撫臣辦理若果如所奏則邱若龍尚屬明白曉事從前高晉因何具奏或別有見聞之處著即傳諭詢問令其

據實覆奏尋奏前因江西撫臣兼提督有轄各鎮之責撫鎮同鄉換帖不特文員易啟交結之端兼恐所轄營員因有恃而生玩忽是以奏請對調報聞戶部等衙門遵旨議奏各處尋常稅口由各衙門揀員引見派往專司權務並無專員兼管稽覈非所以重責成請嗣後各司員所管稅口如張家口山海關雖距直隸省會稍遠第道府各官均為總督屬員該二處稅務應令該督兼管殺虎口係

高宗實錄

卷八二

晉省地方前經戶部覆准該處稅銀按月造報山西巡撫查覈應令該撫兼管至盛京牛馬稅中江稅二處稅務向例由盛京戶部侍郎覈轉通州坐糧廳稅務由總督倉場侍郎覈轉四川打箭鑪稅務由四川總督保題俱應交該處侍郎及該督兼管又由工部揀選派往之荆關監督該處係湖廣總督所轄應即令該督兼管又由理藩院保送派往各差除殺虎口驛站向隸綏遠城將軍張家口賽

爾烏蘇驛站隸察哈爾都統獨石口古北口驛站隸直隸提督喜峯口驛站隸熱河副都統應仍照舊例兼管如稅務有虧短即著落各處大員分賠其八溝塔子溝三座塔烏蘭哈達多倫諾爾等處俱係直隸總督所轄所有稅務自應交該督兼管各該關榷務按月造報兼管大員按冊詳加稽覈該監督倘有侵蝕那移情事即據實奏嚴行辦理如兼管大員不實力稽查及扶同徇隱或別經發

覺一併交部議處虧短銀兩著落代賠從之

禮部奏

皇太后萬壽聖節慶賀禮儀得旨是照例行禮奉

皇太后懿旨今年停止筵宴以給事中素爾訥為內閣學士兼禮部侍郎癸未諭直隸霸州等處本年偶被偏災所有將來應行加賑各項著撥戶部銀四十萬兩解交直隸藩庫備用又諭曰伊勒圖之母病故著回京

守制賞銀五百兩治喪並遣散秩大臣一員侍衛十員前往賜奠所有伊犁將軍印務著永貴署理諭軍機大臣等各省拏獲逃兵正法之處皆入題本或專摺具奏從前滇省有似此者均經具奏阿里衮明德並未將有無逃兵及如何辦理之處奏聞著傳旨詢問之戶部議覆給事中劉秉恬奏稱兩江總督例並管鹽政而鹽政奏事如提引等案皆不列銜於政體未協應如所請嗣後除尋常

等事聽鹽政自行陳奏其有關錢糧如提引等案無論題奏俱令總督會銜長蘆河東等處鹽政一體令該省督撫會銜題奏從之

以光祿寺卿李友棠為宗人府府丞甲申上詣

奉先殿

壽皇殿行禮是月直隸總督楊廷璋奏正定縣城西南兩面瀕河最為險要本年漳水陡發由城西北白店村曹馬口直趨東南逼臨

城根隄埵均被衝缺請於城西南斜角隄頭添築新隄五百七十六丈至柏棠閘止以禦城西北一帶來水原隄加培高厚其城南迴水隄一千六百八十六丈普律加高又斜角隄南有護隄長九十四丈亦經河流汕刷塌陷亟應拆修出險處加長五丈四尺並加高新隄北頭柏棠閘與隄頂平又迴水隄迤南一帶自乾隆七八等年節建魚鱗挑水順水各壩添築壩座閱二十餘年河水南徙著有成效此次水勢陡長猶賴舊壩抵禦但河身漸已北遷自斜角隄草工以東埽灣益險應往東接築挑水壩五座河神祠前築魚鱗壩八十丈使河流仍向南俾資穩固又郡城有護城隄一道外繞城河長四千三百二十丈向屬民修以資灌溉近多淤塞應急疏濬再藁城縣廣陽隄亦經渚水衝口現飭該縣集夫堵築得旨如所議行又奏文安大窪東面係大城縣地方舊有隄埵接連千里長隄

向未帑修隄身單薄亟應培高以禦子牙河水泛漲又格淀大隄分屬大城靜海天津三縣本年子牙淀河並漲被衝殘缺均應加培得旨如所議行又奏藁城縣東北兩面渚水繞流而北面緊貼河身向距水四五里至七八里不等現止七八丈至十二三丈本年異漲侵畧尤甚請自西北城角起至東北城角止順岸築埽長三百六十丈埽後加築土埵得旨如所議行江南河道總督李宏奏洪湖內高堰誌椿存水九尺八寸清水已出東壩清口應先拆二丈以資暢出留口寬十丈多蓄清水敵黃刷淤豫騰湖面以受來年汎水得旨是矣山東巡撫富尼漢覆奏奉諭停拏割辦匪犯仍當密飭所屬設法根尋不稍縱漏得旨覽東省辦理雖有過當之處不怪汝者以既命嚴緝又罪過當則外吏將何適從然裁賊刑求原非正道又不可因此旨而稍懈一切汝應知之護山西巡撫署

布政使富明安奏謝護撫恩得旨覽查拏割
辦事汝如何辦理不可又復模稜蘇爾德即
前車也慎之 四川總督阿爾泰奏查勘打
箭鑪口外裏塘額設土馬兵三百名應裁一
百撥給巴塘巴塘原止設土步兵一百三十
名向因缺馬不能追捕賊番應改為土馬兵
四十合一百四十名土兵得有馬力即成勁
旅且巴裏兩塘兵力相等遇有夾壩更可互
為追擒其土馬兵額缺令委員同各該土司
挑充責成土司操練得旨嘉獎 前任廣西
巡撫錢度奏報晚稻豐收得旨覽汝甫到任
即沾名市恩本應重處仍令汝為布政若心
沮抱怨不實心任事則汝自問汝應何罪

實錄卷八十五

書

大清高宗法天隆運至誠先覺體元立極敷文
奮武孝慈神聖純皇帝實錄卷之八百二十一

實錄卷八十五

書

大清高宗法天隆運至誠先覺體元立極敷文奮武孝慈神聖純皇帝實錄卷之八百二十二

監修總裁官經筵講官太子太傅文淵閣大學士文淵閣領侍衛內大臣稽察奉 上諭書件處管理

吏部理藩院事務兵部旗滿洲部統世襲騎都尉軍功加七級隨帶加一級尋常加二級軍功紀錄一次慶桂

總裁官經筵講官太子太傅文華殿大學士文淵閣領侍衛內大臣稽察奉 上諭書件處管理刑部戶部工部事務

世襲騎都尉軍功加十九級隨帶加二級又加二級尋常內大臣戶部尚書鑲黃滿洲部統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆三十三年戊子十一月乙酉朔諭兵部

議處古州總兵德興一案前經降旨俟德興來京再降諭旨今德興到京覈其被劾情節乃係囑令屬員買物發價遲延又將隨帶使令之人拔補名糧皆係自犯私罪非因公累誤可比該部議以降調准將加級抵銷所辦非是著將原本發還另行定議題覆內外文武各官遇有承辦事務如失察遲延之類其錯誤本屬因公自應將加級紀錄准其抵銷若意涉營私於政事官箴皆有關係而該員

得藉加級紀錄為護持吏議不能持其後殊非黜陟公明本義況內閣票擬現以公罪私罪分別夾簽獨吏兵二部所定准抵條例未能明晰周備豈獨書吏得以為撞騙之媒苟非朕留心察查即堂司官亦得以高下其手且因公者事雖重大其情實輕因私者事雖細微其情實重自來宥過無大刑故無小真古今不易之論嗣後吏部兵部議處文武各員一以公罪私罪為斷其被議之事本屬因

公者仍照例准抵外其因犯私罪交部議處者一概不准抵銷庶辦公者得邀寬典而營私者不致長奸於澄敘官方之道更為允協著為令尋兵部議請照例降調得旨德興著降三級以旗員調用○諭軍機大臣等昨召見四川按察使費元龍伊曾任雲南迤西道因詢其在滇時事據奏任內有木邦土司罕莽底被緬夷連年蹂躪棄地逃匿及緬夷頭目普拉布帶兵搶殺取馬土司之事因思罕

莽底。既係木邦土司。其後何以為線覓團所據。復檢查明瑞原摺。有線覓團胞姪線五格。係已故罕莽底嫡子之語。是罕莽底既有伊子線五格。木邦夷民。何以擁立線覓團。此中情節。未能明晰。今線五格又在何處。再從前吳達善所奏。耿馬土司。被緬夷搶掠。是否即係現在所辦之緬匪種類。其摺內所稱辦理之案。是否實在情形。著傳諭阿里衮等。將各緣由詳晰查明。遇便覆奏。尋奏罕莽底。經緬

匪頭目普拉布帶兵搶掠。逃至孟板病故。木邦夷民。以伊子線五格。年幼擁立其弟線覓團。當日搶掠孟定耿馬。即現在緬匪。至吳達善前奏辦理情形。現據遊擊清泰等舊在緬寧一帶防守。詢訪大畧相符。得旨覽。○又諭前因孟定土司罕大興。當木梳夷匪借道往搶耿馬時。既不能率兵抵禦。又不能通知耿馬。且為罕黑等脅逼同行。罪有應得。經吳達善奏准將罕大興並家口。按律遷往江寧省

城安插。迄今已閱數年。罕大興在江寧居住情形若何。其人是否奉法安分。抑或與人往還不無滋事之處。著傳諭高晉。即行詳悉查明。一面據實覆奏。一面即將罕大興委員伴送來京。尋奏罕大興自安插來江。甚屬安分。亦未與人往還滋事。現委員送京。得旨覽。○丙戌

上詣暢春園問

皇太后安。幸圓明園。賑直隸河間鹽山。二

縣。本年被水蟲災。飢民。予福建出洋被颶淹斃外委李貴盛。兵丁謝恩。楊科。葉安國。林註。徐必捷等賞卹如例。丁亥

上詣暢春園問

皇太后安。還宮。諭曰。嵇璜現在來京。著專辦工部事務。不必在南書房行走。○又諭。據巴爾品奏。楚呼楚種地。每兵一名。收糧至十八石零。請將官員兵丁等分別陞賞等語。著照所奏。官員等交部議敘。兵丁等賞給一月

鹽菜銀兩。諭軍機大臣等。阿里衮等奏。據各土司採訪緬賊。駕艘數十隻。由新街。蠻暮。赴夏鳩江停泊。又有賊匪由水路三四百名。早路二三千名。屯駐夏鳩江。又夏鳩頭目索揚。帶領緬兵前來該江。札會趙宏榜等。又據猛固頭目金猛等。執送賊匪探信達木告稱。猛卜地方。尚有五六十人。各等語。據此情形。或係緬賊。不知本年暫不進兵。仍似上年在老官屯。腊戍等處。為防守之計耳。如果屬實。自應統兵進剿。阿里衮等即派曉事如長清等。驍勇如海蘭察。塔瑪鼐等員。酌帶兵二三百名。直入捉生。詢問賊勢。相機進止。務使賊匪自相驚擾。以疲其力。阿桂到彼。與阿里衮豫籌辦理。不可在彼株守。坐失事機。至夏鳩係賊匪所屬地方。若非彼中內亂。何以自行搶擄。而夏鳩頭目。又復致書內地。且今歲何以不防守老官屯。腊戍等處。而深入夏鳩屯住。種種可疑。著阿里衮等詳悉查訪。迅速奏

聞。吏部議准。兩淮鹽政尤拔世奏稱。通屬西亭場產鹽不足千引。事務甚簡。接壤之金沙場。所轄與西亭等。亦屬簡缺。應裁西亭場大使缺。併金沙場辦理。又泰屬小海場。止轄竈地四處。無庸專員。並應裁附近丁溪場。政務不繁。併歸管理。從之。○增給四川犍為。綿州。二州縣鹽引。從總督阿爾泰請也。○戊子。諭軍機大臣等。前降旨。阿爾泰將費元龍居官如何。是否勝任。臬司之處。詢問迄今已閱月餘。何以覆奏之摺。尚未見到。昨費元龍來京。陛見。看其人係謹飭自守。但於刑名事件。能否諳練。與川省按察使事務。可能稱職。無誤。著再傳諭該督。即速據實具奏。○又諭。前以阿思哈奏稱。採辦馬騾一項。每騾一頭。先給銀六兩。烙印造冊。仍責令拴餵。以俟取用。恐不無貽累民間。辦理殊未妥協。已令軍機大臣議駁。知會。并傳諭湖廣等省。詢問現辦情形。今據定長奏。湖北。湖南兩省。採辦馬騾

俱係按數給價購買。官為收槽飼餵。係屬循
照定例採辦。共得馬騾五千四百餘匹。於軍
儲實有裨益。著將此傳諭阿里衮等知之。○
命編修童鳳三。提督廣西學政。○已丑吏部
議覆江蘇巡撫彰寶疏報。寶山縣軍犯郭三。
攜帶妻子在配脫逃一案。查該犯應發新疆
改遣內地。與尋常軍流有間。該管官若照常
例議處。究於事理未協。請將專管之寶山縣
縣丞。照新疆人犯中途脫逃例。降二級留任。
兼轄之寶山縣知縣。降一級留任。限一月緝
拏。不獲。專管官降二級調用。兼轄官降二級
留任。其不行查察之太倉州知州。及州同。均
罰俸一年。並請嗣後如遇此等案件。地方官
照此辦理。再查新疆改發內地遣犯。單身脫
逃。向例專兼官俱止罰俸。處分較輕。請將專
管官照餘解重犯脫逃例。初叅降一級留任。
一年緝拏限滿不獲。照所降級調用。兼轄官
初叅罰俸一年不獲。降一級留任。不行查叅

之府廳罰俸六個月。從之。○以故四川松茂
道屬水草坪土巡檢蘇永盛叔尚智襲職。○
庚寅諭曰。觀保現在出差。所有禮部尚書事
務著刑部尚書官保暫行兼署。又諭。上年
進剿緬匪滿洲官兵奮勇爭先。經朕加恩。交
部議敘。並量予官銜。陣亡者分別賞給官銜
銀兩。並給養贍孀婦俸餉。但此內有六百四
十四名。因緣由不明。部議俟事體明晰後。再
行覈擬加恩等語。此項人等若均列入陣亡。
一體施恩。未免稍濫。若不列入陣亡。如此多
人。斷無盡寄賊巢之理。或因病身故。或陣亡
時無人目擊。未經算入。均未可定。如俟事體
明晰。再議加恩。伊等妻子俯畜無資。殊堪憫
惻。且伊等雖因事體未明。不過現在暫停卹
典。豈可反將伊等子弟均不令挑差使乎。都
統等念不及此。甚屬糊塗。著查明具奏。倘有
單俸隻餉。別無依倚者。現有馬甲養育兵遺
缺。即行按數挑補。俾資養贍。仍俟事體明晰

後作何辦理之處。另降諭旨。○又諭察哈爾地方設有都統。副都統。專員統轄八旗總管。雖事務無多。若仍由京補授。於該處情形。諸多未諳。悉殊屬無益。嗣後察哈爾總管缺出。著都統等於該處副總管世職內。揀員保送。該部帶領引見補授。如不得其人。再行奏請另補。現出鑲紅旗察哈爾總管員缺。即著喇嘛扎布補授。○又諭。昨因存泰經管牧場馬匹。被逃犯二名。刦奪。並傷斃牧場兵。未能即時

緝獲。已交部嚴加議處矣。今閱存泰所奏。遣員追捕至烏蘭托羅海地方。均被蒙古用鎗擊死等語。實屬不成事體。殊玷職守。存泰著革職。發往伊犁効力贖罪。○諭軍機大臣等。前以江省委員。探知浙省有石匠埋熟圖害之事。與割辦蹤線相近。或可從此根尋。因諭令彭寶。差委妥員。前赴浙省。會查確實。奏聞辦理。今據彭寶。永德。各將會查情形。奏到。在永德以其事浙省已經辦結。惟恐另生枝節。

第稱委係徐大來捏造。並非實有其事。而彭寶則以委員訪聞隣省事件。既屬有因。且恐疑其存化大為小之見。故於浙省所報招詞。未免偏於指摘。究之過猶不及。皆不足以成信讞。永德現已起身赴京。陛見。著崔應階。即將案內應訊人犯。派員解京候審。沿途小心防範。無致稍有疎虞。並諭令彭寶知之。○工部等部議准。廣東巡撫鍾音疏稱。平遠縣屬羊子嶺等處煤山。開採年久。墮深煤盡。應請

封閉從之。○命內閣學士邁拉遜兼總管內務府大臣。○命山西太原鎮總兵敬善前往和闐。更換巴彥弼。○以故四川建昌道屬上八義土百戶阿旺弟陳景嘉木錯。貴州定番州屬程番司土官程天順子元昭。各襲職。○旌表守正捐軀之湖南藍山縣民黃文梁妻唐氏。○辛卯。上御乾清門聽政。○諭軍機大臣等。存泰所遺巴里坤總兵員缺。著巴彥弼補授。巴彥弼未

到之前著吳達善於陝甘副將內遴委一員署理。陝甘總督吳達善疏報。平羅縣乾隆三十三年分開墾荒地一百三十一頃九十畝有奇。旌表守正捐軀之直隸長垣縣民李興妻王氏。壬辰諭前曾降旨令順天鄉試同考官南省人迴避南四卷北省人迴避北四卷邊省人迴避中四卷滿洲漢軍迴避滿字合字卷所以防弊實而慎檢校顧行之未久旋經給事中吳煒條奏停止此例亦遂

允行今御史王猷奏請順天鄉試房考閱卷仍應迴避所見甚是南北中四雖總數省合編究之本籍人多或同鄉戚友適分入本房難保無暗為照應之事況鄉會試事同一例會試房考閱卷既迴避本省鄉試何獨不當迴避本籍乎取士大典所關綦重不可不杜漸防微而遠嫌疑以肅公明於考官士子均為有益嗣後順天鄉試並仍照乾隆六年所降諭旨行著為令。又諭昨據崔應階鄂寧

奏臺灣岡山地方有匪犯黃教糾夥拒捕之事並聲明該犯從前因行竊擬徒援赦安插等語因令刑部檢查原案則黃教因夥竊牛隻聞捕潛逃及馬快朱進等往拏輒敢執刃拒捕架格傷人情罪實為兇惡當日審轉各員僅照尋常拒捕例擬以杖徒刑部亦不復加駁改均屬非是此等咨行案件偶一查詢即有不能允協之處可見外省辦理審案全不認真而刑部之覆覈咨文亦不過依樣葫

蘆漫無可否若以事隔多年置之不究則內外問刑衙門將復何所警畏乎若將審擬此案之縣府道司據詳咨結之該撫及原辦之刑部堂司各官俱著交部查明議處。又諭曰伊勒圖清語生疎殊不稱職著改授鑲紅旗滿洲副都統所遺鑲黃旗護軍統領員缺著伍岱補授。御史趙鏌奏在京各衙門及八旗往來文移僅書年月不填日期恐有稽留改移之弊請嗣後各衙門文移俱令填明

日期即以原文起限。倘有仍前僅寫年月者。科道查叅得旨允行。癸巳諭軍機大臣等。前據定長等奏查審鄔文才等所帶之藥。係硫磺澤瀉等物。隨降旨查詢。前此拏獲時。何以指為麻藥。情由今據該督等奏。詢據營兵王定國供稱。守備李萬紀盤獲各犯。曾將袁加九所帶整個藥子。用口咂試。漸覺麻辣。遂開寫麻藥稟報等語。殊非情理。李萬紀咂試藥子。既入口覺麻。何竟安然無恙。該備當日

既無昏眩之事。其非迷人藥物。可知。何以又指為麻藥。獲犯解審。今既據該督詢明。實係硫磺澤瀉等藥。自不得復執為匪犯証據。則該備從前或係貪功妄拏。或係兵丁裁害。何以置之不問。足見定長程燾諸事糊塗。著傳諭該督等詳晰查明。分別辦理。速奏。尋奉此。案該備急圖稟知總兵。冀邀獎勵。實為貪功妄拏。請交部嚴議。兵丁等訊無裁害情事。仍發營汛當差。臣等未及提該備到省究叅。殊

屬糊塗。應一併議處。得旨該部嚴察議奏。又諭曰。定長等奏審辦傳貼謠詞一案。續經拏獲楊大章等犯。逐節追至李堅仁。又供得自湖北漢鎮居住之李文有。已飛咨湖北撫臣速行查拏等語。湖南查審謠詞來歷。既云得自李文有。則該犯即為此案應訊要犯。必須查拏到案。嚴切根究。是否該犯造作。或另有首先編造之人。層層追詰。務使水落石出。方足以成信讞。著傳諭定長程燾速將李文

有緝獲悉心追訊。造作謠詞。及別有傳播確情。就近逐一根尋。務得正犯。若李文有支飾不承。即飛咨方世儒將李堅仁解至湖北質對。毋任狡展。仍將查辦緣由據實具摺奏聞。再程燾曾請赴京陛見。如已經起身。即交定長辦理。將此一併傳諭知之。尋奏查李文有業於此案未發之前病故。並搜無存留謠詞。及傳播本地情事。隨咨湖南撫臣覆訊。李堅仁仍執前供不移。是李堅仁之謠詞果否得

自李文有既難懸定。且李堅仁果有心狡卸。豈肯遽易前供。即解來北。無可質證。臣等再飭漢陽府縣密訪。仍咨湖南撫臣。訊取當日給帖確據。以杜輾轉推卸。得旨。覽。○又諭。據良卿奏。王三案內所有押送行李之兵丁邵良玉。業經嚴行訊究。該犯堅供實非私逃。但奉派隨征。聽人囑使離伍。即與私逃無異。應請旨正法等語。所辨非是。邵良玉一犯。既據審明實係王三使令。跟同柏文治押送行李。

與刑部審訊。王三所供情節不符。自應質對明確。俾無枉縱。何必遽請正法。著傳諭良卿。即將該犯妥速解京。交刑部質訊定案。至邵良玉到黔時。既敢徑赴都司衙門。自與私逃形跡不類。當時驟指為逃兵。拏獲果何所據。並著良卿一併查明。據實覆奏。尋奏。查邵良玉初係地方官。因其未執票照。疑逃盤詰。嗣據軍營報逃有案。遂信為實。但臣檄司提審時。已訊明與刑部互異。乃不解京質審。仍請

正法。實難辭咎。得旨。實是糊塗。亦因深入外省。文過惡習。又諭。昨據良卿奏。上江協左營軍裝局庫被火。除將失火之字識。及看守兵丁等。按律定擬外。請將護理都司鄔光國等。嚴處勒賠。如有未完。著該管上司分賠等語。軍裝局失火。至延燒盔甲旗仗如許之多。而其火即起於在內住宿之字識。安知非暗中偷竊已久。恐查點敗露。遂爾遺火焚燒。希圖滅跡。其中情節。不可不嚴切根究。務得確

情。按律懲治。著傳諭良卿。即速詳晰審明。定擬具奏。至收貯軍裝重地。關係緊要。何得容字識在內住宿。且聽其持火捻上樓。該管人員所司何事。該撫有統轄通省之責。伊等疎懈如此。平日豈無見聞。何竟不豫飭周防。以重典守。亦難辭咎。所有燒燬此項軍裝。如鄔光國等。與該管上司分賠未完。即著良卿賠補。尋奏。隨飭兩司覆勘。存貯軍裝什物。甫經點查無缺。實無偷竊分肥焚燒滅跡情事。應

將失火之字識及看守兵丁等按律從重問擬護理都司鄔光國等仍請交部嚴議得旨該部議奏禮部議覆福建巡撫鄂寧奏稱各省新中舉人請照順天鄉試例於填寫親供時並令默寫首藝應如所請從之撫卹雲南鄧川浪穹鶴慶劍川等四府州縣本年水災貧民甲午遣官祭

先醫之神諭據託庸等奏保送察哈爾總管之侍衛常青等託故不到請旨查辦前鋒統領誤將宗室章京保送并令查奏一摺著照所奏嗣後總管缺出著該部不論旗分咨取各處通曉蒙古語之應陞侍衛章京會同軍機大臣領侍衛內大臣揀選同察哈爾保送人員帶領引見補授毋庸咨取各部官員又諭據良卿奏准吏部咨正黃旗滿洲一等侯德寧病瘋革職應將伊親弟貴州湄潭縣知縣德坤擬正調取限令十一月內赴京引見襲爵惟該員現署畢節縣印務交代需

時未能依限回旗等語承襲世爵向例擬正者應調取外任但各員均有經手事件一時未能赴京倘引見仍不補放轉致往返徒勞嗣後缺出應行擬正之外任官員毋庸豫期行文著先將家譜進呈候朕酌量辦理再八旗宗人府徑咨行外省亦屬不合嗣後均咨該部轉行著為例諭軍機大臣等刑部議覆彰寶審擬匪犯劉五一案以該犯本係積匪又造意割辦照該撫所奏擬以絞決一摺

辦理尚未允協此案先據該撫奏到安東縣拏獲劉五供稱因見街北堆有錢文欲偷適有鄒德站立街南將其辨剪下計圖人必聚觀可以乘間扒竊等語彼時即以為無此情理諭令該撫嚴究實情毋得任其巧為開脫雖節據該撫奏稱劉五供出端映燦池文學等犯並緝到案嚴訊實無傳授教令之事則劉五前此所供悉屬虛詞狡飾自當另行根訊指使夥黨俾無展遁況劉五所割鄒德之

辦當場被獲確有可據豈得因所供之人訊
非真實黨犯即據該犯到案游供率行結案
思欲顛預了事殊屬非是著傳諭彭寶將劉
五割辦實情覆加詳悉研訊務得確供以成
信讞另行定擬速奏尋奏隨飭兩司迅速研
訊該犯堅不供吐真實黨惡明係遁飾臣仍
囑該司等設法窮究務得確情另擬得旨將
此案人犯速解來京○是日起

上以冬至祀

天於

園丘齋戒三日○乙未以丁酉冬至日

聖祖仁皇帝忌辰先期遣官祭

景陵○

上詣

奉先殿

壽皇殿行禮○諭昨直隸省查出保安州逆犯
孫顯富等妄布逆詞希圖復興邪教一案審
擬時究出該犯於乾隆十五六年間即有入

教之事該知州僅取改過甘結從輕完案實
屬姑息養奸因交該督查叅今據楊廷璋將
前任保安州知州喬淳叅奏已交部察議矣
邪教煽惑愚民最為人心風俗之害久經嚴
禁地方遇有此事州縣官一經訪聞即應稟
明該上司徹底查辦督撫等亦即當據實具
奏按律重懲庶可盡絕根株共知儆畏若僅
從輕完結奸徒毫無顧忌怙惡不悛日久必
復相煽誘藉邪教以圖斂錢財深為閭閻擾

累而無識愚民亦以獲罪甚輕仍易被其黃
鼓如保安州一案即有司輕縱釀成之明驗
也嗣後著各督撫通飭所屬州縣如有潛倡
邪教之案立即查拏報明上司據實具奏嚴
行按法懲治以靖奸匪而安善良若州縣諱
飾不報私自完結即著該督撫查明叅處督
撫等若存化有事為無事之見匿不上聞或
徇庇劣員不行糾劾將來別經發覺惟該督
撫是問將此通諭知之○諭軍機大臣等阿

里哀奏據野人官曹都山送來緬書令此處識緬字人譯出係緬賊三萬餘人由水陸路前赴戛鳩而阿里哀譯奏緬書祇稱三四千人其數不符想因賊數衆多不敢據實陳奏著將譯奏并緬書原稿寄交阿里哀令其查覈至緬書內詞涉不遜或賊匪果有內亂佯以此書嘗試不日必來乞降若彼中無甚事端意在備兵抗拒即再遣人前來斷不可草率了事必應再圖大舉著阿里哀留心查訪

俟阿桂到時會議具奏再前降旨令海蘭察等領兵前進不過欲使彼驚疑以疲其力海蘭察等勇銳有餘或不免輕進著阿里哀等於哈國興長清內酌派一員隨往阿里哀亦即統衆策應惟當相機進止不可愆事○命工部尚書福隆安暫署步軍統領事務○以山西冀寧道胡季堂為甘肅按察使○丙申上詣

南郊齋宮齋宿○諭前以四川按察使費元龍

辦理本年秋審多未允協因降旨阿爾泰令將伊是否勝任臬司之處據實奏聞昨費元龍來京召見時看其才具不過一本分自守之人外任未必相宜今據阿爾泰覆奏該臬司醇謹有餘明決未逮於刑名總滙未能辦理裕如等語是費元龍於臬司難以勝任阿爾泰能據實入告不蹈外省徇隱陋習所見甚是費元龍著留京以京員用其四川按察使員缺著孫孝愉補授又諭都察院奏湖

南叅革通判金文鎔控告茶陵州城隍丈尺工料與報銷原冊多有不符一摺各省城工皆朕降旨發帑興修尤與地方尋常工程不同承辦各官理應加意覈實查辦以期帑不虛糜工歸實用若如金文鎔所稱該處司事之員如此冒銷滋弊不可不徹底究審嚴加懲治使弊實肅清而官方益知儆惕著派喀寧阿黃登賢即行馳驛前往將此案秉公查審具奏○丁酉冬至祀

天於	圜丘	上親詣行禮 遣官祭	永陵	福陵	昭陵	昭西陵	孝陵	孝東陵	景陵	泰陵 遣官祭	孝賢皇后陵	端慧皇太子園寢 吏部等部議覆御史魯 贊元奏稱各省值上司經過處所豫備公館 供具等項督撫所至文武集從地方官一體 酬應往往派累邛移等語查州縣濫應上司 例禁綦嚴日久漸弛應飭各督撫嚴飭各屬 遵例奉行倘州縣藉端費緣或上官僕役需
----	----	--------------	----	----	----	-----	----	-----	----	-----------	-------	---

索即糾叅懲治如涉瞻徇別經發覺分別議處又稱州縣謁見督撫例得側坐近皆屈膝稟話或長跪竟言設有緊要事宜固難從容商榷亦於體制未協應如所奏嗣後遵照儀注行州縣違者題叅督撫安受者議處從之

戊戌諭軍機大臣等前以各省城垣工繁費鉅特頒諭旨給發帑金修築俾閭閻得資保護而地方並肅觀聽司事之臣益當實力奉行屏除積弊况屢經諭該督撫專派地方大員督辦稽查指名奏聞俟報明工竣之日朕當特派大臣前往查勘如有侵冒草率諸弊惟督撫及專派大員是問所以提撕警覺之者不啻至再至三乃近日如江南之宿遷城工現已查有不符原估之事而湖南茶陵州亦有首報工冊多寡互異一案俱已派員前往查辦是各省辦工之員總不能覈實釐剔大概可知現在雖未盡發覺恐不止江楚二省為然且聞不肖官吏竟有視城工為利

數多思於中染指肥橐。喪良範法更不可問。著再傳諭各督撫。嚴飭指派大員。將所屬城工已修者。詳慎勘覈。未修者。據實估查。總期工程益加堅緻。而帑項不致浮糜。倘仍視為具文。將來或經欽差查出。或別經發覺。該督撫恐不能當此重戾。亦斷難曲為寬宥。毋謂朕言之不深切著明也。著於奏事之便。詳悉傳諭知之。又諭。近以江南宿遷縣。湖南茶陵州。皆有承修城工情弊。因通諭各督撫。實

力嚴查矣。茲據楊廷璋奏。估辦已丑年城工五處一摺。直隸近在畿輔。司事之員。或尚有所顧畏。不敢肆意侵冒。但該督初莅直省。見聞恐有未周。斷不可稍有疎畧。致官吏等欺朦舞弊。遂漸開肥橐之端。著楊廷璋實力留心查辦。並將現辦五處城工。詳加覈估。毋少輕忽自誤。又諭。昨阿里衮奏呈緬書。內有不遜之語。朕意此必彼中內亂。姑為此書嘗試。諭令阿里衮察看機會。俟阿桂到時。會議

具奏矣。因思賊匪分兵防守。要隘聞今年我不進兵。必移攻他處。乘其不備。統眾搗虛。使彼膽破勢窮。自來納款。著傳諭阿里衮。即遵朕節降諭旨。派巴圖魯隊兵弁乘機進剿。仍照從前平定準夷。回部輕騎前往。不得如上年計日攜糧。致多遲誤。朕籌度萬里之外。惟知事機不可輕失耳。至如何進止之處。在阿里衮自為酌量。非朕所能懸揣也。將此諭令知之。已亥月食。諭修葺

文廟現屆落成。太學規模式昭輪奐。惟門題殿榜尚應詳考。彙章用肅景仰。向來正殿稱先師廟。二門曰廟門。而大門未有書額。蓋沿習明代舊文。未加釐正。夫廟門之號於禮經所稱祖廟。既涉嫌疑。而

先師廟額。揭諸殿楹。名實尤多未稱。應於大門增

先師廟額。其正殿改為大成殿。二門改為大成門。庶符會典定制。朕親書榜字。涓吉恭懸。

以彰崇道尊

師之至意。又諭據崔應階奏。杭州總捕同知張鐸。續辦烏鎗案內。先後領過銀一萬五千六百八十餘兩。訊據匠頭姚萬山供稱。只領過工料銀六千一百兩。每千兩扣銀二十兩。質之張鐸。堅不承認。請旨革審一摺。張鐸著革職。交與該督與案內有名人犯一併嚴行究審。定擬具奏。諭軍機大臣等。據定海鎮總兵談秀奏報。會哨考察摺內。有各營

兵弁聯合水操。練習滿漢陣勢之語。殊不可解。綠營會操。自有一定程式。該鎮所轄僅綠旗兵。何以云備列滿漢陣勢。且滿洲兵騎射最優。陸地操演。規仿為之。尚為近理。或於排列綠營陣勢之外。兼習進步連環諸法。亦屬可行。若洋面專習舟艦馬力。既無可施。而滿洲又向無水師陣勢。所奏甚屬糊塗。著傳諭談秀將因何如此措詞之處。據實明晰覆奏。吏部等部遵旨議奏。請嗣後在京各衙門

議處案件。係本衙門自參奏者。將應議職名入摺。毋庸另文限送。其不由本衙門參奏。應查職名者。限五日內咨送。如關歷任處分。仍照例限十日內咨送。倘有遲逾。臣部於題奏內分晰請旨交議。至八旗武職。除該旗自行參奏將職名及兼銜世職加級紀錄隨咨送部。其不由該旗參奏。應由該旗叅佐領以次轉查。仍限十日咨送。如應轉查別旗將接查旗分扣限送部查覈。其步軍統領衙門有由部查取職名。即照各部院定限咨送。至該衙門參奏步營官員。向咨兵部轉送該旗查取。多需日期。嗣後令一面將職名咨部。一面行查該旗。有無兼銜世職等項。徑咨兵部再稽。查倉庫街道之大臣。查有空班等事。參奏者。俱照此辦理。至外省道里遠近。不齊。臣等酌定行查咨文到京限期。並請嗣後各部行查外省及該省咨覆各部公文。均將限何日到省到部之處。封面上註明。各該衙門接到公

文。按日覈對。查有逾期。即將何日遲延之該管官議處。其各省督撫提鎮將軍都統副都統。駐防等衙門。奉部查取職名。以接咨日始限。十日出文咨送。如須行查所屬。按程達月日。扣明咨部。臣部將何日咨行及覆到。敕入本內。如有逾違。或在上司及所屬。均照例分別議處。并知照稽察欽奉上諭事件處。及內閣。科道等衙門。查覈從之。

大清高宗法天隆運至誠先覺體元立極敷文奮武孝慈神聖純皇帝實錄卷之八百二十二

大清高宗法天隆運至誠先覺體元立極敷文奮武孝慈神聖純皇帝實錄卷之八百二十三

監修總裁官經筵講官太子太傅文淵閣大學士文淵閣領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級每當加二級軍功紀錄一次臣慶桂

總裁官經筵講官太子太傅文華殿大學士文淵閣領侍衛內大臣稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書錢謙益滿洲都統軍功紀錄五次

奉常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆三十三年戊子十一月庚子

實錄卷八十三

上詣暢春園問

皇太后安 幸圓明園 諭軍機大臣等聞江

南江西等省民間行用制錢內多有攬入翦

邊小錢者雖經地方官查禁其風總未能止

息此等匪徒敢將制錢私自翦邊銷毀殊干

法紀雖間有查出治罪者不過民間零星使

用究之伊等所翦錢邊碎銅非另鑄私錢即

改造器皿售賣時必有蹤跡可尋若即將零

銅鎔化總賣亦必有銅鋪向其收買市井細

民安得盈千累百之銅其形跡更易於推究若於此嚴密訪拏方為正本清源之道著傳諭高晉彰寶馮鈐吳紹詩等即督飭所屬實力上緊緝拏務將窩主及售賣店家嚴行追訊使奸徒無從潛匿以杜根株毋得僅以具文塞責又諭浙省濫請續製烏鎗一案業審據工部書辦供出浙江布政使承差陳德順打點許銀各情節已諭崔應階悉心研鞫矣又據書辦薛榮懷供稱承辦前案之書辦

平糶奏卷之三

三

王魁一亦曾得過銀兩但王魁一已經出京訊據伊弟供稱前往山海關找伊姊夫等語現已行文該處監督即速拏解送京因思部中書辦籍隸紹興者多王魁一或自揣案已敗露假稱赴山海關潛回本籍避匿亦未可定著傳諭崔應階即飭屬嚴密訪緝如該犯業已回浙速行提拏到案一併嚴切訊究又諭曰李侍堯題叅提標前營守備董鼎侵帑誤公一本已降旨將該員革職交與該撫

嚴審定擬矣解滇馬匹事關軍需要務何得撥發九百餘金專委守備微員辦理而該員輒任意將公帑花銷過半延至數月僅買馬六匹所餘之銀屢催未繳其為該弁藉公侵帑已屬顯然該督僅爾題叅革職並不請治其罪且未議及此項如董鼎不能完繳作何著落代賠均屬非是此案由甘國寶揭報辦理種種未協該督即當另為妥辦李侍堯久任封疆何以舛謬若此又屬奇事矣李侍堯

平糶奏卷之三

三

著傳旨申飭並著將辦理此案緣由據實速行覆奏尋奏此案由提臣揭報當飭臬司提審一面題叅革職未經敘及治罪至該員侵用馬價銀如不能清繳臣擬俟定案時著落原派之上司賠補疏內亦未定議總屬舛謬得旨覽賑河南光州光山固始息縣商城信陽羅山等七州縣本年旱災飢民旌表守正被戕之四川新繁縣民張添祿媳劉氏辛丑諭軍機大臣等鄂寧奏臺灣賊匪黃

教聚衆一案地方遇有逆匪糾衆不法之案文武大員果能辦理得宜立時擒治自斷不致蔓延猖獗今據稱賊匪等於十月十七等日尚有在北路一帶焚燒營房拒傷官兵之事則前此所報賊已四散竄匿及匪夥止有百餘之說俱非確情此實係地方官意在化大為小稟報多有粉飾外省積習如此實可痛恨至王魏雖在臺灣於統兵調度諸事未必能悉合機宜且其人原本平常殊不足恃

高宗實錄

中

十

今吳必達現已帶兵前往人尚歷練能事自可剋期剿捕早絕根株至擒獲各犯前已諭余文儀迅往臺灣隨時審明即於該處正法諒已遵旨辦理惟是漳泉諸郡地近海濱人情亦多獷悍尤宜示以鎮靜毋致稍涉驚疑最為要務其王魏辦理不善情形昨已諭吳必達前往確查覆奏所有臺郡文武員弁稟報不實之處俟事竣後查明叅處數人以示警戒目今情形隨便速奏將此傳諭鄂寧知

之補行乾隆三十二年廣東省軍政年老官一員有疾官二員才力不及官一員處分如例調雲南臨元鎮總兵本進忠為普洱鎮總兵以騰越協副將吳士勝為臨元鎮總兵
壬寅

上奉

皇太后還宮 詣

皇太后宮問安 諭軍機大臣等前因各省積匪猾賊情罪較重定例改發新疆嗣以此等

高宗實錄

中

十

匪犯在新疆聚集太多不無怙惡滋事降旨停止仍發雲貴兩廣極邊烟瘴充軍第思閱時既久各處遣犯又將日積日衆此等原係生事不法之人雖經投畀遠方豈皆盡知懲創况居處相近引類呼朋尤易復萌故智甚至釀成事端皆勢所必至近日昌吉之案即其明驗雖事後原可盡法嚴處但與其治於既犯何如先事立法稽查嚴行管束使奸徒不致輕罹法網尤為緝匪安良正道著傳諭

督撫將軍都統等各就本管地方所有發遣積匪猾賊以及定地間擬流徒各犯俱責成該管官實力體察防範毋令其彼此羣集勾結生事如有不遵約束者量其所犯輕重隨事查辦俾之共知凜畏杜防未形庶足以儆奸宄而資綏靖可於各該處奏事之便傳諭知之 吏部議覆奉天府府丞李綬奏稱奉天一省並無挑選二等舉人而奉天教職較別省尤要應如所奏嗣後令直隸總督於報明二等舉人內酌派二員赴奉天聽候差委從之 癸卯

上幸瀛臺 諭軍機大臣等前因梅立本有多索人夫供給逼斃縣令一案曾降旨各督撫令將各該學政按試時有無濫用驛馬人夫擾累地方之處查明具奏今據陸續奏到各省情形未能盡一俟到齊時再行交議但聞學政向來雇覓人夫買辦食用間有已經給發價值而州縣官於試畢後仍行繳還該學

政者陋習相沿不可不嚴加禁止著再傳諭各督撫確查該省學政考試時如有此等情弊即行據實覆奏毋得少為袒護隱飾 兵部等部議准兩江總督高晉奏稱安省奇兵營右哨設有小唬船十一請裁六又平望營小巡船一太湖左營沙船一大快船一均應裁其各營船舵水手兵原係陸路防汛無庸裁汰從之 命署戶部右侍郎索琳在軍機處行走 甲辰諭據李宏奏巴靈阿現在丁

憂所有淮揚道員缺請旨補放等語外省滿員遇有丁憂事故向俱令其遵例回旗終制但南河關係緊要所設管河道止有二員今淮徐道吳嗣爵甫經陞任若淮揚又易生手於河防諸務甚非所宜已靈阿著賞假百日治喪仍令在任守制不必開缺此後不得援以為例 乙巳

上詣
皇太后宮問安 幸瀛臺 諭軍機大臣等臺

灣賊匪聚衆不法一案。前據該督撫等奏到各情形。王魏等辦理不善之處。大畧可見。節經諭令。吳必達妥協經理。今日崔應階奏據鎮道等稟報情節一摺。是此事初發時。該鎮道尚意在彌縫。則平日之姑息養奸。不問可知。而通覈種種緣由。措置尤為失當。如原報十月初二日。一聞黃教糾衆監旗。即統率官兵勦捕。今摺內稱。初三日在城盤獲賊犯劉恭等二名。又續獲洪答等三十餘名。鎮府既領兵前往。則城內獲犯者何人。城內既獲如許賊犯。可見匪徒結聚已久。不止岡山一處。且稱黃教等監旗聚衆。原想搶奪村莊。並無謀為不軌之意。此語更為大謬。試問賊衆搶奪村莊。非不軌而何。即此足見伊等欲化大為小。化有為無矣。又前摺內稱。王魏於初三日帶兵前赴岡山。知府鄒應元隨往協辦。該道張璫留郡彈壓防護。是鎮道並不在一處。今摺內何以稱連據鎮道具稟。伊等既行守

相隔何以會合。稟報或王魏往岡山後旋即回至臺灣。並未親身督勦。耶再摺內有第八名正犯方髓第九名正犯韓筆之語。賊匪並未解散。劉傳帖等事。何由知其次序殊不可解。此語得之何人。又稱賊首雖未就擒。而賊衆驚惶。他處賊匪難以會合。此語益為荒誕。昨據鄂寧等奏賊匪蔓延北路。有焚燒拒捕之事。可見其並未解散。今驚惶瓦解之語。得自何來。前後矛盾殊甚。至稱挑選年力精壯熟識山徑之人。改裝進山探聽賊蹤等語。更非情理。所有帶兵原為勦賊。況兵丁皆臺灣土著。何至不識路徑。另待挑人。若云竄入生番兵。即不能追捕。尤覺可怪。臺地與生番壤接。平時尚當懾以聲威。至賊匪竄入其境。何難一面諭令擒獻。一面統兵直入。曉以勦緝。內地逸匪。並不滋擾。番地方為正理。乃因番境相隔。即生退阻。設使生番稍有不靖。竟將置之不辨乎。又王魏初二日差人齎奏雨水

情形一摺今日亦已遞到計其拜摺日期即係黃教事發之時該鎮何難具摺由驛速奏可以早為指示且總兵等准其奏事原為地方要務起見而緊要事件並許驛函飛遞今賊匪滋事之案地方公務孰有要於此者並非前此吳士勝馳摺謝恩可比王巍又何拘泥若此竟不飛章渡海告之撫臣速赴郵傳耶看來該鎮道專欲消弭隱諱故從未奏聞而節次稟揭措詞亦多粉飾殊不知盜賊竊發原不能保其必無如漳浦縣逆犯盧茂等一案文武各官上緊辦理妥貼朕即加恩獎敘其出力員弁並予陞賞王巍等豈無見聞若黃教之事一有端倪即迅速掩捕何至賊衆逸出生事乃不此之務妄思以詭詞塞責其取戾更甚又何如先事之據實直陳耶王巍等俟此案辦結後再降諭旨吳必達現已領兵赴臺一切勦賊緝犯自能合宜所有已獲各犯並著交吳必達會同余文儀迅速嚴

審仍遵前旨即行在彼正法如鎮道及在事員弁有乖方貽誤應行究訊者即一面令其解任一面奏聞亦無不可仍即將日來查辦情形星速具奏並將此傳諭崔應階鄂寧等知之 兵部議覆護山西巡撫署布政使富明安奏稱霍州霍山驛南至洪洞縣普潤驛路遠山險若遇差使接踵馬力易疲查趙城縣地方處兩驛適中請於該縣添設一驛需馬七十二匹於甘桃等二十二驛內酌撥歸趙城縣經管應如所請從之 實授恒德為直隸宣化鎮總兵 旌表守正被戕之山東安邱縣民朱朋女朱氏 丙午諭據永貴奏烏什地方本年種地兵每名收穫至十八石著加恩官員等交部議敘兵丁等各賞給一月銀兩 以山東臨清協副將薩靈阿署山西太原鎮總兵 丁未谿雲南永昌曲靖思茅等府廳乾隆三十二年稅課缺額銀一萬一千五百兩有奇 戊申

上奉

皇太后幸壽安宮侍膳、諭前因割辦一案其事始於江浙該督撫等不於春間發覺之初、即時具奏實力根求以致蔓延滋擾是以降旨將高晉明德等交部嚴加議處、今閱明德覆奏在江蘇卸事日期、因令檢覈原案、則蘇州被割髮辮及獲犯數起、皆係三月間事、而明德於二月二十四日已遵諭來京、是此案與該撫無涉、所有前經部議降級之處、著即寬免、朕於臣工一切處分、無論巨細、皆度理原情、務令被議之員中心帖服、不使稍有屈抑、即已付吏議、而事後一經覈實、亦立予豁除、期協平允、從不稍存迴護之見、并將此通諭中外知之、又諭伊犁等處種地兵收穫糧石已至分數、俱經加恩將官員兵丁議敘賞賚、其烏魯木齊民人違犯等雖非屯田可比、如果竭力耕作、收穫至分數者、自應於多收糧石內酌加賞給、該管官員亦應一體議

敘著溫福等即行查奏、請旨辦理、嗣後新疆各處種地民人違犯收穫如至分數俱照此例行、諭軍機大臣等據楊廷璋奏、滄州知州翁耀拏獲盜犯首夥七名、內有四犯該州未准關文、即能豫先盤獲、實屬勤能可嘉、等語、翁耀於兇盜案件不待關緝、移文即能先行查獲、尚屬能事、著送部引見、但摺內稱此事拏獲在、本年三月間、係方觀承任內之案、何以不即辦理、遲延至今始行具奏、殊不可解、或翁耀為人方觀承素所不喜、雖經藩臬兩司詳稟、不為據情入告、及楊廷璋接任、兩司復為懇求、抑或藩臬等前未辦及直至此時始為具稟、楊廷璋因而敘入、陳奏、朕辦理庶務、從不肯絲毫稍存疑義、必須詢考明白、著傳諭楊廷璋、令其查明奏聞、尋奏翁耀具報獲犯後、曾經兩司面稟、彼時方觀承擬俟審明定案、再行具奏、故未即辦理、至該員先經方觀承題陞、延慶州部駁未准、續因辦差

開復陞授今職非素所不喜報聞 又諭據明德奏哈國興查出木邦等處各營逃兵五十餘名先後解審正法一摺兵丁臨陣脫逃自應盡數查拏立置典刑以肅軍紀但滇省兵丁怯懦素習歷任督撫提鎮等釀成貽誤亦已有年今有事用兵情狀始行畢露若此時再不加意振作則將來邊防重地既不能盡置綠營而不用又不能概斥滇人不令充補似此退怯不前甚且紛紛竄逸錮習不悛尚復成何營制此等兵丁與其懲創於事後何如整頓於事前著傳諭阿里衮等此時在軍營者固當加意整勵即內地各營亦應實力董飭俾明於有勇知方之義庶不致終歸無用新授提督之哈國興及各該鎮總兵等身司統率俱有訓練戎行之責現在作何設法約束操演使營伍共知奮勵力改前愆以壯軍威而懲積玩即速會商詳議據實具奏仍將伊等於各標營現在作何辦理情形附

摺奏聞 已酉

皇太后聖壽節遣官祭

太廟後殿○

上詣

壽康宮行慶賀

皇太后禮王大臣於

慈寧門衆官於午門行禮 奉

皇太后幸壽安宮侍宴 諭國學崇祀

先師規制法程美備是飭我

列聖右文重道尊禮有加朕臨御初即詔易黃瓦儀惟其隆邇以殿廡歲久弗葺特發帑金二十餘萬鳩庀鼎新勅大臣董厥成輪奐視舊增益工就告藏而門殿諸額向沿明張璠陋議非所以肅觀瞻明折中也既依會典定名躬為榜書並宣諭釐正大指茲復親製碑記具修建原委且於幾暇手書付鈐表示鄭重將以明年仲春詣學釋奠落成之彰盛典焉遐稽

闕里廟堂有後漢時犧象諸尊以為觀美爰擇內府所藏周范銅鼎尊卣壺簋簠觚爵洗各一頒置太學陳之

大成殿中用備禮器夫

孔子志在從周楹間列姬朝法物於義惟允所司其敬凜將事典守勿替以克副朕意諭軍機大臣等據崔應階奏同知張鐸於續辦烏鎗工價銀內每千兩扣銀二十兩堅不承認一摺已降旨將張鐸革職交與該督

嚴行究審矣昨永德來京陛見據奏伊在浙時已經訊出書辦得贓及承辦之員短價浮銷各情節因令軍機大臣將此案緣由詳悉詢問據稱伊在藩司任內書辦虞九洲初辦製鎗詳文稿係照提標移冊一萬三千餘桿經永德改稿止請造四百四桿詳委同知張鐸承辦後又改委同知廣福已訊據虞九洲供稱廣福許每桿給銀三分託為照應所以報銷文內遂添敘餘請陸續製造字樣並經

訊明初辦四百四桿之理事同知書辦費濟川則稱原詳稿內本無餘請續製之語係廣福自行添入調驗原稿果有旁添筆蹟又訊據續辦三千餘桿之杭捕廳書辦居大川供出此案有已滿藩司書辦虞廷榮料理院司衙門撫房王明齋督房韓如山余景賢夏聲等俱經供認得過廣福銀十二兩應允照詳題請又理事廳書辦潘正音一犯往拘時自行抹時現在收禁醫治又訊鐵匠姚萬山供向張鐸領銀每千兩扣銀二十兩並傳問該員稱每桿用銀二兩五錢三分零數之原估每桿二兩八錢一分之數復有盈餘廣福原辦四百桿事同一例雖已報銷亦應嚴究各等語是此案承辦始於廣福而接辦之張鐸仍前弊混必須切實嚴究今該督雖將張鐸短扣情節叅劾查審而於每一鎗較原估餘銀二錢八分及廣福承辦四百桿浮冒報銷之處尚未敘及尤當一併研究務得實情至

廣福既向藩司書辦行賄復又添請續製字樣現有改稿字蹟可據情弊顯然今廣福雖已身故其子若尚留在浙江即當提取根問亦可得其實在根由又現在案內浙省上下各衙門書辦通同作弊者甚多其中亦必有關通部中書辦囑託照應之事因令軍機大臣訊問工部書辦現據供出有浙江布政使承差陳德順來京打點許銀之事著崔應階即速拘拏陳德順到案將何人託彼來京打點及作何許銀過銀之處悉心嚴鞫務令水落石出不得聽其稍有掩飾其書辦潘正音雖經自行抹脖子傷輕重若何收禁醫治後曾否已經痊愈且該廳書吏承辦此案者原不止潘正音一人伊即因傷重急難訊供其同辦之人自可確切追究毋任詭卸亦不得因此稍致延緩仍即將訊明案情據實奏聞著一併傳諭崔應階知之又諭據阿桂奏途次遇阿里衮擒解緬酋遣來謀者三名請

俟至京詢問後仍行釋回使賊匪不致驚疑等語所奏甚屬錯謬緬酋謀者解京時朕方加之刑訊斷無輕縱之理且賊匪擄去內地多人無一遣還今甫獲賊三名即令釋回可乎此次整旅前來相機而動一年無緒再辦一年自然賊匪畏懾兵威計窮歸款若似此示怯賊匪將更驕蹇豈肯復來投誠阿桂此奏與舒赫德前奏遣人招降無異阿桂前此來京日與軍機大臣在朕前面論此事毅然

自任有不足尹繼善之意今甫至中途即心存畏縮遽欲將就塞責恐到軍營既不能協助阿里衮妥協辦理或反為所掣肘阻其勇銳之氣朕實為之憤懣阿桂著嚴行申飭仍令協同阿里衮遵朕節次諭旨悉心籌辦不得草率了事自干罪戾并傳諭阿里衮知之
庚戌

上詣

皇太后宮問安 幸瀛臺 諭軍機大臣等據

鄂寧等奏到現在辦理逆匪黃教情形並吳必達帶領官兵船隻前往勦捕一摺所辦甚好奸徒糾衆拒捕不法實為罪大惡極應即嚴行搜捕務淨根株以彰顯戮至該鎮王魏本係駐劄臺灣之員自匪徒竊發以來雖即督兵往勦但首夥各犯尚多未獲且自初八日具報以後相隔兩旬未據將曾否獲犯續報撫提諸臣該鎮前後作何籌辦是否妥協吳必達到彼自可得其實在情形著即悉心查奏其匪案起事緣由應即確切根究悉力擒拏毋使一名漏網獲犯之日即於臺地正法宣示俾衆人共知儆惕又前據鄂寧等奏報臺灣道張珽留駐郡城知府鄒應元趕往參酌辦理其事殊不可解道員官階在知府之上且兼轄兵備辦賊乃其專責自應隨營調度知府身任地方留郡彈壓庶為合宜何以行守倒置若此著傳諭鄂寧即行查明據實具奏將此一併諭吳必達知之又諭曰

良卿奏黔省冬月行圍一摺由驛四百里馳報甚屬非是三冬操演士卒藉行圍以練營伍本係督撫等分內應行之事自當照尋常摺奏差人齎進何得擅動郵傳且由四百里馳遞良卿殊屬不知事體著傳旨申飭辛亥諭軍機大臣等昨據崔應階奏請將工部邱姓書辦及廣福家人滕二張五解浙審訊經軍機大臣查明書辦邱宗玉與廣福家人滕二俱已物故請將同邱宗玉辦事之書辦王魁一等並亦屬知情之家人張五解赴浙省併案質訊等語崔應階因查辦臺灣逆匪已回閩省而製造烏鎗一案又係永德藩司任內轉詳之事自不便令其獨審著傳諭永德選派妥幹員役將此案應行質訊緊要人犯及應查案卷即速解送來京交軍機大臣會同刑部審訊該撫務嚴飭派出解員沿途小心隔別管押毋令致有串供及疎虞等事著將此併諭崔應階知之壬子諭軍機大

臣等前據李侍堯奏。暹羅國夷目甘恩勅遣人至該督處具呈稱。暹羅為花肚番殘破。該夷目驅逐賊番。即欲為該處國王乞代奏請封等語。當即代該督寫檄諭稿。令交甘恩勅來人齎回。距今已逾三月。自應早有覆文。後又據阿里衮等奏。有守備程轍在阿瓦具稟將軍有暹羅欲圖恢復之語。復經降旨李侍堯。即選妥幹能事員弁往曾經繪畫海外夷圖進呈之河仙鎮夷目莫士麟處訪問。暹羅

近日實在構釁情形。速奏此旨。由六百里馳寄至今。亦一月有餘。所遣探詢消息之人。此時諒應回粵。何不以為事。著再傳諭李侍堯。將莫士麟所覆確情若何。及甘恩勅有無覆稟之處。即速詳晰查明。迅奏尋奏。前奉諭隨派署遊擊鄭瑞等附商船前往河仙鎮。向莫士麟查詢。但自粵東至該處。均屬外洋。須俟次年三月東南風順。始得回帆。未能剋期得信。得旨。既未得信。何須六百里。又糊塗了。汝

不應如此也大奇 癸丑

上詣

皇太后宮問安 幸瀛臺 諭曰御史成德奏

請將關稅盈餘歸入正額一摺。殊屬不知事。理國家稅課本有常經。各關商販日盛。貨物流通。稅項歲有盈餘。亦勢所必至。各監督每年按數報解。交部確覈。如該監督稍有侵漁。一經察出。即當按律治罪。是弊實不因盈餘而生。豈因歸併正額而遂可杜耶。若如該御史所奏。既無當於剔弊之道。轉似於正稅外加額徵取。更與政體未協。況盈餘一項。各關商貨多寡不等。每年稅銀亦贏縮不齊。又當以何年之數為準。若就現在盈餘若干。定作正額。將來設遇課銀稍絀。即指為正額虧缺。乎抑別為隨時酌改。乎所奏甚屬卑鄙。而不知事理。成德著飭行。又諭據彭寶奏。江陰縣丁墅桃花等鎮保正沈添益等欲將熟田一併緩徵。開寫傳單。糾衆突至縣署。將公案

桌椅毀壞甚屬兇悍不法現在已究出一百二十餘名全獲審辦等語。地方遇有水旱偏災，朕念切民依，一經奏報，即飭該督撫悉心查勘，有應行撫卹之處，不惜多費帑金。期間閭閻需實惠，不使一夫失所。今歲江陰縣西鄉偶被偏災，業經有司查明分別蠲緩。若成熟地畝，本非偏災可比。百姓既明知得被恩膏，何得更於例卹之外妄生微倖？悍然藐法抗官，毫無忌憚。而保正等皆屬在官人役，乃

敢借端飲錢煽惑衆人入署毀壞公案，實為不法之尤。其罪無可復逭，朕於良民偶遭災歟，加意拊循，惟恐不及。若受恩不知感激，甚至干犯縣官，則去莠鋤奸，國法不能曲貸。此案已降旨該撫嚴審定擬，並將此通諭知之。諭軍機大臣等著傳諭彰寶將各犯嚴加審訊。照河南新野縣奸民聚衆之案以光棍例將為首及同惡相濟各犯多辦數人，不可稍存姑息。即在事為從之犯，雖不至盡行正

法亦當遣發伊犁、烏魯木等等處以示懲儆。斷不可仍留本地致長刁風，更不可使之免脫。除派專員盡行嚴解交吳達善即將審明辦擬緣由迅速覆奏。又諭前據崔應階鄂寧等節次奏報臺灣匪犯黃教糾衆不法一案，朕覈其情節即料及必係王巍在彼辦理不善與該道府因循貽誤所致。業已諭令吳必達查辦。今閱王巍奏摺，則該鎮於九月初一日抵臺灣地方已知有積匪黃教糾夥滋擾之事，自應即行督兵親往上緊查拏，務期盡獲奸匪以靖海疆。乃僅委守備一員把總一員會同文員入山搜緝，致奸徒無所畏忌，釀成事端。至十月初二日聞賊匪在山頂暨旗糾集百有餘人，始帶兵往勦而所獲各犯又屬寥寥。計其時距該鎮初聞此事已及一月，是王巍等玩視賊情，稽延誤事，果不出朕所料。此次摺內尚稱該處山嶺重疊，路徑崎嶇，是其怯懦觀望情形，更覺自難掩覆。看來

此番賊匪蔓延總由該鎮及道府等始而意在彌縫希圖了事繼復由王魏心存畏蒞不能奮往督勦以致賊益鴟張王魏實罪無可逭著傳諭吳必達就近查明據實嚴叅並將此諭崔應階鄂寧知之 又諭曰阿里衮等前赴龍陵巡察地方業經兩月有餘昨又據奏老官屯緬匪呈書請示亦已二十餘日曾否派令巴圖魯隊官兵捉生攻掠及賊匪另遣人來之處均未具奏辦理緬匪一事本年暫不進兵原欲休息兵力以覘賊勢即相機籌辦非謂屯駐防守遂畢乃事也果因防守起見則地方官優為之事何必又令伊等大員統兵前往而在彼株守坐誤機宜實令人不解計此時阿桂已至軍營著傳諭阿里衮阿桂將賊匪現在情形及伊等如何辦理之處迅速奏聞 旌表守正捐軀之河南寧陵縣民張朋祥女張氏 甲寅

上御乾清門聽政 以太僕寺少卿申甫為光

祿寺卿 是月直隸總督楊廷璋奏直屬本年偶被偏災蒙恩賑貸其有收處所米糧亦不免昂貴請暫停勸捐得旨是 江蘇學政景福奏抵江陰謁

文廟適聞鄉民糾眾闖入縣署毀壞公案即親率該縣星赴彈壓并嚴飭縣役營兵拏獲十二人隨督同追拏數十人得旨如此方是此非越俎干與地方事務也勉之 署河東河道總督吳嗣爵奏東省運河以汶水為源泗洸沙趙等河分流而南旺最為水脊南高臺莊十二丈置閘二十八北高臨清九丈置閘二十一東西兩岸設橋壩涵洞互相挹注河身彎曲與南河平順者不同除臨清以北下河廳屬衛河並無閘座長流迅駛不能熬壩興挑今仍派兵淺額夫用船撈濬其臨清閘內塘河本年衛河盛漲渾流倒灌停淤又南旺濟寧彭口塘河因汶泗沙趙等河水迭發積沙亦多均須挑深一二尺至五六尺不

等惟挑河工程向有墊崖貼坡等弊現按段
簽釘誌橋并視河崖上舊草根為准其挑起
土令擡遠處不得堆積河崖報聞山東按
察使尹嘉銓奏初至省城攔輿赴訴甚多而
頂名假冒希圖濫准及以戶婚田土越控者
各居其半類皆訟師架詞聳聽俱按律重懲
並訪拏訟師治罪民間頗有怨聲終不敢徇
名寬假現在訟謀漸稀得旨嘉獎協辦大
學士公副將軍暫署雲貴總督阿里衮等奏
永昌騰越所管磨盤山一道上下九十里異
常陡險石路殘費過多又騰越州有龍江鐵
鎖橋鐵練輕細礙難經久明歲兵行糧運橋
道關係最要應亟修整得旨嘉獎

大清高宗法天隆運至誠先覺體元立極敷文
奮武孝慈神聖純皇帝實錄卷之八百二十三

大清高宗法天隆運至誠先覺體元立極敷文
奮武孝慈神聖純皇帝實錄卷之八百二十四

監修總裁官經筵講官太子太傅文淵閣大學士文淵閣領事內大臣稽察欽奉 上諭事件處管理

吏部理藩院事務內閣學士滿洲副都統世襲副都統功加七級隨帶加一級尋常加二級軍功紀錄一次 臣 慶桂

總裁官經筵講官太子太傅文華殿大學士文淵閣領事稽察欽奉 上諭事件處管理刑部戶部三庫事務

世襲副都統功加十九級隨帶加二級又加二級尋常加二級軍功紀錄一次 臣 曹振鏞等奉

尋常紀錄十四次 臣 德麟經筵講官太子少保工部尚書紀錄六次 臣 曹振鏞等奉

敕修

乾隆三十三年戊子十二月乙卯朔諭賊匪

黃教糾眾不法一案該鎮王巍於九月初一
日抵臺灣即據地方官報知其事自應刻即
親往勦捕盡獲匪黨以淨根株乃僅派守備
把總入山搜拏遷延一月致賊匪得以肆行
無忌直至十月初二日聞匪眾豎旗之事始
帶兵親往昨閱伊奏摺其觀望畏蒞情形畢
露即此一節已難勝總兵大員之任王巍著
革職俟督提等查叅到日再降諭旨 又諭
兵部奏革職知府邵大業呈請贖罪一摺甚

屬非是邵大業前經獲譴加恩復用之員不
知感激奮勉實心任事以致地方釀成匪案
又一切置之不問闕茸已甚是以降旨革職
發往臺站効力贖罪乃以年屆六十素質羸
弱恐致貽誤軍臺為詞試問伊久任知府何
以戀職隱忍不聞以此引退而將赴軍臺獨
藉此為諉飾乎邵大業不准贖罪所有率行
具奏之兵部堂官著交部察議 禮部議奏
磨勘河南省舉人喬之邵等二名試卷挖補
雖無關文義恐日久弊生應照疵謬例停科
並定為例從之 兵部議奏請嗣後凡襲世
職各員令該督撫先行驗看如應襲之嫡長
子孫人材不及即於嫡次子孫內揀選擬陪
倘應襲子孫祇有一人此外並無合例者該
督撫聲明咨部引見時恭候欽定從之 調
福建漳州鎮總兵葉相德為臺灣鎮總兵閩
粵南澳鎮總兵何思和為漳州鎮總兵浙江
黃巖鎮總兵林國彩為南澳鎮總兵以福建

澎湖水師副將許德為黃巖鎮總兵以故廣西鎮安府屬下雷土知州許慶長子瑞麟襲職丙辰諭據宗人府奏盛京主祭之宗室章京阿郎阿果勒明阿病故請由在京宗室章京內揀派二員前往等語盛京祀典所關甚鉅如宗室章京不敷即著令五部侍郎輪班主祭無庸由京遣往又諭曰明德奏辦理逃兵一摺內稱哈國興至廣南營查辦時守備田倫綱辦理不密以致跟隨兵丁宿秀生鄧朝貴陸成美三名聞風潛逃請將田倫綱交部嚴加議處等語查辦逃兵自應小心慎密田倫綱身為守備輒令營書唱名致營兵聞信脫逃議處不足以示儆田倫綱著革職令在軍營自備資斧効力贖罪所有逃兵即著嚴飭地方文武密速緝拏務獲毋得任意玩延使該犯等乘間遠颺漏網諭軍機大臣等刑部議駁江蘇巡撫彭寶審擬叅革江浦縣知縣劉泰龍短價派買料豆僅擬

滿杖一本所駁甚是已依議批發矣劉泰龍以自應採買之豆轉派牙行短價給發以致各行戶交豆不前顯有強派情弊即云革生王在文冒充牙行情願承辦而領狀內現有丁文遠等四人之名豈有遽信王在文一人而不遍詢各行即便交辦之理其為劉泰龍授意勒派故作不知更不待言該撫於此等緊要關鍵並不按情推勘輒照低價買物問擬明係有意開脫沾染外省沽名惡習殊屬非是著傳諭彭寶將因何如此輕縱之處明白回奏仍照部駁情節另行審明實情妥擬具題尋奏此案臣彼時查例載勒買短價坐贓治罪定例稍輕不便援引因依司詳以低價買物准不枉法律問擬未將該員授意勒派情由推勘明白以致革率辦理報聞又諭曰明德查奏羅源浩應賠銅廠銀兩一摺內稱即係限內全完仍不准其開復程之章等各員如於一年完項照例開復而另片內

又稱均俟交賠完日方准回籍等語顯係該撫意存姑息急欲為伊等開脫所辨非是羅源浩為人朕所素知前於浙省道員任內曾經加恩補授京堂乃召見奏對意並不知感激惟欲貪戀外職養廉及將伊復用道員一味戀棧因循竟不實心任事以致銅廠廢弛日甚任聽屬員透漏作弊甚致銅本有虧亦不上緊釐剔其溺職負恩初非尋常失察應賠官項之人可比前經降旨甚明是論羅源

浩之情罪即將應賠之項按限全繳尚當交部治罪以示懲儆豈徒不准開復遂足蔽辜但此時伊若自知餘罪無可解免則應交官賠項勢必怠玩不前是以暫且停其交議傳諭該撫看其完項情形如不甚踴躍即將伊監禁著追事畢時再行奏請治罪至程之章等均係專司銅務之人任意濫放虧帑亦有應得之罪如拖延不完並著監追俟伊等交完官項之日一併具奏請旨著將此詳諭明

德知之 又諭據阿里衮等由六百里馳奏一摺朕加披覽祇係尋常事件而於如何辦賊之處仍無一語奏及甚屬非是阿里衮身為將軍尚書兼領侍衛內大臣帶有滿兵數千在彼駐劄理宜分派巴圖魯弁兵捉生攻掠使賊匪自相驚擾久而窮蹙自來投誠豈有坐待之理顯係心懷畏葸欲圖草率了事阿里衮自京起程時看其尚屬奮勇不意到彼惟以駐守塞責而於一切布置毫不經意

殊負朕恩著傳旨嚴行申飭 戶部議覆御史虞鳴球奏稱勲田一項係前明勲臣產業散在江浙諸省其賦較別項田畝為輕且不納漕米現在執業並非勲臣後裔而田賦科則相沿邀恩殊為未協應如所請勅各督撫按冊立限飭各州縣清查並令民戶首報布政司覈實一體輸將督撫具奏辦理從之

丁巳

上詣

皇太后宮問安 幸瀛臺 戊午諭軍機大臣等崔應階奏盤獲汀州傅元禧帶有旗信逆詞隨即拏獲逆犯十一名一摺總兵眉綬及府縣各官辦理此事尚屬妥協此等奸匪敢於結盟散札情甚可惡務須上緊查拏毋任一人漏網從重處治庶足以示懲儆閩省現有臺灣匪犯一案尚未辨結今復有此案即須查審崔應階應速回閩省辦理前已令永德回浙如此時已到浙江崔應階即將巡撫印務交代起程若尚未回任即將撫篆交劉純煒暫行護理崔應階迅速前往汀州就近查辦其應拏廣東逆犯已諭令李侍堯一體嚴拏如有續經究出應拏之犯該督可即飛咨粵省嚴緝務獲至汀州府知府宋豐綏及該處文武各員內所有實力妥辦之人著崔應階查明據實具奏有應送部引見者亦並列名奏聞再閱該犯等逆詞內多隱語且開有藥方其蹤跡甚為詭秘或於此中究出造

意割辦首犯亦未可知崔應階查審時著一併留心根究 又諭據崔應階奏盤獲汀州民人傅元禧搜出旗面印記並妄誕逆詞并單內開有廣東奸匪孫志賢等現在飛咨粵省查拏等語奸民聚眾滋事深為不法之尤理應上緊緝拏從重懲治業經降旨崔應階即回閩省查辦所有粵省奸民孫志賢等著傳諭李侍堯飛飭幹練妥員速行緝獲再閱該犯等逆詞內多隱語且開有藥方其蹤跡甚為詭秘或於此中究出造意割辦首犯亦未可知李侍堯獲犯查審時一併留心根究仍將緝犯情形迅速奏聞尋奏隨委糧驛道李縉等馳赴訪緝間准閩浙督臣咨稱廣東孫志賢已到案質訊並非廣東省係蒲城縣之廣東嶺餘無粵民在內報聞 又諭前據李侍堯奏總兵明達不發齋摺路費抑勒守備甘廷亮自縊身死經甘廷亮之子具控一案當即降旨將明達解任交該督嚴審如

果所控屬實即將明達一面革職審擬一面據實奏聞迄今四月有餘尚未見該督奏到此事並無難辦之處何以延緩若此著傳諭李侍堯即速將明達有無扣發路費甘廷亮是否抑勒自盡各情節嚴加審訊務得實情迅即奏聞又諭曰阿桂奏接朕兩次諭旨令相機辦賊即趲程往會阿里衮協同勦辦等語昨據阿桂奏請釋回擒解緬匪三名朕以其處置乖方傳旨訓飭此次所奏乃自知前摺之非趕往會商尚屬有心振作著傳諭阿里衮阿桂務遵節次諭旨妥為辦理迅速奏功毋稍貽誤再緬匪駐劄老官屯布普喇一小頭目徑行文內地將軍等殊屬越分嗣後有似此者即行駁飭勿任縱玩并將此諭令知之工部議准江蘇巡撫彭寶疏稱華亭鎮洋寶山三縣戚家墩等處沿海土石塘經潮浪衝損應加築單壩坦坡從之旌表守正捐軀之直隸雄縣民李良棟妻康氏

已未

上御太和殿視朝文武陞轉各官謝恩諭前據山東省查獲蔡廷章靳貫子通果等供認割辦確鑿經朕降旨詢問該撫如何設法成招而富尼漢覆奏並未刑求到案即行供吐及至解京後經軍機大臣會同刑部審訊其外省所取供詞皆係承審官刑逼妄供而各犯身受刑傷種種現在尚未平復是富尼漢前次覆奏實屬捏飾已將伊交部嚴加議處又程燾奏拏獲僧人普潤不加刑求即自認為割辦匪犯及交河南巡撫阿思哈將普潤案內應質人犯於普潤解至該省時就近提質究出普潤向湖北都司田國恩任所尋父經田國恩妄拏送交黃岡縣查訊該縣楊儀輒加刑訊普潤畏懼信口混供及查起辦藥毫無確據已傳諭將田國恩楊儀及普潤等解京審訊俟審結時再將程燾議處割辦匪犯蔓延各省擾害良民督撫等自當飭屬上

緊嚴拏。但獲犯到案。必須細察情由。反覆研訊。豈得濫加刑拷。累及無辜。屢經傳諭各督撫。極為明悉。乃各省並未獲一真實匪犯。而山東湖北二省。輒將無干之人。妄加鍛鍊。輾轉株連。若非朕洞晰其情。提解覆訊。幾成冤獄。至富尼漢。始而頗知認真。繼緝程燾。則因朕降旨詢問。始行盤獲。一二游僧塞責。覈其初辦情形。富尼漢與程燾判然不同。而以刑逼成招之案。敢以不事刑求。誣奏則兩人如出一轍。督撫等偶有無心之過。尚可加恩寬宥。乃辨理此等重大案件。公然有心欺飾。且二人皆初經委任之員。竟不知以誠實自矢。即重治其罪。亦所應得。若僅予以革職留任。未足蔽辜。而似此居心。豈可復膺封疆之寄。富尼漢著降補山西布政使。革職留任。其山東巡撫員缺。即著富明安補授。程燾著降補江西布政使。革職留任。其湖北巡撫員缺。即著揆義署理。諭軍機大臣等。前以福建民

人李浩背賣孔明碑記圖經。浙省拏獲。供詞狡卸。因傳諭崔應階將李浩供出之犯。迅提研究。務得實情。今閱該督覆奏。稱李浩原供得自王三之處。王三到案。堅不承認。即李浩亦稱實不認識。原係畏刑。妄供等語。王三既係李浩妄供。其碑記得自何人。自當另行窮究。今李浩供七月底在福鼎縣桐山相離三十里之飯店內。開店人向說有孔明碑記。因將安良圖與彼換取。持赴傳阿有店內。令其刻板。而福鼎縣知縣稟稱。訪有長樂縣民陳茂崇等。將碑記互相傳鈔。訊之陳茂崇。則供得自陳茂。相陳茂。相復給林聖可。林聖可復給酒店幫工之人張順應。張順應因遇李浩。傳賣安良圖。隨託陳行海照鈔。向其兌換。是李浩碑記得之於張順應之手。自無疑義。但李浩所供。只云開店人而不能舉其姓名。張順應何由知其為李浩。其中情節。必須切實質訊。始成信讞。至陳茂相一犯。係此案起初

傳說之人但據云曾在省城鈔有碑記則又當向其窮詰層層根究造作首犯方可完案著傳諭崔應階將此案詳悉追究務令水落石出毋致稍有疑竇即將審擬確情據實覆奏至李浩在溫州因何畏刑妄供之處並向該犯研訊明確一併具奏所有案犯俱在浙江而陳茂相等又經該督令其解浙歸案訊擬昨已有旨令崔應階即回閩查辦逆案事件今碑記一案起自福建其蹤線仍當於福建追尋所有續解陳茂相等各犯崔應階途次遇見時仍可帶回閩省審訊其已經在浙之李浩等應行質訊要犯著永德選派妥員小心管押解往福建交崔應階就近查辦毋致稍有疎虞將此并諭永德知之又諭據明山奏署潼關廳同知趙本蟠盤獲僧道慧如等二名帶有天津縣印札稱直督等派令出外躡緝割辦匪犯之人華陰縣楊成棧查驗印札屬實即給以回札轉送河南所辦草

率均請交部議處一摺直隸查緝割辦匪犯設法差令僧道體訪曾經附摺奏明其事亦無關緊要但僧道等如果係匪犯假冒妄為則自直隸以至陝省經過地方必多有割辦滋擾蹤跡隨時敗露何難稽查得實今慧如等所至之處並無犯案且又齋有印札到官赴驗其非奸徒影射可知地方官留心盤詰固屬分所應為而該撫過於逆億并印文亦疑其作偽則未免於事理不能透徹所有趙本蟠等均無庸交部議處仍將此傳諭明山知之漕運總督楊錫紱故以山東布政使梁肅鴻署漕運總督山東按察使尹嘉銓為山東布政使服闋湖北按察使雷暢為山東按察使 庚申

孝惠章皇后忌辰遣官祭

孝東陵 諭軍機大臣等據吳必達奏督勦賊匪黃教一摺內有賊衆東窺西擾官兵疲於奔走未易剋期竣事等語所奏未免心存畏

難吳必達平日尚屬能事昨一聞逆匪蔓延之信即帶兵渡海督辦頗覺勇往何以甫至臺灣輒爾張皇顧慮此等么膺鼠竊原屬不成事體縱使避匿山洞官兵奮力合剿何難剋期就獲前據鄂寧等奏稱分調水師前往合之臺灣本地之兵已不為少今該提督稱現兵不敷派撥已飛咨督撫添調鄂寧現在廈門自即派兵接應吳必達應即上緊督兵設法搜剿迅速擒獲以靖海疆不得復以兵少為詞致奸宄久稽顯戮至此案初起時不過匪徒偶聚深山潛行滋擾本非難辦之事地方文武若即督率掩捕原可立就撲滅皆由總兵王魏畏蒞觀望遷延一月致賊匪鴟張不法實為貽誤已降旨將伊革職至伊統兵以來尚容賊衆肆行竄突焚掠拒捕則其漫無調度更可想見矣吳必達何以不即參奏着再傳諭吳必達遵照前旨將王魏懦怯乖方之處據實嚴叅究治仍將現在勦賊情

形迅由六百里具奏并諭崔應階鄂寧知之又諭據錢琦奏現赴建寧查辦傅元禧等逆案一摺該犯等敢於造作逆詞結盟糾衆情罪甚為可惡自當徹底嚴究務將首夥各犯迅即擒獲重加懲治不得因其茹供不吐致令狡卸稍有輕縱錢琦聞信即行親赴查辦固屬分所應為但省會重地不可無大員彈壓昨據崔應階奏至已諭令迅回閩省督辦崔應階一到甌寧錢琦即應先回省城俟傅元禧等一案辦畢之後崔應階即赴廈門籌辦臺灣一切事宜鄂寧即可回省辦理地方事務可將此傳諭崔應階鄂寧並錢琦知之又諭據鍾音奏廣東省官犯朱邦寧於十月初九日接准勾決部文飛提解省旋據翁源縣知縣葉榮觀詳報該犯病勢委頓復委該府錢鳴泰前往督解據稟十月十四日將該犯扛擡旋即昏迷停止起解延至十六日在監病斃請將葉榮觀各該管上司分別

革職議處一摺所奏殊不可信已交部嚴察議奏矣朱邦寧係縣令枉法受贓應明正典刑之犯先經傳諭各督撫豫將官犯提至司監聽候勾到部文辦理該省於九月二十五日接奉廷寄即經臬司飛提翁源距省僅八百里該縣奉到司文即應如期起解乃任其藉病稽延而所報病斃又復不先不後適在予勾行刑之時其中顯有情弊豈得但以驗訊明確含糊了事看來並其監斃之事皆不可信矣外吏怠玩欺朦習為故智其風實不可長李侍堯身任總督與鐘音近在同城於地方尋常刑名錢穀事件原可聽撫臣自行繕奏乃以此等重大案情何得置身事外不行專摺奏明一任撫臣主稿僅於摺後按例會奏之理實屬不知輕重李侍堯向來尚屬精明強幹任事奮勉之人何近日辦事忽改前轍屢形不及若此著傳旨申飭所有此案官犯臨時斃獄情由著專交該督即行嚴密

鞫訊務得確情據實覆奏其管獄各官既經革職如狡展不吐實供即應加以刑訊務令水落石出毋得任其稍有支飾自干咎戾將此傳諭該督仍令速行嚴察奏聞尋奏隨率兩司親詣啟驗實屬病斃惟據該府錢鳴泰供稱抵縣時將收禁司監諭旨飭看該縣已悉提解原委仍延挨不解是葉榮觀明知該犯勾決在即故令瘦斃獄中倖逃顯戮應照故出人罪律問擬錢鳴泰交部嚴加議處得旨該部覈擬具奏兵部等部議奏吏部尚書託恩多前署步軍統領任內於各該旗步軍協尉等查夜曠誤一任廢弛並不行查叅實屬不職請照例革職得旨託恩多著革職調禮部尚書永貴為吏部尚書以左都御史觀保為禮部尚書內閣學士素爾訥為左都御史給事中德成為內閣學士兼禮部侍郎永貴未到京之前命兵部尚書託庸兼署吏部尚書事務命禮部尚書觀保兼管鑲

清 實 錄 乾隆三十三年十二月上

白旗蒙古都統調鑲紅旗滿洲都統託庸為正黃旗滿洲都統以正白旗滿洲副都統扎拉豐阿為鑲紅旗滿洲都統辛酉諭軍機大臣等廣東省官犯朱邦寧以縣令枉法受贓係應明正典刑之犯本年秋審情實業已予勾昨據鐘音奏該省於九月二十五日接奉豫提官犯收禁司監聽候部文辦理諭旨於十月初九日接准勾決部文節經臬司飛提而該縣以朱邦寧病勢委頓據稟十月十四日將該犯扛擡旋即昏迷停止起解延至十月十六日在監病故等語監犯病斃在常時雖間有其事而朱邦寧之死不先不後適在予勾行刑之時其中難保無李代桃僵情弊所報監斃之處殊不可信現已有旨交李侍堯將管獄各官革職嚴行訊鞫務得確情自當水落石出其朱邦寧一犯若竟係豫行串通抵換倖逃憲典斷不敢仍留粵東勢必遠颺潛匿閩粵江西疆界毗連或即竄入

該省地面亦均未可定除諭四川總督於該犯梁山原籍密查外著傳諭崔應階鄂寧吳紹詩等飭屬實力密訪如有蹤跡立即擒獲奏聞 壬戌

上詣

大高殿行禮 兵部議奏署散秩大臣兼昭信伯李淑忠值班曠誤請旨辦理得旨李淑忠著革退署散秩大臣併世職 工部議准陞任河東河道總督嵇璜疏稱運河捕河二廳屬埽壩各工經汎水疊漲溜勢汕刷殘缺堪虞應加鑲捍禦從之 旌表守正捐軀之河南孟縣民張所敷女張氏 癸亥

上詣

皇太后宮問安 軍機大臣等議奏各省綠營生息銀前經定議全撤令各將軍督撫另籌別款以資賞項今據先後奏覆直隸山東山西廣東等省酌用裁減冗糧湖廣陝西等省以節省馬乾餘剩馬價應用浙江福建等省

以鹽課盈餘房地租銀撥給甘肅廣西等省請於改馬為步改戰為守項內湊支。悉按照地方情形酌籌可行永久均應如所奏辦理。至熱河吉林黑龍江成都等處所請照舊滋生及改賞為借各款覈其所辦情節俱於事理未協應令熱河於節剩賞項吉林黑龍江於餘地租銀成都於鼓鑄餘項通融支給。其荊州駐防有出征滇兵借款據該督定長奏請扣限五年完交應准其展限俾得從容還

項雲貴二省綠營俟軍務全竣日查辦從之。又議覆宗人府奏盛京宗室向無管轄之人請照京師例添設總族長一員每翼添設宗室佐領一員俟出缺時令盛京將軍於盛京承祭宗室中每缺各擬一員宗人府帶領引見補用並鑄給總族長關防佐領圖記三年無過給紀錄一次領催人等即在該處充派均應如所請從之。戶部議准查倉大臣兵部尚書託庸等奏稱盤驗京通各倉每屆

五年丈量一次徒滋糜費應停嗣後分年支放按倉分劃新收舊貯得旨是依議。兵部議奏駐劄闡展辦事大臣福僧額於昌吉滋事脫逃之種地郭二小等犯經由該處不能緝獲應請降調得旨福僧額著降一級調用。工部議准陞任河東河道總督嵇璜疏稱運河廳屬濟寧汛東西二隄加河廳屬滕嶧二汛東隄緣風浪撞激塌卸甚多應幫培高厚從之。又議覆陝西布政使勒爾謹奏稱

各屬估變房船什物不過按年遞減籠統開報其實在情形上司並未目睹議准議駁究屬懸揣請令布政使親勘等語查房屋船隻遇有裁汰均須按期估變布政使錢穀事繁勢難分身往勘應請嗣後估變銀數在二百兩以下者令地方官估報該管知府確勘司道覆覈具詳督撫咨部二百兩以上者該管道員隨時親查布政使轉詳督撫覈奏若多至數千兩者或令藩司勘估或督撫乘便覆

勘均聽該督撫臨時酌辦從之 旌表守正捐軀之湖南善化縣民尹盛貴妻曹氏逼嫁子諭前據李侍堯奏潮州鎮總兵明達抑勒守備甘廷亮墊發齋摺路費等項致令自縊身死經該親屬呈控請旨解任質審一摺業經降旨將明達解任交與李侍堯嚴行審究如所控屬實即一面革審一面奏聞今據該督奏稱已經審出支用齋摺盤費等項屬實等語明達著革職交該督即行嚴審定擬具奏 軍機大臣等議覆直隸提督王進泰奏稱獨石口古北口二處驛站均隸提督兼轄凡支放錢糧若聽管站司員豫領存貯並不報明兼管大員稽查出入難保無那掩弊實應如所奏嗣後獨石口工料銀令管站司員冊報提督移咨戶部支領其銀貯口北道庫該司員於每季首赴庫領取仍將日期報提督存查其古北口工料銀向在藩庫關支

道遠未便應令管站司員分作兩季報提督轉行藩司給領存霸昌道庫俟下屆季首再赴道庫支發其二驛應給蒙古站倒馬價銀均由提督轉咨理藩院移戶部領銀貯兩處道庫按季關支兩處道員均隨時咨報提督存案至各站經餵馬匹之把總夫頭領銀具結一併報提督察覈亦應如所請從之 兵部議准御史覺羅敦岱奏稱順天武鄉試例止派外場監試御史四員並無內簾監試御史武會試例派內簾監試御史一員而耳目難周應請嗣後武鄉會試添派滿漢監試御史各一員至考試武進士舉人等雖額數較少而場外牆垣巡防宜密應照文場例派弁兵員役巡查從之 以署山西太原鎮總兵薩靈阿為廣東潮州鎮總兵 旌表守正捐軀之河南溫縣民鄭生才妻馬氏 乙丑諭據閔鶚元等奏湖廣總督定長於十二月初六日患病身故等語湖廣總督員缺著高晉

就近馳往署理仍兼攝荊州將軍事務兩江總督事務著彭寶暫行兼署吳達善著調補湖廣總督該督現在來京俟陛見後再赴新任其陝甘總督員缺著明山補授諭軍機大臣等據阿里衮等奏派海蘭察巴朗塔瑪鼎領兵三百餘名分路前進等語阿里衮等接朕前旨派海蘭察等帶兵捉生攻掠但為數無多恐有疎虞計此時阿桂已到著傳諭伊等速即領兵策應以壯聲援又據奏自緬

逃出之何士順供稱結些帶兵三萬駐劄邊境俟大兵到時即攻取阿瓦城等語看來結些與緬匪構釁屬實可將本年暫不進兵之處曉示結些令其明歲會兵協剿俟平定緬匪後即以該處地方給令移駐實為妥便阿里衮等務宜相機籌辦勿誤事宜仍將海蘭察等現在進兵情形速行奏聞吏部議覆江西按察使佛德奏稱外省官員遇有親友置貨攜署散交同寅下屬輾轉銷售微末佐

雜無屬員可散勒派所部鄉保給紳民繳價該管上司或視為泛常竟不查究等語應通行各督撫嚴飭所屬務令禁絕倘同寅上司中仍容隱不舉并查叅從之以故蘇尼特多羅貝勒甘珠爾子恭桑扎勒照例襲封調河南巡撫阿思哈為陝西巡撫以哈密辦事大臣文綬為河南巡撫調四川川北鎮總兵福昌為松潘鎮總兵以湖南衡州協副將長清為川北鎮總兵丙寅諭軍機大臣

等崔應階奏據布政使錢琦稟稱盤獲奸僧覺圓并傳元禧所開夥犯董乃福等一案現已拏獲二十二人惟賴子性高永彪未獲等語此案在事官弁等辦理尚屬奮勉其中有應送部引見及分別酌量議叙者該督即行查明具奏其賴子性高永彪二犯即速上緊緝拏務獲以淨根株毋任延緩遠颺將此傳諭知之又諭宋蘇軾有鳳翔八觀詩如所稱石鼓詛楚文開元寺王維吳道子畫天柱

寺維摩像東湖真興寺閣李氏園秦穆公墓諸處皆秦漢以來相傳舊蹟內惟石鼓文久經移置國子監其餘所有尚在鳳翔境內後人曾否修葺至石碣塑像畫壁閱時既久是否尚可追尋抑已俱就湮沒著傳諭明山隨便留心體訪明確并將歷來興廢緣由遇奏事之便附摺奏聞又諭昨已降旨將阿思哈調補陝西巡撫但須俟文綬到豫後方能赴任現在陝西撫篆係勒爾謹護理為時尚久一切俱宜勉力不可稍有懈弛至明山已陞任陝甘總督有統轄兩省之責於阿思哈未赴任前陝西事務該督更宜加意照管無或畧存畛域之見著將此傳諭明山並勒爾謹知之又諭曰文綬現在新疆到豫尚須時日阿思哈來京陞見後仍暫回河南辦事俟文綬到豫交代再赴陝西新任將此傳諭知之以殺虎協副將阿明阿署山西太原鎮總兵丁卯

上詣

皇太后宮問安諭曰盛京將軍明福有面問事件著馳驛來京所遺印務暫令額爾德蒙額署理諭軍機大臣等鄂寧奏查出閩海關稅銀那新掩舊一摺已傳諭令明福由驛來京先行詢問關稅儘收儘報原屬一定之例如有徵收偶遇短少不能足額之年經部駁令督撫等查覈覆奏屬實亦無責令賠完之理何得將下年稅銀提補前額其中若非侵蝕舞弊何至自甘那移掩飾若此况下年之稅補入上年下年再有不足輾轉提補無論後任之人難以接受且由此日就虧缺勢又何所底止又所短止有一萬二千餘兩之數而提補乃至一萬七千有餘雖委員供係撥補石瑪等口缺額此等各口課項何以又不歸入閩海關正數之內種種殊不可解著傳諭鄂寧即將那掩情由徹底清查務使水落石出毋任稍有隱匿所有委員彭譽即一

面革職并闕口書吏人等嚴行究訊。此摺暫停交部俟審有大端具奏到日再降諭旨。先將此傳諭鄂寧速查奏聞。又諭刑部議駁尹嘉銓奏竊盜滿貫及三犯竊盜賊至五十兩以上擬絞各犯再加監候一年。照別項可矜人犯減流之處毋庸議一摺所駁甚是。已依議行矣。尋常可矜罪犯例得減等擬流。若此等竊賊擬絞匪徒多屬積猾。又經屢犯不悛。即賊數未滿尚應擬遣。乃因多禁一年。即

由外遣改易內地。是為賊犯開徼倖之徑。而圖固亦徒滋聚匪之虞。豈明慎庶獄本義。尹嘉銓所奏外若加嚴而實則有意從寬。未改沽名家習。尹嘉銓著傳旨申飭。以兩廣總督李侍堯襲封二等昭信伯爵。以大理寺少卿歐陽瑾為太僕寺卿。予福建出洋巡緝遭風淹斃外委呂梅兵丁柯國鳳等八名賞卹如例。戊辰。

上御乾清門聽政。諭各省甄別教職佐雜及

千總等員。六年俸滿各摺。前經諭令吏兵二部於年終覈較彙奏一次。但各省地方大小不等。額設員弁多寡不同。其在地狹員少之省。每年酌量甄別一二員。即不得謂之姑息。若大省員數衆多。而其甄別斥退者。不過畧舉數人塞責。即較之小省為數稍多。而統計該省員額所去尚不及百之二三。且並有全行留任者。勢必致衰頹庸劣之員。姑容戀棧。而年壯應用者反阻陞進之路。豈覈實澄敘

之道嗣後吏兵二部於彙奏時各按省分大小屬員多少覈其去留之數列單呈覽。並統覈三年內該督撫有無全未甄別及甄別過少之處。一併奏聞。則各督撫之是否實力察覈抑或寬徇沽名底裏皆可立見。著為令。又諭據鄂寧奏臺灣道張珽於辦理逆匪黃教一案平日既不能率屬稽查奸宄及賊匪蔓延又復安坐郡城並不親往督捕且一味存心諱飾捏混欺朦請旨革職等語。張珽著

革職仍留臺灣令其自備資斧協拏逆匪俟事竣之日另行降旨所有臺灣道員缺緊要必須熟諳強幹之員方足以資整飭孫孝愉著以按察使銜管理臺灣道事務其四川按察使員缺著劉益補授諭軍機大臣等各省奏到甄別敎職佐雜千總等摺敘次多未清晰惟阿思哈所奏各摺條款較為明妥嗣後該督撫俱應仿照豫省辦理所有阿思哈原奏摺底著鈔寫式樣於各省奏事之便寄

令知之○已已諭曰良卿奏據高積詳請添建按察使監房收禁官犯一摺所見甚屬舛謬前經降旨令各省情實官犯在臬司監內收禁實法制所當然况該犯等身為職官干犯國法其情視平人為重則在監羈禁何得轉較常犯為優若因提解司獄動項添建監房使此等劣員雖繫囹圄猶得優游安處又豈所以肅憲典而示創懲伊等不過欲藉隔別稽查之名陰示曲庇市恩之實似此官官

相護最為明季惡習此風斷不可長高積輒敢以此詳請良卿亦即據以具奏明係巧為嘗試良卿高積俱著交部嚴察議奏諭軍機大臣等良卿奏擬按察使高積詳稱秋審情實官犯提解司監請添建監房六間於司庫餘租銀內動支一摺所奏甚屬舛謬已降旨將良卿高積交部嚴察議奏矣官員身犯國法其情且較平人為重何得於犴狴之中復令安頓得所使劣員罔知懲創名為隔別

稽查起見其實有意曲庇市恩不惜臨前明官官相護惡習曾不思身為大員乃敢假公濟私巧為嘗試若此雖動項無多而此風斷不可長良卿高積如自度必應添建監房即多構數楹亦聽其各出已貲自為營度可耳將此傳諭知之○又諭據崔應階奏查審浙省濫製烏鎗一案永德家人王六何姓亦有扣剋銀兩情弊等語昨永德到京陛見時曾詢及製造烏鎗一事伊彼時若即將家人王

六。何姓需索之處陳明。請併案審究。其應得處分。不過失察家人而止。何竟隱飾不言。僅委之經手同知。及書辦等串通作弊。今既據崔應階查出王六等扣剋索贓。現有張鐸供詞。可據自應一併解京。嚴行質訊。著傳諭永德。即派妥幹員役。速將伊家人王六。何姓。押解來京。若永德尚欲稍為迴護。任伊授意串供。指使狡卸。斷無不水落石出。則罪上加罪。惟其自取。至沿途尚有疎虞。并自戕之事。則

是欲以身徇其家人。無難立將伊革職。鞫問也。所有摺內附叅司道等員。俟審明日再降諭旨。並諭令崔應階知之。又諭。本日阿里衮由六百里加緊馳奏。達禮善海蘭察等於南坎登拐地方。各勦殺賊二三百名。將糧米器械盡行燒燬一摺。朕詳加披閱。南坎登拐地方距邊境不及百里。達禮善等並未深入賊巢。輒將附近擺夷濫殺塞責。此等擺夷與緬匪何涉。從前珠魯訥妄殺擺夷四十餘名。

因而走險附賊。即前車之鑒。達禮善等理應加之撫慰。取其牲隻糧石。以資進兵之用。乃概行殺戮。並將現有糧石無故燒燬。實屬不曉事體。達禮善等著嚴行申飭。阿里衮等於伊等回時。並不嚴斥其非。反以為功。加緊奏捷。亦屬非是。著傳諭阿里衮等。仍派達禮善海蘭察前往奮勦。阿里衮亦即多帶勁兵。隨後策應。如獲有糧石。即為往來口糧。勿得燒燬。仍將如何辦理之處。速行奏聞。吏部等

部議覆前任廣西巡撫錢度奏稱。平樂府屬賀縣地方遼闊。有大會大寧兩墟。五方雜處。俱離縣窻遠。須專員彈壓。該府原設經歷司獄二員。府屬解犯既少。司獄事務可歸經歷兼理。請裁司獄缺。改為賀縣會寧巡檢。移駐該地管理附近墟寨編甲賭博等事。嗣後缺出歸部銓選。司獄原設禁卒十二名。留四名撥供經歷管司獄之役。餘作為巡檢弓兵。所遺司獄舊署作經歷署。其巡檢署於會寧兩

墟建造均應如所請從之。烏梁海散秩大臣圖布慎故以其子伊蘇特襲職。

大清高宗法天隆運至誠先覺體元立極敷文奮武孝慈神聖純皇帝實錄卷之八百二十四

大清高宗法天隆運至誠先覺體元立極敷文奮武孝慈神聖純皇帝實錄卷之八百二十五

蘇聯總督經議官太子太傅文淵閣大學士文淵閣領閣事務內大臣稽察欽奉 上諭軍機處管理吏部理藩院事務正黃旗滿洲都統世襲騎都尉軍功七級隨帶加一級尋常加二級軍功紀錄一次 臣慶桂總領官經議官太子太傅大學士文淵閣領閣事務稽察欽奉 上諭軍機處管理刑部戶部三庫事務世襲騎都尉軍功加十九級隨帶加二級又加二級 臣董誥內大臣戶部尚書鑲藍旗滿洲都統軍功紀錄五次尋常紀錄十四次 臣德瑛經議官太子少保工部尚書紀錄六次 臣曹振鏞等奉

欽修

乾隆三十三年戊子十二月庚午諭軍機大

臣等昨因臺灣道員缺緊要必須明幹之員方克勝任已降旨令孫孝愉以按察使銜管理臺灣道事今該督以蔣允焄熟悉該處情形奏請調補朕觀孫孝愉尚屬明白勇往於現在整飭諸務似屬相宜著該督再行酌量如臺灣地方必須蔣允焄辦理即據實奏聞將蔣允焄調補臺灣道孫孝愉即以陞銜管理汀漳道事亦無不可將此傳諭知之○又諭昨以阿里衮奏報達禮善等勦殺擺夷之

處辦理錯謬已降旨訓飭矣。朕思此等擺夷並未抗拒王師原屬無辜達禮善等不分輕重概加誅戮從此堅其附賊之心可謂糊塗已極達禮善著革去頭等侍衛降為三等侍衛馳驛來京有面問事件其員缺另候簡派并著傳諭阿里衮等速赴腊戌等處相機進剿勿少退阻設遇擺夷人等務宜溫言撫慰並明白曉示令其協助大兵事竣尚當施恩不得仍行混殺報功自干咎戾近日進兵已抵何處速行奏聞○吏部議覆禮部侍郎兼太常寺卿諾穆渾奏稱看守

壇廟四五品等官員缺例由禮部及該旗擬定正陪移咨吏部五品以上引見補放六品以下吏部堂官驗看補放第此等人員凡遇祭祀看管各門巡查諸處甚關重大若陞五六品官後必俟本處頭目缺出方得擢用並無別途陞轉應如所請嗣後四五品等官缺出作

為公缺聽其自行揀選咨部引見補用六品官員缺仍照例辦理從之○以故續順公沈定文弟廣文三等忠勤伯黃嘉子文燦三等男德保子永泰各襲爵 辛未

上詣

皇太后宮問安○諭曰哈薩克阿布勒比斯遣子卓勒齊來京請朕安卓勒齊年齒尚幼速來瞻覲殊堪軫念第恐地方官員不知輕重過示軍威致令驚懾甚非所宜著傳諭直隸

陝甘大員等所有經過處所務加意照料以示朕體卹外藩至意○理藩院奏據科爾沁保送頭等台吉一員二等台吉七員他布囊一員三等台吉七員他布囊二員四等台吉十員他布囊五十三員均應照例承襲得旨允行 以故一等侯英泰子安林一等男岐山子喀寧阿各襲爵○壬申軍機大臣等議覆乍浦副都統舒景安奏請於乍浦左右兩營八旗內酌裁甲缺一百名以半作為養育

兵每月各給銀一兩米五升應如所請從之
大學士公傅恒奏吏部文選司事務殷繁
該司郎中現俱出差辦事乏人請將內閣侍
讀毓奇刑部員外郎保成調補該司辦理得
旨毓奇著准其調補刑部事務亦關緊要保
成著不必調補嗣後刑部司員別部不得調
取戶部議准調任陝甘總督吳達善疏稱
皋蘭金縣會寧靖遠通渭固原安化鹽茶等
州縣廳所屬村莊本年疊被旱霜等災所有
極次貧民應先行賑卹其例不成災之渭源
隴西伏羌鎮原莊浪及靖遠縣鹽灘通渭縣
閭家門等處新舊錢糧並予緩徵得旨依議
速行癸酉諭據彰寶奏審擬江陰縣保正
沈添益等欲圖熟田緩徵聚眾鬧堂一摺已
批三法司覈擬速奏矣摺內有詢據該犯糾
約四鎮保正同眾挾制縣官其丁墅桃花利
城三鎮均已隨同赴縣獨前周一鎮並無一
人聽從入城等語鄉民散處村落良莠本屬

不齊犯法者必懲安分者當獎刑賞一秉大
公各隨其所自取此案不法奸民已按律
定擬其並未隨行附和之前周鎮保正民人
等奉法不敢為非甚屬可嘉著彰寶即行確
查將保正酌量加賞該鎮民人所有本年應
完漕米加恩特予緩徵仍將此出示曉諭使
知滋事匪徒不能倖逃憲典此外能知大義
皆吾善良赤子原不惜格外施恩優加體卹
使眾人共知激勸並將此通諭知之又諭
據鄂寧奏同安縣知縣吳鏞將監犯呂遇
重責斃命請旨革職一摺所辦非是呂遇係
犯竊被拏糾眾搶犯案內擬絞情實之犯乃
不服拘禁蹬開木籠經禁卒喝阻轉行肆橫
不法已甚該縣將該犯當堂重責示懲自屬
理所當然該撫乃以如此兇犯邂逅杖責致
斃輒將該縣劾奏褫職為地方官者不亦難
乎吳鏞無可加罪著仍令視事不必革職將
此諭部知之諭軍機大臣等前降旨命於

索倫達呼爾兵內揀派二千名以備征緬調遣旋以本年暫不進兵令回營候旨現屆整旅出征著傳諭傅玉將前次二千名派噶布舒阿提木保達什扎布里古子帶領分起來京其如何料理起程之處著軍機大臣等議奏又諭曰阿里衮辦理達禮善等勦殺獵夷一事種種錯謬伊從前凡遇行陣頗知奮勉詎到該處惟知擁兵駐劄以戍守塞責阿桂在京時籌畫亦甚周妥行至中途即欲釋回緬匪謀者冀圖將就了事伊等如此辦理必至貽誤機宜殊堪痛恨朕今添派索倫等兵二千名前往著傳諭阿里衮阿桂務遵節次諭旨率領進勦務使賊匪畏懼乞降尚可將功抵罪倘仍退縮株守稽延時日朕彼時另行遣員勦辦伊等能不顏厚耶此事究應作何完竣著各據所見明白回奏吏部議覆陸任山東按察使尹嘉銓奏稱軍流三五成羣結伴同逃地方官不能嚴防若併案議

處無以懲玩忽應如所奏嗣後除尋常軍流人犯同日脫逃一二名者仍併案查議外若脫逃在三名以上者專管官初叅罰俸一年兼轄官罰俸六個月限一年緝拏不獲該管官降一級留任緝獲開復脫逃在六名以上者初叅該管官罰俸一年兼轄官罰俸六個月二叅該管官降一級留任兼轄官罰俸一年三叅該管官降一級調用逃犯交接任官照案緝拏兼轄官降一級留任緝獲開復如專兼各官於疎縱後限內拏獲一二名及半者仍按未獲名數議處從之賑貸湖北孝感安陸雲夢應城應山等五縣武昌武左二衛德安一所本年旱災飢民並緩徵額賦旌表守正被戕之江西大庾縣民劉隆積妻黃氏守正捐軀之河南舞陽縣民李德立妻陳氏甲戌諭軍機大臣等昨據阿里衮解到騰越州民張文連供稱本年二月間緬匪搶掠戶腊撒等處民七八百口及牛隻什物

等語此必額勒登額所統之兵撤回內地以致賊匪敢入戶腊撒等處肆行搶掠成何事體因憶鄂寧曾奏孫爾桂在鐵壁關有賊匪侵境之事阿里衮到彼業經半載有餘從未奏及甚屬非是著傳諭阿里衮阿桂即速查明具奏阿桂查辦此事並不得瞻顧阿里衮依違粉飾自取重譴也并著諭令知之吏部議覆陝西布政使勒爾謹奏稱各省卓異人員遇有本省陞調缺出先儘陞用以收實效等語查在外各缺人地各有相宜若俟卓異人員用完方准選用別員間有實心辦事之人或因年限未符及叅罰多案轉礙陞轉之途應請嗣後缺出各該督撫將卓異人員奏請陞調其未入保薦之員果人地實在相需仍照例辦理從之戶部議准盛京工部侍郎兼奉天府府尹雅德疏稱承德遼陽海城廣寧等四州縣本年被水請先撫卹一月口糧仍分別加賑其新舊錢糧及餘地額租

等項均按年緩徵得旨依議速行禮部議覆御史何曰佩奏稱順天鄉試中式舉人皆分號定額獨副榜一項未經畫一辦理應如所請嗣後按滿合貝字號每舉人五名准中副榜一名如有奇零照不足五名例毋庸合算取中從之工部議准江南河道總督李宏疏稱徐揚二廳屬額設渡馬船一百四十二隻河工並無需用徒糜修費應裁從之改建山東東平禹城二州縣磚城從前任巡撫富尼漢請也旌表守正捐軀之四川洪雅縣民李榮耀妻盧氏乙亥

上詣
皇太后宮問安辛瀛臺回部和闐阿奇木伯克阿瓜斯伯克等於西苑門外瞻覲吏部議覆御史唐淮奏稱督撫藩臬衙門遇有題奏案件應廣延幕友叅酌辦理不得假手書吏擬稿擬批致令串通舞弊等語應請通飭直省督撫等加意整飭如失察徇庇照例

議處從之 兵部等部議准熱河副都統呼什圖奏稱熱河近年生齒漸繁請將礮手匠役一百名均改為養育兵原食錢糧即作養育兵之用從之 以刑部尚書官保充經筵講官 蠲免兩淮屬富安豐梁垛東臺何垛丁溪草堰小海劉莊伍佑新興廟灣等十二場乾隆三十二年應徵折價等銀四萬二千兩有奇其角斜板浦中正臨興等四場未完折價借給口糧均予緩徵 旌表守正被

戕之江西萍鄉縣民楊達進妻李氏 丙子諭曰劉墉前在太原府知府任內以屬員彌補虧空一案降旨發往軍臺効力後經加恩令其回京在修書處行走今伊父大學士劉統勲年屆七旬止此一子且同案獲罪之文綬已經錄用劉墉事同一例著加恩以知府用 丁丑諭軍機大臣等吳必達奏臺灣賊匪情形一摺所辦不得頭緒吳必達一聞逆匪聚衆之事即帶領官兵渡海勦捕朕見其

頗屬勇往方為嘉予意其到臺必能剋期獲犯乃前此摺內所敘已不免稍涉張皇今日所奏情形更有畏難之意吳必達身為提督率兵赴臺自應董率總兵知府協力調度乃摺內有飛札王巍鄒應元就近確查等語甚不明晰不知吳必達現在何處而王巍等又在何處當此上緊勦賊之時何以徒使文移往來紛歧延誤且逆賊雖係倭南修北出沒無定自當相其要害之處并力先攻一處撲

滅再及其餘次第勦殺方合機宜若轉為賊牽制朝東暮西賊未就擒官兵已疲於奔命於事理深屬未協至閩粵莊民仇殺一節其起釁根由原可無庸根究但伊等敢於乘勢滋事實屬不法即當諭以現在搜捕逆賊爾等不知安分斂跡輒敢借端圖洩私忿即屬亂民嚴諭不從便當立擒為首數人正法示衆伊等自必聞風解散吳必達現擁重兵何所顧畏遽為若輩棘手耶其臺灣總兵王巍

種種貽誤前已降旨革職吳必達雖未奉到諭旨目擊其毫無措置自應一面摺奏一面即統其兵衆妥協籌辦正提督分內所應為何尚聽其因循貽誤耶昨已將葉相德調補臺灣總兵著崔應階鄂寧即催令速赴新任葉相德人尚能事可以資其伙助吳必達專司勦捕之事務須悉心合力上緊督辦將弁兵丁如有出力之人不妨隨時獎賞以示鼓勵其退縮誤事者亦即立予懲治有應行革職治罪之員即據實嚴參毋稍姑息如此則人知自勵自可剋期竣事遠隔重洋遇此要事豈可循例姑息耶將此詳諭吳必達并崔應階鄂寧知之 又諭曰鄂寧奏請將王巍徹回俟匪案完竣覈其功過之語所奏甚屬非是王巍辦理此事庸懦諱飾始終貽誤雖已降旨革職尚應按律治其餘罪之人何得僅以徹回了事且其功過猶必待事竣始行覈定耶鄂寧著傳旨申飭 戊寅諭軍機大

臣等據阿思哈奏請將豫省河工每年歲修節省銀兩儘數加築隄岸一摺所見殊於事理未協河工每年所定歲修之額不過約畧成數而言其實遇有大工年分所費何啻十餘萬若照常工程減少時即數萬亦可敷用至該省所稱約用十一二萬之數已屬膠柱鼓瑟今阿思哈既以每年約銷十一二萬兩為劃定數目又以一二萬兩請儘數加築隄工按其情形竟與估計包工無異即以埽工而論所動之十一二萬豈必盡皆緊要寧不可覈實撙節以辦土工且河兵在汛每當防守餘閒又何難令其隨時畚土保護若必以所餘之數盡為每歲加高培厚之用曾不思隄身綿亘甚長計每十里加築數寸費已不貲此一二萬金所培有幾又豈按年易竟之功縱使果有增高而此數寸浮土畧遇風大即吹卷無存亦何足以資鞏衛是欲盡動歲修銀兩徒滋河員弊混冒銷而於隄工仍屬

有名無實阿思哈本未諳習河務此奏蓋為何謂所愚於事殊無裨益著傳諭吳嗣爵將阿思哈所奏情節悉心籌覈是否應行酌辦之處逐一確查據實覆奏毋得稍有瞻顧尋奏查豫省黃河身寬十數里至二十餘里不等較江南河身窄狹有一灣即生一險者不同故埽壩工程亦較南河為少河面既寬溜勢去來無定埽工旋平旋險其無埽工處所大隄以外俱有河灘外高內窪平時水不上灘則兩隄高峙遇伏秋盛漲漫水上灘則浩瀚無際隄工處處受險撫臣阿思哈因有將節省儘數幫隄之議但工程之平險視水勢之大小若將土埽劃為成數恐各工員視為年例額支啟興工冒銷之弊所奏應毋庸議至河工隄以防溢埽以護隄二者並重豫省隄工向無另案加高款項嗣後遇有應修段落按盛漲時水誌隄工高寬者無庸辦理外其出水卑矮及單薄者分別增培仍照成例

即在搶修內節省可緩之埽工辦理緊要之土隄得旨二語得之矣祇可如此又諭前經降旨令鄂寧俟崔應階至廈門該撫即回省城辦理一切事務今崔應階所辦傳元禧一案自可剋日完結崔應階即應前赴廈門調度勦捕逆匪之事鄂寧俟崔應階到後即行回駐省城再前據鄂寧查奏閩海關短少稅銀一摺有明福任內那後補前各情節隨令明福來京詢係委員等並無稟明那辦情事已交鄂寧秉公查奏但此事本係鄂寧查出今復交伊查辦恐其中不無迴護著傳諭鄂寧即將該委員等及一切緊要案卷並親填各簿及案內應行詰訊要犯案據即行揀派委員解京質訊沿途飭令小心管押毋致稍有疎虞將此傳諭崔應階鄂寧知之已卯

孝莊文皇后忌辰遣官祭昭西陵

上詣

皇太后宮問安 庚辰諭軍機大臣等據阿里衮阿桂奏聞賊匪現在要鳩地方派海蘭察瑪格巴朗克車德納木扎勒豐昇額等帶領官弁三百餘員在前隊伊等親率侍衛官弁一百餘員接應派綠營兵五百名令哈國興長清等帶領出萬仞關遙為聲援均不攜帶行裝等語所辦尚屬妥協此次阿里衮等輕裝前進馬匹口糧雖不能充足倘能多有斬

獲儘可資進兵之用著傳諭阿里衮等轉飭海蘭察等至要鳩地方設所獲賊匪糧米甚多務量力進取即添兵續進亦無不可但大兵前進後或被賊匪從後抄襲亦不可不豫為之慮惟在伊等臨時籌度萬全可耳再據奏各處所有馬三千餘匹疲瘦居多酌選四百餘匹令官弁等乘騎等語此係經管官弁等不善飼餒所致來年進兵如何充用阿里衮等亦宜豫期查辦並將近日辦理一切情

形詳悉速奏 是日起

上以歲暮裕祭

太廟齋戒三日 辛巳諭軍機大臣等前降旨普洱一路軍務阿里衮等不能遙顧特派永瑞五福駐劄九龍江等處令其探訪賊匪消息勦撫兼施曾據奏分路駐防而於該處情形作何辦理之處尚未覆奏現在永昌一路已諭阿里衮等酌量進兵其九龍江一帶若有緬匪潛據或別部人有從賊者亦宜乘瘴

氣未作之時速往捉生攻掠以分其勢不可株守防邊致誤機會著傳諭永瑞等速將附近九龍江等處係何項部落曾否歸附緬匪之處遵旨詳訪相機妥辦仍速行具摺奏聞又諭昨以阿里衮阿桂奏派海蘭察等進兵要鳩諭令酌看情形添調進發第思此次進兵若止由此一路賊匪易於防禦應於腊戍老官屯等處分路掩襲使其伺備不及自相驚擾較為易為辦理普洱一路已諭永瑞等

隨宜協勦矣。著傳諭阿里衮等接奉前旨。若
 尚未派兵前進。務即分路遣往。儘力攻圍。以
 期於事有濟。如此。旨到已逾期。亦不必勉強
 從事。軍機大臣等議准。汪蘇巡撫彰寶。兩
 淮鹽政。尤拔世會。奏鹽務章程。一。雜項加餉
 項內。有員役公務等銀。火足辛工項內。有商
 繳鋪墊銀。均應酌除。計一萬七千四百餘兩。
 併入外支項。合六萬五千四百餘兩。統為備
 貢交辦等用。一向遇購辦物件。不由運使經
 手。致價值無從稽考。嗣後由鹽政行知。運使
 估計。給商領辦。無庸鹽政提銀與商交涉。一。
 選商辦貢。即陳設公署。鹽政運使驗看。合式
 即行起解。不得另派家人幫辦。一。水路起運
 貢物等項。均按道里及物價成規。造冊報銷。
 一。每歲常貢及交辦器件。統於現定外支項
 內動支。彙總冊送。造辦處查辦。一。現定外支
 銀六萬五千四百餘兩。計通歲所需。定有餘
 剩。應照外支不敷銀例。鹽政每屆綱竣。奏明

解造辦處充公從之。是日己丑年立春。順天
 府進土牛春山寶座。壬午以歲暮禋祭。遣官祭
 太廟中殿。
 後殿。諭現在豫省尚有承辦軍需事務。阿思
 哈著仍留河南巡撫之任。其陝西巡撫員缺
 即著文綬調補。癸未禘祭
 太廟
 上親詣行禮。遣官祭
 永陵
 福陵
 昭陵
 昭西陵
 孝陵
 孝東陵
 景陵
 泰陵。遣官祭
 孝賢皇后陵
 端慧皇太子園寢。遣官祭

太歲之神 諭各省學政應用夫馬等事宜
俟各督撫奏齊時交軍機大臣會同該部議
奏 諭軍機大臣等滇省辦理緬匪軍務尚
未告竣現在選派索倫兵二千前往雲南而
豫省所辦驛頭及湖北湖南貴州應解馬匹
皆須大員沿途照管彈壓非分派專司無以
重其責成所有官兵經過之直隸河南省著
派觀音保楊景素料理其湖北湖南貴州護
送兵丁著派閔鶚元王太岳張逢堯管理照
料驛馬著派德福三寶高積管理並傳諭該
員等務期悉心妥協經理倘有承辦不善稍
致貽誤惟專管大員是問至滇省藩臬兩司
各有承辦事件不能分身兼顧著阿桂明德
等於道員內揀派二員令其分司兵行驛馬
事宜仍一面具奏將此諭令該督撫知之尋
阿桂等奏遵派來滇辦差四川建昌道法明
迤西道博明分司其事得旨此內獨有阿桂
之名是何緣故 又諭據永德奏現在查提

濫製烏鎗案內人犯解京質訊內有張鐸管
帳之馬爾忠吳德九俱經自縊鐵匠姚萬山
亦於取供後病故等語此案事關侵欺重款
一切犯証理應嚴密監禁以便逐一根究務
令水落石出而管帳家人及經手匠役尤為
案內緊要關鍵且現在降旨解京候質何得
任其或縊或故竟無活口可問顯係張鐸自
知罪已敗露有潛為指使希圖滅口情弊永
德即應徹底嚴究使鬼域伎倆無從掩飾永
竟視要犯自戕為無足重輕之事率行據詳
具奏殊屬非是此時各犯雖已起解而獄卒
人等自當切實研鞠永德何以亦竟辦不及
此著傳諭該撫即行嚴加究訊務得確情迅
速據實覆奏再前據張鐸供出永德家人亦
有侵扣銀兩之處已諭令將該犯一併解京
著永德再行嚴飭解員沿途小心防範倘仍
稍有疎虞則是永德取戾更重 甲申

上諭

皇太后宮問安 御保和殿筵宴朝正外藩左
翼科爾沁和碩達爾漢親王多羅額駙色旺
諾爾布輔國公哈達固山額駙索諾木固山
額駙固穆三等台吉濟克濟扎布巴林多羅
郡王巴圖固山貝子薩木丕勒多爾濟輔國
公和碩額駙德勒克多羅額駙丹津喀喇沁
多羅都稜郡王喇特納錫第固山貝子多羅
額駙扎拉豐阿和碩額駙那木扎布固山額
駙敦珠布色布騰一等台吉格勒克薩木魯

布翁牛特多羅都稜郡王布達扎布鎮國公
恭格喇布坦二等台吉袞布車布登綽羅斯
多羅郡王羅布扎鄂爾多斯郡王品級多羅
貝勒棟囉布扎木素固山貝子納木扎勒多
爾濟扎薩克一等台吉旺扎勒車布登多爾
濟扎嚕特多羅貝勒錫勒塔喇鎮國公納遜
額爾克圖一等台吉朋蘇克喀爾喀多羅貝
勒阿裕爾敦漢固山貝子固山額駙垂濟扎
勒鎮國公固山額駙羅布藏錫喇布和碩額

駙朋蘇克喇錫密岳特多爾濟固山額駙沙
津阿爾畢特瑚二等台吉班珠爾喇布坦色
布騰多爾濟阿巴哈納爾固山貝子達克丹
朋素克郭爾羅斯輔國公恭格喇布坦右翼
科爾沁和碩親王固倫額駙色布騰巴勒珠
爾三等台吉色楞丹巴喀爾喀親王品級多
羅郡王車布登扎布多羅郡王桑寨多爾濟
多羅貝勒丹津固山貝子車木伯勒輔國公
德勒克多爾濟齊素隆公品級扎薩克一等

台吉成袞扎布扎薩克一等台吉三都布多
爾濟烏巴什車布登旺扎勒索諾木敦多布
一等台吉齊旺多爾濟敦漢多羅郡王巴特
瑪喇什浩齊特多羅額爾德尼郡王齊蘇龍
多爾濟鄂爾多斯多羅郡王車凌多爾濟回
子郡王品級多羅貝勒霍集斯輔國公圖爾
都和什克額色尹扎薩克一等台吉瑪木特
扎齊特多羅貝勒羅布藏錫喇布茂明安多
羅貝勒裕木充巴林固山貝子多爾濟喇布

坦二等台吉索諾木喀喇沁鎮國公丹津達爾扎烏喇特鎮國公索諾木喇布坦和碩特輔國公巴勒濟青海扎薩克一等台吉納罕達爾濟杜爾伯特扎薩克一等台吉布達什哩翁牛特二等台吉巴顏巴圖爾歸化城土默特四等台吉巴勒丹多爾濟及領侍衛內大臣等召科爾沁和碩達爾漢親王多羅額駙色旺諾爾布巴林多羅郡王巴圖輔國公和碩額駙德勒克喀喇沁多羅都統郡王喇

特納錫第固山貝子多羅額駙扎拉豐阿翁牛特多羅都統郡王布達扎布綽羅斯多羅郡王羅布扎鄂爾多斯郡王品級多羅貝勒棟囉布扎木素教漢固山貝子固山額駙垂濟扎勒鎮國公固山額駙羅布藏錫喇布科爾沁和碩親王固倫額駙色布騰巴勒珠爾喀爾喀親王品級多羅郡王車布登扎布敦漢多羅郡王巴特瑪喇什浩齊特多羅額爾德尼郡王齊蘇龍多爾濟鄂爾多斯多羅郡

王車凌多爾濟回子郡王品級多羅貝勒霍集斯輔國公圖爾都和什克喀喇沁鎮國公丹津達爾扎等至

御座前賜酒成禮 是月兩淮鹽政尤拔世奏淮北各場現有餘鹽商人無力收買請發帑儘收以濟貧竈報聞 山東布政使尹嘉銓奏謝陞任恩得旨不料汝近有沽譽之舉大奇朕前豈可用巧夫所謂正人善人者不用巧之謂也 是年追予出師征緬陣亡之副

實錄卷八二五

五


前鋒校神保住等七員藍翎長葉楞額等三員前鋒廣寧等烏鎗頭目對齊等護軍策楞必哈等九十名祭葬卹賞如例俱入祀昭忠祠 旌表孝子湖北等省向宏材等二名孝女江西曹氏一口守節合例八旗滿洲巴克唐阿妻子氏等七十九口蒙古德住妻劉氏等二十八口漢軍蘇殿祐妻宋氏等十七口內務府段三泰妻趙氏等四口盛京等處駐防姜品妻張氏等六十一口直隸等省黃士

凱妻王氏等三百二十七口夫亡殉節江蘇
等省陳鉞妻王氏等十四口未婚守志浙江
等省盧枝長聘妻徐氏等十二口百歲壽民
婦江西等省黎先極等二十三名口各給銀
建坊如例一產三男直隸等省于邦朝等
七家會計天下民穀數各省通共大小男
婦二萬一千八十三萬七千五百二名口各
省通共存倉米穀三千九百九十六萬九千
七百四十一石六斗三升六合四勺

實錄卷一百一十五

五

大清高宗法天隆運至誠先覺體元立極敷文
奮武孝慈神聖純皇帝實錄卷之八百二十五

The background of the entire page is a light brown or tan color. It is decorated with several large, faint green cloud patterns. These clouds are stylized, with multiple lobes and swirling lines, typical of traditional Chinese decorative motifs. They are scattered across the page, with some in the upper corners, some in the middle, and some near the bottom.

統一書號: 11018·1355—18

定 價: 57.00 元